


Eta Táurinaquene máechajiruvahi ema Viya eta
viyehe, ticajare puito Eta Nuevo Testamento



New Testament in Ignaciano (B:Lign:Ignaciano)

**Eta Táurinaquene máechajiruvahi ema Viya eta viyehe,
ticajare puito Eta Nuevo Testamento
New Testament in Ignaciano (BL:ign:Ignaciano)**

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ignaciano

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
332465cd-916c-5bfc-8721-b0114be92360

Contents

San Mateo	1
San Marcos	56
San Lucas	92
San Juan	151
Hechos	192
Romanos	243
1 Corintios	264
2 Corintios	286
Gálatas	299
Efesios	307
Filipenses	315
Colosenses	320
1 Tesalonicenses	325
2 Tesalonicenses	329
1 Timoteo	332
2 Timoteo	339
Tito	344
Filemón	347
Hebreos	349
Santiago	365
1 Pedro	371
2 Pedro	377
1 Juan	381
2 Juan	386
3 Juan	387
Judas	388
Apocalipsis	390

Ena Apóstole Mateo májuequenehahi eta máichararacavahi ena Jesucristo, ticajare puiti eta EANGELIO SEGÚN SAN MATEO

*Ena achaneana máchucáequeneanaini ena Jesús eta acane
(Lc 3.23-38)*

¹ Nuvaraha numetacaheya mayehe ena Jesucristo. Éma, vijaneanahi israelítahi, taicha eta mámariéquenerahi ena viáchucaini Abraham. Énerichuvare, ena Jesús rey-yarehi taicha eta mámariéquenerahi ena víyarahaini rey David. Eta juca eta nalista ena máchucáequeneanaini ena Jesús.

² Ena víyarahaini Abraham, macachichapa ena Isaac. Ena Isaac macachichapa ena Jacob. Ena Jacob macachichapa ena Judá énapa ena apamuriana maparapenaveana. ³ Ena Judá macachichapa ena Fares émapa ena Zara. (Esu naena ticajaru Tamar.) Ena Fares macachichapa ena Esrom. Ena Esrom macachichapa ena Aram. ⁴ Ena Aram macachichapa ena Aminadab. Ena Aminadab macachichapa ena Naasón. Ena Naasón macachichapa ena Salmón. ⁵ Ena Salmón macachichapa ena Booz. (Esu maena ticajaru Rahab.) Ena Booz macachichapa ena Obed. (Esu maena ticajaru Rut.) Ena Obed macachichapa ena Isaí. ⁶ Ena Isaí macachichapa ena rey David. Ena rey David macachichapa ena Salomón. (Esu máenaini ticajaru Betseba, esu mayenainihi ena Urías.) ⁷ Ena Salomón macachichapa ena Roboam. Ena Roboam macachichapa ena Abías. Ena Abías macachichapa ena Asa. ⁸ Ena Asa macachichapa ena Josafat. Ena Josafat macachichapa ena Joram. Ena Joram macachichapa ena Uzías. ⁹ Ena Uzías macachichapa ena Jotam. Ena Jotam macachichapa ena Acáz. Ena Acáz macachichapa ena Ezequías. ¹⁰ Ena Ezequías macachichapa ena Manasés. Ena Manasés macachichapa ena Amón. Ena Amón macachichapa ena Josías. ¹¹ Ena Josías macachichapa ena Jeconías énapa ena maparapenaveana, ena nacarataruanahi námaqueneanahi ena apavasana ticavasana te Babilonia.

¹² Te táequenepa eta juca, ena Jeconías macachichapa ena Salatiel. Ena Salatiel macachichapa ena Zorobabel. ¹³ Ena Zorobabel macachichapa ena Abiud. Ena Abiud macachichapa ena Eliaquim. Ena Eliaquim macachichapa ena Azor. ¹⁴ Ena Azor macachichapa ena Sadoc. Ena Sadoc macachichapa ena Aquim. Ena Aquim macachichapa ena Eliud. ¹⁵ Ena Eliud macachichapa ena Eleazar. Ena Eleazar macachichapa ena Matán. Ena Matán macachichapa ena Jacob. ¹⁶ Ena Jacob macachichapa ena José, ena suímahi esu María, máenahi ena Jesús, ena ticajare Cristo, ena vicuchapaquenehi.

¹⁷ Tacahe, catorcemuriana ena mámariéqueneanainihi ena Abraham. Ena rey David, émapa náichecuinehi eta natupa. Tacahe, ena rey David, catorcemurianavare ena mámariéqueneanainihi. Ena nacarataruanahi námaqueneanahi ena apavasana te Babilonia, énapa náichecuinehi eta natupa. Ena Jeconías, catorcemuriana ena mámariéqueneanainihi. Ena Jesucristo, émapa náichecuinehi eta natupa.

*Ena máuchusira ena Jesús
(Lc 2.1-7)*

¹⁸ Ani tacahehi eta máuchusirahi ena Jesucristo. Esu maena María, tráturipahi eta suítauchirayarehi ena José. Vuíchahasera nacachanecachahini. Ticajaripahisera ésu, mávajúechirahi ena Espíritu Santo. ¹⁹ Ena José, tétavicavahi eta máuriva. Eta tacahe, vahi tisemaimahi. Váhivare mavarahahini máimcatsiriachahini esu María. Mavarahahisera macaepaha eta matratune suyehe ésu. Váhiserá mávarahahini náechahini ena achaneana eta tacayemaquenehi. ²⁰ Ena Viya máimararacahi eta mapanereruhi. Eta tacahe, tiúcupaicapa ena ángele mametapanahi te mavapure ena José. Ánipa máicha*:

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajaripahi ésu, mávajúechirahi ena Espíritu Santo. ²¹ Tacahe, te máuchucapa ena suchichayare, enacayare eta máijareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ena ángele.

* **1:20** Ena ángele, eta máechajisirahi ena José, manacahi eta nayeherepi náechajisira ena israelítana. Ani macahehi: "Piti José, machicha ena David".

²² (Títauchavapahi tamutu eta juca máechajiriruvanahi ema Viya mayehe ema víyarahaini profeta Isaías. ²³ Ani tacahehi: “Sutiarihiyare esu amaperu esena témunahiricavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipanayare” tacahepa.)

²⁴ Tacahe, te tējamiuchavapa ema José eta macavapureirahi, ichaperinehi eta masupirahi eta máechajiriruvanahi ema ángele mavaneruhi ema Viya, eta máitachirayarehi esu María. ²⁵ Váhisera nánecacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi JESÚS.

2

Náejirapana ema amuya ena reye mágoana

¹ Eta máuchusinehi ema Jesús te avasare ticaijare Belén tayehe eta departamento Judea. Te jena año, ema Aluresi ema tayehehi rey eta Judea. Tásiha, títécapanapa te Jerusalén ena reye mágoana tiásihanahi te tayerehiquene avasare tinapaica te táuchusine eta sache. ² Nacayaseserupaipahi, ánipa nacahe:

—Víti, tímitecáhavi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vémetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávihahi ema amuya? —nacahepa.

³ Te masamairicapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi. ⁴ Tacahe, ema Aluresi máimichuhavacapa namutu ena tuparairucana énapa ena títuruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticaijareyare Cristo? —macahepa.

⁵ Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víyarahaini profetaíni Isaías. Máechajicahi éma eta avasare tímícutjiricavahi eta achané-nahini. Ánipa macahe: ⁶ “Píti avasare Belén, tachichavihi eta Judea, picunachacarepánayare píti. Taicha eta máuchusihayarehi piyehe ema ichapequeneyarehi eta maháquenucávayare. Éma, téchapajirimurihayare namutu ena vijaneanana israelítana”.

⁷ Tacahe, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui. ⁸ Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanuyare, apaesa nuyana nútí apanavare néjirapanayare —máichavacapa.

⁹ Tacahe, ena mágoana, eta nasamirahi, tiyananavarepa. Tásiha, náimahavarepa eta jarairiqui náehirupahi. Tiyanapa te namirahu. Étapa te Belén eta tatupihaiyahi, te táinahu eta mávihahi ema amuya. ¹⁰ Tétavicava eta náurisamurevahi ena mágoana eta náimairahi eta tatupihairaripa. ¹¹ Títécapanavanepa eta te peti mávihahi ema amuya. Náimahapa éma, ésupa esu maena María. Tásiha, tépuyucanapa natsiucapa ema amuya. Navecuhapa eta námavahuanapahi. Nájaracasichapa eta oro, eta incienso étapa eta táijiyequene perfume. ¹² Te táequenepa eta náejirairahi ema amuya, tichavanayarepa te návasa. Apanapasera eta achene eta nayanihapahi, taicha ticametacasianapa te navapure vaipa nacuetavajica te mávihahi ema Aluresi.

Éma José ésupa esu María náimijunapa ema amuya te Egipto

¹³ Tacahe, te táequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Pécheputa, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi títécayare matanucayare ema amuya, mavarairahi macapacayare —máichapa ema ángele.

¹⁴ Tacahesera ema José técheputa. Tétupirícavanavanepa te jena yati. Tiyananapa námapa ema amuya tayehe eta Egipto. ¹⁵ Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: “Te Egipto nímijunaiyahi ema nuchicha. Te táequenepa, níchuhayarepa éma”.

Éma Aluresi máimicapapajicapa ena amuyanaini te avasare Belén

¹⁶ Tacahe, ema Aluresi te masamairicapa eta nánucuiraripa ena mágoana, tiseमारिनेhi eta navayuasirahi. Máimivanerecapa nacapapajicapana namutu ena amuyana ajairana tiávihanahi te Belén énapa ena tiávihanahi te tachacayarahana, ena ticayeheararipa apina

año énapa ena náuchusirávana. Máepanaequenehapa eta táuchusihahi eta jarairiqui náimahaquenehi ena mágoana. ¹⁷ Tacahe, te Belén eta táitachiravahi eta májuchaquenehi ena víyarahaini profetaíni Jeremías. Ani tacahehi: ¹⁸ “Tétavicavahi eta najapanuiravahi ena esenana. Ichape eta náiyairahi taicha ena suntaruana nacapapajisirahi ena nachichanaveana. Nájina naratahahini nacamatinaahini taicha eta najapanuiravahi ichape” tacahepa.

¹⁹ Tacahe, te jácáni año te táequenepa eta máepenirahi ena Aluresi, tíápechavavarepa ena ángele máechajicahi ena José te mavapure ánaqui te Egipto. Ánipa maicha:

²⁰ —Pécheputa, José. Piveha ena amuya ésupa esu maena. Piyana pichava te piávava Israel taicha vaipa táéñamavacare. Tépenaipahi ena tipanereuchainihi ticapacayarehini ena amuya —máichapa ena ángele.

²¹ Jéhesare, ena José técheputa. Tétupiricavapa, ésupa esu maena ena amuya. Tiyananapa tichavanahi tayehe eta návava. ²² Tacahe, eta napaisirapahi eta nachavirapa tayehe eta návava, masamairicapa ena José eta maviravaipahi aguenuca ena Arquelao, machicha ena Aluresini. Tipicapa ena José machavahini tayehe eta Belén. Tásiha, ena ángele mápechavarepa máechajicahi te mavapure eta matupiruiravarepa te Nazaret te tinapaica Galilea. ²³ Te títécapanapa, ánaqui étapa náejasihahi. Tacahehi eta táitachiravahi eta táechajiriruvanahi eta Sagrada Escritura nájureanahi ena profetanaini eta macajjareravarehi Nazareno ena Jesús.

3

Ena Juan Tícachasiricarahi tépanavapa ticametarairu eta máechajiriruva ena Viya nayehe ena vámahicuruhana

(Mr 1.1-8; Lc 3.1-9, 15-17; Jn 1.19-28)

¹ Tacahe, te jácáni treinta áño, matiaríhivare ena achane ticajare Juan. Éma, máichuhaquenehi ena Viya eta macametarairuirayare, máetupiricavacayare ena achaneana. Tacahe, masupahi eta matuparahahi. Tiyanapa vámahicuruhana. Váipa avasarecuruhainahini. Ticametarairupaipa nayehe ena macutiqueneanahi vámahicuruhana, ticavasana hi te tachaui eta Jordán te tinapaicahi eta Judea. ² Ánipa macahehi eta máimituresirahi:

—Ítsivacha eta epanereruana. Éneuchava mayehe ena Viya, taicha márapiainapa ena aguenucayare mavaneruhi ena Viya —máichavacapa.

³ Ánaquiapariipahi eta áñoana acane, ena Viya mametacapa ena víyarahaini profeta Isaías eta mapaneruhi, ena mavanesirayare ena Machicha te juca apaquehe, ticatuirahiyarehi eta tímecayarehi. Énerichuvare matiaríhivare ena apana achane máichuhaquene-yarehi ena Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ena Machicha ena Viya. Émaripa ena Juan, ena máechajisihahuenehi ena Viya, máetupiricavacayare ena achaneana. ⁴ Ena Juan, vanairucahi me Viya, profeta hi éma. Eta mamuirihahi eta náitsameru tajiyaha eta náitítiquene ticajare camello. Eta máitijuhe, vácapi jayumepl. Eta maniriji manicasare eta tsacara. Eta matítivera eta mápama. ⁵ Tiyananavare nacapayaca ena achaneana ticavasana te Jerusalén, navairairahi nasamararaca eta máechajisihahuene; énapa ena ticavasana te Judea, énapa ena tiávihanahi tayehe eta cajacure Jordán. ⁶ Tacahe, eta nametauresiravaipa, navairahivare náinajica eta napecaturana, ena Juan máichachavacapaipa te cajacure Jordán.

⁷ Énaripa ena fariséoana énapa ena saducéoana nayanauchahivare ena Juan. Vahi náneuchavahini, navarahahisera ticaicachasiana. Tacahe, ena Juan máichavacapa:

—¿Tájaha tacayema eta epauchiranuhi, eti tachichanaveanatajaji eta quichare? Esamairicahipuca eta járapajirayarepa eta táíñehiqueneyare ecuñaraqui. Evarahahipuca iúchucuhayare. ⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana. ⁹ Váhivare ecucajamurava eta mámariequenehárahahi ena víachucaini Abraham. Taicha tayanapane mámariehepuca éma, váhisera iúchucuhaimahi te vahi ecuitsivacha eta epanereruana. Ena Viya, tájina máemaitucaimahi éma. Te mávarahapuca, vahi máéjearachaimahi máepiyaca achaneanaina eta juca mari, mavairainahi yátupina ena mámariequeneanaina ena Abraham. ¹⁰ Ecaueuchava, taicha tiánehipa eta táitecapauchirahivare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijiricavaipa te máechucayarepa ena achane eta yucuqui máhireana. Ticaechuyarehi tamutu eta tapareana. Tíjuyarehi. ¹¹ Yátupi nútí nícachasicahehi te une, te éneuchava mayehe ena Viya. Ávanepaipahisera mácani ena yátupiquene Cristo. Te yátupina ecasiñava mayehe, tíchachasicaheyareva; tíjaracaheyareva ena Espíritu Santo. Téhesera vahi ecucasiñavapuca

mayehe, tícuñacaheyare tayehe eta táijurequene yucu. Éma, ichapequenehi nuyehé núti. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami. ¹² Puiti éma márājapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tiácatayajirica eta arusu. Máunacainapa. Tásiha, máquijicapa eta tapiraquíji. Máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta namuruira — máichavacapa ema Juan.

Eta macaicachasirahi ema Jesús

(Mr 1.9-11; Lc 3.21-22)

¹³ Tacahe, títecapavarepa ema Jesús te cajacure Jordán te máviahahi ema Juan. Éma, másihaphahi te tinapaica eta Galilea. Mavarahahi ticaicachasiyare mayehe ema Juan. ¹⁴ Émasera ema Juan, vahi mávarahahini máicachasicahini. Ánipa macahe:

—Tata Jesús, núтира táuricahi nútivaina pícachasicanu. Nusapihapa núti picaijuhenuhi eta nícachasicaviya — máichapa.

¹⁵ Émasera ema Jesús majicapapa:

—Tájinachucha táichava. Ticamunucarehi nítauchayare eta mavarahaquenehi ema Nucaiyaquene — máichapa.

Tásiha, ema Juan tísapavapa. ¹⁶ Te tamutupa eta macaicachasirahi ema Jesús, tíúcupaicapa tayehe eta une. Tásiha, tíjahúchavapa téjiaca eta anuma. Máimahapa ema Espíritu Santo tíúcupaicapaipahi, mavasimahipaipa eta paloma. Tavenesicapa ema Jesús. ¹⁷ Tacahe, tíáramicarepa eta mahu ema Viya tásihaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétavicavahi eta núrísamurevahahi máicha — macahepa.

4

Ema Váinaraji Satanás mavaraha macaitsamaraji ema Jesús

(Mr 1.12-13; Lc 4.1-13)

¹ Tacahe, ema Espíritu Santo enurujipa máimitucaipahi ema Jesús eta mayaniraya te mávapahi apaquehe. Ánaqui macuchapayarehi eta máitsamarajiyare ema Váinaraji. ² Tájiina manicahini ema Jesús te jena cuarentaquenehi sache, cuarentavare yati eta mayerevahi. Ichapepa eta máecuavahi. ³ Tásiha, ema Váinaraji témeñahavapa mayehe. Mavarahapa macaetemayarehi. Ánipa máicha:

—¿Pécuahapa píti? Tacahe, pívaneca eta juca mari táepiyacava pan, taicha píti machichavihi ema Viya, ¿masi? — máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tacarichuimahi eta tinicacare ticaitarecayare ena achaneana. Tacachanyarehi eta máechajiriruvana ema Viya. Jéhevare, éta ticaitarecarahiyare” macahepa.

⁵ Tásiha, ema Váinaraji má mavarepa tayehe eta tacapicahuquene avasare Jerusalén. Máimiapanapa te táinahu eta Templo. ⁶ Tásiha, máichapa:

—Te yátupina machichavina ema Viya, písapavayare pémirica te apaquehe. Tájiina píchavaimahi eta pémirisirayare. Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricaviana. Tíamavianayare te navahuana, apaesa vahi picucayutetu eta máriana eta te pípaisirayare” tacahepa. Tásiha, németeaca tíjaneacavianayare puiti, vahi náisapaimahi picajara te pémirica — máichapa ema Váinaraji.

⁷ Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya, taicha Piáquenuhi éma” — máichapa.

⁸ Tacahe, ema Váinaraji má mavarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. Máimechavarepa eta ichapequeneana náimahueneana ena achaneana. ⁹ Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumaserá te numirahu. Pitsiucanu apaesa níjaracavisarepa tamutu — máichapa ema Váinaraji.

¹⁰ Émasera ema Jesús majicapapa:

—Pévuishatataji piti Satanás te juca numirahu. Váhipuca pecha eta táechajiriruvahi eta Sagra da Escritura. Ani tacahehi: “Macarichu ema Viya vépuyumirauchayare. Macarichuvare vicaemataneacayare” tacahepa. Váhiquene táurica nucaemataneacavihini — máichapa ema Jesús.

¹¹ Tacahe, ema Váinaraji térajicavapa. Majunijicapa ema Jesús. Tásiha, tiúcupaicanapa ena ángeleana, náechapajiricapa ema Jesús.

*Éma Jesús tépanavapa ticametarairu
(Mr 1.14-15; Lc 4.14-15)*

¹² Tacahe, te jena sácheana, nacaratapaca ema Juan. Námapa te jácani tayerehiquene. Tacahe, ema Jesús, eta masamairirisirapa eta macaeratairahi te cárcel ema macheji Juan, tiyanapa tichava te mávasa Nazaret te Galilea. ¹³⁻¹⁷ Váipasera mánasihini te majurusinehi. Tiyanapa tayehe eta avasare Caperaum. Étapa máejasihahi. Éta juca avasare távihahi te tachausi eta cáquiure Galilea. Éta macametarairuirahi, tamutuhi mapaica eta tinapaica eta provincia Galilea*.

—Éneuchava mayehe ema Viya. Ítsivacha eta epanereruana, taicha tiánehi eta sácheyare tímerecavaya eyehe ema ticatiuchaheyare. Aquenucayare mavaneruhi ema Viya, téchaheyare éma —máichavacapa.

Éta juca títauchavahi eta májureenahi ema víyahaini profeta Isaías, ani tacahehi: “Tiúricacareanainapa ena achaneana cávasanahi te tachausi eta cáquiure Galilea tayehe eta provincia Zabalón étapa eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Púitsera máitecapauchavacaripahi ema tímícauchamurihi. Ticatiuchavacayarehi tayehe eta nacatajivairahi. Éma, tétumechavacahivare eta mamícauchiravacahi” tacahepa.

*Éma Jesús máichuha ena cuátroqueneana ténicarahiana, máimitureanayare
(Mr 1.16-20; Lc 5.1-11)*

¹⁸ Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticaijarehi Simón Pedro émapa ema maparape Andrés. Éta náematanerepi ena nani, ténicarahianahi. Náquijierecahi eta nayehe tarrafa. ¹⁹ Tacahe, ema Jesús máichuhavacapa:

—Yare, éhicanu. Núti níjaracaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machanerananayare ema Viya — máichavacapa.

²⁰ Enevanepa náinajicapa éna eta náenisirahi. Tiyananapa náehicapa ema Jesús.

²¹ Ánaquipanavarepa máimahavarepa ema Jesús ena apinana ticaparapecácanavare: ema Jacobo émapa ema Juan. Téjacanahi te napacure. Matiarihihivare ema naiya Zebedeo. Náititijiricahi eta nayehe tarrafa. Éma Jesús máichuhavarepa. ²² Enurujiapa náehicavare. Nanaquicavarepa eta napacure, émapa ema naiya. Najunijicavarepa.

*Éma Jesús máimitucavacapa ena camuriqueneana achaneana
(Lc 6.17-19)*

²³ Éta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuhuana tayehe eta náurujisirarevana. Mavanecapa eta náeneuchiravaina taicha tiánehipa eta sácheyare tímerecavayare ema ticatiuchayare, ema aquenucayare mavaneruhi ema Viya. Énerichuvare ema Jesús macanaracaphivare tamutu eta apanapanequeneanahi jumareana eta najumanapahi ena achaneana. ²⁴ Tacahe, nasamairiricapa ena achaneana ticavasanihi eta tasimutuqueneana avasareana te tinapaica eta Siria. Tásiha, námavacapaipa ena nacajumaqueneana, apanapanenejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracaquihana. Namutu ena nani, macanaracavacapahi ema Jesús. ²⁵ Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

5

*Éma Jesús máimitucacahi nayehe ena ticunachacareanahi me Viya
(Lc 6.20-23)*

* **4:13-17** Éma profeta Isaías, ánvare macahehi eta máechajisihairahi: “...étaripa eta provincia táviha náitecapihahi ena apavasanana”. (Acane eta juca apaquehe, apina eta apana tájireanaini: eta Zabalón étapa Neftalí.) Éta máimitusiravacahi ena achaneana, ániapa maicha ema Jesús:

¹ Tacahe, eta máimairavacahi ema Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjacaripa éma, énapa ena máimitureana nachayacaipahi. ² Ani tacahehi eta máimiturapianahi:

³—Ena náimatíhi eta tacamunuqueneanahi eta náchanevana, tétavicavahi eta náuricacarevaya taicha máejerere eta najacapirayare eta máechajiriruva ema Viya, machaneranyarehi.

⁴ Ena nani tijapanujiricavanahi, tétavicavahi eta náuricacareva taicha émaripa ema Viya macurisamurechavacayare.

⁵ Ena nani tisuapajirahianahi me Viya, mánsuanahi mayehe, tétavicavahi eta náuricacareva taicha májararuanayare eta arairu apaquehe náicuchihi me Viya.

⁶ Ena nani, ichape eta najamurachirahi eta náitaresirahi eta matapiravacare te mami-rahú ema Viya, tétavicavahi eta náuricacarevaya taicha májaracayare éma eta navarahaquenehi.

⁷ Ena nani tijapanurahianahi nayehe ena apamuriana achaneana, tétavicava eta náuricacarevaya; taicha ema Viya, éma apanava majapanuvacayare éna.

⁸ Ena nani vahi náisapajiricavahíni tahapapicahíni eta náehisirahi ema Viya, tétavicavahi eta náuricacarevaya; taicha éna, títécapanainapa te mamirahu ema Viya, náimarracainapa éma.

⁹ Ena nani ticonsejarahianahi nayeheana ena achaneana, nacaepahirahi eta semanerena, tétavicava eta náuricacarevaya éna; taicha máimereuchainapa ema Viya eta machichairavacahi éma.

¹⁰ Ena nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náitaresirahi, tétavicavahi eta náuricacarevaya; taicha éna aquenucarahanaya majupahanayare ema Viya.

¹¹⁻¹² Eti nuchaneranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanarachaheanainapa, tépiyaquenehaheanainavarepa. Váhiserá ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, ¡ecurisamurechavachucha, evapinavachucha! ¡Tétavicavahi eta náuricacareva taicha ejacapayare eta ícuchiyare te anuma, taicha ichape eta macunachirahehi ema Viya!

Ena Jesús tímitucavahi eta vicamunucareravayarehi tacutihi eta tacamunucarevahi eta icheve, étapa eta tijarahi

(Mr 9.50; Lc 14.34-35)

¹³ Eti ímiyanavayare eta ecamunucareravahi nayehe ena achaneana, tacutihi eta tacamunucarevahi eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevovainahíni. Tásiha, nájinapa ticamunuimahi. Náepuruinapa namutu.

¹⁴ Tacutiquene éti ecutihi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tamauriqueneana. Ímereuchayarehivare eta iúriava, ecutiya eta avasare tiávihahi te tajirumane eta anuquehe mari. ¹⁵ Tacutiquene, vahi ecucuti nácani súnsuana tijustacanahi jácani lámpara, tásiha nanacapapucaini te tajuhe eta cajune, nayumurusihahíni. Nanacayarehisera te anuquehe apaesa náimairiricasarepa namutu ena tiávihanahi te peti, tamicaureanayarehi. ¹⁶ Ene ecaheyare éti, ímerezayare eta ejaraivayare nayehe ena achaneana apaesa eta náimairainahi eta táuriqueneana íchaqueneanayare; tásiha nacunachainapa ema Tata Vicaiyaquene tiávihahi te anuma.

Ena Jesús tímitucavahi tayehe eta tasuapacarevahi eta Sagrada Escritura

¹⁷ Vahi étaina tímitecanuhi nútí nucaepahahíni eta mavanairipiana ema víyarahaini Moisés, étaripa eta náimiturapianaini ena profetanaini. Eta tímitecanuhi nútí, níminecapaequenehaheyare eta nájureanahi. ¹⁸ Nutupiruva numetacahe: Títauchavaya tamutu eta máechajiriruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahí, tayanapane táitavapuca eta anuma étapuca eta apaquehe. ¹⁹ Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuruiraya. Nácanisera tisuapanayarehi, tímiturecanahivare eta juca nayehe ena apamuriana achaneana eta náehisirahina; éna, ichapeyare eta nacunachacarevayare eta nasiapiraipa te anuma. ²⁰ Táicha te evaraha ítujicava esiaipa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

*Éma Jesús títitucuhavi vahi tacunasi te visamure eta visemaneva
(Lc 12.57-59)*

²¹ Eti écharichucha eta nayeherepiana ena iáchucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñayarehi”. ²² Nútisera numetacahe eta apana: Mácani tisemahi mayehe ema maparape, énerichuvare ticaicuñayare. Mácani tiúmeahahi ema maparape, ticayaserehiyare te namirahu nácani tuparairucanahi tayehe eta avasare. Tacutiquene mácani ticaecahihi ema maparape, mávacuhaipahi eta ecuñaraqui tayehe eta infierno.

²³ Eta tacahe, te piámaphi eta piámavahu te mamirahu ema Viya, tásiha, péchapanaina-papuca eta pitapiravahi mayehe ema piparape. ²⁴ Vuíchaha picuivaracuha eta piámavahu. Tativanumayare piyaseapanaya eta perdón ema piparape. Pétipuricanumayare tativa eta píchavaquenevahi mayehe éma. Táuricasarepa píchava piyaracuhapanainapa eta piámavahu te mamirahu ema Viya.

²⁵ Tacutiquene te matiarhiyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétipurica eta píchavaquenevahi mayehe, mapurare vuíchaha picaeratahini mayehe ema juez tayehe eta cárcel.

²⁶ Taicha te náimisipavipa tayehe eta cárcel, ticajeraequenénapa eta piúchusiraya.

Éma Jesús títitucuhavi vicuneuchavaya eta jácani táimiaquipaichavi tayehe eta pecatu

²⁷ Énerichuvare écharichuhi éti eta náimiturapihi ena iáchucanaveanaini: “Vahi ecuveha esu apana esena”. ²⁸ Puitisera nútí numetacahe eta apana: Mácani majamurachahi esu apana esena, ticapecaturaipahi te masamure taicha eta majamurachirahi. ²⁹ Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi táimayahare eta tamauriqueneana tájiparacana, tiúripana evечuhauquichava iáquijicaya. Taicha tiúripanahi tájijacava ánichichaina te iáquehe, váhisera tacuimicuñacahe eta te yucu infierno, tamutupahi eta iáquehe. ³⁰ Étaripa eta evahu váure, te tavarahapuca tímiaquipaicaheyare tayehe eta pecatu, tapamisirahénapapuca íchayare eta tamauriqueneana, tiúripana eyuchatica iáquijica. Taicha tiúripanahi tájijacava eta evahu, váhisera tacuimicasiapahe támutu eta iáquehe tayehe eta yucu infierno.

*Éma Jesús manacahi eta máimiturapi nayehe ena tñajicacana
(Mt 19.9; Mr 10.11-12; Lc 16.18)*

³¹ Énerichuvare ena iáchucanaveanaini náisapahi eta máejerare eta máinajisira mácani achane esu mayena. Ani nacahehi: “Mácani tñajicahi esu mayena, máemepiyarecahi eta ajumeruca táechajisihayarehi eta máinajisiraya esu mayena”. ³² Nútisera numetacahe eta apana: Mácani achane, te máinajicapuca esu mayena, ticapecaturaipahi me Viya. (Váhiné-nipuca sucaecahihini mayehe ema apana achane.) Énerichuvare te tíápechavahipuca ticaima ésu, tamuriacahi ésu eta maviurevahi ema suima. Tásiha, mácani arairuhi suima, émapa tamuriacahi eta máejecapiravahi taicha eta mavirahi esu esena sucaimaquenehi.

Éma Jesús títitucuhavi eta vahi vijurachaimahi

³³ Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca. Yátupinasera eta itauchiraina tamutu eta íjarasiravahi me Viáquenu” nacahepa. ³⁴ Nútisera numetacahe éti: Vahi táuricahini íchahini eta juramento. Vaipa échajisihahini eta anuma taicha éta, mávacurehi ema Viya. ³⁵ Váipavare échajisihahini eta apaquehe taicha éta, macaematanéyahi éma. Váipavare échajisihahini eta Jerusalén, taicha éta, mávacureyarehi ema yátupiquenehi Rey, mavaneruyare ema Viya. ³⁶ Váipavare échajisihahini eta ejurachirahi te echuti, taicha vahi aratahaimahi ehapamaichahini, ítsivachirahini eta táimahi, tijapupuca, tiquisapuca. ³⁷ Numetacahe: Te tatiarhipuca eta íjarasiravayare, átipuruva ácahe: “Tiuri”. Te váhipuca evarahahi, átipuruva: “Vahi” ácahe. Te émunahacavapuca ejuracha, ema Váinaraji títurucaheripa.

*Éma Jesús títitucuhavi eta vahi vicusema ne nácani ticaetemajiricahaviana
(Lc 6.29-30)*

³⁸ Énerichuvare esamairiricahi eta acane: “Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”. ³⁹ Nútisera numetacahe: Vahi ecujicapa te masema mácani achane váinarajihí. Tiúripana, te náehahepuca nácani te emira, íjaracayare eta apachacaya eta emira. ⁴⁰ Tacutiquene, te natiarhipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihí. Íjaracavare eta apana eta epacuha. ⁴¹ Ísapayare te nácani navanecahepuca eta enaracureca eta tijitacare. Te navaraha iámina étanaina kilómetro, evapinava eta eservichiravacaina. Vahi ecobrachavacaimahi.

⁴² Mácánirípa tájahapuca mayaseacahe, fjaracayare. Vahi ecueñamiha mácani ticapucahe eta ecayehequeneana.

Ema Jesús timitucahavi eta vémunasirayare nácani ticitianacahaviana
(Lc 6.27-28, 32-36)

⁴³ Énerichuvare esamairiricahi eta acane eta námitucasivahi ena iáchucanaveanaini: “Émunasirahi nácani témunacaheanahi. Tásiha, ecatichayarepa nácani ticitianacaheanahi”.
⁴⁴ Nútisera numetacahe: Émunacayareva nácani ticitianacaheanahi. Eyaseaca ema Viya eta nayujarahuina nácani téchajicanahi eyehe. Ímereca eta iúriya nayehe nácani ticitichaheanahi. Eyujaraucha nácani tíumehaheanahi ticaetemajiricaheanahi. ⁴⁵ Te ítaucha eta juca, éta tímereuchaheya eta machichahéirahi ema Vicaiyaquene te anuma. Taicha éma nájina manerejiruina, namutu máemunacavaca: ena achaneana váinarajiana, énapa ena tíuriana. Éma, tjaracahavi vimutu eta sache vimícahuhi, étapa eta tíquiva. ⁴⁶ Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica ena tisipecaturarahiana náichahi eta juca. ⁴⁷ Tacutiquene, tájinavare ecunachacarevaina eta me Viya, te iúriyare nacarichuhi ena eparapenaveanahi. Apanasica ena máimatirahanahi ema Viya tíurianahi eta nayehe ena naparapenaveana. Étisera tatuparacahe ecachuricayare eta iúriya. ⁴⁸ Tétavacavasareya eta iúriya nayehe namutu. Vahi enerejicaimahi ena achaneana. Váhivare eyavanimahi eta iúriya. Ecutiyaere ema Vicaiyaquene te anuma eta máurivahi.

6

Ema Jesús timitucahavi eta vahi vicusiñavavaicapa eta víchira eta táuriqueneana

¹ Eta ecajirayare ena páureana, échapavayare. Ema Tata Vicaiyaquene, tájina ticonachahemahi te evarahapuca náimaha ena achaneana eta ecajirahi, evarairahi ticonachaheanayare. Tájinavare máitsirijicavahini éma eta eyehe. ² Eta tacahe, te ímicatayarepuca nácani ticamunuvanahi, vahi ecumetajirica. Vahi ecucuti ena apimirana timetajiricanapa te víurujisirarevana, téhepa te anecapahiana. Eta juca náichahi, navarairahi ticonachacareanayarehi nayehe ena achaneana. Nútisera numetacahe: Ena nani ticaheanahi, tájina nacunachacarevaimahi me Viya. ³ Te jácani pjaraca nácani ticamunuvanahi piyehe, vahi picumetajirica. Váhivare picumetaca nácani pémunacasareana. ⁴ Piñajichayare eta pjarasirayare nácani pjaracasiruyare. Tacahe, ema Tata Vicaiyaquene te anuma máimaracacahi tamutu. Jácani píchaqueneana tayumururevana, éma títsirijiequenehayare, tjaracaviyare eta píccuhihi.

Ema Jesús timitucahavi eta víyujarasirayare
(Lc 11.2-4)

⁵ Te eyujaracahi, vahi ecucuti ena apimirana tiyujaracana te víurujisirarevana, téhepuca te anecapahiana. Titupihanahi éna eta nayujarasirahi, navarairahi náimaracayarehi ena achaneana. Nútisera numetacahe: Tájinachucha nacunachacarevaimahi me Viya. ⁶ Étisera ani tacaheya te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare ema Tata Vicaiyaquene. Éma, tímaracahavihi; masamayarehi eta piyujaracasa.

⁷ Tacutiquene, váhivare ecuapepirica eta ecayemaqueneanayare. Vaipa tácame-sahini éapepiricahini eta eyujarasirahi. Vahi ecucuti ena máimatirahanahi ema Viya. Tiúpiemanapa eta nayujarasirahi, náimijachaipa tisamacareanahi mayehe ema Viya. ⁸ Vahi ecucuti éna, taicha ema Viya máimatiripahi éma jácani vivarahaquenehi viyaseaca. ⁹ Éti, ani tacaheya eta eyujarauchiravaina: Tata Vicaiyaquene, piti piáviha te anuma, vipicauchahi yátupi eta píjare. ¹⁰ Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquhe, tacuti eta nasuapiravihi ena ángeleana te anuma. ¹¹ Pájapanuhavi pjaracahavi puiti jena sache eta vicamunuirava eta vinicaqueneana. ¹² Pájapanuhavi piperdonachahavi eta viviurevana piyehe, tacuti eta viperdonachira víti ena ticaviurevana viyehe. ¹³ Vahi picuisapahavi eta vicha eta tamauriquene. Picatiuchahavivare mayehe ema Váinaraji. Taicha píti yátupiquenevivihi Víáquenuvivihi. Nájina pácuti eta pítipajijiasiravahi. Máichecuaraquire eta pijaraivahi. Amén.

¹⁴ Taicha te yátupihí eta eperdonachirahi nácani ticaviurevanahi eyehe, ema Tata Vicaiyaquene te anuma tiperdonachaheya éti apanava. ¹⁵ Téhesera te vahi eperdonachahi ena ticaviurevanahi eyehe, ema Tata Vicaiyaquene váhivare tiperdonachahémahi eta éjecapiravanahi éti.

Ema Jesús timitucahavi tayehe eta ayuna

¹⁶ Tacutiquene, te ayunahepuca, vahi ecajapanuramiraimahi te namirahu ena achaneana. Vahi ecucuti ena apimirana ena tímicaecherachavanahi eta ayunairanahi. Núti numetacahe: Tájinachucha nacunachacarevaimahi me Viya. Éma, váhivare títirijicavaimahi eta nayehe. ¹⁷ Étiserá, te ayunahepuca, ímiyanava eta esipauquichiravaya, etatacavavare, apaesa nacuija nacuimatiacahe eta ayunairahehi. ¹⁸ Ema Tata Vicaiyaquene tímararacahehi tamutu eta esamureana. Tisamacareyarehi eta eyasearuhi.

*Éma Jesús tímítucahavi eta vahi vicuisapava vicasamure eta vímahaqueneanahi
(Lc 12.33-34; 11.34-36)*

¹⁹ Váhivare tacuavasamurerecahe eta ímahaqueneana te juca apaquehe. Eta juca ticamítiequenehacareana taicha eta tajararesira eta cachusiri, étapa eta táichasivayare. Natiaríhivare ena tíámeyechaheanayare. ²⁰ Epanerechasera eta ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájinavare tíamerahina tayehe. Tájina témiticaimahi. ²¹ Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchia te anuma, ánaqui evarahayare eyanavaneyare.

²²⁻²³ Tacutiquene, ecuneuchava, machu tacuetaviuchava eta ejamurachira eta ímahaqueneana. Écaratacava, vahi eucisapa tahapasamurechahe eta ecaimahaquenerahi. Taicha te tahapasamureruhepapuca eta ímahaquene, tétavícahavi eta tamapícuahavi eta te íachanevana. Téhesera esuapa eta nímiturapiana, tétavícahavi eta tamícauchiraya eta íachanevana, tímijunijicayare eta emaurivahi, étapa eta ejamurachiravahi eta ímahaqueneana. Eta tacahe, machu ísapava tayanariana eta timapícu eta te íachanevanasami. ¡Páurehesami éti te ísapavapuca tanasipa!

²⁴ Tacutiquene éti, eta ítaresirahi, vahi táuricahini apinanainahini ena íaquenuana. Taicha émunacapanayarehi éma émana, tisuapacarepanayarehivare; tásiha éma apana, apaesarineya eta émunasiraya, váipainapa tisuapacaremahi éma. Ene tacahehi eta juca ímahaqueneana, vahi eucisapa tahapasamurechahe eta plata, machu tahapapíríca eta émunasirahi éma Viya, étapa eta ecaemataneasirahi éma.

*Éma Jesús tímítucahavi eta majaneasirahavihi éma Viya viti machichanaveana
(Lc 12.22-31)*

²⁵⁻²⁶ Étasera nuvaraha yátupina eta ecasiñavairaina mayehe éma Tata Vicaiyaquene. Vahi eucuañamaracavaicha tayehe eta enícaquenerepi étapa eta emuiriharapi puiti juca ítaresirachaha. Eta enícaquenerepi, étapa eta emuiriharapi, tájina táéñamavacarevahini. Ímararacarichuhi eta cáyureana. Vahi táevacahini, váhivare táechatíjiricahini, táunacahipucaini eta tanícaqueneyare. Émasera éma Tata Vicaiyaquene máechapajírícahi, májjarasirahi tamutu eta tanícaquenerepiana. Evetíjipa éti, íápajupanavahi eta éñamacarévahi me Viya tayehe eta cáyureana. ²⁷ Tájina táuricahini eta éñamiravahi eta júcana. Éti, nájina tiratahaimahi étíjivainahini ecajurucavahini, tihapanane tahapasamurechahehipuca.

²⁸ Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacañamaracavahini tacaematanehini, tájijurerecahipucaini. ²⁹ Táitsivahisera, te tépnehapa, tétavícahavi táurinavahi eta taflurene. Nájina tácuti eta nacamuirihaira eta táurinava, émarípa éma víyarahaini rey Salomón eta tajanunúsira eta macamuirihairahi. ³⁰ Apanasicahi, éma Viya májjaracahi eta táurinavahi, ánpíríchuhinéni eta táitaresirahi. Evetíjipa éti eta máechapajírísirahehi, májjarasiraheyarehi eta emuiriharapi eti achaneana. ¿Tájaha tacayema vahi ácasíñavahini eta mayehe? ³¹ Eta tacahe, vahi eucuañamaracavaicha tayehe eta enícaquenerepiana étarípa te echuríriacapuca eta une érayare, váhivare eta emuiriharapi. ³² Éna achaneana vahi náimatihini éma Viya, íchapemurihi eta tacañamarasiravacahi eta júcana. Vahi nácasíñavahini mayehe éma Viya, nacuchapahípucahini eta májjararuyarehi éma. Étiserá, écharine eta mararíhírahí éma Ecaíyaquene te anuma. Máimatíhi éma tamutu eta ecamunuqueneanahi. ³³ Tásihasera éti, tatívyare íjaracava ecaemataneacaya éma Viya, ecasamureirahi eta ítauchirayare tamutu eta mavarahaqueneanahi. Tihapasamurechaheyarehivare eta tátupírívairaya eta ítaresira, ecurisamurechirayare éma. Máimahirinepa éma. Tíjaracaheyare tamutu eta juca ecamunuqueneana. ³⁴ Éta tacahe, ácasíñava mayehe éma. Vahi tacuimípanerechahe eta íchararacavayare achícu. Puiti euchaipaipa eta máimícatasiraheyare. Ímiyanava eta euchaípirayare eta máimícatasiraheya.

7

Ena Jesús tímítucahavi eta vahi vicunemahi eta nájecapiravana ena apamuriana achaneana; vicuneuchavaserá víti

(Lc 6.37-38, 41-42)

¹ Vahi ecunemahi eta nájecapiravana ena apamuriana achaneana, váhivare ecuca-cahivaca, machu étaina táimicuñacahe me Viya. ² Te ecunerahipuca nayehe ena apamuriana achaneana, ecaheyare éti eta macunerahénapa ema Viya tayehe tamutu eta éjcapirávanahi éti. ³ Piti ajaira, pítipa piti esena, vahi táurica eta picunerahi eta ánichichaqueneana nájecapiravanahi éna. Tituparacavi pítijivaina picuneuchava eta táichapeva eta péjcapirava. ⁴⁻⁵ Vahi tatuparacavimahi pétupirica eta jácani nájecapiravahi ichipichuana ena piparaepiyana. Tájina piviyahini eta piconsejachihaimahi. Ichapesera eta tatuparasiravíhi pétupirica eta péjcapiravanahi píti. Tapaenumava pétupirica eta píchavaquénévanahi, táuricapaini piconsejacha ema piparaepiya tayehe eta máichavaquénévahi.

Ena ticaecahirahiana, vahi vicuijaraca jácani téñamacareana

⁶ Vahi ecumituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayayajica.

Vahi vicuyacuji eta viyaseasiraina ema Tata Vicaiyaquene

(Lc 11.9-13; 6.31)

⁷⁻⁸ Ánivare tacahe eta máechajiriruva ema Jesús:

—Numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tjaracaheyareva. Vahi ecuyacuji eta eyaseasiraina. Énerichuvare, te tatiarihina puca eta jácani íchiraya ichapehi eta tacajeravayarehi, eyaseacayare májaracahehíni eta ítupajijiasiravaya. Éma, tjaracaheyare. Te jararíhipuca eta táichejimiráuchahe, éma macaevuisinaheyarehi.

⁹ Eta juca tímícutijiricavahi te natarihipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahíni éti eta márijahi. Tímícutijiricava evijaruinahíni ena echichanaveana. ¹⁰ Étaripa te tiyaseacaheanapuca eta jima, váhivare táuricaimahi íjaracaimahi eta quichare. ¹¹ Etiaríhi éti vahi ecajirahihíni nayehe ena achaneana. Íuríhisera nayehe ena echichanaveana. Mavetijicha ema Tata Ecayyaquene tíávihahi te anuma. Éma, vahi ticavijaruhemahi eta eyaseserepi. Tíjaracaheyarehi tamutu eta táuriqueneana eyasearuanayarehi.

¹² Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta írúva nayehe. Taicha eta tacahehi eta táimiturapi eta Sagrada Escritura eta eyehe.

Jararíhi eta apina achene

(Lc 13.24)

¹³⁻¹⁴ Esamanuchaha. Jararíhi eta apina achene. Eta ichape achene, vahi tácajéra eta náehisira ena achaneana. Camurianapana ena téhicana eta ticaijuhe tayehe eta ecuñaraqú. Étasera eta achene ánicuchicharichu, ticaijuhe tayehe eta vítaresirayare, tájina ecuñaraqúna. Váhisera camurianaina ena téhicana éta. Éti epamicava esipa tayehe eta achene ánicuchicharichu.

Ena Jesús máimícutichahi ena achaneana tépiyahirahiana, nacuti eta yucuquí máurinisiráha eta tahi

(Lc 6.43-44)

¹⁵ Échapavayare tayehe eta náimiturapiana ena tépiyahirahiana tímíjachavana machan-erana ema Viya. Tépiyacavánapahi tíuriana tacutihi eta tamansuva eta uvesa. Téhesera te nasamureana, tétavíjavahi eta navainarajiva, nacutihi eta ichini. ¹⁶ Ímatiacavacahisera éna táichavene eta náichaqueneana. Nacutihi eta yucuquiana. Eta yucuquí, tímíticarehi eta táhi. Étaripa eta sitavere, váiparinehi tíuchucaimahi eta tacahihíni narasahinahipucaini. Tásiha, eta íjicaqui váiparinehivare tacahimahi eta táhi cachicheruhinahipucaini. ¹⁷ Tacutiquene, tímíticarehi eta táhi eta yucuquí tíurínisi. Tímíticarevare eta táhi eta máurinisiráhana. ¹⁸ Eta yucuquí tíurínisíhi eta táhi, vahi témunahiricavaimahi vahi tacurínisíhíni eta táhi. Étaripa eta máurinisiráhana, váhivare témunahiricavaimahi táurínisíhíni eta táhi. ¹⁹ Tamutu eta yucuquiana máurinisiráhana ticaechuyarehi, tíjuyarepa te yucu. ²⁰ Eta tacahe, ímativacayare ena tépiyahirahiana táichavene eta náichaqueneana tamauriqueneana.

Vahi námutuimahi tíujicavana tisiapanaimahi te anuma

(Lc 13.25-27)

²¹ Nararihinapa ena achaneana tépiyacavana nuchanerana. Váhisera tútjicavanaimahi tisiapana tayehe eta mávasa ema Viya. Tayanapane náichanuinapapuca “Tata Viáquenu”, vahi tisiapanaimahi. Taicha vahi yátupinahini eta nacaemataneasirahi ema Tata Nucaiyaquene te anuma. ²² Te táitecapapa eta juicio, camurianayare ena tíchanuanayare: “Tata Viáquenu, víti véchajisihaparacahi eta píjare. Vipiaracavihi te píjare eta viáquijisirahi ena váinarajiana, téhevare te píjare vimerecahi eta tíaramicareana” náichanuinapapuca. ²³ Nútisera nujiapainapa: “Éti vahi nuchanerahéna. Nímatisera nútí eta íchaqueneanahi tamauri-queneana. Évuisiha te numirahu” níchainapa éna.

Ena Jesús máimicuticha ena tisuapajirahiana énapa ena masuapajirairahana
(Lc 6.47-49; Mr 1.22)

²⁴ Nácani tisuapanuanahi náitauchahivare eta juca nuvanairipianahi, téchemarahianahi táicha. Nacutiyaehi mácani túcachí tépiyareca peti, manacayarehi eta túmeana yucuquí emuruquíana. ²⁵ Jéhesare, te járajapapa eta muraca técatcava, tiámaquiha tíquiiva, tisiapapa eta une, váipasera tacayayacahini eta peti, taicha túsiapiravacahi. ²⁶ Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihí ema máitucarahe tépiyareca peti. Vahi manacaimahi eta túmeana yucuquí, váhivare táusiapiravacahini máicha. ²⁷ Te járajapapa eta muraca técatcava, tiámaquiha tíquiiva, tisiapapa eta une, tacajimuyapacapa eta apaquehe. Tiáquipacavapa eta peti, tamutusamipa témitiequeneha —máichavacapa ema Jesús.

²⁸ Te títapiricapa ema Jesús eta máimitusiravacahi ena achaneana, ichaperinehi eta náramirahi eta máimiturapiana. ²⁹ Vahi nasamasarénahini. Tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

8

Ena Jesús macanaraca ema émana achane leproso
(Mr 1.40-45; Lc 5.12-16)

¹ Te tíucupaicapa ema Jesús tayehe eta cerro te mávinehi, camuriana éna achaneana téhicanapahi. ² Tacahe, macahepaipa ema émana achane leproso. Témeñahavapa mayehe ema Jesús. Tépuycapa te mamirahu. Tásiha, máichapa:

—Tata, nucasíñavahi eta piyehe, picanaracanupaini.

³ Tacahe, ema Jesús majicapapa:

—Nuvaraha nuncanaracavi. Tájina píchiravaina puiti —máichapa.

Máemamahacapa. Tásiha, enevanepa tinaracahi ema macajumaquenénihí eta máechajisirahi ema Jesús. ⁴ Tásiha, ema Jesús máichapa:

—Pímaha, nacuija picumetaca eta nútirahi nuncanaracavihi. Piyanavanesera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasalupayachirayare taicha eta macanarasiravihi —máichapa ema Jesús.

Ena Jesús macanaraca ema mamusura ema capitán romano
(Lc 7.1-10)

⁵ Tacahe, ema Jesús títecapapa tayehe eta Capernaúm. Matiarihíhi ema achane apavasana. Comandantehi éma nayehe ena suntaruana romanoana. Capitán eta mávacure. Tíyanapa mapauchapa ema Jesús. ⁶ Mayaserecapa, ániya máicha:

—Tata, mararíhi puiti te nupena ema amaperu numusura ticajumahi eta áire. Tétavicavahi tacativa masama. Pájapanupaini, picanarasinanupanaini éma —máichapa.

⁷ Ema Jesús, majicapapa:

—Tiuri, nuyanayare nuncanarapanayare —máichapa.

⁸ Tásiha, ema capitán majicapapa:

—Tata, vahi picucañamacava eta pítesiraina eta nuyehe, taicha vahi táuricahini pisiapahini te nupenasami. Németeaca taratarichu picavanairipi eta picanarasiraya ema numusura. ⁹ Taicha nútí nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane —máichapa.

¹⁰ Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vijaneana israelíta mácutihini ema maca achane apavasana eta macasiñavairahi eta nuyehe. ¹¹ Numetacahe puiti: Járajapainapa eta sache, náitecapiraya ena camuriqueneana achaneana apavasana tásihanayare te tamutu avasareana te juca apaquehe. Tisiapanayare eta mávasa ema Tata,

te mávihahi ema viáchucaini Abraham, ema Isaac, émapa ema Jacob. Tétavicavainapa eta náurisamurevaya. ¹² Tacahe, tamapuruji eta náimatiequenehairahi ena vijaneanana israelítana eta máechajiriruva ema Tata, váhisera nácasifñavahini eta nuyehe. Eta tiviuachavacayarehi tayehe eta nacaiçuñaiyaya eta te tamapicuquene te távihahi eta tájirequenehi yucu. Ticapitiquiahechavanainapa eta tacatavayare nasama. Tíyahanainapa —máichapa.

¹³ Tásiha, ema Jesús máichapa ema capitán:
—Piyana pichava te pipena. Tinaracaripa ema pimusura, taicha eta picasifñavairahi eta nuyehe —máichapa.

Tacahe, ema amaperu ticajumahi tinaracaripahi te jena hora eta náechajirisiravahi éna.

*Ena Jesús macanaraca esu máimase ema Pedro
(Mr 1.29-31; Lc 4.38-39)*

¹⁴ Ema Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi. ¹⁵ Máemamahacapa, enevanepa tétaviacahi eta fiebre. Tinaracapa. Enurujipa téchepuca. Tásiha, tépanavapa ésu eta suítátirahi ema Jesús.

*Camuriana ena macanararuanapahi ema Jesús
(Mr 1.32-34; Lc 4.40-41)*

¹⁶ Te yátipa, títecaparácanaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana tiávahácanaahi ena nacajumaqueneanaahi. Macanaracavacapa ena apamuriana tisamanahi eta apana jumareana. ¹⁷ Eta juca títauchavapahi eta táechajisihairahi eta májurehi ema víyarahaini profeta Isaías, ani tacahehi: “Masaminahavihivare eta vijumana eta macanarasirahavihi”.

*Tituparacahavi vahi véñamavaimahi eta víjarasiravahi véhica ema Jesús
(Lc 9.57-62)*

¹⁸ Te máimahapa ema Jesús ena camuriqueneana achaneana nachayacahi, macavanaripipa ena máimitureana natsecava eta nánuesirayarehi te apachara cáquiure. ¹⁹ Tacahe, ema émana escribáno témeñahavapa mayehe ema Jesús. Máichapa:

—Tata máestro, nútí apana nuvaraha néhicavi te jácani pivarahaqueneyare piámianu —máichapa.

²⁰ Ema Jesús, ánipa tacahehi eta majicapirahi:

—Tamutu eta sáreana ticapenavaca. Énerichuvare eta cáyureana tamacajipachuvare. Nútiserá nuti Manerejirunuhi ema Viya, tájina nuviya nusiapihahini —máichapa.

²¹ Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

²² Ema Jesús majicapapa:

—Péhicánuchucha. Pésamirica náecaracacaichaha ena máecharareana. Tájina tájjaracavimahi eta juca tihapasamurerecavihi —máichapa.

*Ena Jesús macaesamirica eta táepacusirahi eta une étapa eta técticava
(Mr 4.35-41; Lc 8.22-25)*

²³ Te titapiricapa ema Jesús, tiávachupa te pacure. Énapa ena máimitureana, náehicapapa éma. ²⁴ Te ítupierecanapa, járajapapa eta muraca técticava. Ichapevaca eta táepacuruhana. Tisiapapaipahi eta une tayehe eta pacure. Ema Jesús, tímacapaichucha éma. ²⁵ Tacahe, ena máimitureana típiararecanapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náicha.

²⁶ Ema majicapavacapa:

—¿Tájaha tacayema epica? ¿Vahi ácasifñavapahini eta nutiarahirapahi eta eyehe? —macahepa.

Tásiha, téchepucapa. Macamatnacapa eta técticava étapa eta une. Enevanepa tésamiricavahi eta táepacusirahi. Tájinapa táichiravainahini.

²⁷ Ema máimitureana ichaperinehi nárami. Ánipa nacahe:

—¡Tétavicavahi eta máitupajjiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatnacahi eta técticava étapa eta une eta táepacusirahi! —nacahepa.

*Ena apinana ajairana návaháruana ena ichapemuriqueneana éreanana
(Mr 5.1-20; Lc 8.26-39)*

²⁸ Te títecapapa ema Jesús te apachara eta cáquiure te apaquehe Gadara, tíuchujicanapa te ecarí ena apinana ajairana, návaháruanahi ena éreanana. Tétavicava eta náíñehivavacahi. Náehayarehi nácani tíanucuhanapahi. Tacahe, napauchapa ema Jesús. ²⁹ Tipiáreanapa, ánipa nacahe:

—¿Tájaha picha píteca pipauchahavi piti Jesús, Machichaquenevivi ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vicaicuñaiyare! —nacahepa.

³⁰ Tásiha, tatiarihíhivare nacachacayahi eta camuriqueneana cúchiana tinihicanahi.

³¹ Ena éreanana nayasecapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiapahacavaca eta jena cúchiana —náichapa.

³² Tacahe, ema Jesús máisapapa:

—Tiuri, eyana esiapahacavaca —máichapa.

Tacahe, tíuchunapa ena éreanana nayehe ena návaháruanainihi. Tiáramemurihanainehi eta cúchiana. Tijunaparacanapa témiririjicanapa te tachausi eta cáquiure. Téririjicanapa.

³³ Ena tijanearecanainihi eta cúchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruanahi ena éreanana. ³⁴ Tacahe, tiyananapa ena achaneana te mávihahi ema Jesús, náimahapanahi. Te náimahapa éma, nayasecapa vahi macuitecapahini te návasa, machavahini te másinehi.

9

*Ena Jesús macanaraca ema émana achane macajumaquene eta muracaquiha
(Mr 2.1-12; Lc 5.17-26)*

¹ Tacahe, ema Jesús tichavapa tiávacuhavarepa te pacure. Tichavapa tayehe te mávasahi Capernaum. ² Ánaqui náimipauchavarepa ema achane macajumaquene eta muracaquiha. Ema tívecahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Pétumechava, nuchicha! Nucaepahainavipa eta pipecaturanaini —máichapa.

³ Natiarihi ena escribánoana. Eta nasamirahi ema Jesús, ánipa nacahe te nasamure: “Ema maca tépiyacava tímijachavahi Viya eta macaepahairahiji eta pecatuana. ¡Tétavicava eta matapirava!” ⁴ Émasera ema Jesús máimatihí eta napanereruanahi. Máichavacapa:

—¿Tájaha tacayema eta éjecapirava nuyehé te epanereruanahi? Núti tájina nutapiravaina eta níchirahi eta juca. ⁵ Núti, eta nucaepahairahi eta mapecaturana ema maca, tacutihí eta máejerererahi eta nuncanarasirahi eta máquehe. ⁶ Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi pécheputa. Piveha eta jara piyereruva. Piyana te pípena —máichapa.

⁷ Enevanerinehi técheputa ema macajumaquenéni. Tiyanapa te mapena. ⁸ Ichaperinehi eta náramirahi namutu ena achaneana natiarihiqueneanahi. Tétavicavarinehi eta nacuna-chirahi ema Viya taicha eta máitupajijiasirava ema Jesús eta máijarasirahi ema Maiya.

*Ena Jesús máichuha ema achane ticaijare Mateo, mayehyare apóstole
(Mr 2.13-17; Lc 5.27-32)*

⁹ Te apanapa sache, nuti Mateo néjacahi eta te nucobraresirare eta impuesto. Tacahe, tíanucuhapaipa ema Jesús. Te tímahanupa, tíchuhanupa.

—Yare, péhicanu —máichanupa.

Enevanepa, nécheputachi. Néhicapa éma.

¹⁰ Tacahe, námapa éma te nupena, énapa ena máimitureana. Níchuhavacapa ena nuchamuriana ticobraracarahanahi eta impuesto énapa ena apamuriana tisipecaturana. Nénicavacayarehi éna. Macachanemuríhivare ema Jesús eta vinisirahi. ¹¹ Títecapanavarepa ena fariséoana. Eta náimairahi namutu ena némunaruqueneana, eta vicachanerahi ema Jesús, ticaeahirecanapa. Ánipa nacahe nayehé ena máimitureana ema Jesús:

—¿Tájaha tacayema tísapava ema eyehe maestro macachanevaca eta manisirahi ena nánitatajiana ticobraracarahanahi eta impuesto? ¡Ticapecaturarahiana éna! —nacahepa.

¹² Te masamairiricapa ema Jesús eta náechajiriruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico. ¹³ Nútiripa vahi étaina tímitecanuhi nutanucayarehi nácani matapiravareanahi. Nutanucapahi núti ena tisipecaturana, apaesa náeneuchava, náinajica eta napecaturana. Tásiha éti, eyana ecaravahu eta máechajiriruvanahi ema Viya. Ánipa macahe: “Núti nuvaraha yátupinaini eta japanuraivainahini. Taicha te vahi, tamapurujiyare eta ecamavahuirahi eta nuyehé” macahepa ema Viya.

*Nayaserecapa ema Jesús tayehe eta ayuna
(Mr 2.18-22; Lc 5.33-39)*

¹⁴ Títecapanapa ena máimitureana ema Juan Tícachasiricarahi, nayaserecapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihini viti máimitureana ema Juan, énapa ena fariséoana?

¹⁵ Ema Jesús majicapavacapa:

—Nímicutichinahe puiti. Vahi táuricaímahi ticitisamurevana nácani ticaichuhacasanahi tinicanahi nayehe ena araimana. Tiúrisamureanayarehi taicha matiarihini ema arayena. Téhesera te tépenapuca éma, jéhesare ticitisamurevanayarehi. Tacutiquene, vuíchaha táuricaímahi eta ayunanainahini ena nímitureana. Járájpainapasesa eta sácheyare, ticaverejicasianayare taicha ticaratacanuanainapa ena ticapacanuanaya núti.

¹⁶⁻¹⁷ Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi ticuticacaimahi eta nayeherepiana ena achaneana. Eta itusira éti eta nímiturapiana, tavaraha ínajica eta ichasi eyeherepiana tauriqueneanahi —máichavacapa ema Jesús.

Ema Jesús macanaraca esu machicha ema Jairo, ésupa esu apana esena sucajumaquene-hivare

(Mr 5.21-43; Lc 8.40-56)

¹⁸ Téchajiricavaichahahi ema Jesús nayehe ena achaneana, títecapanechavare ema émana achane ticaijare Jairo. Tuparairucahi éma. Matupirupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Púitirichaha tépenahi. Téhesera te piyana, pinacaini eta pivahu, suchavahini suítarecahini —máichapa.

¹⁹ Tásiha masuapapa ema Jesús. Tiyanapa te mapena ema Jairo, vimutupaichu viti máimitureana. ²⁰ Tásiha, sutiarihihivare esu ésuna esena sucajumaquene. Doce añoripahi eta sucatajivairahi, táichirahi eta suitine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiriha. ²¹ Taicha te supaneru ésu, sucahehi: “Tatarichu jácani te némamaca eta ñimuiriha, éta ticanaracanuyare” sucahepa. ²² Émasera ema Jesús masamarichucha eta suémamajiasirahi, macaicutiarahi eta macanarasesirahi. Téquerucavapa. Máimahapa eta supisirahi esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi —máichapa.

Tacahe, tinaracapa esu esena. Vaipa tápechahini eta sujumainihi.

²³ Tiyanavarepa ema Jesús. Títecapapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecarí esu suépenaquene. Énapa ena achaneana, tijamurarianripahi eta náiyairahi. ²⁴ Tásiha, ema Jesús máichavacapa:

—Íchucachaha te aneca. Váhinéni suépenahini esu suca amaperu. Tímacarichucha ésu —máichavacapa.

Énasera nacaecahirichucha éma, técvanapa. ²⁵ Te tiúchucanapa ena achaneana, tisiapapa ema Jesús te suávihahi esu suépenaquene. Macaratavauchapa ésu. Macahepucapa. Tichavapa títarecahi ésu. ²⁶ Te nasamairicapa ena ticavasani eta te Capernaum, náraminehi namutu. Nacatsatsaicapa timetajiricanapa.

Ema Jesús macanaraca ena apinana púchuquiána

²⁷ Tiuri, tichavayarepa ema Jesús te mapena. Eta mapaisirahi te calle, náehicapai ena apinana púchuquiána. Tipiaracanapaipahi te máequene.

—¡Tátachicha Jesús, pájapanuhaví picanaracahaví. Vicasínavi piti yátupiquenévihi Cristo! —náichapa.

²⁸ Váhisera masuapavanehinehi éma. Te tisiapapa ema Jesús te mapena, ena púchuquiána tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñanuhi eta nucanarasiraheyare? —macahepa.

Ena najicapapa:

—Yátupi, tata.

²⁹ Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare —máichavacapa.

³⁰ Jéhesare, enevanepa tinaracanahi. Tímairiricanapa. Tásiha, muracapa eta matuparasira vahi nacumetajirica eta macanarasiravacahi éma. ³¹ Váhisera nácahehinehi éna. Étarichuhi te tiúchucanapa, timetajiricanapa eta macanarasiravacahi. Tásiha, náechapa namutu te tachacayarahanahi eta avasare eta juca máichaquenehi ema Jesús.

Éma Jesús macanaraca éma achane upa, macaechajicahi

³² Te viúchucavarepa, nacahepaipavare éna achaneana. Námapahi éma achane. Úpahi éma, taicha mávaháruhi éma éreana. ³³ Tacahe, éma Jesús máquijicapa éma éreana, éma tiávahácainihi. Tásiha, éma achane tinaracapa. Téchajicapa. Ichaperinehivare éta náramirahi éna achaneana éta náimairahi. Ánípa nacahe:

—¡Tétavícava éta máitupajijiasirava éma Jesús! Te viávasa Israel, nájina tiratahaina tíchaina tácutihini éta juca vímahaquenéhi —nacahepa.

³⁴ Nararihivare éna fariséoana. Ánípa nacahehi:

—Éma maca Jesús, vémeteaca majupahahi éma Satanás, éma náquenumurihi éna éreana. Máijararuihí jácáni éta máitupajijiasiravahi éta macuchusiravacahi éna —nacahepa.

Éma Jesús majapanuvaca éna achaneana

³⁵ Éma Jesús tamutuhi mapaica éta avasareana éta éta éta ánichichaqueneana avasarechichana. Tímiturecapahi tayehe te jácáni máitecapihapahi te nárujisirarevana. Ticametarairupahi éta máechajiriruva éma Viya éta náuchucuirayare éna ticasíñanahi éma, machaneranyarehi éna. Ticanararecapahivare éna ticatajivanahi ticacatiruhanahi. ³⁶ Camuriana éna achaneana títanajirícavanahi. Taicha ticatajivanahi éna, nájina nácasíñahini. Nacutihí éta uvesa te nájina tíjaneacaina. Éta máimairavacahi éma Jesús, íchape éta majapanuiravacahi. ³⁷ Tacahe, éma Jesús máichahavipa víti máimitureana:

—Tétavícavapa éta vicamunuirava éna tímícatacahavianaya tayehe éta juca vématanerepíhi. ³⁸ Eyaseacayaresera éma Tata Vicaiyaquene, máijaracahaví éna tímícatacahavianayare. Éta juca tímícutíjiricavahi mácáni achane éta macamunuiravahi éna tímícatacacanya te máechatijicaya éta maharusura —máichahavipa.

10

Éna dócequeneana apóstoleana manerejiruanahi éma Jesús

(Mr 3.13-19; Lc 6.12-16)

¹ Tacahe, éma Jesús tíchuhahavipa víti dócequeneana, mayeaneanayare apóstole. Tíjaracahavipa éta vítupajijiasiravayare víratashairayarehi vícuchucavaca éna éreanana, vícanarairayareva éna nacajumaqueneana éta éta éta nacatiruhavana.

²⁻⁴ Éta juca víjareana víti apóstoleana*: Éma títanupuca éma Simón Pedro, émapa éma maparapeichu Andrés, éma Jacobo éma maparapeichu Juan, éma Felipe, éma Bartolomé, éma Tomás, nútípa Mateo, éma apana Jacobo, éma Lebeo, éma apana Simón, émapa éma Júlasí Iscariote (éma tíjararecáhi éma Jesús).

Éma Jesús mavanecavacapa éna dócequeneana apóstoleana napaicayare tamutu avasareana, ticametarairuanayarepahi

(Mr 6.7-13; Lc 9.1-6)

⁵ Tacahe, éma Jesús tévatacahavipa víti dócequeneana apóstoleana vicametarairuyarehi. Ánípa máichahaví:

—Vahí ecuyana tayehe éta návasana éna apavasajuecuana. Váhivare ecuyana nayehe éna samarítanoana. ⁶ Eyanayaresera tayehe éta avasareana návasanahi éna víjaneanana israelítana. Taicha éna nacutihí éta uvesana máquenureana. ⁷ Eyana ecametarairuyare nayehe. Emetacayare éta nútíjapairainapa nutí Náquenuyare, nutí nucuchuhavacayare éna, taicha mavanerunúhi nútí éma Viya. ⁸ Ecanaracavacayarepahi éna leprósoana énapa nácani ticatajivanahi taicha éta apana jumare. Ecaechepucayareva éna náepenaqueneana. Ecuchucayareva éna éreanana. Éti, vahí evachareruinahi éta juca ítupajijiasiravahi, váhivare ecobrachimahi nácani ecanararuanyare.

⁹ Váhivare íámaimahi éta oro, éta plata, éta reale. Tacuíja íama éta enirurucuha te alforja. ¹⁰ Étanarichuvare emuiríha, éta íámayare. Éta éta éparupeva, étaripa éta eyupairiquiana. Éma tícaematanerahi, tútparacáhi náenicayarepahi te jácáni macaemataneyipahi. Éne ecaheya éti, títítíheanyare éna tíjacapanaya éta ecametarairuyarepahi.

¹¹ Te ítecapaucha jácáni avasare, etanucayare éma achane tíuri, témunarahi. Enasiyare mayehe. Tíámánuvaca te táitecapa éta íúchusirayareva tayehe éta avasare, epanumavaya ejunijica éta ítecapihahi. ¹² Te esiapayarepa tayehe éta petí, eyaseacayare éma Viya éta náuricacarevaina éna achaneana tícapenana éta petí. ¹³ Te tíurianahi éna achaneana

* **10:2-4** Éna nani apinana ajairana éma Jacobo émapa éma Juan, napaapecacáhi, machichanaveanahi éma Zebedeo. Éma Mateo, éta máematanerepínihi, ticobrareca éta impuesto. Éma apana Jacobo, machicháhi éma Alfeo. Éma Lebeo, mapapíhi éta májare. Ticajarehivare Tadeo éta éta éta Judas. (Te pívaraha pecha, pítanuca te Marcos 3.16-19 éta éta te Lucas 6.14-16.) Éma apana Simón, tímíticárehi éma, nachamurínihi éna revolucíonáríona tícajareanahi “cananístana”. Navaraha náquijica éna extranjeroana romanoana.

ticapenanahi eta peti, ímiyanava eyaseuchayare eta náuricacarevaina. Téhesera te vahi nacuri, váhi eyaseuchaimahi. ¹⁴ Étaripa te váhipuca nacujacapahe te jácani avasare, étapa te jácani peti ítecapihayare, váhivare nacuvaraha nacusamahe, iúchucavaneyareva. Étatapevachavanúmayeresera eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehíni. ¹⁵ Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te Sodoma étapa eta Gomorra.

Nacatianacainapa ena téhicanapahi ema Jesús
(Lc 12.2-7)

¹⁶ Esamanuchaha. Núti nuvanecehehi éti eyana epaica. Nararihísera ena achaneana váinarajiqueneanahi étupiaruanayare. Éna nacutihi eta sárare táíñehiqueneánahi. Étísera ecutiyaare eta uvesa eta tamansuvahi. Ítucayare eta ecaichepaisirayare eta navainarajivana. Váhisera ecujicapachava te návarahapuca náehahe. ¹⁷ Échapava, taicha nararihíyare ena achaneana ticitianacaheanayare táichavenehi eta éhisiranuhi. Ticaratacaheanainapa, écyaserehinapa nayehe ena juéseana. Téstaacaheanainavarepa eta te náurujisirarevana. ¹⁸ Tásiha, etiarihíyare éti tíamaheanaya te namirahu ena aquenucana, téhevere te namirahu ena Presidenteana gobiernohanahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana. ¹⁹ Tacahe, te jácani námahepapuca te namirahu ena aquenucana, vahi ecueñamava tayehe eta jácani échajuchiravayare, ecatiuchiravayare. Échajicayare eta échajiriruvana májjararuheyare ema Espíritu Santo te jena sache. ²⁰ Taicha máimahaheinepa, timitucaheyare eta échajisiraya. Vahi étíjivaimahi eta échajisiraya.

²¹ Natiarihíyareva nácani achaneana tíjararecanaya ena napaapequeneana, navarairahi námicapaca táichavenénahi eta náehisiranuhi núti. Natiarihíyareva ena nácani náiyana, navarahayareva nájjarareca ena nachichanaveana táichavenehi eta náehisiranuhi núti. Natiarihíyareva nácani nachichanaveana nacanarainapa ena náiyana, námicapacainapa táichavenehi eta náehisiranuhi núti. ²² Namutuyaréni ena achaneana ticitianacaheanayare táichavenénahi eta éhisiranuhi núti. Téhesera ecamichahi tamutu, ímiyanavahi eta éhisiranuhi te táitavapa tamutu, nucuchucuhayare núti. ²³ Te napanajicahapuca te jácani avasare iávihihi, táichavenehi eta ecametarairuirahi, ejunayare tayehe eta apana avasare. Jéhesare, nuti Manerejirunuhi ema Viya, nútijapavanéna. Vuichaha ecuitahi epaica eta avasareana ne vijaneanana israelítana.

²⁴ Éti nímitureana, ticitianacaheanaya ena achaneana. Vahi epicaucharéimahi nayehe, táichavenehi éhisiranuhi núti. Ticitianacaheyaresera tacuti eta nacatianasiranuhi núti. ²⁵ Tíjarechaheanayare váinarajíhe, máurishihepuca, tacuti eta náumehairanuhi núti. Étísera, evapinavaya eta ecutiranuyare eta nacatianasiranuhi nuti iáquenu, núti eyehenuhi maestro.

²⁶ Váhisera ecupicavaca ena ticitianacaheana. Ema Viya tímararacaheya. Ticunachaheya eta ecamichirahi, evehainapa eta ícuchihi. ²⁷ Tásiha, étumechava eta ecametarairuiraya tamutu eta nímiturapiana te tamutu avasareana. Jácani néchajiriruvanahi te tímapícu, éti ecuchujicayarehi te tijarahi, emicauchiravacaya ena achaneana. Étaripa eta nujajairuhehi te vicarichuhi, epiaracainapa te calle. ²⁸ Vahi ecupica nácani nacapacapuca eta iáquehe, tacarichuchucha náituruequenehayare. Váhisera naratahaimahi nacamítiequeneha eta iáchaneva. Macarichu ema Viya epicayare, taicha éma máituruequenehahi tamutu. Maratahahi macamítiequeneha eta iáchanevana tayehe eta táíñehiquene infierno, te ecaínajiruva táichavenehi eta episirapuca eta nacapasiraheyare.

²⁹ Nímicutichinahe eta cáyurechicha. Éti ímjachapapuca vahi tasivachahini éta. Téñamacareanahísera me Viya. Éma, téchavacahi eta táitaresirahi, étapa eta táepenirahi. ³⁰ Evetijipa éti, éñamacarepanahi me Viya. Éma, tímatipa eta tatupa eta echutimacana. Téchahehivare éma tamutu eta ítaresirana. ³¹ Eta tacahe, vahi ecueñamavahi éti tayehe eta ítaresirana, taicha tétavicavahi eta emunavahi mayehe.

Vímereuchavayare eta véhisira ema Jesús
(Lc 12.8-9)

³² Tímiyanava ema Jesús timitucahavi. Ánivare macahe:

—Namutu ena tímereuchavanahi eta náehisiranuhi te namirahu ena achaneana, núti apanavare nímereuchavaya eta nuchanerairavacahi éna mayehe ema Tata Nucaiyaquene,

ema tiávihami te anuma. ³³ Nácánisera vahi návarahahini tímereuchavanahi eta náehisiranuhi, núti apanava nímereuchaya eta vahi nuchaneranainahini éna, te mamirahu ema Tata Nucaiyaquene.

*Ena achaneana náepuruvacainapa nácani téhicanayare ema Jesús
(Lc 12.51-53; 14.26-27)*

³⁴ Éti ímijachaipapuca eta nítisirahi te juca apaquehe, tájina tácyemacarémahí, tiúricacareyarehi nícha. Váhísera ene tacahe. Níchaveneya núti, ena achaneana tépuruheanaya térajicavanaya eyehe. Eta tacahe, nuvaraha échapirica yátupina eta juca éhisiranuhi. ³⁵ Taicha puiti juca vicaijuheyare, mácani achane, te natiarihi ena machichanaveana, nacatichayarehi ema naiya táichaveneyarehi eta máehisiranuhi éma. Ésuripa esu naena, nacatianacayareva. Ésupa esu chinena, sucatianacayareva esu suímase taicha eta suéhisiranuhivare esu apana. ³⁶ Ene nacaheya, nararihiyare ena tachichanaveana eta peti ticatianacana ena náiyana te peti níchavenehi núti.

³⁷ Nácánisera tínajicavana eta náehisiranuhi táichavenehi eta nacatianasira ena nachichanaveana, váipa tatuparacahini nuchaneranainahini. Énaripa nácani tínajicavana eta náehisiranuhi táichavenehi eta nacatianasira ena náiyana, énerichuvare vaipa tatuparacahini nuchaneranainahini. ³⁸ Énerichuvare nácani apaesarichu eta navarairahi téhicanuanahi, váhivare nájaracavahini táimicapacahini eta náehisiranuhi, vaipa tátuparacahini nuchaneranainahini. ³⁹ Taicha nácani téñamavanahi eta náitaresira, tiávamirahuana eta náehisiranuhi, énajivayare ticamitíequenehavanaya. Énasera nácani yátupi tjararecavanahi téhicanuana, táimicaparuanayarepuca eta náehisiranuhi, éna tiúchucuhanayare eta náitaresiyare.

*Jararihi eta vícuchihi te anuma
(Mr 9.41)*

⁴⁰ Ema Viya máitsivachayare nácani tiúriana ena najacapiraheyare nasamahe éti. Taicha eta najacapirahehi, ticaecheranahi eta najacapiranuhivare núti; énerichuvare najacapahivare ema Tata Nucaiyaquene. ⁴¹ Énerichuvare nácani tijacapanahi ema profeta nuvaneruhi, énapa ena achaneana tiuri eta náehisiranuhi, máitsivachayare ema Tata, máijarasiravacayare eta náicuchi. ⁴² Énaripa ena témunarahanahi nayehe ena nani ánichichaqueaneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchi quene —máichahavipa ema Jesús.

11

*Ena Juan Tícachasiricarahi mavanecavacapa ena máimitureana
(Lc 7.18-35)*

¹ Te tamutupa eta máimitusirahavihi ema Jesús viti dócequeneana mayeheana apóstole, tiyanavarepa eta te avasareana tayehe eta Galilea. Taicha mavarahahi máimitucayare ena achaneana eta máechajirivana ema Viya.

² Tiuri puiti, ema Juan Tícachasiricarahi, mávinehi te cárcel. Ánaqui masamairiricapa eta máichaqueneanahi ema Jesús. Tacahe, máevatacapa ena apinana máimitureana, nayaserepanayarehi ema Jesús. ³ Te náitecapauchapa, náichapa:

—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi, ¿téheserapuca vímianavayarepuca vicuchapa? —náichapa.

⁴⁻⁵ Ema Jesús majicapavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiána. Nímipaisiraipa ena masariana. Nucanaracavacaipa ena leprósoana, énapa ena túhuquiána. Nucaechepusiravacaipavare ena náepaqueaneanaini. Énerichuvare níchuhahi ena páureana náeneuchavaya apaesa náuchucuha. Tásiha, eyana emetaca ema Juan tamutu. ⁶ Vaipa macueñamava ema Juan eta nuyehe. Tétavicavahi eta máuricacarevahi éma, te ticasíñavahi eta nuyehe —máichavacapa.

⁷ Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani víuchaha nacaratacahini éma, te eyanapa te mávapahi apaquehe te mávihahi, ¿tájaha eta epanereruana tayehe eta macame-tairuirahi? Éti ímijachaipapuca mamapachichijiririvaichucha eta máechajisirahi tacutihi te vímararaca ta taflurena eta acutena te tacayamuririjica eta técativaca. ⁸ Ímijachaipavarepuca tavayuaruhi éma tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, váhivare tiyanaimahi te mávapahiana apaquehe. Manasiqueneyarehi te jácani tiúrina peti.

⁹ Nuyaserecahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi éma Juan. Mavaneruhi éma Viya eta yátupiquenehi profetahi éma. Nájina mácutihini éna apamuriana profetana. ¹⁰ Éma maca Juan émara máechajisihaguenehi éma Viya eta te Sagrada Escritura, ánipa macahehi: “Nuvanecayare éma títapumirauchaviyarepahi éma ticametarairuyarepahi, apaesa natsecavapa éna achaneana eta najacapiraviyare” tacahépa eta Sagrada Escritura. ¹¹ Núti nutupiruva numetacahe: Éma maca Juan, nájina mácuti nayehe éna achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchaneranya, apaesachichapucaini eta nacaicutiarairahi eta mapanereruana éma Tata.

¹² Éma Juan tépanavapa eta máimitusirahi éna achaneana tacamunuirahi eta náeneuchirava me Viya. Nararihiserá éna vahi náurichahini nasamararacahini. Étapa tímicitichahi témecatájivachahi éma. Puiticha tanasihi ticatichanuana núti apanava, témecatájivachanuanayare. ¹³ Éma víyarahaini Moisés téchajisihanuhi eta te májurehi. Énaripa éna víyarahanaini profetana náechajisihahi eta nitesirayarehi nuti Manerejirunuhi éma Viya. ¹⁴ Puiti numetacahe: Éma Juan émaripahi éma profeta máiteruyarehi mavasiyarehi éma víyarahaini Elías, eta máinapumirauchiranuyare. ¹⁵ Te evarahapuca ecaicutiara, tavaraha eta epanerechinavaya.

¹⁶⁻¹⁷ Etiarihiserá eti achaneana puiti juca sácheana, eta emasuapajiravahi, nímicutichaesá éna amaperuana tíutseruánahi. Apapipijichucha eta nacayemaqueneanapahi. Éma apana macahepapuca: “Vépiyacaya eta piéstachicha”. Énasera éna apamuriana vahi náisapavahini. Tásiha, éma apana macahepuca: “Vépiyacaya eta ecari”. Váhivaresera náisapavahini. ¹⁸ Éma Juan, te tímerecavapa, muraca eta máimiturapianahi. Éta manicasareana, vahi tácutihini eta nánicasareana éna achaneana. Nararihiserá te emuri éna tépiyaequenehanahi éma. Náimijachahi mávaháruhi éma éreana. ¹⁹ Nuti Manerejirunuhi éma Viya, eta nítecapauchirahepa, nucachanehepaipa eti achaneana eta enisirahi. Etiarihivare eti épiyaequenehanuhi: “Ímaha éma maca, cánisiquitátaji, cávahárasí. Macachanevacapaipa éna achaneana tispepararahianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiravahi. Te yátupihihini échemarahi, ímatinuhini eta nucavanahirahi eta me Tata —máichapa éma Jesús.

*Éta táicuñayare eta návasana éna achaneana masuapajirairahana
(Lc 10.13-15)*

²⁰ Éma Jesús tépanavapa máechajisihá eta táicuñayarehi eta avasareana máichinehi eta tiáramicareana. Tícaicuñanayarehi éna tachichanaveanahi táichavenehi eta namasuapajiravahi. Váhivare náeneuchavahini, náinajicahipucaini eta napecaturana. Máechajicapa éna achaneana tímicitijiricavahi natiarihinahini te mamirahu. Ánipa macahe:

²¹ —¡Páurehesami eti nujaneanana ecavasanahi te avasare Corazín! ¡Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu éna tiáramicareana níchaqueneanahi te emirahu, váhisera ávarahahini éneuchavahini. Éna nani achaneana ticavasanahi te Siria, apavasananahinéni, tétavicavahinéni éta namaurivahi, németeacasera núti nasapihahipucaini téneuchavana te náimavahini éta níchaqueneanapahi. Enévanenahini náimerecavahini yátupi éta náeneuchiravainahini. ²² Numetacahanesera: Te jena sácheyare, muracapanayare éta ícuñayare éti, taicha éta emavarairahi éneuchavahini. Tacachuricayare éta nacaicuñairaya éna achaneana apavasanana ticavasanahi te Siria. ²³ Étiripa éti ecavasanahi te avasare Capernaum, tamapurujihí éta nímitusirahéhi éta éna éma ímairahi éta tiáramicareana níchaqueneana. Éti ecasífavavaicahi, ímijachapapuca éta ticayapaheyare te anuma. Ichapesera éta etsirihacarevayare, taicha épujuquichavayare éta te yucu taicha vahi éneuchavaimahi éti. Taicha te nímerecáhini éta tiáramicareana tayehe éta avasaréni váinarajiquenehi Sodoma, tácutihini éta ímairahi éti, íchapehipucaini éta náeneuchiravainahini, váipapuca macuicuñacahini éma Viya. ²⁴ Numetacahanesera: Ichape éta ícuñayare te táitecapapa éta júicoyare. Tacachuricayare éta náicuñayare éna ticavasanaini te avasare Sodoma —macahepa éma Jesús.

*Éma Jesús tíúrisamuréinehi mayehe éma Maiya
(Lc 10.21-22)*

²⁵ Étarichuhi te jena hórahi, éma Jesús ánipa macahe: —Tata Nucaiyaquene, tétavicava éta nucunachiraví. Jéhevare píti táquenuvihu éta anuma éta éta juca apaquene. Títauchavaipa éta pipanereruhi. Vahi písapahini náituchahini éta júcana

ena tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahini. Puiti nasapiharipahi nacachuricahi ena títapajjiacavanahi. ²⁶ Tétavacavahi eta táurivahi eta pipanereruhi píti, Tata Nucaiyaquene.

Ena Jesús máichuhavaca ena navitajiruana, mavaraha macanaracavaca

²⁷ Tacahe, ena Jesús máichavacapa ena achaneana:

—Ena Tata Nucaiyaquene, ena tíjaracanuhi eta nútiraya néchaya tamutu. Nájina énjavainahini náimatihini ena Tata. Nucarichu nútí néchinavahi ena nímimatiruanayare éma. Taicha nútí yátupihí eta nímatarahi ena Tata Nucaiyaquene; tacutiquenéhi eta yátupirahivare eta máimatiranuhi éma.

²⁸ Yare, ecasíñanu emutu eti evitajiruanahi te iáchanévana eti éyarecarahiana eta éjecapiravana. Nútí nuncanaracaheyare. ²⁹ Ísapava nunacasicahe eta nuyehé yugo. Nucachanehe apaesa ecaravahu nuyehé, taicha nútí mánsunu, tétavacava eta núriva eta nusamure. Éti tétavacavaya eta iúrcacarevaya te iáchanévana te ejacapa eta nímaturapiana. ³⁰ Taicha eta nuyehé yugo vahi tácajera. Tipevejyare esama —máichavacapa ena Jesús.

12

Ena fariséoana náimipicauchahi eta nayeherepiana tayehe eta sávarumuhua. Émasera ena Jesús máimereuchahi émarichu téchahi eta nayeherepiana ena achaneana eta sache nanarasirayare.

(Mr 2.23-28; Lc 6.1-5)

¹ Eta jena sávaru, ena Jesús tiyanapa tipaica. Tiámahavipa viti máimitureana. Témehicavanapa ena fariséoana. Vétavivijicapaipahi eta isanítiana. Tacahe, eta vipaisirapahi, vécuhaipa viti máimitureana. Tásiha, vívechuquihapaipahi étajavapahi eta trigo. Vivepiraquihapaipa, vépurajacachavapaipahi. Vinicapaipa, taicha tísapacareichucha. ² Énasera ena fariséoana eta náimarasirapahi, tsemamajuheanapa. Ánipa naicha ena Jesús:

—Pímaha ena pímitureana. Ticaemataneanapaichucha eta navepiraquihapahi eta trigo puiti juca sache tétavacavahi eta tacapicahuirahi. Vahi tísapacaremahi eta juca nacaematanérahí puiti —náichapa.

³ Tásiha, majicapavacapa ena Jesús:

—Németeaca éti vahi eacutiara eta tacayemaquene eta Sagrada Escritura, eta máichavacavenévahi ena víyarahaini David eta mapaisirapahi técuhaipa, énerichuva ena téhicanapahi. ⁴ Écharichuhi éti te masiapapa eta mapena ena Viya, tiyaseserecapa eta manicayarehi. Náijaracapa eta pan tacapicahuquenehi nanacasarehi te mamirahu ena Viya. Nanicasarehi ena tityujaracarahiana, émasera ena David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi. ⁵ Váhipuca échajicua éti eta te Sagrada Escritura eta mavanairipi ena víyarahaini Moisés eta nayehe ena tityujaracarahiana téchapajiricanahi eta Templo. Éna, tájina natapiravainahini eta nacaematanerahi te sávarumuhua. ⁶ Tavetijichapuca puiti nutiarhipahi nútí. Ichápequenénupánahi tayehe eta Templo. ⁷ Éti váhivare eacutiara eta juca máechajiriruvana ena Viya: “Nútí nuvaraha yátupinaini eta eJapanuraivainaini. Taicha te vahi, tamapurujiyare eta ecamavahuirahi eta nuyehé” macahepa. Te eacutiarahini, váhiyarehini ecaechavaca ena nímitureana, taicha éna tájina natapiravainapahi. ⁸ Tiuri puiti, numetacaheyare: Nútí Manerejirunuhi ena Viya, nútirichu néchahi eta sache nanarasiraya ena achaneana —máichapa.

Ena Jesús macanaraca ena achane tépenavahu

(Mr 3.1-6; Lc 6.6-11)

⁹ Te apanavarepa sávaru, tiyanavare ena Jesús tisiapahi tayehe eta náurujisirareva. ¹⁰ Ánaqui matiaríhi ena achane vaipa tayamuricahini eta mavahu, tépenavahuipa. Natiaríhivare ena fariséoana, natanujiricahí eta ticaviurevayarehi ena Jesús. Nayaserecapa éma:

—¿Táuricapuca vicanaracavaca ena nacajumaqueneana te sávarumuhua tacapicahuquenehi? —náichapa.

¹¹ Ena Jesús majicapavacapa:

—Nímicutichinahe puiti. Németeaca májina émanaina achane vahi macujapanuhini eta máitatuquene uvesa, te téchapaicavapuca te pusu te jena sache tacapicahuquenehi. Eta máeñamirahi, tipatsicava mavecuha eta paure sárare. ¹² Nútí numetacahe: Ena maca achane tiápajucavahi eta téñamacare tayehe eta uvesa. Tacahe, tísapacaréchucha víchayare eta táuriqueneana te sávarumuhua —máichavacapa.

¹³ Tásiha, ena Jesús máichuhapa ena achane ticajumavahuhi:

—Nímaha. Picajaruvauchava, pímereca eta pivahu —máichapa.

Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tíchava, tacutipa eta mavahu sapa. ¹⁴ Tisemanarinehi ena fariséoana eta náimairahi eta máichaquenehi ema Jesús. Tiyananapa. Tinacuchavanapa eta napanerechirahi eta nacapasirayarehi ema Jesús.

Ena Jesús tiyanavarepa tipaícahi

¹⁵ Tacahe, ema Jesús, te máechapa eta napanereruhi ena fariséoana, navarairahi nacapaca, tiyanavarepa tipaícahi. Náehicapa ena camuriqueneana achaneana. Énerichuvare, náitecapauchapaipa ena nacajumaqueneana. Macanaracavacapaipa namutu. ¹⁶ Mavane-capaipasera ena macanararanapahi vahi nacumetajirica eta émairahi ticanaraca. ¹⁷ Eta juca títauchavapahi eta máechajiriruvahi ema Viya tayehe eta májurehi ema víyarahaini profetaíni Isaías. ¹⁸ Ánipa tacahehi: “Nuvaraha ímatiya ema vanairucahi nuyeye, nunerejiruhi núti. Tétavicavahi eta némunasirahi, núrismurehivare máicha. Ímatiyare éma taicha mávaháruhi ema Espíritu Santo máijararuhi éma. Ema nuvanara, túmitucavacayare ena achaneana te tamutu avasareana eta nuvanairipianahi. ¹⁹ Éma, tájina máitucaimahi téhacaca. Váhivare tipiararecaimahi, macunachiravahi te cálleana tayehe eta máichaqueneana. ²⁰ Mánsuhi éma taicha ticayehehi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máejacapa tayehe eta mávacureyare, muracainapa eta mávacureyare. ²¹ Tásihasesa, namutu ena achaneana te avasareana ticunevanayare eta mayehe, navarairayare máurichayare éma” macahepa ema Viya.

Ena fariséoana téjcapavanahi eta náimijachirahi ema Jesús mávaháruhi ema Váinaraji Satanás (Mr 3.19-30; Lc 11.14-23; 12.10)

²² Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímairicavarepa. ²³ Ichaperinehi nárami ena achaneana. Tásiha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víyarahaini David —nacahepa.

²⁴ Énasesa ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macuchusiravacahi ena éreana, vémeteaca máijararuhi eta máitupajijiasiravahi mayehe ema Satanás, ema náquenuurihi ena éreana —nacahepa.

²⁵ Ema Jesús máimatíhi eta napanereruhi éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimurihacacanaimahi apinainahipucaini partido. Te típutsimuriacacanapa, énjacacaipapucaini tíáquipaicacana. Énaripa ena achaneana te avasare, vahi táurica náiputsimuriavahini. Émaripa mácani achane, te camurianahi ena machichanaveana, váiparinehivare típutsimuriavanaimahi náehajiricacahini, énjajiricacahini náquipairicacahini. ²⁶ Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, túmiyanavanayarehi eta nacaetemajirisirahiviyarehi. ²⁷ Éti ímijachaiapa nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanerera. Te émahipuca tímicitacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma. ²⁸ Émaquenehisera ema Espíritu Santo, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

²⁹ Nájina tisiapaimahi eta námerecachini te jácani peti matiaríhihi ema túmequenehi. Tacamunuhi nacaratacanumayare, náiticanumayarehi éma. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

³⁰ Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatacachi éma eta macaetemajirisiranuhi.

³¹⁻³² Nutupiruva numetacahe: Eperdonachacareana eti achaneana eta epecaturana, tamutu jácani échajisíhaira eta táííemahíqueneana. Jácani te ecaecahinuhipuca nuti Manerejirunuhi ema Viya. Jararihiserá eta epecatura vahi tiperdonachacaremahi. Éti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi núti, émaquenehi ema Espíritu Santo. Éti epanararacaripa éma. Tásiha, tájina eperdonachacareimahi puiti juca itaresiraichaha, evetijipa te apana itaresira —máichavacapa.

Ena Jesús máimicuticha eta táhi eta yucuqui (Lc 6.43-45)

³³ Tímaticare eta yucuqui te tiúrinisihí eta tacahira. Tímaticarehivare eta apána yucuqui, máuriraha eta tacahira. ¡Epanerecha! Núti níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarecahíni, níchahíni eta máematanerepiana ema Váinaraji, jéhevareserapucaini eta tímereuchanuhi eta mávahásiranuinahíni éma. ³⁴ ¡Étísera machichanaveanatataji ema Váinaraji! Váiparinehi ítucaimahi échajisíha eta táurinaqueneana, taicha éti tamaverasiavahi eta evainarajivana. Eta échajiriruvanahi ticaeherahi eta evainarajiva te esamureana. ³⁵ Nácani tíuriana achaneana, tatupiruvahi eta náechajirisirava taicha tíuríhi eta nasamure. Nácanisera achaneana váinarajiana, vahi tíúrimahi eta náechajirisirava. Tíñemahipivacahi taicha tavayuchahi eta tavainarajiva eta nasamure. ³⁶ Nutupiruva numetacahe: Te táitecapapa eta sache táitecapirayare eta juício, emutu ecayaserehiyare eta échajisíhairana eta tamaeperajiqueneana. ³⁷ Étaripa eta tivíuchaheyare. Téhesera tíúrihipuca eta échajisíhairahi, vahi ecaicuñaimahi. Tájina tivíuchahémahi —máichavacapa.

*Éma Jesús macajachavaca ena fariséoana taicha eta namasuapajiravahi
(Mr 8.12; Lc 11.29-32)*

³⁸ Tacahe, nayaseacapa ema Jesús ena fariséoana énapa ena escribánoana. Ánipa náicha: —Tata maestro, vivaraha picuchucaini eta tíáramicare, te yátupipuca mavaneruvíhi ema Viya —náichapa.

³⁹ Éma Jesús majicapavacapa:

—¡Éti achaneana váinarajiqueneana! Núti nímatihe. Vahi esuapanuimahi, te nímerecapucaini eta tíáramicare. Tásiha, váhinéni étina tatuparaca ímahahíni eta tíáramicareana. Ímahayaresera eta tíáramicare tacutiayare eta máichavaquenevahi ema víyaraháini profetaíni Jonás. ⁴⁰ Taicha ema Jonás masiapajuechahi eta ichapequene jima, mapana sache eta mayerevahi, mapanavare yati. Ene nucaheyare, núti Manerejirunuhi ema Viya, mapanayare sache, mapanavare yati, eta nucaheyare eta nucaecarasirayare. ⁴¹ Eta jena sáchehare téchepucanayare namutu, tíuchucuhanayare ena achaneana ticavasanáinihi acane te Nínive. Tísipecaturarahianahíni éna. Natupiruvahisera nasuapa eta mametarairu ema Jonás. Téneuchavanavanehi. Tásiha, te jena sáchehare, nacahenapa eyehe éti: “Táuricapa nacaicuñaini ena nani maparajuruana ema Cristo, táichavenehi eta namasuapirahi éma. Taicha éma, máuriquenepanahí mayehe ema Jonás” nacahénapa. ⁴² Tacutiquene esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayérehiquenehinéni eta suávasa, tíyanahisera sucapayaca ema Salomón taicha suvarahahi susamayarehí éma. Tacahe te téchepucanapa namutu, ésu suyaseacainapa eta ecaicuña éti máetupicushmanahi puiti. Sucahanapapuca: “Táuricapa nacaicuñahíni ena nani máetupicushmanahi, tájina náetseraruina namaripa ema Cristo, ema tíupajijíapanavahi mayehe ema Salomón, tásiha vuíchahacaruva nasuapa” sucahénapapuca jácani.

*Éma Jesús máimicutichinahi ena masuapajirairahana mayehe
(Lc 11.24-26)*

⁴³ Tímiyanava eta máechajisíravahi ema Jesús, ánipa macahe: —Énerichuvare éti ecuti mácani achane máinajiruhí ema émana éreana. Éma éreana tíyana matanucainapa eta jácani masiapihayarehí. Eta mamaíchimavira eta mavarahaquene, mapanerechayarehí tichava. ⁴⁴ Macahénapapuca: “Nuyanayare nuchava, nusiapayareva mayehe ema návaháruinihi”. Te títecapapa ema éreana mayehe ema achane mávaháruinihi, máimahapa ema achane máinajicaripa eta mapecaturana, vuíchahasera máehicahíni ema Viya. ⁴⁵ Tásiha, tíúrisamurepa ema éreana. Tásiha, tíchuarecapa ena sítequeneana machamuriana. Váinarajipanana éna. Nasiapahacainavarepa namutu éna. Jéhesare, tíapajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

*Suítecapauchapa esu maena ema Jesús énapa ena maparapenaveana
(Mr 3.31-35; Lc 8.19-21)*

⁴⁶ Tímiturecarichaha ema Jesús nayehe ena achaneana, títecapanecha esu maena énapa ena maparapenaveana. Nanasíhisera te aneca. Navarahahi náechajicayarehí éma. ⁴⁷ Natarihíhi ena tímetapananahi ema Jesús. Ánipa nacahe:

—Ésu pémunaruquenehi pena énapa ena píparapenaveana, nararihi ani te aneca. Navarahahi téchajicaviana —náichapa.

⁴⁸ Émasera majicapapa:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

⁴⁹ Tásiha, tísuvechahavipa víti mayeheana apóstoleana. Tásiha, macahepa:

—Numetacahe, ena nani ena némunaruanahivare. ⁵⁰ Taicha namutu nácani ticaemata-neacanahi me Tata tiávihihi te anuma, énahi ena némunaruanahivare —máichavacapa.

13

Ena Jesús máimicutichinavaca ena achaneana eta evaraquí tacaevaquenehi te apanapanenejiquene máteji

(Mr 4.1-9; Lc 8.4-8)

¹ Te jena sache, tiyanavarepa ema Jesús, macaijuhe te tachausi eta cáquiure. Téjacavarepa eta ánaqui eta máimituresirayarehi. ² Tásiha, camurianapahivare ena achaneana títecapauchanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachausi tiájipahi. ³ Tásiha, camurihi eta máimicutichaqueneanahi eta máimitusiravacahi. Ánipa macahe:

—Matiaríhi ema émana achane. Tévipanahi te máesane. ⁴ Eta mapaisirapahi, témiricapaipa eta evaraquí te achene. Táimahapa eta cáyure, tanicapa. ⁵ Eta mayeherepi éma eta máevasira, máevajajapaica eta apaquehe. Tásiha, eta apamuri evaraquí témiricapa te váhirichu tamitutihini eta máteji taicha máripahi eta apaquehe. Tímarucavanepaneni táicha. ⁶ Téhesera te tíjurepa eta sache, tacapajicapa; taicha váhirichu táuparevacahíni. ⁷ Tacahe, eta apana evaraquí témiricapaipa te tataracu eta itapeaire. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca. ⁸ Tacahe, eta apamuri evaraquí témiricapaipa te tiúrina máteji. Tiúrinapanahi eta tajurusira. Eta étana, ticahipa tétupicavapanapa. Eta apanavare, ticahipa ánimuríchu. Eta apanavare, ticahivare apaesajirúichu. ⁹ Esamararacanu emutu éti. Te evarahapuca ecaicutiara, tavaraha eta epanerechinavayare.

Ena Jesús máitametacaquenevacapa ena apóstoleana eta juca máimiturapihi

(Mr 4.10-20; Lc 8.9-15)

¹⁰ Tacahe, viti mayeheana apostóleana vémeñahavapa eta mayehe ema Jesús. Viyase-recapa tájahapuca tacayemahi eta máimicutiarachiravacaichucha eta máimitusiravacahi ena achaneana.

¹¹ Tásiha, ema Jesús tijicapahavipa:

—Ena Tata tituparacanuhi nítametacaheyare éti eta juca táequenereruana mapanereruana. Mavaraha ímatiequenehaya éti. Énasera ena apamuriana achaneana vahi nítametacavacaimahi, náimainavainepa éna. ¹² Éti, te esuapa yátupíhi eta nímiturapiana, ema Espíritu Santo tímitucaheya tamutu eta tacayemaqueneanahi. Énasera nácani vahi návarahahini nasuapa, énajivayare tíchavana ticaverejicasianaya eta nasamaqueneanahi. ¹³ Eta tacahehi eta nímitusiravacahi, nímicutiarachinavacaichucha. Te apaesarichu eta navarairahi náituca, vahi nacaicutiarahini eta juca nímechaqueneanahi. Nasamahi eta néchajiriruvana, váhisera nacaicutiarahini eta nímitusirahi. ¹⁴ Puiti ena nani achaneana nacuti ena achaneana acane, vahi nasupahini ema víyarahaini profeta Isaías. Ánipa macahe: “Nímatíhe éti. Esamayarenénipuca, váhisera ecaicutiaraimahi. Ímahayarehinénipuca, váhivaresera ímatiequenehaimahi. ¹⁵ Taicha eta esamureana eti achaneana, tétavicavahi eta tamuracava. Vahi evaraha esama. Épiyacavahivare púchuquihe, emavarairahi esupahini te esamureana. Tájinapa táichahíni vicuchapahíni eta éneuchiravainahíni, evarairapucaini ecasiñavahini me Viya, apaesa macanaracahehíni” macahepa ema víyarahaini Isaías.

¹⁶ Étisera eti nímitureana, tétavicavahi eta iúricacarevahi, taicha esupahi eta juca ímahaqueneanahi étapa eta esamaqueneanahi. ¹⁷ Nutupiruva numetacahe: Acane ichapemuriana ena achaneana tíuriana énapa ena víyarahanaini profetana, tétavicavahi eta navarairahi tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímituresirahi. Váipasera nacapayacahini.

¹⁸ Ácaicutiaracha eta juca nímicutiarachaquenehi mayehe ema tévacarahi. ¹⁹ Núti nichuhavaca ena achaneana machaneranayare ema Viya ena téhicanuanayare. Tásiha, natiaríhi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamitísicavaca eta náimitucasivainihini. Éna nacutihini eta máteji muracapahiquenehi te achene. ²⁰ Natiaríhivare ena apamuriana achaneana, nacutihini eta máteji máripahi. Te nasamararaca eta nímiturapiana, natupiruvanehi nasuapa, tiúrisamureanainehi. ²¹ Váhisera náratahahini nacaravahuhini yátupinahíni. Vahi nácutihíni eta evaraquí tiúparehi. Ánipirichu eta náehisirahi, taicha vahi nacamicahini jácani nacatajivairanahi. Váhivare túmesamureanainahíni te tatiaríhipa eta

jácani nacatichaira ena achaneana táichavenehi eta náehisiranuhi. ²² Natiarihivare ena apamuriana achaneana nacuti eta máteji te távihahi eta itapequijiana. Énerichuvare nasamaracahinéni eta nímiturapiana. Napaneréquenehahinéni, tahapapiricavacahisera eta jácani táichararacavayarehi eta náitaresira. Tavayucavacavare eta tájiparacana, étapa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacpirahi eta nímiturapiana. ²³ Natiarihisera ena apamuriana achaneana nacutihi eta tíurina máteji. Éna, tisamanuanahi. Náunacahi yátupi eta nímiturapiana, náimatiequenehairahi. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —macahepa ema Jesús.

Éma Jesús máimicutiarachina eta sucureca trigo étapa eta ejare

²⁴ Éma Jesús máimicutiarachavare ena achaneana eta máimitusiravacahi:

—Puiti nuvaraha nímitucahe tatiarihivare eta sáchezare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévcarahi eta tíurina evaraqui tayehe eta tíurina máteji. ²⁵ Étasera te tímacapa ema ticayehe eta sucureca, macahepaipa ema macatianaru. Máimisiriquichinapa eta táñemahiqueneana ejare. Tásiha, tiyanapa. ²⁶ Tacahe, te tímarucainipa eta evaraqui trigo, tíuchucavarepa eta ejare, tacachaneipaipa eta evaraqui. ²⁷ Náraminehi ena machaneranahi ema achane tévcarahi. Tiyanapa nametapana ema náejaháruhi. Ánipa náicha: “Tata, eta jena pévaraquihi, tájina tacasiriquíhíni eta táñemahiqueneana ejare. Púitísera tíuchucapa tacachaneipaipahi eta pévaraquihi” náichapa. ²⁸ Éma náejaháruhi majicapapa: “Matiaríhi mácani ticatianacanuhi. Éma tíchahi eta juca, tímisiríquichinanuhi”. Tásiha, ema machanerana náichapa: “¿Pivarahapuca, tata, viyana víti vivepuríha eta jena ejareana?” ²⁹ Éma majicapapa: “Vahi tíúrine, taicha machu táimivepuríca eta névaraqui trigo. ³⁰ Tácuticacaríhaha eta tajurusirayare. Tíamainucava te tacaechatíjipa, nuvanecahénapa éti nuchanerana tatívyare eveyurica eta ejarejiana, ítíjicainapa eta facaijuirayare. Tásiha, evehainasarepa eta trigo, ticaunainapa te tacaunairare”.

Éma Jesús máimicutícha eta taquí eta mostaza

(Mr 4.30-32; Lc 13.18-19)

³¹⁻³² Éma Jesús máimicutiarachavare eta taquí eta mostaza eta máimituresirahi. Ánipa macahe:

—Puiti nuvaraha nímitucaheya eta apana tayehe eta evaraqui ánichichaquene, étasera te tijurucapa, tíñejiyarehi. Tacaheyare eta tajurusirayare eta nímiturapiana nayehe nácani tijacapanayare. Ímatichuhi éti eta taquí eta mostaza, eta ánichichapanahi tayehe eta apamuriana evaraquiána. Tásihasera te tímarucapa, tíunayarehi eta táenaqui, tacutiyahehi eta yucuqui eta táichapeva. Tacachuricayarehi eta apamuriana evaraquiána. Járájpainapa eta cáyureana. Táepiyacainapa eta tamacájiana te tatavavájiana. Ene tacaheyare eta tajurusirayare eta nímiturapiana núti Manerejirunuhi ema Viya.

Éma Jesús máimicutícha eta levadura

(Lc 13.20-21)

³³ Énerichuvare máimicutíchina eta juca apana máimituresirahi. Ánipa macahe:

—Tacutiquene, eta juca nímiturapiana tímicutíjiricavahi eta levadura. Esu súcani esena tíuríhi eta tasisíjisira eta suyehe levadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tíapucayarehi tíuri.

Camuri eta máimicutíchaqueneana

(Mr 4.33-34)

³⁴ Éma Jesús tamutu máimicutiarachinapahi eta máimituresirahi. Tájina étahena te tímíturaca, vahi macunacahini eta máimicutíchinaqueneana. ³⁵ Títauchavahi eta juca máechajiririvanahi ema émana profeta. Aní macahehi: “Tamutu eta nímiturapianayare nímicutíchinyarepahi. Nímicaecherachainapa eta táéñauveaquenehi te tépanavainapa máepiyacainapa ema Viya eta apaquehe” macahepa.

Éma Jesús máimicaecherachapa eta máimicutíchaqueneanahi tayehe eta trigo étapa eta ejare

³⁶ Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa víti mayeaneaníhi apóstoleana. Tacahe, te véjacapa vimutu, viyaserecapa máimicaecherachahini eta máimiturapihi máimicutíchaquenehi eta ejare tacachanequenehi eta trigo. ³⁷ Tacahe, ema Jesús máichahavípa:

—Nuti Manerejirunuhi ema Viya nucutihi ema achane tévacahi eta tiúrina evaraqui. ³⁸ Eta apaquehe tacaevaiyahi eta trigo, énahi ena achaneana te juca apaquehe. Eta tiúrina evaraqui, étihi eti nuchaneranahi núti. Tásiha, eta ejare énahi ena machaneranahi ema Váinaraji. ³⁹ Taicha ema ticatianacanuhi, manacahi eta ejare, mavarairahi máepacuchayarehi eta névaruhi núti. Eta tacaechatijirapa eta trigo, étahi eta táitavirayare eta apaquehe. Nárajapayarepa ena ángeleana, ticurujiricanayarehi. ⁴⁰⁻⁴² Tásiha, te jena sácheyare, nuti Manerejirunuhi ema Viya nuvanecainapa ena nuyeheana ángeleana nacavehasi ena tichanahi eta máeperajiqueneana énapa ena tímiaquipaicana ena apamuriana achaneana. Tásiha, náquijicavacainapa eta te táijurequenehi yucu. Ticapitiquiahechavanainapa eta tacativayare nasama. Tiyahanainapa. ⁴³ Tásiha, nácani títauchanahi eta mavanairipianahi ema Viya, tétavicavayare eta najaravayare tacutiya eta tajaraiwa eta sache. Téjacanainapa tayehe eta macatuparahaiyahi ema Vicaiyaquene. Te evarahapuca ecaicutiara, tavaraha eta epanerechinavaya.

Emá Jesús máimicuticha eta entierro

⁴⁴ Eta nímiturapiana nuti násihaquenehi te anuma tacuti eta tayumurevaquenehi entierro. Te máichimavahi mácani achane eta entierro, tiúrisamureyarehi. Tásiha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane táimijararecayarepa tamutu eta macayehequeneanainihi.

Máimicutichavare eta perla tasivachaquenehi

⁴⁵ Énerichuvare eta najacapirahi ena achaneana eta nímiturapiana nuti násihaquenehi te anuma tacuti eta macaematanerahi mácani achane comerciantepahi. Matanucapahi eta tasivachaqueneanahi perla. ⁴⁶ Te máichimavapa eta perla matanurepahi, tétavicavahi eta tasivachavahi. Mavarahasera mavachareca eta perla, tayanapane táimijararecayarehi tamutu eta macayehequeneanainihi.

Máimicutichavare eta ichape nayutahe

⁴⁷ Énerichuvare nuvaraha nímitucahe tayehe eta sácheyare eta táitecapirayarehi eta ecuñaraqahi. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutuqueneana jímana. ⁴⁸ Te náimahapa tónica eta nayutahe, navehayarepa nachurupaicapa te táijipahi tachaui. Nanerejicayarepa eta jímana tiúrinana. Nanacacuhayarepa te ichape maha. Tásiha, náquijicayarepa eta apamuri máurirahanahi. ⁴⁹ Ene tacaheyare eta táitavirayare eta apaquehe. Nárajapayare ena ángeleana, nanerejicainapa ena achaneana tichanahi eta tamauriqueneanahi. ⁵⁰ Náijuchainapa te yucu, táetaviuchahi eta táijureva. Ticapitiquiahechavanainapa eta tacativayare nasama. Tiyahanainapa — macahepa ema Jesús.

Emá Jesús mayaserecavaca te nacacutiarahipuca eta máimiturapianahi

⁵¹ Tacahe, ema Jesús tiyaserecavapipa. Ánipa macahe:
—¿Ecaicutiarapuca éti tamutu eta juca nímiturapianahi? —máichahavipa.
Tásiha, víti vijicapapa:
—Vicaicutiara, tata —vicahepa.

⁵² Tácahe, máichahavipapa:
—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacache ímitucavacaya ena achaneana. Tétavicavaya eta ítamuturusirayare eta ímituresirayare eta mapanereruana ema Viya —máichapa.

*Tichavapa ema Jesús te mávasa Nazaret
(Mr 6.1-6; Lc 4.16-30)*

⁵³ Te tamutupa eta máimicutichirahi ema Jesús eta juca máimiturapiana, viyanapa. ⁵⁴⁻⁵⁷ Vichavapa tayehe eta mávasa. Te sávarumuhuquenepa, viyanavarepa tayehe eta náurujisirareva eta nayujarauchirahi ena achaneana. Tímiturecapa ema Jesús. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—Témunahiricava eta máitupajijiasiravapahi ema maca. ¿Távihasica macaravahuinehi eta máichirayare eta tíaramicareana? Vivaraha vímaha víti apanava eta jácani máichaqueneanahiji visamairiruanahi. Taicha vímatihí ema maca. Carpintérohí éma. Vímativare ema máiyaini, ésupa esu maena María, énapa ena maparapenaveana ema Jacobo*, ema José, ema

* 13:54-57 Ema maca achane, ticaijarehi Jacobo te náechajiruruva ena israelítana. Te véchajiruruva, ticaijarehi Santiago. Mapaenunavahi máehica ema Jesús te táequenepa eta máechepusirahi te máecari ema Víáquenu.

Simón, émapa ema Judas. Vímativare ena esenana maparapenaveanahivare, ticavasanahi eta aní. ¿Távihasica máitusiavahi eta juca máitucaqueneanahicacha? —nacahepa.

Émasera máichavacapa:

—Tatuparaca epicauchahaviya vimutu viti mavaneruana ema Viya. Étisera éti nujaneananahi ecavasanahi eta te juca viávasa, étipa eti nuparapenaveana, vahi epicauchanuimahi —máichavacapa.

⁵⁸ Tásiha, tájina máimerecachichaini eta tiáramicareana táichavenehi eta namasuapajirai-vanahi, váhivare nacasiñavahini eta mayehe.

14

Éma Herodes masamairicapa eta máichaqueneanahi éma Jesús
(Mr 6.14-29; Lc 9.7-9)

¹ Tacahe, éma Herodes éma aguenucahi tayehe eta Galilea masamairiricavarepa eta máichaqueneanahi éma Jesús. ² Tacahe, éma Herodes máimijachahi éma tichavahi téchepuca éma Juan. Tásiha, máichavacapa éna máévanachanahi:

—Éma mácara, émaripa éma Juan Tícachasiricarahi, éma nímicaparuhi. Tichavaripa téchepuca te máecari. Táitusiava máiturucahi macuchuca eta tiáramicareana —macahepa.

³⁻⁴ Taicha éma Herodes mavehahi esu Herodías, esu machinenahi, mayenahi éma maparape Felipe. Máiminajicapa éma suima. Tacahe, éma Juan macajachavacaripa éna eta naviracacairahi. Éta pa tímicitachahi éma Juan, sucatichapa esu Herodías. Tásiha, éma Herodes máeratacapa te cárcel éma Juan, macavanaripipa náitiaca te cadena. ⁵ Taicha supamicahi ésu eta máimicapasirayarehi. Tipicahisera éma nasemahini éna achaneana. Taicha éma Juan, tétavacavahi eta náemunasirahi éna achaneana. Náimatihí éma, eta vanairucairahi me Viya.

⁶ Tásihasera, títecapapa eta sache máijaremuhu éma Herodes, sutiarihíhi esu amaperu, suchicha esu Herodías. Tiúchucapa tírimaica te mamirahu éma Herodes, énapa éna machimaranahi. Éma Herodes máuricainehi ichape. ⁷ Tacahe, máichapa ésu:

—Nujuracha te pimirahu, eta níjarasiraviya jácáni piyasearunuyare —máichapa.

⁸ Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare aní píchaya: “Píjaracanu eta ñichuti eñi Juan te curuja” píchayare.

⁹ Tásiha, eta masamirahi eta juca suyasearuhi, éma rey Herodes ichaperinehi eta mapanereresirahi. Tájinapasera máicharacavahini taicha máechajiriruvaiipahi majurachaipahi te namirahu éna machimaranahi eta máíjarasirayare eta suyasearuyarehi ésu.

¹⁰ Tacahe, macavanairipipa nayuchatipiquenuhapana éma Juan. ¹¹ Tacahe, námapaipa te curuja eta machutini, náíjaracapa esu amaperu. Tásiha, ésu sujacapapa, suíjaracapa esu suena.

¹² Títecapananecha éna máimitureanahi éma Juan. Navehapa eta máquehe, náecaranapa. Tásiha, tiyananapa nametapanahi éma Jesús.

Éma Jesús máitaparahavaca máenicavaca éna camuriqueneana achaneana
(Mr 6.30-44; Lc 9.10-17; Jn 6.1-14)

¹³ Te masamairicapa éma Jesús eta nacapasirahi éma Juan, viyanapa viávacuhapa tayehe eta pacure. Vicaijuhepa tayehe eta apaquehe mávapahi. Énasera éna achaneana náecharichucha eta viyanirahi. Tiyananapa náehicali tipaicapanahi. ¹⁴ Te tiúcupaicapa éma Jesús tayehe eta pacure, máimahapa éna camuriqueneana achaneana. Majapanuvacarinehi eta máimairavacahi. Macanaracavacapa éna nacajumaqueneanahi námaqueneanapahi. ¹⁵ Tacahe, viti mayeheana apóstoleana vímahapa eta cáperehíchicharinehi. Vimetacapa éma máevatamuríhahini éna achaneana natiarihiqueneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivanecavaca éna achaneana nayanapa, navachareca eta nanica; taicha aní tájina naviyavaimahi eta te juca —víchapa.

¹⁶ Éma Jesús tijicapahavipa:

—Vahi nuvaraha nuvaneca nayana. Tájina naviyava eta nácaijuhehini. Íjaraca étina eta nanica.

¹⁷ Tásiha, viti víchapa:

—Tájina vácayehe eta tinicacare. Jucarihisera cíncochichahi eta pan, apina eta jima.

¹⁸ Éma Jesús máíchahavipa:

—Íáma aní.

¹⁹ Tacahe, macavanairipipa náejahahapaica ena achaneana te táinahu eta muñjipahi. Mavehapa eta cincoquene pan étapa eta apina jima. Máesenicapa eta anuma. Mahasulupayachapa ema Viya. Mayuvetucavacapa eta pan, tásiha, tjaracahavipa víti. Víti vjaracavacapa ena achaneana. ²⁰ Vinicapa vimutu, visatuhevacapa. Tásiha, vicaemacharichahavare doce saye ichapehiana táinicachaichahava eta vémacharajiana.

²¹ Ena tinicanahi eta juca, cinco mil ena ajairana eta náichapemurivahi, énerichuvare ena esenana énapa ena amaperuana.

Ena Jesús mapaicaeca eta une
(Mr 6.45-52; Jn 6.16-21)

²² Tiuri, ema Jesús tivanecahavipa viti mayeheana apóstoleana viávacuhayare eta te pacure. Vínapucayarehi viánueca te apachara eta cáquiure. Émasera manasiyarehi máevata-murihanumayarehi ena achaneana nachava te napenana. ²³ Te tamutupa eta macameta-vairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Étapa tavinehi eta yati, manasipa macarichuhi eta te cerro. ²⁴ Tacahe, víti te túpierecaviripahi, tichimaracahavipa eta muraca técativaca, viácapaquiuhapipahi. ²⁵ Te tjararahichichapa, vímahapa ema Jesús mapaicaecapahi eta une eta macapayasirahaviya.

²⁶ Eta vímairahi éma, vípicarinehi. Vímijachapa cunare. Vípiararecapa eta vipisirahi.

²⁷ Émasera ema Jesús téchajicahavipa:

—Vahi ecupica. Nútichucha. Étumechava —máichahavipa.

²⁸ Tásiha, ema Pedro majicapapa:

—Te yátupipuca pítiquenehi, piti Tata, pivanecanu nútí apanavare nupaicaeca eta une. Nuvaraha nupauchavi —máichapa.

²⁹ Ema Jesús majicapapa:

—Yare, pipauchanu.

Enevanepa tiúcupaichi te pacure ema Pedro. Tiyanapa mapaicaecapa eta une, macapayacayarehi ema Jesús. ³⁰ Étasera eta máramesirahi taicha eta muraca técativaca, timutserahavapaipa téricapaipa. Tásiha, tipiararecapa:

—¡Picatajicanu, Tata! ¡Néricainapal

³¹ Enevanepasera macaratavauchapa ema Jesús eta macuchucuirayarehi. Tásiha, máichapa:

—¿Ticamitisicavipapuca eta pipisirahi eta picasiñanuirahi?

³² Te tiávacuhapa ema Jesús émapa ema Pedro tayehe eta pacure, enevanepa tésamiricavahi eta técativaca. Tíchecapa eta táepacucairahi. ³³ Tacahe, víti apamuriana vicunachaineihi ema Jesús eta vímairahi. Vépyumurihapa te mamirahu. Tásiha, víchapa:

—¡Jéhevare piti Tata, Machichaquenévihí ema Viya! —víchapa.

Ena Jesús macanaraca ena nacajumaqueneana te avasare Genesaret
(Mr 6.53-56)

³⁴ Tacahe, te apanapa sache, viápechavavarepa viánueca eta cáquiure. Vítecapapa eta te apaquehe ticajiare Genesaret. ³⁵ Tásiha, ena achaneana ticavasanehi tayehe náimativanehi eta émairahi ema Jesús. Timetajiricacanapa náechapa namutu ena achaneana ticavasanehi te avasareana. Tiyananapa mayehe ema Jesús, námavacapaipahi namutu ena nacajumaqueneana. ³⁶ Nayaseacapa éma eta máisapirainahíni náemamajiaca eta tacheyarapi eta mamuiraha. Tacahe, nácani témamajiacanapahi, enevanepaipa tinaracanapahi.

15

Ena Jesús mametaca ena achaneana eta timaeperajicarahi
(Mr 7.1-23)

¹ Tacahe, títecapanapa ena apamuriana fariséoana tiásihanahi tayehe eta Jerusalén, énapa ena escribánoana. Témeñahavanapa eta mayehe ema Jesús. Ánipa naicha:

² —Pímaha, ena pímitureana vahi náítauchahini eta viyeherepiana. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étasera puca tacahehi eta pímitusiravacahi? —náichapa.

³ Tásiha, ema Jesús majicapavacapa:

—¿Tájaha tacayema éti apanavare, vahi itauchahini eta mavanairipiana ema Viya, tasapihapa epicauchahi eta eyeherepiana nanaquiruhi ena iáchucanaveanaini? ⁴ Ema Viya ani macahehi eta macavanairipirahi eta viyehere: “Pipicauchaya pémunacayareva ema piya ésupa esu pena”. Jucarihi eta apana vanairipi: “Écapacayarehi mácani tífemahi eta nacayemaquene mayehe ema máiya, ésupa esu maena”. ⁵⁻⁶ Étiserá vahi epicauchahini eta

júcana mavanairipiana ema Viya. Taicha te mararihi mácani achane ticamavahupuca me Viya eta máimahaqueneanahi, eta ímitucasivahi éti: “Vaipa tatuparaca ema achane eta máimicatasiraya ema maiya ésupa esu maena”. Tasapihapa, ichape ticapicahuhi eyehe eta eyeherepiana. Étasera eta mavanairipi ema Viya, vaipa epicauchahini. ⁷ ¡Éti ecajarehi apimirana! Tatupiruvahi eta máechajiriruvahi ema Viya, téchajisiahehi éti eta te Sagrada Escritura*. ⁸⁻⁹ Ánipa macahe: “Ena nani achaneana, tétserajicanuanahi te najaca; váhisera táetupicavahini te nasamureana. Téneuchavanahi eta nuyehe, tamapurujihisera eta náneuchiravahi. Nacaerajicahivare eta nuvanairipiana; tasapihapa náimicapicauhahi eta nayeherepiana táuchurechucha te napanereruana ena náchucanaveánaini” macahepa ema Viya.

¹⁰ Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara. ¹¹ Tájina máeperajina eta viáchanevana te vinicapuca eta vimacasipavahuiranimahini. Jácani tasiapaquenehi te vijaca, tájina tamaeperajicahivihini. Vahi étaparacaina. Étasera eta evainarajivana táuchureanapuca te ejaca, étapa eta evainarajipanereruanahi, jéhevare éta timaeperajicahahi —máichapa.

¹² Tacahe, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tiseamanahi taicha eta juca píchiravacahi —víchapa.

¹³ Émasera máichahavipa:

—Ena nani nacutihi eta ejare, vaipa émaimahi máechahini ema Tata Nucaiyaquene. Ticavepuricasianayaresera éna. ¹⁴ Ésamiricachucha. Vahi ecuimisiapava nayehe, taicha éna, púchuquianahi tayehe eta juca nímiturapiana. Ena púchuquiana, te tichurucacanapuca, tíáquipaicacanayarehi táicha vahi náimahahini eta nayanihayarehi —máichapa.

¹⁵ Tásiha, ema Pedro mayaserecapa:

—Picatajicahavi pímitucavahi apaesa vímatiequeneha eta juca pímicutiarachirahi eta táuchureanahi te vijaca —máichapa.

¹⁶ Ema Jesús máichahavivarepa:

—¿Énerichuvare éti mapanererurehehi? ¹⁷ ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinasareanahi, tatupiru te viami. Tásiha, te tíuchucapa, apanapa eta táuchusihahi. Vahi timaeperajicahavimahi. ¹⁸ Étasera jácani táuchurehi te vijaca tásihaquenehi te amahe eta visamure. Eta tamaurivahi eta náechajisirana ena achaneana, étara timaeperajicavacahi éna. ¹⁹ Táicha jácani táíñemahique-
neanahi panererucana, eta tásihaqueneanahi te nasamureana. Ema achane mapane-
rechahi maveha esu apana esena mayena ema apana achane. Esu esena supanerechahi suveha ema apana achane suima esu apana esena. Ema amaperuana napanerechahi eta natuhusivaya. Nácanivare, tipanerechanahi eta ticaparecana, tiámerecana, tivayua-
recana, téchajihiana. ²⁰ Tamutu eta juca panererucana tamauriqueneana, te náichahi ena achaneana, éta timaeperajicahi éna. Étasera jácani nanicaqueneana, tayanapanepuca vahi náichahi eta nayeherepi eta nasipavauchirava, vahi tamaeperajicaimahi —máichahavipa.

Esu ésuná esena apavasana sucasiña ema Jesús

(Mr 7.24-30)

²¹ Tacahe, tiámahavivarepa ema Jesús te apana avasareana táunavahi eta departamento Siria, návasa ena apaechajiriruvana. ²² Ánaqui, ticapayacahavipa esu esena. Supiara-
capaipa eta supauchirahi ema Jesús. Ánipa sucahe:

—Pájapanunu, tata. Píti yátupiquenevihu Cristo, ñivaneruvihu eñi Viya, vicuchapaque-
nevihu. Esu nuchicha ñávaháchahi eñi éreana, tétávicavahi eta sucatajivairahi. Picatajicanu,
tata, eta picanarasinanuini ésu nuchicha —suíchapa.

²³ Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévataca suyana esu suna esena apavasana tipiararecapahi te véquene —
vicahepa.

²⁴ Tásiha, ema Jesús máichahavipa:

—Jéhevare eta epanereruhi. Ema Tata tivanecanuhi nacarichu néchapajiricayare ena vijaneana israelítana. Nacutihi éna eta uvesana máqueneureana, taicha ticamunuanahi eta nujaneariraya —máichahavipa.

²⁵ Ésusera esu esena tépuyucapa te mamirahu. Suíchapa:

—¡Tátachicha, picatajicanupaini, pímicatcanu! ¡Picanarasinanuini esu nuchichasami! —
suíchapa.

* 15:7 Májurehi ema víyarahaini profeta Isaías eta juca máechajiriruvana ema Viya.

²⁶ Ema Jesús majicapapa:

—Nativa néchapajiricavacaya ena nujaneanana. Taicha vahi táurichahini ásapihahíni néchapajiricahehíni éti apavasanana émetavicahíni ena nujaneanana —máichapa.

²⁷ Esu esena sujicapapa:

—Énehinehi tacahehi, tátachicha. Yátupihi vahi pijaneananuinahini. Pájapanunusera, picatajicanuchuchaini. Vítí apanava vácasiñavahi eta piyehe eta vítátijivairaina —suíchapa.

²⁸ Ema Jesús majicapavarepa:

—Páurevi piti nuchicha, ichape eta picasiñavairahi eta nuyehé. Puiti títauchavayare eta piyasearapihi nuyehé. Nucanarasinaviyare esu pichicha —máichapa.

Jéhesare enevanepa tinaracahi esu amaperu.

Camurianahi ena nacajumaqueneana macanararuanahi ema Jesús

²⁹ Tacahe, tiyanavarepa ema Jesús. Véhicavarepa vítí apanava. Vichavavarepa te Galilea. Tásiha, vijuchechauchapaipahi eta cáquiure, vícaijuhéya eta te mávapahi apaquehe anuquerehi, te távihahi eta céroana. Vinasipanapa eta jena sácheana eta ánaqui. ³⁰ Tacahe, nacahepaipavare ena camuriqueneana achaneana te víávihahi vítí. Námaquenepanepahi ena nacajumaqueneana: ena masariana, énapa ena púchuquiána, énapa ena úpana, énapa ena túpupáiqueana. ³¹ Namutu ena nani nacajumaqueneana macanaracavacapaipahi éma. Ichaperinehi eta náramirahi ena achaneana eta náechajisiraipa ena úpana, énapa ena túpupáiqueana tinaracanapaipa, tíuripaipa eta napaisira ena masariana. Tímaíriranapaipa ena púchuquiána. Eta náurisamurevapahi, nacunachapaipa ema Viya.

Ema Jesús máenica ena cuatro mílqueneana achaneana

(Mr 8.1-10)

³² Tásiha, ema Jesús tíchuhavipa vítí mayeheana apóstoleana. Máichahavipa:

—Nujapanuvaca ena nani achaneana natiarihiqueneanahi ani, taicha mapanaripahi sache puiti eta nacahehi eta víyehé. Tájinahivare naviyahini nanica. Nujapanuvacaicha névatacavacahini, machu náquipaicava te achene taicha eta náecuavana. Vájapanu eta náecuava, vénicavaca —máichahavipa.

³³ Tásiha, vítí vijicapapa:

—¿Távihapucaini vítusivahini eta tinicacare eta te juca mávapahi vámahi? ¡Váhivare vítaparahaimahi vénicavaca ena nani camuriqueneana achaneana! —Víchapa.

³⁴ Tacahe, ema Jesús tiyaserechavipa:

—¿Áyanachaha eta pan eta ímaqueneanapahi?

Vítí vijicapapa:

—Jucarihi siéterine. Ánimurichicharinehivare eta jímachicha —vicahepa.

³⁵ Tásiha, macavanairipipa eta náejahapaimuriahíni namutu te apaquehe. ³⁶ Mavehapa eta siétequene pan, étapa eta jímana. Mahasalupayachapa ema Viya. Tásiha, mayuvetucavacapa, tíjarachavipa vítí. Tásiha, vítí víjaracavacapa ena camuriqueneana achaneana. ³⁷ Tacahe, vimutu vínicahi, vísatuhevacapa. Vícaemacharichahavare. Siétehi eta sáyeana táinicaruhi eta vémacharajiana. ³⁸ Eta nasimutuvahi ena achaneana, cuatro mílqueneana ena ajáirana. Natiarihihivare ena esenana énapa ena amaperuana. ³⁹ Te tamutupa eta juca, mavanecavacapa ema Jesús ena achaneana nayanapa nachava te napenana. Tásiha, éma tíavacuhavarepa te pacure. Viyanavarepa. Vícaijuhe eta te avasare Magdalena.

16

Ema Jesús mápechavare mayunacavaca eta namasuapajiraivahi ena fariséoana

(Mr 8.11-13; Lc 12.54-56)

¹ Tacahe, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerechahini eta tíaramicareana, máimerechavahini te yátupihipuca vanairucahi me Viya. ² Émasera majicapapa:

—Te cáperhichicha, te ímahahi te táitsirahi eta úcaji, éti ímijacha tímiyanavayare eta tíuriyare eta sácheana. ³ Te yáticarahi, te ímaha eta tímápicurume, tútsitsimehi, ímijachahi tíquivayare. Éti, ímijachavahi ímatiequeneha eta tapaisira eta anuma. ¡Tétavicavahisera eta emasuapajiraivahi! Taicha éti ímijachavahi religiósöhe, ímijachavavare ímatiequeneha eta mavarahaqueneanahi ema Viya, váhisera ávarahahini ímatiequeneha eta máimeruhehi ema Viya, te juca sácheana nucachanerahehi. ⁴ ¡Eti achaneana váinarajiqueneana! Núti nímatihe. Vahi esuapanuimahi, te nímerecapucaini eta tíaramicare. Tásiha, váhira étina tatuparaca ímahahini eta tíaramicareana. Ímahayaresera eta tíaramicare tacutiyare eta máichavaquenevahi ema víyahaini profetaíni Jonás —máichavacapa.

Tásiha, majunijicavacapa, tiyanapa.

Ena Jesús máimicuticha eta levadura eta náimiturapiana ena fariséoana
(Mr 8.14-21)

⁵ Tacahe, eta viánuesiravarepa eta cáquiure, vipanerechapaipahi eta vémitisisirapa eta pan.

⁶ Ena Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapavaicha tayehe, vahi ecuehica éna —macahepa.

⁷ Vítisera víti apóstoleana, eta véñamavairahi, víchacacapa:

—Tímicajachavíhi eta vémitisisirahi eta pan. Eta tacahe, macahehi tayehe eta levadura —víchapa.

⁸ Éna tímaticahavíhi. Tásiha, máichahavipa:

—¿Tájaha tacayema ecahechajiriruvahi eta vahi íámapahini eta pan? ¿Váhípuca ácasíñvahi eta nuyehe? ⁹ ¿Vuíchahacaru ácaicutiaraini? ¿Vuíchahápuca ímatinu? ¿Váhivare échahini eta nucaejapasirahi eta cincoquene pan nanicaquenehi eta cinco mlqueneana achaneana étapa eta náemacharajiana? ¹⁰ ¿Váhivarepuca écha eta síetequene pan naniruhi ena cuatro mlqueneana achaneana étapa eta náemacharajiana? ¹¹ Nímijachapa ecaicutiarayahéhi eta níchirahéhi eta échapiravainahini eta nayehe levadura ena fariséoana énapa ena saducéoana. Váhira étainahini néchajisihahini eta levadura tayehe eta pan —máichahavipa.

¹² Vipaenumavahi véchahi eta máichirahavíhi éma eta véchapiravainahini vahi vicucuti ena fariséoana énapa ena saducéoana eta apimirairanahi.

Ena Pedro máimereucha ena Jesús eta émairahi ena Cristo
(Mr 8.27-30; Lc 9.18-21)

¹³ Tacahe, te apanapa sache, viyanavarepa vipaica. Vicaijuhe eta te Cesarea máepiyarúhi ena rey Felipe. Te viánehipa, ena Jesús tiyaserechavipa:

—¿Tájaha nacayema ena achaneana eta nuyehe nuti Manerejirunúhi ena Viya? ¿Nájahapuca náimijachanuhi éna? —máichahavipa.

¹⁴ Vijicapapa víti:

—Ena apamuriana náimijachavíhi ena Juan, tichavahi téchepucahi. Ena apamuriana tímijachavianahí ena viyarahaini profeta Elías, téchepucahi éma. Ena apamuriana tímijachavianahivare ena viyarahaini profeta Jeremías; émapuca ena apana profetaíni antívuini, téchepucahi —vícahepa.

¹⁵ Ena Jesús tíápechahavivare tiyaserechaví:

—Étiyapa ¿nájaha ímijachanuhi nútí?

¹⁶ Ena Pedro majicapapa:

—Pítira yátupiquenevíhi Cristo, machichaquenevíhi ena yátupiquenevíhi Viya.

¹⁷ Ena Jesús majicapapa:

—Piti Pedro*, tétavicavahi eta pétupisiravahi taicha manacasamureruvíhi ena Tata Nucaiyaquene tiávihahi te anuma. Vahi étainahini eta máimiturapinahini piyehé mácani achane. ¹⁸ Nútí apanavare nutupiruva numetacaví. Píti picajarehi Pedro. Píti picutiyare eta mari, tétavicavayare eta pitumevaya. Namutu ena picutiqueneana eta pisuapiranúhi nútirahi yátupiquenevíhi Cristo, éna nuchaneranayare. Éna apanavare nacutiyareva eta mari eta natumevayare eta náehisiranúhi. Tájina vahi máratahaimahi macaetemavaca ena Váinaraji. ¹⁹ Píti picatuparahayare eta llave tayehe eta anuma, apaesa nasiapa nácani pijacapaqueneanayare píti —máichapa.

²⁰ Tacahe, tituparahavipa muraca ena Jesús nacuija vicumetaca eta émairahi ena Cristo.

Ena Jesús máimereucha eta máepenirayahéhi
(Mr 8.31-9.1; Lc 9.22-27)

²¹ Tacahe, ena Jesús tépanavapa tímétacahavíhi eta táicharachavayare eta máepenirayahé. Máichahavipa:

—Nutí nucatuparahahi eta nuyanirayahéhi te Jerusalén. Ánaqui nucatajivayahéhi ichape naicha ena tugarairucana, énapa ena aquenucarahana, énapa ena escribánoana. Éna, tímicapacananayahéva. Mapanayahéichuhísera sache nucaheyare eta népenirayahé. Tásiha, nuchavayahéhi néchepuca —máichahavipa.

²² Tásiha, máiputiscapa mámahí ena Pedro ena Jesús. Ánaqui macajachapa, máijarasiravahi eta mapanererúhi:

—Nútí vahi návarahahini táitauchavahini nacapavíhini.

* **16:17** Ena Jesús téjichahi te máechajiriruva hebreo, máimijarechahi ena Pedro: “Simón, machicha ena Jonás”.

²³ Tacahe, ema Jesús máichapa ema Pedro:

—Piti téjecapavahi eta pipanereruhi. Pínajica eta juca tamauriqueneanahi. Pivarahapuca pihapapicayare eta mapanereruhi ema Viya. Eta juca pipanereruhi tacuti eta mapanereruanahi ema Satanás, énapa ena machanerana —máichapa.

²⁴ Tásiha, máichahavivarepa víti:

—Nácani navaraha náehicanu, tacamunu náinajicava tamutu eta tihapapiricavaca eta náehisiranuhi. Nacaravahuyareva eta nímiturapiana. Nájaracavavare eta táimicapasiraina eta náehisiranuhi. ²⁵ Nácanisera téñamanahi eta náitaresira, tiávamirahuanaya eta náehisiranu, énajivayare ticamitiequenehavanaya eta náitaresira. Énasera nácani yátupiquenehi tjaracavana téhicanuana, tayanapane táimicapacainepuca eta náehisiranuhi, éna tíujicavanayare tíuchuchuanayare eta náitaresiranaya. ²⁶ Énerichuvare nácani tacañamararuanahi eta nacaimahaqueneíraya te juca apaquehe, tájina náimaequenehaimahi, taicha eta tacañamarasiravacahi tahapapiricavacahi tayehe eta náuchucuirayarehini. Taicha vahi máratahaimahi mácani achane mavachachahini eta máuricacarevaya te apana vítaresira. ²⁷ Taicha nuti Manerejirunuhi ema Viya nuchavayarehi. Námainapaipa eta majaraiva ema Tata, nuchachánapaipavare ena ángeleana. Te jena sácheyare, nijaracavacainapa eta náicuchianahi ena nuchanerana te tíurihi eta nacaemataneasiranuhi, te jácani náemataneanapachuhi. ²⁸ Nutupiruva numetacahe: Púitiripa éti, etiaríhi enerejicavayare vahi épenavanémahi, ímahanumaya eta nucatuparahairaya aquenucanuirayare nuti Manerejirunuhi ema Viya —macahepa.

17

Emá Jesús tihapamaichava eta máimahi
(Mr 9.2-13; Lc 9.28-36)

¹ Tiuri, sáisipa sache eta vinasirahi ánaqui. Tacahe, tinaquicahavipa ema Jesús. Nacarinehi máma ema Pedro, ema Jacobo émapa ema Juan. Tiyananapa eta te étana cerro anuquehepana. ² Eta ánaqui, náimahapa tihapamaichavahi eta máimahi ema Jesús te namirahu éna. Eta mamira, tétavicava eta tajararasira tacuti eta sache. Eta mamúriha, tétavicava eta tajanunumesirahi, étapa eta tajapuvahi. ³ Tásiha, tiáramicareanavarepa tímrecavana ena apinana ajairana: ema víyarahaini Moisés émapa ema víyarahaini profetaíni Elías. Téchajiricavanaripahi mayehe ema Jesús. ⁴ Tásiha, ema Pedro tímisiapavapa téchajicapa. Ánipa macahe:

—Tata Náquenu, tétavicavapa eta viúricacareva eta víavíhairahi eta áni. Tíúrihipucaini vépiyarechahini eta epenahuinapachuhini. Pipenahuarichuhini piti, mapenainarichuhivaréni ema Moisés, émapaini ema Elías —macahepa.

⁵ Tacahe, téchejicaichaha ema Pedro, tiáramicarepa eta úcaji táepacumurihahi éna. Tétavicavahísera eta tajanunusirahi eta úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunarquenehi. Tétavicavahi eta núrisamurevahi máicha. Éma esuapayti, mapenainarichuhivarare —macahepa.

⁶ Eta nasamirahi ena vichamuriana, tipicanarinehi. Tépuycanapa titsiucapairicanapa.

⁷ Tásiha, ema Jesús témeñahavapa eta nayehe. Máemamasicavacapa. Máichavacapa:

—Échepuca, nuchichanaveana. Vahi ecupica —máichapa.

⁸ Tacahe, te téchepucanapa éna, nájinaripahi éna apinana náimahaqueneanahi. Macarinehi ema Jesús.

⁹ Te tichavanapa tayehe eta cerro, ema Jesús mametacavacapa vahi nacumetajiricahini eta juca náimahaquenehi. Tiámainucava te máechepucapaini te máecari éma. ¹⁰ Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare títareca ema víyarahaini Elías, tinapucayarehi eta máimeresiravayare piyehe piti Cristo. ¿Énapuca téjecapavanahi ena escribánoana? —náichapa.

¹¹ Ema Jesús majicapavacapa:

—Yátupi ema víyarahaini Elías títecapayarehi, máetupiripanayarehi tamutu. ¹² Nútisera nutupiruva numetacahe: Títecaripahi ema Elías, váhisera náimatihini ena escribánoana. Váhivare najacapahini éma ena tuparairucana. Nacatianacahi nacapacahi éma. Ene nuchaheyare nuti Manerejirunuhi ema Viya, ticatianacuanayarehiva, éneyaréichuvare ticapacuanayare —máichapa.

¹³ Tásiha, ena vichamuriana náechapa eta máechajisihairahi ema Jesús ema Juan Tícachasiricarahihi.

Éma Jesús macanaraca éma amaperu mávaháruhi éma éreana
(Mr 9.14-29; Lc 9.37-43)

¹⁴ Tacahe, te tichavanapa éna tayehe eta viávihihi víti énapa ena achaneana, témeñahavapa éma émana achane mayehe éma Jesús. Tépuycapa te mamirahu. Máichapa:

¹⁵ —Picatajancanu, tata, pímicatacanu. Picanarasinanuini éma maca nuchicha. Tétavivavahi eta macatajivairahi. Tacaeharipairica te tanahaca eta majuma. Tatiarihi te táquipaica te une, téhepuca yucu. ¹⁶ Námaripahinéni nayehe ena pímitureana, váhisera náratahahini nacanaracahini éna —máichapa.

¹⁷ Éma Jesús máichahavipa:

—¡Tétavivava emasuapajiravavaca eti achaneana! ¡Cúverarecachasicáini eta nucamichirahenahini! Iáma ani éma amaperu —máichapa.

¹⁸ Tacahe, éma Jesús, muraca eta máevatasiráhi éma éreana, máinajiacapa éma amaperu. Enevanepa tinaracavanehi éma.

¹⁹ Tásiha, te táequenepa, víti víputsiacavapa éma Jesús, viyaserecapa:

—¿Tájahapuca tacayemahi eta vahi váratahahini vicuchuca éma éreana mayehe éma amaperu? —víchapa.

²⁰ Éma Jesús tijicapahavipa:

—Éta tichahi éti vuichaha yátupinahini ácasifñavahini me Viya. Nutupiruva numetacahe: Te yátupiquenenahini ácasifñavahini mayehe éma, eratahayarehini. Váhinéni tácomesahini ichapenahini eta ecasifñavairahi. Tayanapanepuca ánichichainaichu eta ecasifñairavahi, tacutíhipucaini eta táquichicha eta mostaza, tamuturihini erataha. Étaripa eta jácani cerro ávarahahini ecayejea, eratahayarehi. Te íchapuca: “Piyecava eta te juca. Piyana ánaquipana”. Tásiha, tiyjecavahini éta. Jéhesare, tájina tacucajerarajihini eyehe. ²¹ Étasera eta juca, muracapanahi éma éreana éma tiávahácahi éma maca amaperu. Éta vicuchusira, tavaraha víchanumayare eta ayuna éta pa eta viyujaraca —máichahavipa.

Tiápechavavare éma Jesús máimereucha eta máepenirayarehi
(Mr 9.30-32; Lc 9.43-45)

²² Tacahe, eta vipaisirapahi tayehe eta avasareana eta te táunavahi eta Galilea, tiápechavavarepa tímecatavahi éma Jesús eta máepenirayarehi. Ánipa macahe:

—Nuti Manerejirunuhi éma Viya, járajapainapa eta sáchezare tíjararecanuyare mácani achane nayehe ena ticatianacanuani. Ticaratacanuanayare éna. ²³ Ticapacanuana-yare. Néhepucayaresera te mapanaquenenapa sache —máichahavipa.

Tacahe, eta visamirahi, ichaperinehi eta véñamiravahi víti.

Ticavacha eta impuesto tayehe eta Templo

²⁴ Tacahe, te vítecapapa tayehe eta viávasa Capernaúm, natiarihihi ena ticobraracarahiana eta impuesto tayehe eta Templo. Nárajapapa náechajipanahi éma Pedro. Nayaserecapa:

—¿Mavachachapuca éma eyehe máestro éti eta impuesto tayehe eta Templo? —náichapa.

²⁵ Éma Pedro majicapapa:

—Mavachacha —macahepa.

Te visiapayarepa te peti, éma Jesús máechajicanumapa éma Pedro. Ánipa macahe:

—¿Tájaha picayema, piti Pedro, nájahasica tatuparacahi navachachayare eta impuesto mavarahaquene éma mácani rey? ¿Énapuca ena machichaqueneana, énapuca ena machan-erana? —máichapa.

²⁶ Éma Pedro majicapapa:

—Éna machanerana.

Tásiha, éma Jesús macahepa:

—Tiuri, víti machichahavahi éma Viya. Vahi tatuparacahini vivachachahini víti eta juca impuesto. ²⁷ Vinaquicasera eta impuesto apaesa tacuija tacucayemacare nayehe ena achaneana. Piyanyare pénica eta jima te cáquiure. Te piáquijicapa eta péñirave, eta tñapuca jima tacaratacaya eta péñirave, tatiarihiyare eta plata te tajaca. Pivehainapa eta reale, tásiha taratahayare tavachacha eta nuyehé parte níti, éta pa eta piyehé píti —máichapa.

18

¿Nájahapuca éma apóstole ticapichupana?
(Mr 9.33-37; Lc 9.46-48)

¹ Tacahe, te jena sácheanahi, viyaserecapa éma Jesús:

—¿Nájahapuca éma ticapichupanaya víyehé víti te táitecapapa eta sache aquenucaviraya? —vicanauicasera eta impuesto apaehepa.

² Tacahe, máichuhapa éma Jesús éma émana amaperuchicha, macatupihapa te vimirahu.

³ Máichahavipa:

—Nutupiruva numetacahe: Ínajicayare eta ecasiñavavaisira. Echávayare ecutiyare ema maca amaperu, apaesa ítujicava esiape ecachanenu tayehe eta néjasihayare. ⁴ Nácani navarahahi ticapichupananayare te jena néjasihayare núti, tacamunu mánsuanayare. Vahi máitucaimahi tiácapauchava. ⁵ Tacutiquene nácani tijacapanayare ena amaperuana nichavenénahi núti, ena nani yátupihí náimereca eta náemunasiranuhi núti, taicha tímicitijiricavahi nútinhini najacapa.

Ichape eta máicuñayare mácani tímiaquipaica te pecatu ena amaperuana
(Mr 9.42-48; Lc 17.1-2)

⁶ Tacutiquene mácani tíaquipaicaya ema émana amaperu téhicanuhi, tiúripanahipucaini máepenahini mativainahini éma. Váhirichupucaini macucaicuñahini, taicha vahi macuaquipaichihini ema amaperu tayehe eta pecatu. ⁷ Taicha muracayare eta náicuñayare nácani tímiaquipaicanayare ena achaneana. Yátupi vahi téjiacavaimahi eta tímiaquipaicaya ena achaneana tayehe eta pecatu. Ichapesera eta náicuñayare nácani ticatapurivanahi eta námiaquipaisirahi ena achaneana tayehe eta pecatu.

⁸ Eta tacaha, te táimipecaturchahepuca eta evahu, étapuca eta ívapeana, tiúripana eyuchatica, iáquijica; apaesa vahi tacuimiauqaicahe tayehe eta pecatu. Tiúripana tájeiacava eta iáquehe eta esiapirayare te anuma, váhisera tacumutuhi tasiapa te yucu eta iáquehe. ⁹ Étaripavare eta iúquiha, te táimiaquipaichahepuca tayehe eta pecatu, tavarairahi táimahayare eta tamariqueneana tájiparacana, tiúripana evечuhauquichava iáquijicaya. Taicha tiúripana eta ejacapacarehi éti eta esiapiraya te anuma tayanapane tájeiacavapuca eta iúquiha. Páureshamisera éti, te náepujuquichahepuca te yucu infierno, tamutuyare eta iáquehe.

Ema Jesús máimicutiarachinahi te témitiaca étana uvesa
(Lc 15.3-7)

¹⁰ Vahi ecuepuru ena amaperuana. Numetacahevane: Nararihi ena ángeleana tijaneacavacahi éna. Titupajjiacavanahi eta nacatiuchiravacahi ena amaperuana, máicha ema Viya. ¹¹ Nuti Manerejirunuhi ema Viya, eta tímitecanuhi nucuchucuhayare nácani tiávacuhanahi táifehiquene eta náitaresira.

¹² Esamanuchaha. Nímicutichinaheyare puiti. Matiarahi ema émana achane. Ticayehe eta cien uvesana. Te témitiychapuca eta étana, ema achane tiyanayarehi matanuca eta táemitaruhi. Eta máeñamiravahi, manaquicayarepa eta apamuriana noventa y nueve te majanearesihahi. ¹³ Te máichimavapa, tichavapa. Tétavicava eta máurisamurevapaipahi eta mámirapaipahi eta táejjaruvahi.

¹⁴ Ene macahe ema Tata Ecayiaquene éti, ema tiávihahi te anuma. Vahi mávarahahini náemitiacahini ena nani amaperuana.

Tatuparaca viperdonacha ena téjcapavana eta viyehe
(Lc 17.3)

¹⁵ Te tatiarhipuca eta máejecapiravahi ema piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta máejecapiravahi. Te tisuapavíhi éma, tájinapa íchiravaimahi. Tiúrinapa eta ítaresirana. ¹⁶ Téhesera te vahi macusuapavi, pitanucayare apinanaina ena piyeheanayare testigo apaesa tasuapacarepa eta piconsejarapiyare. ¹⁷ Te vuíchaha macusuapavi, pimetcapava namutu ena pichamurianahi picatupihapa te namirahu. Téhesera te váhiquenechapuca macusuapahe, tímataréinapa éma eta mamasuapajiraivahi me Viya. Vaipa ecuimisiapava mayehe, taicha eta mamasuapajiraivahi. ¹⁸ Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasirichuhi. Émaripa ema Viya, máimarracahi eta evarairahi etupirica éma. Téhesera te máeneuchavapuca, emetacayare éma eta táepahairaripa eta mapecatura. Ema Viya, tiúriripa eta máimaira.

¹⁹⁻²⁰ Énerichuvare te etiarihipuca éti te juca apaquehe apinahehi, mapanahehipuca ecurujicacahi te níjare núti, nutiarhiyarechuhivare núti te emuri. Tásiha, te étanaichuhi eta epanreruhi, ticuticacahi eta iyaseserepi te mayehe ema Tata, éma tjaracaheyare — máichahavipa.

²¹ Tásiha, ema Pedro mapauchapa, mayaserecayarehi ema Jesús. Ániapa macahe: —Tata, ¿áyahepuca tatuparaca nuperdonachaya ema nuparape, te máejecapava eta nuyehe? ¿Táuricapuca siéteheyare eta nuperdonachirayare? —macahepa.

²² Ema Jesús majicapapa: —Vahi tácarichuimahi siétehéinarichuyare eta piperdonachirayare. Tímiyanavaya-rechucha eta piperdonachiranayare. Vahi pitupachaimahi —máichapa.

Ema Jesús máimicutiarachina ena achane máuriraha vahi máitucaimahi maperdonacha ena maparape

²³ Nuti Manerejirunuhi ema Viya nucuti mácani rey rícoquenehi te mavarahahi máechayare eta nanteveana ena mamusurana. ²⁴ Tásiha, námapaipahi ema tétavícavahi eta manteve. Tisintevapanahi éma. ²⁵ Tásiha, ema achane musu, tájina maviyahini mavachachihahini ema máquenuhi. Tacahe, ema rey macavanairipipa macajjararecasi, namutu esu mayena énapa ena machichanaveana, étapa eta macayehéqueneanaini te mapena, apaesa mavachachahini apaesachichainarinehini eta mantevehi. ²⁶ Tásiha, ema achane musu tépuyucapa te mamirahu ema máquenu. Ánipa máicha: “Tátachicha, picatajicanuhini. Picuchapanuini. Te nítucavapaini, nuvachachapaini tamutu eta nunteve piyehe” macahepa. ²⁷ Jéhesare, ema máquenu majapanupa. Maperdonachapa tamutu eta mantevenihini. Macaiticapa. ²⁸ Vuíchahasa táyerehini eta máuchusirahi, mácapajicapa ema apana achane ticantevehi eta mayehe. Macompañeroinihivare. Váhinéni camurinahini eta mantevehi. Macaratachisera, macobrachapa. Masemaracapa macapitinucapa. “Pivachachanu puitirichu” máichapa. ²⁹ Ema achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te nítucavapa, nuvachachavipa”. ³⁰ Váhiquesera maperdonachahini. Máimicasiapapa te cárcel, mavarairahi mavachachavaneyarehini eta mantevehi. ³¹ Tacahe, te náimahapa ena apamuriana machamurianahi, ticatirinehi te nasamure eta náimairahi ema nachamuri présuiraipahi. Tiyananapa nametacahi ema náquenu tamutu eta máichavaquenévahi ema nachamuri. ³²⁻³⁴ Tacahe, ema máquenuhi máimichuhapa ema tipresurecainihini. Ichape eta masemanevahi. Ánipa maicha: “¡Piti máeperajitataji musu! Váiparinehi péchavahini eta nuperdonachiravíhi eta pinteve ichapequenehi. Taicha eta piyaseasiranuhi, nuperdonachavíhi. Piúriháinehi pájapanuhini píti apanavare ema pichamusuvahi, tácutihini eta nuperdonachiravíhi núti” máichapa ema rey. Tásiha, macavanairipipa náicuñaca, étapa mavachachayarehi tamutu eta mantevehi.

³⁵ Tacahe, ema Jesús te títapiricapa eta juca máimiturapiana, ánipa macahe:

—Ene máichaheyare ema Tata Nucaiyaquene éti apanavare, te vahi ecuituca eperdonacha nácani eparapenaveana náejecaparuvanahi eta eyehe —máichahavipa.

19

*Ema Jesús tímiturecahi máechajisihahi mácani achane tñajicahi esu mayena
(Mr 10.1-12; Lc 16.18)*

¹ Te tamutupa eta juca máimiturapianahi ema Jesús, víuchucapa te Galilea. Vivanapa tayehe eta Judea. Viánuecapa eta cajacure Jordán te tinapaicahi te táuchusine eta sache.

² Camuriana ena achaneana tíurujicavanahi. Ánaqui macanaracapaipavare ema Jesús ena nacajumaqueneana.

³ Tásiha, títecanapapa ena apamuriana fariséoana. Napauchapa ema Jesús. Natanuachi eta tivíuchayarehi éma. Ánipa náicha:

—Vivaraha pimetacahavi ¿te táuricapuca máinajica ema achane esu mayena taicha jácani tájiparacana? —náichapa.

⁴ Ema Jesús majicapavacapa:

—Németeaca vahi ácaicutiarahi eta échajicuirá eta Sagrada Escritura. Te tépanavainapa acane, ema Viya májaracahi ema achane ésunayareichuhi esu mayenayare. Esu esena émanayareichuvare ema suímayare. ⁵ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títáticacanayare. Eta navehacacairahi, tímicutijiricavaipa étanarinehi eta náqueheana” macahepa ema Viya. ⁶ Tacahe, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini náinajicahini. Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

⁷ Tásiha, ánivare nacahe:

—¿Tájahasica tacayema eta mavanairipíhi ema víyarahaini Moisés ticaepiyayarehi eta ajureca suyehe esu esena te máinajisirayarehi ema suíma? —náichapa.

⁸ Ema Jesús majicapavarepa:

—Ena iáchucanaveanaini, te jácani eta nasemirahi, náinajicapa ena nayenana. Ema víyarahaini Moisés máisapahi tinajicacana táichavenehi eta tájinairahi eta náimitucacarevainahini, táetaviuchirahi eta namuracasamureva. Váhisera máuricahini ema Viya eta náinajicahini. ⁹ Puiti nuvaraha numetacahé: Te máinajicapuca esu mayena mácani achane, te tájinapuca suíchiravainahini; tásiha, mavehapa esu apana esena, tícapeaturaipahi me Viya. Tacutiquene, mácani mavehahipuca súcani esena máinajiruhi ema suíma, tícapeaturaipavare éma, taicha ésu, matiaríhichahahi ema suímaquenehi —máichavacapa.

¹⁰ Tacahe, te víputsiacavavarepa, viti mayeheana apóstole víyaserecapa ema Jesús:

—Te énehipuca tacahehi eta juca, eta vivira viti ajairana esu esena, tiúripaichuhipuca vahi vicutanuca esu esena —víchapa.

¹¹ Ema Jesús máichahavivarepa:

—Vahi ámutu árataha ímatiequeneha eta juca. Nararihisera tinerejicavanayarehi náimatiequenehayare máicha ema Viya. ¹² Nararihi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararihivare ena ticavecuhianahi, navetijipa éna vaipa náesenicaimahi esu esena. Nararihivare ena apamuriana tinerejicavanahi vahi natanucahini esu nayenainahini, navarairahi tacuija jácani tahapapicahini eta nacaemataneasiraya ema Viya. Ticunachacarepanayare ena tíratahanayare eta juca náijarasirava yátupiquene nacaemataneacaya ema Viya —máichahavipa.

*Ema Jesús mayujaraucha ena amuyana
(Mr 10.13-16; Lc 18.15-17)*

¹³ Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tíamanapahi ena amuyana. ¹⁴ Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna —máichahavipa.

¹⁵ Tásiha, máemamahacavacapa ena amuyana, mayujarauchavacapa. Te tamutupa, viyanavarepa te apana avasare.

*Ema achane rico téchajiricava mayehe ema Jesús
(Mr 10.17-31; Lc 18.18-30)*

¹⁶ Matiarahi ema achane amaperu rico. Mapauchapa ema Jesús. Mayaserecapa:

—Tata maestro, piti piúrique. ¿Tájahapucaíni eta nícharacavahíni eta nítujisiravaina me Viya máichecuaraquirénahini eta nítaresira? —máichapa.

¹⁷ Ema Jesús majicapapa:

—¿Tájaha tacayema pímiarechanu “Piti piúrique”? Mararihi ema Viya. Jéhevere éma, tétavicavahi eta máurivahi. Téhesera te pivarahapuca pécha te apana vítaresira, pisuapayare eta vanairipiana —máichapa.

¹⁸ Mayaserecavarepa ema achane:

—¿Tájahasica eta vanairipianahi eta nusuapaqueneya?

Majicapavare ema Jesús:

—Eta juca eta mavanairipiana ema Viya: Vahi picucapareca. Vahi picuveha esu esena apayena. Vahi picuamereca. Nacuija pépiyéqueneruina. ¹⁹ Pipicauchayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

²⁰ Tacahe, ema achane majicapapa:

—Tamutu eta juca nusuapahi nítauchahi. ¿Tájahasera puca eta jácani néjequeruichahahi? —macahepa.

²¹ Ema Jesús majicapavare:

—Te pivarahaha pítaucha tamutu, piyana píjararecaya tamutu eta pímahaqueneana. Tásiha, píjaracavacapa ena páureana. Jéhevere éta, píjacapayare eta pímahaqueneayare te anuma táitsivayare. Te tamutupa eta juca, pítecavanepa péhicano —máichapa.

²² Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanapa tipanererecapaipa.

²³ Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujíhi eta náijarasiravainahini eta náehisiranuinahini ena rícoana eta nasiapirainahini te anuma. ²⁴ Esamanuchaha. Eta juca tímicutijiricavahi eta vípera camello, máitujíhi tánucuhahini te támicuejehe eta parirapa. Ene nacahehi ena rícoana —macahepa.

²⁵ Eta visamirahi viti, viáraminehi. Víchacacapa:

—¡Tétavícvavahi eta tamáitujicacarevahi! ¡Nájina títujicavaimahi náuchucuhahini!

²⁶ Ema Jesús tímararachavipa. Tásiha, máichahavipa:

—Nájina émanaina achane émajivainahini ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya. Tamutu marataha —máichapa.

²⁷ Ema Pedro máichavarepa:

—Vítisera, Tata, vinaquicahi tamutu eta vicayehequeneanahi, vivarairahi véhicavi. ¿Tájahasica eta vímahaqueneya? —máichapa.

²⁸ Ema Jesús majicapavarepa:

—Nutupiruva numetacahe: Járápayare eta sáchevayare, tacaitsivairayare tamutu arairuya. Tásiha, nuti Manerejirunuhi ema Tata néjacainapa te tajarahiquenehi trono. Tásiha, eti éhicanuanahi éjacainavarepa tayehe eta dócequene trono. Ecavanairipinapa nayehe ena dócemuriqueneana vijaneanana israelítana. ²⁹ Tásiha, emutu eti ena quicanahi eta epenana, ejunijicahivare eta ticachichaheana*, ena eparapenaveana, ena echichanaveana, eta eyehe apaquehe, táichavenehi eta éhisiranuhi puiti, tiápajucavainapa camuripanyare ena ejaneananayare étapa eta ímahaqueneanaya. Énerichuvare táurivayare eta ítaresira máichecuaraquirenapa. ³⁰ Maverahesera eti etiarihiqueneanahi puiti, váhirichuhi ecapicahuhini. Te jena sáchevayare, ichapepanainapa eta ecapicahuiraya. Ena puiti ticapicahuanahi, te táitachavapa te jena sáchevayare, énapavainapa téquenehanayare.

20

Ena Jesús máimicutichahi ema achane rico tiuri eta mavachachira ena ticaematanezechana

¹ Te jena sáchevayare te níjaracahénapa eta ícuchiyare eti nuchanerana, tacuti eta mavachachirahi ema émana achane ticayehe eta ichape quinta úvaquiji nayehe ena ticaematanearahiana. Ema maca mayatiruhi tipaica matanuca ena achaneana ticaemataneanayarehi mayehe. Tíreecanayarehi eta uva. ² Te títuca vapa ena ajairana, mametacavacapa eta mavachachirayarehi étana reale te sache. Tiúrihi eta mavachachiravacahi. Mavanecavacapa tiyanana tayehe eta náireresihayarehi. ³ Tásiha, macamunichahava ena apamuriana achane. Te las nuévapa sache, tiyanavarepa te plaza. Máimahainevare ena apamuriana ajairana máemataneanahi. ⁴ Máechajicavarepa eta náireresirayarehi. Mametacavacavarepa eta táurivayarehi eta mavachachirayarehi. Tiyanavarepa éna, tíreecanahi. ⁵ Te las dócepa sache, tiyanavarepa matanuca ena apamuriana. Títucavavare, máevatamurivare tíreecanayare. Te las trespa sache, tiápechavavare tiyana títuca vavare ena apamuriana, énerichuvare tíreecanayarehi. ⁶ Te las cincopa sache, tiyanavare tiúchucahi tayehe eta plaza. Títucavavare ena apamuriana ajairana máemataneanahi. Tásiha, máichavacapa: “¿Tájaha tacayema tájina ématanenahini puiti jena sache?” ⁷ Éna najicapapa: “Nájina náechejicahavíhini”. Tásiha, ema máichavacapa: “Eyana éti apanava íreeca ánaqui te nuyehe quinta úvaquiji”. Mametacavarepa eta táurivayarehi eta mavachachiraya. ⁸ Tacahe, te yátipa, mametacapa ema mayehe empleado máichuhavacapa namutu, mavachachavacayarepa. Mavarahahi náinapuca nacavacha ena náequeneruanahi ticaemataneana. Nasapihapa téquenehanahi ticavachana ena náinapureanahi. ⁹ Tásiha, ena nasiapaqueneanahi te las cincopa sache, mavachachavacapa ema achane eta étapevacahi eta reale, tacutirichuhi eta navachahi ena ticaemataneanahi tamutu sache. Énapa ena nasiapaqueneanahi te las trespa sache, énerichuvare eta étapevaca reale eta navachahi. ¹⁰ Tacahe, te ticavachanapa ena náinapureanahi tisiapana, náimahapa éna tacutirichuhi eta navachanahi ena náequenereruqueneanahi. ¹¹ Tásiha, tisemanapa mayehe ema náquenuhi. ¹² Ánipa nacahe: “Ena nani náequeneruanahi títecapana, vicutivachavacaichuhi eta navachahi, étanainehinéni hora eta nacaemataneerahi. Tacutirichuhisera eta vivachahi viti vínapureanahi. Váhiquene táuricaimahi eta juca, taicha ichapemuríhi eta vicamichirahi viti eta tájireva muracaquene eta sache. Táurica vicachuricavacayarehini éna eta navachahi” nacahepa. ¹³ Émasera ema náquenu majicavacapa: “Váhira nucaetmahémahi éti. Énaripa ena náequeneruanahi, váhivare nucaetmahavacaimahi. Tínunahi eta nuvachachirahehi étapevacahi eta reale níjaracahe. Vahi ecusema. ¹⁴ Ésamiricavachucha. Evachachucha eta juca evachahi. ¹⁵ Núti néchinava taicha nuyehirichuhi eta plata. Nuvaraha ácuticacahini eta evachana emutu. ¿Éti ecapinarunupapuca eta núrívahi nayehe ena nani?” máichavacapa.

¹⁶ Ema Jesús macahevarepa:

—Ene nacahevare te jena sáchevayare, nácani náequeneruanahi téhicanuana, éna nasapihayare tínapucana. Tásiha, nácani náinapureanahi, nasapihayare téquenehanayare* —macahepa.

* **19:29** Te jácani apanana versiónéana, tatiarihi te juca lista eta táechajiriruva “ena nayenana”. Tájinasera nalis-tanahini te libro antivupanahi. Eta tacahehi, vímatiequeneha vahí manacahini ema Mateo. Mácani apana achane mavejuchahipuca te Lucas 18.29. * **20:16** Te jácani apanana versiónéana, tatiarihi eta juca táechajiriruvana “porque muchos son llamados, pero pocos son escogidos”. Tájinasera eta juca táechajiriruvanahi te libro antivupanahi. Eta tacahe, vímatiequeneha vahí manacahini ema Mateo. Mácani apana achane mavejuchahi eta juca te Mateo 22.14.

*Éma Jesús tíápechavavare máechajisiha eta máepenirayare
(Mr 10.32-34; Lc 18.31-34)*

¹⁷ Tacahe, eta vipáisirapahi te achene te vicaijuhepa eta Jerusalén, típutsiacahavipa éma Jesús viti dócequeneana apóstoleana. Máichahavipa:

¹⁸ —Ímaha púiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi éma Viya. Ticaratacanuanainapa éna tuparairucana. ¹⁹ Tímicapacuanayare taicha tíjararecanuanainapa nayehe éna suntaruana romanoana. Éna, nájina najapanuquenéna. Tícaecahinuanainapa. Téstacuanayareva. Tétatacanuanayareva te crusu. Tásihasea, te mapanaquenéna sache, néchepucainapa te nécari —máichahavipa.

*Ésu naena éma Jacobo émapa éma Juan suyaseaca éma Jesús eta macajupahavahini éna suchichanaveana
(Mr 10.35-45)*

²⁰ Tásiha, témeñahavapa ésu naena éna vichamuriana éma Jacobo émapa éma Juan, suámavacapaipahi éna. Tépuycapa ésu te mamirahu éma Jesús, suyaseacayarehi énaínahini majapanahainahini éna suchichanaveanahi. ²¹ Éma mayaserecapa:

—¿Tájahasica écamunu, nuchicha?

Ésu suíchapa:

—Nuvaraha pácachanéni éna nuchichanaveana tayehe eta péjasihayare picavacureraya. Náejacahini te píchacaya, éñi éñina te pívaure, éñi apana te sapa —suíchapa.

²² Éma Jesús majicapavacapa éna:

—Éti, vahí ímati tájahapuca eta nátajivayare nácani nujupahanayare. ¿Eratahayarepuca écamicha eta íchavaquenévayare ecatajivairayare, ecutinuyarepuca eta nucamichirayare nútí? —máichapa.

Éna najicapapa:

—Virataha vicamicha —nacahepa.

²³ Tásiha, máichapa:

—Yátupi íchape eta ecatajivairaya, vicuticacaya eta nacapasirahaviyare. Étapasera eta éjasirayare eta te nuchacaya, vaipa nútina necha nucaejahehíni. Éma Tata Nucaiyaquene, émahí tinerejicayarehi éna nujupahanayare —máichapa.

²⁴ Tacahe, eta visamirahi viti díesqueneana mayeheana apóstole, visemapa nayehe éna apinana. ²⁵ Émasera éma Jesús máichahavipa. Ánípa macahe:

—Écharichuhi éti éna aquenucana tayehe eta avasare, muraca eta nacavanairipira. Énaripa éna tuparairucana, tétaavicavahi tisuapacareanahi eta nacavacurerahi. ²⁶ Váhísera eucuahehi éti nayehe éna echamuriana. Mácani tímerecavahi ticapicahupana, tacamunuhi máitativacayare éna apamuriana. ²⁷ Te etiarihivarepuca eti evarahahi ínapuca, tacamunuhi ímerecavaya navanarahayarehi éna echamuriana. ²⁸ Ecutinuyare nuti Manerejirunuhi éma Viya. Vahí étaina tímitecanu nucaítaticasihini. Nútíyarehi nútítihe. Énerichuvare njaracavayarehi nímicapacava íchavenequeneanainahi éti camuriqueneanaya nucuchucureanaya —máichahavipa.

*Éma Jesús macaimairicavaca éna apinana púchuquiana
(Mr 10.46-52; Lc 18.35-43)*

²⁹ Tacahe, te vijunijicavarepa eta avasare Jericó, camurianahivare éna achaneana ticavasannahi tayehe, téhichavianahi. ³⁰ Natíarihi éna apinana ajairana púchuquiana. Téjacanahí te achenechacaya. Te nasamapa éma Jesús eta mánuucirapahi, típiararecanapa. Ánípa nacahe:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

³¹ Natíarihísera éna achaneana vahí náuricahini eta napiarasirahi éna púchuquiana. Navarahapa nacamatínaca. Énasera napiaracaichucha:

—¡Tátachicha! ¡Pítiqueneripa yátupiquenévi Cristo! ¡Picatajicahavipaini pájapanuhavi! —nacahepa.

³² Tacahe, éma Jesús eta masamiravacahi, titupihapa. Máichuhavacapa éna púchuquiana. Mayaserecapa tájahahípuca navarahahi.

³³ Éna najicapapa:

—Tátachicha, vivaraha pípuhauquichahavini apaesa vímairiricapaini —nacahepa.

³⁴ Tacahe, éma Jesús majapanuvacainehi. Máemamahauquichavacapa. Enevanerinehi tímairiricana. Tásiha, téhichavianahi.

21

*Títecapapa ema Jesús eta te Jerusalén
(Mr 11.1-11; Lc 19.28-40; Jn 12.12-19)*

¹ Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoquiji. Ánaqui ema Jesús mavanecapa ena apinana vichamuriana. ² Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitihahi eta esena burrico, étapa eta tachicha te tachacaya. Evejapuacayare íáminanuyare eta áni. ³ Te natiarihinapuca náëñama, emetacayare eta nucamunuirahi núti. Vahi táyeréimahi vímichavavaneyare —máichavacapa.

⁴ Eta juca tamutuhi títauchavapahi eta májuchaquenehi ema mácani víyarahaini profeta. ⁵ Ani tacahehi: “Emétaca ena achaneana ticavasanahi te Jerusalén, apaesa natsecava eta najacampirayare ema nayeheyare Rey. Emétacayare vahi nacupica, taicha tétavicavapahi eta mamansuvapahi, étapa eta máurivahi. Mámaphi eta iúritaresirayare. Tímaticareyarepahi ema, taicha ticaperayare eta burricuchicha” tacahehi eta Sagrada Escritura.

⁶ Tacahe, ena vanairucanahi náitauchahi eta navanahi mayehe ema Jesús. ⁷ Námaphi eta burricochicha étapa eta tachicha. Nanacamaquechapa eta náepacuhana. Tásiha, ticaperapa ema Jesús. ⁸ Camuriana ena achaneana tiácanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanihayarehi éma. ⁹ Ena apamuriana tñapumirauchanapahi énapa ena téquenehanapahi tipiaracanapaipa:

—Yare, Tata. Píti yátupiquenevihu Cristo réyvihu viyehe viti israelítana. Ichape eta vicunachiravihu píti. ¡Vanairucaquenevihu me Viya! ¡Asulupaya me Viya te anuma! ¡Viva ema Víaquenu! ¡Viva! —nacahepa.

¹⁰ Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricanapaipa:

—¿Nájaha ema maca achane?

¹¹ Ena apamuriana najicapapa:

—Émara ema profeta ticaijare Jesús, ticavasa te Nazaret te tinapaica te Galilea —nacahepa.

Ema Jesús macuchuchujicavaca ena tíjararecanahi eta sárareana, cáyureana te tajuhe eta Templo

(Mr 11.15-19; Lc 19.45-48; Jn 2.13-22)

¹²⁻¹³ Tacahe, te apanapa sache, tiyanapa tisiapa ema Jesús tayehe eta te Templo. Máimaharinehi ena achaneana tíjararecanahi eta sárareana, cáyureana. Ena apamuriana ena tivacharecanahi. Natiarihivare ena tísiriperecarahiana eta naplataneara ena apavasanana. Máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihí eta nayujarasirareya ena achaneana” macahepa. Étisera eti tíamerahiana, ecasiapavapa eta te juca. Emaeperajicapa eta tacapicahuirahi. ¡Eyana iúchucataataji! —máichavacapa.

Tásiha, macuchuchujicavacapa namutu. Máequehepuichinavacapa eta namesarana étapa eta nasiyana.

¹⁴ Eta mávilhairahi te Templo ema Jesús, napauchapa ena púchuquiana énapa ena masariana. Tásiha, éma macanaracavacapaipahi. ¹⁵ Tacahe, ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevihu Cristo manerejiruvihu ema Viya” nacahepa. Énasera ena tuparairucana énapa ena escribánoana vaipa náuricahini eta náimairahi tamutu eta juca. Tisemanapa. ¹⁶ Náurujiacapa. Navarahapa nacaichepaica eta máichaqueneanahi. Tásiha, náichapa éma:

—¿Tájaha tacayema písa tipiararecana ena nani amaperuana? ¿Váhiyapa picamatina-cavacapai? —náichapa.

Ema Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táechajisihairahi eta juca najirasahi ena nani amaperuana? Ani tacahehi: “Píti, Tata, pinacasamurechavacahi ena amaperuana eta máejererayarehi naicha eta najirairayare eta táurinaquene alabanza” —máichavacapa.

¹⁷ Te títapiricapa eta majicapiravacahi, majunijicavacapa. Tiyana eta te avasarechicha Betania, étapa máimasinehi. Véhicapaichuhisera víti.

*Ema Jesús májiquiha eta higo taicha máhiriquirehi
(Mr 11.12-14, 20-26)*

¹⁸ Te apanapa sache, te yáticarahichicha, tiyanavarepa ema Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma. ¹⁹ Máimahapa eta yucuqui tciajare higo te achenechacaya. Tiyanapa mapauchahi. Tájinasera táhinahini. Tapacajianachucha. Tásiha, máichapa ema Jesús eta higo:

—¡Pépiyainapa píti eta máhiriquereviyare! —máichapa.

Eta macaherahi, enevanepa tijiyujipa eta tapacajiana. ²⁰ Eta vímairahi víti, viáraminehi ichape. Viyaserecapa ema Jesús:

—¿Tájaha táicharacavahi eta táijahúchiravahi táijiqui eta higo? —vicahepa.

²¹ Ema Jesús tijicapahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaitucaimahi. Eratahayare ícha, ecutinuya eta níchaquenehi. Eratahayareva ecayejecca eta cerro te apachacaya. ²² Tamutu jácáni eyaseserepiyare eta mayehe ema Viya te eyujarasirana, ecajaracasiyare te yátupina eta ecasiñavairahi me Viya —máichahavipa.

*Nayaserecapa ema Jesús nájahhipuca tituparacahi éma
(Mr 11.27-33; Lc 20.1-8)*

²³ Tacahe, visiapavarepa tayehe eta te Templo. Ema Jesús, túmiturecavarepa nayehe ena achaneana. Tacahe, napauchapa ena tuparairucanahi. Natiarihihivare ena tinerejicavanahi ena aquenucarahana. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica túmitucavihi? ¿Nájaha tituparacavihi eta juca píchaqueneana? —náichapa.

²⁴ Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana. ²⁵ ¿Nájahapuca tivanecahi ema Juan eta máitesirahi máichasirisirahi? ¿Émapuca ema Viya tivanecahi, émajivapuca eta máitesirahi? —máichavacapa.

²⁶ Váhisera náituruequenehahini eta najicapirayarehi. Tiácapaemajiricacanapa. Ánipa nacahe:

—¿Tájahasica vicayemayare eta vijicapirayare ema maca? Te vémunahacava vícha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” Téhesera vácahepuca: “Émajivaichucha eta máitesirahi”, ticauyayacerripa titupisicahaviana eta te márijahiana ena achaneana, taicha namutuhi náimijachahi ema Juan profetaquenehi yátupiquene, mavaneruhi ema Viya —téchajiricacanapa.

²⁷ Tásiha, náichapa ema Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca ema tituparacanuhi. ²⁸ Nuvarahasera nímicutiarahinaheyare. Nararihi ena apinana ticaparapecacana. Ticavanahipa éma émana mayehe ema naiya. Ánipa máicha: “Nuchicha, piyana picaematane puiti jena sache. Pirerecaya eta uva” máichapa. ²⁹ Ema machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi. ³⁰ Tásiha, ema naiya mavanecavarepa ema émana machicha, mayanahini macaematanehini éma apanavare. Tásiha, ema amaperu majicapapa: “Tiuri, nuyanayare” macahepa. Váhinéni mayanahini. ³¹ Puiti nuyaserecaheyare: ¿Nájaha ema tisuapajirahihí mayehe ema maiya? —máichavacapa ema Jesús.

Éna najicapapa:

—Ema títapuca, éma tisuapajirahihí.

Tásiha, ema Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapana te anuma ena túhusianainihí énapa ena tisipecaturarahianainihí. Éti vahi esiapaimahi. ³² Taicha vahi esuapahini eta máimiturapiana ema Juan Tícachasiricarahini, váhivare ávarahahini étupiricavahini eta itaresirana. Nararihisera ena tisipecaturarahiana, ichape eta nasuapirahí. Étisera, étavacava eta emasuapajiraiva, tayanapane ímahahi masuapacarevahi éma —máichavacapa.

*Ema Jesús máimicutichina ena pártirárioana máurirahana
(Mr 12.1-12; Lc 20.9-19)*

³³ Ema Jesús máichavarepa:

—Esamanu eta juca apana nímiturapiya. Nímicutichinaheyare. Matiarahi ema achane. Ticaevaruhi camuri eta uva te máesane. Manaruchapa eta masucure. Máepiyacavarepa eta

nacaticaresihayare eta tachi eta uva. Máepiyacavare eta torre, nápanihayare eta najanea-sirayare eta máevaru.

Tásiha, máijaracapa ena achaneana, pártiráριοanayarehi. Tásiha, tiyanapa ena achane te apana avasare. ³⁴ Tacahe, te títecápapa eta caje tayairahi eta uva, máimivanerecapa ena mamusurana nayaseapanavacayarehi ena pártiráριοanahi eta tatucachaqueneyarehi éma. ³⁵ Énasea ena pártiráριοanahi tisemauchavanarichucha. Nacaratacavacapa, náehapa ena vanairucana. Nacapacapa ena émana. Ema apana nayucaracapa te márijahiana. ³⁶ Tásiha, ena achane máimivanerecavarepa ena apamuriana. Camuripananapa. Váhiquesera náijaracahini, náehavacavarepa. Nacapacavacapa ena apamuriana.

³⁷ Tacahe, émajacaruvapa máevataca ena machicha. Máimijachaipahi émapapucaini napicauchahini. ³⁸ Te náimahapa ena machicha ena ticayehe eta úvaquiji, ánipa nacahe: “Émainapapuca ticayeheyare ena maca. Yare, vicapaca apaesa tánasipa viyehe tamutu. Tájina máicharachavimahi ena achanénavaji”. ³⁹ Tacahe, nacaratacapa ena machicha, nacuchucapa eta tayehe eta isaniti, nacapacapa.

⁴⁰ Puiti, nuyaserecaheyare: ¿Tájahapuca máicharacavayare ena ticayehe eta úvaquiji ena pártiráριοanahi máurirahana? —macahepa ena Jesús.

⁴¹ Éna najicapapa:

—Éma tisemainapa. Vaipa májapanuvacaimahi. Macapapanavacayarepa ena pártiráριοanainihi. Máijaracainapa ena apamuriana pártiráριοanayareva, nácani tipicaurahianahi, náijaracahini eta mayehe parte —náichapa.

⁴² Tásiha, ena Jesús máichavacapa:

—Jehe tiúrihi eta ejicapiranuhi. Nuvarahasera epanerechinavapaini eta tacayemahi eta Sagrada Escritura, apaesa écaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mári táicuchihí tatumearayare eta peti, taicha vahí náimatihini. Émasera ena Viya macaiticapahi eta te táicuchihí eta tatuparahahi. Tacapicahuquenehi puiti. Táitusiava, tétaavicavahi eta vicunachirahi víti ena Viya” tacahehi eta Sagrada Escritura. Nuvaraha écaicutiaraya.

⁴³ Puiti numetacahe: Táichavenehi eta emasuapajiraivahi, vaipa étiparacaimahi tayehe eta mavanairipi ena Viya. Ena tisuapajirahianahi, éna ticavacureanayare te jena sáchehare. Énainapa téchanayare eta vanairipiana. ⁴⁴ Puiti, núti nucutihi eta ichape mari náepuruquenehi. Eti épurunuanahi, iáquipaicavayare évetutujicayare. Tichimaracahenapa eta muraca ecuñaraqí taicha eta emavarahairahi éhicanu —máichavacapa.

⁴⁵ Étasera eta nasamirahi ena tuparairucana énapa ena fariséoana, tisemanarinehi taicha tímaticavanapa eta énairahi tayunacavaca eta máimicutichiravacahi ena Jesús.

⁴⁶ Navarahapa nacaratacayarehini. Tipicavanachuchasera nayehe ena achaneana taicha namutu nacunachahi ena Jesús eta émairahi vanairuca me Viya.

22

Ena Jesús tímicutichava mácani rey te máichuhavacapa ena machimaranaya, máichayarehi eta ichape piesta

¹ Ena Jesús máimitucavare ena achaneana eta apana máimicutichaquene. Ánipa macahe:

² —Ena Viya, macutihi mácani rey te máimiyenachayare ena machicha, máichayarehi eta ichape piesta. ³ Mavanecapa ena mavanarana náichuhapanavaca ena machimaranaya. Váhisera návarahahini nayanahini éna. ⁴ Tásiha, ena rey máevatacavare ena apamuriana mavanarana. Ánipa máichavaca: “Eyanavare étipava ímitatjiricavaca ena níchuhaqueneanahi, náitecavanepa. Nucaparecaripahi eta vaca nireureyare nésinruanahi. Tiúrinapa tamutu eta juca tinicacare. Énanecha nucuchapahi náitecavanepa” macahepa.

⁵ Énasea ena máichuhaqueneanahi vahí nasuapahini. Nájina nayanahini. Ema émana tiyanapa te máesane. Ema apana máimahapana eta mayehe tienda. ⁶ Ena apamuriana nacaratacapa ena vanairucanainihi, náehavacapa, nacapacavacapa. ⁷ Tacahe, te máechapa ena rey, tisemapa. Mavanecapa ena masuntaruana nacapapanavaca ena ticapahianahi. Náijuchavare eta tamutu eta napenanaini. ⁸ Tásiha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera núvaraha náiteca ena náinapureanahi níchuhaqueneanainihi. ⁹ Eyana te tamutu calleana. Íchuhavacayare namutu nácani ecainunaqueneanayare” máichavacapa. ¹⁰ Tacahe, ena mavanaranahi tiyananapa, náchepupanevacapa. Nacurujicavacapa namutu nácani nacainunaqueneanapahi: nácani achaneana tiúriana énapa ena súnsusurujiana. Camurianahi. Tínicanarinehi eta te távihayarehi eta piesta.

¹¹ Tacahe, ena rey tisiapapa, máimahayarehi ena machimaranahi. Máimahapa ena émana achane ena matiarihiquenehi vahí manacahini eta namuirihasa te ticaichuasiana.

¹² Tacahe, máichapa: “Ajaira, ¿tájaha tacayema vahi pinacahini eta múiriare níjararuheanahi tayeheyarehi puiti juca piéstayarehi?” Émasera ema achane vahi majicapahini. ¹³ Tacahe, ema rey mavanecavacapa ena mavanarana: “Eveha ema maca. Ítjivaucha, ítiápechavare. Íyaracuhapana te timapicu tayehe eta máiyauchiavayare macapitiquiahechiavayare” macahepa ema rey.

¹⁴ Ema Jesús máichavarepa:

—Numetacahe puiti: Camurianahi ena níchuhaqueneanapaipahi. Ánimurianarichusera ena títaurahianayare —macahepa ema Jesús.

Navaraha námejecapavacha ema Jesús tayehe eta impuesto

(Mr 12.13-17; Lc 20.20-26)

¹⁵ Tacahe, eta nasamirahi ena fariséoana, tisemanarinehi. Tiyananapa ticurujicacanapa, navarahaipa námejecapavachayarehi apaesa étainahipucaini taviuchahini ema Jesús.

¹⁶ Tacahe, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímiturapianahi. Yátupihí eta pímitusiravacahi eta táurinaquene achene ticaijuhe me Viya. Váhivare pipicacarcavahini eta péchajisihairahi eta náichavaquenévanahi nácani achaneana, tayanapanehi aquenucahi. ¹⁷ Vivarahahisera viyaserecaviyare eta pipaneruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

¹⁸ Émasera ema Jesús máimatiacavacapa eta taurivapahi eta napanereruana. Tacahe, máichavacapa:

—¡Apimirahetataji! ¿Tájaha tacayema evaraha ímiaquipaicanu? ¹⁹ Nímahaseji, íáminanu étapena eta reale —máichavacapa.

²⁰ Eta náijarasirapa, éma máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

²¹ Éna najicapapa:

—Mayehe ema Presidente Emperador —náichapa.

Tacahe, éma máichavacapa:

—Tiuri, táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

²² Te nasamapa ema Jesús eta majicapiravacahi, ichaperinehi titsirihacavanahi. Náramipa eta máitupajijiasiravahi. Tiyananapa tichavanahi.

Nayasereca ema Jesús náicharacavayarepuca ena náepenaqueneana eta náechepusirayare

(Mr 12.18-27; Lc 20.27-40)

²³ Étarichu te jena sache, nacahepaipahi ena saducéoana. Ena nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Natanucahi eta táetseraruvayarehi náicha. Ánipa nacahe:

²⁴ —Tata maestro, ema víyarahaini Moisés, manaquicahi eta máechajiriruvahi eta viyehe: “Te máepenaquenehahipuca ema achane esu mayena, tásiha nájinahipuca manaquenequeruvainahini machichainahini; te matiarihihipuca mácani maparapehi, mavehayare esu machinaequeneeni, apaesa émainapuca macachicha eta suyehe, máitsivainahi ema maparapéni”. ²⁵ Tacutiquene te juca vitaracu, natiarihiníhi ena siétequeneana ticapapajiricacana. Tacahe, ema náechavimuri títauchavapa. Máepenaquenehapasera esu mayena. Nájinahi machichainahini. ²⁶ Tacahe, ema maparape máitauchavare esu machinenaini. Énerichuvaresera máepenaquenehavare, nájinavare máchichainahini. Ema émana maparape máitauchavare esu. Énerichuvare máepenaquenehavare. Namutupa ena siétequeneana navehahi ésu, tásihasera náepenaquenehapaipa, nájina émanainahini macachichahini eta suyehe. ²⁷ Te táequenepa, tépenapa esu esenaini. ²⁸ Tacahe puiti, te apanapuca eta náitaresirayare ena naní, ¿nájahapuca ena siétequeneana ema yátupiquenehi suímaquenehi esu esena, taicha ena siétequeneana namutuhi suímanaríhi? —náichapa.

²⁹ Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutiarahini eta táimiturapi eta Sagrada Escritura? ¡Váhivare evarahahini esupahini eta tamutuirahi marataha ema Viya! ³⁰ Ánaqui te apana náitaresiraya, vaipa nácamunuimahi esu esena. Énaripa ena esenana, váipavare

nácamunuimahi ema ajaira. Nacutinapa ena ángeleana tiávihanahi te anuma eta namaepe-nacacairahi. ³¹Éti váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruvahi ema Viya. Ani macahehi éma: ³²“Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahi numetacahe: Ema Viya, éma téchahi eta nátaresirana ena téhicanahi, tayanapane tépenaripa. Eta náchanevana, tímiyanava-richucha títareca te mamirahu. Éti, ichape eta éjecapiravahi —máichavacapa ema Jesús.

³³Tacahe, eta nasamirahi ema Jesús, ichaperinehi eta náramirahi ena achaneana eta máimiturapihi.

*Eta tisuapacarepanahi te mavanairipiana ema Viya
(Mr 12.28-34)*

³⁴Tacahe, ena fariséoana eta náimairahi macamatinasiravacahi ema Jesús ena saducéoana, ticurujicacanapa éna. ³⁵Tásiha, tiyananapa náemejecapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

³⁶—Tata maestro, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

³⁷⁻³⁸Ema Jesús majicapapa:

—Eta máechajiriruvahi ema Viya te Sagrada Escritura, ani tacahehi: “Yátupina eta émunasiranuina nuti Íaquenu. Íunaca te esamureana. Yátupina eta ecachanevairanuina nútí. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, únapuca tayehe eta apamuri vanairipiana. ³⁹Eta apana táehiruhi eta juca, ánvare tacahe: “Pémunacayare ema piparaepiyahi, tácuti eta pémunasiravahi píti”. ⁴⁰Eta juca apinaquene vanairipi, éta máehicahi ema víyarahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

*Yátupi ema Cristo mámariequenénihí ema rey David, Víyahivare éma
(Mr 12.35-37; Lc 20.41-44)*

⁴¹Tacahe, eta náurujiasiraichaha ena fariséoana te machacaya ema Jesús, ⁴²máichavacapa: —Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimerecavapa? —máichavacapa.

Éna najicapapa:

—Vímatinapa éma taicha tiúchucayare mámariequeneyare ema víyaraháini rey David —nacahepa.

⁴³Majicapavarepa:

—Yátupihí ema Cristo achanequenehi eta máimahi taicha mámariequeneyarehi ema víyaraháini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: ⁴⁴“Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pímirahu ena ticatianacavianahi” macahepa. ⁴⁵Ema David, eta máimijarechirahí ema Cristo “Tata Náquenu”, ¿tájahapuca eta macayemaquenehi? Nútí németeaca Víyahivare ema Cristo. ¿Tájaha íchahi éti? —máichavacapa.

⁴⁶Eta nasamirahi eta juca, nájina nájaracavahini najicapahini. Eta tacahe, nájinapa napatsicavahini nápechahini nayaserecahíni.

23

*Ema Jesús máimereuchavaca eta náejecapiravana ena fariséoana énapa ena escribánoana
(Mr 12.38-40; Lc 11.37-54; 20.45, 46)*

¹Tacahe, ema Jesús máichavacapa ena achaneana vítipa viti máimitureana. Ánipa máichahavi:

²—Ena escribánoana énapa ena fariséoana tímijachavana catuparahana eta navepaisirayarehi eta mavanairipiana ema Moisés. ³Tacahe, éna esuapayare. Ítauchayare eta navanairipiana. Váhisera ecuehica eta nayeherepiana taicha ena apapipijichucha eta napaneruana. ⁴Tacutiquene tipimicaheana ítauchaya eta camuriqueneana nayeherepiana. Éti, tájina eta japanucarehíni nayehe. Nájinapa tiratahaimahí títaucha. Apanasica éna, vahi náratayahíni náitauchahíni tamutu. ⁵Tímijachavanahi tamutu náitaucha, navarairahí ticunachacareanayarehi nayehe ena achaneana. Tisiñavaicanahi eta nápajusiravahi religiósoana. Nanacahi te nanahuana eta ajureca navejurehi eta te Sagrada Escritura. Tacutiquene eta nacamuirihaira tisapepeacavanahi píncanillanahi. Ticamatsivacahi eta

nacamuirihaira. ⁶ Ena nani, te ticaichuhasiana eta nanisiraya, éna tinerejisinavanahi eta tiúrinapanána eta náejasihaya. Navarahahivare ichape eta napicauchiraya ena achaneana te náurujisirarevanahi. ⁷ Tétavicavahi eta navarairahi ticapichuana. Navarahahivare ticacajamicasianayarehi te jácani nácapajisiha ena námitureana téhepahi calle.

⁸ Étiserá vahi ecujamuracha eta nacajamisirahenahini ena achaneana, étainapapucaini nacunachirahenahini. Taicha éti eparapejiricacahi, ecuticacahi te mamirahu ema Viya. Nucarichu núti yátupiquenénuhi eyehenuhi Maestro, nuti Cristo. ⁹ Váhivare “Tata Nucaiyaguene” ecuquicha nácani achaneana te juca apaquehe. Taicha mararihi ema yátupiquene Ecaiyaguene, ema tiáviyahahi te anuma. ¹⁰ Váhivare tísapacarémahí eta náimijarechahe, “Tata nuyehe jefe”, taicha nucarichuhi núti yátupiquenénuhi jéfenuhi eyehe. ¹¹ Nuvarahasera ítátijiricacayare. Nácani titátirahiana, éna ticunachacarepananayarehi eta eyehe. ¹² Énerichuvare nácani mánsuanahi, éna ticunachacarepananayare me Viya. Nácanisera ticasíñavavaicanahi ticunachavanapuca, tímitsiriávanayare me Viya — macahepa.

Ena Jesús mayunacavaca eta nájecapiravanahi ena escribánoana énapa ena fariséoana

¹³ Tacahe, títécapanapa ena escribánoana énapa ena fariséoana. Tásiha, ema Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Muracayare eta ícuñayare taicha eta apimirairahehi! ¿Tájaha tacayema ímjachavahi éti echa eta tapaja eta anuma? Vahi ísapa nasiapahini ena achaneana, nácani tivarahana tisiapana. ¡Étiripa vahi ítujiçavaimahi esiapá!

¹⁴ Jucarihi eta apana tiviuçahahehi. Tatuparacahi eJapanuyare ena tépenaimana te váhipuca narataha navachachahini eta nantéve. Étiserá everejicavacahi tamutu eta nacayehéqueneana. ¡Apimirahehi! Épiyacavahi religiósohehi, íchahi íúpiemahi eta eyujarasira te namirahu ena achaneana, evarairahi vahi tacuimicaecherachava eta emaurivanahi. Ichapeyare eta ícuñayare táicha.

¹⁵ ¡Jucarihivare eta apana tiviuçahahehi, éti escribánoana étipa eti fariséoana! ¡Muracayare eta ícuñayare taicha eta apimirairahehi! Éti, tétavicavahi eta éñamavairahi eta íturuca ena téhicana eta ímiturapiana, eyanirahi te avasareana tiyerehiana. Tasapihahi ímitucavacahi eta nacutiheraya eta evainarajivahi. Tiápajucava eta namaurivahi ícha. Eta tacahe, ecachanevacayare éna te yucu infierno.

¹⁶ Jéhevere éti ecáijare páurehe. Ichape eta ícuñayare taicha eta ímiaquipaisiravacahi ena ecutiqueneana púchuquiana. Éjecapavahi tayehe eta juca ímiturapihi. Ímituca eta tájinahi eta taviuchaimahi nácani najurachahi eta Templo. Étasera te najuracha tayehe eta oro eta tiáviyahahi eta te Templo, ticaviurevanainapa ícha éti. ¹⁷ ¡Tétavicavahi eta emaecharaireva eti púchuquiana! Eta Templo, étara tipicauchacarepanahi tayehe eta oro tiáviyahahi tayehe. ¹⁸ Íápechavavare eta éjecapiravahi tayehe eta apana ímiturapi. Éti íchavare: “Te náichapuca nácani eta promesa, najurachapuca tayehe eta náijuchirare eta sárareana, tájinaipavare ticaviurémahí. Téhesera najurachahi tayehe eta nanaquruvahi te táinahu eta náijuchirarehi, étasera ticaviurevanaripa” íchahi éti. ¹⁹ ¡Tétavicavahi eta emaecharaireva eti púchuquiana! Eta náijuchirarehi eta sárareana, étara tipicauchacarepanahi tayehe eta enaquiruvanahi. Éta tímipicauchahi eta enaquiruvanahi. ²⁰ Taicha nácani tijurachanahi tayehe eta náijuchirarehi, vahi tácarichuhini napicauchayare éta, napicauchayarehiva tamutu eta námavahuana tiáviñanahi te náijuchirarehi. ²¹ Tacutiquene nácani tijurachanahi tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiáviyahahi tayehe. ²² Énaripa ena tijurachanahi tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

²³⁻²⁴ ¡Jucarihivare eta apana tiviuçahahehi eta tamuracavaya eta ícuñayare, éti apimirana! Éti ímjachavahi íminecapaequeneha ena ecutiqueneana púchuquiana tayehe eta títuçacareana. Ímjachavahi yátupiquenehi eta religiósohéirahi eta epamisiravahi eta itauchira eta vanairipi eta ecamavahuira me Viya eta diésmuri tayehe eta sucurecana. Ecutnachacarehi taicha éta. Váhisera epamicavahini eta táuriqueneana ticunachacarepanahi me Viya. Tatuparacáhe emutu ájapanurahi; ecatiuchavacayarehi ena macatiuchavarahanahi; yátupina eta itauchiraya tamutu eta íjarasiravahi; yátupina eta ecasíñavairaina me Viya. Tatuparacahivare ecamavahu eta me Viya eta diésmuri. Éti éñamavahi eta itauchirahi eta ánichichana, étasera eta tisuapacarepanaqueneanahi táuriqueneana, tasapihahi vahi esupahini*.

* 23:23-24 Ani tacahe eta mayeherepi ema Jesús te máechajiriruva: “Eti ecatiçica eta çhupi; ejiricasera eta camello”.

²⁵ ¡Tétavicavahi eta apimirairahehi! Éti ímijachavahi yátupiquenehi religiósöhehi, ecañamaracavahi eta ímiyaniravaya ítaucha eta eyeherepiana. Étasera eta esamureana, tétavicavahi eta tachipejivavacahi taicha eta ecaetemaraviana étapa eta íjarasiravahi ícha tamutu eta ejamuraraivana. ²⁶ ¡Tétavicavahi eta epuchuhuiva eti fariséoana! Tamapurujihí eta religiósóhérahí. Tacamunuhi tativa esipaca eta esamureana, apaesa yátupinasarepa eta iúriyavare, tipachínanapa eta itaresiraya.

²⁷ ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eta covacha. Tiúrinahi te táinahu, téhesera te amahe távihahi eta máeperejiqueneana. ²⁸ Tacahehi eta itaresirahi éti. Ticutimahinehi iúrihi te namirahu ena achaneana. Étasera te esamureana táurujsiavahi eta evainarajivana, tacutiqene eta apimirairahehi.

²⁹ ¡Páurehesamichapucaini eti escribánoana étipa eti fariséoana! ¡Ichapemuriqene eta eviurevanahi! Eti, ímijachavaipahi puiti ecunachacarehi eta evarairahi échapajirica eyehehecahi eta náecariana ena profetanaini matapiravarequeneanahi, nacaparuanahi ena iáchucanaveanaini éti. Épiyacavahi yátupiquenénahini eta iúrivahi. ³⁰ Tásiha, ánivare ecahe: “Te vitiaríhinaripahini víti eta acane te ticaparecanapa ena viáchucanaveanaini, vahi vicuimicasiapavahini tayehe éta” ecahepa. ³¹⁻³² Étijivapa ímereuchavahi eta apimirairahehi, taicha puiti éti epanerechahi ecapacanuya, tacutihi eta napanereruanahi ena iáchucanaveanaini. Tásiha, ecuticacayare eta naviurevahi ena iáchucanaveanaini.

³³ ¡Éti tachichanaveanatajahi eta quichare, tétavicavahi eta evainarajivahi! ¡Váhiqene ticaiticahémahi eta ícuñaya te infierno! ³⁴ Nímicaecherachayare eta evainarajivahi. Nuvanecayare napauchahe ena nuchanerana. Éna, timetacaheanayare eta mapanereruana ema Tata. Tímitucaheanayareva tamutu eta nímiturapiana. Nasapihayare vahi esuapaimahi éna. Éna, yátupihí náituca. Émepururecayaresera éti eta náitupajjiasiravahi éna. Esapihainapa, éti ecapacavacainapa éna; ena apamuriana émetatacayare te crusu. Tásiha, ena apamuriana éstacavacainapa te iúrujsirarevana. Éhicharairicavacainapa te jácáni avasareana najunaiyayarepahi.

³⁵ Tásiha, eta ecapasiravacainapa ena nuvaneruanahi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhí, máetaviuchainihí eta máuriva. Émapa ema máequeneruhí Zacarías (machichainihí ema Berequías), ema nacaparuhí te tamirahu eta Templo. Camurianahisera ena apamuriana náumurivanainihí. ³⁶ Nutupiruva numetacahe puiti: Étinapa tamuriacayare tamutu eta náepeniranahi. Títecapainapa eta ícuñayare eti achaneana ítareruanahi puiti —macahepa ema Jesús.

Ema Jesús ticatisamurevahi táichavenehi eta namasuapajiraivahi ena achaneana ticavasanahi te Jerusalén

(Lc 13.34-35)

³⁷ Tacahe, ema Jesús tiápechavava máechajicavacapa ena achaneana. Ánipa macahe, taicha eta macatisamureravahi:

—¡Tétavicavahi nucatisamureravahi ícha étisami eti tachichanaveanahi te juca viávasa Jerusalén! Ena iáchucanaveanaini, éna ticapapajicanahi ena profetana mavaneruanahi ema Tata. Puiti étipavapa evaraha ecutiya ena iáchucanaveanaini. Ichapemurihinéhi eta níchuirahéhi éti, iúrujijacanhini, tácutihini eta varayu te tacurujimurihi eta tachichanaveana eta te tapava. Váhisera ávarahahíni. ³⁸ Ímahainapasera puiti eta íchararacavayare. Ticaquípaicasiyare tamutu eta epenana, étiripa ticuchucaheanainapa. ³⁹ Numetacahévane puiti vaípa iápechavaimahi ímahanu, tiámainucavainapa te ítsivachapa eta epanereruana, evarairayare ejacapanu. Ecahénapa: “Ichape eta vicunachiravihi píti vanairucaquenévihí me Viya” ecahénapa.

24

Ema Jesús máimereucharipa eta táquipaisiravaya eta Templo

(Mr 13.1-2; Lc 21.5-6)

¹ Tacahe, ema Jesús tiúchucapa tayehe eta Templo, tiyanayarepaini. Vítisera viti máimitureana vémeñahavapa eta mayehe. Eta viáramirahí, vímechapa eta táurinaqueneana mari tayehe eta anuquehe peti te Témplosami. ² Émasera ema Jesús tijicapahavipa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járájapayare eta sácheyare ticaquípaicasiyare tamutu eta juca Templo. Téjane-repaicainapa tamutu eta juca táurinaqueneanahi ímahaqueneanahi puiti —máichahavipa.

Tatiarihiyare eta ecutiarareanaya te tánehipaicha eta táichecuiraya
(Mr 13.3-23; Lc 21.7-24; 17.22-24)

³ Tásiha, viyanapa tayehe eta cerro Olivoquiji, víputsicavapa. Te vítecapapa, téjacapa ema Jesús. Tásiha, víti máimitureana viyaserecapa:

—Vivaraha pímetacahavi. ¿Tájamuhupuca eta náimiaquipaisirayare eta Témposami? ¿Jararihiyarepuca eta ecutiarareyare eta piápechiravayare píteca, étapa eta táitachirayare eta táequenereruhi mapanereri ema Viya? —víchapa.

⁴ Tásiha, ema Jesús máichahavipa:

—Ecuneuchavaicha yátupina, machu navayuacahe, taicha nárájapayare ena tépiyacavanayarepahi tímivasichavanayare nuyehé. ⁵ Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

⁶⁻⁷ Énerichuvare esamairiricayare eta táehacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacarenapa guerrina eyehe éti. Váhisera ecuarameca eta esamairirisiraya, taicha ene tachehare eta táepaniravayare eta ecutiarareanayare. Vuíchahasera étaimahi eta táichecuirayare. Énerichuvare tatiarihiyareva eta ichape ecuhamuhuyareva te avasareana. Tatiarihiyareva eta ichape tayamurisiranaya eta apaquehe te jácani távihanapahi táetupiaruyare. ⁸ Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásiha, eti nuchaneranahi, ticatianacaheanainapa ena achaneana, táichaveneyare eta éhisiranuhi. Tipanajiricaheanainapa te tamutu avasareana. Ticaratacaheanayareva. Ticapacaheanayareva. ¹⁰ Tásiha, nararihinapa camurianaya ena tímajicavanayare eta náehisiranuhi. Tásiha, ticatianacaheanainapa éti yátupiquene eta éhisiranuya. Tíjararecheanainapa éti. ¹¹ Natiarihinavarepa nácani tépiyacavanayare mavaneruana ema Tata. Tamutusera eta námiturapiana náepiyahiraivayarechucha, camurianayare ena navayuaruanayare. ¹² Énaripa ena arajuruana, tétaavicavainapa eta namasuapajiraivaya, vaipa napicauchaimahi ema Viya. Camurianayare éna vaipa témunarahianáimahi. ¹³ Étisera nuchaneranahi, te ecamíchahi tamutu, ímiyanavahivare eta éhisiranuhi te táitavapa tamutu, nucuchucuhaheyare nútí.

¹⁴ Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu ena téneuchavanahi, étapa eta apamuriana nímiturapiana. Te ítecapapa te tamutu eta avasareana, nápechavayare nuchava.

¹⁵ Numetacahevanevare eta apana. Járájapayare eta sache táíñehiqueneayare. Tímerecavaya ema achane váinarajiquene, máechajisihaquenehi ema víyarahaini profeta Daniel. Mavanecayare ena machanerana náechipejisirayare eta tacapicahacuenehi Templo, nacuchucavacayare eta téhicanahi ema Viya. (Nácani navaraha nacaicutiara eta juca, tacamunuhi ticaravahanayare eta májurehi ema víyarahaini Daniel.) ¹⁶ Tásiha, te ímahapa eta juca, esamairicapapuca, táuricapa etatajipa ejunavane, éti etiarihiqueneanahi te Judea. Ecaijuheyare eta te cérhoana, étaina eyumursiavaina. ¹⁷ Nácani tiávihanahi te nayehe canchón te nasamairiricapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náéñamaqueneanainíhi. ¹⁸ Nácani tachimararuanayare te vamáhi eta téchacarehi, táuricapa vaipa nacuchava tayehe eta avasare, tayanapane náéñamahi eta nayereruvana. ¹⁹ ¡Páureanasami nácani esenana tachimararuanayare, nácani ticajarianahipuca, nácani esenana ticachichanahi eta amuya tiájicachaha! ²⁰ Eta tacahe, eyaseacayare ema Viya tacuija táichejicahe*, váhivare tacuchimaracahe eta ichape tiquiva te achene te eyanapapuca ejuna. ²¹ Te jena sácheanayare, tétaavicavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta náitaresirahi ena achaneana te juca apaquehe. Te táequenéna eta tíñehi, tájijnainapa tácutimahi. ²² Nájina tacaitiruimahi eta nacatajivairayarehi ichape. Macaichecavayaresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerijirana, majapanuqueneanahivare. Taicha te vahi macucaicheca ema Viya, máitamurihipucaini macapajicavaca namutu ena achaneana ema maca achane.

²³⁻²⁴ Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa nútí. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo.

* **24:20** Ema Jesús máechajisihahi eta ticasarahimuhu, tiquivamuhuvare te jena mávasa Judea. Máechajisihahivare eta nayeherépi ena israelítana eta váhiquene náisapavahini tiyanana tipacana te jácani sávarumuhua.

Matiarihipahi te juca vitaracu". Ena apamuriana ánivare nacaheya: "Náepiyahiraivahi éna. Ema Cristo mávihahi te viávasa víti". Étiserá vahi ecusuapavaca. Eta navairahi tivayua-caheanaya eti machanerana ema Tata, náituruequenehayare naicha eta ichapequeneana tiáramicareana ecutiarareanayare. Camurianasamiyare ena navayuaruanayare. ²⁵ Étiserá vahi tivayua-caheanaimahi taicha numetacahevanehi puiti. ²⁶ Te náichahepuca: "Ímaha máenahi ema Cristo ánaqui te mávapahi apaquehe", vahi ecuyana. Étaripa te náichahepuca: "Mararihipa jácáni tayumurevaquenehi cuarto. Vicarichu viti vímatihí eta mávihahi", váhiquenevare ecusuapavaca. ²⁷ Taicha te yátupinapa eta nítisirayare nútí, nucutiya-re eta tájahúchirava títecapa eta térameca. Namutuyare ena achaneana te juca apaquehe tincapanuanayare. Tacaheyare eta nuchavirayare nuti Manerejirunuhi ema Viya. ²⁸ Vahi ecueñamava távihapuca níticapihaya. Nútí níticapuchaheya te jácáni iávihahi éti†.

*Eta machavirayare ema Manerejiruhi ema Viya
(Mr 13.24-27; Lc 21.25-33; 17.26-30, 34-36)*

²⁹ Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa te tiávihanahi te anuma vímaimahaqueneanahi énerichuvare tiyamuricanainapa, tiyeje-jecavanainapa. ³⁰ Tásiha, náimahainapa te anuma eta nítutiara nútí Manerejirunuhi ema Viya. Tiyahanainapa eta napisira namutu ena achaneana távacuanahi eta avasareana te apaquehe. Tásiha, tímahanuanainapa nútí. Tiámanuinapaipa eta úcaji eta núcupaisirayare. Tétavicavayare eta nujaravayarepahi, níñehinapaipa. ³¹ Nuvanecaya ema Arcángele, muracayare eta macachujairayapahi, apaesa ena ángeleana nacurujicainapa namutu ena nuchanerana nunerejiruanahi, tiásihanayare te tamutu eta juca apaquehe.

³² Tiuri puiti, nuvaraha nímicutichinahe eta jácáni yucuquí. Eta táitsivachiravavacapa eta tapacajiana, te ímahapa eta tajimuyairapa eta tatavaquí, tiúchucayarepa eta tapacajianaya arairu, tímaticarehi tíanehiripa eta únemuhuirayarépa. ³³ Ene tacahehi, te ímahayarepa tacaecherapa eta júcana ecutiarareana, ímaticallyanapa eta tánehirainapa eta nuchavira. ³⁴ Numetacahevanecha: Vuíchaha tívanaimahi ena achaneana náitareruanaichaha te táitecapapa eta júcana ecutiarareanayare. ³⁵ Títavainapa eta anuma étapa eta apaquehe. Tativyaresera títauchava tamutu eta numetaruheanahi.

³⁶ Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahupucáini néchahini. Macarichu ema Tata, ema téchahi. ³⁷⁻³⁸ Tacutiya-re eta acane eta nájahúchiravahi tépenana ena achaneana machamuriani ena Noé. Ena nani tinicairihianarinecha, náematanerinecha térana, tímarecaneahi ena nachichanaveana. Vahi téñamavanaimahi eta náimairahi ena Noé eta masiapirahi tayehe eta ichapequene pacure. ³⁹ Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi natsecavahini tayehe eta nuchaviraya. ⁴⁰ Te jena sácheanayare, natiarihiyare ena apinana ajairana ticaemataneanahi te isaniti, ema émana tiáramicareyare tiára. Ema apana manasinapa. ⁴¹ Tacutiquene, apinahanipuca ena esenana cáemataneanahi tiyuvarecanahipuca. Énerichuvare esu ésuana tiáramicareya tiára. Esu apana sunasinapa.

⁴² Eta tacahe, etsecavahi ecauneuchava éti machu vahi ecunecapuchava eta nítisirayarehi nuti Iáquenu. ⁴³ Nuvaraha ácaicutiaraqueneana. Machu ácutiriana mácani achane námeyeruhi ena tíamerahiana. Tájina máechapiavahini tájahapuca hóravayarehi eta náitecapuchiraya te mapena. Te máechapucaini, ticauneuchavapahini éma, váipasare nacuameyechahini. ⁴⁴ Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu íaramecariana.

*Nararihi ena músuana tíuriana. Nararihivare ena músuana máurirahana.
(Lc 12.41-48)*

⁴⁵ Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta májarasiraya eta tinicacareana ena apamuriana machamusuvanahi. ⁴⁶ Tétavicava eta máuricacarevaya ema maca ticatuparahahi, te tamutuhi máitauchahi jácáni machimapirana ema máquenu. ⁴⁷ Németeaca, eta tamutuirihi tiuri eta machimapirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíuríhi eta máitauravahi. ⁴⁸ Téhesera váhipuca tiuri eta mapanereruana ema mácani empleado,

† 24:28 Te máechajiriruvahi ema Jesús, áni macahehi: "Te jácáni mávihahi ema máepenaquene, eta távihayare eta sipuquiána". Eta juca mayehéhi proverbio, tatiarihi eta tacayemaquenehi tayumurevahi.

máimijachaichucha tiyereyarehi eta máitecapirayarehi ema máquenu. ⁴⁹ Tásiha, macaete-majiricavacapupuca ena machamusuvanahi. Máichapupuca eta piesta, tinahacavapa téra macachanevacahi ena macutiqueneana téra rahiana, téniricapa. ⁵⁰ Tásiha, vaipa manecapau-chavahini te títecapapa ema máquenu. Machimaracapa ema empleado eta mamapachichijisiraipa eta máimahaqueneana. ⁵¹ Eta tacahe, ema máquenu macavanairipinapa náestacayare muraca. Tájina najapanuhini, tayanapane máyahainepuca, macapitiqúiahechavainepuca éma. Tásiha, machu ácutihini ema maca empleado máurirahahi, machu ecaquipacasisami eta te yucu infierno.

25

Ena Jesús máimicutichina ena diésqueneana amaperuana esenachichana

¹ Puiti nuvaraha nímicutichinaheya nayehe ena tiúchuchanaya ticachanenuanayare eta néjasihaya eta návacureya, énapa ena vahí ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámparinana. ²⁻⁴ Ena cincoqueneana, téchemarahianahi. Tiámauchavavacapahi eta nabotel-lana eta aceite natseruvapahi. Ena apamuriana cincoqueneanahivare máechemarairahana mapanererureana. Vahi námauchavapahina eta nahaceiteyarehi. Tásiha, tájinapa naviyahini. ⁵ Tacahe, vahí náitecapavanehini ena araimana. Navarahaipahi tímacana éna. Tavehapa eta ichapu, tímacanapa. ⁶ Tacahe, te enumuhupa yati nasamapa ema tipiaracahi. Ánipa macahe: “¡Nárájapa ena araimanayare! ¡Yare iácapa!” nacahepa. ⁷ Técheputanapa namutu ena esenachichana. Náetupiricapa eta namicahuana. ⁸ Tásiha, ena cíncoanavare tiájicuvacaipahi eta namicahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tiájicuvacaipahi eta juca vimícahuana, vémahaequenehaipa” nacahepa. ⁹ Énasera ena cincoqueneana najicapapa: “Vahi vjjaracahémahi machu véchuriaca víti apanava. Vahi várataimahi. Tiúripina eyana evachareca eta ehaceitea” nacahepa. ¹⁰ Tásiha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távihayarehi eta piesta. Náehicapa ena cíncoana natseruvanahi te távihayarehi eta piesta. Tacahe, ticaeratapa eta tapaja. ¹¹ Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejiequenehahavi. Vivaraha visiapa” nacahepa. ¹² Émasera ema arayanayare majicapapa: “Eti, ¿nájahahéhipuca? Vahi nímatihe. Németeaca vahí étna tavanaranaina eta peti” máichavacapa ema arayanayarehi.

¹³ Tacahe, ema Jesús máichahavipa:

—Éti, vahí ecucuti ena máechemarairahana. Ecutiyaesera ena téchemarahiana. Ecuneuchavaicha éti, machu vahí ecunecapauachava eta jácani sácheyare eta nuchavirayare nútí Manerejirunuhi ema Viya.

Ena Jesús máimicutichinavaca ena achaneana ticajjaracasianahi eta maplatane ena achane rico

¹⁴ Puiti nuvaraha nímicutichinahe tayehe eta níjarasiraheya eti nuchanerana eta evacurecana taicha eta táurirahi eta ecaemataneasiranuhi. Matiarahi ema achane rico. Tiyana-yarehi te apana avasare. Máichuhavacapa ena mapanana mamusurana. Májjaracapa eta maplatane.

¹⁵ Ena achane máimativacahi ena náechemaravahi ena mamusurana. Ena émana májjaracapa cinco millone. Ena apana májjaracapa apina millone. Ena apana májjaracapa étana millone. Nacaiejapacayare eta plata. Tásiha, ema rico tiyanapa te macaijuheryarehi te apana avasare. ¹⁶ Tacahe, ema tijacapahi eta cinco millone, macaemataneacapa eta plata. Macaejapacapa eta plata. Diez millonepa maicha eta maplatane eta macaejapasirahi. ¹⁷ Ena apana, ema tijacapahi eta apina millone, énerichuvarepa macaejapacapa eta plata. Titucavavare éma eta cuatro millone eta plata. ¹⁸ Émasera ema tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

¹⁹ Tiyere eta mapairirisirahi ema náejaharu. Téhesera te tichavapa, mayaserecavacapa eta plata májjararuanahi éma. ²⁰ Tacahe, tínapucapa ema tijacapahi eta cinco millone. Májjaracapa ema máquenu eta máiturevahí. Ánipa macahe: “Tata, píti píjaracanuhi cinco millone eta plata. Júcahisera cinco millonevare eta táejapasirahi”. ²¹ Ena máejaharu majicapapa: “Tiuri, nuchicha. Tájina táichava. Tétavicava eta piúriava. Pitauchahi eta picaemataneasirahi eta nuplatane. Puiti vahí támapurujimahi eta piúrivahi tayehe eta juca ánimurichichahi níjararuvíhi. Nutuparacavinapa eta camuriquene. Puiti pisiapainapa

eta nuyehe. Piúrisamurereacaváinapa”.²² Tásiha, títecapavarepa ema apana ema tijacapahi eta apina millone eta plata. Máichavarepa: “Tata, júcahi eta apina millone eta plata píjararunuhi. Júchavire eta apinavare millone eta táejapasirahi”.²³ Ema máejaharu majicapavarepa: “Tiuri, nuchicha. Tétavicava eta piúri va píti apana. Puiti, váhivare támapurujimahi eta piúrivahi tayehe eta juca ánimurichichahi níjararuvihi. Nutuparacavinapa eta camuripanaquene. Puiti pisiapainapa eta nuyehe. Piúrisamurereacaváinapa”.²⁴ Tásiha, títecapavarepa ema tijacapahi eta étana millone. Máichapa ema máejaharu: “Tata, núti nímativíhi eta pímapapanuravahi. Piverejicanuyarehi eta táejapasirayarehi eta piplatane. Pítahacanuyarehiva eta nématanevachahi”.²⁵ Eta nupisirahi nácaetehahini eta piplatane, nécarapa. Puiti, júcahi nímicava tamutu eta piplatane”.²⁶ Ema máejaharu majicapapa: “Tétavicava eta pisunsuva, píti plújutataji. Te pímatinuhipuca eta numajapanuravahi, nítharahi eta apaematanevacha, téhevare pímiyahahi nuverejicaviyare eta táejapasirayarehi eta níjararuvihi nuplatane; ²⁷ váhiyapa pinacapai te banco eta nuplatane. Puiti váequeneipahini puiti eta táejahacaripahini eta nuchaviraipahi”.²⁸ Tásiha, máichavacapa ena apamuriana mamusurana natiarihiqueneanahi: “Everejica ema mácatataji eta plata. Íjaraca ema ticayehehi eta diez millone. ²⁹ Taicha, mácani máituruequenehahi eta macaemataneasirava, tatuparacahi eta nímicatasiraya. Ticayeheyare camuripana. Énasera nácani vahi náiturequenehahini eta nacaemataneasirava, ticaverejicasianayarehi eta náijaracasianahi. ³⁰ Émechareca muraca ema maca musu máurirahataji. Vahi eculapanu, tayanapane máiyahainepuca, macapitiquiahechavainepuca. Tásiha, íáquijica eta te cuarto tamapicujuhequeneapanahi” macahepa ema achane rico.

Ena achaneana, te jena sáchezare ticayaserehianainapa, étapa tiámavacaya eta náitátirahi ena apamuriana, ticaevatanainapa tayehe eta návihayare

³¹⁻³³ Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuina. Tásiha, névatacaya ena nuyeheana ángeleana nacurujicavacaya te numirahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena vahi nuchanerainahini nunacainapa te sapa. ³⁴ Tásiha, nuti Rey áni pa níchayare ena nuchanerana tívihanayarehi te nuvaure: “Yare, eti iúricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaguehe. ³⁵ Taicha te ímahanuhi eta nécuavahi, éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapahi, éti íjaracanuhi eta nítecapihayare. ³⁶ Tájina numuirihainapahini, éti emuriachanuhi. Nucajumahi, éti ípuchapananuhi. Nucaeratahi te cárcel, éti ejirapananuhivare”. ³⁷ Tásiha, ena níchuhaqueneanahi tíjicapanuanainapa: “Tata, ¿tájamuhu vímahavihi pécuahapahi, tásiha vénicavipa? ¿Tájamuhuvare vímahavihi pímaunepahi, tásiha víti vésicavipa eta une? ³⁸ ¿Tájamuhuvare vímahavihi te pípaisirana tájina pítecapihahini, tásiha, víti víjaracavipa eta pítecapihahi? Váhivare vímahavihini mamuriarevinahini, tásiha víti vimuriachavipa. ³⁹ ¿Tájamuhuvarehipuca picajumahi, tásiha víti vípuchapanavipa? ¿Tájamuhuvarehipuca picaeratahi, tásiha víti véjirapanavipa?” náichanupa. ⁴⁰ Tásiha, nuti Rey nujicapainavarepa: “Nutupiruva numetacahe: Nútira íjaracanuhi tamutu eta ejapanuravahi, ímicatasiravacahi ena echamuriana nuchanerana-hivare, ena nani namaesachaqueneanahi najacapanahini ena apamuriana ena achaneana” níchavacapa.

⁴¹ Tásiha, ena tívihanahi te sapa, níchavacainapa: “Étisera évuísia te numirahu, eti masuapajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema íáquenuhi ema Váinaraji énapa ena majupahana ángeleanainihini. ⁴² Taicha te nécuahapahi, éti vahi íjaracanuhini eta nunica. Numaunepahi, váhivare éschianuhini une. ⁴³ Étaripa te nupaisiranapanahi, váhivare íjaracanuhini eta nítecapihahini. Néchurihavare eta numuiríha, váhivare íjaracanuhini numuirihainahini. Nucajumahivare, nucaeratahare, váhivare éjirapananuhini” níchavacainapa éna. ⁴⁴ Tacahe, éna náichanupa: “Tátachicha, ¿tájamuhu vímahavihi pécuahapahi, pímaunepahi, pípairicapahi, mamuriarevihi, picajumapahi, picaeratahi, eta ícácani vímáimicatasiravíhipuca?” ⁴⁵ Nuti Rey nujicapainavarepa: “Nutupiruva numetacahe: Éti, vahi ejapanunuhini, taicha vahi ájapanuvacahini apaesainahini ena nani nuchanerana emaesachaqueneanahi”. ⁴⁶ Emutu éti eyanayare tayehe eta ecaicuñaiyare máitavacayare. Énasera ena nunerejiruaana, matapiravareanahi. Námvacainapa tayehe eta táurivayare eta náitaresira, máitavacacayareva.

26

Napanerechapaí ena tuparairucana eta nacaratasirayare ema Jesús

(Mr 14.1-2; Lc 22.1-2; Jn 11.45-53)

¹ Te títapiricapa eta juca máimiturapianahi, máichahavipa viti máimitureana:

² —Écharichuhi éti eta apinarine sache eta Pascuáiraya. Tásiha, núti Manerejirunuhi ema Viya, ticaratacanuanainapa témetatarecanuanainapa —máichahavipa.

³ Tiuri, ena tuparairucana énapa ena aquenucarahana, énapa ena escribánoana ticurujicacanaripahi te tajuhe eta mayehe palacio ema Caifás, ema corregidor. ⁴ Tacahe, náechajisihapahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi. ⁵ Tipicacavanarichuchasera. Ánipa nacahehi eta náechajiruvahi:

—Vuíchaha vicucarataca éma achichu juca piéstairaya. Taicha camurianayarehi ena achaneana, machu tájahapuca náicharachavi taicha navarahayarehi nacatiucha éma. Vicuchapasera nayana —nacahepa.

Esu esena tíamasichahi ema Jesús te tájiyequene perfume

(Mr 14.3-9; Jn 12.1-8)

⁶ Tacahe, ema Jesús, tiyanapa tichava eta te avasarechicha Betania. Náichuhasivahi eta manisiraya te mapena ema achane ticajare Simón ema leprosoinihi. ⁷ Tacahe, eta manisirahi, sucahepaipahi esu ésuna esena. Suámaphi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta tájiyieva. ⁸ Eta náimairahi ena nuchamuriana máimitureana ema Jesús, váiparinehi náuricahini eta suémepuresirahi eta tasivachaquene perfume sujucuisirahi ema Jesús. Ánipa nacahehi:

—¿Tájaha tacayema suémepureca eta juca tasivachaquenehi perfume? ⁹ Tiúripanahipucani víjararechahini eta juca tájiyemaquenehi. Vivehahini eta camuriquene plata; tásiha, vímicatasihahini ena páureana —nacahepa.

¹⁰ Émasera ema Jesús máimatihí eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi. ¹¹ Ena páureanasami, tamutuchuca sácheana eta ecachaneravacayare éna. Ímicatacayarehi te jácani ecaimahaquenérana. Nútisera vahi nánasiquenémahi eta eyehe. ¹² Eta juca sujucuisiranuhi eta perfume, sucainapucahi ésu eta sújiyechirahi eta náquehe tayeheyarehi eta nucaecarasirayare. ¹³ Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquene —macahepa.

Eta májjararesirahi ema Júlasí ema Jesús

(Mr 14.10-11; Lc 22.3-6)

¹⁴ Ema Júlasí, émarichu vichamurinihi éma vidocenénihi apóstole mayehe ema Jesús. Tiyanapa téchajiripanavahi nayehe ena tuparairucana. ¹⁵ Ánipa máichavacahi:

—Te yátupihipuca evarahahi ecarataca ema Jesús, núti nímechaheyare. Nucamunuhisera néchayare ¿yanayarepuca eta evachachanuyare eta nímechiraheyare eta mávirare? —máichavacapa.

Tacahe, éna nájaracapa eta treinta reale. ¹⁶ Jéhevarapasera ema Júlasí matanucaipa eta máicharachayarehi eta májjararesirayarehi ema Jesús.

Ema Jesús mánimuríhapa ena máimitureana

(Mr 14.12-25; Lc 22.7-23; Jn 13.21-30)

¹⁷ Tacahe, títecapapa eta piesta Pascua, étaripa eta tínapuca sache eta semana vinicahi eta pan mayehere levadura. Viti máimitureana viyaserecapa ema Jesús:

—¿Távihapuca pívarahahi vácaijuhe eta vétupirisivahini eta vinisirayare eta uvesachicha eta viyeherepi? —nacahepa.

¹⁸ Ema tivanecahavipa:

—Eyana tayehe eta Jerusalén, te mapena ema nímaticasare. Ani íchayare: “Ema maestro tivanecahavíhi eta piyehe. Ani macahehi: Tiánehipa eta nítavirayare eta nématanehi. Te pipena eta nunisihayare eta uvesachicha eta viyeherepi, nénisihayare ena nímitureana” íchayare.

¹⁹ Tacahe, tiyananapa ena máimitureana. Étapaichuhi náichahi eta máimiturapianahi. Tinahacavanapa náetupiricahi eta naniruyare tayehe eta Pascua.

²⁰ Tacahe, te jena yátiquenehi ema Jesús, ténicahavipa viti dócequeneana máimitureana. ²¹ Te vinicaripahi, máichahavipa éma:

—Jéhesareinehi, te etaracu éti, mararihi ema émana tíjararecanuyare —máichahavipa.

²²Tacahe, víti ichaperinehi eta máimipaneresirahavihi eta juca máichirahavihi. Vimutu viyaserecapa éma:

—¿Nútipuca, Tata, jácani? —víchavacapahi víti éma.

²³Tásiha, éma máichahavipa:

—Mácani néniruyare eta pan néchippaejiruhi te juca nuplatura, émara ema tjararecanuyare.

²⁴Tacahe, núti Manerejirunuhi ema Viya, éta paichuhi eta nacapasiranuyarehi, tátauchi-ravayarehi eta nuyehé eta táechajiriruvahi eta Sagrada Escritura. ¡Páuresamisera ema tjararecanuyare! Tiúripaichuhipucani vahi macuchucahini te sujehe esu maena — máichahavipa.

²⁵Tacahe, téchajicapa ema Júlasí:

—Maestro, ¿nútipuca jácani níjararecaviyare?

Tásiha, ema Jesús majicapapa:

—Pítisami —máichapa.

Éma Jesús tímechahavi eta macaejasiraya eta matratune arairu mayehe ema Maiya (1 Co 11.23-26)

²⁶Tásiha, eta vinisirahi, mavehapa eta pan ema Jesús. Mahasulupayachapa ema Viya. Mayuvetucapa, tjaracahavivacapa víti máimitureana. Tásiha, máichahavipa:

—Eta juca neche. Enica —macahepa.

²⁷Tacahe, mavehavarepa eta vasu vérirare, mahasulupayachavarepa ema Viya. Tásiha, tjaracahavivare. Máichahavipa:

—Era eta juca ámutu éti. ²⁸Taicha eta juca eta nítine, táepusiruvayare eta nucaepahai-rayare eta epecaturana emutu éti achaneana, esimutuqueneharehi. Étarichuvare táicutia-rayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe. ²⁹Nutupiruva numetacahe: Vaipa nápechavaimahi nérahiraréni eta juca tachi eta uva. Tiámainucava te tátauchavapa eta nusiapiraya eta nucavacuréraya, nucajupahiraya ema Tata Nucaiyaquene. Te jena sache, níjaracaheya vérainapa eta aramaruama. Vicajupahainapa ema Tata.

Éma Jesús máimereucha ema Pedro tépiyacavayare vahi máimati ema Jesús (Mr 14.26-31; Lc 22.31-34; Jn 13.36-38)

³⁰Tásiha, eta vítanesirapa, vijirapa eta jirasare eta vihasulupayachirahi ema Viya. Te vítapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoquiji. ³¹Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacaratata ema Pastor, nacapasirasamiyare. Tásiha, tijunaracanainapa eta uvesana macurujiruanainihi” macahepa. ³²Téhesera te néchepucapa te nécari, nínapucainapa te Galilea. Ánaqui nucuchapiaheyare éti —máichahavipa ema Jesús.

³³Tásiha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

³⁴Éma Jesús máichavarepa:

—Nutupiruva numetacavi piti Pedrosami: Puiti juca yati, te tamirahuinapaichaha eta táechajisirayare eta varayu, mapahe eta pépiyasiravayare vahi pímatinu —máichapa.

³⁵Éma Pedro macahevarepa:

—Tayanapanepuca pímicapacanu, váhiquenesera népiyacavaimahi vahi nucoimati-vihini, váhivare nínajiacavimahi —máichapa.

Viti apamuriana étarichuvare tacahehi eta véchajiriruvahi.

Éma Jesús tíyujaraca te Getsemaní (Mr 14.32-42; Lc 22.39-46)

³⁶Te vítecapapa víti tayehe eta huerta Getsemaní, máichahavipa ema Jesús:

—Éjacachaha eta ani te juca. Ecuchapanuchaha. Núti nuyanayare ánaquipana, nuyujarayare —macahepa.

³⁷Mapananaichu ena mámaqueneanahi: ema Pedro, ema Juan émapa ema Jacobo. Éma Jesús, ichape eta máéñamiravahi te masamure, ticatisamurevapa. ³⁸Tásiha, máichavacapa:

—Tétavícava eta táéñamirava muraca eta nusamure. Tavaraha ticapacanu. Ácahéchaha ani te juca. Váhisera ecuimaca. Ecauneuchanuhi —máichavacapa.

³⁹Tásiha, tipaipanapa ánaquipanachíchahi. Tiáqui paicavapa máetipaisinapa, macaitecapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasea núti eta nítauchiraya eta pivarahaquenehi píti —macahepa.

⁴⁰ Tásiha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásiha, máichapa:

—Váiparinehi ímicatacanuhini ejaneacavahini étanainahipucaini hora ácahehini. ⁴¹ Éjamiuchava. Eyujarauhava apaesaina. Eyaseaca ema Viya eta étumevaina apaesavaahi macuiturucahe ema Satanás. Yátupihinéni eta iáchanevana taratahahi ticaratacava. Étasea eta éche máteji, vahi taratahaimahi ticaratacava —máichapa.

⁴² Tásiha, tiápechavavarepa tiyanavarepa ema Jesús. Apihepa eta mayujarasirahi. Ánipa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítauchiraya eta pivarahaquenehi puiti. Nísapava nacapacanu —macahepa.

⁴³ Tásiha, tichavavare eta viyehe viti máimitureana. Tímahahavipa víti vímamurihaipa taicha taveharipa eta ichapu eta viúquihana. ⁴⁴ Tacahe, mapahequenepa tichavapa tiyujarapana. Étarichuhi eta máechajiriruvanahi. ⁴⁵ Te tichavapa, téchajicahavipa:

—¿Iápechavapa ímaca? ¿Vuíchahapuca enaracahini? Jéhesare, puiti títecapapa eta nutuparahahi nacaratasiranuyare ena ticatianacananahi. ⁴⁶ Ávane ema tíjararecanuyare. Échepuca. Viyana viácavaca —máichahavipa.

Nacaratacapa ema Jesús

(Mr 14.43-50; Lc 22.47-53; Jn 18.2-11)

⁴⁷ Téchajiricavaichaha ema Jesús, macahepainecha ema Júlasí, ema vichamurinihi. Máimurihapaipahi ena camuriqueneana achaneana suntaruana. Ticaepuchiriquiana-paipahi, étapa eta nayeheana espada. Éna, vanairucanahi nayehe ena aquenucarahana. ⁴⁸ Ema Júlasí, tatiarihihi eta máicutiarayarehi eta náimatirayarehi ena suntaruana ema Jesús. Ani macahehi eta máechajiriruvahi ema Júlasí:

—Ecunenuyare. Ema nétserareruyare, éma ecaratacaya —macahepa.

⁴⁹ Tacahe, ema Júlasí témeñahavapa mayehe ema Jesús. Máichapa:

—Yátiheipa, tata Maestro —máichapa.

⁵⁰ Tásiha, máetserarecapa. Ema Jesús majicapapa:

—Píti nímiturevíhi, ¿tájaha tímitecavi? —máichapa.

Tásiha, ena suntaruana enevanepa nacaratacachi, napresuchapa. ⁵¹ Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás. ⁵² Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheyare, espada eta ticapacayare. ⁵³ Váhipuca pecha te návarahahini núti nuyaseacahini ema Tata, puítinaichuhini macucupaicahini ena 80,000queneana ángeleana. ⁵⁴ Váhisera nuvaraha nuyaseaca. Tatuparacahi títauchavayarehi eta táechajiriruvanahi eta Sagrada Escritura eta níchavaquenevayarehi —tásiha, máichavacapa ena suntaruana —. ⁵⁵ ¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijricavapa námerahihini? Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epaticavahini ecaratacanuhini. ⁵⁶ Títauchavahisera tamutu eta juca taicha tacahehi eta náechajiriruvahi ena profetanahi, tayehe eta Escritura táechajisihairanuhi —macahepa.

Tacahe, viti máimitureana vimutu vijunaracapa, vinaquicapa ema Jesús.

Nacatupihapa ema Jesús te namirahu ena tuparairucana

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ema ticaratacanahi ema Jesús námapa te mamirahu ema Caifás, ema corregidorhi te jena áñohe. Natiarihivare ena escribánoana énapa ena aquenucarahana. ⁵⁸ Ema Pedro, máehiequenehapahi, mayerehipahisera. Te náimisipapa, tisiapavarepa éma te tajuhe eta canchón mayehe ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharacayarehi ema Jesús. ⁵⁹ Tacahe, ena tuparairucana énapa ena aquenucarahana natanucaipahi ena tépiyaquenehanayarehi ema Jesús, navarairahi tatiarihiyarehi eta tivichayarehi eta máepenirayare. ⁶⁰ Váhisera náichimavahini, camurianahinéni ena tépiyaquenehanahi. Tisiapananechasea ena apinana tépiyaquenehanayarehi. ⁶¹ Ánipa nacahe:

—Ema maca achane visamahi víti eta mavarairahi máquipaica eta Templo mayehe ema Viya tacapichahuquenehi. Tásiha, máimichavayarehiji macaechepuca te mapanaquenenaji sache —nacahepa.

⁶² Tacahe, ema corregidor téchepurucainehi. Mayaserecapa ema Jesús. Ániapa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

⁶³ Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecaviyare. Vahi nuvaraha pépiyahirahi. Némechavi máimahavihi ema Viya. Pátupiruva pimetaçahavi te yátupihipuca pítiqenehi Cristo, Machichaquenevihu ema Viya —máichapa.

⁶⁴ Tacahe ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numetaçahayare eta apana. Járjapaya eta sáçeyare ímahanuyare eta néjasirayare te mavauare ema Viya máitupajjiárúvaquenehi. Ímahanuyareva núti eta núcupaisirayareva násihairayare te anuma, támiranuyarepahi eta úcaji —macahepa.

⁶⁵ Tacahe, ema corregidor eta masamirahi, tiseamarinehi ichape. Tivetsayujicavapa eta mamuiraha eta masemanevahi. Tásiha, macahepa:

—¡Tétavicaivaipa eta maviurevahi ema maca taicha macaechahihi ema Viya! ¡Puiti émaqueneva visama éma tépiyacavahi Machicha ema Viya! ¡Váipa tácomesa vitanucahíni ena testígoanainahini! ¡Puiti esamaripa éti eta juca macayemaquenehi! ⁶⁶ ¿Tájaha vícharacayare puiti ema maca? —macahepa.

Tásiha, najicapapa éna:

—¡Ticaviurevapa! ¡Étaina táimicapaca! —nacahepa.

⁶⁷ Tacahe, náehavacapa ema Jesús. Náutuquichapa. Náehamirahavare. ⁶⁸ Tásiha, náichapa: —Vímahasejicacha, te yátupihipuca pítihi Cristo. Te pijarauquipuca, pímatihaviyare nájahahipuca ema téhamirahavíhi —nacahepa.

*Ema Pedro tépiyacavapa vahi máimati ema Jesús
(Mr 14.66-72; Lc 22.56-62; Jn 18.15-18, 25-27)*

⁶⁹ Tiuri, ema Pedro, matiarhichahahi eta te canchón. Téjacaipahi tíasacavahi. Tacahe, sucahepaipahi esu mavanara ema corregidor. Suímahapa éma. Tásiha, suíçhapa:

—Németeaca pítirichu ñímiture eñi Jesús eñi ticavasahi te Galilea —suíçhapa.

⁷⁰ Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? —máichapa.

⁷¹ Tásiha, mavarahapa tíuchucavaneyarehini. Suímahavare esu apana vanaraca. Suíçhavacapa ena natiarhiqueneanahi:

—Eñi ñica achane éñirichu ñichamuri eñi Jesús Nazareno. Nímahahi ñicachanepahi —suíçhavacapa.

⁷² Tíapéchavavarepa ema Pedro téchajica, ániapa macahe:

—Nujuracha te emirahu. Váhiquene nímati ema píchaquenehi —macahepa.

⁷³ Te tiyererehachichavarepa, náimhavarepa ena apamuriana. Náichavarepa:

—Yátupiquene pítirichu machamuri ema maena Jesús, taicha eta péchajisira éta tímereuchavihi —náichapa.

⁷⁴ Tásiha, macahevarepa:

—Máicuñacanuine ema Viya te vahi nucucahe yátupina. Váhiquenesera nímati ema achane échajisihaquenehi —macahepa.

Tásiha, enurujipa téchajicanecha eta varayu. ⁷⁵ Te masamapa eta varayu, enevanepa máechahi ema Pedro eta máichirahi ema Jesús: “Te tamirahuinapaichaha eta táechajisirayare eta varayu, píti mapaheyare eta pépiyacavayare vahi pímatinu”. Tásiha, tíuchucavanepa ema Pedro. Tíyahavanepa taicha máimativanepa eta táichapevahi eta máejecapiravahi.

27

*Námapa ema Jesús te mamirahu ema Pilato
(Mr 15.1; Lc 23.1-2; Jn 18.28-32)*

¹ Te tijararahipa, tíurujicavanepa namutuyaréni ena tuparairucana énapa ena aquenucahahana. Tícaechacasípa eta náimicapasirayarehi ema Jesús. ² Nacuchucapa ticaitihapaípa eta námirapahi te mamirahu ema Poncio Pilato, ema aquenucahi prefectohiquene.

Eta nacapasiravahi ema Júlasí

³ Tacahe, ema Júlasí eta máimairahi eta táichapevahi eta macatajivairahi ema Jesús étapa eta nacapasirayarehi, ichaperinehi ticatisamurevahi taicha eta májecapiravarihi. Tiyanapa máimichavapanahi eta treinta reale eta plata mavachahi nayehe éna. ⁴ Tásiha, máichavacapa: —Néjecapavahi ichape eta njararesirahi ema maca achane matapiravarequene. Nuvarahá nímichavaya eta nuvachainihi —máichavacapa éna.

Énasera najicapapa:

—Jéhepuca, vahi vecha víti. Péchaquenevaichuhi píti —náichapa.

⁵ Émasera ema Júlasí máquijimirauchavacapa eta te tajuhe eta Templo návihahi éna. Tásiha, tiúchucapa. Tiyanapa. Táichavenehi eta macatisamurevairahi, tichumucavapa.

⁶ Ena tuparairucana navehapa eta plata. Tásiha, nacahepa:

—Vahi táuricahini víyaracuhahini eta juca plata tayehe eta caja vinaquisirareva taicha mavachaequeneya eta máepenirayarehi ema maca achane —nacahepa.

⁷ Tásiha, eta plata máimichavaquenehi ema Júlasí, napanerechaipa eta navacharesirayarehi eta apaquehe nacaeasarirareyare ena apavasanana. Eta juca apaquehe naseresirarehi ena típarecarahiana eta yupi. ⁸ Puiti éta ticaijarehi “Apaquehe máitinevacha ema Jesús”. ⁹⁻¹⁰ Tacahehi eta táitauahiravahi eta májurehi ema víyaraha profetaini Jeremías. Ani tacahehi: “Navehapa eta treinta reale eta plata. Ena tuparairucana navacharecapa eta apaquehe nayehe ena típarecarahiana. Tacahe eta juca mametasiranuhi ema Víya eta náichirayarehi eta juca” macahepa ema víyarahaini Jeremías.

Ena Pilato mayaserecapa ema Jesús

(Mr 15.2-5; Lc 23.3-5; Jn 18.33-38)

¹¹ Ena Jesús ticayaserehipa te mamirahu ema aquenucahi Pilato. Ánipa macahe eta mayaseresirahi:

—¿Jéhesareji réyvihí píti nayehe ena pijaneanana israelítana? —máichapa.

Ena Jesús majicapapa:

—Pítupiruvahi eta juca piyaseresiranuhi. Yátupihí eta nurreyvahi —máichapa.

¹² Tásihasera, te nametauchaipa ena tuparairucana, vahi majicapavacahini ema Jesús.

¹³ Tacahe, ema Pilato máichapa:

—¿Vahí péchajiuçhava eta juca nametauchiravihí? Camurihí eta piviuervana eta nayehe —máichapa.

¹⁴ Émasera ema Jesús váhiquene majicapahini. Tásiha, ema Pilato máramipa eta mamajicapirahi. Váipa máitucacarehini.

Ena Pilato macavanairipipa eta náetatasiraya ema Jesús

(Mr 15.6-15; Lc 23.13-25; Jn 18.38-19.16)

¹⁵ Tiuri puiti, tatiaríhi eta mayeherepí ema Pilato, te Páscuamuhuana, macaiticayarehi ema émana preso, mácani nayasearuyarehi ena achaneana. ¹⁶ Tiuri, matiaríhi ema achane ticaijare Barrabás, ichape eta maviurevahi. ¹⁷ Eta náurujisiravahi ena achaneana, mayaserecavacapa ema Pilato:

—¿Nájahapuca ema eyasesereruyare ema nucaitiruya? ¿Émapuca ema Barrabás, téhesera émapuca evaraha nucaítica ema Jesús, ema ticaijare Cristo —máichavacapa. ¹⁸ (Taicha máimatiacaripahi eta nametauchahi ema Jesús ena tuparairucana taicha nacapinaruhi éna.)

¹⁹ Eta máejasirahi ema Pilato tayehe eta mávacure, suímimeta-recapa esu mayena: “Vahí picuimisiapava ñiyehé eñi ñira achane matapiravare taicha yati tametasiranuhi eta nuvapore eta ñícharacavayare éñi” sucahepa.

²⁰ Énasera ena tuparairucana énapa ena aquenucarahana náimitumurihapa ena achaneana nayaseserecahi ema Barrabás, émainahini máuchucuha. Tásiha, nayaseserecapa máepenahini ema Jesús. ²¹ Máechajimurihavarepa ema Pilato, mayaserecavacapa:

—¿Nájahasica ema evarahaquenehi nucaítica? —macahepa.

Éna najicapapa:

—¡Émaina máuchucuha ema Barrabás! —nacahepa.

²² Ena Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

²³ Ena Pilato máichavacavarepa:

—¿Tájaha tacayemahí eyaseacahi eta németatasiraya ema maca? ¿Tájahasica eta maviurevahi? —máichavacapa.

Énasera tipiareremurihanavare muracapana:

—¡Pémetatareca te crusu! —nacahepa.

²⁴ Tacahe, máimahapa ema Pilato eta vahi máiturucahini macatiuchahini, taicha ena achaneana tivayuchavapaichucha eta nasemanevanahi. Tacahe, máemepanapa eta une, ticasipavahupa te namirahu ena achaneana. Tásiha, máichavacapa:

—Nuvaraha nímercava te emirahu vahi nútíparacaina eta máepeniraya ema maca achane matapiravarehi. Éti échinavayarehi —máichavacapa.

²⁵ Tásiha, nájicapapa namutu ena achaneana:

—Vítinarine vicatapurava, énapa ena vichichanaveana. Vítinarine taeha eta máepeniraya ema maca achane —nacahepa.

²⁶ Tacahe, ema Pilato macavanairipipa nacaitica ema Barrabás. Tásiha, macavanairipipa náestaca ema Jesús; tásiha náetatacayarevare te crusu.

Nacavayuemarajipa ena suntaruana ema Jesús
(Mr 15.16-20; Jn 19.1-3)

²⁷ Tásiha, ena suntaruana námapa ema Jesús tayehe eta náestasihayarehi te távirarehi eta guardia. Nachayacapa ena camuriqueneana suntaruana náumurivana. ²⁸ Navejamuhiacapa eta mamuirihá. Namuriachapa eta muíriare títisime. ²⁹ Náitsamemacapa eta itapepi eta majarapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayarehiji. Eta nacavayuemarajirahi, náepuyumirauchapajicaha. Ánipa nacahe:

—Tata, ¡pítitataji nayehevihíji Rey ena israelítana! —náichapa.

³⁰ Tásiha, náutuquichapa. Náetetuvauchapa eta matsucurupahi, náepuchisicapa tayehe.

³¹ Te tamutupa eta nacaecahijirisirahi, navejamuhiacavarepa eta mamuirihá títisime. Namuriachapa eta mamuiriháichu. Tásiha, námapa tayehe eta macaetataiyarehi.

Náetatacava ema Jesús te crusu
(Mr 15.21-32; Lc 23.26-43; Jn 19.17-27)

³² Eta napaisirapahi te calle, nácapajicapa ema achane ticajare Simón ticavasahi te Cirene. Napamicapa éma manaracuha eta macurusura ema Jesús. ³³ Tacahe, nacaitecapapa tayehe eta masihi nacaetatairare ticajare Gólgota. ³⁴ Ánaquipa náesichinehi ema Jesús eta vino tisucareama ticasiriquiama eta ipuruji. Te masamaecapa ema Jesús, vaipa mávarahahini máerahini.

³⁵ Te náitauchapa eta náetatasirahi ema Jesús, ena suntaruana nasuertehachapa eta mamuirihá eta nájarajirisiracacahi. Tacahehi eta táitauhiravahi eta májurehi ema víyahaini profetaini David. Ánipa tacahe: “Tíjarajiricacanapa eta numuirihaini. Nasuertehachapa eta nájarasiricacairahi”. ³⁶ Tásiha, najaneacapa ema Jesús ena suntaruana. ³⁷ Te tápusi eta macurusura, tatiarihíhi eta ajureca táechajisihahi eta tivíuchahi. Ani tacahehi eta ajureca: “Ema Jesús, Rey nayehe ena israelítana”.

³⁸ Natarihíhivare ena apinana tímerahiana. Ticaetatanahivare te machacaya, ema émana te mavauere, ema apana te masapa. ³⁹ Tásiha, ena tíanucumirauchanapahi, tépiupusicavanapaipa eta nacaecahirapaipahi éma. ⁴⁰ Ánipa nacahe:

—¡Pítitataji! Pícahechajiriruvahi eta piáquipaisirayarehíji eta Templo, pírátahahivaréji pímicahava picatupíha eta arairu Templo te mapanayarichuhíji sache. Puiti vivaraha vímaha eta pítipajijasiravahi, te yátupipuca Machichavi ema Viya. Piúcupaica te jara crusu. ¡Picatiuchava píttíjivaina! —náichapa.

⁴¹ Énerichuvare ena tupairucana nacaecahijiricavare, énapa ena escribánoana énapa ena fariséoana, énapa ena apamuriana aquenucarahana. Náichajiricacapa:

⁴² —Ema mácacacha, macahehi eta máechajiriruvahi eta marátahairahíji macatiuchavaca ena apamuriana achaneana. Tásiha, puiti váhivare marátahahini émajivainahíni macatiuchavahíni eta te jara mávihahi. Te yátupinahíni Réyinaíni víyehe víti israelítana, macatiuchavahíni, ¿masi? Máucupaicaripahíni te jara crusu, ¿masi? Visuapasarepáini eta vímairinahíni. ⁴³ Téhevare te yátupíhipuca ticasínavahi me Viya, vivaraha vímaha macuchucuha éma puitinaríchu, te yátupíhipuca máemunacahi éma. Taicha macahehi eta máechajiriruvahi eta machichairahi ema Viya —nacahepa.

⁴⁴ Ena tímerahiana ticaetatanahivare te machacaya, énerichuvare nacaecahivare éna apanavare.

Eta máepenirahi ema Jesús
(Mr 15.33-41; Lc 23.44-49; Jn 19.28-30)

⁴⁵ Tacahe, te las dócequenepa, témahapa eta sache. Timapícupa tamutu eta apaquehe. Mapana hora eta tamapicuirahi. ⁴⁶ Tásiha, te las trespa sache, típiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

⁴⁷ Tacahe, ena natiarihiqueneanahi ena tisamanahi, ánivarepa nacahe:

—Esama ema maca achane mapiaracahi ema víyarahaini profeta Elías —nacahepa.

⁴⁸ Ema apana tiyanapa tijnupahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca ema Jesús, machuchujicayarehi. ⁴⁹ Énaserá ena apamuriana, ánivarepa nacahe:

—Ésamiricachucha. Vímahayare te títecapayarepuca macatiuchapana ema Elías —nacahepa.

⁵⁰ Tásiha, tíapéchavavarepa tipiaraca muraca ema Jesús. Tásiha, tépenapa. ⁵¹ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. Tíyayacarepa eta apaquehe. Étaripa eta ichapepuhiqueneana mari téjepuichavacavare. ⁵² Étaripa eta ecariana téjiacavacapa. Téhepucanavarepa ena náepenaqueneana ena tisuapajirahianahi mayehe ema Viya. ⁵³ Tásiha, te mapanaquenepa sache, téhevare te táequenepa eta máechepusirahi ema Jesús te máecari, éna apanavare tiúchucanapa tayehe eta náecariana. Tásiha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahana éna.

⁵⁴ Tacahe, ena tijanearecanahi, émapa ema nacapítara, te náimahapa eta tayayacarevahi eta apaquehe, émapa eta apamuriana tíramicareanahi, ichaperinehi eta napisirahi. Tásiha, nacahepa:

—Yátupiquenerichuyapa Machicha ema Viya ema maca —nacahepa.

⁵⁵ Natiarihihivare ena camuriana esenana. Timararacanahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea. ⁵⁶ Nacarichusera ticajuanahi eta nájaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

Nacucupaicapa te crusu ema Jesús, náecarayarepa

(Mr 15.42-47; Lc 23.50-56; Jn 19.38-42)

⁵⁷ Matiarihivare ema achane rico ticaijare José. Ticavasahi te avasare Arimatea. Émarichuhi téhicahi ema Jesús. ⁵⁸ Te capererehipa, eta máimairahi máepenraipahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayarepa. Tacahe, ema Pilato macavanairipipa náisapahini eta náecariraya. ⁵⁹ Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana. ⁶⁰ Nanacapa tayehe eta máecari máemepiyareruhi máecariyahini ema José. Eta juca ecari, nasecajeruhi eta mari. Najihachapa tayehe eta tajitacarequene márima. Te náitachapa, tiyananapa. ⁶¹ Esu María Magdalena, ésupa esu apana María, téjacanahi éna, náimararacaipahi eta ecari.

Ticavanahianapa ena suntaruana najaneaca eta ecari

⁶² Tásiha, te apanapa sache tiyananavarepa ena tuparairucana mayehe ema Pilato. ⁶³ Náechajicapa ema Pilato. Ánipa nacahe:

—Tímitcachavihi, tata, vimetapanavi eta máechajiriruvahi ema Jesús te achanerichaha eta máechepusirayarehiji te máecari te mapanaquenénapaji sache. ⁶⁴ Puiti, vivarahahi picavanairipihini náeratahini muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téhepucaripa te máecari”. Tásiha, ena achaneana nasuapainapapuca, náimijachainapa yátupi. Tisuapacarepanainapapuca tayehe eta máichaqueneanahi te achanerichaha —náichapa.

⁶⁵ Ema Pilato máichavacapa:

—Tiuri, níjaracahe ena nusuntarurana. Eyana iama. Evaneca najaneacaquenéna. Nachujichaquenéna muraca eta máecari —máichavacapa.

⁶⁶ Tacahe, tiyananapa nachujichapa muraca eta ecari. Nanacapa eta táicutiaranayarehi. Tásiha, najaneacahi ena suntaruana.

28

Eta máechepusira ema Jesús te máecari

(Mr 16.1-8; Lc 24.1-12; Jn 20.1-10)

¹ Te apanapa sache te tijarahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari. ² Tíjahúchavapa

tiyayacarehi eta apaquehe. Émahi ema ángele eta máucaupaisirahi te anuma. Te máiteca-pauchapa eta ecari, máequehepuichapa eta mari tajihaínihi eta máecari. Máejahamecapa eta mari. ³ Tétavicava eta majaraivahi, tivayuhauquirahi. Eta mamuiraha, tétavicavavare eta tajapuva. ⁴ Eta náimairahi ena suntaruana, tiáquipapaicavanapa, tiyayacareanapa eta napsirahi. Tiánehini tépenaracana. ⁵ Tásiha, ema ángele máechajicavacapa ena esenana. Ánipa macahe:

—Vahi ecupicanu. Núti néchahi eta etanusirapahi ema Jesús ema macaetataquenénihi. ⁶ Májinaipahi eta te tajuhe eta máecari. Técheputaripahi taicha tacahehi eta máechajiriruvahi. Yare, ímaha eta juca mávinénihi. ⁷ Eyana púitinarichu, emetapanavaca ena echamurianaíhi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanahaheyarehi —máichavacapa.

⁸ Tacahe, ena esenana tiyananapa tichavanahi tijunaparacanaipa eta nametasirayarehi ena nachamuriana. Tipicanapaipa, tásihasera tacachanepahi eta náurisamurevapai ichape. ⁹ Eta najunapirapahi, tijahúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuycanapa natsiucapevachapa. ¹⁰ Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare —máichavacapa.

Eta nametarapianahi ena suntaruana

¹¹ Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta náimahaqueneanahi. ¹² Tacahe, ema corregidor ticurujiricapa namutu ena apamuriana aguenucarahana, mavarairahi téchajiricavana napanerechayare eta náicharacavayarehi. Jéhesare, navachachavacapa eta camuriquene plata ena suntaruana. ¹³ Tásiha, náimitucavacapa, ánipa náicha:

—Te natiaríhinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare. ¹⁴ Émaripa ema aguenuca te máechapuca, vímharinepa víti. Vitanucayare eta vivayuarasirayare, apaesa tacuija eviurevaina éti —náichapa.

¹⁵ Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacahehi eta nametarapi, te natiaríhi ena tiyaserecana.

Ema Jesús mavanemurihapa ena máimitureana eta náimituresihaya te tamutu avasareana (Mr 16.14-18; Lc 24.36-49; Jn 20.19-23)

¹⁶ Ene tacahehi eta viyanirahi víti óncequeneana apóstoleana tayehe eta Galilea te cerro taicha tacahehi eta mametarapihi éma Jesús. ¹⁷ Tacahe, te vímahapa ema Jesús, vépuyumurihavanepa. Vimutu vitsiucapa. Natiaríhisera ena vuíchaha nasuapapajicahini. ¹⁸ Tásiha, ema Jesús témeñahavapa eta viyehe. Máichahavipa:

—Ema Tata te anuma tituparacanuhi núti néchayare tamutu te anuma étapa te juca apaquehe. ¹⁹ Eta tacahe, eyanayare puiti epaicayare tamutu eta avasareana. Ímitucayare ena achaneana, nuchaneranaina éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo. ²⁰ Ímitucayareva eta nasuapiraina éna apanavare tamutu eta nímiturapianahi eta eyehe. Núti, tayanapane nuyerehehi, nímicatacaheyaresera. Níjaracahénapaipa eta nítipajijiasirava. Tamutu sácheana nucachanehevacyarehi. Váhiquene nujunijiacahémahi —máichahavipa.

Tamutupa eta juca nájuchaquenehi eta nímahaquenehi nuti Mateo.

**Emá San Marcos májuequeneháhi eta máicháraracaváhi emá
Jesucristo, ticáijare puiti eta
EVANGELIO SEGÚN SAN MARCOS**

¹⁻³ Nupárapenaveána, puiti nuvaráha numetacáhe eta máitaresiráhi emá Jesucristo, Machicha emá Viya, te títecapauchahavipa te vitaracu. Ichaperinehi eta viúricacareváhi puiti taicha eta mametasiráhavíhi eta táurinaquenehi máechájjiruvána emá Viya.

Ánaquiáparipáhi eta áñoána acáne, emá Viya mametacapa emá víyaháini profeta Isaiás eta mapanereruhi, eta mavanésirayare emá Machicha te juca apaquehe. Éma, tímitécahi ticatiuráhiyarehi. Énerichuvare matiaríhiyareva emá apana acháne máichuhaquene-yarehi emá Viya. Macametarairuyarehi, máetupiricavacayare ena acháneana, náinajisiráyarehi eta tamáuriqueneána napanereruána apaesa táuri eta najacápirayare emá Machicha emá Viya.

Emá Juan Tícachasiricaráhi tépanavápa ticametaráiru eta máechájjirúva emá Viya náyehe ena vámahicuruána

(Mt 3.1-12; Lc 3.1-9, 15-17; Jn 1.19-28)

⁴ Tiuri, te táequeneпа eta juca, camuríquenehi áñoána, tíuchucapa emá acháne ticáijare Juan. Éma, máichuhaquenehi emá Viya eta macametarairuirayare, máetupiricavacayare ena acháneana. Tacahe, masuapáhi eta matuparáháhi. Tiyanápa vámahicuruána. Vaipa avasarecuruháinaini. Ticametaráirupaipa náyehe ena macutíqueneána vámahicuruána. Ánípa macáhehi eta máímituresiráhi:

—Ítsivacha eta epanereruána. Éneuchava máyehe emá Viya, apaesa maperdonachahe eta epecaturána. Te éneuchavápa, núti nícachasichénápa, apaesa etsecavápa eta ejacápirayare emá Cristo —máichavacapa emá Juan.

⁵ Tacahe, nárajapápa nápaucha ena acháneana ticavasána eta te ichape avasare Jerusalén étapa eta apamuriana avasareána te táunaváhi eta provincia Judea. Eta nametauresiravápa ena acháneana, navaráiraipa náinájica eta nápecaturána, emá Juan máicachasívacapápa táyehe eta cajacure Jordán.

⁶ Emá Juan, vanáirucáhi me Viya, profetáhi éma. Eta macamuiríhairáhi eta náitsameru tájjyáha eta náitatíquene ticáijare camello. Eta máitíjuhe, vácapi jayumepi. Eta manicasareanáhi eta tsacará. Eta máítiveráhi eta mápama. ⁷ Ánivare macáhe eta macametaráiruiráhi:

—Ávanepáipáhisera mácáni yátupíquene Cristo. Éma, tíápájupánaváhi núyehe núti eta mapícauchacaréváhi. Váiparinehi nácutisámimáhi eta máítupájjiasiraváhi. Váiparinehivare nácaemuñaváimáhi macamusuranuhíni núti páuresami. ⁸ Yátupi núti nícachasícahehi te une, te éneuchavápa máyehe emá Viya. Émainápa, tícachasíchénavarepa eti ecasíñavanáhi máyehe éma, tíjaracáhénasarepa emá Espíritu Santo —macáhepa emá Juan.

Eta macáicachasiráhi emá Jesús

(Mt 3.13-17; Lc 3.21-22)

⁹ Te jena sácheána eta máviháiraricháha emá Juan te cajacure Jordán, títecapápa emá Jesús. Másihápáhi te avasare Nazaret te tinápaica eta Galilea. Tásiha, emá Juan máicachasícapa emá Jesús. ¹⁰ Te tamutupa, te tíucupaícapa eta te une emá Jesús, tíjahúchavápa máímáha téjjiacáhi eta anuma. Máímahavarepa emá Espíritu Santo ticutipáhi eta paluma. Máucupauchápa emá Jesús, mávahácapa éma. ¹¹ Tacahe, nasamápa eta máhu emá Viya tásihaquenehi te anuma. Ani macáhehi eta nasamiráhi:

—Pítira nuchícha némunaruquene. Núrisámurecha píyehe —macáhepa.

Emá Váinaráji Satanás mavaráhapa macáitsamaráji emá Jesús

(Mt 4.1-11; Lc 4.1-13)

¹² Tacahe, emá Espíritu Santo eta mávahásámurechiráhi, enurújipa máímitucaipáhi emá Jesús eta mayániraya te mávapáhi apaquehe. ¹³ Eta máyereváhi emá Jesús cuarenta sácheána. Tásiha, emá Satanás macáitsamaráji, mavaráha macáetema emá Jesús. Váhisera márátaháini. Tatiaríhivare eta sárareána eta te máviháhi emá Jesús. Te tamutupa, ena ángeleána náechapájjiricáhi éma.

Emá Jesús tépanavápa ticametaráiru

(Mt 4.12-17; Lc 4.14-15)

¹⁴Tacahe, te jena sácheana, nacaratacapa ema Juan. Námapa te tiyerehi. Tacahe, tiyanapa tichavahi ema Jesús eta te provincia Galilea. Tépanavapa ticametairiu. Máichuhavacapa ena achaneana náheciyarhi ema Viya. ¹⁵Ánipa tacahehi eta mametarapi:

—Éneuchava mayehe ema Viya. Ítsivacha eta epanereruana. Taicha puiti tíchuha-hénapa ema Viya. Tiánehipa eta sáchezare títécapauchahénapa eyehe ema ticatiuchaheyare. Aqenuucayare mavaneruhi ema Viya, éma téchaheyare. Ichape eta iúricarevaya te esupa eta nímiturapiana —macahepa.

Éma Jesús máichuhavaca ena cuátroqueneana ténicarahiana, máimitureanayarehi
(Mt 4.18-22; Lc 5.1-11)

¹⁶Tacahe, eta mapaisirapahi ema Jesús te tachaui eta cáquiure Galilea, máimahavacapa ena apinana ajairana, ema émana ticajjarehi Simón Pedro émapa ema maparape Andrés. Eta náematanerepi ema nani, ténicarahanahi. Náquijierecahi eta nayutahe. ¹⁷Tacahe, ema Jesús máichavacapa éna:

—Yare, éhicanu. Núti níjaracaheya eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranyare ema Viya — máichavacapa.

¹⁸Enevanepa náinajicahi éna eta náenisirahi. Tiyananapa náhecapa ema Jesús.

¹⁹Ánaquipanavarepa máimahavarepa ena apinana ticaparapeccanavare ema Jacobo émapa ema Juan. Téjacanahi te napacure. Matiarihivare ema naiya Zebedeo. Náititijiricahi eta nayutaheana. ²⁰Éma Jesús máichuhavarepa ena apinana. Tásiha, náehicavarepa. Najunijicapa ema naiya Zebedeo. Manasipa éma te pacure, macachanehi ena manusurana.

Éma Jesús máimijunapa ema éreana tiávahácinahi ema achane
(Lc 4.31-37)

²¹Tacahe, títécapanapa tayehe eta avasare ticajjare Capernaum. Eta juca sache sávarumuhú, tiyanapa ema Jesús eta te náurujisirareva ticajjarehi sinagoga. Máimitucavacapa ena tíurujicavanahi. ²²Ichape náramihí ena achaneana eta máimiturapianahi táicha vahí nasamasarénahini. Tétavicavahi eta máitusirahi mayunapaicahi tamutu. Tétavicavahi eta tasuapacarevahi eta máimiturapiana.

²³Te nataracu ena náurujiruvanahi, matiarihíhi ema émana achane mávaháruhi ema éreana. Típiararecapa, ánipa macahe:

²⁴—Núti nímativi. Pítira Sántoquevivihi. Machichaquenevivihi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapupu pijararecaviyare —macahepa ema achane.

²⁵Tacahe, ema Jesús macajachapa ema éreana. Ánipa maicha:

—¡Pámatina! Piyana pijunijica ema maca achane —máichapa.

²⁶Tacahe, ema achane tójahúchavapa tíaquipaicava, tiyayacarepa. Típiararecapa muraca maicha ema éreana eta majunijisirayarehi ema achane. ²⁷Tásiha, náraminehi íchape ena natiarihiqueneanahi. Tiyaserejiricacanapa, ánipa nacahe:

—¿Tájahasica tacayema eta juca? Éma maca Jesús, tétavicava eta máitupajijíásiravahi, maratahahi máquijica ena éreanana. Tásiha, íchape eta napisirahi ema. Vahi nácapaemachahini. Tamutupa arairu eta máimiturapianahi ema maca —nacahepa.

²⁸Tacahe, nasamairiricapa namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te táunavahi eta Galilea.

Éma Jesús macanaraca esu máimase ema Pedro
(Mt 8.14-15; Lc 4.38-39)

²⁹Tacahe, te tíuchucanapa tayehe eta náurujisirareva, tiyanapa ema Jesús te napena ema Pedro ema Andrés. Náehicavarepa ena apinana ema Jacobo émapa ema Juan. ³⁰Sutiarihíhi esu máimase ema Pedro. Sunasiqueneipahi tívecahi, ticajumahí ésu eta muraca fiebre. Nametacapa ema Jesús eta sucajumairahi esu esena. ³¹Tásiha, mapauchapa. Macarata-vauchapa, macaechepucapa ésu. Táetaviacavaneinehi eta fiebre. Tacahe, suéchapajiricapa ema Jesús, énapa ena máimitureana.

Camuriana ena macanararuapahi ema Jesús
(Mt 8.16-17; Lc 4.40-41)

³²Te jena cáperehiquénehi, te téricapa eta sache, ena achaneana námavacapaipa eta mayehe ema Jesús namutu ena nacajumaqueneana énapa ena návaháruanahi ena éreanana. ³³Jéhesaréinehi, namutu ena achaneana ticavasanahi tayehe eta avasare tíurujicavanapa te tapaja eta peti. ³⁴Camuriana ena macanararuana tayehe eta apanapane jumareana.

Maveranavare ena váinarajiana máquijiruanapahi te náqueheana ena achaneana. Váhisera máisapahini náechajicahini ena éreanana, taicha náimatíhi éna eta émairahi ema Cristo.

*Tamutu avasareana te Galilea mapaica ema Jesús
(Lc 4.42-44)*

³⁵ Tacahe, te tajararahipa, téchepucavanepa ena Jesús. Tiyanapa eta te mayujarasirare.
³⁶ Te téjamicapa ema Pedro, májinaripa ema Jesús. Tásiha, tiyananapa nacapayacapa éma eta te mayujarasirare eta te mávpahi apaquehe. ³⁷ Te náitecapauchapa, náichapa:

—Namutu ena achaneana titanucavianahi —náichapa.

³⁸ Tásiha, máichavacapa ema Jesús:

—¡Páureanasami! Nuvarahapasera viyanayare tayehe eta apana avasareana apaesa nucametarairu taicha nutuparacasivaichuhi níchuhavacaya namutu ena achaneana náehica ema Viya —máichapa.

³⁹ Tacahe, ema Jesús tiyanapa tipaica tayehe eta avasareana te Galilea. Ticametarairupaipa eta te náurujsirarevana. Énerichuvare nayanauchapaipa ena achaneana návaháruanahi ena éreanana, máquijicavacapaipa ena éreanana.

*Emá Jesús macanaraca ema émana achane leproso
(Mt 8.1-4; Lc 5.12-16)*

⁴⁰ Tacahe, te apanava sache, títecapapa ema émana achane macajumaquene eta lepra. Mapauchapa te mamirahu ema Jesús, máepuyumirauchapa. Tásiha, máichapa:

—Tata, nucasiñavahi eta piyehe, picanaracanupaini —máichapa.

⁴¹ Tacahe, ema Jesús tijimuyainehi majapanuinehi. Manacapa eta mavahu. Máichapa:

—Nuvaraha nucanaracavi. Tájinapa píchiravaina puiti —máichapa.

⁴² Enevanepa tinaraca. Vaipa leprósoinahíni. ⁴³ Tacahe, ema Jesús máevatacapa ema achane. Matuparacapa ichape vahi macumetajirica. Ánipa máicha:

⁴⁴ —Pímaha, piyanayaresera pímercava nayehe ena tuparairucana, apaesa náimamacavi. Énainapa timetajiricanayare eta yátupirahi pinaraca, pipachihapa. Nacuijasera picumetacavaca eta nútirahi nucanaracavi. Tásiha, piyanayareva me Viya. Picamavahuyarepahi eta píasulupayachirayare taicha eta macanarasiravíhi —máichapa ema Jesús.

⁴⁵ Tacahe, tiyanapa ema achane. Timetajiricapaipasera, mametacapa namutu ena achaneana eta máichavaquenevahi. Eta tacahe, ema Jesús vaipa máimerecavahini te avasareana taicha enevaneyarehi náurujiaca ena achaneana tímarahijiana. Tacarine tiyanahi tayehe eta nájinaricha achanenahichaini. Énaserá ena achaneana tiyananaichucha napauchahi. Tiásihana tayehe tamutu avasareana.

2

*Emá Jesús macanaraca ema émana achane macajumaquene eta muracaquiha
(Mt 9.1-8; Lc 5.17-26)*

¹ Tacahe, te apanavarepa sache, tichavapa ema Jesús eta te Capernaum. Eta nasamairisirahi eta matiarahiraripa éma, títecapanapaipa ena achaneana, camuriqueneana. ² Tiyututucavanapa eta te peti mávihahi éma. Tájinapa táviravainahini eta te tapajachacaya. Ema Jesús máimitucavacaipa eta nacaijuheraya me Viya. ³ Tacahe, títecapanavarepa ena apamuriana, námapaihi te áchuji ema achane muracaha. Cuátroana ena tíamanapahi. ⁴ Váhisera náitecapauchahini eta te mávihahi ema Jesús, taicha eta nayututusiravahi ena achaneana. Tacahe, navetatamaequechapa eta peti eta te máinahu te manapaicahi ema Jesús. Te náitauchapa navetatata, nacajuchuchucapa ema macajumaquene eta te áchuji te mamirahu ema Jesús. ⁵ Te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi nucaepahainavipa —máichapa.

⁶ Tacahe, énerichuvare natiaríhivare téjacanahi ena escribánoana. Napanereque-nehapa eta macayemaquenehi ema Jesús. Tásiha, tiseanmarinehi. ⁷ Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! Taicha macaríchu ema Viya marataha macaepaha eta pecatuana. Nájina apanaina tiratahaina ticaepahaina eta pecatuana” tacahehi eta napanereruana. ⁸ Enurujipa ema Jesús máimaraacavacahi eta nasamureana étapa eta napanereruanaahi éna. Tacahe, máichavacapa:

—¿Tájaha tacayema téjecapava eta epanereruana? ⁹ Tájina táejeravaina eta níchirahi ema maca: “Nucaepahainavipa eta pipecaturanahi”. Máejerarepánapuca níchahini: “Nucanaracavipa. Péchepuca, piveha eta pímacaraji, piyana pipaica”. ¹⁰⁻¹¹ Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca

apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa ema Jesús.

¹² Enevanerinehi téchepuca ema macájumaquenéni. Mavehapa eta mayereruva. Tipacapa te namirahu ena achaneana. Tiyanapa tiúchucapa. Eta náimairahi, ichape eta námirahi namutu ena natiarihiqueneanahi. Tétavicavainehi eta nacunachirahi ema Viya. Ánipa nacahe:

—¡Tétavicava táramicareva eta máichaqueneana ema Viya! ¡Asulupaya, Tata! ¡Vahi vímahasarenahini! —nacahepa.

Emá Jesús máichuha ema achane ticaijare Mateo, mayehyare apóstole
(Mt 9.9-13; Lc 5.27-32)

¹³ Tiuri, te apanapa sache, tiyanavarepa ema Jesús te tachaui eta cáquiure. Náitecapauchavarepa namutu ena achaneana eta mayehe. Tásiha, máimitucavacapa.

¹⁴ Tacahe, te tiápechavapa tipaica ema Jesús, máimahapa ema Mateo, machicha ema Alfeo. (Emá Mateo ticaijarehivare Leví.) Tétacahi eta te macatuparahaiyahi eta macobrarésirahi eta impuesto.

—Yare, péhicanu —máichapa ema Jesús.

Tacahe, ema Mateo enevanepa tiyana máehica ema Jesús.

¹⁵ Te jena sácheana, ema Mateo ténricapa eta te mapena. Mámapa ema Jesús énapa ena máimitureana. Camuriqueneana ena téhicanahi ema Jesús. Natiarihivare maverana ena macutiqueneana ema Mateo ticobrarécarahiana tayehe eta impuesto. Mavranahivare ena apamuriana máemunacasareana ema Mateo. Tiúrisamureanahi eta nanisirahi.

¹⁶ Títecapanavarepa ena apanamuri achaneana: ena escribánoana énapa ena fariséoana. Eta náimairahi eta macachanérahí ema Jesús ena máichuhaqueneana ema Mateo, nacaachapa. Ánipa nacahe nayehe ena máimitureana:

—¿Tájaha tacayema tísapava ema eyehe maestro macachanevaca eta manisirahi ena nánitátajiana ticobrarécarahiana eta impuesto? ¡Tétavicavahi eta nacapecaturaravahi! —nacahepa.

¹⁷ Te masamapa ema Jesús eta náechajiriruvanahi, máichavacapa:

—Ena ticajumanahi, tétavicavahi eta nacamunuirahi ema médico. Énasea ena majumareanahi vahi nácamunui mahi ema médico. Púitiserá, eta tímitecanuhi núti nutanucayare namutu ena tisepecaturana apaesa náeneuchavahini, náinjica eta napeccaturana. Nácani matapiravareanahi vahi nasamavahini nácamununuhini —máichavacapa.

Nayaserecapa ema Jesús tayehe eta ayuna
(Mt 9.14-17; Lc 5.33-39)

¹⁸ Tacahe, te apahevarepa, ayunanahi ena máimitureana ema Juan. Ayunanahivare ena fariséoana. Náitecapauchapa ema Jesús ena apamuriana achaneana témejecapavarahiana. Nayaserecapa:

—¿Tájaha tacayema vahi naháyunachahini ena pímitureana? ¿Tájaha tacayema vahi nácutihini ena máimitureana ema Juan énapa ena fariséoana? —náichapa.

¹⁹ Majicapapa ema Jesús:

—Nímicutihinahe puiti. Vahi táuricaimahí ayúnánáinahíni nácani ticaichuhacasianahi tinicanaya nayehe ena araimana. Tiúrisamureanayarehi taicha matiarihíni ema arayena. Vahi táuricahini ayúnánáinahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahí ayunanainahini ena nímitureana. ²⁰ Járjapainapasera eta sácheyare, ticaverejicasianayare, taicha ticaratanuanainapa ena ticapacuanayare núti. Jéhevarepa ayunanainapa.

²¹⁻²² Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherépiana ena apamuriana achaneana. Eta ítusirahi éti eta nímiturapiana, tavaraha ínjica eta ichasi eyeherepiana tamariqueaneanahi —máichavacapa ema Jesús.

Ena fariséona náimipicauchahi eta nayeherépiana tayehe eta sávarumuhua. Émasera ema Jesús máimereuchahi émarichu téchahi eta nayeherépiana ena achaneana eta sache nanarasirayare

(Mt 12.1-8; Lc 6.1-5)

²³ Eta jena sávarumuhu, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijcapaipahi eta isanítiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquihapaipa, tépurajacachavanapaipahi. Tinicanapaipa. Tisapacareichucha éta, taicha técuhanapahi. ²⁴ Énasea ena fariséoana eta náimarasirapahi, tise manapaipa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquirapahi eta trigo puiti juca sache tétavicavahi eta tacapicahuquenehi. Vahi tísapacaré mahi eta juca nacaematanerahi puiti —náichapa.

²⁵ Tacahe, majicapavacapa ema Jesús:

—Németeaca éti vahi eacautiara eta tacayemaquene eta Sagrada Escritura, eta máichavaquenevahi ema víyarahaini David eta mapaisirapahi técuhaipa énerichuva ena téhicanapahi. ²⁶ Te émarichaha ema Abiatar náquenumurihi ena tiyujaracarahiana, ema David tisiapapa eta te mapena ema Viya. Tiyaseserecapa eta manicayarehi. Nájaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

²⁷ Tímiyanava eta mametasirahi éna:

—Ema Viya máepiyacahi nativa ena achaneana. Te táequenepa, máimijarechinapa eta sache nanarasiraya ena achaneana, tiúrichayarehi éna. Vahi étainahini témepiyaca eta tíhapiricavacayare éna. ²⁸ Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichavacapa.

3

Ema Jesús macanaraca ema achane tépenavahu

(Mt 12.9-14; Lc 6.6-11)

¹ Tacahe, te apanavarepa sávarumuhu, tiyanavare ema Jesús, tisiapahi eta te náurujisirareva. Matiarihihivare ema émana achane vaipa tayamurichahini eta mavahu, tépenavahuipa. ² Natarihihivare ena fariséoana, ena ticanarajiricanahi ema Jesús. Náimarracapa éma te macanaracayarepuca ema achane eta te jena sache tacapicahuquenehi. Natanunuiricahi eta tiviuchayarehi ema Jesús. ³ Tacahe, máichapa ema Jesús ema achane: —Yare, pitupihayare ani te namirahu ena achaneana —máichapa.

⁴ Tacahe, máichapa ena achaneana:

—Núti nuvaraha epanerechaya. Puiti juca sache sávarumuhuhi, ¿tájahapuca táurica eta víchayare? ¿Tísapacarepuca vicha eta táuriqueneana? ¿Étapuca víchayare eta tamauriqueneana? ¿Táuricapuca vípuchavaca ena achaneana? ¿Vicaparecapuca? —máichavacapa.

Énasera tímatinamurianarinehi. ⁵ Tacahe, ticatisamurevarine ema Jesús eta muracairahi eta nasamureana. Tacahe, tise mamajuhepa eta máesenimurhairahi éna. Máichapa ema achane macajumaquene:

—Nímaha. Picajaruvauchava, pímechanu eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. ⁶ Énasera ena fariséoana, tise manarinehi eta náimairahi eta juca máichaquenehi ema Jesús. Tiyananapa tisamacacana nayehe ena políticoana, machanerana ema Herodes, taicha navaraha nacapacaya ema Jesús.

Títecapanapa ena camuriqueneana achaneana

⁷ Émasera ema Jesús tiyanapa térajicavapa eta te mávapahi apaquehe eta te tachausi eta cáquiure. Mámapa ena máimitureana. Náheicavare ena ichapemuriqueneana achaneana ticavasanahi eta te provincia Galilea. ⁸ Jéhesare, te nasamairiricapa eta máichaqueneanahi ema Jesús, títecapanapa ena ichapemuriqueneana achaneana. Tíásihanahi eta te avasare Jerusalén, eta te provincia Judea, eta provincia Idumea, eta provincia Siria, etapa eta avasareana te apachara eta cajacure Jordán. ⁹ Tásiha, ema Jesús mavanecapa ena máimitureana natsesinahini étasina pacure apaesa vahi nacutupiaraca ena ichapemuriqueneana achaneana.

¹⁰ Taicha camuriana ena macanararuanapahi. Namutu ena nacajumaqueneana témeñahavanapahi tiyumusujicavanapahi eta náemeñahairavaya, taicha navarahahi náemamacayare. ¹¹ Jéhesare, ena éreanana tiávahácanahi ena achaneana, te náimahapa ema Jesús, tiaquipacavanapa te mamirahu éma. Tipiararecanapa:

—¡Pítira Machicha ema Viya! —náichapa.

¹² Mavanecapasera máecatihavacapa nacuija nacumetaruína taicha vuíchaha mávarahahini náimatihini ena achaneana eta émaquenérahí Machicha ema Viya.

Ema Jesús manerejica ena dócequeneana apóstoleana

(Mt 10.1-4; Lc 6.12-16)

¹³ Tacahe, tiyanapa ema Jesús eta te mávapahi apaquehe máripahi. Mámamurihapa ena ánimuriana máimitureana. ¹⁴ Tacahe, ánaqui manerejicavacapa te nataracu ena dócequeneana mayeaneanayarehi apóstoleana. Vaipa najunijicaimahi éma, macachaneyarehi tamutu sácheana. Matuparacavacapa eta nacametairuirayare. ¹⁵ Májaracavacapa ena dóceana

eta naratahairayarehi ticanaracana ena nacajumaqueneana, náimijunairayareva ena éreanana tiávahácanahi ena achaneana.

¹⁶⁻¹⁹ Eta juca náijareana ena manerejiruanahi*: Ema Pedro (éa ticaijarevare Simón), ema Jacobo, ema maparape Juan, ema Andrés, ema Felipe, ema Bartolomé, ema Mateo, ema Tomás, ema apana Jacobo, ema Tadeo, ema apana Simón, émapa ema Júlas Iscariote (ema tjjaracahi ema Jesús).

Ena escribánoana téjcapavanahi eta náimijachirahi ema Jesús mávaháruhi ema Váinaraji Satanás

(Mt 12.22-32; Lc 11.14-23; 12.10)

²⁰ Tacahe, tichavapa ema Jesús, énapa ena mayeheana apóstoleana te napena. Tiápechavavarepa tíurujicavana ena achaneana. Tásiha, vaipa náitujicavahini tinicana taicha tétavacavahi eta nasimutuvahi ena achaneana. ²¹ Énaser a mapaopenaveana ema Jesús, te nasamairiricapa, tiyananapa náepanayarehini éma, taicha náimijachaipahi máurishi éma.

²² Énerichuvare natiarihupa ena escribánoana, tiásihanahi te Jerusalén. Náepiyaequenehapa ema Jesús, ánipa nacahepa:

—Ema maca Jesús, vémeteaca majupaha ema náquenumurihi ena éreanana, émaripa ema Satanás. Táitusiava máijaracahi eta máitupajjiasiravahi eta macuchusirahi ena éreanana —nacahepa.

²³ Tacahe, ema Jesús máichuhavacapa ena ticaecahirahianahi. Eta máimitusiravacahi, máimicutichinapa. Ánipa máichavaca:

—Éti, téjcapavahi eta epanereruana ímijachanuhi majupahanuhi ema Satanás. Ímijachapuca ticitianacananahi ena éreanana. Váhisera évena tácahe. ²⁴ Tacutihi ena machanerana ema gobierno. Éna, vahi típutsimuriavanaimahi apinainahipucaini partido. Te típutsimuriavanapa, énjacacaini tíáquipacacana. ²⁵ Émaripa mácani achane te camurianahi ena machichanaveana, váiparinéhivare típutsimuriavanaimahi, náehajiricacahini, énjacacahini náquipacacahini. ²⁶ Ene macahehi ema Váinaraji Satanás, váiparine máisapahini típutscacana ena machanerana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi.

²⁷ Macutihi ema mácani achane tume. Te macaratacahi eta mataquiriqui eta majaneasirahi jácani macayequeneana, nájina tíameyechaimahi. Tacamunuhi nacaratacanumayare, náitacacanutayarehi ema túmequenehi achane. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

²⁸ Puiti nutupiruva numetacahe: Tiperdonachacareanayare ena achaneana eta napeaturana, tamutu jácani náechajisihaira eta táífemahiqueneana. ²⁹ Jararihisera eta epecatura vahi típerdonachacaremahí. Eti ímijachahi ema Satanás ema tiávahácanuhi. Ichape eta éjcapiravahi, taicha ema tiávahácanuhi nuti, émaquenehi ema Espíritu Santo. Éti epanararacaripa éma. Tásiha, máitavacaca eta etapiravanaya —máichavacapa ema Jesús.

³⁰ Tacahehi eta máechajiriruvahi taicha eta nacahechajiriruvairahi: “Ema maca Jesús, majupaha ema Satanás”.

Sutécapauchapa esu maena ema Jesús énapa ena maparapenaveana

(Mt 12.46-50; Lc 8.19-21)

³¹⁻³² Tacahe, te apanapa sache, tíurujicavavarepa ena camuriqueneana achaneana te tajuhe eta peti. Téjcanapa te machacaya ema Jesús. Titecapanecha esu maena énapa ena maparapenaveana. Nanasipasera te aneca taicha tiyututucavanahi ena achaneana. Navarahahi náechajicayarehi éma. Tásiha, nametacapa ena apamuriana ema Jesús, ánipa naicha:

—Esu pémunaruquenehi pena, énapa ena piparapenaveana nararihi ani te aneca. Navarahahi téchajicaviana —náichapa.

³³ Majicapapa éma:

—Yátupi némunacavacahi esu meme, énapa ena nuparapenaveana. Nararihiserani ani te juca nuchacaya ena némunaruanahivare, nuparapenaveanahi.

* **3:16-19** Ena nani apinana ajairana ema Jacobo émapa ema Juan, napapecacahi, machichanaveanahi ema Zebedeo. Émasera ema Víaquenu Jesucristo mámararacahi eta náchanevana, máimatívacahi éna. Manacapa eta náchucarapianahi “Boanerges”. (Eta táechajiriruvahi eta juca, Tijuricati eta náechajisira, téyayarasianavare.) Matiarihivare ema apana achane ticaijarehivare Jacobo. Ema maiya ticaijarehi Alfeo. Matiarihivare ema apana ticaijarehivare Tadeo. Eta tápipine eta máijare Lebeo, étapa Judas. Tacahe, mapana eta máijare. (Pitanuca te Lucas 6.16 étapa te Mateo 10.2.) Ema apana Simón, tímaticarehi ema, náumurvainihi ena revolucionáñoana ticaijareanahi “cananístana”. Navaraha náquijica ena extranjerona romanoana.

³⁴ Tacahe, máesnimuríhapa ena máimitureana ena téjacanahi te machacaya. Tásiha, macahepa:

—Ena nani ena némunaruanahivare. ³⁵ Taicha namutu nácani ticaemataneacanahi ema Tata, énahi ena némunaruqueneanahi —máichavacapa.

4

Eta máimicutichaquenehi evaraqui tacaevaquenehi te apanapanenéji máteji te apaquehe (Mt 13.1-9; Lc 8.4-8)

¹ Tacahe, te apanapa sache, tiápechavavare tímitureca ema Jesús te tachausi eta cáquiure. Tásiha, camurianapahivare ena achaneana títecapauchanahi éma. Eta navayuchiravaripa ena achaneana, ema Jesús tívacuhapa tayehe eta pacure, tiápajuecavapa apaesahi. Téjaca eta máimituresirahi. Ena achaneana nanasipa tayehe eta te tachausi. ² Camuri eta máimicutichaqueneanahi eta máimitusiravacahi. Ánipa macahe:

³ —Esamararacanchaha. Matiaríhihi ema émana achane. Tévacahi te máesane. ⁴ Eta mapaisirapahi, témiricapaipa eta evaraqui te achene. Táimahapa eta cáyure, tanicapa. ⁵ Eta mayeherepi éma eta máevasira, máevajajapaicapaipa eta apaquehe. Tásiha, eta apamuri evaraqui témiricapa te váhirichu tamitutihini eta máteji taicha máripahi eta apaquehe. Tímarucavanepanéni táicha. ⁶ Téhesera te tíjurepa eta sache, tacapajicapa; taicha vaipa táuparevacahíni. ⁷ Tacahe, eta apana evaraqui témiricapaipa te tapare eta itapequiji. Tiúrinahéni eta táimarusira, étasera eta itape tacachuricapa eta tajurusirahi. Táemuriachapa eta sucureca. Tanasipa, vaipa tacahihíni. ⁸ Tacahe, eta apamuri evaraqui témiricapaipa te tiúrina máteji. Tijurucarahihi eta táimarusira. Ichapemurihi eta tahi. Eta étana, ticahipa apaesajiruichucha. Eta apana, ticahipa tativarerehapanapa. Eta apanavare, ticahivare tétupicavapanapa. ⁹ Esamararacanu emutu éti. Te evarahapuca ecaicutiara, tavaraha eta epanerechinavaya —macahepa ema Jesús.

Ema Jesús máimatetacavaca ena máimitureana eta juca máimiturapi (Mt 13.10-23; Lc 8.9-15)

¹⁰ Tacahe, te najunijicapa ena apamuriana achaneana, témeñahavanapa eta mayehe ema Jesús ena dócequeneana apóstoleana énapa ena apamuriana máimitureana. Nayase-recapa tájahapuca tacayemahi eta máimicutiarachiravacaichucha eta máimitusiravacahi ena achaneana. ¹¹ Tacahe, majicapapa éma:

—Ema Tata tituparacanuhi nítametacaheyare éti eta juca mapanereruana táequeneruana tayehe eta macuchuciraheyare eti achaneana. Mavarahahi ímatiequenehaya éti. ¹² Énasera ena apamuriana achaneana nímicutiarachinavacaichucha, apaesa vahi máejerarémahi eta nacaicutiarairaya eta nasamaquenehi. Tavaraha napanerechinavaya. Eta nacaicutiarairaya, náitsivachahíni eta náitaresira, apaesa naperdonachacarepaini —máichavacapa ema Jesús.

¹³ Énerichuvare máichavarepa:

—Éti, ¿vuíchaha íturuequeneha eta juca nímicutichaquenehi? Tavaraha eta epanerechinavaya éti apanava apaesa íturuequeneha eta apamuriana nímicutichaqueneanahi. Tiuri, numetacahe: ¹⁴ Eta evaraqui eta máevaruhi ema achane tacutihíni eta nímiturapiana. ¹⁵ Natarihi ena achaneana nacuti eta apaquehe muracapahi te achene, te táemirisihahi eta evaraqui. Ena nani nasamararacahi eta nímiturapiana. Émasera ema Satanás macamitiscavanepa eta nasamaquenehi. ¹⁶ Natarihivare ena apamuriana achaneana, nacutihíni eta máteji máripahi. Te nasamararaca eta nímiturapiana, natupiruvanehinéni nasuapa, tíurisamureanainéhi. ¹⁷ Váhisera náratahahíni nacaravahuíni yátupinahíni. Vahi nácutihíni eta evaraqui tíuparehi. Ánipirichu eta náehisirahi, taicha vahi nacamichahíni jácani nacatajivairanahi. Váhivare túmesamureanainahíni te tatiaríhipa eta jácani nacatichaira ena achaneana táichavenéhi eta náehisiranuhi. ¹⁸ Natarihivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. ¹⁹ Napaneréquenehahíníni, tahapapiricavacahisera eta jácani táicharacavayare eta náitaresira. Tavayucavacavare eta tájiparacana, najamurachahi tamutu. Tahapapiricavare eta navarairahi tírricuchavana. Tamutu eta juca táemetavicahi eta navarairahi téhicanuana. Tamapurujíhi eta najacapirahi eta nímiturapiana. ²⁰ Natarihisera ena apamuriana achaneana nacuti eta tiúrina máteji. Éna, nasamararacahi náunacahi yátupi eta nímiturapiana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —máichapa ema Jesús.

Emá Jesús tímitureca eta apamuriana yátupiqueneana
(Lc 8.16-18)

²¹ Tímiyanava eta máimituresirahi, ánipa macahe:

—Te viyustaca eta vimícahu, váiparinehi táuricaímahi vijihapaicahini, vinacahivare-pucaini te tápecu eta vétsatsame vímasirarehi. Tacamunuhi vinacayarehi te anuquehe. ²² Jéhesare, tayanapanepuca nacayumuruquí, tamutuyarehisera ticaechera jácani tayumu-rurevanahi. Tájina tépacuchaimahi jácani najajairuvanahi. Tamutuyarehi téchacareya. ²³ Te evarahapuca ecaicutiara, tavaraha eta epanerechinavaya.

²⁴⁻²⁵ Máichavarepa:

—Tacamunuvare epanerecha yátupina eta esamaqueneana. Te apaesarichuhi eta epane-rechirahi, apaesarichuvare eta ecaicutiarairaya. Te esupa yátupina eta nímiturapiana, emá Espíritu Santo tímitucaheya tamutu eta tacayemaquenehi. Jéhevere, tímitucaheyare éma eta apamuriana yátupiqueneanahi. Énasera nácani vahi návarahahini napanerecha, váhivare nasuapa, énajivayare tíchavana ticaverejicasianaya eta nasamaqueneanahi.

Emá Jesús máimicutiarachava eta támarusira eta evaraquiana

²⁶ Máichavacavarepa:

—Nuvaraha nímicutichinahe eta nímiturapiana nuti Manerejirunuhi emá Viya. Te yátupihí eta nasuapirahi eta nímiturapiana ena achaneana, náitsivachainapa arairuinapa eta napanereruana étapa eta nayeherepianaya eta náítaresira. Tacutihí eta máevaraquí mácani achane. Tévacahí te máesane. Tásiha, tinaracapa, macuchapayarepa eta tacahí-rayare eta máevaraquí. ²⁷ Tímarucapa eta evaraquiana. Tijurucavare. Emá achane, tájina macaicutiarahini eta támarusirahi. Váhivare macaicutiarahini eta tajurusirahi. ²⁸ Taicha eta apaquehe, éta ticamarucahi. Tacuchucahi tativa eta tapacají, táehicapa eta tanaquí. Te ticahipa, tíuchucapa eta tapiraquí. ²⁹ Te tiyahapa eta tahi, ticaechatijipa te tumare, taicha étainapa eta tacavehasiraya —macahepa emá Jesús.

Emá Jesús máimicuticha eta taquí eta mostaza
(Mt 13.31-32; Lc 13.18-19)

³⁰ Ánivre macahe:

—Puiti nuti Manerejirunuhi emá Viya, nímicutichinahe eta ichapemurivaya eti íjaraca-vanahí éhicanu. ³¹ Ecutiya eta ánichichaquene taquí eta sucureca ticajare mostaza. Éta juca, ániqúitavacapana eta taquí te tamutu eta evaraquiana tatiarihiqueneanahi tayehe eta juca apaquehe. ³² Téhesera te ticaevapa, tijurucapa eta tíapajucavahi íchapepana tayehe eta apamuriana sucurecana. Tatiarihi eta ichapetavavaca. Tásiha, tacapenajicapa eta cáyureana —macahepa emá Jesús.

Camuri eta máimicutichaqueneana
(Mt 13.34-35)

³³ Aní tacahe tamutu eta máimitusiravacahí ena achaneana. Camuriana eta máimicu-tichaqueneanahi. Tamutuhí ticaicutiaracarevaca nayehé ena tivarahanahí náiturue-queneha. ³⁴ Tájina étahena te tímitureca, vahi macunacahini eta máimicutichira. Téhesera te macarichupa emá Jesús énapa ena máimitureana, máimicaecherachapa tamutu eta máimicu-tichinaqueneanahí.

Emá Jesús macaesamirica eta une eta táepacusirahi étapa eta técatícava
(Mt 8.23-27; Lc 8.22-25)

³⁵⁻³⁶ Tacahe, te jena sache, eta máejasirahi emá Jesús te pacure, tímiturecahi. Te cáperehi-chichapa, máichapa emá Jesús ena máimitureana:

—Viyánaya víánueca te apachara —máichavacapa.

Tacahe, ticametavanapa nayehé ena achaneana. Tásiha, námapa emá Jesús eta te pacure. Náehicapa ena apamuriana te pacure eta napaisirapahi. ³⁷ Te ítupiēcānāpa, tachimaracapa eta muraca técatícava. Tépacucapa íchape eta cáquiure. Tisiapapaipahi eta une tayehe eta pacure. Tiánehipaipahi tacaericavaca. ³⁸ Émasera emá Jesús, tímcapaichucha te tahivu eta pacure te machunusi. Tásiha, nacajamicapa éma. Ánipa náicha:

—¡Tata maestro! ¡Picatiuchahavi, véricainapa! ¿Váhípuca péñamava eta viyehé? —náichapa.

³⁹ Tásiha, enurujipa téchepuca éma. Titupihapa. Mavanecapa eta técatícava étapa eta une. Ánipa macahe:

—¡Pámatina, pésamiricava! —máichapa.

Tacahe, tíchecapa eta técatícava. Tésamiricavapa eta une. Tésamiriecavapa tamutu.

⁴⁰ Tacahe, máichavacapa ena máimitureana:

—¿Tájaha tacayema epica? ¿Váhípuca ecasiñavahini eta nutiarihirapahi eta eyehe? —máichavacapa.

⁴¹ Ena máimitureana, tétavicavainehi eta náramirahi. Tiyaserecapanapa, áñipa nacahe: —¡Tétavicavapa eta máitupajijiasiravahi ema maca vimaestro! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatnacahi eta técativava étapa eta une eta táepacusirahi! —nacahepa.

5

Ena achane návaháruhi ena ichapemuriqueneana éreanana
(Mt 8.28-34; Lc 8.26-39)

¹ Títecapanapa te apachara eta cáquiure eta te apaquehe ticaijare Gadara. ² Ánaqui tatiarihi eta ecariana. Tacahe, te tiúcupaicapa ema Jesús eta te pacure, tiúchujicavanepa ema émana achane návaháruhi ena éreanana. ³ Éma másihapahi eta te ecari, taicha macape-najuechavacahi eta novachana. Nájina náratahahini nátiacahini éma. Étaripa eta ichapepi cadena, vahi táratahahini. ⁴ Taicha máejeharipa nacaratata. Náitijivauchahi te cadena. Nanacavare eta grillo te mapiqui. Émasera mavenarurujica eta cadena, mavenarucavare eta mayehe grillo. Jéhesare, nájina naratahahini namansuchahini ema maca achane. ⁵ Eta máitaresirahi, eta mávirarehi tayehe eta ecari étapa eta mávapahi te anuqueheana mari. Tamutu sácheana, yátiana, tiptiararecahi éma. Tijarachava te márijahiana. ⁶ Tacahe, tiyerehipaichaha máimahapa ema Jesús, tijunapapa mapauchapa. Máepuyumirauchapa.

⁷⁻⁸ Ema Jesús, eta máimairahi ema achane, máichapa:

—¡Pijunijica ema maca achane, piti éreana! —máichapa.

Tiptiararecapa muraca eta majicapirahi ema achane. Áñipa macahe:

—¿Tájaha picha píteca pípauchanu, piti Jesús, Machichaquenevivi ema Viya? ¡Pájapanunu, vuíchaha picuvanecanu ánaqui te nucaicuñaiyayare! —macahepa.

⁹ Tacahe, ema Jesús mayaserecapa ema éreana. Áñipa maicha:

—¿Tájaha píjare píti?

Majicapapa éma:

—Núti nucaijare “Nacapenaharu ena ichapemuriqueneana éreanana”. Jéhesarehi, ichapemurihavivi víti. ¹⁰ ¡Pájapanuhavisera! Te piáquijicahaviyarepuca, ¡vahi picuevatacavahi vivianaya te tiyerehi! —nacahepa ena éreanana tiávahácanahi ema achane.

¹¹ Tiuri puiti, tatiarihihivare eta camuriqueneanahi cúchiana. Tinihicanahi ánaqui te táemiripaisine eta masihi. ¹² Tacahe, ena éreanana tiyaseuchavanapa mayehe ema Jesús. Áñipa nacahe:

—¡Picatajicahavi! Pévatacavahi eta te táviahahi eta jena cúchiana. Písapahavi visiapahacavaca eta jénana —náichapa.

¹³ Tacahe, ema Jesús macuchuchujicavacapa eta te máquehe ema achane, másapapa nasiapahacavaca eta cúchiana. Tatiarihi cútimahí apina mil eta cúchiana. Tacahe, te tasamapa eta cúchiana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririjicanapa tamutu.

¹⁴ Natiarihihisera ena tijaneacanainihi eta cúchiana. Te náimahapa, tiáramecanarinehi. Tiyananapa tijunapanapaipa, timetajiricanapaipa nácani nácapajiruvanapahi, étapa te avasere namutuvare nametaca. Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana. ¹⁵ Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinaripahi máchiravainahini. Ticamuirihapahivare. Tásihasera, tipicanarinehi ena achaneana. ¹⁶ Tavetijipa te náitametacapa ena tímahanahi eta táichavaquenevahi eta cúchiana te macuchuchujicavacapa ena éreanana ema Jesús. ¹⁷ Tacahe, nayasecapa ema Jesús váhini macuíticapachavacaini tayehe eta návasahi éna, machavavanehini te másinehi.

¹⁸ Tacahe, te tiávachayarepa ema Jesús, ema achane manararuhi tiyaseserecapa eta mavairarpa máehica ema Jesús. ¹⁹ Émasera, vahi másipahini. Áñipa maicha:

—Piyanchucha pichava nayehe ena pijaneanana te piávasa. Pimetacaya eta macanarasiravivi ema Viya taicha eta majapanuiravivi —máichapa ema Jesús.

²⁰ Tacahe, tiyanapa tichava ema achane. Timetajiricapapasera mametacavacapaipa eta máichaquenehi ema Jesús mayehe. Náraminehi namutu ena ticavasanahi eta te provincia ticaijare Decápolis.

Ena Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Lc 8.40-56)

²¹ Tiuri, tichavavarepa tiánueca ema Jesús te apachara. Te títecapapa, náurujiacavanepa ena ichapemuriqueneana achaneana te mávinehi te tachausi eta cáquiure. ²² Tacahe,

títecapapa ema émana achane ticaijare Jairo. Ema maca achane, tétavicavahi eta mapicauchacarevahi. Tuparairucahi tayehe eta náurujisirareva. Te máitecapauchapa, tépuyucapa te mamirahu ema Jesús. ²³ Mayaseacapa, ánipa máichapa:

—Tátachicha, surarihi esu nuchichasami, ticajumahi. Puiti téñamajiricavaipa ésu. Picatajicanupaini, tata. Pinasinanu eta pivahuana suyehe paesa sunaraca —máichapa.

²⁴ Tacahe, masuapapa ema Jesús. Tiyanapa máehicahi ema achane. Náehicavarepa ena camurigueneana achaneana. Náevatajiricanecha éma.

²⁵ Tásiha, te nataracu sutiarihipahivare esu esena sucajumaquenehi. Doce añoripahi eta sucajumairahi táichirahi eta suítine. ²⁶ Ichaperipa eta sucatajivairahi taicha camurianaripa ena típuchanahi médicoana. Títaharipa eta suímaqueneanainihi. Tájinasera vahi suátivarehini. Suáviraparasiavaichuhi svayuhapaichucha eta sujuma. ²⁷ Ésu, sutanucapaipahi ema Jesús, susamairiricahi eta tiáamicareana máichaqueneanahi. Supauchapa suéhiquécuchapaipahi te maquecu. ²⁸ Taicha tacahehi eta supanereruhi: “Taratachuchaini némamajiacahini eta ñimuiraha, németeaca nunaracapapucaini”, sucahesamurepa. ²⁹ Tacahe, suémamajiacapa eta tacheyarapi eta mamuiraha. Jéhesaréinehi, enurujipa tíchecha eta suítine. Tisamavapa ésu eta sunarasiraipahi tayehe eta sujumainihi.

³⁰ Émasera ema Jesús macaicutiaravanepa eta sutiarahirahi esu tacanararuhi eta máitupajjisiravahi. Enurujipa téviurucavahi te namuri ena ichapemurigueneana achaneana. Ánipa macahe:

—¿Nájaha témamajiacanuanahi?

³¹ Tacahe, ena máimitureana náichapa:

—Tata, téñatuhejiricacanahi namutu eta achaneana taicha ichape eta nasimutuvahi. Piyaserecavirichahava nájahapuca ena témamajiacavianahi —náichapa.

³² Émasera ema Jesús máesenimurihapa, matanucapa nájahapuca ena témamajiacanahi. ³³ Tásiha, supauchapa esu esena. Tiyayacarepaipa taicha tipicaripahi. Taichasuéchihi eta suíchaquenehi ésu. Suépyumirauchavanepa te mamirahu. Sumetacapa tamutu. ³⁴ Tásiha, máichapa ema Jesús:

—Tiuri, nuchicha. Pinaracapa puiti táichavenehi eta picasiñairanuhi. Vaipa picueñamava eta pichaviraya te pipena. Vaipa tichavaimahi eta pijumainihi —máichapa.

³⁵ Téchajiricavaichahahi ema Jesús eta suyehe esu esena, títetapananecha ena tiásihanahi te mapena ema Jairo. Nametacavanepa:

—Esu pichicha tépenasampahi. Vaipa picucamesa ema Maestro —náichapa.

³⁶ Émasera ema Jesús vahi masupahini eta nametasirahi. Mavarahaichucha tiyana. Tacahe, máichapa:

—Vahi picueñamava, piti Jairo. Pácasifiavachucha eta nuyehe —máichapa.

³⁷ Tacahe, ema Jesús vaipa máisapahini náehica ena apamuriana achaneana. Nacarinepa ema Pedro, ema Jacobo, émapa ema Juan. ³⁸ Te títetapanapa te mapena ema Jairo, máimahapa ema Jesús ena achaneana vaipa náitucarahahini, tijamurianaripahi eta náiyairahi. Tipiararecanaripahi muraca. ³⁹ Émasera ema Jesús eta masiapirahi, máichavacapa:

—¿Tájaha tacayema eta iúrujiricavahi eta ani, íyaharacavapa? Vahi ecuiyaha. Esu suca amaperu, váhinéni suépenahini. Tímacarichucha ésu —máichavacapa.

⁴⁰ Énasera ena achaneana nacaecahirichucha éma, técavanapa. Tacahe, ema Jesús macuchucavacapa te aneca namutu. Tacahe, tisiapapa te suávilahi esu amaperu, émapa ema suiya, ésupa esu suena, énapa ena mapanana máimitureana. ⁴¹ Tacahe, macaratavauchapa ésu. Máichapa:

—Nuchicha, néchajicavi. Péjamica, pécheputa —máichapa.

⁴²⁻⁴³ Enurujipa esu amaperu téjamica, técheputa. Típaicapa te namirahu. Ichaperinehi eta náramirahi ena tímahanahi. Tásiha, ema Jesús mavanecavacapa nájaraca eta sunica esu amaperu. Matuparacavarepa muraca eta vahi nacuechajisiha eta náimahaquenehi. Esu amaperu, dóceripahi eta suhañora.

Tacahe, tiyanapa ema Jesús. Tichavapa te mapena.

6

*Tichavapa ema Jesús te mávasa Nazaret
(Mt 13.53-58; Lc 4.16-30)*

¹ Tacahe, te apanapa sache, tiyanavarepa típaica. Tichavapa tayehe eta mávasa Nazaret, mámamurihapaipa ena máimitureana. ²⁻³ Tacahe, te jena sache sávarumuhuquene, tiyanapa tayehe eta náurujisirareva nayujarasirare ena achaneana. Tímiturecapa. Camuriana ena

tisamararacana. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—¿Távihipuca mavínehi eta júcana máimiturapianahicacha ema máca? ¡Témunahiricavapa tíupajijiacavaipahíjicacha! ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta máichaqueneanahíjivi visamairiruanahi. Taicha vímatihí ema maca. Carpintérochucha éma. Vímatihivare esu maena María. Vímatihivare ema maparape Jacobo*, émapa ema José, émapa ema Judas, émapa ema Simón. Vímatihivare ena esenana maparapenaveanahi, ticavasanahi ani —náichacacapa.

⁴ Ema Jesús máimatihí eta napanereruanahi. Tásiha, máichavacapa:

—Tatuparaca epicauchahaviya vimutu víti mavaneruana ema Viya. Étiserá eti nujaneananahi ecavasanahi eta te juca víávasa, étipa eti nuparapenaveana, vahi epicauchanuhini —máichavacapa.

⁵⁻⁶ Éma, ichape eta máramirahi eta namasuapajiravahi éna. Eta tacahe, tájina máimerecachihaini eta tiárami careana. Tacarichu eta macanarasirahi ena nacajumaqueneana eta máemamamahásiravacahi te mavahuana. Vahi camurianainahíni ena macanararuanahi.

Ema Jesús mavanecavacapa ena dócequeneana apóstoleana napaicayare tamutu avasareana, ticametarairuanayare

(Mt 10.5-15; Lc 9.1-6)

Tacahe, ema Jesús tiyanapa mapaicahi eta avasareana máimitucavacapaipa ena achaneana.

⁷ Étana sache, macurujimurihapa ena dócequeneana mayeheana apóstoleana. Tacahe, májjaracavacapa eta náitupajijiasiravayare naratahairayare náquijica ena éreanana. Tacahe, mavanecapa tiyanana eta te apanapaneana avasareana, apinanayarepahi eta napaisirayarepahi. ⁸ Matuparacapa, ánípa máichavaca:

—Tájina íamaimahi eta eyereruvana eta epaisiraya. Váhivare ecuama eta enirurucuha te alforja, étapa eta plata. ⁹ Étanarichuvare íamayare eta emuríha. Tacarichu íamaya eta eyupairíqui. Ecaeparupevayaresera. ¹⁰ Te ítecapapa tayehe eta jácáni peti ítecapihaya te jácáni avasare, ánasi tayehe. Te íúchucayarepa eta te jena avasare, epaenumava ejunijica eta ítecapihahi. ¹¹ Te váhipuca nacujacapahe te jácáni avasare, váhivare nacubaraha nacusamahe, íúchucavaneyare. Étatapevachavanumayaresera eta máteji te ívapeana. Táicutiarayare eta máicuñasiravacayare ema Viya taicha eta namavarairahi najacapahehíni. Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te Sodoma étapa eta Gomorra —máichavacapa ema Jesús.

¹² Tacahe, tiyananapa ena dóceana. Ticametarairuana eta tacamunuirayarehi eta náeneuchiravaya ena achaneana, náinajica eta napecaturana. ¹³ Náimijunavacapaipa ena éreanana tiávahácanahi ena achaneana. Camurianahivare ena nacanararuana tayehe eta najumanaini, nacapajasisirapahi te nachuti eta aceite.

Ema Herodes masamairiricapa eta máichaqueneanahi ema Jesús

(Mt 14.1-2; Lc 9.7-9)

¹⁴ Tacahe, ema Herodes ema aquenucahi tayehe eta Galilea masamairiricavarepa eta máichaqueneanahi ema Jesús, taicha náechajisihahi namutu ena achaneana. Nararíhi ena téjcapavanahi eta napanereruana, ánípa nacahe:

—Ema maca Jesús, ¿váhipuca émaina ema Juan Tícachasirícarahíni macaparuhi ema Herodes? Tichavahichupuca títareca. Étapuca tacahehi puiti maratahahi maicha eta tiáramicareana —nacahepa.

¹⁵ Nararíhisera ena apamuriana nacahepa:

—Émapuca ema víyarahaini profeta Elías, técheputahi.

Ena apamuriana nacahepa:

—Émarichuhi profeta, macutiquenehi ena náinapureanáini antivuanaini. Váhisera técheputaimahi éma —nacahepa.

¹⁶ Émasera ema Herodes, eta masamairirisirahi, macahepa:

—Németeacahi ema maca émaripa ema Juan, ema nímiyuchatipiquenurehi, técheputahipuca te máecari —macahepa.

Eta táichararacavahi eta máepenirahi ema Juan

(Mt 14.3-12)

* 6:2-3 Ema maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenumavahi máehica ema Jesús te táequenepa eta máechepusirahi te máecari ema Víaquenu.

¹⁷⁻¹⁸ Eta macapasirahi ema Herodes ema Juan, ani tacahe eta táichararacavahi: Te jena año, ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacapa éna eta naviracacairahi. Éta tamicatichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanairipipa náitiaca te carenapi. ¹⁹ Esu Herodías, tétavicava eta sucatichirahi ema Juan. Suvarahahi sucapaca éma. ²⁰ Váhisera suratahahini, taicha matsirihacahi mapicauchahi ema Herodes ema Juan, taicha máechahi tétavicava eta máurivahi ema Juan. Máimatihivare eta mavaneruhi ema Viya. Eta tacahehi, macatiuchahi éma apaesa tacuija suícharaca ésu. Táitusiava, ema Herodes máuricapa masamararacahi eta máimiturapiana ema Juan; váhisera máituruequenehahini tájahapuca máichararacavayarehi. ²¹ Tacahe, eta te jena yati ticajaremuhupa ema Herodes, sucamapurapa esu Herodías eta máepiyasirahi eta ichape piesta ema Herodes. Máichuhapa ena máevanachana énapa ena oficiáleana, énapa ena ticaimahaqueneana ticavasanahi tayehe eta Galilea. ²² Te títicanapa téranapa, esu suchicha esu Herodías tisiapapa eta te návihahi ena achaneana. Esenachicharipa ésu. Tírimaicapa te namirahu. Ema Herodes máuricainehi ichape, énapa ena machimarana. ²³ Tacahe, ema Herodes máichapa ésu:

—Nujuracha te pimirahu. Piyaseacanu tájahapuca eta pivarahaquenéna. Núti níjaracaviyare jácane piyasearunuyare, tayanapane vácuticaca eta nímahaqueneana —máichapa ésu.

²⁴ Tacahe, tiyanapa tiúchucapa esu amaperu. Suyaserepanapa esu suena, ánipa suícha:

—¿Tájahapuca eta nuyaseacaini eñi ñina Herodes? —sucahepa.

Tásiha, suíchapa esu suena:

—Piyaseacaya eta ñichuti eñi Juan, puítinarichu ñíjaracavi —suíchapa.

²⁵ Enurujipa tichapa tisiapa esu amaperu eta te mávihahi ema aquenuca Herodes. Suyaseacapa éma, ánipa suícha:

—Nuvaraha píjaracanu puítinarichu eta ñichuti eñi Juan eñi tícachasiricarahi. Píjaracanu te curuja —suíchapa.

²⁶ Tásiha, eta masamirahi eta juca suyasearuhi ema rey Herodes, ichaperinehi eta mapanereresirahi. Váhisera mávarahahini mavayuacahini ésu táicha nasamaripahi ena machimarana eta májarasirayarehi eta suyasearuyarehi ésu. ²⁷⁻²⁸ Tacahe, enurujipa mavaneca ema suntaru eta te cárcel. Mayuchatipiquenuhapana ema Juan. Tacahe, mámapaipahi eta machutini te curuja. Májaracapa esu suena amaperu. Tásiha, suíjarapanapa esu suena.

²⁹ Te nasamairicapa ena máimitureana ema Juan, tiyananapa náepanapa eta máquehéni, náecarapanapa.

*Ema Jesús máitaparahavacahi máenicavaca ena camuriqueneana achaneana
(Mt 14.13-21; Lc 9.10-17; Jn 6.1-14)*

³⁰ Tacahe, tichavanapa tiúrujicavana ena apóstoleana mayehe ema Jesús. Nametacapa tamutu eta náichaqueneanapahi éta pa eta najacapirahi ena achaneana eta náimiturapianahi. ³¹ Tacahe, máichavacapa ema Jesús:

—Tiuri. Tájina táichava. Puíti viyana vácarichu eta te mávapahi apaesa vinaraca ánipina —máichavacapa.

Taicha vahí téjiacavana ena achaneana. Tévachajiricacanahi tiyanana. Vahi náituji-cavahini nicanumahini ena apóstoleana émapa ema Jesús. ³² Tacahe, tiyananapa te pacure, tiávacuhanapa. Nacaijuhepa te mávapahi apaquehe. ³³ Énaserá ena achaneana nanecapaichucha eta nayanirahi. Camurianahi ena tímationahi. Tacahe, tiyananapa tijunapanapaipa, nametapanayarehi ena apamuriana achaneana. Tásiha, tiúrujicavanapa ena tiásihana te tamutu avasareana. ³⁴ Te tiúcupaica ema Jesús, máimahapa ena camuri-queneana achaneana natiaririhiripahi. Tétavicavainehi eta majapanuiravacahi, taicha nacutihí eta uvesana nájina tijaneacaina. Tacahe, máimitumuriharipa. Camuri eta máimiturapiana. Tiuna eta máimitusiravacahi. ³⁵ Te cáperehipa, ena máimitureana napauchapa éma. Náichapa:

—Cáperehipa juca sache. Tiyerehivacahi eta pétiana. ³⁶ Tacahe, táuricapa pimetcavaca ena achaneana nayanapa, navachareca eta nanica te jácane isanitiona, avasarechichanapuca te vichacayarahana. Taicha ani, tájina naviyaimahi eta nanicahini —náichapa.

³⁷ Majicapapasera éma:

—Íjaraca étina eta nanica.

Éna náichavare:

—¿Pivarahapuca viyana vivachareca eta pan? Tacamunuhi vácayehéhini eta camuri plata apaesa námutupaini vítaparahahini vénicahini apaesainahini návaminahini. ¡Vahí taratahahini eta dies mil páneana! —nacahepa.

³⁸ Tacahe, mayaserecapa ema Jesús:

—¿Áyana eta pan ecayehe puiti? Eyana ímaha.

Te náechapa, nametacapa:

—Cíncochichaichu eta pan, apiquipa eta jima jitaruca —nacahepa.

³⁹ Tacahe, macavanairipipa náejahahacapaicahini namutu te muǵjipahi, náijamuripaichuhi. ⁴⁰ Tacahe, téjahapaicanapa ena achaneana. Náijamuripaichuhi eta náejasirahi. Cincunatanapahi, cíentonapahi. ⁴¹ Tacahe, ema Jesús mavehapa eta cíncoque ne pan étapa eta apiqui jima. Máesenicapa eta te anuma. Mahasulupayachapa ema Viya. Mayuve-tutujicapa eta pan, tásiha máíjaracapa ena apóstoleana. Éna, náíjaracapa ena achaneana. Énerichuware mayuvetutuhesinavare eta apiqui jima. Tisimurivacapaipa eta náíjaraca. ⁴² Tacahe, námutu tinicana, tísatueanapa. ⁴³ Tásiha, nacaemacharichahavare eta doce saye ichapehiana táinicachavacaichahava eta náemacharajiana eta pan étapa eta jima. ⁴⁴ Camuriana ena máeniruanahi. Te nataracu, natiarihihi ena cinco mílqueneana ajairana.

Ena Jesús mapaicaeca eta une

(Mt 14.22-27; Jn 6.16-21)

⁴⁵ Te tamutupa, enevanepa mavanecahi ema Jesús tiávacuhana eta te pacure ena máimitureana. Tinapucanayarehi tiánuecana te apachara eta te avasare Betsaida. Émasera ena Jesús manasiyarehi máevatamurihanumayarehi ena achaneana.

Tásiha, tiyananapa ena máimitureana. ⁴⁶ Tacahe, te tamutupa eta macametavairahi ema Jesús nayehe ena achaneana, tiyanapa tiápanahi tayehe eta anuquehe mari. Tiyujaracayarehi tayehe.

⁴⁷ Tacahe, te túyatipa jena yati, ema Jesús manasirichaha macarichuhi eta te anuquehe mari. Ena máimitureana itupierecanaipa tayehe eta cáquiure. ⁴⁸ Tásiha, tachimarcavacapa eta muraca técaticava, nácapaquihipaipa. Te tijarahipa, ema Jesús máimahapa eta nanausirapahi muraca. Tacahe, tiyanapa macapayamuriha. Mapaicaecapaipa eta une. Máetavicavacapaipasera. ⁴⁹ Éna máimitureana tipicanarinehi eta náimairahi eta mapaicaesirapahi eta une, náimijachaipahi cunare. ⁵⁰ Tipiaracapanapa namutu eta náimairahi. Máechajicavanepasera éma. Ánipa maicha:

—Vahi ecupica. Nútichucha. Étumehava —máichavacapa.

⁵¹ Tacahe, mapauchapa éna. Tiávacuhapa nayehe. Tacahe, tǵjahúchavapa tichecapa eta técaticava. Náramirinehi ichape ena máimitureana. ⁵² Taicha vuúchaha nacaicutiarahini eta tacayemaquenehi eta macaejapasirahi eta pan, eta táimereuchirahi éma eta vanairucairahi me Viya. Muracasamuremurianarichaha.

Ena Jesús macanaraca ena nacajumaqueneana ticavasana te Genesaret

(Mt 14.34-36)

⁵³ Tacahe, te apanapa sache, tiápechavanavarepa tiánuecana eta cáquiure. Títecapanapa eta te avasare ticaijare Genesaret. ⁵⁴ Te tiúcupaicanapa, náitiacapa eta napacure. Ena natiarihiqueneanahi náimativanepa ema Jesús. ⁵⁵ Tásiha, tiyananapa tjunapanapa timetajiricanayarehi tayehe tamutu eta avasarechichana tachacayarahanahi. Tacahe, tiúrujicavanapahi ena achaneana te jácani máitecapihapahi ema Jesús. Nánavacapaipahi eta te áchuji ena nacajumaqueneana. ⁵⁶ Énerichuware, te jácani mayanipahahi te acheneana téhepuca cálleana, nanaquipaicapahi ena nacajumaqueneana. Tacahe, nayaseacapahi éma máisapirainahini náemamajiaca eta tacheyarapi eta mamuiraha. Tacahe, nácani témamajiacanapahi, enevanepaipa tinaracanapahi.

7

Ena Jesús mametaca ena achaneana eta timaeperajicarahi

(Mt 15.1-20)

¹ Tiuri, te apanapa sache, náitecapauchapa ena apamuriana fariséoana énapa ena escribánoana, tiásihanahi tayehe eta Jerusalén. Témeñahavanapa eta mayehe ema Jesús. ² Te nataracu ena máimitureana ema Jesús, nararihi éna vahi nacasipavahunumahini eta nanisirahi. Tacahe, ena fariséoana, eta náimairahi eta namaitauchirahi eta nayeherepihi, ichaperinehi eta nasemanevahi, taicha náimijarechahi “máeperaji” eta juca. ³ Taicha namutu ena israelítana, napicauchahi eta nayeherepiana ena náchucanaveanaini, navetijipa ena fariséoana. Te vahi ticasipavahunumanahi, váhivare náisapaimahi tinicana. Taicha éna vahi návaraha tánasihini eta tachipejihini ánichichainahini, taicha tipicanahi tamaeperajicahini eta náchanevana. ⁴ Étaripa násihahhipuca te mercado, te plázapuca, te títecapanapa te napena, ticasipavahunayarehi. Mavera eta apamuri nayeherepiannahi tipicauchacareanahi nayehe, étaripa eta nasipasiraparaca eta náereresiana, étapa eta jarra, étapa eta návacuruhihana étapa eta catre náimasirare.

⁵ Tacahe, nacajachapa ema Jesús ena fariséoana énapa ena escribánoana. Ánípa náicha:

—Pímaha. Ena pímitureana vahi náitachahini eta viyeherepi. Namaeperajícapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

⁶ Tacahe, majicapapa ema Jesús, ánípa maicha:

—¡Éti ecaijarehi apimirahe! Tatupiruvahi eta máechajiriruvahi ema Viya, téchajisiahehi éti eta te Sagrada Escritura. Ánípa macahe: “Ena nani achaneana, tétserajicanuanahi te najaca; váhisera táetupicavahini te nasamureana. ⁷ Téneuchavanahi eta nuyehé, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ema Viya. ⁸⁻⁹ Ichape eta éjecipiravahi éti, taicha tasapihapa epicauchahi eta eyeherepiana. Étasera eta mavanairipi ema Viya, vaipa epicauchahini. Tasapihapa épuruhi eta mavanairipiana taicha tivayuacahehi ichape eta ítauchirahi eta eyeherepiana. ¹⁰ Émarichuhi ema víyarahaini Moisés tíájuchahi eta mavanairipi ema Viya eta viyehé: “Pipicauchaya pémunacayareva ema piya ésupa esu pena”. Jucarihi eta apana vanairipi: “Mácani tíumehahi ema maiya ésupa esu maena, vahi tijapanucarémahi nacapacayarehi”. ¹¹⁻¹² Étisera vahi epicaucha eta júcana vanairipiana mayehé ema Viya. Taicha te mararihipuca mácani achane ticamavahupuca me Viya eta máimahaqueneanahi, eta ímiturapi éti “Vaipa tatuparacaimahi ema achane eta máimicatasiraya ema maiya ésupa esu maena”. ¹³ Ani tacahehi eta ecaepahaira eta tasuapacarevahi eta mavanairipiana ema Viya. Tasapihapa, ímicapicáuchahi eta eyeherepianachucha. Jararihivare eta apamuriana eta éjecipiravanahi tavasiqueneanahi —máichavacapa ema Jesús.

¹⁴ Tacahe, máichuhapa ena achaneana, náurujícava eta máimitusiravacayare. Tásiha, máichavacapa:

—Nuvaraha esamanu yátupina, apaesa ácaicutiara. ¹⁵⁻¹⁶ Tájina timaeperajícaina eta viáchanevana te vahi vicasipavahunumahi te vinicayare. Vahi étaparacaina eta vinicaqueneana. Étasera eta jácani evainarajivana táuchureanapuca te ejaca, etapa eta evainarajipanereruana; jéhevare éta timaeperajicahehi —máichavacapa.

¹⁷ Tacahe, te tyanaracanapa ena achaneana, macarinépa ema Jesús énapa ena máimitureana, nayaserecapa máitametacavacahini eta máimiturapi. ¹⁸ Tacahe, máichavacapa:

—¿Énerichuvare éti mapanererurehe? ¿Váhipuca ácaicutiarahini eta juca? Tamutu eta juca tasiapaqueneanahi te vijaca vnicasareanahi, vahi timaeperajicahavimahi, taicha vahi tasiapa te visamure. ¹⁹ Tatupiruhi te vijuhe. Tásiha, te tíuchucapa eta, apanapa eta táuchusihahi —máichavacapa ema Jesús. (Eta máichiravacahi eta juca, máimicaecherachapa eta táurivahi tamutu eta tinicacareana.)

²⁰ Macahevarepa:

—Étasera jácani panererucana tamauriqueneana, te náisapavapuca ena achaneana, étara timaeperajicavacahi éna. ²¹⁻²² Taicha te amahe eta nasamureana napanerechahi eta tamauriqueneanahi. Ema achane mapanerechahi maveha esu apana esena mayena ema apana achane. Esu esena supanerechahivare suveha ema apana achane suima esu apana esena. Éna amaperuana napanerechahi eta natuhusivaya. Nácani tipanerechanahi eta ticaparecana, tíamerecana, tivayuarecana, téchajihihana. Te nasamureana, najamuracha eta apayeheana, ticapinarurahiana, tétserajicavana eta nasiñavairahi. Mapicaurairahana, camuriqueneana eta napanereruana máecharaireana. ²³ Tamutu eta juca panererucana tamauriqueneana tíasihahi te nasamureana. Jéhesare, eta júcana eta timaeperajicahi eta náchanevana ena achaneana —máichavacapa ema Jesús.

Esu ésuma esena apavasana sucasiña ema Jesús

(Mt 15.21-28)

²⁴ Tacahe, tyanavarepa tipaica ema Jesús, énapa ena máimitureana. Nacaijuheyarehi eta avasareana táunavanahi eta provincia Siria. Tásiha, títecapanapa te jácani peti. Váhisera mávarahahini náechahini ena apamuriana achaneana eta matiarihirahi. Tásihasera náecharichucha éna. ²⁵ Tacahe, susamairiricapa esu ésuma esena. Ésu, apavasana, sirofenícana. Eta suéchejiriruva eta griego. Esu suchicha mávaháruhi ema émana éreana. ²⁶ Títecavanépa esu, suépuyumirauchapa te mampirahu ema Jesús. Tiyaseuchavapa mayehé ema Jesús eta máimijunijicahini ema éreana suyehé esu suchicha. ²⁷ Tacahe, máichapa esu:

—Nativaya néchapajiricavaca ena nujaneanana. Taicha vahi táuricahini ásapihahini néchapajiricahehinehi éti apavasana, émetavichahini ena nujaneanana —máichapa.

²⁸ Esu esena sujicapapa:

—Énehineni tacahehi, tátachicha. Yátupihi vahi pijaneanuanahini. Pájapanunusera, picatajicanuchuchaini. Viti apanava vácasifavahini eta piyehe eta vítatijivairaina —suíchapa.

²⁹ Tacahe, máichapa ésu:

—Tiuri eta péchajiriruva. Piyanapa pichava te pipena. Táichavene eta picasiñairanuhi, nímijunijicaripa ema éreana suyehe esu pichicha —máichapa.

³⁰ Tacahe, tichavapa ésu te supena. Suchimapapa tivecahi esu suchicha te sucamane. Jéhesaréinehi, májinaripa ema éreana, majunijiacaripa ésu.

Emá Jesús macanaraca ema túhuquiña upa

³¹ Tacahe, tiyananavarepa tipaicana najunijicapa eta provincia Siria. Nánucuhapa eta provincia ticajare Decápolis. Tacahe, títécapanapa eta te tachausi eta cáquiure Galílea, te tinapaica te táchusine sache. ³² Tacahe, ena achaneana námapa ema émana achane mayehe ema Jesús. Túhuquiña, úpavare ema achane. Náechajiuchapa eta manaca eta mavahu mayehe ema achane, macanarasirayarehi. ³³ Tacahe, ema Jesús mañajichapa ema achane nayehe ena achaneana. Manacapa eta masuveraqui te maquiñana. Tacahe, tiátutuquivauchavapa. Tásiha, máemamacapa eta manene ema achane. ³⁴ Tacahe, máesenicapa te anuma. Tiúmitipa. Tacahe, máichapa:

—¡Téchujihapa eta piquiñana!

³⁵ Enurujipa tisamarahipa ema achane. Tijimuyapa eta manene, tíuripa téchejica. ³⁶ Tacahe, máimichavapa ema achane nayehe ena majaneanana. Matuparacapa éna eta nacuija nametaca. Énaserá tímatajiricanaichucha. ³⁷ Tétavicava eta náramirahi ena nametaruana. Ánipa nacahe:

—Tétavicava táuricacareva tamutu eta máichaqueneanahi ema Jesús. Téchajicanapahi ena úpana, tisamarahianavarepa máicha ena túhuquiñana —nacahepa.

8

Emá Jesús tiápechava máenica ena achaneana
(Mt 15.32-39)

¹ Tacahe, eta juca sácheanahi tíurujicavanapa ena ichapemuriqueneana achaneana te mávihahi ema Jesús. Mapanaripa sache nacahehi ena achaneana, tájinaipa nanichahini. Tacahe, máichuhavacapa ema Jesús ena máimitureana. Máichapa:

² —Nujapanuvaca ena nani achaneana, taicha mapanaripahi sache puiti eta nacahehi eta viyehe. Tájinaipavare naviyahini nanica. Téchurihanaripa eta nanicaquene. ³ Te névatacavaca nayana te napenana, machu náquipaicava te achene taicha vaipa túmevacaimahi eta náecuavahi. Taicha natiaríhi ena tiásihanahi te tiyerehiana. Vénicavacayare —máichapa.

⁴ Tacahe, najicapapa ena máimitureanahi. Ánipa naicha:

—¿Távihapucaíni viviyahini eta vénisihayarehi ena nani camuriqueneana achaneana? Eta te juca mávapahi vamáhi, tájina vítusiáváimahi eta tinicacareana —nacahepa.

⁵ Tacahe, mayaserecapa éna. Ánipa máicha:

—¿Áyanachaha eta pan eta iámaqueneanapahi?

—Jucarihi siéterine —náichapa.

⁶ Tacahe, macavanairipipa eta náejahapaimuriahahini namutu ena achaneana. Tacahe, mavehapa eta siétequene pan, mahasulupayachapa ema Viya te anuma. Tásiha, mayuvecavacapa, májaracapa ena máimitureana. Éna, nájaracavacapa ena achaneana. ⁷ Tatiarihihivare eta ánimurichicha eta jímachichana. Mahasulupayachavare ema Viya tayehe eta jima. Tacahe, mavanecavarepa eta nájarasiravacayare ena achaneana. ⁸ Tacahe, tinicanapa namutu, tísatuheanapa. Tacahe, nacurujicapa eta náemacharájiana. Siete sáyericahahivare eta námachana. ⁹ Eta nasimutuvahi ena tinicanahi táetavica eta cuatro mil achaneana. Tacahe, te tamutupa eta juca, máevatamuríhasarepa ema Jesús ena achaneana nayanaya nachava te napenana. ¹⁰ Enurujipa tiávacuhanapa te pacure ema Jesús énapa ena máimitureana. Tiyananavarepa. Tiánuecana nacaijuhepa eta te avasare ticajare Dalmanuta.

Emá Jesús macajachavaca eta namasuapajiraivahi ena fariséoana
(Mt 16.1-4; Lc 12.54-56)

¹¹ Tacahe, títécapanapa ena apamuriana fariséoana. Tépanavanapa nacanarajirica ema Jesús. Eta navarairahi náimiquipaicayarehi, nayaseacapa máimerecrahini eta tiáramicareana, máimerecrahini te yátuphipuca vanairucahi me Viya. ¹² Tásiha éma, tichurua-michavarine muraca. Tacahe, máichavacapa:

—¿Tájaha tacayema eti achaneana eyaseacanu nímereca eta tíamicareana? Núti nímatihe. Vahi esuapanuimahi te nímercapucaini eta tíamicare. Tásiha, váiparine étina tatuparaca ímahahini eta tíamicareana —máichavacapa.

¹³ Tacahe, majunijicavacapa éna. Tiyonavarepa tiávacuha te pacure. Tiyananapa tiánuecana te apachara eta cáquiure.

Ena Jesús máimicuticha eta levadura eta apimirairanahi ena fariséoana (Mt 16.5-12)

¹⁴ Tiuri puiti, náemitisicahi ena máimitureana eta nanirurucuha. Tatiarihihisera eta étanahi pan eta te pacure. ¹⁵ Eta nayanirahi, máimitumurihapa ena Jesús éna. Máichavacapa:

—Tímicarehi eyehe eta levadura eta tasisijisira tamutu eta masa. Tacutirichu eta tapareasirahi eta apimirairavacahi ena fariséoana étapa eta tacañamarasira eta ecaimahaquenerayare. Vahi ecucuti ena políticoana. Échapaváicha tayehe, machu éhica éna —máichavacapa.

¹⁶ Tacahe, náichacacapa ena máimitureana. Ánipa nacahe:

—Tímicajachahavihi eta vémitisisirahi eta pan. Eta tacahe, macahehi tayehe eta levadura.

¹⁷ Éna máimatiacavacapa. Tásiha, máichavacapa:

—¿Tájaha tacayema ecahechajiriruvahi eta émitisisirahi eta pan? ¿Vuíchahacaru ácaicutairahini? ¿Tájinacaruichaha epanereruina éti? ¿Muracachutihichaha? ¹⁸ Tamapurujichuchapuca eta ímairahi eta níchaqueneana. ¿Vuíchahacaru ácaicutiarahini? Tamapurujipuca eta esamirahi eta nímiturapihana. ¹⁹ ¿Váhivare échahini eta nucaejapisirahi eta cincoquene pan, naniruhi ena cinco mílqueneana achaneana? ¿Áyanahi sáyeana eta náemacharajiana evehaqueneanahi? —máichavacapa.

Tacahe, najicapapa:

—Doce sáyeana.

²⁰ —Étapa eta siétequene pan naniruhi ena cuatro mílqueneana achaneana, ¿áyanahivare sáye eta náemacharajianahi evehaqueneanahi? —máichavacapa.

Najicapavare:

—Siete sáye —náichapa.

²¹ Tacahe, máichavacapa:

—¿Vuíchahacaruva ácaicutiara? —máichapa.

Ena Jesús macanaraca ena émana achane púchuqui eta te avasare Betsaida

²² Tiuri, títecapanapa eta te avasare Betsaida. Ánaqui, námapa ena achane púchuqui. Náechajichapa éna eta macanarasiraya ena Jesús. ²³ Tacahe, ena Jesús macaratavauchapa ena púchuqui, mámapa te tachachacu eta avasare. Tacahe, mayajihauquichapa eta máiture eta te máuquihana. Tásiha, manacapa eta mavahuana eta te machuti. Tásiha, mayaserecapa:

—¿Pímairiricapa? —máichapa.

²⁴ Tacahe, téseninicapa ena púchuqui. Macahepa:

—Nímairiricapa apaesa. Eta nímairahi ena achaneana, ticitimahichuchasera yucuihana, tiyamuricanahisera —máichapa ena púchuqui.

²⁵ Tacahe, ena Jesús mápechavare manaca eta mavahuana eta te máuquihana ena púchuqui. Te mavehapa eta mavahuana, yátupipa tijarahipa eta máimairirisirahi. Tamutupa máimaha. ²⁶ Tacahe, ena Jesús máevatacapa ena púchuquinihi, mayanapa te mapena. Máichapa:

—Piyana pitupiru te pipena. Váhisera picusiapa eta te jena avasare eta piyanihaya —máichapa.

Ena Pedro máimereucha ena Jesús émairahi ena Cristo (Mt 16.13-20; Lc 9.18-21)

²⁷ Te táequenepa eta juca, tiyanavarepa tipaica ena Jesús, énapa ena máimitureana. Nacaijuhepa eta te avasarechichana tachacaya eta ichape avasare tciajare Cesarea, máepiyaruhi ena rey Felipe. Eta napaisirapahi, mayaserecapa ena máimitureana. Ánipa maicha:

—¿Tájaha nacayema ena achaneana eta nuyehe? ¿Nájahanuhipuca náimijachanuhi núti? —máichavacapa.

²⁸ Tacahe, najicapapa:

—Ena apamuriana náimijachavihi téchepuca ena Juan Tícachasiricarahini. Ena apamuriana tímijachavianahi ena víyarahaini profeta Elías, téchepucahi éna. Ena apamuriana tímijachavianahivare ena mácani apana profetaini antívuini, téchepucahi —náichapa ena máimitureana.

²⁹ Tacahe, tiápechavavare mayaserecavaca:

—Étiyapa, ¿nájaha ímijachanuhi núti?

Majicapavanepa ema Pedro:

—Pítira yátupi quenévihí Cristo —macahepa.

³⁰ Tacahe, matuparacapa muraca éna, nacuija nacumetaca eta émairahi ema Cristo.

Ema Jesús tímereuchava eta máepenirayare

(Mt 16.21-28; Lc 9.22-27)

³¹ Tacahe, tépanavapa máimitucavacahi eta táichararacavayare eta máepenirayare. Ánipa maicha:

—Núti Manerejirunuhi ema Viya, nutuparahaichuhi ichapemuri eta nucatajivairayare. Tépurunuanayare ena tuparairucana énapa ena aquenucarahana. Éna, tímicapacanuanyareva. Mapanayareichuhisera sache eta nucaheyare eta népenirayare. Tásiha, nuchavayarehi nécheputa —macahepa.

³² Máimicaecherachapa eta macayemaquenehi. Tacahe, ema Pedro máiputsiacapa ema Jesús. Ánaqui macajachapa, máijarasiravahi eta mapanereruhi. ³³ Tacahe, téviurucavapa ema Jesús. Máesenicapa ena apamuriana máimitureana. Tásiha, macajachavarepa émapava ema Pedro. Máichapa:

—Píti, téjicapavahi eta pipanereruhi. ¡Pínajica eta juca tamauriquenehi! Pivarahapa pihapapica eta mapanereruhi ema Viya. Eta juca pipanereruhi tacutíhi eta mapanere-ruanahi ema Satanás, énapa ena machanerana —máichapa.

³⁴ Tacahe, máichuhavacapa ena máimitureana énapa ena apamuriana achaneana. Máichavacapa éna:

—Nácani navaraha náehicanu, tacamunu náinajica tamutu eta tihapapirica eta náehisiranuhi. Nacaravahuyareva eta nímiturapiana. ³⁵ Nácanisera téñamanahi eta náitaresira, tiávamirahuanaya eta náehisiranu, énajivayare ticamítiequenehavanaya eta náitaresira. Énaserá nácani yátupi tjaracavana téhicana eta náehisiranuhi, étape eta námirahi eta tíurina échajirirucava, tayanapane táimicapacavacapuca, éna tíujicavanayare tíuchuchayare eta náitaresiranaya. ³⁶ Énerichuvare nácani tacañamararuanahi eta nacaimahaquenéiraya te juca apaquehe, tíñehiyare eta náitaresira taicha eta tacañamarasiravacahi tahapapiricavacahi tayehe eta náuchucuirayarehini. Tiyananainapa eta te yucu nacaicuñaiyayare.

³⁷ Taicha vahi máratahaimahi mácani achane mavachachahini eta máurivaya te apana vítaresira. ³⁸ Énaripa nácani titsirihanapuca téhicanuana, náimirtsirihapuca eta nímiturapiana te namirahuana ena achaneana mapicaurirahana pecatumareana, núti apanava nutsirihayareva tayehe ema nani. Nucaerajicainapa ena nani, núti Manerejirunuhi ema Viya, te táitecapapa eta sáchehare nuchavirayare aquenucanuinaipa. Te jena sáchehare, námainapaipa núti eta majaraiva ema Tata, nucachanénapaipa ena sántoqueneana ángeleana.

9

¹ Énerichuvare máichavacapa:

—Nutupiruva numetacahe: Puítiripa te etaracu éti etiaríhi éti vahi épenavanémahi, ímahannunumaya eta táepaniraya eta nítipujijiasiravahi eta nucatuparahairahi aquenucanuya me Viya —máichavacapa.

Ema Jesús tihapamaichava eta máimahi

(Mt 17.1-13; Lc 9.28-36)

² Tiuri, sáisiapa sache eta nanasirahi ánaqui. Tacahe, ema Jesús manaquicavacapa ena máimitureana. Nacarinehi máma ema Pedro, ema Jacobo, émapa ema Juan. Tiyananapa eta te étana mari anuquehepana. Nacarichu éna. Eta ánaqui, náimaha tihapamaichavahi eta máimahi ema Jesús te namirahu éna. Tétavacavapa eta tajapuvahi tajararasirahi tamutu eta máquehe. ³ Eta mamuiríha, táetaviucha eta tajanunumesirahi. Nájiná tiratahaina tépachinacha tajanunumecahini náicha eta muíriare. ⁴ Tacahe, tiáramicareanavarepa tímerecavana ena apina ajáirana: ema víyarahaini profeta Elías émapa ema víyarahaini Moisés. Téchajiricavanaripahi mayehe ema Jesús. ⁵ Tásiha, ema Pedro tímisiapavapa, téchajicapa ema Jesús. Ánipa macahe:

—Tata Náquenu, tétavacavapa táuricacareva eta víviahairahi eta ani. Tiúripanahipucaini vépiyacahini eta epenahuinapachuhini. Pipenahuinrichuhini píti, mapenainarichuhivaréni ema Moisés, émapaini ema Elías —máichapa.

⁶ Váhinéni máimatiequenehaini ema Pedro tájahahipuca eta mavarahaquenehi macayema. Namutu tíñacavana ichape ena mapanana máimitureana. ⁷ Tacahe, tiáramicarevarepa eta úcaji tépacámuríhahi éna. Nasamavarepa eta mahu ema Viya tayehe eta úcaji. Ánipa macahe:

—Ena maca, ema yátupiquenehi nuchicha némunaruquenehi. Éma esuapayare — macahepa.

⁸ Tíjahúchavavarepa, te náesenicavarepa, macarinehi ema Jesús. Nájinaripa ena apinana náimahaqueneanahi.

⁹ Tacahe, te tichavanapa tiúcupaicanavarepa, ema Jesús matuparacavacapa éna. Ánipa maicha:

—Vuíchaha ecumetajirica eta juca ímahaquenehi puiti. Tiámainucava te nécheputa te nécarí núti —macahepa.

¹⁰ Tásiha, nasuapa eta matupararuhi. Napanerequenehahisera eta macayemaquenehi. Tiyaserejiricacanapa:

—¿Tájahapuca tacayemarihi eta máechepusirayare te máecari? —nacahepa.

¹¹ Te tichavanapa tayehe eta anuquehe mari, nayaserecapa éma, ánipa naicha:

—Ena escribánoana tímitucanahi eta machavirayare tíapechavaya títareca ema víyarahaini Elías, tínapucayarehi eta pímeresiravayarehi piti Cristo. ¿Énapuca téjcapavanahi ena escribánoana? —náichapa.

¹²⁻¹³ Majicapapa ema Jesús:

—Yátupi, ema víyarahaini Elías títecapayarehi, máetupiripanayarehi tamutu. Nútisera numetacahe: Títecaripahi ema Elías, váhisera náimatihini ena escribánoana. Váhivare najacapani ena tuparairucana éma. Nacatianacahisera nacapacahi éma, tacuti eta táechajisihaqueneanahi eta Sagrada Escritura eta máichavaquenevayarehi éma. Ene nucaheyare núti Manerejirunuhi ema Viya. Ticitianacanuanyarehivare, tépurunuanyarehi. Ichape eta náemecatajichiranuyare eta náimicapasiranuya, tacutihí eta táechajisihaquenehi eta Sagrada Escritura eta nuyehe —máichapa ema Jesús.

*Ena Jesús macanaraca ema amaperu mávaháruhi ema éreana
(Mt 17.14-21; Lc 9.37-43)*

¹⁴ Tacahe, te tichavanapa éna te návihahi ena apamuriana máimitureana, natirihíhi ena camuriqueneana achaneana te nachacaya. Natirihíhivare ena apamuriana escribánoana, nacanarajiricavacahi ena máimitureana. ¹⁵ Eta náimairahi ema Jesús, náraminehi ena achaneana. Tijunaparacanapa namutu náechajipanaya. ¹⁶ Te títecapanapa te návihahi ena máimitureana, ema Jesús mayaseremurihapa éna. Ánipa maicha:

—¿Tájaha eta ecanarajiricavacahi ena nani escribánoana? —máichapa.

¹⁷ Tacahe, tiúchujicávaneпа ema émana achane. Majicapapa, ánipa maicha:

—Tata maestro, picatajicanu. Námapahi piyehe ema maca nuchichasami. Éma, vahi téchajica maicha ema éreana. ¹⁸ Mavarahapa jácani ema éreana, májahúchava máquipaicahi ema nuchicha. Tásiha, ema amaperu ticarisasajacapa, tínrataquiachechavapa muraca. Tivirajipa máicha ema éreana, muracaquihavarepa. Nuyaseacahi ena pímitureana eta náimijunairayarehini ema éreana. Váhiserá náratahahini —máichapa ema achane.

¹⁹ Tacahe, máichapa ema Jesús:

—¡Tétavicava emasuapajiravavaca eti achaneana! ¡Cúverarecachasicaini eta nucamichirahénahini! Íama ani ema amaperu —máichapa.

²⁰ Tacahe, náepanapa ema amaperu. Te máimahapa ema éreana ema Jesús, enurujipa macaeñamaca ema amaperu. Tacahe, tíaquipaicavapa te apaquehe. Téchariripáicavapa ticarisasajacapa. ²¹ Tacahe, mayaserecapa ema Jesús ema maiya ema amaperu. Macahepa:

—¿Tiyereripahipuca eta juca máichavaquenevahi? —macahepa.

Majicapapa ema achane:

²² —Te amuyarichaha. Májejaripa máquipaica ema mara éreana te yucu téhevere une, taicha mavaraha macapaca éma nuchicha. Pítisera, te píratahapucaini, pájapanuhavini picatajicahavisamíni —macahepa ema achane.

²³ Majicapapa ema Jesús:

—¿Tájaha pícyemaquene eta píchanuhi eta te nuratahahipucaini núti? ¡Pítinapucaini, te pírataha! ¡Pácasíñanu! ¡Tamutu títujicacare te ecasiña eti achaneana! —máichapa ema Jesús.

²⁴ Enurujipa majicapa ema achane. Tijaranu eta majicapirahi, ánipa macahe:

—¡Nucasiñavi, tata! ¡Pímicatacanu eta néchuriasirahi eta nucasiñairavaina piyehe! —macahepa.

²⁵ Tacahe, máimahapa ema Jesús ena achaneana tíurujicavanaripa mayehe. Tásiha, macajachapa ema éreana, ánipa maicha:

—¡Piti váinaraji, piti péтуhуquiñarahi, úpahi pícha éma! Núti nuvanecavi: ¡Pijunijicayare ema maca amaperu! ¡Vaipa picuchavaucha ema maca! —máichapa ema Jesús.

²⁶ Tacahe, tipiararecapa ema éreana. Mavayuyujicapa tiyayacare ema amaperu máicha. Tacahe, majunjiacapa ema amaperu. Ema amaperu ticutipá máepenaquene. Tacahe, nacahepa ena achaneana:

—Tépenasamipa —nacahepa.

²⁷ Tacahe, ema Jesús macaratavauchapa, macaehepucapa ema amaperu. Tacahe, titupihapa ema amaperu, tiúripa. Tájina máichava.

²⁸ Tacahe, te táequenepa, náiputsiacapa ema Jesús ena máimitureana. Nayaserecapa: —¿Tájaha tacayemahi eta vahi váratahahini vicuchuahini ema éreana mayehe ema amaperu? —náichapa.

²⁹ Tacahe, majicapapa éma:

—Ema maca éreana, muracapanahi éma. Eta ecuchusiraina ena nani macutiqueneanahi tavaraha íchanumayare eta eyujarasiraina étapa eta íchiraya eta ayuna —máichapa.

Tiápechavavare ema Jesús tímereuchava eta máepenirayarehi
(Mt 17.22-23; Lc 9.43-45)

³⁰ Tacahe, tiyananavarepa tipaicana. Nánucuhapa eta provincia Galilea. Vahi mávarahahini ema Jesús eta nasamairiricahini ena achaneana eta nánucuirahi éna, machu nahapapiricapucaini eta máimitusiravacahi ena máimitureana. ³¹ Eta máimitusiravacahi, ánipa macahe:

—Nuti Manerejirunuhi ema Viya, járajapainapa eta sáchezare eta máijarasiránuya mácani achane nayehe ena ticatianacanuanahi. Ticaratacanuanayare, ticapacanuanayareva. Téhesera te mapanaquenénapa sache eta népeniraya, néhepucayare —macahepa.

³² Énaserá ena máimitureana váhiquene nacaicutirahini eta macayemaquenehi. Natsirihacapasera nayaserechahini.

¿Nájahapuca ema apóstole ticapicahupana?
(Mt 18.1-5; Lc 9.46-48)

³³ Tacahe, títetapanapa eta te avasare Capernaúm. Te peti náitecapihahi, mayaserecavacapa ena máimitureana. Ánipa macahe:

—¿Tájahapuca eta ejicapamaracacahi eta epaisirapahi te achene? —macahepa.

³⁴ Tásiha, vahi najicapahini, taicha vahi návarahahini náimereuchavahini eta najicapae-majiricacairapahi eta nájahairayarepuca mácani ticapicahupanahi. ³⁵ Tásiha, téjacapa ema Jesús. Máichuhamuripa ena dócequeneana eta napauchirayare náejaca eta te machacaya. Tacahe, máichavacapa:

—Nácani navarahahi ticapicahupananayare te etaracu, tavaraha náechapajiricavaca namutu ena nachamuriana. Nacachuricayare eta náemunaraivahi nayehe ena apamuriana —máichavacapa.

³⁶ Tacahe, máichuhapa ema émana amaperuchicha. Majupacapa te namirahu éna. Tacahe, máichavacapa:

³⁷ —Nácani tijacapanayare ena amaperuana níchavenénahi nútí, ena nani yátupi náimerecaya eta náemunasiranuhi nútí taicha tímicutijiricavahi nútinahini najacapa. Taicha nácani tijacapanuanahi nútí, énerichuyareva tacahehi eta najacapirahi ema Ticachichanu, ema tivanecanuhi —máichapa.

Tímicatacavahanahi nácani vahi ticatianacahaviana
(Lc 9.49-50; Mt 10.42)

³⁸ Tacahe, ema Juan mametacapa, ánipa máicha:

—Tata maestro, vímahahi ema émana achane máquijicavacahi ena éreanana te píjare ticutirinehi pítinahini píjaraca eta máitupajijiasiravahi. Tásihasera vicavacahi éma, taicha vahi víumurivainahini —máichapa ema Juan.

³⁹ Émasera ema Jesús máichapa:

—Vahi ecucavaca éma. Taicha te máichahipuca ema mácani eta tiáramicare, mámapicahi eta níjare, vahi macaecahinuhini. ⁴⁰ Tímicatacavahanahi nácani vahi ticatianacahaviana. ⁴¹ Jéhesare, nácani ticumpirachaheana eta une éti étaripa táichavenera eta étirahi nuchaneranahehi nuti Cristo, vahi námapurujimahí. Yátupihí ticavachequeneanayarehi éna —macahepa.

Ichape eta máicuñayare mácani tímiaquipaica te pecatu ena amaperuana

⁴² Tímiyanava eta máimituresirahi ema Jesús, ánipa macahe:

—Tacutiquene mácani tímiaquipacaya nácani ena téhicanuanahi mánsuqueneanahi. Tiúripanahipucaini tájahúchavahini máepenahini mativainahini éma. Váhirichupucaini macucaicuñahini, taicha vahi macuímiaquipaichahini ena téhicanuanahi —macahepa.

Ecunevaicha ichape, machu náepujuichahe eta te yucu máemahacacaquene
(Mt 18.6-9; Lc 17.1-2)

⁴³⁻⁴⁸ Énerichuvare máichavacapa:

—Jéhevare, te tavarahapuca táimipeaturachaheyare eta evahu, tapamisirahénapapuca íchayare eta tauriqueneana, tiúripa eyuchatica, apaesa vahi tacuimiáquipaicahe tayehe eta pecatu. Étaripa eta ívape, te tavarahapuca támahe íchayare eta tauriqueneana, tiúripa eyuchaticavare, apaesa vahi tacuimiáquipaicahe tayehe eta pecatu. Étaripavare eta iúquiha, te táimiaquipaicahepuca tayehe eta pecatu, tavarairahi táimahayare eta tauriqueneana tájiparacana, tiúripa evectuhaulquichava. Taicha tiúripa eta ejacapacarehi éti eta esiapiraina eta te mávasa ema Viya, tayanapane táejiacavapuca eta íáquehe. Páurehesa-misera éti, te náepujuichahepuca eta te yucu infierno, tayanapanéni tamutuchahahini eta íáquehe. Taicha ánapa máemahacacaquenehi eta yucu. Máitavacaca eta ecatajivairanayare. ⁴⁹ Tacuti eta vépurarajica eta icheve eta viniru, ene nacaheyare ena tiyana te yucu, ticaepuracasianayare tayehe eta yucu.

Vahi ecuisapa táepaha eta ecamunucarevahi
(Mt 5.13; Lc 14.34-35)

⁵⁰ Eta icheve, tétavicavahi eta táurivahi, taicha ticamunucarehi. Ene ecaheyare éti eta ecamunucarevahi eta nayehé ena achaneana. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevavainahini. Tacuijavare tahapapicahe eta iúrivahi —máichapa ema Jesús.

10

Ema Jesús tímíturacahi, máechajisihahi mácani achane tñajicahi esu mayena
(Mt 19.1-12; Lc 16.18)

¹ Tacahe, tiyananavarepa tipaicana te tinapaica te vana. Nánucuhapa eta provincia Judea. Tásiha tiánucanapaha eta te apachara eta cajacure Jordán. Ánaqui tíápechavanavare tiúrujimurivana ena ichapemuriana achaneana te jácani máitecapihapahi ema Jesús. Tásiha, tímíturacavare éma, taicha tacahehi eta mayeherepihi. ² Tacahe, náitecapauchapa ena apamuriana fariséoana. Natanucahi eta ticaviureyarehi ema Jesús. Ánipa náicha:

—Vívaraha pimetacahavi ¿te táuricapuca máinajica ema achane esu mayena?

³ Tásiha, ema Jesús mayaseracavarepa ema apana:

—¿Tájahasica eta tacayema eta mavanairipi ema víyarahaini Moisés? —máichapa.

⁴ Najicapapa éna:

—Ema víyarahaini Moisés máisapahi ema suima máejerare eta máinajisira esu mayena. Macavanairipiser májucha eta ajureca tayehe eta náinajicacaira. Tásiha, eta májjarasirahi ésu eta juca ajureca, máinajica ésu. Tásiha, vaipa mayenainahini —nacahepa ena fariséoana.

⁵ Tacahe, ema Jesús máichavacapa éna:

—Ema íachucanaveanaini, te jácani eta nasemairahi, náinajica ena nayenana. Ema víyarahaini Moisés máisapahi tñajicacana táichavenehi eta namuracasamurevanahi éna, vahi náimitucarehini táicha. ⁶ Váhisera máuricahini ema Viya eta náinajicacahini. Taicha te tépanavainapa acane, ema Viya májjaracahi ema achane ésunayareichuhi esu mayenayare. Esu esena émanayareichuvare ema suímayarehi. ⁷⁻⁸ Aní tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutscavanayarehi eta napanana ena ticachichana. Énajivainapa titáticacanayare. Eta navehacacairahi, tímicitijiricavaipa étanarinehi eta náqueheana” tacahepa. Éna, tímicitijiricavainapa émanainarichuhini te peti. Étanarichu eta napanereruana. Vaipa táisapacarehini eta náinajicacairahini. ⁹ Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

¹⁰ Te táequenepa, nacarichuipahivare ena tayehe eta peti náitecapihahi, ena máimitureana nayaserecapa ema Jesús tayehe eta juca máechajiriruvanahi. ¹¹ Tacahe, máichavacapa éna:

—Te máinajicapuca esu mayena mácani achane, eta maviraya esu apana esena, ticapecaturaipa éma me Viya. Ichapevare eta máejecapiravahi suyehe. ¹² Tacutiquene súcani esena, te suínajicapuca ema suima, eta suviraya ema apana achane, ticapecaturaipavare ichape ésu —máichavacapa.

Ema Jesús mayujaraucha ena amuyana
(Mt 19.13-15; Lc 18.15-17)

¹³ Tacahe, ena achaneana námavacapaipahi ena amuyana eta mayehé ema Jesús. Navarahahi máemamahacavacayarehi éna, mayujarauchavacahivaréni. Énasera ena máimitureana vahi náisapahini. Nacaichepacapa ena tiámanapahi ena amuyana. ¹⁴ Te

máimahapa ema Jesús eta nacaichepaysirahi, tise mapa. Tásiha, máichavacapa ena máimitureana:

—Ésamiricachucha ena amuyana, náitecaichaha eta nuyehé. Vahi eucacichepaica éna. Taicha ena nuchanerana nuti Cristo nacutiyahehi ena nani amuyana eta nasuapajiraiva éna. ¹⁵ Nutupiruva numetacahe: Nácani vahi nácutihini ena amuyana eta nasuapajiraiva, vahi nuchanerana mahi —macahepa.

¹⁶ Tacahe, majupacavacapa ena amuyana. Máemamasicavarepa, mayujarauchavacapa.

*Ena achane rico téchajiricava mayehé ema Jesús
(Mt 19.16-30; Lc 18.18-30)*

¹⁷ Tiuri, te apanapa sache, tiyananavarepa. Eta napaisirapahi, macahepaipa ema émana achane. Tijunapaipahi. Matupiruvu máepuyumiraucha te mamirahu ema Jesús. Mayaserecapa, áni pa maicha:

—Tata maestro, piti piúriquene ¿Tájahapucaini eta nícharacavahini eta nítujsiravaina me Viya máichecuaraquirénahini eta nítaresira? —máichapa.

¹⁸ Ena Jesús majicapapa:

—¿Tájaha tacayema pími jarechanu “Piti piúriquene”? Mararihi ema Viya. Jéhevare éma, tétavacavahi eta máurivahi. ¹⁹ Téhesera te pivarahapuca pecha eta apana vítaresira, písuapayarehi eta mavanairipiana ema Viya. Píti pímatipa eta júcana: “Vahi picucapareca. Váhivare picuveha esu esena apayena. Váhivare picuamereca. Nacuija pépiyaécueneruina. Váhivare picuvayureca. Pipicauyareva ena ticachichaviana” —máichapa.

²⁰ Tacahe, majicapapa ema achane:

—Tata, tamutu eta juca vanairipiana nusuapahi nítauchahi eta námaperuvahi, puíticha juca ajairairanuipa —macahepa.

²¹ Tacahe, ema Jesús máimararacapa ema achane, máemunacainehi. Tásiha, máichapa:

—Jucarihichaha eta pítauchaquene yare. Piyana, píjararecaya tamutu eta pímahaque neana. Tásiha, píjaracavacapa ena páureana. Jéhevare eta, píjacapayare eta pímahaque neyare te anuma, táitsivayare. Te tamutupa eta juca, pítecanepa péhicanu —máichapa ema Jesús.

²² Tásiha, témahasamurerinehi ema achane taicha eta macayemaquenehi ema Jesús. Ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanachucha.

²³ Tacahe, máesenica pa ema Jesús ena máimitureana natiarihiqueneanahi te machacaya. Tacahe, máichavacapa:

—Yátupi quenehi máitujiana eta nájarasiravainahini eta náehisiranuinahini ena rícoana eta nasiapirainahini te anuma —máichapa.

²⁴ Ena máimitureana náramine eta nasamirahi eta máechajiriruvana. Tásiha, mápechavacapa máicha:

—Nuchichanaveana, esamanu. ¡Máitujiquenehi eta nájarasiravainahini téhicanuana ena ticasíhanahi eta nacaimahaquenerahi! ²⁵ Eta juca tímicuti jiricavahi eta vipera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

²⁶ Tásiha, náramine ena máimitureana, eta nasamirahi eta juca. Náichapa:

—¡Tétavacavahi eta tamaitujicacarevahi! ¡Nájina títu jicavaimahi náuchucuhahini!

²⁷ Tacahe, máimararacavacapa ena máimitureana. Tásiha, máichavacapa:

—Nájina émanaina achane émajivainahini ticuchucuhava. Émasera ema Viya, macarichu marataha ticuchucureca. Taicha tájina máemejerachaquenehahini ema Viya, tamutu marataha —máichapa.

²⁸ Tacahe, máichapa ema Pedro:

—Vítisera, Tata, vinaquicahi tamutu eta vicayehequeneana, vivarairahi véhicavi —máichapa.

²⁹ Ena Jesús majicapavarepa:

—Nutupiruvu numetacahe: Namutu nácani nanaquicahi eta napena, najunijichavare ena ticachichana*, ena napanaveana, ena nachichanaveana; étapa eta nayehe apaquehe, te nanaquicahi táichavenehi eta náehisiranuhi, étapa eta námirayare eta tíurina echajirirucava; ³⁰ tíapajucavainapa camuripanayare ena napanaveanayare ajairana, esenana, énapa ena náenaveanayare, énapa ena nachichanaveanayare. Camuripanayareva eta náitsiriravayare. Ticaticacareanayaresera nayehe ena apamuriana

* **10:29** Te jácani apanana versiónéana, tatiarihi te juca lista eta táechajiriruvu: “ena nayenana”. Tájinasera nalistanahini te libro antivupani. Eta tacahehi, vímatiequeneha vahi manacahini ema Marcos. Mácani apana achane mavejuchahipuca te Lucas 18.29.

achaneana. Énerichuvare nįjaracavacaya eta nápechiravayare títarecana. Máichecuarauirenapa eta náuricacarevanayare. ³¹ Maverahesera eti etiarhiqueneanahi puiti, váhirichuhi ecapicahuhini. Te jena sáchezare, ichapepanainapa eta ecapicahuiraya. Éna puiti ticapichuanahi, te tátauchavapa te jena sáchezare, énapavainapa téquenehanayare —máichavacapa ema Jesús.

Éma Jesús tíápechavavare máechajisihá eta máepenirayarehi
(Mt 20.17-19; Lc 18.31-34)

³² Te apanavarepa sache, tiyananavarepa tipaicana. Nacaijuhepa eta te Jerusalén. Tínapucapaipa ema Jesús te namirahu ena máimitureana. Náramipaipahi éna. Natiarhivare ena tipicanapaipahi. Tacahe, ema Jesús mañajichamuripa macaetavajimurihavarepa ena dóceana apóstoleana. Mametacavacapa eta jácani máichararacavayarehi éma. ³³ Máichapa:

—Ímaha puiti, viyanainapaipa vicaijuhezare eta Jerusalén. Ánaqui nucaįjararecasiyare nuti Manerejirunuhi ema Viya. Ticaratacuanayare ena tuparairucana. Tímicapacuanayarehi, taicha tíjararecanuanayare nayehe ena suntaruana romanoana. Éna, nájina najapanuquenéna. ³⁴ Ticaecahinuanayare. Tíátutuquichanuanayareva. Téstacuanayareva. Tásiha, ticapacuanainapa. Tásihasera, te mapanaquenénapa sache néchepucainapa te nécari —máichavacapa.

Éma Jacobo émapa ema Juan nayaseacapa ema Jesús eta macájupahávachini éna
(Mt 20.20-28)

³⁵ Tacahe, te apanapa sache, témeñahavanapa ema Jesús ena apinana ticaparapecacana ema Jacobo émapa ema Juan. Náichapa:

—Tata maestro, vivaraha picatajicahavihini eta viyasearuviyare —nacahepa.

³⁶ —¿Tájaha ecamunu? —máichapa ema Jesús.

³⁷ Najicapapa éna:

—Te jena sáchezare te péjacapa te piávacurezare aquenucavirayare, vivaraha picaejacahavivareni te pichacaya, pijupahahavinahini, véjacaini te pivare, ema émana te sapa —náichapa.

³⁸ Tacahe, majicapapa ema Jesús:

—Éti, vahi ímati tájahapuca eta nátajivayare nácani nupujanayare. ¿Eratahayarepuca ecamicha eta íchavaquenevayare ecataįvairayare, te ecutinuyarepuca eta nucamichirayare nůti? ¿Váhivarepuca epicayare ticapacaheana tacuti eta nacapasiránuyare nůti? —máichapa.

³⁹ Éna najicapapa:

—Viratahayare vicamicha. Váhivare vipicaimahi.

Tásiha, máichavacapa:

—Yátupi ichape eta ecataįvairaya, viciticacaya eta nacapasirahaviyare. ⁴⁰ Étapasera eta nucaejasiraya ena nupujanayare, vaipa nútimahí necha. Éma Tata Nucaįyaquene, émahí tinerejicayarehi éna nupujanayare —máichapa.

⁴¹ Tacahe, te náechapa ena apamuriana apóstoleana, tisemamajuheanapa nayehe ena apinana. ⁴² Tásiha, máichuhamuripa namutu. Máichavacapa:

—Écharichuhi éti ena aquenucana tayehe eta avasare, muraca eta nacavanairipira. Énaripa ena tuparairucana, tétavacavahi tisuapacareanahi eta nacavacurerahi. ⁴³ Váhiserá ecucahe éti nayehe ena echamuriana. Mácani tímerecavahi ticapicahupana, tacamunuhi máitátivacayare ena apamuriana. ⁴⁴ Te etiarhivarepuca éti evarahahi ínapuca, tacamunuhi ímerecavayare navanaraheyare ena echamuriana. ⁴⁵ Ecutinuyare nuti Manerejirunuhi ema Viya. Vahi étaina tímitecanu nucaítaticasihini. Nůtiyarehi nútítihe éti. Énerichuvare nįjaracavayarehi nímicapacava íchaveneyarehi éti camuríqueneanaya nucuchucureanayare —máichavacapa.

Éma Jesús macaimairirica ema púchuqui ticaijare Bartimeo
(Mt 20.29-34; Lc 18.35-43)

⁴⁶ Tiuri, títecapanapa eta te avasare Jericó. Te apanapa sache tiyananavarepa. Náehicapapa ena camuríqueneana achaneana. Te achenechacaya, matiarihini ema achane púchuqui. Ticaijare Bartimeo, machicha ema Timoteo. Téjacahi tiyaseserechahi limosna.

⁴⁷ Te masamapa eta mánuquirapahi ema Jesús Nazareno, típiaracapa. Ánipa macahe:

—¡Tátachicha Jesús! ¡Pítiqueneripa yátupiquenévi Cristo! ¡Picataįcanupaini pájapanunuñi!

⁴⁸ Tacahe, nacavacapa camuriana ena natiarhiqueneanahi. Náichapa:

—Pámatina. Vaipa picupiaraca —náichapa.

Émasera típiaracaichucha:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuiní! —macahepa.

⁴⁹ Tacahe, tíche paicapa titupihapa ema Jesús. Máichapa:

—Íchuha ema mara.

Tacahe, náichuhapa ema púchuqui. Náichapa:

—¡Pétumechava! Péche puca, taicha tíchuhavipa ema Jesús —náichapa.

⁵⁰ Eta mananesirahi ema púchuqui, macamiricapa eta máepacuha. Téche puca, tiyanapa mapauchahi ema Jesús. ⁵¹ Tacahe, mayaserecapa ema Jesús ema púchuqui. Ánipa máicha:

—¿Tájaha picamunu nuyehé?

Majicapapa éma:

—Tátachicha, nuvaraha picaimairicanupaini —macahepa ema púchuqui.

⁵² Tacahe, máichapa ema Jesús:

—Tiuri, nuchicha. Táichavenehi eta picasiñairanuhi, pinaracapa puiti. Tiúrinapa eta piyaniraya pipaisiraya —máichapa.

Enurujirinehi tímairirica. Tacahe, máehicapa macachanepaipa ema Jesús eta mapaisirapahi te achene.

11

Títecapapa ema Jesús eta te Jerusalén

(Mt 21.1-11; Lc 19.28-40; Jn 12.12-19)

¹ Tacahe, te apanapa semana tiyananavarepa. Tétavajicanaya tayehe eta avasarechichana ticaijare Betfagé étapa eta Betania, te tachacaya eta cerro ticaijarehi Olivoquiji. Tiánehianapa eta te Jerusalén. Ánaqui, ema Jesús mavanecapa ena apinana máimitureana.

² Ánipa máicha:

—Eyanayare eta te jena avasarechicha Betfagé. Te itecapapa ánaqui, ímahayare ticaitihahi eta burrico. Eta jena sárare mávaequehéchaha. Nájinaichaha ticaperainahi. Evejapuacayare, íáminanuyare eta ani. ³ Te natiarihinapuca náeflama, emetacayare eta nucamunuirahi níti. Vahi táyeréimahi vímichavavaneyare —máichavacapa.

⁴ Tacahe, tiyananapa ena vanairucanahi. Jéhesare, nachimapapa eta burrico. Ticaitihahi eta te calle te tapajachacaya eta peti. Tacahe, navejapuacapa. ⁵ Náichapasera ena ticayehéana:

—¿Tájaha tacayema íamayare eta viyehé burrico?

⁶ Tacahe, najicapapa éna, nametacapa eta máimiturapíhi ema Jesús. Tásiha, náisapapa eta námirahi eta burrico. ⁷ Tacahe, te títécapanapa te mávihahi ema Jesús, náepacamaequechapa eta náepacuhana. Tásiha, ticaperapa ema Jesús. ⁸ Tacahe, tiúrujicavanapaipa ena achaneana. Camuriana éna tiácapanahi, náepacapaicapaipa eta namuirihana eta te mayanihayarepahi éma. Ena apamuriana navehapa eta cáchipaca. Nanacavare te achene. ⁹ Ena títapumiráuchanapaipahi énapa ena téquenehanapahi, namutu típiaracanapaipa. Ánipa nacahe:

¹⁰ —¡Yare, Tata! ¡Píti yátupiquenévihi Cristo, réyvihi viyehé! ¡Asulupaya! ¡Vanairucaque-névihi píti me Vía! ¡Ichape eta vicunachiravi píti! ¡Asulupaya me Vía te anuma! ¡Viva ema Viáquenu! ¡Viva! —nacahepa.

¹¹ Tacahehi eta máitecapirahi ema Jesús eta te Jerusalén. Matupirupa tiyanahi te Templo. Te tamutupa máimahahi, tiyanapa tichava te Betania, namutupaichu ena dóceana apóstoleana, taicha cáperehichicharipa.

Ema Jesús májiquiha eta yucuqui ticaijare higo taicha máhiquirehi

(Mt 21.18-19)

¹² Te apanavarepa sache, te yáticarahi, tichavanavare te Jerusalén. Eta najunijsirahi eta Betania, técuhaipahi ema Jesús. ¹³ Eta máimairahi tiyerehi eta étana yucuqui ticaijare higo. Ticainapucavahi ticápácaji. Tacahe, ema Jesús tiyanapa máimahapana te ticahihipuca. Téhesera te máitecapauchapa, máimahainehi tájina táhinahini. Tacarichuhi eta tapacajiana, taicha vúichaha tacahirainahini. ¹⁴ Tacahe, máichapa ema Jesús eta higo:

—¡Píti pépiainapa eta máhiquireviyare! —macahepa.

Nasamararacahi ena máimitureana.

Ema Jesús macuchuchujicavaca ena tjararecanahi eta sárareana, cáyureana te tajuhe eta Templo

(Mt 21.12-17; Lc 19.45-48; Jn 2.13-22)

¹⁵ Tacahe, te títécapanapa te Jerusalén, tiyananavarepa eta te Templo. Máimaharinehi ema Jesús ena achaneana tjararecanahi eta sárareana, cáyureana. Ena apamuriana tivacharecanahi. Natiarihivare ena títsiriperecarahiana eta taplataneana eta apanapane avasareana. Tásiha, macuchuchujicapa namutu. Máequehepuichinavacapaipa eta namesarana

étapa eta nasiyana. ¹⁶ Nájnavare máisapaquenénahini eta nánucuhahini eta canchón tayehe eta Templo, námaphini jácani eta nájararuanahi. ¹⁷ Tásiha, máimitucavacapa ena natiari-hiqueneanahi. Ánipa máicha:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihí eta nayujarasirareya ena achaneana tíasihana te tamutu avasareana” macahepa. Étiserá eti tíamerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichapa.

¹⁸ Ena ticitianacanáhi ema Jesús, te nasamairicapa eta juca máechajiriruvanahi, tise-manapa. Tásiha, natanucapa eta jácani náicharasirayare eta náimicapasirayarehi éma. Taicha napicarinehi éma, taicha náimahahi tétavicavahi eta masuapacarevahi eta nayehe ena achaneana.

¹⁹ Tacahe, te cáperehichicharinehi, tiyanavarepa ema Jesús, tiúchuca eta te Jerusalén.

Tiájiriquipa eta yucuqui higo

(Mt 21.20-22)

²⁰ Tacahe, te yáticarahipa, eta nachaviravarepa eta te Jerusalén, náetavicapaipahivare eta yucuqui higo. Náimahainehi tiájiriquipahi éta. ²¹ Tacahe, téchavapa ema Pedro eta máechajiriruvanahi ema Jesús cape sache. Tásiha, máichapa:

—¡Pímaha, tata! ¡Tiájiriquipa eta higo eta pévajiriaruhi!

²² Majicapapa ema Jesús:

—Ácasiñava yátupina eta me Viya. ²³ Jéhesare, éti apana esamacareyareva, te yátupina eta écasiñavairaina eta me Viya. Tájina émaitucaimahí. Eratahayareva ecayejece eta cerro te apachacaya, tájina iávamirahuimahi te esamureana.

²⁴ Tacahe, numetacahe eta juca: Te eyaseacupuca ema Viya eta jácani, ecasiñava mayehe. Vahi ecueñamava eta ejacapirayare. Tásiha, tíjaracahéna éma tamutu eta eyasearuanaya.

²⁵ Énerichuvare, eta eyujarasiraina, eperdonacha éti nácani náječapavaquenehi eta eyehe. Eperdonachavaca apaesa maperdonachahevare eta tijeconpiravana ema Tata Ecaiyaquene te anuma. ²⁶ Téhesera vahi eperdonachahi, váhivare tíjerdonachahemahi eta éječapiravana ema Tata Ecaiyaquene te anuma —macahepa ema Jesús.

Nayasereca ema Jesús nájahhipuca tituparacahi éma

(Mt 21.23-27; Lc 20.1-8)

²⁷ Tiuri, titecapanavarepa eta te Jerusalén. Natupiruvarepa tiyanana te Templo. Te mapairirijuecharipa ema Jesús eta Templo, napauchapa ena ticitianacanáhi éma.

²⁸ Nayaserecapa éma, ánipa naicha:

—Píti, vahi vitupararuvinahini víti eta píchirahi eta júcana. ¿Nájahasica tímitucavíhi? ¿Nájaha tituparacavianahi eta juca píchaqueneanahi? —náichapa.

²⁹ Tacahe, majicapapa éma:

—Núti apanava nuvaraha nuyaserecahe. Ejicapanuyaresera apaesa numetacahe eta nucatuparahairahi eta nichirahi eta júcana. ³⁰ ¿Nájahapuca tivanecahi ema Juan eta máitesirahi máicachasirirayare? ¿Émapuca ema Viya tivanecahi, émajivahipuca eta máitesirahi? Ejicapanu —máichavacapa.

³¹ Váhisera náituruequenehahini eta najicapirayarehi. Tiácapaemajiricacanapa, ánipa nacahe:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, ema macahénapapuca: “Tásiha, ¿váhiyapa esuapahini éma?”

³² Váhivare táurica víchahini: “Émajivaichucha eta máitesirahi”. ¿Tájahapuca vicayemayare eta vijicapirayare? —náechajiricacapa.

Nacahehi éna, taicha napicaracahi eta jácani náicharasirahipuca ena apamuriana achaneana, taicha namutuhi náimijachahi ema Juan profetaquenehi yátupiquene mavaneruhi ema Viya. ³³ Tacahe, najicapapa ema Jesús:

—Vahi vecha víti —nacahepa.

Ema Jesús máichavarepa:

—Énerichuvare núti, vahi numetacahemahi nájahapuca ema tituparacanuhi —máichavacapa.

12

Ema Jesús máimicutichina ena pártirárioana máurirahana

(Mt 21.33-46; Lc 20.9-19)

¹ Tacahe, tépanavavarepa tímitureca eta juca máimicutichaquenehi. Ánipa macahe:

—Matarihi ema achane. Camuri eta máevaru uva te máesane, manaruacahivare eta mascure. Máepiyacavarepa eta naticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Taicha tiyanayarehi ema achane te apana avasare. ²Tacahe, te tiyahapa eta uva, máimivanerecapa ema mamusura mayaseapanavacayarehi ena pártirárioanahi eta tatucachaqueneyarehi éma. ³Énaser ena pártirárioana tiseauchavanarichucha. Nacaratacapa náehapa ema vanairucahi. Tichavapa éma, tájina náijarachahini. ⁴Tacahe, tiápechavavare mavaneca ema apana mamusura. Váhivare nasuapahini éma. Natupisicapa eta te márijahiana, najarasicapa. Náumehavarepa éma vanairucahi. ⁵Tacahe, ema achane mavanecavarepa ema apana mamusura. Tásiha, ena pártirárioana nacapacapa éma. Vuichasera masemahini ema achane. Ticayehehi paciencia. Máimivanerecapa ena apamuriana, camurianapa. Énerichuvare, tiápechavanapa náehavacavarepa. Nacapacavacapa ena apamuriana.

⁶Tacahe, matiarhihahasera ema apana mavaneruyare. Émajacaruvapa máevataca ema machicha máemunaruquenehi. Máimijachapahi émainahipucaini napicauchahini. ⁷Énaser ena pártirárioana, te náimahapa ema machicha ema achane, ánipa nacahe: “Émainapapuca ticayeheyare ema maca. Yare, vicapaca éma apanavare, apaesa tánasipa viyehe tamutu. Tájina máicharachavimahi ema achanenavaji” nacahepa. ⁸Tacahe, nacaratacapa ema machicha. Nacapacapa éma, náquijicapavarepa eta máquehe te aneca tayehe eta úvaquiji.

⁹Puiti, nuyaserecaheyare: ¿Tájahapuca máicharachavacayare ema achane ticayehe eta úvaquiji? Jéhesare, vaipa macayehehini paciencia. Títecavanénapa macapapanavacayarepa ena pártirárioanahi máurirahanahi. Tásiha, máijaracainavarepa eta úvaquiji ena apamuriana pártirárioanayareva.

¹⁰⁻¹¹Nuvaraha epanerechapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitcapa eta te táicuchihi eta tatuparahahi. Tacapicahuquenehi puiti. Táitusiava tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya — máichavacapa ema Jesús.

¹²Tacahe, ena ticatianacanahi ema Jesús, eta nasamirahi, tiseanmarinehi taicha tímatiacavanapa eta énaírahi tayunacavaca eta máimicutichiravacahi. Eta nasamirahi, tiseanmarinehi. Navarahapa nacaratacavarehíni. Típicacavanachuchasera nayehe ena achaneana, nacatiuchahini ema Jesús. Tacahe, najunijiacapa éma, tiyananapa natanuca eta táicharachavaya eta nacaratasirayare éma.

Navaraha náemejecapavacha ema Jesús tayehe eta impuesto
(Mt 22.15-22; Lc 20.20-26)

¹³Tacahe, ena ticatianacanahi ema Jesús navanecapa ena témejecapacachanayare apaesa étainahipucaini taviuchahini ema Jesús. Natiarihi ena tinerejicavanahi ena fariséoana. Natiarihivare ena políticoana. ¹⁴Te náitecapauchapa, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahi. Vahi pipicacacavahini eta péchajisihairahi eta náichavaquenevahi nácani achaneana, tayanapanepuca aquenucahi. Taicha pivaraha náehicahini namutu eta táurinaquene achene ticaijuhe me Viya. Vivarahahisera viyaseracaviyare eta pipaneruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machane-rahávihí ema Viya, ¿masi? —nacahepa.

¹⁵Máimativanehisera ema Jesús eta apimirairavacahi éna, navairahi ticaviureyarehi éma. Tásiha, ema máichavacapa:

—¿Tájaha tacayema evaraha ímiaquiapaicanu? Nímahaseji, iáinanu étapena eta reale — macahepa.

¹⁶Éna náijaracapa eta reale. Tásiha, máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador —nacahepa.

¹⁷Tacahe, máichavarepa:

—Tiuri. Táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

Te nasamapa ema Jesús eta majicapiravacahi, náramipa eta máitupajjiasiravahi.

Nayasereca ema Jesús náichararacavayarepuca ena náepenaqueneana eta náechepusirayare (Mt 22.23-33; Lc 20.27-40)

¹⁸ Nacahepaipavare ena apamuriana achaneana. Saducéonahi. Ena nani saducéona, apanahi eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Ánipa nacahe:

¹⁹ —Tata maestro, ema víyarahaini Moisés manaquicahi eta ajureca máechajiriruvahi eta viyehe: “Te máepenaquenehahipuca ema achane esu mayena, tásiha, nájinahipuca manaquiequeneruvainahini machichainahini, te matiarihihipuca mácani maparapehi, mavehayare esu machinenaqueneáni, apaesa émainapuca macachicha eta suyehe, máitsivainahini ema maparapeni”. ²⁰ Tacutiquene te natiarihipuca ena siétequeneana ticaparapejiricacana, te títauchavapa ema náechavimuri. Máepenaquenehapasera esu mayena. Nájinahi machichainahini. ²¹ Tacahe, ema maparape máitauchavare esu machinena. Énerichuvaresera máepenaquenehavare, nájinavare machichainahini. Ema émana maparape máitauchavare ésu. Énerichuvare máepenaquenehavare. ²² Namutu ena siétequeneana navehahi ésu, tásihasera náepenaquenehapaichucha, nájinaquene émaninahini mácachichahini eta suyehe. Te táequene, tépenapa esu esenaini. ²³ Tacahe puiti, te apanapuca eta náitaresirayare ena nani, ¿nájahapuca ena siétequeneana éma yátupiquenehi suímaquenehi esu esena, taicha ena siétequeneana namutuhi suímanarihi? — náichapa.

²⁴ Tásiha, ema Jesús majicapavacapa:

—Éjcapava éti. ¿Tájaha tacayema vahi evaraha ácaicutiarahini eta táimiturapi eta Sagrada Escritura? Váhivare evarahahini esuapahini eta tamutuirahi marataha ema Viya. ²⁵ Ánaqui te apana náitaresiraya, vaipa nácamunuimahi esu esena. Énaripa ena esenana váipavare nácamunuimahi ema ajaira. Nacutinapa ena ángeleana tiávihanahi te anuma eta vahi náitauchacacahini. ²⁶ Éti, váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruvana ema Viya májuchaqueneanahi ema víyarahaini Moisés. Te juca Sagrada Escritura, eta te libro ticajiare Éxodo, téchajicapa ema Viya. Ánipa macahe: “Nútira yátupiquenenuhi Viya, macasiñaquenehi ema Abraham, ema Isaác émapa ema Jacobo” macahepa ema Viya. ²⁷ Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripapuca. Eta náchanevana, tímiyanavanarichucha títareca te mamiraha éma. Éti, ichape eta éjcapiravahi —máichavacapa ema Jesús.

Eta tisuapacarepanahi te mavanairipiana ema Viya (Mt 22.34-40)

²⁸ Tacahe, matiarihihivare ema émana escribáno. Masamararacahi eta nacanarajirisi-racacahi. Máimativanepa eta táurivahi eta majicapirahi ema Jesús. Tásihasera, tíjaracavahi mayasereca ema Jesús, ánipa maicha:

—Tata, nuvaraha pimetcacuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

²⁹ Majicapapa ema Jesús:

—Eta máechajiriruva ema Viya te Sagrada Escritura, ani macahehi: “Esama, emutu eti achaneana israelítana. Nuti Viya, nucarichuhi nuti Iáquenu. Nacuija apanaina iáquenuina esiñarajina. ³⁰ Tásiha, yátupina eta émunasiranuina nuti Iáquenu, táunasiraina te esamureana. Yátupina eta ecachanevairanuina nútí. Epanerecha eta nimiturapiana tamutu sácheana, yátiana. Yátupina eta ecaemataneasiranu te tamutu eta ítupajijiasiravana”. ³¹ Jararihivare eta apana táehiruhi eta juca, ánivare tacahe: “Pémunacayare ema piparaepiyahi, tacuti eta pémunasiravahi píti”. Eta juca apinaquene vanairipi, tacachurica eta tisuapacareva tamutu eta apamuriana vanairipiana —macahepa ema Jesús.

³² Tacahe, máichapa ema escribáno:

—Yátupiquene, tata maestro, tétupicavahi eta péchajiriruva. Yátupihí eta macarichuirahi ema Viáquenu, eta nájinairahi apanainahini Viáquenuinahini. ³³ Yátupihivare tavaraha eta vémunasiraina ema Viáquenu, étapa eta víunasirayare te visamure, étapa eta vipanerechiraina eta máimiturapiana tamutu sácheana, étapa eta vícaemataneasiraina éma te tamutu eta vítupajijiasiravana, étapa eta vémunasiraina ema viparaepiyahi. Jéhesare, eta táuriva eta vémunasirahi táetavichahi eta táuriva eta víjaracasichira eta sárareana eta víjuchaqueneana eta me Viya. Táetavichavare tayehe eta táuriva tamutu eta apamuriana víámavahuana eta me Viya —máichapa ema escribáno.

³⁴ Ema Jesús máimatiquenehapa eta táuriva eta majicapira ema achane. Tásiha, máichapa: —Píti piánehi eta píjarasiravaina eta péhisirayare ema Viya —máichapa.

Tacahe, nájinapa nájaracavahini nayaserechahini ema Jesús eta náemejecapavachirayaherehi éma.

Éma Cristo, yátupihí mámaríequenénihí ema rey David, Víyahivare éma (Mt 22.41-46; Lc 20.41-44)

³⁵ Tacahe, ema Jesús tímiyanava tímiturecahi, eta máejasirahi eta te Templo. Ánipa macahe: —Ena escribánoana, ani tacahehi eta náimiturapiána: “Tiúchucayare ema Cristo, mámaríequeneyare ema víyarahaini rey David” nacahehi. ³⁶ Yátupihí ema Cristo achanequenehi eta máimahi taicha mámaríequenénihí ema víyarahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: “Ema Viya máichapa ema Tata Náquenu Cristo: Yare péjaca te nuvaure, eta picuchapíhayare eta nucaeputyusiraya te pímirahu ena ticatianacavianahi” macahepa. ³⁷ Ema David, eta máimijarechirahi ema Cristo, “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

Ena camuríqueneana achaneana náuricahi eta nasamararaca eta máimiturapiána ema Jesús.

Éma Jesús máimerechavaca eta nájejecapiravana ena escribánoana (Mt 23.1-36; Lc 11.37-54; 20.45-47)

³⁸ Tímiyanavahi eta máimituresirahi ema Jesús, ánipa macahe: —Échapavayare éti, machu éhica eta nayeherepiana ena escribánoana taicha tétavíjavahi eta apimiranairahi éna. Tétavíjavahi eta náurisirahi éna tíumajihána, navarairahi ticunachacareanayarehi nayehe ena achaneana eta nareligíosoanahi. Navarahavare ticapíchahuayarehi eta náechajisiraya ena achaneana te jácani nácapajisihapahi éna. ³⁹ Tacutiquene tinerejiurucavana eta táurinaqueneana téjasihacareana, te tiyanana te víurujisirarevana. Étaripa te nanisirana, ticaejacavanavare te jácani tíávihanahi eta tíurínisipana tinicacare. ⁴⁰ Tacutiquene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religíosoanahi, tíupiemána eta nayujarasira, namavarairahi tácaeherahini eta náichiraqueneanahi eta tamauríqueneana. Énasera tíapajucavanahi eta náicuñayayare muraca —macahepa ema Jesús.

Eta sunaquiruva esu máimaru tacachuricahi eta nanaquiruvana ena apamuriana achaneana

(Lc 21.1-4)

⁴¹ Eta máejasihahi ema Jesús, máviahahi te tamirahu eta chapamana eta nanacacuirarehi eta plata námavahuana ena achaneana. Máimamaraca ena camuríqueneana eta nanacacuirá eta námavahuana. Natiaríhíhi ena rícoana, tinaquicavanapahi eta ichapemuripanavaca. ⁴² Tacahe, títecapapa esu esena suépenaimaquene, páurehi ésu. Sunaquicahi eta apípechichahi eta suplatane, váhirichu tasivachahini. ⁴³ Tásiha, ema Jesús, eta máimairahi eta juca, máichuhamuripa ena máimitureana. Ánipa maicha:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepanávahi eta sunaquiruva, sucachuricavacahi namutu ena apamuriana achaneana. Ichaperínehí eta sucunachacarevahi me Viya. ⁴⁴ Taicha namutu éna, tacarichu nanaquicahi eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunícavachayahíní —máichapa.

13

Éma Jesús máimereucharipa eta táquipaisiravaya eta Templo (Mt 24.1-2; Lc 21.5-6)

¹ Tacahe, tiyanayarehini ema Jesús, énapa ena máimitureana. Eta náuchusiraya tayehe eta Templo, máichapa ema émana máimiture:

—¡Tata maestro! ¡Pímaha eta juca máriana! ¡Tétavíjava eta táichapeval! ¡Tétavíjava táurinava eta juca petí! —macahepa.

² Ema Jesús májicapapa:

—Tamapurujiyare eta juca táurinava eta pétisami ímahaquenehi puití. Nutupiruva numetacahe: Járájapayare eta sáchezare ticaquípaicasiyare tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneanahi puití —máichapa.

Tatiaríhiyare eta ecutiarareanaya te tánehipaicha eta táichecuraya (Mt 24.3-28; Lc 21.7-24; 17.22-24)

³ Tacahe, tiyananapa eta te cerro ticaijare Olivoquíj, táviahahi te apacharahi eta te tatavarapíhi te tamirahuhí eta Templo. Te téjacanapa nacarichuhí eta te jena quinta,

nayaserecapa eta macayemaquenehi. Matiaríhi ema Pedro, émapa ema Jacobo, émapa ema Juan, émapa ema Andrés. Ánipa náicha:

⁴—Vivaraha pimetacahavi. ¿Tájamuhupuca eta náimiauipaisirayare eta Témposami? ¿Jararihiyarepuca eta ecutiarareyare te tánehipaicha eta táitachiravayare eta apana péchajisihaqueneana? —náichapa.

⁵Tacahe, majicapapa ema Jesús:

—Ecuneuchavaicha yátupina, machu navayuacahe, taicha nárajapayare eta tépiyacavanayarepahi tímivasichavanayare nuyehe. ⁶Nacaheyarepahi éna: “Nútiripa Cristo”. Nasapiha, navayuacayare ena camuriana achaneana.

⁷⁻⁸Énerichuvare esamairicayare eta táehacacairayare eta ichapequeneana avasareana. Ticanarajiricanainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhisera ecurameca eta esamairirisiraya, taicha ene tacheayare eta táepaniravayare eta ecutiarareanayare. Vuichahasera étaimahi eta táichecurayare. Énerichuvare tatiarihiyareva eta ichape tayamurisirana ya eta apaquehe te jácani távihanaya táitupiaruanayare. Tatiarihiyareva eta ichape ecuhamuhuyareva te jácani avasareana. Ichape eta nacatajivairayare ena achaneana. Tamutu eta juca ecutiarareanayare eta táepaniravayare eta nátajivanayare ena achaneana.

⁹Tásihasera eti nuchaneranahi, ecuneuchavayare, étumechavayare. Taicha natiarihiyare ena ticatianacaheanayare táichavenehi eta éhisiranuhi. Ticaratacaheanainapa, ecayaseserehinapa nayeha ena juéseana. Téstaacaheanainapava eta te náurujisirarevana. Tásiha, etiarihiyare éti táimaheanaya te namirahu ena aquenucana, téhevere te namirahu ena Presidenteana gobiernonahí, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare. ¹⁰Énerichuvare, éti nuchanerana ecametairiureva eta tíurina echajirirucava nayeha ena achaneana tayehe tamutu avasareana te juca apaquehe. Te ítecapapa te tamutu, tépanavayarehi eta táichecurayare. ¹¹Tacahe, te jácani nacaratacahepupuca, námahe te namirahu ena aquenucana, vahi ecueñamava tayehe eta jácani échajiuichiravayare, ecatiuchiravaya. Échajisihaya eta échajirirucavana májjararuheyare ema Espíritu Santo te jena sache. Taicha máimahaheinapa. Tíjaracaheyare eta ítusirayare échajica. Vahi étijivaimahi eta échajisiraya.

¹²Natiarihiyareva nácani achaneana tíjararecanaya ena naparapequeneana, navarairahi náimicapaca táichavenénahi eta náehisiranuhi nútí. Natiarihiyareva ena nácani náiyana, navarahayareva nájarareca ena nachichanaveana táichevenehi eta náehisiranuhi nútí. Natiarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi nútí. ¹³Namutuyaréni ena achaneana ticatianacaheanayare táichavenénahi eta éhisiranuhi. Téhesera ecamichahi tamutu, ímyinavahi eta éhisiranuhi te táitavapa tamutu, nútí nucuchucuhaecame.

¹⁴Numetacahevanevare eta apana. Járabajapayare eta sache táíñehiqueneyare. Tímerecavayare ema achane váinarajiquene. Mavanecayare ena machanerana náechipejisirayare eta tacapicahuquenehi Templo, nacuchucavacayare eta téhicanahi ema Viya. (Nácani navaraha nacaicutiara eta juca, tacamunuhi ticaravahuyare eta májurehi ema víyarahaini profetaini Daniel.) Tásiha te ímahapa eta juca, esamairicapuca, táuricapa étátájipa ejunavane, eti etiarihiqueneanahi te Judea. Ecaijuheyare eta te cérroana, étaina eyumurusiavaina. ¹⁵Nácani távihanahi te nayeha canchón te nasamairicapuca eta juca téchacarehi, táuricapa najunavane. Vaipa táuricahini nasiapanumahi te napenana, navehahini jácani náeñamaqueneanainihi. ¹⁶Nácani tachimararuanayare te vamáhi eta téchacarehi, táuricapa vaipa nacuchava tayehe eta avasare, tayanapane náeñamahi ena nayereruvana. ¹⁷¡Páureanasami nácani esenana tachimararuanayare nácani ticajarianahipuca, nácani esenana ticachichanahi eta amuya tájicachaha! ¹⁸Eta tacahe, eyaseacayare ema Viya tacuija táichejicahe; váhivare tacuchimaracahe eta ichape tiquiva te achene te eyanapapuca ejuna^{*}. ¹⁹Te jena sácheanayare, tétavacavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta máepiyasirahi ema Viya eta juca apaquehe. Te táequenenapa eta tíñehiyare, tájinainapa tácutimahi. ²⁰Nájina tacaitiruimahi eta nacatajivairayarehi ichape. Macaichecavaneyare ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejruana, majapanuqueneanahivare. Taicha te vahi macucaicheca ema Viya, máitamurihahipucaini macapajicavaca namutu ena achaneana ema maca achane.

²¹⁻²²Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa nútí. Natiarihivare ena tímicutijiricavanayare

* **13:18** Ema Jesús máechajisihahi eta ticasarahimuhu, tiquivamuhuvare te jena mávasa Judea taicha ticajeraequenehi eta napaisirahi.

profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánvare nacaheya: “Náepiyahiraivahi éna. Ema Cristo máviahahi te viávasa viti”. Étiserá vahi ecusuapavaca. Eta navarairahi tivayua-caheanaya eti machanerana ema Tata, náituruequenehayare naicha eta ichapequeneana tiáramicareana ecutiareanayare. Camurianasamiyare ena navayuaruanayare. ²³ Tásiha, ecuneuchavaya nayehe. Numetacahevanehi puiti apaesa écharipa —máichapa.

Eta machavirayare ema Manerejiruhi ema Viya

(Mt 24.29-35, 42-44; Lc 21.25-36)

²⁴ Máichavarepa ema Jesús:

—Te jena sácheanayare te táequenénapa eta jena nacatajivairayare ichape ena achaneana, eta sache témahainapa, étaripa eta caje váipavare tijarahimahi. ²⁵ Témiricanainavarepa eta jarairiquiana. Étaripa eta tiávihanahi te anuma vimaimahaqueneanahi, énerichuvare tiyamuricanainapa, tiyejejecavanainapa. ²⁶ Nupaenumavainapa níteca nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Tétavicavayare eta nujaravayarepahi, níñehinapaipa. ²⁷ Tacahe, nuvanecainapa ena ángeleana nacurujicayare namutu ena nuchanerana nunerejiruanahi, tiásihanayare te tamutu eta juca apaquehe te jácani náviahahi.

²⁸ Tiuri puiti, nuvaraha nímicutichinahe eta jácani yucuquí. Eta táitsivachiravavacapa eta tapacajiana, te ímahapa eta tajimuyairapa eta tatavaquí, tiúchucayarepa eta tapacajianaya arairu, tímaticarehi tiánehiripa eta únemuhuirayarepa. ²⁹ Ene tacahehi, te ímahayarepa tacaecherapa eta júcana ecutiareanaya, ímahayarepa eta tánehirainapa eta nuchavira. ³⁰ Numetacahevanecha: Vuíchaha tívanaimahi ena achaneana náitareruanaichaha te táitecapapa eta júcana ecutiareanayare. ³¹ Títavainapa eta anuma étpa eta apaquehe. Tativayaresera títauchava tamutu eta numetaruheanahi.

³² Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucaini néchahini. Macarichu ema Tata, éma téchahi.

³³ Eta tacahe, etsecavahi ecaunehivare éti, eyujarauchavayareva. Taicha vahi echa eta tájamuhuyarepuca eta nítesirayarepa. ³⁴⁻³⁶ Tamutu eta juca nímicutichinahe eta máichaquenehi ema mácani achane eta te tiyanayare tipairirica. Te tiyanayarépa, máijaracavaca namutu ena mamusurana eta náemataneana, matuparacavacapa eta najaneasirayarehi tamutu. Tacahe, matuparacavarepa ema tijanearecarahi eta tapaja, macuneyarehi eta jácani hora machavira ema máquenu, téhepuca timapicucuhipa, téhepuca enumuhu yati, téhepuca tijarahiyarepa, téhepuca yáticarahi. Ene ecaheyare éti. Ecauneya machu níjahúchava nítecapauchahe, machu nuchimaracahe ímacacaruhi. Taicha vahi échaimahi tájamuhupuca nítecapayare nuti láquenu. ³⁷ Eta juca numetaruheanahi puiti, nuvaraha emetacayarevare ena echamuriana, apaesa ecauneyare emutu —máichapa ema Jesús.

14

Napanerechaipahi ena tuparairucana eta nacaratasirayare ema Jesús

(Mt 26.1-5; Lc 22.1-2; Jn 11.45-53)

¹ Tacahe, apinarinecha sache eta piesta ticaijare Pascua, eta náepanavaira eta semana eta nanisirahi étachucha pan mayehere levadura. Tacahe, ena tuparairucana énapa ena escribánoana navarahaipaicha náimicapaca ema Jesús. Tásiha natanucahi eta táicharacavaya eta nacaratasirayare. Váhisera navaraha eta nanecapahini ena achaneana. ² Ánipa nacahe: —Vuíchaha vicucarataca éma achichu juca piéstairaya. Taicha camurianayarehi ena achaneana, machu tájahapuca náicharacahavi taicha navarahayarehi nacatiúcha éma. Vicuchapa nayanánuma —nacahepa.

Esu esena tiámasichahi ema Jesús te táijiyeamaquene perfume

(Mt 26.6-13; Jn 12.1-8)

³ Tacahe, ema Jesús tiyanapa tichava eta te avasarechicha Betania. Máichuhaquenehi eta mananisiraya mayehé ema achane ticaijare Simón ema leprosoinihi. Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Ticaijare nardo eta juca tíjiyema amairama. Táetaviuchahi eta tasivachavahi. Supauchapa ema Jesús. Suvechujihapa eta bótechicha, tásiha, suépusasicapa eta táijiyeamaquene perfume. ⁴ Natiarihisera ena váhiquene náurichahini eta suémepururesirahi eta tasivachaquene perfume, suámasichirahi ema Jesús. Ánipa nacahe:

⁵ —¿Tájaha tacayema suémepurureca eta juca tasivachaquenehi perfume? Tiúripanahini víjararechahini eta juca táijiyeamaquenehi. Vivehahini eta camuriquene plata, tásiha, vímicatashahini ena páureana. ¡Máechemarairahahi esu suca esena! —nacahepa.

⁶ Émasera ema Jesús máuricapa eta suíchaquenehi. Ánipa máicha:

—Ésamirica esu suca esena. ¿Tájaha tacayema ecaecahihi éti esu suca? Tétavicava eta táuriva eta suíchiranuhi. ⁷ Ena páureanasami, támutuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe. ⁸ Esu suca suíchahi eta suímíratáharuvahi. Eta juca suépusahasi-ranuhi eta juca perfume. Sucainapucahi ésu eta sújiyechirahi eta náquehe tayeheyarehi eta nucaecarasirayare. ⁹ Nutupiruva numetacahe: Nácani ticametairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechayare suyehe te tamutu avasareana te juca apaquehe —macahepa.

Eta máijaresirahi ema Júlasí ema Jesús
(Mt 26.14-16; Lc 22.3-6)

¹⁰ Tacahe, tiyanapa ema Júlasí, émarichuhi nachamuri ena dócequeneana apóstoleana. Ma-pauchapa ena tugarairucana, téchajiripanava eta máijaresirayare ema Jesús eta nayehe. ¹¹ Tacahe, tiúrisamureanarine ichape eta nasamirahi eta mavarairahi máijarecayare ema Jesús. Tásiha, nametacapa eta nájarasirayarehi eta plata. Tásiha, Jéhevarepa ema Júlasí matanucaipa eta máicharacayarehi eta máimicaratásirayarehi ema Jesús.

Ema Jesús máenimurihapa ena máimitureana
(Mt 26.17-29; Lc 22.7-13; Jn 13.21-30)

¹² Tacahe, títecapapa eta piesta Pascua, te tépanavahi eta semanahi nanicahi eta pan mayehere levadura. Étarichuhi eta sáche nacapasihahi eta uvesachicha naniruyarehi te yátipa. Ena máimitureana nayaserecapa ema Jesús:

—¿Táviha pivarahahi vácaijuhe eta vétupirisiava eta vinisirayare eta uvesachicha eta viyeherepi? —nacahepa.

¹³ Tacahe, mavanecapa ena apinana máimitureana. Máichavacapa:

—Eyana tayehe eta Jerusalén. Te ítecapayarepa tayehe, iácapajicayare ema émana achane tiámaphi eta une te yupi. Éhicayare éma. ¹⁴ Eta te peti masiapihayare, éti apana esiapayareva. Tásiha, emetacayare ema ticayehe eta peti, aní íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. ¹⁵ Tásiha, éma tímechahénapa eta ichape cuarto te anuquehe piso. Táuriquenépahi eta jácara téjasiyacareana, tacaetupirihiqueneripa. Tásiha, étupiricapa eta viniruyare eta ánaqui —máichapa ema Jesús.

¹⁶ Tacahe, tiyanapapa nacaijuhe te Jerusalén ena apinana vanairucana. Jéhesareinehi náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayehe eta Pascua.

¹⁷ Tacahe, te yátipa títecapapa ema Jesús macachanepaipa ena apamuriana apóstoleana.

¹⁸ Eta náejasiraripahi tinicanaripa, máichamuripa éna ema Jesús:

—Jéhesareinehi, te etaracu éti, mararihi ema émana tíjararecanuyare, émarichu tinicahi nucachanehi —máichapa.

¹⁹ Tacahe, ichaperinehi eta máimipaneresiravacahi éna eta juca máichiravacahi. Nayaserecapa ena émanapachu, ánipa náicha:

—¿Nútichupuca jácani? —macahepa ema émana.

—¿Nútichupuca? —macahevarepa ema apana.

²⁰ Tacahe, majicapapa ema Jesús:

—Ema émana te etaracu éti dócequeneana. Mácani néniruyare eta pan néchípaiejiruhi te juca nucuruja, émara ema tíjararecanuyare. ²¹ Nuti Manerejirunuhi ema Viya, étapaichuhi eta nacapasiranuyarehi, títauchavayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! ¡Muracayare eta máicuñayare! ¡Tiúripánaichuhini te vahi macuchuhini te sujuhe esu máena! —macahepa.

Ema Jesús máimerechahi eta macaejasiraya eta arairu matratune ema Maiya
(Mt 26.26-29; Lc 22.14-20; 1 Co 11.23-26)

²² Tacahe, eta nanisirahi, mavehapa eta pan ema Jesús. Mahasulupayachapa ema Viya. Mayuvetucapa májaracavacapa ena máimitureana. Tacahe, máichavacapa:

—Eta juca néche. Enica —macahepa.

²³ Tacahe, mavehavarepa eta vasu náerirare, mahasulupayachavarepa ema Viya. Tásiha, májaracavarepa ena máimitureana. ²⁴ Te náerapaipahi, máichavacapa:

—Eta juca eta nítine. Éta táepusairuvayare étarichuvare táicutiarayare eta nufirmachiraheyare eta arairu matratune ema Vicaiyaquene, nucaejasirayareva eta matratune apaesa eacacacare mayehe, ichapemurivayarepahi éti. ²⁵ Jéhesaréinehisera, numetacahe: Vaipa nápechaváimahi nérhivaréni eta juca tachí eta uva, tiámainucava te táitauchavapa eta

nusiapiraya eta nucavacureiraya, nucajupahairaya ema Tata Nucaiyaquene. Te jena sache, nijaracaheya vérainapa eta aramaruama —máichapa.

Emá Jesús máimereucha ema Pedro tépiyacavayare vahi máimati ema Jesús
(Mt 26.30-35; Lc 22.31-34; Jn 13.36-38)

²⁶ Eta náitanesirapa, tijiranapa eta jirasare eta nahasulupayachirahi ema Viya. Te títapiricanapa, tiúchucanapa, nacaijuhepa eta te huerta Getsemaní tiávihihi eta táemiripaisinehi eta cerro ticaijare Olivoquiji. ²⁷ Eta napaisirapahi, máichavacapa ema Jesús:

—Púiti juca yati ejunijicanuyare emutu éti, taicha epicayare eta náichasiranuyarehi. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor; nacapasirayaresami. Tásiha, tijunarcanaanapa eta uvesana macurujiruanainihi” macahepa. ²⁸ Téhesera te néchepucapa te nécari, nínapucainapa nuyainapa te Galilea. Ánaqui nuchupiaheya éti —máichapa ema Jesús.

²⁹ Émasera ema Pedro máichapa:

—Tayanapane, Tata, najunijicavipuca ena apamuriana, nütisera vahi nujunijicavimahi —máichapa.

³⁰ Ema Jesús máichavarepa:

—Nutupiruva numetacavi pítisami Pedro: Púiti juca yati, te apíhénapa eta táechajisirayare eta varayu, mapahe eta pépiyasiravayare vahi pímatinu —máichapa.

³¹ Ema Pedro tijaranurusi eta majicapirahi. Ánipa macahe:

—Tayanapanepuca pímicapacanu, váhiquenesera népiyacavaimahi vahi nímativi, váhivare nínajiacavimahi —máichapa.

Étarichuhivare tacahehi eta náechajiriruvahi ena apamuriana máimitureana.

Emá Jesús tiyujaraca te Getsemaní
(Mt 26.36-46; Lc 22.39-46)

³² Tacahe, títecapanapa eta te quinta Getsemaní. Tacahe, máichamuripa ena máimitureana: —Éjacaichaha eta ani te juca. Ecuchapanuchaha. Núti nuyujarapanayare —máichapa.

³³ Tacahe, mámapa ánaquipana ema Pedro, émapa ema Jacobo, émapa ema Juan. Tépanavapa téñamava eta masamure, taicha muraca eta máichavaquenévyarehi. ³⁴ Tacahe, máichavacapa éna:

—Tétavicava eta táeñamirava muraca eta nusamure. Tavaraha ticapacanu. Ánasichaha ani te juca. Váhisera ecuimaca. Ecunechanuhi —máichavacapa.

³⁵⁻³⁶ Tacahe, típaipanapa ánaquipanachichahi éma. Tiáqui paicavapa eta te apaquehe. Eta mayujarasirahi, ánipa macahe:

—Tátachicha Nucaiyaquene, píti pirataha tamutu. Picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera nútí eta nítauchiraya eta pivarahaquenehi píti —macahepa.

³⁷ Tásiha, téchepucapa. Tichavapa eta te návihihi ena máimitureana. Máimaharinehi éna, tímacanarichucha. Máichapa ema Pedro:

—Píti Simón, ¿pímacarichucha? ¿Tájaha tacayema pímacahi? Váiparinehi pímicatacanuhini pijaneacanhini étanainahipucaini hora pácahehinehi. ³⁸ Éjamiuchava. Eyujarauhava apaesaina. Eyaseaca ema Viya eta etumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

³⁹ Tacahe, tíapechavavarepa tiyana tiyujaraca. Eta mayujarasirahi, étarichuva eta máechajiriruvanahi. ⁴⁰ Tásiha, tichavavanepa eta te návihihi ena máimitureana. Máimahavarepa tímacanaripavare, taicha muracarpa eta náechapune. Tájinvare nacayemahini táichavenehi eta natsirirahi. Tacahe, tiyanavarepa tiyujarapana. ⁴¹ Te mapahequenepa eta mayujarasirahi, tichavapa. Máichavacapa:

—¿Iápechavaipava ímaca? ¿Vuíchahapuca enarahacaquenénahini? ¡Taratap! Jéhesare, púiti títecapapa eta nutuparahahi nacaratasiranuyare ena ticatianacanhinehi. ⁴² Ávane ema tíjararecanuyare. Échepuca. Viyana víacavacava —máichavacapa.

Nacaratacava ema Jesús
(Mt 26.47-56; Lc 22.47-53; Jn 18.2-11)

⁴³ Téchajiricavaichaha ema Jesús, macahepainecha ema Júlasí. Máimamurihapaipahi ena camuriqueneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena ticatianacanhinehi ema Jesús. ⁴⁴ Ema Júlasí, tatiaríhihi eta máicutiarayarehi eta náematarayarehi ena suntaruana ema Jesús. Ani tacahehi eta máechajiriruvahi ema Júlasí:

—Ecuenuyare. Ema nétsereruyare, éma ecaratacaya. Machu ecaitica, muraca eta ecaratásiraina —máichavacapa.

⁴⁵ Te títecapanapa, mapauchapa ema Júlasí ema Jesús. Máichapa:

—Yátiheipa, tata Maestro —máichapa.

⁴⁶ Tásiha, máetserarecapa. Tacahe, ena suntaruana enevanepa nacaratacahi. ⁴⁷ Tacahe, ema émana apóstole, eta máimaira nacaratásirahi ema Jesús, mavehapa eta mayehe espada. Máquijica eta machaca ema mamusura ema aquenuca Caifás. ⁴⁸ Émasera ema Jesús máichavacapa ena suntaruana:

—¿Tájaha tacayema ecasiña eta espada, ecaepuchiriquipaipahivare eta ecaratásiranyare, tímicitujiricavapa námerahihini nútí? ⁴⁹ Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhi. Tacahehisera éta, títauchavayarehi tamutu eta téchajiriruvana eta Sagrada Escritura —máichavacapa.

⁵⁰ Tacahe, tijunaracanapa namutu ena apóstoleana nanaquicapa ema Jesús. ⁵¹ Matiaríhivare ema émana amaperu achane. Téhicapahi. Ticaepacuhapahi eta te sávana. Tacahe, nacaratacavarepa éma apana. ⁵² Tijunahisera manauicapa eta máepacuhainihi sávana. Tiiyana mamuriarepaipa.

*Nacatupihapa ema Jesús te namirahu ena aquenucarahana
(Mt 26.57-68; Lc 22.54-55, 63-71; Jn 18.12-14, 19-24)*

⁵³⁻⁵⁵ Tacahe, nacaitecapapa ema Jesús te mapena ema corregidor. Ema Pedro, máehiequenehapahi éna, mayererehipahisera. Títujicavapa tisiapa eta te canchón tayehe eta mapena ema corregidor. Tásiha, téjacapa macachanemuripa ena suntaruana, tíasacavahi eta te yucu. Váhisera náimatihini éma. Tacahe, tíurujicavanapa namutuyaréni ena apamuriana tuparairucana énapa ena aquenucarahana énapa ena escribánoana. Napanerechaipa, natanunuaripa eta ticaviureyarehi ema Jesús. Náichuhapa ena tépiyaequenehanayarehi eta matapiravayarehi náicha, navarairahi náimicapacayarehi éma. Váhisera náichimavahini eta maviurevainahini. ⁵⁶ Camurianahinéni ena tépiyaequenehanahi éma, váhisera tácuticahini eta nacayemaqueneanahi. ⁵⁷ Titupihanavarepa ena apamuriana tépiyahirahianayarehi. Ánipa macahe ema émana eta máepiyahiraivahi:

⁵⁸ —Núti nusamahi ani macahehi ema maca: “Núti nuvetataicayare eta juca Templo náepiyarui ena achaneana. Tásiha, te mapánaquenénapa sache, nímiclavayare nucatupíha eta apana Templo. Váipasera tácutimahi eta náepiyarui ena achaneana”. Eta juca nusamaquenehi eta máechajiriruvanahi ema Jesús —macahepa ema tépiyahirahi.

⁵⁹ Váhiquesera tácuticahini eta máechajiriruvanahi nayehe ena apamuriana.

⁶⁰ Tacahe, ema corregidor téchepucapa eta mayaseresirayarehi ema Jesús. Ánipa maicha: —¿Tájaha tacayema vahi pijicapavaca ena nani eta pimetauchacasivahi? ¿Yátupipuca eta nacayemaquenehi? Taicha vímahavi eta vahi picatiuchiravainahini —máichapa.

⁶¹ Émasera ema Jesús vahi majicapavacahini. Timatinaichucha. Tásiha, mápechavare mayasereca ema corregidor:

—Nunaraha pimetaanu. ¿Píti pímiyachavahíjicacha pítihi Cristo ema vicuchapaquenehi, Machicha ema Viya? —máichapa.

⁶² Tacahe, ema Jesús majicapapa:

—Yátupi nuti Cristonu. Nuti Manerejirunuhi ema Viya. Tásiha, numetacahayare eta apana. Járájapaya eta sácheayare ímahanuyare eta néjasirayare te mavaure ema Viya máitupajíjijaquenehi. Ímahanuyareva nútí eta núcupaisirayareva, násihayare te anuma, támiranuyarepahi eta úcaji —máichapa.

⁶³⁻⁶⁴ Tacahe, ema corregidor eta masamirahi, tiseamarinehi ichape. Tivetsayujicavapa eta mamuriha eta masemanevahi. Tásiha, macahepa:

—¿Émaquenepa visama ema maca tépiyacavahi Machicha ema Viya! Tétavacavaipa eta maviureva taicha macaerahini ema Viya. Vaipa tácamesa vitanucahini ena testigoanayare. Púiti esamaripa éti eta juca macayemaquenehi. ¿Tájaha vicharayare púiti ema maca? —macahepa.

Tacahe, namutupa najicapa:

—¿Ticaviurevaipa! ¡Étaina táimicapaca! —nacahepa.

⁶⁵ Tacahe, nátutuáca éma. Náepacauquichavarepa, tásiha, náehamirahavarepa te mamira. Tásiha, náichapa:

—Te yátupíhipuca pítihi Cristo, pímatinuyare nájahanupuca nuti néhavíhi. ¡Pimetacahavi! —náichapa.

Énapa ena suntaruana, te námapaipahi, náehavarepa. Ichape eta náichirahi.

*Éma Pedro tépiyacavapa vahi máimati éma Jesús
(Mt 26.69-75; Lc 22.56-62; Jn 18.15-18, 25-29)*

⁶⁶ Tiuri, éma Pedro, matiarhichahahi eta te canchón. Tacahe, sucahepaipahi esu mavanara éma corregidor. ⁶⁷ Suímahapa éma Pedro, tiásacavahi. Suímararacapa eta mamira. Tásiha, suíchapa:

—Németeaca pítrichu ñichamuri eñi ñica Jesús, eñi nazareno —suíchapa.

⁶⁸ Émasera majicapapa:

—Vahi nímati éma péchajisiquenehi. ¿Távihapuca pímatinenuhi píti? —máichapa.

Tacahe, tiyanapa éma eta te portón. Téchajicavanepa eta varayu. ⁶⁹ Suímahavarepa tiápechava esu esena. Sumetacavacapa éna natiarihiqueneanahi, suíchapa:

—Éñi ñica eñi nachamuri éna téhicanahi eñi Jesús —suíchapa.

⁷⁰ Tiápechavavarepa éma Pedro tépiyacava vahi máimatihini éma Jesús. Tacahe, te tiyere-rehachichavare, éna natiarihiquenehi náichapa éma Pedro:

—Yátupiquene pítrichu machamuri éma maena Jesús, taicha eta péchajisira, tímaticarehi eta piásihairahi te Galilea —náichapa.

⁷¹ Tacahe, majicapapa:

—Máicuñacanuine éma Viya, te vahi nucucahe yátupina. Váhiquenesera nímati éma achane échajisiquenehi —macahepa.

⁷² Enurujiapa tiápechava téhajica eta varayu. Tíjahúchavapa téchava éma Pedro eta macayemaquenehi éma Jesús: “Te tamirahuinapaichaha eta apihequeneña téhajica eta varayu, píti mapahenaripa eta pépiyacavayare vahi pímatinu”. Éta máechavairahi éma Pedro, tépanavapa tíyaha.

15

*Námapa éma Jesús te mamirahu éma Pilato
(Mt 27.1-2, 11-14; Lc 23.1-5; Jn 18.28-38)*

¹ Te tijarahipa, tiápechavanavarepa tiúrujicavana namutuyaréni éna aquenucarahana, taicha náichuhaqueneanahi éna tuparairucana, éna escribánoana. Tiyaserejiricacanapa tájahapuca eta náicharacayarehi éma Jesús. Tacahe, nacuchucapa ticaitihapaipa eta námirapahi te mamirahu éma Prefecto Poncio Pilato. Éta máimairahi éma Pilato éma Jesús, mavarahapa máimatiyarehi éma. ² Tacahe, mayaserecapa:

—¿Yátupisareji réyvihi píti nayehe éna pijaneanana israelítana? —máichapa.

Éma Jesús majicapapa:

—Pétipicavahi eta juca piyaseresiranuhi. Yátupihi eta nurreyvahi —máichapa.

³ Tásiha, éna tuparairucana nametauchaipa éma Jesús, camuri eta maviurevahi náicha.

⁴ Tacahe, mápechavare mayasereca éma Pilato. Máichapa:

—¿Vahi péchajiuchava eta juca nametauchiravihi? Camuri eta piviurevahi náicha —máichapa.

⁵ Émasera éma Jesús váhiquene majicapahini. Tásiha, máramipa éma Pilato.

*Éma Pilato macavanairipipa eta náetatasiraya éma Jesús
(Mt 27.15-26; Lc 23.13-25; Jn 18.38-19.16)*

⁶ Tiuri puiti, tatiarihi eta mayeherepihi éma Pilato te Páscuamuhuana. Macaiticayarehi éma émana preso mácani nayasearuyarehi éna achaneana. ⁷ Tacahe, natiarihihi eta te cárcel éna ajairana ticaeratanahi. Ichape eta naviorevahi éna téhajiricacarahiana te revolucón, nacapirapahi éna achaneana. Te namuri, matiarhihi éma achane ticaicare Barrabás.

⁸ Tásiha, éna achaneana nayaseacapa éma Pilato máichahini eta mayeherepi. Ánipa náicha:

—Vivaraha picha eta piyeherepi te Páscuamuhuana —náichapa.

⁹ Tacahe, mayaseremurihapa éma Pilato:

—¿Evarahapuca nucaítica éma eyehe Rey, iáquenumuri eti israelítana? —macahepa éma Pilato. ¹⁰ (Taicha éma Pilato máimatiacaripahi eta nametauchirahi éma Jesús éna tuparairucana taicha nacapinaruhi éma.)

¹¹ Énasera éna tuparairucana náimitumuriharipa éna achaneana, éna nayaseasirayarehi émaina máuchucuha éma Barrabás.

¹² Tacahe, éma Pilato mayaseremurihavare. Máichapa:

—¿Tájahasica nícharacayare éma Jesús éma íjarechaquenehi Rey iáquenumuri eti israelítana? —máichamuripa.

¹³ Éna, tipiaracanapa eta najicapirahi:

—¡Pémetatareca te crusu! —nacahepa.

¹⁴ Tásiha, mápechavarepa mayaseremuriha, ánipa máicha:

—¿Tájaha tacayemahi eyaseacahi eta németataresiraya ema maca? ¿Tájahasica eta mavivurevahí? —máichapa.

Énaserá tipiaracanavare muracapanapa:

—¡Pémetatareca te crusu! —nacahepa.

¹⁵ Ema Pilato mavarahahi tíuriyarehi nayehe ena achaneana. Tacahe, mavanecapa ena suntaruana, ánipa maicha:

—Ecaiticaya ema Barrabás. Émasera ema maca Jesús, íamayare, éstacayare. Étatacayareva te crusu —máichavacapa.

Nacaecahijiricava ema Jesús ena suntaruana

(Mt 27.27-31; Jn 19.1-3)

¹⁶ Tacahe, ena suntaruana námapa ema Jesús tayehe eta náestasihayarehi te távirarehi eta guardia. Náimichuhavarepa namutu ena apamuriana suntaruana námurivana. ¹⁷ Te náitachapa eta náestahirahi éma, namuriachapa eta muíriare mularume. Náitsamemacapa eta itapepi eta majarapiyarehi. Nanacapa te machuti. ¹⁸⁻¹⁹ Nacavayumarajipa. Náepuyumirauchavarepa, ánipa náicha:

—Tata, ¡pítitataji nayehevihíji Rey ena israelítana! —nacahepa.

Náepuchisicapa eta te machuti tayehe eta curinaquí. Nátutuácvarepa. ²⁰ Tacahe, te títavanapa eta nacaetemajirisirahi, navejamuhiacapa eta mularume. Nanacavarepa eta mamuirihaihu. Tásiha, námapa tayehe eta macaetataiyarehi te crusu. Náetatacapa ema Jesús te crusu

(Mt 27.32-44; Lc 23.26-43; Jn 19.17-27)

²¹ Eta napaisirapahi te calle, nácapajicapa ema achane ticaijare Simón. Éma, másihapahi te máesane. Napamicapa éma manaracuha eta macurusura ema Jesús. (Ema maca Simón, máuchusinehi te jena avasare Cirene. Éma, máiyahi ema Alejandro émapa ema Rufo.)

²² Tacahe, nacaitecapapa tayehe eta masihi nacaetatairare ticaijare Gólgota. ²³ Ánaquipa náesichinehi ema Jesús eta vino ticasiriquiama eta ipuruji tisucareama ticaijare mirra. Váhisera máerahini. ²⁴ Tacahe, náetatacapa éma te crusu. Ena suntaruana, nasuertehachapa eta mamuirihaini eta nájarajirisiracacayare.

²⁵ Te náetatacapa éma, las nuéveripa eta yáticarahi. ²⁶ Te tápusi eta macurusura, tatiarihihivare eta ajureca táechajisihahi eta tiviuachahi eta máepenirayarehi. Ani tacahehi eta ajureca: “Ema Rey nayehe ena israelítana”. ²⁷ Natiarihivare ena apinana tíamerahiana. Ticaetatanahivare te machacaya, ema émana te mavaure, ema apana te sapa. ²⁸ Tacahe, tamutu títauchavahi eta táechajiriruvana eta Sagrada Escritura, ani tacahe: “Náimijachahi ema nachamurihi ena namauriqueneana”.

²⁹ Tacahe, ena tiánucumirauchanapahi, tépiupiusicavanapaipa eta nacaecahirapaipahi ema Jesús. Ánipa nacahe:

—¡Pítitataji! Picahechajiriruvahi eta piáquipaisirayarehíji eta Templo, piratahahivaréji pímuchava picatupíha eta arairu Templo te mapanayererichuhíji sache. Puiti vivaraha vímaha eta pítapujijiasiravahi. ³⁰ Piúcupaica te jara crusu. ¡Picatiuchava pítijivaina! —náichapa.

³¹ Énerichuvare ena tuparairucana nacaecahijiricavare, énapa ena escribánoana. Náichajiricácapa:

—Ema mácacacha, macahehi eta máechajiriruvahi eta maratahairahíji macatiuchavaca ena apamuriana achaneana. Tásiha, puiti váhivare máratahahini émajivainahini macatiuchavahini eta te jara mávihahi. ³² Te yátupinahini Cristo, Reynahini víyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini eta vímairainahini —nacahepa.

Ena tíamerahiana ticaetatanahivare te machacaya, énerichuvare nacaecahihivare éna apanavare.

Eta máepenirahi ema Jesús

(Mt 27.45-56; Lc 23.44-49; Jn 19.28-30)

³³ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. ³⁴ Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

³⁵ Tacahe, ena natiarihiqueneanahi ena tisamanahi, ánivarepa nacahe:

—Esama. Ema maca achane mapiaracahi ema víyarahaini profeta Elías —nacahepa.

³⁶ Ema apana tianapa tjunapahi máepanapa eta machuchujiruyarehi eta tisisica vino. Máitiacapa te tíuquí curinaquí. Máimicapayacapa eta majaca, machuchujicayarehi. Tacahe, máichapa:

—Ésamiricachucha. Vímahayare te títecapayarepuca macatiuchapana ema Elías — máichapa.

³⁷ Tacahe, tíapechavavarepa tipiaraca muraca ema Jesús. Tépenapa. ³⁸ Tásiha, tíjuhúchavapa tétsayumecapa eta cortina tayehe eta Templo. Tépanava te anuquehe, tíchechuha te apaquehe. ³⁹ Tásiha, ema nacapítara ena suntaruana romanoana, eta matupihairahi máimararasirahi te mamirahu ema Jesús, masamirahi eta rompiarasirahi, ániapa macahehi: —Yátupiquenerichuyapa Machicha ema Viya ema maca —macahepa.

⁴⁰ Tacahe, natiarihihivare ena esenana. Náimararacahi, nayererehihisera. Te nataracu, sutiaríhihi esu María Magdalena, esu Salomé, ésupa esu apana María. (Esu suca María, máenahi ema Jacobochicha émapa ema José.) ⁴¹ Ena nani esenana ena náumurivana eta téhicarairicanapahi téchapajiricanapahi ema Jesús eta mapaisirapahi te másihapa te Galilea. Natiarihihivare ena camuriana apamuriana esenana náitecapaquenehi te Jerusalén, téhicanapahi éma.

*Nacucupaicapa te crusu ema Jesús, náecarayarepa
(Mt 27.57-61; Lc 23.50-56; Jn 19.38-42)*

⁴²⁻⁴³ Matiaríhihivare ema achane ticajare José*. Ticavasahi te Arimatea te Judea. Éma, tétavícavahi eta mapicauchacarevahi. Masupahi ema Jesús eta émarahi ema Cristo mavaneruhi ema Viya, étaripa eta émarahi ema téchayarehi namutu ena achaneana. Ema maca José, náumurivahi ena aguenucarahana. Tacahe, te cáperehipa eta jena sáchequenehi, tétumechavapa ema José tiyanapa eta me Pilato, mayaseapanahi eta máquehe ema Jesús, mavarairahi máecarayare. Tacahe, tiyayauchavapa taicha téricayarepahi eta sache. Vahi táisapacarehíni náecararechíni te yátimuhu, váhivare táisapacarehíni máejamíacahíni te jena sávarumuhu. ⁴⁴ Máraminehi ema Pilato eta máijahúchiravahi tépenavane ema Jesús. Tásiha, máimichuhapa ema nacapítara. Te títecapapa ema nacapítara, mayaserecapa te yátupihípuca tépenarípa ema Jesús. ⁴⁵ Tásiha, eta mametasirahi ema nacapítara eta máepenarípa ema Jesús, máisapapa ema Pilato eta máquehe ema Jesús. ⁴⁶ Tacahe, tiyanapa ema José. Mámapa eta tíurina sávana mavachareruhi. Tásiha, macucupaicapa eta máquehe ema Jesús. Náyuruácapa tayehe eta sávana. Náiyaracuhapa tayehe eta máecari eta te mari nasecajureruhi. Tásiha, najihachapa te tapaja eta máecari eta ticheyaramé mari tajitacarequene. ⁴⁷ Sutiarihihivare esu María Magdalena ésupa esu apana María†. Náimararacahi, náimatípa eta nanasihahi eta máquehe ema Jesús.

16

*Eta máechepusira ema Jesús eta te máecari
(Mt 28.1-10; Lc 24.1-12; Jn 20.1-10)*

¹ Tacahe, te jena sache sávaruquenehi, téricaípa eta sache, tiyanapa esu María Magdalena, ésupa esu Salomé, ésupa esu apana María. Tivacharecanapa eta tíjiyequene perfume nayarísihayare eta máquehe ema Jesús. ² Tásiha, te apanapa sache, lumíncuquenehi, nayatírupa tiyanana eta te máecari. Te tíuchucapa eta sache, títecapanapaípa éna eta te máecari. ³ Eta napaisirapahi, tiyaserejiricanapaípa. Ániapa nacahe:

—¿Nájahapapucaini náequehepuichinahavini eta tajiha eta ñécari eñi Viáquenu eta mari tajitacarequene? —nacahepa.

⁴ Te títecapanapa, náimahapa eta máríme tájinarípaípa te tapajacura eta máecari. ⁵ Tásiha, tisiapanapa. Ánaqui náimahapa ema émana amaperu achane, mávihahi te vaure. Eta mamuríha, tétavícava eta tajapuva. Tíaramecanarinehi ena esenana. ⁶ Ema amaperu achane máechajicavacapa:

—Vahi eupíca. Éti etanucapahi ema Jesús Nazareno, ema macaetataquenehi. Májinarípaípa, taicha tíaecheputasirípa. Yare, ímaha. Júcahi eta máevínehi. ⁷ Tiuri puiti, eyana emetaca ema Pedro, tásiha, namutu ena apamuriana echamuriana. Emetacavaca tiyanayare ema Jesús eta te Galilea. Ánaqui macuchapiaheyare emutu éti. Échavarichuhípuca eta macayemaqueneanahi te achaneríchaha —máichavacapa ema ángele.

⁸ Tacahe, tíuchucanapa eta te máecari. Tiyananapa tíjunapanapaípa. Tiyayacareanapaípa taicha eta náramirahi. Eta nayanirahi, nájina nametarúinahini taicha eta napsirahi.

* **15:42-43** Ema maca José, vahi émaina ema maparape ema Jacobo ema táechajísíhaquenehi te versículo 40. Váhivare émaina ema José ema suíma esu María, máenahi ema Viáquenu Jesucristo. Ema maca José, tatiarihi eta mávacure tayehe eta Cabildo te Jerusalén. Émasera vahi máimicasiapavahini nayehe ena ticatianacanahi ema Jesús. (Pitanuca te libro Lucas 23.51.) † **15:47** Esu suca María, esu táechajísíhaquenehi te versículo 40. (Te pívaraha pecha pitanuca Juan 19.25.)

*Tímerecavapa ema Jesús suyehé esu María Magdalena
(Jn 20.11-18)*

⁹ Tiuri, eta máechepusirahi ema Jesús te máecari te jena lumíncuquenehi te yáticarahichicha, sutivapa máimeresiavahi suyehé esu María Magdalena. (Esu suca María, esu máepachiaruhi ena siétequeneana éreanana te suáquehe.) ¹⁰ Tacahe, tiyanapa ésu, sumetapana ena suchamurianahi. Éna, tétavicavahi eta napanereresirahi, títahanahi eta nacatísamurevairahi. ¹¹ Váhisera nasuapahini eta sumetarapihi esu María eta máechepusiraipa, machaviraipahi títareca, étapa eta máimeresiravahi eta suyehé.

*Tímerecavapa ema Jesús nayehe ena apinana máimitureana
(Lc 24.13-35)*

¹² Te táequenepa eta juca, tímerecavavarepa ema Jesús nayehe ena apinana máimitureana eta napaisirapahi, nacaijuheirahi eta avasarechicha te tachacaya eta Jerusalén. Tiápamachavahisera eta mamira. Vahi náimatívanehini éma. ¹³ Téhesera náimatipa éma, majunijacavacapa. Tacahe, tichavavaneanapa nametapana ena apamuriana nachamuriana. Váhiquenevaresera nasuapahini ena apinana, eta nametasirahi.

*Tímerecava ema Jesús nayehe ena mayeheana apóstoleana
(Lc 24.36; Jn 20.19-21)*

¹⁴ Tiuri, te táequenepa, tiúrujicavanahi eta nanisirahi ena óncequeneana apóstoleana. Tacahe, títahúchavapa tímerecava ema Jesús eta nayehe. Macajachamurivarepa eta namasupirahi eta nametarapianahi ena tímahanahi éma eta máechepusiraipahi.

*Matuparaca ema Jesús ena apóstoleana
(Mt 28.16-20; Lc 24.37-49; Jn 20.22-23)*

¹⁵ Tacahe, máichavarepa:

—Eyana epaica te tamutu eta avasareana eta te juca apaquehe. Ecametarairuyare eta tiúrina echajirirucava nayehe namutu ena achaneana. ¹⁶ Nucuchucuhavacayare namutu ena tisuapajirahianaya, ena ticaicachasianaya. Énaserá éna vahi tisuapanaya, ticaicuñanayare taicha tanasirichuhi eta napecaturana.

¹⁷ Ena tisuapajirahiana náimerecayare eta juca tiáramicareana: Náimijunijicayare ena éreanana nayehe ena achaneana, taicha námapiçayare eta níjare. Náitucayare téchajicana tayehe eta apanana échajirirucavana namaitucaqueneanainihi. ¹⁸ Te nacaratacahipuca eta quichareana, tájina táicharacaimahi. Te téranahipuca eta venéno, tájinavare náichavaimahi. Nanacayare eta navahuana nayehe ena nácani nacajumaqueneana, tásiha, tinaracanayare éna —macahepa.

*Eta mayapirahi ema Jesús te anuma
(Lc 24.50-53)*

¹⁹ Tacahe, te titavapa tamutu eta mametarapianahi ema Viáquenu Jesús, tiyanapa tiyapa te anuma. Ema Viya macaejacapa ema Machícha te mavaure.

²⁰ Tacahe, tiyananapa eta te tamutu avasareana ena máimitureana. Ticametarairuanapaipa eta tiúrina echajirirucavana. Ichape eta máimicatásiravacapahi ema Viáquenu. Tétavicavahi tajacapacarevahi máicha, eta náimiturapianapahi. Taicha máijaracavacapahi eta náimeresirapahi eta tiáramicareana ticunachacareanahi.

Tamu tupa.

Ema San Lucas májuequenehahi eta máichararacavahi ema Jesucristo, ticajare puiti eta EVANGELIO SEGÚN SAN LUCAS

¹⁻³ Némunarquene nuparape Teófilo, nucajurevi puiti apaesa pecha píti apanavare eta juca néchaqueneanahi núti. Ichapemurianahi ena vichamuriana tíajuequenehanahi tayehe eta máicharacavahi ema Viáquenu Jesucristo. Tásiha puiti, núti apanavare nájuequenehavare. Nucaejarusinahi tamutu eta nájuequenehairahi, taicha tamutuhi nucayasesereru nayehe ena tincapaequenehanahi, tímahanahi eta apaicape eta táepaniravahi eta máitare-sirahi ema Viáquenu. ⁴ Núti nuvaraha nímimaticravi apaesa yátupina pecha tamutu eta juca piáravahuanahi.

Ema ángele macametarapi eta máuchusirayare ema Juan Tícachasiricarahiyare

⁵ Cape juca viásinequenehi te émarichaha ema Aluresi aquenucahi, réyhi tayehe eta jena provincia Judea, matiaríhivare ema émana achane, ticajare Zacarías. Éma, námumuri-vanahi ena ticajareana Abías. Eta náematanerepi éna, náechapajirica eta námavahuasana ena achaneana tayehe eta Templo. Esu mayena ema Zacarías ticajaruhi Elisabet, mámarie-quenenihí ésu ema víyarahaini Aarón. ⁶ Ema maca Zacarías ésupa esu mayena, tájina náichiravainahini te mamirahu ema Viya. Tamutuhi náitaucha eta mavanairipiana ema Viáquenu. Tacahe, tájina náechajisiequenehahini nayehe ena achaneana. ⁷ Nájinasera nachichainahini, macheruhi esu Elisabet eta suítaresira. Váipavare ticachichanaimahi taicha ichavicanaripahi.

⁸⁻¹⁰ Te jena sache, náichuhapa ema Zacarías eta masiapirayare tayehe eta Templo te Jerusalén, taicha áñopahi eta masiapirayare. Tacahe, ticátuparácasipa éma. Émapa táetupiacahi eta máematanerepiyarehi májuchayarehi eta incienso te táinahu eta mesa nájuchirarehi, taicha tacahehi eta nayeherepini ena israelítana. Tacahe, ema Zacarías tisiapapa te tajuhe eta cuarto tacapahuquenehi, májuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracanaripa éna. ¹¹ Tiáramicarepa tímerecava ema émana ángele te mamirahu ema Zacarías. Mavaneruhi ema Viáquenu. Titupiharipa ema ángele te vaure tayehe eta mesa nájuchirarehi eta incienso. ¹² Tiáramecarine ema Zacarías eta máimairahi ema ángele. ¹³ Émasera ema ángele máechajicapa:

—Vahi picupica, Zacarías —máichapa—. Ema Viya masamahi eta piyaseserepíhi píti eta mayehe. Puiti esu piyena Elisabet ticachichayare. Juan eta májareyare ema echichayare. ¹⁴ Ichapeyare eta piúrisamurevayare te máuchucapa ema echichayare. Énaripa ena achaneana, ichapeyareva eta náurisamurévaya taicha eta máuchusirayare. ¹⁵ Numetacavi: Ema pichichayare, ichapeyare eta macunachacarevayare mayehe ema Viya. Píti, vahi pisapaimahi tera eta vino, étaripa eta apamuriana téracareana muracaqueneana. Taicha éma, eta máuchusirayare, mávaháruyarepahi ema Espíritu Santo. ¹⁶ Éma pichichayare, éma tétupiricayare eta táurivayare eta napanereruana ena pijaneanana israelítana, tachavirayare eta nasuapirayare ema Viya. ¹⁷ Ema maca pichichayare, éma tinapumirauchayarepahi ema Viáquenu. Macutiyare eta máitupajijiasiravaini ema víyarahaini profeta Elías. Ichapeyare eta máitusirayare eta macajimuyasirayare eta nasamureana ena achaneana apaesa tachava eta nasuapiraina ema Viya, tácuti eta nasuapajiraivainihí ena náchucanaveanainihí. Énaripa ena váinarajipanereruana, tisuapajirahanayareva máicha. Mametacavacayare ena achaneana natsecavaipa eta najacapirayare ema Viáquenu —máichapa ema ángele.

¹⁸ Tásiha, ema Zacarías majicapapa. Ánipa macahehi:

—Páurenusami, vaipa numaitacavaimahi nucachichahini, ésuripa esu nuyena. Ichavichavipa víti. Váichica nusuapapajica eta juca vicachichairayarepuca —máichapa.

¹⁹ Émasera ema ángele máichavarepa:

—Núti nucaijare Gabriel. Núti mavanerunuhi ema Viya. Nutuparacasivaichuhi eta numetasiraviyare eta juca ecachichairayare. Piúriháine ichapenahini eta piúrisamurevainahini. ²⁰ Puítisera úpaviyare. Eta ecutiarareyare piyehe taicha eta pimasuapiranuhi. Tiámáinucava te táitauchavapa eta juca numetaruvíhi, péchajicainavarepa —máichapa ema ángele.

²¹ Tacahe, ena achaneana nanasiqueneanahi te aneca nacuchaparairicaipaicha ema Zacarías, náramipa eta mayerevaipahicha te tajuhe. ²² Jéhesareinehi, te tiúchucapa ema Zacarías, vaipa máechajicahini. Náimatiacapasera éna, eta máechajisirahi ema Viya te

tajuhe. Tisuveverecapaipahi éma eta mavarairahi máimicutiarachavaca ena achaneana eta yátupirahi masamaquenehi. Úpapaipahi éma.

²³ Tacahe, te títauchavapa tamutu eta jena sácheanahi eta matuparacasivahi, tiyanapa ema Zacarías tayehe eta mapena. Nueve caje eta mayerevayarehi eta mamaechajisirayarehi. ²⁴ Tásiha, esu mayena Elisabet, ticajaripa ésu. Váipasera súchuchurecahini te supena. Váhivare sumetajiricahini. Tiámainucavapa te títauchavayarepa eta cíncoquenehi caje eta sucajarirahi. ²⁵ Tétavicavahi eta súrisamurevahi eta susamiravahi ésu. Ánipa sucahe:

—Ichape eta ñijapanuiranuhi éñi Viya, tíjaracanuhi éñi nuchichayare. Váipasare nayuna-caimahi ena achaneana eta numacheruvahi —sucahepa.

Éma ángele macametarapi eta máuchusirayare ema Jesús

²⁶ Tacahe, te sáisiquenepa caje, ema Viya mápechavare mavaneca ema ángele Gabriel tíucupaica tayehe eta avasare Nazaret, tayehehi provincia eta Galilea. ²⁷ Máucupauchapa esu amaperu esena ticaijaru María. Ésu, tájina suímatiyahini ema ajaira. Matiarhipasera ema suímayarehi, ema ticaijare José. Tétacaripahi eta natratune. Ésu, mámariequeneínihi ema víyahaini rey David. ²⁸ Tacahe, ema ángele máucupauchapa ésu tayehe eta suávihihi. Máichapa ésu:

—Pícharacava, María. Piti manerejiruvihí ema Viya. Tétavicavahi eta piúricacarevayare taicha ichape eta majapanuiravihí éma Viya. Picachuricahi namutu ena apamuriana esenana —máichapa.

²⁹ Ésusera tíaramecainehi eta máechajisirahi ema ángele. Supanerequenehainehi tájaha-hipuca tacayemahi eta máechajisirahi ema ángele. ³⁰ Émasera ema ángele máichavarepa:

—Vahi picupica, María. Piti manerejiruvihí ema Viya. ³¹ Numetapanavihí puiti eta picajarirayare. Ajairayare ema pichichayare. Jesús eta máijareyare. ³² Tétavicavaya eta napicauchirayare ena achaneana taicha Machichayarehi ema Viya. Ichapequenyare eta aquenucairayare éma taicha ema Viya manacayareva eta mávacureyare aquenucayare. Macutiyarehi eta aquenucairahi ema máchucaini David. ³³ Éma téchayarehi namutu ena pijaneana israelítana. Máepenacayare eta aquenucairayare —máichapa ema ángele.

³⁴ Tásiha, esu María, sujicapapa:

—¿Tájahasica táicharacavayare eta juca? Taicha núti nájinaihaha nímainahini —suíchapa.

³⁵ Émasera ema ángele máichavarepa:

—Picachichayare taicha eta máitupajijiasiravahi ema Viya. Timicauchaviyare eta maraiva, tásiha, tisiapahacavinapa ema Espíritu Santo. Eta tacahe, ema amuya pínaruyare, sántoyare éma, taicha machichayarehi ema Viya. Náimatiyare namutu eta machichairahi ema Viya. ³⁶ Picutiayare esu pijaneana Elisabet, énerichuvare ticajaripahi ésu. Tayanapanehi ichavicachicharipahinéni ésu, macheruinihinéni. Sáisiripasera caje eta sucajarirahi puiti. ³⁷ Taicha ema Viya, tájinaquene máemáituca éma —máichapa ema ángele.

³⁸ Tacahe, esu María sujicapapa:

—Núti ñivanaranuichuhi éñi Viya. Nutiaríhi puiti. Ñímanahuinepa éñi, eta ñicharacavayare te ñivanairipiana —suíchapa ema ángele.

Tacahe, eta masamirahi ema ángele, tiyanapa tichavahi.

Esu María suéjirapanapa esu sujaneana Elisabet

³⁹ Tacahe, te jena sácheana titátájipa esu María tiyana tayehe eta avasarechicha te tataracucujianahi eta márijuecu tayehe eta provincia Judea, suávasahi esu sujaneana Elisabet émapa ema Zacarías. ⁴⁰ Te títecapapa esu María tayehe eta napenahi, suéchajicapa esu Elisabet. ⁴¹ Te susamapa esu Elisabet eta suahu esu María suéchajisirahi, tiyamuricainehi eta amuya te sujhe esu Elisabet, enevanepa mávahácali ésu ema Espíritu Santo. ⁴² Tacahe, téchajicapa muraca esu Elisabet, suíchapa:

—Píti, tétavicavahi eta piúricacarevahi ñicha éñi Viya. Picachuricahavihí vimutu viti esenana. Éñiripa éñi pichichayare, tétavicavahivare eta ñicunachacarevaya. ⁴³ Nusapihasamípa núti péjirapananuhi píti ñénaviyarehi éñi Náquenu. ⁴⁴ Te nusamapa eta piahu eta péchajisiranuhi, tiyamuricainehi te nujuhe éñi nuchicha, taicha eta tíurisamuréinehi éñi. ⁴⁵ Tétavicava eta piúricacarevaya píti taicha eta pisuapajiraivahi ñe Viya. Títauchavainapa tamutu eta ñímetarapihí éñi Viáquenu eta piyehe —sucahepa esu Elisabet.

⁴⁶ Tacahe, esu María sujicapapa:

—Ichapemuríhi te nácheana eta nucunachirahi éñi Viáquenu. ⁴⁷ Taicha tétavicavapa eta táurisamureva eta nusamure ñicha éñi Viya Ticatiurahiquene eta nuyehe. ⁴⁸ Taicha éñi, vahí ñépurunuhini páurenuhinéni nútisami. Tétavicavahisera eta ñijapanuiranuhi nuti ñivanarahi. Nútpa ñinerejicanuhi, tásiha, ichapenapapuca eta nacapinarunuiraya namutu ena achaneana natiaríhiquenehi puiti, énapa ena arajuruanayare. “Tétavicavapa eta

súricacarevahi esu María” nacáhénapapuca. ⁴⁹Tétavicavapa eta ñítupajjiasiravahi eñi Viya, tjaracanuhi eta núrivayarehi ñicha. Jéhevare eñi, Sántoquenehi eta ñijare. ⁵⁰Eta tacaheyare eta ñijapanuirahaviyare puiti, énapa namutu ena arajuruanayare, nácani tipicauchanayare éñi.

⁵¹Eñi Viya, ñjaracayare eñi nuchichaya eta ñítupajjiasiravaya ichape. Tásiha, ñicaerajicavacaya ena ticasíñavavairicana, énapa ena váinarajipanereruanahivare. ⁵²Nácani aguenucana nacatianacainapapuca, ñicapaquechavacayarehisera éñi. Nasapihapa ena páureanasamihí, ñinerejiruanaya éna, ñijupahanayare. ⁵³Yátupiya eta ñjarasiravacayare eta táetaviuchiraya eta náuricacarevaya namutu ena ticasíñavanayare ñiyehe. Énaserá ena tímijachavanahi tájinahini nácamunuhini, ñicaerajicavacaya namutu.

⁵⁴⁻⁵⁵Eñi Viya acane tjaracavahi ñiyehe eñi viáchucaini Abraham énapa ena ñimarié-queeneana, eta ñjarasiravacainapa eta táetaviuchiraya eta náuricacarevanaya. Vahi ñémiti-sicaimahi eñi Viya eta ñéchajiriruvahi ñjararuvahi. Puiti, eñi nuchichaya tiámayarepahi tamutu eta viúricacarevanaya viti israelítana. Máitavacayarehi éta —sucahepa esu María.

⁵⁶Tásiha, sunasipanapa esu María te supena te supena esu Elisabet. Mapana caje eta suyerevahi. Te táequenepa, tichavavarepa te supena.

Eta máuchusira ema Juan

⁵⁷Tacahe, títauchavapa eta sucajera esu Elisabet. Suínacapa ema suchicha. ⁵⁸Tiyananapa ena sujaneanana énapa ena suchacayapenanahi, náejrapana ésu. Táicha eta nasamairirisirahi eta súrivahi maicha ema Viya eta majapanuirahi ésu. Tiúrisamureanarinehi namutu. ⁵⁹Tacahe, te óchoquenepa sáche eta máuchusirahi ema amuya, nayanauchapa ena najaneanana, namarcachapanayarehi ema amuya; taicha tacahehi eta nayeherepihi. Tásiha, navarahapa nanacayarehi eta májareyarehi Zacarías, mámapicayarehi eta májare ema máiya. ⁶⁰Ésusera esu maena ema amuya vahi suvarahahini. Suíchavacapa:

—Juan eta ñjareyare.

⁶¹Tásiha, éna nacahepa:

—¿Tájaha tacayema? Namutu ena pijaneanana, nájina ticaijarena eta Juan —nacahepa.

⁶²Tásiha, éna náimicutiarachinapa eta nayaseresirahi ema Zacarías tájahapuca eta májareyarehi maicha éma. ⁶³Tacahe, ema Zacarías tiyaseserecapa eta táblamechicha, májuchi-hayarehi eta májareyarehi ema machicha. Eta ajureca, ani tacahehi: “Juan eta májareyare”. Tésenijiricacananarinehi éna taicha eta májareyarehi ema amuya. ⁶⁴Tásiha, tñjahúchavapa tichavapa eta máechajisira ema Zacarías. Macunachapa ema Viya eta máurisamurevahi. ⁶⁵Ichape eta tiáramicarehi nayehe ena natiarihiqueneanahi. Nasamairiricavanepa namutu ena távacuanahi eta avasarechichana tayehe eta provincia Judea. Náechajisihapa eta juca nasamaiririruanahi. ⁶⁶Namutupa napanerequenehahi. Nácani tisamairiricanapahi, tiyasereriricacananaripa. Ánipa nacahe:

—¿Cañarihi tacayemaquenehi eta juca máuchusirahi ema amuya? —nacahepa.

Tásiha, ema amuya, tétavicavahi eta majaneasirahi ema Viya eta majurusirapaipahi.

Eta majirarapi ema Zacarías

⁶⁷Tacahe, eta jena sáchequenehi eta macamarcairahi ema amuya, étaripa eta nanasirahi eta májareyarehi, téchajicapa ema Zacarías. Macunachaiapa ema Viya, taicha mávahácaripa ema Espíritu Santo. Ánipa macahehi:

⁶⁸—Tétavicavapa eta macunachacareva ema Tata Vicaiyaquene, ema véhiruhi vimutu viti israelítana. Taicha tñjapanuhavihi vimutu viti machaneranahi, ticuchucuhaviyarehi. ⁶⁹Tjaracahaviyarehi puiti ema yátupiqueneyare eta macatiuraivaya, ema manerjiruhi te namuri ena mámariequeneanainihí ema David, ema mavanarainihivare ema Viya. ⁷⁰Titauchavaipahi eta náechajiriruvanahi ena santo profetanaini acane, eta nametacativasvanahi me Viya. ⁷¹⁻⁷³Taicha tacahehi eta matratunehi ema Viya mayehe ema viáchucaini Abraham. Ema Viya tjaracahavi eta majapanuiravacayarehi ena viáchucanaveanaini, énapa ena ticachichahaviana, vítipa puiti. Énerichuvare tjaracavahi eta mamaemitisisiraya eta macatiuchirahaviyarehi nayehe ena ticatianacahavianahi. ⁷⁴Ema Cristo manerjiruhi ema Viya, ticatiuchahaviyarehi taicha mamavarairahi vipicahini, nacuijahivaréni ena nahapapicahavihini eta vicaemataneasirayarehi éma. ⁷⁵Eta mavarahaquenehi tiúriyare eta vitaresirayarehi tamutu sácheana, tájina víchiravaimahi te mami-rahú éma.

⁷⁶Pítiripa, piti nuchicha, píchuarecasivaichuhi mayehaviyare profeta ema Tata Vicaiyaquene taicha piti pínapumirauchayarepahi ema Viáquenu Cristo. ⁷⁷Pétupiricayarehi eta nasamureana ena achaneana, yátupinapa machaneranayarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivare eta napecaturana. ⁷⁸⁻⁷⁹Púfiripa, eta máemunasirahavihi ema Viya, macucupaisinahavihi

te anuma ema Machicha. Éma, tímimaticahavinapa eta majaraiva ema Tata Vicaiyaquene étapa eta táuriquene achene ticaijuhe mayehe. Máetucarácavacayare eta nasamureana ena ticatisamureanahi, nácani tépenanayarehíni —macahepa ema Zacarías.

⁸⁰Tacahe, ema amuya eta majurusirahi, tiámavapahi eta masuapajiraivahi mayehe ema Viya. Váhivare étainahini te tajuhe eta avasare eta majurusinehi. Vámahicuruhahi eta majurusirahi. Tiámainucava te ajairapa, tímerecavapa nayehe ena majaneanana israelitana, tépanavapasera ticametarairu.

2

Eta máuchusira ema Jesús (Mt 1.18-25)

¹⁻³Tacahe, te jena añoanahi cape juca viásinequenehi te émarichaha aquenucahi ema Emperador Augusto, matiarihivare ema apana achane ticaijare Cirenio, majupahahi ema Augusto. Prefectohi éma, tayehe eta avasareana. Ticaijare Siria eta mávihahi*. Tacahe, te jena sácheana, ema Augusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipi. Táinapuiruhi censo maicha ema Emperador Augusto.

⁴⁻⁵Tacahe, tiyanapa ema José. Mámapa esu mayena María. Ticajaripaipa ésu. Tacahe, tiúchucanapa éna tayehe eta avasare ticaijare Nazaret te Galilea. Nacaijuhepa eta avasare ticaijare Belén te Judea, eta mávasainihi ema aquenucaini rey David. Étarichuvare mávasahi ema José, taicha ema José mámariequenehi ema David. Tiyananapa ticatupanayarehi.

⁶⁻⁷Tacahe, títecapanapa te Belén. Tájinaipasera táviravainahini eta te pétiana eta náitecapihahini taicha camuriqueneanahi ena achaneana náitecapaqueneanahi. Tacahe, tisianapanapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, tínacapa jena yati. Suínacapa ema amuya ema suárachichahi. Tacahe, suáyuruacapa eta te mámaratataji pañal. Sucaivecapa ema amuya alauchu.

Ena pástulérúana ticametacasianapa nayehe ena ángeleana

⁸Te vámahí te tachacaya eta avasare Belén, natiarihíhi ena pástulérúana. Éna, najaneacahi eta nayeheana uvesana te jena yátiquenehi. ⁹Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástulérúana eta majaraivahi éma. Tiáramecanarine éna. ¹⁰Tásihasera, ema ángele máichavacapa:

—Vahi ecupica. Yare, jucarihi eta tímitecanuhi núti numetapanahayare. Tétávicava táurismurécarevaya nayehe namutu ena achaneana. ¹¹Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticaijare Cristo Viáquenu. ¹²Eta tacahe, nímicucutiarachinaheyare eta ímairaya: Echimapayare ema amuya ticayuruhahi te mámaratataji pañal. Tívecahi eta te tajuhe eta peti tapena eta sárareana —máichavacapa ema ángele.

¹³Tásiha, tíjahúchavapa tímerecavana ena camuriqueneana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

¹⁴¡Tétávicavapa eta vicunachirahi ema Viya vimutu viti viávihanahi te anuma! ¡Jéhevare puiti, tiúricavanainapa ena achaneana te juca apaquehe, ena manerejiruanahi macatajiruanahi ema Viya! ¡Tájinainapa náichiravaimahi! —nacahepa.

¹⁵Tacahe, tiyananapa ena ángeleana, tichavana te anuma. Tásiha, náichacacapa ena pástulérúana:

—Yare, viyana te Belén. Viyana vímahapana eta juca mametaruhavíhi ema ángele mavaneruhi ema Viya Viáquenu —náichacacapa.

¹⁶Tacahe, titátájianapaipahi tiyanana. Jéhesareinahi, te títecapanapa, nachimapainehi esu María émapa ema José. Matiarihisaréipahi ema amuya. Tívecahi éma eta te tajuhe eta peti tapena eta sárareana. ¹⁷Te náimahapa tamutu, tépanavanapa náemechapa. Amairipahipa naecha eta mametarapianahi ema ángele eta máuchusiraipahi ema amuya. ¹⁸Tacahe, náraminehi namutu ena achaneana eta nametarapianahi ena pástulérúana. ¹⁹Tásihasera, esu María supanerequenehinehi te susamure tamutu eta juca susamaqueneanahi. ²⁰Tacahe, ena pástulérúana tichavanapa tayehe eta te najanearesihahi eta uvesana. Nacunachinehi ema Viya te anuma táichavene eta máechajiriruvahi ema ángele, táichavenevare eta náimairahivare ema amuya alauchu. Étapachuhi tacahehi eta macayemaquenehi ema ángele.

Námapa ema amuya Jesús te Jerusalén, náimerepana tayehe eta Templo

* **2:1-3** Te jena año, matiarihivare ema ichapequenehi aquenuca ticaijarehi Aluresi. Éma, reyhi tayehe eta departamento Judea.

²¹ Te óchoquenepa sache eta máuchusirahi ema amuya, namarcachapa éma taicha tacahehi eta nayeherepi ena israelítana. Tacahe, nanacapa eta májareyare Jesús. Eta májare máimjarechaquenehi ema ángele te sucajariyarepa esu maena María.

²²⁻²⁴ Tacahe, te cuarentaquenepa sache eta suínasirahi esu María, tiyananapa te Jerusalén. Eta tímiyanavacahi éna, náimerepanayarehi ema amuya mayehe ema Viya Víáquenu. Taicha ema Viya macavanairipihi eta te Sagrada Escritura eta májurehi ema víyarahaini Moiséini, ánipa tacahehi: “Te ajairapuca ema mácáni suárachicha esu esena, ímerezayare nuyehe; íjaracanuyare taicha nícuchichuhi ema”. Énerichuvare náitauchayarehi eta juca apana vanairipi tayehe eta napachihairaina ena esenana eta te táequenerapa eta náinasira. Ánipa macahe: “Esu súcáni esena arainacahi, suíjaracasichanupana eta apihina paluma símarrune; te váhipuca, apina paluma suítatiqueneana, amáiruhichichanasera”.

²⁵ Tiuri, matiarihíhi te Jerusalén ema émana achane ticaijare Simeón. Tétávicavahi eta máuriva. Tipicaurahi éma. Émarichu mávaháruhi ema Espíritu Santo. Ticuchapavaipahicha ticaimairuvaipaicha éma eta máimatiraya ema Cristo, éma ticaurisamurerahi nayehe ena achaneana majaneana israelítana. ²⁶ Taicha ema Espíritu Santo mametacaripahi ema Simeón eta vulchaha tépenavanemahi éma, táicha máimatinumayarehi ema Cristo mavaneruyarehi ema Viya.

²⁷ Tiuri, te jena sache, ema Espíritu mavanecapa ema achane Simeón mayana eta te Templo. Tacahe, titecapanapa ena ticachichana ema Jesús. Námapaipa ema amuya. Náitauchayarehi eta vanairipiana taicha eta máuchusirahi ema suárachichahi. ²⁸ Tacahe, te máimahapa ema Simeón ema amuya, mavehapa, majupacapa. Tásiha, macunacharinehi ema Viya te anuma. Macahepa ema Simeón:

²⁹⁻³⁰ —Tiuri puiti, Tata Náquenu te anuma, nuvarahapa nunaraca te juca apaquehe, nuti pivanarahi. Taicha núrisamurepa eta nímairaipa ema Cristo. Éta paichuhi eta pimetarunuhi. Nímatipa ema Ticaturahiqueneyarehi, ema pivaneruhi pitupararui. ³¹ Éma, tímaticareya picha nayehe ena achaneana ticavasanahi eta te tamutu avasareana. ³² Ticunachavanehi ena pinerejiruana israelítana. Tíjarahinevare te nasamure eta nacunachirahi. Éma, tímicauchavacaya ena apamuriana achaneana apavasanana apaesa náimatiyare ema Viya —macahepa ema Simeón.

³³ Náraminehi ena ticachichana eta máéchajiriruvanahi ema Simeón mayehe ema amuya.

³⁴ Tacahe, ema Simeón mayaseacapa ema Viya eta náurivaina éna. Tacahe, máichapa esu María esu maena ema amuya Jesús:

—Pímaha. Ema maca amuya, matuparacasivaichuhi me Viya eta máimituresirayare eta máéchajiriruvana ema Viya. Natiarihiyaresera camuriana ena vijaneana israelítana énajívyare tichavanayare, taicha náepuruyare ena pichicha, nacatíyacayareva. Tásiha, natiarihiyarevaresera ena apamuriana vijaneana tinaracanayare tíuricavanayare taicha eta nacasiñairaya éma. ³⁵ Étainapa tacaecheraiyaya eta napanerueruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táínehiqueneyare máíchararacavayare ema pichicha. Tímicutíjiricavayare tayuvarachahini eta písamure eta tumare —máichapa ema Simeón.

³⁶ Tiuri, sutiaríhíhivare esu émana esena ichavicachicha. Ticametarairurahi ésu. Ticaijaruhi Ana. Ema suíyaini ticaijaréni Fanuel. Ésu, mámariequenehi ema víyarahaini Aser. Eta suámaperuvahi ésu, siete año eta sucachanerahi ema suímaini. ³⁷ Tásiha, ochenta y cuatro añoripahi eta suépenaimavahi. Sunasiquenehi sucapenahi ésu eta te Templo. Tamutuhi sácheana, yátiana, tiyujaracahi ésu. Suhayunachahivare. ³⁸ Tacahe, ema Simeón téchajiricavainirichaha, titecapanecha esu Ana. Eta suímairahi ema amuya Jesús, sucunacharinéhivare ésu apanahivare, suhasulupayachapa ema Viya máíchavene ema amuya. Tásiha, sucametairupa mayehe ema amuya. Suéchajisihahi éma nayehe ena tisupajirairahana ticuchapanahi eta máitecapirayare te Jerusalén ema Cristo.

Tichavanapa eta te návasa Nazaret

³⁹ Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tichavanapa eta te Nazaret te Galilea, te návasaichuhi éna. ⁴⁰ Tacahe, ema amuya Jesús tíurjurui. Túmehi. Téchemarahíhi, tamutu maecha, taicha mamunavahi me Viya.

Ema Jesús téchajiricava nayehe ena máestroana

⁴¹ Tiuri, tamutu áñoana te Páscuamuhuana, eta nayeherepi ena ticachichana ema amaperu Jesús, tiyananayarehi tayehe eta avasare Jerusalén. ⁴² Tacahe, ema Jesús, te macayehepa doce año, tatuparacaripahi ena ticachichana náimerepanayarehi éma, námayarehi tayehe eta Jerusalén, náimimatichayarehi eta piesta ticaijare Pascua.

⁴³ Tiuri, te jena táequenerapa eta piesta, tichavanapa te napena. Tíminasichavapasera ema amaperu Jesús eta te Jerusalén. Eta napaisirapahi te achene, vahí náéjiacavanehini

ena ticachichana, ⁴⁴ taicha náimijachahi matiarhipahi éma te namuri ena achaneana nacachanequeneanapahi. Étanaripahi sache eta napaisirahi, napaenumavapa náejicahi éma. Te jena cáperehiquenepa, natanucapa te namuri ena najaneanana nacachanequeneanapahi. ⁴⁵ Májinasera náichimavahini. Tacahe, tichavanavarepa te Jerusalén, natanupanayarehi éma. ⁴⁶ Tacahe, te jena mapanaqueneapa sache eta natanusirahi, napaenumavapa náetupiacahi ema Jesús tayehe eta Templo. Macachanemurihi, téjacahi te namuri ena máestroana. Masamararacavacahi, mayaseremurihavacahivare éma apanavare. ⁴⁷ Ichape-rinehi eta náraminehi namutu eta náimairahi eta máechemaraivahi, taicha táurivapahi eta majicapiravacapahi éna, taicha eta máechemaraivahi. ⁴⁸ Tacahe, tiáramivanarinehi ichape ena ticachichana te náetupiacapa. Tásiha, suíchapa esu maena:

—Nuchicha, ¿tájaha tacayema píchahavihi? Ichapemuri eta vicañamarasiravahi pícha. Vitanujiriricavihi, núti éñipa eñi piya —suíchapa esu maena.

⁴⁹ Tacahe, ema Jesús majicapapa:

—¿Tájaha tacayema, meme, eta etanujiricanuhi? ¿Váhipuca échahini éti eta návihairahi eta aní? Níchayare eta máemataneana ema Tata —macahepa ema Jesús.

⁵⁰ Énasera vahi nacaicutiarahini eta macayemaqueneanahi ema nachicha Jesús. ⁵¹ Tacahe, tiyananapasera tichavana te návasahi Nazaret. Ema Jesús, tisuapajirahihí nayehe ena ticachichana. Esu maena María tamutuhi supanerequenehahi te susamure eta juca susamaqueneanahi.

⁵² Tacahe, ema Jesús tijurucapaipa, tijuruhacapaipavare eta máquehe, tacachanepahisera eta máitupajijiasiravahi. Máimicatacahi ema Viya. Tétavicavahivare eta námemunasirahi éma, ena achaneana.

3

Éma Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruhana

(Mt 3.1-12; Mr 1.1-8; Jn 1.19-28)

¹ Tacahe, eta máepenirapahi ema aquenucaini Augusto, tisiapapa ema Tiberio máitsivaguenehi. Émapa Emperadorhi. Quince áñoripahi eta macatuparahairahi. Ema Poncio Pilato, émaripa prefectohi tayehe eta departamento Judea. Tásiha, ema Herodes Antipas, machicha ema Aluresini, prefectohivare tayehe eta departamento Galilea. Ema maparape Felipe, prefectohivare éma, tayehe eta departamento Iturea étapa eta Traconite. Ema Lisanías, prefectohivare tayehe eta departamento Abilina. ² Te Jerusalén, ema Caifás, corregidorhi. Énerichuvare tipicauchacarehi ema Anás, pasado corregidor, máimachuca ema Caifás.

Tacahe, te jena sácheanahi, ema Juan machicha ema víyahaini Zacarías, ajairaripa. Manasirichahahisera tayehe eta mávapahi majurusinehi. Tásiha, ticametacasipa ema Juan eta mayehe ema Viya eta macametarairuirayarepa eta máechajiriruvana.

³ Tacahe, tiyanapa tipacahi ema Juan tayehe eta avasarechichana tiávihanahi te tachausi eta cajacure Jordán. Mametacavapaipa ena achaneana. Ánipa maicha:

—Ítsivacha eta epanereruana. Éneuchava mayehe ema Viya apaesa maperdonachahe eta epecaturana. Te éneuchavapuca, núti nícachasicahénapa —máichapa.

⁴⁻⁶ Ema maca Juan, émaripa ema máechajisihaguenehi ema Viya eta te Sagrada Escritura, taicha ánaquiapirapahi eta áñoana acane, ema Viya mametacapa ema víyahaini profeta Isaiás eta mapaneruhi, eta mavanesisarayare ema Machicha te juca apaquehe. Eta tímitecahi ticatiurahiyarehi. Énerichuvare matiarhipavahi ema apana achane máichuhaqueneyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tamauriqueneana, apaesa táuri eta najacapirayare ema Machicha ema Viya. Tacamunuhivare yátupina eta nacasiñairavayarehi mayehe, náinajicayarehivare eta nacasiñavavaisirahi, étapa eta navayuraivahi. Nasapihahi tijapanurahianainapa éna. Tásiha, te máitecapapa ema ticatiurahiyarehi, éma máimimatichainapa namutu eta najacapacarevaya me Viya namutu ena ticasínavana mayehe.

⁷ Tacahe, ena achaneana tiyananapaipa napauchapaipa ema Juan, navarahapa ticaichasianayare eta mayehe. Tásiha, éma máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairirichahipuca eta jarájapairayarepa eta táifnehiqueneyare ecuñaraquí. Evarahahipuca iúchuchayare. ⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana. Váhivare eucujamurava eta mámaríequenérahehi ema viáchucaini Abraham. Taicha tayanapane mámaríhepuca éma, váhisera iúchuchaimahi te vahi ecuitsivacha eta epanereruana. Ema Viya, tájina máemaitucaimahi

éma. Te mavarahapuca, vahi máejecarachaimahi máepiyaca achaneanaina eta juca mari, mavarairainahi yátupina ena mámariequeneanaina emá Abraham. ⁹ Ecauneuchava, taicha tiánehipa títecapauchahayere eta ecufíaraqui nayehe ena achaneana máitucarahanahe téneuchavana, váhivare náitsivachahini eta napanereruana. Tímicitijiricavaipa te máechucayarepa emá achane eta yucuqui máhireana; tásiha, máijuchainapa tamutu. Ene nacaheyere ena máeneuchavarahana —máichavacapa emá Juan.

¹⁰ Tásiha, emá achaneana nayaserecapa:

—¿Tájahasica eta vícharacavayare eta viúrivaina?

¹¹ Emá Juan majicapapa:

—Ecajirahiyare. Mácani tatiarihi apina eta macamisa, máijaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nanicaquene —máichavacapa.

¹² Te jena sácheana, náitecapauchavare emá Juan ena ticobrarecarahiana eta impuesto. Navarahapa ticaicachasianayarehi. Nayaserecapa emá Juan, náichapa:

—Maestro, ¿tájahapuca vícharacavaini eta viúrivainaini víti apanavare? —náichapa.

¹³ Majicapapa emá Juan:

—Vaipa ecuapechava ecuvayuyujica eta ecobraresira, tátupiruva jácani tavanairipihí eta ley —máichapa.

¹⁴ Énerichuvare náitecapauchá emá suntaruana. Nayaserecavare emá Juan, náichapa:

—Víti apanavare, ¿tájahapucaini vícharacavayare eta viúrivaya? —nacahepa.

Máichavacapa éma:

—Vaipa ecuvarejica eta náimahaqueneana ena achaneana. Váipavare ecuipicarareca. Nacuijapa ecuepiyequeneha. Tarataripa tacurismurechahe eta evachasana —máichavacapa.

¹⁵ Ena achaneana ticunevanaripaicha eta mayehe emá Juan, náimijachaipahi émaripa emá Cristo nacuchapaquenehi, cátiurahiyarehi. Váhisera námutuimahi. ¹⁶ Tásihasera emá Juan máichavacapa:

—Yátupi núti nícachasicahéhi te une. Ávanepaipahisera mácani yátupiquene Cristo. Éma, tiápajupanavahi nuyehé núti, eta mapicauchacarevahi. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, tícachasicahayereva; tjaracaheyereva emá Espíritu Santo. Téhesera vahi ecucasiñavapuca mayehe, tícuñacaheyere tayehe eta táijurequene yucu. ¹⁷ Puiti éma márajapainapa tinerejiricainapa nácani yátupiqueneanahi téhicanayare. Máunacainapa éna. Ticutinapa mácani achane te tiácatayajiricahi eta arusu. Máunacainapa. Tásiha, máquijicapa eta tapiraquí, máijuchayarepa te yucu. Eta nacaheyere ena máurirahanahi, tjuánainapa te yucu, máitavacayarehi eta tamuruira —máichavacapa emá Juan.

¹⁸ Tacahehi eta juca máechajisiravacahi emá Juan. Ichape eta maconsejachiravacahi ena achaneana, máimitusiravacahi eta máechajiriruva emá Viya. ¹⁹ Émaripa emá Herodes Antípas emá aquenucahi, maconsejachahivare vahi macuimyanava macuveha esu Herodías, mayenahi emá maparape Felipe. Váhivare macuimyanava macuquicha eta apamuriana táifemahiqueneana máchaqueneana. ²⁰ Émasera emá Herodes vahi masuapahini. Masapiharichucha tisemahi, máimicaratacapa emá Juan, macasiapayarehi te cárcel.

Eta macaicachasirahi emá Jesús

(Mt 3.13-17; Mr 1.9-11)

²¹ Tiuri, te tamirahupaichaha eta macaeratairaya emá Juan, tímiyanavaichahahi máicachasicavacahi ena achaneana. Étana sache, máitecapauchapa emá Jesús, mavarairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tíjahúchavapa téjiaca eta anuma. ²² Tiúcupaicapa emá Espíritu Santo, mavasimahipaipa eta paluma eta máimahi. Matupiruruchapa te mápusi emá Jesús. Tásiha, nasamapa eta mahu emá Viya te anuquehe. Ánipa macahehi:

—Pítira nuchicha némunaruquene. Núrisamurecha piyehe —macahepa.

Ena achaneana máchucaqueanaini emá Jesús eta acane

(Mt 1.1-17)

²³ Tiuri, emá Jesús, macayeheripahi treinta año te tinacuchavapa tímiturecahi nayehe ena achaneana. Éma, náimijachaquenehi machicha emá José.

Emá máiyainihi emá José, emá Elí.

²⁴ Emá máiyainihivare emá Elí, emá Matat.

Emá máiyainihivare emá Matat, emá Leví.

Ema máiyainihivare ema Leví, ema Melqui.
 Ema máiyainihivare ema Melqui, ema Jana.
 Ema máiyainihivare ema Jana, ema José.
²⁵ Ema máiyainihivare ema José, ema Matatías.
 Ema máiyainihivare ema Matatías, ema Amós.
 Ema máiyainihivare ema Amós, ema Nahum.
 Ema máiyainihivare ema Nahum, ema Esli.
 Ema máiyainihivare ema Esli, ema Nagai.
²⁶ Ema máiyainihivare ema Nagai, ema Maat.
 Ema máiyainihivare ema Maat, ema Matatías.
 Ema máiyainihivare ema Matatías, ema Semei.
 Ema máiyainihivare ema Semei, ema José.
 Ema máiyainihivare ema José, ema Judá.
²⁷ Ema máiyainihivare ema Judá, ema Joana.
 Ema máiyainihivare ema Joana, ema Resa.
 Ema máiyainihivare ema Resa, ema Zorobabel.
 Ema máiyainihivare ema Zorobabel, ema Salatiel.
 Ema máiyainihivare ema Salatiel, ema Neri.
²⁸ Ema máiyainihivare ema Neri, ema Melqui.
 Ema máiyainihivare ema Melqui, ema Adi.
 Ema máiyainihivare ema Adi, ema Cosam.
 Ema máiyainihivare ema Cosam, ema Elmodam.
 Ema máiyainihivare ema Elmodam, ema Er.
²⁹ Ema máiyainihivare ema Er, ema Josué.
 Ema máiyainihivare ema Josué, ema Eliezer.
 Ema máiyainihivare ema Eliezer, ema Jorim.
 Ema máiyainihivare ema Jorim, ema Matat.
³⁰ Ema máiyainihivare ema Matat, ema Leví.
 Ema máiyainihivare ema Leví, ema Simeón.
 Ema máiyainihivare ema Simeón, ema Judá.
 Ema máiyainihivare ema Judá, ema José.
 Ema máiyainihivare ema José, ema Jonán.
 Ema máiyainihivare ema Jonán, ema Eliaquim.
³¹ Ema máiyainihivare ema Eliaquim, ema Melea.
 Ema máiyainihivare ema Melea, ema Mainán.
 Ema máiyainihivare ema Mainán, ema Matata.
 Ema máiyainihivare ema Matata, ema Natán.
³² Ema máiyainihivare ema Natán, ema David.
 Ema máiyainihivare ema David, ema Isaí.
 Ema máiyainihivare ema Isaí, ema Obed.
 Ema máiyainihivare ema Obed, ema Booz.
 Ema máiyainihivare ema Booz, ema Salmón.
 Ema máiyainihivare ema Salmón, ema Naasón.
³³ Ema máiyainihivare ema Naasón, ema Aminadab.
 Ema máiyainihivare ema Aminadab, ema Aram.
 Ema máiyainihivare ema Aram, ema Esrom.
 Ema máiyainihivare ema Esrom, ema Fares.
 Ema máiyainihivare ema Fares, ema Judá.
³⁴ Ema máiyainihivare ema Judá, ema Jacob.
 Ema máiyainihivare ema Jacob, ema Isaac.
 Ema máiyainihivare ema Isaac, ema Abraham.
 Ema máiyainihivare ema Abraham, ema Taré.
 Ema máiyainihivare ema Taré, ema Nacor.
³⁵ Ema máiyainihivare ema Nacor, ema Serug.
 Ema máiyainihivare ema Serug, ema Ragau.
 Ema máiyainihivare ema Ragau, ema Peleg.
 Ema máiyainihivare ema Peleg, ema Heber.
 Ema máiyainihivare ema Heber, ema Sala.
³⁶ Ema máiyainihivare ema Sala, ema Cainán.
 Ema máiyainihivare ema Cainán, ema Arfaxad.
 Ema máiyainihivare ema Arfaxad, ema Sem.
 Ema máiyainihivare ema Sem, ema Noé.

Ema máiyainihivare ema Noé, ema Lamec.

³⁷ Ema máiyainihivare ema Lamec, ema Matusalén.

Ema máiyainihivare ema Matusalén, ema Enoc.

Ema máiyainihivare ema Enoc, ema Jared.

Ema máiyainihivare ema Jared, ema Mahalaleel.

Ema máiyainihivare ema Mahalaleel, ema Cainán.

³⁸ Ema máiyainihivare ema Cainán, ema Enós.

Ema máiyainihivare ema Enós, ema Set.

Ema máiyainihivare ema Set, ema Adán.

Ema Adán macaepiyaquenepa me Viya.

4

Ema Váinaraji Satanás mavaraha macaitsamaraji ema Jesús

(Mt 4.1-11; Mr 1.12-13)

¹ Tacahe, ema Jesús, mávahácaripa ema Espíritu Santo. Tásiha, ema Espíritu Santo eta mávasamurechirahi, máimitucaipahi eta mayanirayarehi te mávapahi apaquehe. Majuni-jicayarehi eta cajacure Jordán. ² Cuarenta sache macahehi tayehe. Tájinvare manicahini eta jena sácheanahi. Técuhasamurepa. ³ Tacahe, ema Váinaraji témeñahavapa mayehe. Mavarahapa macaetemayarehi. Ánipa maicha:

—¿Péchuapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masí? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tácarichuimahi eta tinicacare ticaitarecayare ena achaneana. Tacachaneyarehi eta máechajiriruva ema Viya. Jéhevare, éta ticaitarecarahiyare” —macahepa.

⁵ Tacahe, ema Váinaraji mámvarepa te táinahu eta anuquehe mari. Tíjahúchavapa máimecha tamutu eta ichapequeneana avasareana te juca apaquehe ticutirinehi tacachayajiricacahini taicha eta máitupajijiasiravahicacha ema Váinaraji. ⁶ Tásiha, máichavarepa ema Váinaraji:

—Núti njaracaviyare tamutu eta juca avasareana. Ichape eta napicauchiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaqueneyare njaraca. ⁷ Pépuyucanumasera te numirahu pitsiucanu apaesa njaracavisarepa tamutu —máichapa.

⁸ Émasera ema Jesús majicapapa:

—Pévuishatataji píti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchaya. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

⁹ Tacahe, vahi máévuisihahini ema Váinaraji. Mámvare te avasare Jerusalén. Máimiapanapa te táinahu eta Templo. Tásiha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémirisirayare. ¹⁰ Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricavianayare, énevaneyarehi tijaneacaviana. ¹¹ Tiámavianayare te navahuana, apaesa vahi picucayutetu eta máriana eta te pipaisirana” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

¹² Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya taicha éma Piáquenu” —máichapa.

¹³ Tacahe, tiyanapa ema Váinaraji. Majuniicapa ema Jesús taicha tímahavaipahi vahi máiturucahini macaetema. Mavarahahisera tichavayarehi tiápechavayarehi macaetemapana.

Ema Jesús tépanavapa ticametarairu

(Mt 4.12-17; Mr 1.14-15)

¹⁴⁻¹⁵ Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajijiasiravahi taicha mávahácapahi ema Espíritu Santo. Tímiturecapaipa tayehe eta náurujisirarevana te avasareana. Ichapemuri eta nacunachirahi namutu ena tisamararacanapahi. Nasamairiricavarepa ena apamuriana achaneana ticavasanahi te tachacaya eta avasareana.

*Tichavapa ema Jesús te mávasa Nazaret
(Mt 13.53-58; Mr 6.1-6)*

¹⁶ Tásiha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta náurujisirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutiarahi eta mavarairahi téchajicureca eta Sagrada Escritura. ¹⁷ Náichuhasarepa eta máechajicuresiraya. Náijaracapa eta libro májurehi ema profetaíni Isaías. Te mavejiacapa eta libro, matanucapa eta máechajicureyarehi. Ani tacahehi eta táechajiriruvanahi: ¹⁸ “Tiávahácanuhi ema Espíritu Santo. Taicha manerejirunuichuhi núti ema Viya Viáquenu eta numetasiravacayare ena páureana eta juca máemunasiravacahi éma, máimicatasirayareva. Eta tímitecanuhi nucanaracayare ena ticatamurevanahi. Nucaítijicayareva ena máerataruanahi ema tivayuarahi Satanás. Nucaimairicayareva ena púchuquíana. Nucuchucuhayareva ena ticatajivanahi, níjaracaya eta náuricacarevaya. ¹⁹ Numetacayareva járajapainapa eta sáchezare tamutuiraya máetupirica ema Viya, tamutu-inapa tíurisamurécarepa máicha” tacahehi eta Sagrada Escritura eta máechajicurehi.

²⁰ Te tamutupa eta máechajicuresirahi ema Jesús, máeratacapa eta libro. Máimichavapa mayehe ema tíjanearecarahi eta libroana. Téjacavarepa ema Jesús. Náimarracaripa ena achaneana natarihiqueneanahi. ²¹ Tacahe, tépanavapa téchajica ema Jesús:

—Nútiripa ema táechajisihaquenehi eta juca libro. Tímitecanuhi numetacahe eta máemunasirahehi ema Viya —macahepa.

²² Tacahe, náramipa namutu ena achaneana. Ánipa náichacaca:

—¡Tétavicavahi tapachinava eta máechajiriruvanahi ema maca! Émachuchasera ema machicha ema Joséini ema carpintéroini. ¿Tájahasica eta juca? —nacahepa.

²³ Émasera ema Jesús máichavacapa:

—Németeaca éti váhirichuhi esuapapajicanuhini. Tásiha, evaraharinepuca íchanuyare: “Te yátupina píturequeneha, píuchavaca ena ticajananahi te juca. Vímahaséji piápechavare picuchuca te juca piávasaichu tacuti eta pímeruhi te avasare Capernaum” íchanuyare. ²⁴ Nutupiruvasera numetacahe: Tatuparaca eta epicauchirahaviya vimutu viti mavaneruana ema Viya. Étiserá eti nujaneananahi ecavasanahi eta te juca viávasa, vahi epicauchanuhini, váhivare ejacapanuini. Ecuti ena achaneana acane eta náepuruirahi ena apamuriana profetana mavaneruanahi ema Viya. ²⁵ Eta tacahe, eta máimairahi ema Viya eta náepuruiravacahi, tivanecavaca ena profetana nayana napauchayare ena apavasanana. Acane, te matarihihichaha ema profetaíni Elías, mapana año y medio vahi taquivahini, tásiha, ichapevare eta ecuha. Németeaca núti camurianahi nácani ena tépenaimana israelítana. ²⁶ Váhisera étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahi eta avasare Sidón, étapa macavanahiyahi máitecapihayare suyehe esu ésunahi esena apavasana tépenaimahi. Ésupa máimicataruhi táichavenehi eta susuapajiraivahi me Viya. ²⁷ Énaripa ena israelítana nacajumaqueneana eta lepra te jena sácheanahi te matarihihichaha ema profetaíni Eliseo. Váhivare énanahini macanaracahini ena majaneanana. Masapihapa macanaracahi ema apavasanahuenehi ticajare Naamán, ticavasahi te Siria. Éma Naamán, tinaracaripa eta majuma, táichavenehi eta masuapajiraivahi —máichavacapa ema Jesús.

²⁸ Tacahe, eta juca máichiravacahi ema Jesús, tiseanapa ena natarihiqueneanahi. ²⁹ Tásiha téchepumurihanapa éna. Nacuchucapa ema Jesús te tachachacu eta avasare, te tachausi eta táupenaquene, navarahapa nacamiricayarehi éma. ³⁰ Émasera tichavapa máncumurihapaína éna. Tiyanapa, majunijicavacapa.

*Ema Jesús máimijuna ema éreana tiávahácainihi ema achane
(Mr 1.21-28)*

³¹ Tacahe, títecapapa ema Jesús tayehe eta avasare Capernaúm te Galilea. Tamutu sávaruana tiyanapa tayehe eta náurujisirareva ena achaneana, tímiturepanaya. ³² Ichape náramihi ena achaneana eta máimiturapianahi taicha tétavicavahi eta máitusirahi mayuna-pacahi tamutu. Tétavicavahivare eta tasuapacarevahí eta máimiturapiana.

³³ Étana sávaru, matarihihi te namuri ema émana achane mávaháruhi ema éreana. Tipiara-recahi, ánipa macahe:

³⁴ —Núti nímativi. Pítira Sántoquenevihu. Machichaquenevihu ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca picajanere-pacahaviyare —macahepa ema achane.

³⁵ Tacahe ema Jesús macajachapa ema éreana. Ánipa maicha:
—¡Pámatina! ¡Piyana pijunijica ema maca achane! —máichapa.

Tásiha, tǵahúchava tiáquipaicavapa te apaquehe ema achane. Tásiha majunijiacapa ema éreana. Tájinasera máichavahini ema achane. ³⁶ Náraminehi ichape namutu ena achaneana eta náimairahi. Tiyaserejiricanapa:

—¿Tájahasica tacayema eta juca? Ema maca Jesús, tétavicava eta máitupajjiásiravahi, maratahahi máquijica nácani éreanana. Tásiha, ichape eta napisirahi éma. Vahi najicapae-machahini. Tamutupa arairu eta máimiturapianahi ema maca —nacahepa.

³⁷ Enevanavarepa naecha namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te provincia Galilea.

Ema Jesús macanaraca esu máimase ema Pedro
(Mt 8.14-15; Mr 1.29-31)

³⁸ Te tiúchucapa ema Jesús tayehe eta náurujisirareva, tiyanapa te mapena ema Simón Pedro. Te tisiapapa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre. ³⁹ Tásiha, mapauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajiricapa éma, énapa ena máimitureana.

Camuriana ena macanararuanapahi ema Jesús
(Mt 8.16-17; Mr 1.32-34)

⁴⁰ Te jena cáperehiquenehi, te téricapa eta sache, ena achaneana námavacapaipa namutu ena nacajumaqueneana eta mayehe ema Jesús. Apanapaneneji eta najumanapahi éna. Manacapaipa eta mavahu te náinahuana, macanaracapaipahi. ⁴¹ Maveranavare ena éreanana máquijiruanapahi te náqueheana ena nacajumaqueneana. Tipiararecanapaipa eta náchusirapahi. Ánipa nacahe:

—Pítira Machichaquenevi ema Viya.

Émasera ema Jesús vaipa máisapahini náimiyannahini napiaraca éma, taicha náimatihí ena eta émairahi ema Cristo.

Tamutu avasareana te Galilea mapaica ema Jesús
(Mr 1.35-39)

⁴² Te apanapa sache, te tijarahipa, tiyanapa ema Jesús te mávapai. Natanucapasera ena achaneana. Náetupasirapa éma tayehe eta mávihahi. Navarahapa náiminasíchayahrehini. Vaipa náisapahini mayanahini. ⁴³ Émasera ema Jesús máichavacapa:

—Nutuparacasivaichuhi eta nuyanirayare tayehe eta apana avasareana taicha nuvanahirichuhi eta níchuiravacaya ena achaneana náehisiraina ema Viya apaesa macuchucuhavaca —máichavacapa.

⁴⁴ Tacahe, tiyanapa tipaica ticametarairupaipa te náurujisirarevana tayehe eta avasareana te Galilea.

5

Tiáramicarepa eta náitusiravahi eta jima
(Mt 4.18-22; Mr 1.16-20)

¹ Te jena sácheanahi, ema Jesús mávinehi te tachausi eta cáquiere ticaijare Galilea. Títecanapa ena camuriqueneana achaneana. Váipanecha náratavahini, tipamihejiricanapa eta navarairahi nasama eta macametarairuirahi ema Jesús eta máechajiriruvana ema Viya.

² Máimahapa ema Jesús eta apisi pacure te tachausi. Ena ticayeheana eta pacureana, tisipajiricanahi eta ichapequeneana nayutaheana. ³ Tacahe, ema Jesús tiávachupa tayehe eta mapacurehi ema Simón Pedro. Mavanecapa máevataeca apesachicha eta pacure. Téjacapa ema Jesús eta te pacure, tépanavapa máimitucavacapa ena achaneana. ⁴ Te títipiricapa eta máimitusiravacahi, máichapa ema Pedro:

—Tata, iama eta juca epacure tayehe eta táupenamaiya. Iáquijieca eta jara eyutahe —máichapa.

⁵ Ema Pedro majicapapa:

—Maestro, tamutu yati vinajuiricahi, tájinasera vítucavahini. Tavetijipa puiti eta tajarahiriripa. Nusuapavisera eta juca pivanesiranuhi, náquijieca eta nuyutahe —máichapa.

⁶ Jéhesaréinehi, te nachurucapa eta yutahe, tiyutucavaipahi eta jímana. Vaipa táratavahini ténarujicapa eta ichape yutahe taicha eta tajitacareva eta jima. ⁷⁻¹⁰ Natiarihíhisera te apana pacure ena nachamuriana: ema Jacobo émapa ema Juan. Tacahe, návevhauquichapa tímicitacanayarehi. Te títecanapapa, náinicachapa eta apisiquene pacure. Tiánehirichahavare vahi táratavayarehini taicha eta tajitacarevahi, téricayarepaini eta pacure. Ichape eta náramesirahi namutu taicha eta náimairahi eta camuriquene jímana. Tásiha, ema Pedro máepuyumirauchapa ema Jesús. Máichapa:

—Tata, pítyara yátupiquenévihi Víáquenuvi. Váhicha nímiuriacava nutupihmirauchavi nútí. Nucapecaturarahiquenehi —máichapa.

Matiarihihi ema Jacobo émapa ema Juan, machichanaveana ema Zebedeo. Machamurianihi ema Pedro. Énerichuvare tíramecanarinehi éna, énapa ena apamuriana natiarihi-queneanahi. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Núti níjaracaviya eta apana pématanerepiyare. Pitanucainapa ena achaneana nuchaneranaya —máichapa.

¹¹ Tacahe, te nachurupaicapa eta napacureana te tíajipahi, étapa nanaquisinehi. Tiyananapa náehicapa ema Jesús.

Éma Jesús macanaraca ema émana achane leproso
(Mt 8.1-4; Mr 1.40-45)

¹² Tacahe, eta mánuoirapaipahi ema Jesús eta avasarechicha, mácapajicapa ema émana achane macajumaquenehi eta lepra, tamutu eta máquehe. Eta máimairahi ema Jesús, máitecapauchapa. Tépuycapa te mamirahu. Máichapa:

—Tata, nucasínavahi eta piyehe, picanaracanupaini.

¹³ Majicapapa ema Jesús:

—Nuvaraha nucanaracavi. Tájina pa píchiravaina puiti —máichapa.

Manacapa eta mavahu. Énevanerinehi témitiacahi eta majumainihi. ¹⁴ Matuparacapasera ema Jesús. Ánipa máicha:

—Pímaha, nacuija picumetaca eta nútirahi nucanaracavihi. Piyanavaresera pímercava nayehe ena tuparairucana, apaesa náimamacavi. Énainapa tímétajiricanainapa eta yátupirahi pinaraca, pipachíhairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

¹⁵ Tásihasera, náechapa namutu ena achaneana te avasareana eta máitupajijiasiravahi ema Jesús. Nayanauchapaipa ena camuriqueneana achaneana, navarairahi nasamaracayarehi, macanarasiravacayarehiva tayehe eta najumana. ¹⁶ Émasera ema Jesús, majunijimuriahuchucha. Tiyanapa tayehe eta mávaphianahi apaquehe. Ánaqui mayujarasihayarehi.

Éma Jesús macanaraca ema émana achane macajumaquene eta muracaquiha
(Mt 9.1-8; Mr 2.1-12)

¹⁷ Étana sache ema Jesús tímiturecahi te tajuhe eta peti, camuriana ena achaneana. Natiarihihivare ema fariséoana tépiyacavana religiósoana, énapa ena escribánoana, tímatiána eta nayeherepiana ena israelítana. Éna, tíasihanahi te Jerusalén, ena apamuriana tíasihanahivare te avasarechichana tayehe eta Galilea, étapa te Judea. Éma Viya máimicatacahi ema Jesús eta macanarasiravacayarepahi ena nacajumaqueneana. ¹⁸ Títecapanavarepa ena apamuriana, námaphahi te áchuji ema achane muracaha. Navarahainipa nacasiapa te tajuhe te máviahahi ema Jesús. ¹⁹ Étasera eta nayututusravahi ena achaneana, vahi náitujicavahini nasiapahini. Tímipanerechavanapasera námiapanapa te tamaequehe eta peti. Navetatamaequechapa eta peti te manapaicahi ema Jesús, nacajuchuchucapa ema macajumaquene. ²⁰ Tacahe, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepahainavipa.

²¹ Éna escribánoana énapa ena fariséoana, eta napanerequenehairahi eta macayemaquenehi ema Jesús, tiseanmarinehi. Ánipa nacahe te nasamureana: “Éma maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! ¡Taicha macarichu ema Viya marataha macaepaha eta pecatuana!” tacahehi eta napanereruana.

²² Émasera ema Jesús máimatihí eta napanereruana. Máichavacapa:

—¿Tájaha tacayema téjecapavahi eta epanereruana? ²³ Tájina táéjeravaina eta níchirahi ema máca: “Nucaepahainavipa eta pipecaturanaini”. Máéjarrepánapuca eta níchahini: “Pécheputa, piyana pipaica”. ²⁴ Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti nuchicha, nuvanecavi pécheputa. Piveha eta jara piyereruva. Piyana te pipaena —máichapa ema Jesús.

²⁵ Énevanerinehi técheputa ema macajumaquenehi. Mavehapa eta mayereruva. Tipaicapa te namirahu ena achaneana. Tiyanapa te mapena. Ichaperinehi eta macunachirapahi ema Viya. ²⁶ Ichaperinehivare eta náramirahi namutu ena natiarihiqueneanahi. Tétavicavarinehi eta nacunachirahi ema Viya, napicaucharinehivare. Ánipa nacahe:

—Tétavicavapa táramicareva eta juca vímahaquenehi puiti —nacahepa.

Éma Jesús máichuha ema Mateo, mayehyare apóstole
(Mt 9.9-13; Mr 2.13-17)

²⁷ Te táequenepa eta júcana, ema Jesús tíuchucapa. Eta mapaisirapahi, máimahapa ema achane ticajjare Mateo. (Ticajjarehivare Leví.) Téjacahi éma eta te macatuparahaiyahi eta macobraresirahi eta impuesto.

—Yare, péhicanu —máichapa ema Jesús.

²⁸ Enurujipa téhepucahi ema Mateo. Manaquicapa tamutu eta matuparahainihi. Tiyanapa máehicahi ema Jesús.

²⁹ Tacahe, te jena sácheanahi, tépiyarecapa eta piesta ema Mateo te mapena. Máichuhapa ema Jesús eta máenirisirayarehi, énapa ena camuriqueneana macutiqueneanahi ticobra-recarahiana impuesto, énapa ena apamuriana máemunacasareana ema Mateo. ³⁰ Natiari-hihivare ena máimitureana ema Jesús. Tásiha títecapanavarepa ena fariséoana énapa ena es-cribánoana. Eta tímiyanavacahi, ticaecahirecanayarehi. Ánipa náichavaca ena máimitureana: —¿Tájaha tacayema ecachanemuri eta enisirahi ena nánitatajiana ticobra-recarahiana eta impuesto? ¿Tétavicavahi eta nacapecaturaravahi! —nacahepa.

³¹ Émasera ema Jesús, te masamairiricapa eta náechajiririvanahi, máichavacapa:

—Ena majumareanahi vahi nácamunuimahi ema médico. ³² Núti, vahi étaina tímitecanu nutanupanavacayare nácani matapiravareanahi. Eta tímitecanuhi núti nutanupanavacayare ena tisipecaturanapanahi apaesa náitsivacha eta napanereruana, náeneuchavapa me Viya —máichapa ema Jesús.

Nayaserecapa ema Jesús tayehe eta ayuna

(Mt 9.14-17; Mr 2.18-22)

³³ Tiuri, nayaserecavare ena achaneana ema Jesús:

—¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna eta nayujarasirana. Énaripa ena fariséoana, énerichuvare. Tásiha, ena pímitureana piti tinicanahi, téranahivare —náichapa.

³⁴ Majicapapa ema Jesús:

—Nímicutichinahe puiti. Vahi táuricaimahi ayúnanainahíni icha ena íchuhagueneanahi tinicanayare nayehe ena araimana. Tiúrisamureanayarehi taicha matiaríhíhi ema arayena. Tájina táuricahini ayúnanainahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahi ayúnanainahíni ena nímitureana. ³⁵ Járjapainapasera eta sáchevare, ticaverejicasianayare, taicha ticaratacanuanainapa ena ticapacuanayare núti. Jéhevarepa ayunanainapa. ³⁶⁻³⁸ Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tamauriqueneana. ³⁹ Ticajerasera eta náinajisirahi ena achaneana eta nayeherepiana tamauriqueneana. Apaesachicharichu eta navarairahi naicha eta juca arairu nayeherepianayare. Namutuyaréni navaraha náimiyánava eta nayeherepiana tásihaqueneanahi eta napane-reruana ena náchucanaveanaini —máichavacapa ema Jesús.

6

Ena fariséoana náimipicauchahi eta nayeherepiana tayehe eta sávarumuhuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare

(Mt 12.1-8; Mr 2.23-28)

¹ Eta jena sache sávaruquenehi, tiyanapa tipaica ema Jesús. Mámamuríhapa ena máimitureana. Témehicavanapa ena fariséoana. Náetavivijicapaipahi eta isanítiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepíraquihapaipa, tépurajacachavanapaipa. Tinicanapaipa. Tisapacareichucha eta nanisira, taicha técuhana. ² Tacahe, eta náimararasirapahi ena fariséoana, tise-manapaipa. Ánipa náicha:

—¿Tájaha tacayema vahi epicaucha éti eta juca sache tacapichahuenehi? Écharichuhi éti vahi tísapacarémahíni eta vícaematanehíni puiti. Eta juca evepíraquihapahi eta trigo, ticajjare ecaematanehi —náichapa.

³ Tásiha, majicapavacapa ema Jesús:

—Németeca éti vahi eacutiara eta tacayemaquene eta Sagrada Escritura, eta máichavacuenevahi ema víyarahaini David eta mapaisirapahi técuhapaipa, énerichuvare ena téhicanapahi. ⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapichahuenehi nanacasarehi te namirahu ema Viya. Nanicasarehi ena tiyujaracarahiana émasera ema David vahi tátuparacahini manicahini. Étasera eta máecuavahi, manicipa eta pan, énapa ena macachanequeneanapahi.

⁵ Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

*Ema Jesús macanaraca ema achane tépenavahu
(Mt 12.9-14; Mr 3.1-6)*

⁶ Tiuri, te apanapa sávaru, tiyanavarepa ema Jesús tayehe eta náurujisirareva. Tímitu-recavarepa. Tásiha, matiaríhíhi ema émana achane, ticajumahi eta mavahu váure. Vaipa tayamuricahini, tépenavahuhi. ⁷ Natiaríhíhivare ena escribánoana, énapa ena fariséoana. Náimahirípahi ema Jesús te macanaracayahípua ema macajumaquene eta jena sache tacapicahuquenehi. Natanunuiricahi eta tiviuchayarehi éma. ⁸ Émasera ema Jesús máimatíhi eta napanereruana éna. Tacahe, máechajicapa ema achane ticajumavahuhi. Máichapa:

—Yare, pitupihayare ani te namirahu ena achaneana —máichapa.

Tásiha, titupihapa ema achane te namirahu. ⁹ Tásiha, máichavacapa ema Jesús:

—Nuvaraha epanerechaya. Puiti juca sache sávarumuhuhi, táuricahi víchaya eta táuriqueneana, ¿masi? Táuricahi vípuchayare ena nacajumaqueneanahi, ¿masi? ¿Ímijachapuca tíuriyare eta víchirayare eta tamauriqueneana, vicaparecapuca ena achaneana? ¿Tájahasica eta epanerechahi? —máichavacapa.

¹⁰ Tacahe, ema Jesús máesenimuríhapa ena achaneana. Tásiha, máichapa ema achane macajumaquene:

—Nímaha, picajaruvauchava pímereca eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. ¹¹ Tacahe, tisemanarinehi ena fariséoana eta náimairahi. Tásiha, tiyaserejiricacanapa:

—¿Tájahapuca vícharacaini ema mácatataji eta táimicaviúchaini? —nacahepa.

*Ema Jesús manerejica ena dócequeneana apóstoleanayarehi
(Mt 10.1-4; Mr 3.13-19)*

¹² Te jena sácheanahi, tiyanapa ema Jesús tayehe eta tápusi eta márijuecu. Tamutu eta jena yatí tiyujaracahi me Viya. ¹³ Te tjarahípa, máichuhavacapa namutu ena máimitureana. Manerejicapa ena dócequeneana mayeaneanayarehi apóstole. ¹⁴⁻¹⁶ Ena nani ena manerejiruanahi: ema Pedro (éma ticaijarevare Simón), émapa ema maparapeichuhi ticaijare Andrés; émapa ema Jacobo* émapa ema maparape Juan; émapa ema Felipe; émapa ema Bartolomé; émapa ema Mateo; émapa ema Tomás; émapa ema apana Jacobo; émapa ema apanavare Simón; émapa ema Judas; émapa ema Júlasí Iscariote (ema tjararecahi ema Jesús).

*Ema Jesús máimitucavaca ena camuriqueneana achaneana
(Mt 4.23-25)*

¹⁷ Tacahe, tichavapa ema Jesús, énapa ena máimitureana. Te tachachacu eta mari táinunapahinepa, étapa nacainunainehi ena camuriqueneana achaneana. Ena nani tiásihanahi eta te avasare Jerusalén, eta te provincia Judea, étapa eta provincia Siria. Eta tímitecanahi éna, navarahahi nasama ena Jesús eta máimiturapiana, navarahavare macanaracavacahini tayehe eta najumana. ¹⁸ Ena ticatajivanahi návaháruanahi ena éreanana, macanaracavacapasera ema Jesús. ¹⁹ Namutu ena achaneana navarahahi náemamahaca ema Jesús taicha náechahi tinaracanayarehi eta najumana eta náemamahasirayare taicha títipajijicavahi éma.

*Ema Jesús máimitucahi nayehe ena ticunachacareanahi me Viya
(Mt 5.1-12)*

²⁰ Tacahe, máesenimuríhapa ema Jesús ena máimitureana. Máichavacapa:

—Éti ímatíhi eta tacamunuqueneanahi eta iáchanevana, tétavicavahi eta iúricarevayarehi taicha máejerare eta ejaçapirayare eta máechajiriruva ema Viya, machanerahérayarehi. ²¹ Eti ejamurachahi puiti eta itaresirahi eta matapiravarecare te mamirahu ema Viya, tétavicavahi eta iúricarevayarehi taicha tjaracaheyare éma eta evarahaquenehi.

Eti iyauchavanahi puiti taicha eta epecaturana, tétavicavahi eta iúricarevayarehi. Títecapainapa eta evapinavairaya, éçavainapa, taicha eperdonachacareya me Viya.

²²⁻²³ Eti nuchaneranahi, járajapainapa eta sache ticatíanacaheanainapa ena achaneana, navarahainapa tíaquijicahéana. Típanarachaheanainapa. Nacatíanapicainapa eta

* **6:14-16** Ema apana Jacobo machichahi ema Alfeo. Ema apana Simón, tímíticarehi éma, náumurvainíhi ena revolucionárióana ticaijareanahi “cananístana”. Navaraha náquijica ena extranjeróana romanoana, énarípa nacapaque-recavacahi ena israelítana. Eta májúchirahí ema Lucas, ani macahehi: “...ema Judas mayehe ema Jacobo...”. Váipasera vecha te machichahípua ema Jacobo, téhevare maparapehipuca. Véchahísera eta mapapirahi eta májare ema Judas. Ticaijarehi Lebeo étapa eta Tadeo. (Te pivaraha pécha, pitanuca te Mateo 10.3 étapa te Marcos 3.16-19.)

Íjareana. Eta juca náichiraheyarehi, táichavenehi eta éhisiranuhi nuti Manerejirunuhi ema Viya. Váhiseru ecurami eta juca. Ene nacahehi eta nacatajivairahi ena profetanaini. Te ticatianacaheanahi, jecurisamurechavachucha, evapinavavare! ¡Tétavicava eta iúricacarevaya taicha ejacapainapa eta icuchirichuhi te anuma!

Éma Jesús máimitucahi nayehe ena tavayuaruanahi eta tájiparacana

²⁴ Tacahe, ema Jesús máechajicapa ena apamuriana achaneana, tímicutijiricavahi natiar-ihihi te mamirahu, tiyerehianahisera éna. Ánipa máicha:

—Éti evapinavapa eta ecaimahaquenerahi, páurehesamiyare éti. Tíchechuhainapa eta evapinairavainihi.

²⁵ Páurehesami eti esatuheherecanahi, taicha ichapenapa eta écuhairaya.

Páurehesami eti ecasamureana eta piesta, écarairicavahi, taicha ichapeyare íyairaya, ecatisamurevainapa.

²⁶ Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavanaranahi ema Viya, tivayuarahianahisera.

Vémunacayare ena ticatianacahaviana

(Mt 5.38-48; 7.12)

²⁷ Puítiripa eti esamanuanahi, numetacahe: Émunacayare ena ticatianacaheana. Ímereca eta iúriya nayehe ena ticaticahaheanahi. ²⁸ Eyaseaca ema Viya eta nayujarahuína nácani téchajicanahi eyehe. Eyujaraucha ena tíumehaheanahi. ²⁹ Te máehahepuca mácani achane te emira, vahi ecujicapa. Íjaracasa eta étachacaya eta emira. Te naverejicahepuca eta esacu, ísapayare. Te naverejicahevere eta ecámisa, énerichuvare ísapayare. ³⁰ Énaripa nácani tiyaseacaheanahi eta ecajirayare, íjaracaya. Te naverejicahepuca eta ímahaqueneana, vahi ecucamesa eta náimichaviraina. ³¹ Numetacahe eta apana: Te evaraha eta náuriraya ena achaneana eta eyehe, tituparacahe iúriyare éti eta nayehe.

³² Éti, tájina ecunachacarevaimahi eta me Viya, te nacarichuhi émunaca nácani témunacaheanahi éti. Apanasica témunarahiana ena máimatirahanahi ema Viya. ³³ Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tíurianahi eyehe. Apanasica títsirijicavanahi ena máimatirahanahi ema Viya. Tituparacahe ecachuricavacayare eta iúriya. ³⁴ Téhevere nacarichupuca íjaraca nácani títsirijicavanahi te ticapucaheana, tájinavare tacunachacarevaina eta me Viya. Apanasica ena máimatirahanahi ema Viya tíjaracana ena títsirijicavanahi te ticapucana. ³⁵ Étisera émunacayare ena ticatianacaheana. Íchayareva eta táuriqueneana nayehe namutu. Íjaracavare nácani ticapucaheana. Vahi ecucuchapa eta náitsirijirápiyare. Máimaharine ema Viya. Éma tíjaracaheyare eta táitsivayarehi eta iúriyanahi. Eta tacahehi eta ímereuchirava eta machichaheira ema Tata Vicaiyaquene. Taicha éma, tétavicavahi eta máuriva nayehe namutu ena váinarajiqueneana énaripa ena máechavarahanahi eta máemunasiravacahi éna. ³⁶ EJapanurahiyareva, ecuti-yare eta majapanuirahavíhi ema Tata Vicaiyaquene.

Éma Jesús tímitucavahi eta vahi vicucune eta nájecapiravana ena apamuriana achaneana; vítinasera vicuneuchava

(Mt 7.1-5)

³⁷ Vahi ecunemahi eta nájecapiravana ena apamuriana achaneana, váhivare ecucacahivaca, machu étina táimicuñacahe me Viya. Te májecapavapuca mácani achane, vahi ecuvahara macaicuñavane, apaesa vahi macuicuñacahe éti ema Viya. Eperdonacha ena téjecapavana eyehe apaesa maperdonachahe ema Viya. ³⁸ Ecajirahiya nayehe ena achaneana. Éma Viya títsirijicavayare eyehe. Tímeapanávainapa eta máijjararuheyare éma. Te iúrihi éti nayehe ena achaneana, ema Viya, tétavicavayarehi eta máurivaya eta eyehe éti.

³⁹ Tacahe ema Jesús, ánipa tacahe eta máimiturapi, máimicutichirahi:

—Váiparinehi tichurucacanaímahi ena apinana púchuquiana, taicha tíáquiapaicavanayarehi te pusu. ⁴⁰ Émaripa mácani amaperu te escuelahipuca, váiparinehi macachuricaímahi mácani mayehe maestro. Tapaenumava te máitucapa, macutisarepa ema mayehe maestro.

⁴¹ Vahi táurica eta ecurerahi eta ánichichaqueneana nájecapiravana ena apamuriana achaneana. Tituparacahe ecuneuchava eta táichapeva eta éjecapirava étijiva. ⁴² Vahi tíuparacahemahi étupirica eta jácani ánichichaquenehi májecapiravahi ema eparaepiya. Tájina eviyahini eta econsejarapinahini. Ichapesera eta tatuparasirahehi étupirica eta éjecapiravanahi éti. Tapaenumava eta étupirisirapa eta íchavaquenévanihi, táuricapaini econsejacha ema eparaepiya tayehe eta máichavaquenévahi.

Éma Jesús máimicuticha nayehe ena achaneana eta tacahirahi eta yucuquiana

(Mt 7.17-20; 12.34-35)

⁴³ Tacutiquene tímaticarehivare eta táhiana eta yucuquiana. Jararihi eta tinicacareana. Jararihivare eta vahi tánicacare. ⁴⁴ Énerichuvare eta yucuqui tímaticarehi eta táurinisiva eta táhi. Étaripa eta sitavere, váiparinehi tíuchucaimahi eta táhihini narasahinahipucaini. Tásiha, eta ijicaqui váiparinehivare tacahimahi eta tahi cachicheruhinahini. ⁴⁵ Ene nacahe nácani tíuriana achaneana tatupiruvahi eta náechajirisirava taicha tíúrihi eta nasamure. Nácanisera achaneana váinarajipanereruana, vahi tíúrimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

Éma Jesús máimicuticha éna tisuapajirahiana énapa éna masuapajirairahana
(Mt 7.24-27)

⁴⁶ ¿Tájaha tacayema eta échajicanu éti, “Tata náquenu” ecahepa; tásiha vahi esuapahini eta nuvanairipiana?

⁴⁷ Nácani tisuapanuanahi náitachahivare eta nuvanairipianahi, téchemarahianahi táicha. Nuvaraha nímicutichinahe éna. ⁴⁸ Nacutiyarehi mácani títuca ticatupiareca peti, manacayarehi eta túmeana yucuqui emuruquiana. Tiúpenavacahi máicha eta masucuqueruana. Jéhesare te járajapapa eta muraca técatícava, tíamaquiha eta tíquiva, tísiamapa eta une, váipasera tacaeyayacahini eta peti, taicha máetupiricahi eta máepiyasirahi. ⁴⁹ Nararihivare éna tépiyacavana tisuapanuana, váhisera náitachahini eta nuvanairipiana. Éna nacutíhi éma máitucaraha tépiyareca peti. Vahi manacaimahi eta túmeana yucuqui, váhivare táusapiarahini máicha. Te járajapapa eta muraca técatícava, tísiamavarepa eta une, tacajimuyapaicapa eta apaquehe. Tíjahúchavapa tíáquiapaicava eta peti, témitiequenepa tamutu — máichavacapa éma Jesús.

7

Éma Jesús macanaraca éma mamusura éma capitán romano
(Mt 8.5-13)

¹ Tiuri, te títipiricapa éma Jesús eta máimitusiravacahi éna achaneana, tichavapa eta te avasare Capernaúm. ² Matiaríhihi éma achane apavasana. Comandante éma nayehe éna suntaruana romanoana. Capitán eta mávacure. Ticajumahi éma mamusura. Tíánehiripahi tépena. Ichaperinehi eta máéñamiravahi taicha máemunaruquenehi éma mamusurahi. ³ Tacahe, te masamairiricapa éma capitán eta matiaríhirahi éma Jesús, máevatacavacapa éna náiyamurianahi éna israelítana náichuhapanayarehi éma Jesús, macanarasinapanahini éma mamusura. ⁴⁻⁵ Tacahe, te náitecapauchapa éma Jesús éna vanairucanahi, nayaseacapa, ániha naicha:

—Mararihi éma capitán te viávasahi. Ichapemuri eta máimicatasirahavihi. Máemepiyarechahivare eta ichape peti eta víurujisirareva eta víyujarasirarehi. Tásiha puiti, tivanecahavihi víchuhapanávi picatajicahini picanarasinapanahini éma mamusura. Tatuparacahi pímicatacaini éma maena —náichapa.

⁶ Tacahe, éma Jesús tísapavapa tíyana, máhicavacapa éna. Étasera te tíánehianapa eta mapena, mavanecavacapa éma capitán éna máimaticasareana, nametapana éma Jesús. Ániha naicha:

—Tata Jesús, éta juca máechajiriruvahi éma capitán: “Tata, vahi picucaéñamacava eta pítesiraina éta nuyehe, taicha vahi táuricahini písiapauchanusamihini te nupena. ⁷⁻⁸ Éta tacahe, vahi nupatsicavahini nútíjarúvainahini níchuhapanávi. Németeaca tarataharichu picavanairipi éta picanarasiraya éma numusura. Taicha nútí nusuapahi te tivanecanuana éna anuquehepananahi éta nuyehe. Nútiripa nusuapacarehivare nayehe éna nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca éma nuvaneru, enurujipa tisuapanuvane” macahepa.

⁹ Te masamapa éma Jesús éta juca, ichaperinehi márami éta yátupirahi macasiñavairahi éta mayehe. Máichavacapa éna téhicanapahi:

—Numetacahe: Nájina nímaha émanaina víjaneana israelíta mácutini éma maca achane apavasana éta macasiñavairahi éta nuyehe —máichavacapa.

¹⁰ Tacahe, nacarinepa tichavanahi éna vanairucana. Te títecapanapa, náimaharinehi éma macajumaquenehini, tinaracaripa.

Éma Jesús macaechepuca éma amaperu máépenaquenehi, suchicha esu esena suépenaimaquene

¹¹ Te táequenepa éta juca, tíyanavarepa éma Jesús tayehe éta avasare ticajjare Nain. Náehicapahivare éna máimitureana, énapa éna camuriqueneana achaneana. ¹² Te títecapanayarepa te avasare nácapajicavacapa éna achaneana tíámanapahi éma máépenaquene, náecarayarehi. Camurianapahivare éna achaneana téhicanapahi. Éma máépenaquenehi,

macarichuhi suchichahi esu esena suépenaimaquenehi. ¹³ Eta máimairahi ema Viáquenu, majapanurinehi esu esena. Tásiha, máichapa:

—Vahi picuiyaha —macahepa.

¹⁴ Tásiha, mapauchapa ena tiámanapahi ema máepenaquene. Titupihanapa éna. Máemama-hicapa eta macajone. Tásiha, macahepa:

—Nuchicha, núti nuvanecavi, pécheputa —macahepa.

¹⁵ Enevanerinehi téchepucapa ema amaperu máepenaquenénihi. Téchajicapa ema amaperu. Tásiha, ema Jesús máijaracapa esu maena. ¹⁶ Tacahe, ichaperinehi tiáramicarehi eta juca nayehe ena camuriqueneana achaneana. Ánipa nacahe:

—Tétávicava eta macunachacareva ema Viya. Jéhevare ema maca achane yátupiquene profeta, mavaneruhi ema Viya. Tétávicava táurisamurecareva eta máuchusirahi te vimuri —nacahepa.

Ena apamuriana ánvare nacahe:

—Ema Viya tiúcupauchahavihi tímicitapanahávihi viti machaneranihi —nacahepa.

¹⁷ Eta juca máichaquenehi ema Jesús, téchacarevanepa tamutu avasareana te návasanahi ena israelítana. Títecavarepa te táyerehiqueneana avasareana.

*Ena Juan Tícachasiricarahi mavanecavacapa ena máimitureana
(Mt 11.2-19)*

¹⁸ Énerichuvare ema Juan, te mávihahi te cárcel, masamairiricapa eta juca taicha nameta-capa ena máimitureana. ¹⁹ Tacahe, máevatacapa ena apinana, nayaserepanayarehi ema Jesús te yátupihipuca émaripahi ema Cristo ema macuchapaquenehi. ²⁰ Tacahe, ena vanairucanahi me Juan náitecapauchapa ema Jesús. Nayaserecapa, ánipa náichahi:

—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi. ¿Téheserapuca vímijanavayarepuca vicuchapa? —náichapa.

²¹ Eta náitecapauchirahi ema Jesús, éma ticanararecaichahahi ena nacajumaqueneana, énapa ena nacajaraqueneana. Máquijicavare ena éreanana tiávahácanaahi nácani achaneana. Macaimairicavare ena maveraqueneana púchuquiána. ²² Tacahe, ema Jesús majicapavacapa ena vanairucanahi me Juan. Máichavacapa:

—Nuvaraha ímaracaya eta níchaqueneana puiti. Nucaimairicavacaipa ena púchuquiána. Nímipaisiraipa ena masariana. Nucanaracavacaipa ena leprosoana, énapa ena túhuquiána. Nucaechepusiravacaipavare ena náepenaqueneanaini. Énerichuvare níchuhahi ena páureana náeneuchava apaesa náuchuha. Tásiha, eyana emetaca ema Juan tamutu eta níchaqueneanahi. ²³ Vaipa macueñamava ema Juan eta nuyeha. Tétavicavapa eta máuricacarevahi éma, te ticasañavahi eta nuyeha —máichavacapa ema Jesús.

²⁴ Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanerechuyare ema Juan. Te jácani vuíchaha nacaratcahíni éma, te eyanapa te mávapahi apaquehe te mávihahi, ¿tájaha eta epanerueana tayehe eta macame-tarairuirahi? Éti ímijachavaipapuca mamapachichijiririvaichucha eta máechajisirahi tacútihi te vímararaca eta taflurena eta acutena te tacayamuririjicahi eta técativava. ²⁵ Ímija-chaipavarepuca tavayuaruhi ema tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, váhivare tyanaimahi te mávapahiana apaquehe. Manasiqueneayarehi te jácani tiúrina

peti. ²⁶ Nuyaserecahe: ¿Nájahapuca ímijachahi éma? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana. ²⁷ Ema maca Juan émara máechajisiquenehi ema Viya eta te Sagrada Escritura, ánipa macahehi: “Nuvanecayare ema títapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare” tacahepa eta Sagrada Es-critura. ²⁸ Núti nutupiruva numetacahe: Ema maca Juan, nájina mácuti nayehe ena achaneana. Tétávicava eta macunachacarevahi. Iápajupanavahisera eta ecunachacarevahi eti nuchaneranihi, apaesachicharipa eta ecaicutiarairahi eta mapanereruanahi ema Tata. ²⁹ Ena achaneana, énaripa ena tisipecaturarahianaini, náimatiacahi ema Juan eta mavanecasivahi me Viya. Nasuapahivare eta mametarairuana ema Juan. Eta tacahe, ticaicachasianapa mayeha. ³⁰ Énasea ena fariséoana énapa ena máestroana, éna máisapava-rahamahi nacaicachasihini mayeha ema Juan. Témeapurerecavanaripa eta náurivayarehini maicha ema Viya.

³¹⁻³² Etiarihihi eti achaneana puiti juca sácheana, eta emasuapajiraivahi, nímicuti-chahesa ena amaperuana tiúteruanahi. Apapipijichucha eta nacayemaqueneanapahi. Ema apana macahepapuca: “Vépiyacapa eta piéstachicha”. Énasea ena apamuriana vahi

náisapavahini. Tásiha, ema apana macahepuca: “Vépiyacapa eta ecari”. Váhivaresera náisapavahini. ³³ Ema Juan Tícachasiricarahi, te tímerecavapa, muraca eta máimiturapihanahi. Eta manicasareana, vahi tácutihini eta nanicasareana ena achaneana. Nararihiserá te emuri ena tépiyaequenehanahi éma. Náimijachahi mávaháruhi ema éreana. ³⁴ Núti Manerejirunuhi ema Viya, eta nítECApauchirahepa, nucachaneheripa eti achaneana eta enisirahi. Etiarihivaresera eti épiyaequenehanuhi: “Ímaha ema maca, cánisuiquitataji, cávahárasí. Macachanevacapaipa ena cóbrarecarahianatataji énapa ena apamuriana nasipecurarahiqueneanahi”. ³⁵ Éti épiyacavapa épururahi, ticutirinehi yátupinahini échemarahihini. Tétavacavahisera eta éjecapiravahi taicha eta emasuapajiravahi. Te yátupihípucaini échemarahihini, ímatinuhini eta nucavanahirahi eta me Tata*.

Ema Jesús ticaichuhacasíhi te mapena ema fariseo ticaijarehivare Simón

³⁶ Matiarihíhi ema achane ticaijarehi Simón, fariséohi éma. Macumpirachapa ema Jesús, manipana te mapena. Masuapahisera ema Jesús. Tíyanapa. Te tíuripa eta tinicacare, téjacapa te mesa. ³⁷ Susamairicapa esu ésuna esena tisipecaturarahinihi eta matiaríhirahi ema Jesús te mapena ema fariseo. Tásiha, tíyanapa supauchahi ema Jesús. Suámapaipa eta bótechicha. Tínicapahi eta táijijequene perfume tasívachaquenehi. ³⁸ Tépuycapa te máivapeana ema Jesús. Tíyahacavapa, táetsipapevachapa eta sutsera. Suájahapa te suchutimaca. Tásiha, suépusapevachavare eta suámaquenepahi perfume, sutsiucapevachavare. ³⁹ Tacahe, eta máimairahi ema fariseo eta juca, mapanerequenehapa. Téchajicapa te masamure: “Te yátupinahini profetaínahini ema maca, máimatiacaripahini esu suca esena eta susipecuraravatatájihi. Vahi táuricahini suémamacahípa” macahesamurepa.

⁴⁰ Émasera ema Jesús masamahi eta mapanereruhi ema fariseo. Máichapa:

—Simón, jucarihi nuvaraha numetacaviya.

Ema fariseo majicapapa:

—Nímahaseji, pímetacanu, maestro —máichapa.

⁴¹ Tacahe, ema Jesús máimicutiarachinapa, máichapa:

—Natiarihi ena apinana ajairana ticanteveanahi mayehe ema rico. Ema émana tican-tevehi quiniento; ema apana ticantevehi cincuenta. ⁴² Tacahe, vahi náratahahini navachachahini eta nanteveana. Tásiha, maperdonachavacapa ema rico ena apinana. Tiuri puiti, nuyaserecaviyare. Ena nani apinana, ¿nájahapuca ema témunacapanahi ema rico? —máichapa.

⁴³ Majicapapa ema Simón:

—Ticutimahi ema tisintevapanahi.

Tacahe, máichapa ema Jesús:

—Pímahaipajira.

⁴⁴ Tacahe, ema Jesús máimaracaripahi esu esena. Tásiha, máichapa:

—Pípanereaca esu suca esena. Puítíhi, te nusiapapa te pípena, vahi pímisipacahini eta nívape. Ésusera esu suca esena tisipecavachanuhi te sutsera, tíájapevachanupa te suchutimaca. ⁴⁵ Píti vahi pítsiucanuhini eta pijacapiranuhi. Ésusera, íchapemurihi eta sutsiucapevachiranuhi. ⁴⁶ Váhivare píámasichanuhini eta aceite eta pijacapiranuhi. Ésusera esu suca esena tisipecavachanuhi eta te táijijequene perfume. ⁴⁷ Yátupi tisipecaturainihi esu suca. Numetacaviyaresera, nuperdonacharipahi ésu tamutu eta supecaturanaini. Eta tacahe, íchape eta suímeresirahi eta yátupirahi eta suémunasiranuhi. Nácanisera apaesarichuhi eta napecaturanaini, apaesarichuhivare eta námunaraiva, taicha apaesarichuhivare eta najacapirahi eta nayehe perdón.

⁴⁸ Tacahe, ema Jesús máichapa esu esena:

—Vahi pícuéñamava, nuperdonacharipa tamutu eta pipecaturanainihi.

⁴⁹ Tacahe, ena natiarihiqueneanahi chimaracanáhi náejaruanahi te mesa nacahepa te nasamureana: “¿Nájahapuca ema maca ticaemuñavahi narataha maperdonacha eta pecatuaana?” —nacahepa.

⁵⁰ Émasera ema Jesús máichapa esu esena:

—Táuricapa píyana. Yátupi eta píúchuchairaya táichavenihi eta picasiñairanuhi.

8

Natiarihihivare ena esenana tíátianapahi ema Jesús te mapaisihapahi tayehe eta avasareana

* 7:35 Eta juca mayeherepi proverbio ema Jesús te máechajiriruva, ani tacahe: “Eta téchemarahicare, éta nacunachihare namutu ena tachichanaveana”. Tatiarihi eta tacayemaquenehi tayumurevahi.

¹ Te táequenepa eta juca, tiyanavarepa ema Jesús, tipaichi tayehe eta tasimutuqueneana avasarechichana. Ticametarairupahi eta máechajiriruva ema Viya eta náuchucuirayare ena ticasíñavanahi mayehe, machanerananayarehi. Náehicapahivare ena dócequeneana apóstoleana. ² Énerichuvare náehicapahi ena esenana máepachiaruanahi nayehe ena éreanana tiávahácanainihi. Sutiarihipahi esu María Magdalena, máepachiaruhi nayehe ena siétequeneana éreanana tiávahácanainihi ésu. Natiarihihivare ena apamuriana esenana macanararuanahi tayehe eta apapananenejiqueneanahi najumanainihi. ³ Sutiarihipahi esu Susana, ésupa esu Juana, mayena ema Chuza. (Ema Chuza, mayehehi empleado ema Herodes, téchahi tamutu eta máimahaqueneana ema Herodes.) Maveranahivare ena apamuriana esenana, tiámauchavanapahi eta nirure, náitátirapahi ema Jesús, énapa ena apóstoleana.

Eta máimicutichaquenehi evaraqui tacaevaquenehi te apapananeneji máteji te apaquehe (Mt 13.1-9; Mr 4.1-3)

⁴ Te jena sácheanahi, camuriana ena achaneana tiyananapaipa napaucha ema Jesús. - Tiásihanapahi te avasareana. Te máimahapa éma ena camuriqueneana, máechajicavacapa; máimicutiarachinapa eta máimitusiravacahi. Ánipa máicha:

⁵ —Matiarihi ema émana achane. Tévapanaahi te máesane. Tásihasera, eta mapaisirapahi témiricapaipapuca eta evaraqui te achene. Eta nanucuiraparacahi ena achaneana, nácatayacapaipa eta evaraqui táemiriruanapahi. Táimahapa eta cáyure, tanicapa. ⁶ Tásiha, eta apana evaraqui témiricapa te máripahi apaquehe. Támarucainipa, tásihasera tájjijicapa eta sache taicha muracapahihi eta apaquehe. ⁷ Eta apana evaraqui témiricapa te taparereji eta itapequiji. Tiúrinainihi eta táimarusira, étasera eta itape tacachuricapa eta tajurusirahi, táemuriachapa. ⁸ Eta apana evaraqui témiricapa te tiúrina máteji. Tijurucarahihi eta táimarusira. Tiúrinahivare eta tahi. Tájaracahi ichapemuri eta tahi —macahepa.

Te titapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya —macahepa.

Ema Jesús máitametacavaca ena máimitureana eta juca máimiturapíhi (Mt 13.10-23; Mr 4.10-20)

⁹ Tacahe, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi. ¹⁰ Émasera máichavacapa:

—Ema Tata tituparacanu níametacahayare éti eta juca mapanereruana táequenereruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahi máejerémahi eta nacaicutiarairaya eta nasamaquenehi. Tavaraha napanerechinavaya. Te vahi yátupina eta navaraira nasuapa, váhivare nacaicutiaraimahi eta nímiturapiana.

¹¹ Étara eta juca tacayemaquenehi: Eta evaraqui tímicitijiricavahi eta máechajiriruva ema Viya eta nímiturapianahi. ¹² Natiarihi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamatisicavaca eta nasamaquenehi, mamavarairahi nacasiñanuhini apaesa nucuchuhavacayarehini. Éna, nacutihí eta máteji muracapahi te achene. ¹³ Natiarihivare ena apamuriana achaneana, nacutihí eta máteji máripahi. Te nasamararaca eta nímiturapiana, nasuapa, tiúrisamureanarínehi. Váhisera naratahahini nacaravahuhini yátupinahíni. Vahi nácutihíni eta evaraqui tiúpárehi. Ánipirichu eta náehisirahi. Tíñajicavanávane taicha eta náimairavahi eta nacatajjivairahi. ¹⁴ Natiarihivare ena apamuriana achaneana nacuti eta máteji te távihahi eta itapequiji. Énerichuvare nasamaracahinéni eta nímiturapiana. Napaneréquenehahinéni, tahapapiricavacahisera eta jácáni táicharacavayare eta náitaresira. Váhivare náinajicahíni eta tacaéñamarasiravaca eta tájjiparacana, étapa eta navarairahi tirricochavana. Váhivare náinajicahíni eta náichirahi eta tamauriqueneana. Tamutu eta juca táemetavacahi eta navarairahi téhicanuana. Tamapurujíhi eta najacaparíhi eta nímiturapiana. Tájjina vahi nacaemataneacahíni ema Viya. ¹⁵ Natiarihisera ena apamuriana achaneana nacutihí eta tiúrina máteji. Éna, nasamaracahi eta nímiturapiana, náunacahi yátupi te nasamureana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Vahi nayacujimahi.

Ema Jesús máimicutiarachava eta lámpara eta máimituresira (Mr 4.21-25)

¹⁶ Ánivare macahe:

—Súnsuanahi nácani tiyustacanahi eta lámpara namicahuyarehi, tásihasera, najihapicapapucaini, nanacavarepucaini te tápecu eta náetsatsame náimasirare. Vahi tamicauchaimahi. Tacamunuhi nanacayarehi te anuquehe. Jéhesare ticaecherasareyarepa tamutu

apaesa nácani tisiapanapahi, tímairicanayarepahi. ¹⁷ Tayanapanepuca ticayumuruquianahi, tamutuyarehisera ticaechera jácani tayumurevanahi. Tájina tépacuchaimahi jácani najajairairuvanahi. Tamutuyarehi téchacareya.

¹⁸ Eta tacahe, ecaquiñaicha yátupina eta juca. Taicha mácani máituruequenehahi yátupi, tiápajucavayarehi eta máitupajijiasravayarehi. Mácanisera apaesarichuhi eta máitucaquene, te váipa mapanerequenehahini, máemitiscayarehi eta máitucaquenénihi.

Suítecapauchapa esu maena ema Jesús énapa ena maparapenaveana
(Mt 12.46-50; Mr 3.31-35)

¹⁹ Tacahe, esu maena ema Jesús énapa ena maparapenaveana títécapanapa te peti te máimituresihahi ema Jesús. Váhisera náitujicavahini nasiapahini taicha tiyututucavanahi ena achaneana. ²⁰ Nametacapasera ena apamuriana achaneana ema Jesús:

—Esu pémunaruquenehi pena énapa ena piparapenaveana nararihi ani te aneca, navarahahi téchajicaviana —náichapa.

²¹ Émasera majicapavacapa:

—Yátupi némunacavacahi esu meme énapa ena nuparapenaveana. Nararihisera ani te juca nuchacaya ena némunaruanahivare, nuparapenapanahi. Taicha tisuapajirahianahi éna tayehe eta máechajiriruvana ema Viya, ticaemataneacanhivare éma —máichavacapa.

Ema Jesús macaesamirica eta táepacusirahi eta une étapa eta técticava
(Mt 8.23-27; Mr 4.35-41)

²² Étana sache, ema Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa.

Tacahe, tiyananapa tiánuecanayarehi. ²³ Eta napaisirapahi, ema Jesús tívecapa tímacapaipahi. Tacahe, járajapainapa eta muraca técticava. Tépacucapa muraca eta cáquiure. Tasiapauchapaipa eta une te pacure. Tipicanapa ena máimitureana, taicha tímaticavanapa eta náecharisiravayarehi. ²⁴ Tacahe nacajamicapa ema Jesús, náichapa:

—¡Maestro! ¡Maestro! ¡Péjamica! ¡Pímaha vécharicavainapa taicha eta tépacuca!

Enevanepa téchepucapa ema Jesús. Macamatnacapa eta técticava étapa eta táepacusirahi eta une. Tésamiricavapa tamutu. ²⁵ Tacahe, máichavacapa ena máimitureana:

—¿Tájaha tacayema vahi ácasiñavahini eta nutiarihirapahi eta eyehe? —máichavacapa.

Énasera tiáramecanapa. Tésenijiricacanapa, tásiha nacahepa:

—¡Tétavicavapa eta máitupajijiasirava! ¡Jéhesare, yátupiquene eta émairahi machichahi ema Viya! Taicha eta mavanairipi, tamutu tasuapahi eta técticava étapa eta une —nacahepa.

Ema achane návaháruanahi ena ichapemuriqueneana éreanana
(Mt 8.28-34; Mr 5.1-20)

²⁶ Tacahe, títécapanapa te apachara tayehehi apaquehe eta provincia Gadara. Te apachara tacanaraipahi eta provincia Galilea. ²⁷⁻²⁹ Te tiúcupaicapa ema Jesús, énapa ena máimitureanahi, máuchujichavacapa ema émana achane. Ema maca achane mávasaichuhi tayehe eta juca avasare Gadara. Tájnapasera máimatiyahini mayanahini te peti taicha namaurishichaipahi ena camuriqueneana éreanana tiávahácanahi. Ánaquiaparipa eta návahásirahi. Nametapanéni ena achaneana nacarataca. Náitiaca te ichapepi carena étapa te enure, te náimahavarepa tacananesica naicha ena tiávahácanahi. Émasera, tétavicavaipahi eta matumevahi. Mavechuquimurivare eta carena máitihanahi. Tijunavare, tijunavarehi te mávaphiana naicha ena éreanana. Macapenajuechavacahi eta ecariana. Mamuriarehi eta máitaresirahi.

Tacahe, te máimahapa eta matiarahirahi ema Jesús, mapauchapa. Tépuycapa te mami-rahu. Ema Jesús mavanecavacapa ena éreanana náinajiaca ema achane. Ema achane tipiararecapa. Ánipa macahe:

—¿Tájaha picha piteca pipachanu, piti Jesús, Machichaquenevihi ema Viya? ¡Pájapanunu vuíchaha picuvanecanu ánaqui te nucaicuñaiyayare! —máichapa.

³⁰ Tacahe, ema Jesús mayaserecapa:

—¿Tájaha píjare píti?

Ema achane majicapapa:

—Núti nucaijare “Nacapanaharu ena ichapemuriqueneana éreanana”.

Éma, tacahehi eta majicapirahi ema Jesús taicha camurianahi ena tiávahácanahi.

³¹ Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihi návihayare éna. ³² Tatiarihivare eta camuriqueneana cúchiana. Tinihicanahi te táemiripaisine eta masíhi. Ena éreanana nayaseacapa ema Jesús máisapahini

nasiapahacavaca eta cúchiana. ³³ Tacahe, ema Jesús macuchuchujicavacapa te máquehe ema achane, máisapahivare nasiapahacavaca eta cúchiana. Te tasamapa eta cúchiana eta nasiapahasiravacahi ena éreanana, tijunaparacanapa témiririjicanapa te tachaui eta cáquiure. Téririjicanapa tamutu.

³⁴ Natiarihivare ena tijaneacanainihi eta cúchiana. Te náimahapa, tíramecanarinehi. Tiyananapa tijunanapaipa timetajiricanapaipa nácani nácapajiruvanapahi, étapa te avasare namutuvare nametaca. ³⁵ Tíaramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana. Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinariipahi máichiravainahini. Ticamuirihaipahivare. Tásihasera, tipicanarinehi ena achaneana. ³⁶ Tavetijipa te náitametacapa ena tímahanahi eta macuchuchujisirahi ena éreanana te máquehe ema achane. ³⁷ Tacahe, te nasamairiricapa, namutu ena achaneana ticavasanihi te Gadara, vaipa napatsicavahini máitecapauchavacahini ema Jesús taicha náefñamaipahi táchahémahivaréni eta apamuriana náitátiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa. ³⁸ Tacahe, ema achane mayaseacainipa ema Jesús máisapahini máehica. Émasera máévatacaichucha machava te mapena. Ánipa maicha:

³⁹ —Piyanachucha pichava te pipena. Pimetajiricaya eta majapanuiravihi ema Viya eta macanarasiravihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

Ema Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Mr 5.21-43)

⁴⁰ Te títecavavarepa ema Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisamureanarinehi eta náimairahi éma. ⁴¹ Títecavavarepa ema émana achane ticaijare Jairo. Ema maca achane, tuparairucahi tayehe eta náurujisirareva tayehe eta jena avasare. Tacahe, ema maca achane tépuyucapa te mamirahu ema Jesús. Mayaseacapa macatajicahini mayanahini te mapena, macanarasinapanahini esu machicha. ⁴² Taicha ésunaracavahi esu machichahi. Doce añoripahi eta suhañorahi. Téñamajiricavaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha náratavapahini eta napaisirapahi.

⁴³ Sutiarihivare esu apana esena, sucajumaquenehivare. Doce añoripahi tayerevahi eta suhitiarevahi. Ichapemuripa eta sutanusirahi ena médicoana, váhisera sucanaracahini ésu. ⁴⁴ Tépiyacavapa témeñahava te maquecu ema Jesús. Suémamajiacapa te tacheyarapi eta mamuiríha. Enevanerinehi tinaraca ésu. Tícheccapa eta suítine.

⁴⁵ Émasera ema Jesús masamarichucha eta suémamajiasirahi. Macahepa:

—¿Nájaha témamajiacanuanahi? —macahepa.

Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyututucavanahi te pichacaya. Váiparinehi tímaticarémahí tájahapuca nácani témamajiacavianahi —náichapa.

⁴⁶ Émasera ema Jesús macahevarepa:

—Nacañárihi témamajiacanuanahi taicha nusamavahi núti eta nuncanarasirahi eta jumare táichavenehi eta nítipajjiasiravahi —macahepa.

⁴⁷ Ésusera esu esena, tímaticavapa eta máimatirahi ema Jesús eta suémamajiasirahi, tiyanapa supauchahi. Tépuycapa te máivapechacaya. Tiyayacereripa eta supisirahi. Sutupiruvapasera timetaurecavahi eta ésuirahi témamajiacahi. Ánipa sucahehi:

—Tata, nútira némamajiacavíhi, nuvarairahi nunaraca tayehe eta nujumahi. Nusamavai-pasera eta nunarasirahi —suíchapa.

⁴⁸ Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pipena —máichapa.

⁴⁹ Téchajiricavaichahahi ema Jesús eta suyehé esu esena, títecapanecha ema émana achane tíasihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

⁵⁰ Émasera ema Jesús, te masamapa, máichapa:

—Vahi picuarameca, váhivare picueñamava. Pácasiñava eta nuyehé. Tinaracayareichu esu pichicha —máichapa.

⁵¹ Tacahe, tiyanavanepa ema Jesús. Te títécapanapa, vaipa máisapahini ema Jesús nasiapahini ena achaneana. Nacarichu tisiapanahi ema Pedro, ema Jacobo, ema Juan, émapa ema suiya esu amaperu, ésupa esu suena. ⁵² Natiarihihisera ena achaneana te tajuhe. Tiýahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha —máichavacapa.

⁵³ Técavanarichuchasera eta mayehe éma, taicha náimahi eta suépeniraipahi. ⁵⁴ Tacahe, ema Jesús macaratacapa eta suvahuana. Tásiha, máichapa:

—Nuchicha, nuvanecavi: Péjamica, péchepuca —máichapa.

⁵⁵ Tacahe, esu amaperu tichavapa títareca. Tásiha, téchepucavanepa. Ema Jesús mavanecavacapa ena ticachichana nájaraca eta sunica. ⁵⁶ Ichaperinehi eta náramirahi ena ticachichana. Émasera ema Jesús matuparacavacapa vahi nacuehajisiha eta náimahaquenehi.

9

Ema Jesús mavanecavacapa ena dócequeneana apóstoleana, napaicayare tamutu avasareana

(Mt 10.5-15; Mr 6.7-13)

¹ Ema Jesús macurujimurihapa ena dócequeneana mayeheana apóstoleana. Tacahe, májaracavacapa eta náitupajijiasiravanayare naratahairayare náquijica ena éreanana, naratahairayareva nacanaraca nácani nacajumaqueneanahi. ² Tásiha, ticavanahianapa ticametarairuanayare eta tacamunucarevayarehi náeneuchiravayarehi ena achaneana, náinajisiraina eta napecaturana, náehica ema Cristo. Ticanararecanayarepahivare nácani nacajumaqueneanahi. ³ Eta mavanesisrayacahi, máichavacapa:

—Tájina iámaimahi eta eyereruva. Váhivare ecucayupairiquipahi. Tacuijavare ecaniruru-cuhaina te alforja. Étaripa eta plata, tacuijavare iama. Étanainrichu eta emuiriha iámayare.

⁴ Enasinumayarepahisera te jácani peti nayehe ena tiúrihi eta najacapiraheya. Tiámainucava te táitecapa eta eyanirayareva. ⁵ Téhesera nacuijapuca nacubaraha najacapahe tayehe te jácani avasare, váhivarepuca nacubaraha nasama eta emetarairuya, iúchucavanepa. Étatapevachavanumayaresera eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehíni —máichavacapa.

⁶ Tacahe, tiyananapa ena apóstoleana. Tamutu napaica eta avasarechichana. Ticametarairuanapaipahi eta máechajiriruva ema Viya, eta viúchucuiraya majacapirahaviyare éma. Ticanararecanapaipavare ena nacajumaqueneana nácani náetupiaruanapahi.

Ema Herodes masamairiricavare tamutu eta juca máichaqueneanapahi ema Jesús

(Mt 14.1-12; Mr 6.14-29)

⁷ Tacahe, ema aquenucahi Herodes masamairiricavare tamutu eta tiáramicareana máichaqueneanahi ema Jesús. Váipasera máitucarehíni. Taicha masamairiricahi náimijachahiji émahí ema Juan téchepucahi te máecari. ⁸ Ena apamuriana náimijachahivare téchepuca ema antivuini profeta. Ena apamuriana náimijachahivare ema Elías. ⁹ Émasera ema Herodes macahepa:

—Nútijacaruvahisera nucavanairipi náechatinuca ema Juan, eta máepenirahi. Puiti, ¿nájahapuca ema maca nusamaiririruasaparacahi eta máichira eta tiáramicareana? Nuvarahasa nímatini ema mácara —macahepa.

Ema Jesús máitaparaha máenicavaca ena camuriqueneana achaneana

(Mt 14.13-21; Mr 6.30-44; Jn 6.1-14)

¹⁰ Tacahe, tichavanapa ena apóstoleana eta napaisirahi. Nametacapa ema Jesús tamutu eta náichaqueneanapahi. Tásiha, éma mámamurihavacapa te mávapahi, tinapaicahi eta avasare Betsaida. ¹¹ Téhesera náechavarepa ena achaneana eta macaijuhehi ema Jesús, tiyananavarepa nacapayacahi. Émasera majacapavacaichucha, máimitumuriharipavare tayehe eta náitaresira ena machaneranahi ema Viya. Macanaracavare ena nacajumaqueneanahi.

¹² Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásiha, náichapa:

—Táuricapa pivanecavaca ena achaneana nayanapa natanuca eta nanisiha étapa eta náimasihaya te avasarechichana tachacayarahanahi eta juca viáviyahí, taicha ani, tajina náviyavaimahi eta te juca —náichapa.

¹³ Tásiha, ema Jesús majicapapa:

—Étina, íjaraca eta nanica.

Énasera náichavarepa:

—Tájina viviyaimahi eta nanicahini ena nani achaneana. Jucárihinéni cinco eta pan, apiquipa jima jitaruca. Váiparinehiserá nárataimahi. Tayanapane tatiarihinapucaini eta vivacharesihahini eta tinicacare, váiparinehivaresera nárataimahi ena nani camuriqueneana achaneana —náichapa.

¹⁴ Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásiha, ema Jesús máichavacapa:

—Evaneca náejahapaicavaca ena achaneana. Cincuentavacainapahi eta náiputsitsisiravaina —máichavacapa.

¹⁵ Énepasera tacachehi naicha ena apóstoleana. Tásiha, ticaejarecanapa namutu. ¹⁶ Tacahe, ema Jesús mavehapa eta cincoquene pan étapa eta apiqui jima. Máesenicapa te anuma. Mahasulupayachaipa ema Maiya eta máenisiravacayarehi ena camuriqueneana achaneana. Mayuvetutuhecavacapa, máijaracapa ena apóstoleana. Náijaracapasera namutu ena achaneana. ¹⁷ Namutupa tinicana, tísatuhevacapa. Váhicaruvare náitahini eta tinicacare. Dócehi save ichapehiana tínicahi eta námacharájiana.

Ena Pedro máimereucha ema Jesús eta émairahi Cristo

(Mt 16.13-19; Mr 8.27-29)

¹⁸ Étana sache, ema Jesús énapa ena máimitureana tíapechavare típutsiacavana, tiyanapapa tayehe eta nayujarasihayarehi. Te títavanapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehé? ¿Nájahapuca náimijachanuhi éna? —macahepa.

¹⁹ Éna najicapapa, ánipa naicha:

—Ena apamuriana náimijachavilhiji téchepuca ema Juan Ticachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antiviuni, téchepucahi —náichapa.

²⁰ Ema Jesús mápechavare mayaserecavaca éna:

—Étiyapa, ¿nájaha ímijachanuhi nútí?

Ema Pedro majicapapa:

—Pítira yátupiqueneví Cristo, piásihaquenehi me Viya —macahepa.

Ena Jesús tímereuchava eta máepenirayarehi

(Mt 16.20-28; Mr 8.30-9.1)

²¹ Tásiha, matuparacavacapasera ema Jesús nacuija nacumetaca eta émairahi ema Cristo.

²² Tásiha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunuanayare ena tuparairucana énapa ena aquenucarahana énapa ena escribánoana. Éna, tímicapacuanayareva. Mapanayareichuhisera sache eta nucaheyare eta népenirayare. Tásiha, nuchavayarehi néchepuca —máichavacapa.

²³ Tásiha, máimitucavacahi namutu ena achaneana, ánipa máichavaca:

—Nácani navaraha náehicanu, tacamunu náinajica tamutu eta tihapapiricana eta náehisiránuhi. Nacaravahuyareva eta nímiturapiana. Náijaracavare eta táimicapasiraina eta náehisiránuhi. ²⁴ Nácanisera téñamanahi eta náitaresira, tíavamirahuanaya eta náehisiránuya, énajivayare ticamítiequenehavanaya eta náitaresira. Énasera nácani yátupihí tjaracavana téhicanuana, tayanapane táimicapacavacapuca eta náehisiránuhi, éna títujicavanayare tíuchucuanayare eta náitaresiranaya. ²⁵ Énerichuvare nácani tacaéñamararuanahi eta nacaimahaqueneirayare te juca apaquehe, tájina náimaequenehaimahi, taicha eta tacaéñamarasiravacahi tahapapiricavacahi tayehe eta náuchucuirayare. ²⁶ Énaripa nácani títisrihanapuca téhicanuana, náimitsirihapuca eta nímiturapiana, nútí apanava nutsirihayarevare nayehe ena nani. Nucaerajicainapa ena nani, nútí Manerejirunuhi ema Viya, te táitecapapa eta sáchevare nuchavirayare aquenucanuinaipa. Te jena sáchevare, námainapaipa nútí eta nujaraiva, étaripa eta majaraiva ema Tata. Nucachanépaipa ena sántoqueaneana ángeleana. ²⁷ Nutupiruva numetacahe: Puitiripa te etaracu éti, etiaríhi éti vahí épenavanéimahi, ímahanumayare eta nucatuparahairahi aquenucanuya nuti Manerejirunuhi ema Viya —tacahepa eta máimituresirahi ema Jesús.

Ena Jesús, tihapamaichava eta máimahi

(Mt 17.1-8; Mr 9.2-8)

²⁸ Tiuri, te táequenepe eta óchoquenehi sache, tiyanapa ema Jesús, tíapanahi te anuquehe mari. Tiyujaracayarehi. Mapananarichusera ena mámaqueneanahi: ema Pedro, ema Jacobo, émapa ema Juan. ²⁹ Tacahe, eta mayujarasirahi ema Jesús énapa ena mámaqueneanahi, tjáhúchavapa títisvachavahi eta máimahi ema Jesús. Apaimahipa eta mamira

étapa eta mamuiraha. Tétavicavapa eta tajapuvahi tajararasirahi tamutu eta máquehe. ³⁰ Tásiha, tíamicareanavarepa tímerecavana ena apinana ajairana. Téchajiricavanaripa mayehe ema Jesús. Ema émana, émahí ema víyarahaini Moisés. Ema apana, ema víyarahaini profeta Elías. ³¹ Tétavicavaipahivare tajararasirahi eta te natupihaiyahi. Náechajisi-haipahi eta macatajivairayarehi máepenirayarehi ema Jesús tayehe eta avasare Jerusalén. ³² Tavarahaipaichanéni tímaca ema Pedro énapa ena apinana machamurianahi. Téhesera te náimahapa eta tijararacahi te nachacaya, témitiacarinehi eta náechapuneana. Náimararacari-pahi eta majaraivahi ema Jesús, énapa ena apinana ajairana tiúcupauchanahi. ³³ Tacahe, te máimahapa ema Pedro eta nachavirayarepa ena nani apinana, témeñahavapa. Tásiha, macahepa:

—Tata Maestro, tétavicavapa táuricacareva eta viávihairahi eta ani. Tiúripanahipucaini vépiyacahini eta epenahuinapachuhini. Pipenahunarichuhini píti, mapenainarichuhivaréni ema Moisés, émapaini ema Elías —máichapa.

Váhinéni máimatiequenehahini ema Pedro tájahahipuca eta mavarahaquenehi macayema. ³⁴ Tacahe, eta máechajirisiravaichahahi, tájuhúchavapa tiúcupaichahi eta úcaji, tamuichavacapa ema Jesús énapa ena apinana ajairana. ³⁵ Tásiha, nasamarinehi eta mahu ema Viya, tayehe eta úcaji. Ánipa macahe:

—Ema maca ema yátupiquenehi nuchicha némunaruquenehi. Éma esuapayare —macahepa.

³⁶ Te tímatinapa eta mahu ema Viya nasamaquenehi, náimahapa ema Jesús, macarineipahi. Nájinaripa ena tiúcupauchanahi.

Tacahe, ena mapanana apóstoleana, tiyerehi eta namametasirahi ena apamuriana nachamuriana eta náimahaquenehi.

*Ema Jesús macanaraca ema amaperu mávaháruhi ema éreana
(Mt 17.14-21; Mr 9.14-29)*

³⁷ Te apanaquenepe sache, tiúcupaicanavarepa tayehe eta anuquehe mari návinehi. Natarihipavare ena camuriqueneana achaneana. Te náimahapa ema Jesús, tiyananapa nácapahi. ³⁸ Matiarihíhi ema émana achane te namuri ena camuriqueneana achaneana. Tipiaracapa muraca éma, ániapa macahe:

—Tata maestro, picatajicanupaini pípuchinanuini ema maca nuchicha. Émanaracavahi te numírahu. ³⁹ Mávaháruhi ema éreana. Macapiararerecahi técharipaicavavare ticarisasajacavare. Ichapemuri eta macatajivaira máicha. Vahi mávaraha máinajica. ⁴⁰ Néchajiacaripahinéni ena pímitureana. Váhisera náratayahini nacuchuca ema éreana tiávahácahi ema nuchichasami —máichapa ema achane.

⁴¹ Tásiha ema Jesús májicapapa:

—¡Tétavicava emasuapajiraivavaca eti achaneana! ¡Cúverarecaichapucaini eta nucamichirahenahini! Piama ani ema pichicha.

⁴² Témeñahavainípa ema amaperu, tápechavarepa tacañamacahi tiáquipaicavapa, téchari-ripaivavare. Émasera ema Jesús, máquijicapa ema éreana, muracapavare eta macajachirahi. Tásiha, májaracapa ema maiya, tinaracaipahi. ⁴³ Náramirinehi ena achaneana taicha eta tamutuirahi marataha ema Viya, máitupajijiasiravahi.

*Tiápechavare ema Jesús tímereuchava máepenirayarehi
(Mt 17.22-23; Mr 9.30-32)*

Nanasirichahahi napanerequenehahi ena achaneana eta juca náimahaquenehi. Ema Jesús mápechavare mametacavaca ena máimitureana. Ánipa macahehi:

⁴⁴ —Ecaquiña yátupina eta juca numetaruheya. Váhivare ecuemitisica. Núti Manerejirunuhi ema Viya, járajapainapa eta sácheyare tíjararecanuyare mácani achane nayehe ena ticitianacuananahi. Ticaratanuanayareva —máichavacapa.

⁴⁵ Énasera ena máimitureana váhiquene nácaicutiarahini eta macayemaqueneanahi. Taicha émarichuhi ema Viya tíjaracahi eta vuíchaha nácaicutiaraimahi. Váhivare napatsicavahini nayaserechahini tájahapuca tacayemahi eta máichiravacahi.

*¿Nájahapuca ema apóstole ticapichapuna?
(Mt 18.1-5; Mr 9.33-37)*

⁴⁶ Te táequenepe eta juca, ena apóstoleana ticapinarujiricacanapa nájahahipuca ema ticapichapunanahi. ⁴⁷ Émasera ema Jesús máimatiacavacapa eta náechajiririvanahi. Máichuhapa ema émana amaperuchicha, macatupihapa te namírahu. ⁴⁸ Tásiha, máichavacapa ena apóstoleana:

—Nácani tijacapanayare ena amaperuana níchavenéinahi núti, ena nani yátupi náimerecayare eta náemunasiranuhi núti taicha tímicutijiricavahi nútinahini najacapa. Taicha

nácani tijacapanuanahi núti, énerichuvare tacahehi eta najacapirahi ema Ticachichanu, ema tivanecanuhi. Nácani náechapajiricayare namutu ena nachamuriana, náemunasiravacahivare, énahi ena ticapicahupananayare te etaracu —macahepa.

*Nácani vahi ticatianacahaviana, éna tímicitacahaviana
(Mr 9.38-40)*

⁴⁹ Tacahe ema Juan mametacapa, máichapa:

—Tata Maestro, vímahahi ema émana achane máquijicavacahi ena éreanana te píjare ticuti-rinehi pítinahini píjaracahini eta máitupajjiasiravahi. Tásihasea, vicavacahi éma, taicha vahi víúmurivainahini —máichapa.

⁵⁰ Émasera ema Jesús máichapa:

—Vahi ecucavaca éma. Taicha nácani vahi ticatianacahavianahi, éna tímicitacahaviana —macahepa.

Ema Jesús macajachavaca ema Jacobo émapa ema Juan

⁵¹ Te jena sácheanahi tiánenehipaipa títecapa eta mayanirayarehi ema Jesús te anuma. Tásiha, tíjaracavaichaha eta mayaniranumayare te Jerusalén. ⁵² Macavanairipipa tiyanana ena títapumirauchanayarepahi. Titanucanayarehi eta máitecapihayare tayehe eta jácane avasare. ⁵³ Énasera ena samaritánoana vahi návarahahini najacapa taicha náimahahi éna eta matupiruirapahi te Jerusalén. ⁵⁴ Tacahe, ena apinana apóstoleana, ema Jacobo émapa ema Juan, tisemamajuheanapa eta namajacapirahi ema Jesús. Tacahe, náichapa éma:

—Tata Viáquenu, ¿pivarahapuca viyasesereca táemirica eta yucu tiásiha te anuma? Étaina táitapaimuriha ena náenatajiana, tácuti eta máichaquenehi ema profetaini Elías —náichapa.

⁵⁵ Tacahe, ema Jesús máimararacapa éna. Tásiha, macajachavacapa, máichapa:

—¿Tájaha tacayema vahi tétupicava eta epanereruana? Ticutipa vahi mávaháruhénahi ema Espíritu Santo. ⁵⁶ Vahi étaina tímitecanu nícuñacavacayare ena achaneana, nuti Manerejirunuhi ema Viya. Tímitecanuhi nucuchucuhavacayare éna —máichavacapa.

Tásiha, tiánucuhanapa te apachacaya te apanahivare avasare.

*Vínajicayare tamutu, te vívaraha véhica ema Jesús
(Mt 8.19-22)*

⁵⁷ Eta napaisirapahi te achene ema Jesús énapa ena máimitureana, nacainunapa ema émana achane, mavarahapa máehica. Ánipa macahehi:

—Tata, núti apanavare nuvaraha néhicavi te jácane pivarahaqueneyare piámianu.

⁵⁸ Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera núti Manerejirunuhi ema Viya, tájina nuviya nusiapihahini —máichapa.

⁵⁹ Te apanavarepa sache, máichuhapa ema Jesús ema apana máimiture apóstoleyare. Tásiha, ema majicapapa:

—Tata, nuyaseacavi písapanuhípucaini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

⁶⁰ Ema Jesús majicapapa:

—Pésamirica náecaracacaichaha ena máecharaireana. Tájina tájaracavimahi eta juca tíhapasamurerecavihi. Yare, péhicanu. Níjaracaviyare eta pémataneyare. Picametarairuyare eta máechajiriruvana ema Viya —máichapa.

⁶¹ Matiarihivare ema apana énerichuvare macahehi:

—Tata náquenu, núti nuvaraha néhicavi. Písapanusera nucametavapananumaya te nupena —macahepa.

⁶² Ema Jesús majicapavare:

—Mácane achane típaicapahi téyarecapahi vahi tichavaequenehavaimahi mámarairicahini eta mámaquene. Ene picaheyare piti, vahi pichavaequenehavaimahi tayehe eta tájiparacana. Taicha vahi nuvaraha mácane títajicavahi eta macametarairuira eta máechajiriruvana ema Viya —máichapa.

10

Ema Jesús mavanecavaca ena setentaqueneana, tímítirecanayare

¹ Te táequenepa eta júcana, ema Viáquenu Jesucristo manerejicavarepa ena setentaqueneana apamuriana máimitureanahivare. Tiyananapa ticametarairuanayarehi te avasareana mapaisineanapahi éma. Apinanavacapahi eta napaisirayare éna. ² Máichapa eta matuparasiravacahi:

—Tétavacavapa eta vicamunuirava ena tímícatacahavianaya tayehe eta juca vématane-repihi. Eyaseacayaresera ema Tata Vicaiyaquene májjaracahavi ena náimícatacahavi. Eta juca tímícutijiricavahi mácani achane eta macamunuiravahi ena tímícatacana eta máechati-jisiraya eta maharusura.

³ Puiti, névatacaheyare eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táíñehiqueneanahi. Étísera ecutiyaehi eta uvesachicha eta tamansuvahi. ⁴ Eta epaisirayare, tájina íámaimahi eta tratera, váhivare íámaimahi eta billetera. Váhivare íámaimahi eta eparupeva. Eyaiyauchavayarepahisera eta epaisirayarepahi te achene. ⁵ Te jácani peti ítecapihayarepahi, ani tacaheyare eta échajisirayare ena achaneana: “Ema Viya, tíurichaheyare éti te juca peti”. ⁶ Nararihiyare ena achaneana navarahaya eta náurivaya mayehe ema Viya. Eta échajisiravacayare, tatupiruvaya me Viya májjaraca eta náurivaya. Téhesera vahi nacuvamaha najacapahe, vahi eucaeñamacava nayehe, taicha énapa téchinavana. ⁷⁻⁸ Te jácani avasare, jácani peti eta najacapiahepuca, enasipanayare tayehe eta peti ítecapihahi. Vahi ecuepuru jácani tinicacareana náeniruheanayare. Étaripa jácani náesiruheanayare. Éti, táitsivayare eta ecaemataneasiranuyarepahi. Váhivare ecupamirahapahi ímacacuhapahi eta pétiána. ⁹ Ecanaracayarepahi ena nacajumaqueneana natiaríhiqueneanahi. Tásiha, emetacavacapaipa námutu ena achaneana eta núcupaisiraripa nuti Cristo, nútíríchuhi ema nacuchapaquenehi. Nucuchuhavacayare namutu ena téneuchavana, ticasíñavanavare eta nuyehé nuti Mavanerunuhi ema Viya. ¹⁰ Téhesera nacuija nacujachapahe te jácani avasare ítecapihayarepahi, íuchucavanepa te calle. ¹¹ Ánipa ácahe: “Vétatapevachavahi eta juca tavaparu támaquenehi eta vívape. Eta juca táicutiarahi eta máicuñasiraheyare ema Viya taicha eta emavarairahi ejacapahavíhíni. Vívarahasera vimetacahe eta máucupaisiraripa ema Cristo, émaríchuhi ema vícuchapaquenehi, ema Mavaneruhi ema Viya. Macuchuhahahehíni éti, te éneuchavahíni, ácasíñavahíni mayehe” íchavacayare éna. ¹² Jéhesare, te táítecapapa eta juicio, tíápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanáini te avasaréni Sodoma —máichavacapa ema Jesús.

Eta táicuñayare eta návasana ena achaneana masupajirairahana
(Mt 11.20-24)

¹³ Tacahe, ema Jesús máechajicahi ena apamuriana achaneana, tímícutijiricavahi natiaríhíhahini te mamirahu. Ánipa macahe:

—¡Páurehesami eti nujaneanana ecavasanahi te avasare Corazín étipa eti ecavasanahi te avasare Betsaida! Ichape eta ícuñayare taicha eti ímaharipa tamutu eta tíáramicareana níchaqueneanahi te emirahu, váhisera ávarahahíni éneuchavahíni. Ena naní achaneana ticavasanahi te Siria, apavasanánahinéni, tétavacavahinéni eta namaurivahi, németecasera nútí téneuchavanavanehíni eta náimairahi eta níchaqueneanapahi. Enévanénahíni náimerecavahíni yátupi eta náeneuchiravainahíni. ¹⁴ Tásiha puiti, muracapanayare eta ícuñayare éti, taicha eta emavarairahi éneuchava. Tacachuricayare eta nacaicuñairaya ena achaneana apavasanana ticavasanahi te Siria.

¹⁵ Étiripa eti ecavasanahi te avasare Capernaúm, tamapuruji eta nímitusirahehi étapa eta ímairahi eta tíáramicareana níchaqueneanapahi. Eti ecasíñavavaicahi, ímijachaipapuca eta ticayapaheyare te anuma. Ichapesera eta etsiríhacarevayare, taicha épújuquichavayare eta te yucu taicha vahi éneuchavaimahi éti —macahepa.

¹⁶ Tacahe, tíápechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva nútí. Énasera nácani tépuruheanayarepahi, ticaecheranayareva eta náepuruiranuhi nútí. Ene tacahehi eta náepuruiravare ema Tata tivanecanuhi —máichavacapa ena máimitureanahi eta napaisirayare.

Tichavanapa ena setentaqueneana vanairucanahi

¹⁷ Tacahe, tichavanapa ena setentaqueneana. Tíúrisamurereacavanapaipa eta náítecapirahi. Ánipa nacahe:

—Tata Viáquenu. Vítauchaipa eta pivanairipi. Viratahahivare víáquijicavaca ena éreanana taicha eta vípiarasirahi eta píjare —nacahepa.

¹⁸ Ema Jesús majicapavacapa:

—Tájinarínehi matumevaimahíni ema Satanás eta víáquijisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahi ema Satanás, tacutihi eta térameca eta tájahúchiravahi eta macaquiirahi te anuma. ¹⁹ Táítaurevaquene nútí, ichape eta nujaneasirahehi. Tayanapanepuca íacatayaca eta quichare, alacránpuca, tájinasera táicharachémahi. Eta juca ítupajjiasiravaya níjararuhehi, tacachuriaca eta

máitupajijiasiravahi ema Váinaraji Satanás, énapa ena majupahanahi. ²⁰ Váhisera ecucasiñavavaica eta eratahairahi íaquijica ena éreanana. Íurisamurereacavasea eta táejasiraipa te anuma eta elistana.

*Ema Jesús tíurisamuréinehi mayehe ema Maiya
(Mt 11.25-27; 13.16-17)*

²¹ Tacahe, enévanehinehi táitecapauchahi ema Jesús eta máurisamurevahi maicha ema Espiritu Santo. Tásiha, macahepa:

—Tata Nucaiyaquene, tétavícava eta nucunachiravi. Jéhevare píti táquenuvivi eta anuma étapa te juca apaquehe. Títachavaipa eta pipanereruhi. Vahi písapahini náitucahini eta júcana ena achaneana tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahini. Puiti nasapiharipahi nacachuricahi ena títupajijiacavanahi. Tétávicavahi eta táurivahi eta pipanereruhi, píti Tata Nucaiyaquene.

²² Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nítiraya néchaya tamutu. Nájina náratahaimahi énajivainahini náimatihini ema Tata. Nucarichu nuti néchinavahi ena níminatiruanayare éma. Taicha nútí yátupíhi eta nímatirahi ema Tata Nucaiyaquene; tacutíquenehi eta yátupirahivare eta máimatiranuhi éma —macahepa.

²³ Tacahe, mañajichamuripa ena máimitureana, máichavacapa:

—Tétavícavahi eta iúricacareva éti taicha tíjaracahehi ema Viya eta juca ímairahi puiti eta níchaqueneanahi. ²⁴ Jéhesare, numetacahe: Acane ichapemuriana ena víyarahaini profetana énapa ena réyeaini, tétavícavahi eta navarairahi tímatinuana, navarahivare náimaha eta juca níchaqueneanahi ímahaqueneanahi. Navarahivare nasama eta nímituresirahi. Váipasera nacapayacahini —máichavacapa.

Ema Jesús máimicuticha, máechajisihahi ema achane máuriquenehi, samarítanohi. Tijapanurahahi mayehe ema émana achane macajaraquenehi, tayanapane vahi émainahini majaneanainahini.

²⁵ Matiaríhihi ema achane, maestro tayehe eta mavanairipiana ema víyarahaini Moisés. Tiyanapa matanucahi ema Jesús, téchajiricavayarehi eta mayehe. Mavarahahi macaicutiarayare. Máichapa:

—Tata maestro, ¿tájahapucaini nícharacavaini eta níurusirayare eta núchucuirayare te apana vítaresira? —macahepa.

²⁶ Ema Jesús majicapapa:

—¿Tájahasica tacayemahi eta táechajiriruvahi eta Sagrada Escritura? ¿Tájaha tacayemahi eta pisamirahi eta péchajicuirahi? —macahepa.

²⁷ Tásiha, ema maestro majicapapa:

—Ani tacahehi eta néchejicuirahi: “Macarichu ema Viya pémunacayare te pisamure. Macarichuvare éma piáchanevayare. Píjaracayare tamutu eta pitumeva eta pícaemata-neasirayare. Éma pipanerechayare tamutu sácheana. Pémunacayareva ema piparaepiyahi tácuti eta pémunasiravahi píti”.

²⁸ Ema Jesús majicapapa:

—Tétupícava eta juca píjicapiranuhi. Te pítaucha eta juca, piúchuchayare.

²⁹ Émasera ema maestro vahi mavarahaini apaquehereruinahini. Máichapa:

—¿Nájahasica ema nuparaepiyahi? —macahepa.

³⁰ Ema Jesús máichavarepa:

—Nímicutichinaviyare eta juca. Matiaríhi ema émana achane. Tipacahi te achene, másiha te Jerusalén. Tiyanayarehi te Jericó. Eta mapaisirapahi te achene, náuchujiuchapa ena tiámerahiana. Náepuchiricanumapa. Tiánehi nacapacayaréni. Námeyechapa eta mámaqueneanapahi étapa eta mamuiríha. ³¹ Tásiha, macahepaipa ema émana tiyujaracarahi. Máimahapa ema achane te apaquehe te achenechacaya. Váhisera májapanuhini máichejiuchahini. Máetávicaichucha. ³² Tásiha, macahepaipavare ema apana achane. Éma, téchapajiricahi eta Templo. Énerichuvare te máimahapa, máetávicaichuchavare. ³³ Tacahe, macahepaipavare ema apana achane. Éma, indigenahi samaritano. Éma, te máimahapa ema macajaraquenehi, majapanurinehi. ³⁴ Tícheacanumapa éma, témeñahavapa. Máipuchapa te aceite étapa eta alcohol eta majarana. Máepacuchavacapa te amaratajaj. Tásiha, manaracuhapa manacaquechapa eta te maperapahi cavayu. Mámapa eta te máitecapihayarehi. Máipupuaracaipahi. ³⁵ Te apanapa sache, tiyanayarepa ema samaritano. Tivecuacavapa apipe eta maplatane. Mavachachapa ema ticapenahi eta peti. Tásiha, máichapa: “Picatajicanu. Péchapajirisinánu ema maca achane. Te tatiaríhinapuca eta macamunuirava,

píjarasinánuya. Nímahavirine nuvachachavi te nuchava” máichapa. ³⁶ Tiuri puiti, nuyase-recaviyare píti. ¿Nájahapuca ena nani mapanaqueneana ema témunacahi ema maparaepiya najararuquenehi ena tíamerahiana? —máichapa ema Jesús.

³⁷ Ema maestro majicapapa:

—Ema témunacahi ema maparaepiya, ema tijapanuhi —macahepa.

Ema Jesús máichapa:

—Pímahaipajira, ene picaheyare piti apanava. Pijapanurahiyare —máichapa.

Ema Jesús máejirapanavaca te napena esu Marta ésupa esu María

³⁸⁻³⁹ Tímiyanavavarepa eta mapaisirahi ema Jesús. Máitecapauchapa eta avasarechicha suávasa esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétávicavahisera eta táurivahi eta najacapirahi éna. Tacahe, esu María téjacapa te máivapechacava ema Jesús. Susamararacaripa eta máimiturapiana éma. ⁴⁰ Ésusera esu Marta tahapapiricaichucha eta sucaparujirahi, taicha eta suénisirayare ema Jesús. Tacahe, esu Marta tisemamajheripa eta suímairahi esu suparape suéjarasirahi. Tacahe, suíchapa ema Jesús:

—Tata Náquenu, picatajicanupa. Pivanésinanu esu suca nuparape súmicatacanuichu apaesaina tayehe eta ematanecana —suíchapa.

⁴¹ Tásiha, ema Jesús majicapapa:

—Páurevisami piti Marta, tétavicavapa tahapapirisiravi eta pématanerepiana. ⁴² Tituparacavi pínajica eta tihapapiricavihi. Picaravahu eta máechajiriruva ema Viya. Esu suca piparape María tétupicavahi eta supanereru. Suvarahahi suítucayare. Eta tacahe, tisamararacanuhi. Nájina tiverejicaimahi eta suvarahaquenehi suítuca —máichapa.

11

Ema Jesús tímituchavi eta viyujarasiraya

(Mt 6.9-15; 7.7-11)

¹ Tacahe, te jácani apanapa sache, ema Jesús mávihahi eta te mayujarasirarehi. Te títayujarápa, témeñahavapa ema émana máimiture, máichapa:

—Tata Viáquenu, pímituchavahi eta viyujarasirayare víti apanavare, tácuti eta máimitusi-ravacahi ema Juan ena máimitureanahi —macahepa.

² Tásiha, ema Jesús máimitucavacapa:

—Ani tacaheyare eta eyujarauchiravaina: Tata Vicaiyaquene, piti piávihahi te anuma, vipicauchahi yátupi eta píjare. Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. ³ Pájapanuhavi píjaracahavi puiti juca sache eta vicamunuqueneana vinicaqueneerepiana. ⁴ Pájapanuhavivare piperdonachahavi eta viviurevana piyehe. Víti apanava viperdonachavacaripa namutu ena ticaviurevanahi viyehe. Vahi picuisapahavi vicha eta tamauriquene. Picatiuchahavi mayehe ema Váinaraji. Tacaheya eta eyujarauchi-ravaina.

⁵ Máichavare ema Jesús:

—Tiuri, nímicutichinaheya puiti. Matiarahi ema émana achane. Tacahe, máitecapauchahi ema apana achane máitunacasarehi te enumuhu yati. Viájéropahi éma. Émasera ema avasarecuruhahi, tájina maviya eta máenicahini. Tásiha, mayana mayehe ema apana máitunacasarehivare. Máichainapapuca: “Picatajicanu, nucapucavi mapanaina pan. ⁶ Taicha titecapauchanuhi ema nítunacasare viájéropahi. Tájinasera nuviya nucumpirachahini”. ⁷ Tacahe, ema macajihuquenehi váhipuca macujapanuhi, macahénapapuca: “Vahi picujarareca eta néchapune. Pésamirisinanuvare eta tapaja tacaerataquenehi. Tímacanahivare ena nuchichanaveana. Vahi nítujicava néhepuca níjaracavihini eta pivarahaquenehi” macahe-napapuca. ⁸ Máitunacasarequenénihipuca éma, váhisera máipurajihini máechepecahini májaracahini eta mayasereruhi. Téhesera te tímiyanavapuca mapiararaca ema ticamunuvahi, németeaca tipamicavayarehi téhepuca, májaracayarehi eta macamunuquenepahi.

⁹⁻¹⁰ Eta tacahe, numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tíjaracaheyareva. Vahi ecuyacuji eta eyaseasiraina. Téhevere tatiarihínapapuca eta jácani íchiraya ichapehi eta tacajeravaya, eyaseacayare májaracahehini eta ítupaijjiasiravaya. Éma, tíjaracaheyare. Te jararihipuca eta táichejimiráuchahe, éma macaevuisihainaheyare. ¹¹ Eta juca tímicutijiricavahi te natiarhipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahini éti eta márijahi, tímicutijiricavaipa ecavijaruhini ena echichanaveana. Étaripa te tiyaseacaheanapuca eta jima, váhivare táuricaimahi íjaracahini eta quichare. ¹² Étaripa te tiyaseacaheanapuca eta varayuha, váhivare táuricaimahi íjaracahini

eta sáse. ¹³ Étiaríhi éti vahí ecajirahihini nayehe ena achaneana. Iúrihisera nayehe ena echichanaveana. Ítucahi íjaracavaca jácáni nayasearuheanahi táuriqueneana. Mavetiji ema Tata Ecaiyaquene tiávihahi te anuma. Éma, vahí ticavijaruheimahi eta te eyaseserepiana. Tíjaracaheyarehi tamutu eta eyasearuana, émaripa ema Espíritu Santo tiávahácaheyarehi —macahepa ema Jesús.

Ena achaneana téjcapavanahi eta náimijachirahi ema Jesús mávaháruhi ema Váinaraji Satanás (Mt 12.22-30; Mr 3.19-27)

¹⁴ Te apanaquenepa sache, ema Jesús macanaracahi ema achane, úpainihi eta máitaresira taicha eta mávahásirahi ema éreana. Tacahe, eta máuchusirapa ema éreana te máquehe ema úpainihi, tiúripa téchajica. Ichaperinehi nárami ena achaneana. ¹⁵ Natirihisera ena apamuriana achaneana, ánipa nacahehi:

—Ema maca Jesús, vémeteaca majupahahi ema Satanás, ema náquenumurihi ena éreanana. Máijararuihi jácáni eta máitupajijiasiravahi eta macuchusiravacahi éna —nacahepa.

¹⁶ Nararihihivare ena apamuriana achaneana váhivare nasuapapajicahini ema Jesús. Eta tacahe, navarahapa nacacutiarayarehi, nayaseacapa macuchucahini eta tiáramicare, máimereuchayare eta émaríhi Cristo mavaneruhi ema Viya. Váhisera nasuapayarehini. ¹⁷ Émasera máimatíhi eta napanereruana eta namasuapirahi. Máichavaca:

—Nímicutichinahe puiti ena machanerana ema gobierno. Éna, vahí típutsimurihacacanimahi apinainahipucaini partido. Te típutsimuriacacana, énjacacaipapucaini tiáquipaicacana. Émaripa mácáni achane te camurianahi ena machichanaveana, váiparinehivare típutsimuriavanaimahi náehajiricacahini, énjacacahini náquipaicacahini. ¹⁸ Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímijachaipa nútirichuhi machamuri ema Satanás, táichavenehi eta nuratahairahi nucuchucavaca ena éreanana. ¹⁹ Tájina vahí étupicavahini éti eta juca epanereruana. Te émahipuca tímicitacanuhi ema Satanás, énerichuhivare éti máimicataruanahivare jácáni éna, eta ecuchusiravaca ena éreanana. Epanerechinávana. ²⁰ Émaquenehisera ema Viya, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútirirapa nuti ecuchapaquenehi.

²¹ Tacutiquene mácáni achane tume. Te macaratacahi eta mataquiriqui eta majaneasirahi jácáni macayehéqueneana, nájina tiámeyechaimahi. ²² Téhesera macahepaipa mácáni achane túmepanahi mayehe, maverejicayare eta mataquiriquini macasiñaquenehi. Máitiacavane. Tásiha, émapa técha tamutu eta majanearuinihi ema achane. Ene nucahehi núti, túmepananuhi mayehe ema maca Satanás.

²³ Te vahí ecuehicanu, ecucaemataneacanu, éta tímereuchaheya machamurihehi éti ema ticatianacanuhi. Masapiha ímicatacáhi éma eta macaetemajirisiranuhi.

Ena Jesús máimicutichinahi ena masuapajirairahanahi mayehe (Mt 12.43-45)

²⁴ Tímiyanava eta máechajirisiravahi ema Jesús, ánipa macahe:

—Énerichuvare éti ecuti mácáni achane máinajiruhi ema émana éreana. Ema éreana tíyanainapa matanucainapa eta jácáni masiapihayarehi. Eta mamaichimavira eta mavarahaquene, mapanerechayarehi tichava. Macahénapapuca: “Nuyanayare nuchava, nusiapahacayareva ema návaháruinihi”. ²⁵ Te títecapapa ema éreana mayehe ema achane mávaháruinihi, máimahapa ema achane máinajicaripa tamutu eta mapecaturana, vuíchahasera máehicahini ema Viya. ²⁶ Tásiha, tiúrisamurepa ema éreana. Tásiha, tíchuarecaca ena siétequeneana machamuriana. Váinarajipanána éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane —máichavaca ema Jesús.

Víuriyare te visuapa eta máechajiriruva ema Viya

²⁷ Mapaenumavahi títapirica ema Jesús eta juca máechajiriruvanahi, típiaracapa esu ésuna esena te namuri ena achaneana. Ánipa sucahehi:

—¡Tétavicavapa eta sucunachacarevahi esu pena, táichavenehi eta suínasiravihi, suájisiravihi eta sucajurusiravihi! —sucahepa.

²⁸ Ema Jesús majicapapa:

—¡Tiápajucavayaresera eta nacunachacarevayarehi namutu ena tisamanayare eta máechajiriruvanahi ema Viya, yátupiyarehi eta nasuapirayareva! —máichapa.

Ena Jesús macajachavaca eta namasuapajiravahi ena achaneana (Mt 12.38-42; Mr 8.12)

²⁹ Tacahe, títicaparacanapaichucha te machacaya ema Jesús ena camuriqueneana achaneana. Tásiha, eta máimitusiravacahi, máichavacapa:

—Nararihi ena achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi ema Viya. Tiyaseacuananahi nímechayarehi eta tíáramicare táicutirahi eta mavanesisranuhi ema Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi ema profetaíni Jonás. ³⁰ Ema profetaíni Jonás yátupíhi ecutiararehi éma eta mavanesisrahi ema Viya nayehe ena achaneana ticavasanahi te avasare Nínive. Ene nucahehi nuti Manerejirunuhi ema Viya, ecutiararenuhi puiti eyehe eti achaneana. ³¹ Tacutiquene, esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayerehique-nehineni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe, te táitecapapa eta sáchezare téchepucanaya namutu, suyaseacainapa ésu eta nacaicuñahini ena nani máetupicushianahi puiti. Sucáhénapapuca: “Táuricapa nacaicuñahini ena nani máetupicushiana, tájinapa náetseraruina nasamaripa ema Cristo, ema títupajijíápanavahi mayehe ema Salomón, tásiha vuíchahacaruva nasuapa” sucahénapa jácani. ³² Tacutiquene ena achaneana ticavasanahi acane te Nínive. Tisipecaturarahiana éna. Natupiruvahisera nasuapa eta mametarairu ema Jonás. Téneuchavavaneanahi. Tásiha, nacahénapapuca te jena sáchezare: “Táuricapa nacaicuñahini ena nani maparajuruana ema Cristo, taviuchahi eta namasuapirahi éma. Taicha éma máuriquenepanahi mayehe ema Jonás” nacahénapa. Eta máimiturapiana ema Jesús, tamichahu eta vítaresira
(Mt 5.15; 6.22-23)

³³ Tímiyanava eta máechajirisirava ema Jesús, ániapa macahe:

—Súnsuanahi nácani tiyustacanahi eta lámpara namichahuyarehi, tásihasera nanacapucaini te jácani tayumurevachahi cuarto, najihapaicapucaini te cajune. Tacamunuhi nanacayarehi te anuquehe. Jéhesare, tamicauchasarepa tamutu apaesa tímairicanapaipa nácani tisiapanapahi. ³⁴ Ene ecahehi éti, eta esuapirahi eta nímiturapiana, tétavícavahi eta tímicauchiraya eta iáchanavana. Tímijunijicayare eta emaurivahi. Téhesera vahi esuapahini, tétavícavahi eta tamapícuvahi eta iáchanavana. Tanasipa tamutu eta tammaurivahi. ³⁵ Eta tacahe, machu ecainajiruva tayehe eta juca esamaqueneanahi ímahaqueneanahivare, machu tayanariana te tímapícu eta iáchanavana. ³⁶ Téhesera yátupina esuapa eta nímiturapiana, tétavícavaya eta tímicauchiraheya tayehe eta ítaresiranahi. Tásiha, vahi eyaseacanuímahí nímechahe eta tíáramicareana —macahepa.

*Ema Jesús máimereuchavaca eta náejecapiravana ena fariséoana énapa ena escribánoana
(Mt 23.1-36; Mr 12.38-40; Lc 20.45-47)*

³⁷ Tacahe, te titapiricapa ema Jesús eta máechajisirahi, témeñahavapa ema émana fariseo. Macumpirachapa tinipanayarehi te mapena. Masuapahisera ema Jesús. Tiyana pa te mapená ema fariseo. Te tiúripa eta tinicacare, téjácapa ema Jesús te mesa. ³⁸ (Tiuri, ena fariséoana, jucarihi eta nayeherepi te tinicanayare, tayanapanehipuca tipachívahuanahi, ticasipavahunumanayarehisera. Eta juca nasipavaurucavanuravahi, namavarairahi náechipejicahini eta náchanavana.) Émasera Jesús, vahi masipavaurucavanumahini. Tacahe, máraminehi ichape ema maca fariséo eta mamaitauchirahi eta nayeherepianahi éna. ³⁹ Émasera ema Viáquenu Jesús máichapa:

—Eti fariséoana, eta eyeherepiana, ecaéñamaracavahi esipacanuma eta enisirareana étapa eta érirareana, emavarairahi táetseraruinahini tasiapahini eta pecatu te iáquehe. Étisera iápajupanavahi eta tachipejivahi eta iáchanavana táichavene eta evainarajivana, étapa eta tavayuasirahehi eta ejamurachirahi tamutu. ⁴⁰ ¡Tétavícavasamihi eta tamuracavahi eta esamureana! Ema Viya vahi tácarichu máímaha eta te iáquehe eta tiávihahi te ínahu. Énerichuvare máímahahi eta tiávihanahi te amahe esamureana. Éma yátupíhi eta máímátirahehi. ⁴¹ Tatuparacahi eapanarahiya nayehe ena ticamunuvanahi. Yátupiruva te esamureana te échajirícava apaesa tacuijasarepa tachipejivaina eta iáchanavana.

⁴² ¡Páurehesami eti fariséoana! ¡Tétavícavahi eta tamuracavaya eta ícuñayare! Éti ímijachavahi yátupiquenehi eta religiósohérahí eta epamisirava eta ecamavahuirahi me Viya eta diésmuri tayehe tamutu eta évaraquí. Ecuinacharehi taicha éta. Váhisera ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacahehi eta ecamavahu eta diésmuri iámavahuana. Énerichuvare tituparacahehi eta eapanuraivaya, yátupinavare eta émunasiraina ema Viya.

⁴³ ¡Jucarihivare eta apana tivíuchahehi eti fariséoana! ¡Tétavícava eta esiñavavaisirahi! Emetapa evaraha tipicauchaheana, ticaejacaheana te táurinaquene siya eta te iúrujisirarevana. Evarahavare tipicauchaheanayarehi eta náechajisirareana te cálleana.

⁴⁴ ¡Jucarihivare eta apana tiviucahehi eti escribánoana, étipa eti fariséoana, táichavenehi eta apimirrahehi! Ímijachavahi epicauchacarehiji. Étisera eta eyeherepiana, émejecapavacha ena achaneana eta náehisirahi ema Viya. Páureanasami éna. Váhi náimatiquenehahini eta nájecapiravahi táichavene eta evayuasirahi eta ecaetemairavacahi — máichavacapa ema Jesús.

⁴⁵ Matiarhivare ema émana maestro eta mavanairipiana ema Moisés. Máichavarepa: —Tata maestro Jesús, eta piyunasiravaca ena fariséoana, tétavicavapa tayunasirahavihi viti apanavare viti máestroana. ¿Pivarahapuca vicaviurevahivareni viti? —máichapa.

⁴⁶ Tacahe, ema Jesús majicapapa: —¡Eti apanavare eti máestroana, tétavicavahivare eta eviurevahi! ¿Tájaha tacayema epamicavacahi ena apamuriana achaneana eta júcana eyeherepiana tacajeraqueneana? Nájinapa tiratahaimahi títaucha. Apanasica éti váhivare ítauchahini.

⁴⁷⁻⁴⁸ ¡Jucarihivare eta apana tiviucahehi eta tamuracavaya eta ícuñayare! Éti ecaijare apimirana, taicha ímijachavahi machanerahe ema Viya eta eyeherepiana eti náecariana ena profetanani nacapuruanahi ena íachucanaveanani. Puiti étarichuhi tacahehi eta epanereruanahi eta evarairahi ecapacahavi viti mavanaranahi ema Viya taicha eta épuruirahi eta vímiturapianahi táuriqueneanahi. ⁴⁹ Ema Viya, acane tímatihehi eta ecutirayarehi eta napanereri ena íachucanaveanani ticapacana ena profetanani. Eta tacahehi eta máechajiriruvana: “Nuvanecayare ena profetana; tásiha, nuvanecayareva ena apóstoleana. Váhiquenesera nasupaimahi ena tisamanayarehi eta náimiturapianaya ena nuvanarana. Napanajiricavacayarechucha ena nuvanaranahi. Natiarihiyareva ena nacapacayarepahi” macahehi ema Viya. ⁵⁰⁻⁵¹ Eta tacahe, numetacahe nútí: Eti nujaneana israelítana etiarhiqueneanahi puiti, ecaicuñayare, taicha tímuriacahehi eta naviurevahi ena íachucanaveanani taicha eta nacapapajisiravacahi ena profetanani. Acane te tépanavainapa eta apaquehe, ema Abel máinapuiruhi nacaparuihi. Máequeneruhi nacaparuihi ema maca Zacarías, ema nacaparuihi te tamirahu eta Templo. Camurianahisera ena náumurivanani. Puiti étipa tamuriacahi eta ícuñayare naicha ena íachucanaveanani.

⁵² ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihi eta yátupiqueneana títuacáreana, taicha vahi esuapaimahi, váhivare éhicaimahi. Éti tásihahi íchejimírurucavacahi ena tivarahanahi tisupanaya, náehicaya ema Viya —máichavacapa ema Jesús.

⁵³⁻⁵⁴ Tacahe, eta nasamirahi ema Jesús ena fariséoana énapa ena máestroana, tiseமானinehi eta mayehe. Tépanavanavarepa náitsamarareca eta nayaseresirapahi, navarairahi nasama te májecapavahipucaini eta macayemaqueneanapahi, navarairahi eta tiviucaharehi éma.

12

*Ena Jesús vahi mávaraha apimirahávina
(Mt 10.26-31)*

¹ Tacahe, te jena sácheanahi, títeparacanaipaichucha ena camuriqueneana achaneana. Tiyututucavanapa. Énasera ena máimitureana ema Jesús návihahi te machacaya. Tásiha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu eta taparea-sirahi eta apimirairanahi ena fariséoana. Échapavaicha éti, machu napareacahe éna. ²⁻³ Ema Viya tímararacahehi tamutu eta íchaqueneanahi, tayanapanenénipuca eyumurucavaquene napuca te timapicu. Tisamahehivare tamutu eta échajiriruvana. Tímatihivare tamutu eta epanereruana. Te jácani sácheyare tícaecherayare tamutu, tétavicavaya eta esirihairaya taicha eta emaurivanahi —macahepa.

⁴ Étiripa eti némunacasareana, numetacahe: Vahi ecupica nácani nacapacupca eta íaquehe, tacarichusera náituruequenehayare. ⁵ Numetacaheva, macarichu ema Viya epicayare, taicha macarichu éma téchahi eta ítaresirana. Jéhevare, éma maratahahi macamitiequeneha eta íachanevana tayehe eta táíñehiquene yucu infierno, te ecainajiruva táichavenehi eta episirapuca eta nacapasiráhena. Jéhevare, éma epicayare.

⁶ Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresiranahi. ⁷ Evetijipa éti, éñamacarepanahi me Viya. Éma téchahéhivare tamutu eta ítaresirana. Váiparinehi témitisicahémahi. Eta tacahe, vahi ecueñamava éti tayehe eta ítaresirana, taicha tétavicavahi eta emunavahi éti mayehe. Éma, máimatihí eta tatupa eta echutimacana. Vímereuchavayarehi eta véhisira ema Jesús
(Mt 10.32-33; 12.32; 10.19-20)

⁸ Numetacahe puiti, nuti Manerejirunuhi ema Viya: Namutu ena tímereuchavanahi eta náehisiranuhi te namirahu ena achaneana, nútí apanavare nímereuchaya eta nuchanerairavacahi éna te namirahu ena ángeleana mayeaneanahi ema Tata. ⁹ Nácanisera vahi návarahahini námereuchavahini eta náehisiranuhi, nútí apanava nímereuchaya eta vahi nuchaneranainahini éna te namirahu ena ángeleana mayeaneanahi ema Viya.

¹⁰ Namutu nácani ticaecahinuanahipuca nuti Manerejirunuhi ema Viya, tiperdonachacareana. Nácanisera nacaecahipuca ema Espíritu Santo, vahi tiperdonachacareanaimahi éna.

¹¹ Jararihiyare eta sácheanayare tiámaheanaya te namirahu ena nacapitarana eta te náuruji-sirarevana, énapapuca ena tuparairucana, énapapuca ena juéseana te jácani avasareana eta nayaseseresiraya. Váhisera ecueñamava tayehe eta jácani ecatiuchiravayare. ¹² Ema Espíritu Santo tímítucaheyare eta táurivayare eta ecayemayare te jena sache ecayaseserehinapa — macahepa.

Vahi táurica tahapasamurechahavi eta vímahaqueneanayare

¹³ Matiaríhi ema achane te namuri ena camuriqueneana achaneana. Máechajicapa ema Jesús. Máichapa:

—Tata maestro, pímicatacanu, pímetaca ema nuparape máijaracanu eta nuyehé parte eta nímaequeneruyare eta máimahaquenéni ema ticachichanuini —macahepa.

¹⁴ Ema Jesús majicapapa:

—Nuchicha, ¿tájaha tacayema pivaraha pinacanu juésnuyare eta eyehe? Vahi nútina néchaheyare tayehe eta máimahaqueneanaini ema ticachichahéni —máichapa.

¹⁵ Énerichu máichavacavare ena apamuriana achaneana:

—Échapavavare éti apanavare, machu émunahiricava, ejamurarahi tayehe eta tímahacareana. Taicha eta tímahacareana te juca apaquehe, vahi étaina ticaitarecaheyare. Vahi táeñamacarehini.

¹⁶ Tacahe, máimicutiarachinavare:

—Matiaríhi ema achane ricu. Ichape eta máesane. Tiúrina eta máevaru. ¹⁷ Tacahe, ema ricu mapanerechapa, ánipa tacahe eta mapanereru: “Ániquehepa eta juca névaru, tájinapa núnasiha. ¿Tájahapuca nícharacaya? ¹⁸ Tiúripanapuca nuvetataha eta núnavarahi nujanejuecha. Ichapepanainapa nicha eta táitsivaya. Tiúripanainapa, apaesa táirijica tamutu eta néchatjiru étapa eta apamuriana nucayehequeneana. ¹⁹ Tásiha, nucahénapa: Jéhevare puiti tétávicavapa eta núrivayare. Tájinapa níchiravaimahi. Ichapemurihi eta núnaru. Taratahaquene juca áñoanayare. Nucanaracavaya nútí. Tamutu sache tiúriya eta nunisira, néraya. Ichape eta núrisamurevaya” macahepa ema ricu. ²⁰ Tásihasera ema Viya máichapa ema achane: “Tétávicava eta pisunsuva, piti achane. Puiti jena yati pépenaya. Tájina vahi pítapanaímahi eta juca piúnaruhi”. ²¹ Ene nacahe ena achaneana ticurujiricana eta náimahaqueneana nayehéchiravarichu. Vahi nápanerechahini naicha eta táuriqueneana tacunachacarehini me Viya taicha tétávicavahi tahapasamurechirahi eta nacaimahaquenéraya.

Ema Jesús tímítucahavi eta majaneasirahavihi ema Viya

(Mt 6.25-34)

²²⁻²⁴ Te apahequenepa, ema Jesús máichavacapa ena máimitureana:

—Étisera, nuvaraha ácasíñava yátupina mayehé ema Viya. Vahi ecuaeñamaracavavaicha tayehe eta enicaquenerepi étapa eta emuiriharapi puiti juca itaresiraichaha. Eta enicaquenerepi étapa eta emuiriharapi, tájina táeñamavacarevaina. Ímararacarichuhi eta cáyureana. Vahi tacaeñamaracavahini tayehe eta tanicaquenerepi. Vahi táevacahini, váhivare táechatjiricahini, táunacahipucaini eta tanicaqueneyare. Émasera ema Viya máechapajiricahi máijarasirahi tamutu eta tanicaquenerepiana. Evetijipa éti, iápajupanavahi eta éñamacarévahi me Viya tayehe eta cáyureana. ²⁵ Vahi táuricahini eta ecaeñamaracavahini eta júcana. Eyehe éti, nájina naratahahini étijivainahini ecajurucavahini, tayanapane te tihapasamurechahehipuca. ²⁶ Vahi étijivaimahi íturucava ecajurucavahini, váhivare táuricahini ecaeñamaracavahini tayehe eta júcana.

²⁷ Ímararacarichuhi eta tajurusirahi eta flúreana, vahi tacaeñamaracavahini tacaematanehini, tájururecahipucaini. Táitsivahisera, te tépunehapa, tétávicavahi táurinavahi eta taflorene. Nájina nácuti eta nacamuirihaira eta táurinava, émaripa ema víyarahaini rey Salomón eta tajanusira eta macamuirihairahinihi. ²⁸ Apanasica ema Viya máijaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, máijarasiraheyarehi eta emuiriharapi eti achaneana. ¿Tájaha tacayema vahi ácasíñavahini eta mayehé? ²⁹ Eta tacahe, vahi ecuaeñamaracavavaicha tayehe eta enicaquenerepiana étaripa te échuririacapuca eta une érayare. ³⁰ Ena apamuriana achaneana te juca apaquehe,

ichapemurihi eta tacañamarasiravacahi eta júcana. Vahi nácasifñavahini mayehe ema Viya, nacuchapahipucaini eta májjararayarehi éma. Étiserá, ecasifñavayarehi eta matiarihirahi ema Ecaiyaquene. Máimatihí éma tamutu eta ecamunuiravanahi. ³¹ Eta tacahe, tativayare Íjaracava ecaemataneacaya ema Viya, ecasamureraya eta itauchirayare tamutu eta mavarahaqueneanahi. Máimaharinepa éma. Tíjaracaheyare tamutu eta ecamuniqueneana.

Te vicajirica eta vímahaqueneana, vijacapyare eta táitsivayare ánaqui te anuma (Mt 6.19-21)

³² Vahi ecupica, eti nuchichanaveana. Tayanapane vahi camurihénahini, eti máichuhaqueneanahi ema Ecaiyaquenehi. Éma téchahehi. Eta tacahe, tétavicavahi eta mavapinairavahi eta majacapirahehi, machaneraheya. ³³ Tacahe, te ecaimahaqueneputa, Íjararecayare eta ímahaqueneana. Íjaracayare nácani ticamunuvanahi. Tásiha, ema Viya máimahinepa, éma tíjaracaheyare eta táitsivayare ánaqui te anuma. Máitavacainapa eta ecaimahaqueneraya. Tájinavarepa tévajaicavaimahi. Váhivare táeñamavacare ánaqui taicha nájinapa tíameyechahemahi, váipavare cachusirimahi eta ímahaqueneanayare. ³⁴ Éti, te ecasamureputa eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta íchiana te anuma, ánaqui evarahayare eyanavanyare.

Yátupina eta vicuneuchiravaina

³⁵ Éti, yátupina eta ecuchapiranuya eta nuchaviraya. Etsecavaya tamutu sácheana. ³⁶ Ácutihí nácani achaneana músuana títsecavanahi te tapaja navejjequeneraya ema náquenu eta machaviraipahi másihairahi mayehe ema arayanahi. Te máehahamecapa eta tapaja, enevaneyarepa éna navejjequenehayare. ³⁷⁻³⁸ Tayanapane enumúpica yati, tíjararahipuca eta machavirayarehi ema náquenu. Tétavicavasera eta náuricacarevahi ena músuana eta machimápirahi ema náquenu eta nacuchapirahi, te vahi náimacaequenehahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajacaruvainapa máechapajiricavacayare. ³⁹ Nuvaraha ácaicutiaraquenéna. Machu ácutiriana mácani achane námeyeruhi ena tíamerahiana. Tájiha máechapiavahini tájahapuca hórayarehi eta náitecapauchiraya te mapena. Te máechahipucaini, ticuneuchavaipahini éma, váipasare nacuameyechahini. ⁴⁰ Eta tacahe, éti écaunchavayare tamutu sácheana, taicha vahi échaimahi tájamuhuyareputa eta nuchavirayare nuti Manerejirunuhi ema Viya, machu íárameca —macahepa.

Nararihi ena músuana tíuriana. Nararihivare ena músuana máurirahana (Mt 24.45-51)

⁴¹ Tacahe, ema Pedro mayaserecapa. Ánipa maicha: —Tata Náquenu, eta juca pímicutiarachaquenehavihí, ¿viveheyarechuchapuca viti dócequeneana, téhesera vimutupuca viti véhicavianahi? —macahepa.

⁴² Tacahe, ema Víáquenu majicapapa: —Nímicutichinahepa eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava matuparacahi ema empleado eta májjarasiraya eta tinicacare ena apamuriana machamusuvanahi. ⁴³ Tétavicava eta máuricacarevaya ema maca ticatuparahahi, te tamutuhí máitaucha jácani machimápirana ema máquenu. ⁴⁴ Németeaca, eta tamutuirahi tíuri eta machimápirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíurihí eta máitauraiya. ⁴⁵ Téhesera, váhipuca tíuri eta mapanereruana ema mácani empleado, máimijachaichucha tíyereyarehi eta máitecapirayarehi ema máquenu. Tásiha, macaetemajiricavacapapuca ena machamusuvanahi, énapa ena vanaracanihi. Máichapapuca eta piesta, téniricapa térapa, ticavahapa. ⁴⁶ Tásiha, vaipa manecapauchavahini te títecapapa ema máquenu. Tásiha, machimarapaca ema empleado eta mamapachichijisiraipa eta máimahaqueneana. Eta tacahe, ema máquenu macavanáiripinapa náestacayare muraca, taicha eta mamasuapajiravahi.

⁴⁷ Tacutiquene mácani musu, te máechahi eta mavarahaqueneanahi ema máquenu, tásiha vahi máitauchahi eta mavanahianahi éma, muracayarehi eta macaícuñairayare. Ticaestayarehi éma. ⁴⁸ Mácanisera musu, te vahi máechahi eta tacayemaqueneana, tásiha téjcapapapa, éma apaesayaréchu eta máicuñayare. Étipa eti ecaimitucasianahi eta yátupiqueneanahi, tatuparacahi ímitucavacayare ena apamuriana achaneana. Núti, ánaquiaparipa eta nímitusiráhehi; tásiha puiti, étipa táehanacahi eta juca ímituresirayare.

Ena achaneana nacatianacainapa ena téhicanaya ema Jesús (Mt 10.34-36)

⁴⁹⁻⁵⁰ Núti, eta nítesirahi te juca apaquehe, túmítecanuhi eta népeniraya. Yátupiyare eta nucatajivairayare, naicha ena ticatianacanuana. Éti apanava, ticatianacaheanayare táchaveneyarehi eta éhisiranuhi núti. Timicutijiricavayarehi te tipaica eta yucu, eta tamuruira eta muiji. Eta juca, nuvarahaquenehi táitachavavanehini. ⁵¹ Éti ímjichaipapuca eta nítesirahi te juca apaquehe, tájina tácyemacarémahí, ímjichaipavarepuca tíuricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe. ⁵² Taicha puiti juca vicaijuhewaye, te natiarihnapapuca te étanahi peti mácani achane, esu mayena, esu machicha, ema machicha, ésupa esu chínenaca. Te mapananahipuca ena téhicanuanahi, tásiha apinanahipuca ena ticatianacanuana. Téhesera apinanahipuca ena téhicanuanahi, mapananahivarepuca ena ticatianacanuana. ⁵³ Mácani achane, súcani esena, te natiarihi ena nachichanaveana, nacatichayarehi ena ticachichanahi táichaveneyarehi eta náehisiranuhi éna. Mácani apana achane masuapajirairahahi, súcani esena, nacatichayarehi ena nachichanaveana táichavenehi eta náehisiranuhi, énapa ena nachinenanaveana.

Ena achaneana timasuapanahi eta máimeruana ema Viya
(Mt 16.1-4; Mr 8.11-13; Mt 5.25-26)

⁵⁴ Tacahe, ema Jesús máechajicapa ena achaneana:
—Te ímaha timapicurume, émetecaripa tiquivayare. Ene tacahehi. ⁵⁵ Técativapuca te vana, émetecaripa váipavare tiquivaimahi*. Énevare tacahehi. ⁵⁶ ¡Eti masuapajirairahana! ¡Yátupihinéni ímatiequenehahi te tiquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi!

⁵⁷ ¿Tájaha tacayema vahí ávarahahini éhica eta juca yátupiqueneana? ⁵⁸⁻⁵⁹ Járápainapa eta sache ticaicuñanainapa namutu ena achaneana. Tacamunurichu etanucayare puiti ema Viya, ecasiñayare ecuchucuyavaina. Eta juca tímicutijiricavahi mácani achane te ticametauchacasiya. Tatuparacahi tativaya máetupiricanumaya eta mayaseasirayare perdón ema timetauchahi, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina. Numetacahehi puiti: Te jácani esiapa eta yucu infierno, váhiquene iúchucaimahi éti —máichavacapa ema Jesús.

13

Tavaraha náeneuchava ena achaneana

¹ Étarichu te jena sache, tútecapanavarepa ena apamuriana achaneana. Nametacaipa ema Jesús eta táíñehiquene máichaquenehi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahe:

—Ena nani, galiléonahi éna. Tépenanapa te tachacayanahi eta sárareana nacaparuanahi námavahuásanahi. ¿Étapuca eta nasipeaturaivaHIPUCA tímicapacavacahi? —nacahepa.

² Tacahe, ema Jesús máichavacapa:

—Éti ímjichaipa táimicaparuhi eta nasipeaturaivanahi ena nani nayehe ena apamuriana najaneananahi te Galilea. ³ Nútisera numetacahe: Váhira étainahi táimicapacahini eta nasipeaturaivanahi. Vahi étaparacaina. Tacamunusera éneuchavavane éti, machu tájjahúchava eta épenira, machu ácuti éna. ⁴ Némechahe ena nani diéciochoqueneana tacaparuanahi eta táevajaisiravahi eta torre tayuchamarainihi te calle Siloé. Ímjichapapuca táimicapacavacahi eta táichapevahi eta naviureva, navetijipapuca nayehe ena apamuriana ticavasanahi te Jerusalén. ⁵ Nútisera numetacahe: Váhira ichapena eta naviureva ena apamuriana. Étiripa, te vahi ecueneuchava, énerichuvare tjjahúchavaya eta épenira —macahepa.

Ena Jesús máimicuticha eta yucuqui máhiriquire

⁶ Eta máechajirisirahi ema Jesús, máimicutijirichinapa. Ánipa macahehi:

—Matiarihíhi ema achane. Tatiarihíhi eta masucure higo. Máhiriquirehisera. ⁷ Tacahe, máichapa ema mamusura: “Mapanapa año vahi ticahi eta juca nusucure. Péchupacayare puiti taicha tíapitaváiricaipa eta te juca isaniti” macahepa. ⁸ Émasera ema musu majicapapa: “Tíuripanapucaini, tata, vicuchapaichahaini étanainavaréni año. Nuvaraha némurinahechayare eta máteji apaesa tacahipapucaini. ⁹ Téhesera váhiquenénaichapuca tacucahi, néchupaicasarepa” macahepa ema musu.

Ena Jesús macanaraca esu esena tépiñumaiquehe

* **12:55** Te jena avasare Judea, te táerisine eta sache eta tásirareasa eta tiquiva. Étasera eta táuchusiha eta técativava te vana, tájjijicahi tamutu, taicha tijuruhimuhuhivare.

¹⁰ Te apanapa sávaru, ema Jesús títiturecavarepa tayehe eta náurujisirareva. ¹¹ Sutiarihihi esu esena mávaháruhi ema éreana, tépiñumaiquehehi eta suítaresira. Vahi táurihini sutupinahahini. Diéciocho añoripa eta sucajumairahi. ¹² Te máimahapa ema Jesús, máichuhapa. Tacahe, supauchapa. Máichapa ésu:

—Páurevi piti esena, picajumahi. Puítisera pinaracainapa —máichapa.

¹³ Tacahe, ema Jesús manacapa eta mavahuana te suápusi. Enevanepa titupinahahi ésu, tinaracapa eta sujumainihi. Ichaperinehi eta sucunachirahi ema Viya. ¹⁴ Matiarihihivare ema táquenuruhahi eta náurujisirareva. Eta máimarahi eta juca, tise marinehi taicha eta macanarasirahi ema Jesús esu sucajumaquene te jena sache sávaru tacapicahuquenehi. Tásiha, máichavacapa ena achaneana:

—Saisi sache tatuparaha eta viceamaneraya, énerichuvare eta nacaipuirayareva ena nacajumaqueneana. Puítisera juca sache, vahi táuricahini nacaipuhini taicha tacapicahuquenehi —macahepa.

¹⁵ Tásiha, ema Viáquenu Jesús, majicapapa:

—¡Tétavicavahi eta tamuracava eta esamureana! Te ticaitiquihi eta epera te jácani sache sávaru, evejapuacayarehi eta ésichirayare eta une, tayanapane tacapicahuquenehinéni eta sache. ¹⁶ Suvetijicha esu suca esena vicutiquenehi achane, mámariequenehi ema viáchucaini Abraham, ticatajicacarehi eta nucanarasirayarehi tayehe eta máítiarapi ema Satanás. Taicha diecíocho añoripahi eta máécájumachirahi ésu. ¡Táuricahi nucanaracayarehi puiti juca sache tacapicahuquenehi! —máichapa ema Jesús.

¹⁷ Eta nasamirahi ema Jesús, namutu ena ticatianacanahi titsirihanarinehi. Énasera ena apamuriana achaneana tiúrisamureanarinehi, taicha eta náimairahi eta táuricacarequeneana máichaqueneanahi ema Jesús.

*Emá Jesús máimicuticha eta taquí eta mostaza
(Mt 13.31-32; Mr 4.30-32)*

¹⁸ Ánivare macahe ema Jesús:

—Puíti nuvaraha nímicutichinahe eta nímiturapiana nuti Manerejirunuhi ema Viya. ¹⁹ Tacutihi eta ánichichaquene taquí eta mostaza. Te máevacapa ema achane te máesane, tiúnarahiyarehi eta tajurusira. Tásiha, járajapainapa eta cáyureana, ticamacajiyarehi te tatavana eta sucureca.

*Emá Jesús máimicutichavare eta lévadura
(Mt 13.33)*

²⁰ Ánivare macahe ema Jesús:

—Nímicutichinaheyareva eta apana. ²¹ Eta nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápuçayarehi tiuri —macahepa.

*Vicamesavayare visiapa te tapaja ánicurichu
(Mt 7.13-14, 21-23)*

²² Ema Jesús tiyanavare tipaica. Máimitucavacahi ena achaneana te jácani avasare máitecapihapahi. Macaijuhehi eta Jerusalén, váhisera máitecapavanehini. ²³ Matiarihihii ema tiyaseserecahi éma, ániapa maicha:

—Tata Viáquenu, ¿váhipuca camurihavianainaya viti viúchuchuhanaya? —máichapa.

Tásiha, éma majicapapa:

²⁴ —Vahi táechacare te ánimuriheanayareichupuca eti esiapanaya eta mávasa ema Viya. Étisera tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navarairahi tisiapanaya, váhisera titujicavanaimahi. ²⁵ Taicha járajapainapa eta sácheyare, nératacainapa eta tapaja. Tásiha, itecapapapuca éti, éhahamecapa eta tapaja, epiaracanupa: “Tátachicha, pivejiquequenehahavi”. Tásiha, nujicapahénapa núti: “¿Nájajahesica éti? Vahi nímatihe. Váhivare nuchanerahénahi éti”. ²⁶ Tásiha, ejicapanuinapapuca: “Vítirichu picachanequeneanahi te mesa eta vinisirahi. Pímitucavahivihare te plaza te jena viávasa”. ²⁷ Tásiha, nujicapahénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahi eta tamauriqueneana” níchahénapa. ²⁸ Járajapainapa eta sache ímahainapa te tajuhe eta mávasa ema Viya te návihahi ena viáchucanaveanainihi: émaripa ema Abraham, ema Isaac, ema Jacobo, énapa namutu ena profetana. Étisera enasinapa te aneca. Tétavicavaya eta íyauchiravaya, ecapitiquiahechiravaya taicha eta ecatisamurérvaya étapa eta etsiriraya eta emasiapirahi. ²⁹ Nasapiha tisiapanaya ena camuriqueneana achaneana tiáshianayare te tamutu avasareana te juca

apaquehe. Tétavicavainapa eta náurisamurevaya. ³⁰Tásiha, te jena sáchezare, nácani téquenehanahi puiti, nasapihainapa tisiapanayare. Étiserá eti ínapureanahi puiti, étinavarepa vahi ítujicavaimahi esíapa —máichapa emá Jesús.

Emá Jesús ticatisamureva náichavene ena achaneana ticavasanahi te Jerusalén (Mt 23.37-39)

³¹Tacahe, te jena sáche, títecapanapa emá fariséoana te mávihahi emá Jesús. Náichapa: —Piyana. Pitátájiva piúchuca eta te juca. Taicha emá Herodes mavaraha ticapacaviyare —nacahepa.

³²⁻³³Émasera emá Jesús majicapapa:

—Eyana emetaca emá mácara ticaetemarahi quene. Vahi típicararecanumahi núti eta juca mametarapihi. Nunasiyarechaha puiti, nuncanararecanumayare emá nacajumaqueneana énapa emá návaháruanahi emá éreanana. Núti jucarihi eta nématanerepipahi emá tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi emá ticapahianahi emá profetanaini.

³⁴Tétavicavahi eta táimicatisamurechiranu eta viávása Jerusalén. Namapuruji emá tachichanaveanasami. Éna, ticapapajicanahi emá profetanaini mavanaranahi emá Tata. Puiti navarahainapa nútípavaya ticapacanuana. Ichapemurinehi emá nichuiravacahi éna, náurujiacanuhini tacutihini emá varayu te tacurujimuriha emá tachichanaveana te tapava. Váhiquenesera návarahahíni. ³⁵Náimahainapasera emá náichararacavayare. Ticaquípaicasiyare tamutu emá napenana. Táimijunavacainapa éna emá napisiraya. Numetacahevane puiti: Eta nínjiasiravacainapa, vaípa tímahanuanaimahi. Tiámainucavainapa te náitsivacha emá napanereruana, navarahainapa tíjapacanuana. Nacahénapa: “Ichape emá vicunachiraví píti vanairucaquenévahi me Viya” nacahénapa.

14

Emá Jesús macanaraca emá achane tíamaquiape

¹Tacahe, te jena sáche sávaruhi, emá Jesús ticaichuhacasíhi tinipanaya te mapena emá émana náiyamuri emá fariséoana. Ticaichuhacasianahivare emá apamuriana fariséoana, énapa emá máestroana tayehe máimiturapiana emá Moiséni. Navarahahi nacaicutiarayarehi emá Jesús. ²Tíjahúchavapa tímeracava te nataracu emá émana achane macajumaquene. Tiámaquiapevacahi éma. ³Emá Jesús, emá máimairahi emá macajumaquene, mayaserecavacapa emá natiarihiqueneanahi:

—¿Táuricapuca vicanaracavaca emá nacajumaqueneana puiti juca sávarumuhuirahi tacapicahuquenehi? —máichapa.

⁴Énasera vahi najicapahíni, timatinanarichucha. Tásiha, emá Jesús macaratavauchapa emá macajumaquene. Eta macaratavauchiráhi, enévanepa tinaraca. Tacahe, máevatacapa mayana te mapena. ⁵Tásiha, máichavacapa emá Jesús:

—Nímicutihinahe puiti. Éti, németeaca májina émanaina achane vahi macujapanuhini emá maperá burro, mavuíyerapuca, te tíáquiavacavahi te pusu te jena sáche tacapicahuquenehi. Eta máéñamirahi, típatsicavayarehi macaechepupana emá paure sárare, tayanapanehinéni emá sáche tacapicahuquenehi —máichavacapa.

⁶Énasera vahi napatsicavahíni najicapahíni. Timatinanarichucha.

Eta maconsejarapianahi emá Jesús

⁷Eta máimarasiravacahí emá Jesús emá macumpirachaqueneanahi emá fariseo, énajivahi tinerejiuchavana emá náejasihayarehi tíúrinapanana. Tacahe, emá Jesús maconsejachavacapa, ániapa máichavacahi:

⁸—Te natiaríhinapuca nacumpirachahe, vahi ecainapupuicavaimahi ecaejacava tayehe emá téjasihacareana taicha tíjuricati emá máejasihayarehi mácani ticapichupanahi eyehe éti. ⁹Taicha emá téniricahi, éma ticaejarecayarehi, tíjuricati macaechepucavi te péjasihahi macaejasihayarehi mácani apana. Tísirihacarepahí emá macaéjavahíni te náequenemuri.

¹⁰Te ecaichuhacasipuca, ecaejavavaya te náequenemuri, apaesa emá téchahi tíchuhahénapa ticaejacaheyare te návihahi emá típacauhacareanapanahi. Tásiha, ecunacharénasarepa nayehe emá natiarihiqueneana. ¹¹Taicha nácani ticasíñavavaicanahi tímijachavanahi ticapichuana, emá Viya máimicatsiriacavayarehi. Nácanisera mánsuanahi emá náitaresira, ichapeyare emá nacunachacarevayare me Viya.

¹²Emá Jesús maconsejachavare emá fariseo, emá ticumpirarecahi:

—Píti apanavare, te pénicarayare, vahi nacucarichu píchuhavaca emá pémunacasareanahicha, emá piparapenaveanapuca énaripa emá rícoana, táichavenénahi emá pivarairainahi títsirijicavanaya emá piyehe. ¹³Píchuhavacayareva emá páureana, nácani nacahemahianahi: túpúpavaquiána, masariana, píchuquiána. ¹⁴Taicha emá nani, vahi títsirijicavanaimahi

eta piyehe. Táitsivasera tétávicavayare eta piúricacarevayare píti eta pijacapirayare eta pícutihihi te jena sácheare picachanevayare ena náuriqueneanahi macaechepureana ema Viya —macahepa.

Emá Jesús máimicutichinavare ema achane tíchuhavacahi ena achaneana, máenruanayare

¹⁵ Tacahe, eta nasamirahi ema Jesús ena natirihiqueneanahi te mesa, téchajicapa ema émana. Ánipa macahehi eta mayehe ema Jesús:

—Tétávicavayare eta viúricacarevaya te visiapapuca eta mávasa ema Viya, vinicayare te mamesara —macahepa.

¹⁶ Tásiha, ema Jesús majicapapa, máichapa:

—¡Jéhesare, te esiapapapucaya! Nímicutichinahe puiti. Matirihíhi ema émana achane téniricahi eta ichapemuriquene tinicacare. Camuriana ena máichuhaqueneanahi. ¹⁷ Te máimahapa tíuripa eta tinicacare, mavanecapa ema mamusura mametacavaca náitecapa ena nacaichuhacasiqueneanahi taicha tíuriripahi eta tinicacare. ¹⁸ Namutusera natanucapa eta náetseraruyarehi. Ema apana ánipa macahehi: “Vuíchaha nítujicavaimahi níteca. Nuyananumayare nímahapanayare eta nuvachareruhi apaquehe”. ¹⁹ Ema apana énerichuvare, ánivare macahe: “Picatajicanuchaha. Vuíchaha nítujicavaimahi níteca, taicha nuyananumayare nímahapanayare eta cinco yúntaquene vuiye nuvachareruanahi”. ²⁰ Ema apana ánivare macahe: “Nupaenumava nítauchavahi eta nuvehacacairahi. Eta tacahe, vahi nítujicavaimahi níteca”. ²¹ Te tichavapa ema musu vanairucahi, mametacapa ema máquenu eta namaitujisiravavacahi tífecana ena máichuhaqueneanahi. Tásiha, tisemapa ema máquenu. Máichavarepa ema musu: “Tiuri, piyana puítirichu te plaza étapa te cálleana. Píchuhavaca ena páureana, ena masariana, ena píchuquiana, nácani pétupiaruanayare nacahemahiqueneanahi”. ²² Tacahe, te tichavavarepa ema musu, mametacapa ema máquenu, máichapa: “Tata, nítaucharipa eta juca pivanairipihi. Jucarihichahasera eta juca téjasihacareana”. ²³ Tacahe, ema máquenu máichavarepa: “Píyanavare puítirichu te isanítiana. Píchuhavaca ena achaneana, nácanipa piácapajiruanayarepahi te achene. Picamesavaca náiteca, apaesa nayuriticava eta juca téjasihacareana mávacuanaichahahi. ²⁴ Nusemacarupa puiti. Nájinava néniurimahi ena náinapureanahi níchuhaqueneanahi” macahepa ema téniricahi —máichapa ema Jesús.

Vahi máejeraréna eta véhisiraya ema Cristo

²⁵ Te jena sácheana, camuriana ena achaneana téhicanahi ema Jesús. Tásihasera, éma máesenimurihapa. Máichavacapa:

²⁶ —Te etirihipuca éti evarahanayare éhicanu, tacamunu epamicavaya yátupina eta éhisiranuya. Nútinape émunacapanayare, németavicainapa eta émunasiravacaini ena ticachichaheana. Mácani achane németavicayareva eta máemunasiraini esu mayena, machichanaveanapuca, maparapenaveanapuca. Váipavare éñamaimahi eta ítaresira. Téhesera apaesarichupuca eta émunasiranuyare, vahi táuricaimahi éhicanuhini. ²⁷ Ecatajivayare taicha eta éhisiranuyare. Te epicahipuca íjaracava muraca, táimicapacahepuca eta éhisiranuhi, tíuripanaichu vahi ecuehicanu. ²⁸ Tacutiquene te epanerechahipuca éti épiyarecayare eta anuquehe peti apinapuca piso, vahi táuricahini émunanasicavahini enahahajisiravainarichuini ecaematane, epanerechanumayarehi áyanayarehipuca egastaruya ítauchirainahi eta evarahaquenehi épiyaca. ²⁹ Vahi ácaemuñavaimahi épiyareca eta tíurina peti, te vahi áratahaimahi ítaucha. ³⁰ Tásiha, nacahénapapuca ena ticaecahiheanayare: “Ímahapa, váhira máratahahini máitauchahini eta jena peti, táurinaqueneyahéji. Tíjaracavasamipa. Ichape eta mamelaya” nacahenapapuca. ³¹ Émaripa mácani rey, te tisemahipuca, mavarairahi máichayare eta guerra, macanayarehi mácani apana rey camuripapanahi ena machanerana, mapanerchanumayarehi te maratahayarepuca macanara taicha éma vahi camuriannainahini ena machanerana. ³² Eta máimairahi vahi máratahayarehi, váhivare tíjaracavaimahi máehacacahini. Tásiha, máimivanerecainapa mayehe ema mánarayarehini táitavapa eta semanerehi, vaipa nacupanerechahini. ³³ Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi eratahayare, vahi ecaemuñava éhicanuhini.

³⁴ Eta icheve, tétávicavahi eta táurivahi taicha eta tacamunucarevahi. Étasera eta tajachira eta icheve, tépurucarepahi. ³⁵ Tájinapa tacamunucarevaihini. Ticaquijiyarepa. Ene nachehi ena tinajicavana eta náehisiranuhi. Nacutihi eta tajachira eta icheve. Te evarahapuca ecaicutiara, tavaraha eta epanerechinavaya —macahepa.

15

*Emá Jesús máimicutichinahi te témitiaca étana uvesa
(Mt 18.10-14)*

¹ Tiuri, te jácani sácheana, títicaparacavanarepa ena achaneana te mávihahi ema Jesús. Camurianapahi éna. Natiarihipahi ena cóbrarécarahiana eta impuestoana. Namutu éna, ichape eta náepurucarevahi nayehe ena fariséoana. Émasera ema Jesús, vahi máepuruvacahini. Tásiha, témeñahavanapa éna te machacaya, taicha navarahapa nasamararacayarehi éma. ² Natiarihipahivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánipa nacahe:

—¡Vahi tiuri eta máchaquenehi ema macal! ¡Namutuchucha majacapavaca ena nacahequetátájiana ticajachahacareanahi! ¡Nasapihapa macachanevacahi eta nanisirahi ena nánitajiana! —nacahepa.

³ Tacahe, te masamapa ema Jesús eta juca, máimicutichinavacapa eta máimitusiravacahi. Ánipa máichavaca:

⁴ —Esamanuchaha. Nímicutichinaheya puiti. Matiarhi ema émana achane. Ticayehehi eta cien uvesa. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, majunijicayarehi eta apamuri noventa y nueve uvesa te majaneasihahi. ⁵ Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepa. ⁶ Te títicapapa te mapena, máichuhapa ena machacayapenana májiriareana. Tacahe, máichapa éna: “Yare, éti apana iúrisamurevare nuyehe núti. Taicha nichimavaipahi eta uvesa táemitiaruhi” máichapa ena májiriareana.

⁷ Tiuri, núti numetacahe eta juca: Énerichu ema Viya te anuma tiúrisamurevare nayehe ena achaneana tiúritaresiranahi, taicha tájina nájejacapiravainahini. Tétavicavainehisera eta máurisamurevahi ema Viya nayehe nácani achaneana tímatianahi eta nacapecaturairahi, tásiha téneuchavanapa, náinajicapa eta napecaturanaini —macahepa ema Jesús.

Ema Jesús máimicutichinahi eta táemitiaru étana reale

⁸ Tímiyanava eta máechajirisirava ema Jesús, ánipa macahe:

—Nímicutichinaheya eta apana. Sutiarihi esu émana esena. Ticayehehi eta dies reale eta tijapu plata. Te témitiyechapuca eta étape, tínanesyarehi sutanucayarehi eta táemitiaruhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena. ⁹ Te suichimavapa, tiúrisamurénapa. Suíchuhavacainapa ena suchacayapenana suájiriareana. Tacahe, suíchavacainapa éna: “Yare, éti apana iúrisamurevare nuyehe núti, taicha níchimavaipahi eta reale nacamitiaruhi” suíchavacainapa esu esena ena suájiriareana. ¹⁰ Tiuri puiti, núti numetacahe eta juca: Ene macahehi ema Viya. Tétavicavainehi eta máurisamurevaya te namuri ena ángeleana eta máeneuchiravapa mácani achane cápecaturaraini, máinajisiraipahi eta mapecaturanaini —macahepa ema Jesús.

Ema Jesús máimicutichinahi ema émana achane amaperu tacamitiaru eta matuhusiva

¹¹ Tímiyanava eta máechajirisirava ema Jesús, ánipa macahe:

—Matiarhihi ema émana achane. Apinanahi ena machichanaveana. Ajairana. ¹² Étana sache, máichapa ema maiya ema émana machicha amuyapana: “Tata, picatajicanupa, píjaracanu puiti eta nuyeheyare tatucachaquenenuyare eta picayehequeneana” máichapa. Tacahe, tísapavapa ema naiya. Májaracavacapa eta máimahaqueneana ena apinana machichanaveana. ¹³ Tacahe, étarichuhi te jena sácheanahi, tétupiricavapa ema amaperu, tiyanavanepa. Mámapa tamutu eta mayekehravaripahi májjararuhi ema maiya. Tiyanapa te apana avasare tayerehiquene. Eta ánaqui, máitaiyahi tamutu eta máimahaqueneanaini. Tamutupa mamapachichijica. ¹⁴ Tacahe, eta jena sácheana, táitecapauchapa eta ecuha eta avasare mávihahi ema amaperu. Tacahe, namutu ena achaneana tayehe eta te avasare téchurihanapa eta tunicare. Tivayuchavapa eta ecuha. Ema amaperu títrahaipahi eta máimahaqueneanaini. Tásiha, tájinapa maviyahini eta manica. ¹⁵ Tásiha, ticaquenurecapa mayehe ema émana achane. Tacahe, ema máquenuhi mavanepa ema amaperu eta majaneasinaya eta cúchiana eta te máesane. ¹⁶ Ichapesera eta máecuavahi. Majamurachainehi manicahini eta taniru eta cúchiana, taicha nájina náitátihini éma. ¹⁷ Tacahe, téquavapapa eta mapanereruanahi. Tipanerequenehavapa émajiva. Ánipa tacahehi eta mapanereruhi: “Namutu ena mavanarana ema tata, tiúrihi eta nanisira. Nútisera ani ticapacanuina eta nécuava. ¹⁸ Níjaracava, nuyana nuchava eta me tata ticachichanu. Tásiha, níchayare éma: Tátachicha, nucapecaturaipa mayehe ema Viya étapa eta piyehe piti tata. ¹⁹ Tayanarinepuca táimicutijiricavainepuca vahi picichianuina. Picatajicanusera. Pijacapanu, nímiáquenuchavarine piyehe piti tata. Nácutirine ena pivanarana. Níchayare ema tata”. Tacahepa eta mapanereruhi ema amaperu achane.

²⁰ Tásiha, tiyanapa tichava eta me maiya. Te tiánehipa títicapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijunapa mácapa. Majupahacapa ema machicha. Máetsererecapa eta máurisamurevahi. ²¹ Émasera ema amaperu, téchajicapa. Ánipa maicha: “Tátachicha, nucapecaturapa mayehe

ema Viya étapa eta piyehe piti tata. Tásihasesa, tayanarinepuca táimicutijiricavainepuca vahi pichichanuinaya” máichapa. ²² Émasera ema maiya, mavaraha máimercaya eta yátupirahi eta majacapirahi ema machicha. Vahi máicuñacahini. Tásiha, mavanecapa ena mavanarana. Máichapa: “Etátájirica, iama eta muíriare tíurinapana. Emuiriacha ema maca nuchicha. Iama eta tíurinapana surtija; masurutjaina. Íamavare eta tíurinapana eparuvepa, máeparuvevaina. ²³ Énerichuvare épana eta jena mamona tíujepana. Ecapaca, vinica. ¡Vichayare eta piesta! Viúrisamurevaina eta mátecapirahi ema maca nuchicha. ²⁴ Taicha éma, tímicutijiricavahi eta máepenaquenénahini ema maca, puítisera tíuchujicapa tichavapa ani nuyehe. Máemitiaruhi te numirahu, puítisera nímahapa éma” macahepa ema maiya. Tacahe, ichape eta náurisamurevahi namutu. ²⁵ Tiuri, ema émana machicha máechavahi tiyanahi te isaniti. Te tichavapa, te tiánehipa eta napena, masamapa eta piesta te tajuhe. ²⁶ Tásiha, máichuhapa ema émana nacajurure. Mayaserecapa: “¿Tájaha tacayema eta juca piesta?” macahepa. ²⁷ Tacahe, máichapa ema macajurure: “Ema piparape títecapahi. Tásiha, ema piya máimicapacapa eta étana mamona tíujepana. Ichape eta piesta, taicha eta máurisamurevahi ema piya eta mátecapirahi ema piparape” máichapa ema macajurure. ²⁸ Tacahe, tise marinehi ema maparape. Vaipa mávarahahini masiapahini. Tacahe, te máechapa ema naiya, tíuchucapa. Macamesapa macasiapa. ²⁹ Majicapapasera ema machicha, ánipa maicha: “Pímaha, tata. Ánaquiapapa eta nitatíravíhi níti. Tájina nímatiyahini nácapamachavíhini te pivanairipiana. Tásihasera, tájina píjaracanuhi eta étanainahini chívachichainapucaini eta nunicahini nupapiestarahipucaini níti, nácachanehini ena nájiareana némunacasareana. ³⁰ Tásiha, puítí pimicapacainehi eta mamona tíujepana, taicha eta mátecapirahi ema émana pichichatataji. Ema mácatataji títahacavahi eta píjararuinihi picayehequeneanainihi náichavenehi ena esenana túhusiana” máichapa ema machicha. ³¹ Tacahe, ema maiya máichapa: “Pímaha, nuchichachicha, píti ánaquiaparipa eta péjahasiranuhi. Tásiha, tamutu eta nucayehequeneanahi, piyeheanahivare píti. ³² Puítisera, táuricaichucha vicha eta piesta eta viúrisamurevainahi, taicha tímicutijiricavahi eta máepenaquenénahini ema maca piparape, puítisera tíuchujicaipa, tichavapa éma. Ema máemitiaruhi te vimirahu, puítisera víapechavavarepa vímaha éma” máichapa.

Tacahehi eta máechajiriruvanahi ema Jesús nayehe ena achaneana.

16

Eta máimituresirahi ema Jesús, máimicutichina ema capataz timapachichijicahi eta máimahaquene ema máquenu

¹ Ema Jesús ánivare macahehi eta máimitusiravacahi ena máimitureana:

—Nímicutichinahe eta apana. Ema achane rico, matiarihihi ema mayehe capataz, téchahi tamutu eta máimahaqueneana ema máquenu. Tásiha, masamairiricapa ema máquenu eta mamapachichijisiraipahi eta máimahaqueneana. ² Tacahe, ema máquenu máichuhapa. Mayaserecapa: “¿Tájaha tacayema eta juca? Nusamauchavíhi eta pimapachichijisiraíhi eta nímahaqueneana”. Émasera ema capataz tájina mavivyavahini macatiuchiavahini taicha yátupíhi eta máejecapiravahi. Tacahe, ema máquenu máichapa: “Tiuri, vitupaequenehayare tamutu taicha vaipa nuvaraha pímiyanava eta nuyehe”. ³ Tacahe, ema capataz íchaperinehi eta mapanereresiraíhi taicha eta máuchusiraya. Tásiha, macahepa te mapanereruana: “¿Tájahainapapuca nícharacavayare puítí? Ema náquenu ticuchucanuina pa tayehe eta juca nématanerepíhi. Ichape eta núsirihacarevayare taicha vahi núríhahini nucaematanehini eta isaniti, váhivare nuratahaimahi eta tamuracava eta emataneca. Tísirihacarehivare nuyaseserecahíni eta núnicaquene. ⁴ Tiuri, áni nucaheyare. Némeñahavayare nayehe ena ticanteveanahi mayehe ema náquenu, tíamainucava te níucavapapucaini eta nítatijiyavayare” macahepa te mapanereruana.

⁵ Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: “¿Péchapuca áyana eta pintevehi mayehe ema náquenu?” ⁶ Tacahe, ema ticantevehi majicapapa: “200 lata eta aceite comer eta nuntevehi mayehe”. Tacahe, ema capataz máichapa: “Júcahi eta piyehe vale pífirmaruhi. Puítinarihú vítsivachaya eta apana vale. Vaipa pivachachaimahi tamutu. Cien latáinarine eta pinteveyare” macahepa. ⁷ Tacahe, mayaserecavare ema apana: “¿Pítiyapa péchapuca áyana eta pintevehi?” Ema ticantevehi majicapapa: “Séisicientohi tarera eta trigo eta nuntevehi mayehe”. Tacahe, ema capataz máichavarepa: “Júcahi eta piyehe vale pífirmaruhi. Vítsivachaya eta piyehe vale. Vaipa pivachachaimahi tamutu. Quinientorine tarera eta pinteveyare”. Ene tacahehi eta máichirahi nayehe ena apamuriana ticanteveanahi, máitsivachirapaipahi eta nayeheana váleana. ⁸ Tacahe, te máechapa ema máquenuini eta máichaque-neanahi ema mayeheni capataz eta macatiuchiravahi, ánipa macahe: “Tétavicavapa eta máitusiraíhi masámápuha ema maena nuyeheni capataz” macahepa ema máquenuini. Ene

nacahehi ena achaneana máimatirahanahi ema Viya. Éna tiápajupanavanahivare eta náitusirahi eta tayanirava. Nacachuricahi ena téhicanahi ema Viya, taicha tavayucavacahi eta tájiparacana.

⁹ Puiti numetacaheyare eti nímitureanahi: Eta itaresirahi te juca apaquehe tamauri-quenehi, te ecaimahaquenehipuca, ecajiyare te napauchahepuca ena ticamunuvanahi. Tacahe, te itecapapa te mávasa ema Viya, tiúriyare eta itecapiraya, ánaqui ejacapainapa eta táitsivayare.

¹⁰ Taicha nácani tiúrihi eta náechapajirisirahi jácani ánichichaquenehi, ene tacaheyarehi eta táurivayare eta náechapajirisirayare eta camuriquenehi. Nácanisera vahi tiúrihi eta náechapajirisirahi jácani ánichichaquenehi, éneyareichuhivare vahi tiúrimahi eta náechapajirisirayare eta camuriquenehi. ¹¹ Taicha te vahi tiúrihi eta itauchirahi eta ecaturarahairahi échapajiricaya eta tímahacareanahi eta te juca apaquehe, ema Viya vahi tituparacahémahi eta tímahacareana yátupiqueneana te anuma. ¹² Eta tacahe, itaurahiyare tayehe jácani apayeheana apaesa máijaracaha ema Viya eta ícuchihi, taicha eta máimairahi éma eta itauravahi éti.

¹³ Éti, eta itaresirahi, vahi táuricahini apinanainahini ena iáquenuana. Taicha émunacapanayarehi éma émana, tisuapacarepanayarehivare. Tásiha, éma apana, apaesarineya eta émunasiraina, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurerecahehinehi eta plata, machu tahapapiricaheriana eta émunasirahi ema Viya, étapa eta ecaemataneasirahi éma —máichavacapa ema Jesús ena máimitureana.

Éma Jesús maconsejachapa ena fariséoana

(Mt 19.1-12; Mr 10.1-12)

¹⁴ Natiarihivaresera ena fariséoana. Nasamararacahi eta juca máimiturapianahi ema Jesús. Tásiha, nacaecahirichuchasera eta nasamirahi éma. Taicha tétavacavahi eta tavayuasiravacahi éna eta tímahacareana. ¹⁵ Tacahe, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihí eta esamureana. Macatianacahi ichape éma eta apimirahéri.

¹⁶ Numetacahevare eta apana: Éma víyarahaini Moisés, énapa ena víyarahanaini profetana tínapucanahi eta náechajisihahi tayehe eta nítesirayarehi nuti Cristo ecuchapaquenehi. Puiti ichape eta navapinairavahi ena camuriqueneana téhicanuanapaipa. Éti apana, tituparacaha éhicanuyareva.

¹⁷ Numetacaha puiti: Váhiquene títavaimahi eta tasuapacarevahi eta máechajiriruvana ema Tata. Máichecuaraquire éta, tayanapanehipuca táitava eta anuma étapa eta juca apaquehe. ¹⁸ Éti, eta ímiturapi, ísapahi mácani achane máquijica esu mayena, tásiha, ísapahivare maveha esu apana esena. Nútisera numetacaha: Mácani achane, te máinjajicapuca esu mayena, tásiha maveha esu apana esena, éma ticapecaturaipahi me Viya. Tacutiquene mácani apanavare achane mavehapa esu esena máinjajiruhi ema suima, énerichuvare ticapecaturahivare me Viya taicha ésu, matiarichihahi ema suímaquenehi —máichavacapa.

Éta macatajivairahi ema rico étapa eta máuricacarevahi ema paure ticaijare Lázaro

¹⁹ Tacahe, ema Jesús máimitucavacavare ena achaneana. Ánipa macahe:

—Nímicutichinahe eta apana. Matiarihíhi ema émana achane. Mavayuchahi eta marricuva. Tétavacavahi táurinavahi eta macamuirihaira. Tijanunuhacanecha. Tamutuhi sácheana máicha eta táurinaquene piesta. ²⁰ Tásiha, matiarihivare ema apana achane paure ticaijare Lázaro. Ticajumahi. Amairihahi carachachaha eta majuma. Téjahapairicahi éma tamutu sácheana te mapajacura ema rico. ²¹ Éma maca paure tiyaseserecáhi manicayare eta máemacharajiana ema rico. Tájinasera nájaracaimahi. Tavetijipa, vahi túmenahini ema paure. Vaipa maratatahahini macatiuchavahini eta táeverasirahi eta tamucuna eta macarachana. ²² Étana sache títapapa eta máepenirahi ema paure. Nárajapapa ena ángeleana; náepanapa eta máchaneva ema Lázaro, námapa tayehe eta paraíso mávihahi ema viáchucaini Abraham. Tacahe, te táequenepa, tépenavarepa ema rico. Tiúrinavare eta náecarirahi. ²³ Éta máepenirahi éma, tiyanapa tayehe eta macatajivaiyarehi. Tásiha, te téjamiháuquichapa, máimahapa eta mávihahi ema Abraham, émapa ema Lázaro te machacaya. Mayerehivacahisera eta máimairahi. ²⁴ Tacahe, tipiaracapa ema ricoini: “Tata Abraham, pájapanunu. Picatajicanu, pivanesinanuini ema Lázaro máechipaicaini apaesachichaini eta mavauqui te une. Máecasarechapanaini eta nunene. Taicha tétavacavahi eta numaunevahi eta te juca nucatajivaiyahi tayehe eta juca návihahi táijurequene yucu” máichapa. ²⁵ Émasera ema Abraham majicapapa: “Vahi nuvanecaimahi. Péchavachucha, nuchicha, te achanevichaha, tétavacavahi eta piúricacarevahi. Tájina pácamunuhini eta pítaresirahi. Ánipasera picatajivaiyahi. Émasera ema maca Lázaro, ichapemuríhi eta macatajivairahi te achanerichaha. Púitiserá vaipa macatajivahini. Puiti éma, majacaparipahi eta

máuricacarevahi. ²⁶ Tacutiquene máitujihí eta mánuoirainahini eta ára piyehe. Pítiripa váhivare pítujiacavaimahi pítecapauchahavi ani te juca viáviyahí víti, taicha jucarihi eta tíchejimirauchahavihi eta viánucuirainahini tacutihi eta tíuchausi cajacure. Máitujihí eta mayanahini” macahepa ema Abraham. ²⁷ Tacahe, ema rícoini máichavarepa: “Tiuri, te váhipuca títujiacarehi, picatajancusera. Pivanésinanuini mayana ema Lázaro te nupena. ²⁸ Mametapaninuini ena cincoqueneana nuparapeneana. Maconsejachapanavacaini eta náeneuchiravainaini éna, apaesa váhini nacuitechahini tayehe eta juca náviyahí núti nucatajivaiyahí”. ²⁹ Émasera ema Abraham máichavarepa: “Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanairipianahi, vahí tisiapanaimahi eta te jara ecuñarahui piáviyahí píti”. ³⁰ Ema rícoini majicapavarepa: “Táitauravaquene ene tacahehi, tata Abraham. Túripanahiserahipucaini mayanahini ema émana máepenaquenehi eta nayehe ena nuparapeneana, mametapanavacahini. Németeaca téneuchavavaneanapaini”. ³¹ Ema Abraham máichavarepa: “Te váhipuca nacusuahini eta Sagrada Escritura, tacaheyarehi eta namasuapirayare mácani máchepurehi máepenaquenehi” macahepa ema Abraham.

17

Ichape eta máicuñayare mácani tímiaquipaica te pecatu ena amaperuana
(Mt 18.6-7; Mr 9.42)

¹ Te táequenepe, ema Jesús mametamurihavarepa ena máimitureana. Ánipa macahe: —Yátupi eta vahí téjiacavaimahi eta tímiaquipaicayare tayehe eta pecatu ena achaneana. Ichapesera eta náicuñayare nácani táemesiavanayare náimiaquipaisiraya nácani apamuri-ana tayehe eta pecatuana. ² Mácani tímiaquipaicaya ema émana amaperu, tíuripahipucaini máepenhini mativainahini éma. Váhirichupucaini macucaicuñahini; taicha vahí macuimiaquipaicahini ema amaperu tayehe eta pecatu. ³ Eta tacahe, échapavaya éti machu ímiaquipaica ena amaperuana.

Tatuparaca viperdonacha eta téjecapavana viyehe
(Mt 18.21-22)

Numetacahe eta apana: Te máejecapavapuca ema piparape eta piyehe, piconsejachaya. Téhesera máeneuchava eta piyehe, píperdonachaya éma. ⁴ Tayanapané siétehénapuca máejecapava te étana sache, máeneuchavasera eta piyehe, tituparacavi píperdonachayare — macahepa ema Jesús.

Tamutuyare virataha te yátupihí visuapa ema Viya

⁵ Tiuri, ena apóstoleana nayaserecapa ema Jesús: —Tata Viáquenu, picatajicahavi. Pímitucahavi apaesa tajurucapaini eta vicasiñairavahi mayehe ema Viya. Vivaraha ichapenaini eta vicasiñairavaya eta mayehe — nacahepa.

⁶ Tacahe, ema Jesús majicapavapuca: —Vahí tácomesa ichapenahini eta ecasiñairavahi mayehe ema Viya. Tayanapanepuca ánichichainarichu eta ecasiñairavahi, tácutipuca eta táquichicha eta mostaza, tamutuyare erataha. Étaripa eta jácani yucuqui, te evarahapuca ecayejea, eratahayarehi. Te íchapuca: “Píyejecava eta te juca, piyana písucuhava te cáquiure”; tásiha, eta yucuqui tisuapaheyarehi. Tiyejecavainapa tayehe eta cáquiure.

Tatuparaca vítauchayare eta vicaemataneasirayare ema Viya

⁷ Étaripa ema mácani achane te ticamusurahi, te másihapaipapuca ema musu te vámahi eta majaneasirahi eta vaca, te tisahhipuca, te títecapava te peti, ema máquenu váiparinehi matátáuchaimahi máepiyaca eta tinicayare eta máenisiraya ema musu. ⁸ Matátáuchayarechucha mavaneca ema musu émaina máepiyaca eta tinicacare, máenicayare ema máquenu. Tásiha, máichainapuca: “Tiuri, nítanesipa. Pítipavapa pinica”. ⁹ Váiparinehivare mahasulupayachaimahi ema mamusura eta máitachirahi eta mavanahianahi. ¹⁰ Ene ecahehi éti, ecuti ema musu. Te ítauchapa tamutu eta evanahiana me Viya, ecahenapa: “Viti músuanahi vahí vicunachacarémahí. Tacarichuhi vicha eta vivanahianahi” ecahenapa — máichavapuca ema Jesús.

Ema Jesús macanaracahi eta diésqueneana leprosoana

¹¹ Tímiyanavavare típaica ema Jesús, macaijuhepa eta Jerusalén. Máetavicavapapuca eta avasareana te provincia Galilea étapa eta Samaria. ¹² Te máitecapauchapa eta apana avasarechicha, tíuchujicanapa ena diésqueneana ajairana ticajumana eta lepra. Nacapayapuca éma. Váhisera náemeñahavahini éna, nayerehichucha. ¹³ Tacahe, napiarapuca ema Jesús:

—Tata Jesús Nazareno, pájapanuhavi. Picatajicahavi, picanaracahavi eta vijuma — náichapa.

¹⁴Tacahe, ema Jesús máesenicavacapa. Tásiha, máichavacapa:

—Eyana, ímrecava te namirahu ena tuparairucana apaesa náimamaracahe. Énainapa nametajirica eta iúriwaipa, enarasiraipahi eta ejumlahainihi —máichavacapa.

Nasuapavanehi éna. Tásiha, eta nayanirahi, tinaracanapaipa. ¹⁵Tacahe, ema émana, eta máimairavahi eta manarasiraipahi, tichavapa te mávihahi ema Jesús. Tipiaracapaipahi muraca eta macunachirahi ema Viya. ¹⁶Matupirupa tépuyucahi te mamirahu ema Jesús. Tétipaicapa macaitecapa eta mamira te apaquehe, mamaverarasiravahi eta mahasulupayachirahi ema Jesús. Ema maca achane, indigenahi samaritano. ¹⁷Tacahe, ema Jesús máichapa:

—Ticutimahi diésnahi ena nuncanaruanahi. ¿Tájahapuca tacayemahi vahi nachavahini ena apamuriana nuévequeneana? ¹⁸Macarichuhi tichava ema maca apavasauenesamihí, macunachapaipa ema Viya.

¹⁹Tacahe, ema Jesús máichapa ema achane:

—Pécheputa, piyana pichava. Pinaracaipasera táichavenehi eta picasiñairanuhi — macahepa.

*Eta ecutiarareanaya eta máitesiraya ema Cristo
(Mt 24.23-28, 36-41)*

²⁰Tiuri, ena fariséoana nayaserecavare ema Jesús tájamuhuyareputa eta máitecapiraya ema Cristo nacuchapaquenehi. Éma, majicapavacapa:

—Eta máitecapiraya ema ecuchapaquenehi, tájina metárapimahi eta máimeresiravaya éma. Vahi tácajerahini eta ímairaya. ²¹Nájinavare timetajiricaímahi eta máitecapiraya taicha matarihiripahi éma puiti ani. Nútiripa —máichavacapa.

²²Tacahe, máichavacapa ena máimitureana:

—Tatiarihiyare eta sáchevayare ichapeyare eta ecaimairunuiraya. Tétavicavaya eta evarairaya íjahúchavayare ímahanu nuti Manerejirunuhi ema Viya eta nuchaviraya. ²³Te navayuaracaheputa nacahenapuca: “Émaripa ema vímahaquenehi ánaqui”. Ena apamuriana nacahénavareputa: “Émaripa ema maca vímahaquenehi puiti eta ani”. Váhisera ecusuapavaca éna. Váhivare ecuehicavaca. ²⁴Taicha te táitauchavapa eta nátecapiraya nútí, nucutiyaare eta táijahúchírava titecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya. Ticaecherayesera, tájina vahi máchasimahi. ²⁵Tativayesera nucatajivanumayare ichape. Tépurunuanayare ena achaneana natiarihiqueneanahi puiti. ²⁶⁻²⁷Tacutiyaare eta acane ena achaneana machamurianaini ema Noé. Ena nani tinicairihianarinecha, náematanerinecha, térana, tímarerecanahi ena nachichanaveana. Vahi téñamavanaimahi eta náimairahi ema Noé eta masiápirahi tayehe eta ichape pacure. Tájina vahi natsecevahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi títsecavanaimahi tayehe eta nuchaviraya. ²⁸Tacutiyaare ene nacahehivare acane ena achaneana ena machamuriana ema Lot. Tinicairihianahivare éna, téraracavanahivare. Étanecha napanerechahi náijarareca eta náevavareruana. Ena apamuriana natanujiricarinecha eta nacamunuqueneanahi. Tépiyarerecanarichucha pétiana. Vahi naéñamavahini tayehe jácáni ecuñaraqúya. ²⁹Téhesera te majunijicapa ema víyarahaini Lot eta avasare Sodoma, tíjahúchavapa tiquivapa eta yucu ticasiriquí azufre tíásihahi te anuma. Tacapapajicavacapa. ³⁰Ene tacaheyare eta nusacherayare nuti Manerejirunuhi ema Viya eta nuchaviraya.

³¹Te jena sácheyare, nácani tachimararuanayare te aneca, vahi táuricaimahi nasiapahini te napena navehanumahini jácáni náeñamaqueneanahi náimahaqueneana. Énaripa ena napairiruanahi te vámahi, váhivare tichavaequenehavanaimahi náepanahini eta náeñamaqueneanahi. ³²Écharichuhi eta acane eta suíchararacavahi esu mayenaini ema Lot. Ésu, tétavicavahi eta suéñamaequenehairahi eta suímahaqueneana sujuniruanahi. Táichavenehi eta suvarairahi tichava, ésujivapa ticamitiequenehava* ³³Nácani téñamanahi eta náítaresira, tahapapiricarinecha eta tájiparacana te juca apaquehe, éna témitiequenehanaya eta náítaresira. Énasera nácani tahapapiriruanahi eta náehisiranuhi, tayanapanepuca táimicapavaca, éna títujicavanayare tíuchuhanayare eta náítaresiranaya.

* **17:32** Ema Viya mavanecahi ena apinana ángeleana, nametapana ema Lot eta máicuñasirayarehi eta avasare Sodoma. Ésusera esu mayena ema Lot, ticametacasihineni eta sujunairayare sucachaneyarehi ema suima, sucatiequeneharichucha eta suímahaqueneanainihi. Étapa tivíuchahi sunasipa te achene, tépiyavapa icheve máripuhi.

³⁴ Numetacahevanecha: Te jena yátiyare, te apinanahipuca nácani natiarihiqueneanahi te tajuhe peti, émanayare ema níchuhaqueneyare, ema apana manasiyare. ³⁵ Tacutiquene, apinanahipuca ena esenana tiyuvarecanahipuca. Énerichuvare ésuna esu níchuhaqueneyare. Esu apana sunasiyare. ³⁶ Te apinanahipuca ena ajairana te vámahi, éneyareichuvare émana ema níchuhaqueneyare. Ema apana manasiyareva —máichapa ema Jesús.

³⁷ Eta nasamirahi ena máimitureana, nayaserecapa:

—Tata Viáquenu, ¿távihapuca táitachuiavayare eta juca pimetarapianahi? —nacahepa.

Majicapapa éma:

—Vahi ecueñamava eta távihapuca nítecapihayare. Núti nítecapauchaheya te jácni iávihahi éti† —máichavacapa.

18

Ema Jesús máimicutichinavare ema juez ésupa esu tépenaima

¹ Ema Jesús máimicutavacavare ena máimitureana vahi nacucainajiruva eta nayujarasirana. Tímiyanavanaya, tayanapane vuíchaha najacapavanehini eta nayasearuanahi. ² Eta máimicutichinahi, ániapa máichavacahi:

—Matiarihi ema achane. Juézhi tayehe eta avasare. Éma, tájina vahi mapicauchahini ema Viya. Nájinavare mapicauréna ena achaneana. ³ Sutiarihivare tayehe eta avasare esu ésuna esena suépenaimaquenehi. Suchavauruiricahi ema juez taicha eta sumetauchirahi ema sucatianaruhi. ⁴ Émasera ema juez vahi masuapahini eta sumetauresirahi ésu. Váhisera sucainajiruvahini. Tásiha, mapanerequenehapa macahepa: “Núti néchinava. Nájina nárataha napamicanuhini. Váhivare tipamicanuimahi ema Viya. ⁵ Ésusera esu suca esena, nuyacujipa eta suchavauruirisiranuhi. Nícharinepuca eta suvarahaquenehi, apaesa vaipa sucuápechava suíteca” macahepa ema juez.

⁶ Puiti, nuvaraha ecaicutiaraquenehaicha eta juca nímiturapihi mayehe ema juez mapicauruiraha eta macatiuchirahi esu suca esena táichavenehi eta suchavauruirisirahi éma. ⁷⁻⁸ Ene macahehi ema Viya. Vahi máyererejimahi eta macatiuchirahevaneya eti manerejiruanahi, esamacareyarehi taicha eta emacainajiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi ema Viya, németeacahi natiarihiyareichaha nuchimapaqueneanaya ena vahi ticainajiruvanahi eta nayujarasira, nacutihí esu suépenaimaquene eta sumacainajiruvairahi —máichavacapa ema Jesús.

Ema Jesús tímitucahavi vahi vicasíñavavaicamahi, váhivare vépururahimahi

⁹ Ema Jesús apanavare eta máimicutichinahi eta máimituresirahi, nayehe ena tímijachavanahi tíuriana, tájina náichiravainahi; náepuruvachisera ena apamuriana achaneana. Tacahe, máichavacapa:

¹⁰ —Nímicutichinahe eta apana: Natiarihi ena apinana ajairana te Templo. Téneuchavanahi. Ema émana achane, fariséohi éma. Ema apana, tisipecaturarahi éma. ¹¹ Ema fariseo, eta macasíñavavaisirahi, témeñahavapa tayehe eta cuarto tacapichahuquenehi te Templo. Ániapa macahehi eta mayujarasirahi: “Nuhasulupayachavi, Tata Dios, eta núrivahi te pimirahu. Vahi nácutihini ena apamuriana achaneana tíámerahianahi, tisipecaturanahi, esenamareanahivare. Váhivare nácutihini ema mácatataji te juca nuchacaya. ¹² Píti pímatinuhi eta apiheirahi áyunanu te semanana. Níjaracavivare eta plata nuganareruasa. Te nuganachahipuca eta dies peso, étanahi peso eta níjaracaviparaca. Téhesera cien pésohipuca eta nuganareruhi, dies pésohivare eta níjaracavi. Vahi nuyavanahini eta námavahuásana eta piyehe” macahepa.

¹³ Émasera ema apana achane vahi máemeñahavahini. Tiyerehichucha eta máeneuchiravahi. Váhivare mapatsicavahini máesenicahini te anuma. Téhatupachavahisera eta máeneuchiravahi. Ániapa macahehi: “Tata Dios, nucatisamureva ichape eta nucapecaturairahi piyehe. Pájapanunusera piperdonachanu eta nupecaturana” macahepa ena achane.

¹⁴ Tiuri, nutupiru numetacahe: Ema maca achane, eta machaviraipahi te mapena, tijacapacareinehi me Viya taicha yátupihí eta máeneuchiravahi. Émasera ema fariseo vahi majacapacarehini. Taicha nácni ticasíñavavaicanahi, tímijachavanahi ticunachacarehi, éna tépurucareanayarehi me Viya. Nácnisera ena tiyaseacanihi ema Viya eta májapanuiravacaina, yátupihí tijacapacareanayarehi mayehe —macahepa ema Jesús.

† 17:37 Te máechajiruvahi ema Jesús, ani macahehi: “Te jácni mávihahi ema máepenaquene, éta távihayare eta sipuquiána”. Eta juca mayehehi proverbio, tatiarihi eta tacayemaquenehi tayumurevahi.

Ema Jesús mayujaraucha ena amuyana
(Mt 19.13-15; Mr 10.13-16)

¹⁵ Tacahe, ena achaneana námavacapaipahi ena amuyana eta mayehe ema Jesús, navarairahi máemamahacavacayarehi éma. Énasea ena máimitureana vahi náisapahini, nacaichepaipa ena tíamanapahi ena amuyana. ¹⁶ Émasera ema Jesús máichuhavacaichucha ena amuyana. Tásiha, ena máimitureana máichavacapa:

—Ésamiricachucha ena amuyana, náitecaichaha eta nuyehe. Vahi eucacichepaica éna. Taicha ena nuchanerana nuti Cristo nacutiyahehi ena nani amuyana eta nasuapajiraiva éna. ¹⁷ Nutupiruva numetacahe: Nácani vahi nácutihi ena amuyana eta nasuapajiraiva, vahi nuchaneranaímahi éna —macahepa ema Jesús.

Ema achane rico téchajiricava mayehe ema Jesús
(Mt 19.16-30; Mr 10.17-31)

¹⁸ Matiaríhi ena achane. Náiyacararipahi ena achaneana. Témeñahavapa mayehe ema Jesús, mayaserecapa:

—Tata maestro, piti piúriquene. ¿Tájahapucaini eta nícharacavaini eta nítujisiravaina me Viya máichecuaraquírenahini eta nítaresira? —máichapa.

¹⁹ Ema Jesús majicapapa:

—¿Tájaha tacayema pímiyarechanu “Piti piúriquene”? Mararíhi ema Viya. Jéheve éma, tétavíavahi eta máurivahi. ²⁰ Téhesera te pívarahapuca pecha eta apana vítaresira, písupayarehi eta mavanairipiana ema Viya. Piti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaequeneruina. Pémunacaya ena ticachichavianahi” —máichapa.

²¹ Tacahe, ena achane majicapapa:

—Tamutu nusuapahi eta juca vanairipiana eta námaperuvahi, puíticha juca ajairanuirapa —macahepa.

²² Tásiha, ena Jesús máichavarepa:

—Jucaríhichahasera eta pítauchaquenyare. Píjararecaya tamutu eta pímahaqueneana. Tásiha, píjaracavacaya ena páureana. Jéheve éta, píjacapayare eta pímahaquenyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

²³ Te masamapa ena achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta marricovahi. Macatiequeneharinehi tamutu. Tiyanapa tipanererecapaipa. ²⁴ Eta máimairahi ema Jesús eta mapanereresirahi, máichavarepa:

—Yátupiquenehi máitujíhi eta nájjarasiravainahini eta náehisiranuinahini ena rícoana eta nasiapírainahini te anuma. ²⁵ Esamanuchaha. Eta juca tímicutíjiricavahi eta vípera camello, máitujíhi tánucuhahini te támicuejehe eta parirapa. Ene nacahehi ena rícoana —macahepa.

²⁶ Tacahe, ena tisamararacana, ánipa tacahehi eta nayaseresirahi:

—¡Tétavíavahi eta tamáitujicacarevahi! ¡Nájina títujicavaimahi náuchucuhahini!

²⁷ Ema Jesús majicapavacapa:

—Nájina émanaina achane émajivaimahi ticuchucuhava. Macarichu ema Viya marataha ticuchucuhahe —macahepa.

²⁸ Émaripa ema Pedro máichavarepa:

—Vítisera, Tata, vinaquicahi tamutu eta vicayehequeneana, vivarairahi véhicavihi.

²⁹ Ema Jesús majicapavarepa:

—Nutupíru numetacahe: Namutu nácani nanaquicahi eta napena, najunijicahivare ena ticachichana, ena naparapenaveana, nayanapanuca, nachichanaveanapuca, táichavene-yarehi eta náehisiranuyare; ³⁰ jararíhiyare eta táitsivayare te juca apaquehe eta náimahaquene-yare. Nararíhiyarevare ena achaneana téchapajiricanayareva. Tásiha, tavetijinapa te náitecapapa te apana náitaresiraya, máichecuaraquírenapa eta náuricacarevaya —macahepa ema Jesús.

Ema Jesús tíapechavavare máechajisíha eta máepenirayare
(Mt 20.17-19; Mr 10.32-34)

³¹ Ema Jesús máiputsiamuríhapa mámamuríhapa ena dócequeneana máimitureana. Tásiha, máichavacapa:

—Ímaha puiti, viyanainapa vicaijuhénapaipa te Jerusalén. Ánaqui táitauchiavayare tamutu eta nájucunachaqueneanahi ena profetanaini eta níchararacavayarehi nútí Manerejirunuhi ema Viya. ³² Ánaqui nucaijararecasiyare nútí nayehe ena apavasaqueneana romanoana. Énainapa ticaecahíjiricanuanayare, ticaetemajiricanuanaya,

tiátutuquichanuanayareva. ³³ Téstacuanuanayareva. Tásiha, ticapacuanuanainapa. Tásihasera te mapanaquenéna sache, néchepucainapa te nécari — máichavacapa.

³⁴ Énaserá ena máimitureana vahi nacaicutiarahini eta juca mametasiravacahi. Váhivare náimatiequenehahini tájahapuca eta máéchajisihahi taicha vahi náemetecahini énemahinahini náichahini ema Jesús.

Ena Jesús macaimairica ema achane púchuqui ticvasa te Jericó
(Mt 20.29-34; Mr 10.46-52)

³⁵ Tacahe, te tiánehipa titecapa ema Jesús tayehe eta avasare Jericó. Matiarahi ema achane púchuqui, téjacahi te achenechacaya tasiaparacuhi eta avasare. Tiyaseserecachi eta limosna. ³⁶ Te masamavacapa ena camuriqueneana achaneana tiánucuhanapaipa, macayaseserurapa ema púchuqui tájahahipuca eta téchacarehi. ³⁷ Nametacapasera eta émairahi tiánucuhayarehi ema Jesús Nazareno. ³⁸ Tacahe, tipiaracapa ema achane púchuqui: —¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunu! —macahepa.

³⁹ Ena achaneana títanupiráuchanapahi ema Jesús navarahapa nacamatincayarehini. Émasera tipiararecaichucha:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunu! —macahepa.

⁴⁰ Tacahe, ema Jesús te macanarapa, tíchecanumapa. Macavanairipipa náepana ema púchuqui. Te nacaitecapa, mayaserecapa:

⁴¹ —¿Tájaha picamunu nuyehe?

Ena púchuqui majicapavarepa:

—Tátachicha, nuvaraha picaimairicanupaini —macahepa.

⁴² Ena Jesús máichapa:

—Tiuri, nuchicha. Táichavenehi eta picasiñairanuhi, pinaracapa puiti —máichapa.

⁴³ Jéhesareinehi, tjahúchavapa timairirica ema púchuqui. Tásiha, tiyanapa máehica ema Jesús tíurisamurepaipa. Macunachapaipavare ema Viya. Énapa ena achaneana tímararacanahi eta manarasirahi, ichaprinehi eta nacunachirahi ema Viya.

19

Ena Zaqueo mavarahahi máimati ema Jesús

¹⁻² Tacahe, eta máitecapiraipa ema Jesús te tajuhe eta avasare Jericó, matiarahi ema achane rico, ticajare Zaqueo. Nacapitarahi ena cóbrarecarahiana eta impuesto. ³ Te masamairiricapa eta émairahi ema Jesús titecapapahi, mavarahapa máimatiyarehi. Étasera eta máichipichuvahi éma, vahi máratahahini máimahahini ema Jesús te namuri ena camuriqueneana achaneana. ⁴ Tásiha, tijunapapa eta te mayanihayarepahi ema Jesús. Tiápanapa te yucuqui, máimararacasaréipahi ema mavarahaquenehi máimati. ⁵ Tacahe, te macapecupa ema Jesús eta yucuqui mávihahi ema Zaqueo, máesenicapa ema Jesús te anuquehe. Tásiha, máichapa:

—Zaqueo. Yare, piúcupaica, taicha puiti nuvarahahi nunasinumayare te pipena — máichapa.

⁶ Tacahe, ema Zaqueo titátájipa tiúcupaicapa. Tiúrisamuréinehi eta majacapirahi ema Jesús. ⁷ Eta náimairahi ena achaneana eta juca, téchajicanapa mayehe ema Jesús. Náichapa:

—Émamesapa máitecapauchayarehi ema maca ticapecaturahitátáji —nacahepa.

⁸ Te téjacanapa te tajuhe, témeñahavapa ema Zaqueo te mamirahu ema Jesús. Tásiha, macahepa:

—Pímaha, Tata Náquenu. Núti néneuchavapa me Viya. Puiti níjaracayare ena páureana ticutimuriacaca eta nímaqueneana. Nímichavayareva te natiarhipuca ena nucaetemaqueneanahi, cuátrohénapasera eta táitsivayare eta nímuchavaqueneña —máichapa.

⁹⁻¹⁰ Tásiha, ema Jesús majicapa:

—Nímahapa puiti eta yátupirahi eta péneuchiravahi eta pipecaturana, taicha pivarahahi pímuchavayare eta plata picaetemareruanahi. Tásiha puiti, pijacapacarepa me Viya. Vaipa pémitiequenémahí. Taicha píti picutipa ema viáchucaimi Abraham eta macasiñavairahi mayehe ema Viya. Píti nuchaneravipa, picutipa ena apamuriana nucurujiruanahi. Taicha éta tímitecanuhi nuti Manerejirunuhi ema Viya —macahepa ema Jesús.

Ena Jesús máimicutichinava ema príncipe eta máijarasirahi ena machanerana eta maplatane, apaesa nacajurucayarehi

¹¹ Tacahe, ena achaneana, eta náimairahi eta mánehiraripa eta Jerusalén, náimijachaipahi éta pa tímiyanayare éma, eta máimeresiravayare eta marreyvayarehi. Tacahe, ema Jesús

máimatiacaripa eta napanereruanahi. Tásiha, máimitucavacapa eta apamuri máimicutichinapa apaesa nácaicutiara eta tayerevaichaha eta marreyvayarehi. ¹² Máichavacapa:

—Matiarihíhi ema achane. Ichape eta mapicacarevahi. Tiyanayarehi te apana avasare tayerehiquene. Eta tímiyanayarehi ánaqui máepanihayarehi eta mávacureyarehi eta marreyvayarehi tayehe eta mávasa. Eta machavirayarepa, téjacayarepa éma. ¹³ Te tiyanayarépa éma, máichuhanumapa ena diésqueneana machanerana. Májaracavacapa étapevacá eta maplatane tasivachaquenehi. Tásiha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”. ¹⁴ Tacahe, tiyanapa ema rey-yarehi tayehe eta macaijuheyarehi. Te máequenepasera, tistemamurianapa ena majaneanana. Anipa nacahe: “Vahi vávaraha émaina viyehéna rey ema maca” nacahepa. Náimivanerrecapa eta comisióh, nayaseserecayare vahi nacuijaraca eta mávacuréna. ¹⁵ Ticamesavauchasera majacapaichucha eta mávacurehi. Te tichavapa te mávasa, téjacapa émapa reyhi. Tásiha, máichuhavacapa ena machanerana májararuanahi eta maplatane. Mayaserrecapa te tímecavaipahipuca eta tachichanahi. ¹⁶ Tiyanapa ema émana tímerecavapa. Máichapa: “Tata náquenu, eta piplatane píjararunúhi tímecavaipa eta tachichanahi. Diésripa eta tajurusirahi”. ¹⁷ Ema rey majicapapa: “Tiuri, nuchicha. Tájina táichava. Tétavicava eta piúriya. Puiti vahi támapurujimahi eta piúrivahi tayehe eta juca ánichichaquenehi níjararuvíhi. Puiti níjaracaviyare pituparahaya nupuhaviya. Píti táquenuya eta diésquene avasareana”. ¹⁸ Tímerecavavarepa ema apana mamusura. Máichapa: “Tata náquenu, eta píjararunúhi piplatane, tímecavaipahi cinco eta tajurusirahi”. ¹⁹ Majicapavarepa: “Tiuri, nuchicha. Tájina táichava. Tétavicava eta piúriya. Puiti nunacaviyare aquenucaviya tayehe eta cincoqueneana avasareana”. ²⁰ Tímerecavavarepa ema apana mamusura. Máichapa: “Tata náquenu, júcahi eta piplatane. Vahi nucajurucahini. Núnacaichucha, nítipuichahi te pañuelo. ²¹ Taicha nupicahi nácaetehahini, machu pícuñacanu. Pétáviuchahi píti eta pivainarajiva, taicha píti pivehahi eta nématanevachayaréni”. ²² Tacahe, ema rey máichapa ema machanera: “Eta juca péchajiriruvahi, éta tímicaecherachavihi eta pépiyahiraivahi. Piplujuvahi eta tichavihi. ²³ Te pímatinuhipuca eta nuvainarajivahi, eta nuvehairaya eta pématanevacha, étapa eta nícuñasiraviyare te picamitiacapuca, váhiyapa pinacapaihi te banco eta nuplatane. Étainahini tajurusihahini apaesainahini nímaequenéahini puiti”. ²⁴ Tásiha, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”. ²⁵ Éna nacahevarepa: “Tata viáquenu, tímecavaipahinéni diéspepahi eta tajurusirahi”. ²⁶ Ema rey majicapavarepa: “Tiuri numetacaheya: Nácani ticajurucanahi camuri, nujanechinayare eta apana. Nácanisera tájinaquenehi nacajururénahini, nuverejicayare eta náíjaracasinihi. ²⁷ Énasera ena ticatianacananahi éna vahi najacapanuhini eta nurreyvahi, iáminanuyare ani te numirahu. Ecapapajicavaca éna”. ²⁸ Tacahe, te tamutupa eta juca máimituresirahi, ema Jesús tímiyanavavarepa típaica. Macaijuhepa eta te Jerusalén. Tinapucapa ena máimitureana.

Títecapapa ema Jesús eta te Jerusalén
(Mt 21.1-11; Mr 11.1-11; Jn 12.12-19)

²⁹ Te apanapa semana, tiyanavarepa. Te tiánehipa eta avasarechichana Betfagé étapa eta Betania, tacanarapahivare eta masihi ticaijare Olivoquiji, tíchecanumanapa. Mavanecapa ema Jesús ena apinana máimitureana. ³⁰ Máichavacapa:

—Eyanayare eta te jena avasarechicha Betfagé. Te itecapayarepa, ímahayare eta burrico ticaitúhahi. Eta jena sárare návuéquehéchaha, nájinaichaha ticaperainahi. Evejapuacayare, iáminanuyare eta ani. ³¹ Te natiarihinapuca náéñama, emetacayare eta nucamunuirahi núti —máichapa.

³² Tacahe, tiyananapa ena vanairucanahi. Jéhesaréinehi étapaichuhi eta mametarapihi éma. ³³ Te navejapuacaripa eta burrico, ena ticayeheana nayaserrecapa:

—¿Táviha iámihayare eta viyehe burrico?

³⁴ Éna najicapapa:

—Ema maena Viáquenu macamunúhi —nacahepa.

³⁵ Tacahe, náisapapa eta námiraya eta burrico. Te náitecapauchapa ema Jesús, náepacamaequechapa eta náepacuhana. Tásiha, ticaperapa ema Jesús. ³⁶ Te náimahapa ena achaneana tíuchujicapapahi ema Jesús, náimativanepa. Tiyananapa nácapahi éma. Técapairicanapaipa te mamirahu eta náepacuhana te mayanihayarepahi. ³⁷ Eta napaisirahi, témiricanapaipa te tachaui eta cerro ticaijare Olivoquiji. Namutu ena máimitureana téhicanahi ema Jesús típiaracanapaipa eta náurisamurevahi taicha eta náimahaqueneanahi tíáramicareana máichaqueneanahi éma. Ichape eta nacunachirahi ema Viya. ³⁸ Anipa nacahehi eta napiarasirapahi:

—Yare, Tata, ¡Piti réyquene, vanairucaquenévihí me Viya! ¡Asulupaya! ¡Puiti, te anuma vicuticacahí eta viürisamurevahí víti te eta juca apaquehe! Tétávicava eta vicunachira ema Viya eta macatajisirahavíhi —nacahepa.

³⁹ Tacahe, eta nasamirapahí ena fariséoana natiarihiqueneanahí eta napiarasirapahí ena achaneana, náechajicapa ema Jesús:

—Tata maestro, picamatinacavacaichu ena nani pímitureana —náichapa.

⁴⁰ Ema Jesús majicapavacapa:

—Tiuri, numetacahe puiti. Te namatinapuca ena nani, táitsivasera étainapa tipiaracaya eta máriana —macahepa.

⁴¹ Tacahe, títécapanapa te tápusi eta cerro Olivoquiji. Ticaeherapa eta Jerusalén. Eta máimairahí ema Jesús eta avasare, tíyahapa táicha. ⁴² Macahepa eta máiyairahí:

—Páurevisami piti návasasami Jerusalén. Te nácaicutiaraini apaesachichainaini ena pichichanaveanahí eta nuvarairahí nucuchuchavaca nútí. Puiti juca sache nutiari-hiraripa ani piyehe, náurihainehí nácamapuravahini eta náuricacarevahini. ⁴³ Taicha járajapayare eta sácheyare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahí picatiuchia-vaimahí. ⁴⁴ Témpapaicavianainapa te apaquehe. Nacapapajicavacainapa ena pichichanaveana. Tájina nacaemachaquenémahí eta peti. Tamutuyare náquipapaica. Eta piví-urevaya, eta juca pimajacapiranuhí eta néjirairavíhi nuti mavanerunuhí ema Viya —macahepa.

Ema Jesús macuchuchujicavaca ena tjararecanahí eta sárareana, cáyureana te tajuhe eta Templo

(Mt 21.12-17; Mr 11.15-19; Jn 2.13-22)

⁴⁵⁻⁴⁶ Tacahe, te apanapa sache, tiyanapa ema Jesús. Tisiapahí te Templo. Máimaharinehí ena achaneana tjararecanahí eta sárareana, cáyureana. Tásiha, tiseMAPa. Eta macuchuchujisiravacahí, máichavacapa:

—Ema Tata Nucaiyaquene, ani macahehí eta máechajiriruvahí te Sagrada Escritura: “Eta nupena tacarichu táicuchihí eta nayujarasirareya ena achaneana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahí. ¡Eyana iúchucataataji! —máichavacapa.

⁴⁷ Eta manasiquenerahí ema Jesús, tamutuhí sácheana timitureca tayehe eta Templo. Énasera ena tuparairucana énapa ena escribánoana, napanerechaipahí eta navarairahí nacapaca ema Jesús. ⁴⁸ Váhisera napatsicavahini taicha natiaríhi ena camuriqueneana achaneana tisamararacanhí eta máimiturapiána éma. Váhivare náisapaimahí náichahini ena titatianacanhí.

20

Nayasereca ema Jesús te vanairucahipuca me Viya

(Mt 21.23-27; Mr 11.27-33)

¹ Étana sache timiturecaichaha ema Jesús tayehe eta Templo eta máechajiriruva ema Viya. Títécapanapanapa ena tuparairucana, énapa ena aquenucarahana, énapa ena escribánoana.

² Nayaserecapa ema Jesús:

—Píti, vahí vitupararuvinahini víti eta píchirahí eta júcana. ¿Nájahasica tivanecavíhi? ¿Nájaha tituparacavíhi picha eta juca píchaqueneana? —náichapa.

³ Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera. ⁴ ¿Nájahapuca tivanecahí ema Juan eta máitesirahí eta máicachasirisirahí? ¿Émapuca ema Viya tivanecahí, émajiva-hipuca eta máitesirahí? —máichavacapa.

⁵ Váhisera náituruequenehahini eta najicapirayarehí. Tiácapaemajiricacanapa. Ánipa nacahe eta náechajiriruvannahí:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhí ema Viya”, éma macahénapapuca: “Tásiha, ¿váhiyapa esuapahini éma?”

⁶ Téhesera vácahepuca: “Émajivaichucha eta máitesirahí”, ticauyayacareipa nacapacahaví ena achaneana te márijahiana, taicha náechahí éna émairahí ema Viya tivanecahí ema Juan —náechajiricacapa.

⁷ Tacahe, ánipa nacahehí eta najicapirahí ema Jesús:

—Vahí vecha víti —nacahepa.

⁸ Ema Jesús máichavarepa:

—Énerichuvare nútí, vahí numetacahémahí nájahapuca ema tituparacanuhi —máichapa.

*Ena Jesús máimicutichina ena pártirárioana máurirahana
(Mt 21.33-44; Mr 12.1-11)*

⁹ Tacahe, ema Jesús tépanavavarepa máimitucavaca ena achaneana. Ánipa tacahehi eta máimiturapiána:

—Nuvaraha nímicutichinaheya, tatiarihi eta isaniti amairiha úvaquiji, masucurehi ema émana achane. Tiyanayarehisera ema ticayehe, tipairicayarehi te apana avasare. Tacahe, matuparacavaca ena tírehanayarehi te áñoana eta mayehe uva. Partidoyarepa eta majunijisirayarehi. ¹⁰ Tacahe, te títecapapa eta caje tayairahi eta uva, máimivanerecapa ema mamusura mayaseapanavacayarehi ena pártirárioanahi eta tatucachaqueneayarehi éma. Énaser a mayaseapanavacayarehi, tájina nájaracahini. Tisemauchavanarichucha, náehapa ema vanairucainihi. ¹¹ Tásiha, ema ticayehe máevatacavarepa ema apanavare mamusura, mayaseapanavacayarehi éna. Énerichuvaresera náumehavarepa ema vanairucainihi, náehavarepa. Tájina nájaracahini. ¹² Tásiha, ema ticayehe vahi macainajiruvahini. Máevatacavarepa ema apanavare mamusura. Énerichuvare náehavarepa ema vanairucainihi. Najarachapa, náquijicapa.

¹³ Tacahe, ema ticayehe tipanererecaripa: “¿Tájahasica nícharacavayare?” macahepa. “Nuvanecapuca mayana émajacaruvaina ema nuchicha némunarquenehi. Tatiarihi te émainapapuca napicaucha te náimahapa”. ¹⁴ Tacahe, te náimahapa ema machicha, navetijichucha eta nasemirahi. Tímutujiricacanaripa. Ánipa nacahe: “Émainapapuca ticayeheyare ema maca. Yare, vicapaca, apesa tánasipa tamutu vítinapa vicayehe”. ¹⁵ Tacahe, nacaratapaca éma, nacuchucapa eta tayehe eta isaniti, nacapacapa.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayehehina paciencia. ¹⁶ Títecanénapa macapapanavacayarepa ena pártirárioanahi máurirahanahi. Tásiha, májaracainavarepa eta úvaquiji ena apamuriana pártirárioanayareva —macahepa ema Jesús.

Tacahe, ena tisamararacana, ánipa nacahehi:

—Viti vicatajacare, vahi vácutihini ena nani máurirahana —nacahepa.

¹⁷ Ema Jesús máesenimurihavacapa. Tásiha, máichavacapa:

—Jéhepuca, németeacaser a vuíchaha ácaicutiarahini eta tacayemaquenehi eta Sagrada Escritura. Éta, áni tacahehi: “Ena tépiyarecarahiana eta Templo, tasapiha náepuruhi eta mari táicuchihí tatumearayare eta peti, taicha vahi náimatihini. Émasera ema Viya macaitecapapa eta táicuchihí eta tatuparahahi. Tacapicahuquenehi puiti” tacahehi eta Sagrada Escritura. ¹⁸ Puiti, nútí nucutihí eta ichape mari náepuruquenehi. Eti epurunuanahi, iáquipaicavayare évetutujicayare. Tichimaraheyare eta muraca ecuñaraqui taicha eta emavarahairahi éhicano —máichavacapa.

¹⁹ Ena tuparairucana navarahapa nájahúchayarehini nacaratata ema Jesús, taicha tímatiacavanapa éna eta énaírahi tayunacavaca eta máechajiriruvana ema Jesús. Váhisera napatsicavahini taicha návamirahuhi ena camuriqueneana achaneana.

*Navarahahi náemejecapavacha ema Jesús tayehe eta impuesto
(Mt 21.45-46; 22.15-22; Mr 12.12-17)*

²⁰ Tacahe, náimivanerecapa ena apamuriana ajairana tépiyacavanayarepahi tíuriana te mamirahu, navarairahi natanucayare eta tímiciaviuchayarehi. Énayarepa timetauchanavarehi mayehe ema aquenucahi prefecto Poncio Pilato. ²¹ Tacahe, nayaserecapa éma, ánipa nacahe:

—Tata maestro, vímatihí eta tatupiruvairahi tíuri eta juca pímiturapiánahi. Nájinavare pinerejiruinahini ena achaneana, taicha pivarahahi náehichahini namutu eta táurinaquene achene ticaijuhe me Viya. ²² Vívarahahisera viyaseraviyare: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihí ema Viya, ¿masí? —náichapa.

²³ Ema Jesús máimatiacavacapa eta tamaurivapahi eta napanereruana. Tacahe, máichavacapa:

—¿Tájaha tacayema evaraha ímiaquipaicanu? ²⁴ Náimahaseji, iáminanu étapena eta reale.

Éna nájaracapa. Tásiha, ema máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador.

²⁵ Tacahe, éma máichavacapa:

—Tíuri. Táuricahí íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuvare éma —máichavacapa.

²⁶ Váhiquenesera náratahahini náimiauipacahini eta nayaseresirahi te namirahu ena achaneana. Táitsivahi ichape eta námirahi eta táurivahi eta majicapiravacahi. Timatinnanapa tésamiricavanapa.

Nayasereca ema Jesús náicharacavayarepuca ena náepenaqueneana eta náechepusirayare (Mt 22.23-33; Mr 12.18-27)

²⁷ Nacahepaipavare ena apamuriana achaneana. Saducéoana. Ena nani saducéoana, apana eta náimiturapiana; váhi nasuapa eta náechepusirayare ena náepenaqueneana. Éna natanucahi eta táetseraruvayahi. Tacahe, nayasereca ema Jesús:

²⁸ —Tata maestro, ema víyarahaini Moisés manaquicahi eta ajureca máechajiriruvahi eta viyehe: “Te máepenaquenehahipuca ema achane esu mayena, tásiha, nájinahipuca manaquequeneruvainahini machichainahini; te matiarihihipuca mácani maparapehi, mavehayare esu machinenaquene, apaesa émainapuca macachicha eta suyehe, máitsivainahi ema maparapeni”. ²⁹ Tacutiquene te natiarhipuca ena siétequeneana ticapapajiricacana, te títauchavapa ema náechavimuri, máepenaquenehapasera esu mayena. Nájinahi machichainahini. ³⁰ Tacahe, ema maparape máitauchavare esu machinena. Énerichuvaresera máepenaquenehavare, nájinavare machichainahini. ³¹ Ema émana maparape máitauchavare ésu. Énerichuvare máepenaquenehavare. Namutu ena siétequeneana navehahi ésu, tásihasera náepenaquenehapahi, nájina émanainahini mácachichahini eta suyehe. ³² Te táequenepa, tépenapa esu esenaini. ³³ Tacahe puiti, te jéhesarepuca tichavanayare títarecana te táequenénapa eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi —náichapa.

³⁴ Tacahe, ema Jesús majicapavacapa:

—Ena ajairana te juca apaquehe natuparacasivaichuhi títauchavanayare suyehe esu esena. ³⁵ Ánaquisera te apana náitairesira, nácani ticatuparahanayare eta nasiapirayare te anuma te náechepucapa, vaipa nácamunuimahi esu esena. Énaripa ena esenana, vaipa nácamunuimahi ema ajaira. ³⁶ Taicha vaipa tíápechavaimahi tépenana. Nacutinapa ena ángleana eta namaepenacacairahi. Yátupinapa machichanaveanainapa ema Viya, taicha éma ticaechepucavacahi.

³⁷ Émaripa ema víyarahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaqueneana. Te máimahapa ema Moisés eta yucuqui timurujihí, eta macametacasiyahí mayehe ema Viya eta émarichuhi ema macasiñaquenehi ema Abraham, ema Isaac, émapa ema Jacobo. ³⁸ Taicha ema Viya, ema téchahi eta náitairesirana ena téhicanahi, tayanapane tépenanaripa. Namutu ena, tímiyanavarichucha títareca eta náchanevana te mamirahu éma —macahepa ema Jesús.

³⁹ Tacahe, ena escribánoana, ena natiarihiqueneanahi náichapa ema Jesús:

—Tétupicava eta juca péchajiriruva, tata maestro —nacahepa.

⁴⁰ Váipasera nacaemuñavahini nápechavahini nayasereca.

Ema Cristo, yátupiquenehi Viya. Mámariéquenehisera ema rey David (Mt 22.41-46; Mr 12.35-37)

⁴¹ Ema Jesús máichavacavarepa:

—Éti ecahehi eta échajiriruvahi: “Tíuchucayare ema Cristo, mámariequenehare ema víyarahaini rey David” ecahehi. ⁴² Yátupihí ema Cristo achanequenehi eta máimahi taicha mámariequenehi ema víyarahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: ⁴³ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. ⁴⁴ Ema David, eta máimijarechirahi ema Cristo: “Tata Náquenu”, ¿tájahapuca eta macayemaquenehi? Nutupiruva numetacahe: ema Cristo yátupiquenehi Viya éma. ¿Tájaha íchahi éti? —máichavacapa.

Ema Jesús máimereuchavaca eta náejecapiravana ena escribánoana (Mt 23.1-36; Mr 12.38-40; Lc 11.37-54)

⁴⁵ Namutu ena achaneana nasamararacahi ema Jesús eta máechajisiravacahi ena máimitureana. ⁴⁶ Ánipa macahehi eta nayehe:

—Échapavayare éti, machu éhica eta nayeherepiana ena escribánoana. Navarahavare ticapichuanayarehi eta náechajisiraya ena achaneana te jácani nácapajisihapahi éna. Tacutiquene tinerejiurucavana eta táurinaqueneana téjasihacareana te tiyanana te víurujisirarevana. Étaripa te nanisirana, ticaejacavanavare te jácani táviahí eta tíurinisipana tinicacare. ⁴⁷ Tacutiquene naverejicavare eta nacayehequeneana ena tépenaimana, nájina najapanuqueneana. Tásiha, tépiyacavanapa religiósanahi, tíupiemana eta nayujarasira,

namavarairahi tácaecherahini eta náichira eta tamauriqeneana. Énasera tiápajucavanahi eta nacaicuñairaya muraca.

21

Eta sunaquiruva esu máimaru tacachuricahi eta nanaquiruvana ena rícoana (Mr 12.41-44)

¹ Ema Jesús máimararacahi ena rícoana eta nanaquisirava eta plata tayehe eta chapama nanaquisirareva eta námavahuana mayehe ema Viya. ² Énerichuvare máimahavare tinaquicava esu ésuna esena suépenaimaquene. Páurequenehi ésu. Sunaquicahisera eta apipechichahi eta suplatane. ³ Tacahe, ema Jesús macahepa:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepañavahi eta sunaquiruva, sucachuricavacahi namutu ena apamuriana achaneana. ⁴ Taicha namutu éna tacarichu nanaquicahi eta námacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunicavacharehini —macahepa.

Ema Jesús máimereucharipa eta táquipaisiravaya eta Templo (Mt 24.1-2; Mr 13.1-2)

⁵ Natiarihíhi ena téchajisihanahi eta Templo. Náechajisihahivare eta táurinaqueneana tayereruvana nanaquiruanahi ena achaneana, étapa eta táurinavavacahi eta máriana tayeheanahi. Ichapemurihi eta táejeravahi te nacaematanénapa. Tacahe, ema Jesús máichavacapa:

⁶ —Járajapayare eta sáchevayare ticaquipaicasinapa tamutu eta juca Témplosami. Téjanerepaicinapa tamutu eta juca táurinaqueneanahi ímahaqueneana puiti —macahepa.

Tatiarihiyare eta ecutiarareanaya te tánehipaicha eta táichecuraya (Mt 24.3-8; Mr 13.3-8)

⁷ Tacahe, nayaserecapa ema Jesús. Náichapa: —Tata Maestro, ¿tájamuhuyarehipuca eta náimiaquipaisirayare eta Témplosami? ¿Jararihiyarepuca eta ecutiarareyare eta apana péchajisihaqueneana? —náichapa.

⁸ Ema Jesús máichavacapa:

—Ecuneuchavaicha yátupina, machu navayuacahe, taicha nárájapayare ena tépiyacavanayarepahi tímivisichavanayarepahi nuyehe. “Nútiripa Cristo” nacahénapa. Ena apamuriana nachahénapa: “Táitecapaqueneapa puiti eta sache”. Váhisera ecusuapavaca, váhivare ecuehicavaca. ⁹ Étaripa te esamairiricapuca eta guerra, revoluciónpuca, váhivare ecuarameca. Taicha eta táinapuaraquianayarehi eta júcana ecutiarareanayare, vuíchahasera étaimahi eta táichecuraya.

¹⁰ Ánivare macahe:

—Téhacacayareva eta ichapequeneana avasareana. Ticanarajiricacanainapa eta apamuriana. ¹¹ Tatiarihiyareva eta ichapeyare tayamurisirana eta apaquehe. Te avasareana tatiarihiyare eta ecuhamuhuyareva, jumaremuhuyareva. Te anuma tímerecavainavarepa eta ichape ecutiarareya, tiámayare eta ecuñaraquiyare.

Ena achaneana napanajiricainapa ena téhicanahi ema Viáquenu (Mt 24.9-28; Mr 13.9-23)

¹² Tativanumayaresera tipanajiricaheanayare éti, táichavenénahi eta éhisiranuhi níti. Titaratacaheanayare, tiámaheanayare te náurujisirarevana, ecayaserehinapa nayehe ena juéseana. Ecaevatainapa te cárcel. Tásiha, etiarihiyare eti tiámaheanaya te namirahu ena aquenucana, téhevere te namirahu ena Presidenteana gobiernohanahi, ecaviurevayare táichavenehi eta éhisiranuhi. ¹³⁻¹⁴ Étumechavasera. Te námahepa te ecayaserehiyaya, ecamapuravainapa échajisianuyare. Váhi ecueñamava eta ecayemayare ecatiuchiravaya. ¹⁵ Nímahahéinepa níti, njaracaheyare eta ítusirayare ecatiuchava. Nájina ácutimahi eta ítupajijiasiravaya. Ichape ecachuricayare ena iánaranaya. ¹⁶ Etiarihiyare éti énajacaruvainapa ena ticachichaheana tjararecaheanaya énaripa nácani eparapeanapuca, énajacaruvayareva tjararecaheana, énayarepaichupuca ena ejaneanana, ítumacasareana. Enerejicavainapa eti nacaparuanaya. ¹⁷ Namutu ena acha neana ticatianacaheanayare táichavenénahi eta éhisiranuhi. ¹⁸ Tayanapanesera nacapacahepuca, nímahahéinepasera níti. Vahi émitiequenémahi. Étaripa eta echutimacana, tájinavare témitiequenémahi. ¹⁹ Téhesera ecamichahi tamutu, ímianavahi eta éhisiranuhi, níti njaracaheyare eta itaresiraya.

²⁰ Te ímahapa ena suntaruana nachayacapa eta Jerusalén, étanaquenyarehi ejercito eta náichapemurivaya, étainapa ícutiaraya eta táitavirayare eta avasare. ²¹ Tásiha, te ímahapa eta juca, táuricapa etátájinapa ejuna, eti etiarihiqueneanahi te Judea. Ecaijuheyare eta

te céorroana, étaina eyumurusivaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa távarahahini nachavahini tayehe eta avasare. ²² Taicha táitecapauchainapa eta tasacherayarehi eta tacaicuñairaya, títauchavainapa eta tametarapi eta Sagrada Escritura. ²³ ¡Páureanasami nácani esenana tachimararuanayare, nácani ticajarianahipuca, nácani esenana ticachichanahi eta amuya tiájicahaha! Támairjicainapa eta nacatajivairayare namutu ena achaneana tiávihanahi te Jerusalén taicha eta náicuñayare. ²⁴ Natarihi ena tépenanaya te guerra, ena apamuriana nacaratatajicainapa prisionéoroanainapa. Námavacainapa te apanaqueneana avasareana. Ema Viya máisapainapa tisiapana te Jerusalén ena apava-saqueneana. Énapa téchanayare eta Jerusalén. Tiámainucava te máicutchapa ema Viya, machucavacainavarepa.

Eta máitesiraya ema Manerejiruhi ema Viya
(Mt 24.29-35, 42-44; Mr 13.24-37)

²⁵ Tacahe, tímerecavanainapa eta ecutiarareyare te sache, te caje, étapa te jarairiquiana. Tipicanainapa ena achaneana te juca apaquehe. Tiáramecanainavarepa taicha eta nasamirayare eta muracaquene táepacuruha eta íchapequene une. ²⁶ Ena achaneana tiáquipaicanainapa eta napsiraya, taicha eta náimairayare eta ecutiarareanayare, váhisera náimatiquenehaimahi tájahapuca eta náichararacavayarehi. Énerichuvare tiyejecavavacainapa eta tiávihanahi te anuquehe anuma. ²⁷ Nupaenumava nítecaninapa nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapa eta úcaji. Níñehinapaipa eta táetaviuchirayare eta nujaraivayarepahi. ²⁸ Te ímahapa tanacuchavapa eta juca ecutiarareanayare, evapinavainapa éti taicha tiánehiripa eta nítecapiraya nucatiuchiráheare.

²⁹ Máimicutirachinavare eta máimituresirahi. Ánipa macahe:
—Ecauneyare eta jáceni yucuqui. ³⁰ Te ímahapa títsivachavavacapa eta tapacajiana, tiánehiripa eta únemuhuyareipa. ³¹ Ene tacahehi, te ímahayarepa, ímatiacainapa eta tánehiriripa eta nítesirayare. ³² Numetacahevanecha: Vuichaha títavanimahi ena achaneana náitareruanaichaha te táitecapapa eta juca ecutiarareanaya. ³³ Títavayarepa eta anuma étapa eta apaquehe. Tatívyaresera títauchava tamutu eta numetaruhehi.

³⁴ Échapavaicha, machu tachimaracahe eta jena sache, vahi ecucuti ena tavayuaruana eta tércare, machu muracachutihéna táicha. Vahi ecueñamava eta itaresira, machu tahapapicahe eta éhisiranuhi. ³⁵ Eta táitecapauchirayare eta sache nuchavirayare tímicitijiricavahi eta tájahúchirava eta táeratásirava eta trampa. Ene nacaheare ena achaneana te tamutu avasareana eta namanecapachiravaya. ³⁶ Eta tacahe, etsecavaicha yátupina. Eyujarauchavahi támutu sácheana, apaesa túmehénapa eta ecamichiraina tamutu eta juca táichararacavayare, apaesa tacuija ecuchiravaina eta ítecapauchiranuya te numirahu nuti Manerejirunuhi ema Viya —macahepa ema Jesús.

³⁷ Tiuri, tamutu sácheana tiyana eta te Templo ema Jesús. Tímiturecahi. Te yátivare tiyanavare te avasarechicha Betania te táequenehi eta cerro Olivoquiji. ³⁸ Ena achaneana, tamutu yáticarhiana, tiyanana te Templo, útsecavanaripa eta nasamararasirayare éma.

22

Napanerechapa eta nacaratásiraya ema Jesús
(Mt 26.1-5, 14-16; Mr 14.1-2, 10-11; Jn 11.45-53)

¹ Tamirahupaipaicha eta fiesta ticajare Pascua, eta náepanavaira eta semana eta nanisirahi étachucha pan mayehere levadura. ² Tacahe, ena tuparairucana énapa ena escribánoana, navarahaichaha náimicapaca ema Jesús. Tásiha, natanucahi eta náicharacayare eta nacaratásirayare. Návamirahuhisera ena achaneana.

³ Tacahe, ema Satanás mávahácapa ema émana máimiture ticajare Júlasí. Émarichuhi nachamurihi ena dócequeneana apóstoleana. ⁴ Tacahe, ema maca Júlasí tiyanapa matanupanavacahi ena tuparairucana, énapa ena nacápítárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijarare-sirayarehi ema Jesús eta nayehe. ⁵ Tiúrisamureanarinehi eta mametasiravacahi éma. Nametacapa eta náijarasirayarehi eta plata. ⁶ Tacahe, éma majacapavacapa eta naplatane. Tásiha, máichavacapa:

—Tiuri, núti népanaheyare te nímahapa nacuijapa ena achaneana te machacaya. Námahénapa tayehe eta mávihahi éma —máichavacapa.

Ema Jesús mavanecahi ena apinana máimitureana, natsecayare eta naniryare tayehe eta Pascua

(Mt 26.17-25; Mr 14.12-21; Jn 13.21-30)

⁷ Títecapapa eta sache táepaniravahi eta semana tapiestara eta nanisiraya eta pan mayehere levadura. Étarichuvare eta jena sache ticajare Pascua, nacapasiraya eta uvesa ticajare cordero pascual, nanisirayare te jena yati. ⁸ Ema Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

⁹ Éna nayaserecapa:

—¿Táviha pivaraha vétupirisihaya?

¹⁰ Ema Jesús majicapavarepa:

—Eyanayare tayehe eta avasare. Te ítecapayarepa tayehe, íacapajicayare ema émana achane tiámapahi eta une te yupi. Éhicayare éma te peti masiapihayare. Éti apana esiapayareva. ¹¹ Emetacayare ema ticayehe eta peti. Ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. ¹² Éma, tímechahénapa eta ichape cuarto te anuquehe piso. Táuriquenéipahi eta jácara téjasihacareana. Tásiha, étupiricapa eta viniruyare —máichavacapa ema Jesús.

¹³ Tiyananapa ena vanairucanahi. Jéhesaréinehi, náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayeheyarehi eta Pascua.

Ema Jesús máenimurihapa ena máimitureana

(Mt 26.26-29; Mr 14.22-25; 1 Co 11.23-26)

¹⁴ Tacahe, te hórapa eta nanisirayarehi, téjacanapa te mesa ema Jesús énapa ena apóstoleana. ¹⁵ Eta máenisiravacapa, máichavacahi éna:

—Ichapemuri eta nuvarairahi nucachanehe eta nunisirayarehi eta juca téqueneha nénisirahehi puiti eta juca yati páscuairahi, mapurare vuíchaha táitecapahini eta népenirayare. ¹⁶ Tásiha, numetacahevaneya puiti, vaipa nápechavaimahi nunica eta Pascua, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁷ Tacahe, mavehapa eta vasu náerirare, mahasulupayachapa ema Viya. Tásiha, macahepa:

—Era eta juca. Ecajijiricaca. ¹⁸ Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁹ Tacahe, mavehavarepa eta pan, mahasulupayachavarepa ema Viya. Mayuvetuecapa, májaracavacapa ena máimitureana. Tásiha, máichavacapa:

—Eta juca neche. Enica. Étívenehi níjararecavahi eta népenirayare. Eta juca apajarahiyare te apaquehe, te étipava énicaca, éta témechaheyare nuyehe —máichavacapa.

²⁰ Énerichuvare, te títanesianapa, mavehavarepa eta náerirare vasu. Máichavacapa:

—Eta juca vino, táicutiarahi eta nítine táepusairuvaya ichavene éti, nufirmachirayare eta arairu matratune ema Vicaiyaquene, nucaejasirayareva eta matratune apaesa ejaacaporeya mayehe.

²¹ Puítisera, ani te etaracu, mararihi ema tíjararecanuyare. ²² Yátupiquenehi eta nacapasiranuyarehi, taicha tacahehi eta mapanereruhi ema Tata eta nuyehe nuti Manerejirunuhi éma. Páuresamisera ema tíjararecanuya —macahepa.

²³ Tacahe, ena máimitureana tiyaserejiricananapa:

—¿Nájahapuca mácani te vitaracu ema tíjararecaya ema Viáquenu? —nacahepa.

Ema Jesús máimitucavaca eta nacapicahuirayare ena téchapajiricanahi ena nachamuriana

²⁴ Te táequenepa, tiácapaemajiricanapa ena máimitureana tayehe eta nájahayarepuca ema ichapequenepanaya aquenuca te nataracu te náejasiraya te návacureanayare. ²⁵ Te máechapa ema Jesús, ánipa máichavaca:

—Ema réyeana énapa ena aquenucana te ichapequeneana avasareana nacaetemajiricavacahi ena achaneana, navarairahi ticapicahuanayarehi. ²⁶ Étisera vahi táuricaímahi ene ácahehini. Téhesera evarahahipuca ecapicahu, vahi ecasiñavaimahi. Ecutiyaare ema amaperu eta mamansuvahi. Tacutiquene nácani tivanecanahi, tatuparacavacahi téñamavanayare eta náechapajirisiravacayare ena nachamuriana. ²⁷ Eta nayeherepi ena achaneana, ichape eta napicauchirahi ema ténicahi eta tinicacare. Énasera ena vanairucana téchapajiricanahi eta mesa, vahi nacapicahuhini. Puítisera, nímitucaheyare eta juca arairu nuvanairipi. Puiti ímahanuipa eta nítátirahehi. Nuvaraha ecutinuya. Ítaticayare éti.

²⁸ Éti, ímararacanuhi eta náichiranuhi ena ticatianacanuanihi. Váhisera ejunijicanuhini. ²⁹ Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata. ³⁰ Éjacainapa tayehe eta ecaturarahairaya. Étinapa evanerecaya

nayehe ena dócemuriqueneana ena vijaneanana israelítana. Ecachanenuinavarepa te mesa eta enisiraya ánaqui te nucatuparahairayare —máichapa.

Ena Jesús máimereucha ena Pedro eta máepiyasiraya vahi máimati ena Jesús
(Mt 26.31-35; Mr 14.27-31; Jn 13.36-38)

³¹ Ena Viáquenu máichapa ena Pedro:

—Nuchicha Simón, péchapavayare. Ena Satanás, ichape eta mavarairahi ticaicutia-raheyare tiáquipaicheyare emutu éti. ³² Nútisera nuyaseuchahehi me Tata, pítiripa, apaesa vahi tacuemitiaca eta péhisiranuhi. Piáquipaicavasamiyaresera. Tichavayaresera eta picasifairanuya, tásiha pétimechavacainavarepa ena apamuriana pichamuriana —máichapa.

³³ Ena Pedro majicapapa, máichapa:

—Tata Náquenu, tájina vahi nujunijicavímahi. Níjaracava néhicavi tayehe eta cárcel. Te nacapacavipuca, nútí apanavare níjaracavavare nacapacanu apaesa nácachanevi —macahepa.

³⁴ Ena Jesús majicapapa:

—Numetacavivaneya, Pedro. Puiti jena yati, te tamirahuinarichaha eta táechajisiraya eta varayu, piti mapaheyare pépiyacavayare vahi pímatinu, eta picatiuchiravayare pítijiva —máichapa.

Puiti etserereacavainapa

³⁵ Tacahe, ena Jesús mayaserecavacavarepa ena máimitureana. Máichavacapa:

—Te nuanecahénapa epaica, nutuparacahehi vahi ecuama eta tarera, eta billetera, eta eparupevana, ¿yátupihí, masí, vahi ecamunuvapahini?

Ena najicapapa:

—Tájina vácamunuipahini.

³⁶ Tásiha, máichavacavarepa:

—Puítisera mácani ticatarerahi, tiúripanahi mámayare eta matarera, étpa eta mayehe billetera. Émaripa mácani tájinahi mayehénahi espada, tiúripanahi máijarareca eta masacu, mavacharesihaya eta mayehyare espada. ³⁷ Tacahe numetacahévanécha. Ena achaneana nacatianacahaviya muraca. Títauchavainapa eta táechajiriruvanahi eta Sagrada Escritura eta níchararacavayarehi: “Timicutijiricavahi námerahihini náicha”. Tamutu títauchavayarehi eta tacayemaqueneanahi eta Sagrada Escritura eta nuyehe —macahepa.

³⁸ Tacahe, ena máimitureana náichapa:

—Tata Viáquenu, jucarihi apinahi eta espada.

Éma majicapavacapa:

—Tiuri, tarataquene.

Ena Jesús tiyujaraca te Getsemaní

(Mt 26.36-46; Mr 14.32-42)

³⁹ Tacahe, tiúchucapa ena Jesús, énapa ena máimitureana, tiyananapa tayehe eta huerta Getsemaní tiávihahi te táemiripaisinehi eta cerro ticaijarehi Olivoquiji, eta mayujarasirarehi éma. ⁴⁰ Te títecapanapa tayehe eta Getsemaní, máichavacapa:

—Eyujarauhava. Eyaseaca ena Viya eta étumevaina apaesa vahi macuiturucahe ena Satanás —máichapa.

⁴¹ Térajipanavapa apaesa ena Jesús eta nayehe. Cincuenta metro eta mayerehinévacahi. Tépuycapa. ⁴² Eta mayujarauhiravahi, ánipa macahe:

—Tátachicha Nucaiyaquene, picatajicanupaini. Nuyaseacavi vahi tacuitauchavaini eta níchavaquenevayare. Váhini picuisapaini eta nucatajivairaya. Níjaracavasepa nútí eta nítauchiraya eta pivarahaquenehi píti eta nuyehe —macahepa.

⁴³ Tacahe, tiáramicarepa máucupaucha ena émana ángele tiásihahi te anuma. Máetumechapanyarehi. ⁴⁴ Ichape eta máeñamiravahi eta mayujarasirahi. Témiricapa eta máepatsure tacasiriquiamapahi eta máitine. Cuájuuamapaipa eta táemirisirahi te apaquhe.

⁴⁵ Te títipiricapa eta mayujarasirahi, téchepucapa. Tiyanapa te návihahi ena máimitureana. Máimahinehi éna, tímacanaripahi táichavenehi eta nacatisamurevairahi. ⁴⁶ Tásiha, máichavacapa:

—¿Tájaha tacayema ímacaichucha éti? Échepuca. Eyujarauhava apaesaina. Eyaseaca ena Viya eta étumevaina apaesa vahi macuiturucahe ena Satanás —máichavacapa.

Nacaratacapa ena Jesús

(Mt 26.47-56; Mr 14.43-50; Jn 18.2-11)

⁴⁷ Tacahe, téchejiricavainirichaha ena Jesús, títecapananecha ena camuriqueneana suntaruana. Máinapumirauchavacapaipahi ena Júlasí. Témeñahavapa eta mayehe ena Jesús. Máetserecapa. ⁴⁸ Tásiha, ena Jesús máichapa:

—Júlasi, ¿tájaha tacayema pétserarecanu eta píjararesiranuhi nuti Manerejirunuhi ema Viya? —máichapa.

⁴⁹ Tacahe, ena máimitureana natiarhiqueneanahi, eta náimairahi ena camuriqueneana suntaruana, nayaserecapa ema Jesús. Ánipa nacahe:

—Tata Viáquenu, ¿vicatiuchava te espada?

⁵⁰ Tásiha, ema émana mavehapa eta mayehe espada. Maychatipaisinapa eta machaca tinapa te vaure ema mamusura ema aquenuca Caifás. ⁵¹ Ema Jesús máicha nuti Manerejirunuhi ema vacapa:

—Ésamiricavachucha —macahepa.

Tásiha, ema Jesús mavehapa eta machacaini ema achane, máimichavapa máipistaca, tinarcavanepa. ⁵² Tásiha, máichavacapa ema Jesús ena tuparairucana natiarhiqueneanapahi eta nacaratasirahi éma, énapa ena aquenucarahana, énapa ena oficiáleana tayehe eta Templo. Macajachavacapa:

—¿Tájaha tacayema ecasiña eta espada, ecaepuchiriquipahivare eta etanusiranupahi, tímicutijiricavapa námerahihini nútí? ⁵³ Étayapasica cape juca tamutuhi sácheana nucachanehehi tayehe eta Templo. Váhivare epatsicavahini ecaratacanuhini. Étiserá iúricapuca eta tamapicuvahi eta yátimuhuhi eta íchirahi eta tamauriqueneanahi taicha mávaháruhehi ema Satanás. Máisapaquenéhevarepa ema Tata eta ecaratasiranuyarehi —máichavacapa.

Ema Pedro tépiyacavapa vahi máimati ema Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tacahe, nacaratacapa ema Jesús. Námapa te mapena ema corregidor Caifás. Émasera ema Pedro máehiequenehavacapaipa. ⁵⁵ Ánaqui te tajuhe te canchón, ticamururecanapa eta yucu násasiavayarehi. Téjamurihanapa te tachacaya eta yucu. Téjacavarepa ema Pedro te namuri. ⁵⁶ Sucahepaipahi esu sirvienta, suímahapa ema Pedro eta máejasirahi te tachacaya eta yucu. Suímararaciripahi. Tásiha, suíchapa:

—Eñi ñica achane éñirichu ñichamuri eñi Jesús.

⁵⁷ Émasera ema Pedro tépiyacavapa vahi máimati. Máichapa:

—Pímaha, esena, vahi nímati nútí ema píchaquenehi.

⁵⁸ Te tiyererehachichavare, máimararácaripavare ema apana. Máichapa:

—Píti pítirichu machamurivi ema maca.

Ema Pedro majicapavarepa:

—Vahi, tata. Vahi machamurinuina —máichapa.

⁵⁹ Te hórapapuca eta táetavisiravahi, máimahavarepa ema apana, máimatipa eta máechajiririrava ema Pedro. Máichapa:

—Yátupiquene pítirichu machamuri ema maena Jesús, taicha eti ecavasana te Galilea, tímaticarehi eta échajisira —máichapa.

⁶⁰ Ema Pedro majicapapa:

—Vahi nímati, tata, nájahapuca ema maena píchaquenehi —macahepa.

Tacahe, téchajiricavainirichaha ema Pedro, énevanepa téchajicanecha eta varayu. ⁶¹ Ema Viáquenu máesenicapa ema Pedro. Enévanerinehi téchava ema Pedro eta mametarapianahi ema Viáquenu eta máichirahi: “Te tamirahuinarichaha eta táechajisirayare eta varayu, píti mapaheyare pépiyacavayare vahi pímatinu”. ⁶² Tásiha, tiúchucavanepa ema Pedro. Tiyahapa taicha máimativanepa eta táichapevahi eta máejecapiravahi.

Nacaecahijiricapa ema Jesús

(Mt 26.67-68; Mr 14.65)

⁶³ Ena suntaruana tijaneacanahi ema Jesús, nacaecahijiricapa éma. Náeharacapa.

⁶⁴ Náitiquichavare. Náehamirahavare. Tásiha, náichapa:

—Vímahasejicacha, te pijarauquipuca, pímatihaviyare nájahapuca ema téhamirahavíhi —nacahepa.

⁶⁵ Ichapemurivare eta napanararachirahi éma.

Nacatupihapa ema Jesús te namirahu ena aquenucana

(Mt 26.59-66; Mr 14.55-64; Jn 18.19-24)

⁶⁶ Te tijarahipa, ticurujicacanapa ena tuparairucana, énapa ena aquenucarahana, énapa ena escribánoana. Námapa ema Jesús, nacatupihapa te namirahu. Nayaserecapa:

⁶⁷ —Viyaserecaviyare. ¿Pítisaréji Cristo, ema vicuchapaquenehi? —náichapa.

Majicapapa ema Jesús:

—Tiuri, te numetacahe eta nútirahi, éti vahi esuapanuimahi. ⁶⁸ Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaiticanuimahi. ⁶⁹ Étainapasera nucaijuhéyare te anuma nuti Manerejirunuhi ema Viya eta néjasirainapa te mavaure ema Tata, máitupajijihaquenehi éma —máichapa éma Jesús.

⁷⁰ Nayaserecavare namutu, náichapa:

—Tacahe piti, ¿pímijachavapuca machichavi ema Viya?

Éma majicapavacapa:

—Yátupi machichanu —máichapa.

⁷¹ Tacahe, éna nacahepa:

—Vaipa tácomesa vicayaseseruruhini ena testigoana. Émaquenepa visamahi puiti eta juca máechajiriruvahi, étapa ticaviureya —nacahepa.

23

Námapa ema Jesús te mamirahu ema Pilato

(Mt 27.1-2, 11-14; Mr 15.1-5; Jn 18.28-38)

¹ Tacahe, téchepumurihanapa namutu. Námapa ema Jesús te mamirahu ema Pilato. ² Te nacaitecapa, náepiyaequenehapa éma. Ánipa nacahe:

—Viámaphi ema maca achane ani te pimirahu. Mavarahahi mahapapisinahaviyare ena vichanerana. Énerichuvare macahehi váhiji táurica vivachachahini eta impuesto mayehe ema viyehe Presidente Emperador. Énerichuvare, macahehivare eta émairahíji Cristo, ema réy-yarehíji —náichapa.

³ Tásiha, ema Pilato mayaserecapa ema Jesús:

—¿Yátupisareji réyvihí pítí nayehe ena pijaneanana israelítana? —máichapa.

Éma Jesús majicapapa:

—Pitupiruvahi eta juca piyaseresiranuhi. Yátupihí eta nurreyvahi —máichapa ema Jesús.

⁴ Tacahe, ema Pilato máichavacapa ena tuparairucana énapa ena achaneana natiarihique-
neanahi:

—Tájina maviurevaina eta nímairahi ema maca achane —máichavacapa.

⁵ Énasera nayurucapa muraca ema Pilato. Ánipa naicha:

—Éma maca, ichape eta mahapapisirahi eta napanereruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

Éma Jesús námavare te mamirahu ema Herodes

⁶ Éta masamiravacahí ema Pilato, macayasesererupa te éthapuca te Galilea macavasahi ema Jesús. ⁷ Te nametacapa eta étairahi macavasa ema Jesús, macavanairipipa ema Pilato nama mayehe ema Herodes, aquenucahi tayehe eta Galilea, taicha ema Herodes matiarihíhi tayehe eta Jerusalén eta jena sácheana páscuairahi. ⁸ Tacahe, tíurisamuréinehi ema Herodes eta máimairahi ema Jesús. Ichapemuríhi eta mavarairahi máimati taicha masamairiricahi tamutu eta tíaramicareana máichaqueneanapahi ema Jesús. Mavara-hainehi tíjahúchava máimahahini eta jácani tíaramicare. ⁹ Ichapemuríhi eta mayaseseresirahi. Émasera ema Jesús, tájina vahi majicapahini. ¹⁰ Natiarihípahivare ena tuparairucana. Tétavicavahi eta nasemanevahi eta náepiyaequenehairapahí. ¹¹ Tásiha, ema Herodes énapa ena masuntarurana, ichaperinehi eta náepuruirahi. Tacahe, ema Herodes mavehapa eta mamuirihaini manaquíriaruvapahí, táepahamequeneripahí eta tajanunumesirainíhi. Mamuriachapa ema Jesús. Táicutiarahi eta nacaecahirahí éma. Tásiha, macavanairipivarepa ema Herodes náimichava te mamirahu ema Pilato. ¹² Éma Herodes émapa ema Pilato ticatianacacaninihi eta náitaresirahi. Étasera te jena sáchequenehi tichavapa eta námunasiracacahi.

Éma Pilato macavanairipipa eta náetatasiraya ema Jesús

(Mt 27.15-26; Mr 15.6-15; Jn 18.39-19.16)

¹³ Tacahe, ema Pilato eta máimairahi náimichavirahi eta mayehe, macurujimuríhapa ena tuparairucanahi énapa ena achaneana. ¹⁴ Tacahe, máichavacapa:

—Éta íámirapahi ema maca achane te numirahu, ímijachahi mahapapicavaca ena achaneana. Nútisera nímahahi tájina maviurevainahi eta nuyaseseresirahi te emirahu eta ímijachaquenehi eta máejecapiravanahi. ¹⁵ Émaripa ema Herodes máimichavavare eta ani nuyehe taicha tájinavare máimahahini eta máejecapiravainahini. Étainahípucaini taviuchahini táimicapacahini. ¹⁶ Tíuriserapuca nímvánereca macaemecharahí, tásiha, nucaitacapa —máichavacapa.

¹⁷ Eta mayeherepi ema Pilato te Páscuamuhuana te áñoana macaiticayarehi ema émana preso te jena sáchequenehi. ¹⁸ Tacahe, ena achaneana vahi návarahahini máuchucuhahini ema Jesús. Tipiaracanapa muraca. Ánipa nacahe:

—Vahi vávaraha máuchucuha ema maca. Émaina máuchucuha ema Barrabás —nacahepa.

¹⁹ Ema Barrabás te cárcel mávihahi. Táimicuñaruhi eta máichirahi eta revolucióm étapa eta macapahivahi. ²⁰ Émasera ema Pilato mavarahaichucha macaiticayarehi ema Jesús. Mayaseremuriahavarepa. ²¹ Énasera muracapanapaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

²² Mapahequenepa eta mayaseresiravacahi éma:

—¿Tájasica eta maviurevahi ema maca? Núti tájina nímaha maviurevainahi táimicapahini. Tiúriserapuca nímivanereca macamecharahi, tásiha, nucaiticapa —máichavacapa.

²³ Énasera tímítujiricacanapa eta napiarasiraina nayaseasiraina eta macaetatairaya te crusu. ²⁴ Jéhesaréinehi, ema Pilato masuapavacapa eta nayasearapihi ena tuparairucana.

²⁵ Émapa tiúchucuhahi ema Barrabás ema nayasesereruhi, táimicuñaruhi eta máichirahi eta revolucióm étapa eta macapahivahi. Macavanairipipa táitauchava eta navarahaquenehi éna, eta nacapasiraya ema Jesús te crusu.

Náetatacapa ema Jesús te crusu

(Mt 27.32-44; Mr 15.21-32; Jn 19.17-27)

²⁶ Tacahe, námapa ema Jesús tayehe eta macaetataiyayarehi. Eta napaisirapahi te calle, nácapajicapa ema achane ticaijare Simón ticavasahi te Cirene. Éma, másihapahi te máesane. Napamicapa máevachacaya manaracuhayarehi eta macurusura ema Jesús, máehicapapahi te máequene ema Jesús.

²⁷ Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahi, náimararasirahi eta máejapanuravapahi éma.

²⁸ Máesenimurihapa éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenénahi ena echichanaveana. ²⁹ Taicha tatiarihiyare eta sáchevayare nacapacayarevare ena. Ichape eta nacajapanuravairaya eta nacapasiraya. Tásiha ecahénapa: “Tétavacavapa náuriva ena esenana macheruana. Nájina náimipanererecaini”. ³⁰ Tásiha, ena achaneana, eta napisirayare, tijnunainapa te cérrona, tásiha, nacahénapa: “Tiúripa-napucaini viyumurucavahini eta te juca cerro.” Ena apamuriana nacahenavarepapuca: “Étapucaini te juca simena viyumurusiavahini”. ³¹ Apanasica núti ichapemuri eta nucatajivairahi, tájinahinéni taviuchanuhini. Navetijiyarecha éta nátajivayare ena echichanaveana* —máichavacapa.

³² Énerichuvare natarihipahivare ena apinana tiámerahiana macutiqueneanayarehi ema Jesús eta macaetatairayare. ³³ Tacahe, nacaitecapapa tayehe eta masihi nacaetatairare ticaijarehi Calavera. Náetatacapa te crusu ema Jesús, énapa ena apinana tiámerahiana. Ema émana nanacapa te mavaure, ema apana te sapa. ³⁴ Te náetatacapa ema Jesús, macahepa eta máechajiriruvahi:

—Tata, piperdonachavaca ena nani, taicha vahi nácaucitirahini eta juca náichiranuhi —macahepa.

Tacahe, ena suntaruana nasuertehachapa eta mamuirihaini eta náijarajirisiracacahi. ³⁵ Natarihihi ena achaneana tímararacanahi tamutu. Énaripa ena tuparairucana natarihihivare. Nacaecahijiricaripa éma. Ánipa nacahe:

—Ema mácacacha, macahehi eta máechajiriruvahi eta maratahairahíji macuchucuhavaca ena apamuriana achaneana. Tásiha puiti, vivaraha vímaha máimereuchava eta máitupajijiasiravahíji, te yátupihipuca Cristo éma, Manerejiruhíji ema Viya —nacahepa.

³⁶ Énerichuvare ena suntaruana nacaecahijiricahivare éma. Navarahapa náesichayarehi eta tasisiru vino. ³⁷ Náichapa éma:

—Te yátupinapuca piti reyvíhi nayehe ena israelíta, píitijivaina picuchucuhava —náichapa.

³⁸ Tatiarihihivare eta ajureca nanacaquenehi te tachutisi eta macurusura. Eta juca ajureca tacajuquenehi te náechajiriruva te griego, te latín, téhapa hebreo. Ani tacahehi eta táechajiriruvahi: “Ema maca ema Rey nayehe ena israelítana”.

³⁹ Ema émana tiámerahi macaetataquenehi te machacaya, énerichuvare éma macaecahihi. Ani macahehi:

* **23:31** Eta juca mayeherepi proverbio ema Jesús te máechajiriruva, ani tacahe: “Te náichahi eta juca eta náimairahi eta yucuqui vérepacavacaichahahi, tétavacavahi eta navarairahi náquipaica te tájiquipa”. Tatiarihi eta tacayemaquenehi tayumurevahi.

—Te yátupinapuca pítiqenehi Cristo, picuchucuhava pítijivaina. Tásiha, picuchucuha-vivare víti apana —máichapa.

⁴⁰ Émasera ema apana macaetataquenehi macahepa:

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi. ⁴¹ Víti, vivachachahi eta juca vitapiravahi taicha ichapequenehi eta véjcapiravanahi. Émasera ema maca Jesús, ticatajivahi tájinahinéni taviuchahini.

⁴² Tacahe, máichapa:

—Tata Jesús, péchanupaini te péjacapa tayehe eta piávacureya —máichapa.

⁴³ Ema Jesús majicapapa:

—Numetacavivane, puíti píti nucachaneviyare te paraíso —máichapa.

Eta máepenirahi ema Jesús

(Mt 27.45-56; Mr 15.33-41; Jn 19.28-30)

⁴⁴⁻⁴⁵ Tacahe, te las dócequeneha, témahapa eta sache. Timapicupa tamutu eta apaquehe. Mapana hora eta tamapicuirahi. Étarichuhi eta jena máepenirahi éma, tñjahúchavapa tétsayumeca eta tayehe cortina eta Templo. Ticutimecaca eta taetsayumesirahi. ⁴⁶ Ema Jesús tipiaracapa:

—Tata, pijacapanu eta náchaneva —macahepa.

Te titapiricapa, tépenapa.

⁴⁷ Tacahe, ema nacapitara ena suntaruana romanoana, tipicarinehi eta máimairahi eta júca. Étapa macacutiarapa, macunachapa ema Jesús, ánipa macahe:

—Yátupiquenéichuyapa ema maca achane matapiravarehi —macahepa.

⁴⁸ Namutu ena achaneana natiarihiqueneanahi, eta náimairahi eta júcana, ichaperinehi eta napisirahi. Téhatupachávanapáipa eta nacatisamurévairahi. ⁴⁹ Énasera ena téhicanapahi ema Jesús te másihainapa te Galilea, énapa ena esenana, namutuhi nanecaparacahi eta juca táichavaquenevanahi. Nayererehíhisera eta náimararasirahi.

Nacucupaicapa te crusu ema Jesús, náecarapa

(Mt 27.57-61; Mr 15.42-47; Jn 19.38-42)

⁵⁰⁻⁵¹ Matiarihivare ema achane ticajjare José. Ticavasahi te Arimatea te Judea. Tipicaurahihi éma. Tétavacavahivare eta máuriva. Masuapahi ema Jesús, eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarohana, váhisera mapauchavacahini ena machamurianahi tayehe eta juca náichaqueneanahi tauriqueneanahi. ⁵² Te cáperhichichapa, eta máimairahi máepenirapahi ema Jesús, tiyanapa mayehe ema Pilato, mayaseapanahi eta máquehe ema Jesús, mavarairahi máecarayare. ⁵³ Te tichavapa, macucupaicapa eta máquehe tayehe eta crusu. Máyuruacapa eta te sávana tijapu. Náiyaracuhapa tayehe eta máecari eta te mari nasecajúeruhi. Nájinaichaha nacaecarasihini tayehe. ⁵⁴ Titatajanapa taicha cáperhichichapahi. Taicha vahi táisapacarehini náecararechahini te yati, váhivare te tijarahiacaimahi taicha sávarumuhuyarepa.

⁵⁵ Ena esenana téhicanapahi ema Jesús te másihainapa te Galilea, tiyananapa tayehe eta máecari, náimatiyarehi eta mávihahi. ⁵⁶ Te náimatipa, tichavanapa te napena. Natsecapa eta perfume mayajihayarehi. Tinaracanapasera te jena sáchequenehi, napicauchahi eta tipicauchacarevahi.

24

Eta máechepusirahi ema Jesús te máecari

(Mt 28.1-10; Mr 16.1-8; Jn 20.1-10)

¹ Te apanapa sache, te tijarahichichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahi, nacachanevacapaipa ena apamuriana esenana. ² Te titecapanapa tayehe eta ecarí, náimaharinehi eta ticheyarame mari tájihainihi eta ecarí, téquehepuichavaipa. ³ Tisiapanapa éna, nájejacainehi eta máquehe ema Viáquenu Jesús. Májinaripahi. ⁴ Tiáramecanarinehi eta náejasirahi. Váipa náimatiquenehahini tájahahipuca eta máichararacavahi. Tásiha, tiáramicarepa náimahahi ena apinana ajairana titupihanahi te nachacaya. Tijanunucavacahi eta namuirihana. ⁵ Eta náramesirahi éna, tétipaimurihanapa. Énasera ena ajairana náimahaqueneanahi náichapa:

⁶⁻⁷ —Éti ímjachaipapuca manasihí tépenahi ema Jesucristo, Manerejiruhi ema Viya. Májinaripa, tichavaripahi títareca. Échavarichuhipuca eta macayemaqueneanahi te achane-richaha te manasiquenerichaha te Galilea. Macahehi eta máechajiriruvahi eta nacaratásirayarehi ena ticatianacanahi éma, náetatasirayarehiva te crusu. Téchepecayarehisera te mapanaquenénapa sache —nacahepa ena ajairana.

⁸ Tacahe éna, enurujirinehi náechavane eta máechajiriruvanahi ema Jesús. ⁹⁻¹⁰ Te tichavanapa te napena, nametacapa ena óncequeneana apóstoleana, énapa ena apamuriana nachamurianahi. Te nataracu ena esenana tímahanahi ena ángeleana, sutiarihipahi esu María Magdalena, esu Juana, ésupa esu apanavare María, máenahi ema Jacobo. ¹¹ Énaser ena apóstoleana vahi nasupahini, náimijachaichucha náepiyahiraivahi namaurishivahi ena esenana.

¹² Tiyavanepasera ema Pedro tayehe eta ecarí. Tijnapapaipahi. Te títecapapa, máimahapa tacarínehi eta sávana. Mapanerequenehainehi eta juca táichararacavahi. Tacahe, tichavavarepa.

Tímerecavapa ema Jesús nayehe ena apinana máimitureana te táchehu ticaijuhe eta avasarechicha Emaús

(Mr 16.12-13)

¹³ Étarichu te jena sáchequenehi, tipaicanapahi te achene ena apinana máimitureana ema Jesús. Násihahi éna te Jerusalén nacaijuheharehi eta avasarechicha Emaús. Once kilometro eta tayerehivahi. ¹⁴ Eta napaisirapahi nacasamurepaipahi eta nasamairiruhi. Téchajiricavanapaipa. ¹⁵ Eta náechajisihairapahi eta juca táichararacavanahi, tíaramicarepa macapayamurihapa ema Jesús, macachanevacapaipa. ¹⁶ Énaser vahi náimatihini, taicha éna vahi máisapahini náimati. ¹⁷ Tacahe, ema Jesús mayaserecavacapa:

—¿Tájahasica eta juca échajisihapahi eta epaisirapahi? ¿Tájaha eta tímpanererecáhepahi? —máichavacapa.

¹⁸ Ema émana ticaijarehi Cleofas majicapapa:

—Namutu ena achaneana náechahi eta juca táichararacavahi te Jerusalén puiti juca sácheanahi. ¿Picarichuhipuca pítí vahi péchahini eta juca, eta piáivhairahi te Jerusalén?

¹⁹ Éna máichavarepa:

—¿Tájahasica eta téchacarehi?

Éna náichapa:

—Émara véchajisihapahi eta máichavaquenévahi ema Jesús Nazareno, ema profeta máuriquenehini nayehe ena achaneana. Tamutuinihi tiuri eta máimiturapiana, tétávicavahivare eta máitupajiasiravahi taicha ema Viya, éma tíjaracahi tamutu. ²⁰ Énaser ena tuparairucana te viávasa, éna tíjaracanáhi nayehe ena apavasanana taicha navarahahi náimicapaca. Tásiha, náetatacapa te crusu. ²¹ Vítí ichapemuri eta vicasíñavairainihi eta mayehe. Vicuchapavainihi eta macatiuchirahaviyarehi vimutu viti israelítana. Tamapurujipasera puiti, taicha tépenapa éma. Puiti mapanaripa sache eta táetávisiravahi eta juca. ²² Icháquenesera te yáticarahichichapa, ticaramecahavianapa ena esenana vichamurianahi eta nayatiruirahi tiyanana tayehe eta máecari. ²³ Vaipa nachimapahini eta máquehe. Májinaipahi. Te tichavanapa, tímatacavavianapa eta náimairahi ena apinana ángeleana. Nametacavacapaji eta machaviraipahi títareca ema Jesús.

²⁴ Tásiha, tiyanavaneana ena apamuriana vichamuriana tayehe eta ecarí. Jéhesaréinehi májinaipa ema Jesús, étarichuhi eta nacayemaqueneanapahi ena esenana —náichapa.

²⁵⁻²⁶ Ema Jesús máichavacapa:

—Tétávicavapa tájinaira ácaicutiaraquenéna eti páureana. Váhivarepuca ácaicutiarahini eta náechajiriruvanahi ena profetanaini tayehe eta tacaheyarehi eta macatajivairayarehi ema Cristo eta máepeniranumaya, tásiha tichavayarehi títareca. Váhivarepuca ácaicutiarahini eta tacaheyarehi eta mápanirayarehi tichava éma te mávasa anuma —máichavacapa.

²⁷ Tásiha, mametacavacapasera tamutu eta táechajiriruvanahi eta Sagrada Escritura, eta táechajisihairahi éma. Tépanavapa tayehe eta májureanahi ema víyahaini Moisés; étapa eta apamuriana nájureanahi ena profetanaini.

²⁸ Títecapananecha tayehe eta avasarechicha nacaijuhequenepahi. Mavarahapa ema Jesús majunijicavacayarehini. ²⁹ Énaser nacumpirachapa máehicavacahini te napena. Náichapa:

—Pácaherine eta ani viyehe, taicha yátinapa eta jena —náichapa.

Tásiha, ema Jesús manasipa tisiapapa eta nayehe. ³⁰ Te tíuripa eta tinicacare, mavehapa eta pan, mahasulupayachapa ema Viya, mayuvetucapa, máijaracavacapa éna. ³¹ Enévanerinehi náimativanepa éma. Émasera tíjahúchavapa témitiacahi te namirahu. ³² Tésenijiricanapana éna. Tásiha, nacahepa:

—¿Tájaha tacayema eta vahi vímativanehini ichaquene te achene te ticapayacahavipa éma? Étapa eta vicachanerapahi, váhivare vímatiacavanehini, véjapusamurechapaipahiníni eta visamiravahi eta máimitusirahavipahi tayehe eta Sagrada Escritura —nacahepa.

³³ Tacahe, enévanepa téquequecavanahi tichavana te Jerusalén. Te títecapanapa, tisiapanapa tayehe eta návihahi ena óncequeneana apóstoleana énapa ena apamuriana nachamuriana. ³⁴ Ánaqui ticametacasianaripavare éna. Nacahevarepa ena apóstoleana: —Yátupi eta máechepusiraipa ema Viáquenu. Máimaharipa ema Pedro —nacahepa.

³⁵ Ena apinana najicapavarepa:

—Énerichuvare víti vímahapavare éma, te achene eta vipaisirapahi. Váhiserá vímativanehini. Tapaenumava te mayuvetucapa eta pan, vímatipa éma —náichapa.

*Tíápechavavare tímerecava ema Jesús nayehe ena máimitureana
(Mt 28.16-20; Mr 16.14-18; Jn 20.19-23)*

³⁶ Tacahe, téchajiricavanarichaha éna, tíjahúchavavarepa tímerecava ema Jesús te namuri. Máéchajicavacapa, ániapa macahe:

—Íchararacava, nuchichanaveana.

³⁷ Énaserá típicanarichucha, náimijachaichucha cunarehi éma. ³⁸ Émasera ema Jesús máichavacapa:

—Vahi ecupicanu. Étumecha eta esamureana. ³⁹ Ímaha eta juca nuvahuana étapa eta nívapeana. Émamahacanu apaesa écha eta nútiquenérahí. Eta cunare, tájina táechena, tájinavare táperaina. Vahi tácutihini eta nucaqueherahí nútí —máichavacapa.

⁴⁰ Tacahe, eta máichiravacahi, tícajaruvauchavaipa eta mavahuana, étapa eta máívapeana. ⁴¹ Vuíchahasera nasuapahini éna, tíúrisamureanaripahinéni eta náimairahi, tacachanehísera eta napisirahi. Eta tacahe, máichavarepa:

—¿Jararíhi nunica?

⁴² Éna náijaracapa eta nájimarú jima, étasipa vasu eta mápama. ⁴³ Majacavacapa éma, tinicapa te namirahu éna. ⁴⁴ Tásiha, máéchajiricavacapa:

—Eta juca níchavaquenevahi, étara eta numetaruhehi cape juca nucachanejiricahéichahahi. Eta tacaheyarehi eta táítauchiravayarehi eta májuchaqueneanahi ema víyahaini Moisés nútí táéchajisíhaquenehi. Étapa eta nájuchaqueneanahivare ena profetanaini, étapa eta Salmo.

⁴⁵ Mámechavacapaihi eta táéchajiriruvana eta Sagrada Escritura. ⁴⁶ Tásiha, máichavarepa: —Étara eta juca tacajuqueneanahi eta népenirayarehi nuti Cristo. Néchepucayarehísera tayehe eta nécarí te mapanaquenepa sache. ⁴⁷ Étayaréichuhivare íamapicayare eta níjare eta ímituresiraya ena achaneana ticavasanahi te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apaesa macaepaha ema Viya eta napecaturana. ⁴⁸ Éti, nutupararuheya eta ímituresiraya eta júcana. ⁴⁹ Enasiyarechahasera aní te juca Jerusalén. Tíámainucava te máítecapauchahevacapa ema Espíritu Santo nuvaneruyare, máijararunuyarehi ema Tata. Éma, tíjaracaheyare eta ítupajjiasiravanayare —máichapa.

*Eta mayapirahi ema Jesús te anuma
(Mr 16.19-20)*

⁵⁰ Te títapiricapa eta máimitusiravacahi, mámamuríhapa te tachachacu eta avasare Jerusalén, te tachacayahi eta avasarechicha Betania. Macanuquechapa eta mavahuana, mayujarauchavacapa éna. ⁵¹ Te títapiricapa eta mayujarauchiravacahi, tímutserahavapaipa ticanuquechavapaipa eta mayapirahi te anuma. ⁵² Eta náimairahi éna eta macanuquechiravapaipahi, tépuyumuríhanapa eta nanecapararesirahi eta mayanirahi. Tásiha, tíchavanapa tayehe eta Jerusalén. Tíúrisamureanapaipa. ⁵³ Tájina vahi náejicavahini tayehe eta Templo. Tiyujarauchavanaparacahi eta nacunachirahi ema Viya.

Tamutupa eta juca numetasiravíhi puiti.

Ema Apóstole Juan májuequenehahi eta máichararacavahi ema Jesucristo, ticajare puiti eta EVANGELIO SEGÚN SAN JUAN

¹ Eta acane, te táepaniravahi tamutu, matiarhiqueneípahi ema Jesucristo, ema Tímimatirahi me Viya*. Éma, macachanehi ema Maiya eta máitaresirahi, Viyahivare éma apanavare. ²Ena apinana, nacuticacahi eta napanereruana. ³Eta táepaniravahi eta acane, émaríhi ema Cristo ticaemataneacahi tamutu eta tatiarihiqueneanahi puiti, máitachirahi eta mapaneruanahi ema Maiya. Tájina máejequeruinahini, nájínavare apanainahini náepiyacahini eta tatiarihiqueneana. ⁴Émarichuhivare ticaitarecavahi viti achaneana. Émarichuvare tinacapa te viáchanevana eta tamichahu eta vítaesirahi. ⁵Éma tímíyanava tímícauchahavi taicha mavaraha máimijunijisinahiviyare eta tamapicu te viáchanevana. Nararihisera ena vahi náuricahini eta mamicauchinavaca. Navaraha nacaemaha eta mamicauchiravacahi.

⁶Tacahe, te máimahapa tiuri, ema Jesucristo tíucupaicapa te juca apaquehe. Tíáchanchavapa. Yátupiquenehi achane, macaechehi eta veche viti achaneana. Ticasiriquihavíhi te jena áñoanahi majurusirahi. Matiarihivare ema apana achane ticajarehi Juan Tícachasiricarahi. Tacahe, ema Viya, te máimahapa tiuri, ticavanahipa ema Juan. ⁷Máinapumirauchayarehi eta macametairuyare eta máimeresiravaya ema Cristo, ema namicahuyare nácani ticasíñavanayare mayehe. Ehanechavapa. Yátupiquenehi achane, macaechehi eta veche viti achaneana. Ticama Juan mametacayarehi ena achaneana natsecava eta najacapiraya ema Cristo. ⁸Ema Juan, vahi émainahini tímícauchamurimahi ena achaneana. Émahisera ticametairurahiarehi eta máucupaisirapa ema tíámahavíhi eta yátupiqueneana mapaneruanahi ema Viya. ⁹Ema maca máechajisíhaquene ema Juan, éma yátupiquenehi eta mamicauchirahaviyarehi vimutu viti achaneana, taicha tímíeche viti achaneana. Ticatucavahi eta mapanereruana ema Viya.

¹⁰⁻¹¹Ema Jesucristo, émahí acane tépiyacahí tamutu eta apaquehe, énapa ena viáchucanaveanaini. Puitícha éma téchahaví vimutu. Téhesera te tíucupaicapa éma, namaimatiquenehi ena achaneana Víáquenuirahi éma, váhivare navarahahini najacapahini éma. ¹²Natarihisera ena tinerejicavanahi tjacapanahi, téhicanahi éma. Ena nani, ichaperinehi eta macunachiravacahi táichavene eta nacasíñairavahi mayehe. Éna, yátupiqueneripa machichanaveanahi ema Viya. ¹³Eta macachichairahavíhi ema Viya víti, émahí ema Viya tinerejicavahi táichavene eta vicasíñairavahi mayehe. Vahí étaparacainahipucaini eta náehisrainahipucaini ena ticachichahaviana. Váhivare étaparacainahipucaini vivarahahipucaini ichape víti. Váhivare étaparacainahipucaini ichapenahipucaini eta mavarairahini mácani apana achane.

¹⁴⁻¹⁷Vítí véhicanahi ema Jesús eta matiaríhírahí te juca apaquehe, yátupi eta vímatirahí éma. Vímahahí te víúquihana. Vímativarepa eta másíhírahí te anuma, eta émahírahí ema macarichuquenehi Machícha ema Viya. Yátupíhivare eta víyairahí éma, macutíhi ema Maiya. Éma, tímimatirahí me Viya, taícha éma máímerecáhi eta máetavíuchirahí eta máemunasirahavíhi, máímehírahavíhivare eta yátupíqueneana mapanereruana ema Maiya. Ema víyarahaini Moisés ticatuparahahí me Viya eta máímitusirahavíhi vítí achaneana eta vanairípiana. Émasera ema Jesucristo ticatuparahahí me Maiya eta máímitusirahavíhi eta máemunasirahavíhi, étapa eta máechajírírúvana yátupíqueneana ema Viya. Ema Cristo, tétavícaavahí eta máuríva eta víyehe vimutu. Eta majaneasirahavíhí, tjáracahavíhi eta vítumevahí te tamutu sácheana. Émarípa ema Juan, aní macaehí eta máechajísíhírahí ema Jesús: “Émara ema maca ema néchajísíhaquenehi eta eyehe cape juca. Yátupi nútí nínupacahí eta núchusirahí, émasera matiaríhíqueneípahí eta acane, májínanuichahahí nútí. Eta tacahe, típícauchacarepanahí eta nuyehé” macahepa.

¹⁸Yátupíquene nájina náimatíhíni eta máímahí ema Viya. Émasera ema macarichuquene Machícha, tímimatíchahavíhi eta máuríva ema Maiya taícha étaquenehi másíha te masamure ema Maiya.

* **1:1** Ema Apóstole Juan, te májuchapa eta juca libro, manacahí amairíha te letra griega λογος (eta táechajícuirava: “logos”). Eta tacayemaquene te véchajírírúpa: “Tímimatirahí me Viya”. Étarícheche vítí achaneana. Ticavare tacahe eta táechajísíhaquene eta apamuriana líbroana te castellanorupí, aní tacahehí: “la Palabra” étapa “el Verbo”.

Ena Juan Tícashiricarahi timetacavacahi ena achaneana tayehe eta máimeresiravayarehi ena Jesucristo

(Mt 3.11-12; Mr 1.7-8; Lc 3.15-17)

¹⁹ Tacahe, te jena sácheana, ena tuparairucanahi ticvasanahi te Jerusalén navanecapa ena náevanachana†, nayanaucha ena Juan Tícashiricarahi. Éna, nayaserecapa, ánipa nacahe:

—Tamutu arairuhi eta pímiturapiana. ¿Pítinariya ena Cristo vicuchapaquenehi? —nacahepa.

²⁰ Matupiruvapa eta majicapiravacahi. Ánipa macahe:

—Núti mavanerunuhi ena Viya. Váhisera nútina ena ecuchapaquenehi ena ticajare Cristo —macahepa.

²¹ Tacahe, nápechavarepa nayasereca:

—¿Nájahavisica píti? ¿Pítipuca picajare Profeta Elías? ¿Pichavahi eta te juca apaquehe? —náichapa.

Émasera majicapavarepa:

—Vahi nútina.

Tásiha, nápechavarepa nayasereca:

—¿Nájahavisica píti? ¿Pítipapuca ena apana profeta vicuchapaquenehi? —náichapa.

Émasera majicapavarepa:

—Vahi nútina.

²² Tacahe, náichavarepa:

—¿Nájahaviquenesica píti? Pimetacahavichucha te nájahavipuca píti. Vivaraha véchayare, apaesa vimetacavaca ena tivanecahavianahi —náichapa.

²³ Tacahe, ena Juan majicapavarepa:

—Nútichucha máechajisihaquenehi te ajureca ena víyarahaini profeta Isaías. Núti nucametairuhi nayehe ena achaneana vámahicurúhana. Níchuhavacahi éna apaesa natsecava eta jácani máitecapiraya ena Viáquenu —macahepa.

²⁴ Natarihihivare ena navaneruanahi ena fariséoana. ²⁵ Nayaserecavarepa éna apanava: —¿Tájahasica tacayemahi eta pícachasirisirahi ena vijaneanana, te váhipuca pítinahíni ena Cristo, váhivare pítinahíni ena profeta Elías, váhivare pítinahíni ena apana profeta vicuchapaquenehi? Ena vijaneanana vahi tácamunuhini nacaicachasihini. Énaserá ena apavasana, jéhesare tacamunu eta nácaicachasivaca —nacahepa.

²⁶ Tacahe, ena majicapavacapa:

—Tiuri, núti yátupi níchasicavacahi te une ena achaneana, apaesa natsecava eta jácani máitecapiraya ena vicuchapaquenehi. Matiarhipasera puiti te vitaracu. Étiserá vahi ímatihíni éna. ²⁷ Tímerecavavanéna. Ticunachacarepanayaresera eta nuyehé. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami —máichavacapa éna ena Juan.

²⁸ Eta máviahí ena Juan máicachasirisinehi ticajare Betábara, te apachara eta cajacure ticajare Jordán, tinapaicahi te táuchusine eta sache. Eta nayaseresinepanahi ena vanairucanahi.

Ena Juan máimicaecheracha ena Jesús eta émairahi ena Cordero, vanairucahi me Viya

²⁹ Te apanapa sache, máimahapa ena Juan eta mapauchirapaipahi ena Jesús. Tacahe, máichavacapa ena achaneana:

—Ímaha, márajapa ena Cordero, matapiravarequene éma, vanairucahi me Viya. Éma, táimicaparuyare eta macapahairayare eta vipecaturana viti achaneana te juca apaquehe.

³⁰ Émara ena maca ena néchajisihaquenehi eta eyehe cape juca. Núti nínapucahi mayehé éma, émasera matiarhihiquenéipahi eta acane, májinanuichahahi núti. Eta tacahe, típicauchacarepanahi eta nuyehé. ³¹ Nútiripa néchajisihahi éma, vuíchahasera nímatihini. Numetacahéhiserá eti nujaneanana israelítana eta ecaicachasiraina apaesa etsecavahi eta ejacapiraina éma te jácani máimerecavapa. ³² Tacahe, cape sache, títecapauchanupa ena Jesús, mavarairahi níchasicayare éma. Tásiha, te viúcupaicapa te une, nímahapa ena Espíritu Santo eta máucupaisirahi te anuma, ticutiparine eta paloma. Masiapahacapa ena Jesús. ³³ Tacahe, te nímahapa, nupaenumavapa nímati éma eta émairahi ena vicuchapaquenehi Cristo, taicha ena Viya tímítucanupa eta máicutiarayare. Ani macahehi: “Te pímahá ena Espíritu Santo máucupaucha te mápusi mácani achane, pímatiya eta émairahi ena Nuchicha nuvaneruhi. Éma, tíjaracahevacyare ena Espíritu Santo, tisiapahacahevacainapa éti achaneana. Nuchaneraheinapa éti” máichanupa ena Viya. ³⁴ Tásiha puiti, nímatiya éma.

† 1:19 Ena nani vanairucana, nararihihi ena tiyujarahiana te Templo, éna ena téchapajirahiana eta tayereruvana ena Templo te Jerusalén.

Táitusiava numetacahe puiti eta émairahi ema Cristo, Machicha ema Viya —máichavacapa ema Juan.

Ena náinapuiruana máichuhaqueneana ema Jesús ema máimitureanaya

³⁵ Tacahe, te apanavarepa sache, ema Juan matiarihihí tayehe eta mávirareasahi, vítipa viti apinahavi máimitureanahi. ³⁶ Tásiha, máimahapa ema Jesús tiánucuhapaipahi. Tacahe, ema Juan máichahavipa:

—Ímaha. Ema maena Jesús, émahí ema Cordero matapiravarequene, vanairucahi me Viya —macahepa.

³⁷ Tacahe, eta vímairahi viti apinahavi máimitureana ema Juan, viyanapa véhicahi ema Jesús. ³⁸ Tásiha, ema Jesús téseniequenehavapa. Máimahapa eta véhisirapahi. Tiyaserecavavipa:

—¿Tájaha ecamunu nuyehé? —máichahavipa.

Víti vijicapapa:

—Tata maestro, ¿távihapuca eta pítecapirare?

³⁹ Ema Jesús tijicapahavipa:

—Yare, ímaha apaesa ímativa.

Tacahe, viyaninapa vímatipa eta mávirarehi. Vítaipahi eta jena sache eta víávihairahi eta mayehé, taicha las cuátroripahi sache te vítecapapa ánaqui.

⁴⁰⁻⁴¹ Andrés máijare éma nuchamuri téhicapahi ema Jesús. Tacahe, eta máurisamurevahi ema Andrés, tiyanavanepa matanucahi ema maparape Simón Pedro. Te máichimavapa, máichapa:

—Vímaharipa ema vicuchapaquene Mesías ema Cristo —macahepa.

⁴² Tacahe, ema Andrés tichavapa mámapa ema maparape Simón eta te máviahí ema Jesús. Te náitecapauchapa, ema Jesús máesenicapa ema Simón. Tásiha, máichapa:

—Píti Simón, machichavihi ema Jonás. Nútisera nítivachaya eta píjare. Núti nívarchaviya Pedro, táichavenehi eta pétauviuchirayare eta pitumeva —máichapa ema Jesús.

Ema Jesús máichuhapa ema Felipe émapa ema Natanael

⁴³ Te apanapa sache, ema Jesús mavarahapa tiyanayarehi te tinapaica eta Galilea. Tásiha, macainunapa ema Felipe. Tásiha, máichapa:

—Yare, péhicanu.

⁴⁴ Eta mávasahí ema Felipe eta te avasare ticajare Betsaida, étarichuvare mávasahí ema Andrés émapa ema Pedro. ⁴⁵ Tacahe, ema Felipe tiyanavarepa, matanucahi ema Natanael. Te máetupiacapa, máichapa:

—Vímaharipa ema achane máechajisíhaquenehi te libro májuchaquenehi ema víyarahaini Moisés, émarichuvare éma táechajisíhaquenehi eta libro nájureanahí ena profetanaini. Ema ticajarehi Jesús, machicha ema José. Ticavasahí te Nazaret —macahepa.

⁴⁶ Tásiha, ema Natanael majicapapa:

—Váiparinehi étainahini máuchusinehíni ema achane tiuri tayehe eta avasare Nazaret —macahepa.

Tásiha, ema Felipe máichavarepa:

—Viyana, apaesa pímati —máichapa.

⁴⁷ Tacahe, te náitecapauchapa, ema Jesús máimaracarípa ema Natanael. Tásiha, macahepa:

—Nímativí eta pipanereru. Píti yátupiqueneví israelíta. Tétavicavahí táurivahí eta pítare-sirahí. Vahí pítuca pivayuareca —máichapa. ⁴⁸ Tásiha, ema Natanael majicapapa:

—¿Táviha pímatinenuhí?

Ema Jesús máichapa:

—Núti nímativípahí te vuíchaha máetupiacavíhíni ema Felipe eta máichuiravíyarehí, te píáviharipa te tápecu eta yucuquí higo.

⁴⁹ Tacahe, ema Natanael masuapavanepa ema Jesús. Máichapa:

—Tata Maestro, pítiripa píti yátupiquene Machicha ema Viya. Píti yátupiquenévivare Reyvíhí víyehé viti israelítana. Núti nívarcavapa néhicaviya —máichapa.

⁵⁰ Ema Jesús majicapapa:

—Étachucha eta juca níchiravíhí eta nímaíravíhí te tápecu eta yucuquí, pípatsicavapa píjaracava péhicanuya. Vahí tácarichu eta juca. Pímahayareva eta apana tíáramicareanapana tayehe eta juca.

⁵¹ Tásiha, ema Jesús máichahavipa vímutu:

—Éti ímahayare eta anuma téjiacayare, énapa ena ángeleana tíúcupauchanuanayare núti Manerejirunuhí ema Viya —máichahavipa.

2

Natiarihi ena araimanayarehi eta te avasare Caná

¹ Te mapanaquenepa sache eta táetavisiravahi, natiarihi ena araimanahi eta te avasare Caná te tinapaica eta Galilea. ² Tásiha, esu maena ema Jesús, ánaqui suávinehi taicha suacichuhasiquenehi ésu. Énerichuvare ticaichuhasihivare ema Jesús, vítipa viti máimitureana.

³ Tacahe, ema arayenahi tacaimamarapa téchuriacapa eta máeresahi vino. Esu maena ema Jesús suíchapa ema suchicha:

—Téchuricanapa eta náeresahi.

⁴ Tásiha, ema Jesús majicapapa:

—Picatajicanu, mémechicha. Vuíchaha picucamesanu. Nímahaine núti te táuripa. Nútipa néchinava —máichapa.

⁵ Tásiha, suíchavacapa ena tésiricanahi:

—Tiuri, nímaháinepa éñi. Esuapayare éti eta ñivanairipiana —suíchapa.

⁶ Tacahe, tatiarihíhi eta sáisihi ichapehiana tinajana, márihiana. Nayupisareana ena israelítana tayehe eta nayeherepiana. Eta táichapehivavacahi eta tinajana, cíncohi lata eta tacavacu. ⁷ Tacahe, ema Jesús mavanecavacapa ena tésiricanahi:

—Eyana eyereca eta une. Ínicachayare eta juca tinajana —máichapa.

Tacahe, náinicajicavacapa éna eta tinajana.

⁸ Tásiha, ema Jesús mavanecavacapa:

—Tiuri puiti, eveha ániamaína, eyana íjaraca ema téchapajirica eta juca piesta —máichavacapa.

Tacahe, tyananapa éna, náijarapanahi. ⁹ Mavehapa masamaecapa eta une, vínoripahi éta. Váhisera máechahini éma távihahipuca tásihahi éta. Nacarichu ena tésiricanahi náechahi eta únerahi.

¹⁰ Tacahe, ema téchapajiricahi eta piesta máichuhapa ema arayenahi. Máichapa:

—Namutu ena achaneana te térana, tativa naera eta tiúriamapana vino. Tapaenumava te ticavahahasianapa, náerapa eta vino váhipanaichu táuriamahini. Pítisera, apana eta pipanereruhi. Tiúrihi eta vino píjararuhavíhi tativa. Puítisera eta juca vino, tétavicavahi eta táuriamavahi. Tacachuricarinehi tamutu —máichapa.

¹¹ Eta juca táinapuiruhi tiáramicare máimerecachi ema Jesús, tayehe eta avasare Caná. Ichaperinehi eta víaramirahi viti vinecapanahi eta juca máimeresirahi eta máitupajijiasiravahi. Tacahe, ichaperinehi eta visuapirahi viti máimitureanahi.

¹² Te táequenepa eta juca, viyanavarepa te apana avasare ticaijare Capernaum. Vimutupaipa, esu maena, ena maparapenaveana, vítipa viti máimitureana. Vinasipa jácani sácheana eta ánaqui. Vipaenumava viyanaya te Jerusalén.

Ema Jesús macuchuchujicavacapa ena tjararecanahi eta sárareana, cáyureana te tajuhe eta Templo

(Mt 21.12-13; Mr 11.15-18; Lc 19.45-46)

¹³ Tacahe, eta jena sácheanahi, tiánehiripa eta Pascua, vipiestarahi viti israelítana. Ema Jesús tyanapa tayehe eta avasare Jerusalén, vítipa viti máimitureana. ¹⁴ Te vítecapapa, viyanapa visiapahi tayehe eta Templo. Máimahainehi ema Jesús ena títsiriperecarahiana eta plata, énapa ena tjararecanahi eta vuíyeana, eta uvesana, étapa eta palómana.

¹⁵ Eta máimairahi éna, máepiyacapa eta machicute. Máquijimuríhapa eta naplataneana te apaquehe. Máequehepuichavacapa eta namesarana. Macuchuchujicavacapa namutu, étapa eta sárareana náijarareruanahi. ¹⁶ Tásiha, máichavacapa ena tjararecanahi eta paloma:

—¡Ecucluca eta júcana eta te juca mapenahi ema Tata! ¡Vahi étaina ícuchina éti íjararecana eta tájiparacana! —máichavacapa.

¹⁷ Tacahe, viti máimitureana, eta vímairahi eta juca, enevanerine véchava eta táechajiriruva eta Salmo tayehe eta tamuracavahi eta máichararacavahi ema víyarahaini David táichavenehi eta máetaviuchirahi eta máimipicauchirahi eta, mapena ema Viya.

¹⁸ Jéhesare, enurujipa títécapanapa ena tuparairucana. Nayaserecapa éma:

—¿Tájaha tacayema eta picuchusiravaca ena vichamuriana? Pímijachavahipuca vanairucavi me Viya. ¡Pímechahavi eta tiáramicare te yátupihipuca pivanahi eta juca! —náichapa.

¹⁹ Ema Jesús majicapavacapa:

—Te iáquipaicayarepuca éti eta juca templo, nútisera nucaecheputa te mapanaquenéna sache —máichapa.

²⁰ Ena tuparairucana najicapavarepa:

—Cuarenta y seis año eta tayerevahi eta náepiyaresirahi eta Templo. ¡Tétavicavahi eta pisiñavavaisirahi picaemuñavayarehi picaechepucayare te mapanaquenéna sache! —nacahepa.

²¹ Eta máichiravacahi ema Jesús, máechajisihahi éma eta táechepusirayare eta máquehe. ²² Eta tacahe, te tiyerehi, te táequenepa eta máechepusirapa ema Jesús te máecari, véchavahi viti máimitureana eta juca mametarapihi tayehe eta máechepusirayarehi. Eta tacahe, visuparinehi eta táechajisihairahi eta Sagrada Escritura eta mayehe.

Emá Jesús máimati eta napanereruana ena achaneana

²³ Eta manasiraichahahi ema Jesús te Jerusalén, te Páscuamuhu, camurihi eta tíaramicareana máichaqueneanahi. Camurianahivare ena achaneana tímahanahi. Tásiha, nasuapahi eta émairahi ema Cristo nacuchapaquenehi.

²⁴ Émasera vahi macasiñavahini eta nayehe taicha máimativacahi éna, vuíchaha yátupinahini eta náehisirahi éna. ²⁵ Taicha éma, tétavicavahi eta máitupajijiasiravahi, máimatirahi tamutu eta napanereruana ena achaneana te amahe eta nasamureana.

3

Emá Nicodemo máejirapana ema Jesús

¹ Matiaríhi ema achane téhicarairicahi ena fariséoana. Ticaizare Nicodemo. Ema maca achane, tétavicavahi eta macunachacarevahi taicha máestrohi éma. ² Tacahe, eta jena yátiquenehi, ema Nicodemo tiyanapa mapaipiuchapanapahi ema Jesús. Tacahe, eta náechajirisiravahi, macahepa ema Nicodemo:

—Tata maestro, véchahi eta vanairucavihi me Viya eta juca pítesirahi pímitusirahavipanahi. Taicha nájina apanaina achane títuruequenehaimahi eta juca tíaramicareana píchaqueneanahi píti —macahepa.

³ Ema Jesús majicapapa:

—Púiti numetacavi eta juca yátupiqueneana: Nácani navarahaya títujicavana tisiapana tayehe eta mávasa ema Viya, tacamunuhi náitsivachayare eta náitaresira. Te vahi yátupina eta nájirasiravaina eta máitsivachiravaca ema Espíritu Santo, vahi títujicavanaimahi tisiapana eta te mávasa ema Viya. Tímicutijiricavayarehi tíápechavanayarehi tíuchucana —máichapa.

⁴ Tacahe, ema Nicodemo vahi mácaicutiarahini eta máichirahi ema Jesús. Váhisera macuchapaimahi eta máitametasirahi ema Jesús. Ánipa macahe:

—Váiparinehi vichavaimahi eta amúyahavinahini viti ichasiana, vichavahivarepucaini visiapahini te sujuhe esu ticachichahavi —macahepa.

⁵⁻⁶ Majicapavare ema Jesús:

—Pisamanuchaha. Te tíuchuca eta amuya te sujuhe esu taena, tímaticarehi eta machichairahi ema suima. Tacutiquenehi, nácani mávaháruana ema Espíritu Santo, tíápechavanayare tépanava eta náitaresiranayare, taicha machicharipahi. Nutupiruva numetacavi: Nacarichu ena machichanaveana ema Espíritu Santo tisiapana eta mávasa ema Viya. Te tacujia eta máchichairahéna éti, tájina vahi ítujicavaimahi esiapá. ⁷ Vahi picuarami eta juca níchiravihi: Táitaurevaquene ticachichaheyarehi ema Espíritu Santo.

⁸ Eta juca tímicutijiricavahi eta técatícava, tacarichu visama eta tacaemaira. Váhisera tácaecherahini. Ene nacahehi ena mávaháruanaipa ema Espíritu Santo. Nanasirichu eta náimahi. Ticaitsivaipasera eta náitaresira —máichapa ema Jesús.

⁹ Tásiha, ema Nicodemo mápechavarepa mayasereca:

—¿Tájahasica tacayema eta juca?

¹⁰ Ema Jesús máichavarepa:

—Tétavicavahi eta picunachacareva píti, taicha tíúrihi eta pímitusiravacahi ena vijaneanana. Tasapihasera vahi pímatiequenehahini eta júcana. ¹¹ Pisamanuchaha. Yátupiquene eta numétasirávihí. Tatupiruvahi eta néchajisihahi eta táichararacavanahi te anuma taicha nímahaipa. Étisera vahi esupanuimahi eta numetasirahehi eta nímahaqueneanahi. ¹² Te cape juca sácheana, nímicutichinahehi eta táichararacavanahi te juca apaquehe tayehe eta táichararacavanahi te anuma. Étisera vahi esupanuini. Tavetijipa eta emasuapiranuya te nutupiruvahi numetacahe eta táichararacavanahi te anuma. ¹³ Nuti Manerejirunuhi ema Viya, nucavasahi núti te anuma. Tásiha, núcupaicahi eta numetasiraheya. Nájina apanainahini mácani mametacahehini eta táichararacavanahi te anuquehe, taicha nájina nayanahini nápanahini te anuma, eta jácani náimatihini.

¹⁴ Acane, eta napaisira ena viáchucanaveanaini eta te mávapahi apaquehe, táechucapahi eta quichareana ena masuapajirairahanapahi mayehe ema Viya. Tacahe, ema víyarahaini Moisés máepiyacahi eta metal eta táimahi eta quichare. Manacahi te anuquehe eta te yucuguí. Tásiha, ena achaneana táchureana eta quichare, te náesenica eta quichare máepiyaru

ema Moisés, tinaracanapahi, vahi náepenapahíni. ¹⁵ Ene nucaheyare núti apana, tinacanuanyareva te anuquehe. Eta nícharacavayare apaesa nucuchucuhapahi namutu ena nácani ticasíñanuanayarepahi. Tásiha, máichecuaraquirenapa eta náitaresirayare. Tájina ticamítiequenehavacaimahi.

Emá Viya, tétavicavahi eta máemunasirahavihi

¹⁶ Taicha ema Viya, tétavicavahi eta máemunasirahavi viti achaneana te juca apaquehe. Eta máemunasirahavi, máijaracahi ema macarichuquenehi Machicha eta máucupaisirahi eta ani viyehe. Mavarahapa tíjaracahaviya máichecuaraquirénapa eta vítaresiraya vimutu viti vicasiñanahi éma. Tájina ticamítiequenehahavimahi. ¹⁷ Taicha ema Viya, vahi tácahehíni eta mapanereruhi eta máucupaisirahi ema Machicha máicuñacahavíhíni viti achaneana. Étasera eta tímitecahi éma, ticuchucuhahaviyare vimutu. ¹⁸⁻¹⁹ Taicha nácani ticasíñanayare ema Machicha ema Viya, vahi ticaicuñanaimahi. Nácanisera vahi nácasíñahíni éma táimicuñacavacayarehi eta naviurevanahi éna. Taicha vahi náuricahíni eta tamicauchiravacahi eta majaraiva ema Cristo táucupairuhi te juca apaquehe. Étachucha náurica eta timapicu taicha vahi návarahahíni tácaecherahíni eta náichirahi eta tamauriqueneana. ²⁰ Taicha nácani títchanahi eta tamauriqueneana, nacaticha eta majaraiva ema Viya. Váiparinehi napauchaimahi, namavarairahi tacaecherahíni eta náichirahi eta tamauriqueneana. ²¹ Énasera ena tisuapanahi yátupi eta máechajiriruva ema Viya, náuricayarehi napaucha eta majaraiva. Jéhesare tacaecheranasarepa eta machaneranaripahi ema Viya.

Emá Juan Tícachasiricarahi tíapechavavare máechajisihahi ema Jesús

²² Te táequenepa eta juca, tiyanavarepa ema Jesús, tayehe eta avasarechichana te táunava eta provincia Judea. Véhícahi viti máimítireana. Vinasipa jácani sácheana eta ánaqui. Viti máimítireana vícachasiricaripa ena achaneana tivarahanahi náehicaya ema Jesús. ²³ Tásiha, ema Juan tícachasiricahivare te jena Enón tachacayahi eta Salim, taicha ánaqui tatiarihihi eta une. Ena achaneana napauchahi éma. Jéhesare máicachasicavacapaipahi ena tivarahanahi náinajicayare eta napecaturana. ²⁴ (Eta juca máichahi ema Juan tamirahupaichaha eta jena sache eta náeratasirayarehi éma.)

²⁵ Tacahe, te jena sácheana, ena religiósana tiyananapa náimiyusemacavacapa ena máimítireana ema Juan, nametacahi eta vicachurisravacahi viti máimítireana ema Jesús taicha tíapajumuriavanapanahi ena vícachasiruanahi. ²⁶ Tacahe, eta nasemirahi ena máimítireana ema Juan, tiyananapa nametapanahi éma. Náichapa éma:

—Tata maestro, pímahaini ema maena péchajiriruhi cape te tachausi eta juca cajacure Jordán. Ema Jesús pímiyarecha Cristo, tícachasiricahi puiti éma. Jéhesare, namutyarehíni náehica éma —náichapa.

²⁷ Tásiha, ema Juan majicapavacapa:

—Vahi ecueñamava. Ema Viya, éma téchahi eta máijarasirahi eta máitucaquenehi nácani manerejiruana. Németeaca tíjaracahi ema Viya eta máitupajijiasirava ema maca Jesús. ²⁸ Éti échavahi eta numetasirahehi eta vahi nútinahíni ema Cristo. Yátupisera nucavanahíni eta nínapumirauchirayarepahi éma, numetacavaca ena achaneana natsecavahi. ²⁹ Núti nímicu-tijirisinahe: Te natirihi ena araimanahi, namutu ena nacaichuhasiqueneana tíúrisamureanahi eta náimairahi ena araimana. Nacunachahi ema arayena. Ene nucaheríhi núti eta núrismurevahi eta nímairahi puiti eta nacunachirahi ema Jesús. ³⁰ Éma, te jácani mapaisihayarepahi, tíapajucavayarepaipa eta macunachacarevaya. Éma, mapaenumavapa tépanava eta macemataneasira ema Viya. Núti núrismurehi tayehe éta. Núti, tiánehípa eta nítauchirainapa eta nématane. Tásiha, váhirichu nucunachacare núti —macahepa ema Juan.

Emá Jesús másihaquenehi te anuma

³¹ Ema Jesús, máimatirinehi tamutu eta táicharacavanahi te anuma taicha másihaquenehi éma te anuma. Viti achaneana víavíhahi vicavasanahi te juca apaquehe, vímatihíni étachucha eta táicharacavanahi te juca apaquehe. Émasera ema Jesús, eta másihairahi te anuma, tímatihíni tamutu, tíapajupanavahi eta máitupajijiasiravahi. Ticachuricahavíhi.

³² Éma, tímitecahi eta mametasirahavi tamutu eta máimahaqueneanahi étapa eta masamaqueneana te anuma. Nájinayarénisera nasuapahíni eta macayemaqueneanahi. ³³ Vítisera viti visuapanahi eta mametarapiana, vímatihíni eta yátupihíni eta máechajiriruvana ema Viya mámaqueneanahi ema maca Jesús. ³⁴ Taicha éma, vanairucahi me Viya, máechajisihayarehi eta máechajiriruvana ema Viya. Énerichuvare tétavicavahi eta máimicatásirahi ema Espíritu Santo taicha mávahácahi éma. ³⁵ Ema Vicaiyaquene máemunacahi ema Machicha. Eta tacahe, matuparacahi eta émairayarehi téchayare tamutu. ³⁶ Eta tacahe, nácani ticasíñanayare

ema Machicha, máihēcuarquireyare eta náitaresiraya. Namutusera ena macasiñarahanañahi ena Machicha ema Viya, vahi títarecanaimahi, taicha tanasíhi eta naviurevana táichavenehi eta napecaturanahi. Ticaicuñanayarehi máitavacac ayare.

4

Éma Jesús tiánucuha eta provincia Samaria. Ánaqui máechajicahi esu ésuna esena.

¹⁻³ Tacahe, camurianahi ena tivarahanahi tíjaracavanaya náehicaya ema Viáquenu. Tásiha, viti máimitureana vícachasicavacahi éna. Émasera ema Jesús vahi máicachasiricahini. Camuripanana ena vícachasiruana nayehe ena máicachasiruana ema Juan. Tacahe, ena fariséoana nasamairiricapa. Náramipa. Navanecapa ena tiyaserecanaya. Tacahe, te tisamauchavapa ema Jesús eta napanereuchirahi, majunijicapa eta Judea. Tiyanapa tichavahi tayehe eta Galilea, vítipa viti.

⁴ Eta vipaisirapahi te achene, viánucuhapaipa eta te provincia Samaria. ⁵⁻⁶ Te la dócepa te sache eta vítecapirahi te távihahi eta nória máépiyaruhi ema víyarahaini Jacob. Máijaracasicaripahi ema machicha José eta juca mayeheni apaquehe. Eta nória, tachacayahi eta avasarechicha ticajjare Sicar. Tacahe, eta mavitairapaipahi ema Jesús, tíchecanumapa te tachausti eta nória. ⁷⁻⁸ Eta víchesirahi, viyanapa viti máimitureana vívacharepanayarehi eta tinicacare te avasare. Macarichuipahi ema Jesús. Sucahepainecha esu ésuna esena indigenahi samaritana tícanayarehi. Tacahe, máechajicapa ema Jesús:

—Nuchicha, picatajicanu picajinu une —máichapa.

⁹ Tásiha, esu esena sujicapapa:

—Píti israelítavíhi. ¿Tájaha tacayema piyasecanu eta une, nuti samarítananihi, vahi pijaneananihi? —suíchapa. (Ani tacahehi eta suéchajirisirahi, taicha ena israelítana énapa ena samarítanoana vahi náurianacacahini.) ¹⁰ Tásiha, ema Jesús majicapapa:

—Te pímatihini eta mavarahaqueneanahi tíjaracavi ema Viya, téhevere pímatinuhivaréni nútí nuyaseacavíhi eta une, németeaca piyasecanuipahíni eta une ticaitarecarahí. Tásiha, nútí níjaracavíhíni —máichapa.

¹¹ Tásiha, esu esena suíchapa:

—Tata, tíúpenahi eta juca nória. Píti, tájina enurena piviyahini eta une. ¿Távihasica tásihayare eta une ticaitarecarahí eta pivarahaquenehi píjaracanu? ¹² Éñi víachucaquenéni Jacob, vímaequenéhahi eta juca nória ñépiyaruhi. Nérirarénihi éñi énapa ena ñichichanaveana. Énerichuhi táerihahi eta ñiyeheana sárareana. ¿Píti pímiyachavapuca picuchucahini eta tíúriamapana une? —suíchapa.

¹³ Éma Jesús majicapavarepa:

—Namutu nácani térana eta juca une tíápechavanayarehi timauneanaya. ¹⁴ Nácanisera téranayare eta une níjararuyarehi nútí, vaipa tíápechavanaimahi timauneana. Taicha tacajurucayarehi eta náuricacavea. Tíúrinainavarepa eta náitaresira. Ticaitarecavacayare máepenacacayare —máichapa.

¹⁵ Tacahe, esu esena, eta susamirahi eta máechajiririvanahi, suíchapa:

—Tata, píjaracanupaini eta une ticaitarecarahí, apaesa vaipa nucuapechavaini numau. Váipavare nuquitecahíni eta te juca nória népanahini une —suíchapa.

¹⁶ Éma Jesús majicapavarepa:

—Piyana, píchuhapana ema pima. Píama eta ani.

¹⁷ Ésusera sujicapapa:

—Nájina nímaina.

Tásiha, ema Jesús máichapa:

—Pítupiruva eta juca pímetasiranuhi eta nájinairahi pímainahini. ¹⁸ Cíncoanapaipahi ena pímanaveanainíhi. Tásiha puiti, ema picachanequenehi váhivare pímainahini. Pítupiruvahi eta péchajiriruvahi —máichapa.

¹⁹ Tacahe, tíramecarinehi esu esena eta susamirahi éma eta máichirahi. Tásiha, suíchapa:

—Tátachicha, németeacavíhi eta pítiquenévavíhi profeta. Nuvaraha pímetacanuya puiti, ¿távihapuca eta yátupiquene víyujarasirareyarehi? ²⁰ Taicha ena víachucanaveanaini samarítanoanaini eta nayujarasiraréni eta te juca táinahu eta cerro. Púiticha tanasirichuhi eta víyujarasirarehi. Étisera eti israelítana, eta emetarapi eta víyujarasirareyare ñe Viya téhenapa te Jerusalén —suíchapa.

²¹ Éma Jesús mametacapa:

—Nutupiruva numetacaví, nuchicha, ánipa táenasihayare puiti váipa tácomesaimahi íteca eyujaraca me Tata te juca táinahu eta cerro étaripa eyanahipucaini te Jerusalén. Tamutuinapa eta táurivayare eta eyujarasihayare. ²² Eti samarítanoana, apaesachicharichu eta ímatirahi ema Tata eyujaraurehi. Vítisera vímatíhi ema víyujaraurehi, taicha viti israelítana

víti vicatuparahahi viámayare eta máechajiriruvana ema Tata eta macuchucuirayare namutu ena achaneana ticasíñavanahi mayehe. ²³⁻²⁴ Numetacaviya eta apana: Ema Tata, tiávihihi te anuma, jéhevare éma, yátupiquenehi Viya. Vahi mátejinahini eta maeche macutihini viti achaneana. Eta tacahe, nácani tiyujaracana mayehe, tatupiruvayarehi eta nasamure, tisuapajirahianahivare tayehe eta máechajiriruvana. Vahi tácomesaimahi ticasíñarajiana. Eta juca tacaheyarehi eta mavarahaqueneanahi ema Tata eta eyujarasirayarehi —máichapa.

²⁵ Tásiha, esu esena suíchapa ema Jesús:

—Téchacarehi eta fítecapirayare te juca apaquehe eñi Cristo, ñivaneruya eñi Viya. Téchacarehivare eta ñimetasirahaviyare tamutu eta yátupiqueneanahi. ¿Píti, péchapuca tájamuhuyarepuca eta fítecapihayare?

²⁶ Ema Jesús majicapapa:

—Nútira nuti mavanerunuhi ema Viya. Nútira ecuchapaquenenuhi —máichapa.

²⁷ Tásiha, vítecapanecha viti máimitureana. Tacahe, viáraminehi eta máechajirisiravahi eta suyehe esu esena indigenahi. Vivarahahi viyasereca esu esena tájahapuca suvaraha eta mayehe. Vivarahahivare viyasereca ema Jesús tájaha tacayema eta máechajisirahi esu esena. Váhisera vipatsicava viyaserecaini. ²⁸ Tásiha, esu esena sunaquicapa eta suyupi. Tijunapapa tiyana te avasare, sumetapanavacapa ena achaneana. Te fítecapapa, suíchavacapa:

²⁹ —Yare, ímahaya eñi achane profeta. Ñimatihí tamutu eta níchaqueneanahi néjecapiravahí. Tamutuhi ñicuchuchujisínánuhi. Núti németeaca éñiripa eñi Ñivaneruhi eñi Viya, éñiripavare eñi vicuchapaquenehi ticaijare Cristo —suíchapa.

³⁰ Ena achaneana sumetaruanahi tiyananapa náehica esu eta te mávihahi ema Jesús, náimahapanayarehi. ³¹ Eta nayerevapaichaha ena achaneana suíchuhaqueneanahi esu esena, viti máimitureana víchuhapa ema Jesús tinicanumayarehi. Víchapa:

—Tata maestro, yare pinicanuma, apaesaina piávamina.

³² Tásiha, éma tíjicaphavipa:

—Núti, jucarihi eta tinicacare tanicasarehi eta náchaneva emáimatiéquenéruhi éti —máichahavipa.

³³ Tásiha, véjecapavasamurepa víti. Víchacacapa:

—¿Náenicaipapuca jácani?

³⁴ Ema Jesús máimatihí eta vipanereruanahi. Máichahavipa:

—Eta ticaitarecanuhi núti, eta nítauchirahi eta mavanairipiana ema Nucaiyaquene, taicha nuvaraha nítauchaya tamutu eta nucaemataneasira éma. ³⁵ Eta viyeherepi te véchajiriruva: “Puiti vítapa eta vévasirapa eta trigo, cuátroyere caje eta vicuchapira eta vicurujisiraya” vicahehi. Puítisera numetacahe núti: Vaipa táyeremahi eta vicurujisirainapa. ¡Esenica puiti te achene! Nárajapa ena achaneana ena névaraquianahi. ³⁶ Ema Tata tájaracaheya eta ícuchiyare te ímicatacanuyare eta vicurujisira ena nani achaneana apaesa náuchuchuyare, máichecuaraquireyare eta náitaresira. Tásiha, tétavacavaya eta víúrisamureva vimutu: éti, nútípa. ³⁷ Ena achaneana, ticatisamurevanahi eta náechajirisira: “Vítira vévacahi eta vépane; apanapasera ema ticuruji” nacahehi. ³⁸ Vítisera te juca vivapinavayare. Núti níchuhahéhi eta ecurujisiraya eta névaruhi. Énerichuvare nararihihi ena tinapucanahi viyehe eta nacaematerahi eta juca. Puiti vivapinavaya eta vícuchiyare taicha vícuticacahi eta vícaematanesirahi ema Viya —máichahavipa ema Jesús.

³⁹ Ena ticavasanahi te jena avasare, camuriqueneanahi ena tisuapanahi eta émairahi Mavaneruhi ema Viya táichavenéhi eta suíchirahi eta macuchuchujisinaquenehi tamutu eta suíchaqueneanahi. ⁴⁰ Tásiha, tiyananapa tícapahaviana. Te fítecapanapa, émaquenepa nasamahi. Tásiha, náechajicapa mánasipahanahi nayehe. Masuapahisera ema Jesús. Apina sache eta mayerevahi, vítipa. ⁴¹ Tacahe, eta manasipanairahi tayehe eta avasare, namutupa nasamahi eta máimiturapiana. Tacahe, camurianainéhi ena tisuapanahi, téhicanahivare éma. ⁴² Tásiha, náichavarepa esu esena:

—Puiti émaquenepa visamahi. Vaipa tácarichuhini visuapahini eta pimetarapihi. Véchapa viti apanava eta émaquenérahí ema Cristo, ema vicuchapaquenehi, ema ticuchuchahaviyare vimutu viti achaneana —náichapa.

Ema Jesús macanaraca ema machicha ema aquenuca majupahahi ema rey

⁴³ Te táequenepa eta apinaquenehi sache, tiyanavarepa ema Jesús; macaijuhe te provincia Galilea. Véhicapaichuhivare viti apanava. ⁴⁴ Eta mayanirayarehi eta Galilea, vahi mácasíñavahichaini eta masuapacarevainahini nayehe ena achaneana. Émarichuhi, aní macahehi eta máechajiriruvahi: “Mácani profeta, vahi tivapinavanahi eta najacpirahi ena achaneana te mávasa”. ⁴⁵ Téhesera te máitecapauchapaipa ema Jesús eta avasarechichana tinapacanahi te Galilea, namutu najacpahi. Taicha náimatípa éma taicha

náimahapa eta tiáramicareana máichaqueneana te mávihaipa te Jerusalén te jena piéstairahi eta Pascua.

⁴⁶ Tásiha, tiápechavavarepa mayanaucha ema Jesús eta avasare Caná, te máepiyasinehi vino eta une. Te apanahivare avasare ticaijare Capernaúm, matiarhihi ema majupaha ema rey. Macajumaquenehi ema machicha. ⁴⁷ Te masamairiricapa ema achane eta máitecapiraipahi ema Jesús te Caná, tiyanapa matanupanahi. Eta máichimavapa, mayaseacapa eta macatajicahini máehicavanehini te mapena, macanarapanahini ema machicha taicha ema macajumaquene tiánehiripa tépenayahini. ⁴⁸ Émasera ema Jesús máimatipa eta masamure ema achane, tásiha, máichapa:

—Éti vahi esupanuimahi, te vahi númechahehi eta tiáramicareana —máichapa.

⁴⁹ Émasera ema achane máichapa:

—Picatajicanuchucha, tátachicha. Péhicanu, machu máepenacaru ema nuchichasami —máichapa.

⁵⁰ Ema Jesús majicapapa:

—Tiuri, piyana. Vahi picueñamava, ema pichicha vahi tépenaimahi. Máenahi tinaracaipahi nícha —macahepa.

Tacahe, ema achane masuapapa eta máichirahi ema Jesús. Tiyanapa tichavahi te mapena. ⁵¹ Te tiánehipaipahi titecapa te mapena, nácapapa ena macajurureana. Náichapa:

—Tata, ema pichicha tinaracaipahi.

⁵² Tacahe, ema mayaserecavacapa:

—¿Tájaha hora te tinaracapa ema nuchicha?

Éna náichapa:

—Cape te la una te cáperehi, táetaviacapa eta fiebre —nacahepa.

⁵³ Tásiha, ema achane máechapa étairaichuhi eta hora eta mametasirahi ema Jesús eta manarasiraipa ema machicha. Tacahe, ichaperinehi eta masuapirahi éma, énapa éna machichanaveanahi te peti, eta émairahi ema Cristo, Mavaneruhi ema Viya.

⁵⁴ Eta juca eta tápinanehi eta tiáramicarehi máichaquenehi te Galilea, te táequenepa eta machavirahi eta te Judea.

5

Ema Jesús macanaraca ema achane macajumaquene eta muracaquiha, ema tiávihami te tachacaya eta noque ticaijare Betesda

¹ Te táequenepa eta juca, tatiarhihi eta apana piesta eta viúrujisirávana te Jerusalén. Tiyanavarepa ema Jesús. ² Te jena viávasa, tatiarhihi eta ichape tapaja náimisiapirare eta uvesana nacaparuasana. Tatiarhihivare eta ichape noque vímijarechahi Betesda. Ticayehehi cinco eta cúlurureana. ³⁻⁴ Eta návihahi ena nacajumaqueneana púchuquiana, masariana, énapa ena muracaquihana. Namutu éna, ticuchapanahi eta macayamurisira eta une ema ángele. Tásiha, namutu tiyanana téchipapaicavana te une, taicha tímijachavana mácani tnapuca téchipaicava, taccanaracayarehi eta jácani majuma. ⁵ Tacahe, matiarhihi ema achane macajumaquene. Tréintayocho áñoripahi eta macatajivairahi. ⁶ Tacahe, te tisiapapaipahi ema Jesús, máimahapa ema achane macajumaquene tivecahi. Máimativare eta tayerevaipahi eta macajumairahi. Mayaserecava:

—¿Pivaraha pinaraca, nuchicha? —máichapa.

⁷ Tásiha, ema achane majicapapa:

—Nuvaraha, tata. Nájinasera ticasiapanuimahi tayehe eta noque, te tiyamurieca eta une. Ticachuricanuanaparaca ena apamuriana nucutiqueneana nacajumaqueneana —máichapa.

⁸ Tacahe, ema Jesús máichapa:

—Péhepuca, piveha eta pímacaraji. Piyana pipaica —máichapa.

⁹ Tásiha, eta máichirahi ema Jesús, enevanerinehi tinaraca ema achane. Mavehapa eta máimacaraji. Tiyanapa tipaica. ¹⁰ Eta sache manarasirahi ema achane, sávarumuhuhi. Ticapicahuhi eta jena sache nayehe ena israelítana. Tacahepa, te náimahapa ena tuparairucana, nacajachapa éma. Ánipa ná icha:

—¿Tájaha tacayema vahi pipicaucha puiti juca sache tacapicahuquenehi? Vahi vísapa piámahini eta pímacaraji puiti juca —náichapa.

¹¹ Ema achane majicapavacapa:

—Vahi nútina tásiha. Ema maca achane ticanaracanuhi, tivanecanuhi. Máichanuhi: “Piveha eta pímacaraji. Piyana pipaica” —máichavacapa.

¹² Tásiha, éna nayaserecava:

—¿Nájahasica ema tivanecavilhi pipaica eta piámirapahi eta pímacaraji? —náichapa.

¹³ Émasera ema achane vaipa máimatihini eta máijare ema ticanaracahi. Váipavare náetupiacacarehini ema Jesús te namuri ena camuriqueneana achaneana taicha tityanaripahi. ¹⁴ Téhesera te táequenepa, tityanapa ema achane eta te Templo. Ánaqui títecavaparepa ema Jesús. Te máimahapa ema Jesús ema achane macanararuhi, máichapa:

—Pímaha, vaipa picuapechava picuapecatura, machu tachavauchavi eta pijuma, máchuvare pávetiji —máichapa ema Jesús.

¹⁵ Tacahe, eta máimatirapa, ema achane tityanapa mametapanavaca ena tuparairucana eta émairahi ema Jesús ema ticanaracahi. ¹⁶⁻¹⁸ Eta tacahe, ena tuparairucana tisemanapa. Ichaperinehi eta nacatianasirahi ema Jesús táichavenehi eta macanarasirahi te jena sache sávarumuhuhi tacapichahuquenehi. Tásiha, títecapanapa, éna ticaratacanayarehini ema Jesús. Émasera máimatihí eta napanereruana. Tacahe, máichavacapa:

—Ema Tata tamutuchucha sache ticaematane. Ene nucaheyarehi nuti apana. Nítauchayare eta mavanairipiana —macahepa.

Eta nasamirahi ena tuparairucana eta máichiravacahi, navetijipaicha eta nasemirahi. Navarahapa nacapacavaneyarehi éma. Eta tivíuchahi eta macanarasesirahi te sávarumuhuana, náimijachirahi máepuruhi eta nayeherepi. Tavetijipaicha eta máimicaecherachiravahi Machichairahi ema Viya, Vívairahi ema apana.

Ema Jesús macatuparahaquenehi me Maiya

¹⁹ Énerichuvare ema Jesús máichavacapa:

—Nutupiruva numetacahe: Nuti Machicha ema Viya, eta nutuparahanahi mayehe, váiparinehi nútijiricavaimahi nícha jácani nuvarahaqueneanahi. Núti nímatiequenehahi tamutu eta máematanerepíhi ema Ticachichanu. Étayareichuhi níchayehi nútí. ²⁰ Taicha yátupíhi eta máemunasiranuhi ema Ticachichanu. Eta tacahe, tímechanuhi tamutu eta máematanerepiana. Énerichuvare tíjaracanuyareva eta nímechiraheya eta apamuri tíáramicareana. Tíápajucavayare eta táramicarevayare, apaesa iáramirineyare, epicayareva. ²¹ Ema Tata marataha macaehepuca ena náepenaqueneana, máimichavayarehi macaitarecavacaya. Énerichuva nuti Machicha, nuratahavare nucaitareca nácani nuvarahaqueneanaya, níjaraca eta náitaresiraya. ²² Nucatuparahahivare mayehe ema Tata eta nímairaya eta nacaicuñairayare namutu ena náejecapavaqueneanahi. Vaipa émainahi tícuñareca éma. ²³ Taicha mavarahahi epicauchanu nuti Machicha, tácutirichu eta epicauchirahi ema Tata. Nácanisera vahi típicauchuanahi nútí, váhivare napicauchaimahi ema Tata.

²⁴ Yátupiquenevare numetacahe eta juca apana. Nácani ticaquiñanayare tisuapanayare eta néchajiriruvana, nasuapavare eta nucavanahirahi mayehe ema Tata, éna títarecanayare, vaipa ticaicuñanaimahi. Taicha éna, tíuchuchanaripa tayehe eta náicuñayaréni te yucu. Náicuchíhi eta náitaresiraya. ²⁵ Tacutiquene nutupiruva numetacahe nuti Machicha ema Viya. Táitecapaquenepa puiti juca sácheana, tísamuanayare ena achaneana, tayanapane tépenahi eta náchanevana. Te nasuapajirahipuca, nucaitarecavacayare eta náchanevana. ²⁶ Taicha ema Tata namutuhi marataha macaitareca. Ene tacahe eta máijarasiranuhi nútí Machicha eta namutuyareva nurataha nucaitarecavaca. ²⁷ Énerichuvare tíuparacanuhi eta nícuñasiravacayarehivare taicha yátupiquenehí manerejirunuhi. ²⁸ Vahi ecuarami eta juca numetasirahéhi. Járájapa eta sácheyare eta nasamirayare namutu ena náepenaqueneana eta nahu nútí. ²⁹ Téchepecanainapa namutu te náecariana. Nácani tíchanahi eta táuriqueneana, títarecanainapa. Énasera ena tíchanahi eta tamauriqueneana, ticaicuñanainapa.

Ema Jesús máimereca eta macavanahirahi me Viya

³⁰ Nútí vahi nútijiricaváimahi nícuñareca. Nucuchapayarehi eta mavanairipi ema Tata, ema tivanecanuhi. Tacahe, te nícuñareca, vahi numapachichijicaimahi, tatupiruvayarehi nícha. Taicha tacahehi eta mavarahaquenehi ema Tata. ³¹ Te nácarichu nútí nútijiruvainachuchaini eta nímereruanahi, vahi tácomesahini esuapanuhini. ³² Váhisera nucarichuimahi, taicha matiaríhihi ema apana títametasinanuhi, émaripa ema Juan Ticachasiricarahi. Nímatihí nútí eta matupiruvahi eta máichaqueneanahi eta tímereuchanuhi. ³³ Éti ecavanairipipa nayasereca ema Juan te nájahanuhipuca nútí. Matupiruvahisera éma eta majicapiravacahi eta nútiqueneipahi éma ecuchapaquenehi. ³⁴ Váhisera étaparacaimahi eta juca eta matiaríhirahi ema tímereuchanuhi. Eta ticamunucarepanahi eta esuapiranuina apaesa iúchucuhaíya éti nícha nútí. ³⁵ Ema Juan tímicutijiricavahi tímicauchahehi tayehe eta mametarapíhi eta eyehe, te jena sácheanahi esamararasirahi éma. Iúrisamureinehi ichape, taicha eta tamicauchirahéhi eta máechajiriruva. ³⁶ Váhisera mácarichu eta máimicaecherachiranuhi ema Juan. Jararíhi eta apana táimicaecherachiranuhi, tíápajupanavahi eta táramicareva. Taicha nútí nícha eta nématanerepiana máijaranuhi ema Tata. ³⁷ Émaripa

ema Tata tivanecanuhi. Éma, vahi macutihémahi éti achaneana. Vahi esamahini eta mahu, váhivare ímahaimahi eta máquehe. Téhesera te jena Sagrada Escritura, timetacahehi eta níticapiraya. ³⁸ Éti vahi evarahahini esuapanuhini nuti mavaneruhi éma. Éta tímereuchahehi eta váhivare iúnacahini eta máechajiriruvana te esamureana. ³⁹ Éti, tamapuruji eta ecaravahuirahi eta Sagrada Escritura. Ímijacharipapuca eta ticaítarecaheyarehi. Váhiserá ímatiequenéhahini, váhivare ácaicutiarahini eta nútirahi táechajisihahi nútí nucaítarecayarehi. ⁴⁰ Tacutiquene vahi ávarahahini epauchanuhini éti, njaracahehini eta ítaresiraya máitavacainahini.

⁴¹ Nútí vahi nácomesa nacunachanuhini ena achaneana. ⁴² Títecapa, nímatihevachahi emutu éti eta emaemunasirahi ema Viya. ⁴³ Nútí nuvanecasivarichuhi me Tata eta nítésirahi. Étiserá vahi esuapanuhini, váhivare ejaçapanuhini. Téhesera te máitecahini mácani apana achane, tímijachavapuca Cristo ema ecuchapaquenehi, masapihapucaini ema tisuapacarehini eta eyehe. ⁴⁴ Éti, vahi esuapanuhini taicha eta evarairahi ecunachacareva ena achaneana. Esapihachucha éti vahi ávarahahini ecunachacare me Viya. ⁴⁵ Váhiserá nútínayare numetauchahe eta me Tata. Máimahaherinepa ema Moisés. Éma tímetauchaheyare. Éti ímijachavahi ticuchucuhayare eta evarairahi ítaucha eta mavanairipiana éma. Tamapurujihisamisera. ⁴⁶ Te yátupinahini esuapahini eta mametarapiana ema Moiséini, esuapanuhivarepucaini nútí táechajisihaquenehi eta májureanahi ema Moiséini. ⁴⁷ Váhiserá esuapahini eta májuchaqueneanahi éma. Tavetijipa eta emasuapiranuhi eta juca numetarapiana eyehe —macahepa ema Jesús.

6

*Éma Jesús máitaparajahi máenicavaca ena camuriqueneana achaneana
(Mt 14.13-21; Mr 6.30-44; Lc 9.10-17)*

¹⁻⁴ Te táequenepe, te jena sácheana tiánehipa eta Pascua, vapiestarasahi viti israelítana. Émasera ema Jesús, tiyanavarepa tiámahavivare eta viánuecachi eta cáquiure Galílea (ticaíjarehivare Tiberias). Camurianasera ena achaneana tipaicanapahi téhicanapahi éma, taicha eta náimairahi eta tiáramicareana máichaqueneanahi eta macanarasiravacahi ena nacajumaqueneana. Te vítecapapa te apachara, viyanapa te jácani anuquerehi mávapahi. Tacahe, véjacapa vinaracayarehi. ⁵ Téhesera te máimahapa ema Jesús ena camuriana achaneana eta náitecapauchirahi, máichapa ema vichamuri Felipe:

—¿Távihapucaini vivacharesihaini eta tinicacare vénisihahini namutu ena nani achaneana? —máichapa.

⁶ Eta juca mayaseresirahi étachuchanéni eta mavarairahi éma macaicutiarayarehi te tájahapuca macayemayarehi ema Felipe. Taicha ema Jesús máechahi eta máichaqueneayarehi. ⁷ Tásiha ema Felipe majicapapa:

—Tacamunuhi vácayehéhini eta camuri plata apaesa namutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —macahepa.

⁸ Tásiha, téchajicapa ema nuchamuri Andrés, maparapehi ema Pedro. Máichapa:

⁹ —Mararihi aní ema émana amaperu tiámaphi eta cincochichaphi eta pan, apinapa eta jima. ¡Váiparinehiserá nárataimahi ena nani camuriqueneana achaneana! —macahepa.

¹⁰ Émasera ema Jesús máichahavipa:

—Evaneca náejahapáica námutu ena achaneana —macahepa.

Taicha tíurinapahichíchahi eta apaquehe, mujípahihivare. Cinco mil éta náichapemu-rivahi ena ajairana. Vahi náimitupachahini ena esenana énapa ena amaperuana. ¹¹ Tacahe, ema Jesús mavehapa eta páneana. Te tamutupa eta mahasulupayachirahi ema Viya, tíjarcachavipa. Vénricapa víti, víjaracavacapaipa eta pan étaipa eta jima. Tisimurivacapaipahi eta víjaraca. ¹² Tinicanapa namutu. Tisatuheanapa, nacaemacharichahavare. Tásiha, ema Jesús máichahavivarepa:

—Ecurujica eta náemacharajianahi, machu támapuruji —macahepa.

¹³ Tásiha, viti vicurujicapa eta pan náemacharajianahi. Táinicachaichahavare eta dócehiquene ichapehiana saye. ¹⁴ Tacahe, eta náimairahi ena achaneana eta juca máichaqueneanahi ema Jesús, ichaperinehi nárami. Tásiha, nacahepa:

—Émaripa ema maca profeta ema vicuchapaquenehi máiteruyarehi te juca apaquehe —nacahepa.

¹⁵ Eta tacahe, navarahapa námayarehini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tiyanapa macarichuhi te tápusi eta cerro.

Ena Jesús mapaicaeca eta une
(Mt 14.22-27; Mr 6.45-52)

¹⁶ Tacahe, te jena cáperehichichapa, viyanapa viti máimitureana tayehe eta cáquiure. ¹⁷ Te vítecapapa, viávacuhapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Ena Jesús májinahi macachanehavi-pahini. ¹⁸ Eta vipasirapahi, tachimaracapa eta muraca técativava. Tépacucapa muraca eta cáquiure. ¹⁹ Cinco kilómetroipahi eta viyerehivahi, vétupiecapaipahi, te vímahapa ema Jesús. Mapaicaecapaipahi eta une, tipauchahavipaipa. Viti vipicapa eta vímairahi. ²⁰ Émasera máichahavipa:

—Vahi ecupicanu. Nútichucha.

²¹ Tacahe, vímatipa éma. Viúrisamuréinehi eta vijacpirahi eta mávacuirapa eta te vipacure. Tásiha, vítecapanecha eta te vicaijuheyarehi.

Ena achaneana natanujiricaipahi ema Jesús

²² Te apanapa sache, ena achaneana manaquiruanahi ema Jesús, natanujiricaipahi éma. Námatiacapa eta vicarichuirahi viánueca viti máimitureana. Tájinahivare apanainahini pacure. ²³ Tásiha, tacahepainecha eta apana pacureana, nayehihi ena tiásihanahi te avasare Tiberias. Títecapanapa te tachacaya eta nanisinehi eta pan ena camuri-queneana achaneana. ²⁴ Tacahe, ena achaneana eta namaimairahi ema Jesús vítipa viti máimitureana, tiávacuhanapa te pacureana. Tiyananapa ticapayacahavianayarehi te Capernaum, natanusirapahi ema Jesús.

Ena Jesús ticaitarecarahi

²⁵ Te títecapanapa ena achaneana te apachara, náetupiacapa ema Jesús. Tásiha, nayase-recapa:

—Tata maestro, ¿tájamuhu pítecapahi eta ani? —náichapa.

²⁶ Ena Jesús majicapavacapa:

—Nutupiruva numetacahe: Eti etanucanupahi táichavenihi eta nénisirahehi nésatuhechirahehi. Váhisera ácaicutiarahini eta nimechirahehi eta tiáramicareana. ²⁷ Eti tamapurujipa eta ecañamarasiravahi etanuca eta enicaquenerepi taicha títavayarehi. Tatuparacahisera etanucayare eta tinicacare ticaitarecaheyarehi, máitavacacahi éta. Étara eta juca níjararueheyarehi nuti Manerejirunuhi ema Viya. Éta tímereuchanuhi eta yátupirahi nuvanecasivahi eta mayehe ema Tata —máichavacapa.

²⁸ Tacahe, éna nayaserecapa:

—¿Tájahapucaini eta mavarahaqueneanahi ema Viya eta vicaemataneasirahi éma? —nacahepa.

²⁹ Ena Jesús majicapavacapa:

—Eta mavarahaqueneanahi ema Viya íchaquenyare, esuapanuyare nuti mavanerunuhi —macahepa.

³⁰ Tásiha, ena nayaserecavarepa:

—¿Tájahasica eta tiáramicare pímechahiviyare apaesa visuapavipa? Vivaraha vímaha.

³¹ Eta acane ema víyarahaini Moisés tíjaracavacahi ena viáchucacaequeneanaini tinicanahi eta ticaijare maná, ánaqui te apaquehe mávapahi. Taicha tacahehi eta táechajiriruvahi eta Sagrada Escritura ani tacahehi: “Máenicavacahi eta tinicacare tásiha te anuma”. Piti, ¿pímijachavapa pirataha picachurica ema víyarahaini Moisés? —nacahepa.

³² Ena Jesús majicapavacapa:

—Nutupiruvavare numetacahe. Éti, ichape eta éjecapirava. Ena víyarahaini Moisés, vahi émainahini macucupaicahini eta maná. Ena Tata, émahí ticucupaicahi eta maná. ³³ Jararihi eta apana numetarapi eyeh: Puiti ema Tata mavaraha májaracaheya eta yátupiquenehi tinicacarehi. Étaripa tinicacarehi tiásihahi te anuma ticaitarecavacayarehi namutu nácani tijacapanaya. Étara eta tímitecanuhi —macahepa.

³⁴ Tásiha, najicapapa éna:

—Tata maestro, piyaseasinahavi ema Viya májaracahavipaini máejehainahini eta tinicacare péchajisihaquenehi —náichapa.

³⁵ Tásiha, éma máichavarepa:

—Nútira eta yátupiquene tinicacare nucaitarecaheyarehi. Eta tacahe, nácani tisuapanuanayare, vaipa tiápechavanaimahi téchuhana. Váipavare timauneanaimahi. ³⁶ Étasera eta níchaquene, ímahanuipapaneni éti, váhisera esuapanuhini. ³⁷ Nuvaraha ácaicutiaraquene éna yátupina. Namutu nácani tipauchanuanayare, nútí vahi névatajicavacáimahi taicha tásihaquenechuhí me Tata eta májarasiranuhi éna. ³⁸ Taicha nútí, eta núcupaisirahi te anuma, tímitecanuhi nítauchayarehi eta mavanairipiana ema Tata. Vahi nútíjiriruvainahini eta nítesirahi níchayarehi eta nuvarahaqueneanahini nútí. ³⁹⁻⁴⁰ Eta mavarahaquenehi ema Tata

eta mavanesiranuhi, nucaitarecayarehi nácani máijararunuanayarehi éma. Nácani tésenicanuanayare nuti Machicha, tisuapanuanayarevare, máichecuaraquireyare eta náitare-siraya te nucaechepecapapa éna te náecariana te jena sache táitecapapa eta népaníravacayare. Váhiquene nucamitiacaimahi éma émanaimahi —máichavacapa.

⁴¹ Tásiha, nararihi éna ticaecahirahiana eta máichiravacahi éma Jesús eta émairahi eta yátupiquene tinicacare, máucupairuhi te anuma, ticaitarecarahiyare. ⁴² Ánipa náichacacahi:

—Tépiyahirahipa éma maca. Vítí, vímatíhi éma maiya, ticaijare José. Énerichuvare vímatihivare esu máena. ¿Tájaha tacayema eta macahechajiriruvahi eta másihairahi te anuma? —nacahepa.

⁴³ Éma Jesús máichavacapa:

—Ámatina. ¿Tájaha tacayema épururahi? ⁴⁴ Nacarichu témunahiricavanaya tipauchanuna nácani máichuhaqueneanahi éma Tata. Eta tacahe, éna máichuhaqueneanayarehi éma, nucaechepecavacayare nútí te táitecapapa eta sache népaníravacayare nútí. ⁴⁵ Taicha tacahehi eta májurehi éma profeta víyarahaini Isaiás, ani tacahehi: “Náimitucasivayareichuhi me Viya namutu éna achaneana”. Tacahe, namutu éna máimitureana éma Tata, énara tipauchanuanayare puití. ⁴⁶ Tayanapane váhihinéni náimahaimahi eta mamira éma Tata. Nucarichu nútí nímahapa éma taicha étaquenehi eta násinehi eta mayehe. ⁴⁷ Nutupiruvahi numetacaha: Nácani tisuapanuanayare, níjaracayare eta náitairesirayare máitavacacayare. ⁴⁸ Nútí, yátupiquenehi eta nucaitairesiravacahi éna ticasíñavanahi eta nuyeh tacuti eta tinicacare tacaitarecachi eta víáqueheana. ⁴⁹ Éti, éna iáchucanaveanaini tinicanahi eta maná te mávapahi apaquehe. Váhísera náitarecahíni. Namutuhi tépenaracánahi. ⁵⁰⁻⁵¹ Nácánísera tinicanahi eta néche, vahí tépenanaimahi. Taicha nútí núcupaicaripa te anuma. Eta neche, yátupiquenehi tinicacarehi ticaitarecarahi. Nácani tinicanayare eta neche, máichecuaraquireyare eta náitairesiraya. Nútí níjaracayare eta neche taicha nuvaraha tacaitarecavacahíni namutu éna achaneana —máichavacapa.

⁵² Tásiha, éna natiarihiqueneana tiácapaemajiricacánapa. Éna apamuriana, ánipa nacahe:

—¿Tájahapuca macayemahi eta máíjarasirahavi eta maeche viniruyarehi?

Éna apamuriana, ánipa nacahe:

—Vaipa tétupicava eta juca mapanereruhi. Mavaraha vinicayarecacha eta máeche naváji —nacahepa.

⁵³ Émasera éma Jesús máichavarepa:

—Nutupiruva numetacaha: Te épuruhipuca énica eta neche, nuti Manerejirunuhi éma Viya, te épuruhivarepuca éra eta nítine, vahí itarecaimahi. ⁵⁴ Taicha nácani tinicanayare eta neche, téranayareva eta nítine, éna máichecuaraquireyare eta náitairesira. Tásiha, nútí nucaechepecavacayare te náecariana te jena sache népaníravacayare. ⁵⁵ Taicha eta neche yátupiquenehi tinicacare tacaitarecarahi. Énerichuhi eta nítine, yátupiquenehivare téracare ticaitarecarahi. ⁵⁶ Esamanuchaha. Nácani tinicanayare eta neche, téranayareva eta nítine, éna tiávahácanuanayarehi nútí. Tásiha, nútí návahácvacayareva éna. ⁵⁷ Taicha éne nucahehi nútí, tiávahácanuhi éma Tata. Tásiha, nútí návahácvahivare éma. Máitavacacahi eta máitairesira. Éma ticaitarecanuhi. Tivanecanuhivare nucaitarecaheyarehi. Tásiha, nácani tinicanayare eta neche, máitavacacayare eta náitairesira nícha. ⁵⁸ Nútí núcupaicahi te anuma eta níjarasiraheyarehi eta juca yátupiquenehi tinicacare. Vahí tácutíhi eta maná nanicaquenehi éna iáchucanaveanaini éti. Tépenaracanárichuchaséra. Énasera éna tinicanayare eta neche, máichecuaraquireyare eta náitairesiraya —máichavacapa.

⁵⁹ Tamutu eta juca máimiturapiana éma Jesús te mávihalpahi te náurujisirareva ticaijare sínagoga tayehe eta jena avasare Capernaum.

Tacarichu eta máimiturapiana éma Jesús ticaitarerahi te visuapa

⁶⁰ Tacahe, éna téhicanahi éma Jesús, eta nasamirahi eta juca máimiturapianahi, camuriana éna vaipa návarahahíni náehica. Ánipa nacahe:

—Ticajerapicha eta vicaicutiarirainahíni eta juca máimiturapiana. Nájínavare tisuapanaimahi —nacahepa.

⁶¹ Émasera éma Jesús máimatíhi eta napanereruanahi eta namavarairaripa náimiyana-vahíni náehicahíni. Tacahe, máichavacapa:

—Páurehehi éti eta evaraha ínajica eta éhisiranu taicha eta emacaicutiarairahi eta nímiturapianahi. ⁶² Németeaca ímíyanavaichucha eta emasupajiravahi, tayanapanepuca ímahánupuca eta náiraraya nuchavirayarehi te anuma, te návinehi acane, taicha nútí Manerejirunuhi éma Viya. ⁶³ Ácaicutiara eta nucayemaquenehi. Vahí étaparacaini eta néchaquene. Éta juca nímiturapiana, te esuapapa, étara ticaitarecaheya taicha yátupiqueneríhi. ⁶⁴ ¡Páurehehi éti váhiquenehi evarahahíni esuapanu! —máichavacapa.

Eta juca macayemaqueneanahi ema Jesús, matupiruvahi eta máichiravacahi taicha máimatipahi eta napanereruana ena tijunijacananayarehi, émapa ema tjararecayarehi.

⁶⁵ Tacahe, máichavacapa:

—Puíti, evaraha ínjácanu. Eta tacahehi eta níchirahehi: “Nacarichu témunahiricavanaya tipaichanauana nácani máichuhaqueneanahi ema Tata” —máichavacapa.

⁶⁶ Eta nasamirahi eta nacayemaqueneanahi, tñajicavanapa ena camuriqueneanainihi. Vaipa náimiyavahini náehicahini ema Jesús. ⁶⁷ Tacahe, tiyaserecavavipa viti dócequeneana máimitureanahi. Máichahavipa:

—¿Evarahainapapuca ejunijicanuyare éti apanavare?

⁶⁸ Tacahe, ema Simón Pedro majicapapa:

—Tata maestro, vahi vijunijicavimahi, taicha nájina pácuti eta péchajiruvana. Tétavicavahi eta tacaitarecaravahi. ⁶⁹ Viti vitupiruvahi eta visupiravíhi. Véchahivare eta yátupiquenéravíhi Cristo, Machichaquenévíhi ema yátupiquenehi Viya —máichapa.

⁷⁰ Ema Jesús majicapapa:

—Dócehehinéni eti nunerejiruanahi. Mararihiserá ema émana te etaracu, ema mávaháruhi ema Váinaraji —máichahavipa.

⁷¹ Ema Jesús, máechajisihahi ema Júlasí. Taicha ema Jesús máimatíhi eta émarayarehi tjarareca, tayanapané éma vidocenéníhi viti apóstoleana.

7

Ena maparapenaveana ema Jesús váhivare nasuapa

¹ Tacahe, ema Jesús tímiyanapaipahi tipacapaipahi eta avasareana te tinapaica eta Galilea. Vahi mavarahahini machavahini tayehe eta avasareana tinapaica eta Judea, taicha ena tuparairucanahi te Jerusalén napanerechaipahi nacapacayarehi éma. ² Tacahe, te jena sácheanahi, tiánehípa eta vipiéstara viti israelítana eta vicapenahuyivacahi eta viyusujiana. Étahi eta vítecapíhacavahi te Jerusalén, vihasulupayacha me Viya eta macajurusinahavíhi eta visucureana te véseaneana. ³ Tiuri puítí, natíarihíhi ena maparapenaveana ema Jesús. Tacahe, náichapa éma:

—Te pímiyachava píтира máestrovi, vahi pánasi eta te aní. Piyana te Judea, apaesa ena pímitureana tíávihanahi ánaquí náimaha eta píchaqueneanayare. ⁴ Taicha te pívarahahípuca náimatívi ena achaneana, tacamunúhi pímerécava yátupína te namírahu namutu. Vahi pícuymuruca eta pítucaqueneana —náichapa.

⁵ Taicha ena maparapenaveana váhiquenevare nasuapahíni éma. ⁶ Tacahe, ema Jesús máichavacapa:

—Vuíchaha táitecapauchanuhíni eta nuyanirayare te Jerusalén. Étísera tamutuchucha tíuri eta eyaniraina. ⁷ Nútísera tícatichanuanahí ena achaneana táichavenehi eta nímereuchiravacahí eta náichaqueneana tamauríqueneana. Étísera vahí tícatíchaheanaimahí taicha tájina taviuchahehíni. ⁸ Te evarahapuca, eyana éti te píesta. Nútísera vuíchaha nuyanaimahí taicha vuíchaha táitecapauchanuhíni eta nuyanirayare —máichavacapa.

⁹ Máevatacáhi ema Jesús ena maparapenaveana, émasera tícaequenehavapa. Manasipanaichaha te Galilea.

Ena Jesús tíyanarichuchanéni tayehe eta píesta

¹⁰ Te tíyananapa te píesta ena maparapenaveana ema Jesús, énerichuvaréni éma tíyanavarepa. Váhísera máímerecavahichainí. ¹¹ Énasera ena tuparairucana natanucaipa éma, te jena píéstaquenehí. Tásiha, nacahepa:

—¿Macáñárihipucacacha ema mácani achane? —nacahepa.

¹² Énerichuvare ena achaneana natíarihíqueneanahí te píesta, náechajisihahí éma. Ánípa nacahehi: “Vahí tíuri ema maena achane. Macaetemavaca ena achaneana”. Ena apamuriana ánívare nacahe: “Tíúríhi ema maca. Vémeteaca tétavícava eta máúrivahí”.

¹³ Váhísera nacuchujípícahíni eta nacayemaqueneanahí taicha típicacaracavanarichucha nayehe ena tuparairucana.

¹⁴ Te enumuhuquenepa eta píesta, mapaenumavapa tímerécava ema Jesús. Tíyanapa tísiapahí tayehe eta Templo. Tínahacavapa tímiturecahí. ¹⁵ Ichape eta náramirahí ena tuparairucana, eta náimairahí eta máítusirahí yátupí. Tásiha, ánípa nacahehi:

—Ema maca vahí vímiturenahíni. ¿Távíhi mavíyahí eta máítuquenehí ema maca? Vahí mávamírahuíni eta máímitusíravacahí ena achaneana —nacahepa.

¹⁶ Émasera ema Jesús máimatíhi eta napanereruanahí. Tacahe, máichavacapa:

—Vahí nútíjírírúvaina nuvehahíni te nuchutí eta juca nímiturapíanahí. Ema Tata tívane-canuhí, émahí títiparacanuhi eta nímitusíraya eta máímiturapíana. ¹⁷ Te etíarihínapuca eti evarahahí ítaucha eta mavanairípíana ema Viya, ímatíacavaneyare eta juca nímiturapíanahí

étairahi tásihahi eta me Viya. Vahi nútjiricávainahini eta nímitusirahi. ¹⁸ Mácani achane émajiricavahi téchajisihava, mavarairahi ticunachacareyarehi. Nútisera, eta nuvarairahi ecunachayare ema Tata tivanecanuhi, vahi népiyahirahimahi. Nutupiruvahi néchajisiha eta yátupiqueneana tisuapacareana.

¹⁹ Échavarichu éti eta májarasirahehi ema víyarahaini Moisés eta mavanairipiana éhiru-yarehi. Váhisera ítauchahini éti émanainahini. ¿Tájahasica eta nuviureva eta evarairahi ecapacanuya? —máichavacapa ena tuparairucana.

²⁰ Ena achaneana najicapapa:

—¡Péjicapava píti eta pipanereru! ¡Máurishivipapuca píti! ¿Nájaha ticahehi eta vivarairahi vicapacavi? —náichapa.

²¹ Ena Jesús tímiyanava téchajiricava nayehe ena tuparairucana, ánipa máicha:

—Táichavenehi eta nípuresirahi te jena sache tacapicahuquenehi sávarumuhuquenehi, éta tiviuhanuhi ichape eta eyehe. ²² Étiyapa epamicavahi eta emarcachiraya mácani amuya ajaira te óchopa eta masacherahi, tayanapane sávarumuhuhipuca. Taicha ichape evaraha ítauchayare eta mayeherepini ema víyarahaini Moisés. (Váhisera émainahini máinapucahini manacuchahini eta juca eyeherepi. Ema viáchucaini Abraham énapa ena machichanaveana tinapucanahi nanacucha eta viyeherepiyarehi.) ²³ Te tíuríhi ímaha eta emarcachirahi mácani amuya alauchu te sávarumuhuana, ítauchirapaipahi eta mavanairipi ema Moisés, tatuparacahe vahi ecusemahini eta nuyehé táichavenehi eta nuncanarasirahi ema maca achane te sávarumuhu. ²⁴ Vahi ecuémunanásicava eta epanereruana. Epanerechinava tayehe eta táuriqueneana. Ácaicutiara eta táurivahi eta vicanarasirahi ena achaneana, tayanapane eta sávarumuhuhipuca —máichavacapa.

Ena Jesús máechajisihapa eta másihehi

²⁵ Tacahe, natiiríhi ena tinerejicavana ena ticavasanahi te Jerusalén, nacahepa éna:

—Ena maca, émara ema natanujiriruasa ena tuparairucana, ema navarahaquenehi nacapaca táichavenehi eta máimijachirava ema Cristo mavaneruhi ema Viya. ²⁶ Ímahasera éma, vahi mapicacaracavahini eta macametarairuirahi te juca Templo. Nájínavare ena tuparairucana nájaracavahini nacaratacahini. Nájínavare nacamatínacahini. ¿Nasuapari-papuca puiti éna, eta émaríhi ema Cristo? ²⁷ Vémetecasera vuíchaha émaina ema Cristo, taicha vímatíhi ema maca, étapa eta máuchusinehi. Te máitecapa ema yátupiquene Cristo, nájina téchaimahi távihapuca eta máuchusihayare —nacahepa.

²⁸ Émasera ema Jesús máimatíhi eta napanereruana. Tásiha, muracapanapa eta máechajisirahi eta te Templo máimituresirahi. Ánipa macahe:

—¡Éti ímijachava ímatínuhi, étapa eta núchusinehi! ¡Váhisera ímati eta tímitecanuhi! ¡Váhivare ímati ema Eternoquenehi, ema tivanecanuhi! Núti, vahi nútjiriruvainahini eta nítesirahi. ²⁹ Nútisera nímatíhi éma taicha étaquenehi násinehi eta mayehe eta nítecapauchirahehi —máichavacapa.

³⁰ Eta nasamirahi éna tuparairucana, tiápajupanavahi eta nasemanevahi. Navarahapa nacaratacayarehini, náeratacayarepáini, vuíchahasera máisapahini ema Viya eta nacaratasira éma. ³¹ Natiiríhisera camuriana ena tisuapanahi. Tásiha, nacahepa:

—¡Víti vémeteaca émarípa ema Cristo ema maca! ¡Taicha nájina mácuti eta máichirahi eta tiáramicareana máichaqueneanahi ema maca! —nacahepa.

Ena tuparairucana náevatacapa ena suntaruana nacaratapanayarehi ema Jesús

³² Ena fariséoana nasamaemachapa ena achaneana eta nacunachirahi ema Jesús. Tásiha, napanereuchavanepa ticurujicacanapa ena tuparairucana. Náevatacapa ena suntaruana nacaratapanayarehi ema Jesús te Templo te mávihahi. ³³ Tacahe, ema Jesús máichavacapa ena suntaruana:

—Vuíchaha tituparacahe eta ecaratacanuhi. Yátupisera ánipirine eta nucaheyare eta eyehe. Tásiha, nuchavainapa mayehe ema tivanecanuhi. ³⁴ Éti, etanucanuinapa, váhisera íchimavanuimahi. Taicha vahi ítuicavaimahi ecapayacanu te návihayare núti —máichavacapa.

³⁵ Tacahe, ena ticatianacanahi tiyaserejiricacanapa. Ánipa nacahe:

—¿Távihapapuca macaíjuhénapa eta vaipa viratahaimahi vicapayacaimahi víti? ¿Mavarahapuca tiyanayare te tayerehiquene avasare, macapayacaya ena vijaneanana israelítana tiávihanahi te tayerehiquene? ¿Mavarahapuca máimitucayare ena apavasanana? ³⁶ ¿Tájahapucáji tacayemahi eta juca máechajiriruvahi eta vaipa viratahaimahi vicapayaca te jácani macaíjuhayare? —nacahepa.

Tétavicavayare eta viúricacarevana maicha ema Jesús, tacutiya eta ichape cajacure táuchurehi eta máriana. Ticaitarecavahi éma.

³⁷ Te jena téqueneha sache eta piéstairahi, tímahacarepana eta jena sache. Tiyanavarepa ema Jesús te namuri ena achaneana. Titupihapa, téchajicapa muraca. Ánipa macahe:

—Te natiarihnapuca nácani tímauneanahi, náitecapauchanu. Núti níjaracayare eta náerayare nácani tisuapanuanayare —macahepa.

³⁸ Taicha ani tacachehi eta Sagrada Escritura: “Ema Mavaneruhi ema Viya, tétavicavaya eta viúricacarevana máicha, tacutiya eta ichape cajacure táuchurehi eta te máriana. Ticaita-recahaviya éma” tacachepa. ³⁹ Eta juca macayemaqueneanahi ema Jesús, máimicaeche-rachahi eta masiapahasiravacayarehi ema Espíritu Santo te nasamureana nácani tisuapanayarehi éma. Vuíchahasera tátauchavahini, taicha vuíchaha machavahini mápanahini te mávasa te anuma ema Jesús.

Apanapanepa eta napanereruanahi ena achaneana mayehe ema Jesús

⁴⁰⁻⁴³ Tacahe, ena achaneana apapanepa eta napanererua mayehe ema Jesús. Ena apamuriana achaneana, nacunachapa éma. Ánipa nacahe:

—Yátupiquene ema maca achane, émaripa ema profeta ema vicuchapaquenehi máiteruyarehi.

Ena apamuriana, ánvare nacahe:

—Émaripa ema maca ema Cristo.

Énasera ena apamuriana, téjecapavanarichucha. Ánipa nacahe:

—Galileo ema maca Jesús. Váiparinéhiséra étainahi máuchusiha ema Cristo tayehe eta avasare Galilea. Taicha eta Sagrada Escritura táechajisihahi ema Cristo émayarehi mámarie-queñeyarehi ema víyarahaini Rey David. Téhesera te avasare Belén eta máuchusihayare, étaichuhi te mávasahi ema víyarahaini Rey David —nacahepa.

⁴⁴ Natarihivare ena apamuriana navarahaichucha náemeratacyarehi, váhisera napatsicavahini nacaratachahini.

Ena tuparairucana vahi náurica eta nasuapirahi ema Jesús ena achaneana

⁴⁵ Tacahe, ena suntaruana vanairucanahi tichavanapa nayehe ena tivanecanahi tuparairucanahi. Vahi náijaracavahini nacaratachahini éma. Tacahe, náichapa ena tuparairucana:

—¿Tájaha tacayema vahi íamapahini éma?

⁴⁶ Ena suntaruana najicapapa:

—Víti vahi vipatsicavahini vicaratachahini éma, taicha tétavicava eta máitupajijiasirava ema maca. Émahipuca ema Cristo vicuchapaquenehi. Nájina mácuti eta máechajisira ema maca achane —nacahepa.

⁴⁷ Tacahe, ena fariséoana náichapa:

—¡Éti apनावare ísapavaipahi tivayuaracahe ema mácara! ⁴⁸ Nájina émanaina ema tuparairuca viyehe viti nasuapahini ema máenatajaji. Váhivare émanaripa vichamuri fariséo, vahi masuapahini. ⁴⁹ Énasera ena nani achanetatajiana máimatirahanahi eta viyehe ley, náehicávanetatajipa. Táurica nacaicuñahini táicha —nacahepa.

⁵⁰ Matarihivare ema Nicodemo, ema tipaipuchahi ema Jesús te jena yátiquenehi. Fariséohivare éma. Máichavacapa:

⁵¹ —Váiparinehi vétavicaimahi eta viyehe ley vítijiricavahini vicapachahini ema achane. Tamamunuhi véchanumayarehi eta maviurevahi —nacahepa.

⁵² Éna najicapapa:

—Vémeteaca píti apनावare pijaneanahipuca éma, pítrichupuca galiléovihí. Vivanecevi péchajicuha eta Sagrada Escritura apaesa pecha vahi étaimahi te Galilea máuchusihayare ema profeta Cristo vicuchapaquene —nacahepa.

⁵³ Tacahe, te tátapiricanapa eta náechajisihairahi ema Jesús, téjanerecanapa. Tiyanaracana te napenana.

8

Esu esena ticayepéhi

¹ Ema Jesús májinaripahi. Tiyanaripa te tachachacu eta avasare, te cerro ticajarehi Olivoquijí. Tatiarihíhi eta avasarechicha ticajarehi Betania, eta máitecapihahi éma. ² Te apनावarepa sache, te tijarahichichapa, tiyanavarepa éma tayehe eta Templo. Téjacapa éma, tímiturecapa. Namutu ena achaneana tiyananahi napaucha, nasamararacayarehi éma. ³ Tacahe, sutiarihíhi esu esena ticayepéhipuca, esu suvehahi ema apana achane. Ena escribánoana énapa ena fariséoana, eta náimereuchirahi ésu, námapa te mamirahu ema Jesús te namuríhi ena achaneana. ⁴ Tacahe, náichapa ema Jesús:

—Tata maestro, esu suca esena nachimaracahi ticayepahi, suvehahi ema apana achane.
⁵ Eta viyehe ley májararuhavi ema víyarahaini Moisés, tímítuchavíhi vicapacayarehi eta vitupisisirayare te márijahiana nácani tícapacaturanahi. ¿Tájahapuca picayema pítí? — nacahepa.

⁶ Éna nayaseserecahi ema Jesús, taicha natanucahi eta tivíuchayarehi éma. Émasera ema Jesús tétipaicapa tíajupairicapa te apaquehe te mavauqui. ⁷ Énasera tímíyanavanarichucha nayaseserecahi. Tacahe, máesenimurihapa. Máichavacapa:

—Te etiarihipuca éti mapecaturareanahi, enerejicava ínapuca eyuca esu suca esena — máichavacapa.

⁸ Tacahe, tétipaicavarepa tíajupairicavarepa éma. ⁹ Eta nasamirahi eta juca, téchavananarichuhinéni eta napecaturana. Títsirihacavanapa. Tásiha, tímútserahavanapa tíuchuchujicana. Natívapa tíuchucanahi ena íchavícapanana. ¹⁰ Te máesenicavarepa ema Jesús, nájinaripahí éna. Sucarineipahi esu esena. Tásiha, máichapa esu esena:

—Nuchicha, tíyananapa namutu ena tímétauchavianahi. ¿Nájinapa apanainahini ena navaraha ticapacaviana?

¹¹ Tásiha, ésu suíchapa:

—Nájina, tata.

Éma máichavarepa:

—Núti apanavare, váhivare nímicapacavimahi. Piyana pichava. Váipasera picuapechava picuquicha eta pecatu — máichapa.

Éma Jesús, ema namícahu ena achaneana

¹² Te táequenepa eta juca, tépanavavarepa tímítureca ema Jesús. Máichavacapa ena achaneana:

—Nútira numícauchahehi eti achaneana te juca apaquehe. Eta tacahe, nácani téhicanuanayare, vahi téjecapavanaimahi. Taicha eta nímiturapiana, étapa tímícauchavacahi. Tásiha, nacatichainapa eta tímápicu, vaipa napauchaimahi — máichavacapa.

¹³ Tásiha, ena fariséoana natíarihipahíavare. Tacahe, náichapa:

—Pítíjivíachucha péchajisiavahi. Tájina písuapacarevaina.

¹⁴ Éma Jesús májicapavarepa:

—Tísuapacare eta juca néchajírírúvana, tayanapane nútíjivahi néchajisiava. Taicha nímatíhi nutuparahaichuhi eta nímeresiravavare. Nímatíhivare eta nucaíjuhíyare. Étísera vahi ímatíhini távíhapuca eta násinéhi, váhivare ímati eta nucaíjuhíyare. ¹⁵ Éti étachucha éhícahi eta nayeherepiana nanacaqueneana ena íchucanaveanainí. Étasera tíchahehi eta épuruiranuhí. Nútísera vahi népuruhéímahi éti. ¹⁶ Jéhevareséra, te jácani sácheýare, népuruhepapuca táchavenehi eta emasuapírahí, tatupírúvayarehi eta népuruírahíyeta taícha vahi nácaríchuímahi népuruhe nútí. Matíaríhi ema Tata tívanecanuhí. Éma apana máímahahi eta emasuapájríavíahi. Tépurúheýarehíavare éma. ¹⁷ Te eyeherepí éti, te natíarihipuca apinana ena tímetacarahíana, te tícticacanáhi eta náechajírírúva, tísuapacareanayarehí éna. ¹⁸ Ene nucahehi nútí. Yátupíhi eta numetarapiana. Émapa ema Tícachíchanuhí, éma tímetacáhehi eta yátupírahí eta numetarapiana — máichavacapa.

¹⁹ Énasera nayaseserecavarepa:

—¿Távíhasíca mávíhahi ema tícachíchavíhi?

Éma Jesús májicapavarepa:

—Éti vahi ímatínu. Váhíavare ímatímahi ema Tícachíchanu. Te ímatínuhíni, ímatípahíavareíni ema Tícachíchanu — máichavacapa.

²⁰ Eta juca eta máechajírírúvanahi ema Jesús eta máímítúresirahí tayehe eta Templo. Eta máéjasínehí te tachacaya eta nanasírareana eta námavahuana. Nájinasera napatsícvahíni nacaratacháini taícha vuíchaha máisapavacáimahi ema Vía eta nacaratasírírahíni éma.

Éma Jesús tímírechavapá eta émaíríhi Crísto

²¹ Éma Jesús tíapéchavavare mametacavaca:

—Púití tíánehípa eta nuyanírayare. Éti etanucanuínapa. Váhísera íchímavanuímahí. Émepénainapa eta epecaturana. Tímícuñacaheýare te ínfierno taícha vahi ecámápuravahíni eta nutíaríhírahí, esuapanuhíni. Taícha vahi ítujícaváimahi ítecapa te návíhaya nútí — macahepa.

²² Tásiha, ena tíctíanacanáhi náíchacacapa:

—Mavaraháinapuca tícapacavayare. Táítúsiava macahehi eta máechajírírúvahi eta váhíjívíratáhímahí véhíca éma. ¿Távíhapuca eta macáíjuhíyeta? — nacahepa.

²³ Éma Jesús máichavarepa:

—Éti tayehehi eta apaquehe. Nútisera tayahenuhi te anuquehe. Eta íavasahi éti te apaquehe íávihihi. Núti návasaichuhi te anuquehe. ²⁴ Eta tacahe, numetacahenumahi eta tanasinapa eta epecaturana te épenapa. Taicha te vahi esuapanuhini eta nútiquenérahi ema ecuchapaquenehi, tanasiyare eta epecaturana te épena —máichavacapa.

²⁵ Tacahe, nayaserecapa éna:

—Piti pímiyachava mavaneruhi ema Viya. ¿Nájahavisica pítinavaji?

Ema máichavarepa:

—¿Áyáhepapuca numetacahe? ²⁶ ¡Tétavicavahi eta tamuracavahi eta esamureana! Tavaraha muraca eta nucajachiraheya. Vuíchahasera nicha. Émasera ema tivanecanuhi, tatupiruvahi eta máechajiriruvana. Eta tacahe, eta néchajiriruvana nútí eyehe eti achaneana, étarichuhi eta nusamaqueneanahi mayehe —macahepa.

²⁷ Énaserá váhiquene nácaicutiarahini eta mametasiravacahi eta mayehe ema Maiya. ²⁸ Tásiha, máichavarepa:

—Jéhevaresera te ecaturipihanupa te anuquehe, tapanumavainapa ímatinuyare eta nútiquenerahi ema Cristo ecuchapaquenehi. Ecaicutiarayareva yátupihí nímítucahe eta máimiturapiana ema Tata. Vahi étaina nuviyahini te nuchuti nútijiriruvainahini. ²⁹ Puíticha, ema Tata ticachanenuhi, vahi majunijiacanuhini, váhivare nácarichuhini taicha nítauchai-pahisera nútí eta mavarahaqueneanahi éma —máichavacapa éna.

³⁰ Eta nasamirahi ena achaneana eta mametarapianahi, ichaperinehi eta nasuapirahi ema Jesús ena camuriqueneana achaneana.

Tímaticareana ena mavanarana ema Viya énapa ena tavanarana eta pecatu

³¹ Tacahe, ema Jesús máichavacapa ena tisuapanaripahi. Máichavacapa:

—Te ímíyanava ecaratacava eta esuapirahi eta nímíturapiana, éti yátupiquenehe nímítu-rehehi. ³² Tásiha, ímatinapa eta yátupiqueneana táuriqueneana. Vaipa vanaracahémahi éti —máichavacapa.

³³ Nararíhihisera ena ticanarajiricanahi éma. Náichapa:

—Víti mámariequeneháveni ema viáchucaini Abraham. Tájina vímatiyahini eta vítare-sirahi nacavanarahivihini. ¿Tájaha tacayema eta picahehi vaipa vanaracahavimahi? —nacahepa.

³⁴ Ema Jesús máichavarepa:

—Nutupiruva numetacahe: Namutu nácani tíchanahi eta pecatu, tavayuaruanahi éna. Nacutíhi ena vanaracana taicha tétavicava eta tavayuasiravacahi. ³⁵⁻³⁶ Ímijachavaipahi machichahehi ema Viya. Váhisera tacahehini, taicha tavayuaruhehi eta pecatu. Nútisera nuti Machicha ema Viya nuratahahi nucuchucuhahe. Vaipa vanaracahémahi. Vaipa tivayucachémahi eta pecatu. Jéhesare, yátupina eta machichaheraya, máichecuaraquireyare éta. ³⁷ Néchahivare nútí eta mámariequenehérahí ema viáchucaini Abraham. Epanerechachuchasera ecapacanu, taicha ecaticahahi eta nímíturapianahi. ³⁸ Núti néchajisihahi eta máimechaqueneánuanahi ema Tata. Étisera étachucha íchahi eta mavanairipianarichuhi ema ticachichahe —macahepa.

³⁹ Éna najicapapa:

—Víti machichaequeneánaichaha ema viáchucaini Abraham —nacahepa.

Ema Jesús máichavarepa:

—Te yátupinahini machichaequenehénahini ema Abraham, ecutihini éma eta yátupirahi eta macamataneasirahi ema Viya. ⁴⁰ Esapíhahi éti, epanerechachucha ecapacanu. Ema Abraham, vahi tácahehini eta mapanereruhi éma. Núti numetacahehi eta yátupiqueneana mapanereruana ema Viya. Váhisera esuapanuimahisami. ⁴¹ Éti ícharichucha eta máichaqueneasahi ema ticachichahe —máichavacapa.

Ema najicapavarepa:

—Víti vahi apáchichahávina. Émanaichu ema ticachichahavi, ema Viya —nacahepa.

⁴² Ema Jesús majicapavarepa:

—Te yátupinahini machichahenahini ema Viya, etupiruvaipahini émuncanu. Taicha nútí étaquenehi násiha me Viya. Vahi nútijiriruvainahini eta nítésirahi puiti. Nuvanecasivahi mayehe. ⁴³ ¿Tájaha tacayema vahi árataha ecaicutiara eta nímíturapiana? Étaserapuca eta emavarairahi esama. ⁴⁴ Nútisera nímicaecherachinaheyare ema ticachichahe. Émara ema Váinaraji. Ema téchahehi, taicha evarahahi íchayare eta máichaqueneana éma. Taicha éma, ticapahi eta máitaresirahi te tépanavainapa. Váhiquene mávarahahini máehichahini eta yátupiqueneana. Étachucha máurica tivayuarereca. Tépiyahirahipaipa. Máuríhayapara eta máimahi. Éma, náiyahi ena tépiyahirahiana. ⁴⁵ Eta echichairahi ema maca tépiyahirahi,

váhiquenehíni esuapa eta juca nímíturapiana yátupiqueneana. ⁴⁶Éti, ímijachanupuca jararíhi eta néjcapiravahi. Nutupiruvahinenisera eta numetasirahehi eta yátupiqueneana. ¿Tájaha tacayema vahi esuapanu? ⁴⁷Taicha nácani mayeaneanahi ema Viya, náuricayarehi nasamararaca eta máechajiriruvana ema Viya. Étisera vahi machichahénahini ema Viya. Eta tacahe, vahi iúricahini esamararacahini eta máechajiriruvana numetaruheanahi — máich avacapa.

Te májinaichahahi ema Abraham, manasiqueneripahi ema Cristo

⁴⁸Tacahe, ena ticatianacananahi náichavarepa:

—Piti achane picahequetatajichucha. Yátupiquenehi mávaháruvahi ema Váinaraji. Táitusiava, máurishivahi máicha —nacahepa.

⁴⁹Ema Jesús majicapavarepa:

—Vahi máurishinuínahini. Eta juca nucaemataneasirahi ema Tata, nuvarairahi ecunachayare éma. Étisera épurunuichucha. ⁵⁰Núti vahi nucunachavaimahi. Matiarhisera ema ticunachanuhi. Éma téchahavahi, te nútupuca nétupicavahi eyehe, téhesera étihipuca. ⁵¹Nutupiruva numetacahe: Nácani tisuapanayare eta numetarapiana, máepenacacayanare éna —máichavacapa.

⁵²Najicapavarepa ena ticatianacananahi:

—Jéhevare puiti, vímaticavipa eta pimáurishivaquenehi. Apanasicáji ena profetana tépenanahi, émapa ema Abraham. Tásiha puiti, picahechajiriruvavare eta nácani tisuapanayare eta pimetarapiana máepenacacayanarehi. ⁵³Pivarahapapuca picachuricayare ema viáchucaini Abraham, apanasica ema tépenahi, énapa ena profetanaini. ¿Nájahavisica piti pivayuyucavapa? —nacahepa.

⁵⁴Ema Jesús majicapavarepa:

—Tájina nucunachacarémahí, te nútijiricavaríchuchapuca nucunachavahi. Mararihsera ema Tata ticunachanuhi, ema ímijachaquenehi ema esasiña éti. ⁵⁵Éti ímijachavahi ímati éma. Váhinéni ímatihini. Jéhevare núti nímatihí éma. Téhesera numetacahéhini eta numaimatirahi, népiyahirahiripapucaini nácutiherípahíni éti. Étasera yátupiquenehi eta nímatirahi éma, nusuapahivare eta mavanairipiana. ⁵⁶Ema víyarahaini Abraham ema viáchucaini, tétavicavahi eta máurisamurevahi eta máimatiranuhí núti —máichavacapa.

⁵⁷Tacahe, ena ticatianacananahi náichapa:

—¡Vuíchaha pácayehé cincuenta áñoinal! ¡Picaemuñavapa pímati ema víyarahaini Abraham!

⁵⁸Ema Jesús majicapavare:

—Nutupiruva numetacahe: Májinaichahahi ema Abraham, nunasiqueneripahi núti — máichavacapa.

⁵⁹Tacahe, tiápajucavapa eta nasemanevahi. Navehapa eta márijahiana, nayucayarepaini éma. Tiúchucasera éma eta te Templo. Tiyanapa tiyumurucavapa.

9

Ema Jesús macanaraca ema achane máimiuchurehi eta mapuchuquiva

¹Tacahe, eta mapaisirahi ema Jesús te tajuhe eta avasare, máetupiacapa ema achane máimiuchurehi eta mapuchuquivahi. ²Eta véhisirapahi ema Jesús víti máimitureana, víyase-recapa éma:

—Tata maestro, ¿tájahapuca tiviuchahi ema maca eta mapuchuquivahi te tiúchucainapa?

¿Énapuca tiviuchanahi ena ticachichana, téhesera mapecaturaichuhipuca éma? —vicahepa.

³Tacahe, tijicapahavipa:

—Váhinéni étaina taviuchahini eta mapecatura éma. Énaripa ena ticachichana, váhivare énaparacaina. Matuparahaichuhi me Viya, mavarairahi nímerecayarehi puiti eta máitupajjiasiravahi ema Tata. ⁴Núti apanava nucamapurayare eta sache níchirayare eta máematanerepiana ema Tata eta mavanésiranuhi taicha járajapavare eta yati nájina ticaematanena. ⁵Ticamapuravacarerichaha eta nutiarahirahi te juca apaquehe nuti namicahuhi ena achaneana —macahepa.

⁶Tásiha, tiátutuicapa te apaquehe ema Jesús. Máepiyacapa eta tiúrajichicha te matuture. Mayajihauquichapa ema púchuqui. ⁷Tásiha, máichapa:

—Piyana picasipauquipana tayehe eta noque ticajjare Siloé —máichapa. (Te véchajiriruva, eta Siloé ticajjare Vanairuca.)

Tacahe, ema púchuqui tiyanapa ticasipauquipanahi. Tíjahúchava tímairirica. Tichavapa te mapena. ⁸Náraminehi ichape ena machacayapenanahi énapa ena tímatianahi eta mapuchuquívainihi. Tásiha, nacahepa:

—Vímatihí ema émana limosnerohí púchuquihí. Émasera ema maca achane tímairiricahí. ¿Apanapuca éma? —nacahepa.

⁹ Najicapapa ena tímationahi yátupi:

—Émara ema maca.

Éma apana, macahevare:

—Vahí émaina. Mavasichucha.

Émasera ema achane púchuquiníhi máichavacapa:

—Nútira nútí púchuquinuíhi —macahepa.

¹⁰ Tásiha, nayaserecapa ema achane:

—¿Tájaha pícharacavahi eta pímaírisirahí? —náichapa.

¹¹ Éma majicapapa:

—Éma maena achane ticajare Jesús máepiyacahi eta tiúrajichicha. Tásiha, tiyajihauquichanupa. Tivanecanupa nucasipauquipana te noque Siloé. Te nuyanapa nucasipauquipanahi, nímaíricarinehi —máichavacapa.

¹² Éna náichapa:

—¿Táviha ema mácara achane?

Éma majicapapa:

—Jéhepuca, vahi nécha.

Ena tuparairucana navaraha náecha eta manarasirahi ema púchuquiníhi

¹³⁻¹⁴ Tacahe, nasamairicapapa ena fariséoana eta manarasirahi ema púchuquiníhi. Tásiha, nacavanairípipa náepana ema púchuquiníhi, taicha natanucahi éna eta tivíuchayarehi ema Jesús. Ichaperinehi eta nacatíanasirahí éma táichavenehi eta máipuresirahí te jena sache sávarumuhuquenehi. ¹⁵ Te títecapapa ema púchuquiníhi, nacatupíhapa éma te namirahu. Nayaserecapa tájahahípuca táicharacavahi eta máimairirisirahí. Éma, máichavacapa:

—Éma achane típuchanuhi tiyajihauquichanuhi eta máture. Tásiha, nucasipauquipa. Nímaíricapapa —macahepa.

¹⁶ Nararíhi ena nacahepa:

—¡Éma mácara achane vahi machaneraina ema Viya, taicha vahi mapicauchahini eta sávarumuhuana tacapícahuquene!

Éna apamuriana, ánvare nacahe:

—Váiparínehisera máituruequenehaimahi maicha eta tíaramicareana te yátupinahini macapecaturarahíhíni —nacahepa.

Tacahe, apanapanenejiana eta napanereruana.

¹⁷ Tásiha, nápechavare nayasereca ema achane:

—¿Tájaha pícaýema píti mayehe ema achane ticaimairirivahí?

Éma, máichavacapa:

—Núti németeaca émahí ema profeta.

¹⁸ Énasera ena tuparairucana váhiquene nasuapahini eta émaírahí ema púchuquini. Tásiha, náimichuhapa ena ticachichanahi. ¹⁹ Nayaserecapa:

—Vívaraha víyaserecahe: ¿Yátupíhi eta máimiuchurehi eta mapuchiquiva ema píchicha? ¿Tájaha táichararacavahi eta máimairirisirahí púiti?

²⁰ Éna ticachichanahi najicapapa:

—Yátupi ema maca ema víchicha. Máimiuchurehivare eta mapuchiquivainíhi. ²¹ Váhísera véchahini tájahapuca táicharacavahi eta máimairirisirahí. Váhivare vecha nájahapuca ticaimairiricahí. Émaina eyasereca. Ajairarípa éma. Émapa téchinavahi eta mametasiraheyare —náichapa.

²² Tacahehi eta najicapirahí taicha típicanahi éna nacaicuñahini, nacaquíjivaréni te náurujsirarevana taicha ena ticatíananahí ema Jesús nacuchucapa eta vantu, nacavanarípirapa nacuíja nasuapa ema Jesús émaírahí ema Cristo. ²³ Éta tacahehi eta náichirahí: “Émaina eyasereca. Émapa téchinavahí”.

²⁴ Tacahe, ena tuparairucana nápechavare náicha ema achane púchuquini. Ánípa nacahepa:

—Pátupírúva pímetacahaví te májarepuca ema Viya eta pínasirahí. Vítísera vímatíhi ema maena achane tíspecaturarahí —nacahepa.

²⁵ Éma majicapavarepa:

—Jéhepuca, vahi necha nútí te tíspecaturarahíhipuca éma. Tacarichu néchahí eta nupuchiquivainíhi nutí, púitísera nímaíricarípa máicha —macahepa.

²⁶ Nápechavare nayasereca éna:

—¿Tájaha máicharacavahí eta macaimairirisiravahí?

²⁷ Majicapavarepa éma:

—Cápachí numetacaherípa. Vuíchahacaru esuapanu. ¿Evarahíhipucasera éhicayare éma éti apanavare? —máichavacapa.

²⁸ Tacahe, nacajachapa éma:

—¡Pítisera péhicaipahi éma! Vítisera véhicahi ema víyahaini Moisés. ²⁹ Taicha véchahi eta máechajisihahi ema Viya ema Moisés. Émasera ema máenatajaji, vahi vecha távihapuca másiha —nacahepa.

³⁰ Ema achane majicapavarepa:

—¡Tájina échaquenéna éti páureanasami! Vahi ímatiequeneha távihapuca másihahi ema ticaimairicanuhi. ³¹ Váhipuca echa váiparinehi tisamacaremahi mayehe ema Viya mácani achane ticapacaturarahi. Nacarichu tisupacareanahi nácani títauchanahi eta mavanairipianahi ema Viya. ³² Váhivare visamairirica nácani nacaimairiricahini ema mácani máimiuchurehi eta napuchuquiva. ³³ Núti németeaca te tacuijahini eta vanairucairahi me Viya ema maena achane, váhiva macuratahahini maicha eta tíamicareana máichaque-neanahi —máichavacapa.

³⁴ Tacahe, tise-manapa éna eta máichiravacahi. Nacahepa:

—¡Píti pétaviurequenehi eta picapacaturavahi! ¡Éta tiviuahivi! ¡Puiti pisapihapa pivarahaya pímitucahavi víti! —náichapa.

Tásiha, nacuchucapa éma.

Ena tépiyacavanahi púchuquiana taicha eta namasuapajiravahi

³⁵ Ema Jesús masamairiricapa eta náqujisirahi ema máipuchaquenehi. Tásiha, te macainunavarepa, máichapa:

—¿Pisuapapuca píti ema Machicha ema Viya?

³⁶ Ema achane majicapapa:

—Pimetacanupaini, tata. ¿Nájahapuca ema Machicha ema Viya, apaesa nusuapahini? —macahepa.

³⁷ Ema Jesús majicapapa:

—Nútiripara nuti pímahaquenehi, nuti péchajirunuhi.

³⁸ Tacahe, ema achane tépyucapa te mamirahu ema Jesús. Tásiha, máichapa:

—Nusuapavi, Tata —macahepa.

³⁹ Ema Jesús máichavarepa:

—Núti tímitecanuhi te juca apaquehe, nímimatichayare ena máimatirahanahi eta yátupi-queneana máechajiririvanahi ema Viya, apaesa náimatiequeneha. Eta juca tímicutijiricavahi nucaimairiricayarehi nácani púchuquianahi tayehe eta máechajiririvanahi ema Viya. Nácanisera tímijachavanahi téchemarahiana, nímahaya te najacapapuca eta nímiturapi, tisapanayarepuca eta nucaimairirisiravacayare. Téhesera vahi nacuisapava, tíapajupananavainapa eta napuchuquivayare. Étapa naviurevayarehi —macahepa.

⁴⁰ Tacahe, ena fariséoana natirihiqueneanahi te machacaya, eta nasamirahi, nayase-recapa:

—Píti pímiyahaviripapuca púchuquihavihi. ¡Váhira púchuquihavinahini! —nacahepa.

⁴¹ Ema Jesús majicapavacapa:

—¡Éti épiyacavahi púchuquihe! Taicha vahi evaraha esuapanuhini. Tásiha, tanasipa eta eviurevahi táichavenehi eta epecaturana. Te yátupinahipucaini esuapanuhini, tacuijahini taviuchahehini —máichavacapa.

10

Ena Jesús tímicaecherachava eta majaneasirayare ena téhicanahi éma

¹⁻² Tacahe, ema Jesús máechajisihahi eta tajaneacasiva eta uvesa, máimicutichirahi eta macatiuchirahi ena téhicanahi éma. Ánipa macahe:

—Nutupiruva numetacahe: Mácani tijanearecahi eta uvesa, tétavicavahi eta máechapajiririsyarehi. Te yátiana, máimisipayarehi te tapena, tásiha, máeratacapa eta tapajacura eta majaneasirahi, apaesa tájina tacuquichiravaina. Taicha nararhi ena tíamerahiana, ticaetemarahanavare. Navarahahi ticayumuruquianayarehi eta nasiapirayarehi te tapena eta uvesa, námechayarehi. ³ Émasera ema pástulero, te yáticarahi mavejiéquenehahi eta tapaja, máichuhahi eta tájareana eta uvesana. Eta máichuirahi, tíuchuchujicanapaipa táehicapapa, taicha táimatiahuchahi ema pástulero. ⁴ Éma, máinapumirauchapaipa eta mayeheana uvesa. Táehimurihapaipa tamutu eta uvesana, taicha táimatihahi eta mahu. ⁵ Váiparinehiséra táehicaimahi mácani apanaquene achane. Tavarahayarehi tijunaracana taicha vahi táimatiahuchahini ema apanaquene —máichapa ema Jesús.

⁶ Ema Jesús máimicutichinahi eta juca. Váhiserá nácaicutiarahini éna eta máimitusiravacahi.

Ena Jesús ema yátupiquenehi tijaneacahavivi taicha máuriquenehi éma

⁷ Ema Jesús mápechavaca máimitucavaca. Ánipa macahe:

—Nutupiruva numetacahe: Núti nímicutijiricavahi tapajacurahi eta tapena eta uvesa te tanarasirarehi éta. ⁸ Tinapumirauchanuanahi ena tépiyacavana máestroana, váhisera máimitureanainahini ema Viya. Tiámerahianachucha éna, ticaetemarahiana. Váhisera táehicaimahi eta uvesana taicha vahi táimatiahuchahini éna. ⁹ Núti nujaneacavacahi ena nuchanerana, nucutíhi eta tapena eta uvesa. Nácani ticasíñavana eta nuyehe, nucatiuchayarehi núti. Tájina náichavaimahi, tájinavare náechuriacaimahi. Néchavacahi núti.

¹⁰ Ema tiámerahi, tímitecachi éma tiámerecayare, ticaparecayare. Macaejanerepaicayareva. Nútisera tímitecanuhi níjaracayare eta náitaresiraya. Máitavacayare eta náuricacarevayare nícha. ¹¹ Énerichuvare núti yátupiquenehi eta nujaneasiravacahi ena nuchanerana, tacutíhi eta majaneasiravacahi mácani achane eta mayeheana uvesa. Núti níjarareca eta nítaresira eta nucatiuchiravacahi. ¹² Mácanisera tuparairucachucha, vahi macatiuchaimahi eta uvesa. Te máimahapa eta tinicarahi sárare, tijunayarehi. Vahi tipatsicavaimahi macatiucha eta uvesa, taicha vahi mayehenahini. Tacahe, eta tinicarahi ticamapuravainapa tacapacayare eta uvesa. Eta tacaitiruana, téjanerepaicanapa. ¹³ Ema maca achane tijunaya taicha vahi téñamavaimahi tayehe eta uvesa. Éma tímijachavahi majaneacavaca, étachuchasera macunehi eta mavacha.

¹⁴⁻¹⁵ Núti yátupiquenénu pastulérunu taicha tiúrihi eta nujaneasiravaca ena nuchanerana. Tímatinuhivare ema Tata, tacutíhi eta nímatirahi núti éma. Énerichuvare tacahehi eta nímatiravacahi ena nuchanerana. Éna tímatinuanahivare. Eta néñamairavacahi, núti nímiararecavahi eta nítaresira náichavenehi éna. ¹⁶ Nararihivare ena apamuriana nuchanerana. Váhisera ánina nacavasa. Nucurujicavacayaresera, népanayareva. Tisuapanuanayareva namutu. Étanayaréichupa eta náumuriva. Nucarinenapa núti néchavaca.

¹⁷ Ema Tata, yátupíhi eta máemunasiranu taicha nímiararecachi eta nítaresira náichavenehi ena nuchanerana. Nuchavayaresera nítareca. ¹⁸ Nájinanéni napamicanuhini eta nísapiravaya ticapacanuana. Níjararuvahi núti eta nacapasiranuya. Taicha nutuparahaichuhi me Tata núti néchinavayarehi. Níjararuvayare. Tásiha, nuchavayareva nítareca — máichavacapa.

¹⁹ Eta nasamirahi ena achaneana eta juca máechajiririvanahi ema Jesús, típutsimuriavacavarepa. ²⁰ Natarihihi ena ticatianacana. Nacahepa:

—¿Tájaha tacayema esupa ema mara? Máurishi éma, mávahárupuca ema Váinaraji — nacahepa.

²¹ Énaseera ena apamuriana, ánivare nacahe:

—Te yátupinahini mávaháruinahini ema Váinaraji, vahi macuratahahini macaimairirica ema púchuqui. Nájinavare mácuti eta máechajisira —nacahepa.

Ena tuparairucana vahi návarahahini najacapa ema Jesús

²² Te jena sácheanahi diciembrequenehi eta ticasarahimuhuana te Jerusalén, ena achaneana napiestachahi eta año táepaniravahi náetupirica eta Templo. ²³ Ema Jesús matarihihi te tajube eta te Templo te tayehe eta alar máepiyaruhi ema Reyni Salomón. ²⁴ Te náimahapa ena ticatianacana, nachayacapa ema Jesús. Tásiha, náichapa:

—¿Tájaha tacayema pímpianererechahavihi? Pátupiruvapa pimetacahavi te yátupivihipuca pítiqunehi Cristo —náichapa.

²⁵ Ema Jesús majicapavacapa:

—Cápachi numetacaheripahi. Vuíchahacaru esuapanu. Eta juca níchaqueneanahi ímahaqueneanahi tásihaqueneanahi me Tata, étaripara tímereuchanuhi. ²⁶ Étisera váhiquene esuapanu. Taicha vahi étinahini nuyehenenahini uvesa. ²⁷ Eta nuyehena uvesa tímatiahuchanuanahi éta. Núti apanavare nímativacahivare. Eta tacahe, téhicanuanahi. ²⁸ Níjaracavacayaresera núti eta náitaresirayare máichecuaraquireyare. Váhiquene náimahahini eta náicuñayaréni. Nájinavare tiverejicanuanaimahi ena nujanearuanahi. ²⁹ Taicha máijjararunuanahi ema Tata. Éma, nájina ticachuriacainahini. Nájinavare tiratahaimahi tiverejicaimahi ena majanearuanahi. ³⁰ Taicha núti émapa ema Tata vicuticacahi eta vítapujijiasiravavacahi —máichavacapa.

³¹ Tacahe, ena ticatianacana natanucapa eta márjahiana. Navarahapa natupisicayarehini ema Jesús. ³² Máichavacapasera éna:

—Íchapemurihi eta níchirahi eta táuriqueneana ímahaqueneanahi, máijjararuanahi ema Tata. ¿Étaserapuca tivichuanuhi eta evarairahi etupisicanu te márjahahi?

³³ Tacahe, najicapavarepa:

—Vahi étaparacaina eta píchirapuca jácani táuriqueneanahi. Eta tivichavihi pímpijachiravahi machichavi ema Viya. Pítrichuhi vicutiquenehi achane. ¡Pítisera pímpijachavaihipahi Vívavi! —nacahepa.

³⁴ Ema Jesús majicapavarepa:

—Eta ajureca te Salmo, vahi ímatiequenehahini eta táechajisiaherahi eta macayemaquenehi ema Viya: “Víahehi nícha eti nunerejiruheanahi”.³⁵ Véchahi eta tacayemaquenehi eta ajureca, vahi tépiyahirahimahi. Taicha tamutu eta táechajiriruvana eta Sagrada Escritura táechajisihairahi eta juca máechajiriruvanahi ema Viya. Nácani nacatuparahahi me Viya, ema tímijarechavacahi “Víanahi”.³⁶ Nútiripa puiti, nuvetijipa nímijarechacare “Viya” taicha émarichu ema Viya tñerejicanuhi, tivanecanuhi eta núcupaisiraya te juca apaquehe.³⁷⁻³⁸ Núti nítaucharahi eta mavanairípiana ema Tata tivanecanuhi. Tásiha, tatuparacahe esuapanuvaneyarehi. Tayanapane vahi tisuapacarehi eta nimiturapiana eta eyehe, étapaseraíni esuapahini eta tíamicareana níchaqueneanahi. Étara tímereuchanuhi eta mávahásiranuhi ema Tata, návahásirahivare núti apanava éma —máichavacapa.

³⁹ Tacahe, tíapechavanavarepa navaraha nacaratacayarehini ema Jesús, napresuchayarehini. Émasera tíuchucavanepa.

⁴⁰ Tásiha, tiyanavarepa ema Jesús te tinapaica te apachara eta cajacure Jordán. Manasiapanapa eta te avasarechicha Betábara te máicachasirisinehini ema Juan.⁴¹ Camuriana ena achaneana tiyanaracananahi eta mayehe. Tásiha, nacahepa éna:

—Ema víyarahaini Juan, tayanapanehi tájina máimerechahini eta tíamicareana, yátupihisera eta profetairahi éma, taicha tamutupa eta mametarapiana mayehe ema maca Jesús, vímaharipa puiti eta yátupiqueneanahi —nacahepa.

⁴² Tacahe, ánaqui camurianahi ena achaneana tisuapanahi ema Jesús, téhicanahivare.

11

Eta máepenira ema Lázaro

¹ Matiaríhi ema achane ticaijare Lázaro. Éma, máemunacasarehi ema Jesús. Ticavasahi tayehe eta avasarechicha ticaijare Betania, návasahivare ena maparapenaveana, esu María ésupa esu Marta. Te jena sácheana, ticajumahi muraca ema achane.² (Esu suca María, ésuhi esu tisipapevachahi ema Jesús tayehe eta táijiyequenehi perfumeama. Suájapevachahivare te suchutimaca.)³ Tacahe, ena náni apinana esenana ticapapecacana náimivanerecapa, nametapanayarehi ema Jesús eta macajumairáhi muraca ema Lázaro.⁴ Te máechapa ema Jesús, macahepa:

—Eta juca jumare, vahi tíaimahi ema Lázaro. Matuparahaichusera me Viya, mavarairahi númerca eta máitupajijiasirava éma, nímeresirayareva eta nútupajijiasiravahi nuti Machicha, apaesa nacunachahavi ena achaneana —macahepa.

⁵ Jéhésare, ema Jesús yátupíhi eta máemunasirahí ema Lázaro, énapa ena esenana maparapenaveana.⁶ Váhísera mayanavanehini máimahamanahíni ema máemunacasare. Manasirichaha apinahi sache.⁷ Tásiha, te apanapa sache, ema Jesús máichahavipa víti máimitureana: —Viyana víchava te Judea.

⁸ Víti víjicapapa:

—Tata maestro, cáperichaha ena ticatianacavianahi navarahahi ticapacaviana. Tásiha, puiti pivarahachaha piyanayare ánaqui nayehe —víchapa.

⁹ Ema Jesús máechajisihahi eta mavanecasivahi. Máichahavipa:

—Vahi táeñamavácarehini. Yátupi eta sache ticayehe doce hora. Te vípaica te sáchemuhu, vahi vícáyutetuímahi taicha vímairiricahi tayehe eta tijarahi.¹⁰ Nácánisera típaicanahi te yátimuhu, ticayuteterejianayarehi taicha vahi náimairiricahini. Ema Tata tijaneacanuhi núti taicha nítauchahi tamutu eta mavarahaqueneana. Vahi máisapahini jácani náichanuhini; tapaeñumava máimaha tiuri —macahepa.

¹¹ Tacahe, te táequenepa, macahevarepa:

—Ema vémunacasare Lázaro máenahi tímacahi. Nuyanayaresera nucajamipanayare.

¹² Víti víchapa:

—Tata, te tímachípuca éma, étapa táicutiarahi eta mativareraya —víchapa ema.

¹³⁻¹⁴ Víti vímijachaíchucha yátupíhi tímaca. Tásiha, ema Jesús matupirupa timetacahivíhi: —Tépenaipa ema Lázaro.¹⁵ Núrisamuresera eta májananuirahi eta ánaqui. Tíuripánaya eta eyehe taicha ímahaya eta níchaquenyare apaesa esuapanu. Puiti viyanaya vímahapanayare —macahepa.

¹⁶ Tacahe, ema víchamuri Tomás máichahavipa víti machamuriana:

—Viyana víti apanavare. Te nacapacapuca éma, nacapacahavirineva víti apanava —máichahavipa ema Tomás. (Tatiaríhivare eta máchucarapi Chame.)

Ema Jesús, ema téchahi eta macaechepusirayare ena náepenaqueneana, máimichavayare macaitareca

¹⁷⁻¹⁸ Tiuri, viyanapa vicaijuhe eta avasarechicha Betania. (Eta Betania tachacayahi eta Jerusalén, apina kilómetro y medio eta tayerehivahi.) Tásiha, te viánehipaipa, tímecatavianapa cuátroripa sache eta náecarairahi ema Lázaroini. ¹⁹ Camurianahichahasera ena achaneana te napena ena maparapenaveana, esu Marta ésupa esu María. Nacamitisiripanahi apaesa vahi nacuyaharacavaicha ena apinana. ²⁰ Tacahe, te suéchapa esu Marta eta máitecapirayarehi ema Jesús, tiyanapa suácapahi. Ésusera esu María sunasirichuhi te tajuhe eta peti. ²¹ Te suéchajicapa esu Marta ema Jesús, sumetacapa eta máepenirahi ema suparapeini. Tásiha, suíchapa:

—Tátachicha, te pitirihinahini eta ani, vahi ñicuepenahini eñi nuparapeini. ²² Váhisera néñamava. Nucasiñavihi eta piyehe. Pímahainepa píti eta pícharacaya eta piyaseasirayare eñi Viya —suíchapa.

²³ Ema Jesús majicapapa:

—Tiuri eta péñamirahi ema piparape. Váhisera picupica. Tichavayare títareca te pimirahu —máichapa.

²⁴ Esu Marta suíchavarepa:

—Yátupi, Tata, néchahi eta ñichavirayare títareca te táitecapapa eta sácheyare náechepusiraya ena náepenaqueneana —sucahepa.

²⁵ Ema Jesús máichavarepa:

—Jéhevare núti, nucaitarerahi nácani nucaecheppureanaya. Táitusiava numetacavi: Nácani tisuapanuanayare, tayanapanepuca náepena, nucaitarecayaresera núti. ²⁶ Ene ecaheyare éti éhicuanahini, tayanapanepuca épenayare, nútisera nucaitarecaheyare. Tásiha, tájinapa tímiapchaimahi épenahini. ¿Pisuapanupuca eta níchiravihi? —máichapa.

²⁷ Ésu sujicapapa:

—Nusuapavi, Tata. Pítira yátupiquenévihi Cristo, Ñichichavi eñi Viya. Pítiripa piti vicuchapauenévihini píteruyarehi te juca apaquehe —suíchapa.

Ema Jesús tíyaha te tachacaya eta máecari ema Lázaro

²⁸ Te títipiricapa eta suéchajisirahi esu Marta mayehe ema Jesús, tiyanapa suíchuhapanahi esu suparape María. Sujajicapa, ani tacahehi eta suíchirahi:

—Eñi Maestro ñirarihi eta ani. Ñicavanairipi piyanayaréji —suíchapa.

²⁹ Te susamapa esu María eta matiarihirahi ema Jesús, téchepurucavanepa. Tiyanavarepa suácapahi. ³⁰ Taicha ema Jesús vuúchaha máitecapahini te napena. Manasirichuhi eta te suácapinehi esu Marta. ³¹ Eta náimairahi ena suchimarana eta suéchepusirahi súchusirahi esu María, tiyananapa náehiequenehahi. Náimijachahi éna tiyanayarehi ésu te máecari ema suparapeini, tíyahapanayarehi.

³² Tacahe, te suítecapauchapa ema Jesús, esu María sutupirupa tépuyucahi te máivapechacaya. Tásiha, suíchapa:

—Tátachicha, te pitirihinahini eta ani vahi ñicuepenahini eñi nuparapeini —suíchapa.

³³⁻³⁵ Tásiha, tíyahapa esu María, énapa ena téhicapanahi ésu. Eta máimairahi ema Jesús eta náiyairahi, ticatísamurevavarepa éma apanavare. Tíyahavarepa. Tásiha, mayaserecapa:

—¿Táviha écarihahi? —máichapa.

Ena najicapapa:

—Yare, Tata, pímaha.

³⁶ Tacahe, ena natirihiqueneana eta náimairahi eta máiyairahi ema Jesús, téchajicacanapa:

—Piáha. Tíyahavaréa éma apanava. Tétavicavahipucáji eta máemunasirahi —nacahepa.

³⁷ Ena apamuriana, ánivare nacahe:

—Ema maca ticaimairiricahi ema púchuqui. ¿Tájahapuca vahi macanaracahini ema Lázaroinisami, apaesa vahi macuepenahini? —nacahepa.

Eta máechepusira ema Lázaro te máecari

³⁸ Tacahe, ichape eta macatísamurevairahi ema Jesús. Mapauchapa eta ecari nasecajueruhi te mari. Tatirihivare eta márime tajihajacahi eta tapajacura eta ecari. ³⁹ Tacahe, ema Jesús mavanecavacapa:

—Ecaerajica eta jara tachujihini eta máecari.

Ésusera esu Marta suíchapa:

—Tata, németeaca tijeheripa jácani taicha cuátrorípahi sache eta ñépenirahi —sucahepa.

⁴⁰ Ema Jesús máichavarepa:

—Cápachi numetacavipa, te pisuapanu yátupina, pímahayare eta macunachacarevahi ema Viya taicha nímercaya eta tamutuirahi marataha —máichapa.

⁴¹ Tacahe, nacaerajicapa eta márime. Tásiha, ema Jesús máesenicapa te anuma, tiyujaracatumapa:

—Tata, nuhasulupayachavi eta pisamiranuhi. ⁴² Váhiquene péñauchanu eta jácani nuysearuviana. Puiti nuysaeacavi eta pítupajjiásirava, apaesa náimaha ena nani achaneana natiarihiqueneanahi, apaesa nacunachavi. Náechavare eta pítirahi pivanecanu —macahepa éma.

⁴³ Te títapiricapa eta mayujarasirahi, máimararacapa eta ecari. Tipiaracapa muraca, ánipa macahe:

—Lázaro, péchepuca eta te jara piávihihi. Yare, piúchuca —máichapa.

⁴⁴ Tacahe, ema máepenaquenénihí tiúchucapa. Mámapaichuhi eta máyuruhanahi étapa eta máepacamirahi. Tásiha, ema Jesús mavanecavacapa naveruruaca eta máyuruhanahi, apaesa tiyanayarepa te peti.

Ena tuparairucana napanerechapa nacaratacyarehi ema Jesús

(Mt 26.1-5; Mr 14.1-2; Lc 22.1-2)

⁴⁵ Tacahe, ena suchimaranahi esu María, eta náimairahi eta juca máichaquenehi ema Jesús, camurianarinehi ena tisuapanahi éma. ⁴⁶ Natiarihisera ena apamuriana tiyananapa nayehe ena fariséoana ticatianacahahi ema Jesús. Eta namaurisirahi eta juca, tiyanana nametapanavaca ena tuparairucana. ⁴⁷ Tacahe, ena tuparairucana náimichuhapa namutu ena juéseana, ticurujicacanapa. Tásiha, nacahepa:

—¿Tájaha vícharacavayare, tátanaveana? Ema maena achane Jesús, tétavicavahi eta máitupajjiásiravahi máichahi eta tíaramicareana. ⁴⁸ Vahi táuricahini vísapahini máimiyana-vahini máitarecahíni, machu námaturiana náehica ena achaneana, masapihainapapuca nasuapayare éma. Machu ena aquenucana romanoana náimijachinapapuca tatiarihiyare eta tíñepiyare. Tisemanainapapuca. Nárajapainapapuca eta ani. Náquipaisinahavinapapuca eta viávasa. Nasapihainapapuca tiverejicahavianayare eta viávacureanahi —nacahepa.

⁴⁹ Matiaríhihi ena achane ticaijarehi Caifás. Émahi ena ichapequenehi tiyujaracarahi te jena áñohi. Tacahe, máichavacapa éna:

—Éti vahi ímatiequeneha eta vícharacavayare. ⁵⁰ Németeaca núti tíuripana máepena ema émanaina achane mavachareca eta náitaresiraina namutu ena apamuriana achaneana —máichavacapa.

⁵¹ Eta juca máechajiruvahi ema Caifás, váhinéni étainahini táichahini eta máechema-raivahíni éma. Étahi eta émairahi ena ichapequenehi tiyujaracarahi te jena áñohi. Manacasamureruichuhi ema Viya eta máechajisihahi eta máepenirayare ema Jesús náichavene ena israelítana. ⁵² Étasera juca máepenirayarehi ema Jesús, mavacharecainapa eta naviurevahi namutu nácani machaneranayarehi ema Viya te apanapanenequeneana avasareana. Vahi tácarichuhini eta naviurevana ena israelítana. Taicha te táequenénapa, mavarahahi macurujimurihayarehi, étamurianayarehi namutu éna.

⁵³ Tacahe, tacutipa eta napanererihi ena tuparairucana eta nacapasirayare ema Jesús. ⁵⁴ Eta tacahe, ema Jesús vaipa máimerecavahini eta te Jerusalén. Majunijicapa eta Judea. Tiyanapa eta te mávapahi apaquehe tachacaya eta avasare ticaijare Efraín. Manasipanapa ánaqui, vítipa víti máimitureana.

⁵⁵ Tacahe, semanayare eta Pascua, vapiestara viti israelítana. Namutu ena achaneana tiávihana te apanana avasareana tiyanaracanapa tayehe eta Jerusalén. Tisipahacavanayarehi taicha náimijachahi ani tacahehi tacujiu nacuquichiravaina eta náimeresiravayare me Viya. ⁵⁶ Tacahe, ena achaneana nacunepaipahi te Jerusalén ema Jesús. Eta návihairahi te Templo, téchajiricacanaripa. Ánipa nacahe:

—¿Tájaha ecayema? ¿Títecyarepucáji ema Jesús puiti juca piéstaya? —nacahepa.

⁵⁷ Énaripa ena tuparairucana tivanerecanapa ena ticuneanayare ema Jesús. Te matiarihinapuca, nametapanayarepa ena tuparairucana. Tásiha, éna náimicaratacyarepa.

12

Esu María susipapevacha ema Jesús te perfumeama

(Mt 26.6-13; Mr 14.3-9)

¹ Séisirinehi sache eta piéstayarehi eta Pascua. Tichavavarepa ema Jesús tayehe eta avasarechicha Betania, mávasahi ema Lázaro, ema macaechepurehi te máecari. Tacahe, ena máemunacasareana tíurisamureanarínehi eta náimairahi eta máitecapirahi ema Jesús eta nayehe. ² Ticacherujianapa náenicayarehi. Ema Lázaro macachanehi te mesa eta nanisirahi. Esu Marta téchapajiricavacahí. ³ Tacahe, esu María suámapaipa eta tájiyequene perfumeama te bótechicha. (Te navírare eta juca perfumeama te nasucure ticaijare nardo.) Tétavicavahi eta tasivachavahi. Ticutiamacacahi te botella eta tasiamavahi. Tacahe, suépusapevachapa ema Jesús, suájapevachapa te suchutumaca. Enevanerine táinicajuecha

eta peti eta tájijevahi. ⁴ Matiarihíhi ema vichamuri Júlasí. Ema maca émarichu tjárarecayarehi ema Jesús. Témechajicavapa éma:

⁵ —¿Tájaha tacayema váhivaréyapa tacaijararecasihini eta juca tasivachaquenehi perfumeama? Vivehahini eta camuriquene plata, tásiha, vímicatasihahini ena páureana — macahepa.

⁶ Ema maca Júlasí, vahi étainahini eta majapanuirainahini ena páureana. Étachuchanéni mavarairahi mayumuruca eta plata, taicha ema tíamerahíhi. Títecapa émarichuhivare tiúnarecarahi eta plata. ⁷ Tacahe, ema Jesús máichapa:

—Pésamirica esu suca esena. Suíchachaha ésu eta suvarahaquene taicha nícomunichuhi eta juca tayeheyarehi eta nécarí. ⁸ Ena páureana, tamutuchucha sácheana eta ecachanera-vacayare éna. Te jácani ávarahapapuca ímicatayare, nararíhi ena ticamunuana. Nútisera vahi nánasiquenémahi eta eyehe —macahepa.

Ema Lázaro, navarahavare nacapaca

⁹ Tacahe, camuriana ena tisamairicanahi eta matiaríhirahi ema Jesús te Betania. Tiyananapa náimahapanayarehi. Énerichuvare náimahapanayarehiva ema Lázaro, ema máechepurehi te máecari. ¹⁰ Tacahe, ena tuparairucana napanerechavarepa nacapacayarehi ema Lázaro. ¹¹ Taicha émavenéhi tíchahi eta nasuapirapíhi ema Jesús ena camuriqueneana achaneana. Vaipa nasuapahini eta navanairipiana ena tuparairucana.

Títecapapa ema Jesús te Jerusalén

(Mt 21.1-11; Mr 11.1-11; Lc 19.28-40)

¹² Te apanapa sache, ena nani achaneana táimiyaqueneanahi eta piéstayarehi eta Pascua, nasamairicapa eta máitecapirayarehi ema Jesús tayehe eta avasare. ¹³ Tiúrisamureanarinehi. Eta náurisamurevahi, navehapa eta tajuru eta cáchipaca. Tiyananapa nácapahi éma. Eta napiarasirapahi, ánipa nacahe:

—¡Yare, Tata! ¡Piti yátupiquenévíhi rey viyehe viti israelítana! ¡Asulupaya! ¡Piti vanárucaquenévíhi me Viya! ¡Ichape eta vicunachiravi piti! ¡Viva ema Víaquenu! ¡Viva! — nacahepa.

¹⁴ Ema Jesús ticaperapahi eta burricu eta masiapirahi, taicha ene tacahehi eta táechajiriruvahi eta Sagrada Escritura: ¹⁵ “Eti ecavasanahi te Jerusalén, vaipa ecupica, taicha márajapa ema eyeheyare Rey. Tímaticareyarehi éma, ticaperayare eta burricuchicha. Mámapahi eta iúritaresirayare” tacahehi eta Sagrada Escritura.

¹⁶ Eta juca ajureca eta vimacaicutiaraquenehi viti máimitureana. Tapaenumava te máechepucapa ema Jesús, vicaicutiarahi eta tacayemahi eta Sagrada Escritura, táechajisihairahí éma, étapa eta tamutu eta apamuriana máicharacavanahi.

¹⁷ Tiuri puiti, ena apamuriana achaneana tímararacanáripa ema Jesús eta macaechepusirahi ema Lázaro te máecari, náechajisihapíhi éna eta náimahaquenehi. ¹⁸ Eta tacahe, camuriqueneanahi ena achaneana tiyananahi nácapahi éma, taicha navarahahi náimati ema tíchahi eta tíaramicare. ¹⁹ Tásiha, eta náimairahi ena fariséoana eta camurianairahi ena tiácapanahi, náichacapaca:

—¡Váhichara víturucáimahi taicha tétavicavahi eta nasimutuvahi ena téhicanahi éma!

Ema apavasaqueneana navarahavare náimati ema Jesús

²⁰ Natiaríhivare ena apamuriana achaneana apajuecuruhana tayehe eta Jerusalén. Énerichuhi éna tímitecanahi tiyujarapananahi te jena piéstairahi. ²¹ Tiyananapa napauchahi ema vichamuri Felipe. Ánipa tacahe eta nayaseasirahi:

—Tata, víti apanava vívaraha vímati ema Jesús — nacahepa.

²² Tacahe, ema Felipe tiyanapa mametacáhi ema Andrés. Tásiha, ena apinana tiyananapa nametapanahi ema Jesús. ²³ Tásiha, ema Jesús máichavacapa:

—Jéheva puiti, tiánehípa eta népeniraya nuti Manerejirunuhi ema Viya. Nápechavayaresera nítareca, apaesa nucunachacareyare eyehe. ²⁴ Nutupiruva numetacahe: Te vahi vicuevaca eta evaraquí te apaquehe, vahi téjapacáimahi. Tanasiyareichuhi eta tasimutuva eta evaraquí. Téhesera vévacáhi, tétavicavaya eta táejapasiraya. ²⁵ Nácani téñamavanahi eta náitaresira, tiávamirahuana eta náehisiranu, énajivayare ticamítiequenehavanayare eta náitaresira. Nácani tjáracavanayare eta náehisiranuyare, tájinavare vahi náéñamavahini eta náitaresira te juca apaquehe, tiúchuchanayare éna. Máichecuaraquireyare eta náitaresirayare. ²⁶ Énerichuvare nácani tivarahanayare ticaemataneacanuana, tacamunu tímerecavanayare yátupi eta náehisiranuhi. Tásiha, nútí nucaejacavacayare éna te néjasihayare nútí. Ena nani, tétavicavayare eta macunachirayare ema Tata.

Ema Jesús tímereuchava eta máepeniraya

²⁷ Ema Jesús táimipanererecáhi eta máepenirayare. Ánipa macahehi eta máechajiriruvahi:

—Tiánehinapa eta népeniraya. ¡Ichape eta nupisirahi! ¿Tiúripuca nuyaseaca ema Tata macatúchahuini apaesa vahi nucucatajivaini? ¡Váhiquene nuyaseacaimahi, taicha nútí tímitecanuhi te juca apaquehe eta népeninavacaya ena achaneana!

²⁸ Tacahe, macahevarepa:

—Tata, pímereca eta pítupajjiásirava apaesa nacunachavi ena achaneana —macahepa.

Tásiha, t́jahúchavapa nasamahi eta mahu ema Viya te anuma. Ániapa macahe:

—Nímerecaripa eta nítupajjiásiravahi. Jéhesare, nápechavayareva nímerecayare —macahepa.

²⁹ Tacahe, ena achaneana natiarihiqueneanahi nasamahi eta máechajisirahi ema Viya. Váhisera nácaicutiarahini, náimijachaichucha tirureca. Tásiha, ena apamuriana, ángelepuca éma échájicahi nacahevare.

³⁰ Ema Jesús máichavacapa:

—Vahi nútivenéna eta juca esamaquenehi. Ema Tata tímisamahehi, mavairairahi esuapayare. ³¹ Achichu juca sácheanayare, ticapacuanainapa ena achaneana téhicanahi ema Váinaraji. Eta nacapasiranuya, tacaviureyare namutu ena achaneana te juca apaquehe eta náicuñayare. Eta népenirayare nuvachachainapa eta nuratahairaya nucuchucuhavaca nácani ticasiñavanahi nuyehé. Téquecavanainapa eta nuyehé ena machanerainihi ema Váinaraji. ³² Eta tacahe, te nacatupihanupa te anuquehe te crusu, te nacaicutiarapa ena achaneana apanapanenejiana eta nasamairirisiraya, énajivainapa tipauchuanayá téhicanuanainapa —máichavacapa.

³³ Eta juca máichiravacahi ema Jesús, mavarahahi nacaicutiarayarehi eta táicharacavayarehi eta máepenira. ³⁴ Tacahe, ena achaneana tisamararacananahi najicapapa éma:

—¿Tájahasica tacayema eta péchajisihahi eta pépeniraya te crusu? Viti vímijachaipahi pítiripa ema Cristo, piti Manerejiruvahi ema Viya. Viti visamahi eta Sagrada Escritura te náechajicuha máichecuarquireyarehi eta máitairesiraya ema Cristo. Vahi vícaicutiarahini —náichapa.

³⁵ Ema Jesús máichavacapa:

—Ecamapurava esamararacanu mapurare nutiarhihichaha eta eyehe. Numicaucha-hechaha taicha ánipirine eta juca ímairanuyare apaesa vahi ecucayutete tayehé eta timapicu. Taicha nácani tájinahi náechaquenénahi, ticayutetuanayare. ³⁶ Esuapanu eta juca numicauchaherichaha apaesa ímiturecaya éti apanava, íamayare eta juca tajarahiquene —máichapa.

Te títipiricapa ema Jesús eta máichiravacahi, tianapa majunijimurihapa. Vaipa máimerecavahini eta nayehe.

Tétavicava eta namuracasamurevanahi ena ticavasanahi te Jerusalén

³⁷ Ichapemurihi eta náimairahi ena ticavasanahi te Jerusalén eta tiáramicareana máichaqueneanahi ema Jesús, váhiquenesera nasuapahini éna. ³⁸⁻³⁹ Étahisera tacahehi títauchavayarehi eta májuchaqueneanahi te ajureca ema profetaini Isaías tayehé eta tamuracavahi eta namasuapirayare. Ani tacahehi eta táechajiriruvahi: “Tata Viáquenu, nájina ticaicutiaranaina eta péchajiriruvananahi vímiturapianahi víti. Píti pímerecaripahi eta pítupajjiásiravahi, váhiquenesera nasuapavihini”.

Énerichuvare ani tacahehi eta májuchaqueneanahi ema Isaías: ⁴⁰ “Ema Viya, eta máimairahi eta namuracasamurevanahi, máisapahi tíapajucava eta namasuapajirairavahi, tímicitjiricavahi púchuqiana éna. Váhiquene tétupirisamurechavanaimahi. Váhivare navarahaimahi nacasiñavahini me Viya, apaesa macanaracavachahini” tacahehi eta májuchaquenehi ema víyarahaini Isaías. ⁴¹ (Ema profetaini Isaías, tíaramecahi eta máimairahi te mavapure eta táetavisiraya eta majaraiva ema Cristo, étpa eta masantuvahi eta te máejasihahi.)

⁴² Nararihihisera ena aguenucarahana tinerejicavanaripahi ena tisuapanahi. Váhisera návarahahini náimerecavahini eta náehisirahi, napisirahi nacaquijihini eta te návacureana.

⁴³ Taicha étachucha náuricahi eta nacunachacarevahi nayehe ena nachamuriana, ena fariséona. Tasapihaichucha náepuruhi eta nacunachacarevayarehini me Viya.

Tímicuñarahi te vahi visuapa eta máechajiriruvana ema Jesús

⁴⁴ Ema Jesús tjaranupa eta máechajisiravacahi ena achaneana. Máichavacapa:

—Nácani navarahahi tisuapanuana, tímaticareanaripa eta nasuapirahivare ema Tata, ema tivanecanuhi. ⁴⁵ Tacutiquene nácani tímatinuanahi eta nímiturapiana, náimatipahivare eta mapanereruana ema Tata. ⁴⁶ Taicha nútí yátupiquenénuhi eta numicauchiravacahi ena téhicanuanahi te juca apaquehe. Váipasera tavehaimahi eta timapicu. ⁴⁷⁻⁴⁸ Tacutiquene nútí, vahi étaina táimitecanuhini te juca apaquehe eta náicuñacahehini

eti achaneana. Eta tímitecanuhi, nucuchucuhaheyarehi. Nácanisera nasamairirica-ripahinénipuca eta néchajiriruvana, váhisera nasuapanuhini, nasapiha tépurunuanahi, muracayarehi eta náicuñayare. Eta náepuruirahi eta néchajiriruvana, étaripa tiviuchavacainapa te jena sáchezare nacayaseresehipa te mamirahu ema Viya. ⁴⁹ Taicha vahi nútijiriruvainahini eta nímituresirahi. Ema Tata tivanecanuhi, éma tjaracanuhi eta nímiturapiayarehi. ⁵⁰ Eta tacahe, numetacahehi puiti tamutu eta numetacasivanahi. Vahi nuhapapicaimahi, taicha nímatihí tacaitarecayarehi nácani tisuapanahi eta máimiturapiana ema Tata —macahepa.

13

Ema Jesús, masipapevachavacapa ena máimitureana

¹ Tiuri, te jena sácheanahi tamirahupaipahi eta Pascua, ema Jesús máecharipa táitecapauchayarepa eta majunijsirayarehi eta juca apaquehe. Tiyanyarepa mayehe ema Maiya. Tétavicavahi eta máemunasirahavihi viti máimitureana. ²⁻⁴ Jéhesare ema Júlasí, máimipanerecharipa ema Váinaraji eta májjararesirayarehi ema Jesús. Émasera ema Jesús, máecharipa eta machavirayarepa mayehe ema Maiya taicha eta máisinehi. Émarichuhi ema Maiya tjaracahi eta tamutuirayarehi máituruequeneha. Tacahe, te jena yati, eta máenisirahavihi viti máimitureana, téchepucapa ema Jesús. Tivejamuhíacavapa eta mamuiríha. Tiáyuruñequechavapa te mayehe paño. ⁵ Tásiha, majucuhapa eta une te bañadora. Tépanavapa tisipapevachavahi eta vívapeana viti máimitureana. Mavehavarepa eta paño, tiájapevachahavipa.

⁶ Tásiha, te macapayacapa ema Pedro, éma vahi máisapavahini eta masipapevachira eta máivape. Máichapa:

—Tata maestro, vahi táurica eta pisipapevachiranuhini núti —macahepa.

⁷ Tásiha, ema Jesús majicapapa:

—Páuresamivíhi píti. Vuíchaha picaicutiarahini eta tacayemaqueneanahi eta juca. Achichuinapasera picaicutiarainapa.

⁸ Ema Pedro máichavarepa:

—Nútisera, vahi pisipapevachanuimahi.

Ema Jesús máichavarepa:

—Te vahi nucusipapevachavi, vaipa pítiparacaimahi eta nuyehe.

⁹ Tacahe, ema Pedro máichapa:

—Tata, vahi táarichuimahi pisipaca eta nívapeana. Énerichuvare eta nuvahuana étapa juca nuchuti.

¹⁰ Tásiha, máichavarepa ema Jesús:

—Nácani nacaviravahi vahi tácomesaimahi tiápechavana ticasipana. Tacarichu ticasipayarehi eta náivapeana. Éti, epachihavacaripa; váhisera ámutuhini epachihahini —máichapa.

¹¹ Ema Jesús máichavahi eta juca vahi vámutuhini vipachihahini taicha máimatihí ema tjararecayarehi.

¹² Te titavapa eta masipapevachirahavihi, ticamuirihavarepa eta mamuiríha. Tásiha, téjacapa te mesa. Máichahavipa:

—¿Ímatiequenehapuca éti eta juca níchirahehi? ¹³ Eti ímijarechanu “Tata Maestro”. Étipicahisera, taicha yátupiquenúhi eta numaestruvahi. ¹⁴ Eta níchirahehi núti emaestro nusipapevachirahehi, ene ecaheyare éti eta ítaresiraya. Esipapevachacacayare eta ívapeana. ¹⁵ Éhicayare eta juca níchaquenehi. Étayareichu eta nímitusirahehi. ¹⁶ Nutupiruva numetacahe: Ema musu vahi macachuricaimahi ema máquenu. Émaripa ema vanairucahi váhivare macachuricaimahi ema tivanecahi. ¹⁷ Te yátupina ecaravahuinapa eta juca nímiturapiana, tájina íchiravaimahi. Ecanachacareyareva eta ítauchiraya tamutu.

¹⁸ Néchahinéni núti vahi ámutuhini esuapanu. Nímatihéhvare eti yátupiqueneana nunerejiruanahi. Títachavayarehisera eta táechajiriruvahi eta Sagrada Escritura, ani tacahehi: “Ema néniruasahi, masapíhahi ticationacanuhi”.

¹⁹ Puiti nucainapucava numetacahe apaesa te táitachavapa eta juca numetarapi, ímatinuinapa nuti yátupiquenúhi Cristo. ²⁰ Nutupiruva numetacahe: Nácani tijacapaheanayare éti nuvaneruana, ticaecheranahi eta najacapiranuhi núti apana. Énerichuvare, najacapahivare ema Tata Nucaiya quene.

Ema Jesús máechajisiha eta májjararesirayare ema Júlasí

(Mt 26.20-25; Mr 14.17-21; Lc 22.21-23)

²¹ Te titapiricapa eta máichirahavihi ema Jesús, téñamavaipa te masamure eta májjararesirayarehi ema émana vichamuríhi. Tacahe, matupiruvapa máichahavihi:

—Nutupiruva numetacahe: Mararíhi ani te etaracu ema tjararecanuyare —macahepa.

²² Tacahe, viáramecarinehi eta máichirahavihi. Véseniuquijiricacapa. Vahi vímatihini nájahahipuca ema máichaquenehi. ²³ Nutiarihisera nuti nachamuri máemunarupananuhi ema Jesús. Nucachacayahi éma eta véjasirahi te mesa. ²⁴ Tacahe, ema Pedro tíumatsiuquichanupa nuyaserecaini nájahahipuca ema máichaquenehi ema Jesús. ²⁵ Tásiha, nútí nujaiaicapa ema Jesús:

—Tata, ¿nájahasica ema píchahi?

²⁶ Tásiha, tijicapanupa:

—Nuyuvetumecaya eta pan, néchipaejicaya. Ema níjararuyare, émara ema tíjararecanyare —macahepa.

Tacahe, máechipaejicapa eta pan, máíjaracapa ema Júlsi. ²⁷ Jéhesaréinehi, ema Váinaraji enevanepa mávahácahi éma. Tásiha, ema Jesús máichavanepa:

—Júlsi, eta juca pipanereruhi, táitauchavavanepa puítinaichu —máichapa.

²⁸ Váhisera vácaicutíarahini eta juca máichirahi ema Jesús ema Júlsi. ²⁹ Vímiijachahichucha eta mavacharesirayarehivare eta tinicacare tayeheyare eta piesta, mácajihivarepuaini ena páureana, taicha émahí técha eta tarera máunasirarehi eta plata eta matesorerovahi. ³⁰ Te títanésipa ema Júlsi eta manisirahi eta pan, tiyanapa tíuchuchi. Tijunijicahavipa te jena yátiquenehi.

Ema Jesús macavanairipipa eta vémunasiracacayare

³¹ Eta máachusiraipa ema Júlsi eta viyehe, ema Jesús máichahavipa:

—Títecapapa puiti eta táitauchiravayare ímahainapa éti eta máitupajijiasirava ema Viya étapa eta nítipajijiasiravayare nútí Manerejirunuhi éma. Éti ecunachahavinapa. ³² Nímerecainapa eta máitupajijiasiravahi ema Tata, ema apana máímerecayareva eta nítipajijiasiravahi nuti Machícha. Puiti juca sácheanayare títauchavainapa. ³³ Nuchichanaveana, ánipirine eta juca echaneranyare. Tásiha, nuyanainapa. Éti, etanucanuinapa; vuíchahasa ítujicavaimahi ecapayacanu. Étarichuhi eta numetarapihi nayehe ena ticatíanacanuana eta níchiravacahi vahí títujicavanaimahi ticapayacanuana. ³⁴ Puiti nunaquicayare eta juca arairu nuvanairipi eta eyehe. Émunacacayarehi ena echamuriana. Ecutinuyarehi eta némunasiráhehi nútí. Ene ecaheyare éti apanavare. ³⁵ Te yátupina émunacaca, eta tímatíacaheanayare ena achaneana étirahi eti nímitureanahi —máichahavipa.

Ema Jesús máímereucha ema Pedro eta máepiyasiravaya vahí máímati ema Jesús (Mt 26.31-35; Mr 14.27-31; Lc 22.31-34)

³⁶ Tásiha, ema Pedro mayaserecapa:

—Tata Maestro, ¿távihainapa picaijuheya?

Ema Jesús majicapavarepa:

—Eta nucajuheya puiti, éti vuíchaha ítujicavaimahi éhicanu. Ecapayacanyaresera. Váhivare ánasimahi éti. Vuíchahasa tíjahúchavaimahi —máichapa.

³⁷ Ema Pedro majicapavarepa:

—¿Tájaha tacuichavaini vahí nukuratahahini néhicavi, Tata? Nútí níjaracava népena píchavenénahi píti —máichapa.

³⁸ Tacahe, ema Jesús máichapa:

—Píti, pímiijachavapuca píjaracava pépena eta picatiuchiranuya. Numetacavisera: Puiti juca yati, te tamirahuinarichaha eta táechajisiraya eta varayu te tíjararahi, píti mapaheyare pépiyacavayare vahí pímatinu, eta picatiuchiravayarehi píti —máichapa.

14

Ema Jesús, jéhevale éma téhicacare eta vítecapiraya me Viya

¹ Vahi ecueñamava éti. Ácasiñava eta me Viya; ácasiñavavare eta nuyehe. ² Taicha ánaqui te mávasa ema Tata, camuri eta tíaviravacare íávihayare éti, taicha ícuchihi éti. Tacahe, tatuparacahi nuyanayare nétipuricayare eta íávihayare. ³ Te táuripa eta íávihayare, nútíjapainavarepa nuchavainapa népanahénapa apaesa ácachenenu éti tayehe eta návihayare nútí. ⁴ Eti ímatiripa eta nucajuheya. Ímatipahivare eta achene nuyanihayare.

⁵ Tásiha, ema Tomás majicapapa:

—Tata, váhira vímati távihapuca eta picaijuheyare; váhivare vímati eta achene piyanihayare —macahepa.

⁶ Ema Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarerahi, nájina apanaina ácasiñaimahi eta ítecapirayare me Tata. ⁷ Eta ímatiranuipa nútí, ímatiripahivare ema Tata, taicha ímahanuripa puiti eta juca nucachanérahehi —macahepa.

⁸ Ema Felipe máichapa:

—Tata, pímechahavipaini ema Viya apaesa viúrisamurepaini eta vímatirainahini.

⁹ Ema Jesús majicapavarepa:

—Ánaquiaparipa eta picachaneranihi, piti Felipe, vuíchahacaruvare pímatinu. Eti ímahanurípahi, ímatinuipavare yátupíhi. Tímicutijiricavaipahi émainahini ímaracahini ema Tata. ¿Tájaha tacayema pivarahaichahavare nímechavi ema Tata? ¹⁰ ¿Váhipuca pisuapanuhi eta mávahásiranuhi ema Tata, tásiha, étapa eta návahásirahivare núti apanava? Eta juca nucayemaqueneanahi, vahi nuvehaqueneanaina te nuchuti. Étara eta mávahásiranuhi ema Tata, títauchavahi eta mavarahaqueneanahi. ¹¹ Esuapanu eta návahásirahi núti ema Tata, étapa eta mávahásiranuhivare éma. Te vuíchahapuca esuapanuhini eta numetarapi, étavanerecainaséra esuapa eta tíamicareanahi níchaqueneanahi. ¹² Nutupiruva numetacahe: Nuyanainapa eta me Tata. Eta tacahe, éti yátupi eta esuapiranuhi, nútsivahe éti. Níjaracahe eta eratahairaya echucha eta tíamicareana, ecutinuyare. Níjaracahevare eta eratahairaya ímitupirucha eta náchanevana ena achaneana. Jéhesare, eta juca tíapajupanavayare eta tacunachacareva tayehe eta tíamicareana íchaqueneanayare. ¹³⁻¹⁴ Núti níjaracahevareva tamutu jácani eyasearunuanayare te níjare, taicha nuvaraha ichape eta ecunachirayare ema Tata.

Ema Jesús macametarapi eta mácupaisiraya ema Espíritu Santo

¹⁵ Eta esuapiranuhi tímereuchaheya eta yátupirahi eta émunasiranuhi. ¹⁶ Tásiha, núti nuyaseacainapa ema Tata máevataca ema Espíritu Santo. Éma, tímicatacaheya, ticurisamurechahevareva. Yátupiquenevare eta mávahásirahevare eta ítaresirayare. Vahi tínjacahémahi. ¹⁷ Éma, tímítucaheya, máitametacayare tamutu eta yátupiqueneanahi tásihaqueneana eta me Tata. Énasera ena achaneana, vahi ticaijaracasianaimahi, taicha vahi návarahahini najacapahini éma. Eta namaratahairahi náimaha éma, náimjachahi vahi máimaticarehíni éma. Étísera ímatiyare éma, taicha máitavacayare eta mávahásirahevare. ¹⁸ Núti, váhivare nujunijiacahémahi. Nuchavayare eyehe, ecachanenuyareva. ¹⁹ Puiti juca sácheanayare, ena achaneana vaipa tímahanuanaimahi. Étísera ímahanuparacaya, taicha nuchavayarehi nítareca. Éti apanavare ítarecayareva nícha núti. ²⁰ Te nuchavapa nítareca, échavainapa éti eta mávahásiranuhi ema Tata, échavainavarepa eta návahásirahevare núti, éti apana ívahácanuhivare. ²¹ Nácani náimatiyare eta nuvanairipiana, náitachayareva, eta tímícaecherachayare eta yátupíhi eta náemunasiranuhi. Tásiha, ichapeyare eta namunavayare me Tata táichavenénahi eta náemunasiranuhi. Núti apanavare ichapeyareva eta námunasiravacayare. Tásiha, nímerecavayareva nayehe —macahepa.

²² Ema Tadeo máichapa:

—¿Táicharacavayare, Tata, eta vicarichuirayare pímerecava eta viyehe; tásiha, ena apamuriana achaneana, vaipa tímahavianaimahi? —macahepa.

²³ Tacahe, ema Jesús majicapapa:

—Nácani témunacanuanayare, nasuapayare eta nuvanairipianahi. Tásiha, ema Tata, tétavacavayarehi eta máemunasiravacaya. Tásiha, vítijapainapa viávahácavacayare éna. ²⁴ Nácanisera vahi témunacanuanaimahi, váhivare nasuapaimahi eta nuvanairipiana. Eta juca esamaqueneanahi puiti, vahi tásihaquenenahini te nuchuti. Tásihaquenehi me Tata, ema tivanecanuhi.

²⁵ Nucamapurava numetacahe puiti taicha ánipirine eta juca nucahevare eta eyehe. ²⁶ Émasera ema Espíritu Santo mavaneruyare ema Tata níchavenénahi núti, ema tímicatacahevare, ticurisamurechahevareva. Énerichu tímítucahevare, témechahevare tamutu eta juca numetarapiana eyehe.

²⁷ Puiti nucametavaya eta eyehe. Nuvarahasera tacujahini íchiravainahini, ecanarasiraina eta epaneruana. Núti vahi nácutinuhini ena apamuriana achaneana eta nujunijisiraheya. Vahi ecuvayuchava eta éñamavairaina. Váhivare ecupica. ²⁸ Puiti numetacaheripa eta nuyanirayare; tásiha, étapa eta nuchavirayare eta eyehe. Eta tacahe, te yátupina émunacanú, evapinavayarehi nuyehé núti eta nuchavirainapa mayehé ema Tata, nápechavaya nucachane éma tayehe eta máetaviuchirahi eta majaraivahi étapa eta máitupajijiasirava. ²⁹ Nucametarapivane eta juca, apaesa te ímaha táitachavapa, esuapainapa yátupi.

³⁰ Ánipirine puiti eta juca néchajirisiravahi eta eyehe taicha ávanepaipa títecapa ema Váinaraji eta mavarairahi tíaquipaicanuyare. Éma, yátupíhi táquenuhi eta juca apaquehe. Váhiquenesera títahacanuimahi núti. ³¹ Nuvarahasera náimatiya ena achaneana eta námunasirahi yátupi ema Tata; tásiha, nítauchaparacahi tamutu eta mavanairipiana. Écheputa. Viyana viyejecava eta te juca —máichahavipa.

¹ Núti nucutihi eta sucureca uva. Étiripa éti ecuti eta tatavana. Ema ticachichanu tímicitijiricavahi ema tijaneacahi eta sucureca. ² Éma máechuca eta máhiquerehi tatava. Máepachiacavare eta apana tatava eta ticahirisi apaesa tacaHIPANA. ³ Éti epachihava-caipahi taicha eta nimiturapiana emetacasivanahi. ⁴ Eta tacahe, ímianavayare eta úrujiasiranuyare taicha eta návahásirahehi núti, apaesa ácuti eta tatava ticahiriqui. Taicha te viyuyetura eta tatava eta uva, vaipa ticahimahi. Ene ecahehi éti, te vahi ecuimianava úrujiacanu, tájina vaipa ecaemataneacuanimahi.

⁵ Nápechava nímicutichinahe puiti. Núti nucutihi eta táenaquihí. Éti tímicitijiricavahi n-tavahehi. Te ímianava úrujiacanu, ichapemuriyarehi eta ecaemataneasiranuya. Téhesera ácarichu éti, tájina eratahaquenémahi ícha. ⁶ Nácani tijunijiacuanayare, ticituanayare te ticaechu eta tatava. Tájiqiyarehi. Tásiha, nacurujicainapa, nájuchainapa te yucu.

⁷ Ímianava yátupina eta úrujiasiranu. Yátupinavare eta itauchiraina eta nimiturapiana. Tásiha, te eyaseacanupuca jácani evarahaqueneanahi, núti njaracaheya. ⁸ Nuvaraha ímerezavaya eta táurivayare eta ecaemataneasiranu, apaesa tétavicavainapa eta macunachacarevaya ema Tata. Tásiha, ecaecheraipahi eta yátupirahi nimiturehe. ⁹ Ímianava eta iávahásiranu taicha tétavicavahi eta némunasirahehi tacuti eta máemunasiranuhi ema Tata. ¹⁰ Eta ímianirava itauchapaipa eta nuvanairipiana, tijurucapaipa eta ímatirahi eta némunasirahehi. Tacuti eta nítauchirahi núti eta mavanairipiana ema Tata, nímataipaipa eta máemunasiranuhi éma. ¹¹ Eta juca nímicitiarachirahi, nuvarahahi íapajuca eta íurisamurevahi tásihaquenehi eta iávahásiranuhi núti. Ecutinuya eta núsamurevahi. ¹² Nápechahe numetacahe eta juca nuvanairipi eta eyehe: Yátupina eta émunasiracaina. Ácutinu eta némunasirahehi núti. ¹³ Ena achaneana, te navarahahi náimerecaya eta náemunasirahi nácani náemunaruanahi, natanucayarehi nájaracasicha. Nácani tijarrecavanapuca eta náepenirahi énavenehi ena náemunacasareana, éna yátupihí náimereca eta náemunasirahi. Ene nucachehi núti, njararecavayare eta népeniraya íchavene éti éhisiranuhi. ¹⁴ Jéhevare, éti yátupiquenehi némunacasareanahi, eta itauchirahi eta nuvanairipianahi. ¹⁵ Vahi vánaracahéna nuyehé, taicha ena vanaracananahi vahi náimatimahi eta mapanereruanahi ema náquenu. Étiserá némunacasareanahi. Eta tacahe, numetacahe tamutu eta mapaneruanema Tata. ¹⁶ Vahi étinahini enerejicanuhini eta éhisiranuhi. Núti nunerejicahehi. Puiti nutuparacahe, nuvaraha táuri eta ecaemataneasiranu eta epaisiraya eta ecametarairuirayare. Nuvaraha ecajimuyacahini ena achaneana náehicanuhini. Yátupina eta ímitusiraina apaesa náimianava eta náehisiranuhi. Tásiha, ema Tata tijaracaheyare tamutu eta eyasearuanayare te níjare. ¹⁷ Nuvaraha itaucha eta juca nuvanairipiana. Yátupina émunacaca.

Ena achaneana ticatianacaheanayare tacutiayare eta nacatiansiranuhi núti

¹⁸ Puiti numetacahevare, te nacatianacahe ena achaneana, échavayare éti vahi étinahini nacatianaca. Núti nacatianacahi. ¹⁹ Taicha, te étainachahini iávacuhahini eta tayehe-repiana eta apaquehe, ena achaneana témunacaheanaripahini, tacutihini eta náemunajirisiracacahi éna. Étasera eta nunerejisirahehi te nataracu ena achaneana, étapa tivuchahehi eta nacatiansirahehi taicha ínajicaipa eta máeperajiquene tayehe eta apaquehe. ²⁰ Échavavare eta juca numetaruhehi: “Vahi máspihaimahi ticaemunacasi ema musu mayehé ema máquenuhi”. Núti ticatianacuananahi; ene ecaheyarehi éti, eta nacatiansiraheyareva. Vahi nasuapahini eta nimiturapiana. Váhivare nasuapaimahi eta ímiturapiana éti apanava. ²¹ Eta éhisiranuhi núti, étaripa tivuchaheyare tamutu eta juca nacatiansirahehinapa táichavenehi vahi náimatihini ema Tata tivanecanuhi.

²² Tacuijarichuhipucaini naviurevainahini éna, te vahi nucuitechahini eta nímitusiravacahini. Tépurunanahiséra, náepuruhivare eta nimiturapiana; tásiha, tétavicavahi eta naviurevanahi. ²³ Taicha nácani ticatichanuanahi núti, nacatianacahivare ema Tata. ²⁴ Énerichuvare tacuijahini taviuchavacahini te vahi nucuimerecchini eta tíáramicareana níchaqueneanahi. Mamaratahaquenehi máichahini mácani apana achane tacutihini eta níchaqueneanahi núti. Étasera náimaharipahi, váhiquenesera nasuapahini. Nasapiha ticatianacuanarichucha, nacatianacahivare ema Tata. ²⁵ Étasera tacaheyarehi eta táitauchiravayarehi eta táechajiriruvana eta Sagrada Escritura te Salmo, ani tacahehi: “Tájina taviuchanuhini eta nacatiansiranuhi”.

²⁶ Étiserá, mararihiyare ema tímicatacaheyare, ticurisamurechaheyareva. Te nítecapauchayarepa ema Tata, nuyaseacaya mavaneca ema Espíritu Santo. Éma, te máitecapapa, tímereuchaheyare eta yátupiqueneana. Tímereuchanuyareva núti eta eyehe. ²⁷ Éti apanavare ímerezachanuyareva taicha tiyereripahi eta ecachaneranuhi, tépanavapa te nunerejicahéna.

16

¹ Núti numetacahe eta juca apaesa vahi ecuarami eta nacatianasirahe, váhivare ecuina-jicava eta éhisiranuhi. ² Taicha tiáquijicaheanayare tayehe eta viúrujisirarevana. Énerichuvare navarahayare ticapacaheana. Éna, náimijachayarehi tíuriyarehi eta náichirayare te mamirahu ema Viya. ³ Éna, náichayare eta juca táichavene eta namáimatirahi ema Tata, váhivare náimatínuhini núti. ⁴ Numetacahe eta juca apaesa te táitecapapa eta íchavaquenevaya, vaipa ecuarameca. Échainapa eta numetasirahehi.

Ema Espíritu Santo tímícatacahavíhi

⁵ Puiti tiánehinapa eta nuyaniraya nuchava eta me Tata. Eta nucachaneirahehi, ticitianacananuani núti ena achaneana. Puitísera eta májinairanuyare, ticitianacaheanainapa éti. Eta juca tacahehi, nupaenumava numetacahehi puiti. Étísera németeaca vuíchaha ecaicutiara eta numetarapi, taicha váhivare eyaserecanuhini eta nítametásirayare, étahinéni eta nucaijuhayare. ⁶ Esapiha éti ecatisamurevahi taicha eta juca numetasirahehi eta nuyaniraya. ⁷ Tayanapane vahi eyaserecanuhini, nutupiruvasea numetacahe: Tatuparacahi eta nuyaniraya nuchava mayehe ema Tata, taicha te vahi nucuyana, vahi títecaimahi ema nuvaneruya. Éma tíurichaheyare, tímícatacahayare, ticurisamurechaheyareva. ⁸ Énerichuvare ena achaneana te juca apaquehe, manacasamurechaya eta nacatuparahairahi náichayarehi eta táuriqueneana, náehicanuvare núti. Manacasamurechavacayareva éna eta náimatiraina eta nasipeccaturaravahi. Taicha te vahi nacuvараhá náinajica eta tamauriqueneana, téhevere vahi nacuvараhá náehicanu núti, ticaicuñanainapa te yucu. ⁹⁻¹⁰ Ema Espíritu Santo manacasamurechavacayare ena achaneana eta najacapacarevaya me Tata nácani ticasíñavanapuca eta nuyehé, taicha nuyanaya eta me Tata, néchajuchavacayare éna. (Vaipa ímahanuimahi éti.) Nácanísera vahi nasuapanuhini núti, tanasiquenehi eta napecturanahi. ¹¹ Manacasamurechavacayareva ema Espíritu Santo eta yátupina táiturevayare éna eta máicuñayare ema Váinaraji náehiruhi te juca apaquehe. Éna apanava náepujuquichainapa tayehe eta yucu infierno.

¹² Maverachahaneni eta juca nuvarahaqueneanahi numetacahe. Váhisera eratahaimahi ecaicutiara puiti. ¹³ Téhesera máitecapapa ema Espíritu Santo, éma tíamayarepahi eta yátupiqueneana numaimitureheanaríchaha, émainapa tímítucaheyare. Taicha mametacásivahi eta máechajísiraheyare, énerichuvare tímítucaheyareva eta íchavaquénévanayare. ¹⁴ Ichapenapa eta nucunachacarevayare máicha. Émainapa tímítucaheyare eta nuvanairpianayarehi eyehe. ¹⁵ Taicha ema Tata tituparacanuhi eta nútirayarehi nécha tamutu. Eta tacahe, eta juca mametarapianayare ema Espíritu Santo tásihaqueneanayare nuyehé.

Vahi tánasimahi ecatisamureva. Tichavayare eta iúrisamurevaya

¹⁶ Ánipiyareichusera eta emaimairanuyare. Téhesera táequenénapa, íápechavainavarepa ímahanuyare. Taicha nuyanayarepa te mávihahi ema Tata.

¹⁷⁻¹⁸ Tacahe ena apamuriana nuchamuriana tiyaserecanuanapa:

—¿Tájahapuca tacayema eta juca mametarapihi, eta macahehi ánipirine eta vimaimarayare, tásiha, te táequenénapa víápechavainavarepa vímaha? ¿Tichavavanepuca eta mayanirayare eta me Maiya? ¿Váhipuca mánasimahi eta machaviraya? Váipavare vácaicutiara eta ánipirine eta macaheyare eta viyehé —nacahepa.

¹⁹ Ema Jesús macaicutiaravacahi eta navairahi nayasereca. Máichavacapa:

—Núti numetacahehi eta ánipirine eta emaimairanuyare. Tásiha, te táequenénapa eta emaimairanuyare, íápechavainavarepa ímahanuya. Eta juca emacaicutiaraqenehi. ²⁰ Tásiha puiti, nutupiruva numetacahe eta íyahairainasamipa éti, eJapanuvairayareva. Énasera ena apamuriana achaneana, tíurísamureanainapa éna. Tásihasera te táequenénapa, vaipa íyahaimahi. Tétavicavasea eta iúrisamurevainapa eta táitsívaya. ²¹ Eta juca tímícutijiricavahi te tínacayare esu esena. Ánipichuhi eta sucatiruhavahi taicha eta suínasirayarehi. Téhesera te tamutupa eta suínasirahi, suémítisicanapa eta sucatiruhavainihi. Tíurísamuréinapa eta suímairahi eta suchicha, tajurusirayarehi te juca apaquehe. ²² Ene ecaheya éti, ecatisamurehi puiti, ánipirichusera. Téhesera te víápechava vímahacacaya, tétavicava eta iúrisamurevaya. Nájinainavarepa tíhapapicahémahi eta iúrisamureva.

²³ Te jena sáchevare, vahi nútímahi eyaserecanu. Émasera ema Tata eyaserecayarehi. Éma, tíjaracahayarehi tamutu jácani eyasearuanayare te níjare. ²⁴ Puitícha tájinaichaha eyasearapínahini me Tata te níjare. Ticamunacarehi eyaseacayare. Éma tíjaracahénapa. Étainapa tícurisamurerecaheyare íchape.

Numetacahe eta nucaaquechiravacayare ena nánaranayare

²⁵ Núti nímicituchinahehi eta juca numetasirahehi. Téhesera te táequenéna, nutupiruvainapa numetacaheyare eta yátupiqueneana mapanereruanahi ema Tata. ²⁶ Te jena sache, eyaseacainapa ema Tata te níjare. Váipayare tacamunuimahi nuyaseuchahe eta mayehe. ²⁷ Taicha émaripa ema Tata témunacahehi éti, táichavénehi eta émunasiranuhivare núti. Éti esuaparipa eta yátupirahi eta mavanésiranuhi ema Tata. Tíjaracahénavanepa eta eyasearuanayare. ²⁸ Núti, eta násihahi mayehe eta nítesirahi te juca apaquehe. Puítisera nujujicainavarepa eta apaquehe, nuchavainavarepa mayehe ema Tata —máichahavipa.

²⁹ Tacahe, viti máimitureana víchapa:

—Jéhehare puiti pitupiruvapa eta péchajisihahi. Vaipa pímicutiachinahávihi. ³⁰ Vímativarepa eta yátupirahi pímatiequeneha tamutu. Jéhesare, pímatiequeneha tamutu eta vipaneruana, étaripa eta juca vivarairahi víyaserecaviyare. Vísuparipa puiti eta yátupiquenéravíhi Machichavi ema Viya —víchapa.

³¹ Tacahe, ema Jesús máichahavipa:

—Jéhepuca eta esuapiranu puiti. ³² Puítisera juca yati, títecapainapa eta éjanerépáisirayare éti. Ejunijicanuinapa, nucarichuinapa núti. Matiarhiyaresera ema Tata. Éna, ticachanenuyare. ³³ Numetacahehare tamutu eta juca apaesa vahí ecurameca. Ácasíñava yátupina nuyehe apaesa tacuija ecuichiravaina, tayanapane ecatajivayare muraca te juca apaquehe. Ácasíñavahisera eta nuyehe, taicha núti máíjararunuhi ema Tata eta nucapaquemuríhairayare namutu ena nánaranahi —máichahavipa.

17

Eta mayujarasirahi ema Jesús, mayaseuchavacahi me Maiya eta náurivaina ena máimitureana

¹ Te títapiricapa ema Jesús eta máechajisirahavíhi viti máimitureana, tépanavapa tiyujaracahi. Máesenicapa te anuma. Ánipa macahe:

—Tata Nucaiyaquene, títecapachuanu puiti eta táitachiravayare eta pipanereruana. Nuvarahasera nucunacharéni eta piyehe, tácutini eta nucunachiravíhi píti. ² Yátupíhi eta píjarasiranuhi eta aquenucairanuyare, te namirahu namutu ena achaneana. Nucaitarésirayarehivare namutu ena píchuhaqueneanahi píjararunuanahi. ³ Níjaracayare eta náitarésirayare máichecuariqueyare ena píjararunuanayare apaesa náimatívi, píti Tata yátupiquenévihi Viya, nútipa núti Jesucristo, núti pivanerunuhi te juca apaquehe. ⁴ Núti nímercahi ne achaneana eta picunachacarevahí. Nítauchaipahi tamutu eta pivanairipianahi pívarahaquenehi níchayarehi. ⁵ Puítisera nuchavainavarepa eta piyehe. Píjaracanuayare eta nuchavirayare te píjaravahi. Néjacainavarepa te pivature tayehe eta návinehi acane te tépanavainapa eta apaquehe.

⁶ Nítamuturucaripahi eta nímitusiravacahi ena píchuhaqueneanahi píjararunuanahi píti. Nímimatchavacahivare eta píúrivahi píti. Yátupíhisera eta píchichanaveanahi éna, taicha nasuapahi eta nímiturapiana píjararunuanahi núti. ⁷ Náecharipahi tamutu eta juca nímiturapiana tásihaqueneanahi piyehe. ⁸ Náecharipahivare eta yátupiquénérahi eta pivanésiranuhi. Eta tacahe, natupiruvahi najacapa eta nímitusiravacahi eta péchajiriruvana.

⁹ Eta tacahe, puiti nuyaseacavi, Tata, eta pijaneasiravacaina ena píjararunuanahi téhicanuanahi, taicha píchaneranihi éna. Vahí éna nuyaseuchavaca ena masuapajirairahanahi te juca apaquehe. ¹⁰ Núti néchahi eta piyeheravacahi éna. Eta tacahe, néñamavahi eta nayehe, nuyeheanaipahi éna. Yátupíhi eta náimatiranuhi eta pivanerunuhi, tásiha ticunachanuanahi ichape.

¹¹ Puiti núti nujujicavacainapa ena píjararunua. Énasera nanasiyarechaha te juca apaquehe. Nútisera nútijapainapa eta piyehe. Tata Nucaiyaquene, píti yátupiquenévihi eta pisantuvahi. Nuyaseacavi pijaneasinanuvacachucha éna, apaesa náimiyavahi eta náurujasiracacaina, návahásiracacayare nácutihini eta vívahásiracacahi víti. ¹² Núti nímimatchavíhi píti eta nayehe, étapa eta píjare, apaesa yátupina eta náehisiravina. Ichapemuríhi te juca apaquehe. ¹³ Núti náehisiravacahi éna eta nucachaneravacaichaha. Eta tacahe, vahí náinajicavahini eta náehisirahavíhi. Émanarichu ema téjecapavahi, ema tíjararecanuyare. Étasera tacaheyarehi eta táitachiravayarehi eta Sagrada Escritura.

¹³ Puiti nútijapainapa, Tata, tayehe eta jara piávihihi. Eta nucachaneravacaichaha éna, numetacavacahi eta pipanereruana, taicha nuvaraha vícuticacahini eta víúrisamurevaina. ¹⁴ Taicha ena achaneana te juca apaquehe, ichapemuríhi eta nacatianasiravacahi táichavenehi eta najacapirahi eta péchajiriruvana nímitusiravacahi. Éna, vaipa náehicahini eta tayeheana eta juca apaquehe, ticutinuanaripahi núti eta numahisirahi eta tayeheana eta te juca apaquehe. ¹⁵ Vahí nuyaseacavi eta piviravacainahini te juca apaquehe. Nuyaseacavi núti eta picatiuchiravacainahini mayehe ema Váinaraji. ¹⁶ Taicha yátupíhi éna

vaipa tayeheanainahini eta juca apaquehe, ticutinuanaripa núti vahi tayahenuinainahini eta juca apaquehe. ¹⁷ Píjaracavacahini eta náurivainahini eta piyehe, náitusirainahini cápachi eta péchajiriruvana yátupiqueneana. ¹⁸ Píti pivanecanuhi nímiturecayarehi eta péchajiriruvana nayehe ena achaneana te juca apaquehe. Tásiha, núti nuvanecavacayareva ena nímitureana, náimituca ena apamuriana achaneana. ¹⁹ Puiti, eta némunasiravacahi éna, níjaracava núti, nítauchayare eta pivarahaquenehi. Nuvaraha ene nácahinehi éna, yátupinahini nájaracavahini eta nacaemataneasiraviyarehi. Yátupinahivaréni nasuapa eta péchajiriruvana yátupiqueneana.

²⁰ Váhivaresera nacarichuhi éna nuyaseuchavacahi eta piyehe. Énerichu nuyaseuchavaca ena tisuapanayare eta táunavayare eta áñoana, ena tijacapanayare eta péchajiriruvana. ²¹ Nuyaseacavivare váhini tacuitavahini eta náurujiásiracacayare éna. Píjaracahivaréni, Tata, te nasamureana eta návahásirahavinahini tácutihini eta viávahásiracacahi víti. Náurujiásirahavinavare víti, apaesa ena achaneana te juca apaquehe náimatihini yátupina eta pivanesiranuhi.

²² Núti níjaracavacaipahi éna eta náitupajijiasiravacayarehi tamutuirayarehi narataha. Vicutihí víti eta tamutuirá virataha. Návahácacahini éna, vácutihini víti eta viávahásiracacahi. ²³ Píti piávahácacahini núti. Tásiha, núti návahácavacahi éna apaesa yátupinahini éna étanainarichuyare eta napanereruana, apaesa ena apamuriana achaneana te juca apaquehe étainahini náimatirainahini eta pivanesiranuhi, étapa eta pémunasiravacahi ena nímitureana tacutihí eta pémunasiranuhi núti.

²⁴ Tata Nucaiyaquene, píti píjaracacahini ena nani píchuhaqueneanahi. Nuyaseacavi puiti eta nucachaneravacainahini tayehe eta návihayare núti. Náimahahini eta nuvaraiva píjararunuhi taicha eta pémunasiranuhi te tépanavainapa eta tacaepiyairahi eta apaquehe. ²⁵ Tata Nucaiyaquene, píti yátupiquenévihi eta pisantuvahi. Éna achaneana te juca apaquehe vahi náimativihini. Nútisera nímativihí. ²⁶ Ena nani píjararunuanahi nímitichaviripahi. Tétavicavahi eta pémunasiranuhi. Tásiha, nuvaraha yátupina nasamava eta táetaviuchirahi eta pémunasiravacahi taicha éna tiávahácacacahini núti.

18

*Títecapanapa ena ticaratacanaya ema Jesús
(Mt 26.47-56; Mr 14.43-50; Lc 22.47-53)*

¹ Te títapiricapa ema Jesús eta mayujarasirahi, tiyanapa tiámamurihavipá te apachara eta tatavarapi ticaijare Cedrón. Ánaqui tatiaríhi eta huerta ticaijare Getsemaní. Visi-
apapa tayehe. ² Tacahe, ema Júlasí máimatihí eta juca viávirarehi taicha ichapemurihi
eta vicachanerahi ema Jesús tayehe eta huerta. ³ Tacahe, te jena yátiquenehi, títecapapa
ema Júlasí. Mámamurihapapahi ena oficialeana énapa ena camuriqueneanahi suntaruana
romanoana, vanairucanahi éna nayehe ena tuparairucana, taicha napamicavacahi ena
fariséoana. Ticamicahuanapapahi. Ticaepuchiriquianapapá, étapa eta nayehe espada.
⁴ Émasera ema Jesús máecharipa eta nacaratasirayarehi. Tacahe, mácapavacapa éna.
Máichavacapa:

—¿Nájaha etánuca?

⁵ Ena najicapapa:

—Ema Jesús Nazareno vitanucapahi.

Éma máichavarepa:

—Nútira etánurepahi.

Ema Júlasí mapauchapa, máetserarecapa. Tásiha, titupihachaha te machacaya. ⁶ Eta
majicapirahi ema Jesús, máichirahi: “Nútira etánurepahi”, tiáquipaimuriavanapa ena sun-
taruana te apaquehe. ⁷ Tásiha, mayaserecavarepa ema Jesús:

—¿Nájaha ema etánucapahi?

—Ema Jesús Nazareno —najicapavarepa.

⁸ Éma, máichavarepa:

—Cápachi numetacaheripahi nútihira etánurepahi. Te nútichucha etánucanupahi, ísapayare
nayana ena nani —máichavacapa.

⁹ Étapaichuhi eta máechajiriruvahi ema Jesús te tiyujaracaipa nájina émanainahini náemitia-
cchini te namuri ena máijararuanahi ema Maíya. ¹⁰ Tacahe, ema Pedro, tatiaríhihi eta
mayehe espada te mañahe. Mavehapa, máechuchacachapa eta machaca te vaure ema
achane ticaijare Malco, mavanarahi ema aquenuca Caifás. ¹¹ Émasera ema Jesús macahepa:

—Pinaca te tatumaramuhi eta piyehe espada. Vahi pihapapicaimahi eta táitauchiravaya
eta mavarahaquenehi ema Tata, taicha nutuparahaichuhi mayehe eta juca nucataji-
vairaya —macahepa.

*Nacaratacapa ema Jesús, námapa te mamirahu ema corregidor
(Mt 26.57-58; Mr 14.53-54; Lc 22.54)*

¹² Tacahe, ena suntaruana émapa ema comandante nacaratacapa ema Jesús, náitiji-vauchapa. ¹³ Tiyananapa námapa te mapena ema Anás. Étarichu mapena ema Caifás, taicha ema maca Anás máimachucahi ema Caifás, émapasera tuparairucahi te jena áñoi máitsivaequenehi ema máimachuca. ¹⁴ Ema maca Caifás, émarichuvare ticaechajiriruvahi eta máepenirainahini ema émana achane tivachachayarehi eta náitaresirana namutu ena achaneana.

*Ema Pedro tépiyacavapa vahi máimati ema Jesús
(Mt 26.69-70; Mr 14.66-68; Lc 22.55-57)*

¹⁵ Ema Pedro, nútipa nuti Juan viyanapa véhiequenehapaipa ema Jesús. Nusiapapa nútí te tajuhe eta canchón mapenahi ema aquenuca Anás, taicha náimaticasarenuhi ena mavanarana. ¹⁶ Émasera ema Pedro manasipa te aneca te tapajachacaya. Tásiha, néchajiacapa esu vanaracahi téchahi eta tapaja, sucasiapahini ema Pedro. ¹⁷ Tásiha, esu suyaserecapa ema Pedro, ánipa suicha:

—¿Pítirichu jácani apanava ñímiture eñi ñica Jesús?

Ema Pedro majicapapa:

—Vahi nútina.

¹⁸ Tásiha, eta jena yátiquenehi táetaviuchahi eta tacasaraivahi. Ena mavanaranahi ema Anás, énapa ena suntaruana ticamururecanapa eta yucu, násasiavayarehi. Eta náurujiyasi-rapahi eta yucu, titupihapavare ema Pedro te nachacaya, másasiavahivare.

*Ticayaseserehipa ema Jesús te mamirahu ema Anás
(Mt 26.59-66; Mr 14.55-64; Lc 22.66-71)*

¹⁹ Tacahe, ema Anás mayaserecapa ema Jesús áyananapuca ena téhicanahi éma, tájahahivarepuca eta máimiturapihi eta nayehe. ²⁰ Ema Jesús majicapapa, ánipa macahe:

—Núti vahi nuyumurucavahini eta nímituresirahi. Nímecavahi te namuri namutu ena achaneana te viúrujisirarevana, éapa te Templo. Éta nímituresirareanahi. ²¹ ¿Tájaha tacayema piyaserecanu nútí? Piyaserecapaini ena tisamararacananahi. Énaina nametacavi eta nímiturapianahi nútí —macahepa.

²² Matiarihíhi ema émana suntaru te machacaya. Eta masamirahi eta máechajiriruvahi ema Jesús, máehamirahapa éma. Tásiha, máichapa:

—¿Tájaha tacayema tíñemahi eta pijicapirahi ema aquenuca macapichahuquenehi? — máichapa.

²³ Tacahe, ema Jesús majicapapa:

—Váhira táíñemahihini eta nujicapirahi ema aquenuca eta taviuchanuhini. ¿Tájaha tacayema péhanu? —macahepa.

²⁴ Tacahe, ema Anás máevatacapa mayehe ema Caifás, émarichuhi corregidor. Ticaitihapipahi eta námirapahi éma.

*Ema Pedro tíapechavavare tépiyacava vahi máimati ema Jesús
(Mt 26.71-75; Mr 14.69-72; Lc 22.58-62)*

²⁵ Tacahe, ema Pedro manasirichuhi titupihahi te tachacaya eta yucu, tiásacavahi éma. Nayaserecavarepa nápechahi:

—¿Pítirichu jácani máimiture ema maca achane? —náichapa.

Ema Pedro majicapapa:

—Vahi nútina —macahepa.

²⁶ Tásiha, matiarihihivare titupihahi ema mavanarahi ema aquenuca, macheji ema máechatichacaruhi ema Pedro. Tacahe, éma téchajicapa, máichapa:

—Núti németeaca nímahavihi picachanehi éma tayehe eta huerta te vicaratasinehi ema maca —máichapa.

²⁷ Émasera ema Pedro macahevarepa:

—Váhiquene nímati éma —macahepa.

Tásiha, enurujiapa téchajicanecha eta varayu.

*Ema Jesús námapa te mamirahu ema Pilato
(Mt 27.1-2, 11-14; Mr 15.1-5; Lc 23.1-5)*

²⁸ Te jena yáticarahi, te tijararahipa, nacuchucapa ema Jesús te mapena ema Caifás. Námapa tayehe eta palacio mávihahi ema Pilato. Váipasera nasiapahini ena tuparairucana. Náimichuhahi ema Pilato. Nanasipa te aneca, namavarairahi náechipejicavahini eta nanisirayarehi eta cordero pascual te jena sache. ²⁹ Tacahe, ema Pilato tíuchucapa, máechajimurihapa éna. Máichavacapa:

—¿Tájaha eta maviurevahi ema maca achane íamaquenepahi eta ani nuyehe? — macahepa ema Pilato.

³⁰ Éna najicapapa:

—Jucarihi eta maviurevahi. Eta tacahe, víamapahi eta piyehe.

³¹ Tásiha, ema Pilato, máichavacapa:

—Eyana iama. Étina ícuñaca ema maca, taicha jararihi eta eyeherepichuhi eti israelítana —máichapa.

Éna najicapapa:

—Étasea víti, vaipa ísapahavihini vítaucha eta viyeherepi vímicapaca mácáni ticaviurevahi, vitupisica te márijahi. Émasera ema maca vivaraha máepena. Vivaraha pémetatacaini te crusu —nacahepa.

³² Tacahehi eta táitachiravapaipa tamutu eta máechajiriruvanapahi ema Jesús eta máepenirayarehi te crusu.

³³ Tisiapavarepa ema Pilato te tajuhe. Máichuhapa ema Jesús. Tacahe, mayaserecapa:

—¿Yátupisareji réyvihí pítí nayehe ena pijaneanana israelítana? —macahepa.

³⁴ Ema Jesús máichapa:

—¿Pitupiruvahipuca eta juca píchiranuhi, pivairairahi pecha te yátupihipuca eta nur-reyvahi? ¿Pitanucahipucasera eta nuviurevayare, picutihpuca eta napanereruhi ena nujaneanana israelítana? —máichapa ema Jesús.

³⁵ Ema Pilato majicapavarepa:

—Vahi nímati eta epanereruana eti israelítana. Énarichuhi ena pijaneanana ena tuparairucana, éna tíamavianapahi eta ani nuyehe. ¿Tájaha eta piviuurevahi eta nayehe? —máichapa.

³⁶ Tásiha, ema Jesús majicapavarepa:

—Jéhesare, jararihi eta návacurehi; váhisera étaina te juca apaquehe. Te étainahini te juca apaquehe eta návacurehi, téhacacauhanuaripahini ena nímitureanahi, váhivare nacucarátacanuhi ena ticatianacanuahi. Taicha yátupiquenehi eta návacurehi, vahi étaina te juca apaquehe —macahepa.

³⁷ Tacahe, ema Pilato mápechavarepa mayasereca:

—Tacahe, ¿yátupihí eta pirreyvahi? —máichapa.

Ema Jesús majicapapa:

—Yátupi réynuhi nútí. Eta núcupaisirahi, núchucahi te juca apaquehe, nímiturecayarehi eta yátupiqueneana. Nácani tisupajirahianayare, nasamaracayare eta yátupiqueneana —macahepa.

³⁸ Tacahe, ema Pilato macahevarepa:

—¿Pítí pímijachava pímati eta yátupiqueneana? Nútí, németeaca nájina narataha náimatimahi eta yátupiqueneana —macahepa.

Ema Pilato macavanairipipa náetataca ema Jesús te crusu

(Mt 27.15-31; Mr 15.6-20; Lc 23.13-25)

³⁹ Te tamutupa eta mayaseresirahi, tiúchucavarepa ema Pilato. Máechajimurihapa ena ticatianacanuahi ema Jesús:

—Tájina maviurevaina ema maca achane eta nímairahi nútí. Étisea jucarihi eta eyeherepi te Páscuamuhuana eta nucaitisirayare ema émana presu. ¿Evarahapuca nucaítica ema eyehere Rey, íaquenumuri eti israelítana? —máichavacapa éna.

⁴⁰ Énasea típiararecanapa eta najicapirahi:

—¡Vahi vivaraha picáitica ema maca! ¡Émaina picáitica ema Barrabás! —nacahepa.

Ema Barrabás táemerataruhi eta máetaviuchirahi eta mámeravahi.

19

¹ Tacahe, ema Pilato macavanairipipa náestaca ema Jesús. ² Tásiha, ena suntaruana navehapa eta épire itapepi, náitsamemacapa. Nanacapa te machuti ema Jesús, majarapiyarehiji náicha. Namuíriachavarepa eta muíriare mularume. ³ Tásiha, nachayacapa éma, nacavayumarajipa nacaecahijiricapa. Ánipa nacahe:

—Tata, ¡pítitataji nayehevihiji Rey ena israelítana! —nacahepa.

Náehamirahavare te mamira.

⁴ Ema Pilato tíapechavarepa tiúchucahi. Tásiha, máichavacapa ena achaneana:

—Nímereca te emirahu ema maca achane. Nuvarahasera ácaucituaraini eta tamajinairahi maviurevainahini eta nímairahi nútí —máichavacapa.

⁵ Tacahe, nacuchucapa ema Jesús, mámapaipa eta itapepi te machuti, majarapihi náepiyaruhi éna, étapa eta namuriaruhi mularume. Tásiha, máichavacapa ema Pilato:

—Mácaripa ema maca achane. Ticaemecharáhiripa, ticaestarijavare. Maratapa — macahepa.

⁶ Te náimahapa ena tuparairucana énapa ena nasuntaruana, tipiaracanapa:

—¡Pémetatareca te crusu! ¡Pémetatareca te crusu! —nacahepa.

Ema Pilato máichavacavare:

—Núti tájina maviurevainahini eta númairahi. Étina écha eta iámairaya éma. Étina émeta-reca te crusu —máichavacapa.

⁷ Éna najicapavarepa:

—Ichape eta maviurevahi ema maca eta viyehe, taicha tímijachavahi Machicha ema Viya. Vivaraha máepena, taicha váhiquene vísapahini eta juca —nacahepa.

⁸ Eta masamirahi ema Pilato eta machichairahipuca ema Viya ema Jesús, ichaperinehi eta mapisirahi. ⁹ Tisiapavarepa tayehe eta mayehe palacio. Máichuhavarepa ema Jesús. Mayaserecavarepa:

—¿Nájahavisica píti? ¿Távihasica eta piásinehi? —macahepa.

Émasera ema Jesús, tájina vahi majicapahini.

¹⁰ Tásiha, ema Pilato máichavarepa:

—¡Vahi pivaraha pijicapanu! Échapuca píti eta nuratahairahi nucuchucuhavi, énerichuvare nuratahavare nucavanairipi náetatacavi te crusu —macahepa.

¹¹ Ema Jesús mapaenumavapa majicapa:

—Váhiquene piratahaimahi pítiyiva pémetatarecanuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana ena títararecanuanahi eta piyehe. Píti váhipanaichuhinéni eta pipecaturahi eta píchiranuhi —macahepa.

¹² Tacahe, ema Pilato mavarahainipa macuchucuhayarehini ema Jesús. Énasera ena tuparairucana tipiaracanavarepa:

—¡Te picaitica ema maca, vépiyaequenehaviyare mayehe ema ichapequene aquenuca Emperador! ¡Ema maca achane macatianarúhi ema Emperador taicha tímijachavahi rey! —nacahepa.

¹³⁻¹⁴ Tacahe, te masamapa ema Pilato eta náechajiriruvahi éna, tiyanapa te anuquehe, téjacapa tayehe eta máejasirare apaesa namutuyarepa náimaha. (Eta mávacurehi, amairiha máripahi. Eta jena sache, vírnesi táequenereruhi eta Pascua.) Tacahe, tiánehiripa las dóceyarehi eta sache macavanairipipa nama ema Jesús. Tásiha, máichavacapa ena achaneana:

—¡Mácaripa ema eyehe Rey! —macahepa.

¹⁵ Énasera tipiaracanavarepa:

—¡Pémetatarecavane! ¡Máepenanepa! ¡Váhiquene vivaraha ema maca! —nacahepa.

Tásiha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Emperador! —nacahepa.

¹⁶ Tacahe, ema Pilato máisapapa. Májjaracavacapa ena masuntaruna eta náetatasirayare ema Jesús. Jéhesaréinehi námapa éma.

Náetatacava te crusu ema Jesús

(Mt 27.32-44; Mr 15.21-32; Lc 23.26-43)

¹⁷ Tacahe, nájjaracapa ema Jesús eta macurusuraya. Tiúchucapa éma, mámapaipahi te majihu. Námapa eta te Calvario (te hebreo ticaijare Gólgota). ¹⁸⁻¹⁹ Tásiha, ema Pilato máepiyacapa eta ajureca eta táechajiriruvahi, ánipa tacahehi: “Ema Jesús Nazareno, Rey nayehe ena israelítana”. Te tápusi eta macurusura nanacapa eta juca ajureca. Natiarihivare ena apinana ticaetatanahivare te machacaya. Émasera ema Jesús, te enumuhu mávihahi.

²⁰ Camuriana ena achaneana téchajicuhanahi eta ajureca, taicha eta macaetataiyahi ema Jesús tacachacayaichuhi eta avasare. Eta ajureca, te hebreo, te griego, téhepa latín. Mapana eta táechajiriruvanahi. ²¹ Eta tacahe, ena tuparairucana tiyananapa mayehe ema Pilato nayaseapanahi máitsivachahini eta ajureca. Éna navarahahi áni tacaheyarehi eta ajureca: “Ema maca tímijachavahi Rey nayehe ena israelítana”. ²² Émasera ema Pilato máichavacapa: —Eta ajureca nunacaquenehi, nájina tihapapicaimahi —macahepa.

²³ Te náitauchapa ena suntaruana eta náetatasirahi ema Jesús, nasuertehachapa eta mamuiriha nayehe ena cuátroqueneana. Navehavarepa eta apana mamuiriha. Étasera tájina taparinahini, amairijuheichucha eta itsameruca. ²⁴ Vaipa návarahahini navetsayucahini. Tásiha, nasuertehachavarepa, náimairayarehi nájahayarehipuca mácani tivecuhayarehi.

Tacahehi eta táitachiravahi eta Sagrada Escritura eta táechajiriruvahi: “Ticajjiricanapa eta numuirihaini. Nasuertehachavare eta apana numuiriha”. Jéhesare, tacahehi naicha ena suntaruana.

²⁵ Te tápecu eta macurusura ema Jesús, sutiarhihi esu maena, ésupa esu mápenaru, ésupa esu apana María mayena ema Cleofas, ésupa esu María Magdalena. ²⁶ Tacahe, te máimahapa esu maena eta sutiarhirahi te machacaya, nútupa nuti máimiturehi máemunaruquenehi, ánipa máicha ésu:

—Mémechicha, márahi ema nítivayare ema pichichayare. Éma títátiviyare.

²⁷ Tásiha, énerichuvare tituparacanuvarépa nútí:

—Némunacasare, nutuparacavi esu meme. Esu pényare. Pímainanu —máichanupa.

Jéhesaresera, nútí Juan ichaperinehi eta nujacapirahi esu maena. Námapa te nupena.

Eta máepenirahi ema Jesús

(Mt 27.45-56; Mr 15.33-41; Lc 23.44-49)

²⁸ Tacahe, eta máimairahi ema Jesús eta táitachiravaripa tamutu eta táechajiriruvanihi eta Sagrada Escritura, ánvare macahehi:

—Tétavicava eta numauneva —macahepa.

²⁹ Tatiarhihi eta tísisica vino te tinaja. Náechipajjicapa eta machuchujiruyarehi. Náimicapayacapa tayehe eta majaca te tiúqui curina. ³⁰ Tacahe, machuchujicapa ema Jesús eta tísisica vino. Tásiha, macahepa:

—Jéhevare puiti, títauchavapa tamutu —macahepa.

Tásiha, téyusicapa. Tépenapa.

Ema émana suntaru mayuvaracapa te machene ema Jesús tayehe eta lanza

³¹ Tacahe, ena tuparairucana vahi návarahahini nánasihini ena ticaetatanahi te crusu te jena sache sávaru páscuairahi. Tacahe, tiyananapa mayehe ema Pilato, nayaseapanahi macavanairipihini eta nacavetupaiquechavacayarehi apaesa náepenavanehini. Navarahahi náecarávane, taicha tétavicavahi eta tacapicahuirahi nayehe éna eta jena sácheana páscuairahi. ³² Jéhesaréinehi, tiyananapa ena suntaruana, nacavetupaiquechavacapa ena apinana tíamerahiana nacaetataquenehi te crusu te machacaya ema Jesús. ³³ Tásiha, éneyareichuhivaréni ema Jesus. Téhesera te náitecapauchapa, náimahapa eta máepeniraipahi. Tacahe, vaipa nacavetupaiquechahini éma.

³⁴ Táitsivahisera ema émana suntaru mayuvaracapa te machene tayehe eta lanza. Enevanépa tiúchucahi eta iti étapa eta une. ³⁵ Nútí Juan nájuequenehahi tamutu eta juca, nímahaqueneanahi. Nuvaraha nítametacahe tamutu. Yátupihivare eta numetasirahehi, taicha nuvaraha esuapahini éti apanavare. ³⁶ Títauchavahi eta juca táechajiriruvahi eta Sagrada Escritura: “Tájina vahi nacavetucaimahi eta máperana”. ³⁷ Jararhivare eta apana Escritura, ánvare tacahe: “Náimahayare ema najarachaquenehi”.

Nacucupaicapa te crusu ema Jesús, náecarayarepa

(Mt 27.57-61; Mr 15.42-47; Lc 23.50-56)

³⁸ Te tamutupa eta juca, matiarhihi ema achane José, ticavasahi te Arimatea. Émarichuhi tisuapajirahíhi mayehe ema Jesús. Váhisera máimerecavahini, mapisiravacahi ena machamuriana aquenucarahana. Tiyanapa éma mayaseapanahi ema Pilato eta máquehe ema Jesús. Tacahepera ema Pilato máisapapa. Tiyanapa ema José, macucupaipanapa eta máquehe ema Jesús. ³⁹ Émapa ema Nicodemo macachanehi, ema téjirapanahi ema Jesús te jena yátimuhuquénehi. Mámapahi éma eta treinta kilo eta perfume mayajihayarehi. ⁴⁰ Tacahe, ema José émapa ema Nicodemo navehapa eta máquehe ema Jesús, náyuruacapa eta te sávana tijapu táurinaquenehi. Nayajihacavarepa tayehe eta tájijyequene perfume. Tacahehi eta viyeherepi te vécarayare ena náepenaqueneana. ⁴¹⁻⁴² Tacahe, te tachacaya eta máepeninehi ema Jesús, tatiarhihi eta huerta te távihahi eta mari natsecajueruhi ecariyare tacúthi eta covacha. Nájinaichaha nacaecarasihini tayehe. Étapa náecarihahi eta máquehe. Tiputuvahuanapa taicha cáperehichicharipahi. Vahi táisapacarehini náecarahini te yati, váhivare táisapacarehini te apanapa sache taicha sávarumuhupahi.

20

Eta máechepusira ema Jesús te máecari

(Mt 28.1-10; Mr 16.1-8; Lc 24.1-12)

¹ Tacahe, te jena sache lumincuquenehi, te tijarahichichapa, tiyanapa esu María Magdalena tayehe eta máecari. Timapicuihaha te suitecapauchapa eta ecari, suímahapa tájinaripahi eta mátime tajihainihi eta tapajacurahí eta ecari. ² Te suímahapa, tichavavanépa tijnapapaipahi. Suíchuhapanayarehi ema Pedro nútípa nuti Juan. Timetacahavipa ésu:

—Námechapa jácani eta ñáquehéni eñi Viáquenu. Vaipa vecha táviahapuca nanasihahi —sucahepa.

³⁻⁴ Tacahe, núti émapa ema Pedro viúchucapa viyanapa vijunapapaipahi. Nucachuricapa ema Pedro. Nítecapavanepa núti tayehe eta máecari ema Viáquenu. ⁵ Nétipaicapa. Nujíña-ñajuechapa. Tacarinehi nímaha eta máyuruhánainihi. Váhiserá nusiapahini. ⁶⁻⁷ Te títecapapa ema Pedro, tisiapapa éma tayehe eta ecari. Máimahapa eta máyuruhánainihi. Tanasirinecha enurujuhehi, étapa eta mamuhisiequene ema Jesús. ⁸ Tacahe, nusiapavarepa núti tayehe eta ecari. Nímahapa eta táichararacavahi. Tásiha, ichaperinehi eta nusuapirahi. ⁹ Vipaenu-mavapa vicaicutiarahi eta táechajiriruvahi eta Sagrada Escritura, eta máechepusirayarehi ema Viáquenu te máecari. ¹⁰ Te tamutupa eta vímairahi, vichavapa te vipena.

*Ema Jesús tímerecavapa suyehe esu María Magdalena
(Mr 16.9-11)*

¹¹ Esu María Magdalena, énerichuvare tíapechavaripa tichava eta te máecari. Sunasipa, tíyahaipa. Tásiha, tétipaicapa sujínáachahi te tajuhe. ¹² Tiáramicarepa suímaha ena apinana ángeleana, tijapumuirihavacahi. Téjacanahi éna te tajuhe eta máecarini. Ema émana te tanapaihi eta machuti, ema apana te máivape. ¹³ Tásiha, ena ángeleana nayaserecapa ésu: —¿Tájaha ticaiyacavi, nuchicha? —náichapa.

—Ticaiyacanuhi eta náechirahi eta ñáquehe eñi Viáquenu. Vahi nécha táviahapuca nanasihahi —sucahepa.

¹⁴ Te títapiricapa eta súchiravacahi, téviurucavapa, suímaharinehi ema Jesús. ¹⁵ Tásiha, éma apanava mayaserecapa: —¿Tájaha ticaiyacavihi, nuchicha? ¿Nájaha pitanucahi? —máichapa. Ésusera suímijachaichucha ema tijanearecarahi eta huerta. Tásiha, suíchapa:

—Tata, te pítihipuca piámahi eta ñáquehe eñi Viáquenu, picatajicanu pimetcanu táviahapuca pinasihahi. Nuvaraha námayare núti —suíchapa.

¹⁶ —¡María! —máichapa.

Suésenicainehi ésu. Supaenumavapa suímatihí éma. Tásiha, suíchapa:

—¡Pítiquenehi, Tata Náquenu!

¹⁷ Tásiha, ema Jesús máichapa:

—Vahi picuemamahacanu, taicha vuíchaha nápanahini te mávihahi ema Tata. Piyana pimetcavaca ena apamuriana nímitureana eta nápanirayare mayehe ema Tata, Ecaiaque-nehivare éti apanava —máichapa.

¹⁸ Tacahe, esu María Magdalena tiyanapa sumetapanavacahi ena suchamuriana eta suímairahi ema Jesús, étapa eta mametarapianahi.

*Tímerecava ema Jesús nayehe ena máimitureana
(Mt 28.16-20; Mr 16.14-18; Lc 24.36-49)*

¹⁹ Étarichu te jena sáchequenehi lumincuquene, yátiripahi, viúrujicavahi víti máimitureana ema Jesús te tajuhe eta peti. Vérateaquenerecavahi taicha eta vipisirahi ena tuparairucana. Tiáramicarepa titupihahi ema Jesús te vímuri. Téchajichavipa:

—¿Ícharacava, nuchichanaveana? —máichahavipa.

²⁰ Tásiha, tímechahavipa eta majarana te mavahuana étapa te machene. Tacahe, víti ichaperinehi eta víurisamurevahi eta vímairahi éma. ²¹ Tásiha, máichahavipa:

—Vahi ecueñamava. Núti, mavanerunuhi ema Tata núcupaicayare te juca apaquehe, nímitucaheyarehi éti. Puiti nuvanecaheyare núti ímitucavacayarehi ena achaneana, apaesa náehicanuhini éna apanava —macahepa.

²² Tásiha, tíchajucachavipa víti. Tásiha, máichahavivarepa:

—Táuri eta ejacapiraina ema Espíritu Santo eta máitecapauchiraheya, mávahásiraheya.

²³ Éma, tímitucaheya eta ítametasiravacaya ena achaneana eta naperdonachacarevahi me Viya ena téneuchavanahi. Te vahi nacubaraha téneuchavana, tanasiyare eta naviurevana taicha eta napecaturana —macahepa.

Ema Tomás vahi masuapa eta máechepusiraipahi ema Jesús

²⁴ Te jena sache eta máímeresiravahi ema Jesús eta viyehe, májinahi ema vichamuri Tomás. ²⁵ Tásihasera, ena apamuriana vichamuriana nametacapa éma eta vímairaipahi ema Jesús. Émasera macahepa:

—Vahi nusuapa. Téhesera te nímaha eta majara te mavahu taicha eta clavo, nímisipavare eta nuvaquí tayehe eta majara te machene, tapaenumava nusuapayare eta máechepusiraipahi —macahepa.

²⁶ Te óchopa sache eta táetavisiravahi, viúrujicavapavare te viúrujisirareva. Matiarhipahi ema Tomás te vímuri. Tásiha, tíramicarevarepa tímerecavahi ema Jesús. Titupihahi te vímuri. Téchajichavivarepa.

—Ícharacava, nuchichanaveana —macahepa.

²⁷ Tásiha, máichuhapa ema Tomás:

—Yare, nuchicha —máichapa—. Pímaha eta nujarana te nuvahuana. Pímisiapa eta pivauqui eta te juca nuchene, apaesa pisuapanu.

²⁸ Tacahe, ema Tomás majicapapa:

—Tátachicha, piti yátupiquenévi Viya. Tétavicavahi eta nucasiñairavihi —máichapa.

²⁹ Ema Jesús majicapapa:

—Nuchichasami Tomás, pipaenumava pisuapanu eta pímairanuipahi. Tétavicavasera náuricacareva nácani tisuapajirahianahi vahi tácomesahini náimahanuhini —macahepa.

Nuvaraha esuapa eta juca libro nájurehi

³⁰ Jucarihichahavare eta apamuriana tíramicareana máichaqueneanahi ema Jesús, eta vímahaqueneanahi viti máimitureana. Váipasera tamutuhini tacajuhini te juca libro.

³¹ Nuvarahasera ácaicutiara eta nájureanahi apaesa esuapahini ema Jesús eta émairaquenehi Cristo, Machichaquenehi ema Viya. Taicha te esuapapuca éma, máitavacacayare eta itaresirayare.

21

Tiápechavavare tímerecava ema Jesús nayehé ena siétequeneana máimitureana

¹⁻⁴ Tiuri, te táequenepa eta juca, viyanapa víti te Galilea, vicuchapayarehi ema Jesús. Ánaqui matiarihíhi ema Pedro, ema Tomás, ema Natanael, ema nuparape Jacobo, núpita nuti Juan. Natiarihivare ena apinanahi vichamuriana. Tacahe, ema Pedro máichahavipa:

—Nuyanayare nénipanayare te cáquiure —macahepa.

Tásiha, víti vijicapapa éma:

—Véhicaviyare víti apanava —víchapa.

Tacahe, te vítecapapa, víávacuhapa tayehe eta pacure. Vénicaipahi te jena yátiquenehi. Tájinasera vítucavahíni. Te tíjárarahichichayaréipa, vímahapa ema Jesús. Titupihapahi te tachaui. Váhisera vímativanehíni. ⁵ Tásiha, téchajicahavipa:

—¿Ícharacava, nuchichanaveana? ¿Tájina ítucava eta jima? —macahepa.

Vijicapapa víti:

—Tájina vítucava —víchapa.

⁶ Tásiha, éma tivanecahavipa víáquiieca eta viyehe tarrafa te apachacaya eta pacure tinapaicahi te vaure.

—Eta ítusiavayare eta jima —máichahavipa.

Visuapahisera víti. Tásiha, te vichuruecapa eta viyehe tarrafa, vaipa víchinahini taicha táetaviuchahi eta camurirahí eta jima. Tijítacarenecha. ⁷ Tásiha, núti níchapa ema Pedro:

—¡Émara ema Víáquenu! —níchapa.

Masaminenurichuhi ema Pedro eta níchirahi, ticamuirihavanepa taicha tivejamuhia-cavahi éma eta mamuiríha. Tépuhecavapa, mavarairahí macapayacavaneyarehi ema Víáquenu. ⁸ Víti apamuriana vípauchapa eta tachaui. Vichuruecapaipahi eta viyehe tarrafa; tínicapapahi eta camuríquene jima. Cien métrorichuhiserapuca eta víyerehirahí eta tachaui. ⁹ Te víucupaicapa te tachaui, vímaharinehi tatiarihíhi eta yucu, étapa eta jima jitaruca, étapa eta pan. ¹⁰ Tásiha, ema Jesús máichahavipa:

—Íama eta íturevahi jima —máichahavipa.

¹¹ Ema Pedro machurupaicapa eta tarrafa. Vímaharinehi eta ichapemuríquene jima. Ciento cincuenta y tres eta tasimurivahi. Váhisera táetsayucahini eta viyehe tarrafa.

¹² Tásiha, tíchuhahavipa ema Jesús:

—Yare, enica —macahepa.

Tásiha, viyanapa víti, vínicayarehi. Váhisera vipatsicavahini víyaserecahíni te nájaha-hipuca éma taicha tétavicavahi eta víáramesirahí. Vímaticahisera eta émairahí ema Víáquenu. ¹³ Tásiha, ema Jesús témeñahavapa. Mavehapa eta pan. Tíjaracahavipa. Étapa eta jima táimaqui quenepa, tíjaracahavivarepa.

¹⁴ Eta juca eta mapahequenepa eta máimeresiravahi ema Jesús eta viyehe eta máechepu-sirahi te máecari.

Ema Jesús mavaraha macaicutiara te yátupipuca máemunaca ema Pedro

¹⁵ Te vítanésipa eta vinisirahí, ema Jesús mayaserecapa ema Pedro. Ániapa máicha:

—Píti Pedro, nuvaraha nuyaserecavi: ¿Picachuricapuca píti ena nani apamuriana eta pémunasiranuhi? —máichapa.

Éma majicapapa:

—Némunacavi, Tata. Pécharichuhi píti jácani némunasiravíhi —macahepa.

Ema Jesús máichavarepa:

—Tiuri, te yátupihipuca pémunacanu, nuvaraha pijaneasinanuvaca ena téhicanuanayare, taicha vahi náituchahini nacatiuchavahini. Téñamacareanahi —macahepa.

¹⁶ Te táequenepe, mápechavare mayasereca:

—Pedro, nuvaraha nuyaserecavi: ¿Yátupi eta pémunasiranuhi? —máichapa.

—Némunacavi, Tata. Pécharichuhi píti eta némunasiravihi —máichapa ema Pedro.

Ema Jesús máichavarepa:

—Tiuri, te yátupihipuca pémunacanu, pijaneasinanuvaca ena téhicanuanahi —macahepa.

¹⁷ Te táequenevarepa, mapahequene mayasereca:

—Pedro, ¿yátupi eta pémunasiranu? —máichapa.

Émasera ema Pedro tatsirihapa taicha mapaheripa eta mayaseresirahi. Majicapavarepa:

—Pécharichuhi, Tata, eta némunasiravihi —macahepa.

Tásiha, máichavarepa ema Jesús:

—Tiuri, te yátupihipuca pémunacanu, pijaneasinanuvacayare ena téhicanuanahi.

¹⁸ Nutupiruva numetacavi: Eta piámaperuvahi, píti péchinavahi eta pítaresirahi. Picamuirihahi, piyanahivare te jácani pivarahaqueneanahi picaijuhe. Jácanisera áñoanayare eta pichávicavaipa, apanainapa eta pítaresirayare. Apananainapa ena timuriachavianayare, taicha titijivauchavianayare, tásiha tiámavianainapa te jácani pimavarahaquenéni picaijuhe —máichapa.

¹⁹ Eta juca máichirahi ema Jesús, mavarairahi máiminecapaequenehayarehi eta máicharacavayarehi eta máepenirayare ema Pedro. Tétavicavainapa eta macunachacareva ema Viya maicha ema Pedro, taicha vahi téquecavaimahi eta máimairahi eta macatajivairaya. Tásiha, máichavare ema Jesús:

—Piti Pedro, tacuija tahapapiricahini eta pítauchira tamutu eta nutuparasiravianahi —máichapa.

Eta táichecuine eta májurehi ema Juan, máemunaruquenehi ema Jesús

²⁰ Tásiha, téseniequenehavapa ema Pedro, tímahanupa eta néhiequenehairapahi nuti máemunarunuhi ema Jesús. (Nútirichu núti nuyaserecahi te mesa te nájahhipuca ema tjararecayarehi.) ²¹ Eta máimairanuhi ema Pedro, mayaserecapa ema Jesús tájahapuca eta nícharacavayarehi núti apana. Ániapa macahe ema Pedro:

—Tata, ¿tájahapuca máicharacavayare ema apanava ema maca?

²² Ema Jesús majicapapa:

—Núti nécha. Te nuvarahapuca máitareca máimahayare eta nápechiravayare nuchavirayare, vahi tacuimipanerecavi. Pítisamisera, pítaucha tamutu eta nutuparasiraviana. Tacuija tahapapiricahini eta péhisiranuhi.

²³ Tacahe, ena nuchamuriana, ichaperinehi eta napanerequenehairahi eta numaepe-nirayarehi. Váhisera mametacahini eta numaepe-nirayarehi. Tacarichu macahehi: “Te nuvarahapuca núti máitareca máimahayare eta nápechiravayare nuchavirayare, vahi tacuimipanerecavi” macahepa.

²⁴ Nuparapenaveana, núti yátupiquenenuhi eta máimiturenuirahi ema Jesús. Nutupiruvahi néchajisiha te juca nájurehi eta yátupiqueneana nímahaqueneanahi.

²⁵ Jucarihíchaha eta apamuriana máichaqueneanahi ema Jesús. Váipasera támutihini nájuequénéhahini, taicha tétavicavahi eta táichapemurivahi. Te vítametacapucaini tamutu eta máichaqueneanahi, váipapuca vicuratahahini vítuca, namutihinéni ena achaneana te juca apaquehe tiájuequenerahiana.

Tamutupa eta juca nájurehi.

Ena San Lucas májuequenehahi eta náichararacavahi ena Apóstoleana eta náehisirahi ena Jesucristo, ticajjare LOS HECHOS

¹ Piti Teófilo, títecapáuchaviripa eta tánapure nájure tayehe eta máichavaqueneváhi ena Jesucristo te títecapapa te juca apaquehe. Nájuchahi tamutu eta máichaqueneanahi, étapa eta máimiturapianahi. ² Nararihíhi ena manerejiruana apóstoleana. Émaripa ena Espíritu Santo máimicacachi eta matúparasírvacachi éna. Nájuchavarepa eta mayapirahi te anuma. Puiti nímiama-recavare eta piyehe eta juca nájure, apaesa pímati tamutu eta téchacareana tayehe eta máichavaqueneváhi ena Jesús. ³ Te táequenepe eta máepenirahi, téchepucapa te máecari, tiápechavavare títareca. Tásiha, cuarentaquenehi sache eta macáchanéravacaríchaha ena máimitureana. Máimerecachi ichape eta machavirahi títareca. Máimitucavacachi éna, eta táichararacavayare eta náehisirayare ena Viya ena achaneana te tamutu avasareana.

Ena Jesucristo mametaca eta máucupaisirayare ena Espíritu Santo

⁴ Te jena sache, macáchanevacaríchaha ena apóstoleana, mametacavacapa. Ánipa maicha: —Vahi ecújúnijica eta juca víavasa Jerusalén. Ecuchapayare eta táitachuravayare eta máijjararuvahi ena Vicaiyaquene. Étaripa eta juca numetarapianahi. ⁵ Échavarichu ena Juan, máicachasicavacachi te une ena achaneana. Étiserá, puiti juca sácheanayare, tíucupaicayare ena Espíritu Santo. Ena tícachasicaheyare, tiávahácahénapa —macahepa ena Jesús.

Ena mayapira ena Jesús te anuma

⁶ Tacahe, nayaserecapa ena tíurujícanahi ena Jesús. Ánipa naicha: —Tata Viáquenu, ¿puítinríchu píjaracahavi viti israelítana eta vitináni vigóvernachacáca te juca víavasa? —nacahepa.

⁷ Ena Jesús majicapapa, ánipa maicha:

—Vuíchaha táechacare. Vahi tatuparaca étinahíni echa tájahapuca sáchevayare, tájahapuca cájevayare títauchavaya. Taicha tayumurevahí eta juca maicha ena Tata Vicaiyaquene. Macarichu éma máituruequeneha eta juca. ⁸ Jucarihiserá eta ítucaquenyare. Ena Tata tíjaracaheyare ena Espíritu Santo, tiávahácaheyare tímicatacaheyare. Tacahe, échajisianuínapa núti. Tamutuyare avasareana eta epaisiha, te Jerusalén, te Judea, te Samaria, étapa te jácani tayerehiqueneana avasareana tayehe te juca apaquehe —máichapa ena Jesús.

⁹ Tacahe, te títavapa eta máechajirísiravahi, tiyanapa tiyapa te anuma. Tacahe, ena máimitureana náimararaequenehaipa eta mayanirahi. Táepacuchirahi eta úcaji. Vaipa macaecherahíni te anuquehe. ¹⁰ Eta mayanirahi ena Jesús te anuma, náimararacáichaha ena máimitureana. Tacahe, tíaramicareanapa tímerecavana ena apinana ángeleana. Tijapumuirihavaca. ¹¹ Tacahe, náichapa ena ángeleana:

—¿Tájaha íchahi ímararacahi eta anuma, eti máimitureana ena Jesús? Puiti enecapararecachi ena Jesús eta majunijisiraheripa, mayanirapa te anuma. Vimetacahe: Te jácani sácheare, ena Jesús tichavayare te juca apaquehe. Tíucupaicayare tacutiyareichu eta mayanirahi —náichavacapa ena ángeleana.

Nanerejicapa ena Matías, máitsivayarehi ena Júlasí

¹² Tiuri, eta návihairahi te anuquehe masíhi ticajjare Olivoquiji. Tachacayahi eta Jerusalén, apina kilómetro eta tayerehivahi. Tiyananapa tichavana tayehe eta avasare. ¹³ Te títecapanapa te avasare, tisiapanapa te peti apina piso, eta náitecapihahi. Tiápananapa te téqueneha piso. Natarihíhi ena Pedro, ena Jacobo, ena Juan, ena Andrés, ena Felipe, ena Tomás, ena Bartolomé*, ena Mateo, ena apana Jacobo, ena Simón, émapa ena Judas. ¹⁴ Natarihivare ena maparapenaveana ena Jesús, ésupa esu maena María, énapa ena apamuriana esenana. Tamutu sácheana, ena nani tíurujicavanahi eta nayujarasirahi.

¹⁵ Tacahe, te jena sácheana, ena náurujiruvananahi náetavicahi ciento veinte eta nasimutuvá ena máimitureana ena Jesús. Tacahe, téchepucapa ena Pedro te namuri, titupihapa. Máichapa:

* **1:13** Ena Bartolomé ticajjarehivare Natanael. Ena apana Jacobo, machichahi ena Alfeo (váipasera véchapirica eta máitaresira ena Alfeo). Ena Simón, nachamurinihi ena revolucionario ticajjareana “cananístana”. Ena nani cananístana nacanarajirichahi ena apavasanana romanoana, navarairahi náquijica, nacuchucayare te návasa Judea. Ena maca Judas, matiaríhi ena maparape ticajjarehivare Jacobo, váhisera nachamurinahini ena apóstoleana. Ena maca Judas, mapanahi eta májjare: eta Tadeo étapa eta Labeo, étapa eta Judas. (Te pívaraha pecha, pitanuca te libro Marcos 3.18 étapa te Mateo 10.3.)

¹⁶ —Nuparapenaveana, ema víyarahaini David macaimitucasiquenehi mayehe ema Espírítu Santo, ánaquiríchaha eta áñoana eta matiarihiraema ema Júlasí, ema tñapumiráuchaya ena suntaruana nacaratacaya ema Jesús. Títauchavapa eta mametarapihi ema Espírítu Santo. ¹⁷ Taicha ema Júlasí, émainichuhi vichamurini tayehe eta juca vématanerepíhi — macahepa ema Pedro. ¹⁸ (Émasera ema Júlasí ticapacavahi tichumucavapa. Tiáquipaicavahiséra eta máquehe. Tiúchumuriapa eta maturupiana. Te táequenepe, navehapa eta mavachainíhi eta májjararesiráhi ema Jesús. Navacharecapa eta apaquehe. ¹⁹ Te náechapa ena ticavasana te Jerusalén, nanacapa eta tájarehi Acéldama. Eta ticajarehi puiti “Apaquehe máitinevacha ema Jesús”.)

²⁰ Tímiyanava eta máechajisirahi ema Pedro, ánípa maicha:

—Ema víyarahaini David májucunachahi eta mametarapiana ema Espírítu Santo eta te Salmo. Áni macahehi: “Machu nacuija nacusiapa eta mapena majunijiruipa nácani macutipanereruana eta mavainarajiva”. Ánivarepa macahe: “Tatuparacahi masiapaya ema apana achane máitsivaya te mávacurénihi” macahepaji ema Espírítu Santo.

²¹⁻²² Tacahe, tituparacahavi vinerejicare ema apana, máitsivaina ema Júlasí, apaesa vahi macuejiacava te vimuri viti dócequeneana. Máimicatacavahi eta véchajisiha eta máechepusirahi ema Jesús. Nararihi ani te vitaracu ena vichamurianahi te juca áñoana te matiarihichaha ema Jesús te vimuri. Ena ticachanehavianahi te ticaicachasinapa ema Jesús me Juan. Vahi najunijicahavíhini. Natiarihiquenehi te tiyapapa ema Jesús te anuma —macahepa ema Pedro.

²³ Tacahe, ticanerejianapa ena apinana: ema ticajare Matías, émapa ema apana ticajare José Barsabás (énerichuvare náimijarechahi Justo). ²⁴⁻²⁵ Tacahe, tiyujaracanapa, ánípa nacahe:

—Tata Viáquenu, piti pímati eta visamureana vimutu. Pímechahavi nájahapuca ema tiuri nayehe ena nani apinava vinerejiruanahi máitsivayare ema máemitariuhi apóstoleni Júlasí, táimicufariuhi eta mapectura —nacahepa.

²⁶ Tacahe, nasuertehachapa ena apinana. Tatocachapa ema Matías. Tásiha, natuparacapa eta mávacureyare nachamurirayarehi ena apamuriana apóstoleana.

2

Eta máucupaisirahi ema Espírítu Santo

¹ Tiuri, títicapapa eta sache napiestara ena israelítana ticajarehi Pentecostés. Tiúrujicavanahi ena apóstoleana énapa ena apamuriana nasimutuvaqueneana máimitureana ema Jesús. ² Tacahe, tiáramicarepa eta ticaema te anuquehe tásiha te anuma ticutipahi eta muraca técatícava. Ticaemapa muraca te táinahu eta peti návihahi éna. ³ Tacahe, tiáramicarepa tímerecava eta tacuti eta tanene eta yucu. Tijarahivacapa te nápusiana namutu ena náurujiರುವನಾಹಿ. ⁴ Tacahe, ena mávahácavacaripa ema Espírítu Santo. Tiáramicareanapa apéachajiríruvavacapa taicha eta mávahásiravacáipahi ema Espírítu Santo. ⁵ Te jena sache, natiarihivare ena camuriqueneana israelítana te Jerusalén tiásihana te tamútyaréini avasareana. Tipicaurahianahi tayehe eta nayehe religión. ⁶ Te nasamapa eta tacaemairahi te anuquehe, tícurujicacanapa ena achaneana. Náraminehi ichape táichavenehi eta nasamirahi ena apéachajiríruvavacáipahi.

⁷ Ichaperinehi nárami. Tacahe, náichacacapa:

—¿Tájaha tacayema eta juca? Ena nani, váhira vichamurianaina tayehe eta avasare viávihahi. Ticavasana te Galilea ena nani. ⁸ Tásihasera, náituchavare eta véchajiríruvavachu vímíuchurehi viti. ¿Tájahapapuca tacayema eta juca? ⁹ Camuriana eta véchajiríruvana taicha viti viásihahajíruvanahi te apanapanejiana avasareana. Nararihi ena tiásihana te Partia, te Media, te Elam, te Mesopotamia, te Judea, te Capadocia, te Ponto, te Asia, te Frigia, te Panfilia, te Egipto. ¹⁰ Nararihivare ena tiásihana te Cirene te Libia. Nararihivare ena tiásihana te Roma, ena yátupiqueneana israelítana énapa ena tépiyacavanaripa israelítana. ¹¹ Nararihivare ena tiásihana te Creta éapa te Arabia. Vimutusera visama eta véchajiríruvavachu. ¿Tájahapuca tacayema? Ena nani téchajicanahi timetacahavianahi eta táuricacarequeneana tásihaqueneanayare me Viya. Vicaicutiarahi tamutu taicha téchajicanahi te véchajiríruvavachu —nacahepa.

¹² Namutu napanerequenehahi. Vaipa náimatihini tájahapuca tacayema. Tiyaserejiricacavarepa:

—¿Tájahapuca tacayema eta juca? —nacahepa.

¹³ Natiarihísera ena apamuriana nacaecahírichucha, ánípa nacahe:

—Nacavahaqueneana ena nani —nacahepa.

Ema Pedro máechajicapa ena achaneana

¹⁴ Tacahe, titupihapa ema Pedro te namirahu ena achaneana. Natiarihivare ena óncequeneana apóstoleana. Téchajicapa muraca ema Pedro eta máechajisirahi, ánipa macahe:

—Tátanaveana nujaneanana, emutu eti ecavasana te juca Jerusalén, ecatajicanu esamanuchaha. Ácaicutiaraqúenéna eta juca nucayemayare. ¹⁵ Eti ímijachahi vicavaqueneana. Vahi vicavaqueneana. Tapaenumava las nuéverava yáticarahi. Écharichuhi éti vahi vítuca vera viti israelítana te yáticarahi. ¹⁶ Eta juca ímahaquenehi íaramiquenehi puiti, eta tacaheyarehi taicha mametarapihi ema Viya mayehe ema víyahaini profeta Joel. Tásiha, ema Joel májucunachapa eta mametarapihi ema Viya, ánipa tacahe: ¹⁷ “Jararihiya eta sácheanaya njaracayare ema Espíritu Santo nayehe namutu ena achaneana. Tásiha, ena echichanaveana, ajairana énapa ena esenana, nacametairuinapa eta néchajiriruva. Ena amaperuana, njaracayare eta náechirayare eta táicharacavayare. Ena ichavicachichana ticametacasanayare te navapure. ¹⁸ Taicha nuvanecayare ema Espíritu Santo, njaracayare mávahácavaca namutu ena nuchanerana. Tasiha, nacametairuinapa eta néchajiriruva tásihaquenehi nuyehe. ¹⁹ Te juca anuma nímerecayare eta tíaramicareana. Te juca apaquehe nucuchucayare eta ecutiarareanaya, apaesa ímatinu nuti nucarichu nurataha nicha tamutu. Nucamiricaya eta ecuñaraqú. Tépusaicavayare eta náitine ena achaneana váinarajiqueneanahi. Nucamiricayare te avasareana eta yucu étapa eta ichape quijare. ²⁰ Eta sache, nucaemahayare eta tajaraiwa. Énerichuvare nitsivachayare eta táimahi eta caje. Ítimeyare nícha. Tásiha, títecapainapa eta nusacherayare nuchaviraya nuti láquenu. Te jena sácheyare, ichape eta napisirainapa ena achaneana taicha nícuñacavacainapa namutu ena ticapecaturarahianachaha. ²¹ Étiserá eti ecasíñanuhi échajicanuhi eta te níjare nuti láquenu, nucuchucuhayare” macahepa ema Viya.

²² Tiuri puiti, nuparapenaveana nujaneanana, esamavare eta juca apana numetaruhayare. Ímatihí ema Jesús Nazareno. Ema maca ajaira, mavaneruhi ema Viya. Écharichuhi éti eta tíaramicareanahi máichaqueneanahi ema Jesús. Ema Viya májjaracahi eta máitupaji-jásiravayare, mavarairahi máimerecayarehi te emirahu eta émarahi mavaneru ema Viya. ²³ Tiyerehichahahi eta juca, ema Viya mapanerecharipahi eta máicharacavayarehi ema Machicha. Eta tacahe, máisapahi eta íjaresirahi ema Machicha nayehe ena váinarajiqueneana achaneana. Éma, émetataruhi te crusu. Éma, ímicaparuhi. ²⁴ Émasera ema Viya macaechepucahi ema Machicha. Macaitarecahi tayehe eta máepenirahi, taicha vahi mávarahahini mánasihini máepenahini. ²⁵ Ema víyahaini rey David timetacahavihi eta te Salmo eta máechajiriruva ema Jesús. Ánipa macahe: “Tata, piti pímararacanuhi eta picáchanéranuhi. Piti pijaneacanuhi te nuchacaya. Pétimechanuhi tamutu sácheana. ²⁶⁻²⁷ Tacahe, núsismure ichape. Nuvarahavare nujirauchaviyare néchajisihiviyare. Núti, te népenapa, tájina néñamavaimahi, taicha nucasíñavahi piyehe eta pímuchavirayarehi piáchanechanu. Vahi písapaimahi témitiequeneha eta náquehe nuti pichicha pémunaruquenehi. ²⁸ Piti píjaracanuhi eta picachepusiranuyarehi te nécari, nápechiravayarehi nítareca. Tásiha, nuvapinavayare eta nutiarahirayare te pimirahu” tacahepa eta Salmo.

²⁹ Nuparapenaveana, véchahi vimutu eta máepenirahi macaecarasirahi ema víachucaini David, taicha vímharichaha puiti eta máecari. ³⁰ Ema víyahaini David, yátupiquenehi profeta. Macuchapahi eta táitachiravayare eta mametacasihahi me Viya, eta matiarahirayarehi ema émana mámaríequeneayarehi ema ticajireyarehi Cristo ema téjacayarehi te trono. Máitsivayarehi ema máchucaini. ³¹ Ema Viya máimechahi ema David eta máicharacavayarehi ema Cristo máchechepusirayarehi te máecari. Tacahe, ema David májucunacharipa eta vahi tánasimahi tépena eta máchaneva ema Cristo; váhivare témitiequenehaimahi eta máquehe. ³² Puiticha, ema Viya macaechepucahi ema maca Jesús. Tásiha, viti véchajisihahi eta juca taicha vímahaquenehi eta mápechiravahi títareca. ³³ Tacahe, ema Maiya macayapapa te anuma ema Machicha, macaejacaripa te mavauve. Tacahe, májjaracaripa ema Espíritu Santo ema máitsivayarehi taicha ema matuparaharichuhi. Tacahe, ema Jesús máevatacapa ema Espíritu Santo eta viyehe. Étara eta juca ímahaquenehi puiti, esamaquenehi eta máucupaisirahi ema Espíritu Santo.

³⁴⁻³⁵ Vahi ecuimijachahini émainahini ema David mápanahini te anuma. Émahisera téchajisihahi eta matiarahirayarehi ema apana tíapanayarehi te anuma. Ánipa macahehi: “Ema Viya máichapa ema Tata Náquenu Cristo: Yare, péjaca te nuvaure, eta picuchaphayare eta nucaepuyusiraya te pimirahu ena ticatianacavianahi, máichapaji ema Viya”. Étara eta juca macayemaquenehi ema víyahaini David.

³⁶ Tiuri puiti, emutu eti nujaneanana israelítana, nuvaraha ímatiyare ema Jesús émetataruhi, émara ema Víaquenu, émarahivare ema Cristo, maicha ema Viya —macahepa ema Pedro eta máechajiriruvahi.

³⁷ Tacahe, eta nasamirahi eta juca ena achaneana, ichaperinehi eta náëñamiravahi te nasamureana. Tásiha, nayaserecapa ema Pedro énapa ena apamuriana apóstoleana, ánipa nacahe:

—Viparapenaveana, ¿tájahapuca vícharacavaini víti? —nacahepa.

³⁸ Tacahe, ema Pedro majicapapa:

—Ítsivacha eta juca ítaresiraina te mamirahu ema Viya. Eta íjarasiravaya mayehe ema Jesucristo, ecaicachasiya emutu éti. Tásiha, ema Viya macaepahainapa eta epecaturana. Tíjaracahénavarepa ema Espíritu Santo. ³⁹ Taicha ema Viya mavarahahi tíjaracaheyare ema Espíritu Santo emutu éti énapa ena echichanaveana énapa ena apavasanana, namutupa nácani manerejiruanahi máichuhaqueneanahi ema Viya, tayanapane ticavasanahi te tiyerehiqueneana avasareana —macahepa ema Pedro.

⁴⁰ Tacahehi eta juca máechajiriruvanahi ema Pedro. Ichape eta maconsejachiravacahi, ánivarepa máichahi:

—Ácājuhe ema Jesús. Ínajica eta eváinarajivana. Érajicava nayehe eta tíchana eta tamauriqueneana —macahepa.

⁴¹ Tacahe, natiarihi ena tisuapanahi eta máechajiriruvahi. Enevanepa ticaicachasiana éna. Mapanaqueneana mil ena tisuapajirahianahivare.

Eta náitaresirahi ena náinapureana téhicanahi ema Cristo

⁴² Ena achaneana, eta nasamarasirahi eta náimiturapiana ena apóstoleana, ichaperinehi nasuapa. Tásiha, tíuririnehi eta náitaresirana. Náemunacaine ena nachamuriana. Tamutu sácheana ticurujicacanaahi eta nayujarasirayarehi étapa eta nanisirayarehi eta pan táicutiarahi eta máepenirahi ema Viáquenu. ⁴³ Ichape eta náramirahi ena achaneana, taicha náimaharipa eta tíaramicareana náichaqueneana ena apóstoleana, máimicatasiravacahi ema Viya. ⁴⁴ Namutu ena tisuapajirahiana tíurujicavanaparácahi ticajicacanaahi eta náimahaqueneana. ⁴⁵ Te náimaha ema mácani nachamuri ticamunuvahi, náijarareca eta náimahaqueneana. Tásiha, náijaracapa eta plata ema ticamunuvahi, náimicatasihayare. ⁴⁶ Tamutu sácheana tíurujicavanahi eta te Templo. Tásiha, te napenana tíchuhacacanaahi ténicacanaahi. Ticachaneacananahivare eta nanisirahi eta pan táicutiarahi eta máepenirahi ema Viáquenu. Náurisamurevahi, táurivaipahi te nasamureana. ⁴⁷ Najirauca nacunachahi ema Viya. Tacahe, namutu ena apamuriana achaneana napicauchahi éna. Tásiha, tamutu sácheana ema Viya máichuhavacahi ena apamuriana tisuapanavare.

3

Eta manarasirahi ema achane masarini

¹ Tiuri, étana sache, te las trespa cáperehi, ema Pedro émapa ema Juan tiyananapa tisiapanayarehi eta te Templo. Te jena hora, las tresquenepa sache, hora eta nayujarasira ena israelítana. ² Matiarahi ema achane masari. Máimichurehi eta mamásariva. Tamutu sácheana nanapana eta te Templo. Nanaquica eta te ichapepana tapaja ticajare Tíurinapana, mayaseseresihayarehi eta limosna nayehe nácani achaneana tisiapanapahi. ³ Tacahe, ema masari, te máimahavacapa tisiapanayarehi ema Pedro ema Juan, mayaseacavacapa eta limosna. ⁴ Tacahe éna, náesenicapa ema masari. Tasiha, máichapa ema Pedro:

—Pímararachavi.

⁵ Tacahe, máimaracharipahi. Máimijachaipa náijaracayarehi eta plata. ⁶ Tásiha, ema Pedro máichapa:

—Tájina nuviya eta plata níjaracavihini. Jucarhisera eta juca nucatajicaviyare. Nucanaracaviyare. Táichavene eta máitupajijíásirava ema Jesucristo ema Nazareno, nuvanecavi: Péchepuca, pípaica —máichapa.

⁷ Tacahe, ema Pedro machuruvauchavanepa te mavahu vaure, macaechepucapa. Énevanerínehi túmevaca eta mapaqueana eta mayucarana. ⁸ Tacahe, ema masarini tíjuhúchavapa titupíha, tipaicapa. Tacahe, tisiapanapa te Templo máehicavacapaipa éna. Máeteresinapaipa eta mapaisirapahi. Macunachapaipa ema Viya, mahasulupayachavare eta macanarasirahi. ⁹ Namutu ena achaneana náimarachacahi eta mapaisiraipahi, macunacharinehi ema Viya. ¹⁰ Te náimatipa ena achaneana ema masarini, ichaperinehi eta náramirahi. Ánipa nacahehi:

—Ánaquiaparipa eta mayaseseresirahi eta limosna ema maca, máejasiraparaca te tapaja ticajare Tíurinapana taicha eta mamasarivahi. Puítisera tipaicapa, téterecavarepa. ¿Tájahapuca máicharachavahi eta manarasirahi? —nacahepa.

Ticametarairu ema Pedro te Templo

¹¹ Tacahe, ema masarini vaipa máinajiacavacahini ema Pedro ema Juan. Tacahe, náurujiacapa namutu ena achaneana te návihahi ena apóstoleana te tajuhe eta Templo, te

tayehe eta alar máepiyaruihí ema reyni Salomón. ¹² Tacahe, eta máimairahi ema Pedro ena achaneana náramirahi eta juca, máichavacapa:

—Tátanaveana, nujaneanana israelítana. Íaramihi éti eta juca víchirahi víti. Ímijachapa vítijivahi vicanaraca ema maca achane masarini. Ímijachapapuca viti vítupajjiacavahi táichavene eta víjarasiravahi mayehe ema Viya. Eta juca ánira tacahehi, vahi vítina vicanaracahini ema maca. Ema ticanaracahi, émaquenehi ema Jesús Nazareno, ¹³ taicha ema Viya* títjaracahi eta tamutuirayare marataha ema Machicha Jesús. Émara ema maca Jesús ema épuruquenehi éti, íjarareruhi mayehe ema aguenuca apavasajuecu Pilato. ¹⁴ Éma, mavarahahinini macaitica ema Jesús, étisera vahi ávarahahini máuchucuhahini ema máuriquenénihi yátupiquenehi santo. Masapihapa eyaseserecachi máuchucuha ema ticapahi. ¹⁵ Tásiha, émapa ímicapacahi ema Ticaitarecavahihi. Émasera ema Viya macaecephucahi te máecari. Véchajisihahi víti éma taicha vímahaquenehi eta mápechiravahi títareca. ¹⁶ Puiti, ímararacahi eta manarasirahi ema maca masarini. Eta juca eta tímicaeherachahi eta machavirahi títareca ema Jesús. Taicha émahí ema títjaracavahihi eta vítupajjiasiravahi eta vicanarasirahi ema maca achane, táichavenehi eta vicasiñairahi éma.

¹⁷ Tiuri puiti, nuparapenaveana, éti ímicapacahi ema Jesús taicha vahi ímatihini eta émairahi ema Cristo ema vicuchapaquenehi. Énaripa ena tuparairucana eyehe, váhivare náimatihini éma. ¹⁸ Étasera tacaheyahehi eta juca taicha máechajiriruvaichuhi ema Viya nametacavahi ena profetana eta macatajivairayarehi ema Cristo.

¹⁹ Tásiha puiti, éneuchavainapa ecájuhénapa ema Viya, apaesa macaepaha éma tamutu eta epecaturana. Énerichuvare ema Viya técasarechaheyarepa éti. ²⁰ Ene ecahehi etsecava ejacapayare ema Jesucristo te machavapa. Éma, iáquenuyare taicha manerejiruihí ema Viya te tépanavainapa tamutu. ²¹ Éma maca Jesucristo puiti téjacahi te anuma. Jararihiyaresera eta sache eta machavirayare, máetupiricayareva tamutu. Ánaquiaparipa, eta juca mametarapihi ema Viya nayehe ena mayeheana santo profetanaini eta náimitusirayare ena achaneana. ²² Éma émana víyarahaini profeta ema Moisés, mametacahi ena víachucanaveanaini, ani macahehi: “Éma Viya Dios tivanecanuhi níti numetacaheyare eta máechajiriruva. Títecayare ema apanayare profeta mavaneruyareva ema Viya, tacutiyare eta mavanesianuhi níti. Éma, tíuchucayare te namuri ena víamariqueneana. Tatuparaca nasuapayare tamutu ema mavanairipianayare. ²³ Taicha ema Viya máimicapacayare namutu ena masuápajirárahánayare mayehe ema profeta máiteruyarehi, taicha mamavarahahi nacasiapahini ena machanerana” macahepa ema Moisés.

²⁴ Namutu ena apamuriana profetana, émaripa ema Samuél énapa ena náequenereruana profetana, náechajisihahi eta juca vímahaqueneanahi puiti juca sácheana. ²⁵ Ánaquiaparichaha, te víuchaha máuchucuhini ema víyarahaini Moisés, ema Viya mametacaipa ema víachucaini Abraham, ánipa macahe: “Nunerejicayare ema émana piámariéquene tíuchucayare. Éma, títjaracaya eta táurivaya eta náitaresiraya namutu ena achaneana apánanenéjiqueneána te juca apaquehe” macahepa ema Viya. Tíápechava mametacaipa étarichuhi máechajiriruvana mayehe ema machichaini Isaac, énapa ena mámarinaveánaini. Puiti títauchavaripa eta juca máechajiriruvaichuhi ema Viya. Tásiha puiti, éti tíuparacahehi ínapucayare ejacapa eta máíjararuheya ema Cristo, taicha étirichuhi israelítahehi. Ímatihivare eta apamuriana máechajiriruvana ema Viya, nájuchaqueneana ena víyarahaini profetana. ²⁶ Tásiha, eta macaecephusirahi ema Viya ema Machicha Jesús, tivanecahavipa vimetacahe éti. Te ecasiñavapuca eta mayehe, máquijisinaheyare eta evainarajivana. Títjaracahenapa eta íúricacarevayare —macahepa ema Pedro.

4

Éma Pedro émapa ema Juan námaqueneanahi te namirahu ena tuparairucana

¹ Téchajicanarichaha ema Pedro ema Juan te namirahu ena achaneana, títecapanapa ena tuparairucana, énapa ena tímítuerecarahiana ticaijareana saducéoana. Námapahivare ema náquenuruha ena tasuntarurana eta Templo. ² Tisemanapa taicha vahi náuricahini eta nasamairirisirahi ena apinana apóstoleana náimitusirahi ena achaneana. Vahi náuricahini eta nametasirahi eta yátupiquenerahi eta máecephusirahi ema Jesús te máecari, mápechiravahi títareca. ³ Tacahe, nacaratavacavapa, náimisipavacapa te cárcel. Váipasera nacayaserehíhíni, taicha cáperehichichárinénihi. Tíámainucavapa te apanapa sache, nacuchucavacaya ticayaserehianayarehi. ⁴ Camurianasera ena tisuapanahi táichavenehi eta

* **3:13** Éma Pedro téchajicahi te náechajiriruva ena israelítana, máimijarechirahi ema Viya: “éma nacasiñaquehehi ena víachucanaveanaini ema Abraham, ema Isaac, ema Jacob, énapa ena apamurianaini víachucanaveanaini”.

nasamarasirahi eta náechajiriruvahi ena apóstoleana. Eta natupahi ena téhicanaripa ena Viáquenu Jesucristo cinco mil ena achaneana ajairana. Camurianavare ena esenana énapa ena amaperuana. ⁵⁻⁶ Te apanaquenepa sache, ena corregidor Caifás ticurujicapa ena apamuriana aquenucarahana tayehe eta ichapequene cabildo te Jerusalén. Natiarihihivare ena escribanoana. Matiarhihivare ena Anás ena pasado corregidorhi, énapa ena machichanaveana: ena ticajarehivare Juan émapa Alejandro. Natiarihihivare ena apamuriana machichanaveana.

⁷ Tacahe, náemepanapa ena Pedro ena Juan te cárcel. Nacatupiacapa te namirahu, nayaseserecapa. Ánipa naicha:

—Éti, vahi vituparacahehine eta ímitusirahi eta juca. ¿Nájaha tivanecahehi icha eta juca? ¿Nájaha ena tjaracahehi eta ítupajijiasiravahi? —nacahepa.

⁸ Tacahe, ena Espíritu Santo máimicatacachi ena Pedro eta majicapirahi ena tiyaseserecanahi, ánipa macahe:

—Tátanaveana víjeesana, tátanaveana víyacárana te juca víávasa. ⁹ Evaraha echa eta juca táuriqueneana táicharacavahi eta vicanasirahi ena maca achane macajumaquenenihi. ¹⁰ Vimetacaheyare puiti. Vivaraha vémechaheyare, eti énapa namutu ena achaneana te juca víávasa Israel. Ena maca achane, ímahaquenehi eta manarasirahi. Vivaraha vímimatichahe eta máitupajijiasirava ena Jesucristo ena Nazareno tacanaracachi eta vipiarsirahi te máijare. Éma, émetatáruhi te cruso, ecaparuhi. Émasera ena Viya macaechepucahi te máecari. ¹¹ Éti, épuruhi ena Jesús, ena manerejuruquenehi ena Viya. Puiti, ecutipia ena máitucarahana tépiyarecana peti, te náepurupuca eta tatumequene esuiqui táesuiquirayarehini eta peti. ¹² Macarichu ena Jesucristo eta marataha eta macatiuchirahaviya macuchucuirahaviyarehi. Taicha ena Viya manerejiruhichuhi ena Jesús eta macuchucuirahaviyare. Nájina apantina manerejiruinahi te vimuri viti achaneana eta te juca apaquehe —macahepa ena Pedro.

¹³ Tacahe, ena tuparairucana náraminehi eta náitusirahi téchajicana ena Pedro ena Juan. Náichacacapa:

—¡Tájina vahi napicacaracavahine eta viyehe! Ena nani tájina náitucaquenéna eta letra. Máiturereanahi. Tájina náimatayahine eta viyehe escuela. ¿Máijaracavacahipuca ena Jesús eta náitupajijiasiravahi te macachanevacaiçhaha ena? —náichacacapa.

¹⁴ Tájina naviyahine nacayema taicha matiarhi ena achane masarini, titupihahi te namirahu. Taicha náimahahi eta yátupirahi eta manarasirahi. ¹⁵ Tacahe, navanecapa eta nacuchusiraya ena apóstoleana eta te náurujiavahi. Nanasipa ena aquenucana téchajiricavanaripa. ¹⁶ Ánipa nacahe:

—¿Tájaha vícharacavayare nayehe ena nani? Taicha namutu ena achaneana ticavasanahi te juca Jerusalén náechahi eta náichirahi ena nani eta tiáramicare. Tásiha, vahi visuapacaremahi te vépiyaquenehavacapuca. ¹⁷ Váhisera távaraha vísapa náimiyana náimitureca nayehe ena achaneana. Vípicararevacaya apaesa vahi nacuimiyana náechajisihá ena máechepusirahipuca ena mácaninavaji Jesús —nacahepa.

¹⁸ Tacahe, nacasiapavarepa ena Pedro ena Juan. Navanecapa éna, ánipa naicha:

—Vahi vivaraha ímianava échajisihá eta juca, váhivare ecuimitureca nayehe ena achaneana eta máechepusirahipuca ena Jesús —náichapa.

¹⁹ Najicapapasera ena Pedro ena Juan, ánipa naicha:

—Esamahavichaha. Ena Viya timetacahavi eta véchajisiháirayare. Étisera ecatichapa véchajisihá éma. Émaquenehisera tisuapacarepanahi eyehe éti. Epanerecha yátupina. ²⁰ Viti, vahi vimatinamáhi eta véchajisiháiraya tamutu eta juca vímahaqueneanahi visamaqueneanahivare mayehe ena Jesucristo —nacahepa.

²¹ Tacahe, ena tuparairucana eta nasamirahi eta namasuapirahi, tisemanapa. Tacahe, náipicararecapa. Tájinapasera náicharacahine. Nacaitcapa taicha tájina naviurevainahine jácani táimicuñacahine. Taicha namutuhi ena achaneana nacunachahi ena Viya táichavenihi eta náimahaquenehi. ²² Cuarenta áñoripa eta mahañora ena maca achane masarini. Tétavicavahi eta tiáramicarevahi eta manarasirahi maicha ena Viya.

Ena téhicana ena Jesús tiyaseserecana eta natumesamurevaina

²³ Ena náuchucuiraripa ena Pedro émapa ena Juan, tiyananapa eta te návihahi ena nachamuriana. Nametacapa tamutu eta nacatianasirahi ena tuparairucana. ²⁴ Te náechapa, ena nachamuriana tiyujaracanapa namutu. Ánipa nacahe eta nayujarasirahi:

—Tata Viáquenu, píti pépiyacachi eta anuma, eta apaquehe étapa eta ichapequene une mar. Pétipiricahi tamutu eta juca vímahaqueneanahi puiti. ²⁵ Píti pimetacachi ena víyarahaini David pivanarainihi eta májucunachiraya eta te Salmo. Ani tacahehi eta májurehi: “Tatiarihiya eta avasareana, ena achaneana navarahaya nacanara ena Viya. Énaparichu

ena nujaneanana, énerichuvare napanerechaya nacanara ema Viya. Máetupicushiana éna. ²⁶ Ena réyeana te juca apaquehe títsecavanayare eta nacanarairayare. Énaripa ena aquenucarahana nacapaneruya nacanaraya ema Viya, nacanarayareva ema Cristo manerejiruhi éma” tacahehi eta májurehi ema David.

²⁷ Étaripa te juca viávása, ticuticacahi eta napanerechirahi ema Herodes Antipas, ema Poncio Pilato, ena apavasanana, énapa ena vijaneanana israelítana, navarairahi nacapaca ema sátoquene píchicha Jesús, ema pinerejiruquenehi. ²⁸ Títauchavahi naicha eta juca pipaneruana étarayarehi tacaheyarehi eta péchajiriruvana. ²⁹ Pítisera, Tata Viáquenu, pímararahavihi puiti eta náichirahavihi viti pivanaranahi. Píjaracahavisera vitumesamurevaina eta véchajisihairaya eta péchajiriruva. ³⁰ Píjaracahavi eta vítupajijíasiravaina viratahairaina vicanaraca ena nacajumaqueneana, vímeresiraina eta tiáramicareana táichavenehi eta vicasíñairahi ema sátoquenehi píchicha Jesús —nacahepa.

³¹ Te títapiricanapa eta nayujarasirahi, tójahúchavapa tiyayacare eta apaquehe návihahi éna. Tacahehi eta mávahásiraváchavare namutu ema Espiritu Santo. Váipasare napicacacavahini eta náechajisirahi eta máechajiriruva ema Viya.

Ticajicacani tamutu eta náimahaqueneana

³² Namutu ena nasimutuvaqueneana tisuapajirahianahi, ticuticacahi eta napaneruvana eta nacajicacairahi. Namutu nácani téchanahi eta náimahaqueneana nacayehqueneanahi, vahi nayavanihacacahini. Tatupiruvahi te nasamureana eta nacajirahi. ³³ Tacahe, tímiyanavanahi ena apóstoleana eta náechajisihairahi eta máechepusirahi ema Viáquenu Jesucristo. Tisuapacarepaicha eta náimiturapianahi. Máimicacavachivare ema Viya ena téhicanapahi ema Jesús. Namutu éna, tipacuchacareanahivare ne achaneana. ³⁴ Nájina émanáinahíni te nataracu máemepaurechavahini. Taicha ena ticayheana apaquehe, pétipuca, nájararecapa. ³⁵ Tásiha, nájaracavare eta plata ena apóstoleana. Tásiha, ena apóstoleana nájaracavacavare nácani páurepananahi.

³⁶ Matiarihivare ema achane ticajare José. (Éma máuchurehi eta te tíurupuhi te mar ticajare Chipre.) Ema maca José náumurivaichaha ena levítana. Ena apóstoleana nanacapa eta májarehi Bernabé (te véchajiriruva ticajare Ticaurisamurerahi). ³⁷ Ema maca májararecapa eta mapenapahini. Tásiha, májaracapa eta plata ena apóstoleana.

5

Eta mapecturahi ema Ananías ésupa esu mayena Safira

¹ Matiarihivare ema achane ticajarehi Ananías ésupa esu mayena ticajaru Safira. Énerichuvare nájararecapa éna eta nayehe apaquehe napenapahini. ² Ema maca achane macarajicapa ticutimurihacaca eta plata tavachahi eta mayehe apaquehe. Esu mayena suéchahi eta mayumurusirahi eta ticutimurihacaca eta plata.

Tacahe, te títicapapa ema achane nayehe ena apóstoleana, máichapa:

—Níjararecahi eta nuyehe apaquehe. Júchahi tamutu eta plata tavachahi —macahepa.

³ Tásiha, ema Pedro máichapa:

—Píti, Ananías, ¿tájaha tacayema písapavahi ticaetemavi ema Satanás? Pipanerechaipa pivayuaracayare ema Espiritu Santo eta piyumurusirahi ticutimurihacaca eta tavachahi eta piyehe apaquehe. ⁴ Pímaha, Ananías. Piyehrichuhi eta apaquehe píjarareruhi. Nájina tipamicavinahi eta pinaquisiravaya. Puiti eta juca píjarasiravahi pinaquícava, pépiyahiráhipaipa pímiyahahi tamutu eta juca plata tavachahi eta piyehe apaquehe. Pátupiruvapaini eta pivarahaquenehi pinaquica. Émasera ema Viya máímaracacahi eta juca pépiyahiravahi. Vahi vítinahini pivayuaracahini —máichapa ema Pedro.

⁵ Te masamapa ema Ananías eta juca, tiáquípaicavapa, matupiru tépena. Te nasamairicapa ena achaneana, namuturinehi tipicana ichape. ⁶ Tacahe, nararihi ena natuparaháchuhi técararecana. Navehapa eta máquehe ema Ananías. Náyuruacapa. Námapa te ecari, náecarapanapa.

⁷ Te táequenepa eta mapanaquene hora, títicapapa esu Safira, mayena ema Ananías. Vuíchaha suéchahini eta máicharacavahi ema suima eta máepenirapahi. ⁸ Tacahe, ema Pedro mayaserecapa, ánipa maicha:

—Pimetacanu. Eta juca plata mámaquenepahi ema pima, ¿étahipuca tamutu eta tavachahi eta eyehe apaquehe? —máichapa ema Pedro.

Tásiha, sujicapapa:

—Eta tavachahi tamutu —suíchapa.

⁹ Tacahe, ema Pedro máichapa:

—¿Tájaha tacayema ecuticacahi eta juca épiyahiraivahi evayuarasirahi ema Espíritu Santo? Ávane tichavana eta técarapananahi ema pímaini. Tásiha, puiti pítipavayare tíamavianayare —máichapa.

¹⁰ Tacahe, eta máichirahi ema Pedro, enevanepa tíaquipaicavahi ésu te máivapechacaya ema Pedro. Tépenavarepa. Te tichavanapa ena técarapananahi ema suímaini, náimaharinehi ésu tépenaipavare. Navehavarepa esu, námavarepa náecarapana te machacaya ema suímaini. ¹¹ Te nasamairiricapa namutu ena achaneana, ichaperinehi eta napisira ema Viya, naveti-
jipa eta napisirahi ena téhicanahi ema Cristo.

Májaracahi ema Viya ena apóstoleana eta náimeresiraya eta tíamuricareana

¹² Tacahe, ena apóstoleana, ichape eta májarasiravacahi ema Viya eta náimeresirayare eta tíamuricareana te namirahu ena apamuriana achaneana. Ticurujicacánahivare tamutu sácheana ena tísupajirahiana te náurujsirareva te tajuhe eta Templo, te tayehe eta alar máepiyaruihí ema reyni Salomón. ¹³ Namutu ena apamuriana achaneana máehicarahanaríchaha ema Jesucristo, vahí napatsicavahini nacanara taicha namutu napicauchahi. ¹⁴ Camurianapaipasera ena ajairana énapa ena esenana ena téhicanapaipahi ema Jesús. ¹⁵ Camurianaiapa ena nacanararuanapáipahi ena apóstoleana. Tacahe, námavacapai ena apamuriana nacajumaqueneana, nanaquicapaipa te calle mayanihayarehi ema Pedro. Eta máetavisirayarehi éma, távichayare eta macuna, tacanaracayarehi eta najumana. ¹⁶ Énerichuvare, títecapanapa te Jerusalén ena achaneana tíasihana te avasareana nachacayarahanahi. Námapahi ena nacajumaqueneana énapa ena návaháruana ena éreanana. Namutu ena nani tínaracanapahi tayehe eta náichavaquénévanihi.

Naémeratcapa ema Pedro émapa ema Juan

¹⁷ Váipasera máuricahini eta juca ema corregidor, énapa ena machamuriana. (Saducéoa-nahí éna.) Tisemanarinehi táichavenehi eta náehisirahi ena camuriqueneana achaneana eta náimiturapihi ena apóstoleana. ¹⁸ Tacahe, nacavanairipipa nacaratatajica ena apóstoleana. Náimisiapapa te cárcel, ticaeratanapa. ¹⁹ Émasera ema Viya majaneacavacahi éna. Te jena yatí, mavanecapa ena mayehe ángele. Mavejiapana eta cárcel návivahí éna. Mavanecapa náuchuca, ánipa maicha:

²⁰ —Eyana ímerezava te jena Templo. Emetaca ena achaneana eta mavarairahi ema Viya máitsivachaya arairuya eta náitaresirayare ena téhicanaya ema Jesucristo —máichavacapa ema ángele.

²¹ Náuchusihapa ena apóstoleana te cárcel, tímopicucuhichaha te tiyananapa tayehe eta te Templo. Tinahacavanavarepa tímiturecana.

Tacahe, te jena yáitarahi ema corregidor mavanecapa ena comisarioana máimichuhapa namutu ena apamuriana tuparairucana énapa ena náiyacarana israelítana. Te tíurujicavanapa namutu, nacavanairipipa náepana ena apóstoleana eta te cárcel. ²² Te títecapanapa te cárcel ena suntaruana, navejiacapa eta tapaja. Nájinaripahisera. Tacahe, tichavanapa nayehe ena náquenuruhana. Nametacapa eta nájinariapaihi ena apóstoleana. ²³ Tacahe, náichapa:

—Te vítecapauchapa eta cárcel, vímahapa tanasihi ticaeratahi eta tapaja. Natarihivare ena sentinélaná tijaneacanahi eta tapaja. Tacahe, te vivejiacapa eta tapaja, nájina émanainahini vichimapaihi te tajuhe —nacahepa ena vanairucana.

²⁴ Te máechapa ema corregidor, énapa ena machamuriana tuparairucana, émapa ena náquenumuri ena tasuntarurana eta Templo, náramirinehi ichape. Tacahe, náichacacapa:

—¿Tájaha tacayema eta juca? Vaipa vímatiequeneha. ¿Tájahapuca vícharacavaya? —náichacacapa.

²⁵ Téchajiricavanarichaha éna, títecapanecha ema émana achane. Mametacavacapa éna. Ánipa macahe:

—Ena naena ajairana érataruanahi te cárcel, náenahi ánaqui te Templo tímiturecanahi nayehe ena achaneana —máichapa.

²⁶ Tacahe, ena náquenuruha ena suntaruana, émajacaruvapa tiyana. Mámamuriha-paipahi ena suntaruana, náepanayarehi ena apóstoleana. Jéhesare, námamurihapa, tájinasera náicharacapaihi eta námirapaihi taicha napicahi ena apamuriana achaneana natupisicavacahini te márijahiana. ²⁷ Te nacaitecapapa, nacatupihapa te namurí ena tuparairucana. Tásiha, ema corregidor ánipa maicha:

²⁸ —Víti vivanecahehi muraca eta vaipa ecuapechava ecuimitureca eta máechepusirahipuca ema Jesús, tasiha, éti ímianavarichucha ímitureca. Namutupa ena achaneana tayehe eta juca víávasa Jerusalén náitucapa eta ímiturapihana éti. Visapihapa evaraha vítiyare táecatíha eta máepenirahi ena achane Jesús. ¿Tájaha tacayema vahí esuapahavíhí? —macahepa.

²⁹ Tacahe, ema Pedro énapa ena apamuriana apóstoleana najicapapa, ánipa naicha:

—Tatúparáca mativayare visuapa ema Viya. Éma tisuapacarepana eyehe éti. ³⁰ Víti, véhicahi ema Viya, émarichuhi nacasiñaquenehi ena viáchucanaveanaini. Émahi ema ticaechepucahi ema Jesús, ema ímicaparuhi eta émetatasirahi te crusu. ³¹ Tásiha puiti, ema Viya máunacahi te anuquehe anuma. Macaejacahi te mavaure tayehe eta trono. Máijaracaripa eta matuparahayarehi Aquenucayarehi Ticatiurahiyareva. Taicha mavarahahi ema Viya vimutuyare víti israelítana véneuchavaya mayehe, apaesa éma tiperdonachahaviyare tamutu eta vipecaturana. ³² Víti véchajisihahi eta juca taicha vímahaquenehi eta mápechiravahi títareca. Víti véchajisihahi maicha ema Espíritu Santo máijararuhavihi ema Viya viyehe víti visuapana éma —náichapa ena apóstoleana.

³³ Te nasamapa eta juca ena aquenucana, tiseமானapa. Navarahapa nacapacavacayarehini. ³⁴ Matiarihisera te nataracu ema achane ticajare Gamaliel. Ema tuparairucahi doctrinero fariseo. Ema maca achane ticapicahuhi nayehe namutu ena achaneana. Tacahe, titupihapa te namirahu. Macavanairipipa náuchucachaha ánipina ena apóstoleana. ³⁵ Tacahe, máichavacapa ena machamuriana aquenucarahana:

—Tátanaveana, nujaneanana israelítana. Échapava eta evarahaquenehi íchaya nayehe ena nani achaneana. ³⁶ Échapuca éti cape juca táitaresirahi, téchepucahi ema émana achane ticajare Teudas. Éma macahehi eta máitupajjiásiravahi. Tásiha, camuriana ena achaneana téhicanahi. Cuátrocientoanahi ena ajairana ena machaneranahi. Tásihasera, nacapacahi ena mánarana. Tásiha, namutu ena téhicanainihi téjanerepaicanahi. Títavapa tamutu. ³⁷ Tásiha, te táequenevarepa, te jena sache eta nacatupairahi ena achaneana, téchepucavarepa ema apana ema ticajare Judas, ema ticavasa te Galilea. Camurianavare ena téhicanahi. Énerichuhivareséra nacapacahi ena mánarana. Namutuhivare téjanerepaicana ena téhicanainihi. ³⁸ Tiuri puiti, esamanu eta juca numetaruheya. Ésamiricachucha ena nani achaneana. Vahi ecuimicasiapava nayehe. Taicha eta juca náichaquenehi te nayehechuchapuca éna, títavayarehi. ³⁹ Téheserapuca mayehehi ema Viya, vahi eratahaimahi ecamitiaca. Échapavachucha. Machu ecucaemuñava ecanara ema Viya —máichavacapa.

⁴⁰ Tacahe, tésamiricavanapa namutu. Náimisapavarepa ena apóstoleana. Náestacavacapa. Tásiha, navanecavarepa eta vaipa nacuapechava nacuechajisihahi eta máechepusirahi ema Jesús. Tásiha, nacaíticavacapa. ⁴¹ Tacahe, tiúchucanapa ena apóstoleana te náurujisiavahi ena tuparairucana. Tiúrisamureanapáichucha eta nacaestairahi. Ánipa nacahe:

—Ema Viya máimaranacahi eta vicamichirahi tamutu eta náimicatsiriasirahavihi táichavene eta véhisirahi ema Jesús —nacahepa.

⁴² Váhiquene nacatsimavahini. Tímiturecanáichucha tamutu sácheana, náechajisihahi ema Jesucristo. Tímiturecanahi te Templo étapa te pétiana.

6

Ticatuparacasiana ena siéteana ajairana

¹ Te jena sácheana, eta nasimutuvaipa ena téhicanahi ema Jesús tisiapanapaipa ticajane-murianapaichucha. Natiarihivare ena israelítana, apáechajirírivanarípa éna. Natiarihihi ena páurepanana te nataracu énapa ena máimaruana. Ena nani najacapaihi eta nayehe ración tamutu sácheana. Étana sache, ena nani apáechajirírivanarípa vaipa náurisamurehini taicha vaipa nácuticacahini náechajirícahini ena máimaruana. Ánipa nacahe:

—Váipa nácuticacahini eta najacapirahi eta tinicacare ena vijaneananarichuhi máimaruana —nacahepa.

² Tacahe, ena dócequeneana apóstoleana nacurujicapa namutu ena téhicanahi ema Jesús. Tásiha, náichapa:

—Váhi táuricahini víchepaicahini eta vicametarairuira eta máechajiríriva ema Viya. Ticaichepairicahavipa eta víjarasirahi eta tinicacare ena vichamuriana. ³ Tiuri puiti, nuparapenaveana, tacamunu vinacayare siéteanaina ena ajairana te emuri éti, nácani ímatiqueneana tiúriana achane, téchemarahiana náimatiequeneha tamutu, mávaháruanahivare ema Espíritu Santo. Énaina vituparaca naicha eta juca. ⁴ Taicha víti vímijanavayare viyujaraca vímiturecayare eta máechajiríriva ema Viya —náichapa ena apóstoleana.

⁵ Tacahe, namutu navaraha eta náechajirírivahi. Tacahe, ticanerejianapa ena ticatuparahanayare. Navehapa ema Esteban, achane tiuri, tisuapajirahiquene mayehehi ema Viya, mávaháruhivare ema Espíritu Santo. Navehavarepa ema Felipe, ema Prócoro, ema Nicanor, ema Timón, ema Parmenas, émapa ema Nicolás*.

* 6:5 Ema maca Nicolás, ticavasainihi eta te avasare Antioquia eta máuchusinehi. Éma, apavasanahi, máehicahinihivare eta nayeherépiana ena israelítana. Tásiha puiti, máehicaipa ema Jesucristo.

ena apóstoleana. Tásiha, nanacapa eta navahuana te nachutiana, nayujarauchapa, náijarasihapa eta náematanerepiyarehi.

⁷ Tiuri, eta nasamirahi eta máechajiriruva ema Viya, camurianapaipaicha ena téhicanahi tayehe eta avasare Jerusalén. Tisimutuanavare ena tiyujaracarahiana israelítana náunacaipa te nasamureana eta náehisiraipa ema Jesucristo.

Eta nacaratasirahi ema Esteban

⁸ Tiuri, ema Viya máimicatacahi ema maca Esteban. Máijaracahivarehi eta ichape eta máichirahi eta tiáramicareana te namirahu ena achaneana. ⁹ Tatiarihivare te Jerusalén eta apana náurujisirareva. Tiúrujicavanahi ena israelítana prisionéroanaini náuchucureana-pasera. Éna tiásihanahi te apanana avasareana, te Cirene, te Alejandría, te Cilicia, étapa te Asia. Nácapaemajiricapa ema Esteban te yátupihipuca ema Jesús émaquenehi Cristo. Vahi nasuapahini taicha tétavicavahi eta namasupajiravahi. ¹⁰ Ema Espíritu Santo máijaracahi ichape ema Esteban eta máitusiraya téhájica. Eta tacahe, vahi náratahahini nacachuriaca éma. Tisemanapa eta máitahasiravacahi. ¹¹ Tacahe, náimitucapa ena apinana ajairana navachachaqueneanahi eta náepiyequenehairaya ema Esteban. Ánipa naicha eta náimitusirahi:

—Visamahi ema maca macaecaahi ema víyahaini Moisés, macaechivare ema Viya — náichapa.

¹² Tacahehi, eta nacahepusirahi eta semanere nayehe ena achaneana, énapa ena aquenucarhana, énapa ena escribánoana. Náimiyusemacavacapa. Tásiha, nacaratapaca ema Esteban. Námapa ticayaserehiya te namirahu ena tuparairucana. ¹³ Tásiha, náichuhavare ena apamuriana tépiyaequenehanaya. Ánipa nacahehi eta náepiyahiravahi:

—Ema maca achane vahi máituca timatina macaecaahi eta viyehé Santo Templo. Máepuruvare eta viyeherepiana. ¹⁴ Énerichuvare macahehi ema Jesús Nazareno máquipaicyareji eta Templo, máitsivachayarehiji eta viyeherepiana máijararuhavíhi ema víyahaini Moisés —náichapa ena tépiyahirahianahi.

¹⁵ Tacahe, namutu ena natiaríhiqueneanahi náejaruanahi náimaraacaripa ema Esteban. Eta mamira macavasirahi ema ángele.

7

Eta maconsejarapi ema Esteban

¹ Tacahe, ema corregidor mayaserecapa ema Esteban, ánipa maicha:

—¿Yátupíhi ene picahehi eta juca nametarapianahi ena nani? —máichapa.

² Tacahe, majicapapa ema Esteban, ánipa maicha:

—Tátanaveana, nuparapenaveana. Esamanuchaha. Eta acane, ema Viya tiúcupaicahi másihahi te mávasa anuma. Tímerecavapa mayehe ema viáchucaini Abraham. Ema Abraham, mávichaichaha te tinapaica te apaquehe ticajiare Mesopotamia, ticajarevare Caldea. Vuíchaha mayanahini macavasahini te Harán. ³ Máechajicahi ema Viya ema Abraham, ánipa maicha: “Pijunijica eta juca piávasa, énapa namutu ena pijaneanana. Piyana eta te apana apaquehe. Núti níjaracaviya eta arairu piávasaya” máichapa ema Viya. ⁴ Tacahe, ema Abraham masuapapa; tiúchucapa eta te tinapaica te Caldea. Tiyana eta te avasare Harán. Te táequenepa eta máepenirahi ema máiyaini, mavanecapa ema Viya ema Abraham máiteca eta te juca apaquehe viáviyahahi puiti víti. (Te jena áñoana ticajirehi Canaán.) ⁵ Tájinasera máijaracahini mayehenahini apaquehe, ánicuchicháinahipucáini. Mametacahisera eta máijarasirayarehi eta mayeharehi apaquehe. Taicha eta apaquehe máijaracayarehi nayeheyarehi ena machichanavequeneana te maépenapa ema Abraham. Nájinarichahasera machichanaveanainahini te jena áñoanahi. ⁶ Énerichuvare mametacahi ema Viya, ánipa maicha: “Ena pichichanavequeneanayare ticavasarecanaya nayehe ena apavasajuecuana. Ticatajivanayaresera naicha ena napaureanaya. Nacajireyare. Cuatrociento áñoayare eta náichirayare. ⁷ Nútisera, níjaracayare eta náicuñayare ena achaneana te jena avasare nácani ticajireanayare ena pichichanavequeneanayare. Tásiha, te táequenenapa, nucuchucuhavacainapa. Tásiha, títecanainapa aní te juca najirauchihanuyare” máichapa ema Viya.

⁸ Ema Viya mafirmachapa eta matratune eta máitachirayarehi eta juca máechajiriruvahi mayehe ema Abraham. Énerichuvare mavanecapa ema Abraham timarcachavayare, máicutiarayarehi eta macasiñavairahi me Viya. Namarcachayareva namutu ena machichanaveana ajairana, énapa ena mámariequeneana ajairana. Eta tacahehi, te óchoquenepa sache eta máuchusirahi ema Isaac machicha ema Abraham, mamarcachapa. Énerichuvare, máichahi ema Isaac te macachichapa ema Jacob. Ema Jacob, énerichuvare máchavacapahi ena dócequeneana machichanaveana, ena víyanaveanaini víti. ⁹ Ema José,

nacapinaruhi ena maparapenaveana taicha máemunacapanahi ema naiya. Eta tacahe, nájararecapa ena maparapenaveana nayehe ena apavasanana. Tásiha, éna náequecapa nájararecapa mayehe ema ticavasa te apana avasare Egipto. Émasera ema Viya majaneacahi ema amaperu José. ¹⁰ Macatiuchahivare tayehe eta macatajivairana. Májaracahivare eta máitucaqueneyare. Ema rey aqenucahi tayehe eta Egipto máemunacahi ema José. Máimatiacahi eta máitusirahi. Eta tacahe, ema rey macajupahahi eta majaneasirahi tamutu eta máimahaqueneana. Aqenucahi máicha, nayehe namutu ena ticavasa te Egipto.

¹¹ Tásiha, te jena áñoanahi, táitecapauchapa eta ecuha te tamutu eta avasareana tayehe eta táunavahi eta Egipto étapa eta Canaán. Tétavicavahi eta nacatajivairahi ena achaneana. Tásiha, ena viáchucanaveanaini, tájina naviyahini eta nanicaquene. ¹² Émasera ema Jacob te masamairicapa eta tatiarirahahi eta tinicacare te Egipto máunaruhi ema rey, máevatacapa ena machichanaveana eta navacharepana eta tinicacare. Te téchuricacanavare eta tinicacare, mápechavarepa máevataca ena machichanaveana. ¹³ Te apihequenepa eta nachavirahi, ema José tímimatichavapa nayehe ena maparapenaveana. Tacahe, ema rey mapaenavapa máimati énarahi maparapenaveana ema José. ¹⁴ Tacahe, ema José máimichuhapa ema maiya Jacob énapa ena natiarihuqueneanahi te mapena. Setenta y cincoqueneana eta nasimutuva éna. ¹⁵ Tacahehi eta mayanirahi ema Jacob macavasairahi tayehe eta te Egipto. Étapa máepenihahi. Te táequenepa, étarichuvare náepenihahi ena machichanaveanaini viáchucanaveánaini. ¹⁶ Váhisera nacaecarasihini eta náperanaini te Egipto. Nacayejepa eta nacaecarasirahi eta te ecarí te tachacacu eta avasare Siquem te tinapaica eta Canaán. Étarichuhi eta máecari ema Abraham*.

¹⁷ Tiuri, tiánehipa eta máitauahirayarehi eta máechajiriruvahi ema Viya matratunehi mayehe ema Abraham, ánaquiaparíchaha eta áñoana eta májarasirayarehi eta apaquehe nayeheyarehi ena machichanavequeneana. Ena nachichanaveana ena viáchucanaveanaini, ánaquiipa náejapasihahi te Egipto. ¹⁸ Tayerevahi eta año, titupihapa ema apana rey te Egipto. Éma arairuhi rey, vaipa macapayacahini máimatihini ema José. Váipavare mávarahahini maecha eta manaquiruanainihí máemataneanainihí ema José. ¹⁹ Masapihapa macatianacavacahi ena viáchucanaveanaini taicha eta náejapasirahi éna. Macaetema-jiricavacapa. Macavanairipipa eta vahi nacueperajica ena amuyana ajairachichana náachusiravanahi. Najunijica apaesa vahi nacuitareca. ²⁰ Tacahe, te jena sácheanahi, tiúchucapa ema amuya alauchu Moisés. Ema Viya máemunacahi ichape ema maca amuya. Mapana caje eta nacajursirahi ena ticachichana te napena. ²¹ Te náimahapa téchemarhipaipa ema amuya, vaipa mayumurucacarehini. Tacahe, nayumurucapa ema amuya te pacurechicha te curichepiraquiana távihahi te cajacure. Ésusera esu machicha ema rey suíchimavapa, suvehapa. Ésupa ticajurucahi suchichayarehi. ²² Tacahe, ema amaperu Moisés ticaimitucasipa tamutu eta náitupajjiásiravanahi ena ticavasanahi te Egipto. Tacahe, ichape eta máitupajjiásiravahi eta máechajisirapahi étapa eta máematanerepianahi. ²³ Te ticayehepa carenta año ema Moisés, mavarahapa tiyana máejirapanavaca ena majaneanana israelítana. ²⁴ Te títecapapa ema Moisés, máimahapa ema émana achane ticavasa te Egipto téhararecahi, máehahi ema majaneana ema Moisés. Tacahe, macatiuchapa ema majaneana. Émapa títsirijiequenehahi. Macapacapa ema ticavasa te Egipto. ²⁵ Eta mapaneruhi ema Moisés, mavarahahi nacaicutiarayare ena majaneana eta mavaneruirahi me Viya eta macuchucuiravacayarehi eta te nacatajivairahi. Váhisera nácaicutiarahini éna. ²⁶ Tacahe, te apanaquenepa sache, ema Moisés máimahapa téhacacana ena apinana majaneanana. Mavarahapa macaichepaica. Máichapa: “¿Tájaha tacayema éhacaca éti? Ímaha eparapecahí” máichapa. ²⁷ Tacahe, ema túmepanahi mayehe ema apana, máevatajicapa ema Moisés, máichapa: “¿Tájaha tacayema pímsiapava píti eta viyehé? ¿Nájahapuca tivanecavilhi juéseyarehi eta viyehé, viáquenumuriviyarepuca víti? ²⁸ ¿Pivarahapapuca picapacanuyareva núti, tacutiyaepuca eta picapasirahi cape ema egipcio?” máichapa. ²⁹ Te masamapa ema Moisés eta náechirahi ena achaneana émarahi ticapaca, tianapa tjunahi eta te apaquehe ticajare Madián. Ánaquiipa eta máerajisavahi máitatijiyavahi. Mavehapa esu mayena, ticaparapepa. Apinana ena machichanaveanahi ajairana suyehe esu mayena.

* **7:16** Ánaquiaparipa tatiaríhi eta avasareni Siquem, návasa ena mámariequeneana ema achane ticajare Hamor. Te tachacaya eta jena avasareni, tatiaríhíhi eta mari enurujuhe. Tacahe, ánaquiaparipa ema Abraham mavacharecapa eta apaquehe táimivehapa eta mari enurujuhe, mavarairahi sucaecarasiyarehi esu mayena Sara, énapa namutu ena machichanaveana. Émarípa étarichuyareva macaecarasiyahi. Ena machichanaveana ichapemuríhi áñoana eta náechapajirirahi eta ecarí, taicha étarichuyarehi nacaecarasiyarehi éna, énapa ena apamuriana mámariequeneana ema Abraham.

³⁰ Te cuarenta áñoa eta mávhairahi ánaqui, te étana sache, tipairiricahi te mávapahiana apaquehe tachacaya eta cerro ticajare Sinaí, majanearesirahi eta uvesana. Tacahe, tiúcupaicapa ema Viya eta te táviahahi eta chéyaraji yucuqui. Timurujirinehi eta yucuqui maicha ema Viya. Váhisera tájuchahini tátahini eta tapacajiana. ³¹ Eta máimararasirahi eta juca ema Moisés, máramirinehi. Tiyanapa mapauca, máimatiyarehi. Te macachacayapa, masamapa eta mahu ema Viya. Ánipa máichahi: ³² “Nútichuca Viya nacasiñaquenehi ena piáchucanaveanaini. Nútirichu macasiñaquenéni ema Abraham, ema Isaac, émapa ema Jacob” máichapa ema Viya. Tacahe, ema Moisés tiyayacareinehi eta mapisirahi. Vaipa mapatsicavahini máimararahini. ³³ Tásiha, ema Viya máichavarepa: “Pivejuhupevacava eta péparupeva taicha santo eta juca apaquehe piáviyahahi piácatayapairuhi. ³⁴⁻³⁵ Písamanuya puiti, jucarihi numetacaviyare. Núti nímararacahi eta nacatajivairahi ena nuchanerana tiávianahi te Egipto. Nusamahi eta náiyairahi. Nuvaraha nucatiuchavacayare. Eta tacahe, núcupaichahi numetapanaviya. Nuvanecaviyare puítirichu piyana tayehe eta Egipto, picuchucuhavacayarehi” máichapa ema Viya.

Tacahehi eta matuparasirahi ema Moisés mayehe ema Viya, mavaneruhi náquenu-muriyarehi ena majaneanana, macuchucuhaya éna eta te nacatajivaiyahi. Étasera te tinapucainapa vahi náesachahini éma. ³⁶ Tásiha, émarichuhi ema maca Moisés macuchucuhavacapa namutu ena majaneanana tiáshianahi te Egipto. Eta macuchucuiravacahi, máimerecahi eta tiáramicareana te jena avasare Egipto, étapa eta te mar ticajare Títsiama Une, étapa te mávapahiana vámahí. Cuarenta año macahehi ema Moisés eta máichirahi eta juca. ³⁷ Émarichuva ema Moisés ticaechajiriruvahi nayehe ena majaneanana israelítana eta máuchusirayarehi ema profetayare. Máichapa: “Ema Viya Dios tivanecanuhi núti numetacaheyare eta máechajiriruva. Titecayare ema apanayare profeta mavaneruyare ema Viya, tacutiyahe eta mavanesianuhi núti. Éma, tiúchucayare te namuri ena viámariéqueneanayarehi. Tatuparaca nasuapayare tamutu eta mavanairipianaya” macahehi ema Moisés. ³⁸ Émarichuvare ema Moisés, ema máichuhaquenehi ema ángele tiápanaya eta te jena cerro Sinaí, nacuchapirahi ena achaneana machamuriana te vámahí. Tasiha, máechajicahi ema Viya ema Moisés. Te titapiricapa ema Viya, ema Moisés tiúcupaicapa, mametacavacapa ena achaneana tamutu eta mametacasivanahi me Viya. Énerichuvare ema Moisés májuchapahi te libro eta mavanairipiana ema Viya, tisuapacareanahi viyehé viti israelítana véhicanaya. ³⁹ Eta mávhairahi ema Moisés te cerro, vaipa náimahahini ena viáchucanaveanaini. Tásiha, vaipa návarahahini náehicahini éma. Navarahapa tichavanayarehi te Egipto. ⁴⁰ Tacáhénapa, te náichapa ema Aarón: “Vivaraha pépiyasinahavi eta visiñarajina tánapumirauchahaviya, taicha vaipa vecha tájahapuca máicharacavahi ema Moisés, ema ticuchucuhahavihi tayehe eta viávinénihí te Egipto” náichapa. ⁴¹ Tacahe, náepiyacapa eta nasiñarajiyarehi, amairiha oro, tavasimahi eta torillo. Napiestachayarepa eta náepiyaruhi nasiñaraji. Tacahe, ticaparecanavare eta vaca; nájararacacahahi eta nasiñaraji eta námavahuhi, náimcutichaipa ema Viya. Ténicacanapa. Tiúrisamureanapa eta náimairahi táurinavahi eta nasiñaraji náepiyaruhi. ⁴² Émasera ema Viya, eta máimairahi eta juca, vaipa máurichahini. Tásiha, vaipa majaneacavacahini éna. Váhisera máicuñacavanehini. Máisapapa ticasañarajiana, téneuchavanapa te tamirahu eta nasiñarajiana. Tásiha, tamutupa nacasiñaraji eta jarairiquiana. Taicha ánipa tacahehi eta Sagrada Escritura nájurehi ena profetana. Ánipa maicha ema Viya: “Émitisicanuhi núti, eti israelítana. Vaipa nútinahini ácasíña eta jena cuarentaquenehi año te mávapahi vámahí. ⁴³ Étapa ecasiñahi épyumirauchahi eta esiñarajiana ticajare Moloc. Énerichuvare ecasiñahi eta jarairiqui ticajare Renfán. Eta ecaparuhi, vahi nútinahini íjaraca. Étapa íjaracahi eta esiñarajiana. Éti, éperajiricapa eta esiñarajiana te tayeheana trono tapenahuana épiyuanahi. Eta tacahe, nucajanerepaicaheya te apachacaya apaquehe ticajare Babilonia” máichapa ema Viya.

⁴⁴ Te jena mávapahi vámahí ema Moisés mavanecapa ena viáchucanaveanaini náepiyaca eta mapenayarehi mácupaisirareyarehi ema Viya. Mavecunaruhi eta tiáviha te anuma máimechaquenehi ema Viya. Étarichu náunasirare eta ajureca tiáma eta mavanairipiana ema Viya. ⁴⁵ Te tépenapa ema Moisés, máevachacapa ema Josué émapa máitsivahi téchapajiricayarehi ena achaneana. Tacahe, tiyananapa mámamurihapa ema Josué. Ena achaneana námapahi éna eta mapena mácupaisirare ema Viya. Nacaijuhepa eta apaquehe natuparahahi. Natarihisera ena achaneana ticavasana tayehe. Váhisera tácajerahichaini eta náitahasiravacahi ena nánaranahi taicha ema Viya máimicacavacahi. Tacahe, tayerevahi eta áñoana ena náeperajicahi eta mapena ema Viya. Te tíjurucapa ema rey David, ticatuparahapa, machimapapa eta tatiaririchaha. Émapavavare máechapajirica. ⁴⁶ Taicha ema maca rey David máemunaruhi ema Viya. Tacahe, ema David mavarahapa tépiyarecaya eta

mapenaya ema Viya amairihayarepa mari. ⁴⁷ Váhisera táitachahini eta mapanereruhi ema David, taicha ema Viya vahi máisapahini. Émapa títauchahi ema machicha ticajare Salomón. Émapa tépiyacahi eta Templo.

⁴⁸ Tiuri puiti, numetacahevare, ema Viya ticavasahi te anuquehequene anuma. Vahi títecaimahi macapena te témploana vépiyaruanasami viti páureanasami achaneana. Taicha ema Viya máichapa eta máechajiriruva: ⁴⁹ “Te anuma táviha eta nuyehe trono néjasihihi. Ánaqui tásiha eta nuvanairipiana tayehe te juca apaquehe. Núti vahi nácamunu eta peti te juca apaquehe. Núti vahi nácamunu eta nunarasirarena. ⁵⁰ ¿Váhipuca échava eta nútirahi népiyaca tamutu eta juca ímahaqueneanahi te juca apaquehe?” macahepa ema Viya eta máechajiriruvahi.

⁵¹ Puítiripa eti esamararacuananahi, ¿tájaha tacayema éhicahi eta namuracasamurevanaini ena iáchucanaveanaini? Váhivare ávarahahini esama puiti eta máechajiriruvahi ema Viya táichavenehi eta evainarajisamurevavacahi étapa eta emasuapirahi ema Espíritu Santo. Éti, eta epanereruana tacuti eta napanereruana ena iáchucanaveanaini eta navainarajivana. ⁵² Éna, náemecatajivachahi namutu ena profetanaini. Nacapacavacahi nácani téchajisihanahi eta máitesirayarehi ema Cristo. Tásiha puiti, eta máitesiraipa ani, épururipa éma, masapihapa íjararecahi ímicapacahi éma taicha tétaavicavahi eta máurivahi. ⁵³ Étaripa eta mavanairipiana ema Viya, ángeleana ena tíjarapananahi ema Moisés. Échajicuhaipahinéni éti, esamaripahinéni; váhiqueneséra esuapahini —máichapa ema Esteban eta maconsejahiravacahi.

Eta máepenira ema Esteban

⁵⁴ Te nasamapa ema Esteban eta máichirahi, tiseanmarinehi. Tinicavanarinehi eta nasemaneva. ⁵⁵ Émasera ema Esteban vahi mapicaracavacahini éna taicha mávaháruhi ema Espíritu Santo. Máesenicapa te anuma. Máimaharine eta majaraiva ema Viya, émapa ema Jesús titupihahi te vaure tinapaicahi eta majaraiva ema Viya. ⁵⁶ Tacahe, ema Esteban máichavacapa ena achaneana natarihiqueneanahi:

—Ésenica te anuquehe. Núti nímahahi eta anuma téjiacahi. Émapa ema Jesucristo, máenahi titupihahi te mavaure ema Maiya —máichavacapa ema Esteban.

⁵⁷ Énasera eta nasemanevahi, tichujiquíñahavanapa. Tijajamurihanapa náetereuchapa namutu. ⁵⁸ Nacaratacapa, námapa te tachachacu eta avasare. Ánaqui eta natupisisihayarehi nacapasihayarehi te márijahiana. Ena téhanahi nanaquicapa eta náepacuhána, natuparacapa ema nayehehi comisario ticajarehi Saulo. ⁵⁹ Tacahe, nanahacaripa natupisicahi ema Esteban. Tiánehiripa nacapaca. Émasera tiyujarauchavaichaha. Ánipa macahehi:

—Tata Náquenu Jesús, pijacapinanu eta náchaneva.

⁶⁰ Eta máquipaisiravahi, tépuyucapa tipiaracapa muraca. Ánipa macahe:

—Tata, piperdonachavaca ena nani eta juca náichiranuhi napecaturahi —macahepa.

Te títapiricapa eta mayujarasirahi, tépenapa.

8

Emá Saulo mapanerecha mapanajiricavaca eta macatichiravacahi ena téhicanahi ema Jesús

(Hch 22.6-16; 26.12-18)

¹⁻² Ema maca Saulo, eta mapanereruhi tacutihi eta napanereruana ena ticapacanahi ema Esteban. Tiúrisamurepa éma. Natarihivaresera ena apamuriana ajairana tiúripanereruanahi. Navehapa eta máquehe ema Esteban, náecarapanapa. Tiyahanapa ichape eta nacatiequenerahi. Étarichu te jena sache tépanavanapa napanajiricavaca muraca ena téhicanahi ema Jesús tayehe eta avasare Jerusalén. Téjanerecanapa náicha, ena camuriqueneana. Tiyananapa te apana avasareana tinapaica te Judea étapa te Samaria. Énasera ena apóstoleana nanasirichuhi te Jerusalén.

³ Tacahe, ema Saulo, ema náinapuraquipahi ena tipanajiricanahi ena téhicanahi ema Jesús. Tisiapanapaipa te napenana. Nacaratacavacapaipa ena nachimapaqueneanapahi ajairana, esenana. Nachururupaicavacapaipa eta námirapahi te cárcel.

Emá Felipe ticametarairu te avasare Samaria

⁴ Te jácani avasareana náitecapihapahi ena najunaqueneanahi, tímiyanavanarichucha ticametarairuana eta máimiturapiana ema Jesucristo. ⁵ Ema maca Felipe majunaquenehivare. Títecapapa eta te avasare ticajare Samaria. Tacahe, ticametarairupa nayehe ena achaneana eta náehisraya ema Jesús, émairahi Cristo ema nacuchapaquenehi. Tiúrujicavanapa ena achaneana. ⁶ Namutu nasamararacahi eta macametarairuirahi ema Felipe.

⁷ Taicha náimahapa eta macanarasiravacahi ena nacajumaqueneana camuriqueneana: ena muracaquihana, ena tiyayacareana, énapa ena masariana. Camuriana ena éreanana máimijunaqueneanahi te náquehe ena achaneana návaháruanahi. Tipiárrarecanapáipa eta náchusirapahi. ⁸ Eta tacahe, ichaperinehi eta náurisamurevahi ena achaneana tayehe eta jena avasare.

⁹ Te jena avasare Samaria, matiarihahi ema émana achane ticaijare Simón. Iáparehi éma. Ánaquiaparipa eta macaetemajirisiravacahi ena achaneana. Títupajijiácavahi tépiyacava éma. ¹⁰ Namutuhi ena nasimutuvaqueneana achaneana énapa ena ticaimahaqueneana nasamararacahi nasuapahi eta macayemaqueneanahi. Nacunacharinehi, ánipa nacahe eta náechajiriruvahi:

—Ema maca achane títupajijiácavahi ichape maicha ema Viya —nacahepa.

¹¹ Ánaquiaparipa eta mavayuarasiravacahi éna, tayehe eta mahiápemarevahi. Eta tacahe, napicauchahi éma. ¹² Téhesera nasamapa ema Felipe, nasuapapa eta nasamirahi eta máechajiriruva ema Viya. Náehicapa eta mametarairuhi mayehe ema Jesús eta émairahi Cristo, ema nacuchapaquenehi. Tacahe, camuriana ena ajairana énapa ena esenana ena ticaicachasianahi taicha eta nasuapirahi ema Jesús. ¹³ Émaripa ema iápemaréni Simón, masuapavare éma. Ticaicachasivarepa. Máehicapa macachanepaipa ema Felipe. Ichape máramipahi eta ichapequeneana tiáramicareana máichaqueneánapahi ema Felipe.

¹⁴ Tiuri, te Jerusalén, nasamairicapa ena apóstoleana eta náehisiraipahi ema Jesús ena achaneana ticavasana ena avasare Samaria. Tásiha, ticaevatavaneanapa ema Pedro ema Juan. ¹⁵⁻¹⁶ Tiuri, ena téhicanaripa ema Jesús, vuíchaha máucupauchahini ema Espíritu Santo, mávahácavacahíni éna. Tacarichuichaha eta nacaicachasirahi eta navarairahi náehica ema Viáquenu Jesús. Tásiha, te títécapanapa ema Pedro ema Juan, tiyujaracanapa nayasecapa ema Viya májarasiraina ema Espíritu Santo eta mávahásiravacaina ena téhicanaripahi. ¹⁷ Tacahe, ema Pedro émapa ema Juan nanacapa eta navahuana te nápusiana éna. Tacahe, ema Espíritu Santo mávahácavacaripa eta náemamachutíchiravacahi éna. ¹⁸ Tacahe, ema Simón eta manecapirahi eta mávahásiravacahi ema Espíritu Santo te náemamachutíchiravacahi éna, mavarahapa éma mavachachavaca ena apóstoleana. ¹⁹ Ánipa máichavaca:

—Íjaracanu núti apana eta nítusiraina eta ítucaquenehi, apaesa te nunaca eta nuvahuana te nápusiana ena nácani achaneana, máucupaicapaini ema Espíritu Santo, mávahácaini éna —máichavacapa.

²⁰ Tacahe, ema Pedro máichapa:

—Pémitiequenehaya píti étapa eta piplatane. Taicha píti vahi tiuri eta pipanereru. Pímijachahipuca vicavacharapiyare eta májararuhaviana ema Viya. ²¹ Vahi pitiparacaina píti, taicha eta pipanereruana vahi tátupiruvahini mayehe ema Viya. ²² Pínajica eta pivainarajivana. Piyaseaca ema Viya, tijuricati tiperdonachavi eta tamaurivahi eta pipanereruhi píti. ²³ Taicha nímatiacavíhi eta pétávichirahi eta picapinaruraivahi. Eta juca picahehi taicha vahi tinajiacavimahi eta pivainarajiva —máichapa ema Pedro.

²⁴ Tacahe, tipicapa ema Simón. Ánipa maicha:

—Ímicatcanu éti, eyujaracahanu me Viya apaesa vahi tacuitauchava eta juca ecayemaqueneanahi —máichapa.

²⁵ Tacahe, ema Pedro ema Juan tinahacavanapa túmiturecana eta máimiturapiana ema Viáquenu Jesucristo. Te tamutupa eta náimituresirahi, tiyananapa tichavanayarepa te Jerusalén. Tétávajicanapa te avasarechichana tayehe eta Samaria. Ticametarairuanapa nayehe ena achaneana.

Ema Felipe máimituca ema achane ticavasa te Etiopía

²⁶ Tiuri, te jena sácheana, tiúcupaicapa ema émana ángele mavaneruhi ema Viya. Máechajicapa ema Felipe. Ánipa maicha:

—Felipe, pétipiricava, piyana te tinapaica te vana. Pivenacuhayare eta achene tiásiha te Jerusalén, tiyana te avasare Gaza. Péticayare eta mávapahiana vamáhi —máichapa.

²⁷ Tacahe, títupiricavapa ema Felipe, tiyanapa. Te achene ticainunacacanapa ema achane ticavasa te avasare ticaijare Etiopía. Ema maca achane*, sujupaha esu Candace, reina tayehe eta apaquehe ticaijare Etiopía. Ema maca achane ema tijaneaca eta suímahaqueneana esu reina. Éma, másinehi te Jerusalén, máejirapanahi ema Viya. ²⁸ Ema maca achane machavaqueneapipahi te mávasa. Eta mapaisirahi, téjacapahi te mayehe carro. Téchajicurecapahi eta Sagrada Escritura májure ema profetaini Isaías. ²⁹ Tacahe, ema Espíritu Santo mametacapa ema Felipe, ánipa maicha:

—Pémeñahava te tachacaya eta jena carro —máichapa ema Espíritu Santo.

* 8:27 Eunucohi ema maca achane.

³⁰ Tacahe, te témeñahavapa ema Felipe, te macachacayapa eta carro, masamapa ema achane téchajicurecapahi. Tásiha, mayaserecapa. Máichapa:

—¿Picaicutiara eta jara péchajicurepahi?

³¹ Ema achane majicapapa:

—Váiparinehi nuaicutiaramahi taicha nájina nametacanupahini eta tacayemapahi. Te pitucapuca píti pimetacanu, picatajicanu. Yare, piávacuha péjaca te juca nuchacaya — máichapa ema achane.

³² Tiuri, eta máechajicurepahi ema achane, ani tacahehi: “Eta uvesa, te nacaratata nacapacayarepuca, vahi ticatiuchavaimahi. Te nachucamecapuca, váhivare tipiarare-caimahi. Ene macahehi ema maca achane, vahi mácapauchavahini, váhivare máechajiuca-vahini te námapa tayehe eta nacapasihayarehi. ³³ Tétavicavahi eta nacatsirirairahi éma, tayanapane tájinanéni maviurevainahini. Nájnavare nacatiuchahini. Ena mámarieque-neanaini, nájina náechajisihahini éna”.

³⁴ Tacahe, ema maca achane mayaserecapa ema Felipe. Máichapa:

—Picatajicanu pimetacanu. ¿Nájaha ema táechajisihahi eta juca libro májurehi ema profeta? ¿Ema táechajisihahi ema maca profeta, vahi apanapuca? —macahepa.

³⁵ Tacahe, ema Felipe tépanavapa mametaca ema táechajisihaguenehi eta libro. Mametacapa eta émairahi táechajisihahi ema Jesús, ema Cristo ema nacuchapaquenehi. ³⁶ Tacahe, te máechapa ema achane, mapanerequenehainehi eta napaisirapahi. Tacahe, te nacapayacapa eta únequire, macahepa ema achane:

—Te juca jararíhi une. Nuvaraha picachasicanu —macahepa.

³⁷ Tacahe, ema Felipe majicapapa:

—Tiuri, te yátupihupuca eta pisupirahihahi te pisamure eta picasiñairaya ema Jesús, nícachasicavi —máichapa.

Majicapapa éma:

—Yátupi nusuapa ema Jesucristo eta émairahi machicha ema Viya —macahepa.

³⁸ Tacahe, macavanairipipa nacaicheca eta carro. Tiúcupaicanapa éna, tiyanapapa te únequire. Tacahe, ema Felipe máicachasicapa ema achane. ³⁹ Te tichavanapa tayehe eta únequire, tñahúchavapa témitiaca ema Felipe, taicha ema Espíritu Santo manaracuhapa. Váipa macaecherahirihini. Váipavare máimahahini ema achane. Tímiyanavapasera tipaica ema achane. Tiúrisamurepaipahi. ⁴⁰ Eta máucupaisinehi ema Felipe eta te avasare ticaijare Azoto. Tacahe, tétavajicapapa eta te avasareana. Ticametairupaipahi eta te apana avasare ticaijare Cesarea.

9

*Ema Saulo masuapa eta máichuirahi ema Jesucristo
(Hch 22.6-16; 26.12-18)*

¹ Tímiyanavarichucha ema Saulo eta mapánajirisiravácahi ena téhicanahi ema Jesús, mavarairahi máimicapacavacaya. Tiyanapa tiyasesereca eta órdene mayehe ema corregidor tayehe eta Jerusalén. ² Máichapa ema Saulo:

—Nuvaraha nuyanaya te jena avasare Damasco. Nuvarahavare píjaracanu eta órdene, eta nucaratasiravacaina ena téhicanahicacha ema Jesús, namutu nácani nétupiaruanayarepahi ajairana, esenanapuca. Nutanucavacayare te náurujisirarevana ena vijaneanana. Présoanayarepahi eta námiryare eta te juca Jerusalén —máichapa.

³ Tacahe, tiyanapa ema Saulo. Eta mapaisirapahi éma te achene, tiánehipa títécapa te avasare Damasco, tiáramicarepa eta majaraiva ema Viya tiásiha te anuma. Tamicauchapa éma. ⁴ Tásiha, tiáquipaicavapa eta mapisirahi. Tásiha, masamapa eta mahu ema Jesús. Máichapa:

—Saulo, Saulo, ¿tájaha tacayema picatianacanu pipánájiricanu? —máichapa.

⁵ Majicapapa ema Saulo, mayaserecapa:

—¿Nájahavi píti Tata?

Majicapapa:

—Nutí Jesús. Nutí picatianaruhi, eta pipanajirisiravaca ena téhicanuanahi. Pésamiricavachucha, taicha pítijivaichucha píchavahi. Vahi piúrimahi te pímiyanava picatianacanu. Péhicanusera píti —máichapa ema Jesús.

⁶ Tacahe, ema Saulo tiyayacarenecha eta mapisirahi eta máechajisirahi ema Jesús. Macahepa:

—¿Tájahapuca eta pivarahaquene nítauchaquenéna piyehe, Tata? —máichapa.

Tacahe, ema Jesús máichapa:

—Péhepuca. Piyana pítecapa te jena avasare. Ánaqui mararíhi ema timetacaviyare eta pítauchaquenyare nuyehé —máichapa ema Jesús.

7 Ena apamuriana ajairana macachanequeneanapahi ema Saulo, ichape eta tiáramecana. Taicha nasamahí ema téchajicahi, váhisera náimahahini. 8 Tacahe, ema Saulo téchepucapa eta te máquipaisinevahi. Vaipa máimairiricahini. Tacahe, nachurucapaipahi eta nacaitecapiraya tayehe eta avasare Damasco. 9 Mapana sache eta mapuchuquívahi. Váhivare tinica. Tájinvare máerahini.

10 Tiuri, eta te jena avasare Damasco, matiaríhihi ema apana téhichahivare ema Jesús, ema ticaijare Ananías. Émarichuvare máechajiruhi ema Viáquenu Jesús. Ánipa tacahe eta máechajisirahi:

—¡Ananías!

Éma majicapapa:

—Nutiaríhi, Tata —macahepa.

11 Tacahe, ema Viáquenu Jesús máichapa:

—Piñana pitupiruya te jena calle ticaijare Titupina. Te jena mapena ema Judas, picayasasereruyare ema achane ticaijare Saulo, ema tiásihahi te avasare Tarso. Puiti máenahi tiyujaracahi. 12 Núti néchajicahi éma. Numetacahi éma eta pítecapiraya mayehe. Nuvanecavi pinacaya eta pivahu te mápusi apaesa tachava eta máimairirisira —máichapa ema Jesús.

13 Te masamapa ema Ananías, macahepa:

—Tata, namutu tímecanuanana eta máicharacavanahi ema achane eta mavainarajivahi nayehe ena téhicanahí ticavasana te Jerusalén. 14 Éma, tímitecahi puiti eta ani, námaphi eta órdena náijararúhi ena tuparairucana eta te Jerusalén eta máepanirahaviya mapresuchirahaviya vimutu viti véhicavianahi —macahepa ema Ananías.

15 Émasera ema Jesús máichapa:

—Piyanachucha, taicha ema maca, nunerejiruhichuhi núti. Nuvanarayarehi éma. Nuvanecayare mayana macametarairu eta níjare nayehe ena achaneana te apanana avasareana étapa eta nayehe ena vijaneana israelítana. Nuvanecayareva máechajisíha eta níjare nayehe ena ichapequeneana aquenucana réyeana. 16 Núti nímechayare eta macatájivairayare ichape táichavenenahi eta máehisirunuyare —máichapa ema Jesús.

17 Tacahe, masupahi ema Ananías. Tiyanapa tayehe eta peti mávihahi ema Saulo. Tisiapapa. Máechajicapa. Manacapa eta mavahu te mápusi. Tásiha, máichapa:

—Nuparape Saulo, ema Viáquenu Jesús tímerecavahi eta piyehe te achene te pítecainapa. Éma, tivanecanuhi níteca eta piyehe. Mavarahahi tichavayare eta pímairisira. Mavarahavare tiávahácaviya ema Espíritu Santo —máichapa.

18 Tacahe, enevanepa témitiaca eta tépacuchainíhi ema máuquiha, téjamihaquicha. Tichavapa eta máimairirisira. Tásiha, ema Saulo téchepucapa, matupirupa ticaicachasi. 19 Te tamutupa, tinicapa. Tichavapa eta matumeva. Manasipanapa jena sácheana nayehe ena machamurianarípahi téhicanahi ema Jesús tayehe eta avasare Damasco.

Tépanavapa ticametarairu ema Saulo

20 Tacahe, tépanavapa ticametarairu ema Saulo te náurujisirareva ena israelítana. Máechajisihapa ema Jesús émaríhi Machicha ema Viya. 21 Namutu ena tisamararacanáhi, ichaperinehi nárami. Tásiha, nacahepa:

—¿Tájaha tacayema? Émara ema maca ema tipánajirícavacahi ena téhicanahi ema Jesús, ena ticavasana te Jerusalén. Tímitecahi te juca eta mapresuchirapanavacayarehi ena apamuriana, mámamuríhayarehi nayehe ena tuparairucana eta te Jerusalén. ¡Tásiha puiti, émarinechavare ticametarairuhi mayehe ema Jesús! —nacahepa.

22 Émasera ema Saulo tiápajucavapanapa eta máitusira ticametarairu. Máimerecahi eta yátupiquenerahi ema Jesús émaríhi ema Cristo, ema nacuchapaquenehi. Te tamutu eta náurujisirarevana ena israelítana eta te Damasco, macapaquechamuripa nácani ticatiana-canahi eta véhiruhi.

Éma Saulo nacaratacayarepaini ena israelítana. Émasera tiyanapa tijuana.

23 Tayerevahi eta áñoana,* ena israelítana napanerechapa nacapacaya ema Saulo. 24 Émasera masamairiricapa eta náemauchirahi. Tamutu sácheana, yátiana nacunehi eta te acheneana máuchujisihayarehi, taicha ichape eta navarairahi nacapaca éna. 25 Énasera ena machamuriana náitucahi eta nayumurusirahi náiyaracuhapa eta te ichape saye. Náitiacapa te tiupi enure. Tacahe, nacajuchuchucapa eta te apachacaya eta yúchama. Tacahehi eta máitujisiravahi tijuana.

Éma Saulo títecaparipa te Jerusalén

* 9:23 Te pivaraha pecha, pitanuca te libro Gálatas 1.18.

²⁶ Te títicapapa ema Saulo te Jerusalén, mavarahapa masiapamuriha ena náinapureanahi téhicanahi ema Jesús. Énasera napicarichucha éma, taicha vuúchaha nasuapahini eta máehisiraiapa ema Jesús. ²⁷ Matiarihisera ema achane Bernabé. Émapa tiámahi ema Saulo tímimaticahahi nayehe ena apóstoleana. Mametamurihapa eta máícharacavahi ema Saulo eta máimairahi ema Viáquenu Jesús eta te achene, etapa eta máechajisirahi, máichuirahivare ema Saulo. Mametacavare eta yátupirahi máituca ticametarairu ema Saulo mayehe ema Jesús eta te avasare Damasco. ²⁸ Tacahe, ema Saulo manasipa te Jerusalén. Masiapamurihapa éna, énapa macachanejiricavacahi. Vahi mapícarácavahíni eta macametarairuirahi mayehe ema Viáquenu Jesús. ²⁹ Máechajiricavacapahi ena israelítana† te jácani mácapajisihavacapahi. Macanaraemachavacahi éna. Vahi náuricahini eta máimiturapianahi. Tisemanapa mayehe. Tásiha, navarahapa nacapacaya éma. ³⁰ Nasamairiricapasera ena machamuriana. Tacahe, náevatacapa mayana tayehe eta te mávasa Tarso. Náehicapa ena apamuriana tinapananayarehi tayehe eta avasare Cesarea, etapa nachavinehi. Tiánucuhapa éma, tiyanapa macarichupa.

³¹ Tacahe, tiúricavanapa ena náumurivana ena téhicanahi ema Jesús tiávihana te apanana avasareana tayehe te Judea, te Galilea, etapa te Samaria. Tásiha, tétumechacacanihi eta náimiyarivaya napicauchiraya ema Viáquenu. Máimicatamurihahivare ema Espíritu Santo. Eta tacahe, camurianapaipavare ena téhicanahi.

Eta manarasirahi ema achane ticajare Eneas

³² Tiuri, ema Pedro tiyanapa máejiravacapaipa ena machamuriana eta te avasareana. Títicapapa nayehe ena apamuriana machamuriana ticavasanahi eta te avasare ticajare Lida. ³³ Matiarihi ema émana achane ticajarehi Eneas. Macajumaquenehi éma. Ocho añoripahi eta macajumairahi. Vaipa táurihini tiyamuriaca, váhivare máechepuchahini te macamane. Tacahe, máitecapauchapa ema Pedro. ³⁴ Máichapa:

—Pésenicanu, Eneas. Ema Viáquenu Jesucristo ticanaracaviya. Puiti tájinapa eta pijumaini. ¡Pécheputa! —máichapa.

Tacahe, ema Eneas enevanepa técheputa. Tájinapa máichiravainahini. ³⁵ Tacahe, náimahapa eta manarasirahi namutu ena ticavasanahi tayehe eta te avasare Lida énapa ena ticavasanahi te tachacaya ticajare Sarón. Eta náimairahi, náinajicapa eta nayeherepianaini. Tásiha, náehicapa ema Viáquenu Jesús.

Eta suápechirava títareca esu Tabita

³⁶ Te jena sácheanahi, sutiarhi esu esena ticajaru Tabita, eta suátserepihi Dorcas. Ésu, ticavasahi eta te avasare ticajare Jope. Ésurichuhivare téhichahi ema Jesús. Eta suítaresirahi esu suca esena, sucajivaca ena páureana eta suímahaqueneana. Tímícatarahi nayehe nácani ticajuheanapahi. ³⁷ Te jena sácheanahi, esu Dorcas ticajumapa. Suvayuhapa, tépenapa. Tacahe, navehapa, náicachapa eta suáquehe. Nacasiapapa te tajuhe te anuquehe téqueneha piso.

³⁸ Eta juca avasare Jope tachacayaichuhi eta apana avasare Lida, eta mávihahi ema Pedro. Náecharipahi eta matiarihirahi ema Pedro te Lida. Tacahe, navanecapa ena apinana ajairana, náichuhapanayare éma. Te náitecapauchapa, náichapa:

—Vivaraha viámavi puítirichu ánaqui te Jope. Pímahapanaini esu vémunaruquenehi vichamuri Tabita. Tépenaipahi —náichapa.

³⁹ Tacahe, tiyanapa ema Pedro, máehicavacapa éna. Te títicapapanapa, náimisiapapa eta te tajuhe suávihahi esu Dorcas. Namutu ena esenana máimaruana, te náimahapa ema Pedro, náurujiacapa. Tíyahanapa, náimechapa ema Pedro eta namuirihana supariruanahi ésu te achanerichaha. ⁴⁰ Tacahe, ema Pedro macavanairipipa náuchuca namutu. Tacahe, tépuyucapa éma, tiyujaracapa. Tacahe, máimraracaripa esu esena suépenaquene. Tásiha, máichapa:

—Tabita, pécheputa.

Tacahe, ésu téjamihauquichapa. Suímahapa ema Pedro. Téjahapaicapa. ⁴¹ Tacahe, macaratacapa eta suvahu, macaechepucapa. Énevanepa máichuhavaca ena máimaruana énapa ena apamuriana machamuriana. Máimechapa eta suchaviraipa títareca. ⁴² Tacahe, náechapa namutu ena ticavasanahi eta te avasare Jope. Camurianarine ena tisuapanahi ema Viáquenu Jesús. ⁴³ Ema Pedro manasipanapa jena sácheana tayehe eta avasare te mapena ema machamurihivare ticajare Simón, náimijarechavare Suélareru.

† 9:29 Ena nani, yátupiqueneanahi israelítanahi, náuchureanahisera te jácaniana apanana avasareana. Táitusiava, apaechajiriruvanaripa eta ticajare griego. Puiti tichavanaripa eta te Jerusalén, návasahi ena ticachichanaini.

10

Éma Viya mavaneca éma Pedro máimitupanayare éma Cornelio

¹ Te jena avasare ticaijare Cesarea matiaríhi éma émana achane romano ticaijare Cornelio. Militar éma achane. Éta mávacure éma capitán, comandante te étana compañía tayehe éta batallón ticaijare Italiano. ² Éma maca achane mapicauchahi éma Viya. Tamutuhi sácheana tiyujarauchavahi. Máimitucavacahivare namutu éna machichanaveana énapa éna tiávihanahi te mapena. Énerichuvare máimicatavacahi éna israelítana páurequeneana, máijaracahi éta camuri plata. ³ Te jena sache, las trésqunepa cáperehi, éma Cornelio tiyujaracahi. Tijahúchavapa máimaha máucupauchahi éma émana ángele mavaneruhi éma Viya. Máéchajicapa éma ángele, máichapa:

—¿Pícharacava? Cornelio —máichapa.

⁴ Tásiha, éma Cornelio tipicarínehi éta máimararasirahi éma ángele. Majicapapa:

—¿Tájaha pivaraha éta nuyehe, tata?

Tásiha, máichapa éma ángele:

—Tímitecanuhi numetacavi. Éta piyeheana oración piyujarauchiravana étapa éta pímicatasiravacahi éna ticamunuvana páureana, táitecapauchahi tamutu éma Viya. ⁵ Pímicavaneera puiti náepana éma achane ticaijare Simón, éta máchucarapíhivare Pedro. Éma tiávihi puiti te jena avasare ticaijare Jope. ⁶⁻⁷ Éta peti máitecapíhahi mapena éma apanavare Simón éma náimijarechaqueneva Suélareru. Éta táviha éta peti mapenahi te tachausí éta mar. Éma maca Pedro éma tímecaviyare éta pítauchaqueneánayare — máichapa éma ángele.

Te tamutupa éta máéchajisirahi éma ángele, tiyanapa tichava. Tacahe, máichuhapa éma Cornelio éna apinana mamusurana. Máichuhavare éma émana masuntarura. Énerichuvare tipicaurahi mayehe éma Viya, títaurahivare mayehe éma máquenuhi. ⁸ Tacahe, mametacavacapa éta mametarapi éma ángele. Tacahe, máevatacapa tayehe éta avasare Jope.

⁹ Te jena las docequenepa sache, éma Pedro tiápanapa éta te téqueneha piso. Tiyujaracayarehi. ¹⁰ Técuháipaicha éma, taicha tájinarichaha manicahini. Vuíchaha náimaquerecáhini éta tinicacare. Tacahe, éta mayujarasirahi máimahapa téjiacahi éta anuma. ¹¹ Máimahavare éta tiúcupaicapahi éta te mávihahi éma, tacutiyaréni éta ichape sávana. Ticaitiapusivacapahi te esquinana. ¹² Camuri éta sárareana, quichareana, cáyureana, támaqueneanapahi éta sávana, tamutu éta apánapanenéjiqueneána sárareana. ¹³ Tásiha, masamapa éma téchajicahi te anuquehe. Máichapa:

—Pécheputa, Pedro. Picapaca étanaina sárare. Pinica.

¹⁴ Émasera éma Pedro, majicapapa:

—Vahi, Tata. Tituparacahavi vahí vicunicahini vinica viti israelítana éta juca sárareana vicajachaqueneana, vicinahini. Tájina nímatiya nunicahini éta juca —macahepa.

¹⁵ Tiápechavavare máéchajica éma Viya, máichapa:

—Vahi picuimijarecha ticajachacareana éta níjararuvianahi tinicacareana —máichapa éma Viya.

¹⁶ Mapahe éta máéchajisirahi éma Viya éma Pedro. Tacahe, tichavapa éta sávana tiápana te anuma. ¹⁷ Éma Pedro manasirichaha macájarasamúrehi éta mapanerechirahi tájahapuca tacayemahi éta máimahaquenehi. Títecapananecha te tapaja éna vanairucana mayehe éma Cornelio. Nacayasesererupa éta mapena éma Simón Suélareru. ¹⁸ Éta náitecapirahi, nacayasesererupa te étahipuca mávihahi éma Simón Pedro. ¹⁹ Émasera éma Pedro manasirichaha tipanererecarichaha taicha éta máimahaquenehi. Tásiha, éma Espíritu Santo máichapa:

—Nararíhi te juca éna mapanana ajairana titanucavianapahi. ²⁰ Piyana pímahavaca éna. Vahí picueñamava éta péhisiravacayare, taicha núti nuvanecavacahi éna —máichapa éma Espíritu Santo.

²¹ Tacahe, masuapapa éma Pedro. Tiúchucapa tiyanapa nayehe éna titanucanapahi. Te máitecapauchavacapa, máichapa:

—Nútira etanurepahi éti. ¿Tájaha tímitecahehi?

²² Tásiha, najicapapa éna:

—Tivanecahavíhi éma capitán Cornelio. Éma achane tipicaurahi mayehe éma Viya. Títaurahivare nayehe éna achaneana. Namutu éna israelítana napicaucha náemunacavare éma. Puiti víti, vítecapauchavipa, taicha cape juca, éma ángele mavaneruhi éma Viya mametapanahi éma Cornelio máimichuhaví píteca te mapena, apaesa masama éta pímetarapianaya —nacahepa éna.

²³ Tacahe, ema Pedro macasiapavacapa te tajuhe. Nanasipa jena yati mayehe ema Pedro. Te apanapa sache, tiyananapa. Náhecapa ema Pedro ena apamuriana machamuriana ticavasanahi te Jope.

²⁴ Te apanaquenepa sache, napaenumavapa titecapana te avasare Cesarea. Ema Cornelio macuchapaipahi te mapena. Tiurujicavanaripa ena majaneanana énapa ena máemunacásareana máichuhaqueneánahi. ²⁵ Te titecapapa ema Pedro te mapena ema Cornelio, mácapapa máepuyumirauchapa mátsiucayarepa. ²⁶ Émasera ema Pedro máichapa:

—Péhepucachucha pitupiha. Vahi táuricahini pitsiucanu, taicha nútirichuhi picuti-quenehi achane —máichapa.

²⁷ Te tamutupa eta náechajisirahi, tisiapanapa te tajuhe. Máimaharine camurianahi ena náurujiruvanahi. ²⁸ Tacahe, ema Pedro máichavacapa:

—Écharichu éti eta viyeherepiana viti israelítana. Vahi tituparachavi visiapamurihahe eti apavasanana. Émasera ema Viya tivanecanuhi eta vahi nucupica eta nusiapamurihairahereyare. Nájinavare nunerejirumahi nácani ticajachacareana. ²⁹ Eta tacahehi, nítecavanepa. Tájina nácajemahini. Tiuri puiti, nuvaraha néchaya. ¿Tájahapuca eta tímichuhanuhi? — macahepa.

³⁰ Tacahe, ema Cornelio majicapapa:

—Cuátropa sache eta táetavisiravahi eta juca nímahaquenehi. Te jena cáperehi sache hora las tres, nútí nunasiquenehi te juca nupena. Ayunanuhi nuyujarachavare. Tíjahúchavapa tímerecava ema ángele. Tijanuca eta mamuriha. ³¹ Máichanupa: “Cornelio, ema Viya masamahi eta piyeheana oronución piyujarasirana. Táitecapáuchahivare eta pímicatasiravacahi ena ticamunuvana páureana. ³² Pimivanerecaya puiti náepana ema achane ticaijare Simón, eta máchucarapi naicha Pedro. Ema tiávihahi puiti te jena avasare ticaijare Jope. Eta peti máitecapihahi ema apanavare Simón ema náimjarechaqueneva Suélareru. Eta távihahi eta peti mapenahi te tachusi eta jena mar. Te máitecapapa ema Pedro, éma tímítucaviyare” máichanupa ema ángele. ³³ Tacahe, enevanepa nímicuhavíhi. Tájinasera táichiravainahini eta pítesirahi. Tímararahávihi ema Viya eta juca viúrujisiravahi puiti. Vivaraha visamaviya tamutu eta pímetacasivanahi mayehe ema Viya —máichapa ema Cornelio.

Ticametarairupa ema Pedro te mapena ema Cornelio

³⁴ Tacahe, tépanavapa ticametarairu ema Pedro. Ánipa macahe:

—Nucaicutiarapa puiti vahi vácarichu viti israelítana vijacapacare mayehe ema Viya. ³⁵ Namutuchucha majacavavaca nácani típicauchanahi éma, tíchanahivare eta táuriqueneana. ³⁶ Taicha cape juca ema Viya macaitecapahi eta máechajiriruva viyehe viti israelítana. Tivanecahavíhi vimetacavacayare eta najacapacarevahi me Viya nácani ticasifivanahi mayehe ema Jesucristo, maperdonachiraripa ema Viya eta napecaturana. Émara Viáquenu vituparaha téchapajirichavíya vimutu viti achaneana: viti israelítana, étipa eti apavasanana. ³⁷⁻³⁸ Écharichupuca éti eta táicharacavahi te viávasa Judea cape juca táitaresirahi. Te ticaicachasipa ema Jesús Nazareno mayehe ema Juan, máucupauchapa ema Espíritu Santo máijjaruhi ema Viya. Mávahácapa éma, máijjaracaripa eta máitupajijiásiravaya. Tacahe, tépanavapa ticametarairu nayehe ena achaneana ticavasanana te Galilea. Te jácani mapaisihapahi, máichapahi eta táuriqueneana. Macanaracavacapahi ena nacatajivaqueneana mávaháruanahi ema Váinaraji. Maratahahi éma máichahi eta juca, taicha ema Viya máimicatapahi. ³⁹ Tiuri, viti véchajisíha eta juca, taicha vímahaquenehi tamutu eta máichaqueneanapahi ema Jesús tayehe eta mapaisineanapahi avasareana te Judea, étapa te Jerusalén. Énasera ema tuparairucana nacaticahahi éma; náemetatarecapa te crusu eta náimicapasirahi. ⁴⁰ Émasera ema Viya macaechepucahi te máecari te mapanaquenepa sache. Tásiha, máimerecavare te vimuri eta machavirahi títareca. ⁴¹ Vaipa námutuhini ena achaneana náimamahini. Vítinecha vímahaparacahi viti manerejiruanahi ema Viya. Vinecapaequenehahi tamutu eta vícachanerahi ema Jesús te vinisirana. Tásiha puiti, vimetacahiva ena achaneana eta vímahaqueneanahi. ⁴² Taicha tivanecahavípa vicametarairuya. Vimetacayare eta émairahi ema Jesús viyeheyarehi juez viti achaneana énapa ena náepenaqueneana. Taicha ema Viya ema tituparacahi eta mávacureyare juésyarehi. ⁴³ Étaripa eta acane namutu ena profetanaini náechajisíhahi ema Cristo. Ánipa nacahehi: “Namutu ena tisuapanaya ticasifianaya ema Cristo, maperdonachavacayare ema Viya tamutu eta napecaturana táichavene eta nacasifairaya ema Cristo”.

Eta mávahásiravacahi ema Espíritu Santo ena apavasanana

⁴⁴ Tímiyanavarichaha eta máechajisirahi ema Pedro, tiúcupaicapa ema Espíritu Santo. Mávahácapa namutu ena tisamararacanaahi eta mametarairuhi ema Pedro. ⁴⁵⁻⁴⁶ Tíjahú-chavapa ena mávaháruanaahi apáechajiríruvanapa. Nacunacharipa ema Viya. Nasamapa ena machamurianapahi ema Pedro tiásihanahi te Jope. Náraminehi éna eta mávahásiravacahi ema Espíritu Santo ena apavasananaahi, taicha ena israelítana náimijachahi nacarichu ena mávaháruanaahi ema Espíritu Santo. ⁴⁷ Tacahe, ema Pedro máichavacapa:

—Tájina náechajisiacarevaimahi eta nacaicachasiraya ena nani, cápachi mávahácaripa ema Espíritu Santo vicitiripa víti eta mávahásirahavihi —máichapa.

⁴⁸ Tacahe, macavanairipipa nacaicachasi namutu te máijare ema Viáquenu Jesucristo. Te tamutupa, nayaseacapa ema Pedro vahi macuyanavanehini. Tacahe, manasipanapa te jena sácheana eta nayehe.

11

Eta mametarpiana ema Pedro nayehe ena machamuriana te Jerusalén

¹ Tacahe, téchacarevanepa te Jerusalén eta nasuapirahi ena apavasanana eta máechajiriruva ema Viya. Tásiha, napanerequenehapa ena apamuriana apóstoleana énapa ena námurivana. ² Tásiha, te títecapa ema Pedro te Jerusalén, nacajachapa ena apamuriana máinajarahanaichaha eta nayeherepiana ena israelítana. ³ Ánipa naicha:

—¿Tájaha tacayema péjirapanavacahi ena apavasanana? ¡Písapavavare pinica te namesara! —náichapa.

⁴ Tacahe, ema Pedro majicapapa mametacapa eta máichararacavahi eta mapaisirahi. Ánipa maicha:

⁵ —Esamanuchaha. Te návihaipe te avasare Jope, nuyujaracaipahi. Nímahapa téjiacahi eta anuma. Nímahavare eta tiúcupaicapahi tiásiha te anuma tacutiyareni eta ichape sávana. Ticaitiapusivacapahi te esquinana. Títecapapa te návihahi núti. ⁶ Nímahapa eta apánapanené-jiqueneána sárareana támaqueneanapahi eta sávana. Tátarihi eta táínehiqueneana sárareana, quichareana, cáyureana. ⁷ Tacahe, nusamapa eta mahu ema Viya, máichanupa: “Pécheuca, Pedro. Picapaca étanaina sárare. Pinica”. ⁸ Nútisera nujicapapa: “Vahi, Tata. Tituparacahavi víti israelítana vahi vicunicahini eta juca sárareana vicajachaqueneana. Tájina nímatiya nunicahini eta juca”. ⁹ Tacahe, tiápechanuvare téchajicanu ema Viya, máichanupa: “Vahi picuimijarecha ticajachacareana eta nijararuvianahi tinicacareana” máichanupa. ¹⁰ Mapahe eta juca máechajisirahanuhi ema Viya. Te tamutupa, tichavapa tiyapa te anuma tamutu. ¹¹ Étarichu jena hora, títecapanapa ena mapanana ajairana titanucanuanapahi eta te peti nítecapihahi núti. Mavaneruanahi ema émana achane ticavasahi te Cesarea. ¹² Tacahe, ema Espíritu Santo tivanecanupa néhicavaca éna, taicha tájina táefñamavacarehini. Énerichuvare téhicanuanapa ena nani sáisiqueneana vichamuriana. Vimutuhi visiapa eta mapena ema achane. ¹³ Timetacahavipa éma eta máimairahi ema ángele tiúcupauchahi eta te mapena. Titupihahi te mamirahu. Tacahe máichapa: “Pímivanereca puiti náepana ema achane ticajare Simón, eta máchucarapi naicha Pedro. ¹⁴ Ema maca Pedro, ema timetacaviyare eta piúchucuiraya, píti, esu piyena, énapa ena pichichanaveanahi” máichapa ema ángele. ¹⁵ Tacahe, népanavapa nímitucavaca ena náurujiruvanahi. Te néchajicaipa, tíjahú-chavapa tiúcupaica ema Espíritu Santo nayehe éna. Mávahácavacapa tacutihí eta mávahásirahavihi víti te épanavainapa. ¹⁶ Tacahe, enevanepa néchavahi eta mametaruhavihi ema Viáquenu Jesús. Áni macahehi: “Échavarichu ema Juan máicachasicahi te une ena achaneana. Étisera tiúcupauchaheyare ema Espíritu Santo. Éma, tícachasicaheyare tiávahácáhénapa” tacahehi eta máechajiriruvahi. ¹⁷ Tiuri, ema Viya máijaracavacahi ena apavasanana ema Espíritu Santo táichavenehi eta náehisirahi ema Viáquenu Jesucristo, tacutihí eta máijarasirahavihi víti. Tásiha, váiparinehi nácapaemachaimahi núti eta mavarahaquenehi ema Viya —máichavacapa ema Pedro.

¹⁸ Tacahe, ena ticajachanaahi ema Pedro, te náechapa, timatinanapa. Nacunachainehi ema Viya, nacahepa:

—Yátupirichuhi eta majacapiravaca ema Viya ena apavasanana eta náeneuchiravaina. Nácutihavihini víti eta visiapirayare te anuma, máichecuarquirénapa eta vítaresiraya maicha ema Viya —nacahepa.

Náhicavare ema Jesús ena achaneana ticavasana te avasare Antioquía

¹⁹ Te jena sácheana, te nacapacapa ema Esteban, napanajicavare ena apamuriana téhicanahi ema Jesús. Eta tacahe, tijunanapa. Téjanerepáicanapa tiyananapa te Siria, ena apamuriana tiyananapa te tiúrupuhi te mar ticajare Chipre, ena apamuriana te avasare Antioquía. Te jácani náitecapihapahi, ticametarairuanapahi mayehe ema Jesucristo nayehe

ena najaneanana israelítana. Vuíchaha nametacahini ena apavasanana. ²⁰ Tásiha, titecapanapa ena apamuriana* eta te avasare Antioquía. Énasera ticametarairuanapa nayehe ena apavasanana. Nametacavacapa, ániapa naicha:

—Te esuapa éhica ema Viáquenu Jesucristo, éma ticuchucuhaheyare eta icuñayaréni taicha eta epecaturana —náichapa.

²¹ Ichape eta tasuapacarevahi eta nametarairuana taicha ema Viya máimicacavacahi. Eta taichehi, nasuapahi ena camuriqueneana achaneana. Náinajicapaipa eta nayeherepinihi tauriqueneana, náehicapa ema Jesús.

²² Te nasamairiricapa ena nachamuriana ticavasananahi te Jerusalén eta juca téchacareanahi te avasare Antioquía, ticaevatapa ema Bernabé, mayana macacutiarapana te yátupihipuca. ²³ Tacahe, te titecapapa éma te Antioquía, máimhapa eta máimicatasiravacahi ema Viya. Tiúrisamureinehi. Maconsejachavacapa namutu éna eta náetumechiracacaina eta náehisirahi ema Viáquenu. Vahi nacucainajiruva te tatiarihnapuca jácane náichavaquenevaya. ²⁴ Taicha ema Bernabé, tétávicavahi eta máuriva. Mávaháruhivare ema Espiritu Santo. Tisuapajirahi éma. Tacahe, camurianahi ena tisuapanahi téhicanahi ema Viáquenu maicha ema Bernabé.

²⁵ Te táequenepa eta juca, ema Bernabé tiyanapa te avasare Tarso. Matanupanapa ema Saulo. ²⁶ Te máetupiacapa, mámapa te avasare Antioquía. Tacahe, nanasipa ánaqui. Étana año nacahe eta nacachaneravacahi ena nachamurianahi. Camuriana ena náimitureanahi. Te jena avasare Antioquía, táepaninevahi eta nacaijarerahi cristianoana namutu ena téhicanahi ema Jesús.

²⁷ Te jena sácheana, natiarihahi te Jerusalén ena profetana máijaruaranahi ema Viya eta máechajiriruvana. Tacahe, tiyananapa nacaijuhe te Antioquía. ²⁸ Te titecapanapa, ema émana ticaijare Agabo titupihapa te namuri ena machamuriana. Macaimitucasiquenehi éma mayehe ema Espiritu Santo. Mametacavacapa eta tatiarihivare eta ecuha te tamutu avasareana. (Eta juca táichavaquenevahi eta ecuha te avasareana te jena áñoanahi matupihairahi ema aguenucaini Emperador Claudio.) ²⁹ Tacahe, ena téhicanahi ema Jesús ticavasana te Antioquía napanerechainapa náimiamarecaya eta nanaquiruana, náimicatasiraya ena nachamuriana ticamunuvanahi, énaripa ena ticavasanahi te Judea. ³⁰ Tacahe, tinaquiucavanapaipa eta naratahaquenevaya nanaquica. Tacahe, náimiamarecapa mayehe ema Bernabé émapa ema Saulo. Náijaracayarehi ena náiyarahana pastoreana. Énapa tijaracanayarehi ena ticamunuvanahi.

12

Nacapacapa ema Jacobo. Náeratacapa ema Pedro.

¹ Te jena sácheana, matiarahi ena rey ticaijare Herodes Agripa. Ema macavanairipipa nacaratacavaca ena tachutirihanapahi ena téhicanapahi ema Jesús, náemecharecavacapa. ² Énerichuvare, máimicacavare ema apóstole Jacobo maparapeni ema Juan. Nayuchatipiquenuhapa eta nacapasirahi. ³ Tacahe, ena rey, eta máimairahi náurisirahi ena ticatianacanahi ema Jesús, máimicaeratacavare ema Pedro. Te jena semanahi, napiestarahi ena israelítana eta nanisiraya eta pan mayehere levadura. ⁴ Eta nacaeratasirahi ema Pedro, náimisiapapa te cárcel. Navanecapa ena dies y seis suntaruana tijaneacanaya te machacaya. Cuátrumurianahi ena patrullanahi. Ema Herodes Agripa, mapanerechahi macapacayareva ema Pedro te namirahu ena achaneana te táequeneraya eta napiestara. ⁵ Tacahe, ema Pedro, muracahi eta najaneasirahi te cárcel. Énasera ena machamuriana tiyujaracanahi me Viya. Nayaseacahi ichape eta nasamacarevaina máuchucuiraina ema Pedro.

Ema Viya macuchucuha ema Pedro tayehe eta cárcel

⁶ Tacahe, ena Herodes Agripa máijarechapa eta sache eta máemepaniraya te cárcel ema Pedro eta nacapasiraya te namirahu ena achaneana. Te jena yati tamirahupa jena sache, ema Pedro tímacahi te nachacaya ena apinana suntaruana. Ticaitiahi te apipi cadenana. Ena apinavare suntaruana najaneacahivare eta tapaja. ⁷ Tíjahúchavapa tímerecava ema ángele mavaneruhi ema Viya. Tijarahijuheinehi eta cárcel. Tacahe, ema ángele macayamuricapa ema Pedro. Macajamicapa. Ániapa maicha:

—Pedro, péjamica. Péchepuca —máichapa ema ángele.

Tíjahúchavapa téjapumuriha eta cadenana máitihanahi te mavahu ema Pedro. ⁸ Máichavare ema ángele:

* **11:20** Ena nani téhicanahi ema Jesús, yátupihí israelitanahi éna. Náuchusinehisera éna te apanana avasareana: te jena avasare Cirene, étapa eta avasareana táunavanahi eta tiúrupuhi ticaijare Chipre.

—Picapitijuechava eta pítijue. Pinaca eta péparupevana.

Tacahe, ema Pedro masuapahi. Tacahe, ema ángele máichavarepa:

—Pinaca eta pépacuhasa. Yare, péhicanu —máichapa.

⁹ Tacahe, ema Pedro máehicavanepa ema ángele. Ema Pedro váhi máimatihini eta máicharacavapahi, máimijacharichucha mavapure. ¹⁰ Tacahe, náetavicapa ena tinapucana sentinélana, náetavicavare ena apamuriana. Titecapanapa eta te tapajacura eta cárcel. Eta tapajacura amairihahi fierro tijitacarehi. Témunahiricavapa téjiaca. Tiúchucanapa te aneca te calle. Te tiyrehianapa eta napaisirahi, majunijicapa ema ángele. ¹¹ Tacahe, ema Pedro mapaenmavapa macaicutiara. Macahepa:

—Nímahapa puiti eta yátupirahi tijaneacanuhi ema Viya. Mavanecahi ema ángele ticuchucuhapananuhi eta macapasiranuyarehini ema Herodes énapa ena nujaneanana —macahepa.

¹² Tipanererecapaipa eta mapaisirapahi. Matupirupa te supena esu María, maena ema Juan ticajarehi puiti Marcos. Éta, náurujsihavahi nayujarasihahi ena camuriqueneana machamurianahi. ¹³ Titecapapa ema Pedro te tapajacura eta nayehe canchón. Máehahamecapa eta tapaja. Tacahe, esu esena amaperu ticajaru Rode, tiyanapa suímahapana nájahapuca ema téhahamecahi eta tapaja. ¹⁴ Suímahahuchavanepa ema Pedro, váhisera suvéjiáequenehahini eta súrisamurevahi. Tiyanapa tijunapa te tajuhe, sumetapanavacapa eta matirihirahi ema Pedro te aneca te tapaja. ¹⁵ Énasera vahi nasuapahini. Tacahe, náichapa:

—Máurishivipapuca píti.

Ésusera sumetacarichucha eta yátupirahi. Énasera náichavarepa:

—¡Váhipuca émaina! Émapuca ema mayehe ángele ema tijaneacahi —nacahepa.

¹⁶ Émasera ema Pedro tímiyanavarichucha máehahamecahi eta tapaja. Tacahe, tiyananapa navéjiáequeneha. Náimaharine émasarehi. Tiáramecanarinehi éna. ¹⁷ Émasera máimicutiarachapa te mavahuana eta namatina. Tacahe, mametacavacapa eta macuchucuirahi ema Viáquenu tayehe eta cárcel. Te tamutupa eta mametasiravacahi, máichapa:

—Emetapana ema Santiago* énapa ena apamuriana vichamuriana —máichapa.

Tacahe, tiúchucapa tiyanapa te apana avasare.

¹⁸ Te tijarahipa, ena suntaruana tinanesicarajianaipa taicha vahi náechahini tájahapuca eta máicharacavahi ema Pedro. ¹⁹ Tacahe, ema Herodes Agripa máimivanerecapa natanuca ema Pedro. Májinasera náetupiacahini. Eta namaetupiasirahi, ticayaserehianapa ena suntaruana tijaneacana. Nájinasera émanainahini nanecapahini eta máuchusirahi ema Pedro. Tacahe, macavanairipipa ema Herodes nacapacavaca ena suntaruana. Te tamutupa eta juca, tiyanapa ema Herodes te apana avasare Cesarea; étapa mávihahi.

Eta máepenirahi ema Herodes Agripa

²⁰ Te táequenepa, ema Herodes Agripa tisemapa nayehe ena achaneana ticavasana te Tiro étapa te Sidón. Énasera náimivanerecapa mayehe ema Herodes. Tiyaseserecanapa eta náurivaina mayehe éna. Taicha eta návasanahi táitecapauchahi eta tinicacare tiásihahi eta te mávasa ema rey. Tacahe, nacasiñapa ema Blasto, ema majupaha ema rey, máechajiuchavacaya eta náurivaina. ²¹ Tacahe, ema Herodes májarechapa eta sache, máimichuhairaya ena achaneana eta jena sáchequenehi. Ticamuirihapa ema rey eta mamuiriha tiúrina. Téjacapa ema Herodes te máejasirare. Téchajicapa. ²² Tacahe, ena achaneana eta nasamirahi éna, tipiaracanapa. Nacahepa:

—¡Ema maca téchajicahi váhiya achanena! ¡Viya ema maca! —nacahepa eta nacunachirahi éma.

²³ Tacahe, tíjahúchavapa ema émana ángele mavaneruhi ema Viya májaracapa eta majumahi ema Herodes Agripa. Taicha ema Herodes tímijachavahi Viya, máuricaipahi eta náejirairahi natsiusirahi ena achaneana. Eta tacahe, tanicapa eta vusanuana te majuhe. Tacapacapa.

²⁴ Tacahe, tavetijipaipaicha camurianapaipa ena achaneana tisuapana eta máechajiriruvana ema Viya.

²⁵ Te titavanapa eta natuparahahi ema Bernabé ema Saulo, tichavanavarepa te avasare Antioquía. Námapa ema Marcos.

* **12:17** Ema maca achane, maparapehi ema Jesucristo. Te náechajiriruva ena israelítana, ticajare Jacobo. Te véchajiriruva ticajarehi Santiago. Émarichuhi ema tíjucharahi eta carta ticajarehi Santiago.

13

Éma Bernabé émapa éma Saulo tépanavanapa tipaicana ticametarairuanayare

¹ Éna téhicana éma Jesús ticavasanahi te avasare Antioquía, natiarihi te namuri éna ticametarairurahiana éta máechajiriruva éma Viya. Timiturahianahi éna. Natiarihichaha éma Bernabé émapa éma Saulo. Natiarihivare éma Simón (éma náimijarechavare Negro), émapa éma Lucio (éta máuchusinehi te avasare Cirene), émapa éma Manaén (éma machajuruhi éma Herodes Antipas, machicha éma Aluresini). ² Étana sache, ticurujcanapa éta nayujarasirahi me Viáquenu. Náichahivare éta ayuna. Tacahe, máechajicavacapa éma Espíritu Santo. Máichapa:

—Éma maca Bernabé émapa éma Saulo, natuparahaichuhi ticametarairuanaya taicha nunerejiruanahi éna. Évatasinanuya puiti éna nani apinana —máichapa.

³ Tacahe, titsecavanapa éna apinana éta napaisiraya. Te tamutupa, tíapechavanapa nahayunacha namutu. Éta nayujarauchirahi, nanacapa éta navahuana te nápusiana éna tipaicanyare. Nayaseacapa éma Viya éta táurivainapahi éta napaisiraya. Tacahe, ticametavanapa. Tiyananapa.

Éma Bernabé émapa éma Saulo tépanavanapa ticametarairuana te tíurupuhi Chipre

⁴⁻⁵ Tacahe, éna nani éma Bernabé éma Saulo, mavaneruanahi éma Espíritu Santo, tiyananapa te puerto ticajiare Seleucia. Máehicapahivare éma Juan Marcos. Tímicatarecapahi nayehe. Tacahe, tiánuecanainapa nacáijuheya éta tíurupuhi ticajiare Chipre. Te títecapanapa te puerto ticajiare Salamina, tiyananapa éta te náurujisirárevana éna israelítana (taicha tamutu avasareana tatiarihíahi éta nayehe sinagoga). Ticametarairuanapa éta máechajiriruva éma Viya. ⁶ Tamutu napaica éta táichapevahi éta tíurupuhi. Títécapanapa te avasare ticajiare Pafos. Ánaquí matarihihi éma émana israelíta ticajiare Elimas Barjesús. Iápemare éma maca. Tépiyahirahivare tímijachavahi máimati éma Viya. ⁷ Éma maca iápemare macachanejiricahi éma Prefecto Sergio Paulo. Éma maca Prefecto, téchemarahi. Tásiha, máimivanerecapa náichuhapana éma Bernabé émapa éma Saulo, taicha mavarahahi masamaya éta máechajiriruva éma Viya. ⁸ Émasera éma maca iápemare macatianacavacapa éna. Mayurucapa éma Prefecto éta vahi macusuapa éta máechajiriruva éma Viya. ⁹ Tacahe, éma Saulo (éna ticajiarehi puiti Pablo), mávaháruquenehi éma Espíritu Santo, máimararacapa éma iápemare. ¹⁰ Tacahe, máichapa:

—¡Tivyuarahitataji matsirairaha! ¡Piti machicha éma Váinarajil! ¡Piti picatianaca tamutu éta táuriqueneana! Piti píchejimiráuchavacahi éna tivarahana téhicana éma Viáquenu. ¡Pínajica éta juca pivainarajivahi! ¹¹ Puiti éma Viya tícuñacaviyare. Púchuquiviyare máicha. Tiyereyare éta vahi pímahaimahi éta tajaraiva éta sache —máichapa éma Pablo.

Jéhesaréinehi, tíjahúchavapa témah éta máimairirisira, púchuquipa éma iápemare. Tacahe, matanucapa éna tichurucanaya te mavahu. ¹² Te máimahapa éma Prefecto éta juca, típicarinehi. Tásiha, masuapapa éta masamirahi éta náimiturapiana éna apóstoleana mayehe éma Viáquenu Jesús.

Éma Pablo émapa éma Bernabé tiyananapa tayehe éta avasare ticajiarevare Antioquía Ichipichu

¹³ Tacahe, éma Pablo énapa éna macompañeroana tiávacuhanapa. Najunijicapa éta Pafos. Tiyananapa tayehe éta avasare Perge táunavahi éta provincia Panfilia. Te títecapanapa te Perge, éta jena sácheanahi, éma Juan Marcos majunijicavacapa éna. Tichavapa te Jerusalén.

¹⁴ Éna, tiánucuhanapa nacáijuhepa éta avasare Antioquía Ichipichu te tinapaica éta Pisidia. Te títecapanapa, te apanapa sache sávaru, tisiapanapa éta te náurujisirareva éna israelítana éta nayujarauchirahi. Téjacanapa. ¹⁵ Tacahe, tisiapanavarepa éna tuparairucana tayehe éta náurujisirareva. Náechajicuhapa ánihi éta Sagrada Escritura májurehi éma Moisés éta éta nájurehi éna profetana. Te tamutupa éta náechajicuirahi, nayaserecapa éna araitecapianahi. Náichapa:

—Viparapenaveana, te tatiarihípuca éta échajisihayare consejo viyehe víti, táuricapa econsejachahavipa —náichapa.

¹⁶ Tacahe, éma Pablo titupihapa. Macanuquechapa éta mavahuana éta máechajisiryarehi, mavarahahi tauri éta nasamiraina (taicha tacahehi éta nayeherepi). Ániha macahe:

—Esamanuchaha, nuparapenaveana israelítana. Étiha eti epicaurahianahi mayehe éma Viya. ¹⁷ Éma Viya vicasiñaquenehi víti israelítana manerejicavacahi éna viáchucanaveánaini. Te návihaichaha te apanaquene avasare ticajiare Egipto, macaejapacavacahi éna nachichanaveana. Énerichuvare, te máiputsicavacapa te jena avasare návinénihí, máimerecapahi éta máitupajijiasiravahi máimicatasiravacapahi éna. ¹⁸ Tásihasera, cuarenta año éta macamichirahi éma Viya éta náejecapirávana tayehe éta návihairahi te mávapahi vámahí. ¹⁹ Te

táequenepa, macamitiequenehavare eta siétequene avasareana ena apánapanéjiqueneána ticavasanainihi te Canaán. Tásiha, máijaracapa ena viáchucanaveanaini eta jena apaquehe natuparahaquenehi maicha ema Viya. ²⁰ Tacahe, 450 año eta majaneasiravacahi, mavanecapa ena juéseanaya téchapajiricanayarehi. Tacahe, tiámainucavapa te tijurucapa ema profeta ticaijare Samuel, máequeneréruhi nayehehi juez. ²¹ Tacahe, éna nayaseacapa ema Viya ema nayeheyarehi rey. Tásiha, máijarasihapa ema Viya ema nayeheyarehi rey ticaijare Saúl, machicha ema Cis, mámariéquenéni ema viáchucaquequenéni Benjamín. Cuarenta año eta macatuparahairahi. ²² Te táequenepa, ema Viya máitsivachapa ema Saúl. Ticaijarapa ema David, émapavapa reysi. Taicha macahepa ema Viya: “Nímararacahi ema David, machicha ema Isaí, núrca eta máurivahi. Taicha máítauchayare tamutu eta nuvanairipianaya” macahepa ema Viya. ²³ Tiuri, eta máechajiriruvahi ema Viya, matiarihiyare ema émana mámariequenezare ema maca David tíuchucayarehi ema Ticatiurahiyare viyehé viti israelítana. Puiti vimetacahe eta máimeresiravaipa ema Jesús ema Ticatiurahiyare viyehé. ²⁴ Te tamirahupaichaha eta máimeresiravayarehi ema Jesús, ticametarairuripa ema Juan nayehe ena achaneana vijaneanana israelítana. Mavanecapahi eta náeneuchiravaina náinajisiraina eta napecaturana, étapa eta nacaicachasiraina. Títecapapa eta sache máitauchiraipa ema Juan tamutu eta mavanahianahi me Viya. Ticametarairurichaha ema, máichavacapa ena achaneana: ²⁵ “Ímijachaipapuca nútihí ema Cristo, ema vicuchapaquequenehi. Váhira nútina. Títecapainapasera éma, téhicanupahi te néquene. Malayarínehí nútí nácutinasihini eta máitupajijiasiravahi éma. Váiparínehí nácaemuñavaimahi macamusuranuhini nuti páuresami” máichavacapa ema Juan.

²⁶ Esamanuchaha, emutu eti nujaneanana, eti nucutiqueneanahi eta mámariequenerahivíhi ema viáchucaini Abraham, étipa eti apamuriana epicaurahianahi mayehe ema Viya. Ema Viáquenu tivanecahavi vimetacaheyare yátupina eta iúchucuirayare éti apanava, te ecasiñava me Jesús.

²⁷⁻²⁹ Máchusera ácutihini ena tupairucana te Jerusalén, énapa ena ticavasanahi te jena avasare. Tamutu eta sávaruana eta náurujisiravana, náechajicuhaparacahi eta libro nájuchaquequenehi ena profetanaini. Váhiserá nácaicutiarahini. Eta tacahehi, vahí náimatihini ema Jesús eta émairahi Cristo. Váhivare najacapahini. Éma, tájinahinéni matapiravainahini taviuchahini eta táimicapacahini. Énaserá nayaseacapa ema Pilato eta máimicapasiraya. Tacahepa masuapapa éma eta nayasearapihi. Tásiha, te títauchavapa eta nacapasirahi, ena máimitureana nacucupaicapa te macurusura, náecarapa. Tacahehi eta táitauchiravahi tamutu eta nametarapiana ena profetanaini eta máicharacavayarehi ema Cristo eta máepenirahi, taicha tacajuquenehi éta te Sagrada Escritura. ³⁰ Émasera ema Viya macaeche-pucahi te máecari. ³¹ Tacahe, camuri eta sácheana máimeresiravahi ema Jesús nayehe ena máimitureana, ena nani macachanevacapahi te másihapa te Galilea, téhepa te tiyanapa te Jerusalén. Ema nani tímahanahi, énará ena téchajisihanahi puiti eta máechepusirahi.

³²⁻³³ Acane, ema Viya macametarapihi nayehe ena viáchucanaveanaini eta macucupaisirayarehi ema Cristo. Títauchavaipahisera puiti eta máechajiriruvahi taicha vímatiripa ema Cristo viti nachíchanavéqueneana. ¡Tímerecavaipa ema Jesús, émairahi yátupiquenehi Cristo manerejiruhi ema Viya! Máimerecapa ema Viya ema Jesús eta émairahi yátupiquenehi Cristo, taicha macaeche-pucahi te máecari. Étará tímitecavahi vimetapanáhe eta juca táuriquene téchacareana. Étará tacayemaquenehi eta máechajiriruva ema Viya eta te Salmo 2, ánipa macahehi: “Pítira nuchichavi. Puiti jena sache, nímimatchaviyare nayehe ena achaneana eta nuchichairavíhi eta nucaechepusiravíhi te pécarí” máichapa. ³⁴ Eta máechepusirahi ema Jesús te máecari, vaipa tíápechavaimahi tépena. Taicha máechajicahi ema Viya ena israelítana, ánipa máichahi: “Níjaracaheyare ema máuriquene Iáquenyare. Éma ticatiuchaheyare tamutu sácheana. Máichecuarequiyare eta ítaresiraya máicha, eta ecachanerayare éma. Taicha níjararuvahi eta juca néchajiriruvahi mayehe ema David” máichapa ema Viya. ³⁵ Énerichuvare, acane ema Cristo macahehi eta máechajiriruvahi te apana Salmo: “Vahí písapaimahi témitiequeneha eta náquehe nuti pichícha pémunaruquenehi” máichapa. ³⁶ Tiuri, ema David, yátupíhi eta máechapajirisiravacahi ena machanerana. Te títecapapa eta matuparahahi mayehe ema Viya, tépenapa ema David. Tacahe, náecarapanapa éma. Tépaichavahi eta máeche te máecari. ³⁷ Émasera ema Jesús vahí táepachaicavahini eta máeche te máecari taicha macaeche-pucahi ema Viya. ³⁸ Nuparapenaveana, nuvaraha numetacahe puiti apaesa ímatiequeneha. Ema Viya mavaraha típerdonachahe eta epecaturana te ácasiña ema machicha Jesús. ³⁹ Viti israelítana, ichape eta véjecapiravahi me Viya taicha vímatauchirahi eta viyeherepiana máijararuvahíhi ema Moisés. Téhesera véhica puiti ema Jesucristo, víperdonachacareya viti mayehe ema Viya. ⁴⁰ Tásiha puiti, ecaunevayare éti, machu ácutiriana ena achaneanaini máechajiruanahi ema Viya eta acane.

Ani máichahi: ⁴¹ “Ímahayare, eti épurunuanahi núti. Núti níchayare eta tiáramicare te emirahu te juca sácheana. Te nímimetacahena eta juca, váhiquene esuapahini éti. Tásiha, tapaenu-mavainapa te ímahapa eta níchaueneya, iáraminapa. Nímatihesera eta emásuapajirávanahi. Épenainapa táicha” máichapa ema Viya.

⁴²⁻⁴³ Te tamutupa eta máechajisirahi ema Pablo, nayaseacapa ena achaneana, ánipa naicha:

—Picatajicahavi. Piápechahavini pímitucahavi eta juca te apanainavare sávaru — náichapa.

Te tiúchucanapa eta te náurujisirareva, tiyananapa ena apinana apóstoleana eta te náitecapihahi. Náehicapa ena camuriana israelítana, énapa ena apavasanana tépiyacavanaripa israelítana taicha napicauchaipa ema Viya. Ticaimitucasianapa táurivaina eta najicapiraya eta máurivahi ema Viya, nacasiñairava me Machicha Jesús.

⁴⁴ Te apanavarepa sávaru, namutyareni ena achaneana ticavasanahi te avasare tiúrujicavana nasamararacayarehi eta máechajiriruva ema Viya mametarapiyarehi ema Pablo. ⁴⁵ Énaser ena israelítana masuapajirairahanahi, te náimahapa eta natiaririrahi ena apavasanana, tisemanapa eta mametasiravacahi ema Pablo eta najacapacarevahi me Viya éna apanava. Eta tacahe, nácapaemachapa ema Pablo, nacajachapa. ⁴⁶ Te nasamapa ema Pablo émapa ema Bernabé eta náichirahi ena ticatianacanahi, tájina vahi nayútutuémahini. Náichavacapa:

—Tatuparacahi étivayarehi eti vijaneanana vímitucahe eta juca máechajiriruva ema Viya. Étiser vahi iúricahini eta esamirahi, váhivare ésachahini ésenica eta mávasa ema Viya. Tacahe puiti, énarínepuca vímitucavacaya ena apavasanana. ⁴⁷ Taicha víti vivanecasivahi me Viya. Vítauchayare eta juca mavanairipi, ani macahehi: “Nutuparacaviyare píti pipaicyare tamutu avasareana te juca apaquhe. Picametarairuyare eta néchajiriruvana nayehe ena achaneana eta nucuchucuiraya nácani tisuapanuanaya” —macahepa ema Pablo.

⁴⁸ Te nasamapa eta juca ena apavasanana, tiúrisamureanapa. Tásiha, nacahepa:

—Tétavacavapa táurinava eta juca máechajiriruva ema Viya —nacahepa.

Énerichuvare, nasuapapa ena máichuhaqueneanahi ema Viya eta náitaresiraya máichecuaraquireya te táequenenapa eta náepeniraya. ⁴⁹ Tacahe, ena tisuapanaripa nacametarairuvare eta máechajiriruva ema Viya nayehe ena achaneana ticavasanahi te tachacayahana eta avasare Antioquía Ichipichu. ⁵⁰ Nararihíhisera ena ticatianacanahi ema Pablo émapa ema Bernabé. Israelítanahi éna. Tacahe, náimitucapa ena tuparairucana te avasare, énapa ena ésenana ticapachucareanahi, téhicanahi eta nayeherepiana ena israelítana. Énerichuvare napamicapa ena achaneana, navarairahi náquijicaya tayehe eta avasare ena apóstoleana. Jéhesareinehi, ticuticacanapa eta nacatichiravacahi, nacuchucavacapa ena apinana. ⁵¹ Tacahe, eta nayanirayarepa ena apóstoleana, náetapevachavaca eta náeparupevana te namirahu ena ticatianacanahi. Táicutirahi eta namáimitucacárevahi éna, tájinaavarepa tímiapechaimahi náimitucavacahini. Tacahe, tiyananapa nacaijuhepa eta te avasare Iconio. ⁵² Énaser ena apamuriana téhicanaripa tímiyanavanapa eta nasuapirahi ema Viya. Tiúrisamureanahivare éna taicha eta mávahásirahi ema Espíritu Santo.

14

Em a Pablo émapa ema Bernabé títecapanapa eta te Iconio

¹ Tacahe, títecapanapa ema Pablo émapa ema Bernabé eta te avasare ticaijare Iconio. Tiyananavare natupiru eta te náurujisirareva ena israelítana. Ticámetaráruanavarepa. Tacahe, camurianavare ena achaneana tisuapanahi eta nametarairuhi: ena israelítana énapa ena apavasanana. ² Váhisera téjiacavana ena apamuriana israelítana masuapajirairahanahi. Nayurucavacapa ena apamuriana achaneana apavasanahi. Navarahapa náimiyusemacavaca. Navarahahivare ticuticacanayare nacatichavaca ena téhicanaripa ema Viya. ³ Eta tacahe, nanasipanapa ena apóstoleana. Vahi nayanavanehini. Tiyerehi eta náimituresirahi, taicha navarahahi náetumechavacaya eta nacasiñairahi ema Viya. Tacahe, ema Viya máimicatacavacahi. Májaracahi eta náichiraya eta tiáramicareana. Eta juca, máicutiarahi eta mavanésiravacahi eta nacametarairuirayarehi eta majacapiravacahi nácani achaneana ticasíñavana mayehe. ⁴ Tásiha, típutsimurihavanapa ena achaneana ticavasanahi tayehe. Ena apamuriana náehicapa ena israelítana masuapajirairahana. Ena apamuriana náehicapa ena apóstoleana. ⁵ Tacahe, ticuticacanapa eta napanereruana ena apavasanana énapa ena israelítana énapa ena náquenuruhana, eta nacajachiraya ena apóstoleana. Navarahapa nacapacaya natupisicaya te márijahiana. ⁶⁻⁷ Énaser, ema Pablo émapa ema Bernabé, te nasamairricapa, tijunanapa nacaijuhepa eta te provincia ticaijare

Licaonia. Ánaqui ticametarairuanapa tayehe eta avasare Listra, tásiha, tiyananavarepa te avasare Derbe, etapa te avasareana tachacayarahanahi.

Emá Pablo macanaracahi emá masari ticavasahi te avasare Listra

⁸ Te jena avasare ticaijare Listra, matiarihihi emá émana achane masarihi eta máitare-sirahi. Vahi táurihini tipaica, taicha máimiuchurehi eta mamasarivahi. ⁹ Macaheripa ticasa-marahihi éma eta mametarairuhi emá Pablo. Tacahe, emá Pablo máessenicapa, máimatiacapa eta macasiñavairahi emá masari mayehe emá Viya macanarasirayarehi. ¹⁰ Tacahe, emá Pablo mapiaracapa:

—Pécheputa píti. Pétumecha eta jara piápeana. Pitupiha —máichapa.

Eta masamairahi eta juca emá masarini, enevanepa técheputuca. Titupihapa. Tipaicapa. ¹¹ Eta náimairahi emá achaneana eta macanarasirahi emá Pablo emá masarini, náraminehi ichape. Tipiaracanapa te náechajiriruvaichu, ániapa nacahehi:

—Viyana ena nani. Achanemahianahiséra eta náimahi eta náucupauchirahávihi. ¹² Emá maca ticaijare Bernabé, émara Viya Júpiter. Emá maca apana ticaijare Pablo, émara Viya Mercurio taicha emá ticametarairurahi —nacahepa.

¹³ Tiúri, tatiarihi eta peti te tasiaparacu eta avasare, mayujarasirarehi emá achane tavanarahi eta nasiñaraji ticaijare Júpiter. Tatiarihivare eta apina turu mamansurehi. Tacahe, emá maca achane máepanapa eta turu. Mayeheheacapa eta flure taicha mavaraha macapacayarehi eta turu. Máijaracasichayarehi emá Pablo émapa emá Bernabé. Énerichuvare ena achaneana navarahahi náejirayarehi ena nani apinana apóstoleana taicha náimijachaipa énaripa emá nasiñarajianahi. ¹⁴ Étasera te nasamairicapa emá apóstoleana eta náichirayarehi, ichape eta náéñamirava. Tiúchucanapa, nasiapamurihapa emá achaneana. Tipiaracanapa, ániapa nacahe:

¹⁵ —¡Tátanaveana, mémenaveana! ¡Váhirine táurihini eta juca íchirayare! Vítirichu ecuti-queneana achaneana. Tímitecahavihi vimetapanaha énajica eta juca eyeherepianahi. Taicha vahi tiuri, tamapurujíhi eta eyehheasiraparacahi eta esiñarajiana. Ínajicaya eta juca. Éhicayaresera emá Viya, emá yátupiquenehi tisamahavi. Éma tépiyacahi eta anuma, eta apaquehe, eta ichapequene mar. Tétupiricahi tamutu eta vímahaqueneanahi puiti.

¹⁶ Ánaquiaparipa eta macamichirahi emá Viya eta náichirahi eta navarahaqueneana emá achaneana. ¹⁷ Máimerecacinéniséra eta émairahi tépiyaca eta juca táuriqueneana. Tíjaracahavihi eta tiquiva. Tiúrinachayare eta sucurecana vínicaqueneana máicha. Máijarasirahavihi tamutu eta vicamunuqueneana. Ticurisamurechahavivare. Eta tacahe, ímatiquenéha yátupina eta émairahi Viya esiñarajiya —náichapa emá apóstoleana.

¹⁸ Eta tacahehi, nametacaripahinéni eta taurivahi eta juca navarahaquenehi naicha. Énasera ticamesavanarichucha eta navarairahi ticaparecana eta túruana. Váhiqueneséra náisapahíni emá apóstoleana náichahini eta juca.

Natupisicapa te márijahiana emá Pablo

¹⁹ Tayerevahi eta sácheana, títecananapa emá israelítana tiásihanahi te Antioquía Ichipichu etapa te Iconio. Éna tícitianacananahi emá apóstoleana. Nayurucavacapa emá achaneana, náimiyusemacavacapa. Eta nachimapirahi emá Pablo te calle, natupisisihapa te márijahiana. Náquipaicapa. Eta náimairahi máquipaisiravahi, náimijachaipapuca tépenahi. Nachururupaicapa náquijicayarehi te tachachacu eta avasare. ²⁰ Tacahe, tiyananapa emá machamuriana emá Pablo, náimahapanayarehi. Te náitecapauchapa, náurujiacaripa. Émasera téchararahaipa técheputuca. Máehicavacapa tiyanapa eta te máitecapihahi. Te apanapa sache, tiyananapa emá Pablo émapa emá Bernabé te avasare Derbe.

²¹ Te títecananapa tayehe eta avasare Derbe, nanasipanapa tayehe. Ticametarairuanahi eta máechajiriruva emá Viya. Camuriana emá tisuapanahi téhicanahi emá Jesús. Te tamutupa eta náimitusiravacahi, tiyananavarepa tichavanapaipa eta te avasareana náimituresinepahi eta te Listra, te Iconio, etapa te Antioquía Ichipichu. ²² Eta te juca avasareana, náimitucavarepa emá téhicanaripa emá Jesús. Náetumechavacapa eta táurivaina eta náehisiraya emá Viya. Náichavarepa:

—Vahi ecuarameca eta nacatianasiráhe emá achaneana táichavene eta éhisira emá Viáquenu. Ecamichachucha tamutu. Échava eta esiapiraya eta mávasa emá Viya —náichapa.

²³ Énerichuvare, natanucapa emá nayeheanapachu pastor nácani náijamuripachu. Téchanayarehi eta nayujarasirana. Tacahe, natuparacapa eta návacureanaya. Te tamutupa eta natuparasiravacahi, tiyujaracanapa nahayunachavarepa, nayaseacapa emá Viya eta majaneasiraina táurivaina eta náehisiraya namutu emá ticasañaripa emá Viya.

Emá Pablo, emá Bernabé tichavanavare tayehe eta avasare Antioquía

²⁴ Tacahe, tiyananapa ema Pablo émapa ema Bernabé, tétavajicanapa eta te avasarechichana tayehe eta Pisidia. Náitecapirapa tayehe eta avasare Perge táunavahi eta provincia Pamfilia. ²⁵ Ticametarairuanapa eta máechajiriruva ema Viya nayehe ena achaneana ticavasana tayehe eta avasare. Te tamutupa eta nacametarairuirahi, tiyananavarepa nacaijuhepa eta Atalia. ²⁶ Étapa návacuinehi eta nánuesiraya eta mar, nacaijuhepa eta avasare Antioquia. Tichavanapa tayehe eta juca avasare náchusinehi te ticavanahianapa mayehe ema Espiritu Santo. Étarichuvare nayujarauchinehi ena nachamuriana eta majaneasirayare ema Viya ena apóstoleana eta napaisirayare. Puiti eta juca náitauchaquenéipa eta náematanehi. ²⁷ Eta náitecapiraipa, nacurujicapa ena nachamuriana. Nametacapa tamutu eta máimicatasiravacahi ema Viya tayehe eta napaisirapahi. Étapa eta majacapiravacahi ema Viya ena apavasanana eta nasuapiravacahi nacasñairahi éma. ²⁸ Tacahe, ema Pablo émapa ema Bernabé, tiyerehi eta nanasirahi nacachaniravacahi ena nachamuriana.

15

Ticurujicacanapa te Jerusalén. Ticaechacasinapa eta panererucanahi.

¹ Te jena sácheana, titecapana te Antioquia ena apamuriana israelítana, tiásihanahi te Jerusalén. Navarahapa nahapapiricavaca ena apavasanana téhicanaripa ema Jesús. Ánipa naicha eta náimituresirahi:

—Te evaraha iúchucuha eta ícuñayaréni, tacamunu ítauchayare eta mavanairipihí ema Moisés eta vicamarcairaya* —nacahepa.

²⁻³ Émasera ema Pablo, émapa ema Bernabé nacapaemachavacapa muraca ena tipamicanahi ena apavasanana eta nacamarcairahi. Ichape eta nacapaemachiracacahi. Tacahe, ena nachamuriana navarahahi náetupirica eta juca. Tásiha, natuparacapa ema Pablo émapa ema Bernabé, nayanahini eta te Jerusalén. Eta ánaqui, ticaechacasiyarehi nayehe ena apóstoleana énapa ena náiyarahanahi. Náevatacavare ena apamuriana téhicanayarepahi ena apinana.

Tacahe, eta napaisirapahi te achene, tétavajicanapaipahi tayehe eta avasarechichana táunavanahi eta Siria, étapa te Samaria, návihahi ena apamuriana nachamurianahi. Nametacapaipa eta náinajisirahi ena apavasanana eta nayeherepianaini tamauriqueneana, taicha eta náehisiraiipa ema Jesús. Tacahe, ena nachamuriana, eta nasamairirisirahi eta juca, tiúrisamureanarinehi éna.

⁴ Tacahe, eta náitecapirahi eta te Jerusalén ema Pablo émapa ema Bernabé, ena apóstoleana énapa ena náiyarahanahi pastoreanahi nacurujicapa ena nachamuriana eta najacapiraya ena araitecapianahi. Tacahe, ena apinana nametacapa eta máimicatasiravacapahi ema Viya eta napaisirapahi éna. ⁵ Natarihivare ena relijiosoana téhicanaripahi ema Jesús. Titupihanapa éna. Téchajicanapa, ánipa nacahe:

—Táitauveaquene tacamunurichu nacamarca ena apavasanana téhicanaripa ema Viáquenu Jesús. Tacamunuhivare nacaravahu náehica eta juca mavanairipianahi ema Moisés —nacahepa.

⁶ Tacahe, te apanapa sache, tiúrucavanapa ena apóstoleana énapa ena náiyarahanahi. Navarahapa náetupirica eta juca. ⁷ Nacamataneacaripa eta juca náechajisihahi. Tacahe, titupihapa ema Pedro. Máichavacapa:

—Nuparapenaveana, écharichuhi éti ánaquiaparipa eta manerejisiranuhi ema Viya eta nacametarairuya eta nayehe ena apavasanana eta náuchucuirayarehi táichavenénahi eta nasuapirayare ena apana. ⁸ Ema Viya máimatihí eta nasamureana ena apavasanana eta nasuapirahi. Tásiha, máimerecahi eta majacapiravacahi eta mávahásiravacahi ema Espiritu Santo tacutihí eta mávahásirahavihí víti. ⁹ Ema Viya, nájina manerejiruina eta máemunasirahaví. Témunacahavihí vimutu: viti israelítana, énapa ena apavasanana. Eta tacahehi, masípasinavacarípa eta nasamureana éna táichavénehi eta nasuapirahi. ¹⁰ Étiserá evarahapa épuruyare eta máichaqueneanahi ema Viya. Ticajeraequenepa eta véhisirainahini eta nayeherepianahi. Vítiripa váhivare váratahahini vítauchahini. Tacahe, váipa táuricachini vécatihavacahini ena víchamuriana apavasanana náichahini eta juca. ¹¹ Vécharipahisera yátupi eta víúchucuiraya táichavénehi eta macatajisirahavihí ema Viáquenu Jesucristo. Viti israelítana, vahi étaparacaina eta vicamarcairahi. Ema apavasanana, váhivare étaparacaina eta tájinairahini namarcainahini —máichapa ema Pedro.

* **15:1** Eta mavanairipini ema víyarahaini Moisés ticamarcanayarehi namutu ena amuyana ajairana israelítana. Éta tímereuchayarehi eta yátupiquenerahi israelítana. Te juca, ena napaipiruanahi tiásihanahi te Judea, navarahapa nacamesaqueeneha nacarmacavaya ena ajairana ichanaruanaripa, apavasananhivare.

¹² Tacahe, timatinanapa namutu. Nasamararacaripa ema Bernabé, émapa ema Pablo. Nametamurihapa eta máimechirahi ema Viya eta mavanésiravacahi éna, taicha máijaracavacahi eta náichirahi eta tiáramicareana te namirahu ena apavasanana. ¹³ Te títapiricanapa eta nametarapianahi, émapavapa ema Santiago téchajica. Macahepa:

—Nuparapenaveana, esamanuchaha. ¹⁴ Ema Simón Pedro timetacahaviripa te tépanavainapa majacapavacainapa ema Viya ena apavasanana machaneranayarehi. ¹⁵ Eta juca eta náechajisihaquehehi namutu ena víyarahaini profetana. Émaripa ema víyarahaini profeta Amos májuchahi eta juca máechajiriruvana ema Viya, ani macahehi: ¹⁶ “Te táequenénapa eta juca, nápechavaya núcupaicayare te juca apaquehe. Nétupiripanaya eta nupena táquipairuvahi. Tásiha, tiápechavanayare tiyujarauchanuanayare ena achaneana, tacutiyaere eta náejirairanuhi ena machaneranaini ema rey David. Tisuapanuanayareva. ¹⁷ Énerichuvare títanucanuanayare namutu ena apavasanana. Nuchaneranayareva éna, taicha námáyare eta níjare”. ¹⁸ Étara eta juca macayemaquenehi ema Viya. Ánaquiaparipa eta mavarairahi vicaicutiaraya eta juca.

¹⁹ Tímiyanava eta máechajiriruvana ema Santiago, ánipa macahe:

—Tiuri, eta juca eta nupanereruhi nútí: Tiúripána vésamiricavacachuca ena vichamuriana apavasanana náequeruvanaripa mayehe ema Viya. ²⁰ Taratarichu vicajurevaca tametaca eta vaipa nacuapechava nacunica eta taeche eta sárare náijaracasiruana eta nasiñarajiana. Váhivare nacuveha súcani apana esena. Énaripa ena esenana, váhivare nacuveha ema apana achane. Váhivare nacunica eta taeche eta sárare namaechatinure. Étaripa eta táitine, váhivare nacunica. ²¹ Eta vimetacavacayare ena vichamuriana apavasanana eta juca, apaesá vahi nacusemaracavaca ena téhicanarichaha eta mavanairipiana ema Moisésini. Taicha ánaquiaparipa te avasareana eta náechajicuiraparacahi ena vijaneanana israelítana eta mavanairipiana ema Moisésini te náurujisiravana. Puíticha nararihichaha ena náimicapicaucharichucha —macahepa ema Santiago.

²² Tacahe, ena apóstoleana, énapa ena náiyarahana, énapa ena náumurivana, tiúrihi nasama eta mapanereruhi ema Santiago. Tacahe, ticavanahianapa ena apinana téchemarahiana ticapicahuanahi, ema Judas Barsabás émapa ema Silas. Éna téhicanayarehi ema Pablo émapa ema Bernabé eta nachaviraya te Antioquía. ²³ Tiuri, eta juca táechajiriruvahi eta carta. Ani tacahehi:

“Vímiamareca eta juca véchajiriruva viti apóstoleana, énapa ena víyarahana, énapa ena vichamuriana te juca Jerusalén. Vivaraha tatívayare véchajicahe eti viparapenaveanahi te mavahuana ema Viáquenu: eti apavasanana tiávianahi te Antioquía, étipa eti tiávianahi te táunavanahi eta Siria étapa eta Cilicia. ²⁴ Visamairiricahi eta nayanirahi ena tiásihanahi ani te juca. Tiávajiriricaheanapa. Navarahahi nahapapicayare eta epanereruana. Ticamesaheanahi itauchayare eta mavanairipiana ema Moisés eta ecamarairaya. Váhisera vanairucanaina eta viyehe eta náimitusirahehi eta juca. ²⁵⁻²⁷ Vévatacachi ema Judas émapa ema Silas, vanairucanahi viyehe. Éna, timetacaheanayare tamutu eta juca téchacareanahi viyehe. Ena nani téhicanapahi ema Bernabé ema Pablo, ena viparapenaveana vémunaruqueneana. Ema maca Bernabé émapa ema Pablo, tíjaracavanahi éna náepenacaya ema Viáquenu Jesucristo taicha eta nacametairuirahi. ²⁸ Áni te juca viti, vicuticacahi eta vipanereruanahi, máimitusirahavíhi ema Espíritu Santo. Vahi vávarahahini tacajeraequenehini eta éhisirayare ema Viáquenu. ²⁹ Tacarichu vimetacahe eta juca ticamunucarepana te mamirahu ema Viya:

1. Vahi ecunica eta taeche eta sárare nayujaraurehi ena achaneana te tamirahu eta nasiñarajiana.
2. Váhivare ecunica eta táitine eta sárareana.
3. Váhivare ecunica eta taeche eta sárare namaechatinure.
4. Váhivare ecuveha esu apana esena. Énerichuvare eti esenana, vahi ecuveha ema apana achane. Énerichuvare ímitucavaca ena echichanaveana tacuíja eta natuhusivaina.

Te yátupina esuapa eta júcana, tájina íchiravaimahi te mamirahu ema Viya. Éma tímicatacaheyare tíjaneacaheyareva tamutu sácheana. Tamutupa eta juca véchajiriruvanahi eta eyehe”.

³⁰ Tacahe, tiyananapa ena tiámana eta carta, nacaijuhepa eta Antioquía. Te títecapanapa ánaqui, nacurujicapa ena nacaijuhequeneanahi nachamuriana. Náijaracapa eta náamaqueneapahi carta. ³¹ Te najacapapa eta carta, navejiacapa. Náechajicuhapa te namirahu namutu ena nachamuriana. Tétavicavahi eta náurisamurevahi eta nasamirahi.

³²⁻³³ Nanasipanapa jena cájeanahi ema Judas émapa ema Silas. Éna, énerichuvare eta títucanahi eta máechajiriruva ema Viya. Tiúrihi eta náimitusiravacahi ena nachamuriana. Naconsejachavacahi, náetumesámurechavacáinehi náicha. Te tamutupa eta náimiture-sirahi, tichavanayarepa nayehe ena tivanecanahi. Tacahe, ena nachamurianahi náechejje-machavacapa. Nayaseacapa ema Viya táurivainapahi eta napaisiraina. ³⁴ Émasera ema Silas mavarahapa manasiyare. ³⁵ Énerichuvare, ema Pablo émapa ema Bernabé nanasivarepa tayehe eta avasare Antioquía. Tímiyanavanapa eta títiturecana nayehe ena nachamuriana. Ticametarairuanavare nayehe ena apamuriana achaneana. Natiarihivare ena apamuriana tímicitacanáhi.

Tiápechavánavare tiyanana ena apóstoleana te avasareana

³⁶ Te táequenepa eta juca semananáhi, ema Pablo máichapa ema Bernabé:

—Viyanavare viápechava vipaica tayehe eta avasareana, véjiravacapaihi ena vichamuriana te vipaisineanapahi cape juca te títapucainapa viyanahi. Vímaha tájahapuca náicharacavahi —máichapa.

³⁷ Tacahe, ema Bernabé tísapavahi tiyana. Mavarahapasera mama ema Marcos. ³⁸ Émasera ema Pablo vahi mávarahahini mayanahini ema Marcos. Taicha te títapucainapa tipaicana manaquimuriahahi ema Marcos te avasare Perge tayehe eta Panfilia. Vahi máimicatacahíni tayehe eta náemataneanapahi. ³⁹ Nacaemataneacaripa eta mamavarairahi mayanahini ema Marcos. Tacahe, títajicacanapa. Ema Bernabé tiyanapa, macachanehi ema Marcos. Tiávacuhanapa, nacaijuheyarepa eta tíurupuhi Chipre. ⁴⁰ Tacahe, ema Pablo mapanerachapa mámayare ema Silas. Te tétupiricavanapa, nayujaruchanumapa ena nachamuriana. Nayaseacapa ema Viya eta máimicatasirainapahi eta napaisiraya. Ticametanavanapa tiyananapa. ⁴¹ Eta napaisirapahi te achene tétavajicanapaipa tayehe eta avasarechichana Siria étapa te Cilicia. Náejiravacapaipa ena nachamuriana natiarihiqueneanapahi. Náetumesámurechávacapáipahi.

16

Ema Timoteo máehicavacapa ema Pablo, ema Silas

¹ Tacahe, ema Pablo émapa ema Silas náejiravacapaipa ena nachamuriana ticvasanahi te Derbe. Tásiha, tiánucuhanavarepa te Lистра. Ánaqui te Lистра matiarihíhi ema Timoteo, suchicha esu ésuna esena israelíta, téhichavare ema Jesús. Émasera ema maiya, apavasanahi griego éma. Ema maca Timoteo émarichuvare téhichahi ema Jesús. ² Énerichuvare, nacunachahi eta máurivahi ena nachamuriana ticvasanahi te Lистра énapa ena ticvasanahi te Iconio. ³ Tacahe, ema Pablo mavarahapa mámayare ema Timoteo eta napaisiraya. Tacahe, mavanecapa macamarca* apaesa tacuija nacucayema ena israelítana ticvasanahi tayehe eta napaisihayare. Taicha náimatíhi éma eta machichairahi ema apavasanahi. ⁴ Tacahe, tiyananapa. Náejiravacapaipa ena nachamuriana te tamutu avasareana. Nametacapaihi éna eta táechajiriruvapahi eta carta náimiamareruhivare ena apóstoleana énapa ena náiyarahana tiávihanahi te Jerusalén. ⁵ Ena nachamuriana, eta nasamirapahi eta mametarairu ema Pablo, tétumechacacanapaipa eta nasupajiravapahi. Tamutu sácheana ticajanemuriánapáichucha ena téhicanapahi.

Ema Viya máechajicahi ema Pablo mayana eta te Macedonia

⁶ Tiuri, ema Espíritu Santo mametacahi vahi nacuyana eta te tinapaicahi eta avasareana te Asia. Tásiha, náetavicapa eta avasarechichana táunavanahi eta Frigia (ticajirehivare Galacia). ⁷⁻⁸ Nacaijuheyarehi eta provincia ticajire Bitinia. Téhesera te tiánehianapa, ema Espíritu Santo mavanecavarepa vahi nacuyana tayehe. Tacahe, náetaviequenehapa. Tiánucuhanapa tayehe eta táunavahi eta Mísia. Náitecapirapa te puerto ticajire Troas. ⁹ Te jena yati, máimahapa ema Pablo te mavapure ema émana achane ticvasahi te tinapaica te Macedonia. Titupihahiji éma. Máichapaji eta máechajisirahi:

—Picatajicahavi, piánueca te juca viávihahi Macedonia. Pímicatapanahavi —máichapaji.

¹⁰ Eta máimairahi ema Pablo te mavapure eta juca, enevanepa vétupiricavapa eta viyaniraya tayehe eta Macedonia, taicha vémeteacahi eta mavarairahi ema Viya eta viyaniraya eta ánaqui, vicametarairuirayare.

Títetapanapa te avasare ticajire Filipos

* **16:3** Eta juca nayeherepi eta nacamarcairahi ena israelítana, te tíuchuca ema amuya ajairachicha, te óchopa sache eta máuchusirahi, namarcachayarepa. Émaripa ema Timoteo ichanaruipahinéni. Émasera ema Pablo macavanairipipa macamarcahivaréni éma apavavare, apaesa tacuija nayunacahi ena israelítana.

¹¹ Tacahe, viávacuhapa eta te puerto Troas. Viyanapa tayehe eta tiúrupuhi ticaijare Samotracia. Te apanapa sache, vítecapapa te Neápolis. ¹² Viúcupaicapa viyanapa te avasare Filipos. Eta juca avasare nayehe colonia ena romanoana. Eta ichapepanahivare tayehe eta avasarechichana tinapaicahi eta te tacunahu táuchusine eta sache eta Macedonia. Vinasipanapa tayehe te jena sácheana.

¹³ Te jena sache sávaru, viyanapa eta te nayujarasirarehi te tachachacu eta avasare te tachaui eta cajacure. Véjacapa tayehe. Vicametarairupa nayehe ena esenana náurujiruvanahi tayehe. ¹⁴ Sutiarihi esu ésuna esena ticaijaruhi Lidia. Ésu, tiásihai eta avasare eta suchusinehi. Esu suca tjararecarahi eta yérerucava sédana mularumeana. Ésurichu, tipicaurahi me Viya. Susamararacaripa eta mametarairuhi ema Pablo. Ema Viya mavejiasinaipa eta susamure sujacampirayepahi eta mametarairu ema Pablo. ¹⁵ Enevanehi ticaicachasihi esu esena énapa namutu ena tiávihanahi te supena. Tacahe, suvarahapa tiámahavi eta te supena. Sucahepa:

—Te esuapapuca eta yátupirahi eta néhisirahi núti eñi Viáquenu Jesús, ítecapauchanupaini te nupena —sucahepa.

Tásiha, ticamesahavipa tiámahavi te supena. Tacahe, vísapavapa véhica.

¹⁶ Te apana sache, te viápechavavarepa viyana tayehe eta nayujarasirare, vicainunapa esu ésuna amaperu mávaháruhi ema éreana. Tijarauquihí ésu máicha. Esu suca amaperu vanaracahi. Ichapemurihi eta plata suvachanahi, suíjaracaphisera ena suáquenuana. ¹⁷ Te tímahahavivare viánucuhu, téhichavivare esu suca amaperu. Tipiaracapai te véquene. Ánipa sucahe:

—Ena nani ajairana ñivanarana eñi Viya Viáquenu vimutu viti achaneana. Náechajisihavare eta eyehe eta achene ticaijuhe ñe Viya nayanihayare ena náuchucureanayare —sucahepa.

¹⁸ Ichapemuri eta sácheana eta suéhicarairisrahavihi. Mapuñacapa ema Pablo. Téquerucavapa. Tásiha, máichapa ema éreana ema tiávahácahi ésu:

—Te máijare ema Náquenu Jesucristo, nuvanecavi piúchuca te suáquehe esu suca amaperu —máichapa.

Enevanepa tiúchuca ema éreana. Majunjiacapa ésu.

¹⁹ Te náechapa ena suáquenuanahi, tise-manapa taicha tájinapa suviyahini eta suplatanechihavachini. Tacahe, nacara-tacapa ema Pablo émapa ema Silas. Námapa te plaza te namirahu ena tuparairucanahi. ²⁰⁻²¹ Tacahe, nametauchavacapa nayehe ena tuparairucanahi. Ánipa nacahe:

—Ena nani ajairana israelítanacacha. Nacahepuca eta tamauriqueneana. Navarahapa tíminajicahaviana eta viyeherepiana. Navarahavare véhica eta vimaimatiequeneruhi viti romanoana. Váhivare táisapacarehini vítauchahini eta nayeherepianahi énatatájiana —náichapa.

²² Tacahe, ena achaneana tise-manapa nayehe ema Pablo émapa ema Silas. Tacahe, ena tuparairucana juéseanahi nacavanairipipa navejamuhicavaca, náestacavacapa te yucupipiana. ²³ Te tamutupa eta náestasiravacahi, námapa te cárcel. Navanecapa ema nacapitara ena carceléroana máechapajirica muraca eta tapaja. ²⁴ Te masamapa ema nacapitara eta navanairipihí, máimisipavacapa tayehe eta téqueneha cuarto. Máeratapaiquechavacapa te cepo. Manacapa cantavu eta tapaja.

²⁵ Tacahe, eta jena enumuhuquenepa yati, eta nacaeratairahi ema Pablo émapa ema Silas, tijiranaichucha tiyujaracanhivare me Viya. Ena apamuriana présoanahi nasamararacaripa eta jirasare. ²⁶ Tijahúchavapa tiyamurica muraca eta apaquehe. Tiyamuricapa eta yúchamana. Tijahúchavapa téjiacavaca eta tapajacurana eta cárcel. Téjapucapa eta cadenana náitihanahi ena pré-suana. ²⁷ Téjamiuchavapa ema nacapitara ena carceléroana. Máimaharine eta tapajana téjiacavacari-pahi. Máimijachapa nájinaripahi ena présoanahi. Tásiha, mavehapa eta mayehe espada. Mavarahapa ticapacavayarehini táichavenehi eta mapisirahi.

²⁸ Émasera ema Pablo mapiaracapa:

—Vahi picucapacava. Vitiarihirichuhi vimutu. Nájina émanaina téjiacavaina —máichapa.

²⁹ Tacahe, ema nacapitara tiyaseserecapa eta namicahuyare. Tisiapapa máimamuriharehi éna. Tiyayacarepainecha eta mapisirapahi. Tépuycupa te namirahu ema Pablo émapa ema Silas. ³⁰ Máichuhavacapa éna, námapa te mapena. Mayaserecavacapa:

—Tátanaveana, ¿tájahapucaini nícharacavaini eta núchucuirayare núti apana?

³¹ Éna najicapapa:

—Pácasíña písupa ema Viáquenu Jesucristo. Tásiha, éma ticuchucuhaviyare píti, énapa ena pichichanaveana —náichapa.

³² Tacahe, náimitucapa éma eta máechajiriruva ema Viya, énapa namutu ena tiávihanahi te mapena. ³³ Étarichu jena yati ema nacapitara masipasinavacapa eta najarana ema Pablo

émapa ema Silas. Tacahe, ticaicachasipa éma, esu mayena, ena machichanaveana, énapa ena apamuriana tiávihanahi te mapena. ³⁴ Te táequenepa eta juca, mámamurihavarepa te mapena. Máenicavacapa. Tiúrisamureripa éma, énapa namutu ena tiávihanahi te mapena, eta macuchucuiravacayare ema Viya eta nasuapiraipa.

³⁵ Te las nuévepa sache, ena juéseanahi navanecapa ena nasuntarurana nacuchupana-vacayarehi ena náerataruanahi. ³⁶ Tacahe, ema nacapitara ena cárceleroana máichapa ema Pablo:

—Jucarihi eta órdeno nayehe ena juéseana eta nacaitisiraheya. Tiúripa eyana iúchuca. Vaipa táéñamavacare —máichapa.

³⁷ Émasera ema Pablo máechajicavacapa ena suntaruana. Máichapa:

—Víti tavanarahavi eta Estado te Roma. Viávacuhahi eta ley. Vahi táuricahini náichahavihini ena juéseana ticaratachavianapa téstacahavianapa te namirahu ena achaneana. Vahi nayaserechavinumahini te tatiarhipuca eta viviurevahi. Tásiha puiti, navarahapa nayumurucayare eta nacuchusirahaviyare. ¡Vahi ene tácahe! Emetaca énaína náiteca nacuchupanhavi —máichapa ema Pablo.

³⁸ Tacahe, tichavanapa ena vanairucana. Nametacapa ena juéseana eta máechajiriruva ema Pablo. Ichaperine tipicana ena juéseana eta nasamirahi tavanaranairahi eta Roma. ³⁹ Tacahe, tiyananapa ena juéseana nacuchupana. Tiperdonachavanapa nayehe. Náichapa: —Ájapanuhavi. Eperdonachavi eta juca víchirahahi. Ecatajicahavi, vahi ecumetauchahavi. Ájapanuhavichucha, tiúripanahipucáini iúchucaini eta te juca avasare viávihihi, apaesa náesamiricahepa ena iánaranahi —náichapa.

⁴⁰ Tacahe, te tiúchucanapa te cárcel ema Pablo émapa ema Silas, tiyananapa tichavana te supena esu Lidia, viávihihi víti. Vicurujiaca ena vichamuriana. Tásiha, náetumechavacapa, náimitusiranumapa eta náimiyavachucha eta nasuapajiraivaina mayehe ema Viya. Tásiha, tiyananapa.

17

Nacaechepuca eta semanere ena israelítana te avasare Tesalónica

¹ Eta nayansirahi ema Pablo émapa ema Silas, tiánucuhanapa tayehe eta avasareana Anfípolis étapa te Apolonia. Titecapanapa tayehe eta apanavare avasare Tesalónica. Tatiaríhihi ánaqui eta náurujisirareva ena israelítana. ² Eta mayeherepihi ema Pablo, matupiru te náurujisirareva. Mapana sávara eta macametarairuirahi nayehe ena achaneana. ³ Manerejicapahi eta te Sagrada Escritura eta máechajicurepahi. Máimitucavacahi eta máitesiraipahi ema Cristo. Ánipa máichavacahi:

—Tiyerehi eta vicuchapirahi eta máimeresiravayare ema Cristo eta viyehe viti israelítana. Tímitucavahihi eta Sagrada Escritura eta macatajivairayarehi, nacapacayarehi. Émasera téchepucayarehi te máecari. Puiti numetacahe: Nímatipa ema Jesús Nazareno, ema nacaparuihi. Téchepucaipahi éma. Eta juca tímicaecherachahi émahí ema Cristo —máichapa.

⁴ Tacahe, tinerejicavanahi ena achaneana. Natiaríhi ena tisuapanahi, náurujiacahi ema Pablo émapa ema Silas. Camurianavare ena griégoana apavasanana tipicauchanahi ema Viya, téhicanahivare. Énerichuare ena esenana nayenana ena táiyarahana eta avasare tinerejicavanahivare ena téhicanahi. ⁵ Énasera ena apamuriana israelítana masuapajirairahanahi, ticapinaruanahi eta náimairahi ena camuriqueneanahi achaneana téhicanahi ena apóstoleana. Tisemasamureanarichucha. Nacurujiaca ena ajairana váinarajipanereruana, máematanereanahi te cáleana. Tíchuhajiricacanapa eta nacaechepusiraya eta semanere. Natanucapa ema Pablo émapa ema Silas, navarairahi nacaetemajiricavaca te namira ena achaneana. Tiyananapa eta te mapena ema Jasón. Náquipaica eta tapaja. Tisiapanapa. ⁶ Eta namaichimavirahi ema Pablo émapa ema Silas, nacaratacapa ema Jasón énapa ena apamuriana machamuriana. Nachururupacavacapaipahi eta náimirapahi te namirahu ena tuparairucanahi. Tipiaracanapa eta nasemanevahi, nacahepa:

—Títecapauchahavianahi ena nani achanetatajiana náitecapaurehavianahi. Najararecapahi eta viyeherepiana, nahapapicahivare eta napanereruana ena vijaneanana. ⁷ Éna majacapaqueneanahi ema Jasón te mapena. Namutu ena nani nacaecahíhi ema aquenuca viyehe Émperador romano, náepuruvare eta mavanairipiana. Náimijachahíji mararíhi ema apana rey ticijarehipuca Jesús —nacahepa.

⁸ Te nasamapa eta juca, ena tuparairucana énapa ena apamuriana achaneana, napanerequeneháinehi. ⁹ Tájinasera apanainahini náicharachini, nayaseacapa nanaquica eta prenda eta náuchusirayare ema Jasón énapa ena machamuriana. Tiámainucava te náuchucapa te avasare ema Pablo ema Silas, náimichavayarepa eta prenda.

Éma Pablo, ema Silas títecapanapa te avasare Berea

¹⁰ Te jena yátiquenehi, ena vichamuriana námapa nayumurucapa eta nacuchusirahi ema Pablo émapa ema Silas tayehe eta avasare. Tiyananapa nacaijuhe eta avasare Berea. Te títécapanapa ánaqui, tiyananavare tayehe eta náurujisirareva ena israelítana. ¹¹ Ena nani israelítana ticavasanahi te Berea, tiúripanereruanapana nayehe ena ticavasanahi te Tesalónica. Navapina éna, nasamararaca eta mametarairuhi ema Pablo. Tamutu sácheana nacaravahuhi eta Sagrada Escritura. Navarahahi náechayare te yátupihpuca eta mametarapihi ema Pablo. ¹² Jéhesareinehi, camuriana ena tisuapanahi. Camurianavare ena apavasanana tisuapanahi. Te namuri, natiarihivare ena esenana ticapichahuqeneanahi, énapa ena ajairana. ¹³ Nasamairiricavarepasera ena israelítana ticavasanahi te Tesalónica eta macametarairuripahiva ema Pablo eta te Berea. Enevaneпа tiyanana nacapayaca. Te títécapanapa, náimiyusemacavarepa ena achaneana. ¹⁴ Énasera ena machamuriana ema Pablo enevaneпа náevataca éma te tachaui eta mar. Nanasipasera te Berea ema Silas, ema Timoteo. ¹⁵ Ena tiámanahi ema Pablo, te títécapanapa te puerto, tiávacuhanapa tiyananapa tayehe eta avasare Atenas. Te títécapanapa, etapa nachavinehi ena tinapananahi ema Pablo. Tacahe, ema Pablo matuparacavacapa nametaca ema Silas, ema Timoteo nayavanane nacapayaca éma eta te mávihahi.

Tímiturecapa ema Pablo te avasare Atenas

¹⁶ Eta macuchapiravacahi náitecapiraya ema Silas, ema Timoteo, vaipa máitucacarehini ema Pablo eta máimairavacahi ena achaneana nayehehearacahi eta camuriquene nasiñarajiana. ¹⁷ Tacahe, tamutu sávaruana, tiyana eta te náurujisirareva ena israelítana. Máechajisihahi eta tiúrina échájirirucava nayehe éna, énapa ena apavasanana griego típicauchanahi ema Viya. Tamutuvare sache máechajisihahi éma te plaza nayehe ena achaneana natiarihiqueneanahi. ¹⁸ Natiarihihi ena ajairana ena téhicanahi eta máimiturapi ema ticajiare Epicuro, énapa ena apamuriana ticaravahuanahivare eta náimiturapiana ena estoicoana. Te jena sácheana, téchajiricavanapa mayehe ema Pablo. Váhisera nácaicutiarapahini eta macayemapahi. Nacahepa:

—¿Táahasamipucara tacayemahicácha eta mapanereruhi ema maca?

Ena apamuriana ánivare nacahe:

—Ema maca ticametarairurahi tayehe jácani apanavare masiñarajianarichu — nacahepa.

Nacahehi éna eta juca, taicha ema Pablo mametacavacahi eta máepenirahi ema Jesús etapa eta máechepusirahi, mápechiravahi títareca. ¹⁹ Tacahe, tiyananapa tayehe eta cabildo náurujisirareva ticajiarehi Areópago. Ánaqui nayaserecapa ema Pablo:

—Vívaraha vímati víti eta juca arairuhi pímiturapihi eta viyehe. ²⁰ Taicha tiáramicarehi eta juca vimaimatiquenehi. Vivaraha véchayare tájahapuca tacayemahi eta juca —náichapa.

²¹ Taicha ene nacahehi namutu ena ticavasanahi te Atenas, énapa ena náiteruanapahi. Náuricarinehi náechajisihahi tamutu sácheana eta náimahaqueneana nasamaqueneanapahi arairuqueneana.

²² Tacahe, ema Pablo titupihapa te namirahu te nayehe cabildo. Máichavacapa:

—Tátanaveana, eti ecavasanate te juca Atenas. Nímararacahehi eta yátupirahi religiósöhe. ²³ Taicha te nítécapanapa nútí eta ani eyehe, nupaicahi tamutu eta eyujarasirareana. Nímahapa eta eyehe altar tatiarihihi eta ajureca ani tacahehi: “Ema Viya vimaimatiquene”. Tiuri, ema maca Viya eyujaraureasa emáimatiquénehi éti, émara ema Viya néchajisihahuenehi nútí.

²⁴ Émara tépiyacahi eta apaquehe, etapa eta vímahahueneanahi távaphianahi eta juca apaquehe. Émara téchahi ticavanairipihí te anuquehe etapa te juca apaquehe. Ema Viya vahí tácarichuimahi máucupaisihaya eta te vépiyaruana hi templo, taicha vahí mácamunu eta mapenainachuhini eta te juca apaquehe. ²⁵ Váhivare mácamunu víjaracasichahini eta víámavahu viti achaneana. Vítira vícamunuvahi eta mayehe. Éma, téchapajirichavihí vimutu. Tíjaracahavihí eta táurivahi eta vítaresira.

²⁶ Acane te tépanavainapa tamutu, ema Viya máepiyacapa ema máinapuiru achane ticajiare Adán. Vimutu viti achaneana, mámariequenehavi ema Adán. Apánapanenéhíhavihiséra maicha ema Viya. Tamutu eta apaquehe víávapaicahi máicha. Máimicutiarachapahisera eta táenasihayarepahi eta víávasanapachuyarehi. Énerichuvare, máimicutiarachahivare eta táichecurayare eta vítaresirana. ²⁷ Vítiaríhisera viti achaneana vémitisicaipa ema Viya. Émasera mavarahahi vitanucayare. Váhinéni máyerehíhávihini. Titsecavahi éma te vichacaya. Mácani mavaraha matanuca, máichimavávaneyarehi. ²⁸ Taicha vítarecachi máicha, tímipaichavihí, achanehavihi máicha. Émaripa éma ichapequene escribáno te emuri éti macahehi eta máechajiriruvahi: “Viti achaneana cáitarecavíhí ema Viya”. ²⁹ Viti vímatihí eta máchanechirahavíhí ema Viya, macaitaresirahavíhí. Viyamuricahí vipacahí máicha.

Tacahe, véjecapiravahi víti te vímijachapuca virataha víachanecha eta visiñaraji. Vímvivasi-chahineni eta jácani, váhisera tasamarahihini, váhivare tapaicahini, váhivare tayamurica-hipucaini. Tayanapanepuca táurina te vépiyaca eta óropuca, plátapuca, chínapuca. Váhivare váratahaimahi nacasiñacarehini vícha. ³⁰ Te vicasañarajihipuca eta vépiyaruana, vimáima-tirarichaha. Ánaquiaparípa eta macamichirahi ema Viya ena achaneana eta nacasiñairahi eta nasiñarajiana. Puítisera vaipa macamicha eta juca. Tivanecahavipa vimutu víti achaneana vínajica eta juca, tátupiruvapa eta véneuchiravaina eta mayehe. ³¹ Taicha tatiari-hiyarehi eta jena sáchezare máicuñacayare namutu ena tíchanahi eta juca. Tamutuínapa máetupiricayare. Mararihi ema achane manerejiruhi ema Viya, juéseyare eta viyehe. Éma, ticaijare Jesús. Ema Viya máimerecahi eta manerejisirahi ema Jesús juéseyarehi, taicha macaechepucahi te máecari te táequenepa eta máepenirahi —macahepa ema Pablo.

³² Te nasamapa eta máechajisihairahi eta máechepusirahi te máecari ema Jesús, natiarihi ena nacaecahirichucha. Énaserá ena apamuriana napanerequenehapa. Tacahe, náichapa: —Téhenarinevare apahena péchajisihavare eta juca, apaesa visamaví —náichapa.

³³ Tacahe, tiúchucapa ema Pablo eta te náurujisirareva. Tiyanapa. ³⁴ Natiarihisera ena apamuriana nasuapahi náehicapa eta mametarapi ema Pablo. Matiarihíhi ema Dionisio táiyaraha eta nayehe cabildo, ésupa esu ésuna esena ticaijaru Dámaris. Natiarihivare ena apamurianahi.

18

Ema Pablo tiyanapa te avasare Corinto

¹ Te táequenepa eta juca, tiyanapa ema Pablo. Tiúchucapa eta avasare Atenas. Ticaijuhe eta apana avasare ticaijare Corinto. ² Ánaqui macainunapa ema émana israelíta ticaijarehi Aquila, ésupa esu mayena ticaijaru Priscila. Ema maca Aquila máuchusinehi te tinapaica eta departamento Ponto. Tayerevahisera eta áñoana, tiyananapa tayehe eta avasare Roma. Macaemataneínehi ánipihi. Émasera ema aquenucaini Emperador Claudio macavanairipipa náuchuca namutu ena israelítana eta te Roma. Tacahe, tiyanapa ema Aquila tayehe eta avasare Corinto, étapa macainunainehi ema Pablo. ³ Énapa mávayechavacahi ema Pablo. Ema nani ticuticacanahe eta námatanerepiana tálabarteroana. Tímicatacacanapa eta nacaematanerahi.

⁴ Tiuri, tamutu sávaruana ema Pablo tiyanahi tayehe eta náurujisirareva. Maconsejacha-vacahi ena achaneana. Macajimuyacahi eta nasamureana ena israelítana énapa ena apava-sanana.

⁵ Tacahe, napaenumavapa nacapayaca ema Silas émapa ema Timoteo, tíasihanahi te Macedonia. Eta natiarihíahi éna, tépanavapa ema Pablo ticametarairu tamutu sácheana eta máechajiriruva ema Viya. Mavarahapa macajimuyacavacaya ena israelítana ema Jesús émairahi Cristo ema nacuchapaquenehi. ⁶ Natiarihisera ena apamuriana masuapajirairanahahi. Nacatianacapa ema Pablo, napanararachavare. Tásiha, tétatajiacavapa ema Pablo eta máepacuhasa, tácutiarahi eta namaimitucacarevahi ena nani. Majunijicayarepa. Tásiha, máichavacapa:

—Étipa ecatapiravayare vaipa iúchuchuhaimahi tayehe eta ecuñarajiqi te apana vítaresira taicha eta emajacapirahi eta máechajiriruva ema Viya. Vaipa necha núti. Puiti juca nuyarinapa, nímiturecahi nayehe ena apavasanana —máichavacapa.

⁷ Tacahe, tiúchucapa tayehe eta náurujisirarevahi. Tiyanapa te mapena ema apana machamurihi ticaijare Justo. Ánaquiipa eta máimituresihahi. Ema maca Justo, vahi israelítana, mapicauchahisera ema Viya. Eta mapenahi te tachacaya eta náurujisirareva ena israelítana. ⁸ Matiaríhi ema apana achane ticaijare Crispo, tuparairuchahi tayehe eta náurujisirarevahi. Masuapahi éma, ésupa esu mayena, ena machichanaveana, énapa ena apamuriana tíavihanahi te mapena. Camurianavare ena tisuapanahi ticavasanahi tayehe eta avasare Corinto eta nasamirahi eta máechajiriruva ema Viya. Namutu ticaicachasianahi. ⁹ Tacahe, étana yati, ema Viáquenu Jesús máechajicapa ema Pablo, ánipa maicha:

—Vahi picupica. Pímiyanavachucha picametarairu te juca avasare, ¹⁰ taicha camuriana ena nuchaneránaya. Núti nutiaríhiya te pichacaya. Tájina náicharacavimahi ena piánarana —macahepa ema Jesús.

¹¹ Tacahe, ema Pablo manasipa. Étana año y medio macahehi tayehe eta avasare Corinto. Tímiturecahi nayehe ena achaneana eta máechajiriruva ema Viya.

¹² Étasera jena sácheana matupihairahi ema Prefecto ticaijare Galión. Aquenucachi éma tayehe eta avasare Corinto tayehehi capital eta departamento Acaya. Tiuri, ticurujicacanapa ena nacanarayarepa ema Pablo. Nacaratacapa námapa te mamirahu ema aquenuca, nametauchayarehi. ¹³ Tacahe, náichapa ema aquenuca:

—Ema maca achane macontracha eta viyeherepi. Ema máimitucavaca eta vijaneanana, náitsivachayare eta véjirairaya ema Viya —náichapa.

¹⁴ Téchajichavayarepaini ema Pablo, émasera ema Galión macachuricapa. Máichapa ena israelítana:

—Tiuri, esamanuchaha éti. Te tíñehhipuca eta máejecapiravahi ema maca, ticaparecahipuca, núti apana nímisipavahini juésenuinahini eta eyehe eta nusamirahénahini. ¹⁵ Étasera echájirirucavánachucha te máijare ema mácani apana, étapa eta eyeherepiana éti. Tájina táíñehicaréna eta juca. Vahi nímisipavaimahi núti, juésenuinahini tayehe eta juca. Ímahainepa éti —máichapa.

¹⁶ Tacahe, máevatacavacapa náuchuca te mamirahu. ¹⁷ Tacahe, namutu ena apavasanana griégoana nacaratapaca ema Sóstenes, nacapitarahi ena israelítana. Náestacapa te mamirahu ema Prefecto Galión. Émasera váhiquene máimisipavahini. Váhivare macatiuchahini. Ema Pablo tichavapa tayehe eta Antioquía

¹⁸⁻¹⁹ Tiyerehichaha eta jena sácheana manasirarichaha ema Pablo. Te ticacutiaravapa, mavarahapa tiyanaya eta te Jerusalén, tétavajisirayarepahi eta te avasare Efeso, étapa te avasare Tiro, táunavahi eta Siria. Tásiha, ticametavapa nayehe ena machamuriana. Macachanevacapaipa ema Aquila ésupa esu mayena Priscila. Tiyanapa tipaicana eta te puerto ticaijare Cencrea. Te tiánuceanayarepa, ema Pablo ticachusasinumapa títahisinumapa eta machuti, máitachirayarehi eta mayehe promesa. Te títecapanapa te avasare Efeso, nanasihayarehi ema Aquila ésupa esu Priscila. Te jena sache sávaru, tiyanapa ema Pablo tayehe eta náurujisirareva ena israelítana. Téchajiricavaipa nayehe, máimitusiravacahi éna. ²⁰ Tacahe, éna navarahapa náiminasicha, émasera vahi máisapavahini. ²¹ Téhesera te ticametavapa nayehe, máichapa:

—Nuyanayare tayehe eta Jerusalén. Ánaqui nunarasihayare eta jena sácheana piéstairayare. Nuchavayaresera nímahapanaheyare éti, te mavaraha ema Viya tacuijaichu níchava —máichavacapa.

Tacahe, tiavacuhavarepa. Majunijicapa eta Efeso. ²² Te títecapapa ema Pablo tayehe eta avasare Cesarea, tiánucuhapa tayehe eta Jerusalén. Máechajipánavacapa ena machamuriana. Te táequenepa, tiyanapa te avasare Antioquía. ²³ Tiyerehi eta cájeana manasiranumahi tayehe eta avasare Antioquía. Tacahe, tiápechavavare tipaica. Máejiravacapahi ena machamuriana te jácani návihavacapahi tayehe eta avasarechichana te Galacia étapa eta Frigia. Maconsejachavacapahi ena machamuriana. Matiaríhi ema Apolo te Efeso

²⁴ Te jena sácheanahi, títecapahi te avasare Efeso ema émana israelíta ticaijare Apolo. Éma máuchurehi te avasare Alejandría. Máituca ticametarairu éma. Máimativare yátupi tamutu eta Sagrada Escritura ticaijare Antiguo Testamento. ²⁵⁻²⁶ Mavapinahi éma tamutu, étaripa eta máechajisirana. Ema Apolo máitucahi eta máimiturapiana ema Juan Tícachasiricarahi eta máitecapirayare ema Cristo ema nacuchapaquenehi. Máechahi eta máicachasísirahi ema Juan ema Jesús, ema yátupiquenehi Cristo. Váhisera tamutuhini maecha eta máichavaquenevahi ema Jesús. Tamutu sávaruana, tiyanapa tayehe eta náurujisirareva ena israelítana. Ticametarairupa, vahi mapicacaracavahini. Ánipa macahe:

—¡Títecapaipa ema Cristo ema vicuchapaquenehi! Ema ticaijare puiti Jesús. Vétupiricavaya vimutu eta viyaniraya te Jerusalén. Ema véhicaya taicha ema viáquenuya —macahepa.

Étasera te nasamapa ema Aquila ésupa esu Priscila, námapa éma te napena. Tásiha, náimitucapa tamutu eta apamuriana téchacareana mayehe ema Jesús. ²⁷ Manasipanapa ema Apolo te jena cájeana. Tacahe, mavarahapa tiyanayare te tinapaica eta departamento Acaya. Tásiha, ena machamuriana náimicatapaca. Ticajureanapa eta carta nayehe ena nachamurianahi tayehe eta avasareana macaijuhreyarehi apaesa túri eta najacapiraina. Te títecapapa éma tayehe eta Acaya, ichape eta máimicatasiravaca ena machamuriana taicha ema Viya májaracahi eta máitupajjiasiravahi. ²⁸ Máimitucavare ena israelítana eta te náurujisiravana. Máiminecapáequenehávacahi tayehe eta Sagrada Escritura ema Jesús émahí ema Cristo ema nacuchapaquenehi.

19

Títecapapa ema Pablo te avasare Efeso

¹ Tiuri, manasipa ema Apolo eta te avasare Corinto. Te jena sácheana, ema Pablo tiúchucahi eta avasareana táunavanahi eta Frigia. Eta mayanhipahi te achene te márijuecuana. Tacahe, títecapapa tayehe eta avasare Efeso. Te jena avasare, natiaríhihi ena apamuriana tisuapajirahianahi. Máimativacapaipa éna. ² Tacahe, mayaserecavacapa:

—¿Mávaháruhépa ema Espiritu Santo te ecáijuhéinapa ema Viya? —máichavacapa.

Tásiha, éna najicapapa:

—Váhira visamairirica eta matiarihirahi ema Espíritu Santo.

³ Mápechavare ema Pablo mayaserecavaca:

—¿Tájahasica tacayemahi eta ecaicachasirahi éti? —máichavacapa.

Éna najicapapa:

—Eta vicaichasirahi véhicahi eta máimiturapianahi ema Juan Tícachasiricarahi —náichapa.

⁴ Ema Pablo mametacavacapa:

—Tiuri, yátupi ema Juan máicachasicavacahi ena achaneana eta náitsivachiraya eta náitaresirana. Énerichuvare, mametacavacahi eta nasuapirayare ema achane téhiequenehapahi éma. Puiti numetacahe: Ema maca téhiequenehapahi ema Juan ticaijare Jesús. Émaqueneripahi ema Cristo —máichavacapa.

⁵ Tacahe, te nasamapa eta juca, navarahapa ticaicachasiana te máijare ema Viáquenu Jesucristo. Tacahe, ema Pablo máicachasicavacapa. ⁶ Tacahe, manacapa eta mavahu te nápusiana. Tásiha, tiúcupaicapa ema Espíritu Santo, mávahácavacapa. Témunahircavanapa apáechajirírúvána. Ticametarairuanapa eta máechajiriruva ema Viya. ⁷ Eta nasimutuvahi ena nani, dóceanahi ena ajairana.

⁸ Tamutuhi sávaruana tiyana ema Pablo te náurujisirareva ena israelítana. Mapana caje ticametarairu nayehe ena achaneana. Vahi mapicacaracavahini eta macametarairuirahi. Macajimuyacavacahi ena achaneana, náehisiráina ema Jesús, náimatiraina eta émairahi Cristo, ema nacuchapaquenehi. ⁹ Natiarihisera ena apamuriana murácasamuréanaríchucha. Váhivare návararahahini náehicahini ema Jesús. Te jácani náurujisiravana, nacaecahiríchucha eta arairu máimiturapihi ema Jesús. Tacahe, ema Pablo térajicavapa eta nayehe. Máiputsimurihapa ena tisuapajirahianahi, mámamurihapa tayehe eta colegio máimituresirarehi ema ticaijare Tirano. Tacahe, ema Pablo tímiyanavapa tímitureca tamutu sácheana nayehe ena machamuriana. ¹⁰ Apina año eta máimituresirahi. Tacahe, ena máimitureanahi tiyananapa típaicana. Ticametarairuanapaipa eta máechajiriruva ema Viya nayehe ena achaneana ticavasanahi eta te avasarechichana táunavanahi eta avasare Efeso, tayehehi capital eta departamento Asia. Tásiha, nasamairiricapa namutu ena achaneana: ena israelítana énapa ena apavasanana. ¹¹ Ema Viya máimicatacahi ichape ema Pablo eta máichirayare eta tiáramicareana. ¹² Ichapemuriana ena achaneana macanararuanapahi tayehe eta páñoana, camisapuca macaratajiruanapahi. Máijaracavare nacaitcapaya nayehe ena nacajumaqueneana, tásiha tacanaracapaipa. Énerichuvare táquijicapahi ena éreanana.

¹³⁻¹⁴ Te jena avasare, natiarihihini ena siéteana israelítana ticaparapejiricacana, machichanaveanahi ema ticaijarehi Esceva, náiyarahaini ena tiyujaracarahiana te Jerusalén. Tacahe, ena nani siétequeneana napaiririruanahi. Náitucahi naveha eta itiriji. Éna, eta navehairahi eta itiriji, navarahapa éna apanava napiaracayare eta máijare ema Jesús. (Váhiserá náehicahini eta máimiturapiana.) Matiarihihivare ema achane macajumaquenehi maicha ema éreana. Tacahe, te napauchapa ema macajumaquenehi, náichapa:

—Piti éreana, vivanecavi te máijare ema Jesús máechajisihaquenepahi ema Pablo. Piúchuca te máquehe ema maca macajumaquene —náichapa.

¹⁵ Tásiha, ema éreana majicapapa:

—Nímati ema Jesús, émapa ema Pablo. Étiserá vahi nímatihe. ¿Nájahahepuca? ¡Ásajipucaini nusuapahehini! —máichapa.

¹⁶ Tacahe, ema achane mávaháruhi ema éreana majunauchavacapa éna. Máehavacapa máquipapaicavacapa namutu ena siétequeneana. Tiyananapa tijunana, najunijicapa eta mapena ema macajumaquene. Mamuiriareanapaipa, ticajaranaipa. ¹⁷ Tásiha, téchacarehi eta juca nayehe namutu ena ticavasanahi tayehe eta avasare Efeso, énaripa ena israelítana. Te nasamairiricapa, típcanarinehi. Tásiha, nacahepa:

—Tétavacavapa tamutuira tarataha eta máijare ema Jesús, náquenu ena nani —nacahepa.

¹⁸ Tacahe, ena téhicanapaipa ema Jesús, te náurujisiravana te tiyujaracana, timetaurecavanapaipa tamutu eta náejecipiravana eta náitaresirahi. ¹⁹ Natiarihini ena apamuriana ticaratacanahi eta iápemarecare. Námavacapaipa eta náitucqueneanaini nasiñarajianainihini, nayehepuca libro. Náijuquechavacapaipa te namirahu ena nachamuriana. Vaipa nacatiequenehapahini. Natupaequenehapasera eta tavachanahi te navacharecainapa tacapayacahi eta \$b250,000. ²⁰ Tacahe, ichape eta nasuapira ena achaneana eta máechajiriruva ema Viya. Camurianapaipa ena téhicanapahi.

²¹ Te táequenepa eta juca, ema Pablo macahepa:

—Nuvarahapa néjirapanaya ena vichamuriana ticavasana te Macedonia énapa ena apamuriana ticavasana te Acaya. Tásiha, nánucuhayare te Jerusalén. Te tamutupa eta juca, nuyaninavarepa te Roma —macahepa.

²² Tacahe, máevatacavacapa nánapuca ena apinana machamuriana ema Timoteo émapa ema Erasto. Tiyananapa tayehe eta Macedonia. Émasera manasipanarichaha tayehe eta Efeso.

Tisemamurianapa ena achaneana te avasare Efeso

²³ Tacahe, te jena sácheanahi, tisemamurianapa ena apamuriana achaneana taicha camurianapa ena téhicanapahi ema Viáquenu Jesús. Áni tacahehi eta nasemirahi. ²⁴ Matirihahi ema achane ticajjare Demetrio. Ema maca achane, máepiyacahi eta suyehe trónochicha esu nasiñaraji ticajjaru Diana. Ticutiheta eta pétichicha eta táimahi eta templo suávihahi ésu. Amairihahi plata. Tiúrihi eta maganaresira éma, énapa ena apamuriana plateroana macutiqueneanahi. ²⁵ Tacahe, macurujicapa ena apamuriana plateroana. Tásiha, máichavacapa:

—Tátanaveana, éti ímatiheta eta juca vématanerepihi, tiúrihi eta viganaresira. ²⁶ Ímaharichuhi puiti éti, esamahivare ema maca Pablo macahehi eta máechajiruvahi ena nani visiñarajiana vépiyaruana viti achaneana váhiji yátupinahini vénainahini. Ichapemurianaripa ena tisuapanahi, taicha nasamaripa eta máimiturapiana namutuyareni ena achaneana ticavasanahe te juca viávasa Efeso, énerichuhivare ena ticavasanahe eta te avasarechichana táunavana eta Asia. ²⁷ Ticauyayacarehi eta juca. Táemitiequenehahini eta juca táurivahi eta viganaresira. Étaripa eta templo suávihahi esu súrinaquene visiñaraji Diana témitiequeneanapuca, nacuijapapuca nacuechahi. Náemitisicáinapapúca eta táurivainiheta eta náejirairahi namutu ena achaneana te juca apaquehe —máichavacapa.

²⁸ Tacahe, eta nasamirahi ena apamuriana, tisemanarinehi, tipiaracanapa. Ánipa nacahe:

—¡Viva esu Diana visiñaraji viti efesioana! —nacahepa.

²⁹ Tacahe, tisemamurianapa ena apamuriana achaneana. Apanapa eta napanerecha. Tiuri, natiirihahi ema Gayo émapa ema Aristarco, macompañeroana ema Pablo náuchureanahi eta te avasare Macedonia. Tacahe, ena achaneana nacaratacapa ena nani apinana. Námapa tayehe eta náurujisirévea. ³⁰ Émapa ema Pablo mavarahapa masiáapamuriháyarehíni máechajicavacayarehi, énasera ena machamuriana vahi náisapahini. ³¹ Natiirihivare ena apamuriana, tuparairucanahi tayehe eta departamento Asia, mayeaneanahi amigo ema Pablo. Nacametararipa vahi macuímisiápava. ³² Tacahe, eta náurujisirávahi tijajamurihanahi. Ema émana tipiaracahi, apanahi eta macayema. Ema apana, énerichuvare tipiaracahivare apanahivare eta macayema. Namutuyareni ena achaneana apápipijivácachucha eta nacayemaqueneana. Vahi náimatíequenehahini tájahapuca tacayemahi eta náurujisirávahi. ³³ Tacahe, ena apamuriana israelítana náichuhapa ema Alejandro. Nametacapa eta táicharacávahi eta náurujisirávahi. Tacahe, navanecapa téchajica, maconsejachavacayarehi ena achaneana. Tásiha, ema titupihapa te namirahu. Máimicutiarachapa te mavahu namatinachaha. ³⁴ Tásiha, náimativanepa ema émarichuhi israelítahi. Tépanavanavarepa tipiaracana. Apina hora nacahe eta napiareresirahi:

—¡Viva esu Diana visiñaraji viti efesioana! —nacahepa.

³⁵ Tacahe, títecapanecha ema tayehehi alcalde eta avasare. Macamatinacavacapa. Tásiha, téchajicapa. Ánipa macahe:

—Tátanaveana, mémenaveana. Emutu eti tachichanaveana eta juca viávasa Efeso. Nájina émanáina achane vahi macuechahini eta véchapajirisira vimutu eta templo suávihahi esu súrinaquene visiñaraji Diana, esu supicahuquenehi taicha eta juca mari suáquehehi ánaquiaparipa eta táemirisirahi te anuma. ³⁶ Nájina tépuruina eta juca. Ésamiricavachucha. Vahi ecuijajahuchava. Epanerechinava te tiúriyarepuca. ³⁷ Taicha ena nani ajairana íamaqueneanapahi, tájina natapiravainahini. Vahi nacacahi esu visiñaraji, váhivare námeyecha ésu eta suyereruvana. ³⁸ Tiuri puiti, ema Demetrio, énapa ena machamuriana, te navarahapuca timetaurecana, nararihi ena juéseana. Nacaunehi nácani timetaurecanaya. Táuchushiyare eta natapiravana. ³⁹ Téheserapuca apana jácani evarahaquene, ticaechacasiyarehi te reunión tásihaqueneharehi viyehe viti tuparairucana. ⁴⁰ Tíñehicare eta juca íchaquenehi. Náimijachaipa ena achaneana víchahi eta revolución puiti jena sache. Tijuricati natiiriheta tiyaserechávianaya eta táicharacavahi eta juca. Tájina viviyavaimahi —macahepa ema alcalde.

⁴¹ Te tamutupa eta máechajisirahi, mavanecapa téjanerecana ena achaneana. Títavapa eta náurujisirávahi. Tacahe, téjanerecanapa ena achaneana, tamutupa eta nasemirahi.

20

Tiyanavare ema Pablo te departamento Macedonia étapa te Acaya

¹ Tacahe, te táequenepa eta jácani sácheana, ema Pablo máichuhavacapa ena machamuriana, maconsejachavacapa. Tásiha, ticametavapa nayehe. Tiyanapa tiánueca macaijuhepa eta te departamento Macedonia. ² Máejiravacapaipa namutu ena machamuriana ticavasanapahi te avasarechichana. Mátumechavácapahi éna eta maconsejachiravacapahi, máitecapirapa tayehe eta avasare Corinto, táunavahi eta departamento Grecia (ticaijarehivare Acaya). ³ Ánaqui manasipanapa tayehe, mapana caje eta mávihairahi. Tásiha, mapanerechaipa tiávacuhaya te pacure eta mánuesirayare macaijuheraya eta te Siria. Étasera te máechapa eta navarairahi nacapaca ena israelítana mánarana, téquecavapa eta mapanereru. Tiyanapa tipaica tichavapa tayehe eta Macedonia eta mávacuüyayarehi. ⁴ Eta machavirapa, náehicapa ena machamuriana ema ticaijare Sopater ticavasahi te Berea, ema Aristarco émapa ema Segundo ticavasanahi te Tesalónica, ema Gayo ticavasahi te Derbe. Máehicavare ema Timoteo. Natiarihivare ema Tíquico émapa ema Trófimo ticavasanahi te tinapaica eta Asia. ⁵ Tacahe, títecapanapa te Filipos, návihahi núti. Tacahe, ena siétequeneana vichamuriana tinapucanapa tiyanana tiánuecanapa, nacaijuhepa eta apana puerto ticaijare Troas. Ánaquipa nacuchapihahavihi. ⁶ Tásiha víti, te táequenepa eta Pascua vinisirahi eta pan mayehere levadura, vipaenumavapa viúchuca tayehe eta Filipos. Viávacuhapa viyanapa. Cinco sache eta viánuesira. Vicápayamuríhapa te Troas. Vinasipanapa tayehe, siete sache vicahe.

Máejirapa ema Pablo ena machamuriana ticavasanahi te Troas

⁷ Te jena tinapuca sáche tayehe eta semana, tíurujicavanapa ena vichamuriana. Viyuvecuayare, vinicayare eta pan táicutiarahi eta máepenirahi ema Viáquenu Jesucristo. Tacahe, ema Pablo maconsejachavacapa jena yati, taicha tiúchucayarehi te jena yáticarahi. Tiúnahi eta máechajisiravacahi. Te énumuhupa yati tímiyanavaríchaha téchajica. ⁸ Eta viúrujisirávahi te anuquehe peti te mapanaquene piso. Tatiarihíhi camuri eta namicahuana. ⁹ Matiaríhihi ema émana amaperu ticaijare Eutico. Téjacahi éma eta te ventana. Tacahe, eta táunavahi eta máechajisirahi ema Pablo, ema amaperu téyucapahi. Eta máimasirahi, tiáquipaicavapa te anuquehe ventana. Tacahe éna, tíucupaicavaneánapa nacáechepupánayarehi. Éma tépenaripahi. ¹⁰ Tacahe, ema Pablo tíucupaica, mapauchapa ema amaperu. Mayuratanauchapa majupahacapa. Tacahe, máichapa ena machamuriana:

—Vahi ecueñamava. Tichavayare títareca —máichapa.

Jéhesaréinehi, tichavapa títareca ema amaperu. ¹¹ Tacahe, tichavanavare tiápanana te náurujsiávahi. Tacahe, tinicanapa. Tásiha, ema Pablo tíjárahíacaríchaha eta máechajirisiravacahi. Te títapiricapa, tiyanapa. ¹² Tacahe, te téjanerecanapa, námapa ema amaperu máitareruhi. Ichape eta náurisamurevapahi.

Tiúchucanapa tayehe eta Troas, nacaijuhepa te Mileto

¹³ Viti viávacuharipa, viyanapa vicainapucavahi tayehe eta apanavare puerto Asón eta mávacuüyayarehi ema Pablo, taicha ichape eta táepíñu. Émasera ema Pablo tipaicayarehi tímitupiruchavapa. ¹⁴ Te vítecapapa te Asón, tiávacuhapa éma. Tacahe, viyanapa vicaijuhehi eta apanavare puerto Mitilene. ¹⁵ Te apanapa sache viúchucavarepa tayehe, viánucuhapa te tachacaya eta tíurupuhi ticaijarehi Quío. Te apanavarepa sache, vítecapapa te apanavare tíurupuhi ticaijarehi Samos. Víchecapa tayehe, vinaracanumapa eta te puerto ticaijarehi Trogilio. Te apanapa sache viyanavarepa, vítecapapa te puerto ticaijarehi Mileto. ¹⁶ Váipa vétavajichahini te Efeso, taicha ema Pablo váipa mávarahahini váyereréjipahini eta vipaisirapahi te táunavahi te Asia. Taicha mavarahahi títecapavaneyare te Jerusalén, eta máimaiyayarehi eta napiestara ticaijare Pentecostés. Étapa tiámahaviyare te viratavayarepuca.

Eta maconsejachira ema Pablo nayehe ena náiyarahana pastoreana ticavasana te Efeso

¹⁷ Etasera eta viávihairahi te Mileto, ema Pablo máimichuhavacapa ena náiyarahana pastoreana tayehe eta avasare te Efeso. ¹⁸ Te títecapanapa éna, majacapavacapa. Tásiha, tépanavapa máechajiricavaca, máichavaca:

—Éti ímatinuhi táichararacavahi eta nítaresirahi eta jena sácheana te nítecapauchahénapa. Tájina níchahini núti eta nuyechiravana. ¹⁹ Tájinavare vahi népiyacavahini aguenucanuinahini eta eyehe. Nucaemataneacahi ema Viáquenu. Vahi nusemaimahi tayehe tamutu eta níchavaquenévahani naicha ena nujaneanana israelítana, navarairahi títaequenehanuana. Tasapiha ticaiyacanu naicha eta námásuapajirávana. ²⁰ Tamutu numetacahéhi eta táuriqueneana tíurichaheyare éti apanava. Nímitucahehi te jácani viúrujisirávana étapa te epenana. ²¹ Nuconsejachahivare namutu ena achaneana, eta náneuchiravaina me Viya, eta náitsivachiraina eta náitaresirana, étapa eta nasuapiraina nacasiñairaina ema

Viáquenu Jesucristo. ²² Puítisera nuyaninapa te Jerusalén. Taicha nuvancasivahi mayehe ema Espiritu Santo. Vahi necha núti tájahapuca nícharacavaya eta ánaqui. ²³ Tacarichu necha eta mametasiranuana ema Espiritu Santo. Tamutu eta avasareana nupaisihana, timetacanupahi éma eta nucatajivairaya, napresuchiranuya te cárcel te Jerusalén. ²⁴ Tájinasera vahi nupicacava. Tayanapanéine népenapuca, vahi néñaeta eta nítaresira. Nuvaraha nímiyanavaya eta núrivahi mayehe ema Viya. Nuvapinavahi eta nítauchiraya eta nutuparacasivahi mayehe ema Viáquenu Jesucristo. Taicha éma tituparacanuhi nucametarairuya eta máemunasirahavihi ema Viya vimutu viti achaneana.

²⁵ Numetacahe: Puiti juca nuyaniraya, vaipa íápechavaimahi ímahanu. Eti ínapureanahi nímitureanahi emutu éti te íávasanapachuhi. Nímitucahehi tamutu eta véhisiraya ema Viáquenu Jesucristo. ²⁶ Eta tacahe, numetacahe puiti: Vaipa nútiparacáina te natirihi-napuca téjcapavanaya te etaracu éti. ²⁷ Tamutuhi numetacahe eta mavarahaqueneana ema Viya. Tájina vahi nuyumurupicahini. ²⁸ Tiuri puiti, ejaneacavayare éti, énerichuvare ejaneacayare ena íumurivana taicha etuparahaipa mayehe ema Espiritu Santo eta ejaneasirayare ena manerejiranahi ema Viáquenu, énavenehi tépenahi éma, máepusaicahi eta máitine. ²⁹ Ecaunevaicha muraca, taicha puiti juca nujunijisiraheya, tijuricati títecanaya ena navarahaya témejecapávachaheánaya. Navarahaya ticajanerecaheanaya tacutiyare eta chuye tinicarahi te tacajanereca eta varayuana. ³⁰ Énaparichu ena vichamuriana te etaracu, natirihihi ena tímiturecanaya nahapapicayana nahapapicavanaya ena nácani apamuriana vichamuriana, navarairainahi éhicayare eta napanereruana. ³¹ Tásiha, ecaunevaicha yátupina. Échavayare eta mapanaquene año eta nutiarihirahi eyehe. Tamutuhi sácheana, yátiana nuconsejachahehi, émanapachuhi numetaca. Níyahasamurehi taicha eta nímairahehi.

³² Puítisera, nuparapenaveana, nuyanainapa. Nuyáseuchahéyareséra me Viya eta majaneasiraheya. Ecaravahuirainapa yátupina eta máechajiriruvana ema Viya. Túmeheyarepaipa táicha. Ema Viya mavarahahi ímijuruchayare eta juca máechajiriruva; taicha mavaraháa tíjaracaheya eta íuchianahi te anuma eta íáviyahare, ecachaneraya ena apamuriana masántuchaqueneánarípa. ³³ Eta návihairahi eyehe, vahi nujamurachahini eta emurirahana étaripa eta plata íjaracanuhi.

³⁴ Ímararacanuhi éti eta táichararacavahi eta nucaematana. Nucaematanehi tíasihanahi te nuvahuana, nuviyahí eta nucamunuqueneana, énapa ena tímicitacanuani. ³⁵ Tamutu nímitucahehi tacaheyare eta vicáematanéraya, vímicatasirayareva ena ticamunuvana, nacajumaqueneana. Véchavayare tativa eta máechajiriruvahi ema Viáquenu Jesucristo, ani macahehi: “Viúripanaya me Viya, te vicajirica eta vímahaqueneana nayehe ena apamuriana. Vahi vicujamuracha nájaracasichahavi” macahepa.

³⁶ Te tamutupa eta juca maconsejachiravacahi ema Pablo, tépuyucanapa namutu. Tiyujaracapa mayaseuchavacapa me Viya. ³⁷ Tásiha, tíyahanapa namutu, najupacapa náetserecapa ema Pablo. ³⁸ Tipanererecanaipa taicha eta mametasiravacahi vaipa tíápechavainaimahi náimaha éma. Tásiha, tiyananapa nanapana eta te mávacuiyayarehi.

21

Eta viyanirapa eta te Jerusalén

¹ Te vijunijicapa ena vichamuriana, víavacuhapa viyanapa vitupiruruchapaipa eta tíurupuhi ticaijare Cos. Te apanapa sache vicaijuhepa eta tíurupuhi ticaijare Rodas. Te apanavarepa sache víanucuhavarepa eta puerto ticaijare Pátara. ² Étapa vicainunainehi eta apana pacure tiyanarehi tayehe eta apachara apanavare departamento Siria. Tacahe, víavacuhapa tayehe, viyanapa. ³ Eta vipaisirapahi, víanucuhapa eta tíurupuhi Chipre tanapai-capahi te sapa eta viyehe. Vímiyanavachucha vipaica vítecapira te puerto ticaijarehi Tiro tayehe eta Siria. Taicha eta pacure véhirupahi tanaquicayarehi eta carga támaquenepahi tayehe eta puerto. ⁴ Étapa vicainunainehi ena apamuriana vichamuriana. Vinasipanapa nayehe, siete sache vicahe. Te juca, ema Espiritu Santo mametacavacahi ena vichamuriana eta máichavayare ema Pablo te Jerusalén. Tacahe, nametacapa ema Pablo eta vahi macuíticapa te Jerusalén. ⁵ Téhesera tíuchucayarepa eta pacure véhirupahi, viyanapa te puerto. Téhicahavianapa namutu ena vichamurianahi, énapa ena nayenana énapa ena nachichanaveana. Tinapanahavianapa te pacure. Te vítecapapa te playa, vépuyucapa vimutu, viyujaracapa. ⁶ Te tamutupa, vémamavauchavacapa vicametavapa eta nayehe, víavacuhapa. Tásiha, tichavanapa éna te napenana.

⁷ Eta víásihairahi te Tiro, vítecapapa te Tolemaida. Étapa táenasihahi eta vipaisirahi te une. Viyanapa véchajicavacahi ena vichamuriana. Vinasipa étana sache eta nayehe. ⁸ Te apanaqueneapa sache viyanapa vicaijuhepa eta avasare Cesarea. Te vítecapapa, viyanapa

te mapena ema Felipe ema ticametarairuahi, ema nasietenehi ena nanerejiruanahi téchapajiricanahi eta nirureana nayeheana ena máimaruana. Vinasipa eta mayehe. ⁹ Ema Felipe, natiarihi ena cuátroana machichanaveana esenana, máimaruunarichaha. Ena nani máijaracahi ema Viya eta náitusirahi ticametarairuana. ¹⁰ Eta jena sácheana víávihairahi mayehe ema Felipe, vítecapapa ema émana profeta ticaijarehi Agabo. Éma tiásihahi te Judea. ¹¹ Títecapauchahavita tímahanahaviyarehi. Tacahe, mayasecapa eta máitijuhe ema Pablo. Tásiha, títiapechavapa, étapa eta mavahuana. Tásiha, macahepa:

—Ema Espíritu Santo ani macahehi eta máechajiriruvahi: “Ena vijaneanana te Jerusalén nacaratacayare ema ticayehe eta juca itijuere. Náitiacaya, náijararecayareva nayehe ena apavasanana” —macahepa ema Agabo.

¹² Tacahe, vimutu viti, énapa ena ticavasanahi tayehe, viyasecapa ema Pablo eta vahi macuyana te Jerusalén. ¹³ Émasera ema Pablo máichahavipa:

—¿Tájaha tacayema ímipanererecanu eta juca íyáuchiranuhi? Vahi nupica te náitiacapunuca. Núti níjaracava népena te Jerusalén máichavenénahi ema Víaquenu Jesucristo — máichapa.

¹⁴ Te vímahapa vahi váratahahini víchejica, vísapapa tiyana. Vicahepa:

—Énenarinepuca tácahe, máimahavirinepa ema Viya —vicahepa.

¹⁵ Te tamutupa, vétupiricavapa. Vivanapa te Jerusalén. ¹⁶ Téhicahavianapa ena vichamuriana ticavasanahi te Cesarea. Téhicahavipahivare ema vichamuri ticaijare Nasón. Ánaquiripahi eta máehisirahi ema Jesús. Éma, máuchurehi eta te tíurupuhi Chipre. Tatiarihiserá eta mapena te Jerusalén, eta vítecapihayarehi.

Ema Pablo máejirapanapa ema Santiago

¹⁷ Te vítecapapa te Jerusalén, ena vichamuriana tíurisamureanaríne eta najacapirahavihi. ¹⁸ Te apanapa sache ema Pablo tíamahavipa, víurujicavayarehi te mapena ema Santiago. Vichimapanapa natiarihipa namutu ena víyarahana pastoreana. ¹⁹ Tacahe, ema Pablo máechajicavacapa éna. Mametacavacapa tamutu eta máimicatasirapahi ema Viya eta macametarairuirapahi nayehe ena apavasanana étapa eta máichirapahi eta tíaramicareana.

²⁰ Te nasamapa ena mametaruanahi, nacunacharinehi ema Viya. Tacahe, náichapa ema Pablo:

—Tétavivavapa táuriva eta juca pimetarapiana. Pímahapasera natiarihíhira ena camuriqueneana ena vijaneanana téhicanahi ema Jesús. Énasera, muracaqueneanahi religiósoanahi, téhicanahi eta mayeherepini ema Moisés. ²¹ Puiti, jucarihi eta pépiyaequenehi eta pihápapahíji eta pímitusiravacahi ena vijaneanana ticavasanahi te avasareana estranjeroana. Pímitucavacahíji eta váhiji nacusuapa eta mavanairipiana ema Moisés, váhivaréji nacumarcacha ena nachichanaveana ajairana, váhivaréji nacuehica eta viyeherepiana. ²² ¿Tájahapuca táicharacava eta juca? Tijuricati ena achaneana tíurujicavanainapa, te nasamairiricapa eta pítiarihírahí. ²³ Tíuripana eta juca píchayare. Nararihi te juca vitaracu ena cuátroana ajairana. Títáuchanapáipa eta nayehe promesa. ²⁴ Pisipahacavaya, piámamurihi éna eta pímeresiravaya tayehe eta Templo. Pivachachinaya eta uvesa navehacqueneana apaesa éna náisapava nacachucasi eta nachutimacana. Eta táicutiarayare eta vahi yátupinahi eta pépiyaequenehi, apaesa náimahavi eta pípicachirahi eta mavanairipiana ema Moisés. ²⁵ Énasera ena vichamuriana apavasanana, vímimarecaripa eta vicartane. Náecharipa eta vaipa étaparacáinahíni nayehe eta juca. Tacarichu vahi nacunica eta taeche eta sárare nayujaraurehi te tamirahu eta nasiñarajiana, váhivare nacunica eta táitine eta sárareana, váhivare nacunica eta taeche eta sárare namaechatinure. Énerichuvare vahi nacuveha esu súcaini apana esena. Énaripa ena amaperuana, tacuija eta natuhusivaina — náichapa ena pastoreana.

Nacaratacapa ema Pablo eta te Templo

²⁶ Tacahe, ema Pablo tísapavapa. Te apanaquenepa sache, tisipahacavapa, énapa ena cuátroqueneana ajairana. Mámavacapa, tiyananapa te Templo. Nametapanayarehi ena téchapajicarahiana eta Templo, semanayareipahi eta nanaquisiravayare eta námavahuana. ²⁷ Tacahe, te náitachapa eta siete sache eta nasipahasiravahi, tichavanapa te Templo. Te jena sache, natiarihípvare ena apamuriana najaneanana tiásihanahi te tínapaica eta Asia. Eta mávihairarichaha ema Pablo te Templo, náimahapa éma. Tacahe, náimiyusemacapa namutu ena achaneana. Nacaratacapa ema Pablo. ²⁸ Tipiarianapa:

—¡Tátanaveana israelítana! ¡Yare, ímicatacavahi! Émara ema maca achane ema típaicahi tamutu avasareana. Tímiturecapahi nayehe ena achaneana eta macontrachirahi eta víávasa. Énerichuvare macatianacahi eta mayeherepi ema Moisés, étapa eta juca viyehé

Templo. Puiti macasiapavare te juca Templo ema apavasanatataji. Majararecapa eta juca tacapicahuquenehi —nacahepa.

²⁹ Ena nayunacahi eta juca, taicha náimahahi te calle ema Pablo macachanepahi ema Trófimo ticavasahi te Efeso. Náimijachahi mámahi ema Pablo te tajuhe eta Templo.

³⁰ Tacahe, tijúnacaparajíanápápa namutu ena achaneana te tajuhe eta avasare. Ena ticatianacanáhi ema Pablo nacaratapaca éma, nachururuipaicaipa eta nacuchusirahi tayehe eta Templo. Tacahe, ena apamuriana náeratacavanepa eta tapajacura eta Templo. ³¹ Navarahapa nacapacavaneyarehini. Masámairiricavánepaséra ema comandante nayehe ena suntaruana, tatiarirahahi eta revolucíon te tajuhe eta avasare. ³² Tacahe, ema comandante máichuhapa ena masuntarurana énapa ena oficialeana. Tiyananapa tijunapanapaipa. Ena achaneana, te náimahapa eta máitecapauchirahi ema comandante, náinajicapa eta náehairahi ema Pablo. ³³ Tacahe, ema comandante mapauchapa ema Pablo, macavanairipipa nacaratataca, náitiacapa te apipi cadena. Tásiha, mayaserecapa te nájahahipuca, tájahapuca maviurevahi. ³⁴ Énasera ena achaneana tipiaracanarichucha, apapipijipa eta nacayema. Vaipa mácaicutiarahini ema comandante tájahapuca eta nacayemahi taicha eta najajasirahi. Tásiha, macavanairipipa náma te cuartel. ³⁵ Ticajerahisera eta nápanirapaipa te tayehe grada eta cuartel. Nanaracuhapa ema Pablo, taicha ena achaneana navarahachucha nacapacavane. ³⁶ Taicha namutu náehicapahi tipiaracanapaipa:

—Máepenávanetataji —nacahepa.

³⁷ Te tisiapanayarepa te tajuhe te cuartel, ema Pablo máichapa ema comandante:

—¿Písapanupuca néchajica?

Tacahe, ema comandante majicapapa:

—ijéhepuca, píti pítuca péchajica te véchajiriruva griego! ³⁸ Tacahe, ¿váhiyara píatina ema ticavasa te Egipto, ema tíchahi eta revolucíon ticaeteharecahi cape juca viásinequenehi, ema majunaquenehi tiámamurirahi te mávapahi ena cuatro mílqueneana ticapahiana? — máichapa.

³⁹ Tacahe, ema Pablo máichapa:

—Vahi nútina, tata. Nútirichu israelítanu. Eta núchusine te Tarso. Tavanaranu eta ichape avasare capital te Cilicia. Picatajicanusera písapanu néchajicaya nayehe ena achaneana — máichapa.

Téchajicapa ema Pablo te namirahu ena achaneana

⁴⁰ Tacahe, ema comandante máisapapa téchajica. Titupihapa ema Pablo te tayehe grada eta cuartel. Tacahe, macanuquechapa eta mavahu, macamatinaçapa ena achaneana. Te timatinanapa, tépanavapa téchajica eta náechajiriruva ena majaneanana, ánipa macahe:

22

1 —Tátanaveana, nuparapeneana. Esamanuchaha eta néchajisiraheya nucatiuchi-ravaya —macahepa.

² Tacahe, te nasamapa eta máechajisiravacahi te náechajiriruva, tésamirimuríavanapa ticasamarahianapa. Tinahacavapa téchajica ema Pablo, máichavacapa:

³ —Nútirichu ejanéana, israelítanu. Eta núchusine te avasare Tarso tayehe capital eta Cilicia. Ánipasera nujurusinehi te juca viávasa Jerusalén. Ema tímitucanuhi ema viyacara Gamaliel. Nujuruchahi eta nupicauchirahi yátupi eta viyeherepi nájararuhavihi ena viáchuchanaveanaini. Eta nítaresirahi, nímicapicáuchahi ema Viya, tacutihí puiti eta ímicapicáuchirahi éti te juca sácheana. ⁴ Eta nítaresirahi, nucatianacavacainihi ena téhicanahi ema Jesús. Nupresuchavacahi nucasiapavacahi te cárcel ena ajairana énapa ena esenana. Nímicapacavacahi éna. ⁵ Tímatinuanarichuhi namutu ena aquenucarahana émapa ema corregidor. Taicha éna tíjaracanuanahi eta órdené nayeheya ena vijaneanana ticavasanihi te Damasco, náimicatásiranuyare eta nucaratasiraya ena téhicanahi ema Jesús. Tacahe, nuyanapa népanavacayarehini éna, ticaamecharahianayarehi.

Ema Pablo mametacavacapa eta máehisrahiva éma apanava ema Jesús
(Hch 9.1-19; 26.12-18)

⁶ Tacahe, eta nupaisirapahi te achene, nánehiripa eta avasare Damasco. Te jena las dócequeneyárepa sache, tiáramicarepa eta tíjarahí tímícauchanuhi tíasiha te anuma. ⁷ Náquipaçavapa te apaquehe. Nusamapa ema téchajicanuhi, máichanupa: “Saulo, Saulo, ¿tájaha tacayema picatianacanu pipánájrícanu?” ⁸ Tacahe, nuyaserecapa: “¿Nájahavi píti tata?” níchapa. Tásiha, tíjicapanupa: “Nuti Jesús Nazareno, nuti picatianaruhí, eta pipánájrísiravaca ena téhicanuanahi” máichanupa. ⁹ Énerichuvare ena téhicanuanapahi náimahahi eta tíjarahí tímícauchanuhi. Tiáramecanarinehivare éna apanava. Váhisera nácaicutiarahini ema téchajicanuhi. ¹⁰ Tacahe, nujicapapa nútí: “¿Tájahasica níchayare,

Tata?” Tásiha, ema Viya máichanupa: “Pécheputa, piyana pítecapa te avasare Damasco. Ánaqui mararihi ema timetacaviyare tamutu eta pématanerepiyare pítauchaquenéyare nuyehé” máichanupa. ¹¹ Tásiha, púchuquinupa taicha eta tjarahi. Tacahe, ena nucompañeroanapahi tíamanuanapa tichurucanuanapaipa te nuvahu, nacaitecapiranupa te avasare Damasco. ¹² Eta ánaqui, matiaríhihi ema émana vijaneana ticajare Ananías. Títaurahi éma tayehe eta mavanairipiana ema Moisés. Namutuhi ena vijaneana ticavasanahi te Damasco nacunachahi éma. ¹³ Títecapa ema Ananías, tímahapanuahi. Te títecapauchanupa, máichanupa: “Nuparape Saulo, tachava eta pímaíririsira”. Tacahe, títahúchavapa nímaírira. Nímahapa éma. ¹⁴ Tacahe, máichanupa éma: “Ema Viya nacasiñaquenehi ena viáchucanaveánaini, píti manerejiruvíhi taicha mavarahahi tímimatichaviya eta mapanereru. Énerichuvare mavarahapa tímimatichavi ema máuriquene Cristo, émaquenehi téchajicavíhi eta cape. ¹⁵ Péchajisihayare éma eta picametairuirayare nayehe namutu ena achaneana picainunaqueneanaya. Pimetacayare eta juca pímaíríhi étapa eta písamíríhi éma. ¹⁶ Tiuri puiti, evane ena picáicachasiya te májare ema Viáquenu Jesucristo. Picasíñava mayehe eta tacasipairaya eta pipecaturana” máichanupa ema Ananías.

Ema Pablo mametacavacapa eta macavanahirahi nayehe ena apavasanana

¹⁷ Tásiha, te nuchavapa ani te Jerusalén, nítecapa ani te juca Templo. Te nuuyjaracaipa, tíapechanuvarepa téchajicanu ema Viya. ¹⁸ Eta nímaíríhi éma, máichanupa: “Piyayauchavayare eta píuchusiraya te juca Jerusalén, taicha vahí tisuapavianaimahí eta péchajisiháiranupa”. ¹⁹ Tacahe, níti níchapa: “Tiuri, Tata. Énaserá, tímatinuanahi eta néstasiravacahi nupresuchiravacahi ena téhicavianahi. Tamutuhi te náurujisirarevana nutanusihavacapai éma. ²⁰ Énerichuvare, te nacapacapa ema Esteban ema pívanarainíhi, nutiaríhíhivare. Nímícatáhíhivare ena ticapacanahí, nujaneasiravacahi eta namuirihana. Tijuricatipuca nasamararacanu eta numetasiravaca eta péchajisiranuahi” níchapa. ²¹ Énaserá ema Viáquenu tipamicanuichucha: “Píyanayaresera. Níti nuvanecavi pípaicayare nayehe ena apavasanana ticavasanahi te tayeríhíqueneana” máichanupa.

²² Tacahe, ena achaneana, eta nasamíríhi eta juca, vaipa návarahahini nasamararaca. Tísemanapaicha. Típiaracanapa:

—Tíúripána máepénachucha ema maca achánatataji. Vaipa táurícahíni máítarecarícahahíni —nacahepa ena mánarana ema Pablo.

Ema comandante macasiapapa te tajuhe ema Pablo

²³ Muracapanapa eta napiarasira. Tívejamuhiacavanapa eta nacamisana eta nase-maneva. Navehavare eta máteji. Náevajasicapa ema Pablo. ²⁴ Tacahe, ema comandante macavanairipipa nacasiapa ema Pablo te tajuhe eta cuartel. Macavanairipivare náestaca, mavarairahi máimícaecherachaya ema Pablo eta maviurevahí, tájahapuca tacayemahí eta nasemíríhi ena achaneana eta mayehe. ²⁵ Étasera te náíticayarepa eta náestasirayarehi, téchajíuchavanumapa ema Pablo eta mayehe ema nacapítara ena suntuana. Máichapa:

—Níti tavanaranuhi eta víávasa Roma. Pícunevachucha, machu péjécapava eta péstasiranu, vuíchaha táimaticarehíni eta nutapíravapuca —máichapa.

²⁶ Te masamapa ema nacapítara eta juca, tíyanapa mametaca ema comandante. Máichapa:

—Péchapavachucha eta pívarairahi pémostareca ema maena achane. Taicha tavanarají ena Roma —macahepa ema nacapítara.

²⁷ Tacahe, ema comandante tíyanapa mapauchahi ema Pablo. Máichapa:

—¿Yátupísaréji tavanaraví eta Roma? —macahepa.

Ema Pablo májicapapa:

—Yátupi —máichapa.

²⁸ Tásiha, macahepa ema comandante:

—Níti, íchapemurí plata náquijica eta nusiapirayare eta tavanaranuirayare eta Roma. Píti, ¿tájahapuca eta pítujuisírvavahí eta písiapíríhi? —máichapa.

Ema Pablo máichavarepa:

—Níti tavanaranuhi eta Roma taicha étarichuvare náuchusínehi ena ticachichanuana —máichapa.

²⁹ Tacahe, térajícavanapa ena téstacanayarehíni ema Pablo. Émarípa ema comandante, te máechapa eta tavanarairahi eta Roma, típicarínehi eta máítiasirahí.

Ema Pablo námapa te namirahu ena aquenucarahana

³⁰ Te apanapa sache, ema comandante mavarahapa máechayare tájahapuca eta maviurevahí ema Pablo eta nayehe ena majaneanana. Mavejapucapa eta cadenana máítihanahí.

Macurujicapa ema corregidor énapa ena aquenucarahana. Tiyanapa mámahi ema Pablo, macatupihapa te namirahu.

23

¹ Tacahe, ema Pablo máesenimurihapa ena aquenucarahana, máichavacapa:

—Nuparapenaveana. Núti eta nítaresirahi puíticha juca nucahehi, tájina níchiraváinahi eta nusamíravahi te mamirahu ema Viya —macahepa.

² Ema corregidor Ananías, tise mapa eta masamirahi eta máechajiriruvana ema Pablo. Macavanairipipa ena titupihanahi te machacaya ema Pablo. Máichapa:

—¡Ésapajacacha ema mácatátaji!

³ Émasera ema Pablo majicapapa:

—¡Pítira téhaviyare ema Viya, táichavene eta apimirairavi! Te juésvihipuca píti eta péjasirahi eta te jara, tatuparacavi pímatinuma te tatiarihhipuca eta néjecapirava apaesa pémehanu. ¿Tájaha tacayema eta juca pivanairipihi? —máichapa.

⁴ Ema apamuriana achaneana natiarihiqueneanahi náichapa ema Pablo:

—¿Tájaha tacayema piácapaemacha ema corregidor, macapicahuquenehi tiyujaracarahi mayehe ema Viya? —náichapa.

⁵ Ema Pablo majicapapa:

—Tátanaveana, eperdonachanu. Vahi néchahini eta émairahhipuca corregidor, macapicahuquenehi tiyujaracarahi. Tájina nímatiya nucajachareca ena tuparairucana, taicha nusuapa eta máechajiriruva ema Viya. Ani tacahe: “Vahi picucajacha mácani tuparairuca tayehe eta piávasa”.

⁶ Tacahe, ema Pablo máimativacapa ena aquenucarahana, natiarihira ena saducéoana, énapa ena apamuriana fariséoana. Tásiha, tijaranupa eta máechajisirahi:

—Nuparapenaveana. Nútirichuvare fariséonu. Énerichuvare ena ticachichanuana fariséoanahivare. Ecatupiacanuhi te juca emirahu táichavenehi eta nucuchapirahi eta véchepusiraya te táequenenapa eta vépenira —máichavacapa.

⁷ Te nasamapa eta juca, ena fariséoana énapa ena saducéoana típutsimuríavanapa, napanerequenehapa.

⁸ (Taicha ena saducéoana, vahi nasuapa eta náechepusiraya ena náepenaqueneana; váhivare nasuapa eta natiarihira ena ángeleana; váhivare nasuapa eta tatiarihira ena náchaneva ena náepenaqueneana. Énasera ena fariséoana nasuapa tamutu eta juca.) ⁹ Tacahe, téchajicanapa muraca. Tacahe, te nataracu ena fariséoana, natiarihira ena escribanoana. Téchepecana. Nacahepa:

—Ema maca achane, tájina matapiravaina. Éneserapuca táechajicahi eta máchaneva ema Jesús, ángelepuca mácani. Vahi vicucanara ema Viya —nacahepa.

¹⁰ Tacahe, ichape eta semanere. Tíñepipa náicha. Tacahe, ema comandante, eta máimairahi eta nasemavahi, tipicanecha tájahapuca náicharachahini ema Pablo. Tásiha, máimichuhavanepa ena suntaruana navehapa ema Pablo, náimijunijicapa te namirahu ena mánananahi. Náimichavavárepa ema Pablo te cuartel.

¹¹ Tásiha, te jena yátiquenehi máechajicapa ema Viya ema Pablo, máichapa:

—Túmevinachucha, Pablo. Taicha tíuríhi eta péchajisihairahi eta níjare te juca Jerusalén. Púiti piyanayare eta te Roma, éneyareichu tacaheyare eta péchajisiraya —máichapa.

Napanerechapa eta nacapasiraya ema Pablo

¹² Te apanaquenepe sache, natiarihira ena apamuriana napanerechapa eta nacapasiraya ema Pablo. Nacahepa eta náechajiriruvahi:

—Tacamunurine máepnavane ema mácatátaji Pablo. Tásiha púiti, víti vinacaya eta juca vícutiaraya. Vuíchaha vinicaímahi, vuíchahavare véraímahi, machu vásapiha vicaicuña me Viya te vahi vicuitaucha eta juca vipanereruhi. Tiámainucava te víturucapa vicapaca ema maca, vinicapa —nacahepa.

¹³ Náetavichhipuca cuarentana ena ajairana, ena tíjaracavanahi ticaechajiriruvanahi eta juca. ¹⁴ Tacahe, tiyananavarepa nayehe ena tuparairucana. Náichapa:

—Víti víjaracavapa eta vítaequeneháiraya ema mácatátaji Pablo. Vinacaripa eta juca vícutiaraya. Vuíchaha vinicaímahi, vuíchahavare véraímahi, machu vásapiha vicaicuña me Viya te vuíchaha vicuitaucha eta juca vipanereruhi. ¹⁵ Tacahe, púiti eti tuparairucana eyaseacayare ema comandante máma achichu te emirahu, etanuca eta etseraruina macayaserehi ema Pablo eta juca máichavaquenevahi. Tásiha, víti vitsecavayare eta vicapasirayare éma te vímahapa máuchuca —náichapa.

¹⁶ Tiuri, matiaríhi ema suchicha esu maparape ema Pablo. Masamairicapa eta juca. Tiyanapa te cuartel mametapana ema Pablo. ¹⁷ Tacahe, ema Pablo máichuhapa ema nacapítara ena suntaruana, máichapa:

—Piáma ema maca amaperu te mamirahu ema comandante. Jucarihi eta juca mametacaya —máichapa.

¹⁸ Tásiha, ema nacapitara mámapa ema amaperu mayehe ema comandante. Máichapa:

—Ema máena macaerataquene Pablo tiyaseacanuhi náma eta piyehe ema maca amaperu. Jucarihihi eta timetacaviya —máichapa.

¹⁹ Tacahe, ema comandante macaratavauchapa ema amaperu, mámapa máiputsiacapa. Tásiha, mayaserecapa, máichapa:

—¿Tájahasica eta pimetcanuya?

²⁰ Ema amaperu máichapa:

—Nararihi ena nujaneanana navarahahi nacapaca ema nécuca. Achichu tiyaseacavianayare piama éma te namirahu ena tuparairucana te cabildo. Nacaetseraruya ticayaserehiyare eta juca máichavaquenévahi. ²¹ Váhisera picusupavaca taicha cuarentana ena ajairana ticuchapanahi te picuchucapa éma, nacapacayarepa. Taicha najurachahi eta nacapasiraya ema Pablo, tásiha napaenumavainapa te náitachapa eta napaneruhi, tinipananainapa. Puiti éna, pítimecha nacuchapahi te pisupayarepuca éna —máichapa ema amaperu.

²² Tacahe, ema comandante macahepa:

—Tiuri, piyana te pipena. Nacujasera picumetaca eta juca pimetarunuhi —macahepa.

Ema comandante máevatacapa ema Pablo mayehe ema Prefecto Félix

²³ Tiuri, ema comandante máichuhapa ena apinana nacapitarana ena suntaruana. Máichapa:

—Etsecayare ena docientoana suntaruana tiámanaya eta espada, docientoanavare ena tiámanaya eta lanza, setentana ena ticaperanayarepahi. Enápanayare ema Pablo te Cesarea. Iúchuca puiti te las nueve yati. ²⁴ Énerichuva etsecayare étanaina cavayu maperainapahi ema Pablo. Táurisera eta iámirainapahi. Íjaracaya ema Prefecto Félix —máichavacapa.

²⁵ Tacahe, máimiamarecavarepa eta carta. Eta juca táechajiriruvapahi eta carta:

²⁶ “Nutí Claudio Lisias nímiamareca eta juca carta piyehe piti piúriquene excelentísimo aquenuca. Néchajicavinuma tativa.

²⁷ Jucarihi eta juca téchacarehi. Ena israelítana nacaratacahi ema émana achane ticaijare Pablo. Navarahahi nacapacaya. Étasera te néchapa núti tavanarairahi éma eta Roma, nuyanapa námahi ena nusuntarurana nucatiuchapanapa. ²⁸ Eta nuvarairahi necha eta maviureva, námapa te namirahu ena tuparairucana israelítana te juca. ²⁹ Nímahapa tájina matapiravainahini táimicapacahini táemeratachahipucáini te cárcel. Étachuchanénipuca tímicitichahi eta nayeherepiana. ³⁰ Tásiha, nusamairiricavarepa eta nacamesairayarehi nacapaca. Tacahe, nímiamarecapa puiti eta piyehe. Énerichuvare nuvanecahi ena timetauchanahi náiteca ara piyehe, étaina macayaserehiya. Tamutupa eta juca néchajiriruvanahi piyehe”.

³¹ Tacahe, ena suntaruana náitachahi eta vanairipi. Námapa ema Pablo te jena yati. Títécapanapa te avasarechicha ticaijare Antípatris. ³² Étapa nachavinehi te apanapa sache ena suntaruana ena tipaicanapahi. Énasera ena ticaperana tímiyanavánapa eta nanapaniraya ema Pablo. ³³ Tacahe, te títécapanapa te Cesarea, nájaracapa ema prefecto eta carta, émapa ema Pablo. ³⁴ Te tamutupa eta máechajicuirahi eta carta, ema prefecto mayaserecapa ema Pablo:

—¿Táviha eta piúchusine píti? —macahepa.

—Núti núchusine te Cilicia —máichapa ema Pablo.

³⁵ Tacahe, ema prefecto máichapa:

—Tiuri, véchayare te náitecapa ena piánarana —máichapa.

Tásiha, macavanairipipa macajaneha te palacio máepiyaruinihi ema ichavicaini Aluresi.

24

Téchajuchavapa ema Pablo te mamirahu ema Félix

¹ Te táequenepa eta cincoquene sache, títécapanapa te Cesarea ena tuparairucana tiásihanahi te Jerusalén. Matiarhihi ema Ananías corregidorhi, énapa ena apamuriana náiyacaranahi. Matiarhipahiva ema abogado ticaijare Tértulo. Tiyananapa mayehe ema prefecto, timetaurecanapa. ² Tacahe, náepanapa ema Pablo. Te títécapanapa, tépanavapa téchajicapa ema Tértulo, ánipa macahe:

—Vihasalupayachavi, tátachicha Prefecto, eta viúrivahi pícha. Tájina víchiravainahini eta pitusirahi, pijaneacahavi eta juca aquenucairavihi eta viyehe. ³ Vimutu viti achaneana te avasareana, tamutuvare sácheana vicunachavihi. Vihasalupayachavihi, tátachicha Félix, eta piúrivahi eta viyehe. ⁴ Picatajicahavi, tata, pisamahavi. Vahi picuyacujihavi

eta juca viyasearuvianaya. ⁵ Puiti vímatipa ema maca achanetataji, tihapapirahi éma. Tamutu avasareana te jácani viávihapahi víti israelítana, mayurucavaca ena víjaneanana. Émarichuva tachutirihahi nayehe ena téhicana ema Jesús Nazareno. ⁶ Énerichuvare mavarahapa máechipejicayare eta tacapicahuquene Templo. Eta tacahehi vicaratacapa. Vícuñacayarehi taicha tacahehi eta tavanesarahavihi eta viyehe ley. ⁷ Émasera ema comandante macatiuchapa tiverejimirauchahavipa taicha camuriana ena masuntarurana. ⁸ Tásiha, máichahavipa: “Te evarahapuca emetaucha ema maca, eyana te mamirahu ema viáquenuruha Prefecto” máichahavipa. Tiuri, puiti vitupiruvahi víti eta vimetasiravi. Te pivaraha, picayasesereru éma eta yátupirahi eta máichavaquenevahi ema maca eta vimetauchirahi puiti —macahepa ema Tértulo.

⁹ Tacahe, ena apamuriana natirihiqueneanahi, énerichuvare nacahehi:

—Yátupi eta juca máechajiriruvanahi —nacahepa namutu.

¹⁰ Tacahe, ema prefecto máimicutiarachapa máechajiuchava ema Pablo. Tépanavapa téchajica ema Pablo, ániapa macahe:

—Tájina táichava néchajiuchavaya te pimirahu taicha néchahi núti ánaquiáparipa eta juéservahi tayehe eta viávasa. ¹¹ Tiúripa picayasesereru. Núti, dóceravahi sache eta nítecapirahi te jena viávasa Jerusalén eta néjirairayarehi ema Viya. ¹² Nájina núcájachaque néna. Nájnavare nímiyusemaruina te tajuhe eta Templo, étaripa te náurujisirareva ena nujaneanana. Téhepucaini cáleana nuchacharecaini. ¹³ Ena nani ticatianacuanana, tájina naviya náetseruinahini eta nametauchiranuhi. Vaipa tisuapacareana. ¹⁴ Ena nani náimijachahi vahi nétupicava eta nímituresirahi. Nútisera nusuapa tacutihi eta nasuapirahi namutu ena viáchucanaveanaini. Émarichuhi nucasíñahi ema Viya, ema nacasíñaquenehivare ena viáchucanaveanaini. Núti nusuapahi tamutu eta táechajiriruva eta Sagrada Escritura. ¹⁵ Núti nucasíñavahi mayehe ema Viya, nuchapavahi eta véchepusiraya te vécarí vimutu víti matapiravareanahi, énapa ena ticatapiravana. Puiti, énaripa ena tímetchanuanahi ticutinuanahi eta nasuapirahi eta macaechepusiraya ema Viya ena náepenaqueneana. ¹⁶ Núti, eta nusuapirahi tamutu eta juca, vahi návarahahini néjcapavahini te mamirahu ema Viya. Váhivare návarahahini néjcapava te namirahu ena achaneana.

¹⁷ Tiuri, camuripa áñoana nupaisirahi. Tacahe, nuchavapa te návasa Jerusalén. Náminapahivare eta nanicavachaya ena nujaneanana páureana. Énerichuvare nuchamavahupahiva me Viya. ¹⁸ Te tamutupa eta tacasipairahi eta náchaneva éropa eta nuvahuana, nuyanapa te Templo eta nunapanayarehi eta námavahuana me Viya. Eta návihairahi te Templo, tichimapanuanapa ena nujaneanana tiásihanahi te departamento Asia. Nájinasera achaneanahini nachimaphini te nuchacaya. Váhivare náimahanuini nímiyusemacavacahini ena achaneana. ¹⁹ Ena nani nujaneanana tiásihanahi te Asia, énarata titecanayarehini tímataurecana, te tatiarihinahipucaini eta nuviureva. ²⁰ Piyasereca ena nani natirihiqueneanahi puiti, te náimicaecherachapuca eta nuviurevahi te ticatupiacanuanapa te namirahu ena tuparairucana. ²¹ Téheserapuca eta tímícvíuchanuhi eta numetasiravacahi éna: “Puiti juca sache ecaturipihanuhi te juca emirahu táichavenehi eta nusuapirahi eta véchepusiraya te táequenénapa eta vépenira” níchavacapa núti —máichapa ema Pablo.

²² Émasera ema Prefecto Félix máecharipahi tamutu eta náehisirahi ena achaneana ema Jesús, éropa eta táurivahi eta nayeherepiana. Tásiha, te tamutupa eta náechajirisiravahi, máichavacapa:

—Tiuri, tácaheine achichupaine vécha eta juca, te máitecapa ema comandante Lisias. Nuyaserecaya éma eta juca íchavaquenevahi éti —máichavacapa.

²³ Tacahe, ema prefecto Félix mavanecapa ema mayehe capitán máimichava te palacio ema Pablo. Macavanairipivare vahi nacuerataca, táuri eta manarasiraina. Táuri eta náechapajirisiraina ena vichamuriana, téjiranayarepahi.

²⁴ Te jena sácheana, tiyanapa ema Félix te apana avasare. Te tichavapa, mámapa esu mayena ticaijuru Drusila. Ésurichuhivare israelíta. Náimichuhapa ema Pablo, téchajiricavanayare. Tacahe, ema Pablo mamentacavacapa eta táicharacavahi eta máehisirahi ema Jesucristo. ²⁵ Eta máechajirisiravahi ema Pablo, máichavacapa:

—Te ecasíñava me Jesucristo, éhícvare eta máimiturapiána, tiperdonachaheyare ema Viya. Matapiravarehena te mamirahu. Énerichuvare, tíurinapa eta ítaresiraya, eratahainapa ecaratacavayare. Puiti, táuricapa ecasíñavavane, taicha járajapa eta sáchevare nacayaserehirayare nácani ticatapiravanahi. Ticaicuñanainapa te yucu —máichavacapa ema Pablo.

Te masamapa eta juca ema Félix, tipicarinehi. Máichapa:

—Tiuri, taratapa puiti eta juca. Nuvarahasera nápechavaya nusamararacavi. Te apahe-navare nímicuhaviyare —máichapa.

²⁶ Ema Félix ticuchapavahi te májaracayarepuca eta plata ema Pablo eta máuchucuiraya. Eta tacahehi máimichuhaparacahi téchajiricavanayarehi. ²⁷ Váhisera máuchucuhahini ema Pablo, taicha ema Félix mavarahahi tíuriyarehi nayehe ena israelítana. Apina año eta tayerevahi. Ticaitsivanecha ema Félix. Tisiapapa ema Porcio Festo, émapavapa prefectohi.

25

Nacatupiacapa ema Pablo te mamirahu ema Festo

¹ Te émapavapa aguenucahi ema Festo, te mapanaquenepa sache, tiyanapa te Jerusalén. ² Tacahe, ema corregidor énapa ena apamuriana tuparairucanahi, ticurujicacanapa mayehe ema aguenuca Festo. Nametauchapa ema Pablo. ³ Nayaseacapa ema Festo macátajicavacahini eta máevataca te Jerusalén ema Pablo. Taicha navarahahi titsecavanayarehi te achene eta nacapasiraya. ⁴ Émasera ema Festo majicapapa:

—Tiuri, ema Pablo ticaeratahi te Cesarea. Núti achichupaichu nuyanayare nuchavaya tayehe. ⁵ Eta tacahe, te tatiarihipuca eta échaqueneanahi eti tuparairucana, tíuripana éhicanu te Cesarea apaesa vecha te ticaviurevahipuca ema maena achane —máichavacapa.

⁶ Te tíanehipa eta diésquene sache eta mávihairahi ema Festo te Jerusalén, tichavapa te Cesarea. Te apanapa sache téjacapa tayehe eta mávacure. Máimichuhapa ema Pablo. ⁷ Te títecapanapa ema Pablo, tisiapapa te mamirahu ema Festo. Témeñahavanapa ena mánarana tíásihanahi te Jerusalén. Timetaurecanapa ema Pablo. Camuri eta májecapiravahiji. Ichape eta maviurevahiji nayehe. ⁸ Tájinasera naviyahini eta náetserarúinahíni. ⁸ Émasera ema Pablo máichavacapa eta macatiuchiravahi:

—Núti tájina nutapiravaina tayehe eta nayeherepiana ena nujaneanana, étainapucáini eta Templo, émainahivarepucáini nucaecahi ema ichapequene aguenuca Emperador — máichavacapa.

⁹ Émasera ema Festo, énerichuhivare mavarahahi tíuriyare nayehe ena israelítana. Tacahe, mayaserecapa ema Pablo:

—¿Pivarahapuca piyana te Jerusalén, étaina tacaechacasiya te numirahu eta juca píchavaquenévahi?

¹⁰ Tacahe, ema Pablo majicapapa:

—Étaripa návihahi puiti te pimirahu píti viyehe juez manacaquenevivi ema Emperador. Pítipa tituparacavi picuchucuhanuyarehi taicha pécharichuhi píti tájina nuviurevaihini nayehe ena nujaneanana. ¹¹ Téheserapuca nucaviurevahini, táimicapacanuríne eta nuviureva. Vahi nucatiuchavaimahi. Tájinasera nuviurevaina eta nametauchiranuhi ena nani. Váhivare tituparacavi píjararecanuhini eta nayehe ena nani. Téheserapuca te vahi picucaiticanu, nuyasesereca puiti nuyana te mamirahu ema Emperador. Étaina nucematauchacasiya mayehe —máichapa ema Pablo.

¹² Tacahe, ema Festo macayaserecerupa nayehe ena mayeheana abogado. Tásiha, máichapa:

—Píti Pablo, piyaseserecahi piyana te mamirahu ema Emperador. Nísapavi piyana — máichapa.

Títecapapa ema rey Agripa, ésupa esu Berenice

¹³ Te jena sácheana, títecapanapa te Cesarea ema rey Agripa, ésupa esu Berenice. Náechajipanyarehi ema Festo. ¹⁴ Eta nanasiqúenerahí te jena sácheana, ema Festo mametacapa ema rey eta máichavaquenévahi ema Pablo. Máichapa:

—Mararíhi aní ema achane ticaeratahi ticaijare Pablo. Manaquiruhi ema Félix. ¹⁵ Te nuyanapa te Jerusalén, ena tuparairucana tímecacananapa eta máichavaquenévahi, tíyaseacuanapata eta nímicapasiraina. ¹⁶ Tásiha, núti nujicapavacapa: “Víti aguenucarahana tayehe eta Roma, vahi tituparacahavi vímicapacahini mácani ticematauchacasihi te vuichaha ticamirahucacacahani ema mánarahi” níchavacapa. ¹⁷ Tacahe, te títecapanapa aní, vahi náyererejihini núti. Te apanaquenepa sache néjacavanepa te návacure, nímicuhapapa ema Pablo. ¹⁸ Núti nímicajapapa ichape eta maviureva. Étasera eta nametauchirahi, tájina vahi táíñepihini. ¹⁹ Étachuchanénihipuca tímicaviuchahi eta nayeheana religión. Émapa ema náehiruhi ticaijarehipuca Jesús, ema mácani tépenahi. Púitiserá ema Pablo máechajisihahi eta mápechiravahi títareca. ²⁰ Núti vahi nímatiequeneha eta táicharacavaya eta juca. Tacahe, níchapa ema Pablo: “¿Pivarahapuca piyana te Jerusalén, étaina tacaechacasiya eta juca píchavaquenévahi?” ²¹ Émasera tíyaseuchavapa eta mayaniraya te mamirahu ema Emperador Augusto. Tacahe, nímicanerecapa macajaneha tímainucava te nítujicava nímicanerecapa nanapana mayehe ema Emperador —máichapa ema Festo.

²² Tacahe, ema Agripa máichapa ema Festo:

—Núti apana nuvarahasa nusamaini ema mácara achane —máichapa.

Tacahe, ema Festo máichapa:

—Tiuri, achichu pisamaya éma.

²³ Tacahe, te apanapa sache tisiapanapa ema Agripa ésupa esu Berenice tayehe eta náejasirare ena aquenucana. Tiúrina eta náitecapira. Jánunuhacavaca eta namuirihana. Énapa ena aquenucana tachutirihana nayehe ena militáreana énapa ena tuparairucana tayehe eta avasare. Tacahe, ema Festo máimichuhapa ema Pablo. ²⁴ Tacahe, téchajicapa ema Festo, ánipa macahe:

—Tata Rey Agripa. Tátanaveana. Emutu eti etiarihiqueneanahi te juca viúrujisirávahi. Mácahi ema maca achane nametaurehi ena majaneanana eta nuyehé, ánaqui te Jerusalén, étapa ani te juca Cesarea. Nararihi camuriana navaraha náimicapaca ema maca. ²⁵ Nútisera tájina nímaha matapiravaina táimicapachahini. Émasera tiyaseuchavapa tiyanayare te mamirahu ema Emperador Augusto. Nísapahisera mayana eta mayehe. ²⁶ Vuíchahasera nucajurerhini ema náquenu Emperador, taicha tájina nuviyahini eta matapiravainahini. Puítisera nucatupihá éma te pimirahu piti rey Agripa, étipa eti tátanaveana. Nuvaraha ímicatacanu eta táicharacavaya eta juca, apaesa nucajurepahi ema Emperador. ²⁷ Taicha vahi tiuri vévataca ema présuhi te tájina matapiravaina —macahepa ema Festo.

26

Éma Pablo téchajuchavapa te mamirahu ema rey Agripa. Mametacavacapa eta máitaresirahi te vuíchaha máehicahini ema Jesús.

¹ Tacahe, ema Agripa máichapa ema Pablo:

—Tiuri, nímaha péchajica —máichapa.

Tacahe, ema Pablo macanuquechapa eta mavahu. Tépanavapa téchajica, ánipa macahe:

² —Tiúrisamurécare eta nítujisiravahi néchajica te pimirahu, piti rey Agripa, eta nucatichiravaya nútí apanava eta juca nametauchiranuhi ena nujaneanana israelítana. ³ Núrísamure ichape taicha píti pímatihí tamutu eta juca viyeherepiana viti israelítana, étapa eta véchajirirahí. Eta tacahe, nuyaseacavi puiti pisamanu eta nucayemaya. Pácayehe paciencia nuyehé.

⁴⁻⁵ Eta námaperuvahi nútí, fariséonuhi te návasa núchusinehi étapa te Jerusalén nujurusinehi. Néhicahi eta viyeherepiana viti israelítana eta nítaresirahí. Nucachanevacahi ena fariséoana ena tipícauchacareánapána. Namutu ena nuchajuruanahi tímatinuanahi eta nítaresirahí. Éna títametacavianaya eta nítaresirahí. ⁶⁻⁷ Puiti ticatupiacanuanahi te pimirahu, piti rey, táichavene eta vicuchapiravahi eta macaechepusirahaviya ema Viya te vépena, taicha tacahehi eta máechajiriruvahi nayehe ena viáchucanaveánaini. Vimutu viti tachichanaveanahi eta viávapaiu Israel, vimutu vicuchapavahi eta juca táitachiravaya eta májjararuhaviya ema Viya. Eta tacahehi, tamutuhí sácheana, yátiana vítatihí ema Viya, viyujaracahí mayehe. Táichavenehi eta nucuchapiravahi nútí, tímatauchanuanahi ena nujaneanana. ⁸ Tiuri puiti éti, németeaca tisuapacarehi eyehe eta macaechepusiraya ema Viya ena náepenaqueneana.

Éma Pablo mametacavacapa eta mapánajiriravaca ena téhicanahi ema Jesús (Hch 8.1-3; 9.1-2)

⁹ Nútiripa acane nímijachahi nétupicava eta me Viya (eta níchaqueneánahi nucatianasiravacahi ena téhicanahi ema Jesús Nazareno. ¹⁰ Eta juca níchirahi te Jerusalén. Tímicatacanuanahi ena tuparairucana eta nucaratasiravacahi ena matapiravareanahi téhicanahi ema Jesús; nímisiapiravacahi te cárcel. Eta nímairahi eta nacapasirayarepahi, néhicahi eta napaneruru éna. ¹¹ Ichapemurianahi ena nucarataruana. Némecharecavacapahi ena nétupiaruanapahi te náurujisirarevana. Níminajicavácápáipa eta náehisirahi ema Jesús. Nécatihavare eta náepuruiraya. Muraca eta nuvainarajichiravahi nayehe. Tamutuhí nutanusihavaca te apanaqueneana avasareana tayerehiqueneana.

Éma Pablo mametacavarepa eta máehisiraipa éma apanava ema Jesús (Hch 9.1-19; 22.6-16)

¹² Étarichuvare tímijanuanuhi te avasare Damasco. Tivanecanuanapa comisiónnuhi ena tuparairucana; tíjaracuanuanahi eta órdené. ¹³ Tacahe, tata rey, te nánehipa te avasare, te jena sache las dócequenepa, tíjahúchavapa tímícauchanu eta majaraiva ema Viya, tíasiha te anuma. Tijarahipana tayehe eta sache. Tímícauchanupa, énapa ena téhicanuanapahi. ¹⁴ Tacahe, viáquipáicavapa vimutu eta vipisirahí. Nusamapa ema Viya, téchajicanuhi te véchajiriruva viti israelítana. Máichanupa: “Saulo, Saulo, ¿tájaha tacayema picatianacanhí? Pésamiricavachucha, taicha pítijiváichucha píchavahi. Vahi píúrimahi te pímiyanava pipanajiricavaca ena téhicanuanahi” —máichanupa. ¹⁵ Tacahe, níchapa: “¿Nájahavi, píti Tata?” Tijicapánupa éma: “Núti Jesús. Núti picatianaruhí, eta pipanajiriravaca ena

téhicanuanahi. ¹⁶ Pécheputa, pitupihia. Núti nímerecavahi eta piyehe, taicha nunerejiruvihí nuvanaraviya. Púiti numetacaviya eta juca pématanerepiyare eta nuyehe. Péchajisi-hayare eta níjare nayehe ena achaneana eta juca pímainanuhi púiti, étapa eta apamuriana nimerereruanayare. ¹⁷ Núti nucatiuchaviya te tájahapuca náicharacavi ena víjaneanana israelítana énapa ena apavasana. Púiti nuvanecavihí péchajisihanuya eta nayehe ena apavasana. ¹⁸ Pímitucavacayare eta mavanairipiana eta Vicaiyaquene. Nacaijuhe éma, apaesa náitujicava náimaha eta majaraiva. Náinajicapa eta náichaqueneasana te timapicu. Vaipa nacuehica ema Satanás. Ena tisuapanuanaya téhicanuanaya, nuperdonachavacaya eta napeaturana. Nasiapamurihaya ena náinapureanahi nunerejiruana” máichanupa ema Jesús.

Éma Pablo mametacavacapa eta masuapirahi eta matuparacasivanahi me Jesús

¹⁹ Tacahe, tata rey Agripa, nusuapahi núti ema Jesús eta mavanésiranuhi. ²⁰ Nucemeta-rairupa tatívahi nayehe ena ticavasanahi te Damasco. Te nuchavapa, étapa te Jerusalén, étapa te avasarechichana te Judea. Tásiha, núchucapa tayehe eta avasareana tayerehi-queneana nayehe ena apavasana. Numetacavacapahi eta nácaijuhéraina ema Viya, náeneuchiravaina náitsivachiraina eta náitairesiraina, táuripa eta náitairesiraina. ²¹ Étara eta juca tivichuanuhi nayehe ena nujaneanana eta nacaratasiranuhi te Templo, navairahi ticapacanua. ²² Émasera ema Viya tímicitacanuhi. Puítirichucha tímicitacanuhi éma. Eta tacahe, nutiarichichucha púiti. Tásiha, vahi núchávacuéjehavahíni nucemetarairuya-rechucha nayehe namutu ena achaneana, ena páureana énapa ena rícoana. Tájinasera vahi nuhapapicahíni eta táechajiriruvanahi eta Sagrada Escritura eta táitauchiravayarehi eta macatajívairayarehi máepenirayarehi ema Cristo. ²³ Tásiha, émayarehi títapuca técheputa te máecari. Éta, tácutiarahi eta véchepusiraya víti apana te vécari vimutu víti achaneana, víti israelítana énapa ena apavasana. Tásiha, tivanecahavipa vimetacaya ena achaneana, apaesa nácasíñava mayehe éma.

Éma Pablo mavarahapa macajimuyasamurechayare ema Agripa eta máehisiraya ema Jesús

²⁴ Tímiyanavarichaha téchajica ema Pablo eta máechajichiravahi, témechajicavapa muraca ema Festo, macahepa:

—Máurishivipa piti Pablo, táichavene eta pivayuchiravapa picaravahu. Étapa timaurishichavihi.

²⁵ Émasera ema Pablo majicapapa, macahepa:

—Váhiya máurishinuina, tata aquenuca Festo. Nutupiruvahi eta juca nucayemaqueneanahi. Jéhevare eta yátupiqueneanahi. ²⁶ Émaripa ema maca rey Agripa máimatívare tamutu eta juca. Eta tacahehi vahi nupicacaracavahíni eta néchajisiráhi te mamirahu taicha nucasíñavahi núti eta máimatiráhi éma. Namutuhivare ena achaneana náechahi, taicha tájina vahi tayumurucavahíni. ²⁷ Pítiripa piti rey Agripa ¿pisuapahi jácani eta nacayemaqueneanahi ena profetanáini? Núti németeacahi pisuapahi pítí.

²⁸ Éma rey Agripa majicapapa:

—Picájimuyacayaréni eta nusamure. Núti apanavare néhicayare jácani ema Jesús.

²⁹ Tacahe, ema Pablo máichavarepa:

—Tiúripána pisuapavane puítinarichu, yátupina te pisamure. Nuyaseacaya ema Viya eta pisuapiraina. Énerichuvare nuyaseacayare eta esuapiraina emutu eti apamuriana eti esamaracananahi. Éhicavanéni ema Jesús, tácutihíni eta néhisiráhi núti. Váhisera nacuératáhéni, vahi ecucutínuhíni núti eta nucaeratairáhi táichavenehi eta néhisiráhi ema Jesús —máichapa.

³⁰ Te nasamapa eta juca máechajiriruvahi ema Pablo, téchepucapa ema rey, ema prefecto, esu Berenice, énapa namutu ena natiaríhiqueneanahi náejaruanahi. ³¹ Tásiha, tiyananapa típutsiacavanapa, náechajisihayarehi eta juca. Náichacapa:

—Éma maca achane, tájina maviurevaina táimicapacahíni. Váhivare táuricahíni macaeratahíni te cárcel.

³² Éma Agripa mametacapa ema Festo:

—Tiúrihíni picáitica ema maca achane te vahi macúyaseserécáhini eta mayaniraya te mamirahu ema Emperador —máichapa.

27

Ticaevatapa ema Pablo te Roma

¹ Tiuri, matiaríhíni ema capitán ticaijare Julio, nacapitarahi ena masuntarurana ema aquenucaíni Augusto. Tacahe, te tiúripa eta napanereru eta náevatasirahaviya te Roma,

nataparacapa ema Julio mámaya ema Pablo éna ena apamuriana présoana. ² Viávacuhapa te ichape pacure tiásihahi tayehe eta puerto Adramitio. Tiyanyarehi te apanavare puértoana te Asia. Téhicahavipahi ema Aristarco ticavasahi te Tesalónica tayehehi capital eta departamento Macedonia. ³ Te apanapa sache, vítecapapa te puerto Sidón. Tacahe, ema Julio majapanupahi ema Pablo, máisapahi tiyana máejirapanavaca ena vichamuriana. Náechapajiricahi ema Pablo. ⁴ Te viásihavarepa te Sidón, vétavicapa eta tiúrupuhi Chipre tinapaicapahi te sapa, váipasare viácapapahini eta técticava. ⁵ Tacahe, vijuchecherecapaipa eta mar te tachacayapahi eta Cilicia, étapa eta Pamfilia, vítecapirapa te avasare Mira tayehe eta Licia.

⁶ Eta tayehe, viávacuhavarepa tayehe eta apanapa pacure máechajiaruhi ema capitán Julio. Eta juca pacure tiásihahi te avasare Alejandria. Puiti tacaijuheyarepa te Italia. ⁷ Te jena sácheana vahi vijuricatipahicháini eta vipaisira. Muracarichucha eta técticava eta vítecapirapahi. Muraca eta nacaemataneasirapahi, vítecapirapa te tánara eta puerto Gnido. Tacahe, vétavicavarepa eta puerto Salmón te tasumuqui eta apanavare tiúrupuhi ticajjare Creta. Viávicuchapáipa eta tiúrupuhi, étapa tiávichahávipahi tayehe eta técticava. ⁸ Ticajerapahi eta vipaisirapahi. Vijúchecherecapáichucha, vítecapiravarepa tayehe eta apanavare puerto Buen Puertohiji eta ticajjare te tachacaya eta avasarechicha Lasea.

⁹ Ticachuricahavipa eta tiempo taicha eta viyérerejivapahi. Tíñehiripa eta tapaisirava te mar, taicha tinacuchavaipa eta muracana técticava. Eta tacahehi ema Pablo maconsejachavacapa, macahepa:

¹⁰ —Tiuri, tátanaveana. Váipara tiuri vímiyanavahini vipaica, taicha tíñehicarepa vécharicava. Machu vicamitiaca eta pacure, eta carga, vítipa machu vérica —macahepa.

¹¹ Émasera ema capitán Julio, ema comandante tayehe eta pacure, émapa ema piloto vahi návarahahini nánasihini. Vahi nasuapahini ema Pablo. ¹² Taicha vahi táurihini eta puerto, tájina távichahini tayehe eta muracana técticava. Napanerechaichucha tiyananayare. Ánipa nacahehi:

—Vahi tiuri eta vánasi te juca. Viyanchucha tayehe eta apanavare puerto Fenice tayehe eta juca Creta. Tiúripa eta jena, távichahi tayehe eta muracana técticava. Étaina vicuchapiha eta te táetupiricavapa eta sácheana —nacahepa.

Muraca técticava te mar

¹³ Tacahe, tépanavapa eta técatitjavahi te vana. Tiápajuecavanapa éna. Náimijachapa tímiyanavanyarehi tiuri eta náehisirayarepahi eta técticava*. Vahi náemetecahini táequcavahini te cajaha. Viánehipaipa vicachacaya eta tiúrupuhi Creta. ¹⁴ Te ticaicutiavapapa, tñahúchavapa téqucava, muracapa técticava tiásiha te cajaha. ¹⁵ Tavehapa eta vipacure. Tiámahavipa. Viyerehipa eta tachausi. Navarahainipa náimichava eta pacure te tachausipahi, váhisera náratahahini. Tásiha, náisapapa tiámahavi eta técticava. ¹⁶⁻¹⁷ Témetavichavapa te apachacaya eta tiúrupuhichicha ticajjare Clauda, étapa tiávichahavihi. Váiparichu muracainahini eta técticava. Étapa víturusine vijataca eta étasi pacure vichururepahi. Vinacuhapa te tajuhe eta ichapepana pacure. Ichapesera eta vicaemataneasirapahi. Tacahe, náinunucapa eta pacure te enureana apaesa vahi tacuvejajuecha eta táepacuruha. Nacamiricapa eta ichapepana tavanterema tévatajicapahi eta pacure taicha napicahi támahini eta técticava, táejahapaicahini eta pacure tayehe eta playa ticajjare Náecharisireva. Tacahe, táevatajicapaipa eta vipacure, vétaviequenehairapa eta playa. ¹⁸ Tíñehichucha eta táepacuruhana. Eta napisirahi éna, náepuhecavacapa te une eta támaquenepahi. ¹⁹ Te mapanacuenepa sache, vivehavarepa eta apamuri támaqueneanapahi tayereruranapaichuhi eta pacure, véchipaicavarepa. ²⁰ Jéhesare, ichapemurihi eta sácheana vahi tacaecherahini eta sache, étapa eta jarairiquiana. Eta vímairahi vahi tarasahini eta muraca tépacuca, vaipa vémeteacavahini viúchucuhahini.

²¹ Ichapemurihi eta sácheana tájina vinicahini. Tacahe, ema Pablo titupiha te vimirahu, máichahavipa:

—Tátanaveana, tiúripanáichuhipucáini esuapanuhini te vuíchaha viúchuchahini tayehe eta Creta. Puiti vahi vicucatajivahini. ²² Puitisera, vahi ecupica, taicha nájina tépenaimahi. Técharicavayaresera eta pacure, témitiacaya. ²³ Néchahi núti eta juca, taicha yati téchajicuanuhi ema ángele mavaneruhi ema Viya, ema náquenuhi nacaematanearuhi. ²⁴ Ani macahehi eta mametasiranuhi ema ángele: “Vahi picupica, Pablo. Vahi pépenaimahi. Énaripa ena nani picachanequeneanapahi, váhivare tépenanáimahi táichavenehi eta pitirihirapahi eta nayehe. Picamesavayare pítecapaucha ema Emperador pitupihamiraureya” máichanupa

* **27:13** Acane eta ichapequeneana pacure, amairihaichaha te náurape eta napisihahi te une. Camurianahi ena achaneana tinacuanapahi. Nacatupihavare eta ichapemequeneana sábanana tímicitacayarepahi tévatajica eta técticava.

ema ángele. ²⁵ Eta tacahe, tátanaveana, túmehénachucha, taicha núti nucasíñavahi mayehe ema Viya. Nusuapahi eta mametarapiana ema ángele eta nuyehe. ²⁶ Tiámahaviyaresera eta técatícava tayehe eta tíurupuhi —máichavacapa ema Pablo.

²⁷ Apinaquenepa semana eta támirahavipahi eta muraca técatícava te íchapequenehi mar. Te jena enumuhuquenepa yati, ena marinéroana náimijachaipa tiánehianaripa eta tíájpahi taicha nasamáhi eta cachuela te tachausi. ²⁸ Náicútiēcava eta táupenava eta une. Náimahapa treinta y seis metro eta táupenavahi. Te tiyererehavare, náicútiēcavarepa, veinte y siete metro eta táupenava. Náemeteacapa tiánehianaripa eta tachausi. ²⁹ Tacahe, nacajuchucupaca eta cuatro ánciana te tahivu eta pacure, taicha napicahi táemestaquihahini eta vipacure tayehe eta máriana. Navarahaipaicha tájjahúchavahini tjarahi. ³⁰ Eta napisiraipaicha, ena marinéroana navarahapa tjunanayarehini, tíjunijicahavianayarepa. Nacucupaicapa eta étasi pacure vicavacurehi. Nacaetserarupa nacajuchucucayare eta apana ancla te tasumu eta pacure. ³¹ Ema Pablo máimatiacavacapa eta navarairahi tjunana. Tacahe, mametacapa ema capitán Julio énapa ena masuntarurana. Máichavacapa:

—Te vahi nacunasi te juca pacure ena nani, éricayare éti, vahi íuchucuhaimahi —máichavacapa.

³² Tacahe, ena suntaruana náechupicavacapa eta enureana táitihapahi eta étasi pacure. Náinajicapa te une.

³³⁻³⁴ Te tjararahipa, ema Pablo tivanecahavipa vimutu vinicanuma. Máichahavipa: —Enicanumapa apaesaina, taicha apinapa semana eta juca iávamina, emaimasirahivare. Tatuparaca enicanuma apaesa táetumechahe eta iávaresirayare. Nájinasera témíticaimahi te vítaracu —máichavacapa.

³⁵ Tacahe, te tamutupa eta mavanésiravacahi, ema Pablo mavehapa eta pan; mabendiciónchapa te vimirahu. Mavejecapa, tinicapa. ³⁶ Vétumechavapa vimutu, vinicapa víti apanava. ³⁷ Camurihavihi víti támaqueneanapahi eta pacure. 276 eta visimutuvapahi. ³⁸ Te vítanésipa eta vinisiraíhi, navehapa ena marinéroana eta apamuri trigo, náquijicapa te une, navarairahi téchacayare eta támaquene eta pacure.

Técharicavapa eta pacure

³⁹ Te tjarahipa, ena marinéroana vahi náimatívahini táviahipuca eta víavíhahi. Náimahapasera eta tachausi ticayehehi playa. Navarahapa náimipachayare eta pacure, víucupaisihayarehi te playa. ⁴⁰ Tacahe, náechuacavarepa eta enureana ticaratacanahi eta ánciana. Tanasivacapa te amahé une. Nacaesimucavarepa eta tayeheana leme eta pacure. Tacahe, nacanunquechapa eta étana tavanterame ticarataca eta técatícava tíavíhahipahi te tasumu. Táimicacapa eta napauchiraya eta playa. ⁴¹ Tiámahavipasera tayehe eta remanso. Vaipa táupenahini. Tásiha, ticaratachavipa eta playa. Tachucupaca eta tavaparu. Vaipa tayamuricahini. Tacahe, eta tamuracavahi eta tépacuca, tacavaracapa eta tahivu eta pacure. ⁴² Ena suntaruana navarahapa nacapacayarehi ena présoana, napisiraíhi náitujicavahini tjunana eta návaresiraya. ⁴³ Émasera ema capitán Julio vahi máisapahini taicha mavarahahi macuchucuhayarehi ema Pablo. Macavanairipipa ena náitucanahi tíavarecana napauca eta tachausi. ⁴⁴ Ena apamuriana máitucaranahahi tíavarecana nayuratamecavacapa eta tabla, nacuchucuiyavahi te tíájpahi. Tacahehi eta víuchucuirahi vimutu.

28

Ema Pablo mávahiapa te tíurupuhi Malta

¹⁻² Tacahe, te vimutupa víuchucuhahi, tíuchujichavianapa ena ticavasanahi tayehe eta tíurupuhi. Timetacahavianapa eta tájjarehi Malta eta víucupaisihahi. Nacamuruequechapa eta yucu, tíchuhavianapa víasacavayarehi taicha vicasarechavacaipahi taicha eta une étapa eta tíquiva. Énapa tíatíhavianahi. ³ Tacahe, ema Pablo tinerecapa eta yucuqui máijuquechapa. Tatiarihihipuca eta quichare te manereru. Tásiha, tíuchujicapa eta quichare, táimijunapa eta yucu. Táechucapa te mavahu ema Pablo. ⁴ Te náimahapa ena ticavasanahi tayehe eta tíurupuhi eta táechusiraíhi ema Pablo te mavahu, nacahepa:

—Ema maca achane ticaviurevapuca jácáni, ticáparechíhupuca. Tíuchucuhahi te une, ánipasera tavíyihahi te tíájpahi eta matuparahahi. Vaipa máuchucuhahíni —nacahepa.

⁵ Émasera ema Pablo máquijipicapa te yucu eta quichare. Tájjina máichavahini. ⁶ Tacahe, ena tímaracananahi nacuchapaipa máepenahini, támahipuchahini eta mavahu. Eta náimairahi tájjina máichavahini, napanerequenehapa.

—Víyachupuca ema maca —nacahepa.

⁷ Te tachacaya eta vécharisínevahi, tatiarihihi eta barraca, maverahi eta pétiana napenanahi ena machaneranahi ema subprefecto, tuparairucahi tayehe eta tíurupuhi. Ema ticaijarehi Publio. Émapa tíchuhahavíhi téchapajiricahavíhi eta jena mapanaquenehi

sache. ⁸ Matiarihivare ema maiya ema Publio. Ticajumahi éma, eta muraca fiebre. Tisacahivare iti. Tívecahi éma te matuleta. Tiyana pa ema Pablo, máejirapanahi. Tiyujaracapa, mayaseacapa ema Viya eta macanarasiraina ema macajumaquene. Tásiha, manacapa eta mavahu te máinahu. Jéhesare, tinaracapa ema achane. ⁹ Eta náimairahi ena apamuriana achaneana eta macanarasirahi ema macajumaquene, náepanavacapa ena apamuriana nacajumaqueneana. Macanaracavacapaipa ema Pablo. ¹⁰ Mapana caje eta viávihairahi tayehe eta tiúrupuhi. Ichaperinehi eta náitátirahavihi ena achaneana. Te viávacuhayarepa, tjaracasichahávianapa eta vicamunuqueneánayarehi eta vipaisirayareva.

Tímiyanavanavarepa eta napaisirahi, nacaijuherahi eta Roma

¹¹ Tasiha, viávacuhavarepa tayehe eta apanavare pacure tachimararuhivare eta muracana técativaca tayehe eta puerto viáviha. Eta juca pacure ticajarehi Castor-Polux, Chámeana. Tiásihavare te Alejandría. ¹² Eta vipaisirahi, vítecapapa te apanavare puerto ticajarehi Siracusa. Vítecapapa tayehe mapana sache vicahe. ¹³ Te viyanavarepa, vijuhechecapaipa vítecapirapa tayehe eta puerto Regio. Te apanapa sache tépanavavarepa eta técativaca te vana. Tímicatacavapi eta vipaisirapahi. Te apanapa sache, vítecapapa tayehe eta puerto Puteoli. ¹⁴ Te jena avasare, vicainunapa ena apamuriana vichamuriana, tímiasichahavianapa. Étana semana vicahe eta nayehe. Tásiha, vipaícapa te tiájipahi, vicaijuhepa eta te Roma. ¹⁵ Ena apamuriana vichamuriana ticavasanahi te Roma tisamairiricahavianapa eta vítecapirayarehi. Nárajapapa tiácapahavianahi te achene te apanahivare avasare ticajarehi Foro de Apio. Énerichuvare ena apamuriana tiácapahavianahivare, ticuchapahavianapa tayehe eta apanahivare avasarechicha ticajare Tres Tabernas. Te máimahavacapa ema Pablo, tiúrisamuréinehi naicha eta nácapirahavihi ena vichamuriana. Tétumehavacapa ema apana. Mahasulupayachapa ema Viya. ¹⁶ Te vítecapapa te Roma, ema capitán Julio mahentregachapa ema comandante tayehe eta guardia ena présoana. Émasera ema Pablo náisapapa títecapapa te apana peti, matiarihisera ema émana suntaru tijnacahi.

Éma Pablo máimitucavacapai ena téjirapanana te máitecapihahi

¹⁷ Te mapanapa sache eta vítecapirahi te Roma, ema Pablo máimichuhavacapa ena náiyarahana ena israelítana ticavasanahi te jena avasare. Te tiúrujicavanapa, ema Pablo máichavacapa:

—Nuparapenaveana, tájinanéni nutapiravainahini. Tájinavare nícharacahini ena vijaneanana. Váhivare nucaecahi eta nayeherepianaini ena viáchucanaveanaini. Nucaeratahisera te Jerusalén, timetauchanuanahi te namirahu ena tuparairucana romanoana. ¹⁸ Eta nayaseresiranuhi, navarahahineni ticaiticanuana taicha náimaha éna tájina taviuchanuhini táimicapacanhini. ¹⁹ Énasera ena vijaneanana tuparairucanahi váhiquene návarahahini nacaiticanuhini. Eta tacahehi nuyaseserecapa núti étaina nucametauchacasiya te mamirahu ema Emperador. Tájinasera vahi numetauchaimahi ena nujaneanana ticaetemajiricanuanahi. ²⁰ Eta tacahe, nímicuhahehi nuvarahahi nímatiheyare éti, numetacheyareva eta juca níchavaquenevahi. Ticaviurenuhi eta néhisirahi ema Cristo, ema vicuchapaquenehi vimutu víti israelítana, eta tímitiacanuhi puíticha te juca cadena — máichavacapa.

²¹ Tásiha, ena náichapa:

—Tájina váhiya visamairiricavi. Váhivare vijacapa eta carta tiásiha te Judea táechajisihavihini píti. Énapa ena vichamuriana israelítana tiásihanapahi eta ánaqui, váhivare náechajisihahini eta pivirevahipuca píti. ²² Vívarahasera visamavi puiti péchajisiha eta pipanereruanahi, taicha visamairiricahi eta nacatichirahi ena vijaneanana tiávihanapahi te avasareana eta juca arairuhi éhiruhi —náichapa.

²³ Tacahe, náijarechapa eta sache máechajisiraya. Te jena sache, títecapanapa ena camuriqueneana israelítana tayehe eta máitecapihahi ema Pablo. Tépanavapa te jena yáitarahi téchajicahi éma. Tiámainucava te cáperehichichapa títipiricapa eta macametarairuirahi eta máechajiriruva ema Viya. Máimivehapiacapai eta máechajicuirapahi eta Sagrada Escritura. Máimitucavacahi éna eta náimatiraya ema Jesús eta émairahi Cristo, ema nacuchapaquenehi. Macajimuyacavacahi eta náehisiraina éma.

²⁴ Tásiha, típutsimurihanavana ena tisamararacanhahi. Natirihihini ena apamuriana nasuapa eta macayemaqueneanahi ema Pablo. Natirihisera ena apamuriana vahi nasuapahini. ²⁵ Éna, vahi návarahapahini nasama, timutserahavanapaipa tiyanana. Tacahe, ema Pablo máichavacapa:

²⁶⁻²⁷ —Machu ecutihini ena viáchucanaveánaini acane. Matupiruvahi ema Espíritu Santo eta máechajisihavacahi éna te mametacapa ema viyarahaini profeta Isaias. Máichapa:

“Piyanapa pimetaca ena naena achaneana. Ani píchayare: Nímatihe éti eta emasuapajiraivahi. Épiyacavahi religiósöhehi; tétavicavahisera eta tamuracavahi eta esamureana. Eta juca emasuapajiraivahi, tahapapiricahi eta ecaicutiarairahi eta numetarapiana étapa eta nímereuchaqueneana. Tájina táichahíni vicuchapahini eta éneuchiraváina, evarairapucaini ecasiñahini me Viya, apaesa macanaracahehíni” máichapa ema Espíritu Santo.

²⁸ Ácaicutiaraquenéna éti, puiti juca vicaijuheya vimetacaya ena apavasanana eta mavarairahi macuchucuhaya éna apana ema Viya. Tásiha, éna nasapihayare nasamararacayare —máichavacapa ema Pablo.

²⁹ Te tamutupa eta máechajisirahi ema Pablo, tiyananapa ena majaneanana, tiúmehavannaipahi.

³⁰ Apina año macahehi ema Pablo tayehe eta máitecapihahi. Tamutu sácheana majacavacahi ena tipapiuchanapahi. ³¹ Máechajisihahi eta máechajiriruva ema Viya, máimituachivare eta náehisiraina ema Viáquenu Jesús, émairahi yátupiquenehi Cristo. Nájina nacamatinaahini. Náisapahi ticametarairu.

Tamutupa eta néchajiriruvana eta piyehe.

Eta macartane ema Apóstole Pablo nayehe ena machamuriana ticavasanahi te Roma, ticajare ROMANOS

¹ Nuti Pablo, mavanaranuhi ema Viáquenu Jesucristo, manerejirunhivare eta mayehe-nuyarehi apóstole. Tituparacanuhi eta nucametarairuirayare eta mapanerechirahi ema Viya eta mavarairahi macuchucuhaya namutu ena ticasíñavanaya mayehe ema Machicha.

² Ema Viya, ánaquiaparipahi eta juca mametasiravacahi ena víyarahanaini santo profetana eta mapanerechirahi eta macuchucuiraya ena achaneana. Tásiha, nájuequeneharipahivare éna. ³ Eta Sagrada Escritura táechajisihaipa ema Machicha ema Viya eta máucupaisirayarehi te juca apaquehe. Yátupiyarehi Cristohi éma. Achanequenehi eta máimahi. ⁴ Natiarihiserana ena ticatianacananahi éma. Náimicapacahi éma. Émasera ema Espíritu Santo, tiáamicarehi eta macaechepusirahi éma te máecari. Étapa tímereuchahi eta yátupiquenérihi Machicha ema Viya. ⁵ Puiti ema Viáquenu Jesucristo tíjapanunuhi eta matuparasiranuhi eta nuyaniraya nupaicaya te tamutu avasareana, nucametarairuyarehi eta najacapacarevayarehi me Viya namutu ena tisuapanayare, náehica éma. ⁶⁻⁷ Te namuri ena nasimutuqueneana, etiaríhivare éti apanava. Tíchuhahéhvare ema Viya, machanerayarehi ema Machicha Jesucristo, mavaraha tauri eta ecaemataneasiraya éma. Puiti nucajurehe eta juca nucartane emutu eti nuchamuriana ecavasanahi te avasare Roma, máemunaruqueneananahi ema Viya. Nuvaraha macatajicahéhini íchape ema Tata Vicaiyaquene, émapa ema Viáquenu Jesucristo; nájaracahéhini táurivaina eta epanereruana.

Ema Pablo mapanerechaipa tiyanayare te Roma

⁸ Núi, tétavicavahi eta nuncachirahi ema Viáquenu Jesucristo, nuhasulupayachahi ema Viya íchavenehi emutu éti. Namutu ena achaneana te avasareana téchajisiaheanahi eta yátupiraripahi éhica ema Viya. ⁹ Núi nuvavinavahi eta nucaemataneasirahi ema Viya, eta nucametarairuirahi eta máimiturapiana ema Machicha Jesucristo. Ema Viya tímararacanuhi eta néñamiravahi eyehé éti. Núi, tamutu sácheana te nunarasirana, te néchepusirana, nuyaseuchahehi me Viya, májaracahéhini eta iúrivínahíni éti. ¹⁰ Nuyaseuchavahivare eta máispiranuinahíni nítujisiravainahini nupaipiuchahe. ¹¹ Ichape eta nuvarairahi nímaháhe, nímicatacahéhini eta tajurusiraya eta íachanevana apaesa muracaqueneñapaini eta éhisiraya ema Viya. ¹² Éti apanava ímicatacanuhini. Vétumejiricacahivaréni eta véhisirahi ema Viáquenu.

¹³ Nuparapenaveana, nuvaraha numetacahe apaesa echa. Ichapemuríhi eta nuvarairahi níteca nímahapanáhe. Puitícha, vuíchahasera nítujicava. Tijuricati nétupicavahini eta nítesirainahini eyehé, natiarihichuhipucaini nucajimuyacavacahini eta nanerejisiravainahini náehicahini ema Viáquenu, tácutihini te nupaicainapa te apana avasareana. ¹⁴ Taícha íchape eta néñamiravahi níti eta nucatuparahairahi nucametarairuirayare nayehe namutu ena achaneana te íchapeana avasareana énapa ena tíávihana te vámahiana, ena tíávihana te isanítiana. Nájina nunerejiruimahi. Namutuyare numetacavaca: ena cráyanana rícoana énapa ena páureana. ¹⁵ Tacahe, níti nutserereacavahi eta nupaipiuchi-raheya te iávasa Roma, nuvarairahi nímitucahe eta máechajiriruva ema Viya tayehe eta véhiruhi.

Vijacapacareipahi mayehe ema Viya táichavene eta vicasíñavairahi mayehe

¹⁶ Núi nuvavinavahi eta nímitusirahehi tayehe eta véhisirahi ema Cristo. Tájina vahi nutsirihahini, taícha tétavicavahi eta macasíñacarevahi ema Viya máitauchayare tamutu eta macuchucuirahavi. Éma, tétavicavahi eta mavarairahi nacasíñavahini ena israelítana eta mayehe, énapa namutu ena apamuriana achaneana. Tétavicavahi eta máitupajijiasiravahi máitsivachinahi eta náitaresirana, tamutupa arairuhi máicha. ¹⁷ Taícha ema Viya máimerecaripa eta vijacapacarevahi eta mayehe vímutu viti vicasíñavanahi mayehe. Tájinapa vácamunuhini. Tarataripa eta vicasíñavairahi mayehe. Tásiha, éma ticuchucuhaviripa. Taícha eta Sagrada Escritura, ani tacahehi eta táechajiriruvahi: “Nácani ticasíñavanahi eta me Viya, tíjapacacareanahi, máíchequaraquireyare eta náitaresiraya táícha”.

Ticaviurevana namutu ena achaneana táichavene eta nájecapiravana

¹⁸⁻¹⁹ Acane ema Viya manacasamurechahi ena achaneana eta matiarirahi éma. Manacasamurechahivare eta máicuñasiraya namutu ena téjecapavanahi, máurirahanahi. Yátupíhi eta nacaicuñairayare táichavenehi eta namasuapirahi eta yátupiqueneana, váhvare návarahahini náinajicahini eta navainarajivana. ²⁰ Máimahasihinéni ema Viya Eterno eta viyehe, véchahiserana eta matiaríhírahí, taícha tamutu vímaha eta máepiyaruanahi, étaripa eta

apaquehe étapa eta tatiarihiqueneanahi. Émarichuhi ema Viya téchapajiricahi tamutu eta táepaniravahi eta juca apaquehe, puíticha eta juca víavacurehi. Étara vímatiarahi eta matiarihira-hirahi ema máitupajjiaruvaqueheni. Énasera ena achaneana, vai návarahahini nacasiñavahini eta mayehe. Étapa naviurevahi éna. ²¹ Tamapurujhisera eta náimatirahi ema Viya, vahi návarahahini nasuapahini; váhivare napicauchahini. Váhivare nahasulupayachahini éma. Tétavicavahi eta tájecapiravahi eta napanereruana. Étachucha napanerechahi eta tájiparacana. Muracasamureanahivare. ²² Ticasiñavavaicanahi taicha tímijachavanahi títupajjiacavana. Tétavicavahisera eta namaiturerevanahi. ²³ Vaipa najirauchahini ema Viya máepenacacahi. Váipavare mapicauchacarehini nayehe. Tásiha, náemitisicaipa éma. Nasapihapa najirauchahi eta nasiñarajiana achanemirana matumerairahanahi náipunechucha ena achaneana. Tamutuchucha nacasiñarajipahi cáyurepuca, quicharepuca, sáraremrapuca.

²⁴ Tacahe, eta máimairahi ema Viya eta náichirahi eta júcana, máisapapa éma. Máinajiacavacapa. Puíticha navaraharichucha tímijanavana naicha eta natuhusivana titsiriaca-reanahi. Tavayucachivare eta najamuraraivana tamauriqueneana. Tétavicavahi eta namaeperajisiracacahi. ²⁵ Tétavicavahivare eta náepururahi ema Viya, émayarehi najiraurereyarehini. Tasapihapa téjecapavanahi, eta náimijachirahi tíuripana eta najirauchira eta nasiñarajiana náepiyaruanahi. Tásiha, náemitisicapa ema yátupiquenehi. Jéhevarequenehi máichecuaraquireyarehi eta majirauchacareva. Amén.

²⁶ Eta tacahe, ema Viya macaerajicavacapa. Vaipa návarahahini máemechavacahini. Máisapapa náichahi eta navarahaqueneanahi. Tásiha, tétavicavahi eta náichaqueneanahi. Nararíhi ena esenana, énajicacapa náichacacahi eta napecaturana. Vaipa nácomesahini ema ajaira. ²⁷ Énaripa ena ajairana, nararíhivare énajicacahi náichacacahi eta pecatua. Vaipa nácomesahini esu esena. Navayuchaipa eta najamurachiracacahi. Váhiquene nátsirihahini. Táichavenehi eta náejecapiravahi, énajivapa tímitaequenehavana tayehe eta náicuñayare.

²⁸ Ena nani, ichape eta nacerajisiravahi eta me Viya. Vaipa návarahahini náesenicahini éma. Váhivare návarahahini napanerechahini eta táuriqueneana. Tásiha, ema Viya máinajiacavacapa, vaipa émainahini máechavacahini. Máisapapa tímijanavana eta náichirahi eta tájiparacana tamauriqueneana. ²⁹ Tétavicavahi eta náepiyaresirahi eta napecaturana tamauriqueneana: Navehahi esu esena apayena. Ena amaperuana náichahi eta natuhusivanahi. Téharahiana nayehe nácani matapiravareanahi. Tamutupa navaraha nacayehe, cáetemarrahiana, ticapinarurahiana, ticapahiana, tipiararecana te tisemana, tivayuarrecana, sémarairihiana, téchejihiana. ³⁰ Tíñemahi eta náechejisirana nayehe ena apana achaneana. Nacatichavare ema Viya. Tiácapaemarahiana, cájamuravana, píncanillana, tisiñavavairicana. Tisipanerehiana eta náichirayare eta apana pecatu navarahaqueneana. Masuapajirairahanavare nayehe eta ticachichana. ³¹ Tímijachavanahi tétupicavana eta náichirahi eta tamauriqueneana. Tivayarrahiana eta náechajirisiravana. Vahi témunarahiana. Váhivare tiperdonarahiana, nájina najapanuquenéna. ³² Náechahinéni éna eta taurivahi eta júcana me Viya. Náechahivare éna, eta táimicapacsiravacayarehi, tímijanavanarichuchasera eta náichirahi. Náimiquipaicahi nácani apamuriana. Émasera ema Viya máitachayarehi eta náicuñayare.

2

Ena Viya titupiruvahi eta máitachirayarehi eta náicuñayare

¹ Étiarihiserá éti ímijachahi tájina eviurevaimahi eta vahi ácutimahi ena apamuriana máimatirahanahi ema Viya. Ímijachavahi tájina epecaturaina. Éti ecaecahivacahi ena tíchanahi eta tamauriqueneanahi. Váhiserá étupicavahini eta ecaecahirahi, taicha étirichuhi nacutiqueneanahi eta íchaqueneana. Énerichuhivare eti ecaviurevahivare. ² Víti véchahi matupiruvahi ema Viya eta máicuñasiravacaya ena tíchanahi eta juca tamauriqueneana. ³ Étipa, éjecapavahi eta ímijachirahi ticaiticaheyare eta ícuñayare, eti ícharahiana eta tavasi-queneana ecutirichuhinéni ena ecaecahiqueneana. ⁴ Émasera ema Viya, tétavicavahi eta máurivahi eta eyehe. Vahi maicuñacahavanehini. Ticamicahaehi, ticuchapahivare, mavarairahi éneuchavahini eta mayehe, ínajicahini eta íchira eta tamauriqueneana. Tásiha, vahi ecuemepurureca eta máurivahi eta eyehe. ⁵ Taicha táíñehiqueneayare eta ícuñasamiyare éti, te vahi ecueuechava, ínajicavare eta tamuracavahi eta esamureana. Taicha evayuchapaichucha eta ecurumtusirahi eta etapiravana. ⁶ Taicha éma, matupiruvahi eta májjarasirayare eta táitsivayare eta víchaquenepachu. ⁷ Vítiripa viti machanerana ema Viya, tajarachavinapa éma máichecuaraquireyare eta vítaresiraya, taicha vivaraha puiti vicurisamurechaya éma, vímijanavaya eta vivapinairavayare vícha eta táuriqueneana. Vicuchavaya eta visiapiraya eta te majaraivahi, vicunachacareya mayehe, máichecuaraquireya

eta viúricacarevaya. ⁸ Muracainapasera eta máicuñasiravacaya namutu ena masuapajirairahanahi énaripa ena ticatianacanáhi eta yátupiqueneana, tasapihahi náuricahi eta tauriqueneanahi. Navayucharipa eta náimiyusemasirahi ema Viya. ⁹ Ichape eta nacatajivairaya, tíyahacavanayare namutu ena tíchanahi eta juca tauriqueneana. Ticuticacanayare namutu eta náicuñayare, ena israelítana énapa ena apavasanana. ¹⁰ Étiserá eti íchanahi eta táuriqueneana, tíjaracáhénapa ema Viya eta iáviyaha te majaraivahi. Tétavicavaya eta ecunachacarevaya mayehe. Tinaracainavarepa eta epaneresiranainihi. Ecuticacaya emutu eta iúricacarevaya. Eti israelítana, vahi ecachuricaimahi ena apavasanana.

¹¹ Ema Viya vahi manerejicaimahi ena máicuñaruanaya. Ticuticacanayarehi máicha. ¹² Nácani máimatirahanahi eta mavanairipiana ema víyahaini Moisés, ticaicuñanayare. Énerichu nácani náimatihinénipuca, tavetijinapa ticaicuñanayare taicha vahi nasuapahini. ¹³ Taicha vahi tíjacapacareanaimahi mayehe ema Viya nácani vahi náitauchahini eta nasamaqueneanahi. Tíjacapacareanayaresera nácani títauchanahi típicauhanahi eta vanairipiana. ¹⁴ Nararihivare ena tinerejicavanahi ena apavasanana, váhinéni náimatihini eta vanairipiana, nasapihasera natupiruvahi te nasamureana eta náichirahi eta táuriqueneanahi, taicha yátupihí eta nasuapirahi eta manacasamurechaquenehi ema Viya. ¹⁵ Éna, náimerechahi eta manacasamurechirahi ema Viya eta vanairipi te nasamureana. Énajivaya tisamavana te napanereruana eta táurivahi eta náichaqueneana, éta ticatiuchavacahi. Te téjecapavanapuca, tisamavanahivare eta taurivahi eta náichaqueneana. Tásiha, napicahi eta náicuñayarehi táicha. ¹⁶ Járájapa eta sáchevare, ticayaseserehianainapa namutu ena achaneana te mamirahu ema Viáquenu Jesucristo. Éma, máimatiya tamutu eta náichaqueneana tayumurevanahi. Étarichuhi eta numetarapihi te nucametairupa.

Ena israelítana, ena ticatuparahanainihi eta vanairipiana, váhisera náitauchahini

¹⁷ Étiserá eti israelítana, ímijachavahi yátupihí ítaucha eta vanairipiana, ecunachavaipahi mayehe ema Viya. ¹⁸ Ímijachahivare ítuca eta mavarahaqueneanahi ema Viya. Énerichuvare eta vanairipi éhiruhi tímitucahehi eta enerejisirayare icha eta táuriqueneana. ¹⁹⁻²⁰ Tétavicavaipahivare eta ecunachiravahi taicha ímijachavaripa ecaturaraha eta ímitusiraya ena apavasanana apaesa náesenicahini ema Viya, náimatiyareva eta máechajiriruvana, náinajicayareva eta napecaturana, váipavare nanasimahi eta te timapicu. Ímijachahivare ímatiequeneha tamutu eta vanairipiana, ítamuturusirahi tamutu eta tayeheana yátupiqueneana. ²¹ Éti evarahahipuca ímitureca. Tituparacahehisera étivaya ítaurahi. Éti, ímiturechahi vahi nacamereca ena achaneana; étisera epanerechahi eta ímeresiraya. ²² Tacutiquene váhivare iúrica nacaesenarahini ena eparajairavana; étisera epanerechahi eta ecaesenaraya. Ecatichavare eta nasiñarajiana; étisera matsirirairahahehi eta evehairahi eta tájaracasiana eta nasiñarajiana. ²³ Ecnachavahi eta ímijachiravahi ítuca eta mavanairipiana ema Viya; étisera tamutu sácheana iácatayayaajicahi eta mavanairipiana. Tétavicavahi eta empicauchirahi éma. ²⁴ Ani tacahe eta Sagrada Escritura: “Ena achaneana vahi napicauchahini ema Viya íchavenihi éti israelítana” tacahepa.

²⁵ Eti ecunachavaipahi eta israelítirahehi. Tacamunuhisera eta ítauchirainahini eta vanairipiana. Taicha eta juca emaitauchirahi, tímicutijiricavaichucha vahi étinahini israelítanainahini. ²⁶ Ticachuricaheanaripa nácani apavasanana, nasapihaipa náitauchahi eta vanairipianahi. Ema Viya máimahahi eta táurivahi eta náitauchirahi, váhineni israelítanainahini éna. ²⁷ Ena apavasanana títaurahianahi tayehe eta vanairipiana, éna tiyaseserecanainapa eta ícuñayare emutu eti emaitauchanahi, émpururecavaipahi israelítirahehi, étapa eta ecaravahirahi eta vanairipiana. ²⁸ Váhivare étimahi ecunachacarevaya eta ecamarcairahi te íaquehe eti israelítana. ²⁹ Nácansera yátupiquenehi eta nasuapajiraiva, jéhevare ena yátupiqueneanahi israelítana. Vahi tácomesaimahi ticamarcana te náqueheana, taicha éna yátupiquenehi te nasamureana námahi eta nacamarcairahi eta machanerairavacahi ema Viya. Vahi étaparacainahini eta nacaravahirahipuca eta vanairipiana, étainapapucaini nacunachacarevainahini nayehe ena achaneana. Eta ticamunucarehi eta náitauchirayare eta mavanairipiana ema Viya. Étapa nacunachacarevaya eta mayehe.

3

Ena israelítana tímijachavanahi nacarichu ticunachacareana

¹ Eti nujaneanana ímijachavaipa ecunachacarehi taicha eta israelítirahehi, ecamarcairahivare te íaquehe. ² Jéhesare, jararihi eta ecunachacarevahi, máicha ema Viya. Éma, matuparacavacahi ena viáchucanaveanaini eta náimituresirahi eta yátupiqueneana máechajiriruana, vítipa viti námariqueneana. ³⁻⁴ Tayanapane natirihíhi ena vijaneanana vahi náitauchahini eta natuparahahi, émasera ema Viya, váhiquene títavaimahi eta

máitachuiraya tamutu eta májjararuvanahi eta nayehe. Taicha tétavicavahi eta máitauravahi éma. Tayanapanepuca natiarihi ena achaneana énaína náepiyahirahi, émasera ema Viya máitachuyare tamutu. Eta Sagrada Escritura, ani tacahe: “Tayanapane ena achaneana vahi navarahahini nasuapa eta pítauravahi, piti Tátachicha, tamutu sácheana pímercahi píti eta pítauravahi. Tayanapane natiarihi náimijachahi vahi tátupiruvahini eta píchaqueneana, tétavicavahisera eta pitupiruvahi te tamutu” tacahepa. ⁵⁻⁶ Vimutu vímati tétavicavahi eta majapanuravahi ema Viya. Németeacasera etiarhi eti ímijachahi tíapajucavayarehi eta macunachacareva taicha eta esipecaturairavacahi. Ímijachavavare vahi tátupiruvahini eta masemairahi eta ecapecaturairahi. ¡Tétavicavahi eta éjecipiravahi! Ecuti ena achaneana mapanerereana. Ema Viya, tatuparacahi máicuñacavacayare namutu ena téticapavanahi, taicha tétavicavahi eta masantovahi. ⁷⁻⁸ Ímijachavahi tísapacarehi eta épiyahiraiva, taicha ímijachavahi títametache eta yátupirahi eta tatupiruvahi eta máechajiriruvana ema Viya. Ánipapuca tacahe eta epanereruana: “Ema Viya ticaijare tijapanurahi. Tacahe, tíapajucavayare eta macunachacarevahi éma, taicha táetaviuchayare eta majapanuirahavi eta máimairainapa eta vivayuchiravahi eta vivinarajivana. Tásiha, vahi tátupiruvahini eta mavarairahi tícuñacahavi, taicha tíapajucava eta macunachacareva vícha, ¿masi?” ecahepuca eta epanereru. Natiarihivare ena tétipyaequenehahavi náimijachahiji tacahe eta vímiturapi víti apóstoleana. Muracayaresera eta náicuña namutu ena tacahehi eta napanereruana.

Vimutu viti achaneana vicaviurevahi eta me Viya

⁹ Eti nujaneanana, vahi ecuimijachava viti israelítana víuripana nayehe ena apamuriana achaneana. Tájinaquene víurívainahini te mamirahu ema Viya. Taicha vímatiequenehapa eta vimutuírahi vicaviureva me Viya viti achaneana, viti israelítana énapa ena apavasana. ¹⁰ Eta Sagrada Escritura, ani tacahe: “Nájina náurihini, émanainahipucáini máurihini, ésunainahipucáini esena súrihini. ¹¹ Nájina nájina énavivainahini náimatihini ema Viya, váhivare navaraha náesenica ema Viya. ¹² Namutuhi téticapavana, namutuhivare táquipaichi eta tamauriqueneana. Nájina náichahini eta táuriqueneana, émanainahipucáini máichahini. ¹³⁻¹⁴ Tíñemahipi eta náechajirisiravana. Tétavicavavare eta navayuaravananahi. Éna nacuti eta quichare téchurahi, tétavicavahi eta nacaetemaraiva. Náematanechucha namaldicióncha nácani apamuriana. ¹⁵ Apaesarichu nacamunu navarahaipavare ticaparecana. ¹⁶ Sirujiana eta náitaresirana, ticaetemarecana. ¹⁷ Vahi natanucaimahi eta náurivainahini nayehe ena apamuriana. ¹⁸ Tájina vahi napicauchaimahi ema Viya” tacahepa eta Sagrada Escritura.

¹⁹ Nujaneanana, eti ímijachavaipapuca vahi étinahini táechajisihá eta Sagrada Escritura. Téchajisiháhehisera, taicha eti iávacuhanahi eta vanairipiana. Emutuhi ecaviurevahi. Te jena sácheyare, vaipa ecatiuchavaimahi. Ematinainaripa emutu taicha eta eviurevanahi. Taurica eta ecaicuñairayare emutu. ²⁰ Natiarihipcaserá nácani tíimijachavanaripahi tijacapacareana taicha navarahainapa náitachaya eta vanairipiana. Váhiquenesera tijacapacareanaimahi me Viya, taicha vahi étaparacaimahi eta náitachirahi. Taicha eta vanairipiana, tímimatichahavichucha eta vicepecaturairahi.

Vijacapacarehi mayehe ema Viya táichavenehi eta vicasiñavairahi mayehe ema Machicha Jesucristo

²¹ Puítisera, ema Viya tímimatichahaviripa eta vijacapacarevayarehi eta víuchucuiraya. Vahi étaparacaina eta vivarairahipuca vítaucha eta vanairipiana. Tanasiqueneripa eta Sagrada Escritura, táechajisiháipahi eta máitecapiraya ema ticatiuchahaviya, vijacapacareya máicha. ²² Eta tacahehi puítí, yátupíhi eta vijacapacarevahi vimutu viti vicasiñavanahi mayehe ema Jesucristo. Ema Viya vahi manerejicaimahi nácarichuhini ena tíuriana. Váhivare máepuruimahi ena achaneana tisipecaturanahi. Eta nacasiñairavahi eta mayehe, majacapavacahi namutu. ²³ Taicha yátupíhi eta vicepecaturairahi vimutu. Vimutu véchurica eta víurivana, vijacapacaréni me Viya. Nájina émanainahini mátipiruhíni. ²⁴ Étasera eta máemunasirahavihi ema Viya, tijapanuhavihi. Tijacapahavihi táichavenehi eta vicasiñairahi ema Machicha Jesucristo. Émapa tivachachinahavihi eta vitapiravana táichavenehi eta vicepaturana. ²⁵⁻²⁶ Ema Viya, tétavicavahi eta matupiruvairahi. Vahi macamichaimahi ena téticapavanahi te machacaya. Tásihasera, tijapanuhavihi. Májjararecáhi ema Machicha eta mavachachirahi eta vicepaturana, vímicapacahi éma. Eta vicasiñaira ema Jesucristo, macaepahahi eta véjecipiravanahi vicepaturanahi. Tásiha, vijacapacarehi mayehe ema Viya.

²⁷⁻²⁸ Tacahe, puítí visamaripahi eta majacapirahaviripa ema Viya, étachucha tíchahi eta vicasiñairahi ema Jesucristo. Vahi vétupicavahini eta vicasiñavavairisirahi eta vítauchirapá eta vanairipiana. Váhiquenevare étaparacaina.

²⁹⁻³⁰ Vahi ácarichuimahi eti israelítana ejacapacarehi me Viya. Énerichuvare tijacapacareanahi namutu ena apavasanana ticasíñanahi. Tijacapahavihi ema Viya vimutu viti vicasíñavanahi eta mayehe. ³¹ Váhivare ecuimijacha nútinahípucaini nímutucahe vaipa tasuapacarehini viyehe eta mavanairipiana me Viya. Viti véhicanaahi ema Jesús, táitusiava vicarichuhi virataha vítaucha eta mavanairipiana ema Viya. Vahi vínajicaimahi.

4

Vicutiyarehi ema víyarahaini Abraham eta macasiñavairahi mayehe ema Viya

¹⁻² Németeaca etiarihi eti evarahaipa échajisiha ema víachucaini Abraham. Evaraha ecunacha eta macaemataneasiranahi ema Viya, ímijachirahi éta tíchahi eta majacapacarevahi me Viya. Ímijachahivare táuriha eta macasiñavavisiravapuca éma. Numetacahesera: Eta majacapacarevahi me Viya, vahi étainahini táichahini eta macaemataneasirahi ema Viya. ³ Eta Sagrada Escritura, ani tacahe: “Ema Abraham, tétavicavahi eta macasiñavairahi me Viya. Eta tacahe, tijacapacaréinehi me Viya” tacahepa.

⁴⁻⁵ Tiuri puiti, viti achaneana, te vicaematnerecahi, tatuparacahi ena vicaemataneyeruanahi eta navachachirahaviyarehi. Vahi tíjaracasichahavianaimahi eta najapanuirahavihini. Émasera ema Viya tijapanuhavihi, tijacapahavihi táichavenehi eta vicasíñavairahi eta mayehe. Vahi étaparacaimahi eta vicaemataneasirahi. ⁶ Énerichuva ema víyarahaini David máechajisihahi eta náuricacarevahi ena ticapecaturarahiana eta majacapiravacahi ema Viya, tájina étaparacaina eta nacaemataneasirahi. ⁷⁻⁸ Ánipa macahehi: “Tétavicavapa eta náuricacarevahi nácani maperdonachueneanahi ema Viya eta napecaturanaini, tijacapahavihi tímicutijiricavainehi tacuijahini véjecapiravainahini” macahepa.

⁹ Tacahe, eta juca víuricacarevahi, vahi vácarichu vicatuparahahini víti israelítana. Énerichuhivare tatuparacahivare ena apavasanana. Vécharipahi eta majapanuirahi ema Viya ema Abraham. Tacarichuhi eta macasiñavairahi, majacapahi ema Viya. ¹⁰⁻¹² Ímijachapapuca éti, eta majacapacarevahi ema Abraham tásihaquenehi eta macamarcairahi. Numetacahesera: Váhiquene étainahi táichahini eta macamarcairahi éma, taicha te táequenepa eta majacapirahi ema Viya, mapaenumavahi ticamarca ema Abraham. Étapa táicutiarayarehi eta majacapiraipa ema Viya táichavenehi eta macasiñavairahi. Émara ema achane máinapuiruhi ticasíñavahi me Viya. Púiticha ema Abraham, émapa vicaiyaquenehi vimutu viti vicasíñavanahi me Viya, vijacapacareipa víti apanava. Tacamunúpasera vácuticacahini vicasíñavahini mayehe, viti israelítana étipa eti apavasanana.

Ema Viya máitauchayare eta májjarasirahaviya eta vícuchihi táichavene eta vicasíñavairahi eta mayehe

¹³ Ema Viya tíjaracavahi eta májjarasirayare ema Abraham énapa ena mámaríequeneana tamutu eta apaquehe, návapairuyare. Májjaracayare táichavenehi eta macasiñavairahi ema Abraham. Vahi étaparacainahini eta masuapirainahini eta vanairipiana. ¹⁴ Taicha te tatiaríhinahini eta náicuchihi ena titauchanahi eta vanairipiana, tamapurujipapucaini eta vicasiñavairahi, tamapurujipavarepucaini eta májjarasiravahi ema Viya eta majacapiravaviyare. ¹⁵ Taicha eta vanairipiana, étachucha támaparauca eta náicuña ena téjcapavanahi. Tásiha, vimutu vicaicuchiyarehini eta vícuña, taicha vimutu véjcapavahi*.

¹⁶ Ema Viya, tétavicavahi eta majapanuraivahi. Tásiha, yátupi máitauchayare eta májjarasiravana nayehe namutu ena mámaríequeneana ema Abraham. Vahi nácarichuhini ena téhicanaahi eta vanairipiana. Nayeheyareva namutu ena ticasíñavanahivare mayehe, ticutionahi ema Abraham eta macasiñavairahi. Eta tacahe puiti, eta vicaiyairahi vimutu viti ema Abraham te mavahuana ema Viya. ¹⁷ Taicha ema Viya, ánipa maicha ema Abraham: “Puiti nunacaviyare píti nacaiyaquenyare ena achaneana te camuriquene avasareana”. Tásiha, ema Abraham, ticasíñavahi muraca me Viya eta máitauchirayare eta májjarasirayare ema machichaya, tayanapane eta mácheruanahi éma, ésupa esu mayena. Taicha ema Viya, tamutuhí máituruequeneha. Ema Abraham ticasíñavahivare eta majacapirayare eta máicuchihi, tayanapane tájinaichaha máimahahini.

¹⁸ Ema Viya mametacavarepa ema Abraham eta macachichairayare, camurianayare ena mámaríequeneanayare. Eta nasimutuvayare, tamutu nacavasayarepahi, camurianayarehi eta návasanaya. Ema Abraham, ticasíñavahi eta táitachiravayarehi tamutu. Ticuchapavaipa eta máuchusirayare ema machichayarehi. ¹⁹⁻²¹ Ema Abraham, ichavicaipa éma, cien año eta mahañora. Ésupa esu Sara, ichavicaipavare, macheruhivare. Vaipa náuríhahini

* **4:15** Ema Pablo te mayeherepi eta máechajiriruvana, ani macahe: “Te táviha tájina vanairipi, nájinavare ticaviurevahini eta nájecapira tayehe”. Étasera eta macayemaquenehi, ani tacahe: “Tatiarihi eta vivirevahi vimutu, taicha tatiarihi eta vanairipi te tamutu jácani vicaijuhepuca”.

eta nacachichairayarehi. Váhiserá máeñamavahini emá Abraham. Ticasiñavahi muraca eta mayehe emá Viya eta tamutuirahi máituruequeneha eta máitachirayarehi tamutu eta máijarasiravanahi. Váhivare mapicacaracavahini. Eta macasiñavairahi, tétavicavahi eta macunachirahi emá Viya. ²² Eta tacahe, ichape eta majacapacarevahi me Viya táichavenehi eta macasiñavairahi muraca.

²³ Tacahe, eta vicaravahuireta eta Sagrada Escritura, vímatiequeneha vahi mácarichuhini emá Abraham majacapacarehini me Viya. ²⁴⁻²⁵ Puiti, víti apanava vijacapacarehi me Viya eta vicasiñavairahi mayehe. Taicha emá Viáquenu Jesucristo táimicapacahi eta vipecaturana. Émasera emá Viya macaechepucahi emá Machicha te máecari apaesa vijacapacareyarehi mayehe vimutu víti vicasiñavanahi mayehe.

5

Tétavicava eta viúricacarevahi táichavene eta majacapirahavihi emá Viya

¹ Puitiripa vijacapacareipa me Viya táichavenehi eta vicasiñavairahi eta mayehe. Tásiha, tétavicavaipa viúrivahi eta mayehe. Vaipa vipicacaracavahini tayehe eta vícuñayarehini, taicha emá vímicuñaruhi emá Viáquenu Jesucristo, macaepaharipa eta vícuñayarehini. ² Máichavenehi emá Cristo, tétavicavahi eta majapanuirahavihi emá Viya. Tásiha, tijacapahaviripa táichavenehi eta vicasiñavairahi eta mayehe. Tamutu sácheana viúrisamurehi eta vicuchapiraipa eta vijacapirayare eta vícuchihi visiapirayare te majaraivahi emá Viya. ³ Te tatiaríhinapuca eta vicatajivairayare, vivapinavachucha eta vicamichirahi taicha tétumechahaviya eta vímianirava véhica emá Viáquenu. ⁴ Táichavenehi eta vímianirava véhica, vijacaparipavare eta vítumevayare viratahairayare vicamicha tamutu. Tásiha, eta vicamichirahi tamutu, vicuchapainapa eta táitsivayare vícuchihi. ⁵ Tájina tímipanererécahavamahi taicha yátupiyarehi eta vijacapirayare eta vícuchihi. Vicasiñavahi mayehe emá Viya taicha tímimatichahaviripa te visamureana eta máemunasirahavihi máichavenehi emá máijarahavihi Espíritu Santo.

⁶ Víti, tájina viviyaimahi eta vicuchucuiraváinahíni. Émasera emá Cristo, te tíurihi eta máimairahi, tíjaracavahi tépena víchavenehi víti máurirahanahi, eta macuchucuirahaviya. ⁷ Váhiserá tátuticacahini eta visamureana víti achaneana. Vimutuhi véñama eta vítaresira. ⁸ Téhesera tatiarahinapucaini eta véñamirainahini mácani achane máetaviuchahi eta máuriva, víjaracavapapucaini vépena eta vicatiuchirainahini éma. ⁹ Émasera emá Viya, tétavicavahi eta máemunasirahavihi, tayanapane eta vicepaturarahirichahanéni. Máijarecahisera emá Machicha Jesucristo máepeninahavihi. ⁹⁻¹⁰ Tásiha puiti, vijacapacareipa me Viya táichavenehi eta vicasiñairahi emá Jesucristo eta máepeninahavihi. Ichapehinéni eta véjepiravahi, vímaesenisirahi emá Viya, mavarahahisera éma macaepahayarehini eta vícuñayarehini táichavenehi eta vipecaturana. Eta máepenirahi te crusu emá Machicha, puiti emá Viya tíchuhahavihi vipauchayare éma. Tájina vipicahini eta viávahásiraipa éma. Tásiha puiti, eta vicasiñavairahi eta mayehe, vaipa véñamavahini tayehe eta viúchucuirayare taicha eta máechepusirahi te máecari, eta tímicaeherachahi eta máitupajijiasiravahi eta macuchucuirahaviya. ¹¹ Puiti, tétavicavaipa eta viúrisamurevahi mayehe emá Viya máichavene emá Viáquenu Jesucristo. Tétavicavahi eta viúrivahi mayehe.

Éma Adán tímaiquipaichavi vimutu. Émasera emá Cristo émapa ticuchucuhaviyare.

¹² Tacahe, emá Adán, emá máinapuiruhi achane tiávapaicahi eta juca apaquehe, éma tinacuchahi eta pecatu. Tásiha, táichavenehi eta pecatu, járajapapa eta vépenira, tavachaequenehi eta pecatu, taicha tímirijichaviripa tayehe eta pecatu. ¹³ Te tájinaichaha májuchahini emá Moisés eta vanairípiana, tatiaríhipahi eta pecatu te juca apaquehe. Étasera tamajinairachaha eta vanairípiana, vuíchaha nacaviurevahini ena achaneana. ¹⁴ Namutusera ena mámariequeneana emá Adán tépenanapaipahi taicha mámaparoucharipahi eta mapeatura éma, tayanapanepuca eta napecaturana vahi tácutihini eta mamasupajiraivahi, tayanapanehivare tájinaichaha eta vanairípi májurehi emá Moisés. Éma Adán, émapa ticaetehahavihi. Te táequenepa, márajapainapa emá apana, émainapa tétupiripanahaviyare. ¹⁵⁻¹⁶ Víti, tétavicavaipahi eta visimutuvahi víti vicaicuñanayarehini tayehe eta ecuñaraqú te yucu infierno, étanaichuhinéni eta máejecapiravahi emá víchucaini Adán. Émasera emá Viya, ichaperinehi eta majapanuirahavihi vimutu, mavairahi ticuchucuhaviyare máichavenehi emá Machicha Jesucristo. Tamuturipahi macaepahahi eta tasimutuqueneana vipecaturana. Tájina tavachaequenenahini. Tájinvare jácani vicaematanearacaimahi. ¹⁷ Étanarichuhinéni eta pecatu máejecapiravahi emá émana achane, émaripa emá víchucaini Adán. Tiámairijichaviripasera eta vépeniraya vimutu. Émasera emá Viya tiápajucavaipa eta majapanuirahavihi. Tijacapahaviripa máichavenehi

ema émanaquenerichuvare achane, ema Jesucristo. Tíjaracahavinavarepa eta arairuyare vítaresirayare vimutu viti vicasíñavanahi eta mayehe.

¹⁸ Eta mapecaturahi ema Adán, yátupi tiámaparáuchahaviripa vimutu eta vicaicuñairaya. Émasera ema Jesucristo, tájina matapiravainahini eta máítaresirahi. Éma, tiámaparáuchahaviripa eta vítaresiraya viti, vijacapacareipa me Viya. ¹⁹ Camurihavihi viti tacaerajiruanahi me Viya, táichavenehi eta mamasuapajiraivahi ema émana achane. Puítisera camurihaviripa viti vijacapacareanaripahi me Viya táichavenehi eta masuapajiraivahi ema apana achane Jesús, taicha tájina matapiravainahini eta máítaresirahi.

²⁰ Te táequenepa eta máejecapirahi ema Adán, ema Viya manaquicahi eta vanairipi. Éta tímítucahaviyarehi eta tavayuchiravahi eta vipecaturanahi. Puíticha tiápajucavapaipaicha eta pecatu, émasera ema Viya tiápajucavaichucha eta majapanuirahavi. ²¹ Tacahe, eta pecatu, ichape eta támaparáuchirahavivi tayehe eta vépenira. Étasera eta majapanuirahavi ema Viya tiámaparáuchahaviripahivare eta vijacapacarevahi mayehe. Tásiha, píjaracahavinavarepa eta vítaresiraya máichecuarequireyare máichavenehi ema Viáquenu Jesucristo.

6

Puítí eta majacapirahavipa ema Viya, vicutuparahapa vitupiruvainapa eta vítaresiraya. Vínjacainapa eta pecatuana.

¹ Tiuri puítí, németeaca etiaríhi eti ímjachaipapuca tíuríhi vímíyanava vicha eta pecatu apaesapuca tácaecherapaipa eta táetaviuchirahi eta majapanuirahavi ema Viya. ²⁻³ Váhiquenesera táuricahini vímíyanavahini vicha. Taicha tépaharipa eta tapamisirahavini eta pecatu. Nuvaraha vahi ecumitísica eta ímitucasivanahi. Eta vicaicachasirahi eta víjarasiravahi véhicaya ema Viáquenu Jesucristo, víurujiacaripa éma. Tásiha, tímícutijiricavaipa vácachanehíni eta máepenirahi, vépenahivaréni viti. Vaipa tárataha tipamicahavi eta pecatu. ⁴ Eta vicaicachasiraipa te une, tímícutijiricavahi vicaecarasíhi, vicachanepa ema Cristo eta máepenirahi. Énerichuvare eta víuchusirahi te une, vicutipa éma eta máechepusirahi te máecari. Tanasiripa eta ichasini vítaresira. Tásiha puítí, arairupa eta vítaresirahi taicha máetaviuchirahi ema Viya eta macemataneasirahavi tacuti eta ichape máítupajijiasiravahi te macaechepucapa ema Machicha. Vaipa táuricahini víchahini eta pecatu.

⁵ Taicha eta víurujiasiraipa ema Cristo, vicutiripahi éma eta máepenirahi. Tásiha, étarichu vicaheyarehi viti apanava eta véchepusirayarehi, vicutiyarehi éma eta máítaresirahi, tájina matapiravainahini. Tásiha viti, arairuina pa eta vítaresira. ⁶ Tacutiquene, eta tamaurivainíhi eta ichasini vítaresira tacapecaturavainíhi, tímícutijiricavahi te vicaquenureca. Tétavíicavahi eta tacavanarairahavíhi, tipamicahavíhi eta víchirayarehi eta tamauriqueneana. Puítisera táecarasipa eta ichasi vítaresira, tacutihi eta náecarairaipa ema Viáquenu Jesús. Vaipa tipamicahavimahi. ⁷ Taicha mácani achane eta máepeniraipahi, tícheipaíhi eta macapecaturairahi. ⁸⁻⁹ Puítí vécharipa eta máechepusirahi te máecari ema Viáquenu Jesucristo, tájinapa tímaipechaimahi máepenahivaréni taicha tájinapa tárataha táimicapacahíni. Ene vicahehi viti eta víurujiaríhi ema Cristo. Vécaraipahi eta tamaurivahi eta ichasíhi vítaresirahi. Puítí, tamutupa ticaitsivahi. Vicutinapa éma eta vítaresirainapa. ¹⁰ Eta máepenirahi ema Cristo, éta tímícapacahi eta vipecaturana. Éma, vaipa tíápechavaimahi tépena. Tamuturipahi. Tásiha, eta máechepusiraipahi, máichecuarequirenépa eta máítaresira te mavoure ema Maiya. ¹¹ Ene ecaheyare éti, écarainapa tamutu eta tapamisirahéni eta epecaturana. Puítí eta ítaresirainapa, macarichu ema Viya ecaematanearya, táichavenehi eta íurujiaríhi ema Viáquenu Jesucristo.

¹²⁻¹³ Vaipa ecuisapa eta tapamisirahe eta pecatu. Váhivare ecusuapa jácani tajamurachaqueneanahi eta íáqueheana, taicha tétavíicavahi eta tamaurivahi eta tajamurachaqueneanahi. Tímícutijiricavainapa épenaquene, vaipa échaimahi eta pecatu. Ítarecainapasera mayehe ema Viya, íjararecainapa eta íáqueheana mayehe. Ísapainapa ema Espírítu Santo tipamicahé eta ecaemataneasiraya ema Viya, eta íchiraya eta táuriqueneana. ¹⁴ Eta pecatu, vaipa ticavanarahémahi. Émainapasera puítí ema Viya, tímícatacahénapa eta íchirahi eta táuriqueneana. Énerichuvare vaipa tácamunuhini eta táipicarsirahe eta vanairipiana apaesa vahi ecuquicha eta tamauriqueneana.

Ena ticapecaturarahiana tímícutijiricavahi ena ticaquenurecana eta tapamisirahi eta náichirahi eta pecatu

¹⁵ Puítí, németeaca etiaríhi eti ímjachahi tísapacarechaha eta vicapecaturaira taicha vaipa táipicarserahavíhíni eta vanairipiana. Étisera, tétavíicavahi eta táejecapiravahi eta epanereruana. Ímipanapa eta majapanuraivahi ema Viya. Vaipa epicauchahini. ¹⁶ Écharichuhi éti, te ímíyanavayarechuchapuca eta tapamisirahehi eta pecatuana, ecutirichapuca mácani

ticaquenurecahi, tipamicavayarehi eta masuapirayarehi ema máquenu. Ene ecahehi eta esuapiraichaha eta pecatu. Éta tiámaparáuchahehi eta esiapiraya te yucu inferno. Téheserapuca émainapa esuapaya ema Viya, tatupiruvainapa eta itaresiraya. ¹⁷⁻¹⁸ Nuhasulupayachasera ema Viya eta ínjaisiraipa eta tapamisirahénihí eta pecatuana. Puiti tatupiruvaipa te esamureana eta esuapirahi eta véhiruhi ímitucasivahi. Puiti íjaracavainapa ecaemataneaca ema Viya, iávacuharipa eta táuriva eta itaresiraya. ¹⁹ (Nímicutichinahehi eta juca, taicha vahi máejerarena eta ecaicutiarairaina éta. Nuvaraha yátupina ecaicutiaraya.) Cape eta itaresirahí, étarichaha íjararecahi eta iáquehe tayehe eta tamauriqueneana, étaviuchahi eta evainarajivanainihí. Puiti íjararecaya eta iáquehe íchayare eta táuriqueneana, táurivaya eta itaresira. Tacuija tahapapicahe eta ecaemataneasiraya ema Viya.

²⁰ Taicha cape juca itaresirahí étarichaha tipamicahehi eta epecaturana. Vuíchaha étainahini ecaemataneaca eta táurivaya eta itaresira. ²¹ Tájinavare ímaequenehahini eta íchirahi eta tamauriqueneana. Puitisera, tétavacavahi puiti eta etsirihacarevahi tayehe, taicha ímatipa tiámaparáuchahehi eta esiapirayarehini te yucu inferno. ²² Puiti iúchurepa tayehe eta tapamisirahéhi eta pecatu. Iávacuhaipa eta ecaemataneasiraya ema Viya. Jéhevare eta iúritaresirayare me Viya, máichecuarquirenapa eta itaresiraya. ²³ Eta víchirahi eta tamauriqueneana, tacarichu tiámaparáuchahavi eta visiapirayarehi te yucu inferno. Émasera ema Viya mavaraha tjaracasichahaviya eta vítaresirayare máichecuarquireya, te yátupina eta vicasiñairayare mayehe ema Viáquenu Jesucristo.

7

Viti véhicanahi ema Jesucristo, títavariya eta tapamisirahavihi eta vanairipiana

¹ Nuparapenevana, écharichu éti eta yátupirahi tisuapacarehi eta vanairipiana nayehe ana achaneana, étachuchasera te titarecanarichaha. ²⁻³ Tímicutijiricavahi súcáni esena sucaimaque. Tatuparacahi ésu sucachaneyarehi macarichuhi ema suima, vahi sucuacacahí éma, te jácáni achanerichaha éma. Te suvehapuca ema apana achane, ticapecaturaiapa ésu. Téhesera te tépenaipapuca ema suima, ésupa téchinava. Tisapacare suápechava suácaima mayehe mácáni suvarahaquenyare suímayare. Vahi pecatuina eta suápechiravayare ticaima.

⁴ Ene ecahehi eti nuparapenevana. Ema Cristo, máepenahehi te crusu, macaepaharipa eta tapamisirahénihí eta vanairipiana. Puiti émapa téchahehi ema Cristo. Ecutiripa esu esena suépenaimaque te tiápechava ticaima, tásiha apanapa ema téchahi ésu. Puiti mavanaraheripa ema Cristo, ema máechepurequenehi te máecari. Mavarahahi íchapeyarehi eta ecaemataneasiraina eta mayehe ema Viya. ⁵ Taicha cape juca itaresiraichaha, esuapahi eta tavarahaqueneana eta iáqueheana. Te esamapa eta vanairipi tiápajucavahi eta evarairahi ícha eta tamauriqueneana. Tásiha éta, tiámaparáuchahehi eta ícuchihi eta esiapirayare te yucu inferno. ⁶ Puitisera vaipa tapamicahavihiní eta vanairipiana. Puiti víuchucurepa eta ichasi vítaresirainí. Émapa vicaemataneacayare ema Viya taicha tépanavaripa eta arairu vítaresira eta mávahásirahaviripa ema Espiritu Santo.

Eta viáquehe tichurucavahi eta tavarairahi vicha eta tamauriqueneana

⁷ Etiarhipuca eti ímijachahi tipamicahehi eta vanairipiana eta ecapecaturairaya. Váhiquesera étaina. Vítiripa vahi vímatiequenehavanehini eta tamaurivahi eta vicepecaturairahi, te vuíchaha vímatihini eta vanairipiana. Vuíchahavare vímatihini eta tamaurivahi eta vijamurachirana eta apayehe. Eta vanairipi, ani tacahehi: “Vahi picujamuracha eta apayehe”. ⁸ Téhesera te vímatipa eta juca vanairipi, víápajucavapa vijamuracha tamutu eta vímahaqueana tájiparacana. Te tacuijahini eta juca vanairipiana, váhirichuhini vicujamurachahini eta apayeheana. ⁹ Eta víamaperuvaichaha apaicape, vúchaha vímatihini eta vanairipiana. Téhesera te vímatiequenehapa, visamavapa eta tatiarhipa eta véjecapiravahi eta vimaitauchirahi eta vanairipiana. Tásiha, véchapa eta vépenirayare, tatiarhirahi eta vícuchihi eta vícuñayarehi. ¹⁰ Tacahe, víti vímijachaipahi víuchucuhayare te vítauchapapuca eta vanairipiana. Tájinachuchasera tájaracahavihiní eta víuchucuirainahini. Étachucha tiámaparáuchahavi tayehe eta vépenirayarehi. ¹¹ Téhesera te amahe eta visamure, jararihi eta pecatu. Tavayuaracahavipaipa, tacamapurairavahi eta tatiarhirahi eta vanairipiana, taicha tavaraha táimicapacahavi.

¹² Nuvaraha numetacahe: Tíurhisera eta vanairipi, sántohivare, tatupiruvahivare. ¹³ Németeacasera etiarhi eti ímijachapuca vahi tiuri eta vanairipi taicha támapiricahi eta vépenirayarehi. Vahi tacucahe eta epanereruana. Numetacahe: Váhiquene étainahini eta vanairipi támaparacahavihiní eta vépeniraya. Étarichu eta vicepecaturairahi, étapa tiámaparáuchahavihi eta vépenirayarehi. Étasera eta vanairipi tímereuchahavi eta vimaurivahi víti te visamureana, tétavacavahivare eta vimasuapajiraivahi.

¹⁴ Eta vanairipiana tavarahahinéni tímítupiruchahavi. Étasera eta veche máteji, tavayuaruhi eta tavarairahi víchaya eta tamauriqueneana. ¹⁵ Taicha víti váhiquene vímatiequeneha tájahapuca eta vícharacavaya. Vahi véhichahini eta vipanerechaquenehi vivarahaquenehi vicha. Tasapihachucha víchahi eta vicatichaquenehi vimavaraquenehi vicha. ¹⁶ Tatupiruvahi eta vanairipiana eta tametasirahavi eta vicaicuñairayare táichavenehi eta vipecaturana. Tásiha, te víchapapuca eta tamauriqueneana, visamava te visamure eta tamarivahi eta víchirahi, vémechaemachirava eta tametasirahavihi eta vicaicuñairayare. ¹⁷ Tatiarihi te víachaneva eta pecatu. Tásiha, váipanéni vítijiricavahini víchahini eta pecatu. Étasera eta távahásirahavihi te visamure eta pecatu, étpa tipamicahavihi eta víchirayarehi eta tamauriqueneana. ¹⁸ Véchahivare víti eta tamarivainihi eta táitaresiraini eta viáquehe. Tétavicavahi eta tamasuapajiravainihi. Tímicitijiricavaipa tichururecachavihi. Vivarahahinéni vétupiricavahini, váhiquenesera táisapahavinihi eta viáquehe vétupiricavahini. ¹⁹ Te vivarahainipa vicha eta táuriqueneana, vahi váratashaimahi vicha. Étachucha víchahi eta tamauriqueneana vimavaraquenehi vicha. ²⁰ Te víchahipuca jácáni vimavaraquenehi vicha, vaipa vítinahini tásihahini eta víchirahi, étpa eta pecatu tipamicahavihi, taicha tiávaháchahavi víti.

²¹ Te vivarahainipa vicha eta táuriqueneana, tasapihachucha eta pecatu tímíapitavairicavahi tíchejimirauchahavihi. Eta tacahehi eta víchavaquenevahi. ²² Étasera eta víachaneva, tétavicavahinéni eta tajamurachirahi víchahini eta mavarahaqueneanahi ema Viya. ²³ Jararihisera eta pecatu te amahe eta viáquehe. Ichapemurihi eta táehacacairahi tacanarahi eta paure víachaneva. Tavaraha tíchejimirauchahavi apaesa vahi vicuitauchahini eta mavarahaqueneana ema Viya. Tétavicavahi eta táitiasirahavihi, tímicitijiricavahipa vicaerata.

²⁴ ¡Tétavicavapa eta véjapanuraivasamihí viti páureana! ¡Tacahehi eta vícharacavahi! Németeaca eta vipanereruanahi víti, ticutimahinepa nájinapa tiratahaimahi ticuchucuhahavi tayehe eta tavayuasirahi eta viáquehe eta pecatu, támirahaviyare tayehe eta vépenira. ²⁵ ¡Mararihisera ema Viáquenu Jesucristo! ¡Macarichu éma marataha ticuchucuhahavi tayehe eta juca tamauriqueneana! Puítiripa núti, ichape eta nuhasulupayachirahi ema Viya. Tétavicavahi eta nuvapinairavahi eta níchirahi eta mavarahaqueneanahi. Étasera eta ichasiquenetataji náquehe, ticavanaranuichucha tayehe eta pecatu.

8

Tiúriyarehi eta vítaresira taicha eta mávahásirahavihi ema Espiritu Santo

¹⁻⁴ Puítisera témitiacaripa eta vícuñayarehíni viti viávaháchanaipahi ema Cristo Jesús. Eta mávahásirahavihi ema Jesucristo, tiávaháchaviripavare ema Espiritu Santo. Émapa, ticaepahahi eta tapamisirahavihi eta pecatu, étpa eta támaparauchirahavihi eta visiapi-
raya te yucu infierno. Ema Viya, eta máimairahi eta vimaetumechiravahi, vimaratahairahi vítauchahini eta vanairipiana, mavanecapa tiúcupaicahi ema Machicha, macaqueheyarehi eta juca viáquehe viti achaneana. Eta májjarasiravahi, macamítiequenehaipa eta tapamisirahavihi eta viáquehe eta vicapecaturairana. Puiti émainapa téchahaviyare ema Espiritu Santo. Véhicainapa eta mavarahaquenehi. Tásiha vínajicainapa eta visuapirainihi eta tavarahaqueneanainihi eta viáquehe tacapecuraravaini. Émapa tétumechahavihi eta vítauchiraya eta mavarahaqueneana ema Viya.

⁵ Nácánisera nasuapahi eta tavarahaqueneana eta náquehe, étachucha napanerechahi eta náichiraya eta tamauriqueneana. Vítisera viti visuapanahi eta mavarahaqueneana ema Espiritu Santo étainapa vipanerechaya eta vicurisamurechiraya ema Viya. ⁶ Nácáni napanerechahi eta tavarahaqueneana eta náquehe, támaparaucharipa eta nasiapiraya te yucu. Vítisera viti vipanerechanahi eta mavarahaqueneanahi ema Espiritu Santo, viti vítarecayare. Viúrinapa mayehe ema Viya. ⁷ Nácáni napanerechachucha eta tavarahaqueneana eta náquehe, éna macatianaruanahi ema Viya. Taicha váhiquene návarahaimahi nasuapa eta mavanairipi. ⁸ Tacahe, éna étachucha nacurisamurerechahi eta náquehe, vahi náituchahini nacurisamurechahini ema Viya eta mavarahaquenehi.

⁹ Puítisera éti, eta mávahásiraheripahi ema Espiritu Santo, vaipa étaimahi epanerecha eta tavarahaqueneanahi eta iáquehe. Étpa epanerechaya eta mavarahaqueneanahi éma. Nácáni vahi mávaháruanainahini ema Espiritu Santo, váhivare machaneranainahini ema Cristo. ¹⁰ Étisera, eta mávahásiraheripa ema Cristo, tayanapane táicuchirichuhi eta iáquehe eta táepeniraya táichavenehi eta pecatu, étasera eta íachaneva títarecayarechucha, taicha ejacaparéipahi me Viya. ¹¹ Táichavene eta mávahásiraheripa puiti éti ema Espiritu Santo, ema Viya macaechepucayare eta iáqueheana, tayanapanepuca épenaquenénaripa. Tacutiarehi

eta macaechepusirahi ema Machicha Jesucristo te máecari. Éti íápechavayare ítareca maicha ema Espírítu Santo.

¹² Tacache, nuparapenaveana, vicutuparahapa eta visuapiraya ema Espírítu Santo. Vaipa étaimahi visuapa eta tavarahaquene eta viáquehe. ¹³ Taicha te étachuchapuca esuapa eta tamauriqueneana tavarahaqueneanahi eta íáquehe, tájinapa íuchucuiyaimahi, ecaicuchihi eta épeniraya. Téhesera éhicali eta mavarahaquenehi ema Espírítu Santo, ínajicayareva eta íchira eta tavarahaqueneanahi eta íáquehe, ejacapainapa eta ícuchihi eta ítaresirainapa.

¹⁴ Taicha vimutuhi viti visuapanahi ema Espírítu Santo, machichahaviripa ema Viya. ¹⁵⁻¹⁶ Émaripa ema Espírítu Santo timetacahaviripa eta machichairahaviripa ema Viya. Visamavaipi te amahe eta visamure. Éma, vahi tipamicahémahi. Váhivare típarareca-hémahi tayehe eta ícuñayarehini. Tímimaticahénapasera eta yátupirahi macachichairavehi ema Viya. Tásiha, ecasiñavaipa eta mayehe ema Viya, émairaipahi ecaiyaquenehi. “Tátachicha Nucaiyaquene” ecaheyarehi. ¹⁷ Eta macachichahaviraipa ema Viya, vijacapainapa eta vícuchihi máijararuhaviya. Vicutinapa ema Cristo eta máijarasirahi eta máicuchihi éma. Puiti, eta vicitajivairahi te juca vítaresirahi, vicutihi ema Cristo eta macatajivairahi, tásiha, vicachanépa éma tayehe eta mávihahi eta majaraivahi.

¹⁸ Puiti németeacahi núti, tayanapane ichapepuca eta vicitajivairahi puiti juca sácheana, tájinachucha táichavahi taicha jararihiyare eta ichape táitsivayare, vijacapaya eta ichape víuricacarevaya te majaraiva ema Viya. ¹⁹ Jéhevare, tétavicavahi eta tajamurachacarevahi te táitecapapa eta sácheare eta vímairaya eta vicuchapaquenehi eta tacaitsivairaya eta viáquehe vimutu viti machichanaveana ema Viya. ²⁰⁻²² Tacutiquene te jena sácheare vicuchapaquenehi, tamutuinape témitiacayare eta témecatajivachahavianainihi te juca apaquehe. Tamutuinape arairuyare, tétavicavainapa eta táurivaya eta apaquehe. Vímaha puiti ticatajivanahi tamutu te juca apaquehe: Eta sárareana, ticajumanahi, táepenanihi; étapa eta sucurecana. Eta tacatajivairahi tacutihi eta sucatajivaira esu súcani esena ticacatiruhahi eta súnasira. Étasera eta arairuyare apaquehe, ticaitsivainapa tamutu. Vaipa pecatupairemahi, tamicauchainevarepa eta majaraiva ema Viya eta viávihaya viti machichanaveanahi. ²³ Ema Espírítu Santo máitsivacharipa eta víachanevana. Vaipa táesachaimahi vicha eta pecatu. Váipavare víchaimahi eta tamauriqueneana. Tásiha, víti, ichaperipa eta vicuchapiraipaicha eta jena sácheare eta tacaitsivairayare eta viáqueheana. Titauchavainapa eta macachichairahavinapa ema Viya. Yátupinapa mayehhavinapa.

²⁴⁻²⁵ Yátupihí puiti eta machichahavirahi ema Viya. Ichapevare eta vicasiñavahi eta mayehe eta vicuchapirahi eta víuchucuirayare te jena sácheare. Vácamicha tamutu, vímíyanava eta vicasiñavairahi eta mayehe támutu sácheana. Tapaenumavainapa vímahainapa, tájinapa vicuchapaimahi.

²⁶ Énerichuvare, ema Espírítu Santo tímícatacahavíhi te tamutu eta vimaratahaqueneanahi. Tavetiji tímícatacahavíhi eta vimaitusirahi eta viyaseuchiravayarehi te viyujarasirana. Éma, tiyaseuchahavi te viáchanevana. Víúmitichahi taicha muraca eta vivarairahi eta mayasearuana. Vaipa virataha véchajicahini. ²⁷ Émasera ema Viya máimatihí eta visamureana jácani vivarahaqueneana viyaseaca, étaripa eta mayasearapi ema Espírítu Santo. Taicha ema Espírítu Santo máimatihí eta mavarahaqueneanahi ema Viya, tásiha tiyaseuchahavíhi viti machaneranihi.

Éma Viya mavaraha ticachanehaviyare víti te majaraivahi

²⁸ Vécharipahivare tétavicavahi eta majaneasirahavíhi ema Viya vimutu viti vémunacanahi éma. Tayanapane vicitajivahipuca, éma tamutuhi tíuri máicha. Títauchavayare eta mapanereruana éma eta víuricacareyarehi eta máichuirahavíhi. ²⁹ Acaneripahi eta máimatirahavíhi, tinerejicahavípa machichahaviyarehi. Mavarahahi éma vicutiyare ema Machicha Jesucristo eta máurivahi. Tímícutijiricavayarehi viparapeya éma, véchavimuríhi eta macachichairahavíhi ema Viya. ³⁰ Tásiha, te máimahapa tíuri, tíchuhahavípa viti manerejiruanahi. Eta visuapirahi vipauchaipa éma, tijacapahavípa. Tásiha, tíjaracahavípa eta vícuchihi eta visíapiraya tayehe eta majaraiva.

Tájinaquene ticaerajachavimahi mayehe ema Viya taicha yátupihí eta máemunasirahavíhi

³¹ Tásiha puiti, nuvaraha yátupina eta eacacutiariraya eta juca: ¡Tétavicavahi eta macatiuchirahavíhi ema Viya! Tájina táichava eta nacatianasirahavípuca nácani achaneana. ¡Váhiserá nárataha ticapaquechahavianaimahi! ³² Eta majapanuírahavíhi ema Viya, vahi mavayuacahini máijararecapa ema Machicha eta nacapasirahi víchavenehi vimutu víti. Tásiha, mavetijinapa eta macatiuchirahaviyare puiti te tamutu eta jácani víchavaquenevana. ³³ Puiti tájinapa víviurevaina támicuñacahavíhini viti manerejiruanahi, taicha ema Viya tépachiacahaviripa eta majacapirahavíhi. ³⁴ Tájinaquenepa tímícuñacahavimahi taicha ema Cristo máepeninahaviripa, tichavaripavare títareca. Puiticha téjacahi te mavaure

ema Viya, téchajirucahavioripa éma. ³⁵ Ema Cristo, tájinaquene vahi máinajicaimahi eta máemunasirahavihi. Tásiha, yátupina eta vicasiañairaina éma. Tayanapanepuca vicatajivahi, váhivarepuca vicuitucahi vétupirica eta víchavaquenevanahi, vicamichahisera máicha. Te vécuhapuca, te vítajihapuca, vahi vicainajirucahini máicha. Te típicararecahavianapuca, te tipanajiricahavianapuca, te navarahapuca ticapacahaviana, váhiquenesera vicainajiruvahini máicha. ³⁶ Te tamutu eta juca, vicuti ena machanerana ema Viya ena táechajisihaque-nenahi acane eta Sagrada Escritura, ani tacahehi: “Tamutu sácheana ena ticatianacanaahi ema Viya titanucahavianahi viti machanerana, navaraha ticapacahaviyare. Tivapinavahani eta nacapasirahavihi, ticuti ena ticaparecanahi eta vaca te náichayare eta ichape piesta”. ³⁷⁻³⁹ Váhiquenesera vipicaimahi eta náipicararesirahavianahi. Tétavicavahi eta máetumechirahavihi ema Jesucristo táichavenehi eta máemunasirahavihi. Tájinavare tihapapicahavimahi eta véhisirahi éma. Núti nucasiñava ema Viáquenu eta majaneasirahaviya. Tájinaquene ticaerajicahavimahi eta máemunasirahavihi. Vahi étainapucaini eta vicatajivapuca eta vítaresira, étainapucaini eta vépenira, étainapucaini náipicararesirahavipuca puiti juca vítaresiraichaha, étainahipucaini táimipanererecahavihíni, jácani víchavaquenevaya eta vítaresiraya. Tájinaquene vahi vipicahini eta tipicacareanaahi te juca apaquehe, éna napucaini ena ichapemuriqueneana mayeheana ángele ema Váinaraji, étainahipucaini eta náifehivanahi. ¡Tájinaquene ticaerajicahavimahi mayehe ema Tata taicha yátupili eta máemunasirahavihi taicha viávahácahi ema Viáquenu Jesucristo!

9

Ena israelítana, éna manerejiruanaahi ema Viya

¹⁻³ Nuparapenaveana, tétavicavahi eta némunasirahi ena nujaneanana israelítana. Eta tacahe, ichape eta náimipanerechiranuhi nucatisamurehivare, táichavenehi eta namaehisirahi ema Viáquenu Jesucristo. Táetaviucha eta néfamiravahi eta nayehe, nuvarahainehi níjararecavahini nuyanahini núti te jena yucu, apaesa vahi nacuyanahini éna. Énainahini náurihini éna mayehe ema Cristo. (Núti nutupiruva puiti juca numetasirahehi. Ema Espíritu Santo, émaripa téchahi tamutu eta nupaneruanahi. Tímisanuahi eta nétupirisirahi eta numetasirahehi.) ⁴⁻⁵ Tétavicavahi eta náuricacarevayahini éna, taicha manerejiruanaahi ema Viya, máichavenehi ema náchucaequenéni Israel, mavarairahi ema Viya machichanaveanayarehi. Ichapemurihi eta macachaneravacahi, máimechirahi eta majaraiva. Máijaracavaca eta matratune eta majaneasiravacayare. Máimimaticahivare eta mavanairipiana. Máimimaticahivare eta náechajisiraya émachuca te nayujarasirana. Mametacahivare eta máitesirayarehi ema ticatiurahiye nayehe. Ena nani, tétavicavahi eta táurivahi eta náicuchiyarehini taicha manerejicavacahi ema Viya éna máumurivanrichuhi ema Cristo, najaneanarichuhi eta máucupaisirahi te juca apaquehe. Émasera, Víyahi éma. Puiticha émaripa téchahi tamutu. Máitavacacaipa eta vijirauchirahi. Amén.

⁶ Tayanapane eta macatajisiravacahi ichape ema Viya ena nujaneanana israelítana, tamapurujisera, éna namutuyaréni témepurecavana. Vahi návarahahini náehica. Váhisera étainahini táichahini eta mamaitauchirahi eta matratune ema Viya. Nasapihapa namapuruji namutuyaréni, vahi machichanaveanainahini ema Viya, táichavenehi eta namasuapajirivanahi. ⁷⁻⁹ Nuvaraha némechahe eta manerejisirahi ema Viya ena apinana machichanaveana ema Abraham. Matarihihi ema Ismael, émapa ema Isaac. Ema Viya vahi manerejicahini ema Ismael, máijarasiravacayarehi eta náicuchihíni ena mámariequeneana. Macarichu ema Isaac, manerejiruquenehi ema Viya. Eta mametacasihahi ema Abraham eta me Viya, ani tacahehi: “Puiti juca cájeyare, níjaracaviyare piti ésupa esu Sara ema echichayare, ticaijareyare Isaac. Núti níjaracayare eta máicuchiyarehi ema Isaac, énapa ena mámariequeneana” macahepa. Puiti nuvaraha ecaicutiaraya eta juca: Ema Viya máimijarechahi “nuchichanaveana” nacarichuhi ena navaraha najacapayare eta náicuchihíni, nasuapirahi eta máijarasiravahi nayehe.

¹⁰ Numetacahayareva eta táicharacavahi eta macachichairahi ema Isaac ésupa esu mayena Rebeca. Chámeanaahi ena náinapureanaahi nachichanaveana. ¹¹⁻¹³ Tacahe, vuúchaha náuchuchahini ena nani amuyana, tájinaichahavare napecaturainahini, táimaticarepahipucaini eta táuriva eta náichaquene. Te tiánehipa eta suínasirayare, ema Viya mametacapa esu Rebeca, ánipa macahe: “Chámeanayarehi ena pichichanaveana. Émasera ema títapucayare tiúchuca, éma, mósoyare mayehe ema máti”. Étapichuhi eta macayemaquenehi ema Viya te Sagrada Escritura, ani macahehi: “Némunacahi ema Jacob, máequenereruhi tiúchuca. Émasera ema Esaú, máinapurehi tiúchuca, vahi núrianaca éma” macahepa. Tacahe puiti, vímaticuenehaipahi eta táichararacavahi eta manerejisiravacahi ema Viya, máichuiravacahivare nácani mavarahaqueneana. Vahi étaparacainahini jácani táurivainahini eta náichaqueneana.

¹⁴ Puiti, vahi ecuimijachahini vahi tétupicava ema Viya eta manerejisiravacahi ena achaneana. Váhiquesera énéna tácahe. ¹⁵ Ema Viya mametacahivare ema Moisés, ani macahe: “Núti necha mácani nujapanuqueneyare” macahepa. ¹⁶ Tacahe, vahi vámutu vácuticaca eta majapanuirahavi ema Viya máichuirahaviyarehi. Éma téchahi eta manerejisiravacahi nácani majapanuqueneana máichuhaqueneanayare. Vahi étainahini eta náimijachiravahi tíchuhacareana taicha eta náurivahíji, napamisirahipuca naicha eta táuriqueneana. ¹⁷ Ema Viya ánvare macahehi eta te Sagrada Escritura mayehe ema rey te avasare Egipto: “Núti nunacavihi eta piávacurehi pirreyvayarehi, taicha nímativi eta pímuracasamurevahi. Nuvarahasera núti nímmatichaviyare eta tamutuiraíhi nurataha nítupajijiasirava, apaesa táimaticare eta níjare te tamutu eta juca apaquehe” macahepa ema Viya. ¹⁸ Tacahe, ema Viya manerejicahi nácani mavarahaqueneanayare máichuha. Máisapahisera ena masupajirairahana tajurucachuchaini eta namuracasamurevahi.

¹⁹ Németeaca, áninapapuca ecaheyare éti: “Ene tacahe jácani, ¿tájahapuca tacayema eta vicaviurevahi eta mayehe? Taicha vahi véchavahini eta víchirahi eta tamauriqueneana. Émarichuhinéni tíchahavíhi” ecahénapapuca éti. ²⁰ Vahi tacucahe eta epanereruana. ¿Vahi epicahini iácapamachirahi ema Viya? Eta cachapare mátejisi vahi táuricaímahi tácapama-chahini súcani tépiyacahi: “¿Tájaha tacayema pímpipanajicanu eta pépiyasiranuhi, váhiyapa nucunachacarehini eta pépiyasiranuhi?” vahi táichaimahi. ²¹ Esu típuarecarahi, ésu téchinavahi jácani táimahanayare eta súlpune, súchayarehi eta súcarahiyare, tásiha suépiyacavare eta suyehe vásenilla, tacahehi eta suvarahaquenehi.

²² Tatuparacahi ema Viya máicuñacavaneya namutu ena achaneana vámarajiqueneana, máimitaequenehavacavane éna. Tatuparacahivare máimerecavane eta máitupajijiasirava étapa eta masemirahi tayehe eta namaurivahi. Tétavicavahisera eta macayehavahi paciencia. ²³ Vítí apana, ene tacahehi eta táetaviuchirahi eta majapanuirahavíhi, máimerecahi eta táichapeva eta macunachacareva. Acaneripahi eta manerejisirahavíhi eta vicachaneraya éma tayehe eta majaraíva. ²⁴ Vahi vácarichuhini víti israelítana manerejiruhavíhi; énerichuhi etí apavasanana manerejiruhehivare. ²⁵⁻²⁶ Eta Sagrada Escritura májurehi ema víyarahaini Oseas, eta máechajiriruva ema Viya, ema yátupiquenehi eta macasiñacarevahi, ani macahehi: “Núti nunerejicayare níchuhavacayare ena ichapemuriqueneana ena achaneana apavasanana. Tayanapane vahi náesenicanuhini cape eta náítaresirahi, tíjacapacareanahisera nuyehe. Ichape eta némunasiravacayare taicha nuchichanaveanayarehi éna” macahepa. ²⁷ Énasera ena nujaneanana israelítana, ánimurianarichuhi ena tisupapanahi eta máichuarapi ema Viya. Nacuti éna ánimuriqueneana náechajisihahi ema víyarahaini profeta Isaías, ani macahehi: “Tétavicavahinéni visimutuva víti israelítana, ánimuríhavríchuchasera víti víchucuhanayare. ²⁸ Ema Viya, vaipa macamichaimahi eta náejecapiravanahi ena achaneana. Tijahúchavayarepa eta máicuñasirayare eta apaquehe. Máijahúchayarehi máitaequeneha tamutu”. ²⁹ Ánvare macahehi ema Isaías: “Muracarinehi eta náquipaisirahi eta víávasa. Te tacuíjahini eta majapanuirahavíhi ema Viya víti vinerejiruanahi véhica éma, vítaequenehini vímutu. Nájina nánasihini te víávasa. Vícutiyaréni ena ticavasanahi te Sodoma, énapa te Gomorra, máitaequeneruanahi ema Viya, ema tétavicava eta máitupajijiasirava, máituruequenehahi tamutu” macahepa ema Isaías.

Ena israelítana, vahi návaraha náehica ema Jesucristo

³⁰ Nuvaraha numetacahe eta juca, apaesa écha. Éna apavasanana nasapíhahi tíjacapacareanahi me Viya, váhinéni náesenichahini éma cape eta náítaresirahi. Tacarichusera puiti, táichavenehi eta nacasiñavairahi eta mayehe, tíjacapacareanaripahi éna. ³¹ Énasera ena nujaneanana, tímjachavanahi tíjacapacareanayarehi me Viya táichavenehi eta navarairahi náehica eta vanairipiana. Váhisera najacapacarehini. ³² Taicha éna, náempururecahi eta najacapacarevayarehini me Viya. Vahi návarahahini nacasiñavahini mayehe ema Machicha Jesús. Éna tímjachavanahi étachucha nacunachíavahi tayehe eta náítauchirahi eta navanesiracacanhahi. Eta tivíuchahi eta nacatiansirahi muracaquenehi ema Víaquenu Jesús, vahi návarahahini nacasiñavahini eta mayehe. ³³ Ema Viya, eta máechajiriruvana eta Sagrada Escritura, ani macahehi: “Puiti névatacaya ema Nuchicha Cristo nayehe ena israelítana. Nímahaya nájahapuca ticatíananaya éma, énapa ena ticasiñavanayare eta mayehe. Nácani ticatíananapuca, énajívyare ticamítiequenehavanayare, ticaicunayareva táicha. Nácanisera ticasiñavanayare eta mayehe ema nuvaneruyare, vahi máinajiacavacaimahi” macahepa ema Viya.

10

¹ Nuparapenaveana, tétavicavahi eta néñamiravahi nayehe ena nujaneana israelítana. Eta nuyaseserepi me Viya te nuyujarasirana, nuvarahahi náuchucuhahini. ²⁻³ Nucuna-

chavacahi éna eta náetaviuchirahi eta napicauchirahi ema Viya. Téjcapavanahisera éna eta táichararacavahi eta vijacapacareva me Viya. Éna, tímiuricavanahi tíurianahi, tímijachavanahi tijacapacareanahi me Viya táichavenehi eta náitauchirahíji eta vanairipiana. Vuíchaha náimatihini eta táichararacavayarehi eta najacapacareva eta nacasiñavairaya me Viya. Váhivare návarahahini nasuapahini. ⁴Taicha ema Cristo macaepaharipa eta tasuapacarevahi eta viyehi eta mavanairipiana ema Moisés. Vaipa étaparacaina eta viúchucuiraya. Tacarichu eta vicasiñavairahi mayehe éma, vijacapacareyare me Viya.

⁵ Émarichuhi ema Moisés, muracahi eta matuparasirahi ena achaneana, ánipa macahe: “Éti, tapamiruanahi eta itauchirayarehi tamutu eta vanairipiana. Te yátupipuca itauchahi tamutu sácheana, te tájinapuca eta éjcapiravainahi, tásiha éjcapacarenapa me Viya” macahepa. Nájinasera náratahahini náitauchahini eta vanairipiana. ⁶⁻⁸ Máejerarepanasera eta vijacapacarevahi me Viya táichavenehi eta vicasiñavaira eta mayehe. Vahi tácame-sahini vitanupanahini ema Cristo te anuma, taicha tíucupauchahaviripa éma. Váhivare tácomesahini vitanupanahini te máecari vicaechepupanahini éma, taicha téchepucaripahi éma. Tacamunuhisera eta vicasiñavairaina mayehe ema Cristo te visamureana. Eta vikiparasiraina eta máijare eta víjarasirava eta véhisirayare éma.

Tásiha nútí, eta nucametarairuira, néchajisiha étachucha eta arairu véhiruhi eta majac-pirahavihi ema Viya viti vicasiñavanahi eta mayehe. ⁹⁻¹⁰ Eta juca eta nímiturapi: Eta viúchucuiraya viti achaneana, tacamunuhi eta visuapiraina ema Viya eta macaechepu-sirahi ema Machicha te máecari. Éma, macaepahayare eta vipeaturana, te yátupina eta vicasiñavairahi te visamure ema Jesucristo. Tacamunuhivare yátupina eta víjarasiravahi véhica éma. Víchayarehi éma: “Núti njaracavahi néhicavi, Tata Jesús. Pítipa náquenuvihi, péchanupa pítí” vicahenapa.

¹¹ Eta Sagrada Escritura, ani tacahehi: “Nácani ticasíñavanayare mayehe ema nuvene-ruyare, tájina náichiraváimahi. Tamutu tíuriyare eta náitaresira”. ¹² Ema Viya, vahi máepuruimahi nácani ticasíñavanahi mayehe. Ticuticayarehi eta majacpiravaca ena israelítana énapa ena apavasanana, taicha émaichuhi ema Viáquenuhi vímutu. Tétavicava eta majapanuirahavihi, ticuchucuhaviviya vímutu viti vicasiñavanahi mayehe. ¹³ Taicha ánvare tacahehi eta Sagrada Escritura: “Ema Viáquenu macuchucuhavacayare namutu nácani tipiaracanahi eta máijare táichavenehi eta nacasiñavairahi mayehe” tacahepa.

¹⁴ Tásiha, eta náuchucuhairayare, tacamunu napiaracaya eta máijare ema Viáquenu táichavenehi eta nacasiñavaira mayehe. Táurivaina eta nasamirahi eta náimitucasivana. Tacahe, tacamunuhivare eta viyana vipaicayare viti te tamutu avasareana eta vicameta-rairuiraya nayehe éna. ¹⁵ Émaripa ema Viáquenu, ichape eta máichuhairahavihi viti visuapajirahiana, mavaraha eta vicametarairuirayare. Títauchavayare eta tacayemaquene eta Sagrada Escritura, ani tacahehi: “Tétavicavahi eta náurisamurevana ena achaneana eta nasamirahi eta táuriquenehi máichuarapi ema Viya eta majacpiravacaya. Tásiha tíuriyare eta majacpirahavihi viti mavaneruana ema Viya” tacahepa.

¹⁶ Váhiserá námutuhini nasuapahini eta juca arairuhi véhiruhi vímitucaquenehi. Ema Isaías, ani macahehi te Sagrada Escritura: “Tata Náquenu, ánimurianarichu ena tisuapanahi eta juca nímiturapiana nuvanahiana piyehe” macahepa. ¹⁷ Téhesera te táurihini nasama ena achaneana eta vímiturapiana mayehe ema Cristo, titupiruvanayarehi ticasíñavana mayehe.

¹⁸⁻¹⁹ Esamanuchaha. Ema nujaneanana israelítana, tájina naviyahini nayunaca eta namacasiñavairahini mayehe ema Cristo. Nasamapa eta máechajiriruvana ema Viya, taicha te tamutu avasareana tisamacarepaipa. Eta Sagrada Escritura, ani tacahehi: “Tamuturipahi te juca apaquehe ticasamahuhí. Eta máechajiriruva ema Viya tamuturipa-hivare tacaitatapahihi te juca taquiñacucujiana te apaquehe” tacahepa. Náimatipavare. Váhivare návarahahini nasuapa. Eta máechajiriruvanahi ema Viya májurehi ema Moisés, ani macahehi: “Ímaha, eti israelítana. Nasapihaya nujacpavacayare nuti ena apamuriana achaneana, énaripa ena máesenicanurahanahi. Nuvaraha etsirihaini éti, éneuchavayare eta nuyehe” macahepa. ²⁰ Jararihivare eta apana máechajiriruvahi, májurehi ema víyarahaini Isaías, ani macahehi: “Núti nímerecavaipa nayehe ena nani váhiquenehi náesenicanuhini, váhivare nacayaseseruhini”. ²¹ Ánvare macahe ema Viya: “Tamutuhí sácheana eta níchuiravacahi ena nani israelítana. Tétavicavahisera eta namasuapajiraivahi. Vahi návara-hahini nachavahini eta nuyehe” macahepa.

11

Ánimurianarichu ena israelítana ena tisuapajirahianahi, macuchucureanayare ema Viya

¹ Esamanuchaha. Nuvaraha vahi ecuimijachaimahi macaerajicavacahipuca ema Viya ena machanerana israelítana. ¡Váhiquene énéna tácahe! Éti ímatinuhi nútirichuhi israelítanuhi, mámaríequenenuhivare ema Abraham, émapa ema apanavare náchuca Benjamín. ² Eta acane, tétavicavahi eta máemunasirahavihi ema Viya viti israelítana. Puíticha vahi máinjaciachavihini. Échava éti eta tacayemahi eta Sagrada Escritura eta máichavaquenevahi ema víyarahaini profeta Elías. Ani tacachehi eta mametauresiravahi me Viya eta mayujarasirahi: ³ “Tátachicha Nucaiyaquene, ena nani apamuriana nujaneanana israelítana nacapapajicavacahi namutu ena piyeheana profetana nuchamuriana. Puiti navaraha-hivare ticapacanua. Navetataicaipavare eta pipena. Nucarinehi núti nútarecahi puiti” macahepa. ⁴ Tásiha, ema Viya majicapapa, ániapa macahe: “Vahi picarichuhini píti. Nararihi siete mil ena ajairana nujanearuanahi, ticasíñanuanahi. Vahi náisapavahini éna náepuyumirauchahini ema nasiñaraji Baál ena masuapajirairahanatatajihi” macahepa ema Viya. ⁵ Ene vicahehi viti, vahi vámutuhini viti israelítana masuapajirairahanahi me Viya. Vitiarichahá ánimurihavihi viti manerejiruanahi majapanuquenehavihi. ⁶ Numetacahe: Ema Viya, eta majapanuirahavihi viti israelítana, váhiquene táichavenénahini jácani víchirainahipucaini eta táuriqueneana. Jéhesare, tijapanuhavihi táichavenehi eta táetaviuchirahi eta máemunasirahavihi. Tájina étaparacaina eta víchirapuca eta táuriqueneana.

⁷ Tacahe, vímaha puiti ena nujaneanana, ánimurianarichuhi ena ticasíñavanahi me Cristo, manerejiruanahi majacapaqueneanahi. Énasamisera ena apamuriana, vahi nacasiñavahini mayehe, muracanaichucha te nasamureana. Étapa tivíuchahi vahi tijacapacareanaimahi me Viya, tayanapane nácani navarahahi. ⁸ Títauchavapahi eta táechajiriruvahi eta Sagrada Escritura eta nayehe. Émarichuhi ema Viya ticamitisicavacahi apaesa vahi nacucaicutiara eta máimiturapiana ema Cristo. Puíticha ene nacahehi. ⁹ Ema víyarahaini David, ánivare macahehi tayehe eta Sagrada Escritura: “Ena nani, ticasíñava-vaicana eta tavayuchirahi eta náimahaqueneana. Ichapemuríhi eta nacapiestairana náenisiracacana. Ichapevaresera eta náichirahi eta tamauriqueneana. Puíti, Tátachicha, písvichayare eta náurisamurevahi. Járájpainapa eta pícuñasiravacayare. ¹⁰ Nuvaraha púchuquianaina pícha. Vahi nacucaicutiara eta náitaresira. Tacaetipapaicainapa eta tajitacareva eta napisirahi. Tájinapa nanarasiraimahi” macahehi ema David.

Eta majacapirahi ema Viya ena apanapanenejiqueneana

¹¹ Esamanuchaha. Nuvaraha vahi ecuimijacha tanasiyarehi eta náquipaisirahi ena nujaneanana. ¡Váhiquene énéna tácahe! Puítisera nasapiha ena apavasanana najacapacarehi me Viya, taicha mavaraha máimicatsiriacavaca ena israelítana, apaesa náneuchavayare eta mayehe. ¹² Puíti tijacapacareanahi me Viya namuturipa ena apanapanenejiqueneana achaneana te juca apaquehe, taicha eta náquipaisiravaipa ena nujaneanana. Puíti eti apavasanana, tétavicavahi eta iúricacarevaipa. Jéhesare tíapajucavapanayaresera eta iúricacarevaya éti, étapa eta náuricacarevayare éna, te nachavapa náneuchava.

¹³ Németeaca ímatinuhi núti eta nucatuparahairapa eta nímitusiraheyare eti apavasanana. Táiutusiava puíti tétavicavahi eta nucunachiravahi eta nucacemataneasirahehi. ¹⁴ Numetacavacahi ena nujaneanana eta yátupirahi eta ejacapacareirahi me Viya, apaesa nímahahini éna, te najamurachayarepuca eta najacapacarevahi éna apanava, ticutiheanayarepuca éti. Nuvaraha nanerejicavahini nácani náneuchavahini, apaesa náuchucuhayare. ¹⁵ Páureanasami éna eta náquipaisirahi. Esapíhahi éti apanapanenejiqueneana te juca apaquehe, tétavicavahi táuriva eta ejacapacarevahi me Viya. Jéhesaresera, tétavicavapaini eta tajaravainahini te visamure te nachavirainahini, náneuchavapaini éna, náhicapaini ema Cristo. Tímicutitijiricavapaini eta navayuchirahi eta náurisamureva ena achaneana te macaechepusiravacaina namutu ena náepenaqueneana tíurianahi. ¹⁶ Eta natarihirapa puíti ena nujaneanana tinerejicavanahi téhicana ema Cristo, németeaca namutuyare jácani náhicayare ena apamuriana.

Tacutiquene, viti machaneranahi ema Viya vicuti eta ichape yucuqui. Ema Abraham macutihí eta táquehequi. Viti israelítana mámaríequeneanaini vicutihí eta tatavajiana. Ema víachucaini majacapaqueneripa ema Viya. Tásiha, németeaca namutuyaréni ena nujaneanana, énerichuvare náneuchavapapucaini nacasiñavahini me Viya te jácani sácheyare, apaesa najacapacarevarepaini éna apanava. ¹⁷ Puíti ena nujaneanana náquipairuvahi, vuíchaha nasiapahini eta náicuchihí te namuri ena machaneranahi ema Viya. Étipa eti apavasanana, esapíhaipa machaneraheripa ema Viya. Tíjaracaheripa éna eta táuricacarequene iávíhayarehini te majaravahi eta náicuchiníhi ena israelítana. ¹⁸ Puíti étipavaipahi machanerahéhi ema Viya. Nutuparacahesera, vahi ecucasiñavavaica eta ítujisiravahi esipapa tayehe eta náicuchihí ena nujaneanana israelítana. Taicha vahi ecachuricavacaimahi éna eta iúrivahinéni eta ejacapacarevahi me Viya. Vahi ecuemitísica eta esiapirahi táichahi

eta náquipaisiravahi ena masuapajirairahana. Éti máetumechaqueneana ema Viya; vahi étina étumechahini éma.

¹⁹ Váhivaresera ecupanerecha te esamureana: “Yátupi éna máquijicavacahi ema Viya eta namasuapajiravahi. Tásiha, tinerejicahavipa víti, taicha viúripvani víti eta máimairahavihi ema Viya” váhinéni tácahehini eta epanereru. ²⁰ Tacahe, échapava éti apanava, machu ácutiriana ena nujaneanana. Éna, eta náquipaisiravahi tímucitijiricahi ticaechuanahi, táichavenihi eta namacasiñavairahi me Viya. Puiti étipa náitsivahi éna eta ecasiñavairahi mayehe. Váhisera ecucasiñavavaica. Ecuneuchava éti apanava. Epicaucha ema Viya. ²¹ Éna nujaneanana israelítana, éna tnapucanayarehíni nasiapamuriha ena machanerana ema Viya. Váhisera nacasiñavahini eta mayehe. Éti apanava, tacamunuhivare ecasiñava eta mayehe apaesa esiapahini. ²² Tacahe, ticaecheravapa eta máurivahi ema Viya, étapa eta matupiruvahi. Tétavicavahi eta matupiruvairahi eta náerajisiravacahi ena masuapajirairahana. Tétavicavahivare eta máurivahi eta eyehe, eta ímianiravahi eta ecasiñavairahi eta máurivahi. Nacánisera vahi nacasiñaimahi, macaerajicavacayare. ²³ Tiuri puiti, te náeneuchavapuca me Viya ena nujaneanana, nacasiñavahivarepuca mayehe, éma majacavacayarehi éna, machichanaveanavarepa. Taicha éma, tétavicavahi eta majapanuirahi. ²⁴ Taicha éti cape juca eta itaresira, énerichuvare masuapajirairahéhi éti, emaensisirahi ema Viya, tásiha, tájinahinéni ejacapacarevainahini. Esapihasera éti esiapamuriharipa ena apamuriana machaneranahi ema Viya. Ene nacaheharehi ena israelítana. Éna, te náesenicapa ema Viya, camuriqueneanayarehi ena ticasíñavanaya mayehe. Tisiapanavareva tayehe eta náicuchihi.

Te namutupa ena apavasanana manerejiruanahi ema Viya, tapaenumavainapa náesenicayare ema Viya ena israelítana

²⁵ Tiuri puiti, nuparapaveana, vahi nuvaraha ecasiñavavaica eta ítupajijiasirava. Tásiha, nuvaraha numetacahe eta juca tayumurevainihi, máimimatichaqueneñuhisera ema Viya. Eta namuracasamurevavacahi ena nujaneanana, vahi tánasimahi. Téhesera námutupa nasiapa ena apavasanana manerejiruanahi ema Viya, napaenumavainapa ena nujaneanana náesenicayare ema Viya. ²⁶ Tacahe, eta nacasiñavaira me Viya, tiúchucunayare namutu éna. Títauchavayare eta máechajiruvahi ema Viya te Sagrada Escritura, aní macahehi: “Nuvanecayare ema Ticatiurahiyare nayehe ena achaneana. Ticavacureyarehi te Jerusalén. Masipahacavacayare ena majaneanana israelítana eta navainarajivana, máitsivachirayareva eta náitaresirana. ²⁷ Núti nátauchayare eta nutratunehi nayehe eta népachiasiravacayare namutu eta napecaturana” macahepa.

²⁸ Tacahe, ena nujaneanana nacatianacapa puiti eta juca véhiruhi. Étasarepa ítujisavayare éti. Émasera ema Viya máemunacavacarichucha, taicha manerejiruanahi ena náchucanaveanaini. ²⁹ Taicha ema Viya, tamutu eta májararuanahi, vahi máemepururecáimahi. Máitachayarehiva tamutu eta máichuarapiana. ³⁰ Éti acane eta itaresirana, vahi ávarahahini esuapahini ema Viya. Puitisera eta namasuapajiravahi ena israelítana, ichaperipahi eta majapanuirahéhi éma. ³¹ Énerichuvare éna, te jena sácheyare, majapanuvacayarehi éna, tacuti eta majapanuirahéhi éti puiti. ³² Taicha ema Viya máimatíhi eta emutuirahi emasuapajiravahi éti apavasanana, vítipa víti israelítana. Mavarahasera viciticacayarehi eta majapanuirahavíhi vímutu.

³³ Ema Viya, ¡tétavicavahi eta majapanuravahi eta viyehé, tavayuchahi eta viúricacarevahi máicha! ¡Tétavicavahivare eta máitupajijiasiravahi! ¡Tétavicavahivare eta macachuriasirahavíhi eta máimatíequenehairahi tamutu! ¡Matupiruvahi éma tamutu eta manerejirisirahi! ¡Vahi víturuequenehaimahi vicaicutiara eta mapaneruana! ³⁴ Taicha nájiná tímátíequenehaimahi eta mapaneruana. Nájinavare náimitucahíni éma. ³⁵ Nájinavare nájaracasichahíni tájaháinahípucáini, étanainahípucáini máitsirijicavacahípucáini eta májarasirahi éma. ³⁶ Taicha tamutu eta tatiarihiqueneanahi, tacarichu tásihaqueneanahi mayehe, étaripa eta vjararuanahi mayehe, mavaraha táitachavapaini eta mapanereruanahi táuriqueneanahi. ¡Máitavacacahi eta vicunachirahi éma! Amén.

12

Vicatuparahahi yátupina vjaracava eta véhisira ema Viya

¹ Tacahe, nuparapaveana, nuvaraha ácaicutiara yátupina eta majapanuirahéhi ema Viya. Eta táetaviuchirahi eta majapanuirahéhi, ecaturarahahi íjaracava yátupina eta ídqueheana étapa eta íchanevana eta éhisiraina émainachucha ema Jesucristo. Tacutihi eta íamavahuhi me Viya. Jéhesare, tétavicavaya eta ecurisamurechiraya éma tayehe tamutu eta ecaemataneasirana éma. ² Énerichuvare eta itaresirana, vaipa ecuehica eta tayeherépi eta juca apaquehe. Ísivachapasera eta epanereruana, apaesa námutupa apainahi eta

ítaresiraina. Tásiha, ímatisarepa eta mavaraqueneanahi ema Viya, ítucayareva icha eta táuriqueneana. Ecurisamurechayare éma eta íchira eta tatupiruvaqueneanahi.

³ Núti mayehenuhi apóstole ema Viya. Tituparacanuhi numetacaheyare: Emutu éti, tátupiruva eta epanereruana tayehe eta ítucaqueneana máijararuheanahi ema Viya, apaesa tauri eta ecaemataneasiraina mayehe. Nacuija nacasiñavavaica. ⁴ Tacutihi eta viáquehe víti achaneana. Camurianahi eta táunavanahi, táemataneapachuhivare. Vahi étainarichuhini eta táitucaqueneanahi. ⁵ Ene vicahehi víti. Camurihavihi, étanaichuhisera eta viáquehehi eta viúrujasiracacahi eta véhisirahi ema Cristo, vímicatacaairahi eta vicaemataneasirahi éma.

⁶ Ema Viya, apanapanenejili eta vítucaqueneana eta máijarasirahavihi eta vémataneapachuyarehi máicha. Tacamunuhisera vahi vicuemepururecava eta vítucaqueneanahi máijararuhavianahi, apaesa táuri eta vicaemataneasiraya. Te tjaracahavipuca éma eta vítusirayare vicametarairu, vijaneacavainapa, machu vihapapiricahini eta táimiturapiana eta véhiruhi. ⁷ Te tjaracahavipuca eta vítusirayare vímicataca ena vichamuriana, tatupiruvayarehi te visamure eta vímicatasiravacaya. Nácani náitucahi tímiturecana, vahi nayacujimahi eta náimituresiraya. ⁸ Nácani náituruequenehahi eta náetumechiraya nácani apana, váhivare nayacujimahi. Nácani tjaracasírecanahi eta náimahaqueneana, tátupiruvayarehi te nasamure eta nacajirahi ena ticamunuvanahi. Nácani cátpararahanahi téchapajiricarianayare, tivapinavayare eta náitauchirahi eta natuparacasivahi. Nácani tímicitacananahi ena tijapanucareanahi, tiúrisamureanaya eta náimicataresir ahi.

Eta viúrivahi nayehe ena achaneana ticaecherayare eta yátupirahi eta véhisirahi ema Viáquenu Jesucristo

⁹ Nuparapenaveana, yátupina eta émunasiracacaina ena echamuriana. Vahi apimirahe mahi, ímijachava eta émunasiracaca. Evapinavaya eta íchira eta táuriqueneana. Épuruyare eta tamauriqueneana. ¹⁰ Tiápajucavainapa eta émunajirisiracacaina eta echamuricaairahi. Ecunachainapa namutu ena echamuriana. Yátupina eta epicauchiracacahi. ¹¹ Étumechavaina eta ecaemataneasirahi ema Viáquenu. Tavapinava eta esamureana. Tacuija eplujuvavacaina.

¹² Iúrisamurereacavayare eta ejacapiraya eta ecuchapaquenehi. Ecayeheyare paciencia tayehe eta ecatajivairana. Vahi tacuechuquiha eta eyujarasirana.

¹³ Ímicatajiricaca ena echamuriana, tayehe eta nacamunuiravana. Tiúriyare eta ejacapiracaca te epaipuchacaca.

¹⁴ Te natiarihinapuca nácani náehahe, napanajiricahepuca, eJapanuyare éna. Eyaseuchaya me Viya eta náuricacarevaina. Váhisera ecuyaseucha jácani náicuñavanéna.

¹⁵ Te tatiarihinapuca jácani tiúrisamurecare nayehe nácani, éti apanava iúrisamureyareva. Téhesera te tatiarihinapuca eta ticatisamurecarehi nayehe nácani, eJapanuvacayare éna, íyahayareva éti apana.

¹⁶ Ecurisamurechacacaya ena echamuriana. Vahi ecucasíñavavairica. Ácuticacahi nayehe ena mánsuanahi, váhivare ecucasíñava eta ítusirahi.

¹⁷ Te tatiarihinapuca náicharacahe eta nacatichirahe, vahi ecuitsicava. Íchayaresera eta jácani táuriqueneanahi nayehe namutu ena achaneana. ¹⁸ Nacuija ecucatiha. Te natiarihinapuca nactianacahe eyanauchayare te napena émemunacavayare apaesa vaipa nacucatihahe. ¹⁹ Némunaruqueneana, te tájahapuca náicharacahe, vahi ecuitsicava. Cápachi mararihi ema Viya, máimahainepa éma téchayare eta náicuñayare. Taicha ema Viáquenu, ani macahehi tayehe eta Sagrada Escritura: “Nimahainepa núti eta táitsivayare. Núti néchahi eta náicuñayare ena ticaviurevanahi eyehe” macahepa. ²⁰ Ánivare macahe éma: “Te pímaha máeculhapahi mácani ticatianacavihi, pénicayare. Te mamaunepahipuca, pésicayare. Eta máimairainahi eta pémunasirahi, ticatisamurevainapa titsirihainapa” macahepa. ²¹ Vahi ecuisapava ítsicava eta náichiraheya te táíñehiqueneana. Étumechavasera eta íchiraya eta táuriqueneana. Étapa ticaepahayare eta nasemaneva.

13

¹ Éti, emutu esupajirahiyare nayehe ena tuparairucana, taicha éna manacaqueneanahi ema Viya eta návacureanahi. Nájina émanaina máemunasiricavahini. ² Eta tacahe, nácani tiácapauchavanahi nayehe ena tuparairucana, tímicutijiricavahi nácapaemachahivare ema Viya. Jéhesare, ticaicuñanayarehi ena téjecapavanaripahi. ³ Taicha ena tuparairucana, vahi étaina tímínacavacahi éna eta náipicararesiraya nácani tíchanahi eta táuriqueneana. Nácansera ticaviurevanahi, táuricahi tipicanayarehi. Te evarahahipuca iúri nayehe, esupajirahiya nayehe, tásiha, éna ticunachaheanainapa. ⁴ Taicha ema Viya, émahí macaejacavaca te návacureanahi, náurichayarehi ena achaneana. Téhesera ecaviurevahi, epicayarehi

taicha éna vahi támapurujimahi eta nacatuparahairahi. Natuparacasivahi me Viya eta náicuñasirayare ena ticaviurevana. ⁵ Eta tacahe, tavarahaichu esuapajirahiyare nayehe ena tuparairucana, apaesa vahi nacuicuñacahe. Tavetijipa esuapajirahiyare taicha éti etuparacasivahi me Viya. ⁶ Tacutiquene tatuparacahéhi eta evachachirayare eta impuesto. Taicha ena tuparairucana, natuparacasivaichuhi mayehe ema Viya, náitachiraya eta nacaemataneasira éna.

⁷ Tásiha, ítaurahiyare te jácani nayaseasiraheana eta cuota étapa eta nayaseasiraheana eta impuesto. Epicauchavare nácani tipicauchacareanahi. Émunacavare nácani témunacacareanahi. ⁸ Nacuija ecantevéya. Tituparacahe evachachavanezare jácani entévehi nayehe. Tituparacahévere émunacacayare ena echamuriana. Nácani títauchanahi eta juca náemunasira, náitachahi eta mavanairipi ema Viya. ⁹⁻¹⁰ Te pémunarahihi piti nayehe ena achaneana piparaepiyanahi ticutiyaehi eta pémunasiravahi píti, vahi pipanerechaimahi picapinaru, váhivare picaparecaimahi, váhivare piámerecaimahi, váhivare pivehaimahi esu apana esena mayena ema apana achane, váhivare pépiyaequenercaimahi. Taicha nácani témunarahianahi, vahi nacaetemaímahi ena naparaepiyana. Te yátupi eta émunaraivaya, máejerare eta ítachirayare tamutu eta vanairipiana.

¹¹ Eta tacahezare eta ítasesirayare. Vaipa véjekaracha eta sácheana. Vahi vímacacaracavaimahi. Vitsecavayarehisera taicha víánehipaicha eta jena sáchezare eta máitecapiraya ema véhiruhi. ¹² Eta vicuchapiraipa eta machavirayare ema Viáquenu, tacutihi te vicuchapaipa te jena yati eta tijararahi. Puiti vímahapa eta tajarahiquene. Tásiha, ínajicapa eta íchaqueneanaini te timapicu. Puiti tíapajucavasera eta iúrivana, étapa eta íchaqueneanaina te tijarahi. ¹³ Ímicapicauchavayare eta ítasesirana. Íurisiyare tamutu sácheana. Vahi ecavahaimahi. Váhivare ímisiapavaimahi nayehe ena ticapiestaranahi. Váhivare túhusihémahi. Vahi tivayuacahémahi eta tájiparacana. Vaipa iúmeharerecaimahi, váhivare ecapinarurahimahi. ¹⁴ Tásihasera, ímereca eta iúrivaina. Ácuti ema Viáquenu Jesucristo eta máurivahi éma. Vaipa ecusuapa eta tajamarachaqueneanahi eta iáqueheana. Váhivare ecupanerecha eta íchiraya éta.

14

Vahi ecucaecahi ena echamuriana

¹ Te napauchahépuca nácani navarahahi tisiapamurihaheana, echamurianayare, vahi ecuepuruvaca. Ejanuvacaserá eta ejacapiraya. Te jácani apaesarichuhi eta nacasiñavairahi mayehe ema Viáquenu, napicauchaichaha eta nayeherépiana ichasiana, vahi ecuacapaemachahini éna. ²⁻³ Nararihi ena títuca nanica tamutu eta tinicacareanahi. Nararihivare ena apanahi eta nayeherépi, náimijachahi vahi tiuri nanica eta vaca. Tásiha, máechejirechucha eta nanica. Éna, vuíchaha muracanainahichaini tayehe eta véhiruhi. Eti ítuca enica tamutu, vahi ecuepuruvaca éna vahi tinicanahi eta vaca. Étipa eti máechejirehi eta enica, váhivare ecuepuruvaca ena tinicanahi tamutu. Taicha majacapaquenehevacaipahi ema Viya emutu. ⁴ Vahi ecuimijachavaimahi étinahi échavaca eyaseserocarahi ena machaneranahi ema Viya. Éma, téchavacahi ena mavanaranahi. Máimaraacahi eta táurivahi náicha, macunachavacahi éna. Te váhipuca, émainahi techa eta máemechiravacaya.

⁵ Tacutiquene váhivare ecuepuruvaca tayehe eta sache iúrujisiravana eyujarasirana. Nararihi náimijachahi tíuripana te sávarumuhuana. Nararihivare tíuripanaíhi nasama te lumincumuhuana. Nararihivare tamutuchucha sácheana tíuríhi eta náimairahi. Étipa échinava eta sache éhiruyare. ⁶ Nácani tiyujarauchavanahi te jena sache, ena navarahahi napicaucha ema Viáquenu. Ena apamuriana, vahi tácameshini nanerejichahini eta sache, éna apanava napicauchahi ema Viáquenu. Ena nacahehi nácani tamutuchucha nanicahi, eta napicauchirahi ema Viáquenu, nahasulupayachahi éma. Nácanisera náepuruhi nanica eta jácani tinicacareana, táichavenehivare eta napicauchirahi ema Viya, nahasulupayachavare éma. Tamutuhi tiuri naicha.

⁷⁻⁸ Taicha vahi vítijiriruváinahini eta vítaresira. Émaripa téchahavihi ema Viáquenu. Émachucha vicaematanearuhi, visuapirayarehi éma te tamutu. Étaripa eta vépenirapuca, váhivare vítijiriruváinahini véchinavahini. Émarichuhi téchahavíhivare te tamutu. ⁹ Ema Jesucristo, tatuparacahi eta máepeninahaviyarehi, típechavayarehivare tichava títareca, apaesa émainapa Viáquenuya viti vítareruanaichaha, énapa ena náepenaqueneanaripa.

¹⁰ Étisera, vahi étinahini tátuparacahéhini échavaca eyaseserocarahi ena echamuriana. Váhivare étupicavahini eta épurujirisiracacahi. Échavarichu eta vimutuirayare vicayaseserehi te mamirahu ema Viáquenu Jesucristo. ¹¹ Ema Viáquenu, ani macahehi te Sagrada Escritura: “Núti acaneripahi eta nítaresirahi; puíticha máepenacacanhivare eta nutiaríhivare. Tásiha, nútirichu nucatuparahahi nuyaseserecavacayare namutu ena achaneana.

Namutu tépuyumirauchanuanayare te numirahu. Tímatinuanayare eta yátupirahi nútí tituparacanu júesnuhi nayehe, nuti Iáquenu” macahepa. ¹² Tacahe, vimutu émanapachuhaviya vimetaurecava mayehe ema Viya. Éma máimatiya tamutu. Tájina virataha viyumurucahini.

Vahi ecuimiaquipaica ena echamuriana

¹³ Tásiha éti, vaipa ímijachavaimahi étinahi échavaca, eyaseserecarahi ena echamuriana. Táurisera eta ecachanéracacaina. Tasapihasera, te tamutu jácani íchaqueneana, étaviuchaya eta iúrivahi nayehe. Tacuija jácani táimiaquipaicavaca éna ícha. ¹⁴ Nútí, eta mavanaranuirahi ema Jesucristo, numetacahe: Tájina eta tinicacareana tamaeperajicahavimahi eta vinisirahi. Nararihiserá ena vichamuriana, tépuruana eta jácani tinicacareana, napisirahi eta tamaeperajisiravacayahéji. ¹⁵ Tásiha, nuconsejachahe: Vahi ecuimiyusemaca ena nani, váhivare ecuacapaemachahini tayehe eta jácani tinicacare, machu ímicainajiruchavaca ena echamuriana mavachareruanahi ema Cristo eta máepenirahi. ¹⁶ Máchuvare émechajisiava tayehe eta ímatiquenehi tíuri. ¹⁷ Taicha eta véhiruhi ema Viya, vahi étaparacaina jácani vinicaquenerépiana, véraqueneana. Étaripa eta ticunachacarehi mayehe, eta víchirapaipa eta táuriqueneana, navetijiva nayehe ena vichamuriana. Mavarahahivare vítucavahini tájina tahapapiricahini eta vicurujisiracacahi, apaesa táimiyavanini eta viúrisamureva vimutu, maicha ema Espíritu Santo. ¹⁸ Éti, te yátupina eta émunasiravacahi ena echamuriana tépuruanahi eta jácani tinicacare, tíuriyare eta ecaemataneasiraya ema Cristo. Tétavicavahi eta ecurisamurechirahi ema Viya, ecunachacarehivare nayehe ena achaneana.

¹⁹ Tacahe, vitanucayare eta viúrivaya nayehe ena vichamuriana, apaesa vétumechacaca tayehe eta véhiruhi. ²⁰ Vaipa íacapaemachacacaimahi tayehe eta jácani tinicacare. Váipavare ecuiputsicacaimahi, machu émitiaca eta echamuricacairahi eti majanearuanahi ema Viya. Yátupiquene eta táurivahi tamutu eta tinicacare. Tájina táimanéna. Énasera nácani tépuruanahi jácani tinicacare, te nanicapuca, ticauyayacare táimiaquipaica tayehe eta pecatu. ²¹ Tíuripanaichu vahi ecunica eta vaca, váhivare ecuera eta cátsiama, machu étaina táimiaquipaicapuca ena echamuriana tayehe eta pecatu, máchuvare nacainajiruva eta véhiruhi. ²² Éti, yátupíhi eta esuapirahi ema Viya tayehe eta tinicacareana. Ejaneacavasera te mamirahu éma. Tétavicava eta náuricacareva nácani námatíhi eta náurivahi te nasamure, vahi nacaecahirahihini énajivainahini. ²³ Nácanisera tísapavanahi tinicana, tiávamirahuanahi, énajivapa tíimiaquipacavanahi eta nanisirahi, taicha vahi tátupirvahini eta nanisirahi. Tamutu jácani vahi tátupiruvahi eta visamure eta víchira, pecatuanahi éta.

15

Ecurisamurechaya ena eparaepiyana. Vahi étijiricavaimahi ecurisamurechava.

¹ Tacahe, víti vímatianahi eta táurivahi eta vinisirahi eta jácani tinicacareana, tituparacahaviripa véchapajiricavacaya ena vichamuriana tímijachanahi vahi táurihini eta nanisrapuca. Vácayehé paciencia nayehe. Vaipa vípanerechahini étachucha vicurisamurechirava vítijiricáva. ² Emutuchuchasera éti, ecurisamurechaya ena eparaepiyana. Éñamava éti eta náuricacarevayare, apaesa tápajucavapaipa eta nasuapiraina eta véhiruhi. ³ Taicha ema Cristo, vahi mácarichuhini macurisamurechavahini. Éma, ticurisamurechahi ema Maiya te tamutu. Eta tacahe, nacatianacahi ena achaneana váinarajiqueneana. Tásiha, títauchavahi eta tametarapi eta Sagrada Escritura, ani tacahehi: “Nútí nímiyanavahi eta nítauchirahi eta pivanaíripiana eta nuyehé, tayanapane eta námehairanuanahi ena piánaranahi” tacahepa eta Sagrada Escritura. ⁴ Ema Viya tivanecahi ena víyarahánaini profetana nájuchahi eta máechajiriruvana te Sagrada Escritura. Éta, ticamapuravacareyarehi eta táimitusirahivayarehi, apaesa táetumechahavi eta véhisira, tacurisamurechahavinavare. Tímituchahivare yátupina eta vicasíñava me Viya eta májjarasiraparaca eta viúricacarevaya. ⁵ Puiti nuvaraha májjaracahéhini ema Viya eta evarairahi ecutiya ema Jesucristo eta mapanereruana, étaripa vahi mácarichuhini macurisamurechavahini. Ema Viya máetumechahéhini emutu, macurisamurechahevaréni te jácani ícharacavanapuca, apaesa táuri eta ecachanecacaira. ⁶ Nuvarahavare ácuticahini eta epanereru. Tásiha, te iúrujisiravana, étanainarichuhini eta íahuana eta ecunachirayare ema Viya, Macaiyaquene ema Viáquenu Jesucristo.

Ema Pablo ticatuparahahi ticametarairuyare nayehe ena apavasana

⁷ Tacahe, nuparapenaveana, ejacapacacayare eti echamuricacanáhi, apaesa macunachacarehi ema Viya nayehe namutu ena achaneana. Ecutiyare ema Viáquenu Jesucristo eta majacapirahavíhi víti. ⁸ Écharichuhivare eta máucupaisirahi éma te juca. Tétavicavahi eta

mamansuvahi eta máimitusiravacahi ena majaneanana israelítana. Mavarahahi máimimatichavaca éna eta máitauravahi ema Viya tamutu eta máechajiriruvana máijararuvanahi nayehe ena víachucanaveanaini. Váhiquene tivayuarahi. ⁹ Énerichuvare máimimaticchahi ena apavasanana eta majapanuiravacahi ema Viya apaesa nacunachayarehi éna apanava éma. Títauchavayarehi eta máechajiriruvahi ema Cristo eta Sagrada Escritura, ani macahehi: “Puiti nútí, énapa ena nuchaneranahi apavasanana vicuticacahi eta vicunachiravihi, piti Tata, vijirauchiravihi eta vipicauchiravihi”. ¹⁰ Te apana Escritura, ánvare tacahe: “Eti apavasanana, étapa eti israelítana, étamurihéipa ecuticacainapa eta iúrisamurevaya me Viya”. ¹¹ Te apanavare Escritura, ánvare tacahe: “Étamurihénapa eta ecunachirahi ema Viya, eti apavasaqueneanahi. Váhivare ínjicahini eta ecunachiraya éma”. ¹² Eta májurehi ema víjarahaini Isaias te Sagrada Escritura, ánvare tacahe: “Tíjahúchavainapa ema Cristo, te nájina nacuchapaimahi. Éma, aquenucayare nayehe ena apavasanana. Macarichuyare éma ticasíñavanayare mayehe, eta nacuneraya éma” tacahepa.

¹³ Ema Viya, tétavicavahi eta macunecarevahi, ticasíñacarehivare. Tásiha puiti, tétavicavahi eta nuvarairahi máijaracahéni éti eta tavayuchiraina eta iúrisamurevaina, tavayuchirainavare eta ecasiñaira mayehe, apaesa tanaracaina tamutu eta epanereruana. Eta mávahásirahéhi ema Espiritu Santo, máetumechahéni muraca apaesa táetaviuchiravaya eta ecasiñavairayare mayehe ema Viya eta máijarasiraparaca eta iúricarevaya.

¹⁴ Tiuri puiti, némunarqueneana nuparapenaveana, nucasíñavahi nútí eta eyehe, eta étaviuchiraipa eta iúriava étapa eta ímatiequenehairahi tamutu eta máimiturapiana ema Viáquenu. Yátupihivare ítucahi consejachacaca. ¹⁵ Nucasíñahéhvare eyehe puiti juca eta níjarasirava nucajúrehe eta juca nucartane étapa eta juca táechajisihaqueaneanahi, apaesa vahi ecuemitísica, taicha nutuparahahi me Viya eta nujaneasiraheya eti apavasanana. ¹⁶ Éma, tituparacanuhi eta nuyanirayare nupaipica te tamutu avasareana, nucametarairuiraya nayehe namutu ena achaneana eta najacapacareipahi me Viya eta nacasiñavairahi eta mayehe. Tituparacanuhihvare eta nujaneasiraheya emutu eti esuapanahi éma. Tásiha, nuvaraha nútí nímerecaheya te mamirahu ema Viya te jena sache ticutiyahehi námavahuhe. Éma tíurisamurénapa eta majacapiraheya, taicha máepachiaruhéipahi ema Espiritu Santo.

¹⁷ Eta mavanaranuirahi ema Jesucristo, nucunachava eta nucaemataneasirahi ema Viya. ¹⁸ Váhiserá nucasíñavaimahi, nucuneuchavaimahi tayehe eta jácani nacaemataneasiranahi ena apamuriana mavanarana. Nútiserá nítauchahi eta nucatuparahairahi me Cristo eta nímitatichiravacahi ena apavasanana eta nasuapirahi ema Viya, náehisirapaipahi eta nímiturapihi étapa eta núrívahi eta nayehe. ¹⁹ Nímechavacahi ichape eta tíáramicareana eta nítipajjiasirava maicha ema Espiritu Santo. Tacahehi eta nítauchirahi tamutu eta nucametarairuirahi eta máimiturapiana ema Jesucristo. Tamutuhi nupaica, népanavahi te Jerusalén, níchecuhapa tayehe eta departamento Ilírico. ²⁰ Taicha ichape eta nuvarairahi nítecapauchaya tamutu avasare, te jácani nájinaichaha nacametarairuhini. Nuvarahaya nucametarairuyare nayehe ena achaneana tájinahi nasamihahini eta májare ema Cristo. ²¹ Nítauchahi eta táechajiriruvahi eta Sagrada Escritura, ani tacahehi: “Náechapa puiti eta májare ema Cristo ena achaneana tájinaquenehi apaesainahini nasamairiricahini eta májare. Náimatiequenehapa eta máimiturapi, éna eta namaitucaquenehi namasamaquenehivare” tacahepa.

Ema Pablo mapanerechapa tiyanayare te Roma

²²⁻²³ Ichapemuríhi eta áñoana nuvarairahi nupaipiuchahe éti, nucachaneheya apaesaina. Váhiserá nítujicava, taicha eta nupaipiuchirapahi eta apana avasareana. Puítiserá nítauchapa eta nupaisirahi tayehe eta avasareana. ²⁴ Tásiha, puiti nupanerechahi nétavauchaheya achichu juca, nuyaniraya te avasare España. Nuvaraha vicaurisamurechacacainapa. Te támutupa eta nucachaneraheya eta nétavauchiraheya, németeaca ímicatacanuyare jácani eta nuyanirayareva. ²⁵ Nuyanatumayaresera te Jerusalén. Nunapanumayare eta nanaquiruvana ena vichamuriana nayeheya ena apamuriana vichamuriana hvare ticavasanahi ánaqui. ²⁶ Taicha ena vichamuriana te Macedonia, énapa ticavasanahi te juca Acaya, tínaquiquicavanahi eta náimicatasihaya ena apamuriana vichamuriana páureana ticavasanahi te Jerusalén. ²⁷ Tétavicavahi eta náurisamurevahi eta nanaquisiravahi, navarairahi tísirijicavanaya nayehe. Táurica eta juca náitsirijisiravaya, taicha ena nachamuriana israelítana tímimatichanahi ena apavasanana eta máimiturapiana ema Viáquenu. Tásiha puiti, énapavaya ena vichamuriana apavasanana, nacajiyare ena nachamuriana israelítana. ²⁸ Tacahe, te támutupa eta níjarasiravacayare ena vichamuriana

páureana eta nanaquiruvana ena nuchamuriana te juca, nuyaninavarepa nucaijuhe te España. Nétavajicainapasera eta ara eyehe. ²⁹ Németeaca eta nitecapauchiraheya, ichapeyare eta viúrisamurevaya eta vétumechiracacayare taicha eta véhisirahi ema Cristo.

³⁰ Nuparapenaveana, nuyaseacahe te máijare ema Viáquenu Jesucristo étapa eta vémunasiracacahi maicha ema Espíritu Santo. Nuyaseacahe ímicatacanuhíni eyaseuchanu me Viya te eyujarasirana. ³¹ Eyaseacahini eta majaneasiranuhini eta nitecapauchiraheya ena masuapajirairahanahi ticavasanahi te Judea. Étapa eta juca námaquencharepahi nanaquiruvanahi ena vichamuriana, táurihini eta najacapirayare ena vichamuriana ticavasanahi te Jerusalén. ³² Eyaseacahivaréni ema Viya máisapanuhini eta núrismurevainahini eta nitecapauchiraheya, ímicatasiranuhíni eta nítujisiravaina nucachanehe. ³³ Ema Tata Vicaiyaquene, tétavacava eta macanarasirahi tamutu eta vipanereruana. Nuvaraha puiti yátupina esamava eta macanarasirahehi éti. Amén.

16

Ema Pablo máemechajirisíha te macartane namutu ena máimatiqueneana machamuriana

¹ Nutuparacahe emutu échapajirisinanu eta suítecapauchiraheya esu apana vichamuri Febe. Taicha ésu, tétavacavahi eta suítatiravacahi ena vichamuriana te avasare Cencrea.

² Tauri eta ejacapiraina esu, evapinavayare te máijare ema Viáquenu Jesucristo. Ímerezayare eta yátupirahi eparapehivare ésu eta echamurirahi tayehe eta véhiruhi. Ímicatayare te jácáni sucamunuiravana. Taicha ésu, camurianahi ena suímicataruanahi. Nútiripa, tétavacavahivare eta suímicatasiranuhi.

³ Échajisinanuyare ema Aquila ésupa esu mayena Priscila. Vahi némitisicavaca éna eta nucachamurirahi tayehe eta vicaemataneasirahi ema Jesucristo. ⁴ Ena, vahi nacatiequenehahini eta náitaresirana eta nacatiuchiranuhi. Nuhasulupayachavaca éna. Énerichuvare nahasulupayachavare namutu ena apamuriana vichamuriana apavasanana. ⁵ Échajisinanuvare ena apamuriana vichamuriana tíurujicavaráhianahi te napena ema Aquila ésupa esu Priscila. Échajisinanuvare ema némunaruquenehi nítunacasare Epeneto. Éma tínapucahi majacapahi ema Cristo apaicape te nuyanapa te Acaya. ⁶ Échajisinanuvare esu Maria. Nusamairiricahi eta ichapemurirahi eta suímicatasirahehi éti. ⁷ Échajisinanuvare ena nujaneanana Andrónico émapa ema Junias. Éna, nuchamurianainihi eta vicaeratairahi te cárcel. Tétavacavahi vémunasirahi éna viti apóstoleana. Éna, tínapucanahi nuyehe eta náehisirahi ema Cristo.

⁸ Échajisinanuvare ema Amplias, émarichuvare némunaruquenehi eta véhisirahi ema Viáquenu. ⁹ Échajisinanuvare ema Urbano, ema vichamuríhi tayehe eta vicaemataneasirahi ema Viáquenu Jesucristo. Échajisinanuvare ema némunaruquene Estaquis. ¹⁰ Échajisinanuvare ema Apeles. Yátupíhi éma eta máimeresirahi tíuríhi eta máehisirahi ema Cristo. Échajisinanuvare ena machichanaveana ema víyarahaini Aristóbulo. ¹¹ Échajisinanuvare éma apanavare nujaneana Heredión. Énapa ena machichanaveana ema víyarahaini Narciso, tétavacavahi eta nasuapajiraivahi éna me Viáquenu Jesucristo. ¹² Échajisinanuvare esu Trifena ésupa esu Trifosa. Énarichuvare ticaemataneacanahi ema Viáquenu. Échajisinanuvare esu vémunaruquene vichamuri Pérsida. Tétavacavahivare eta sucaemataneasirahi ema Viáquenu. ¹³ Échajisinanuvare ema Rufo. Éma, tétavacavahivare eta masuapirahi ema Viáquenu. Échajisinanuvare esu maena. Ésu, tímicutíjiricavahi mémenahini eta nuyehe ésu. ¹⁴ Échajisinanu ema Asíncrito, ema Flegonte, ema Hermas, ema Patrobas, ema Hermes. Échajisinanu ena vichamuriana tíurujicavarahiana te napena. ¹⁵ Échajisinanu ena Filólogo, ésupa esu Julia, ésupa esu Olimpas émapa ema Nereo, ésupa esu maparape. Échajisinanuvare ena vichamuriana tíurujicavarahiana te napena.

¹⁶ Puiti eta néchajisirahehi emutu eti nuchamuriana, nuvaraha nétsererecahe emutu te máijare ema Cristo. Aní te juca, téchajicaheana namutu ena apamuriana vichamuriana te tamutu avasareana.

¹⁷ Nuparapenaveana, nuvaraha ecuneuchavare nayehe ena tipanerechanahi típutsimuríhaheana taicha navarahahi tíhapapicaheana eta te éhiruhi. Éna nani nacatianacahi eta juca vímiturapíhi íáravahuhi. ¹⁸ Érajicavayare eta nayehe, taicha éna vahi émainahini nacaemataneacahini ema Viáquenu Jesucristo. Énajivachucha navaraha tíurichavana. Tétavacavahivare eta náitusirahi téchajiricavana. Títivehi eta náechajirisirava. Étachuchasera navarahahi tivayuaecana te nasamureana ena achaneana tíjimuyapanereruana. ¹⁹ Namutuhi tímatíheana éti, náechahivare eta esuapajiraivahi. Éta tacahe, tétavacavahi eta núrismurevahí ícha. Ecajurucaseraini eta íchirahi eta táuriqueneana. Vahi ecuquicha

eta tamauriqueneana. ²⁰ Nuti nucasíñavahi me Viya, máimicatasiraheya íputsicavaneya ena machanerana ema Satanás. Tásiha, tiúriyare eta íchararacavahi maicha ema Viya. Nuyaseacaparacavare ema Viáquenu Jesucristo táetaviuchahíni eta iúricacarevaya máicha.

²¹ Téchajicahe ema Timoteo, ema nuchamurihi eta vicaemataneasirahi ema Viáquenu. Énapa ena nujaneanana: ema Lucio, ema Jasón, émapa ema Sosípater.

²² Núti apana nuti Tercio, núti nájuchahi eta juca carta, néchajicahe núti apana te máijare ema Viáquenu Jesucristo.

²³ Téchajicahevare ema Gayo, ema nítecapaurehi te mapena. Étarichuhivare viúrujisiravahi te viyujarasirana. Téchajicahevare ema Erasto, ema tayehehi secretario tésorerohi eta te alcaldía. Téchajicahevare ema viparape Cuarto.

²⁴ Nuyaseuchaheparaca emutu éti me Viáquenu Jesucristo, táetaviuchahíni eta iúricacarevaya máicha. Amén.

Eta táichecuaraqui eta macartane ema Pablo

²⁵⁻²⁶ Nuvarahahi vácuticacaini eta vijirauchira ema Viya. Éma, mavarahahi tétumechaheya tayehe eta éhisirahi ema Viáquenu Jesucristo. Eta tacahehi eta nucametarairuirahi, nímitucavacahi namutu ena achaneana eta majacapiravacahi ema Viya eta nacasiñavairahi me Machicha. Acane eta táepaniravahi eta apaquehe, ema Viya Eterno mapanerechapa eta majacapirayare namutu ena achaneana tícasiñavanaya eta mayehe. Ena israelítana énapa ena apanapanenejiqueneana achaneana, namutu tijacapacareanayarehi. Étaripa eta náechajisiqueneanahi ena víyarahaini profetana tayehe eta Sagrada Escritura. Nájinasera nácaicutiarahini. Mapaenumavapa tímimatichanuhi núti ema Viya eta mapanereruhi.

²⁷ Ema Viya, ¡tétavicavahi eta máitupajijiasirava! ¡Macarichuhi tijirauchacarehi ticunachacarevare tayehe tamutu! ¡Máitavacayarehi eta vihasulupayachirayare éma tivanecahavihi ema Jesucristo eta macuchucuirahaviyarehi! Amén. Tamutupa.

Eta macartane ema Apóstole Pablo nayehe ena machamuriana ticavasanahi te avasare Corinto, ticajare 1 CORINTIOS

¹⁻² Nuti Pablo, mayehenuhi apóstole ema Jesucristo. Níchuarecasivaichuhi mayehe, manerejirunuichuhi ema Tata Vicaiyaquene, mavarairahi nímitucaya eta náechajiriruvana éna. Puiti nucajurehe nútí émapa ema vichamuri Sóstenes, eta juca carta eyehe eti vichamuriana ecavasanahi tayehe eta avasare Corinto. Puiti éti iávaháururipa ema Viya taicha etupiruvahi esuapa eta máichuirahéhi éti apanava, mavarairahi émayarepa ema Machicha Jesucristo ecaemataneacayarehi. Ecutiripa ena apamuriana vichamuriana ticavasanahi te tamutu avasareana, taicha ecasiñavahi eta eyujarasirana eta mayehe. Vimutu víti, émanarichuhi ema Viáquenu Jesucristo ema visuapaquenehi. ³ Nuvaraha macatajicahéhini ichape ema Tata Vicaiyaquene, émapa ema Viáquenu Jesucristo; nájaracahéhini táurivaina eta epanereruana.

Viúricacarepa ichape maicha ema Cristo

⁴ Nútí nuhasulupayachaparaca ema Viya táichavene eta majapanuiraheripa. Eta iávahásirahi ema Jesucristo, ichaperinehi eta iúricacarevahi. ⁵ Tjáracahehípa eta ítupajijiasiravahi eta échajisirana, échemaharipihi tamutu. ⁶ Écharipa eta numetacahequenehi eta májarasirahéya ema Cristo eta iúrivaya. Pútipa tjáracaheripahi. ⁷ Tamuturipa tjáracahéhi ema Viya. Tájina iátajivainahini eta ítupajijiasiravaipahi. Étanecha ecuchapayare eta jena sáchehare machavirayare ema Viáquenu Jesucristo. ⁸ Puiti ema Viya tétumechaheyare puiti juca vicaijuheyare eta itaresiraya apaesa tacuija ecuavamirahu te jena sáchehare machaviraya ema Viáquenu Jesucristo. ⁹ Ema Viya vahi mahapapicaimahi eta mapaneruanahi. Yátupi eta máitachirayarehi eta máichuirahéhi, mavarahahi iúrujicavayare ecachanenapa ema Machicha Jesucristo ema Viáquenu.

Vahi táurica vicaerajicaca

¹⁰⁻¹¹ Nuparapenevane, ztájahapapuca ecayema éti vaipa tétupicava eta epanereruana? Nútí nusamairiricahi eta íputsiasiravacaripa. Taicha tacahéhi eta nametasiranuhi ena suchichanaveana esu vichamuri vénaraha Cloé. Nuparapenevane, nutuparacahéyare te máijare ema Viáquenu Jesucristo, tácuticáca eta epanereruana. Nuvaraha étanainarichu eta epanereruana. Vaipa ecuiputsiacaca. ¹² Taicha ani tacahéhi eta nusamairirisirahéhi. Ena apamuriana ánipaji nacahéhi: “Víti viúripanahi víti véhicanahi ema Pablo”. Ena apamuriana énerichuvare nacahéhi: “Vítira viúripanahi víti véhicanahi ema Apolo”. Ena apamuriana énerichuvaréji nacahéhi: “Jéhevaresera víti viúripanahi víti véhicanahi ema Pedro”. Ena apamurianavare nacahéhi: “Vítira viápajupanavahi viúripanahi víti véhicanahi ema Cristo”. ¹³ Váhira tíuri énenahini ácahehíni, taicha ema Cristo vahi apapijijnahini eta máimiturapiana. Nuti Pablo, váhira nútinahini népenahini te crusu íchavenéhaníni éti. Eta ecaicachasirahi, váhivare étainahini te nájare. ¹⁴⁻¹⁵ Tiúririchuhi vahi nútinahini nícachasicahéhini éti. Nájina tíyunacaimahi eta nútinahini nícachasicahéhini te nájare, náepiyaequenehanuhipucaini. Yátupi nícachasicavacahi ema Crispo émapa ema Gayo. Téhesera te máijare ema Cristo eta nícachasisiravacahi. ¹⁶ (Néchavapasera eta nícachasisirahivare ema Estéfanos, énapa ena machichanaveana. Váipasera néchava nájahapuca nácani nícachasiruanahi.) ¹⁷ Ema Náquenu Jesucristo tituparacanuhi nucametarairuyare eta víuchucuirayare máicha. Váhira étainahini mavanecanuhini nícachasiricahini. Tacahe, tatupiruvahi eta nucametarairuirahi. Váhiseru nuvayuyujicaimahi nútínápupucaini nápajucavahini eta nusuapacareva, tásápihapapucaini vahi tacusuapacarehini eta máepenirahi ema Cristo te crusu.

Ema Viya májaracahi ema Machicha Jesús eta máitupajijiasiravahi

¹⁸ Natarihihi ena achaneana náimijachahi súnsurupiana eta juca nucametarairuirahi eta víuchucuiraya taicha eta máepeninahivíhi te crusu ema Viáquenu Jesucristo. Ena nani masuapajirairahanahi énarataíturivanayare eta ecuñaraqui. Vítisera víti macuchucureanayare, tíuríhi visama eta yátupíqueneana tásíhaquenehi me Viya. ¹⁹ Ema Viya ani macahéhi eta máechajiriruva eta te Sagrada Escritura: “Tamapurujíhi eta náitucaqueneanaini ena ítupajijijihanainíhi, énaripa máehicanurahanahi. Súnsurupíhi nuyehé eta náechemarairvanahi” macahepa.

²⁰ Eta tacache puiti, tájina tacunachacarevainasami me Viya eta máitucaquenehi ema achane ítupajijiacavahi, mácani máestropuca, tayanapane macarichuhi nayehe ena apamuriana tímatiequenehanahivare eta tayeheana eta juca apaquehe. Taicha tájina vahi

étaparacaina mayehe ema Viya eta júcana taicha súnsurupianachucha eta mayehe éma. ²¹ Tamutusera eta mapanereruanahi ema Viya, tétavicavahi eta tapachinavavacahi. Éma, tivanecahavihi viti vicametarairuanayare. Nararihi ena tisuapanapahi eta vimetairuana. Énaripa tiúchucuhanayarepahi. Tayanapane ena apamuriana náimijachahi súnsurupianahi eta vimetarairuana. Ena nani achaneana, tamapuruji eta náechemaraivanahi, taicha vahi táimimatichavacahini me Viya. ²² Ena nani nujaneanana israelítana náepiarichuhi tiyaseserecana, navaraha náimaha eta tiáramicareana tísihana me Viya. Ena griégoana eta nayeherepi natanucahi eta tápajusiravaya eta náechemaraivaya. ²³ Eta tacahe, vahi tasuapacarehini nayehe eta vimetasirahi eta víuchucuirayare táichavene eta máepenirahi te crusu ema Cristo. Ena nujaneanana titsirihanahi eta juca, tásiha náepuru náehica éma. Ena apamuriana apavasanana náimijachaichucha súnsurupiana eta juca. ²⁴ Natarihisera ena tisuapanapahi eta máichuirahi ema Viya, ena israelítana énapa ena apavasananahi. Náimatiripa ema Cristo, eta vanairucairahi mayehe ema Maiya taicha éma tjaracahi ema Machicha eta máitupajijiasiravahi étapa eta matumeva. ²⁵ Tayanapaneinesera te súnsurupihupuca nasama ena achaneana eta vimetarairuana, étasera tiápajucavahi tiúripanahi tayehe eta náitucaqueneanahi éna. Tayanapanevare náimijachahi mamaratahairainahi ema Viya, émahisera túmepanahi nayehe namutu éna. ²⁶ Ímativaichuhi, eti nuparapenaveana, te tíchuhahepa ema Viya, vahi ámutuhini ímatihini eta táchharacavahi eta ítaresirahi te juca apaquehe. Váhivarenéni ámutuhini tuparairucahevacainahini. Váhivarenéni ámutuhini ecaimahaquenevacahini. ²⁷ Tayanapane ena achaneana náimijachahepuca súnsuhéna éti, manerejiruhehisera ema Viya, taicha mavarahahi máimicatsiriacavacayarehi ena tímijachavanahi títipajijiacavana. Tinerejicaheripa éti váhirichu túmejicuhénahini, mavarairahi máimicatsiriacavacayarehi ena tímijachavanahi túmejicua. ²⁸ Tayanapane eta épurucarehi, náimijachavare máiturerehe, manerejiruhehisera ema Viya. Eta tímicaecherachavacahi eta táejecapiravahi eta napanereruana mayehe ema Viya, taicha vahi énana matanuca ema Viya ena títipajijiacavana, aquenucarahana, ticaimahaqueneanapuca. ²⁹ Eta juca mapanereruhi ema Viya, mamavarairahi nacuija nacucasiñavavaica te mamirahu éma, náimijachirapuca matuparaca éma nayehe éna. ³⁰ Púitiserá éti, majacapaqueneanaripa ema Viya. Mávaháruhevarepa ema Jesucristo maicha ema Maiya. Tacahe, íchaperipa eta échemaraivahi máicha. Sántuheripa máicha, ecutipaipe eta masantuvahi éma. Íuchucurepaipahi tayehe eta ticaviurecarevana. ³¹ Tavaraha vítaucha eta táechajiriruvanahi eta Sagrada Escritura, ani tacahe: “Vahi vítijivaimahi vicunachava taicha eta vítipajijiasiravana. Éma vicunachayare ema Viáquenu taicha ema tíúrichahavihi”.

2

Éma Pablo macametarairuhi eta máepenirahi ema Jesucristo te crusu

¹ Nuparapenaveana, échavarichuhi te nítecapauchahénapa cape juca viásinequenehi. Eta nímitusirahéhi eta máechajiriruva ema Viya, tíúrihi eta níminicapaequenehairahéhi, tamutuhi ticaicutiaracare eta néchajirisirahéhi. Vahi tácajerapihini eta néchajirisirahéhi. ² Taicha nuvararahahi níimimatichaheyare ema Jesucristo, nuvarahahivare yátupinahini ácaicutiara eta masivachaquenehi macatajivairahi éma eta máepenirahi te crusu íchavenéhi éti. Eta tacahe, nupamicavahi núti eta nímitusirahéhi. ³ Núti, te nímitucahénapa, vahi nítipajijihahini eta nusamiravahi. Nupícarácavahi támapurujihini eta nímitusirahéhi. Ichape eta tayyacarevahi eta náquehe taicha eta néñamiravahi vahi tacusuapacarehini eta eyehe eta nímiturapiana. ⁴ Núti, vahi nácutihini mácani achane mavayuyupica eta máechajirisirava. Étiserá ecaicutiaravanehi eta nímitusirahéhi maicha ema Espíritu Santo. Ecaicutiaravanehi étairahi eta yátupiqueneana tásihaqueneana me Viya. ⁵ Taicha nuvararahi yátupina muracaina eta ecasiñavairahi mayehe ema Jesucristo taicha ímatihí te esamureana eta yátupirahi másihairahi me Maiya. Vaipa ecuehica eta nayeherepianaini ena víachucanaveanaini.

Éma Espíritu Santo tímimatichahavihi eta mapanereruana ema Viya

⁶ Étiserá ánaquiaparipa eta éhisirahi. Ímatiequenehávacaripa. Tacahe, táuricapa puiti vímitucaca eta apamuri échajirirucava títuacareana ticajerarapianahi. Eta juca títuacareana tísihanahi me Viya. Vahi tásihaquenehahini mayehe mácani vicutiquirene achane. Énainahipucaini tásihahini nayehe ena íchapequeneana aquenucana, taicha vahi tánasimahi eta napanereruana éna. ⁷ Eta júcana títuacareana tásihaqueneanahi me Viya, mapanereruanahi te tépanavainapa acanevaca. Ánaquiaparipasera eta macaerajisrahini. Tapaenu-mavapa puiti máimicaecherachinahavihi viti achaneana, mavarairahi visiapaya tayehe eta mávasa anuma. ⁸ Ena aquenucanahi, vahi náimatihini eta mapanereruana ema Viya. Nájina

émanainahini ema ichapequene aquenuca máimatihini. Taicha te náimatihini eta mapanereruana ema Viya, váhirichuhipucaini nacuémetatacahini te crusu ema Viáquenu. Tájina náimatihini eta émairaquenehi Viya, tiásihahi te anuma. ⁹⁻¹⁰ Vítisera víti, máimitureanahi ema Espíritu Santo. Vímatihí eta mapanereruana ema Viya. Émahi ema tímimatchahavihi taicha macarichu máimatihí eta tayumurevanahi te mapanereruana ema Viya. Taicha ani tacahe eta Sagrada Escritura: “Tétavicavaya eta náuricacareva ena nani témunacanhahi ema Viya. Taicha máijaracavacaya eta náicuchihí natuparahahi maicha éma. Máimahasirichaha eta tacutiquenehi eta náuricacarevaya. Váhivare tisamairicacarehini eta tacutiquenehi te jácani tiyerehi avasareana. Nájina naratahahini náimijachaimahi eta táetaviuchiravaya” tacahepa eta Sagrada Escritura.

¹¹ Vítí achaneana, vicarichu vecha eta vipanereruanapachu tásihaqueneanahi te visamureana. Nájina apanaina náratahahini naecha. Ene macahehi ema Espíritu Santo. Macarichu éma téchahi tamutu eta mapanereruanahi ema Viya, taicha émarichuhi máchanevahi. ¹² Vítí, tájina vahi vítijivainahini vímipanerechavahini mayehe ema Viya. Émasera ema Espíritu Santo tímítucavahí tamutu eta tíutucareana tásihaqueneanahi me Viya, taicha mavarahahi véchayare. ¹³ Eta tacahe, eta juca vímiturapianahi tásihaqueneanahi mayehe ema Espíritu Santo. Vahi tásihaquenénahini te vipanereruana. Táitusiava, ena vímitureanahi natupiruvahi najacapa taicha mávaháruanahi ema Espíritu Santo.

¹⁴ Énasera nácani achaneana vahi mávaháruanaina ema Espíritu Santo, vahi najacapaímahi eta máimiturapiana, taicha náimijachahi súnsurupiana. Váhivare nárataha nacaicutiarahini, taicha ticamunarehi eta máimitusiravacainahini ema Espíritu Santo. ¹⁵ Vítisera víti yátupiqueneanahi mávaháruana, vicaicutiarahi tamutu eta máimiturapiana éma. Énasera ena máehicarahanahi, vahi nacacutiaraimahi eta apanairapahi eta viyeherepianahi víti. ¹⁶ Tacahehi eta táechajiriruvana eta Sagrada Escritura: “Nájina émanaina achane máemunahiricavahini máimatihini eta mapanereruana ema Viáquenu. Tavetijicha májina mácani máitucahini máimituca ema Viya eta mamaitucaqueneanapucaini” tacahepa. Nájinavare nácutihavíhí víti vicaravahuquenehi eta máechajiriruanahi ema Cristo. Vímatiripa eta mapanereruana.

3

Vimutu vicompañerocaca tayehe eta vicaemataneasirahi ema Viya

¹ Nuparapeneveana, cape te nítecapauchahénapa, vahi tacajerapahini eta nímitusirahehi. Tacutihí te vicajyruca eta amuya, vépiyayasinahi eta vímitusira. Tativahi nímitucahe eta epaisirayare éhisirayarehi ema Jesucristo. Taicha éti víuchaha támutihini ínajicahini eta tajamurachaqueneana eta iáqueheana. Vuíchahavare éhicahini eta mavarahaquene ema Espíritu Santo. ² Vahi námainunujicahini eta nímitusirahehi. Éti ecutihí ena nácani amuyana tájicanarichaha. Vahi námainucavahini nanicahini eta cheruji. Ene ecahehi éti, vahi íámáinucavaimahi ácaicutiarahini támutihini. Puítirichucha vuíchahavare áratuachaimahi ácaicutiarahini eta apamuriana tíutucareanahi murácapanáhi. ³ Taicha éti vuíchaha támutihini ínajicahini eta tajamurachaqueneana eta iáqueheana. Taicha ecapinarujiricacachaha, ecatianajiricacachaha, íputsimuriajiricacachaha. Eta epanereruana ecutihichaha eta napanereruanahi ena apamuriana achaneana masupajirairahanarichaha. ⁴ Éti épurujiricacahi nayehe ena echamurianahi, ániapa ecahe: “Vítí viúripanahi víti véhicanahi ema Pablo”. Éti apamuri ecahepa: “Vítira viúripanahi víti véhicanahi ema Apolo”. Eta juca ecahehi, tacutihichaha eta napanereruana ena apamuriana achaneana masupajirairahanarichaha.

⁵ Váhira nútinayarehi éhica nuti Pablo. Váhivare émáimahi ema maca Apolo éhicayare. Vahi véhicacare víti, taicha mavanarahavichucha ema Viáquenu Jesús. Yátupi víti vímitucahehi. Tamutihisera mayeaneanahi ema Viya eta esamaqueneanahi. Ema Viáquenu tjaracahavihi eta vituparahapachuyarehi. ⁶ Yátupi nútí nínapucahi nímisamahehi eta máechajiriruva ema Viya. Te néquenepa, títecapauchahepa ema Apolo, émapa títametacahehi tamutu. Émasera ema Viya, ema ticajurusinahehi eta esupajiraivanahi. ⁷ Táitaurevaquene nútihinéni névacahi te esamureana eta echajirirucavana, tájinasera vahi nútina néchahe. Émaripa ema Apolo, ema títametacahehi, váhivare émaina téchahe. Émara ema Viya, ema téchahi tamutu eta juca. Éma ticunachacare. ⁸ Núti, émapa ema Apolo, vicuticacahi vínunahi eta vicaematane. Vituparahapachuhisera. Ema Viya tjaracahaviya eta vícuchianapachu, te tíúrihi eta vicáematánérana. ⁹ Vítí mamusurahavihi ema Viya. Éti ecutihí eta sucurecana eta macajurusirahehi ema Viya.

Eta éhisirahi ema Jesús tacutihi eta náepiyasirahi eta ichapequene peti. ¹⁰⁻¹² Tativa, ema maestro tépiyarecarahi peti arquitecto, éma tinacucha eta labriyu eta tatumearaya eta yúchama. Tásiha, ena apamuriana máestroana, énapa tiúnachana eta yúchama étapa eta tamaiquehe. Tiúriyare eta nacaemataneraya. Nanerejicayare eta táuriqueneana tasivachaqueneana, navarairahi tjanunucayarehi eta náematane. Váhiya nanacaimahi eta tjujuchacareana, yucuqui, muji, cáchipaca; apaesa vahi tacuiju eta peti. Taicha titecayare máimahapanaya ema ticayehyarehi eta peti. Tásiha, te máimahapa tiúrihi, mavachachainapa namutu ena ticaemataneanahi. Nuti manerejirunuhi ema Viya eta nímicatichirahehi ema Jesucristo, éhicapaipa éma. Puíticha eta ecajuherapaipa te anuma, nájina apanaina naratahahini námahehine. Macarichuhi marataha éma. Puiti, ena apamuriana mamusurana ema Viya tímítucahehi apaesa tajuruca eta esuapirahi. Tacamunusera tiúriyarehi eta náimitusiraheya. ¹³⁻¹⁴ Taicha tatiarihiyare eta sácheyare máimahayare ema Viya eta vémataneanapachu, te tiúripuca. Te tiúrihi eta vémataneanahi, ema Viya tjaracahaviya eta táitsiyare eta vématanerepili. Téhesera vahi táurihini, eta mayucune táijuchayarehi eta vémataneanahi. ¹⁵ Tacamítiequenehayare tamutu jácane tájina tacunachacarevainahini. Tájina táimaequenénaimahi. Yátupi viúchucuhahi víti, tájinasera vímaequenéhaimahi.

¹⁶⁻¹⁷ Écharichuhi éti eta mávahásirahehi ema Espíritu Santo. Éti ecutihi mayehihi templo ema Viya, étarichuhi eta máucupaisirarehi máemunaruquenehi. Éma, máicuñacayare muraca nácani tjararecanahi éta. Táitusiava, ejaneacava éti, machu ejarareca eta iúrujasiracacahi, ímiyusemaca ema Viya.

¹⁸ Vahi ecuejecapava eta ímijachirahi ímatipa tamutu eta juca vítaresirahi. Étiserá ecaravahuya eta me Viya. Éma, tímítucahe eta ítupajjiasiravanaya yátupiqueneana. Échemaravaina máicha. ¹⁹ Taicha eta náitucaqueneanahi ena achaneana te juca apaquehe, súnurupianachucha eta máimairahi ema Viya. Taicha eta Sagrada Escritura, ani tacahe: “Ena tímijachavanahi náimatiequeneha, énajivachucha tímiaquipaicavanahi maicha ema Viya, taicha eta namáetupisirávanahi”. ²⁰ Ánivare tacahe eta Sagrada Escritura: “Ema Viya máimati eta napanereruana ena tímijachavanahi ítupajjiacavana. Tájina eta tacunachacarevanahi eta mayehe”. ²¹ Táitusiava, vahi tiuri ecasiñavaicahini. Vahi étupicava eta éhisiravacahi ena enerejiruanahi éhica. ²² Ecaravahuinasera tamutu eta vímiturapiana viti mavanaranahi ema Viya: ema Apolo, émapa ema Pedro, nútupa nuti Pablo. Ecamapurava eta ítaresiraichaha te juca apaquehe. Jararihiyarehi eta iúricacareva puiti étapa eta sácheana vicaijuhequeneana. Vaipa ecupica eta épeniraya. ²³ Échava ema Viya ema téchahehi, taicha éti mayeheripa ema Machicha Cristo.

4

Eta nacatuparahairahi ena apóstoleana

¹ Nuvaraha némechahe eta vicituparahairahi viti mayeaneanahi apóstole ema Cristo. Mamusurahavihi víti. Tivanecahavihi eta vímitusiraheyare eta mapanereruana ema Viya, eta tayumurevanainihi. ² Puíticha, mácani ticatuparahayare tayehe eta ematanecana, tacamunuhi yátupiyare eta máitauchiraina. ³ Natarihipuca ena ticaunenuanahi te nítaurahihipuca. Étiripa, enevanehipuca ecaunenu. Núti, tájinavare tácyema te ticaunenuanahipuca. Németeaca nítauchapaipa tamutu eta nucatuparahairahi me Viáquenu. ⁴ Váhisera nucasiñavaicahini, taicha néchahi ema Viáquenu, máimahahi éma tamutu eta nucaemataneasirahi éma, te tiúrihipuca, váhipuca. ⁵ Eta tacahe, vahi táurichahini tativainahini ecaunehini eta júcana, te víuchaha ímatiequenehahi. Ecuchapaya eta mápechiravayare titeca ema Viáquenu. Éma tímicaecherachayare eta tayumurevahi te timapicu. Éma tímereuchahaviya eta vipanereruana te visamureanapachu. Tacahe, ema Viya ticunachahavinapa eta víúriivanahi.

⁶ Nuparapenaveana, numetacahe eta juca eta tiúrichaheyare apaesa ácuti eta máuriva ema Apolo, ácutinuvare nútupa apana eta núrivahi, taicha étanarichuhi eta vímiturapianahi tayehe eta véhiruhi. Vahi táurica enerejicahini nácani émunaruanaya. Vácuticacasa eta émunasirahavina viti vímiturahianahi. Nacuijavare épuruquenéna nácani tímiturahianahi. ⁷ ¿Tájaha tacayema ímijachavahi éti iúripana nayehe ena apamuriana? Tájina apanaina ecasiñavaiya, tacarichu ecasiñavaiyaya tayehe eta májararuheanahi ema Viya. Váchuripa tjaracaheripa éma eta iúriivanahi, vahi étijivainahini iúrichavahini. Tásiha, ¿tájaha tacayema ecasiñavavaicarichucha éti?

⁸ Éti, eta esamiravahi ecaemuñavaipa tímicutijiricavaipa ecayehihini tamutu, ecaimahaquenehini. Ímicutichavaipavare aquenucahenahini eta esamiravahi. Ímijachavapa vaipa nucamunucarehi eyehe. Jéhechapucaini malayarine yátupinahini aquenucahenahini apaesa viti apanava vémeñahavapaihi eta eyehe. ⁹ Ímatirichu éti eta procesión

náichaqueneasa ena tiverearecanapahi tayehe eta guerra. Nanacahi te náijiquimuri ena ticatuparahanahehi eta náepeniraya taniruanayare eta sárareana. Ichape eta náimahacarevahi nayehe ena achaneana. Viti apóstoleana ticutimahi tinacahavi ema Viya eta vicutihí ena nani páureanasamí. Ichape eta vímahacarevahi nayehe ena achaneana, énapa ena ángeleana. ¹⁰ Viti apóstoleana, eta vicaematanearahi ema Cristo, tisunsuchahavianasamihiji ena achaneana. Étiserá étaviucharipahiji eta itupajijiasiravahi tayehe eta titucacareana mayehe ema Cristo. Tacutiquene náimijachahivare matumerairahavisami. Éti, tétavicavaipáji eta etumevavacahi. Tipicauchaeanaripáji ena achaneana. Vítisami tájinapa vipicauchacarevainahini nacahehi éna eta náechajiriruvahi. ¹¹ Púitiripa vinasirichuhi eta vicatajavairahi eta vinicaquenerepi, eta vimauneva, étpa eta véchuriasirapa eta vimuiriharapi. Ena achaneana téhahaviana. Tájina viviyava vijunaiya. ¹² Vicávitacávahi te vivahuana eta vicaematanera. Ena achaneana ticajachachajicahaviana. Vítiserá tájina vácyemahini nayehe. Tiúrihi eta vijicapiravacahi éna. Tipanajiricahavianapa, vítiserá vicamichahi tamutu. ¹³ Tamutu sácheana téchajicanahi eta veyehe. Tíñemahi eta nacayemahavahi. Ichape eta vépurucarevahi nayehe. Vítiserá vicayehehi paciencia nayehe, viconsejachavacahi.

Eta mahapasamuresiravahi ema Pablo nayehe ena machamuriana

¹⁴ Eta juca nucajureheirahi, vahi étaina nupanerecha nímicatsiriacahe. Nuvarahahisera nuconsejachahevere. Tétavicava eta némunasirahehi, tacutirichu eta nucachichairahahi. ¹⁵ Tayanapane camurianahi ena eyeheanahi máestroana tímítucaheanahi eta éhisiraina ema Cristo, diez mílnáinahipucaini; nútiserá tímítujiricavahi nácarichuhini éyanuinahini maestro taicha nútí nímicatichahehi tayehe eta iúchucuirayare maicha ema Jesucristo. ¹⁶ Eta tacahe, nécatiacahehi eta éhisiraina eta núrívahi nútí.

¹⁷ Eta tacahe, névatacyare eta ara eyehe ema némunaruquene nuchicha Timoteo. Éma, títaurahi eta macaemataneasirahi ema Viáquenu. Éma, tímítucaheyare, mámechiraheyareva eta tacayemaqueneana eta nímiturapiana eta véhisirahi ema Cristo. Táuriquenehi eta máimiturapiana taicha étarichuhi eta nímiturapíhi nayehe ena vichamuriana te jácáni nupaisineanapahi. ¹⁸ Etiarիրipapuca eti ecasiñavaripa eta numaitujisiravaripa néjirapanahéhini. Ímijachaipapuca nupicahi. ¹⁹ Nuvarahapaicha nútí njahuchavahini nítecapauchahéhini. Nucuchapahi eta nútujisiravainahini maicha ema Viáquenu. Te nítecapauchahépa, nímahainapa ena nácarana tisiñavavaicanahi, te yátupihipuca eta nacaemataneasirapa. Vahi tisupapacareimahi eta nacunachiravana te vahi náimicaecherachahini eta táurivahi eta nacaemataneasirahi ema Viya. ²⁰ Taicha eta véhisirahi ema Cristo, tacamunuhi vítauchayare vicaemataneacayare. Vahi tácarichuimahiya eta véchajiriruvana. ²¹ Tiuri puiti, te ímiyanava ene ecahehi, némecharecaheyarehi te nítecapauchahépa. Téhesera te étupiricava eta epanereruana, ichape eta núrísamurevayarepahi eta nímairaheyare, nétserrajicahénapa.

5

Éma Pablo mavaraha nacaerajica mácani téjcapavahi

¹ Jucarihivare eta juca apana téchacarehi eta matiaríhirahi ema émana echamuri téjcapavahi, tíñehicarehi eta juca máichaquenehi. Mavehahiji esu máenaharuva. ¡Váhicha tíuri eta juca máichaquenehi! Énaripa ena navayurevaqueneana ticapecaturarahiana vahi náuricaímahi eta juca. ² Esapihaíchucha éti, ¡tétavicavahi eta tahapasamurechirahehi eta íputsimuricairahi tásihaquenehi eta ecasiñavavaisirahi! ¡Túrihaipa etsirihapaini, táichavenehi eta máichaquenehi ema echamuri! ¡Túrihaipavare étupiricahini ema maca! Taicha ema Viáquenu Jesús títparacahavi vicuchucayare te vimuri nácani téjcapavanahi te vahi návarahahini náetupiricava. ³⁻⁴ Puiti, nuvaraha iúrujicavayare éti. Eyaseacayare ema Viáquenu Jesucristo máimicatacahe eta étupirisirayare eta juca. Nútí apanavare, tayanapane eta nuyerehihehi, étasera eta náchaneva ticachaneheya. ⁵ Íchayare: “Te máijare ema Viáquenu Jesucristo, víti émapa ema Pablo, vicuchucavi te vimuri. Váipa tijaneacavimahi ema Viya. Máimahavinepa ema Satanás, émainapa téchaviyare. Vivaraha píñajicaini eta juca pímaurivahi, apaesa táuchucuhaini eta piáchaneva te táitecapapa eta jena sácheayare machavirayare ema Viáquenu Jesús” íchayare.

⁶⁻⁷ Éti, vahi táuricahini ecasiñavavaicahini. Tacamunu ecuchucavane ema mácara achane téjcapavahi apaesa vahi macupareacahe eti apamuriana, machu mámaírjicahe. Taicha éma macutiripa eta levadura te nanaca te masa eta pan, tayanajicahi tamutu. Étiserá, nuvaraha ecutiya eta pan mayehere levadura vinasare te páscuamuhana. Yátupiquenehi arairu taicha vahi tasisijicahini. Ene ecaheyare éti, vahi tépahaimahi eta iásinequenehi te arairuhepa tacuti eta épaniravahi te éhicainapa ema Jesucristo. Taicha éma, tamutuhi

mavachacha eta vímicapasirahi, macutihi eta uvesa eta vímijararesirahi. ⁸ Táitusiava puiti, vicutinapa ena nujaneeana israelítana eta nacaerajisira eta levadura te napenana te páscuamuhuana. Tamutusera sácheana vicauneuchavaya tayehe eta tamauriqueneana, vahi pecatumarehavamahi. Tamutu sácheana eta juca vítaresirahi matapiravarehavinahi, tájinasarepa víchiravaimahi te mamirahu ema Viya.

⁹ Cape eta nucartanehivare eyehe, nímimetacahehi eta tamaurivahi eta ecachanevacahini ena tíchanahi eta juca pecatuana tivehajiricacana: Súcani esena suvehahi ema apana achane, mácani achane mavehahivare esu apana esena. ¹⁰ Tiuri, núti eta numetasirahehi, váhisera énaina nicha ena nani máehicarahanarichaha ema Viya ena nani tivehanahi esu apana esena apayena, énapa ena tavayuaruana eta plata, énapa ena tímerahiana, énapa ena ticasíñarajiana. Ena nani, náetaviuchahi eta nasimutuvavacahi, tamutuhi návihávaca. Tacamunui papuca vérajicavahini eta te juca apaquehe, apaesa vaipa nacuitecapauchahavihini. Váhira énaina níchaquenéhahini. ¹¹ Mácanisera tímijachavahi echamuri, vahi nuvaraha ecachanejirica ema tivehahi esu esena apayena, émapa ema tivehahi esu esena amaperu máimaruchaha, émapa ema tavayuaruhi eta plata, émapa ema ticasíñarajiji, émapa ema titupiarahi, émapa ema ticavaharasi, émapa ema tímerahi. Mácani echamuri, te ene macahehi, tájina vahi táuricahini ácachanevacahini te enisirana. ¹²⁻¹³ Vahi nútina tatuparaca eta nacayaseserehiyare te numirahu ena anecaqueneanahi eta víyehe. Téhesera te mamirahu ema Viya eta nacayaseserehiraya. Éma téchavacahi éna. Étisera éti, échahi ena echamurianahi. Éti eyaserejiricacayare étijicacaya. Eta tacahe, ecaevuisihayare ema mácara téjcapavahi te emuri.

6

Vahi táurica vimetauchacacahini te namirahu ena máehicarahanahi ema Viya

¹ Énerichuvare nuvaraha numetacahe eta apana: Te natiarihinapuca ena echamurianahi navaraha tímetauchacacana, vahi távaraha nayanahini nayehe ena tuparairucana máehicarahanahi ema Viya. Étarichu nacamirahucacaiyare te emirahu eti nachamuriana. ² Tativayare échava eta machaneraherahi ema Viya. Étjivayarehi étupiricaca eta íchavaquenevanahi. Vahi étinayare etanuca ena masupajirairahanahi taicha járajapayare eta sáchezare ticayaseserehianaya te emirahu éti ena masupajirairahanahi. Puítisera eta íchavaquenevanahi ánichichaqueneanahi, éti tatuparaca étupiricaya. ³ Écharichu éti tituparacahaviyareva ticayaseserehianayareva ena ángeleana te vímirahu. Tacumapurujichapucaini eta tayeheanahi te juca vítaresirahi, vahi vicuturuequenehahini. ⁴ Puiti éti, te tatiarhipuca eta íchavaquenevahi tayehe eta juca vítaresira puiti, váhiquenesera etanucaimahi ena emetauresihahini nácani vahi énaparacaimahi nayehe ena echamurianahi. ⁵⁻⁶ Némechahe eta juca, nímaha te etsirihapuca. Váhiquene táuricahini mayanahini mácani vichamurihi matanucachini ena tuparairucana máehicarahanahi ema Viya. Tasapihahini étainahini mametauchihahini mácani machamurihi. Cúverarecapa nacuijahini te etaracu mácani émanainahini vahi macuturuequenehahini mayasesereca jácani téchacareanahi nayehe ena vichamuriana.

⁷ Vahi táuricahini íchahini eta juca. Étjicacainahini eta echamuricacahi evarahapa ejarareca. Tivarahacarepana eta eratahairaina ecamicha, tayanapanerine ecatajivahi naicha, tíameyechaeanapuca. ⁸ Étisera etivavaicapa íchahi eta juca émecatajivachacacapa. Vahi táuricahini eta juca; násapihahini énahini echamuriana ena etupiaruanahi.

⁹⁻¹⁰ Váhhipuca échahi éti eta namaitujisiravaya tisiapana te mávasa ema Viya ena tíchanahi eta tamauriqueneana. Taicha yátupihí eta namaitujisiravayare tisiapana ena ajairana tivehanahi esu apana esena apayena énapa ena vahi nayenacacaqueneana, énapa nácani tivehana esu esena amaperu máimaruchaha. Énerichuvare ena esenana, váhivare tútjicavanaimahi tisiapana te mávasa ema Viya, súcani tivehahi ema achane vahi suímaquenenahi, ésupa súcani amaperu esena namutuchucha suvehapahi. Váhivare tútjicavanaimahi tisiapana ena nani tivehacacana ajairacacana, énapa ena nani ticasíñarajiana, ena nani tímerahiana, ena nani ticapinarurahiana, ena nani ticavaharasiana, ena nani titupiarahiana, énapa ena nani náipicararecapahi eta námeresirayare. ¹¹ Ene ecaheni éti eta íásinequenéni. Puítisera tútsivachavaipahi eta ítaresira, sántuheripa maicha ema Espírítu Santo, ejaicaparepa mayehe ema Viya, máichavenehi ema Viáquenu Jesucristo.

Tiávahácahviripa ema Espírítu Santo eta te víaquehe viti machanerana ema Viya; tásiha, tituparacahavipa tacuija eta vituhusivaina

¹²⁻¹³ Puiti jucarihivare eta numetacaheyare. Nararhipuca ena nacahehi: “Núti néchinava eta nítaresirahi. Eta náquehe tajamurachahi eta tavarahaqueneanahi. Eta tinicacare táicuchihí eta viami. Eta viami tatuparahaichuhi tajacapaya eta vinicaqueneayare. Ene

tacahe eta náquehe tavarahahi nuveha esu esena tacutihi eta viami tavarairahi tinica” nacahepa. Nútisera te nupanereru, vahi énéna tácahe. Yátupi víti véchinavahi. Váhiserá távarahacarehini támutuhichaini víchahini eta tavarahaqueneanahi eta víáquehe, vivayuchahini víchahini eta tauriqueneana. Yátupi tísapacarehi eta vintisraya eta tinicacareana. Tatiarihiserá eta sáchehare, vaipa vácamunuimahi eta tinicacare, maicha ema Viya. Ema Viya máepiyacahi eta víáquehe, mavarairahi vícaemataneacayare éma. Émapa téchahavihi puiti eta juca vítaresirahi. Vahi étainahini táemepiyacahavíhíni eta víchiraya eta pecatuana esenamarehavinahini. ¹⁴ Ema Viya macaechepucahi ema Víáquenu Jesús te máecari. Ene vícaheyare víti eta macaechepusirahaviyare víti apanava, taicha tétavícavahí eta máitupajjiasiravahi.

¹⁵ Écharichuhi emutu éti, eta íáqueheana mayeheripahi ema Cristo. Émaripahi téchahehi. Etiarihípuçasera ímijachapuca táuricahini vímicachanechahini eta víáquehe tayehe eta suáquehe esu esena túhusi. Váiparinehi táuricaimahi. ¹⁶ Nuvarahavare némechahe, te mavehahi ema achane súcani esena túhusi, tíanecacahi eta náqueheana eta nacamujichiracacahi. Acane, ema Viya májaracapa esu Eva mayehe ema Adán. Tásiha, eta Sagrada Escritura, ani tacahe: “Te tivehacacapa, tímicitijiricavapa étarinehi eta náqueheana”. ¹⁷ Ene tacahehi eta vítaresira mayehe ema Viya, eta mávahásirahaví ema Víáquenu, eta víáchaneva tachaneripa éma.

¹⁸ Eta tacahe, ejaneacava yátupina, machu íáquipaicava tayehe eta túhusicare. Tamutu eta pecatuana náíchaqueneanahi nácani achaneana, tajararecahi eta náchanevapachu. Taveti-jipa, mácani achane tivehahi esu esena vahi mayenaquenenahini máimijararechavare íchape eta máquehe. Ticajachacareínehi eyehe éti eta juca. ¹⁹ Écharichuhivare éti eta mávahásiraheripa ema Espíritu Santo eta te íáqueheana, taicha mavaneruichuhi ema Viya eta mávahásiraheripahi ema Espíritu Santo. Vaipa étinahini écha eta víáqueheana. ²⁰ Taicha mavachareruhehi ema Viya. Ichapemurihi eta macatajivairahi íchavenehi éti. Puiti, eta íáqueheana étapa eta íáchanevana mayeheripahi ema Viya. Tacahe, puiti, ejaneacavapa eta ítaresiranahi te namiraha ena achaneana, apaesa namutu nacunachaya ema Viya.

7

Eta maconsejarapi ema Pablo nayehe ena máimaruaana, énapa ena nacaimaqueneana

¹ Tiuri puiti, nujicapaheyare eta juca eyasesiranihi te ecartane. Yátupi tíuríhínehi máyénaresinahini mácani achane. ² Táichavenesera eta tavayuraivahi eta pecatu, ticamunucarehi ena ajairana nayanapachuina, énaripa ena esenana ticamunucarehivare náimapachuina. ³ Mácani achane te sutiaríhipapuca esu mayena, tacamunuhi máítauchayare eta máítátiraya máemunásiraya esu mayena. Ésuripa esu esena te ticaimaripapuca, énerichuvare suítauchayare eta suítátiraya suémunasiraya ema suima. ⁴ Taicha esu esena vaipa ésuinahini téchinava eta suáquehe. Émapa téchahi ema suima. Ene macahehi ema achane, váipavare émainahini téchinava eta máquehe. Ésuripahi téchahi esu mayena.

⁵ Éti ecaimaqueneanaripa, vahi ecuepurucaca tayehe eta íanesiracairana. Téhesera tatiarihínapuca eta eyujarauchiravayare me Viya, ecuticacahipuca eta epanereruhi, tísapacare ínajica ánipina eta íanesiracacana. Te táequenénapa, táuricavare echávauchacacavare, apaesa ema Satanás vahi macuturucache eta máimijamurachirahé ena apanana.

⁶ Tiuri, eta juca numetasirahéhi, vahi nútina nucavanairipi. Nísapasera eta énéna ácahe. ⁷ Nuvarahahínéni ácutinuhini nútí eta mayénarenuirahi. Víjaracasipachusera me Viya eta vítaresiraya. Nararihi ena ajairana máyénaresana eta náítaresira. Nararihivare ena esenana máimaruaana eta náítaresira. Nararihivare ena apamuriana májararuichu ema Viya ticaimana.

⁸ Énaripa ena nácara vichamuriana máyénaresanachaha, énapa ena máimaruanachaha, énapa ena tépenaimana, tíuripanahínéni nánasihini máimaruanainahini; nácutinuhini nútí. ⁹ Étasera te vahi náratatahi ticaratacavana, tacamunúichuhi ticaimanayare, apaesa vahi nacuepujuichava tayehe eta pecatu.

¹⁰⁻¹¹ Tásiha puiti, nutuparacavacayare ena nacaimaqueneanaripa. Ema ajaira vahi macuinajica esu mayena. Esu esena váhivare sucuinajica ema suima. Eta juca vanairipi tásihaquenehi mayehe ema Víáquenu, vahi tásihaquenéna nuyehe nútí. Téhesera natiaríhipapuca ena vichamuriana náinajicaca, vahi táuricahini nápechavahini nacaimahini, nacachanehipucaini. Tacamunuhi tichavauchacacananayare tivehacacana.

¹² Tiuri puiti, tájinachaha vanairipina tásihaquenéna me Víáquenu tayehe eta náinajisiracaca ena nacaimaqueneana. Níjarachesera eta juca nupanereru nútí. Te matiaríhipuca mácani vichamuri esu mayena vuíchaha vichamurinahi, te tíuríhipuca eta nacachanercacahi, vahi táuricahini máinajicahini ésu. ¹³ Énerichuvare, te sutiaríhipuca súcani esena

vichamuri ema suima vuíchahavare vichamurinahi, te tíurhipuca eta nacahaneracacahi, váhivare táuricahini suínajicahini éma. ¹⁴ Taicha ema suima, ichape eta majapanucareva me Viya táichavenehi eta sucaimairahi esu mayena. Énerichuvare esu esena mayenahi ema vichamuri, ichape eta sujapanucareva me Viya táichavenehi eta mayenairahi ema achane vichamuri. Énaripa ena nachichanaveana majapanuhivare ema Viya náichavenehi ena ticachichana, vaipa náepurucarehini me Viya. ¹⁵ Téhesera mácani vuíchaha vichamurina suímahi esu vichamurihi mavarahapuca máinajica esu mayena, suísaparine máinajica. Ema Viya vahi macavanairipi eta suíchejiricahini éma, mayanarine. Taicha ema Viya mavarahahi viúriyare, tacuijapa tahapapiricahavihi eta vipanereruana. Énerichuvare súcani esena vuíchaha vichamurinahi mayenahi mácani vichamuri, te suvarahapuca suínajica ema suima, énerichuvare máisaparinevare suyana. ¹⁶ Taicha piti esena, vahi pecha te pimaitacayarepuca picajayayasamurecha ema pima eta máehisiraina ema Viya. Pítiripa piti achane, váhivare pecha te pimaitacayarepuca picajayayasamurecha esu piyena eta suéhisiraina ema Viya.

¹⁷ Ema Viáquenu tjáracahehi eta ématanerepianahi te tíchuhahenapa. Etuparahapachuhi eta ématanerepiya. Váhisera ínajicaimahi, ímiyanavare ítauchaya eta etuparahanahi. Étara eta juca nuvanairipi nayehe ena vichamuriana ticavasanahe te tamutu avasareana. ¹⁸ Nácani ticamarcanaripa te máichuhavacapa ema Viya, vaipa táuricahini nacaepahavahini eta nacamarcairahi. Nácani mámarcaneanarichaha te máichuhavacapa ema Viya, vaipa táurica nacamarcahini. ¹⁹ Tájina vahi étaparacaina te vicamarcahipuca, étasera tivarahacarehi vicaemataneacayare eta mavarahaqueneanahi ema Viya. ²⁰ Namutu nácani máichuhaqueneana ema Viya, vahi náitsivachaimahi eta náematanerepianahi nájaracahi te máichuhainapa ema Viya. ²¹ Te ecaquenuhipuca éti te tíchuhahenapa ema Viya, vahi ecueñamava eta ecaquenuirahi. Téhesera ímaha eta iúchucuiraina, tájinachucha táichava. ²² Taicha mácani achane músuhi eta máitaresira, tayanapanerine matiarihinahi ema máquenuinahi; téhesera te mamirahu ema Viya, tínunánaripahi mácani achane nájina máquenuinahini eta máitaresira. Puiti ena apinana mavanaranaripahi ema Viáquenu Jesucristo, taicha ticuticacanaripa eta nacaemataneasiraipa éma. ²³ Taicha mavachareruhehi ema Viya. Ichapemurihi eta macatajivairahi íchavenehi éti. Puiti machaneraheripa éma. Eta tacahe, te navarahapuca nayurucahe ena achaneana, vahi ecuisapava nahapapicahe eta ecaemataneasirayare ema Viya. ²⁴ Eta tacahe, nuparapenaveana, ímiyanavayare ecaematane mayehe ema Viya. Ítauchayare eta ématanerepipachu íjaracasíhi me Viya.

²⁵ Tiuri puiti, tájina vanairipina tásihaquenéna me Viáquenu nayehe ena amaperuana máyénaireanarichaha énapa ena máimaruanchaha. Nútisera numetacaheya eta nupaneruhi. Nuvarahasera esuapanu taicha núti nucaimitucasiqenehi mayehe ema Viáquenu, táichavenehi eta majapanuiranuhi. ²⁶⁻²⁷ Puiti juca vítaesirahi, tétavicavahi eta vicatajivairahi. Eta tacahe, németeaca núti tíuririchu nánasi ena ajairana nayehe ena nayenana nácani nacayenaqueneanaripahi. Vahi nacuinajica. Énaripa ena máyénaireanarichaha, vahi nacutanuca ena nayenaina. ²⁸ Mácanisera sutiaríhi esu mayena, tájinachucha pecatuina eta mavirahi esu esena. Ésuripa súcani amaperu esena, te tatupiruvahi eta sucaimaira, tájinachuchavare pecatuina eta sucaimairahi. Táitsivasera ichapeyare eta nacatajivairaya eta náitátiracacaya, tavetijipa te natiaríhinapa ena nachichanaveanaya. Eta tacahe, nuvaraha numetacahe apaesa vahi ecucatajivahini.

²⁹ Tiuri, nuparapenaveana, nuvaraha numetacahe ticutimahi ánipirine eta juca vítaesiraya puiti juca vicaijuheya. Eta tacahe, táurica eta íjarasiravahi yátupina eta ecaemataneasira ema Viáquenu. Étiripa, éti natiaríhi ena eyenana, vahi tacucarichu eta ecaeñamasirava nayehe ena eyenana, énerichuvare me Viya. ³⁰ Te jararihipapuca eta tacáiyasiráhe écatismurepuca, vahi ecuisapa tahapapicahehini eta ecaemataneasira ema Viáquenu. Te jararihipapuca eta tacaurisamurechiraha, váhivare ecuisapava tahapapicahehini. Te ecaimahaquenehipuca, tísapacare eta ecamapura eta ímahaqueneana eta májararuhehi ema Viya, váhivare ecuisapa tahapapicahehini eta ecaemataneasirahi ema Viáquenu. ³¹ Nuvaraha táuríhini eta itaesirayare te juca. Váhisera ecuisapava ecucañamaracava eta ecayeheirayare eta ímahaqueneana te juca apaquehe. Taicha tamutuyarehi témitiaca te táitecapapa eta táitaviraya eta juca apaquehe.

³² Eta tacahe, vahi nuvaraha ecañamaracava tayehe eta júcana, taicha mácani achane máyénairehi, tájina tahapapiricahini eta macaemataneasirahi ema Viáquenu, mavarahahi máicutichiravaya eta macurisamurechiraya ema Viáquenu. ³³ Mácanisera achane te sutiaríhipa esu mayena, ticañamaracavainapa taicha eta máitátirayare esu mayena, mavairahi macurisamurechaya ésu.

³⁴ Ene nacahehi ena esenana. Vahi tácticaca eta napanereruana suyehe esu esena sucaimaquene ésupa esu esena máimaruchaha. Taicha súcani máimaruhi tahapasamurechahi eta suítátiraya ema Viáquenu, suvarairahi suítauchaya eta mavarahaqueneana. Suíjaracayarehi ema Viya eta suáchaneva étapa eta suáquehe. Ésusera esu esena sucaimaquenepa tahapasamurechapa eta suítátiraya ema suima, suvarairahi sursorisamurechaya éma.

³⁵ Eta júcana nuconsejarapianahi eyehé, nuvaraha eta táurivaina eta ícharacavaya. Vahi nuvaraha nupamicahé tayehe eta tacajeraqueneana. Nuvarahasera tacujahini eta tihapapicahé eta itátirayare ema Viáquenu.

³⁶ Tiuri puiti, eta juca nuconsejarapi mayehé mácani achane te sutiarhipuca esu machicha esena máimaruchaha. Te tahapapiricaipapuca eta sucaimarayare esu machicha, táichavenehi eta suítanahasiraipa; te tiúrihi eta máimairahi, máisapayarehi ticaima esu machicha. Tatupiruvayaresera eta sucaparaperayare. Tájinachucha táimanena; váhivare pecatuína. ³⁷ Mácanisera achane, te tájina máichiravainahini, nájinavare tipamicaimahi; te mavarahapapuca suánasi máimaruina esu machicha, tiúrihi maicha. ³⁸ Tacahe, tiuri máichayare mácani achane máimachayarehi, tatuparacahi ticaparapeyare esu machicha. Mácanisera vahi máimachahini esu machicha, éma tiúripana maicha.

³⁹ Esu esena ticaima tatuparacahi suítauchayare eta suíjarasiravahi ticaima, sunasirichuya eta mayehé ema suima eta náitaresirana. Tiámainucava te táitecapapa eta máitaviraya ema suima, tiúchuchapa ésu. Ésupa téchinava eta suítaresirayare. Tísapacarepa eta suápechava sucaima. Tacamunuhsira mácani vicutiquenehi vichamurihi tisuapajirahi me Viya. ⁴⁰ Tiápajucavasera tiúripanaya te suánasipa máimaruina. Eta juca tásihaquenepa te nupanereru. Németeacahi núti tétupicavapahi eta nuconsejarapiana taicha mávahárunuhi ema Espíritu Santo.

8

Éma Pablo mametacavaca eta nayaseresirahi te tiúrihipuca nanica eta tinicacareana tacayujarahuquene te tamirahu eta nasiñarajiana ena achaneana

¹ Puiti numetacaheya eta táicharacavahi eta enisira eta tinicacareana nayujaraurehi te tamirahu eta nasiñarajiana ena achaneana. Yátupi vimutu vímatiequeneha tájinachucha táimanena eta juca. Váhiserá vácasiñavaimahi eta vítusirahi. Tacamunuhsira tajurucaya eta vémunasiravaca ena vichamuriana, vímicatasiracacaya eta véhisira ema Viáquenu. ² Taicha nararihi ena ticasíñavavaicanapa, tímijachavanapa náimatiequeneha tamutu. Eta juca náichahi táimerecáhi vuíchaha náitucahini, vuíchaha nacapayayaracahini eta mapanereru mácani yátupipa máituca. ³ Nácanisera yátupihí témunacanahí ema Viya, éta tímicaecherachahi eta machichanaveanairahi éma.

⁴ Tiuri puiti, numetacaheyare eta juca nuconsejarapi tayehe eta juca enisirana eta tinicacareana tacayujarahuquenehi te tamirahu eta nasiñarajiana ena achaneana. Tájinachucha táichava, taicha eta nasiñarajiana vahi yátupinahini víyanainahini te juca apaquehe, taicha émanarichuhi ema yátupiquenehi Viya. ⁵ Ena achaneana náimijachahi camurianahi ena víyana te anuma, étaripa te juca apaquehe. Namaveracapa ena náquenuanahi nayeheanahi viya, camurianapa naicha eta nasiñarajiana. ⁶ Vítisera viti vímatiequenehanahi émanarichuhi ema Viya Vicaiyaquene te anuma. Éma Jesucristo, émanarichuhi ema Viáquenuhi. Éma Tata Vicaiyaquene mapanerechapa eta tatiarihiyare tamutu eta vímahaqueneanahi; vítipa vimutu achaneana, mavaraha vítiarihiya eta vicaemataneasiraya éma. Tásiha, ema Machicha tépiyacahi tamutu. Puiti émapa téchahavíhi vimutu. Éma, tíjaracahavíhi eta arairu vítaresira.

⁷ Tisimutuanasera ena vahi náimatiequeneha eta juca. Énaripa ena vichamuriana, nararihi ena vuíchaha náemitisicahini eta navaraira napicaucha eta nasiñarajianaini. Éna, tisamavanahi vaipa náetupicavanahi eta nanisirahi eta tinicacare tacayujarahuquenehi, vahi táuricahini eta nasamirahi. ⁸ Numetacahesera puiti, vahi étaparacaina eta tinicacare, víjacapacareyare me Viya táicha. Váhivare étaimahi tiúrichahavíhi mayehé ema Viya, te vahi vinicahí. Váhivare tíjararechavimahi mayehé te tiúrihipuca eta vinisira. ⁹ Eta tacahe, ecauneuchava yátupina machu émejecapavacha ena apamuriana vichamuriana vuíchaha náimatiequenehanahini eta júcana. ¹⁰ Étisera éti ímatiequeneanaripa, te ísapavayahipuca enica eta tinicacare nayujaraureanahi te tamirahu eta nasiñarajiana; tacahe, te máimahahepuca ema echamuri, énerichuvare tísapavayarehi tinica. Táitsivahisera típicacaracavahi jácani te masamure. ¹¹ Eta tacahe, échapavaya éti tayehe eta ímatiequenehairaripa machu émejecapavacha ema echamuri mácani vuíchahapiravahi máimatiequenehanahini eta júcana. Émarichuhi iúmurivahi eta mavacharesirahehi ema Cristo eta máepenirahi te crusu. ¹² Éti, te ehapicapapuca eta táurivahi eta napanereruana ena echamuriana, éti ecapeaturaipa eta

mayehe ema Cristo, taicha eta émejecapavachirahi ena echamuriana. ¹³ Ácutinu eta juca nuyeherepihi: Te nútinahipuacaini némejecapavachaini mácani nuchamuri táichavene eta nunisirainahini eta vaca, váhirine nunicaimahi, apaesa vaipa nucuemejecapavachahini éma. Éti apanava, ene ecaheyare. Váhivare ecuemejecapavacha ena echamuriana.

9

Éma apóstole Pablo, tatuparacahi náitátiyare ena mámitureana

¹ Núti, nájina náquenuinahini te juca apaquehe. Yátupi apóstolenuhi mayehenuhi ema Viáquenu Jesucristo. Nucutinasivacahi eta návacurehi nayehe ena apamuriana apóstoleana taicha nímahaquenehi ema Viáquenu Jesús. Étiripa, etupiruvahi esuapanu eta nímításirahéhi. Éta tímereuchanuhi eta táurivahi eta nucaemataneasirahi ema Viáquenu. ² Tayanapane nacañajivarinepuca nácani vahi tisuapapajicanuanahi eta apóstolenuirahi. Étiserá esuapanuyarehi, taicha etiaríhi eti nímítireuanahi, étira ímereuchanuhi eta yátupirahi apóstolenuirahi mayehe ema Viáquenu. ³ Étara nucatiuchiavahi eta juca nayehe ena tépuru-jiricanuanahi.

⁴ Éti tituparacahehinéni ítátinuhini nútí tayehe eta núnicaquenerepi táichavenehi eta apóstolenuirahi. ⁵ Énerichuvare tituparacahehi ítátihivaréni te sutiaríhinahini esu esena nuyenainahini, súcani nucutiquenehi tisuapajirahi. Tácutihini eta ítátiravacahi ena esenana nayanahini ena apamuriana apóstoleana, émaripa ema Pedro, énapa ena maparapaveanahi ema Viáquenu. ⁶ Éti, ímjachaipapuca nútí émapa ema Bernabé, vicarichuhi vahi tatuparacahavíhíni eta ítátirahavínahíni eta vicametaríruirahi. ⁷ Púiti nuvaraha nímicutírachínahéyare eta nacaitaticasíra ena ticaemataneahiana. Ani tacahe: Namutu ena suntaruana ticaitaticasianayarehi nayehe ena comandanteana. Énerichuvare, ema tisucurecáhi eta tinicacare, tatuparacáhi masamapuhayarehi eta tahi eta masucureanahi. Émaripa ticayehéhi vaca tatuparacáhi máerayarehi eta tacheneama eta mavacane. ⁸ Eta juca níchirahéhi, vahi nácarichu nútí núcapanereruhi eta júcana. Énerichuvare eta Sagrada Escritura májurehi ema Moiséini títametacahavíhíre. ⁹ Ánipa tacahehi eta táechajírírúvahi: “Vahi picuitisumucha eta pivuíyerana, te ticaemataneváhi taicha técuhanapáhi éta”. Táitaurevaquene ema Viya vahi tácarichuhíni eta vúiye eta máechajísíhahi. ¹⁰ Énerichuvare víti mayunacáhi te máechajírírúvahi. Mavaraháhi vícaenicásiyare vímutu víti vícaemataneahiana. Tacutíhi mácani achane ticaemataneváhi. Macaemataneacáhi muraca eta máesane, mavaráirahi máímaequenehayare eta távameanahi eta máesane. ¹¹ Ene vícahehi víti eta vévasírahí eta máechajírírúva ema Viya te esamureana. Éta tíúrichahehi. Tásiha, éti ecutinapa eta sucureca tímecavahi eta táhi. Tájjina táíchava eta ítátirahavíyarehi víti. ¹² Ena apamuriana ticasíñavanahi eta eyehe. Tásiha éti, tíúrihi eta ítátirahi. Vívétíjipa víti vítícarehi eta eyehe.

Váhisera vávaraháhiní vícasíñavahíni víti eta eyehe, víyaseacahehíni eta ítátirahavínahíni. Vicamíchahi tamutu, vímavaráirahi tátíaríhínahíni jácani apanainahíni tahapapíricahíni eta esamírayarehi eta máechajírírúva ema Cristo. ¹³ Écharichuhi éti eta mavanáirípí ema Viya nayehe ena téchapajírícana eta mayehe Templo, nanícarahí eta tinicacare námaqueneasana ena achaneana nájaracasíruanahi ema Viya. Cájaracasíanayareva éna eta vaca táeche eta námavahuanahi ena achaneana. ¹⁴ Ene tacahehi eta mavanáirípíhi ema Viáquenu eta víyehé víti vícametaríruanahi eta tapachínaquene máechajírírúva, títiparacahavíhi víjacapayarehi eta vínicaquene taicha eta vícametaríruirahi. ¹⁵ Nútísera tájjina nímátíyahíni nuyaseacahehíni eta ítátíranuínahíni. Étaripa púiti te juca núcartane, váhivare nuyaseacahe jíjaracánuhíni. Nucamíchahi tamutu. Tíúrínehípucaíní népenavanehíni, machu tachímaracánuaru táítava eta juca núrisámureváhi nútí tamajínáirahi nuyaseacahehíni.

¹⁶ Nútí vahi étaparacáina nucasíñavahi taicha eta nucametaríruirahi. Nutuparahaichuhi eta juca. ¡Páurechichanusamí te némunahacava nínajica eta juca nucametaríruirahí! ¹⁷ Taicha nútí, vahi nútíjjívainahíni njaracavahíni mayehe ema Viáquenu eta nucametaríruiraya, étapapucáini nujacapíhahíni eta nuvachayarehi eta mayehe. Nuvanecasívahísera me Viya eta matuparasíranuhi eta juca nématanevárehi. ¹⁸ Ichapesera eta nuvaráirahi eta nucametaríruirahi, taicha tíjarahi te nusamure eta nurataháirahi nucametaríru, tamajínáirahíre nuyaseacahehíni eyehe éti. Vahi nupamícahehíni eta ítátíranuínahíni táíchavenénahíni eta nucatuparaháirahi eta apóstolenuirahi.

¹⁹ Nájínahíne ní te juca apaquehe napamícanuhíni eta nucaemataneasírainahíni táíchavénehípucaíní jácani náitátíranuhíni, énaínahípucaíní náechanuhíni. Nútísera njaracavahi

nítauchayarehi tamutu eta nucamunucarevahi nayehe ena achaneana, apaesa étainahi-pucaini níturusihavacahini ena nasimutuvaqueneana, machanerainahini ena Cristo. ²⁰ Étaripa te nítecapauchavacavare ena nujaneanana israelítana, ichaperinehivare eta nupicauchiravacahi éna, apaesa najimuyasamurepapucaini eta náehisirainahini ena Cristo, étainapapucaini níturusihavacahini éna. Ena nani, ichape eta nasuapirahi eta mayeherepiana ena Moiséini. Tásiha, te nucainunavaca éna, tájinavare vahi nucaecahihini eta nayeherepihi, nupicauchahivare éna apanava. Váhinihi nútíparacainahini tayehe eta náehiruhi. ²¹ Tatiarihiserá eta yátupiquenehi néhiruhi nuvanahihi mayehe ena Viya, májjararunuhi ena Cristo. Énerichuvare te nucainunavaca nácani apavasana maéhica- rahanahi eta mayeherepianahi ena Moiséini, váhivare nucaecahivaca. Nupicauchahivare éna, nuvarairahi nucajimuyasamurechavacahini éna apanava. ²² Te nucainunahiva- repuca ena vichamuriana nácani vuíchahahi náitamuturucahini náimatíequenehahini eta véhisirahi ena Cristo, váhivare nucaecahivaca eta namaimatíequenehairarichaha. Ichape- rinehi eta nujanuiravacahi. Nímícatavacapa, nuvarairahi náimatíequenehapaini yátupinahini eta véhiruhi. Namutu ena achaneana, nujanuvacahi. Nutanucahi eta nucajimuyasihayare eta nasamureana apaesa nanerejicavapaini náehicahini ena Cristo, machanerainahini éna. ²³ Núti nítauchahi tamutu eta júcana apaesa najacapa eta tapachinaquene máechajiruru ena Viya, apaesa vácuticacapai vámutuhini vijacapa eta víurivayare maicha ena Viya.

²⁴⁻²⁵ Écharichuhi éti, ena ticavijarurahiana pelota, tijaneacavanayarehi muraca, ichape eta ticaravahunumanayare apaesa túmeanainapa eta naratahairaya navereasihaya ena nánaranayarehi. Te vahi najaneacavahini, vahi tivrearecanaimahi. Ene ecaheyare éti, ichape eta étumechiravayare apaesa tauri eta ecaemataneasiraya ena Viáquenu, ejacapi- hainasarepa eta etuparahahi mayehe. Eta navereareruanahi ena ticavijarurahiana, vahi tánasimahi. Témitíequenehavaneyarehi. Vahi tácutimahi eta vijacapaquenezare me Viya. Éta, tájinapa ticamítíequenehaimahi. ²⁶ Nútiripa eta nucaemataneasirahi ena Viáquenu, ichape eta nupamisiravahi, taicha eta nímatirahi eta mavarahaquene. Vahi némepurecava- imahi. ²⁷ Nucaratacavahi muraca. Vahi nusuapahini eta tajamurachaqueneanahi eta náquehe. Nupamicahi eta táemitísisirainahini eta tamauríqueneana, machu néjecapava- papucaini, tásiha váipapucaini nucujacapai eta nícutihí. Ichape eta nutsirihacarevapa- pucaini, tavetijipa eta camurianairahi ena nímitureana tayehe eta véhisira ena Cristo.

10

Ena Pablo maconsejachavaca vahi nacucuti ena ticasíñarajijiana

¹ Nuparapenevaneana, nuvaraha némechaheyare eta náichararacavahi acane ena viáchuca- naveanaini máumurivanaini ena Moiséini. Ena náehisirahi éma, tatiarihí eta úcáji tímícau- chavacapai namutu éna. Ena nánuesirahi eta mar ticajarehi Títsiama Une, namutu náimahahi eta tájjivahi eta nánuesiraya. ² Namutu ena nani tíjaracavanahi eta náítauchiraya eta náehisiraya ena Moisés, eta nánuesirahi eta ichape une mar, náehisirahi eta úcáji*. ³ Énerichuvare namutu ticuticacanaahi eta nanisirahi eta tinicacare tásihaquenehi me Viya. ⁴ Namutuhivare térana eta une tásihaquenehi me Viya. Ena juca une náeresaparacahi éna, táuchurehi tayehe eta mari, maicha ena Cristo. Émairahi ena tinapumirauchapahi éna, máitátivacapai eta napaisirapahi. ⁵ Tamapurujihiserá eta majaneasiravacahi ena Viya. Vahi émainahini éma náesenicahini. Tájinachucha vahi nacaurisamurechahini éma. Ena tacahe, máicuñacavacapa ena Viya. Namutuyaréni tépenaracanaahi tayehe eta mávapai apaquehe. Tíuchuchanahiserá ena nachichanaveana.

⁶ Éna viáchucanaveanaini, táimicuñacahi eta najamurachirahi eta tamauríqueneana. Étara eta juca ticauyayacarehi eta viyehé, énémahihávinahini víti apanavare vácutihini éna eta najamurachirahi eta tamauríqueneana. ⁷ Váhivare ecucitipa éna eta nacasíñarajirana. Échava eta Sagrada Escritura ani tacahehi: “Ena achaneana náichapa eta napiestachirahi eta nasiñaraji. Tícaejacacanapa eta nanisiraya, téranapa. Téchepucanapa tírimaicana te tamirahu eta nasiñarajihí” tacahepa eta Sagrada Escritura. ⁸ Váhira énéna vicucahe víti. Váhivare vicuveha esu apana esena. Tacuija eta vituhusivaina. Machu vácutiriana éna eta nacaicuñairahi táichavenehi eta náichirahi eta juca tamauríqueneana. Tépenaracanapa. 23,000 achane ena tépenanahi te jena éanaquenehi sache. ⁹ Váhira vicuyururujica tayehe eta mapanereruanahi ena Viáquenu. Ena nani tiyuruchavanahi, vaipa nasuapahini ena Viya. Tásiha, máicuñacavacapa éma, táechucavacapa eta quichare. Tépenaracanapa. ¹⁰ Váhira tacucarasacava eta échajisirana mayehe ena Viya. Vahi ecucuti eta náejecapiravahi ena

* **10:2** Ena Pablo máimicuticha eta nánuesirahi eta ichapequene mar; tímícutijiricavahi eta nacaicachasihini te une, étapa te jara úcáji.

viáhcucanaveanaini. Macapapajiruanahi ema ángele mavaneruhi ema Viya. ¹¹ Tacahehira eta juca náichavaquenevahí ena viáhcucanaveanaini. Púiticha tanasíhi te ajureca téjacaíhi tamutu maicha ema Viya. Tamutu eta juca témechahavihi víti, ticatsimavacarehivare viyehe víti vinecapaequenehanahi eta juca táitavirainapa puiti juca sácheana vicaijuheyare. ¹² Eta tacahe, vahi eucimijachahini tájina tiáquipaicahena. Tatuparacahi ecauneuchavayare tayehe eta tamauriqueneanahi. ¹³ Puiti juca eta vítaresira, jararihi eta tavaraha témejecapavachahavi. Váhiserá ecuaramihini, taicha eta tacahehi eta náichararacavahi namutu ena achaneana te juca apaquehe. Ecasiñavayaresera muraca mayehe ema Viya, taicha yátupi eta macasiñacarevahi. Éma, vaipa máisapaimahi távayuchavahichaini eta tapamísiraha. Jéhesare éma, tjaracahénapa eta etumevayare, ecamichirayare tamutu.

¹⁴ Tásiha puiti, eti nuparapenaveana némunaruqueneana, érajicavayare nayehe ena ticasíñarajijiana. ¹⁵ Éti ímatiequenehahi tamutu. Eta tacahe, numetacahe apaesa táuri eta epanerequenehairaya. ¹⁶ Étaripa eta juca vérasahi vimutu viyujarareasahi te vinicayare, étarichuhi táicutiarahi eta máitine máepusairuhi te crusu ema Viáquenu Jesucristo. Étaripa eta pan vinicaqueneasa viyuvetuhejiricacahi, étarichuhivare táicutiarahi eta máeche ema Viáquenu. Eta vérirahi étape eta vinisirahi, táicutiarahi eta viúrujasiracacahi te máijare, tásiha éma táivahácahavihivare vimutu víti viúrujiacanahi éma. ¹⁷ Yátupi apanapanenejihavihi víti, visimutuvacueneanahi. Émanarichuhisera ema viávaháruhi. Eta vinisirahi eta pan, étarichuhi te máijare eta viyujarauhiraíhi.

¹⁸ Eta juca viúrujasiracacahi, vicutivacaipa ena nujaneanana israelítana. Éna, tíurujacacanihi eta nanisiraya eta tacayujarahuquenehi me Viya eta tinicacare, navarairahi mávahácavacaini ema Viya táichavenehi eta nanisira. ¹⁹ Tiuri puiti, vímatiequenehahi tájinachucha táimanéna eta vaca nayujaraurehi náijjaracasiruhi eta nasiñaraji ena achaneana. Tacutirichu eta vaca mayujaraurehi. Taicha eta nasiñaraji, tájinachucha tasamacarevainahini. ²⁰ Nuvarahasera némechahe, eta nayeherepiana ena nani máimatirahanahi ema Viya, énachucha náijjaracasichahi ena éreanana eta tinicacare. Vahi émainahini ema Viya náijjaracasichahini. Eta tacahe, vahi nuvaraha ímicasiapava éti eta nayehe, machu náimivehahe nayehe ena éreanana. ²¹ Vahi táurichahini apiquererahavinahini: eta véhisirahi ema Viáquenu, tásiha véhicahivarepucaini ena éreanana. Te enicayare eta tinicacare, te érayarepuca, tatupiruva eta ecurujisiracacaina mayehe ema Viya. Mácarichu émaina ecasiña. ²² Machu ímijusemaca ema Viáquenu, taicha vahi áratashaimahi ecanara éma.

Vímerecaya eta vémunaraivanaya nayehe ena vichamuriana

²³ Yátupinéni víti véchinavahi, viyeherepipachuyarehi eta vinisiraya, váhisera tácuticacahini táetupicavahini mayehe ema Viya, váhivare tácuticacahini táimicatacavahihini eta vipauchiraya ema Viya. ²⁴ Tásiha, nuconsejachahe puiti: Vahi ácarichuimahi eti iúrichavayarehi; énerichuvare etanucayarehi eta táurichiravacayarehi ena apamuriana.

²⁵ Te enicayarepuca eta vaca tásiha te mercado, vahi ecuavamirahu eta enisirayare, váhivare ecucamesa ecuecha te ticayujarahuhípuca eta vaca, apaesa tacuíja tahapasamurechahe. ²⁶ Taicha ema Viáquenu, éma tépiyacahi eta apaquehe, étape tamutu eta távapahianahi. Vituparahaichuhi eta vinisiraya máicha.

²⁷ Títecapa te náichuhahepuca enica nácani vahi vichamurianainahini, te ísapavayarepuca tiámaheana, tíurichucha enica eta náijjararuheyare. Váhiserá ecuyasereca te ticayujarahuhípuca eta tinicacare. ²⁸⁻²⁹ Téhesera natiaríhinapuca nácani tinecapaequenehanahi, te nametacahepuca eta nayujarauhiraíhi te tamirahu eta nasiñaraji, tíuripana vahi eunica, apaesa tacuíja tahapasamurecha eta mapanereru ema timetacahehi. Éti, émitisicapuca eta epicauchirahi eta nasiñarajiana. Émasera ema echamuri, vuúchaha máemitisicahini. Tásiha, nuvaraha tacuíja tahapapicahini eta mapanereruana ícha éti.

³⁰ Téhesera etiaríhinapapuca ecahe: “Vahi núrica nuclarinepapuca nútí tituparacanuhi nujaneacavayare apaesapuca vaipa nuemejecapavacha eta mapanereru ema apana. Nútí nuhasulupayachaparaca ema Viya eta nunisirayare” ecahepuca. ³¹ Tiuri puiti, nuconsejachaheya: Tamutu eta enisirana étape eta érirana, étape eta ecaematanerana, tíuriyare tamutu eta íchirayare te mamirahu ema Viya énapa ena achaneana. Jéhesare, ena achaneana nacunachainapa ema Viya taicha eta náimairahayarehi tíurihi ícha tamutu.

³² Jéhesare, nájinapa émejecapavaruímahí, énaripa ena israelítana, énaripa ena apavasanana, navetijipa ena vichamurianahi, taicha vicuticacahi eta machichairahavihi ema Viya.

³³ Ácutinu nútí eta nuyeherepihi. Ichapemurihi eta nuvarairahi nucurisamurechavaca namutu. Vahi nácarichuhini nútí nutanucahini eta núrichiravayare. Énerichuva nutanucavivare eta núrichiravacaya ena apamuriana, taicha nuvarahahi tauri eta náehisiraina ema Viya, náuchucuiraina éna apanavare.

11

¹ Núti puiti juca nítaresirahi, étapa nupanahi eta máitaresirahi ema Cristo. Nuvaraha éne ácahéni éti apanavare, epananuyare núti eta juca nítaresirahi.

Esu esena témetserajicavaya nayehe ena suchamuriana te iúrujisiravana

² Ichape eta nucunachahe eti nuparapenaveana, taicha eta emaemitisiranuhi. Ímiyana vahivare éhica eta ímitucasivanahi nuyehe. ³ Nuvarahasera némechaheyare eta juca apanavare téchacarehi. Ema Tata Vicaiyaquene, éma machutirihahicha ema Cristo. Ema Cristo, émapa vichutirihahi vimutu viti ajairana. Ene nacahehi ena ajairana nacayenaqueneanapa, éna nachutirihanahivare ena esenana nayenana. ⁴ Eta tacahe, viti ajairana vahi viúrihahini vicaepacasihini te viyujarauchavaya étaripa te vicametarairuyare. Taicha te vicaepacasihi, tímcutijiricavaipa vémeperuhi ema Cristo eta vichutirihairahi éma. ⁵ Ésusera esu esena tatuparacahi ticaepacasiyarehi te tiyujarauchavayare, étaripa te ticametarairuyare. Taicha te vahi ticaepacasihi, tímcutijiricavaipa suémepuruhi ema suima eta suchutirihairahi éma. Te vahi ticaepacasihi ésu, tímcutijiricavaipa sucachucasiquenahini ésu. Sucutihi éna túhusiana. ⁶ Esu súcani esena vahi suávarahahini ticaepacasi, ésu tivaraha sucutiyahe ema mácani ajaira. Tásiha, te suvarahapuca suácutihavi viti ajairana, tíuripanahi sucachucaspaini, suítahisivanepaini. Téhesera te tímcsiriacavayarehipuca eta suítahisiraya, tíuripanaichuhi sucaepacasihini, suácutihini ena supáraesenávana. ⁷⁻⁹ Taicha te tépanavanainapa ena achaneana, ema máinapuiruhi ajaira vahi étainahini máuchusine-nahini suyehe esu esena. Te mavahuana ema Viya máepiyasinehi ema ajaira. Ema Viya manacahi eta máimahi, mavasirichuhi eta máimahihí ema Viya. Eta máurinavahi tásihaquenehi me Viya. Ésusera esu esena suínapuiruhi, súchurepa esu te máquehe ema ajaira, étaripa eta súrinavahi tásihaquenehi mayehe. Eta témepiyacahi esu esena, macompañerayare ema ajaira, mayenayarehi ésu. Vahi ésuina esu témepiyacahini ema ajaira eta sucaimairaya. Eta tacahe, eta viyujarauchiravana, viti ajairana tatuparacahavi vahi vicaepacasihini, taicha viti vicaquehehi ema Viya, viciticacahi ema viáchucaini Adán. ¹⁰ Énasera ena esenana, tatuparacavacahi ticaepacasianayare eta nayujarauchiravana, nacutiyahehi ena ángeleana ticaepacamiranahi te natupihamirauchayare ema Viya, navarairahi náimereca eta napicauchirahi. ¹¹ Púitsera, eta juca vítaresirahi véhisirahi ema Viáquenu, ichapemurihi eta véjiasiraipa eta náitátirahaviya ena esenana. Vítiripa ichapemurihivare eta náejiasirahivihí éna eta vítátiraya viti ajairana. ¹² Esu esena, yátupihí ema súchusirahi ésu te maeche ema ajaira, púitsera viti ajairana étapa viúchusihahi te sujehe esu esena ticachichahavi. Viásihaquenehisera vimutu mayehe ema Viya.

¹³ Nuvaraha epanarequenehaya yátupina eta juca. Németeaca nájina éti ímijachavahini tíurihi esu súcani máepacasinávehi eta suyujarauchiravahi me Viya. ¹⁴ Viti ajairana véchahi eta tatsirihacarévahi viújijiquihini eta vichutumaca. ¹⁵ Suímiturevahisera esu súcani esena súrihahi tíujijiquiyarehi eta suchutumaca. Étara tíurinachahi ena esenana. Náijaraichuhi éna eta nacaepacasiyaya taicha natuparahaichuhi éna. ¹⁶ Te natiarihinapuca nácani vahi navaraha nasama eta juca nimiturapihi, tacamunuhi napanerechinavayare tativainana. Tájina vímatiyahini eta juca apayeherepi. Énaripa namutu ena vichamuriana, tájina apanaina nayeherepinahini.

Ema Pablo macajachavaca eta namaetupisiravahi te tinicanayare eta tinicacare táicutiarahi eta máepeninahivihí ema Viáquenu

¹⁷ Tiuri puiti, numetacaheyare eta juca apana. Tájina ecunachacarevainahini nuyehe, taicha vaipa táetupicavahini eta iúrujisiravanahi eyujarauchiravana. ¹⁸ Jucarihisera eta juca ticatíhi nuyehe. Nusamairicahi te iúrujisiravana íchirana eta culto, vaipa tacuticacahini eta epanererua, íputsimuriavavacapa. Németeaca núti cañarihihí eta íchavaquenéva. ¹⁹ Páurehesami eta íputsimuriavairacacahi. Étainapasera eaecheraiyaya eti yátupiqueaneanahi machaneranahi ema Viya, énapa ena vahi machaneranaínahini. ²⁰ Eta juca tíchahehi vaipa táetupicavahini te ecurujicaca enisirayare eta tinicacare táicutiara eta máepeninahivihí ema Viáquenu te crusu. Váipasera émainahini tatupiruruchahini. ²¹ Títecapa vaipa ecuchapacacahini. Nararihi ticainapupuiricavanapa tinicana nayéhechirávavacapa. Tinahacavanapa térana técavahachávanapa. Nararihisera ena apamuriana técuhanaripaicha. ²² Tájina táurivainahini eta juca íchaquenehi. Ticutipatacujaquene-nahini epenainahini, étainapaini enisihahini érihahini. Tímcutijiricavaipa épuruvacahi ena apamuriana machaneranahi ema Viya. Ímicatsiriacavare nácani tájinaquenehi naviyavahini. Étupicavaipapuca eta juca ecahehi. Tájinaqueneapasera ecunachacarevaina eta nuyehe.

Eta táetupisiravahi eta vinisirahi eta tinicacare táemechahavihi eta máepeninahavihi ema Viáquenu te crusu

(Mt 26.26-29; Mr 14.22-25; Lc 22.14-20)

²³ Núti tatupiruvahi eta nucaimitucasirahi mayehe ema Viáquenu. Tásiha, étarichuhivare eta nímiturapihi eyehe. Taicha ani tacahehi eta nímitusirahehi: Te jena yátiquenehi te ticajjararecasiyarepa ema Viáquenu Jesús, mavehapa te mavahuana eta pan. ²⁴ Te tamutupa eta mahasulupayachirahi ema Viya, mayuvetucapa eta pan. Tásiha, máichavacapa ena máimitureana: “Enica eta juca néche. Étivenehi nímiararecavahi eta népeniraya. Eta juca apajarahiyare te apaquehe, te étipava énicaca, éta témechaheyare nuyehe” macahepa. ²⁵ Te tamutupa eta nanisirahi, mavehavarepa te mavahuana eta máerirare, mahasulupayachavare ema Viya. Tásiha, máichavarepa ena máimitureana: “Era eta juca nítimeama táepusairuvayare. Eta juca táicutiarahi eta nucaejasirayare eta arairu matratune ema Tata Vicaiaquene eta eyehe, majacapiraheyare eti ecasiñanuanayare, arairupa eta éhiruyare. Eta íchiraparacayare te énicaca, éta témechaheya eta nuyehe” macahepa ema Viáquenu. ²⁶ Puíticha tanasi eta juca. Apajarahiyarehi viyehe. Te vénicaca étapa eta vésicacaca, vémechacacahi ena vichamuriana eta máepeninahavihi ema Viáquenu. Tiámáinucava vicainajiruyare te mápechavavare máiteca.

Tacamunu eta vipicauchirayarehi te vinicaya

²⁷ Namutu nácani tinicanahi téranahi eta táicutiarahi eta máepeninahavi ema Viáquenu, te vahi tétupicavahi eta napaneruanahi, váhivare napicauchahini, ticapecaturanaripa éna. Námeपुरurecaripa eta máitine étapa eta máepenirahi. ²⁸ Eta tacahe, nácani tinicanayare, tativanumayare típanereacavanayare te tájinahipuca náichiravainahini te mamirahu ema Viya. Te tájinahini nasama, tísapavanayarehi eta nanisirayare, náerirayare. ²⁹ Taicha te vahi tipicauchacarehi eta náimairahi eta máeche ema Viáquenu eta nanisirayare, náerirayare, énajivaichucha tíchavanahi, tímicuñacavanaripahi eta nanisirahi. ³⁰ Étara tíchahehi eta juca táitusiava esimutupa eti ecajumanahi, tájinapa tatumevainahini eta iáqueheana. Ena apamuriana tépenanapaipa táicha. ³¹ Téhesera vítijivahi vétupirica eta vítaresirahi, ema Viáquenu vahi tícuñachavimahi. ³² Taicha mavarahahi vétupiricayarehi. Vaipa vicaicuñaimahi tayehe eta nacaicuñairayare ena apamuriana achaneana máimatirahanahi ema Viya.

³³ Eta tacahe, eti nuparapenevana, te ecurujicacayare eta enisirayare, ecuchapacacayare apaesa ínuna eta enisirayare. ³⁴ Téhesera matiarhipuca mácani técuhasamureripaicha, tíuripana manicanuma te mapena, apaesa vaipa macuemeharecahe ema Viya taicha eta tamaetupisiravahi eta iúrujisiravahi. Étasera eta juca apamuriana téchacareanahi viyehe, nímaharinepa núti. Nétupiricaya te níteca eta ara eyehe.

12

Vimutu viti vítupajijiasiravapachuyare maicha ema Espéritu Santo

¹ Nuparapenevana, nuvaraha numetacaheyare eta apana téchacareana, apaesa yátupina ácaicutiara. Jucarihi apanapanenejihu eta vítupajijiasiravanayare maicha ema Espéritu Santo.

² Écharichuhi éti, te vuíchaha émainahini éhica ema Viáquenu Jesucristo, ísapajiricavaichaha tipamicacheana éhica eta nasiñarajiana tájinaquenehi eta tájicapaivaínahini. ³ Nuvaraha némechaheyare eta juca ímatirayare nayehe nácani vahi mávaháruanaimahi ema Espéritu Santo. Te nacahepuca: “Másájitatajipucaini ema iáquenu éti”, te nacahepuca eta juca, ímativacaya éna. Taicha ena mávaháruanahi ema Espéritu Santo, nararichu ena tatuparacahi náimatiyare eta aquenucairahi ema Jesús. Énasera ena vahi mávaháruanainahini ema Espéritu Santo vahi tatuparacahini nácahepuca: “Ema Jesús émara Viya Viáquenuhi”.

⁴ Víti mávaháruanahi ema Espéritu Santo, apanapanenejihu eta vítupajijiasiravana májjararuhavianahi. Émanarichuhisera éma. ⁵ Énerichuvare apanapanenejihu eta vémataneana májjararuanahi ema Viáquenu. Émanarichuhisera éma. ⁶ Te tamutu eta vicaemataneasira, ema Viya émarichuhi ema téchahavihi, tíjaracahavihi eta vitumevahi, viratahairaya vimutu. ⁷ Énerichuvare ema Espéritu Santo, víjaracasipachuhi eta vítupajijiasiravayare maicha, vímitusihayarehi eta tasimutuqueneanahi namutu ena vichamuriana. ⁸ Nararihi ena máimicatavaca ema Espéritu Santo eta náitusiraya téchajicana, náimituresiraya. Ena apamuriana májjaracavavare máejerareyare eta nacaicutiarairaya eta mapanereruana ema Viya. Émanarichuhisera ema Espéritu Santo tíjaracahi eta juca. ⁹ Nararihivare ena májjararuanahi eta nacuchapirayare muraca eta nayasearuanahi ema Viya táichavene eta nacasiñavairahi eta mayehe. Nararihivare ena májjararuanahi eta nacanarasirayare ena nacajumaqueneana. ¹⁰ Nararihivare ena májjararuanahi eta

nacuchusiraya eta tíamicareana. Ena apamuriana nájaraichuvare eta ticametacasianaya mayehe ema Espíritu Santo eta máechajiriruvanahi ema Viya. Ena apamuriana májjaracavare eta náimatisiravaneya ena achaneana nájahapuca nácani mávaháruanahi ema Espíritu Santo, nájahavarepuca ena mávaháruanahi ena éreanana. Ena apamuriana májjaracavare eta tíurichuya eta náechajisiraya eta apaechajiriruvana. Ena apamuriana májjaracavare eta náitusirayare, nápepica náechajisihia eta apaechajiriruva, trépeteayarehi. ¹¹ Tamutu eta juca máichaqueneanahi ema Espíritu Santo. Macarichuhi ema máitaparajahi májjaracavaca eta náitucaquenepachuyare namutu ena mavarahaqueneanahi májjaraca.

Émanarichuhi ema véhiruhi

¹² Viti achaneana, apanapaneneji eta tájareana eta viáquehe. Tisimutuhi eta táitupajjiásiravana. Étanarichuhisera eta táuchusihahi te viáquehe. Ene tacahehi eta véhisirahi ema Viáquenu Jesucristo. Vimutu viti véhicanahi éma, apanapanenejihavihi, visimutihivare. Émanarichuhisera ema véhiruhi. ¹³ Tacahe, vahi étaparacaina te israelitahávipuca, te apavasasajuecuhavivarepuca, étaripa te máquenurehavihipuca. Téhesera te vicaicachasipa eta véhisirayare ema Viáquenu, étanarinepa eta vímahi maicha ema Espíritu Santo. Énerichuvare, eta mávahásirahaviripa, viciticacaripa eta máecasarechirahavihi eta viáchanevana.

¹⁴ Yátupi eta viáquehe vahi étanainarichuhini eta táimahanahi, étpa eta táitupajjiásiravanahi. ¹⁵ Étaripa eta vívape, vahi távasihini eta vivahu, váhivare tacuticacahini eta táitupajjiásiravanahi. Étarichuhisera táunavahi eta viáquehe. ¹⁶ Étaripa eta vichaca, vahi távasihini eta viúquiha. Étarichuhivaresera táunavahi eta viáquehe. ¹⁷ Váiparinehi táuricaimahi amairihainahini eta viáquehe tacaquihahini. Tásiha, tacuijapucaini víquifainahini, tacuijapaini visamaquenehanini. Váhivare táuricaimahi amairihainahini eta viáquehe tacaquihahini. Tásiha, tacuijapucaini visirinhahini, tacuijapaini vijjurenahini. ¹⁸ Ema Viya manacahi eta táematanerepianayarepachuhi eta juca táunavanahi eta viáquehe. Taicha tacahehi eta mapaneruhi ema Viya te tépiyacahavinapa. ¹⁹ Vahi mávarahahini étanainarichuhini eta táitupajjiásiravainahini eta viáquehe, amairiquihahavinahipucaini. ²⁰ Yátupi tisimutuhi eta táitupajjiásiravanahi eta viáquehe, étanarichuhisera eta táviahahi.

²¹ Tamutu eta juca viáquehe ticamunujiricacahi. Étaripa eta viúquiha tacamunuhi eta vivahuana. Étaripa eta vichuti tacamunuhivare eta vívapeana, vipaisihayare. ²² Étaripa eta táivihanahi te amahe vijuhe, tamumearairahaipahi eta vímairahi, étahisera tiápajucavahi ticamunucarepanahi. ²³ Jucarihi eta viáquehe ticutimahahi vahi múnainahi eta vímairahi. Étahisera tiápajucavapanahi vimuiriachahi. Jucarihivare eta viáquehe vaipa táuricahini vímerekahini. Tásiha, tiápajucavapanahi vépacucurehi, vicatiuchahivare. ²⁴ Jucarihivare eta apana táunavahi eta viáquehe ticutimahahi vaipa vicamunuhi vépacuchahini. Timererecavahi nayehe ena achaneana. Tamutu eta juca máépiyaruanahi ema Viya, máicuchahi eta táimahanapachuhi, mavarahahi tácuticacahi eta vémunasiraya tamutu eta táunavanahi eta viáquehe. ²⁵ Eta tacahe, te vicaematane, tamutu eta viáquehe tiyamuricahi, tímicatajiricacahi. Ichapehi eta táejiasiracacahi. Vahi táiputsiacacahini. ²⁶ Étaripa te tatiarihípuca eta táichavaquenevahi eta táunavahi eta viáquehe, támairiacahi ticati eta viáquehe. Téhesera tatiarihípuca eta táurisamurevahi taicha eta táitupajjiásiravanahi, tamutuyarehi eta viáquehe tíurisamure.

²⁷ Ene ecahehi éti eta éhisirahi ema Viáquenu Jesucristo. Eta iúrujisiravahi mayehe, ecuticacahi eta táunavanahi eta máquehe. ²⁸ Énerichuvare, ema Viya tituparacahavipachu eta viávacurepachuhi, mavarairahi vijaneacaheyare eti vichamuriana, machanerahi. Tituparacahavihi viti apóstoleana vímahaheya, énapa ena profetana, énapa ena tímiturecarahianahi eta máechajiriruvana ema Viya, énapa ena títurequenehanahi nacuchuca eta tíamicareana, énapa ena ticanararecanahi ena nacajumaqueneana, énapa ena tímicatahianahi nayehe ena nacamunuquenevana, énapa ena tíúrianahi eta nacavanairipirana, énapa ena tíúrichu eta náechajisihia eta apaechajiriruvana, énapa ena trépeteana títucanahi nápepica eta apaechajiriruvana. ²⁹ Vahi étanainarichuhini eta viávacureanahi. Vahi vámutuhini apóstolehavinahini, vahi vámutuhini profetahavinahini. Vahi vámutuhini vímiturecaini. Vahi vámutuhini vicuchuca eta tíamicareana. ³⁰ Vahi vámutuhini vítupajjiacavahini vicanararecaini ena nacajumaqueneana. Vahi vámutuhini véchajicanahini te apaechajiriruvana. Váhivare vámutuhini trépetehavinahini. ³¹ Tiuri puiti, étpa tacamunu eyaseaca ema Viya májjaracahe eta ítupajjiásiravaina eta ticamunucarepana. Jéhesare, nuvaraha nímitucaheyare eta apana táurinaquenevana. Esamanuchaha.

13

Eta ticamunucarepanahi eta vémunaraivaya

¹ Vítiripa, te tacuijahipucaini eta vémunaraivainahini, vaipa tisuapacaré mahi eta vimeta-
rairuana. Vémunasiricavapa. Tayanapane vítucahipuca véchajica tamutu eta apaechajiri-
ruvana, vácutipucaini eta náechajisira ena ángeleana. ² Te tacuijahipucaini eta vémunarai-
vainahini, tájinapa vicunachacaré mahi me Viya. Tayanapane vicametarairuhipucaini eta
vimetacasivanahi te anuma, támutuhivarepucaini víturuequeneháini, étaripa te máijahúcha-
pucaini macayejecahini ema Viya eta ichapequene mari táichavenénahini eta viyaseasi-
rainahini eta vicasiñavairainahini eta mayehe. ³ Tásiha, te tacuijahipucaini eta vémun-
araivainahini, tájina vijacaparé mahi me Viya táicha. Tayanapanevare vicajiricahipucaini
tamutu eta vímahaqueneana te vipena, téhevare vísapapucaini náijuchaini eta víaquehe
táichavenénahini eta namaurisirahi véhica ema Viáquenu. ⁴ Téhesera yátupihí vémunarahi,
vicayeheyarehi paciencia, vijapanurahiyare. Vahi vicapinarurecaini. Váhivare píncani-
llahavimahi. Váhivare vicasiñavavaicaini. ⁵ Váhivare vicavapajaimahi jácani táifema-
hiqueneana. Váhivare viveremirauchaimahi ena apamuriana achaneana. Váhivare
tijuricati visemaimahi. Váhivare vicitianarecaini. ⁶ Váhivare táuricahini vicaechira-
hahini te vímaha nácani ticaejeanahi. Viúrisamuresera te vímaha ena achaneana tíuríhi eta
náitaresira. ⁷ Te yátupihí vémunarahi, vicamichayare tamutu. Vahi énevanémahi visuapa
eta echajirucavana náepiyapiruanahi ena achaneana. Vicuchapayarehi eta táetupirisira-
vayare eta panerucana. Vahi víjahúchavaimahi vínjicava, vicuchapínávayare. ⁸ Tájinapa
títaimahi eta vémunaraivayare, vímiyanavainapa eta vítaresiraya. Eta jena sácheanayare,
vímatiequeneha tamutu. Vaipa vicamunu eta vimetacasivana eta metarapianayare tásiha-
queneanayare me Viya. Tájinapa víatájivaimahi eta visamirayare eta apaechajiriruvana.
Váipavare tácajerainahi eta visamirayare vímatiequenehavanéna. ⁹ Taicha puiti te juca
vítaresirahi, apaesachicharichu eta vímatiequenehairahi, apaesachicharichu eta vítusirahi
eta metarapiana tásihaqueneanahi me Viya. ¹⁰ Járjapainapasera eta sácheyare, vímatieque-
nehainapa yátupi eta mapaneruana ema Viya, eta vímáimatiequeneruanahi puiti. Vaipa
vácamunu ena tímitucahiviana.

¹¹ Nímicutichavahi nútí eta víámaperuvahi. Vuíchaha vítucahini vipanerereca, vímapa-
chichijiricavaichaha. Téhesera te ajairahavipa, te esenapuca, títsivachavapa eta vipane-
reruana. Vínjicapa eta víámaperuvainíhi. ¹² Ene vicahehi víti eta juca vítaresirahi. Puiti
vuíchaha támutuhíni vímatiequenehahini. Ticutirichaha te vímararacaicha eta vicuna te
jácani ichasi espejo, vahi tacaecherahini. Járjapainapasera eta sácheyare ticaecherainapa
tamutu. Puiti, ticajera eta vicaicutiarairahi víti. Ema Viya vuíchaha tímitucahívihini
tamutu eta mapaneruana. Téhesera te aparahinapa, tamutuya vicaicutiara máicha.
Tacutirichu eta máimairahi puiti eta vipaneruana víti te amahe eta visamureana. ¹³ Puiti,
eta juca vicaijuheya, vímiyanava vámutu muracaina eta vicasiñavairahi me Viya, váhivare
vicuyacujihini eta vicuchapirapaipa eta víurivainapaipa, tacuijavareni tahapapiricahini
eta vémunaraivayare. Jéhesare, tiápajucavapanayarehi eta vémunaraiva. Étara ticunachaca-
repanahi me Viya.

14

Tísapacare eta náechajisiraya eta apaechajiriruvana

¹ Tacahe, nuvaraha nútí yátupina eta émunaravaina. Nuvarahavare eyaseaca ema
Espíritu Santo eta ítupajjisiravaina, étaripa eta ítusiraina ecametarairu eta máechajiriruva
tásihaqueneanahi mayehe ema Viya. ² Tájina táichava, nácani téchajicana ema Viya eta
apaechajiriruva. Éma masamahi. Vítipasera víti apamuri vaipa vácaicutiarahini eta
náechajiriruvahi. Yátupihipuca máimitureanahi ema Espíritu Santo, váhisera náimereucha-
vahini eta máimiturapihi éma. ³ Vahi tácuti nácani nacametarairuhi eta máechajiriruvana
tásihaqueneanahi mayehe ema Viya, ticaicutiaracarehi tamutu eta nametarapianahi.
Tatupiruvahi eta náimitusiravacahi ena apamuriana. Náetumechahi eta náchanevana eta
nasuapiraina. Éta nacurisamurechihavacahi te jácani napanereresirana. ⁴ Ema mácani
téchajicahi ema Viya te apaechajiriruva, mayechirivarichuhi te máchaneva eta macajuru-
siraya eta masuapajiraivaya. Émasera mácani ticametarairuhi eta máechajiriruvana tásiha-
queneanahi mayehe ema Viya, macajurusinahi eta nasuapajiraivayarehi ena machamuri-
ana.

⁵ Nuvarahahinéni nútí ámutuhini ítupajjiacavahini maicha ema Espíritu Santo, échaji-
cahipucaini te apaechajiriruvana. Tiápajucavahisera eta nuvarairahi ecametarairuhini
eta máechajiriruvana tásihaqueneanahi mayehe ema Viya, taicha étara tíuripahini eta juca
tayehe eta échajisirainahini te apaechajiriruvana. Tíúrihinéni échajichahini, tacamunuhisera

natiarihinahini nácani trépete, nametacavacasarepaini ena apamuriana eta tacayemaqueneanahi apaesa tajurusihapaini eta nasuapajiravainahini. ⁶ Nútripa, nuparapenaveana, nítecapauchahepucaini néjirapanahehinehi, tásiha néchajicapahipucaini te apaechajiriruvana eta eyehe, éti vahi ácaicutiaraimahi, váipavare tímicitacahémahi eta tajurusirainahini eta ecasiñavairahi me Viya. Tacamunuhi néchajicahíni te échajiriruvaiçu eta nímutisirahénahini, éti ecaicutiarasarepaini tamutu eta numetacasiavanahi me Viya, étapa eta máimerechaquenenuhi, étapapuca eta máimatiquenehi, arairu eta viyehe.

⁷ Eta juca tímicutijiricavahi te mapacharajihí eta masiviviripi ema ticasivivihi. Vaipa tacaicutiaracarehini tájahapuca eta masiviviripi. Émaripa ema violinista, váhivare ticaicutiaracarehini tájahapuca eta mapununerapi. ⁸ Énerichu tacutihí mácani cúnretéru nayehe ena suntaruana, te váhivare ticaicutiaracarehi eta macachujairahi, váiparinehi tíurujicavanaimahi ena suntaruana táichuhaqueneanahi, taicha vahi nácaicutiarahini. ⁹ Ene ecahehi éti, eta échajisirahi eta apaechajiriruvana, nájina nacaicutiarahini. Tímicutijiricavaipa nacuijahini nasamararacahinehi eta échajisirahi. ¹⁰ Yátupi tisimutuhi eta apaechajiriruvana hi juca apaquhe. Nayehepachuhisera nácani ticaechajiriruvanapahi. ¹¹ Vítiripa te náechajicahavipuca ena extranjeriana te náechajiriruvana, váiparinehi vácaicutiaraimahi. Énaripa váhivare ticaicutiarahavianaimahi víti. ¹² Tiuri puiti, vahi tacumapuruji eta evarairahi ejaçapa eta ítipajijiasiravanaya májararuheyahehi ema Espíritu Santo. Tíuripana eyasesereca eta ítusiraina ímitucavaca ena echamuriana apaesa tajurucapaipa eta nasuapajiravaina éna apanava.

¹³ Tásiha, mácani téchajicahi te apaechajiriruvana, tacamunuhi mayaseacahini ema Viya eta máitusirainahini mametacavaca eta tacayemaquenehi eta máechajiriruvahi apaesa nacaicutiarasarepaini nácani tisamararacanahehi. ¹⁴ Taicha eta viyujarasirahi víti te apaechajiriruvana, te vítiparicapa eta viyujarasirahi, vahi tánasihini véchavahini eta vícayemaqueneanapahi, vémitisicavanehi tamutu. ¹⁵ Eta tacahe, tíuripanehi viyujaraca te véchajiriruvaiçu, tásihaqueneanahi te visamure. Te víjirayarepuca, tíuripanehi váhivare te véchajiriruvaiçuhavare, tásihaquenehanavare te visamure, vícaicutiarasarepaipa eta vícayemaqueneanapahi. ¹⁶ Téhesera apaechajiriruvahi eta eyujarasirahi me Viya, yátupihí eta ecunachirahi éma. Énasea ena tisamararacahanehi vahi náehicaimahi eta eyujarasirahi náimicatasirahinehi eta nayujarasirahi; taicha vahi nácaicutiarapahini eta ecayemaqueneanapahi. ¹⁷ Tíurihinéni eta eyujaracasahi eta ehasulupayachirahi ema Viya, énasera ena echamuriana vaipa táimicacavacahini eta eyujaracasahi. ¹⁸ Jéhevaresera núti, íchape eta nuhasulupayachirahi ema Viya taicha eta níтусirahi néchajica eta apaechajiriruvana. Nucachuricahinehi emutu éti. ¹⁹ Étasera te nucametarairuyare te namuri ena vichamuriana, vahi nuvaraha nácuti ena tíupiemana eta náechajisira te apaechajiriruvana. Núti ánipirichu te néchajica, tamutuhisera ticaicutiaracarehi nayehe ena nímutireanahi.

²⁰ Nuparapenaveana, éti vaipa amaperuhénahini. Nuvaraha táuripaini eta epanereruana, eta íchirayare eta táuriqueneana. Nuvarahasera ácutihini ena amaperuana vuíchaha náitucahini naicha eta tamauriqueneana. Énenapaini ácahehinehi éti. ²¹ Ema Viya, ani macahe eta te Sagrada Escritura: “Nutuparacayare ena apanaqueneana achaneana apaechajiriruvana náimitureca eta nuvanairipiana eta nayehe ena achaneana távacuanahi eta avasare. Váhiquenesera nasuapaimahi” macahepa ema Viya.

²² Tacahe, nácani tiyujaracanehi te apaechajiriruvana, táicutiarahi eta májarasiravacahi ema Viya náichavenehi ena máehicarahanarichaha ema Viáquenu. Jéhesare, tayuchusamurechavacayare eta nasamararasirahi. Énasera nácani ticametarairuvana hi eta máechajiriruvana ema Viya, tayuchusamurechavacayare ena téhicanahi ema Jesús, taicha ticaravahuanayare eta nasamararasirahi. ²³ Étasera te jácani íurujisiravana, te eyujaracahipuca emutu te apaechajiriruvana, tásiha, te natiarhipuca nácani masuapajirairahanarichaha, ticaecahiheanayarehi éna, náimijachayarehi máurishihehi. ²⁴ Tíuripanehi eta ecametarairuvana emutu eta máechajiriruvana ema Viya, te échajiriruvaiçu. Tásiha, te natiarhipuca te íurujisiravahi ena masuapajirairahanarichaha, ticatisamurevanayarehi taicha eta nasamararasiraya. Tipanerequenehavanainapa eta nacapeaturairahi. ²⁵ Tacahe, tímaticavanainapa eta máimatirahi ema Viya tamutu eta napecaturana tayumuruvanaínihi. Tépuycavanainapa téneuchavanainapa mayehe ema Viya. Téchajisiaheanainapa: “Yátupiquenéyapa mávahácavacahi ema Viya ena nániana” nacahenapa.

Tacapicahu tamutu eta íurujisiravana

²⁶ Nuparapenaveana, áni tacaheyare eta íurujisiravanayare. Enerejicava eti íputsiacavayare eta ejirairaya. Énerichuvare tinerejicavayare mácani tíjaracavayare ema tímituracayare. Énerichuvare te matiarihinapuca mácani mavarahahi ticametarairuyare eta mametacasiavanahi me Viya, tájmachucha táichavahi. Tísapacarehivare eta échajisirayare

te apaechajiriruvana. Tacamunuhisera matiarihiyare ema trépeteyare. Tamutu eta júcana, étara ticajurucayare eta nasuapajiraivainapaipaicha ena echamuriana. ²⁷ Téhesera te natiarihinapuca apinana, mapananapuca ena tivarahanahi téchajicana te apaechajiriruva, tájinachucha táichava. Tísapacarechucha. Tévacajiricacanayahisera te jácani náechajisirayare. Váhivare téjiacavaimahi ema nayeheyare trépete. ²⁸ Téhesera nájinapuca naviyavahi ema nayeheyare trépete, tiúripanaichuhi vahi nacuechajica te apaechajiriruva te namuri ena echamuriana náurujiruvanahi. Tiúri, te navarahahipuca náechajica ema Viya, tavarahahi nacarichuyarechucha eta náechajisiraya. ²⁹ Nácani ticametarairuanayare eta máechajiriruvana tásihaqueneanahi mayehe ema Viya, te apinanahipuca, mapananahipuca, tájinachucha táichavahi, tiúrichucha. Ticamunucarehisera ena náurujiruvanahi tisamararacananahi napaneréquenehayarehi tamutu eta nacayemaqueneanapahi ena ticametarairuanahi. ³⁰ Téheserapuca matiarihíhi mácani máejaruhi, ticametacasihiquenehi me Viya; tásiha mavarahapuca macuchujpica eta mametacasiyahí, tísapacarechucha eta máechajisiraina. Macuchapavayaresera máitapiricanuma mácani máinapuiruhi téchajica. ³¹ Emutu eti ecametacasiqueneanahi eta máechajiriruvana ema Viya, itsivajiricacayare. Émanainapachu mácani téchajicayare, apaesa ena ímitureanahi namutu nacaravahu, náetumechavahivare éna apanava. ³² Ena ticametarairurahiana tatuparacahi ticuchapavanayare. Vahi ticainapupuicavanaimahi. ³³ Taicha ema Viya vahi mávaraha mapacharajinahini nácani ticametarairuanayare. Tásiha, éti ecajarusinavayare apaesa ecurisamurecha ema Viya.

Táepiyarichuhi eta juca viyeherepi víti te viúrujisiravana. ³⁴ Ena vichamuriana esenana timatinanayarehi. Vahi téchajicanaimahi. Nasamararasinavaichucha. Taicha sujárachuhi me Viya esu esena susamararasiyareichuhi. ³⁵ Te tatiarihipuca eta suvarahaquenehi suecha esu esena, tiúripanahi te náitecapapa te napena suyaserecapa ema suima. Taicha vahi súrihahini esu esena sucayasesereruhini eta suvarahaquenehi suecha te namuri ena echamuriana.

³⁶ ¿Tájaha tacayema eta ecasiñavavaisirahi? Vahi étinahini ínapuchahini mametacahehini ema Viya eta máechajiriruva. Váhivare ácarichuhini éti tatuparacahini eta ejacapirahi. ³⁷ Te natiarihipuca nácani tímijachavanaripa náimatiequeneharipa tamutu eta máechajiriruva ema Viya, náimijachaipapuca mávahácavacaripa ema Espíritu Santo, tatuparacahi éna napánerechinávánumayare eta juca nájurehi eyehe, tásihaquenehi me Viáquenu, mavanaripichuhi éma. ³⁸ Téhesera matiarihíhipuca mácani tépuruyare eta juca numetarapianahi, émaina máepurucare, vaipa tisamacaremahi eta eyehe.

³⁹ Tiuri, nuparapenaveana, epamicavachucha ecametarairu eta máechajiriruva ema Viya. Tásiha, táuricachucha ísapa nácani téchajicanaparacahi te apaechajiriruva. ⁴⁰ Tacapicahuhisera támutu eta iúrujisiravana. Ecajarusinavapahi tamutu eta íchaqueneanayare te iúrujisiravanahi.

15

Eta máechepusirahi ema Cristo te máecari

¹ Nuparapenaveana, nuvaraha némechaheyare eta numetarairuhi eyehe eta máechajiriruvahi ema Viya tayehe eta viúchucuirayare. Étara táemesiavahi eta juca te esamainapa, etupiruvanehi ejacapa. Puíticha tanasíhi eta esupirahi. ² Tásiha, puítí iúchucuhapaipa táichavenehi eta ímiyaniravahi esupa eta numetarairuanahi eyehe. Németeaca yátupíhi eta íjarasiravahi eta éhisiraya eta juca esamaquenehi.

³ Écharichuhi eta nímiturapianahi eyehe, étarichuhivare tacahehi te nímitucasivahi. Eta júcana eta tisuapacarepanahi: Yátupirahi máepeninahivíhi ema Cristo táichavenehi eta vipecaturana, émairahi ema táechajisihaquenehi eta Sagrada Escritura. ⁴ Eta náimairahi tépenapa éma, náecarapa. Téchepucahisera éma te mapanaquenepa sache, taicha tacahehi eta tametarapíhi eta Sagrada Escritura, tímecatavahíhi tamutu eta máichararacavayarehi éma. ⁵ Tímerecavahi mayehe ema vichamuri Pedro, énerichuvare ena apamuriana apóstoleana. ⁶ Tásihapa tímerecavavarepa nayehe ena quinientoqueneana eta nasimutuvanahi ena vichamuriana. Puíticha nararihíhahaha maverana ena tímahanahi. Nararihípasera ena tépenanapaipahi. ⁷ Te táequenevarepa, tímerecavavarepa mayehe ema Santiago. Tásiha, táípechavavarepa tímerecava nayehe namutu ena apóstoleana.

⁸ Tásiha, te táequenevarepa eta júcana, táípechavapa tímerecava nuyehé, nútípavapa nímahahi éma. Ichape eta táamicarevahi nuyehé eta máichuiranuhi nútí néquenereruhi mayehenuyarehi apóstole, tacuti eta tájahúchirava te tiújucayare esu esena. ⁹ Ichapemuríhíni eta némpuruirávahi nútí nayehe ena apamuriana apóstoleana. Váhivare táurichahini apóstoleninahini eta nímairavahi, taicha ichapemuríhi eta nupanjirisirávacahi ena nánapureanahi

machaneranahi ema Viya. ¹⁰ Tíchuhanuhisera ema Viya, taicha eta máemunasiranu-samihi. Apóstolenuhi puiti eta mayehe. Váhisera némepurecavahini eta máemunasi-ranuhi. Jéhevare núti, nucachuricahi ena apamuriana apóstoleana. Ichapemuripanahi eta nucaemataneasirahi éma. Váhisera níputsiaracavahini núti. Eta máemunasiranuhi ema Viya, tímícatacanuhi eta nucaematanerahi. Tíjaracanuhi vare eta nétumechiravahi. ¹¹ Tájinasera vahi étaparacaina eta juca nájahapuca nácani ena ticaemataneapanahi. Étarichuhi eta vímiturapiana eyehe, eta esuapaquenehi puiti.

Tayanapane vépenaipapuca, véchepucayarehisera

¹² Víti vímitucaheripa eta máechepusirahi ema Cristo te máecari. Németeacasera etiar-i-hichaha eti vuíchaha esuapahini taicha nusamairiricahi eta ecahehiji: “Vahi téchepuca-naimahi ena nápenaqueneana”. ¿Tájahapuca tacayema vuíchahacaruhi tasuapacarehini eyehe? ¹³ Éti éjécavavahi eta epanereruana. Ímijachaipapuca vahi máratahaimahi ema Viya máechepucavaca ena nápenaqueneana. Te vahi macuratahahini, váhivarepucaini macuaechechepucahini ema Cristo te máecari. ¹⁴ Tacahe, te vahi macuechepucahini ema Cristo, váipapucaini tacusuapacarehini eta vímiturapianahi eyehe, tamapurujipapucaini eta esuapirahi. ¹⁵ Te yátupinahini vahi tacusuapacarehini eyehe eta náechepusirayare ena nápenaqueneana, váhivare tacusuapacarehini eta macaechechepusirahi ema Viya ema machicha Cristo. Tímicutijiricavahini vépiyahirahihini vivayuarerecaipapucaini viti te máijare ema Viya, taicha eta vímitusirahehi eta macaechechepusirahi ema Viya ema Cristo. ¹⁶ Te yátupinapuca vahi tisuapacarehi eta náechepusirayare ena nápenaqueneana, váipava-repucata tisuapacarehi eta máechepusirahi ema Cristo. ¹⁷ Énerichuvare, te váhipuca tisuapa-carehi eyehe eta máechepusirahi ema Cristo, tásiha énerichuvare váipapuca tisuapacare-hivare eta macaepahaira ema Viáquenu eta epecaturana táichavenehi eta ecasiñairahi éma. ¹⁸ Te yátupinapuca vahi tisuapacarehi eta júcana, tímicutijiricavaipea témítiequeneanaripa ena nápenaqueneanahi téhicanahi ema Cristo te achaneanarichaha. ¹⁹ Te yátupinapuca vahi tisuapacarehi eyehe eta júcana, tamapurujiripa eta vijanearisravahi eta víaresirahi puiti juca táichavenehi eta vicuchapiravahi vivarairahi vicachane ema Cristo te apana vítaresira. Te vahi tacuitauchava eta juca, ichapeyare eta vicatisamurevairaya.

²⁰ ¡Yátupiquenehisera eta máechepusirahi ema Cristo te máecari! Tacahe, éma ecutiararehi viyehe eta véchepusirayare viti apanavare te vépenaripapuca. ²¹ Taicha eta vépenira manaquipairuhi ema máinapuiruhi ajaira te juca apaquehe ticaijare Adán. Ene macahehi ema Cristo, éma tinaquipaicahe eta máinapuisirahi tayehe eta véchepusiraya te vécari. ²² Táichavenehi eta mámariequenerahavihi ema Adán, émapa tíamahavihi tayehe eta vépenira. Puitisera táichavenehivare eta véhisirahi ema Cristo, émapa tíamahaviyare tayehe eta vípéchi-ravayare vítareca. ²³ Yátupiquenehi táejarurevahi eta juca. Tínapucahi ema Cristo téchepuca. Éma ecutiararehi viyehe. Tásiha, te mápechavavare máiteca te juca apaquehe, émainapa téchepucanayare ena nápenaqueneanaripa machaneranahi. ²⁴⁻²⁷ Tacahe, tíánehinapa eta táichecuaraqiyare eta tamauriqueneanahi te apaquehe. Taicha ema Cristo macamítie-quenehainapa tamutu eta náitupajjiasiravanainihini ena táquenuruhanainihini eta tamauri-queneana. Ema Viya máijaracayarehi eta matumevayare macapaquechirayarehi namutu ena mánananahi, étainapa mácatayanusihavacayare. Tacahe, macaepahainapa eta vépeniraini. Nájinainapa tépenaimahi. Taicha ema Cristo matuparahaichuhi mayehe ema Maiya eta aquenucairayarehi, émayarehi téchayarehi tamutu. Taicha ániapa macahehi ema Viya eta te Sagrada Escritura: “Éma nutuparacahi téchayarehi tamutu”. ²⁸ Tájinasera vahi ticasíñavavaicaimahi ema Cristo eta émairaipa técha. Te máimahapa támutupa máetupirica, macuchapainapa eta vanairipianayarehi mayehe ema Maiya, taicha éma tíjaracahi ema Machicha eta máitupajjiasirava. Tásiha, ema Cristo máimereuchainapa étairahi tásiha eta vanairipiana mayehe ema Maiya. Émarichuhi téchahi tamutu.

²⁹ Tiuri puiti, nararihi ena apamuriana ticaicachasianahi náitsivahi ena nápenaque-neanaripa, namavarairahi náemítiequenehahini tayehe eta náechepusirayare. Ene nani, muracahi eta nasuapirahi eta yátupirahi eta náechepusirayare ena nápenaqueneanaini.

³⁰ Nuvaraha ácutihavi viti eta vicasiñairavahi me Viya. Tayanapane ichape eta tacuayaya-carevahi eta vépenirainahini puiti juca sácheana, vicamichahisera tamutu taicha vicucha-pavahi eta macaechechepusirahaviya ema Cristo. ³¹ Nútiripa, nuparapenaveana, tamutuhi sácheana ticauyayacarehi eta népenirainahini. Ichape eta tapicacarevahi. Nucurisamu-rechavasera eta núrisamurevahi icha éti eta iúrivaipahi mayehe ema Viáquenu Jesucristo. ³² Núti muracahi eta nusuapirahi eta véchepusiraya te vécariana. Te váhipuca nusuapahini, vahi nacucanaranuhini te juca avasare Efeso. (Náetaviuchahi eta navainarajivanahi, nacutihi éna eta sárareana táíñehiqueneanahi.) Tájinachuchasera táimaequenehahini nuyehe eta nímiyanavayare eta nucatiuchira eta véhiruhi, te tacuija yátupinahini eta véchepusirayare

te vépena. Nararihisera ena téjcapavanahi eta napanereruana. Tímijachavanahi vaipa téchepucanaimahi te náepenapa, taicha ani nacahehi: “Vicamapuravachucha puiti vera vinica, viúrisamureyare taicha achichupuca vépenacaru. Tásiha, títavainapa tamutu eta viyehe” nacahepa.

³³ Vahi tacucahe eta epanereruana éti. Taicha éna, vahi tétupicavahi eta nayeherepianahi. Ticauyayacarehi najarareca eta táurinavaipahi eta eyeherepiana. ³⁴ Tátupiruvapa táuri eta itaresiraina éti. Vaípavare ecuquicha eta pecatuana. Taicha nararihi ena viúchaha náimatihini ema Viya te emuri. Titsiriacerripahi eta nacasiriquirahehi eti machaneraque-neanahi ema Viya.

Apanainapa eta vicaqueheyare eta véchepusirainapa

³⁵ Németeaca nútí nararihi vuúchaha nasuapahini. Navarahapuca tiyaserecanuanaya: “¿Tájahapuca náicharacavayare eta náechepusirayare ena náepenaqueneanaini? ¿Tájaimahinapapuca eta nacaqueherayare?” ³⁶ Ena tiyaserecanuanaya, tájina náechaquenéna. Puiti, nuvaraha epanerequeneha. Nímicutiarachinaheyare tayehe eta evaraquí. Eta evaraquí váhira tímaruca te vahi vémuríachahini te apaquehe. Ene vicahe viti achaneana. Tínapuca eta vépenira étapa eta náecarairahaví. Tásiha, te táequenepa, víjacapaya eta viáqueheana arairuya. ³⁷ Te vévacapa eta jácáni evaraquí, vémuríachapa te apaquehe. Te tinanapahi eta apaquehe, tímarucapa eta vévaraquí. Váhisera étainahíni tachavahini táuchuchahini eta evaraquíhi. ³⁸ Táquehepachuhi eta táimarúsirahi eta evaraquí maicha ema Viya. Vahi apaimamajinahini eta táimaru. ³⁹ Étaripa eta veche viti achaneana, vahi távasimahihíni eta taeché eta sárare. Apanahi eta táimahi. Eta taeché eta cáyure, apanahivare eta táimahi. Eta taeché eta jima, énerichuvare apanahivare eta táimahi. ⁴⁰ Énerichuvare, eta nacaquehera ena tiávihanahi te anuma, vahi távasihini eta vicaqueherahi viti viávihanahi te juca apaquehe. Apanahivare eta táurinavahi eta nacaqueherahi éna. Vítí, apanahivare eta táurinavahi eta vicaqueherahi. ⁴¹ Énerichuvare nuvaraha ácaicutiara eta tajaraivahi eta sache, apanahivare eta táimahi. Vahi távasihini eta tajaraivahi eta caje. Étaripa eta tajaraiva eta jararíquiana, apanahivare. Jararíhivare eta tijarahípanavacahi tayehe eta apamuriana. ⁴² Ene tacheheyare eta vicaquehera vítí te véchepucapa. Apanayare eta táimahi. Te vépenapapuca, ticaecarasiyarehi eta viáquehe, tímuyuyarepa eta véche, tépachaicavayarehi. Téchepucayarehisera eta apana viáqueheyare eta máepenacainapa. ⁴³ Ticaecarasiyarehi eta viáquehe, taicha ticajachacarepuhapa eta véche. Téchepucayarehisera eta tapachinaqueneyare viáqueheyare. Ticaecarasiyarehi eta viáquehe, matumerairahahi. Téchepucayarehisera eta viáquehe, tétavicavainapa eta tatumevayare. ⁴⁴ Ticaecarasiyarehi eta enaha viáquehe. Téchepucayarehisera eta viáqueheyare apaimahinapa, tijarahinapa eta vicaqueheraya vicutinapa eta macaqueherahi ema Cristo eta máechepusiraípa. Tanasiyareichuhi eta táimahi eta viáquehe, espírituinapasera.

⁴⁵⁻⁴⁶ Eta Sagrada Escritura, tacahehi eta táechajiriruvahi: “Ema Adán, máinapuiruhi ajairahi máchaneruhi ema Viya”. Éma ticaejaparecahi eta vímarúsirahi viti achaneana, vicutihí éma eta víjurusirahi eta vítaresirahi. Tásiha, te táequenénapa, ema apana ajaira ticajare Cristo, émapa tíjaracahivayare eta apanayare vítaresirayare, vicaquehenapa eta máquehe. ⁴⁷ Ema ajaira máinapuiruhi, te ticaepiyainapa, máteji eta máquehehi. Éma, távapaiyarehi eta apaquehe. Émasera ema apana ajaira, mávasarichuhi te anuma. Éma Viáquenuhi.

⁴⁸⁻⁴⁹ Vítí achaneana, énerichuvare mátejíhi eta viáquehe, taicha mámariequenehavíhi ema máinapuiru ajaira. Eta vicaqueherahi tavasimahihí eta macaqueherahi éma. Tipachinayarehisera eta viáqueheyare, tacutiyaere eta tapachinavahi eta macaqueherahi ema ticavasahi te anuma. Eta vicaqueherayare tavasimahiyare eta macaqueherahi ema ticavasahi te anuma, taicha machíchahavíhi vítí.

⁵⁰ Nuvaraha níminicapáequenehahéyare, nuparapenaveana, eta veche máteji vahi étaimahi tisiapayare te mávasa ema Viya. Tínapucayarehi ticaitsiva eta veche máteji, máepenacayarehi éta. ⁵¹ Énerichuvare nuvaraha níminicapáequenehahéyare eta juca tayumururevainíhi: Vahi vámutuimahi vépenayare vítí vitareruanáichaha. Ticaitsivayaresera eta viáquehe, vítí énapa ena náepenaqueneanaripahi. ⁵² Ticaema eta chujare, tíchuhahavinapa vítí véhicanahi ema Cristo. Tíjahúchavainapa eta táitsivachiravainapa eta viáquehe vítí vitareruanáichaha, tacutiyaerechucha viúmatzisina. Tíjahúchavainavarepa téchepucayare ena náepenaqueneana, máepenacainavarepa éna. ⁵³ Taicha tatuparahahi eta viáquehe ticaitsivayare, máepenacainapa. Máichecuaráquirenapa eta vítaresiraya. ⁵⁴ Te tamutupa eta táitsivachiravayare eta viáquehe, títauchavainavarepa eta tametarapianahi eta Sagrada Escritura: “Ema Viáquenu macaepahaípa eta vépeniraini”. ⁵⁵ ¡Vaipa tápicacarehi viyehe eta vépenirapapuca, taicha vahi vánasimahí vépena! ¡Yátupíhi eta véchepusiraya te

vécari! ⁵⁶⁻⁵⁷ Eta tacahe, vihasulupayacha ema Viya, taicha éma ticatiuchahaviyare tayehe eta vépenira. Tájina vahi vémitiequenémahi, véchepucayarehisera máichavenehi ema Viáquenu Jesucristo. Tásiha, te jena sácheyare, vaipa vicapecaturaimahi. Váipavare vicaicuñaimahi táicha. Vaipa vépenaimahi.

⁵⁸ Táitusiava, eti némunarúqueneanahi nuparapenaveana, ímiyanavachucha eta étumechiravaina tayehe eta juca véhiruhi. Vahi tacuequeuérecava eta epanereruana. Ecaemataneacaquena yátupina ema Viáquenu, taicha écharichuhi éti vahi támapurujimahi eta ecaemataneasirahi éma.

16

Eta nanaquiruvanayare

¹ Étasera eta juca enaquiquisravayare eta nayeheyare ena vichamuriana ticavasanahi te Jerusalén, étarichu éhicayare eta nímitusiravacahí ena vichamuriana ticavasanahi te avasareana eta táichapevahi eta departamento eta Galacia. ² Puiti, nuvaraha nutuparacahayare: Te lumincumuhuana, íputsinavayarepahi, émanapachu eta manaquiruvanayare. Étiserá échinavahi áyanahipuca jácani evachasanahi te semanamuhuana. Iúnasínávapaipa apaesa tacuijapa étaparacaimahi te nítecapauchahepa. ³ Te nítecapapa eta ara eyehe, vévatacapa ena enerejiruanahi éti nayana te Jerusalén. Éna tiámanayare eta enaquiruvanahi éti. Níjaracayaresera eta nucartane eta náimeraquiayarepahi. ⁴ Téheserapuca nútina paichu návaraha nuyana apaesa nútina paipa nácáchanenupahi ena vanairucanayare.

Éma Pablo mavarahapa tiyanaya máejirapanavacaya

⁵ Eta nítesirayare, nuvaraha nétavajicayarepahi te avasareana tayeheana provincia eta Macedonia, nítecapirainapa eta ara eyehe. ⁶ Nuvaraha nunasipanayare eta eyehe. Tijuricati nucuchapa eta táetavisirahavina eta muracana técaticava. Tijuricati ímicatacanupahi éti apanava eta nímiyaniravayare nupaica. ⁷ Taicha vahi návarahahini ánipinarichuhini eta néjirairahayare. Nuvarahahi nunasipanayare. Émapasera téchanuyare ema Viáquenu. ⁸ Nuvarahahivaresera nunasipanumayare ani te juca Efeso. Tiámainucava te táetavica vapa eta piesta ticaijare Pentecostés, nútijapainapa. ⁹ Taicha nuvarahahi nucamapuravanumayare nucametarairu taicha camurianahi ena tivarahanahi tisamararacanuana. Énerichu varesera nararihivare camuriana ena viánaranahi.

¹⁰ Nutuparacahayare, te máitecapauchahepa ema Timoteo, tauri eta eja capiraina. Échapa-jirisanuyare, taicha émarichuhi nucutiquenehi eta vicaemataneasirahi ema Viáquenu.

¹¹ Nutuparacahavare nacuija nacuepuru éma. Ímicatacasera eta mapaisirayare éma apaesa máitecapauchanúvane, émapaicha nucuchapahi nútí, énapa ena apamuriana nuchamuriana te juca.

¹² Nuvarahahivaréni mayanahini ema vichamuri Apolo eta ara eyehe, máehicavacahini ena tiámanahi eta nucartane. Váhisera máisapavahini mayanahini puiti. Téhé narínevare apahenavare, mayanapa.

Táichecuaraqui eta macartane ema Pablo

¹³ Ecuneuchava yátupina. Túmehénahi tayehe eta juca véhiruhi. Yátupina eta éjairavacáina. Vahi ecupíca eta vicatajivairanahi. ¹⁴ Eta émunaravayare yátupina táuchurena te esamureana, étaina táemesiava tamutu jácani íchaqueneanayare.

¹⁵ Puiti nuvaraha némechahe ena tínapucanahi téhicana ema Viáquenu te avasare Corinto, ema Estéfnas, esu mayena, énapa ena machichanaveana. Ichapemurihi eta nájjarasiravahi eta náitátirahi ena apamuriana vichamurianahi. ¹⁶ Puiti nuvaraha epicauchavaca esuapavaca ena nani. Énerichu vare epicauchavare esupa ena apamuriana tímicatacavahanahi eta vicaemataneasirahi ema Viáquenu.

¹⁷ Ichaperinehivare eta núrísamurevahi puiti eta náitecapauchiranuhi ema Estéfnas, ema Fortunato, émpa ema Acaico. Tímicutijiricavainehi ámutuhini ítecapauchanuhini éti eta nímairavacahí ena nani mapanana tiásihanahi eta ara eyehe. ¹⁸ Téchararahainehi eta nusamure, túmemeinevare eta nusamiravahi. Ene ecaheyare éti eta táetumechiravayare eta esamureana eta ímairainahi ena nani mapanaqueneana te nachavapa eta eyehe. Epicauchayare ena nani, émunasinavayare.

¹⁹⁻²⁰ Téchajicaheana namutu ena vichamuriana ticavasanahi tayehe eta avasareana te juca Asia. Téchajicahevare ema Aquila ésupa esu Priscila, énapa namutu ena tíurujiricavanahi te napena, taicha énarichuhi vicutiqueneanahivare eta véhisirahi ema Viáquenu. Te íurujicavapa, ejupacacayare éti, táicutiarainahi eta émunajiririracacahi.

²¹ Nuti Pablo eta nímiamaresirahi eta néchajiriruva eta eyehe, nútijacaruvapa nájuca eta táichecuaraquihí eta nucartane.

²² Nácanisera máesacharahanahi ema Viáquenu náimainavapainepa éna eta náicuñayare te machavapa. ¡Tata Viáquenu, pítecávanéni!

²³ Nuyaseuchaheparaca me Viáquenu Jesucristo táetaviuchahíni eta iúricarevaya máicha. ²⁴ Nuvaraha ejacapai ámutu eta némunasiráhevacahi máichavenehi ema Viáquenu Jesucristo. Tamutupa eta néchajirivanahi eyehe.

Eta macartane ema Apóstole Pablo nayehe ena machamuriana ticavasanahi te avasare Corinto, ticajare 2 CORINTIOS

¹ Nuti Pablo, mayehenuhi apóstole ema Jesucristo. Manerejirunuichuhi ema Tata Vicaiyaquene, mavarairahi nímutucaya ena achaneana eta máechajiriruvana éma. Puiti juca nucartane, nápechava nucajurehe núti, émapa ema viparape Timoteo. Véchajicahehi emutu eti machaneranihi ema Viya ecavasanahi tayehe eta avasare Corinto, énapa namutu ena vichamurianihi machaneranihivare ema Viya ticavasanahi te avasareana tayehe eta departamento Acaya. ² Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Nájaracahehini eta táurivaina eta epanereruana.

Tétavicavahi eta macurismurechirahavi ema Viya, macaepahairahi eta vicatajivairanahi
³ Núti nuvaraha nucunachaparaca ema Viya Macaiyaquene ema Viáquenu Jesucristo. Taicha éma, Vicaiyaquenehivare víti. Tétavicavahi eta majapanuirahavihi, tétavicavahivare eta macurismurechirahavihi. ⁴ Puiti éma, ticurismurechahavihi tayehe tamutu eta víatjaviana, apaesa viratahahivaréni víti apanava vicurismurechavachahivaréni nácani ticatajivanahivare, tacutihi eta macurismurechirahavihi víti ema Viya. ⁵ Tayanapanehipuca ichapepuca eta vicatajivairahi eta véhisirahi ema Cristo, táetaviuchaquenehivare eta táichapevahi eta macurismurechirahavihi ema Espírítu Santo májararuhavihi ema Cristo. ⁶ Yátupiquene ichape eta vicatajivairahi táichavenehi eta vímitusirahehi eta máechajiriruvana ema Viya, vivarairahi vétumechaheyare apaesa iúchuchuhayare. Émapasera ema Viya ticurismurechahavipa tayehe eta vicamichirahi tamutu. Taicha éma, mavarahahi ímatiequenehayare eta macurismurechirahe éti apanava te tamutu jácani ecatajivairana. ⁷ Víti vicasínavahi eyehe eta ecamichirayare taicha vicuticacahi eta vicatajivairahi étapa eta macurismurechirahavihi vimutu.

Eta macatajivairana ema Pablo

⁸ Nuparapenevaneana, nuvarahavare numetacahe eta vícharacavahi víti tayehe eta jena avasare departamento Asia. Ichapemurihi eta vicatajivairahi. Tiánehipa véchuriharéni eta vítumevanahi tayehe eta vicamichirana tamutu. Váipavare vémetecahini víuchuchuhahini tayehe eta vépenira. ⁹ Vicutiripa nácani nacaparuasana te navahu ena aquenucana. Ema Viya máisapapa eta juca, mavarairahi vaipa vítijivaimahi vicasínavá. Mavarahapa yátupina eta vicasínavarayehi eta mayehe, taicha éma, macarichu maratahahi máimichava ticaitarechavi te vépenapapuca. ¹⁰ Cape juca ticatiuchahaviripa tayehe eta vépenirarayehini. Puiticha ticatiuchahavirichaha. Tétavicavainehivare eta vicasínavairahi eta mayehe, vahi tísapahavimahi vépenávanehini. ¹¹ Tacahe, nuvaraha ímicatachavini eyujarauchahavini víti. Éti, németeaca camurihénapa éti eyujarauchahaviyare, camurihyareva éti ehasulupayachainapa ema Viya eta máimiyansirava ticatiuchahavi.

Ema Pablo vahi máitujicavavanehini mayanahini tayehe eta avasare Corinto

¹² Visamavahisera víti eta vicunachiravahi eta tájinairahi víchiravainahini, váhivare apiemahavahinahini. Sánturuhahaviripa te nataracu namutu ena achaneana, evetijipa éti. Émahisera ema Viya tímatachahavihi táurahi eta vítaresirahi táichavenehi eta máemunasirahavihi. Vahi vítijiriruvainahini eta vítipajjiasiravanahi. ¹³ Puiti, tacahehi eta nucartaneana. Vahi apiemanuinahini. Váhivare tácajerahini eta ímatiequenehairayare. ¹⁴ Éti, ímatiequenehapaipa eta nímiturapiana. Puiti nuvaraha esamayareva eta nuconsejarapiana apaesa vácuticaca vivapinacaca vítijicaca te jena sache te machavapa ema Viáquenu Jesucristo.

¹⁵⁻¹⁶ Tacahe puiti, eta táinapuiruhi nupanereruhi, nuvarahahi néjirapanahayarehini, nétavauchiraheyarehini te nuyanirayarehi tayehe eta departamento Macedonia. Tásiha, te nuchavayarepaini, nápechavavare néjirapanáhe, apiheyarehini eta nucurismurechirahayarehini. Tacahe, te tamutuyarepa, ímicatanupapucaini éti eta nuyanirayarevare tayehe eta departamento Judea. ¹⁷ Apanaripahisera eta nupanereruhi. Vuíchaha néjirapanahémahi. Váhivare nuvayuacahemahi eta nuvarairahi néjirapanáhe. Nítauchayare núti. Vahi ímjachaimahi éti nucuti mácani achane te mapanerechahi, váhisera máitauchahini. ¹⁸ Núti nucasínavahi eta máimatiranuhi ema Viya. Vahi nuvayuacahemahi éti. ¹⁹ Cape juca, te nímutucahepa núti, émapa ema Silvano, émapa ema Timoteo, vímimatichahehi ema Jesucristo, Machichaquenehi ema Viya. Puiti ímatipa éma, tájinaquenehi mavayuaravaina éma. Núti apanava, tájina nuvayuacahini taicha mavanaranuhi núti. ²⁰ Máichavenehi éma, títauchavahi tamutu eta mapanereruanahi ema Viya. Víti, te visamavaipa eta

májararuvanahi ema Viya, vijirauchahi éma. Vicahehi: ¡Amén! ¡Vicasifñava Vímahainapa eta máitauahirainapa! ²¹⁻²² Émaripa ema Viya témuracachahavihi eta viúrujiasirahi ema Cristo, víti étipa éti. Timarcachahaviripahivare éma, táicutiarahi eta máchichairahavipa, taicha manerejiruhavihi. Tíjaracahaviripavare eta mávahásirahavihi ema Espíritu Santo te visamureana, máitametásirahaviparaca títauchavaya tamutu eta viúricacareyarehi.

²³ Núti, vuíchaha nítecaimahi eta ara eyehe, taicha némunacahehi, numavarairahi nucara-meacahehini éti. Ema Viya tímatinuhi eta nutupiruvairahi. ²⁴ Vahi nuvaraha nupamicaha eta esuapiranuinahini nápepejicahehini, taicha éti muracaheripahi eta esuapirahi eta juca véhiruhi. Nuvarahahisera nímicatacahe eta tápajusiravaina eta iúrisamurevayare éti.

2

¹ Eta tacahe, vuíchaha nítecaimahi. Taicha vahi návarahahini nápechavahini némecatavachahihini te esamureana eta néjirairahayare. ² Taicha te ecatisamureva nícha, tímaticaréipahi nájina ticurisamurechanuimahi núti. Ecarichuyarehi éti ecurisamurechanuyarehi. ³ Tacahe, eta táitsivahi eta néjirapanairaha, nucajurehepa eta táinapuiru nucartane, nuvarairahi ésamiricavayare apaesa vaipa nucatisamurevaimahi icha éti. Nuvarahahisera núrisamurehini icha. Tacahe, németeaca étiripa iúrisamurehivaréni ámutu eta nuyehe. ⁴ Jéhevare, te jena sache, te nucajurehepa eta nucartane, ichapemurihi eta nupanereresirahi, nucatisamurevahivare. Níyahacavahi ichape. Váhisera étaparacainahini nuvaraha némecatavachahihini te esamureana. Núti nuvarahahi ímatihini eta táichapevahi eta némunasirahéhi.

Ema Pablo májjaracahi eta maconsejarapi eta naperdonachirayarehi ema téjcapavahi

⁵⁻⁶ Tiuri puiti, ema maca téjcapavahi máichahi eta pecatu, tétavicavahi eta ecatisamurevahi máicha. Núti apanavare nucatisamurevahivare. Váhisera táurica vivayuchava eta vémecharesira éma. Puiti, tarataharipa eta ecuchusirahi te emuri éti. ⁷ Puiti táurica eperdonachayare eta máichavaquenevahi. Ecurisamurechainapa éma apaesa vahi macuvayuchava eta macatisamurevahi, máinajicavapuca. ⁸ Nuvaraha puiti íapechavahini ímereca eta émunasirasamíhi éma. Ejacapavare te emuri. ⁹ Eta tacahe, nucajurehi cape juca, nuvarairahivare nucacutiaraha te esuapayarepuca eta nuvanairipianahi. ¹⁰ Núti nuperdonacharipa ema maca achane te májare ema Cristo. Táurica eperdonachayareva, ecutiranuyare eta nuperdonachirahi. ¹¹ Taicha te váhipuca viperdonachacahi, tíñhicarehi macampurava ema Satanás, taicha tímaticarehi eta mavarairahi tímiáquipai-cahaviyare.

Vaipa máitucacarahahini ema Pablo

¹²⁻¹³ Núti, te nítecapapa eta te avasare Troas, nímiyachahi nuchimaphahini ema nuparape Tito. Tétavicava eta néñamiravahi, nuvarairahi néchayarehi tájahapuca eta íchararacavahi éti. Yátupihinéni natiarihihi ena camuriqueneana ena tivarahanahi tisamana eta nímituresirahi eta máimiturapiana ema Jesucristo. Étasera eta néñamiravahi eta eyehe émapa ema Tito, nucametavavarepa nayehe ena vichamuriana. Nuyanavarepa tayehe eta juca departamento Macedonia, nutanusirayare éma.

Ema Viya, tétavicavahi eta majaneasiravacahi ena mavanaranahi

¹⁴ Tásiha, tétavicavahi eta núrisamurevahi eta nuchimapirahi ema Tito eta te juca. Puiti, ichape eta nuhasulupayachirahi ema Viya eta majaneasirahaviparaca, tíjaracahavirahivare eta máitupajijiasirava eta viratahairahi vicanara tamutu, táichavenehi eta mávahásirahavihi ema Jesucristo. Tituparacahavivare vicametarairuyarehi eta máimiturapiana, mavarairahi tíuriyarehi eta nasamiraya namutu ena achaneana tacuti eta najjusira jácani tájijyequeneana. ¹⁵⁻¹⁶ Taicha eta vicametarairuirahi tímicituriravahi eta tájijyeva eta inciense, eta májjarasirahi ema Cristo te mamirahu ema Maíya. Tacapusisiacahi namutu ena tisamahiviana. Natiarihi ena masuapajirairahana, náemitiaruanayare taicha namavarairahi nasuapahini. Tijechehi eta najjusira tacutihi eta máquehe mácani máepenequenehi. Natiarihivare ena tisuapanapahi náuchucureanayarehi; ticutirinehi najjucahíni eta tájijyequene. ¡Tétavicavahi eta néñamiravahi eta vikatuparahairahi! ¹⁷ Viratahasera vítaucha eta vítuparahahi. Taicha víti, eta vicametarairuira, tájina vahi vicavacharapi eta máechajiriruva ema Viya, vétupiripicahipucaini, vivarairainahini tajamurachacarehini, tácutihini eta náichira ena apamuriana tímijachavanahi yátupiqueneana mavaneruana ema Viya. Vítisera yátupiquenehavihi mavanarahavihi ema Viya; vitupiruvahi eta vicametarairuira eta máimiturapi ema Cristo.

3

Viti vicametarairurahiana eta téqueneha matratune ema Viya

¹ Vahi nuvaraha ímijachahavi eta vicunachiravainahini puiti. Váhivare vácutihini ena nácani apamuriana tímiturahianahíji, típairiricana tíamanahi eta carta táechajisihahi eta nacunachacarevahi. Tájjinavare vímatiyahini viyaseacahehine víti eta carta vímeraquinapahini táechajisihahini eta ecunachirahavinahini. ²⁻³ Étísera, tájina véñamiravaimahi eyehe. Taicha tímaticarehi te avasareana eta táurivahi eta itaresirana éti, táichavenehi eta vinacasamurechirahéhi eta máechajiriruya ema Viya. Eta juca tímereuchahavi víti eta yátupirahi mavanarahavianahi ema Viya. Éti, ecutihí eta carta vímeraquinapahi. Émaquene ema Cristo, ema íájuchahi, taicha tíjaracahehi ema Espírítu Santo máitsivachaheyarehi eta itaresirana, táuriyarehi eta esamureana. Arairuripa eta itaresirahi. Puiti juca eta itaresirahi, tájinapa étaparacaina esuapahini eta vanairipiana tacajuquenehi acane te márieme tabla.

⁴ Eta tacahe, tájina vahi néñamavaimahi tayehe eta apóstolenuirahi. Nétumechava ichape, taicha nusíñavahi eta manerejirunuirahi ema Cristo, máijjarasiranuhivare ema Viya eta máitupajjiasiravana. ⁵ Taicha víti vahi vítijivainahini víjaracava eta vítupajjiasirava. Émaquenehi ema Viya tíjarachavahi eta vítumevanahi eta vícaemataneasirahi éma. ⁶ Émaquenehi títparacahavi vícametarairuyarehi eta arairu matrátune. Vahi étainahini nupamicahayare eta esuapirayarehi eta vanairipiana. Taicha eta juca arairu matrátune ema Viya, tíjaracahehi emutu ema Espírítu Santo, máitsivachinaheyare eta itaresirana, arairuinapa. Étasera eta vanairipi tacarichu táimivanerecachi eta náepeniraya ena téjcapavana.

⁷ Acane, te jena sache te tíucupaicapa ema Moisés, mámapahi eta vanairipiana tacajuquenehi te márieme tabla. Eta mamira, tétavícavahi eta tarapepesirapahi táichavenehi eta macachanerahi ema Viya. Ena achaneana, vaipa náratahahini náimarraca eta mamira. Ichapehinéni eta tapicauchacarevahi eta vanairipiana taicha tétavícavahi eta tarapepesirapahi eta mamira ema tíamapahi. Étasera eta mayerevapa, tímutserahavapaipahi témitiaca eta tarapepesirahi. Éta vanairipiana, tacarichuhí táimicapacahí nácani téjcapavanahi. ⁸ Étasera eta arairu matrátune ema Viya, eta nucametarairuquenehi puiti, tétavícavahi eta tápajusiravahi eta tasuapacarevahi taicha tíámahavihi eta mávahásirahavihi ema Espírítu Santo. ⁹ Yátupíhi eta tasuapacarevahi eta vanairipiana, tíápajucavahisera eta tasuapacarevapanahi eta máichuarapi ema Viya, víjacapacarehi mayehe táichavenehi éta. ¹⁰ Yátupi tírapepecahi eta mamira ema tíamapahi eta vanairipiana, váhisera étaparacainahini táurichahivihini. Jéhevarequenehi puiti, tétavícavahi eta víúrivahi maicha ema Espírítu Santo. ¹¹ Eta tarapepesirahi eta mamira ema Moisés, tímutserahavapaipahi témitiaca. Eta juca táicutiarahi eta ánipirichuhi eta tasuapacarevayarehi eta mavanairipiana. Étasera eta juca máichuhairahavi ema Viya, tíápajucavahi eta tasuapacarevahi taicha máichecuaraquireyarehi eta víúrivaya táicha.

¹² Étavenehi eta vicasíñavairahi vímahayare eta juca sache vícuchapaquenehi, víti matupararuana vétumechavahi eta vícametarairuirana. ¹³ Váhi vácutihini ema víyarahaini Moisés, tépacamirahavahi te páñome, tíuriyarepa eta náimarrasirayarehi ena machamuriana. Váipasare nanecapahini te tímutserahavapa eta táemahairapahi eta tarapepesirahi eta mamira, táicutiarahi eta táepahairaya eta tapamisirahavini eta vanairipiana eta vítauchirayarehi. ¹⁴⁻¹⁵ Puíticha ena nujaneanana israelítana vahi nácaicutiarahini eta juca. Tacahe, te náechejicuha eta ichasiquene matrátune ema Viya tacajuquenehi eta te libro májurehi ema Moisés, víuchaha nácaicutiarahini. Tímicutijiricaváichucha táepacuchahi eta máepacamirahi ema Moisés. Ticajeraichucha eta nacaicutiarairayarehi. ¹⁶ Mácanisera achane, esenapuca, tíjaracavapa eta máehisirayarehi ema Víáquenu, ichapenapa eta macaicutiarairayare. Tájjinapa táepacaquíñahaimahi. ¹⁷ Jéhesare, ema Víáquenu tíjaracahavisarepa ema Espírítu Santo. Tásiha, vaipa vípicacaracavahini eta vípauchiraya éma. Yátupina eta vívopinairavahi maicha ema Espírítu Santo. ¹⁸ Tacahe, vímutu víti véhicanahi ema Víáquenu vícutiripa eta espejo eta tarapepesirahi eta tajaraivahi eta sache. Víti, yátupíhi vímerecohi eta máurivahi ema Víáquenu. Vaipa vícaepacamirahini. Eta tacahe, víti puiti tíápajucavainapaipa eta vícutirayare ema Víáquenu taicha tíápajucavahi eta majaravahi te vísamureana. Étavenehivare eta mávahásirahavihi ema Espírítu Santo máijjaruhi ema Víáquenu.

4

¹ Eta tacahe, váhiquene víyacujiequenehavaimahi eta vícametarairuira, taicha ema Viya tímechahavihi eta máemunaraiva eta matuparasirahavihi eta juca vícaemataneasirayarehi éma. ² Víti, tájina vímatiyahini víyumurujiricahini eta víchaqueneana. Váhivare víchahini eta títsirihacareana. Váhivare víútserrupinahipucaini víhapapicahipucaini eta máimiturapiana ema Viya, taicha vívaraha vícurisamurechaya éma. Tamutuhi véchajisihahi eta yátupiqueneana. Jéhesare, vívaraha nacaicutiarahini ena achaneana eta vímiturapianahi

tásihaqueneanahi me Viya. ³⁻⁴ Nararihismisera nácani vahi nacaicutiarahini eta vímiturapiána, taicha ema Váinaraji, tacaiyaquenehi eta juca apaquehe, éma tépacacuñihavacahi éna. Taicha vahi mávarahahini náimatiequenehahini eta máimiturapiána ema Jesucristo, tétavicaavahi eta tajarahiquenérahi taicha émaquenehi macunaquenehi ema Viya. Táitusiava éna, vaipa nácaicutiarahini eta vímiturapi. Náemitiaruanayarehi tayehe eta ecuñaraqui táicha. ⁵ Te vicametarairu víti, vahi vítinahini vicunachavahini, vivarahahini éhichahi. Vivarahahisera esuapahini ema Jesucristo, ecaquenuyarehivare éma. Víti vanairucahavichucha eta eyehe, taicha vicaemataneacahi ema Jesús. ⁶ Ema Viya, te máepiyacainapa eta juca apaquehe, macavanairipipa tatiarihiyarehi eta tijarahi, témtiacayarepa eta timapicucuenénihi. Ene macahehi eta viyehé. Tímimatchahávihí eta majaraiva ema Machicha. Tétavicaavahi eta tajaraivahi te visamureana. Éma, tímimatchahavipaipahi eta máetaviuchaquenehi máurivahi ema Viya.

Puiti eta vítaresirahi, vímerezavaya yátupihí eta vicasiñairahi eta macatiuchirahavipaipa ema Viya

⁷ Eta juca véhiruhi vímiturapiánahi, tétavicaavahi eta tacunachacarevahi. Vahi vítinahini vicunachacarehini. Taicha víti páureanasami, vicutichucha eta muñeca náipune. Émasera ema Viya máimerecahi eta máitupajijiasiravahi, májarasirapa eta tatumevayarehi eta viáquehe. Váhiserá vítijivainahini. ⁸ Táichavenehi eta vicametarairuira, tatiarihihi jácáni jáchavaquenévahí; ticatiuchahavíhiserá ema Viya apaesa víuchucuhaparaca. Ichapevare jácáni eta táimipaneresirahavíhi; vicasiñavahiserá eta majaneasirahavíhi ema Viya. ⁹ Tipanajirichavíanahí ena víánarana, váhiserá tíjunijiacahavímahí ema Viya eta majaneasirahavíhi. Tayanapane nachururupaicahavíhíni, émasera ema Viya vahi máisapaimahi ticapacahaviana. ¹⁰⁻¹¹ Tamutu te jácáni vicaijuheanapahi, natarihi ena navaraha ticapacahaviana táichavenehi eta véhisirahi ema Jesús. Tamutu sácheana víamarairicapahi eta vépenira, vicutíhi ema Jesús eta napanereuchirahi éma. Émarichúhiserá ema Jesús máechepurequenehi. Éma máimerecahi eta máitupajijiasirava eta macuchucuirahavipaipahi tayehe tamutu eta víchararacavaqueneanahi. ¹² Tayanapane víti víamarairicahi eta vépenira táichavenehi eta vímituresirahi, táitsivahiserá ejacapahi éti eta tamáichecuaráquireyarehi eta itáresira táichavenehi eta esuapirahavíhi. ¹³ Ema víyarahaini David, aní macahehi eta máechajiriruvana eta te Salmo: “Núti nucasínavahí mayehé ema Viya, tásiha vahi nupicacaracavahini eta néchajisirayare mayehé” macahepa. Énerichuhi vicahehi víti puiti. Vicasiñavahí mayehé eta macatiuchirahavíyare. Táitusiava, vahi vipicacaracavaimahí eta vímituresiraya. ¹⁴ Taicha véchahi eta macaechepusirahavíyarehi ema Viya, vicutiyarehi eta macaechepusirahi ema Machicha Jesús te máecari. Tásiha, étamurihavinapa, éti apanavare, eta vímerezavayare te mamiraha éma. ¹⁵ Tamutu eta juca víchavaquenevanahí, támahi eta iúrivayarehi. Vicamichahi tamutu, taicha vivarahahi eti esimutuqueneanahi ejacapahini eta iúrivayare májararuhehi ema Viya, apaesa ámutuhivaréni eti esimutuqueneanahi ehasulupayachahini éma, eunachahivaréni.

¹⁶ Eta tacahe, váiparinehi vicainajiruvaimahi. Tayanapanepuca tivitaji eta viáquehe, étasera eta víachaneva tétavicaavichucha eta tatumeva tamutu sácheana. ¹⁷ Taicha eta víátajivanahi puiti juca vítaresiraichaha, vahi táunacacare. Técativánachucha, tíánucuhávanepa. Énerichuvare, jararihi eta táitsivahi, taicha vijacapahi eta táetaviuchiravaya eta víuricacarevayare. Puiti tájina tácutimahí eta víuricacarevaya, taicha máichecuaráquirénapa éta. ¹⁸ Eta tacahe, vahi vipicacaracavaimahí eta víátajivanahí, taicha vahi táunacacarehini. Vicasiñavahiserá mayehé ema Viya eta máimisipirahavíya eta te mávasa anuma. Tásiha, máichecuaráquirénapa eta víuricacarevaya eta víávilhairaya tayehe.

5

¹ Vimutuhi vímati te náquipaicapuca eta viáquehe, tépenayarehi éta. Taicha éta, vahi muracainahini. Tacutíhi te víáquipaica eta petí. Máejerarehi vicha taicha vahi muracainahini. Jararihiserá eta viáqueheyarehi te anuma vícuchihi mayehé ema Viya. Éta, nájinapa tiratahaimahí tíáquipaica taicha máepiyaruhi éma. ² Puití, tétavicaavahi eta tacatajivairahí eta viáquehe. Tamutuhi tasama. Eta tacahe, vivarahainehi tájahúchavahini tacáitsivahini eta viáqueheyare te anuma. ³ Taicha vicamunurinehi eta arairu viáquehe, apaesa vahi vitsirihaimahí eta vicachanerayare ema Viáquenu taicha vicutiyarehi éma. ⁴ Puiti eta juca vítaresiraichaha, tamutuhi tasama eta viáquehe. Ichapemurihi eta táimipaneresirahavíhi. Váhiserá étainahini eta vivarairainahini vépenávane, étasera vivarairahi tacáitsivahini eta viáquehe arairuinahini. ⁵ Tacahe, ema Viya tamutuhi máicucha eta táichararacavayare te apana vítaresira. Puiti tíjaracahavíhivare ema Espíritu Santo. Émapa títametacahaviparaca eta vijacapirayare eta vícuchianahí.

6-7 Tacahe, núti vahi nupicahini eta népenirayarepuca, taicha ichape eta nucasíñavairahi mayehe ema Viya. Tájina vahi nëñamavaimahi mayehe eta májjarasiranuinapa eta arairu náquehe, tayanapane vuíchaha nímahahini. Eta táimiyániravaya eta nítaresirahi, nuyerehi eta nícuchihí náqueheyare. ⁸ Nuvarahainehisera tájahúchavahini tacaitsvahini eta juca náquehe, nuyanasarepáini nucachanehini ema Viáquenu. ⁹ Eta tacahe, vivaraha ichapemurihi eta vicurísamurechirahi eta vícaemataneasira ema Viáquenu puiti juca vítaresiraichaha. Tásiha éma, tíurísamureyare eta viyehe te vímrecavainapa te mamirahu. ¹⁰ Taicha vimutu vímrecavayare te mamirahu ema Cristo te mávacureyare. Ánaqui tímaticareyare tamutu eta víchaqueneanapachuhi puiti juca vítaresiraichaha, te víchahipuca eta táuriqueneana, te étahipuca eta tamauriqueneana. Te víchahipuca eta táuriqueneana, víjchapainapa eta vícuchianapahi.

Emá Viya mavaraha vípauchayarehi éma, macaepahairaya eta vípicacarasiravahi eta vícuñayare

¹¹ Nútisera, ichape eta nupicauchirahi ema Viya. Eta tacahe, nímiyanava numetacavacahi ena achaneana eta mayehe, taicha nuvarahahi námutihini napicauchahivaréni éma. Émasera, tétavicavahi eta máimatiranuhi táurivahi eta nupanereruana eta nucaemataneasirahi éma. Puiti nuvaraha échahivaréni éti apanava eta táurivahi eta nupanereruana. ¹² Tacahe, eta juca néchajísihahi, vahi nútinahini nucunachavahini. Nuvarahahisera nucunachacarehini eta eyehe, apaesa áratahahini ecamatinaca ema tímijachavanahi náimatiequeneha. Váhisera yátupinahini táuchurequenénahini te nasamureana. ¹³ Éna, tépiyaequenehanuanahi, máurishinuhíji náicha, taicha ichape eta nuvapinairavahi eta nucaemataneasirahi ema Viya. Tiúrihisera eta nuchuti. Nuvarahaparaca ichapenaini eta iúrcacarevaina éti. ¹⁴⁻¹⁵ Núti nímatihí eta táetaviuchirahi eta máemunasirahavíhi ema Cristo, taicha máepeninahavíhi te crusu. Vimutu viti achaneana vituparahaichu vépenirapachu. Mavachachapaserá tamutu ema Cristo. Eta tacahe, tatuparaca vítsirijicava vícaemataneaca éma. Tásiha puiti, viti machanerahavipa. Vaipa vítíjiricavaimahi. Émapa téchahi eta vítaresira, taicha eta machavirahi títareca. ¹⁶ Eta tacahe, viti véhicánaripa ema Cristo, étainapa vípanerechayare eta vítsivachiraipa eta vítaresira. Vaipa véhicaimahi eta apana panereruca tayeheanahi te juca apaquehe. Étaripa cape juca víásinequenehi váhirichu vísuapapajicahini ema Cristo, vímijacharichucha éma vícutihí viti achaneanasami. Púitísera vaipa tácahehi eta vípanereruana. Vísuapahi émaírahi Machíchaquenehi ema Viya. ¹⁷ Púitírípa víti víúrujajacanáhi ema Cristo, apanahavírípa. Vínajicaipa eta víyeherepiníhi tamauriqueneana. Tamutupa arairuhi puiti eta víyeherepiana.

¹⁸⁻¹⁹ Emá Viya, tétavicavahi eta máurivahi eta viyehe. Éma, mavarahahi vípauchayarehi éma. Mavarahahivare macaepahayarehini eta vípicacarasiravahi eta vícuñayare táichavenehi eta vípecaturana. Tásiha, mavaneca ema Machícha Jesucristo apaesa macaepahayarehi eta vípecaturana vimutu viti vícasíñavana eta mayehe, vaipa máecharairicaimahi. Tásiha, tájina eta vípicacarasiravaimahi eta vícuñainahini. Tásiha puiti, ema Viya tituparacahavípa viti véhicánahi eta víchuhairavacayare namutu ena apamuriana achaneana, apaesa éna apanava nacasíñavavare eta mayehe, váipavare típicacacavanaimahi eta mayehe. ²⁰ Tacahe, víti mavaneruhavíhi ema Cristo víchuhavacayarehi namutu. Tímicitíjiricavaipa émaquenénahini máechajicavacahini ema Viya. Puiti víyaseacavacahi namutu nacasíñava mayehe ema Jesucristo; váipavare típicacacavanayarehini eta náicuñainahini náicuchiyaréni. ²¹ Emá Cristo, tájina mapecaturainahini. Étasera mavarairahi ema Viya víúchucuhayare víti, émapa ema Cristo tamuriacahi eta vípecaturana. Puiti, tájinásarepa víchiravaimahi, tájinavarepa vívirevaina te mamirahu ema Viya vimutu viti víúrujajaranahí ema Cristo.

6

¹ Tásiha, nútí mavanaranuhi ema Viya, nuyaseacaheyare ímiyanava tauri eta éhisirahi éma. Vahi ecuemepurureca eta máemunasirahehi, majacapirahehivare. ² (Taicha aní macahehi eta máechajíríruvahi tayehe eta Sagrada Escritura: “Nuchicha, tétavicava eta písamacarevayare eta nuyehé te pípiaracanu. Nucatiuchavivaneyare” macahepa. Jéhesare, puiti juca sache ticamapuracarehi eta epíparasirayarehi éma, ejaçapacarechaha me Viya mapurare achanehechaha. Esamacarechaha puiti, taicha ema Viya mavaraha tíchucuhahayare eta te ícuñayaréni taicha eta epecaturana.)

³ Nútí nuvaraha nacuíja nacaecahini eta vématanerepi viti apóstoleana. Eta tacahe, nupamicavahi nútí tíuríyare eta nuyeherepiana. ⁴ Eta tacahe, ichape eta néchapiravahi te nímitureca. Nímrecavahi yátupi eta mavanarairanuhi ema Viya. Ichapemuri eta

nucamichirahi eta nucatajivairana, eta néchuriasirana, étapa eta tacajeravana eta nítátijiriravara. ⁵ Vahi nucaínajiruvaimahi táichavene eta náestasiranuhi ena nánarana, náeratasiranuhivare, tájinanéni viviurevainahini. Te apana avasareana timurijiacanuanahi taicha eta nasemanevahi. Eta nítátijiriravahi, ichape eta tamuracavahi eta nucaematanerahi. Camurihivare eta numacaimasiravahi. Camurihivare eta nécuava eta nupaisirana. ⁶ Éti Ímatinuhi yátupihí eta táurivahi eta nítaresira. Ímatinuhivare eta nucaimitucasihi mayehe ema Jesucristo. Táichavenehi eta mávahásiranuhi ema Espíritu Santo, nucayehehi eta paciencia nayehe namutu, nujapanurahihivare. Yátupiquenehi eta némunaraivahi. ⁷ Nímitucahi eta yátupihí mámiturapiana ema Viáquenu. Énerichuvare ema Viya tímicatcanuhi tayehe eta máitupajijiasiravahi te tamutu eta nucametarairuirahi eta máechajiriruvahi, étapa eta nucatiuchirahi eta véhiruhi. ⁸ Eta nupaisirapaipahi, natiaríhíhi ena ticunachanuanahi, tíuriemanahi eta nuyehe. Natiaríhíhivare ena tépurunuanahi, tíñemahipivare eta nacayemaquene eta nuyehe. Natiaríhíhivare ena tímijarechanuana tépiyahirahi. Nutupiruvahisera tamutu eta nítaresirahi. ⁹ Natiaríhivare ena vahi tisuapanuanaimahi, taicha tépuruanahi eta apóstolenuirahi. Natiaríhisamivaresera ena tisuapanuana taicha tisamairiricanuanahi eta yátupirahi eta nímiturapiana. Tatiaríhíhivare te tiánehípa eta népenirayaréni. Núchuchisera, maicha ema Viya. Natiaríhíhivare ena téhanacanuanuana muraca. Váhisera máisapavaca ema Viya eta nacapasiranuinahini. ¹⁰ Tatiaríhíhivare te nucasamurevahi ichape. Nútisera nucurisamureacavahi tamutu sácheana. Páurenuhi eta náimairanuhi ena achaneana. Ichapemurianahisera ena níjararuanahi eta tacaimahaquenehi eta náchanevana. Ani, tájina nímaahaquenéna. Téhesera apana nítaresira, tétavicavaya eta nucaimahaqueneraya.

¹¹ Nuparapeneana némunaruqueneana, nutupiruvahi te nusamure eta juca nuconsejarapianahi eyehe. ¹² Vahi nuvaraha ecuímijachahini nínjajacahe eta némunasirahehi. Németeacahisera éti ínajiacanuhi eta émunasiranuhi. ¹³ Éti, ecutihí nuchichanavehénahini eta némunasirahehi. Nuvaraha tachavahini eta émunasiranuhi, esuapiranuhivaréni.

Vítí, tiávahácavahíhi ema Viya taicha machanerahavíhi

¹⁴ Nuparapeneana, vahi ecuávahácavaca nácani máehicarahanahi ema Viáquenu. Étaripa te arayenaheyare, vahi ecuveha nácani máehicarahanahi. Taicha téjecacayarehi eta panererucana. Vítí véhicanaahi ema Viáquenu, tatupiruvahi eta vipanereru. Énasera ena máehicarahanahi, tavayucachi eta tamauriqueneana. Vítí víuricahi eta tíjarahí; énasera náuricahi eta timapícu. ¹⁵ Taicha víti, mávaháruhavíhi ema Cristo. Váiparinehi vicachanémahi ema Váinarají. Tásiha, te víávahácavaca ena masupajirairahana, tíapitavairicanahi eta véhisirahi ema Viáquenu. ¹⁶ Énerichuvare, tiávahácavahípa ema Viya, émarípa ema Vicaiyaquene. Taicha aní macahehi: “Núti návahácavacaya ena téhicanuanahi. Néchavacayareva éna, taicha éna yátupiqueneanahi nuchaneranahi” macahepa. Eta tacahe, váhiquene táuricahini eta vicasiapiravahini eta nayehe ena vahi machaneranainahini ema Viya, taicha apanahi ema nasiñarajíhi. ¹⁷ Taicha acane macavanairípa ema Viya, aní macahehi: “Érajícava eta te namuri ena vahi nuchaneranahi, machu napareacahe eta namaeperajívana éna. Tacahe, éti nujacapaheyarehi. ¹⁸ Núti yátupiquenénuyarehi Ecaiyaquenuhi. Éti nuchichanaveanahi” macahepa ema Viya máitupajijíhaquenehi.

7

¹ Tacahe, némunaruqueneana nuparapeneana, vahi távarahahini vínjicavahini tayehe eta juca vicuchapaquenehi puiti. Tacahe, vépachinachayarehi tamutu eta víáquehe étapa eta víáchaneva. Víjaracavayarehi tamutu te visamureana me Viya taicha eta vípicachirahi éma.

Eta máurisamurevahi ema Pablo táurivaípa eta nítaresira ena machamuriana

² Nuparapeneana, nuvaraha ímiyanavahini esuapanuhini. Taicha nájinahi te etaracu éti nacatajivahini náinjicavahini níchavenénahini núti. Nájinavare nucaetemaqueneahini, nímpinanánájicavacahipucaini. ³ Váhivare nuvaraha nujacachahe puiti. Nutupiruvahi eta numetasirahehi cape juca: “Tétavicavahi eta nucasamurerahehi. Tájina ticamitísicanuimahi, tayanapanepuca népena”. ⁴ Ichape eta nucasíñavairahi eta eyehe, nuncunachahehi eta ecurisamurechiranuhi. Tayanapanehinéni ichape eta nucatajivairahi, tétavicavahisera eta étumechiranuhi ecurisamurechiranuhi.

⁵ Étaripa te nítecapapa tayehe eta Macedonia, tájina nunarasirainahini. Ichape eta nucatajivairahi naicha ena ticatianacanuanahi. Ichaperinehivare eta néñamiravahi eta eyehe. ⁶ Émasera ema Viya tétavicavahi eta máetumeravahi nayehe nácani téñamavasamureanahi. Nútirípa nétumechavainehi maicha éma, eta nímaírapa máítecapauchiranuhi

ema Tito. ⁷ Tavetijipa eta mametasiranupa ema Tito eta ecurisamurechirarinehi éma. Timetacanuware ichape eta éñamiravahi eta nuyehe; evarairaipaicha ímahanu; ichapevare eta evarairahi esuapanu eta étupirisirahi ema maca achane téjcapavahi. ¡Eta juca, tétavicavainehi eta ecurisamurechiranuhi!

⁸ Ichapehinéni eta táimipaneresirahéhi eta nucartane. Nútiripa, ichaperinehivare eta táimipaneresiranuhi nucasamurevahi te nucajurepa. Némitiscapasera puiti, taicha ánipi eta táimipaneresirahéhi. ⁹ Púitiserá, tétavicavainehi eta núsamurevahi ícha, eta táetaviasiraheripahi eta ecatisamurevahi. Eta núsamurevahi, vahi étainahini taicha eta ecatisamurevahi. Núti núsamurevahi taicha tútsivachavaipahi eta táurivaipahi eta epanereruana, evarairahi ecurisamurecha ema Viya. Eta tacahe, víti tájinapa vácayemahini eta eyehe. ¹⁰ Taicha tatiarihíhi eta jácani májjararúhi ema Viya, táimipaneresirahéhi, mavarairahi eta éneuchiravaya tayehe eta ejacapiravahi apaesa macuchucuhahe. Eta ecatisamurevahi tiámahi eta iúricacarevaya. Énasera ena apamuriana achaneana tayehe eta juca apaquehe, yátupi ticatisamurevanahi, váhisera náeneuchavahini eta me Viya. Éta, tiáma eta náepenira. ¹¹ Étiserá, ¡tétavicavahi eta iúrivahi tásihaquenehi eta ecatisamurevairahi! Enevanerinehi ínajicahi eta ejecapiravahi taicha evarahahi ímiyanava ecurisamurecha ema Viya. Ichaperinehi eta nuncunachirahéhi taicha epicauchainehi ema Viya tayehe eta juca íchavaquénévahi. Evarahainehi nújahúchavahini nítecahíni eta eyehe nímica-tacahehíni. Étiserá enevanepa ecurujicacahi taicha eta esemanevahi maicha ema téjcapavahi te etaracu. Enevanepa émecharecapa éma. Ímerecovahi eta tamajinairahi ejecapiravainahini éti. ¹² Núti, te nucajurehénapa eta táinapure nucartane, vahi émainahíni máimipanerererecanuhini ema téjcapavahi, váhivare émainahíni máimipanerererecanuhini ema maiya, émaripa ema majarareruhi. Íchavenehi éti eta ímipaneresiranuhi te nucajurehénapa, nuvarairahi ímereuchavayarehi eta yátupipapuca eta esuapiranuinahini te mavahuana ema Viya. ¹³ Eta tacahe, tétavicavainehi eta étumechiranuhi núti eta nusamairisirahéhi eta esuapiranuipa.

Tavetijipa eta núsamurevapa eta táurivahi eta ejacapirahi ema Tito. Tétavicavahi eta máurisamurevapai ícha éti eta ésamirisiravaipa. ¹⁴ Váhirichu támapurujihíni eta nuncunachirahéhi mayehe ema Tito eta núsamurevahi ícha éti. Púitiripa, ímereuchavapa yátupíhi eta ecunachacarevahi. ¹⁵ Éma, tiápajucavapaipa eta máemunasirahéhi éti. Máechariricahi eta táurivahi eta ejacapirahi éma, esuaparinehivare, táichavenehi eta emansuiravahi étapa eta epicauchirahi ichape ema Viáquenu. ¹⁶ Núti apanavare, tétavicavahivare eta núsamurevahi ícha éti. Nucasíñavahi táimiyánava eta esuapiranuina te tamutu.

8

Tatupiruvayare te visamure te vivaraha vicajirica

¹ Tiuri puiti, nuparapenaveana, vivaraha vimetacahe eta nanaquisiravahi ichape ena apamuriana vichamuriana ticavasanahi te avasareana tinapaica te juca Macedonia. Éna, nasuapavanepa eta manacasamurechirahi ema Viya eta nacajirisirayarehi. ² Ichapemurihinéni eta náichirahi ena ticatianécanahi náemepaurechavacahi, váhisera náinajicavahíni. Tivapinavandarichucha. Tatupiruvahi te nasamureana eta nájjarasirahi eta nanaquiruvana. Páureanahinéni, tímecavahiserá eta nanaquiruvana, ticutirine rícoanainahíni. ³ Núti néchajisihahi eta juca taicha nuncapaequenehahi eta tápajusiravahi eta nanaquiruvana. Vahi náeñamahíni, nájjaracahi jácani nacayehequene. Vahi vipamicavacahini víti. ⁴ Énasera, ichapemurihivare eta nayaseasirahavíhi vísapahini tinaquicavana éna apanava, navarairahi nacajiyare ena vichamuriana ticavasanahi te Jerusalén. ⁵ Éna, náetaviuchahi eta navapinairavahi. Tinapucapa tinaquicavanahi eta nacaemataneasirahi ema Viya, navarairahi nacurisamurecha éma. Tásiha, étapa eta náicurehi ena vichamuriana. ⁶ Eta nímairahi núti eta navapinavairahi eta nacajirisiraya, nupanerechahi nuvanecaya ema Tito machava máiteca eta ara eyehe apaesa táitauchavapaini eta enaquiruvanahi éti apanava. Cape juca épaniravainapa. Puiti itauchavanepaini. ⁷ Taicha éti, ichapemuri eta easiñavairahi me Viya. Tétavicavahivare eta échemaraivahi. Camuríhevere éti ímiturahiana. Evapinavahivare eta ecaemataneasirahi ema Viya. Tétavicavahivare eta émunaraivahi eta viyehe. Eta tacahe, táurica tápajucavahivaréni eta enaquiruvana ecajirisiraya.

⁸ Váhisera nupamicache eta nuvanahirahénahini. Nuvarahahiserá ímatiequenehahi eta navapinaraivahi ena apamuriana vichamuriana apaesa ímerecohíni éti apanava eta yátupiquenérahíni émunaraivahi. ⁹ Ímatirichuhi éti eta máemunasirahavíhi ema Viáquenu Jesucristo. Éma, tamutu tíuricacarehí te mávihahi te anuma, tájinahinéni mácamunuhíni.

Étívenehisera tiúcupaicapa te juca apaquehe. Páurehi éma eta máitaresirahi apaesa éti ejaicapahini eta iúricacareva maicha éma.

¹⁰⁻¹¹ Németeaca táurica ítauchavanéni eta juca enaquisiravahi, váchupa épanavaqueneripahi cape año. Táimiyana eta evapinairavayarehi eta ítauchiraya eta enaquiruvanayare tásihaquenehi eta jácani tatiarihiqueneanahi ecayehequeneanahi. ¹² Etiarihi erataha enaúca apaesachicha. Etiaríhivare erataha íapajucava eta enaquisiravahi. Etiarihi erataha enaúca camuri. Tacamunuchucha tátupiruva te esamureana, evapinavahi eta enaquiruvaya apaesa tijacapacareya mayehe ema Viya.

¹³ Vahi nuyaseacahe échuriahini éti táichavénenahini eta ímicatasirayare ena apamuriana. ¹⁴ Nuvarahahisera ímrecavahini eta ímicatasiravacayare ena vichamurianahi. Puiti ecáimahaquenevacahi, eratahahi ecájríca ena náechuriaruanahi. Tijuricati te apana año, étípavainapapuca échuriaca. Éna títsiríicavanainapa eta eyehe, énapavainapa tinaquicavanayare. Ene tacaheyare eta ítaresirayare, ecuticacayare. Nacuija nacucatajiva tayehe eta ecamunuqueneana. ¹⁵ Vítauchayare eta tacayemaquenehi eta Sagrada Escritura, ani tacahe: “Namutuhi ticaniruana. Nájina nácatajivahini, nájinavare náechuriacahini, váhivare náemepururerecahini” tacahepa.

Éma Tito énapa ena apinana vanairucanahi mayehe ema Pablo

¹⁶ Núti nuhasulupayachahi ema Viya eta manacasamurechirahi ema Tito máeñamiravahi eta eyehe, tacutihi eta nusamure néñamiravahi eta eyehe. ¹⁷ Éma, matupiruvahi tijicapahuhi eta nutuparasirahi téchapa jrícaheyare. Ichape eta mavarairahi téjirapanahayare, taicha tétavacavahi eta máemunasirahehi.

¹⁸ Eta mayaniravare ema Tito eta ara eyehe, vévatacayare macachaneyarepahi ema apana vichamuríhivare. Tímaticarehi éma eta macunachacarevahi te jácani máimituresirapahi nayehe ena vichamuriana tayehe eta véhiruhi. ¹⁹ Ema maca nerejihi ne vichamuriana eta máimicatasiranuyare eta vipaisirayare, víjarasirayare ena vichamuriana eta enaquiruvanahi. Víchahi eta juca, vivarairahi vicurísamurechaya ema Viáquenu. Vímereuchaheyareva eta evapinairavahi éti ecájríavahi. ²⁰⁻²¹ Taicha núti eta víamirayare eta íchapequene enaquiruvana, nuvaraha nímerecayare eta táuriva eta víchira, apaesa vahi nacuehájísianu nácani achaneana. Éma Viya tímararacanuhi eta táuriva eta nupaneruana. Nuvarahavare tíuri eta náimairahi ena vichamuriana.

²² Énerichuvare vévatacayareva ema apanavare vichamuri. Éma, íchapemuríhi tímereuchava eta mavapinairahi eta macaemataneasirahi ema Viáquenu. Puiti éma, tivapínavavarepa eta máitecapauchiraheya, taicha macasínavahi eta máimatirainapa eta evapínavahi eta ecájríavahi éti. ²³ Núti nuvarahahi náimatiyarehi namutu ema Tito, eta émairahi nujupaha tayehe eta juca vématanerepi. Vicuticacahi eta vícaemataneasirahe, véchapa jrísisirahehi éti. Étarípa te nacayasasererupuca nayehe ena apinana vichamuriana macachanequeneanayarehi ema Tito, énerichuvare emetacayare eta nerejianahi ena apamuriana vichamuriana, táichavenéni eta táurivahi eta nacaeamataneasirahi ema Cristo. ²⁴ Nuvarahahi ímrecavayare eta nayehe ena nani apinana vichamuriana eta yátupirahi eta émunaravahi, apaesa ecurísamurecha namutu ena vichamuriana te nasamairíricapa, náimatirayare vahi támapuruji eta nucunachirahehi.

9

Tíurípana vivapínavayarehi eta vínaquisiravana nayeheyare ena vichamuriana

¹ Tíuri puiti, núti nímatíheripahi eta evapinairava tayehe eta ecájrísira nayeheyarehi ena vichamuriana ticavasani te Jerusalén. Vaipa tácamunucarehini nápepejrícahehíni. ² Íchapemuríhi eta nucunachirahehi nayehe ena vichamuriana ticavasani te juca Macedonia. Numetacavacahi eta evapinairavahi eta épaniravahi enaúcuva cápequenerípahi te apanahi año. Tacahe, eta nasamairísirahi eta evapinairavahi éti, éna apanava tivapínavavarepa íchape. ³ Eta tacahe, névatacáhi puiti ena nani mapanana vichamuriana, apaesa vahi ecuvayaracanu. Vahi tacumapuruji eta nucunachirahehi eta enaquisirava. Nuvaraha tatsecavaipa támutu te nítecapauchahépa. ⁴ Tijuricati náehicanupahi te níteca ena vichamuriana ticavasani te juca, tacuíjarichaha tatsecavahi machu átsiríhacare, machu támapurujípa eta nucunachirahehi. Váipasare ecuímicatsiríacanu núti apanava. ⁵ Tásiha, tacahehi eta nupaneruana eta névatasirahi puiti ena nani vichamuriana, nánapumírachanu náitecapauchahé, náimicatacahe eta ecurújsirayare eta enaquiruvana. Nuvaraha evapínavayarehi eta enaquisiravahi. Nájina vahi náimíjachanu nútínachucha nupamícahe.

⁶ Némechaheyare júcaríhi eta échajírírucava, ani tacahehi: “Mácani achane ánicuchícharíchu eta máesane máevaruhí, ánimuríchícharíchu eta mavehayare eta távame eta

máesane. Mácanisera ichapepana eta máesane, ichapemurivare eta távame mavehaqueneyare” tacahepa. ⁷ Namutu nácani tinaquicavanayare, tavarahahi tatupiruvayarehi te nasamureana eta nanaquisiravaya. Vahi nacatiequenehaimahi, taicha nájina tipamicaimahi. Taicha ema Viya, tétavicava eta máemunasirahi mácani tatupiruvahi eta májjaracasiresirahi. ⁸ Ecasiñavaya yátupina mayehe ema Viya, taicha éma, tétavicavahi eta máitupajijasiravahi. Mavarahahi tjaracaheya tamutu eta ecamunuqueneana. Vaipa échurihaimahi maicha éma. Ecayehenasarepa eta ímicatasiravacaya nácani apamuriana ticamunuvanahi. ⁹ Ecutiyarehi ema achane tiuri, ema táechajisihahi eta Sagrada Escritura, ani tacahehi: “Ema achane tíurihi ticunachacarehi me Viya, tivapinavahi eta macajiraparacahi ena páureana. Tájina vahi téchuricaaimahi eta macajirisira te tamutu eta máitaresirahi” tacahepa. ¹⁰ Ema Viya, émahí ema tinaquicahi eta evaraquiana. Éma, macaejapacahivare eta tinicacare, étapa viáchanechiavayarehi. Ene macaheya eyehe éti. Tjjaracahepa eta enaquisiravaya, tímcutijiricavahi eta táejapasira eta evaraqui. Éma, ticajurucayareva eta enaquiruhi apaesa camurianaina ena ecatajiruanayare. ¹¹ Tásiha, ema Viya tjaracahenapa eta ímahaqueneanayare apaesa ímiyanavayarehi tjjaracasireca. Puitiripa eta viámaqueneyare enaquiruvanahi nayehe ena vichamuriana, ichape eta nahasulupayachirayarehi ema Viya. ¹² Taicha eta ímicatasiravacahi ena vichamuriana, ecuchucuhavacayarehi tayehe eta nacamunuiravahi. Tásiha éna, tiápajucavainapa te nasamureana eta nahasulupayachirayarehi ema Viya. ¹³ Ichapeyarehivare eta najirauchirayarehi ema Viya, nacunachirayareva éma. Eta evapinairavahi eta ecajirisirahi eta ímeresiravahi eta esuapirahi yátupi eta véhiruhi, étaripa eta máimiturapihi ema Cristo. Timereuchahehivare eta iáchanevahi nayehe nácani ticamunuanahi. ¹⁴ Tásiha, tiyaseuchaheanainapa me Viya te nayujarasirana. Ichape eta náemunasiraheyahehi, navarairayareva náimahahevane táichavenehi eta ítsirijisiravahi eta máemunasirahehi ema Viya.

¹⁵ ¡Tétavicavahi eta viúricacarehi maicha éma! ¡Tájina viyivi apanaina vácyema eta vihasulupayachira ema Viya táichavenehi eta juca víjaracasi!

10

Yátupi eta masuapacarevahi eta apóstolériahi ema Pablo

¹ Nuti Pablo, yátupiquenénuhi eta apóstolenuira. Puiti nuyaseacahe eta ímatiranuína eta némunasirahehi. Nucutihi eta máemunaraivahi ema Cristo étapa eta majapanuraivahi. Etiarhipuca eti ímijachahi népiyacavahi núri te emirahu; tásiha, te nuyerehihevare, tétavicavahíjhi eta nuvainarajivahi mapicaurairahanuhíjhi. ² Puiti nutuparacahe: Étuprisamurechavaipahini te tamirahu eta nítecapauchiraheya, apaesa vahi tacuitauchava nucusemaracahéini. Ena nani náimijachahi nucutihi mácani achanetataji, étachucha nutanuca eta nuvarahaquenehi. Nucamatinacavacayaresera te nítecapauchahépa. ³ Yátupi ecutiquenenuhi achanenuhi. Váhiserá nácutihini ena apamuriana ajairana náipicaracാനာမာမာ eta náeharaivana, navarairahi tisuapacareanayarehi. ⁴ Taicha núti vahi néhacacaimahi te nuvahuana, tájinavare nácasíñaimahi. Mararihiserá ema Viya ema tjaracanuhi eta nítpajijasiravaya nucamatinasihayare éna. Ema Viya, nájina ticachuricaaimahi. ⁵ Eta tacahehi eta nucaepahairahi eta semanereana, ena ticasíñavavaicanahi, tímijachavanahivare ena téchinavanahi, vahi návarahahini máimicatacavacahini ema Viya. Váhivare návarahahini náesenicahini éma. Níturucayarehisera nácani muracapanereruanahi eta nasuapiraina yátupi ema Cristo. ⁶ Nucuchapahesera eta yátupina eta esuapajiravaina. Tásiha, te nítecapa, nímiratahacava eta nítsivachirayare eta napanererua ena masuapajirairahanahi. Te váhipuca náeneuchava, némechavacayare.

Natiarihi ena tímijachavanahi apóstoleana, tímicutichavanahi ema Pablo

⁷ Éti ímijachaipapuca tájinaquenénuhi nítpajijasiravainahini, eta ímairanuhi eta nímahisami. Németeacavare natiarihi ena ticunachavanahi machaneranahi ema Cristo. Nuvarahasera náimatinuhini eta machanerairanuhi núti apanava. ⁸ Natiarihipapuca náimijachaipapuca vahi nétipicavahi núti eta nupamisirahehi eta esuapiranuhi. Váhiserá nutsirihahini taicha yátupihí nutuparahaichuhi eta návacure apóstolenuhi. Taicha ema Cristo mavarahahi nétumechaheyare eta éhisirahi éma. Tájina vahi nucamitiequenehahémahi núti. ⁹ Numetacahéhi eta juca, váhiserá tácarichuimahi nípicararecahehini te juca nucartane. Tamutuyare títauchava te nítecapauchahepa. ¹⁰ Ena nacahehi eta náechajiriruvahi: “Vahi ecusuapa eta macartane. Tayanapane muracapahi eta táechajiriruvana, émasera tájina mamuracavaina. Énerichuvare muracacaema eta máechajisira” nacahepa. ¹¹ Éna náimijachahi tacarichuhi muraca eta táechajiriruvahi eta nucartane. Tímahanuanayaresera te váhipuca nusuapacarehi te nítecapauchahepa eta ara eyehe.

¹² Núti vahi nímicutichaimahi nayehe ena tímijachavanahi ticunachacareanapanahi. Ena nani énajiricavaichucha ticunachavana, tímijachavanahi nájina ticachuricanaina éna. Súnsurupichucha eta juca náichaquenehi. ¹³ Nútisera vahi nútijivaimahi nucunachavahini. Émayarehi ema Viya ticunachanuyarehi, taicha éma tjaracanuhi eta nusuapacarevahi eta eyehe, tásihaquenehi eta níjarasirahehi eta táurinaqueneana máechajiriruvana ema Cristo. ¹⁴ Váhivare nétaviviriacavahini eta nusuapacarevahi eta eyehe. Nútihinéni nínapucahi te nítecapauchahéna te nímitucahepa eta máechajiriruva ema Cristo. Tacahe, tituparacanuhi eta esuapiranuyarehi. ¹⁵ Váhivare nucunachavaimahi tayehe eta apaematanehi násapíhahipucaini. Nuvarahasera tápajucavaini eta esuapajiraivaina mayehe ema Cristo. Nuvarahavare nímitucaheyare eta apamuriana yátupiqueneana, nítauchiraina eta nucatu-parahairahi me Viya. Tájina vahi nétaviviriacavahini eta nusuapacarevahi eta eyehe. ¹⁶ Núti, váhiquene nímicasiapavaimahi te jácani avasare nacametarairuquenéipa nácani apana, nucunachiravayarepuca tayehe eta tátaurevapaipa apaematanéanahi. ¹⁷ Numetacahe: Nácani tímijachavanahi ticunachacareana, yátupinahiseráni eta nacunachacarevaina mayehe ema Viya. ¹⁸ Taicha mácani achane, te yátupíhi eta macunachacarevahi, vahi émajivaimahi ticunachava. Émayarehi ema Viya ticunachayarehi.

11

Ichape eta máeñamiravahi ema Pablo nayehe ena machamuriana

¹ Tiuri puiti, nuvaraha ecamichaini eta juca nucayemaqueneanayare eta eyehe. Ticutiyaie súnsurupiana. Nuvarahasera ítasamahini. ² Puiti, tétavicavahi eta néñamiravahi ícha éti, tásihaquenehisera me Viya. Nucutiripa mácani achane suiya esu amaperu eta majaneasirahi ésu. Taicha nuvaraha táurihini eta majacapiraheyare ema Cristo te jena sácheyare. Ácutihini súcani esena amaperu te sutupiruvahi eta sucaimaira, tájinasarepa mácayemahini ema suima. ³ Eta néñamiravahi eyehe, nuvarahahi ecuijahini íáquipaicava, ecucamítiequenehahini eta táurivahi eta éhisirahi ema Cristo. Vahi ecucuti eta suáquipaisiravahi esu vénarahaini Eva, maicha ema Váinaraji Satanás. ⁴ Ímicatisamurechanuhi eta esuapiravanehi ena tépiyahirahiana, apapíahi eta nametarairu tayehe eta náuchucuiraya. Núti, émahí ema Jesucristo ema néchajisihasahe. Énasera, apanahi ema náechajisihahi. Émaripa ema Espíritu Santo, váhivare émainahini náechajisihahini éna. Apanachucha ema nacasiñahi. Éti ejacaparipahi ema yátupiquenehi Espíritu Santo. ⁵ Núti németeaca vahi ticachuricanuanaimahi eta nucametarairuira ena tímijachavanahi apóstolequeneana ticametarairurahianahíji náichava. ⁶ Tayanapanepuca táepurucarehi nayehe eta néchajisirasami, étasera eta nítipajijiasirava, tamutuhi nímatiequeneha. Ímatinuhi éti tayehe tamutu jácani nímitusiraheana níchaqueneanahi.

⁷ Etiaríhisera puca éti ímijachahi néjcapava eta némpaurechiravahi. Táitusiava népurucarehi eyehe, ichaperipahisera núríchaheripahi éti. ⁸ Váhivare nuyaseacahehipucaini eta nunicaqueenerepi eta nímitusirahehi. Yátupi tjaracuananahi ena apamuriana vichamuriana eta nénisiavayare. ⁹ Tásiha, te nítahapa eta plata, váhivare nuyaseacahéni eta nunicaque. Taicha ena vichamuriana ticavasanahi te provincia Macedonia náimiamarecachi eta nucamunuqueneanahi. Tacahe, nujaneacavahi, vahi nuyaseacahéni éti. Váhivare nuyaseacahémahi puiti. ¹⁰ Jéhesare, nájina tíratahaimahi tíhapapica eta nucunachacarevahi tayehe eta tájina nucobrachirahehíni eta nímitusirahehi emutu eti ecavasanahi te Acaya, taicha yátupíhi eta nímatiequenehairahi tamutu eta yátupiqueneanahi máimiturapiana ema Cristo. ¹¹ Eta juca nucayemaqueneana, vahi ímijachaimahi étainahipucaini táichanu eta numeamunasirahénahini. Ema Viya máimatíhi eta yátupirahi némunacache.

¹² Énesera nucaheyare núti. Váhiquene nuyaseacahémahi. Nímiyanavaya eta nujaneasirava apaesa tacuíja naviya eta taviuchanu nayehe ena tímijachavanahi tímíturahiana nácutinuhini eta apóstolenuirahi núti. Taicha navarahahi ticunachacareanayarehi tímicutichavanayarehi eta nucunachacarevahi núti. ¹³ Éna, tépiyacavanahi apóstoleana. Tivayuarahianasera eta náítaesirahi. Váhiquenevare vanairucanaimahi me Víaquenu Jesucristo. ¹⁴ Ena nani, vahi tíaramicareana éna eta navayuaravahi, taicha ema Satanás, yátupiquenehi náquenu éna, tépiyacavahi macutí ema ángele vanairucachi me Viya, mavarairahi tivayureca. ¹⁵ Ene nacaheyarehi ena nani mavanaranahi ema Satanás, tépiyacavanapahi pastoreana náuriqueneana. Járáparyarehisera eta sácheyare najacapirayare eta náicuifayare táichaveneyare eta juca náimíquipaisirahehi.

Ichapemuri eta macatajivairahi ema Apóstole Pablo taicha eta macametarairuirahi

¹⁶ Nuvaraha nápechava numetacahe: Vahi ecusuapa eta náimijachiranuhi máurishinu. Te etiaríhipuca éti ímijachanu máurishi, ecayehe paciencia eta nuyehe. Ecamichanu eta juca nucunachiravasamipaini apaesachichainahini nácutipaini eta nacunachiravahi

ena apamuriana. ¹⁷ Tájina mavanairipina ema Viáquenu tayehe eta vicunachacarevahi. Tichanuhisera nucunachava taicha éti ímjachanu máurishinui. ¹⁸ Táichavenehisera eta nusamairirisirahi eta nacunachiravahi eyehe eta náitupajijiasiravahíji, énenapa nucahe-yare núti eta nucunachirava. ¹⁹ Éti, ímjachavahi ichape eta échegaraivavacahi. Evapinavahisera eta esuapirahi eta nayaseasirahehi ena máurishiana. ²⁰ Ecamichahivare tamutu eta napamisirahe itaucha eta tivitacareana vanairipiana. Tiverējacheanahi eta ecayehequeneana. Tiyurucaheana éhicavaca éna. Tasapihapa éti ecamichahi tamutu eta juca. ²¹ Núti, tétavicavahi nutsirihahi énemahinuhinahini nácahehini. Te ímjachahipuca tíuríhi tamutu eta juca náichirahéhi, eperdonachanuhini vahi nícahíni éta.

Ena nani ticunachavanahi eta náurivahi. Núti apanava núriha eta nucunachiravarehi, tayanapane ímjachanupuca máurishinui. ²² Éna ticunachavanahi énaírahí hebreo israelítana. Núti apana hebréonuvare, israelítanuvare. Énerichuvare núti mámariequenenu ema viáchucaini Abraham, nucutirichuhivare éna. ²³ Éna, tímijachavanahi mavanarana ema Cristo. Nútisera, jéhevarequenenuhi mavanaranuhi ema Cristo. Nápapujanavahi núti eta nayehe. (Máurishinui eta nímaíravahi eta juca nucunachiravahi.) Jéhevare núti nápapujanavahi eta nucaemataneasirahi ema Viya, nucachuricavacahi namutu éna. Eta juca nucaemataneasirahi me Viya, témestacanuhi, témeratacanuhivare. Énerichuvare ichapemuríhi eta táimicapasiranuyarehini. Ena nani nánarana, vahi náichahini, nájina nacatianacavacahini. ²⁴ Tacutiquene cíncohevare nucaesta naicha ena nujaneeana israelítana te jácani nupaisiranapahi. Mapana arroba eta náestasiranuhi. ²⁵ Mapahevare tépuchiricanuanahi. Étahevare tiyucararacuanahi te márijahiana. Mapahevare térica eta pacure tiámanupahi. Tásiha, étanavare sache étanapa yati nucahehi te táinahu eta une te ichapequene mar. ²⁶ Ichapemuríhivare eta nupaisiranahi. Nímahavahivare eta táifehicarevahi eta tamuracava tajunapirahi eta une te ichape cacajure. Nupicacavahivare naicha ena tiámerahiana. Tipanereuchanuanapahi ticapacanuana ena nujaneeana, énapa ena apavasanana. Tamutuhi náemauchianupahi te jácani avasare, téhepa te mávapahi apaquehe, étapa te jácani nupaisirana te une tayehe eta pacure. Énerichuvare témauchanuana ena tímijachavanahi nuchamuriana táichavenéhi eta népiyaequeneanahi. ²⁷ Ichapemuri eta nucaemataneerahi. Nucatajivahi muraca. Ichapemuríhivare eta numacaimarasiravahi. Nucatajivahivare tayehe eta nécuava étapa eta numauneva. Ichapemuríhivare eta nucamíchira eta ayunanuiranuhi. Nucatajivahivare taicha eta ticasarahi. Néchuríhavare eta numuiríharapi.

²⁸ Tayanapaneinesera eta nucatajivairahi ichape, nímiyanavahisera eta néñamiravahi ícha emutu eti nuchamuriana te tamutu avasareana, nuvarairahi tacuijahini tahapapiricahéhini tayehe eta éhisirahi ema Cristo. ²⁹ Te etiaríhipuca eti vahi túmehéhaníni eta éhisirahi ema Viáquenu, ichaperinehi eta néñamiravahi núti. Tacutiquene te etiaríhipuca éti náimíquipairuhehi, tétavicavahi eta nutsirírahivare, nusemasamurevarepa.

³⁰ Téhesera tatiaríhipuca eta nacunachiravahi, núti apanavare nucunachavavare. Étasera numaitupajijiasiravahi, étachucha ticunachacarehi eta nuyehe. ³¹ Émasera ema Tata Vicaíyaquene, Maiya ema Viáquenu Jesucristo, máimatíhi éma eta tatupiruvairahi eta nucayemaqueneanahi te juca nucartane. Éma, máitavacacahi eta majirauchacarevahi.

³² Tacutiquene te návihaipahi te Damasco, ema tuparairucahi tayehe, majupahahi ema rey Aretas, máimivanerecáhi ena séntinelana te tapajana tayehe eta avasare, mavarairahi ticaratacanuana. ³³ Énasera ena nuchamuriana tinacacuhanuanapa tayehe eta ichape saye túmehi, ticuchucanuanapa te ventana, ticajuchucanuanapa te tiupi enure te apachacaya eta yúchama tayehe eta avasare. Tacahehi eta núchucuirahi. Vaipa nacaratacanuhini.

12

Ena Pablo mavapuchahi tímerecava ema Viya

¹ Yátupi tájina nuvehaimahi eta nútijivairahi nucunachava. Numetacaheyaesera eta nímaírahi te nuvapure máechajisiranuhi ema Viáquenu. ²⁻³ Catorce áñoa eta táetavisiravahi eta nímaírahi tiámanuanapa tímipairicanuanahíji te anuma te mávasa ema Viya. Váhisera necha te étahipuca eta náquehe námaphi eta nuyanirahi, te étachuchapuca eta náchaneva. Émasera ema Viya, éma téchahi eta níchararacavapahi eta mámiranuhi te mávasa anuma. ⁴ Ánaqui nusamapa eta mahu. Timetacanuapa eta téchacareanahi tayumurevahi. Váhisera táisapacarehini numetajiricahini. ⁵ Étapapucaini nucunachiravahini tayehe eta nímahaquenehi nusamaquenehivare, taicha tímimatichanuhi ema Viya. Váhisera nucunachavaimahi tayehe. Núti nucunachavahi tayehe eta numáitupajijiasiravahi. Étachucha nucasiñavaiyahi tayehe. ⁶ Yátupihinéni eta nucunachacarevahi. Váhisera nucajamuravahini,

taicha tájina nímatihini nutanuca eta nacunachiranuhini ena achaneana. Nuvarahasera nanecapaequenehahini eta táurivahi eta nítaresirahi.

⁷ Tétavicavahi eta tíáramicare eta nímahaqueneana te anuma. Tásiha, ema Viya vahi mávarahaimahi nucasíñavaivaichahini eta nímairahi. Máisapahi ema Váinarajiquene Satanás técajumachanuhi, cútirine tatiarihinahini itape tayuvacara te neche. Taicha ema Viya mavaraha vahi nucuvayuchava eta nucunachacarevaina. ⁸ Mapahe eta nuyaseasirahi ema Viya eta macanarasilanuhini eta nucatiruhavahi. ⁹ Émasera ema Viya, ánipa máichanuhi: “Vuíchaha nucanaracavimahi. Nujapanuvysera. Níjaracaviyare ichape eta pitumevaya, tayanapane eta pimaitupajijiasiravahi. Taicha nuvaraha náimatiyarehi ena achaneana eta nítipajijiasiravahi piyehe” máichanupa. Eta tacahe, núsismuréichucha puiti eta tamajinairahi eta nítipajijiasiravainahini apaesa máimerecavahini ema Cristo eta máijarasiranuhi eta máitupajijiasiravahi. ¹⁰ Tásiha, nuvavinavahi puiti eta napanajisiranuhi, nucatajivairahi náicha, námehairanuhivare táichavenehi eta mavanarairanuhi ema Cristo. Nuvavinavahivare eta numaitupajijiasiravahi étapa eta néchuriasirana, taicha eta nímairavahi tamajinairahi nítipajijiasiravainahini, nútisera nusamavahi eta nutumevapaipaicha maicha ema Viáquenu.

Ema Pablo tétavicava eta máeñamiravahi nayehe ena machamuriana

¹¹ Yátupi puiti eta néchajisivaairahi nucatiuchiravahi, tímicutijirícavaipa máurishinuínahini. Íchavenehisera éti, taicha éti tatuparacahi ecatiuchanuyarehini, váipasare nucuechajisivaahini nútí, vahi nútijivainahini nucunachavahini. Navetijisera ena tímijachavanahi apóstoleanahí ena éhiruanahi, jéhevare éna, tájinaqueneпа nacunachacarevaina. ¹² Nímerecavahisera eta eyehe eta yátupiquenénuirahi apóstolenu eta nucaemataneasirahehi. Tayanapane camuri eta nucatiruhavana, nucamíchahisera tamutu. Nimechahe-ripahinéni eta tíáramicareana níchaqueneanahi, maicha ema Espíritu Santo. Éta tímícahe-rachanuhi eta yátupiquenénuirahi apóstolenu. ¹³ Ena apamuriana vichamuriana te apana avasareana ticajinuanahi éna eta nucamunuqueneanahi. Étiserá, tájina vahi nuyaseacahéhini étainahipucaini eta nunicaquene, nítecahipucaini íjaracanuini. ¡Váhisera ecusema eta juca numaitcapauchirahíhi!

¹⁴ Puiti nutsererecavaipa eta mapaherayarepa níteca eta ara eyehe, nupaiiuchiraheya. Váhivaresera nácamunuimahi ítátinuhini. Váhivare étaina nutanucapahini eta ecayehequeneana. Étiquenesera nucamunuhepahi eta esuapiranuinhini. Taicha nuchichanavehehi éti. Vahi étinayare ítátinu. Nútí nítátiheyare taicha nútí ecaiyaquenenuhi. ¹⁵ Váhivare néñamiáhémahi eta nucayehequenehi eta nítátirahéyare. Váhivare nuyacujimahi eta nucaemataneasiraheya táurivayare eta íáchanevana. Tayanapane váhipuca ecuemunanajicanuhi, nútisera tétavicavahi eta némunasirahehi.

¹⁶ Nararihivare ena téchajicanahi eta nuyehe. Ani tacahehi eta náechajiriruvahi: “Yátupi te tipaiiuchahavi éma, váhinenicacha tiyaseacahavi eta macamunuquene. Máitucasera eta mavereasirahaviya eta viplatane” nacahehi. ¹⁷ Eti ímatíhi vahi énavanerecainahipucaini ena névataruasanahi eyehe, énaiahipucaini navereacahehini níchavenénahini nútí. ¹⁸ Te nuvanecapa ema Tito émapa ema macachanequenehahi, téjirapanahéanayarehi, ¡tájinavare mayaseacahehini éma! Taicha viciticacahi víti eta víúrivahi eta eyehe, táichavenehi eta vémunasirahehi ichape.

¹⁹ Eti ímijachaipapuca nutanucahi nútí eta nucatiuchiravayarehi eta eyehe. Váhiserá tácahehini. Vahi tácamunucarémahi eta nucatiuchiravaya taicha nútí nutupiruvahi eta néchajisirahehi te mamirahu ema Viya étapa te máijare ema Cristo, nuvarairahi tajurucahini eta táurivaina eta íáchanevana, eti némunaruqueneanahi nuchamurichichana. ²⁰ Nútí, te níteca eta ara eyehe, nupicahi vahi núrícaimahi ácahemahihíni eta nuchimapiraheya: éhajiricácahipucaini, ecapinarujiricacahipucaini, esemajiricacahipucaini, íputsimuríaca-hipucaini, épíyéquenerejiricacahipucaini, íúmehajiricacahipucaini, ecasíñavavairicahipucaini, váhipuca tacuaquejiricacahi eta epanereruana. Te ecahehipuca, vahi íúricaimahi némecharecahehini. ²¹ Nupicahisera nátsiríhacarehini nútí mayehe ema Viya íchavenénahini éti, vuíchaha étupiricavahini eta nuchimapiraheyare. Vahi nuvaraha ecaiyacanu éti enerejicavana éjecapavanahi, taicha eta ánaquiaparipahi eta émainajisiraichaha eta ecapecaturairana. Ímiyanavaichucha eta esenamarerahéhi, étapa eta emapicaurahivaichucha.

13

Eta máipicararesirahi ema Pablo eta táichecuaraqui eta macartane

¹⁻² Puiti mapahenapa eta néjirairaheya. Cape te nítesinehi, numetacahevanehi nútijacuruvahi, camuriripa eta nuconsejachirahehi eti éjecapavanahi. Íúrihapaini ínajica eta emaurivana. Puiti te nucartane, nápechavahi numetacahe emutu. Vaipa nucaiticaimahi

nácani téjcapavanahi. Núti nétupiricavacaya. ³ Etiarihíhi eti épurunuhi eta mavanésiranuhi ema Cristo. Ímahayaresera ichape eta máimicatasiránuhi eta nétupirisiraheyare. Taicha éma, títipajjiacavahi eta máemechaesiraheya. Típicacare eta máicuñaraqui. ⁴ Yátupi éma tísapavahi ticaetata, tímicitijiricavaipahi vahi macuratahahini ticatiuchava. Váhiserá mánasihini máepenahini, tichavahi titareca puiti taicha eta máitupajjiasiravahi ema Viya. Ene nucahehi núti nísapayarehi, tímicitijiricavahi vahi nucuratahairainahini. Ímahanuyaresera eta májjarasiranuhi eta máitupajjiasirava táichavenehi eta mávahásiranuhi eta nétupiricaheyarehi taicha nucatuparahahi eta nujaneasiraheyarehi emutu éti.

⁵ Nuvaraha esamavayare étijiva, te yátupihípuca tíuríhi eta éhisirahi ema Viáquenu Jesucristo, te yátupipuca eta mávahásirahehi éma. Taicha éma mávahácavacahi namutu ena machichanaveana yátupiqueneana. Machu émepururecava eta íjarasiravahi éhica éma. ⁶ Nuvarahasera némechahe ímatinuhini yátupinahini eta mávahásiranuhi ema Cristo, jéhevare núti yátupiquenenuhi machaneranuhi. ⁷ Núti, ichape eta nuyujarauchirahehi, nuyaseacahi ema Viya eta étupirisiravayarehi apaesa tacuija eviurevaina mayehe. Ichape eta nuvarairahi íchahini eta táuriqueneana. Tayanapanerinehipuca náepurunuhini, nuvarahasera ímiyanavayare éti íchayare eta táuriqueneana. ⁸ Taicha núti nutupiruvahi nicha eta táuriqueneana yátupiqueneana. Váhiquene nísapavaimahi nuhapapica eta yátupiqueneana. Eta tacahe, yátupina ésamiricava. Vaipa ecucamesa eta nápepejiricahe numetacahe. ⁹ Ichape eta ecurisamurechiranuya te yátupinapa étupiricava. Étijivainapa eratahayare ecaratavaca. Vaipa nútuparacaimahi eyehe. Puiti eta nuyasearapi núti me Viya, tamutuyarepa tichavaya eta táurivahi eta ítaresira. ¹⁰ Puiti nucajurehe eta juca carta, nucuchapavahi núti eta néjirairaheyare, támuturipahini étupirica apaesa tacuijahini nucucayema. Váhivare nucusemaini eyehe. Nuvarahasera nétumechaya eta íachanevana. Étahi eta nutuparacasisivanahi me Viáquenu eta apóstolenuirahi mayehe.

¹¹ Tiuri puiti, nuparapenaveana, ítátijiricavahi. Etanucayare eta táuriqueneana eta ítaresirana. Ecurisamurechacaca. Tacuijahini eta semanerena eta eyehe. Tácuticaca eta epanereruana. Májjaracahehíni ema Viya eta tanarasiraina eta íachanevana, taicha tétavicavahi eta máemunaraivahi éma.

¹² Núti néchajicahe emutu. Nuvaraha nétserarecahevacyare tácutiarahi eta táetavisiravahi eta némunasirahehi te mavahuana ema Viáquenu. ¹³ Ani te juca téchajicaheana namutu ena vichamuriana.

¹⁴ Nuyaseuchaheparaca emutu éti me Viáquenu Jesucristo táetaviuchahini eta iúricarevaya máicha, evapinavaréni taicha eta máetaviuchirahi eta máemunasirahehi ema Viya. Macurisamurechaheparacaini tamutu sácheana ema Espíritu Santo. Tamutupa eta néchajirivanahi eyehe.

Etá macartane ema Apóstole Pablo nayehe ena machamuriana ticavasanahi te Galacia, ticajare

GÁLATAS

¹ Nuti Pablo, yátupiqueneanuhi mayehenu apóstole ema Jesucristo taicha manerejirunuhi. Ema Tata Vicaiyaquene ticutihí eta mapanereruhi ema Machicha eta máichuiranuhi. Puíticha émaquenehi ema Jesucristo tinacanuhi eta juca návacurehi apóstole, émarichuhi ema macáechepucasiquénehi te máecari. Vahi apanainahini achane ema tinacanuhi, énnainahipucaini ena nucutiqueneanahi apóstoleana nanacanuhini eta juca návacurehi. ² Puiti nucajurehe eta juca carta eyehe eti nuchamuriana ecavasanahi tayehe eta avasareana tayeheana provincia eta Galacia. Téchajicaheana ena apamuriana vichamuriana te juca návihahi.

³ Nuvaraha macatajicahehine ichape ema Tata Vicaiyaquene, émapa ema Viáquenu Jesucristo. Nájaracahehine eta táurivaina eta epanereruana. ⁴ Ema Viáquenu tíjaracavahi tépena te crusu taicha mavarahahi ticuchucuhaviyare tayehe eta vícuñayarehine táichavene eta vípecaturana, macámítiasinaháviripahivare eta víjamurachirainihí eta tamauriqueneana tayehe eta juca apaquehe. Eta tacahehi eta mapanereruhi ema Tata Vicaiyaquene. ⁵ ¡Máichecuarequiyarehi eta víjirauchiraya éma! Amén.

Étarichu eta doctrina véhiruhí, tájina apanaina

⁶ Ichaperinehi eta ímipaneresiranuhi. Váhicha németeaca ene ácahehine eti éhichahine eta apanaquene doctrina. Tasapihapa esuapahi eta juca, vaipa émainahine esuapa ema Viya. Ínajicavanepa eta esupirainihí éma. Émepurarecapa eta máichuirahéhi. Tasapiha émepurarecapa eta máepeninahéhi ema Jesucristo eta máemunasirahéhi. ⁷ Nutupiruva numetacahe, tájina apanaina doctrinaina tácuti eta juca véhiruhí víti. Néchahi eta juca ícharacavahi éti, nararihi ena témejecapavachaheanahi, navarahahi nahapapicayare eta vímiturapianahi tásihaqueneanahi mayehe ema Cristo. ⁸⁻⁹ Víti vímitucaheripahí eta juca yátupiqueneana, étarichuhi eta máéchajiriruva ema Viya. Cape juca, te víávihaichaha eyehe, vímetacahévanehi eta macatichira ema Viya eta apanapanequeneana doctrina nahapapiruanahi. Puiti nápechahevare numetacahe: Ticatichacareya me Viya nácani nahapapica eta vímitureheanaripa yátupiqueneanahi. Nútiripa, te nápechavahivaréni níteca eyehe, apánainapáipahivarepucaini eta nímiturapiana, ticatichanuhine ema Viya taicha eta nuhapapirainahine eta máéchajiriruvana. Téhevare máítecapucaini mácani émana máímucitichavapahine ema ángele másihaquenénahipucaini te anuma, te mavarahavivarepuca mahapapica eta vímitureheanaripa víti, énerichuvare macatichayarehi ema Viya.

¹⁰ Nararihipuca ena témetecanuanahi nuhapapicahi eta máéchajiriruvahi ema Viya, étainahipucaini níturusihahehi ena achaneana, némemunasiravainahine nayehe. ¡Tájinasera vahi nuhapapicahine nútí! Nutupiruvahi eta nímituresirahi taicha nuvarahahi nucurisamurechaya ema Viya, nímerecavayarehi eta núriva eta mavanaranuirahi ema Jesucristo.

Ema Pablo tímereuchava eta táicharacavahi eta masiapirahi apóstoleyare

¹¹ Nuvaraha numetacahe eti nuparapenaveana eta juca nucametairuirahi, vahi tásihaquenénehi te nupaneru nútí. ¹² Váhivare nímitucasivainahine mayehe mácani apana achane nucutiquenehi apóstole. Émaquenehi tímitucanuhi ema Jesucristo.

¹³⁻¹⁴ Éti esamairicanuhi jácani eta nícharacavahi eta nítaresirahi cape juca násinequenehi, te étarichaha néhicahi eta nayeherepiana ena israelítana náchucanaveanainihí nútí. Nútí, eta nujurisirahí, nímahahi eta tacapicahuirahi eta víyeherepiana. Ichapehi eta némuracachiravahi, nucachuricavacahi ena nuparajuruanahi. Nímicapicauchahi muraca, numavarairahi táemitiequenehine eta víyeherepianahi nanaquipairuanahi ena náchucanaveanaini. Eta tacahehi, ichapemurihí eta nupanjirisiravacahí ena machaneranahi ema Viya, nuvarairahi nucámítiequenehavacayarehine eta náehisirahi ema Jesucristo. ¹⁵ Námavaquenévahiséra eta manerejisiranuhi ema Viya, te vúichaha núchuchahine te sujuhe esu ticachichanu; tacahehi eta mapanereruhi eta máichuiranuyarehi, taicha eta máemunasiranuhi. ¹⁶ Tásiha, tímimatichanuhi ema Machicha, taicha mavarahahi nucemetarairuyare nayehe ena apavasanana eta macuchucuirayare namutu ena tisupapana ema Machicha. Váhiserá nutanucachine nácani náimitucanuhi eta nucemetarairuirayare. Nájinavare nuyasereruina. ¹⁷ Váhivare nuyanahine te Jerusalén nutanupanahipucaini ena nánapureanahi apóstoleana. Téhechucha apaquehe Arabia nucajúhehi. Émasera ema Jesús, éma tímitucanuparacahí. Te váchupa, nuchavavarepa te avasare Damasco. ¹⁸ Te mapanaqueneapa año, nupaenumavapa nuyanahi te Jerusalén, éta pa nímatinehi ema Pedro.

Nunasipanapa quince sache nucahehi eta mayehe. ¹⁹ Émapa ema Santiago, maparape ema Viáquenu, ema nímahaquenehivare. Énaserá ena apamuriana apóstoleana, nájina nímahavacahini. ²⁰ (Puiti títamaracanuhi ema Viya, tájina vahi népiyahiraivaina eta juca nucáyemaqueneánapahi te juca nucartane. Nutupiruvahi eta numetasirahehi.) ²¹ Tájinaserá vahi nucaimitucasihini nayehe taicha nuyanavanavarepa nucaijuhehi eta te Cilicia, nánuBuchapa tayehe eta Siria. ²² Tacahe, ena vichamuriana ticavasanahe te Judea, váhivare náimatínuhini taicha vahi náyerehini tayehe. ²³ Tisamairicanuanahisera eta néquesiravaripahi. Ánipaji tacahehi eta nasamairirisiranuhi: “Ema maca Pablo tipanajiricahavihi cape juca viásinequenehi, ¡téquecavaripahi! Cape juca mavarahahi ticámitiéqueneháviyarehini eta juca véhiruhi. ¡Puiti émarinecha tétucaracavahi ticametarairuhi eta juca véhiruhi víti!” nacahepaji. ²⁴ Tacahe, ichaperinehi eta nacunachirahi ema Viya níchavenehi núti eta néquesiravahi.

2

Éma Pablo tímereuchava eta masiapamurihairapa ena apóstoleana, tásiha natupiruva naja-capa éma

¹ Catorce áñoripa eta táetavisiravahi, nupaenumavapa nápechavahi nuchava te Jerusalén. Émapasera ema Bernabé nucachanehi, émapa ema Tito. ² Taicha numetacavahi me Viya te nuvapure eta nuyanirayarehi tayehe eta Jerusalén, véchajicacayare nayehe ena tachutirihanahi. Eta nítecapirapa, viúrujicavapa, énachuchasera vicachanehi ena tachutirihanahi. Tásiha numetacavacapa eta nímuturapianahi eyehe eti apavasanana étapa eta esuapirahi. Taicha nuvarahahi ena vichamuriana israelítana najacapahehini eti apavasanana vichamurianaripahi. ³⁻⁴ Te jena, natiarihíhi ena tépiyacavanehi vichamurianahi, tépiyahirahianapahi eta nasiapamurihairahavihi. Éna, navarahahi tipamicahavianayarehi eta vímitusirahe éti apavasanana éhica eta nayeherepiana ena israelítana. Taicha tacahehi eta náechajiriruvahi éna, ítauchayarehíhi eta nayeherepiana éna, váhíhi tacarichuimahi eta éhisirahi ema Jesucristo. Navarahahivare napamicayarehini eta macamarca ema Tito, eta apavasanairahi éma. ⁵ Tájinaserá vahi visapavahini nacachuricahavihini, taicha víti vivarahahi tacujahini tahapapicahinehi eta éhisirahi eta yátupiqueneana téhicacareanahi. ⁶⁻⁹ Tacahe, énaripa ema Santiago, ema Pedro, émapa ema Juan, énapa ena apamuriana náiyarahana ticutinuanahi eta nupanereruhi. Tájinavare vahi nametacanuhi eta apamuriana téchacareanahi nayehe. Étasera eta nasamiranuhi, náimativanepa eta émairahi ema Viya tituparacanuhi eta nucametarairuiraya nayehe ena apavasanana. Nucutihi eta macatuparahairahi ema Pedro máimitusirayarehi ena israelítana. Ema Viya májaracahi eta mávacurehi ema Pedro apóstolehi nayehe ena israelítana. Májaracahivare eta máitupajijiasiravahi. Ene nucahehi núti tíjaracanuhi eta návacurehi apóstolenuhi nayehe ena apavasanana. Tíjaracanuhi vahi eta nitupajijiasiravahi. Eta tacahehi, náimatipa eta émairahi ema Viya tíjaracasihinuhi eta juca nítucaquenehi. Tacahe, tíhijapachavianapa, núti émapa ema Bernabé. Eta juca náichirahavihi táicutirahi eta náisapirahaviyarehi vímiyanava vímitucavacayare ena apavasanana. Éna, tímiyanavanayare tímiturecanahivare ena israelítana. (Tépurunuanarichuchapuca eta náimairanuhi. Tayanapanesera váhipuca nujacapacarehi nayehe eta apóstolenuirahi. Nútisera néchahi eta manerejisiranuhi ema Viya eta apóstolenuirayare.) ¹⁰ Tacarichu tituparacahavianahi eta vímicatasirayarehi ena páureana. Eta tacahehi puiti, nítauchahi núti eta nuvanecavahi nímicatasiravacaya ena páureana.

Éma Pablo tímereuchava eta macajachirahi ema Pedro

¹¹ Te táequenepa, te jena áñoanahi, títecapauchahavipa ema Pedro te avasare Antioquía. Étasera eta mávihairahi viyehe, téjicapavainapa. Eta tacahe, nucajachapa éma. ¹² Eta máitecapirapa ema Pedro, tájinapá máichiravainahini eta masamiravahi eta macachanjirisiravacahi ena apavasanana vichamurianahi, tinicahi eta nayehe. Tacahe, te jena sácheana, títecapanapa ena máemunacasareanahi ema Santiago, israelítana vichamurianahivare. Te máimahavacapa ema Pedro, títsirihapa éma eta macachaneravacahi ena apavasanana vichamurianahi. Vaipa mávarahahini macasiriquivacahini. Tipicahi eta nacaecahirahi ena tímicapicauhanahi eta nayeherepianahi ena israelítana. ¹³ Tacahe, ena apamuriana israelítana vichamurianahi, énerichuvare éna náehicapa eta májecipiravahi ema Pedro. Térajicavanavare éna apanava. Émaripa ema Bernabé máehicavarepa eta nájecipiravahi éna. ¹⁴ Tacahe, te nímahapa núti eta nájecipiravahi, vahi táurihini eta náichaquenehi, nucajachapa ema Pedro te namirahu ena vichamuriana taicha májejequihapa eta tavanairipihi eta yátupiqueneana máechajiriruvana ema Jesús. Níchapa ema Pedro: “¿Tájaha tacayema eta pitsirihahi ena vijaneanana israelítana eta picachaneravacahi ena apamuriana vichamuriana apavasanana? Pémitisicavapapuca eta israelítavirahi

cape juca pítaresirahi, táitusiava eta picachanejiricavacahi ena apavasanana vichamurianahi. Tásiha puiti, eta pímairapa náitecapirahi ena vijaneananarichu násihaqueneanahi te Jerusalén, péquecavavarepa nayehe. Váipa pávaraha picachanehini ena apavasananahi vichamurianahi ticutiripahi eta vahi vichamurianainahini éna. Pivarahapuca náepiyacava israelítanáina éna apanavare” níchapa ema Pedro.

Namutuchucha tijacapacareanaya me Viya nácani navarahaya téhicanayare ema Jesús

¹⁵⁻¹⁶ Tacahe, numetacavacapa namutu eta juca yátupiquenehi: Véchahi víti eta vahi tácomesaimahi vítauchahini eta nayeherepianaini ena víachucanaveanaini. Tarataripahi eta véhisirahi ema Jesucristo, vijacapacarépa vimutu eta mayehe ema Viya. Énaripa ena apavasanana, tayanapanehi náetaviuchahi éna eta nasipecuraraivahi viyehe viti israelítana, tíujicavanayarehisera tijacapacareanaya me Viya taicha eta náehisirahi ema Jesucristo. Tayanapane vítamuturuchahipuca eta mavanairipiana ema Moiséini, tájina vahi vájacapacarémahí víti eta me Viya táicha. Vimutu vijacapacare eta me Viya táichavenechucha eta véhisirahi ema Jesús.

¹⁷ Natarihipuca ena téjecapavanahi te napanereruana, ánipuca nacahehi eta náechajiriruvahi: “Yátupipucáji eta vijacapacarehi me Viya táichavenechucha eta véhisiraya ema Cristo, vívetijinaserapuca tíapajucavainapapuca eta visipecuraravaya taicha vínjacainapa eta vanairipiana. Tacahe, émapapuca ema Cristo táemesiavaya eta vicapecaturaravaya” tacahenapapuca eta napanereruhi. Éna, tímá Pachichijiruvachucha te napaneruana. Ema Cristo váhiquene émaina tásiha eta pecatuana.

¹⁸⁻¹⁹ Eta néhisirainihi apaicape eta vanairipiana, tájinachucha vahi táimicatatanuhini eta nujacapacarevayarehi me Viya taicha váhiquene étaparacaina. Eta tacahe, nínajicahi eta néhisirainihi. Nímatiripasera eta nujacapacarevarehi me Viya táichavene eta nucasíñairahi eta mayehe. Puíticha tíuripa eta nítaresirahi me Viya. Tásiha, ichapenapahini eta néjecapiravaya nútí apana, te nuchavapuca néhica eta mavanairipiana ema Moiséini. ²⁰ Eta nusupirahi eta máepenirahi ema Cristo te crusu, nujacapacarehi me Viya. Puiti, vaipa nútijivaina necha eta nítaresirahi. Émapa téchanuhi ema Cristo tamutu eta nítaresirahi. Émapa nucasíñahi taicha yátupíhi eta macasíñacarevahi taicha yátupiquenehi Machichahi ema Viya. Eta máemunasiranuhi, tímijararecavahi níchavenehí nútí. ²¹ Vahi némpururecainahi nútí eta máemunasiranuhi ema Viya. Nararihísera ena tímijachavanahi tíjacapacareana mayehe táichavenechucha eta navarairahi náitaucha eta vanairipiana. Ena nani, tímicitijiricavahi náempururecavi eta mapanereru étapa eta máemunasiravacahi. Tímicitijiricavahi náempururecavare eta máepenirahi ema Jesucristo te crusu.

3

Tacarichuchucha eta vicasíñairahi ema Jesús, vijacapacarépa me Viya

¹ ¡Páurehechapucaini, eti nuparapenaveana gálatana! Ímjíjachaipapuca étupicavahi eta juca ecahehi. Ínjacavanepa eta éhisirainihi eta yátupiqueneanahi. Vímmímatichaheripahi eta iúricacarevahi tásihaquenehi eta máepenirahi ema Víáquenu Jesucristo te crusu. ¿Tájaha tacayema émpururecavi eta juca iúricacarevarehini? ² Esamanuchaha, puiti nuvaraha numetacahayare. Eta mávahásirahehi ema Espíritu Santo, éta tíchahi eta éhisirahi ema Jesucristo. Vahi étainahini taicha eta ítauraivainahipucaini eta vanairipiana. ³ ¡Tétavicavapa eta esunsuvavaca éti! Te épanavapa eta éhisirahi, tájinainiripahi íchiravainahini máicha ema Espíritu Santo. Éma tétumechahehi. Puítisera éti evarahapa ínjacaya eta mávahásirahénihí, ímjíjachaipapuca eta ticuchuchaheyare eta éjairavanahi. ⁴ Tamapurujinapapuca eta máimicatasirahehi ema Espíritu Santo. Németecasera nútí vuíchaha émpururecavaimahi. ⁵ Ema Viya tíjaracheripahi ema Espíritu Santo eta mávahásirahehi. Tímechahehivare eta tíáramicareana. Étaripa macatajísirahehi táichavenehi eta ecasíñavairahi tayehe eta máechajiriruvana. Étasera eta ítauraivainahipucaini eta vanairipiana, tájinainapa táimijaracahéhiní.

⁶ Énerichuvare macahehi ema víachucaini Abraham. Ticasíñavahi éma tayehe eta máechajiriruvana ema Viya. Tásiha, ema Viya, ichape eta majacapirahi éma. Máemítisicahi tamutu eta májecapiravanahi. ⁷ Puiti, yátupina ácaicutiara eta juca: Te yátupina vicasíñava me Viya, vijacapacareya mayehe, taicha vicitiyare ema víachucaini Abraham eta macasíñavairahi me Viya. ⁸ Ema Viya mametacahi ema Abraham eta najacapacarevahi mayehe, nácani ticasíñavanayare éma. Áni macahehi eta máichirahi: “Tétavicavayare eta náuricacarevayare ena achaneana te tamutu avasareana nácani ticutivianayare eta picasíñairanuhi nútí” máichapa ema Viya. ⁹ Tásiha, viti vicasíñanahi puiti, tétavicavayarehi eta víuricacarevayare, taicha vicitinapa ema Abraham eta macasíñairahi ema Viya.

¹⁰⁻¹² Natiarihiserá ena tímijachavanahi tijacapacareanayare me Viya táichavenehi eta navairairahi náitamuturuca eta vanairipiana. Téjcapavanapahisera. Taicha ani tacahe eta vanairipi: “Tamutu sácheana ítauchayare tamutu eta juca vanairipiana. Te éjequiha apaesachichaina, éta tímicuñacaheyare”. Váhiqenesera naratahahini náitaucha tamutu eta vanairipiana. Eta tacahe, náviraichu ticaicuñaya, vahi tijacapacareanaimahi. Ánivare tacahe eta vanairipi: “Te ítamuturuca eta vanairipiana, máichecuaraquireyare eta ítaresirayare táicha”. Tásiha, vímatiequeneha eta juca: Eta náitamuturusira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahe eta Sagrada Escritura: “Nácani ticasíñavanahi me Viya, tijacapacareanahi, máichecuaraquireyare eta náitarasiraya táicha”. Tásiha, nuvaraha ácaicutiara eta juca: Eta vijacapacarevahi tásihahi eta vicasíñavairahi me Viya. Eta vítauchirapuca eta vanairipiana, tájina étaparacainahíni tayehe eta vijacapacareva me Viya. ¹³ Ánivare tacahe eta Sagrada Escritura: “Mácani achane ichape eta maviureva, ticaetatacasiyarehi te yucuqui. Eta táicutiarahi eta máicuñasirayare ema Viya eta máchaneva”. Viti achaneana, ichape eta vícuñayarehini taicha eta vimaitauchirahi tamutu eta vanairipiana. Émasera ema Jesucristo, tépeninahavihi te crusu, tamuriasirahi tamutu eta vícuñayarehini víti. ¹⁴ Éma máichahi eta juca, mavairahi eta iúricacarevayare eti apavasanana táichavenehi eta ecutirahi ema Abraham eta macasiñairahi ema Viya. Puiti, tétaavicavahi eta víúricacareva vimutu, taicha tíavahácahavihi ema Espíritu Santo máijararuhavihi ema Viya táichavenehi eta vicasíñairahi ema Jesucristo.

Tájinachucha tájaracahavi eta véhisirahi eta mavanairipiana ema Moiséini. Macarichu ema Viya tjaracahaviya eta víúricacarevaya.

¹⁵ Nuparapenevane, nuvaraha nímicutiarachináheyare eta juca. Te matiarhipuca ema achane, te tépiyarecahi tratu mayehe ema apana achane, nafirrachayarehi eta natratunehi. Tásiha, nafirracharipa eta natratunehi, vaipa táuricaímahi nacaepaha eta tacajuquenehi. Nájinapavare tihapapicaímahi. ¹⁶ Ene macahehi ema Viya eta matratunehi mayehe ema Abraham. Ani macahehi: “Níjaracaviyare píti eta piúricacarevayare. Énerichuvare níjaracayare eta máuricacarevayare ema piámariéquenezare” macahepa ema Viya. Tacahe, émanarichuhi ema mámariequenehi ema táimijarechaquenehi eta matratune, vahi námutuhini ena nasimutuvaqueneanayarehi mámariequeneanayarehi ema Abraham. Émahi ema ticaijarehi Cristo. ¹⁷ Tiuri puiti, nuvaraha nímicacherachaya eta eyehe: Eta juca matratunehi ema Viya mayehe ema Abraham, mafirmachaquenehi eta máijarasirayare eta náuricacarevaya nácani ticasíñavana eta mayehe. Étasera eta táetavisiravahi eta 430 áñoripahi, te májuchapa ema Moiséini eta vanairipianahi, vahi macaepahahini ema Viya eta matratunehi, váhivare máitsivachahini eta máijarasirayarehi ema Jesús, mámariequénehi ema Abraham. ¹⁸ Ema Viya mamecachahi ema Abraham eta máijarasirayare eta máuricacarevayare, taicha eta máemunasirahi éma. Ene vicahehi víti. Ema Viya tjaracaviyare eta víúricacareva taicha témunacahavihi. Eta víúricacarevaya, vahi étainahini eta vítauchirainahipucaini eta vanairipiana. ¹⁹⁻²⁰ Etiarhipuca eti evaraha eyaserecanu, ánipapuca ecáheya: “Te yátupipuca vaipa étaparacaina eta vítauchiraina eta vanairipiana, ¿tájahasrapuca tacayemahi eta mavanasirahi ema Viya májucha ema Moiséini eta juca mavanairipiana?” Tiuri, puiti numetacáheya: Yátupi ema Viya máimivanerecáhi ema Moiséini májucha eta vanairipiana, taicha mavarahahi máimimatichayare ena achaneana eta tamaurivahi eta pecatuana. Téhesera te títecapa ema Cristo, vaipa táimiyavanahini tasuapacarehini eta mavanairipianahi ema Moiséini. Arairupa tamutu eta véhiruhi maicha ema Jesús. Yátupi ema Viya matupiruvahi eta máechajisirahi ema Abraham. Vahi máimivanerecáhi ema Viya, émajacarúvahi éma, eta máechajisirahi. Émasera ema Moiséini macaimitucasique-nechucha nayehe ena ángeleana.

Eta mavanairipiana ema Moiséini tivanecahavi vahi vicuquicha eta pecatuana taicha tíñehicarehi eta júcana mayehe ema Viya

²¹ Puiti németeaca etiarihichaha eti ímijachahipuca tacarichuhi téhicacarehi eta vanairipiana. Esamanuchaha. Váhiquene étaimahi vájacapacarehini eta me Viya. Váhivare étainayare ticaitarecaviyare. ²² Esama eta juca máechajiriruvahi ema Viya eta te Sagrada Escritura, ani tacahe: “Náicuchirichuhi eta náicuñayarehi namutu ena achaneana taicha eta napecaturanahi” tacahepa. Jararihiserá eta víuchucuirayare taicha tjaracavahi ema Viya ticuchuhahaviyare vimutu víti vicasíñanaya ema Machicha Jesucristo. ²³ Ánaquiapariipa eta tacaratasiravacáhi eta mavanairipiana ema Moiséini nayehe ena israelítana náchucanaveanaini núti. Vahi táisapahini tasimutuhichaini eta napecaturana. Tíamainucavapa te títecapa ema Jesucristo, émapa tímitucahavihi eta arairuyarehi eta véhiruyare. ²⁴ Táitaurevaquene eta mavanairipiana ema Moiséini eta típcararécahávihi tayehe eta

táñehicarevahi eta vicepecaturairana. Éta, tétupiricahavihi tacutihi mácani profesor eta máetupirisiravacahi eta napanereruana ena máimitureana. Ene tacahehi eta táchapajirisirahavihi eta mavanairipiana ema Moiséini. Púitiserá eta máitecapiraipahi ema Jesucristo, émapa véhicayare, vijacaparénapa me Viya taicha eta vicasañairahi ema Jesús. ²⁵ Púiticha, émainapa véhicayare éma, vaipa étaimahi véhica eta mavanairipiana ema Moiséini. ²⁶ Puiti, eta ecasiñairapa ema Jesucristo, machichaheripa ema Viya. ²⁷ Puiti, eta ecaicachasirahi te máijare ema Jesucristo, tiávahácaheripa éma, éti ecutinapa eta máurivahi. ²⁸ Tayanapane apavasasajuecuhehi éti; tayanapanehivare ecasiriquiquíjhi eti ajairana, ena esenana; tayanapanehivare músuanapuca, líbreanapuca. Téhesera te mamirahu ema Viya, étanarichuhi eta vímahi. ²⁹ Puiti machichaheripa ema Cristo; tásiha, ecutiripa mámariequenehéhanini ema Abraham. Ímaequeneharichucha eta matratunehi ema Viya eta máijarasiraheyare eta iúricacareyare táicha.

4

¹⁻² Esamanuchaha. Nuvaraha nímicutiarachináheyare. Te matiarhipuca ema achane camurihi eta máimahaqueneana te mapena, te matiarhipuca ema machicha, téhesera te amaperurichaha éma, natiarhiyarehi ena téchapajiricanayare, énapa ena túmitucanayareva. Vahi náisapaimahi mamápachichijicaimahi eta máimahaqueneanahi ema maiya, tayanapane émahinéni ticayeheyare tamutu. Tiámainucavasera te máimahaqa ema maiya eta máechemaravahi ema machicha, máisapainapa eta máemamaca eta máimahaqueneanahi. ³ Ene vicahehi víti cape juca viásinequene te vuichaha vímatihini ema Cristo, vicutiníhi ena amaperuana. Tipamicahavianahi véhica eta nayeherepiana ena viáchucanaveanaini. ⁴ Émasera ema Viya, te máimaha tiuri eta tátauchiravayarepa eta mapanereruhi, máevatacapa ema Machicha te juca apaquehe. Ema Jesús, tiáchanechavapa te sujuhe esu maena. Eta máuchusirahi, vivasimahi eta vicaqueherahi víti achaneana. Eta majurusirahi, ticaravahupa eta viyeherepiana víti israelítana. ⁵ Eta túmitecahi éma, mavarahahi ticuchucuhahaviyare víti achaneana. Mavarahavivare vimutu vijacaparereyarepa me Viya, machichahaviyarepa. ⁶ Puiti, eta machichairaheripa ema Viya, tíjaracaheripa ema Espíritu Santo tiávahácaheripa te esamureana. Émapa témechahéhi mayehe ema Viya, túmitucahepa eta eyujarauchiravaya: “Tátachicha Vicaiyaquene” ecahenapa. ⁷ Tacahehira eta machichairaheripa, vaipa ísapaimahi nácani napamicahéhi tayehe eta nayeherepiana. Tíjaracaheripa ema Cristo eta iúrivaya, iúchucuirayare máicha.

Emá Pablo, nahapasamurechahi ena machamuriana

⁸ Cape juca iásinequenehi éti, vuichaha ímatihini ema Viya, váhivare epicauchahini éma. Énachucha epicauchavacahi ena esiñarajiana. Tájina eratahaimahi émitisica eta eyujarauchirahi tayehe. Éna, vahi yátupinahini víyanainahini, váhivare távahácavacaimahi eta máchaneva ema Viya. ⁹ Púitiserá, ímatipa ema yátupiquenehi Viya. Tásiha, énerichuvare éma túmatihévacapa, esamacarepa mayehe, taicha machichaheripa. Tásiha puiti, ¿tájaha tacayema evarahavarepa echavayare eta ecasiñayare eta esiñarajiana? Eta ecasiñasanahi, tájina vahi tisamaheanaimahi, váhivare túmicatacaheanaimahi tayehe eta panererucana. ¿Tájaha tacayema ísapava napamicahé eta ítauchira eta nayeherepiana? ¹⁰ ¿Tájaha tacayema enasirichuhi epicaucha eta piéstamuhuana, étapa eta aracherumuhua caje? ¹¹ ¡Ichape eta néñamiravahi eyehe! ¡Tájuricati támápurujipahi eta juca nímitusirahehi!

¹² Esamanuchaha, nuparapenevaneana. Nuvaraha vácuticacahini eta vipanereruana. Váhini vicuehicaini eta nayeherepiana ena achaneana. Németeaca esuapanu taicha vahi eyacujiequenehanuhini. ¹³ Éti etupiruvahi ejacapanu cape te nítecainapa eta ara eyehe. Écharichuhi eta nucajumairapahi te nítecapauchaha. Etupiruvahisera esuapa eta numetarairuhi eta eyehe. ¹⁴ Vahi ecaecahinuhini eta nucajumairapahi. Váhivare épurunuhini. Tiúrihi eta ejacapiranuhi túmicutijiricavainehi ángelenuinahini, Crístonuinahipucaini. ¹⁵ Ichape eta iúrisamurevahi te jena sácheana eta návihairahi eyehe. Nímatihí tétavícavahí eta émunasiranuhí. Te nucamunuvahi, evarahahi íjaracanu eta ecayehequeneana. Tájina éñamahi. Ichape eta nucunachirahehi. Tacahe, máejeha néchajisisha eta émunasiranuhi.

¹⁶ Éti ímjachaipapuca nucatichirahehi eta numetasirahehi puiti eta juca yátupiqueneana. ¹⁷ Éna nani téchapajiricaheanahi, váhisera tátupiruvahini eta náemunasirahehi, navarairachucha típichasicaheanayare apaesa vahi ecusuapanu nútí, eta vaipa ecuehicahinuhí. Navarahavivare éhicayare eta nayeherepiana apaesa énapa échapajiricayarehi. ¹⁸ Tiuri, nútí vahi nucaticha eta ítatiraina ena apamuriana achaneana. Táurisera eta náemunasiráhena tácuti eta némunasirahehi nútí. Éti apanavare evapinavayare tácutirichu te nutiaríhíhi eyehe. ¹⁹ Nuchichanavechichana, tétavícavapa tacatíva nusama taicha eta

ímipanerereriranuhi. Ticutirinehi súcani esena ticatiruhapa, taicha ticatíhi susama eta amuya. Ene nucahehi núti eta nucatísamureravahi, néñamiravahi icha éti. Nuvaraha ácutini ema Cristo eta máurivahi. Tiámainucava te nímahahepa ecutinasipa éma eta máurivahi, núrísamurenapa icha. ²⁰ Eta tacahe, nuvarahanecha nájahúchavahini nítecapauchahe. Nútíjaccaravainapáini néchajiricavahini eta eyehe eta nímitusirahenahini. Ichapemurihi eta ímpanereresiranuhi.

Ema Pablo máimicuticha ena apinana machichana ema Abraham

²¹ Éti evarahapa éhica eta mayeherepianaini ema Moiséini, puiti nuvaraha níminecapaequenehaheya eta táechajiriruvahi eta Sagrada Escritura mayehe ema Abraham. ²² Táechajisihahi éma, apinanairahi ena machichanaveana ajairana. Ema máinapurehi machicha ticajirehi Ismael, esu maena ticajjaru Sara. Ema máequenereruhi machicha ticajirehi Isaac, esu maena ticajjaru Sara. Esu Sara, mayenaquenehi ema Abraham. Esu Agar, suvanarahi esu Sara. ²³ Esu Agar, araitanaichahahi ésu, te sucachichainapa ema Ismael. Ésusera esu Sara macheruhi eta suítaresirahi. Étasera eta máitupajjiasiravahi ema Viya, máijaracapa ema suchichahi Isaac. Taicha ema Viya máechajicahi ema Abraham, ánipa macahe: “Esu piyena Sara ticachichayare. Ajairayare ema suchicha”. ²⁴⁻²⁵ Puiti, nuvaraha nímicutiarachinaheya nayehe ena nani apinana esenana. Esu Sara, tájina suímatiyahini eta vanaracacare, nájina nahapapiricahini ésu. Ene vicahehi víti eta véhisirahi ema Cristo, nájina tihapapiricahavimahi. Vahi suácutihini esu Agar, tapamicahi eta suématanerepi taicha sirvientahi ésu. Ene nacahehi ena israelítana náchucanaveanaini núti, napamicasivahi naicha tayehe ena nayeherepianaini. Étarichuhi eta vanairipiana májuchaque-
neanahi ema Moiséini te mávihalpahi eta te anuquehe mari ticajirehi Sinaí, táupahiva eta provincia Arabia, návasahi ena suámariéqueneanaini esu Agar. Puiticha ena nujaneeana tachichanaveanahi eta Jerusalén nanasirichuhi eta tapamisiravacahi eta vanairipiana. ²⁶ Jararihiserá eta apanahivare avasare ticajjare Jerusalén, tiávihahe te anuma. Víti tachichanaveanahi. Vaipa vítiparacainahini tapamicahavihini eta vanairipianaini. ²⁷ Ema Viya máechajisihahi eta te Sagrada Escritura eta juca arairu Jerusalén. Máimicutichinahi esu éguna esena. Ánipa macahe: “Piti esena macheruvinihi eta pítaresirahi, tájina vahi pímatihini eta tacatíva eta amuya. Puitísera tétavicavainapa eta píúrsamurevaya. Vaipa pánasimahi macheruvimahi taicha nárájpainapa ena pichichanaveanaya nájjaruviyare núti. Picachuricainapa nácani esenana ticachicharahiana” —macahepa ema Viya.

²⁸ Nuparapeneana, víti véhicanahi ema Jesus, vítira tachichahavianahi eta arairu Jerusalén, taicha vítiparahichuhi eta tachichairahaviyare tacuti eta scutaparahirahi esu Sara mayehe ema Viya, eta sucachichairayare ema Isaac. ²⁹ Tacahe, ema Ismael, suchicha esu Agar, macatíanacapa ema amuya Isaac, ema suchicha esu Sara máijjaruhi ema Espíritu Santo. Puiticha, tanasirichuhi eta nacatíanasirahavíhi ena téhicanahi eta vanairipiana vimutu víti mávaháruanahi ema Espíritu Santo. ³⁰ Ánivarepa tacahe eta Sagrada Escritura: “Pivaneca esu Agar émapa ema suchicha, nayana náuchuca eta píyehé. Taicha vahi táuricahini mavehahini eta pímahaqueneana te táitecapapa eta pépeniraina. Macarichuyare ema pichicha suyehe esu piyenaquene tivehayare tamutu” tacahepa. ³¹ Nuparapeneana, ene vicahehi víti. Vahi vácutihini ema suchicha esu sirvienta. Vicutihí víti ema Isaac eta tamajinairahi eta vípamicasivainahini eta vítauchiraya eta vanairipiana, maicha ema Jesús.

5

Vímivanavachucha véhica ema Jesús. Vahi vicuehica eta mavanairipiana ema Moiséini.

¹ Puiti nuvaraha yátupina ácaicutiara eta macatiuchirahehi ema Cristo, eta vaipa étaparacainayare ítaucha eta vanairipiana. Váipavare ecuisapava te náviraichupuca napamicahé, taicha ticajjarayare eta ítauchiraina, machu ajirehéna táicha. Étipasera tacamunu étumechava te nayehe ena nani.

² Nuti Pablo nutupirupa numetacahe: Te ísapavapuca namarcachahe, tímicutijiricavahi tépurucarehi eyehe ema Cristo. Tímicutijiricahivare vahi márataha ticuchucuháhe éti.

³ Énerichuvare numetacahe: Namutu nácani ajairana tísapavanayare ticamarcana, tacamunuhí náitauchayare tamutu eta vanairipiana. Tájina ánichichaimahi nájejequihaimahi éta. ⁴ Eti enerejiruvana éhica eta vanairipiana, ímijachaipapuca ejacapacareipa mayehe ema Viya. Émepururecaripasera eta máemunasirahéhi ema Viya. Émepururecavare eta máimicatasirahéhi ema Cristo. ⁵ Vítísera víti vicasiñanahi ema Jesucristo vicunevaripa eta majacapirahaviya ema Viya máichavenehi ema Espíritu Santo eta mávahásirahavíhi. ⁶ Eta mávahásirahaví ema Jesucristo, vahi étaparacaimahi eta vicamarcapucaini. Tacarichu ticamunucarehi eta vicasiñarayare yátupina éma, vémunarahinapa eta vítaresiraya.

⁷ Éti, iúrinipahi eta éhisirahi ema Jesús. ¿Tájahasera puca tacayemahi eta evarairahi ecainajiruva? Ísapavayarepa tiyurucaheana, tímínajicaheanayarepainsi eta yátupiqueneanahi. ⁸ Éti máichuhaqueneanarichuhi ema Viya eta éhisiraya eta yátupiqueneanahi. Váhiquene mávarahahini ísapavahini nácani nahapapicahehine. ⁹ Échapavaicha nayehe ena tiyurarahiana, machu napareacahe. ¹⁰ Nútiserá nucasínavahi eta me Viáquenu eta mamaisapiraheyare ínajicava. Németeacahi vahi ínajicaímahi eta nímiturapianahi. Émasera ema Viya téchahi eta juca náicuñayare nácani tivarahanahi tihapapicaheana.

¹¹ Esamanurichuhi, eti nuparapenaveana. Natíarihíhipuca nácani tépiyaequenehanuanahi eta nupamisirahehi ecamarca eti nuchamurianahi apavasananahi. Étasera eta nímitusirahehi, tájina váhiquene nupamicahehine eta ecamarcairayare. Nasapihapa ena nujaneanana israelítana tipanajiricanuanahi taicha vahi nupamicahehine ecamarca. Étara tímíyusemacavacahi eta nasamirahi eta nucametairuirahi eta viúchucuiraya táichavenehi eta máepenirahi te crusu ema Jesús. ¹² Ena nani tipamicahenahi ecamarca, ¡néchaticavaichaha énajivaina! ¡Nuvarahasa yátupinapainsi náechatihicavaini!

¹³ Taicha eti nuparapenaveana, vahi étaina tímichuhahehi mayehe ema Viya eta éhicayare eta mavanairipiana ema Moiséini. Váhivaresera étijiricavaimahi íchayarehi eta evarahaqueneanahi tauriqueneana. Ema Viya tíchuhahéhi, mavarairahi étíjivaya ítátijiricacayarehi taicha eta émunasiracacainahi. ¹⁴ Ema ticavanairipi, ánipa macahe: “Pémunaca ema piparaepiya tacuti eta pémunasiravahi píti” macahepa. Te vítauchapuca yátupi eta juca mavanairipi, vahi tácajera eta vítauchiraina jácani apana vanairipi. ¹⁵ Vahi táurica ecaticahajiricahini. Váhivare táurica ecatianajiricahini, machu étíjivaina ecamítiequenehacaca.

Ema Espíritu Santo tímícatacahavi eta vahi vicusuapa eta tajamurachaqueneanahi eta víáquehe

¹⁶⁻¹⁷ Esamanuchaha. Ema Espíritu Santo mavaraha tímícatacahavi eta vahi vicusuapa eta tajamurachaqueneanahi eta víáqueheana. Étasera eta víáquehe vahi táisapa eta víchiraina eta táuriqueneana. Étachucha tavaraha vicha eta tajamurachaqueneanahi. Eta tacahe, ichapemurihi eta tacanairirahi ema Espíritu Santo. Tacahe, nécatíacahecha puiti eta esuapirainai cha eta mavarahaqueneanahi maicha ema Espíritu Santo eta eyehe. ¹⁸ Eta tacahe, éti, te émainapuca ema Espíritu Santo tímítucahe, máejeha eta íchiraina eta táuriqueneana. Vahi étaparacaimahi eta episira eta ícuñayarepuca, táichavenehi eta jácani éjecapiravanapuca tayehe eta vanairipiana.

¹⁹ Tímaticareanahi eta tauriquenehi eta náíchaqueneana ena tisuapanahi eta tavarahaquenehi eta náquehe: Navehapa esu apana esena, ésupa esu esena suvehapa ema apana achane. Ena amaperuana náichahi eta natuhusivanahi. Nararihi ena tivehacacana ena nacutiqueneana ajairana. Tavayuasiravacahi eta najamurarairvanahi. ²⁰ Natanucahi eta nasiñariyare. Nacaravahuhi eta íápemarecáre. Tícatianarecanahi tisemacacana. Téteajiricacana. Apaesarichu nacamunu tisemanaripavare. Énachucha navaraha títicavana, nacachuriaracapa mácani achane. Típutsimuríávanapa nayehe nácani apamuriana. Vaipa navaraha típauchacacana. ²¹ Tícapinarucacana. Tícapahianapa. Tícvaharasianavare. Píéstamareana. Tamutuchucha naicha eta tájiparacana. Puiti numetacahevere nápechava, tacutihi eta numetasirahehi cape juca víásínequenehi. Vahi tíujicavanaimahi tisiapana te mávasa ema Viya ena tíchanahi eta juca tauriqueneanahi.

²² Vítiserá, tíavahácahavihi ema Espíritu Santo. Te vísapa éma, tíjaracahavihi eta vémunaravaya. Víúrisamurerecavayare, tinaracainapa eta vípanereruana máicha. Tíjaracahavi eta vícayeheraya paciencia. Víjapanurahiya máicha. Vícajiravayareva máicha. Vítaurahiya. Vétaviuchaya eta víúrivayare. Tímicatacahaviya eta víjaneasiravaya apaesa vahi vícuquicha eta tauriqueneanahi. ²³ Te vítauchahi tamutu eta júcana, vícurisamurechahi ema Viya*. ²⁴ Tacahe, víti véhícanaripa ema Jesucristo, vaipa víchaimahi eta tauriqueneanahi tajamurachaqueneanahi eta víáquehe. ²⁵ Tásapíhapapuca, eta mávahásirahaviripa ema Espíritu Santo, vísapavaya vámutu eta mavarahaqueneana máichayare te víáquehe. ²⁶ Vaipa táuricahini ecasíñavavaicahini ecapinarujiricacahipucaini. Váhivare etanucaimahi eta semanere mayehe mácani echamuri.

6

Vímícatajiricacayare

* **5:23** Ema Pablo te mayeherepi eta máechajiriruvana, ani macahe: “Tájina jácani vanairipi tapamicahavíhine vahi vícha eta juca táuriqueneana”. Étasera eta macayemaquenehi, ani tacahe: “Vítacuparaha víchayarehi tamutu eta juca táuriqueneana”.

¹ Nuparapenaveana, te natiarihipuca ímaha téjcapavanahi ena vichamuriana, econsejachayare éti ímatiequeneharipa maicha ema Espírítu Santo. Táuriserá eta échajirisiraina. Ecauneuchava éti apanava, machu íáquipaicava tayehe eta máquipaisiavahi ema echamuri.

² Ímicatacaca eta ecatiuchiravaina eta jácani íchararacavanahi. Ene tacahehi eta itauchirahi eta mavanairipi ema Viáquenu Jesucristo, étaripa eta vémunasiracacayarehi. ³ Taicha nararihi ena ímijachavanahi vahi tiáquipaicavanaimahi tayehe eta pecatuana. Vahi eucache éti. Vahi tacaemuñavacarehini, taicha eta juca vahi tánecapácare. ⁴ Váhivare tácaemuñavacare vácahehipucaini: “Núti, váhirichu nusipecatura. Núripána nayehe ena apamurirana”. Te viúrihipuca, vimatinairayarechucha. Víti véchinavahi eta viúrivahi eta vítaresirahi. ⁵ Véchaquenevapáchupa víti eta vítaresiraya mayehe ema Viya.

⁶ Nutuparacahe eta apana. Ecajiyare eta ímahaqueneana mácani tímítucahe eta máechajiriruva ema Viya, taicha eyeheharehi eta máimiturapiana eta tíurichaheharehi.

⁷ Numetacahevare eta apana. Nuvaraha étupiricaya eta epanereruana. Machu ecatanaca ema Viya. Taicha te icha eta pecatuana, yátupiqueneyare eta ecamítiequenehavayare. ⁸ Te icha eta tájiparácana tavarahaqueneanahi eta íáqueheana, étarichuhi ticamítiequenehahehare eta ítaresirana, tímicuñacahehareva. Téhesera icha eta táuriqueneana mavarahaqueneanahi ema Espírítu Santo, yátupina táurina eta ítaresira. Ímahayareva eta iúchucuiraya, máichecuaráquirénapa eta iúricacarevaya. ⁹ Eta tacahe, vahi vicucainajiruva eta víchirahi eta táuriqueneana. Váhivare vicuyacujiequenehava eta vicuchapirahi eta vícuchihi mayehe ema Viya te táitecapapa eta jena sáchehare májjarasirahaviyare. ¹⁰ Táitusiava, te tatiarihinapuca eta vicamunucarevana nayehe ena achaneana, te vimahhipuca eta nacamunuiravahi, vítijivayare víchayare eta táuriqueneana nayehe. Tavetijipa te énahipuca tipauchahavianahi ena vichamurianahi tayehe eta juca véhiruhi, vicajiyarehi éna.

Eta táichecuaráqui eta máechajiriruva ema Pablo

¹¹ Ímaha ichapevacanecha eta juca nuletrana. Nuvahurupajipa núti eta juca nucajureirahehi éti. ¹² Ena nujaneanana israelitana, tétavicavahi eta nasemanevahi viyehe víti vicametarairuhi eta viúchucuiraya táichavenehi eta máepenirahi ema Cristo te crusu. Tásiha, ena nani ticamesajiricaheanahi navaraha ecamarcaya, éna navaraha témemunacavanayare nayehe ena nujaneanana, apaesa vaipa nacupanajiricavaca. Navaraha nahapapicayarehi eta nasemaneva. ¹³ Navarahahivare ticunachavanayare eta nacamesairahahi ecamarca te íáquehe, náimiturehéna éti eta éhisiraina eta vanairipiana. Énayapasica vahi náitauchahini támutuhini eta vanairipiana. ¹⁴ Nútisera, eta nítaresirahi, nuvavinavahi ichape maicha ema Jesucristo, máepeninanuhi te crusu níchavenehi núti. Tacahe, núti apana nínajicaripa eta néhisirainahini eta tayaherepiana eta apaquehe. Vaipa nútiparacaina tayehe, taicha eta máepenirahi níchavenehi núti.

¹⁵ Eta mávahásirahavíhi ema Jesucristo, tamuturipa arairuhi eta vítaresira. Apanapa eta viyeherepiyare. Vaipa étaparacaimahi eta viyeherepiana ichasiqueneanahi, váhivare eta vicamarcapucaini te viáquehe. ¹⁶ Éti, te esuapa eta juca nímiturapianahi eyehe, nuvaraha májapanuhehini ema Viya, májjaracahehini táurivaina eta epanereruana taicha eti yátupiquenehi machanerahehi ema Viya.

¹⁷ Tiuri puiti, németeaca núti tájina táéñamavacarehini eta esuapajiraivahi eta nuyehe, váhivare ísapavahini ena nácani ticamesajiricaheanahipuca éhica eta nayeherepiana. Núti, yátupiquenenuhi apóstolenuhi mayehe ema Viáquenu Jesús. Eta juca nujaranahi te náquehe, éta tímereuchanuhi eta yátupiquenérahí eta nucaemataneasirahi éna.

¹⁸ Nuparapenaveana, nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo nayehe ena machamuriana ticavasanahi te avasare Efeso, ticajare EFESIOS

¹ Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaquene, navarairahi nimitucaya ena achaneana eta máechajiriruvana. Tásiha puiti, nucajurehe eta juca carta eyehe eti nuchamuriana ecavasanahi tayehe eta avasare Efeso, taicha éti machaneraheripa ema Viya, táuriquenehi eta éhisirahi ema Jesucristo. ² Nuvaraha macatajicahehine ichape ema Tata Vicaiyaquene, émapa ema Viáquenu Jesucristo. Náijaracahehine eta táurivaina eta epanereruana.

Tétavicavahi eta viúricacarevana táichavenehi eta viúrujasirahi ema Jesucristo

³ Núi nucunachaparaca ema Viya, ema Macaiyaquene ema Viáquenu Jesucristo taicha ichape eta máimicatasirahavihi táichavenehi eta viúrujasirahi ema Cristo. Puiti tachichahaviripa eta anuma. Ichape eta viúricacarevahi maicha ema Espíritu Santo. ⁴⁻⁵ Acane, te tamirahu eta táepaniravapa eta apaquehe, ema Viya tétavicavahi eta máemunisirahi namutu ena achaneana natiarihiqueneanayarehi. Tásiha, émajivapa manacahi eta mapanereruhi eta mavarahaquenehi, étarichuhi eta majacapirayarehi namutu ena ticasíñavanayarehe mayehe ema Machicha Jesucristo. Eta viúrujasirayare ema Jesucristo, yátupiquene-yarehi machichahavi, matapiravarehaviyarehi te mamirahu, sántohaviyarevare. ⁶ Taicha mavarahahi vijirauchayare éma, vítsirijicavayarehi eta táetaviuchirava eta máemunisirahavihi. Mavarahahivare ichape eta viúricacarevana táichavenehi eta viúrujasiraya ema máemunirahene Machicha. ⁷⁻⁹ Tásiha ema Viya, tíurihi eta máimaira, máimerecahi eta máemunisirahavihi ichape. Tíjaracahavihi ema Machicha tépeninahaviyarehi eta macaepahairayare eta vipecaturana, viúchucuhayarehi máicha. Énerichuvare tíjaracahavivare eta véchemaraivaya vímatiequenehairaya ichape, taicha tímítucuhavihi eta mapanereruana. Váhisera máimerecavanehine eta juca mapanereruana acane; tapaemunava te tíucupaicapa ema Machicha. Tivapinavahi éma eta máitauahiraya eta mapanereruana ema Maiya. ¹⁰ Tamutu eta juca mapanereruana títauchavayarepahi, jácane tatuparapahahi. Te jena sáchehare manerejicaripa, ema Viya manacainapa ema Machicha Jesucristo aguenucaquene-yarehi, téchayarehi tamutu eta táicharacavana. Nasuapayarehiva namutu ena tíavihanahi te anuma, énapa ena tíavihanahi te juca apaquehe.

¹¹ Eta acane te tépanavainapa, ema Viya máetupiricapa eta mapanereruhi. Vahi máejequihahine. Tásiha, manacapa eta mavarahaquenehi. Acane tinerejicahavihi machichahaviyarehi vimutu viti viúrujiacanayarehi ema Jesucristo, mavarairahi tíjaracahavi eta vícuchianahi. ¹² Viti vínapuicanahi véhica ema Cristo, mavarahahi tíuriyare eta vítaresiraya, apaesa nacunachayare ema Viya ena apamuriana achaneana eta máimicatasirahavi ichape. ¹³ Tacutiquene éti, te tínapucainapa esama eta máechajiriruva ema Viya eta mavarairahi ticuchucahe, enévanehi éhichi ema Cristo. Tásiha, eta iúrujasiraipa éma, tíavahácheripavare ema Espíritu Santo. Émapa títametacahe eta machichairahapa ema Viya. Ema Espíritu Santo, ema vítuparahahi vimutu viti vicasíñanahi ema Cristo. ¹⁴ Eta mávahásirahavihi éma, títametacahaviparaca eta vijacapiraya eta vícuchianahi mayehe ema Viya te táitecapapa eta viúchucuiraya viti machichanaveanahi. Tásiha, tétavicavainapa eta vícunachirayare ema Viya taicha ichapequene eta máimicatasirahavihi.

Te tíyujaraca ema Pablo, mayaseaca ema Viya eta náitupajijiasiravaina ena téhicanahi ema Jesús

¹⁵⁻¹⁶ Eta tacahe, núti néchahehi éti tamutu te nujujarasirana, taicha nusamairiricapa eta yátupirahi éhica ema Viáquenu Jesucristo étape eta émunajirisiracacahi emutu eti machanerana ema Viya. Nuhasulupayachahi ema Viya eyehe. ¹⁷ Éma, macaiyaquenehi ema Viáquenu Jesucristo. Máetaviurehi eta majaraiva te mávihahi te anuma. Nuyaseacahi máijaracahehine eta échemaraivainahine maicha ema Espíritu Santo, apaesa ímatiequenehine yátupina eta emetacavayanaya eta mapanereruana ema Viya. Nuvaraha ímatipaichaini éma. ¹⁸ Nuyaseacahivare éma yátupina eta ecaicutiaraya, eti máichuqueneanahi éma, eta táetaviuchirayarehi eta viúricacarevare te jena sáchehare vícuchaquenehi. Nuyaseacahivare ecaicutiaraya eta táetaviuchirayarehi eta táuricacarevare eta víavíhaya te anuma, vícuchihi viti machanerana ema Viya. ¹⁹ Nuvaraha ecaicutiaravare eta táetaviuchirahi eta máitupajijiasiravahi ema Viya, váhiquene tivitaimahi. Éma, macaemataneacahi eta vítaresira, mavarairahi víuripanayare viti vicasíñavanahi mayehe. ²⁰ Ema Viya máimerecahi eta máitupajijiasirava ichape te macaechepucapa ema Cristo te

máecari, macaejacapa éma te mavaure tayehe eta anuma mávihahi puiti. ²¹ Ema Cristo, émaripa íchapequenehi aquenuca nayehe ena ángeleana. Tétavicavahi eta masuapacarevahi nayehe. Énerichuvare ena éreanana, mapamicavaca eta nasuapiraina. Éma, tétavicava eta macapichuirahi. Nájina nácutihini éma. Nájnavare ticachuricaímahi. Apajarahiyarehi eta aquenucaira éma. ²² Ema Viya macaejacahi éma téchahi tamutu eta tatiarhiqueneana. Émaripa vicaiyaquenehi vimutu viti machanerana. ²³ Víti, eta viúrujasirahi éma, tímicutijiricavaipahi máquehehavihi te juca apaquehe. Vicaemataneacahi eta táuriqueneana tímicutijiricavahi émainahini macaematanehini, taicha tamutu eta víchaqueneanahi, éma téchahavihi, tétumechahavíhivare.

2

Eta máemunasirahavi, éma Viya ticuchucuhavíhivi tayehe eta vícuñayahéini

¹ Ema Viya tíjaracaheripa arairupa eta ítaresira. Tichavapa títareca eta iáchanevana, tacuti eta machavirahi títareca éma Cristo te máecari. Taicha éti, cape juca ítaresirahi, tímicutijiricavaichaha épenaquenénahini táichavenehi eta evainarajivanaini étapa eta epecaturanaini. ² Cape juca ítaresirahi éti, éhichíhvare eta tayeherépiana eta apaquehe, tamauriqueneanahi. Esuapahivare eta mavarahaqueneana éma Váinaraji, éma mapamicavacahi ena achaneana masuapajirairahanahi me Viya. ³ Vimutu viti, tacahenihí eta vítaresirahi eta acane. Étachucha véhicahi eta tavarahaqueneana eta víaquehe. Vítijiricavaripahi víchahi eta tajamurachaqueneana eta víaquehe, étapa eta vipanereruana tamauriqueneanahi. Ichapemuríhi eta vímíyusemasirahi éma Viya, vicutíhi éna apamuriana masuapajirairahanahi mayehe. ⁴⁻⁵ Tímicutijiricavaichaha vépenaquenénahini táichavenehi eta vipecaturanainihí. Tétavicavasea eta majapanuirahavíhi éma Viya. Ichapevare eta máemunasirahavíhi. Tíjaracahaviripa arairupa eta vítaresira táichavenehi eta viúrujasirahi éma Cristo. (Táichavenehi eta majapanuiráhehi, ticuchucuhaheyarehi.) ⁶ Puiti, eta víavahásirahi éma Cristo, yátupíhi eta véchepusiraya, vícaicuchipa eta macaejasirahavinapa tayehe eta víavacureyare te anuma, vícachaneya éma Cristo. ⁷ Eta juca émavenehi éma Viya, mavarahahi máimereca maverahi eta víuricarevana májjararuhavíyare eta víyehe te jena sácheyare, taicha tétavicavahi eta máemunasirahavíhi táichavenehi eta viúrujasirahi éma Jesucristo. ⁸⁻⁹ Taicha eta víuchucuirayare eta víápechiravaya vítareca, étavenehi eta majapanuirahavíhi éma Viya. Víjacapacareripa eta mayehe, táichavenehi eta vícasiñairahi éma Jesús. Vahi étaparacaina tacuchucuhavíhíni eta víchaqueneanahi, taicha vahí vítíjivainahíni váratahahíni víjacapacarehíni. Tacahehi éta, apaesa nacuíja nacucasíñavavaica eta nacuchucuiravapuca. ¹⁰ Arairuinapa eta vítaresira maicha éma Viya. Émarichuvare ticajuruchaví eta véhisirahi éma Jesucristo, mavarairahi víchayare eta táuriqueneana. Eta víchirahi, vítauchahi eta mapanereruana acane.

Eta véhisira éma Jesucristo, étamuríhavinapa. Vaípa víputsimuríavavacáimahi.

¹¹ Németeaca échavahí éti eta nacatíasiráhehi éna nujanéana táichavenehi vahí éhícahíni eta nayeherepiana. ¹² Éti, cape juca, tájina ímatíyahíni eta máimíturapíanahí éma Jesucristo. Vuíchahavare ímatíhíni eta iúricacarevayarehí táichavenehi eta matrátune éma Viya víyehe viti ísraelítana, taicha tícaerajícaheanahí te vímuri. Vuíchahavare ímatíhíni eta ícuchianayare májjararuheanaya éma Viya. Eta tacahehi, éti ímíjachaípa vahí éjacapacare eta mayehe. Vuíchahavare ácasíñavahíni eta mayehe. ¹³ Puitípasera eta éhisirahi éma Jesucristo, iúrujicáripahí éma. Tásiha, émeñahaváipahí mayehe éma Viya, taicha ecasíñavahí eta máepeninahíni éma Jesucristo. ¹⁴ Énerichuvare, étavenehi eta viúrujasirahi éma, tíhétamuríchahavíripahí vimutu: éti apavasanana, vítipa viti ísraelítana. Vaípa víputsimuríavavacáhíni. Tímicutijiricavaípahí étanahíni eta víchúsusine. Macaepaharípahí eta vícatíjanajírísiracacáihíni. ¹⁵⁻¹⁶ Eta májjararesirahí eta máquehe te crusu éma Jesucristo, macaepaharípavare eta tapamísirahavíni véhíca eta vanarípiana étapa eta nayeherepiana típícauchacareana. Puiti, vaípa étaparacainahíni eta víuchucuiraya. Énerichuvare macaepaharípa tamutu eta vícatíjanajírísiracacáihíni táichavenehi eta apavasanahavírahí. Puiti vimutu viti véhícanahí éma Jesucristo, étamuríhavíripahí máícha. Tájina víchiraváimahi. Táitusíava tíúrichahavíripa vimutu mayehe éma Viya.

¹⁷ Eta tímítecahí éma Jesucristo, tímítapanahavíhi eta táurinaquene echajírírucava eta najacapacarevaya namutu éna achaneana. Éma, tíúrichahavíyarehí mayehe éma Viya vimutu: viti vínapucanahí vímáti eta máechajírírúvana, étípa eti epaenumavahí ímáti eta máechajírírúvana. ¹⁸ Puiti, eta víúrujasirahi éma Jesucristo, tíavahácahavíhi éma Espírítu Santo. Tásiha, máíchavenehí éma Espírítu Santo, vimutu vícutícaípahí eta vípauchíraípa éma Tata Vícaíyaquene. ¹⁹ Eta tacahe, tájínapa táéñamacarehíni eta éjacapacareva eta víyehe viti machanerana éma Viya. Esiapamuríhahavíripahí viti. Tachíchaherípa eta

mávasa anuma. ²⁰⁻²² Eta esiapamurihavirahi te vimuri, nímicuticharipa te náepiyaca eta ichape peti. Ema Jesucristo, tétavicavahi eta máetumechirahavihi vimutu viti véhicanahi éma. Macuti eta tatumearaya eta yúchamana, eta manasirahi eta máimiturapiana. Tásiha, visiapa viti apóstoleana énapa ena profetana. Tacahe éti, eta esuapirahi eta vímiturapiana, esiaparipahivare. Ecuti eta labriyuana étapa eta yucuquiána. Ema Espíritu Santo, tétavicavahi eta máitupajjiasiravahi tihétamurichahavihi. Vituparahapachuhi eta manasirahavihi. Máepiyacavacapaipa. Te máitauchapa tamutu, tétavicavainapa táurínávaya eta ichapequenehi templo, mapenayare ema Viáquenu, sántoquenehi.

3

Ema Pablo, éma ticatuparahahi ticametairuyare nayehe ena apavasanana

¹⁻² Németeaca nuti ímatiequeneharipa eta máetaviuchirahi eta máemunasirahehi ema Viya. Éma, tivanecanuhi níchuhahéya eti apavasanana, mavairahi éhicayare ema Machicha Jesucristo. Eta juca nucametairuirahi eta eyehe, étara tivichuanuhi puiti juca nucaeratairahi. Nútisera nuyaseuchaeparaca éti te nuyujarasirana. ³⁻⁴ Taicha ema Viya timetacanu-ripahi te nuvapure eta mapanereruhi tapaemunava téchacarehi. Puiti te juca nucartane, eta échajicuirá eta nájurehi, németeaca ímatiequenehayare tamuturipa nímatiequenehahi eta mapanereruhi ema Viya tayehe eta macuchusirahavihi ema Jesucristo. ⁵ Eta juca mapanereruhi ema Viya, nájina náimatiequenehahini cape juca tásinequenehi. Púitísera, ema Espíritu Santo tumechahaviripa viti mayeheana santo apóstoleana énapa ena profetana. ⁶ Ani tacahehi eta juca tayumurevanainihi: Eti apavasanana, éti apanavare ejacapacarehivare mayehe ema Viya maicha ema Jesucristo. Íuchuchuyare táichavenehi eta éhisirayare eta vimetarairuana. Esiapamurihaviyare viti machanerana ema Viya. Étamurihaviripa. Viciticacainapa eta vícuchihi viti israelítana.

⁷ ¡Tétavicavahi eta majapanuiranuhi ema Viya! Nútisamipa máichuhaquenehi eta nucametairuyarehi eyehe. Tásiha éma, tétavicavahivare eta máetumechiranuhi te tamutu eta nucametarairuirahi. ⁸ Vahi németeacavahini nútinasamihini manerejica, taicha nararihihi ena títupajjijapanavanahi eta nuyehe. Tijapanunuhisera ema Viya. Nútisamipa manerejiruhi, mavairahi numetapanáhe eta máichuirahéhi éti apana eti apavasanana, eta ejacapiraya eta táuricacarequene vícuchi maicha ema Cristo. Tétavicavaya eta víuricacárevayare. ⁹ Tacahehi eta mapanereruhi ema Viya eta veyehe acane te tépanavainapa máepiyacaya tamutu. Váhisera táijahúchavahini mametacahavihini. Tapaenumava timetacanuhi nútí, matuparasiranuhi eta numetasiraheyare tamutu. ¹⁰⁻¹¹ Taicha mavarahahi natarihiyare camurianayare ena tisuapanayare yátupi. Eta táurivayare eta náehisira, túmereuchayarehi eta máetaviuchirahi eta máitupajjiasiravahi ema Viya. Náraminehi ena aqenucanahi tíavihanahi te anuma eta náimairahi eta juca. Eta tacahehi eta mámirapahi ema Viáquenu Jesucristo tamutu eta mapanereruana eta acane ema Maiya. ¹² Tásiha puiti, tájina táéñamavacaréimahi eta vipauchira ema Viya. Vicasíñavahi eta mayehe, taicha ema Jesucristo émahí ema vicasíñasarequenehi. ¹³ Eta tacahe, nutuparacaheho: Vahi ecuinajicava eta juca éhiruhi, váhivare ecupica eta esamairirisirahi eta nucaeratairahi táichavenehi eta nucametairuirahi eyehe. Evapinavasera eta nucamichirahi eta nátajivana, taicha nuvarahahi nímereca eta táetaviuchirahi eta némunasirahehi.

Ema Pablo mayujaraucha ena machamuriana

¹⁴ Eta némechirana eta táetaviuchirahi eta máitupajjiasiravahi ema Viya eta juca mapaneruanahi, nútí népuyumiraucha ema Macaiyaquene ema Viáquenu Jesucristo, nucunachirahi éma. ¹⁵ Éma, Táiyaquenehi tamutu te anuma. Émarichuvare téchahi tamutu te juca apaquene. ¹⁶ Nuyaseaca éma májaracaheni éti, ichapenahini eta ítupajjiasirava étapa eta étumevainahini te iáchanavana, maicha ema Espíritu Santo. Taicha ema Viya, tétavicava eta máitupajjiasirava, váhivare mayavanaimahi. ¹⁷ Nuyaseacavare yátupina eta ecasiñairaya ema Cristo, yátupinavare eta éhisirana eta máimiturapiana. Túmeheyare eta émunarivahi. Tájina tihapapicahéimahi eta éhisirahi. ¹⁸⁻¹⁹ Nuyaseacavare ácutihini ena apamuriana echamuriana te tamutu avasareana, te yátupina ecaicutiara eta táichapevahi eta máemunasirahavi ema Cristo. Tájina titaina éta. Tayanapane vahi vícúcaicutiaraquenéna. Nuyaseacahivare yátupina émainahini ecasamure ema Viya.

²⁰ Tétavicavahi eta nucunachirahi ema Viya, taicha máituruequenehahi tjaracahavi tamutu, máemetavichahi eta viyasearuanahi, étapa eta vipanerechirana. Tétavicava eta máitupajjiasirava ema Espíritu Santo eta máetupirisirahi eta visamureana. ²¹ ¡Vicunachaparacahini ema Viya vámutu viti véhicanahi ema Jesucristo! ¡Máichecuaraqúirénapa eta vicunachira! ¡Amén!

4

Viúrujiacacahi maicha ema Espíritu Santo

¹ Yátupi nūti tipresuhanuhi pūiti táichavenehi eta néhisirahi ema Viáquenu. Eta tache, nutuparacahēya: Tacuija íchiravaina eta itaresira te mamirahu ema Viya; taicha éti máichuhaquenéherichuhi éma, mavarairahi machaneraheyare. ² Yátupina eta emansuvaina, étapa eta iúrivaina. Ecayehe paciencia. Ecamichayare jácāni te ticaviurevanapuca nācāni echamuriana, táichavenénahi eta émunasiracacainahi. ³⁻⁴ Émanarichuvare ema tiávahācahe, émaripa ema Espíritu Santo. Ísapava eta macurujisirahēhi. Tacuija íchiravaina eta iúrujisiravahi. Étanainarichuhi eta epanereruana. Taicha ema Viya tíchuhahehi. Pūiti ecuchapahi eta iápechiravayare itareca. ⁵ Émanarichuhi ema Viáquenu. Tacarichuhi véhica eta máimiturapiana. Étanarichuhivare eta vicaicachasira eta viúrujasira éma. ⁶ Émanarichuhivare ema Viya, Vicaiyaquenehi vimutu. Éma téchahavihi vimutu. Ticaemataneacahavihi vimutu. Émavare tijaneacahavihi vimutu.

Vítuqaquenepachuhi maicha ema Espíritu Santo

⁷ Énerichuvare ema Cristo, éma tíjaracahavihi eta vítuqaquenyarepachu, jácāni mavarahaquenehi. ⁸ Taicha eta Sagrada Escritura, ani tacahehi: “Te tiárapa éma te anuma, mámamurihapaipa ena macuchureanahi. Májjaracasichavacapa eta náitupujijiasiravaya ena machanerana” tacahepa. ⁹ Epanerechaya pūiti eta tacayemaquenehi eta márairahi. Eta juca tavaraha vicaicutiara eta máucupaisirahi tativa te juca apaquehe. ¹⁰ Te títauchavapa eta tímiucupaicahi, tírapa tichavapa te mávasa anuma. Tichavavarepa eta émairyare técha tamutu. ¹¹ Tásiha, ema Viáquenu tituparacahavi víti, tíjaracahavivare eta vítuqaqueneanayarepachu. Taicha tinacahavipa eta viávacurepachuya apóstolehaviya víti manerejiruqueneanahi. Ena apamuriana, manacahivare profetanahi náimatiequenehayarehi eta mapaneruanahi ema Viya apaesa náitametacavaca ena vichamuriana. Ena apamuriana, manacavare ticametarairurahanayare, náichuhayare ena achaneana náehica ema Viáquenu. Ena apamuriana, manacavacavare pastóreanayarehi, najaneacavacayare ena vichamuriana. Énapa ena apamuriana, manacavacavare máestroana, náimitucavacayare eta máimiturapiana ema Viáquenu. ¹² Taicha éma, mavarahahi máetupiricayarehi tamutu te etaracu eti machanerana; mavarahavivare vitiarihiyare víti vítátijiricaheyare eti vichamuriana, vicajurusirahēyarehi eta éhisirahi éma. ¹³ Apaesa yátupina vácuti vámutu eta máurivahi ema Machícha ema Viya; táitecapavanevaréni eta sache eta viúrujisiravaya, tájinapa tahapapichavimahi eta véhisirahi; vítamuturucaripahini tamutu eta vítuqaqueneanahi tásihaqueneanahi me Cristo. Vácutipaini éma tamutu eta máitupajijiasiravahi. ¹⁴ Mavarahavivare vimutuyare vímatiequeneha. Vaipa vácutimahi ena amuyana, témunanasiricavanarichaha éna. Tísapajiricavanarichaha navayuaca tayehe eta apana náimiturapiana ena títurequenehana tivayuarecana, napamisiravacahi namutu náehica eta tamauriqueneana. ¹⁵ Eta tacahe, vétumechavayare eta véhisirahi eta máimiturapiana yátupiqueneana, yátupinavare eta vémunarivahi, vicajurucayahivare eta viúruva, vicutiyare ema Viáquenu Jesucristo, taicha émahī ema téchahavihi. ¹⁶ Nímicutichahehi eta viáquehe. Camuríhi eta táunavahi eta viáquehe; étanaichuhisera. Camuríhivare eta táitupajijiasiravanahi; tamutuhisera ticaematanehi, víchirahi eta vivarahaquenehi. Tájina vahi táejiacavahini. Tamutu tijaneacacahi. Ene vicahehi víti machaneranehi ema Jesucristo. Éma, tétumechahavihi vimutu víti. Eta viúrujasirahi mayehe éma, étamuríhavihi. Vimutu vítuqaquenepachuhi máicha. Vématanerepachuhi máicha. Vijaneacacahivare. Vicajurucapaipahi táichavenehi eta vémunasiracacahi.

Apanainapa eta vítaresira taicha eta viávahásirahi ema Cristo

¹⁷ Eta juca numetarapiana eyehe, nutuparacahéicha taicha matupararunuhi ema Viáquenu. Nucavanairipipa pūiti: Vaipa ecuapecha ecuquicha eta náichaqueneanahi ena máimatirahanahi ema Viya, náichahi éna eta náitaresirahi jácāni tavarahaqueneanahi eta napanereruana súnstrupiana. ¹⁸ Tamutu eta napanereruana tétavicavahi eta tamapicuvahi. Vahi apaesainahini tavehahini eta tijarahi. Máecharaireanahi éna, táichavenehi eta tamuracavahi eta nasamureana. Váhiquene navarahaimahi napauca ema Viya apaesa macanaracavacahini éna. ¹⁹ Tájinapa apaesainahini náimatihini eta titsirihacare. Tíjaracavanapa tayehe tamutu eta najamuraraivana. Tétavicavahi eta navapinairahi náichahi eta tamauriqueneana tájiparacana. ²⁰ Étisera vahi tacucahe eta itaresiraya pūiti eta éhisirahi ema Cristo. ²¹ Taicha németeaca yátupíhi esamararacahi eta vímitusirahēhi. Ímatiripahi eta táuriqueneanahi yátupiqueneanahi tásihaqueneanahi mayehe ema Jesucristo. ²² Tásiha pūiti, vaipa euesacha echavaucha eta itaresirainihi acane echipejiricavahi taicha tivayuacahe eta ejamurachirahi eta tamauriqueneana. ²³ Pūiti éti, ísapaya ema

Espíritu Santo mávahácahe, máitsiva chirayare eta epanereruana étapa eta ejamurachirana te iáchanevana. ²⁴ Tásiha, apanainapa eta itaresiraya. Yátupi eta ecaquehéraína ema Viya, ácutini éma eta máurivahi étapa eta masantuvahi.

Étipiricayare tamutu eta itaresirana

²⁵ Tásiha puiti, vaipa épiyahirahimahi. Étipiruvayare tamutu eta échajirisiravaya nayehe ena echamuriana eparaepiyana, taicha étanarichuhi eta echamuriracacairahi, émanarichuhivare ema Viúrujiruhi, ema Jesús.

²⁶ Te tatiarhipuca eta táimiyusemacahe, ejaneacavaicha machu ecapecatura. Te esemapuca, vahi tacunasi eyehe. Énevanéna eperdonachacaca. ²⁷ Ecaunevayare, machu máiturucahe ema Váinaraji, táichavenénahi eta esemanevahi.

²⁸ Mácani tiámerahinihi, vaipa macuapechava macuamereca. Mácaematane apaesa macunachacare, apaesavare eta jácani máematanevachayare eta maviyihayare eta macajiyare ena ticamunuvanahi.

²⁹ Váhivare ecunacajacachava eta tájiparácana échajirirucavana tamauriqueneana. Tátupiruva eta échajirisiraváina apaesa étaina eyuchusiha eta nasuapiraina nácani tisamaheanayare, éta tétupirisamurechavacayare éna. ³⁰ Vahi ecuisapava ícha jácani tamauriqueneana, machu ímpanerereca ema Espíritu Santo, émaripa ema sántoquenehi, tiávahácaheripa éma. Eta mávahásirahehi tímicutijiricavaipahi eta ecamarcati, taicha ímaticaréipahi eta machanerahéirahi ema Viya; puiticha, étapa eta te titecapapa eta jena sácheyare víuchucuirayare.

³¹ Váipavare ecunaca eta semanereana. Váipavare ecatianarahimahi. Váipavare ecusemarairihi, váhivare ecuijajachava ecapiaracava. Vahi ecuichanareca. Ínjajaya éti tamutu eta júcana tamauriqueneana. ³² Táitsiva étaviuchayare eta iúrivayare nayehe nácani apamuriana, ejaminurahiyare. Te tatiarhipuca eta nájecapirava, eperdonachacacayare taicha ene macahehi ema Viya eta maperdonachirahehi máichavenehi ema Cristo.

5

Tiúriyarehi eta náitaresirayare ena machichanaveanahi ema Viya

¹ Puiti éti machichaheripahi ema Viya, máemunaruqueneheripa, tásiha ácutipa éma eta máurivahi. ² Émunajiricacayare eta itaresiraya. Ecutiyare ema Cristo eta máemunasirahivahi. Éma, macurisamurecharipa ema Maiya eta máimijaresiravahi víchavenehi víti, macutihi eta sárarechicha uvesa nacaparuhi eta námavahuhi me Viya.

³ Eta machaneraheraripa ema Viya, vaipa táuricahini íchahini eta túhusicare. Tíñehi te mamirahu ema Viya. Váhivare ecupanerecha ícha jácani tiámanahi eta tamauriqueneana. Váhivare tacuvayucahe eta tájiparácana. ⁴ Vahi ecunacajacachava eta échajirirucavana titsirihacarepiana, súnsurupiana, tájiparácaqueneana, taicha tájina tacunachacarévaina éta. Tamutusera eta échajisiranaya, amairipiquenéna eta ehasulupayachiraya ema Viya. Jéhevare, éta iúrihaquenehi. ⁵ Németeaca ímatiequeneharipa éti eta vahi tíuchuchuanaimahi nácani ticaeahicacanayare, ema achane te mavehapuca esu esena apayena, esu esena te suvehapuca ema achane apaima; nácanivare ena amaperuana tivehajiricacanahi; mácanivare achane mavehapuca ema maparajairava; nácanivare tijamurachana tamutu jácani náimahaqueneanahi. (Ena tavayucavacahi eta najamurachirana, énarichuhi ticasiñarajiana.) Namutu ena nani tímereuchavanahi vahi machaneranainahini ema Cristo. Vahi tisiapanaimahi te mávasa ema Viya. ⁶ Tásiha éti, vahi ecuisapava nácani navaraha navayucahe te náechajiriruva súnsurupiana, napamisiraheya ícha eta júcana tamauriqueneana, taicha eta júcana, éta tíviuchavacayare nácani masuapajirairahanahi me Viya, muracayare eta náicufñayare. ⁷ Tásiha, ejaneacava, machu ácuti ena nani tíchanahi eta júcana tamauriqueneana.

⁸⁻⁹ Échavaripa tacáhénihi eta itaresirahi acane étarichu íamapiricainihi iávacuhahi te timapicu. Puitisera eta iúrujasiraipa ema Viáquenu, tijarahiripa eta itaresirahi. Tásiha, ímerecayare eta emicahachirayare ena apamuriana achaneana, ímeresirayare eta iúriha, étapa eta tipachinaqueneana eta itaresira, étapa eta yátupirahi eta éhisirahi ema Viya. ¹⁰ Tamutu sácheana ecaravahuinavarepa eta mavarahaqueneanahi máuriruanahi ema Viáquenu. ¹¹⁻¹³ Ejaneacava éti, machu íápechava ícha eta tamauriqueneana náichaqueneásahi ena achaneana te timapicu. Taicha tétavicavahi eta tatsirihacarevahi eta náichaqueneanahi eta nayamurusiravahi. Étisera ímitucavacayare éna. Emicahachayare eta tamaurivahi eta náichaqueneana, apaesa náimaha eta táíñehivahi eta náichaqueneanahi. Tásiha, natiarhipuca ena tivarahanaya náinajicayare. ¹⁴ Eta emicahuchiravaca éna, tacuti eta táechajiriruva eta jirasare, ani tacahe:

Pitisami pímicutijiricava pépenaquene taicha

eta tavayuasiravihi eta pecatuana.
Péjamiuchavaichu eta pímacacarasiravahi
te tímápicu.

Písapava macaechepucavi ema Cristo,
mavarahahi tímácauchaviyare.

¹⁵ Eta tacahe, yátupina eta ejaneasiravaina. Vahi ecucuti ena máecharaireana. Ímrecavaya eta ítupajijiasiravahi. ¹⁶ Ecamapuravachaha tamutu sácheana eta ímitusiravacahi ena achaneana, taicha maverana ena tíchanahi eta tamauriqueneana. ¹⁷ Tacuija eta esunsuvanaina. Epanerechayare apaesa ácaicutiara yátupi eta mavarahaquenehi ema Viáquenu. ¹⁸ Vahi ecucavaha taicha éta ticauyayacarehi ticamitiacahe. Ísapavasera émaira máechahe ema Espíritu Santo tamutu eta ítairesira. ¹⁹ Eta ímiturapiyare nayehe ena echamuriana, eta salmo éta pa eta jirasareana majirihuana ema Viya. Eta ecunachirainahi ema Viáquenu, iúrisamureyarehi eta ejiraira. ²⁰ Ehasulupayachaparacaya ema Vicaiyaquenehi te májare ema Viáquenu Jesucristo tayehe tamutu jácani íchararacavana taicha tásihaqueneanahi eta mayehe.

²¹ Emutu éti, ímreca eta iúri va táichavenehi eta epicauchirahi ema Viya. Ísapava eta nacamunuirahahi ena echamuriana. Vahi étainachucha éhica eta evarahaqueneana.

Ema achane ésupa esu mayena náimerecayarehi eta náuriva énjacacayarehi

²² Étiripa eti esenana ecaimaqueneanaripahi, tituparacahehi epicauchayarehi ena ímanaveana. Esuapajirahiyarehiva nayehe, tacutiyaichu eta esuapirahi ema Viáquenu. ²³ Taicha mácani achane, tatuparacahi éma, téchaya eta máitátiraya esu mayena, tacutihi ema Jesucristo tatuparacahi éma téchahaviyarehi vimutu viti véhicanahi éma. Émarichuvare ema ticatiuchahaviya vimutu viti machanerana. ²⁴ Tásiha, yátupihí eta vipicauchirahi visuapahi ema Cristo. Ene nacaheyaehi ena esenana, nasuapayarehi napicauchayarehi ena náimanaveanahi te tamutu.

²⁵ Étiripa eti náimanaveanahi, tituparacahehi émunacavacayare ena eyenana, tacutihi eta máemunasirahavihi ema Jesucristo viti machanerana. Éma, tímjararecavahi víchavenehi, ²⁶ taicha mavarahahi tisantuchahaviyarehi. Tásiha, masipahasinahavipa eta viáchanevana eta visuapirahi eta máimiturapiana. Eta masipahasirahavi tacuti eta sucavira te une esu araimayare te tétupiricavapa tayehe eta sucaimairayare. ²⁷ Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejicaimahi, tájinavare tíjararecavimahi, apanaimahi víchava. Mavarahahivare tétavacavayarehi eta visantovaya. Yátupi matapiravarehaviya viti. ²⁸ Ene ecaheyaehi eti náimanaveanahi, ímrecayarehi eta émunasirahi ena eyenana, tacutihi eta émunasirahi eta iáqueheana. Mácani máemunacahi esu mayena, tímcutijiricavahi eta máemunasiravahi éma. ²⁹ Taicha viti achaneana, eta vítaresirahi, váhiquene vícaticaimahi eta vécheana. Tétavacavahi eta víjaneasirahi, véchapajiricahi, vénicahivare eta véche. Ene macahehi ema Cristo eta majaneasirahavihi, máechapajirisirahavivare viti machanerana. ³⁰ Viti tímcutijiricava eta táunavanahi eta máquehe táichavenehi eta viávahásirahi éma. Vícutijiricavavare eta maeche, máperanavare. ³¹ Échavaya eta táechajirisirahi eta Sagrada Escritura, ani tacahe: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énjavainapa títatícaanayare. Eta navehacacairahi, tímcutijiricavaipe étanarinehi eta náqueheana” tacahepa. ³² Te juca tametarapi, jararihi eta tacayemaquene tayumururevaquenehi. Puiti nímitucahe: Viti machanerana ema Cristo, eta viúrujasirahi éma, étanamuriháviripa tacuti eta étanarinehi eta náqueheana ena ticaimanahi. ³³ Tásiha, nuvaraha yátupina ácaicutiara eta juca nucayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta iáquehe. Énerichuvare eti esenana, tituparacahehi epicauchayarehi ena ímanaveana.

6

Ema amaperuana, náimerecayarehi eta náuriva nayehe ena ticachichana

¹ Étiripa eti amaperuana, yátupina eta esuapajiraivaina nayehe ena ticachichaheana, taicha tituparacahehi ene ecaheyaehi eta éhisirahi ema Viáquenu. ²⁻³ Ema Viya tíjaracavapa tíjaracaheyare eta iúricacarevaya eti esuapajirahiana, taicha ani tacahe eta máechajiriruva: “Epicauchayare ena ticachichaheana. Te esuapajirahi éti, nucajurucaheya te apaquehe. Tájina íchiravaimahi, iúritaresirainapa” macahepa. Tétavacavahi eta tasuapacarevahi eta juca mavanairipi ema Viya eta eyehe.

Ema náiyana, náenana, táurini eta náimitusiravacaina ena nachichanaveana

⁴ Énerichuvare, eti náiyana, náenana, vahi ecuimiyusemaca ena echichanaveana tayehe eta evanesirana. Tauri eta ecavanairipira, apaesa napicaurahi eta najurusiraina, énjavayare ticaratacavana. Ímitucavaca tamutu eta máimiturapiana ema Viáquenu, apaesa nasuapajirahi.

Ena ticaquenurecana, táurini eta nacaemataneasiraina

⁵ Énerichuvare eti ecaquenurecana, tituparacahehi esuapajirahiyare nayehe ena iáquenuanahi. Epicauchavacayareva, émunacayareva. Táurivainahini eta ecaemataneasirahi, tacutirichu eta táurivahi eta ecaemataneasirahi ema Cristo. ⁶⁻⁷ Evapinavayarehi te esamureana eta ecaematnera, vahi tacucarichu te natiarichi ena iáquenuanahi te emirahu. Vahi ecuyacujiriraha. Evapinavayaresera eta ecaemataneasirahi éna, taicha émarichuvare ema Viáquenu ema ecaematanearuhi. Ímrecavayare eta yátupirahi mavanarahahehi éma. Tacaheyarehi eta itauchirayare eta mavarahaqueneana ema Viya. ⁸ Taicha écharipahi émutu éti, vijacapayare eta vícuchihi mayehe ema Viáquenu te vítauchahi tamutu eta táuriqueneana. Vahi manerejicaimahi nácani líbreanahi énapa ena ticaquenurecanahi; vínunayarehi tayehe eta vícuchihi.

Énapa ena náquenuana, tituparacavaca eta náurivaina nayehe ena nachanerana

⁹ Énerichuvare eti náquenuana, tituparacahehi iúriyareva nayehe ena echanerana, ejapunayare éna tayehe eta evanesirana. Vahi ípicararerecaimahi te evanesirana. Ínunayarehi échava eta matiarahirahi ema Iáquenuhivare éti apanava, ema tiávihahi te anuma. Taicha éma, nájina máepuruquenéna ena acha neana.

Yátupina eta vicasíñavairahi me Viya; vétumechavavare eta véhisirahi

¹⁰ Puiti nutuparacahevare, nuparapenaveana, ecasíñava yátupina mayehe ema Viáquenu apaesa májaracahe éma eta natumeva étapa eta máitupajijasirava. ¹¹⁻¹³ Nuvaraha numetacahe eta juca: Ema Váinaraji ticanarahavihi víti machanerannahavihi ema Viya. Tétavacavahi eta mavarairahi tíaquipaicahavi. Tásiha, tituparacahavi eta véchapajirisiravaya eta vicatiuchiravaya mayehe éma. Natiarihivare ena camuriqueneana majupahana, énapa ena masuntarurana. Váhisera achaneanainahini, váhivare víparaepiyanainahini. Éreananahi éna, váinarajiqueneanahi. Tétavacavahi eta nasimutuvahi éna. Tétavacavahivare eta náitupajijasiravahi étapa eta natumeva eta nacaematnera tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayuarauiana ema Váinaraji. Étumechava eta éhisira. Ecuti ema suntaru ticasiñavahi tayehe eta mamuiraha vahi tasiapahacaimahi eta espada. Tásiha, eratahayare camicha tamutu eta ecatajivairana. Vahi ecainajiruvaimahi. Iáquipaicayareva namutu ena machamuriana ema Váinaraji. ¹⁴ Yátupinahisera esuapa eta vímiturapiana yátupiqueneana. Vahi ecuchavacuéjehava. Átupiruvahini eta itaresirahi. Ecutiyare ema suntaru, manacahi eta máitijuhe, étapa eta fíerromehi tiávichayarehi eta matupa, tájinasarepa náicharaca ena mánarana. ¹⁵ Vahi tacuechuquiha eta ecametarairuirayare eta majacpiraya ema Viya namutu ena achaneana. Etanucayareva eta eparupevaya apaesa erataha eta epaisirayare te acheneana eta ítecapirayare tayehe eta tayerehiqueneana avasareana. ¹⁶ Tacutiquene eta ticamunucarehicha, yátupinahí eta ecasíñavairaina mayehe ema Viya. Eta ecasíñavairayare táimicutijiricavahi iávihuinahini eta ticaemahaeguenehayarehi eta tamuruirapahi eta mayucaraquí ema Váinaraji. ¹⁷ Tacutiquene, ecasíñavahi yátupina eta iúchucuirayare, tácuti eta macasíñavaira ema suntaru eta mayehe casco te machuti. Ínucachi eta máechajiriruva ema Viya, máimiturehequenehi ema Espíritu Santo. Eta juca tímicutijiricavahi eyehenahini espada eta ecatiuchiravahi. ¹⁸ Te eyujaraca, eyaseacáema ema Viya májaracahe eta etumevaina. Eta eyujarasirana, tacuija tahapapiricahé eta máimitusirahéhi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahi. ¹⁹ Énerichuvare, te eyujarasirana, eyaseuchanuhini me Viya, apaesa májaracanhini éma eta nupapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya. ²⁰ Ema Viáquenu tinacanhí nítí námayarehi eta máechajiriruva, nucutiyarehi mácani achane embajador mayehe ema aquenuca Emperador. Éta tíchanuhi ticaviurenuhi eta napresuchiranuhi puiti. Eta tacahehi, nutuparacahe eyujarauchanu, eyaseuchanu me Viya, májaracanhini eta nutumevaina eta nucametarairuirayarehi nayehe namutu ena achaneana te avasareana, váhivare nucuyacujihini eta nucametarairuirayarehi.

Eta táichecuarauqui eta macartane ema Pablo

²¹ Tiuri puiti, máimahaherinesera ema vémunaruquenehi vichamuri Tíquico. Éma, títametacaheyare tamutu eta níchararacávahi núti. Tétavicavahi eta máimicatasiranuhi eta vicaemataneasirahi ema Viáquenu. ²² Eta tacahe, névatacahi éma eta ara eyehe. Títametacaheyare eta víchararacavahi, tétumechaheyareva éti eta éhisiraya ema Viáquenu.

²³ Puiti nuyaseacahi ema Vicaiyaquenehi émapa ema Viáquenu Jesucristo, nájaracahehinehi eta nuchamuriana eta enarasirahi te esamureana tamutu eta epanereruana, tajurucahivaréni eta ecasiñavairahi eta nayehe, étapa eta émunasiracacahi. ²⁴ Nuyaseuchahevare táetaviuchahinehi eta iúricacárevaya emutu eti yátupihinehi éta émunasirahi ema Viáquenu Jesucristo.

Tamutupa eta néchajiriruvanahinehi eyehe.

Eta macartane ema Apóstole Pablo nayehe ena machamuriana ticavasanahi te avasare Filipos, ticaijare FILIPENSES

¹ Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iúrujasiravahi ema Jesucristo. ² Nuvaraha máetaviuchahini eta macatajisirahema ema Tata Vicaiyaquene, émapa ema Viáquenu Jesucristo; nájjaracahehini táurivaina eta epanereruana.

Ema Pablo mayaseuchavaca te mayujarasirana ena machamuriana

³ Tatiarihi eta te néchahe, nuhasulupayachahi ema Viya íchavenehi éti. ⁴ Te tamutu eta nuyujarasirana, tétavicavahi núrismureva eta nuyaseuchirahahi emutu éti. ⁵ Taicha te jena tinapucainapa sache eta nucametarairuirahi eta eyehe, ichapequene eta ímicatasiranuhi. Puiticha enasrichuhi. ⁶ Ema Viya, tétavicava eta máurichirahe eta ítaresira cape juca. Núti, tétavicavahi eta nucasíñavairahi mayehe eta máimiyaravaina eta máurichiraheyare, mavarairahi iuri eta machimapiraheya ema Jesucristo te jena sache machavirayare. ⁷ Énerichuvare nucasíñavahi eyehe eta ejacapiraya eta máurichirahahi éma, taicha némunacahehi ichape emutu éti. Nucasíñavahivare vicuticacaipahi eta vijacpirahi eta máimicatasirahavihi ema Viya, tayanapane viyerehicacahipuca, étaripa te juca návihahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava. ⁸ Tímaracaranuhi ema Viya eta némunasirahahi emutu éti, nucutihi ema Jesucristo eta máemunasirahahi éma. ⁹ Nuyaseacahivare ema Viya eta iápajusiravainahini eta émunaravaya. Ítupajjiacavahini, támutuhini ímatiequeneha, apaesa ímatiparahini eta enerejisiraya eta táuriquenehi. ¹⁰ Taicha nuvaraha tápajupánávainahini eta iúrivaina eta ítaresirana, tájina téchépejicahémahi. Matapiravarehéyare, tíuriyarepa eta machimapirahayare te machava ema Jesucristo. ¹¹ Nuvarahavare iápajusiravainahini eta íchaqueneana táuriqueneana eta ecaemataneasirahi ema Viáquenu Jesucristo. Tásiha, tétavicavayarehi eta nacunachirayarehi ema Viya ena achaneana eta náimairahahi éti.

Eta vítaresirahi, puiti émapa ema Cristo téchahavihi

¹² Nuparapenaveana, nuvaraha numetacahe tájinaichucha táichavahini eta nucaera-tairahi. Eta návihairahi núti te juca cárcel, camuriana ena numetaruanahi eta máemunaraivahi ema Viya eta nayehe. ¹³ Énaripa ena tasuntarurana eta palacio énapa ena apamuriana achaneana náecharipahi eta táemeratasiranuhi eta néhisirahi ema Cristo. ¹⁴ Tacutiquene, eta náimairanuhi eta nupresuvahi, ena camuriqueneana nuchamuriana táetumechavacainehi eta nacametarairuira eta máechajiriruva ema Viya. Vaipa nupicahini taicha ichape eta nacasíñavairahi mayehe ema Viáquenu. ¹⁵⁻¹⁷ Nararihi éna, tíurihi eta napanereruana eta náimituresirahi te máijare ema Cristo. Tatupiruvahi eta náichirahi, tásihaquenehi eta náemunasiranuhi, taicha náechahi éna eta návihairahi ani, nucatiuchirayarehi eta yátupira eta viúchucuiraya maicha ema Jesucristo. Nararihisamisera ena tímiturecanahi te máijare ema Cristo, váhisera tátupiruvaqueénahini eta napanereruana. Nacapinaruivarichucha, navarairahi ticachuricanuana. Napanerechaichuchavare tiápajucavayarehi eta néñamiravana, tavetijipa eta návihairahi nuti te juca cárcel. ¹⁸ Tájinachuchasera táichavahi. Núti vahi nupinaruvacaimahi ena nani páureanasami. Ticurisamurechanuanarichucha núti eta náechajisihairahi ema Cristo namutu.

Énerichu ichapemuriyarechucha eta núrismurevaya, ¹⁹ taicha németeaca tíuriyare tamutu eta níchavaquenevayare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicatasiranuhi. ²⁰ Núti, ichape eta nuvarairahi váhini nucutsirihaini. Nuvaraha nuvopinava eta nímiyanirava nucasíñavaya mayehe ema Cristo eta majaneasiranuhi apaesa náimatihini ena achaneana eta yátupirahi eta macasíñacarevahi ema Cristo. Tájina vahi nupicacavahini eta náimicatichiranuhipuca, táimicapacapunuca. ²¹ Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta núcicarevaya. ²² Téhesera te nítarecarichahapuca, nucamapuravayarehi nucaemataneacayare ema Viáquenu. Eta juca, vaipa nímatiequeneha tájahapuca tíuripapayarehi nuyehe. ²³ Nuvarahaipanéni níjahúchavahini népenahini apaesa nunaracapaihi te machacaya ema Cristo. Eta juca tíuripanahi eta nímairahi. Váhisera nímatiequeneha tájahapuca eta néhiruyare. ²⁴ Néchahevaresera éti, néñamahevare nujunijicahe. Tíuripanaichupuca vuíchaha nucuepena. ²⁵⁻²⁶ Tásiha, németeaca vuíchaha mavaraha népenahini

ema Viáquenu. Nucuchapa nápechavahivaréni níteca eta ara eyehe, nucachaneheyarécha éti. Nímicitacahenumayare apaesa tápajucavahini eta iúrisamurevana eta ecasiñavairahi me Viáquenu Jesucristo. Tacahe, tétavicavapaini eta viúrisamurevainahini eta viúrujiacacairaya.

²⁷ Eta ítaresiraya, ímereco yátupina eta éhisiraina eta máimiturapiana ema Cristo. Tayanapane váhipuca nucuiteca eta eyehe, ímiyanavasera eta étumechiravaina eta iúrujiasiracacahi. Nusamairiricahehine táurihini eta ímiyaniravahi éhica emutu, étanainarichuhi eta epanereru, evapinavahi eta ecametarairuira eta véhiruhi tayehe eta viúchucuiraya. ²⁸ Vahi ecuarameca naicha nácani iánanarahi. Eta nacatiansirahehi, tímicaecherachahi eta nacaicuchirahi eta náicuñayare. Táimicaecherachahi eta íchucuirayarehi éti maicha ema Viya. ²⁹ Éti, iúricacarehi maicha ema Viya eta ejacapacarevahi mayehe, táichavenehi eta ecasiñavairahi me Cristo. Tacamunuhisera eta ecatajivairayare táichavenehi eta éhisirahi éma, ecaicuchirahi éta. ³⁰ Ecutinuripahi eta vicanarajirisiravacahi ena viánanarahi. Éti ímahanurichuhi cape juca eta nuncanaravacahi, puíticha esamairicanuipahivare eta nunasirichuhi nuncanaravacahi.

2

Tétavicavahi eta masuapajiraivahi ema Cristo. Tásiha puítí, tétavicavayarevare eta masuapacarevayare.

¹ Tacahe puítí, németeaca esamavahi eta máetumechirahehi ema Cristo, iúrisamurerahivare táichavenehi eta máemunasirahehi; evapinavahivare eta mávahásirahehi ema Espíritu Santo, máimitusirahehi eta ecajirahi ejanurahiivare. ² Tacahe puítí, nuvaraha étanainarichuvare eta epanereru, ácuticacaini eta ecaemataneasiraina ema Viya; tácuticacahivaréni eta émunasiracacahi. Tásiha, tétavicavayare eta núsamurevana ícha. ³⁻⁴ Éti eta itaresiraina, tacuija eta ecasiñavavisiraina, váhivare ecumijuquiha eta evarahaqueneana. Nuvarahasera ímerecohine eta emansuvaina nayehe ena echamuriana; énahi émunaruqueaneanahi. Nativaina ímicatavaca éna, táetaviuchiravainahini eta náuricacareva ícha. Vahi ecutátijiva.

⁵ Emutu éti íámanahini eta táurivahi eta juca mapanereru ema Jesucristo, tisuapajiraivi éma. ⁶ Éma, tacahehi eta mapanereruanahi: Vahi macasiñavahini eta víyairahi éma. Tétavicavahisera eta mamansuvahi, étapa eta máurivahi. Tísapajiricavahi. ⁷⁻⁸ Tacahe, manaquicahi eta mávacuréni. Eta máucupauchirahavihi, macutipaipe mácani achane macahequenechucha eta máuchusirahi. Tamutusera eta máitaresirahi, tétavicavahi eta masuapajiraivahi, macutihi mácani moso. Eta masuapajiraivahi, étapa tíamaparauchahi eta máepenirahi te crusu. Tísirihacavahinene, máitachahisera. ⁹ Eta tacahe, ema Viya máijaracapa eta máejasihayarehi tayehe eta anuquehepana mávacureyarehi, étapa eta tacapicahuirahi ichape eta máijare, ¹⁰ apaesa námutu nácani tisamanahi eta máijare Jesús, tépuycanayarehi: ena tiávihanahi te anuma, énapa ena tiávihanahi te apaquehe, énapa ena nacaerataquenehi puítí te amahe apaquehe. ¹¹ Namutu náichayare: “Yátupi Aquenucaquene éma”. Tacahe, tétavicavahi eta vicunachirayarehi ema Tata Vicaiyaquenehi.

Tétavicava eta najaraiva ena téhicana ema Jesús, nacuti eta jarairiqui

¹²⁻¹³ Núti nuncanachahehi, éti nuparapenaveana némunaruqueaneanahi, taicha tétavicavahi eta esuapiranuhi te nutiarihirichaha te echacaya. Puítisera nuvaraha tápajucavaini eta esuapiranuyare, puítí eta nuyerehirahehi. Ema Viya, émarichuhi ema tinacahi te esamureana eta evarairayare ecurisamurechayare éma; tiávahácahevare eta ítauchirayare tamutu. Tásiha, muracaina eta ejaneasiraya tayehe eta tájiparacana, epicavareni eta ímicatisamurechira ema Viya. Tacuija táemitequenehahini eta tapachinavahi eta íachanevana.

¹⁴ Te tatiarihinapuca jácani íchaqueneanayare, vahi ecuevataemachavaca, váhivare ecuacapauchava, ¹⁵ apaesa tacuija échajisiacarevaina emutu. Tacuijavare etapiravainahi eta náimairaheyare ena achaneana. Ímerecovayarehi eta machichahérahí ema Viya, tájina táechipejicahehine nayehe ena achaneana váinarajipaneréruana. Nímicitichinahe eta táurinavahi eta jarairiquiana vímahaqueneana te anuma te jácani yati timapicuquenehi.

¹⁶ Ímitucavacahini eta máechajiriruva ema Viya, eta íchuhairavacavare náehicavare, apaesa náuchucuhahini tayehe eta apana náitaresira. Tacahe, te máiteca machava ema Viáquenu Jesucristo, eta máimairaheyarehi eta juca táuriqueneana íchaqueneanahi, tétavicavainapa eta nuncanachiravaya núti íchavenehi éti eta táurivahi eta nímitusirahehi. Vahi támapurujihini eta nucaemataneasirahehi. ¹⁷⁻¹⁸ Nímicitichahe eta esuapajiraivahi tayehe eta ecaemataneasirahi ema Viya. Ticutihi eta iámavahuhi mayehe. Núti, tijuricati táimicapanupuca eta nucametarairuirahi eta eyehe. Eta népenirainapucaini tacutiyaeva eta námavahuhi mayehe ema Viya, tacachane eta iámavahuhi éti. Núti nuvapinavahi eta níjarasiravahi

népena, núrísamurehivare eta nucamavahuirahi me Viya. Nuvaraha iúrisamureyareva éti apanava. Vahi eucatiequenehanu. Ácutinu eta núrísamurevahi núti.

Éma Timoteo émapa éma Epafrodito, vanairucanayare me Pablo

¹⁹ Nupanerechahi névatacayaréni éma Timoteo eta ara eyehe, máimahapanahe apaesa núrísamurepainsi eta nusamairirisiraheya te machavapa. (Máimahavirinesera éma Viáquenu Jesús eta vítujisiravaya.) ²⁰ Taicha éma Timoteo, yátupihí macutinuhi eta nuhapasamurechirava eta iúricacarevainahini éti. Nájina apanainahini nácutihini éma. ²¹ Nararihinéni éna apamuriana, énachuchasera tiyayauruircavanahi. Vahi tíhapasamurechavanaimahi eta iúricacarevaina éti machaneranahi éma Jesucristo. ²² Ímatiripahi éti eta máurivahi éma Timoteo eta máimicatasiranuhi tayehe eta vicametarairuirahi, tacutihí mácani machicha éma achane, eta táurivahi eta máimicatasirahi éma máiya. ²³ Vuíchahasera névatacaimahi éma. Néchanumayare eta juca níchararacavayare te juca. ²⁴ Nucasiñavahiné-nísera mayehe éma Viáquenu Jesucristo eta nútijacarúvainahini nímahapanahe.

²⁵ Tásihasera, nupanerechahi névatacahivaréni puítirichu éma apana viparape Epafrodito, éma évataruhi tímícatacanuyarehi, tíamapahivare eta énaquiruvana. Puiti éma, tétaví-cavahi eta máimicatasiranuhi tayehe eta juca vématanerepíhi, vícanarairahi eta tamauri-queneana. ²⁶ Mavarahaipaichavare tímahahe éma apanava. Téñamavaipahi eta eyehe emutu éti taicha máechahi eta esamairirisirahi eta macajumairahi. ²⁷ Yátupihí eta macaju-mairahi, tíánehíyarehíni tépena. Majapanuhísera éma Viya; tinaracahi. Tijapanunuhihare núti apana apaesa vahi nucueñamavahichaini, vahi tacuapiquihanuhini eta néñamiravahi puiti. ²⁸ Eta tacáhe, nuyayaucha puiti névataca éma, apaesa eta ímairainahini éti, iúrisa-murevarepainsi. Te néchapa eta iúrisamurevahi, étapa tacapaha eta néñamavahi eyehe. ²⁹ Táurísera eta ejacpiraina éma te esamureana, taicha yátupihí echamuríhi éma eta éhisirahi éma Viáquenu. ³⁰ Taicha éma, yátupihí tíánehípa eta máepenira, táichavenehi eta táetaviuchirahi eta mavaraira macaemataneaca éma Cristo. Váhíquene tiyavanavahini eta máitaresirahi, taicha muraca eta mavarairahi máítaucha eta etuparaciranahi mayehe. Taicha éma ítsivahi éti, eta vahi ítujicavahini ítecahíni étijacarúvainahini ítátinuhini.

3

Tiúripána véhica eta juca yátupiqueneana

¹ Nuparapenaveana, evapínava eta macachaneraheripa éma Viáquenu. Núti, vahi nuyacují eta nápechirayare numetacahe te juca néchajíruruvahi te nájure taicha eta tíurícha-heyare éti. ² Échapavayare nayehe nácani achaneana típamícaheana éhica eta mavanairipiana éma Moiséini, navarairahivare ecamarcazare, náimíjachahi machaneraheya éma Viya taicha eta ecomarcairahi. Éna nani, tétaví-cavahi eta náíñehivahi eta náemejecapí-rachira éna víchamuriana. Éna, nacutihí eta jácani tamucu tétaví-cavahi eta tanícaravahi. ³ Jéhesaresera vítiquenehi machaneranahi éma Viya yátupiquenehavíhi. Vícamarcaque-neanahi víti te visamureana maicha éma Espíritu Santo. Vítiquenehi yátupiquenehavíhivare víti véneuchavahi me Viya. Vivapínavahivare táichavenehi eta vícasiñairahi eta machane-rahavirahi éma Jesucristo. Véchahi vahi étaparacainahini vítauchahini eta vanairipiana, étainapucaini visamacarehíni táicha. ⁴ Jéhevare núti, táurícahíne ní nucasiñavahini núti nusamacarehíni, taicha nítauchahi tamutu eta víyeherepiana víti ísraelítana. Nucachu-ricahí éna nujaneanana. ⁵ Núti yátupiquenenuhi ísraelítanuhi taicha nucamarcaripahi te óchopa sache eta núchusirahi, náítauchahi éna eta víyeherepí. Mámariéquenenuíni éma Ben-jamín. Yátupiquenenuhi hebreeo. Yátupiqueneanahivare hebreeoana éna tícachichanuana, énapa éna náchucanaveanaini. Núti náchamurínuníhivare éna fariséoana. Nítucahi nímicapí-caucha eta náítauchiraina yátupí eta víápajusiravahi religíósohavíhi nayehe éna apamuri-ana nujaneanana ísraelítana. ⁶ Eta nímicapícauchira, íchape eta nupanjírísiravacahi éna náinápureana creyénteana. Nucasiñavahi núti eta nítauchirahi yátupí eta víyeherepiana. Tájina néchajísíacarevahíni nayehe éna achaneana. ⁷ Puítísera eta néhísira éma Cristo, vaípa tacunachacarehíni eta nusamiravahi tamutu eta juca níchaqueaneanahi nusíñavirainíhi. ⁸ Tacáhe, eta nímairahi, váhinéni étaparacainahini tayehe eta víuchucuiraya. Puiti níñajícapa tamutu eta júcana, taicha tíhapapícanuhi eta néhísirayarehi éma Cristo; táichavare vahi tácutihíni eta táetavíuchiravahi eta táurivahi eta néhísirahi éma Náquenu Jesucristo. Puítícha tamutupa némitísica. Émachucha nucaemataneacahi. ⁹ Puiti eta návahísirahi éma, vahi étainahini eta táurivahi eta néhísirahi eta víyeherepiana. Éma Viya tíjacapanupa táichavenehi eta nucasiñavairahi me Cristo. Taicha namutu éna tícasiñavanahi éma, tíjacapacareanaya me Viya. ¹⁰ Nuvarahahi núti tajurucachucha eta nímatirayarehi éma Cristo. Nuvarahavare tacuíja tahapapíca eta macaemataneasiranuhi, máímeresirahi eta táetavíuchiravahi eta

máitupajjiasiravahi, tacutipa eta máechepusiraipa éma te máecari. Nuvarahavare nucapayayarácachivaréni eta macatajivairahi. Étapa eta népenira, nuvarahavare táurichavacayare ena nuchamuriana, tácutihini eta táurichirahavihi eta máepenirahi ema Jesús. ¹¹ Taicha nútí nucaunevahi eta néchepusiraya nútí apanava te nécari.

Yátupiya eta vicaratasiravaya te vivaraha vítujuca víveha eta vícuchihi

¹² Nútí vahi nímiyachavaimahi tamutuhini nítaucha eta nútujisiravaya. Vuíchaha nítamutura. Nímiyanaichuchasera eta nupamisiravahi, nuvarairahi nucurismurechayare ema Cristo te tamutu, taicha eta tacahehi eta máichuiranuhi néhisirayare. ¹³ Nuparapenaveana, yátupiquenehi vuíchaha támutu nucapayayaracahini. Nuvarahaipasera némitisicayare tamutu eta nunaquíruana. Tásiha, nétumechavainapa eta nítauchiraya tamutu eta mavarahaqueneanahi níchaqueneanayarehi. ¹⁴ Nupamicavahi taicha ichape eta nuvarairahi nucurismurechahini ema Viya, nuvehahini eta nícutihihi mayehe. Taicha eta tacahehi eta máichuirahavihi, mavarairahi tíjaracahavi eta víurujiasirahi ema Jesucristo.

¹⁵ Tacaheyarehi eta epanerechirayare éti. Ecutinuyarehi emutu eti échemachanaripahi eta juca véhiruhi. Te vuíchaha ecaicutiarahini eta juca, németeaca tímitucaheyare ema Viya. ¹⁶ Jéhesare, yátupina vímiyanava véhica tamutu eta vímitucasivanahi.

¹⁷ Nuparapenaveana, nuvaraha yátupina ácutinu nútí eta nírivahi eta nítaresira, éhica-varéni eta náurivahi ena apamuriana téchemachanaripa. ¹⁸ Ichapemurihi eta nutuparasirahehi tayehe eta juca. Puiti eta nápechirahehi numetacahehi, níyahasamurehi taicha nararihichaha ena vuíchaha náimatiequeneha eta tacayemaquenehi eta máepenirahi ema Cristo te crusu. Eta nacatichirahi, vahi navaraha nasamararaca te véchajisiha. ¹⁹ Ena nánisami témitiequeneanayare taicha tétavicava eta tavayuasiravacahi eta najamurachaqueneana. Nacasamurechucha eta tájiparacana te juca apaquehe. Tisiñavavaicanahi, tivapinavanahi eta náichirahi eta tamauriqueneana titsirihacareana. ²⁰ Vítisera tachanerahavihi eta anuma. Eta tacahe, vicunevaipa eta vicuchapirahi ema Viáquenu Jesucristo ticatiurahiquene, máshairaya te anuma. ²¹ Máitsivachainapa éma eta juca víaquehesami. Apanainapa eta táimahiayare. Tacutinapa eta macáquehéra éma, tapachinaquenehi. Tétavicaivainapa eta tatumevayare taicha ichapequene eta máitupajjiasiravahi éma. Maratahahi macapaquecha tamutu.

4

Iúrisamureacavayare me Viáquenu

¹ Nuparapenaveana némunarqueneanahi, tétavicavahi eta nuvarairahi nímahahe, taicha nucajamurahehi éti, tétavicavahi eta núrismurevahi ícha. Puiti nuvaraha ímiyanava túmehéna tayehe eta éhisirahi ema Viáquenu, eti némunarqueneanahi.

² Nuvarahavare nutuparacavaca ena vichamuriana esu Evodia ésupa esu Síntique: Tachavaini eta námunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu. ³ Nutuparacavivare, piti némunarquenehi nucompañeruvihí: Pímicatacavacahini ena nani apinana esenana viparapenaveanahi, taicha éna ichapemurihi eta náimicatasiranuhi tayehe vicametarairuirahi. Náimicatacahi ema Clemente, énapa ena apamuriana ena nucompañeruanahi. Eta náijareana ena nani ticajuanaripa tayehe eta libro tiama eta víjareana víti vítareruanayare.

⁴ Támutuhini sácheana iúrisamureacavahini me Viáquenu. Nuvaraha nápechahe numetacahe: Iúrisamureacavahini mayehe. ⁵ Námutuhini ena achaneana náimatihéhini éti eta tétaviuchirahi eta iúriava. Taicha ema Viáquenu, tiánehipa eta máitesiraya.

⁶ Vahi ecueñamava, te tatiarihinapapuca eta íchava. Ecasiñavasera eta eyaseasira ema Viya te eyujarasirana. Ehasulupayachavare tayehe jácani májjararuheanahi. ⁷ Jéhesare, ema Viya macaepahayare eta jácani ecatisamurevana eta juca májjarasiraheyarehi táurivayare eta esamureana étapa eta epanereruana, táichavene eta iúrujasirahi ema Jesucristo. Eta macurismurechirahavihi ema Viya, tétavicavahi eta tacachuriasirahi eta nacurismurechira nácani achaneana.

Epanerechayare eta táuriqueneana

⁸ Títecapa, nuparapenaveana, epanerechinavayare tayehe tamutu eta yátupiqueneana, tayehe tamutu eta tipicauchacareana, tayehe tamutu eta itauraivaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurismurechirahi ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

⁹ Ímianava éhica eta nímiturapiana. Ítauchayare eta numetarapianahi esamararuaruani. Ácutinu eta néchaqueneanahi ímahaqueneanahi. Ítauchaya eta juca, tásiha ema Viya, tamutu-ina pa tjaracaheyare eta táurivaya eta epanereruana éti.

Tinaquiucavanapa ena machamuriana ema Pablo, náimicatasiraya éma

¹⁰ Tétavicava eta núsamurevahi eta mayehe ema Viáquenu eta májjarasirahehi éma eta epanerechiranuhi tayehe eta íápechavahi ímiámareca eta nuyehe. Németeaca váhiquene émitisicanuhini. Étachucha eta emaitujisiravavanehi ímiámareca eta ímicatarapi eta nuyehe, tapaenumavahi. ¹¹ Vahi táichavenénahini jácani nuvayuchiravainahini eta nucamunirava. Núsamuréichucha, nítucasamihi núti eta nítátiravahi tayehe jácani tatiarihi-quenehi. ¹² Nítucahi eta nítaresirahi puiti eta nupaurévahi. Nítucahivare te nucaimahaquenéichaha. Nítucahi eta nucamíchirahi eta nátajivanahi, te nunicapuca, váhipuca; te nucaimahaquenehipuca, te tájinahivarepuca nímahaqueneénahini. ¹³ Núti nuratahahi nucamicha tamutu, taícha ema Cristo éma tétumechanuhi. ¹⁴ Tájinasera táichavahini eta ímicatasiranuhi tayehe eta ímiámarreruhi, evarairahi ímrecanu eta émunasiranuhi, ítátiranuhi eta numaitujisiravahi nutanuchavahini.

¹⁵⁻¹⁶ Eti nuchamuriana, nucunachahe eta némechirahehi eta ímicatasiranuhi eta nu-paisirahi eta nucametarairuirahi te apanana avasareana. Tayanapane epaenumavahinéni épanava éhica ema Viáquenu, camurianahi eta ímiámarsinanuhi eta enaquiruvana te náviharipa te Tesalónica. Énerichuvare, te núchucapa te provincia Macedonia, éti íápechavahi ímiámareca eta enaquiruvana. Jéhevare nájina apamurianainahini nacutihéini eta ímicatasiranuhi. ¹⁷ Váhisera étainahini jácani nuvarairahini íápechavahini ímiámareca eta nuyehe eta enaquiruvana. Nuvarahahi nímincapaequenehahe: Eta ímicataravahi te juca apaquehe, puiti te anuma ánaqui táurujisiavahi eta enaquiruvana te mamirahu ema Viya. ¹⁸ Nuti íchapemuripa eta nujacapirahi eta enaquiruvana, eta mámaquenepahi ema Epafrodito. ¡Tétavicavahi eta ecajiravahi! Eta ímiámarreruana, tacutirinehi eta inciensoinahini, eta tájijyevahi te mamirahu ema Viya. Tivapinava ema Viáquenu eta majacapirahi. Tacutihivare eta nanaquisira eta námavahuana te Templo. ¹⁹ Máimahahéine ema Viya. Éma, máitsivachayare tamutu eta enaquiruvanahi. Tjaracaheyare te jácani ecamuniravana. Émarihi téchayarehi ema Viáquenu Jesucristo. Éma, tétavicavahi eta tamutuirá marataha. ²⁰ ¡Máichecuaraquireyare eta vicunachiraya ema Tata Vicaiyaquenehi, tjarahi eta vijirauchira éma! Amén.

Eta táichecuaraquí eta macartane ema Pablo

²¹ Eta iúrujasiracacahi mayehe ema Viáquenu Jesucristo, nuvaraha échajisinaanuini namutu ena machaneranaahi ema Viya, vichamurianahi eta véhisirahi ema Viáquenu Jesucristo. Téchajicaheanahi éti ena nucompañeruana, ena nucachanequeneanahi ani te juca. ²² Téchajicaheanahivare namutu ena vichamuriana machanerana ema Viya, ena ticavasanahi ani te juca. Nararihivare ena tiávihanahi te mayehe palacio ema Emperador, énarichuvare vichamuriana. Téchajicaheanahivare éna apana.

²³ Nuyaseuchaheparaca emutu éti me Viáquenu Jesucristo táetavicavahini eta iúricarevaya máicha.

Tamutupa eta néchajirivanahi eyehe.

Eta macartane ema Apóstole Pablo nayehe ena machamuriana ticavasanahi te avasare Colosas, ticajare COLOSENSES

¹⁻² Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaquene, navarairahi nímitucaya eta náechajiriruva. Puiti nucajurehe eta juca carta eyehe eti nuchamuriana ecavasanahi tayehe eta avasare Colosas, taicha éti machaneraheripa ema Viya, tíuríhi eta éhisirahi ema Jesucristo. Téchajicahe ema vichamuri Timoteo.

Nuvaraha macatajicahehíni ichape ema Tata Vicaiyaquene, máijaracahehíni eta táurivaina eta epanereruana.

Emá Pablo masamairica eta náehisirahi ema Jesús ena ticavasanahi te avasare Colosas

³⁻⁸ Puiti títecapauchahaviripa ema vémunaruquene Epafras, ema vichamurihi eta vicametarairuirahi. Éma, ichape eta macunachacarevahi. Tiúrihi eta máítauchirahi tamutu eta macavanarairahi ema Cristo, máimitusirahehi yátupi eta máimiturapiana ema Viáquenu. Éma Epafras títametacahavihi eta ícharacavahi, eta éhisiraipa ema Jesucristo, étapa eta émunasiracairahi emutu éti, émunasirahivare ena iúmurivanahi te apana avasareana, machaneranahivare ema Viya, taicha ecuchapavainapa eta esiapiraya tayehe eta mávasa anuma. Viúrisamurevahi eta visamairisirahi eyehe, vihasulupayachaparacahi ema Viya Macaiyaquene ema Viáquenu Jesucristo. Tamutu sácheana te viyujarasirana, viyaseuchahehi me Viya. Ichape eta viúrisamurevahi eta táurivahi esama eta macametarairuirahi ema Epafras eta yátupiquene máechajiriruva ema Viya, etupiruvahi esuapa eta ímitucasivahi, te esamainapa eta máemunasirahehi éti apanava ema Viya. Étarichuhi eta juca vímiturapihi nayehe ena apamuriana achaneana ticavasanahi te apanana avasareana. Natarihipahi ena tisuapanapahi eta vímiturapiana.

Emá Pablo mayaseuchavaca te mayujarasirana ena machamuriana

⁹ Eta tacahe, te visamairiricahepa, viyaseuchaheparaca me Viya tamutu te viyujarasirana. Viyaseuchahehi máijaracahéni eta ítusiraina, ímatiraina yatupina eta mapanereruhi ema Viya. Máijaracahevivaréni eta échemaraivainahini, ecaicutiarayare eta máechajiriruvana, máichavenénahini ema Espíritu Santo. ¹⁰ Víti viyaseacahi ema Viya tacuijahini etapiravaina te mamirahu taicha eti machanerahehi éma, ítauchahini tamutu eta ecaurisamurechirayare éma. Táurihini eta ecaemataneasirahi, támutuhini ítaparaha eta táuriqueneana. Iápajucavapáipahivaréni eta ímatirayare éma. ¹¹ Énerichuvare viyaseacahi ema Viya máijaracahéni eta íchapequene máitupajjíásirava apaesa ecamichahini tamutu eta ecatajivairana, ácayehehíni paciencia muraca, iúrisamureareacavachuchaini. ¹² Ehasulupayachahini ema Tata Vicaiyaquene eta máichuirahéni éti apanava, mavarairahi tíjaracahivare vimutu eta tajarahiquene vicuchianahi víti machaneranahi éma.

Emá Viya mavaraha ticuchucuhaviyare

¹³ Éma Viya ticatiuchahaviripa mayehe ema Váinaraji ticaratacavinihi. Téquecaviripase vihicayarehi ema Machicha Jesucristo máemunaruquenehi. Vaipa véhicaimahi eta nayeherepiana ena timapicumareana. Émapa téchahavihi puiti. Viávucuhaipa eta mavanairipiana. ¹⁴ Taicha ema Viáquenu Jesucristo tépenahi te crusu eta macaepahairaya eta vipecaturana, víuchucuhaipahi máicha.

Emá Jesucristo, ema tinacuchahi tamutu. Émarichuvare téchahi puiti.

¹⁵ Yátupi máimahasihi ema Tata Vicaiyaquene. Émasera ema Jesucristo tétavicavahi eta macavasirahi ema Maiya, émapa tímimatichahavihi eta máurivahi ema Maiya. Éma, ichapequenepanahi Aquenuca. Éma, téchahi tamutu. ¹⁶ Éma, mavanahihi me Maiya eta máepiyasirahi tamutu eta vímahaqueneanahi puiti: te anuma, étapa te juca apaquehe, étapa tamutu eta vimaratahaqueneanapa vímaha. Ticavacureanahivare máicha ena ángeleana. Nararihi ena majupahaqueneanahi te machacaya, énapa ena túparairucanahi, énapa ena apamuriana tijacapanahi eta vanairipi nayehe ena majupahanahi, énapa ena apamuriana ángeleana masuntaruranahi. Máepiyacahi tamutu, máítauchiriripa tamutu eta mapanere-ruanahi. ¹⁷ Éma Cristo manasiqueneripa acane te tamirahuichaha eta táepanirávayarehi tamutu. Puiticha éma téchahi tamutu. ¹⁸ Énerichuvare ema téchahavihi vimutu víti véhicanahi éma, taicha machichaquenehaviripa. Éma, vínapuaraqúhi víti véhicanahi, taicha éma tinacuchahi eta juca arairuhi véhiruhi. Énerichuvare maratahahi ticaechepucava te máecari, éne tacaheyare eta macaechepusirahaviyare víti apanavare. Puiticha, éma téjacahi

tayehe eta mávacurehi aquenucairahi. Ichapequeneya eta vipicauchira vimutu. ¹⁹ Taicha ema Viya májjaracapa ema Machicha macutiyahehi eta masantuvahi, étapa eta máurivahi, étapa eta máitupajjiasiravahi. ²⁰ Eta mapanereruhi ema Viya eta mavanesirahi ema Machicha te juca apaquehe, tépenayare te crusu taicha máetupiricayarehi tamutu eta juca apaquehe pecatupaire, étapa tamutu eta anuma. Macaepahayarehiva eta majarareruquenehi ema Satanás émapa ema Adán. Tichavayarehi tiuri tamutu.

Eta máepenirahi ema Jesucristo, mavacharecahi eta mámirahaviyare mayehe ema Maiya

²¹ Étiripa eti, cape juca iásinequenehi ecatianacainihi ema Viya. Vahi táurihini eta epanerurana, taicha eta íchirahi eta tamauriqueneanahi. Iávamirahuinihi epauchahini ema Viya. Epicainihi éma. Émasera mavarahahi macamitiasinaheyare eta ecatianasirainihi. ²² Eta tacahehi eta máimitesirahi ema Jesucristo te juca apaquehe. Tépenahi te crusu táichavenehi eta macaepahairayare eta etapiravanainihi, masantochiraheyareva, apaesa tacujapa ecuavamirahu te jena sáchehare eta mámirahayare te mamirahu ema Viya. ²³ Tacahe, nuvaraha étumechavayarechucha, ímianava táuri eta éhisirahi. Vahi ecúyacujéquenehava eta ecuchapirahi eta iúchucuiraya. Vahi ecuemepurureca eta esuapiraipahi eta máechajiriruva ema Viya. Tétavicavahi tasuapacarevahi nayehe namutu ena achaneana te juca apaquehe, nájina tanerejiruina. Nútiripa nuti Pablo vanairucaquenenuhi, étarichuhivare tacahehi eta nucametarairuirahi.

Ema Pablo matuparahaichuhi máechapajiricayare ena máumurivana

²⁴ Puiti núti, vahi nucatiequenehavahini eta nucatajivairahi táichavenehi eta nucaturahairahi nucametarairu eyehe eti apavasanana. Ema Viáquenu Jesucristo, ichape eta macatajivairahi te crusu víchavenehi víti. Tatiarihichahasera eta macatajivairayarehi. Eta juca nucatajivairahi, tácutihini eta macatajivairahi éma. Nucatajivanumapaipahi íchavenehi eti machichanaveana, eti vichamurianahi. ²⁵ Taicha tituparacanuhi ema Viya eta néchapajiricaheyarehi emutu éti. Nuvanecasivahi mayehe eta nímitusiraheyare tamutu eta máechajiriruvana.

²⁶ Nímimaticahayare tamutu eta juca mapanereruanahi ema Viya, tayumurevainihi eta táitaresirahi acane, énaripa ena viáchucanaveanaini vahi támutuhini náimatihini. Puítisera ema Viya tímimaticahaviripa víti machaneranahi tamutu eta júcana. ²⁷ Tétavicavahi táramicarevahi maicha ema Viya eta máimimatichirahavihi eta juca tayumurevainihi ímitucasivahi puiti eti apavasananahi. Eta juca tayumurevainihi, émahí ema Jesucristo títecapauchaheripahi tiávahácheripa. Puiti, ejacapacarépahe me Viya. Ecunevainapa maicha ema Jesucristo eta esiapiraya te mávasa anuma. ²⁸ Eta tacahe, émaquenehi ema Cristo véchajisihahi víti te vicametarairu. Étaripa te viconsejareca, te vímiturecapahi nayehe namutu nácani achaneana vicaimunaqueneanapahi, émarichuhi véchejisihahi, apaesa nácaicutiaraini tamutu eta mapanereruanahi ema Viya, náchemarahivacahini táicha. Vivaraha ítamuturucaripahini te táitecapapa eta sache vímeresiraheyare te mamirahu ema Cristo. ²⁹ Eta tacahe, nupamicavahi núti eta nucaemataneasirahi ema Viáquenu. Émaquenehi tétumechanuhi eta nuratahairahi tamutu eta nímitusirahehi emutu eti nuchamurianahi.

2

Ema Pablo tímereuchava eta máemunasiravacahi ena machamuriana

¹ Núti íchapemuríhi eta néñamiravahi eyehe eti numaimatiqueneanarichaha, énapa ena apamuriana vichamurianahivare ticavasanahi te Laodicea. ² Nuvarahahi ámutuhini étumechavahini te esamureana. Evapinavahini te iúrujisiravana taicha eta émunasiracacahi. Nuvaraha yátupina ímati ema Cristo, émahí araenumahi vanairucahi me Viya. Nuvarahahivare ímatiequenehayare eta mapanereruanahi ema Viya apaesa íchapenahini eta ecasiñairavainahini eta mayehe. ³ Nájina mácuti ema Cristo, ema tíjaracahavihi tamutu eta vítapajjiasiravanahi, véchemarahivacahi maicha. ⁴ Eta tacahe, nutuparacachea: Vahi ecuisapava nahapapicaha ena tiyururahiana. ⁵ Tayanapane vityerhicacahi, vahi vímahacacahini, núsismurehisera ticutirinehi étainahini návihahini eti ara eyehe, néchirahi eta tamajinairahi íchiravainahini, yátupíhi esuapa eta éhisirahi ema Cristo.

Vímianava tauri eta véhisirahi ema Jesucristo

⁶ Tásiha puiti, tauri eta iávahásiraina ema Viáquenu Jesucristo. Ímianava eta ítauchira eta íjarasiravahi éhica éma. ⁷ Etupihayare muraca mayehe ema Cristo, apaesa tápajucavapaipa eta ítapajjiasiravaina, ímatirainapáipaicha éma. Émuracachavayare eta éhisirahi éma, yátupina esuapa taicha tacahehi eta ímitucasivanahi. Vahi ecucainajiruva eta ehasulupayachiraya ema Viya.

⁸ Échapavayaresera, taicha nararihi ena navarahayare tiyurucacheana, navarairaya éhica eta napanereruana. Vahi ecuisapava náemejecapavachahe éna. Machu náimitucahe eta nayeherepiana, náehiruhi ena náinapureanaini ticayeherepianahi tásihaquenechucha te napanereruana éna. Eta júcana, tájina tavehapica apaesainahini eta mámiturapiana ema Cristo. Vahi ecusuapa ena nani.

⁹ Ema Viáquenu Jesucristo, jéhevare éma, yátupiquenehi santo. Taicha ticuticacanhahi ema Tata Vicaiyaquene eta nasantuvanahi éna. Ticuticacanhavare eta náurivahi, étapa eta náitupajijiasiravahi. ¹⁰ Éti apanavare, puiti eta iávahásiraripa ema Cristo, tisantuchahevacaripahi éma. Tájinapa ácamunuhini puiti eta iúchucuirapa. Taicha ema Viáquenu, téchavacahi ena ángeleana. Éma, túmepanahi nayehe ena éreanana. ¹¹ Ema Cristo, timarcachaheripa eta iáchanevana puiti eta iávahásiraipa éma. Ticamitisaaheripahi eta tajamurachaqueneanainihi eta iáquehe tavarahaqueneanainihi icha eta tamauriqueneanahi. Jéhevarequene, eta emarçahi éti, ecachuricahi eta nacamarçairahi ena israelítana náechatirirahi eta náquehe. ¹²⁻¹³ Éti, cape juca iásinequenehi, vahi ímatihini ema Cristo. Vuíchaha ecamarçahini mayehe. Tímicutijiricavahi táepenaquenénahini eta iáchanevana taicha eta epecaturanahi. Tímicutijiricavahi épenaquenénahini, ecaecarasihini tacutihí eta macaecarasirahi ema Cristo te máecari. Púitiserá, eta ecasiñairaripa ema Jesucristo, ema Viya macaitaresinaheripa eta iáchanevana. Puiti ticutiripa écheperénaripahini éti, tacutiripahi eta máechepusirahi ema Cristo, maicha ema Maiya. Eta ecaicachasiraripa eta mayehe ema Cristo, táicutirarahi eta juca macaechepusiraripa eta iáchanevana. ¹⁴ Taicha ema Viya, eta máimairahi eta macatajivairahi ema Machicha máepenirahi te crusu, tiperdonachahaviripa eta vipeaturana. Énerichuvare macaepaharipa eta vitapiravana tímicuñacahaviyarehini. Puiti matapiravarehviripa eta máimairahavíhi éma. ¹⁵ Eta máepenirahi ema Jesús tayehe eta crusu, máitahacavacaripa ema Váinaraji énapa ena machanerana éreanana. Tájinarinehi natumevainahini eta mayehe. Puiti táquijicavacahi éna, te vipiaraca te máijare ema Jesús. Vaipa tipauchahavi anaimahi.

Ema Pablo mavanecavaca vahi nacusuapa ena tiyururahiana

¹⁶ Puiti nutuparacahe: Vahi ecusuapavaca ena navarahahi éhica eta nayeherepiana, apanapanenejiqueneana, nácani vahi tísapaheanaimahi enica eta apamuriana tinica-careana. Váhivare ecusuapavaca te ticamesajiricaheanahipuca epicaucha eta napies-tarana. Étaripa eta ecaematanerana te aracheruana caje, navarahaya epicaucha. Étaripa eta sache sávarumuhuana, navarahayareva epicaucha. ¹⁷ Tamutu eta júcana, vaipa tásuapacare taicha náchucarapianachucha éna. Étasera eta juca máechajiririvanahi ema Cristo, jéhevare eta yátupiqueneanahi. Tisuapacareanahi. ¹⁸ Eta tacahe, vahi ecusuapa ena nácani navaraha típicaracaheana, te náichahepuca: “Vahi tíuri eta juca éhiruhi”. Váhivare ecusuapavaca, te ticamesajiricaheanahipuca éstacava, étapa eta ejirauchirainaji ecasiñairainaji ena ángeleana. Éna náimijachahi tacarichu eta ejaçapacareya me Viya taicha eta juca. Ena nani, ticasinávavaicanahi taicha tímijachavanaripahi máechajicavacahiji ema Viya. Vaipa navaraha nacainajiru eta navayuacasivanahi. Tamutu eta juca tímereuchavacahi éna, máehicarahanahi ema Cristo. ¹⁹ Vítiserá vimutu víti apanapanenejiquenehavianahi véhicanahi ema Jesucristo. Eta víúrujiasiraipahi éma, vaipa apaimamajihavinahini máicha. Tímicutijiricavaipahi mácani achane máitucahi eta macajurusirahi ena machichanaveana. Náurujiacahi namutu nácani machinanaveana, machinenana, mámarinaveanapuca. Émanarichuhisera ema téchahi. Ene vícahehi víti véhicanahi ema Cristo. Macarichu ema téchahavíhi. Vímicatajiricacahi vicatijiricacahivare vimutu maicha ema Viya.

²⁰⁻²² Puiti, eta éhisiraripa ema Cristo tímínajicaheripa eta éhisirainihi eta nayeherepiana ena achaneana tamauriqueneana. Tacahe, vaipa ecusuapa ena ticamesajiricaheanahi te navanecahepuca: “Éhichavi eta viyeherepiana tayehe eta vinisiraya, apaesa ejanucare eta me Viya”. Machu navayuacache ena nani, taicha tamutu eta juca nayeherepianahi, tájina vahi étaparacaina tayehe eta viyapiraina te anuma. Eta juca nayeherepianahi, tásihaqueneanachucha te nachuti ena náchucanaveanaini. ²³ Eta juca nayeherepiana cútirinehi yátupiquenénahini tásihaquenénahini eta me Viya. Tásihasera vahi táimanaca. Ichape tayerehi eta máechajiririvana. Ena nani, tímijachavanahi nacurisamurechahi ema Viya. Tépiyacavanaripahi mánsuanahi eta náichirahi eta muraca penitencia. Téstacavanapa nájararecaripa eta naeche tayehe eta tacatiquene. Tamapurujihisera eta náichirahi, náviraichuhi náichahi eta tajamurairavahi eta náqueheana.

3

Tihapasamurecachaviyare eta vivarairayare véhica eta máurivahi ema Cristo

¹⁻² Puitisera arairupa eta itaresira maicha ema Cristo. Étainapa tihapasamurerecaheyare eta máurivahi éma étapa eta itecapauchira éma tayehe eta anuma máejasihahi te mavaure ema Maiya. Vaipa étaimahi tihapasamurerecaheyare eta eyeherepianainihi tamauriqueneanaini. ³ Taicha íjararuvaipa eta ínjisirayare eta júcana. Puiti ticaitarecaheripa éma táichavenehi eta íávahásiraipa ema Jesucristo. Íúricahi puiti. Vuíchahasera ímahahini tamutu eta táetaviuchiraya eta iúricarevaya. ⁴ Téhesera te machava ema Viáquenu Jesucristo, máitsivachainapa eta íáqueheanayare, tajarahiqueneanayare. Tásiha, ecachanenapaipa éma. Tétavicavaya eta viúricarevaya vimutu máicha.

Vínajicayare eta viyeherepini eta viásinequene

⁵ Tásiha puiti, ínjaicainapa eta eyeherepianaini tamauriqueneanahi. Nacuijapa nacuveha esu apana esena. Vaipa ecupanerecha eta panerercana tamauriqueneana. Vaipa ecujamuracha icha eta tamauriqueneanahi. Vaipa tihapapiricahemahi eta ecaimahaqueneána, taicha ena titanucanahi eta juca, nacutíhi nácani ticasíñarajiana. ⁶ Ena masuapajirairahana, náichahi tamutu eta juca tamauriqueneana. Étapa tímicuñacayarehi éna, taicha táimiyusemacaichucha ema Viya. ⁷ Éti apanavare étainichuhivare íávacuhainihi cape juca íásinequenehi. ⁸ Puitisera ínjajica tamutu eta júcana: esemarajivana, ecatanaraivana, evainarajivana, iúmeharaivana, étapa eta táíñemahiqueneana eta échajiriruvana. ⁹ Vahi ecuépiyaeguenehacáca. Ímereuchava yátupina eta ínjisirahi tamutu eta eyeherepianaini cape juca itaresirainihi. ¹⁰ Puiticha, amairiharipahi arairupa eta juca itaresirahi, machichaheripa ema Viya. Tajurucapaipaini eta ecutirayare éma eta masantuvahi étapa eta máurivahi éma. ¹¹ Tayanapane apavasananjihavíhi viti véhicanahi ema Viáquenu, émasera tihetamurichahaviripa viti israelítana, étipa eti apavasanana, énapa ena máicachasianana. Te mampirahu ema Cristo, vaipa apavasananjihavinahini, étanarinépa eta vímahí maicha éma. Tayanapane tájina emarcainahini te íáqueheana. Váhiserá ticachuricaheanaimahi ena ticamarcanahi. Tayanapanevare ecaquenuhipuca. Váhivaresera vicachuricahe mahi viti líbreanahi. Ema Cristo tiávahácahavihi vimutu.

Vicaravahuinapa tíuriyare eta vítaresira

¹² Ema Viya tétavicavahi eta máemunasirahehi. Eta tacahe, tinerejicahehi eti machanarayarehi éma, ecutipaipe eta masantuvahi. Eta tacahe, puiti étijiváinapa ecaravahuyare eta táurivayare eta itaresirayare. Étaviuchayare eta eجانوراivaya, émunarahiyareva. Ímrecaya eta emansuvayare. Ecamicha tamutu. ¹³ Te tatiarihínapuca eta nájecapiravaina ena echamuriana eta eyehe, vahi ecucaticha, ácayehavare paciencia. Eperdonachacacayare, ecutiyaare ema Cristo eta maperdonachirahehi éti. ¹⁴ Tamutu eta juca numetaruhéanahi, ítauchayare. Énerichuvare típajucavayare eta émunaravayare. Taicha te vémunajiricacahi, tétavicavayarehi eta viúricarevaya eta viúrujíásiracacahi. ¹⁵ Vahi ecuemepurureca eta iúrivahi maicha ema Cristo. Ísapavavare mayehe ema Cristo macanaracahe tamutu eta epanereruana. Taicha tacahehi eta máichuirahéhi, mavarahahi étanayaréichuhi eta epanereruana eta iúrujasiracacahi. Ehasulupayachahivaréni tamutu sácheana.

¹⁶ Étaviuchahini eta iúnasiráina te esamureana eta máéchajiriruvana ema Cristo. Étumechacacahini eta ímitusiracacaya eta échemarávayare. Evapínvahini te esamureana eta ejiraira te iúrujisiravana. Ejirayare eta majiriahua ema Viya, eta ehasulupayachirayarehi éma. ¹⁷ Tamutu jácani ecaematanerana, échajirisiravana, ímereuchava eta machaneraheirahi ema Viáquenu Jesucristo, íámirapaipa eta máijare. Te tamutu eta jácani ícharacavana, ehasulupayachayarehi ema Tata Vicaiyaquene.

Vímerecayare eta viútriva nayehe ena vichamuriana

¹⁸ Étiripa eti esenana ecaimaqueneanaripahi, epicauchayarehi ena ímanaveana. Esuapajirahiyare eta nayehe, taicha etuparahahi eta éhisirahi ema Viáquenu. ¹⁹ Éti apanavare eti náimanaveanahi, émunacayare ena eyenana. Vahi ecuímpipananjica éna. ²⁰ Éti apanava eti amaperuana, esuapayare ena ticachichaheana, esamararasinavaya te jácani náechajisiraheana. Te ítaucha eta juca, ecurisamurechayare ema Viya. ²¹ Énerichuva eti náiyana, vahi ecuímyusémaraca ena echichanaveana apaesa vahi nacuípuñacava eta eyehe.

²² Étiripa eti ecaquenurecanahi, esuapajirahiyare nayehe ena íáquenuanahi. Ítauchayare eta navanairipianahi. Tátupiruva te esamureana eta ecaematanerana. Vahi tácarichuimahi ítaurahiyare te natiaríhi te echacaya ena íáquenuanahi. Te nájinahípuca, tacutiyaererichu eta ecaematanerayare. Taicha ema Viya tímaracahéhi. Éma epicauchayarehi. ²³ Evapinavayare icha eta evanecasivanahi nayehe ena íáquenuana, táimicutíjiricavahi émainahini

ecaemataneaca ema Viáquenu. ²⁴ Taicha eti mamusurahehivare ema Cristo, ema tiápajucavahi iáquenuapanahi. Écharichuhi éti eta tatiarihirahehi eta ícuchihi íjaracasiyarehi eta mayehe. ²⁵ Énasera ema téjecapavanapuca, máimarasirahi ema Viya eta nájecapiravanahi. Étáinapa tímicuñacayarehi. Nájina mamunanequeneanaimahi.

4

¹ Éti apanavare eti náquenuanahi ena músuana, tiúriyareva eta ecavanairipiraya, vahi ecuimipananajicavaca. Ítauchayare íjaraca eta nacamunuqueneanahi. Échavayare éti apanavare eta máimarasirahéhi ema Viya, émahi Iáquenuquenehi.

Eta téqueneha matuparasirahavihi ema Pablo viti véhicanahi ema Viáquenu

² Puiti emutu éti, étumechavachucha eta eyujarasirahi eta me Viya. Vahi ecuyacujihini. Énerichuvare ehasulupayachaparacayare tamutu me Viya. ³ Énerichuvare ímicatacavahi eyujarauhachavahi, apaesa vítujicavapaihi víuchucuha, vímianavapaihi vímimatichahini ena achaneana eta juca tayumurevavainihi mayehe ema Cristo. Étavenehi puiti présunuhi táicha. ⁴ Nécatiacahecha ímicatacanu eyujarauhachu apaesa nítujicava nucametarairu, taicha nutuparahaichuhi me Viya.

⁵⁻⁶ Táuri eta itaresiraina nayehe ena máehicarahanarichaha ema Jesús. Tátupiruva tauri eta échajirisiravana, tapicauchacarehi. Táurivare eta ejicapiraina te natiarihinapuca nácani tiyaserecaheanayare. Ecamapuravachaha puiti juca sácheana eta ímitusiravacahi.

Eta táichecuaraqui eta máechajiriruva ema Pablo

⁷ Máimahahehinesera ema vémunaruquenehi vichamuri Tíquico. Éma, titametacaheyare tamutu eta níchararacavahi nútí taicha éma nucachanehi eta te juca návihahi. Tétavicavahi eta máimicatasiranuhi eta vícaemataneasirahi me Viáquenu. ⁸ Eta tacahe, névatacachi máiteca eta ara eyehe. Éma tímეტacaheyare eta víchararacavahi. Énerichuvare tétumechaheyare éti apanava. ⁹ Énerichuhivare névatacachi ema Onésimo némunaruquenehivare. Éma, tiásihahi eta ara eyehe. Puiti émarichuhi vichamurihi eta te juca. Tétavicavahi eta máitauravahi eta macaemataneasirahi ema Viáquenu. Ena nani apinana, éna titametacaheanayare eta víchararacavahi viti te juca víávihahi.

¹⁰ Téchajicahe ema Aristarco, ema nucutiquenehi eta nucaeratairahi. Téchajicahevare ema Marcos, ema macheji ema Bernabé. Éti écharipa eta máitesirayare eta ara eyehe ema Marcos. Te máitecapauchahépa, tiúriyare eta ejacapirayare éma. ¹¹ Énerichuvare téchajicahe ema Jesús Justo. Nacarichuhi ena nani mapanana nujaneananahi israelítana tímicatacuananahi. Nacachuricahi ena apamuriana nujaneanana vichamurianahi. Ichape eta náimicatasiranuhi eta vicametarairuirahi eta máechajiriruvana ema Viya. Ichape eta nacurisamurechiranuhi éna.

¹² Téchajicahevare ema Epafras, ema eyehe pastor. Ema maca, yátupiquenehi mavanara ema Jesucristo. Tétavicavahi eta máecharairisirahehi éti te mayujarasirana, mavarairahi ímianavahini étumechava yátupinahini ítauchahini eta mavarahaqueneana ema Viya. ¹³ Ichapemurihi eta nímarasirahi nútí ema Epafras eta máecharairisirahehi éti, énapa ena ticvasanahi te avasareana Laodicea étapa Hierápolis. ¹⁴ Énerichuhivare téchajicahe ema médico Lucas, ema vémunaruquenehivare. Téchajicahevare ema Demas.

¹⁵⁻¹⁶ Tacahe, te támutupa eta échajicuirayare eta juca nucartane, ímiamarecaya nayehe ena apamuriana vichamurianahi ticvasanahi te avasare Laodicea. Nuvarahavare échajisinanuini éna. Échajisinanuvare ema Nínfas, énapa namutu ena tiúrujicavarahianahi te mapena. Nímiamarécavahareséra eta nucartane nayeheyare namutu éna. Te táitecapauchaha, échajicuhayarevare éti apanava. ¹⁷ Piti apanavare piti Arquiipo, nutuparacaviyare: Pítauchayare tamutu eta juca pématanerepianahi, taicha eta pituparahahi me Viáquenu.

¹⁸ Nuti Pablo nútiquenepa nájuca eta juca táichecuaraquihi eta nucartane tayehe eta némechajirisirahehi. Nutuparacahe vahi ecuemitisicanu te eyujarasirana. Eyaseasinanu eta núchucuirávanéna.

Nuyaseuchaheparaca me Viáquenu Jesucristo, táetaviuchahini eta iúricacarevaya máicha. Tamutupa eta juca néchajiriruvahi e yehe.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticajare

1 TESALONISENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiamarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. Nuvaraha macatajicahehíni ema Tata Vicaiyaquene, émapa ema Viáquenu Jesucristo; náijaracahehíni eta táurivaina eta epanereruana.

Ema Pablo tiúrisamure eta máechirahi náimiyániravahi náehisirahi ema Cristo

² Viti vihasulupayachaparaca ema Viya eyehe emutu eti. Tamutu sácheana, te viyujasirana, viyaseuchahe me Viya. ³ Taicha tamutu sácheana vécharairicaheparaca eta ímeresirahi eta esuapirahi éhisirahi ema Viáquenu Jesucristo, étapa eta epamisiravahi ecaemataneacahi yátupi táichavene eta émunasirahi éma, étapa eta ecamichirahi tamutu táichavene eta ecuchapiravahi eta machaviraya. Ema Tata Vicaiyaquene máimaha tamutu eta ícharacavana. ⁴ Nuparapeneveana, éti, máemunaruvaripa ema Viya. Véchahi eta manerejisirahéhi éma.

⁵ Taicha te vímitucahepa eta máechajiriruva ema Viya tayehe eta viúchucuiraya, éti etupiruvahi ejacapa eta vimetarairuana taicha ímatíhi yátupiquenérahí mayehe ema Viya. Ema Espíritu Santo tinacasamurechahehi eta táurivahi esama eta vímitusirahéhi. Ímatihavíhi eta mavanesirahavíhi ema Viya. Ímahahivare eta viúrivahi eyehe.

⁶ Jéhesare puiti, étijivapa eta épaniravahi éhichahavi eta viúrivahi víti, vicutiyahe eta máuriva ema Viáquenu. Ecátajivanúmahi íchape taicha eta ejacapirahi eta vimetarapiana. Iúrisamurehíséra maicha ema Espíritu Santo. ⁷ Tacahe, ena apamuriana vichamuriana ticavasanahi te tinapaica eta Macedonia étapa te Acaya, eta náimairahi eta yátupirahi eta esuapirahi, étarichulí náehicahí éna. ⁸ Éti ímisamáhi eta máechajiriruva ema Viya namutu ena achaneana ticavasanahi te Macedonia étapa te Acaya. Téchacarehivare te tamutu avasareana te jácani vítecapihapahi eta juca yátupirahi esuapa ema Viya. Vaipa tácomesahíni vimetatacavacahíni éna eta esuapajiravahi éti. ⁹ Timetacahavianapahivare eta etupiruvairahi ejacapa eta vimetarapiana, étapa eta ínjásiraipa eta esiñarajanaini, équesiravaripa eta ecajúherapa yátupi ema Viya. Puíticha tépanavaripa eta ecaemataneasirahí éma. Éma, yátupiquenéhi Viya. Yátupiquenehivare eta masamaraiya. ¹⁰ Énerichuvare timetacahaviana eta ecuchapirahi eta machaviraya ema Machicha ema Viya máshíharyana te anuma, ema maca Jesús émarichu ema macaehepucasiquenehi te máecari maicha ema Maiya. Émara ticatiuchahaviyare tayehe eta ecuñaraqú náicuchíhi ena masuapajirairahana.

2

Eta máematanerepíhi ema Pablo nayehe ena ticavasanahi te Tesalónica

¹⁻² Écharichulí eti nuparapeneveana, tamutu eta náichirahavíhi ena achaneana, tímicuñacahavianahí ánaqui te avasare Filipos. Váhisera vácatsimavahíni te vítecapauchahepa ani, vímiyanavaríchucha vicametarairu taicha tétumechahávírichucha ema Viya eta vímitusirahéhi eta máechajiriruva, camurianahiníni ena ticatianacahavianapahí. Váhisera támapurujíhíni eta véjirairahéhi. Éti etupiruvahi ejacapa eta vimetarairuanahí. ³ Taicha vahí véjicapavahíni eta vímitusirahéhi. Váhivare étainahíni vipanerechapahíni eta tájiparacana tauríqueneana, váhivare vivayuaráquina eta véchajísirapahí. ⁴ Víti manerejiruhavíhi ema Viya taicha máechahí eta vítauchirayarehí eta vituparacasivayarehí mayehe. Eta tacahe, tituparacahavíhi muraca víámayare eta máechajiriruva nayehe ena achaneana eta náuchucuiraina. Étapaichulí eta juca véchajiriruvanapahí. Vahí étaina vívaraha táemmunacahívihíni nayehe ena achaneana. Vítauchahí eta mavarahaqueneana ema Viya eta vicurisamurechíhahí éma, taicha éma, máimararacahí eta visamureana. ⁵ Écharichulí éti eta vicayemaqueneanapahí, vahí vémetserajíricavapahíni eyehe. Váhivare étaina vétseraruínahíni vívereacahéhíni eta eplatané. Vitupiruvapahí eta vicayemaquenehi te mamirahu ema Viya. ⁶ Vahí vápanerechahíni náetserajícahavíhíni ena achaneana, étiripa, víratahahíníni vímereco eta vítuparahaquenehi mayehe ema Viáquenu Jesucristo. Váhisera vávarahahíni vímereco vácutihíni mácani achane ticamusura. ⁷ Véchapajiricahehíséra tacutihí

* 1:1 Ema Silas, eta májarequene Silvano te náechajiriruva ena romanoana.

eta suéchapajirisira suémunasira súcani esena ena suchichanaveana. ⁸ Ichape eta vémunasirahehi. Vimitucahehi eta máechajiriruva ema Viya eta iúchucuiraya. Víjaracavahi íchape te visamureana, vivarairahi esuapa éti apanava, taicha vémunacahehi. ⁹ Nuparapenaveana, te vinasiqueneripa eta eyehe, eta vicametarairuirahi eta máechajiriruva ema Viya, ímaracahavirichuhi éti eta vicaematanerahi muraca eta vítátijirisiravahi. Tamutuhi sácheana, yátiana vicaematanehi, taicha vahi vávarahahini vétsepanáracahéhini eta vinicaquenerépi.

¹⁰ Éti enecapaquenehahi tamutu eta víchararacavahi. Tímaracahávihi vare ema Viya. Vitupiruvahi yátupi eta viúrivahi eta eyehe eti vichamurianahi. Tájina naviyahini nayunaca ena apamuriana achaneana. ¹¹ Énerichuvare échahi eta vétumechirahehi, émanapachuhi víconsejacha vicutihí mácani achane tiuri eta maconsejachira ema machicha. ¹² Vécatiacahéhi íchape eta iúrivaina éti, ímerecaya eta macáchichairaheripa ema Viya, taicha íchuarecasivaipa mayehe eta ecachaneraya éma tayehe eta mávasa te anuma, te távihahi eta majaraiva.

¹³ Eta tacahe, vihasulupayachaparaca ema Viya eta táurivahi esama eta máechajiriruva vimetarapianahi. Éti, etupiruvahi ejacapa eta vimetasirahehi taicha eta esamirahi yátupiquenehi, tásihaquenehi ema Viya. Ímativanehi vahi vipanereruinchuchahini víti, émainapucaini mácani apana achane. Eta juca eta tíurichahehi éti esuapanahi. ¹⁴ Énerichuvare tíuríhi eta ecamichirahi eta ecatajivairahi nacatianasirahehi ena ejaneanana, ecutihí ena apamuriana vichamuriana ticavasanahi te Judea. Nuparapenaveana, ene nacahehi eta nacatajivairahi naicha ena najaneanarichu israelítana, táichavene eta náehisirahi ema Viáquenu Jesucristo. ¹⁵ Ena nani nujaneanana nacapacahi ema Viáquenu Jesucristo nacutihí ena náchucanaveánaini eta nacapasiravacahi apaícape ena profetanaini. Tipanajiricahavianavare víti. Ena nani náimiyusemacahi ema Viya. Váhivare návaraha nasamahini ena apamuriana achaneana eta máechajiriruva ema Viya. ¹⁶ Taicha te vivarahainipa vimitucavaca ena apavasanana apaesa náuchuchahini éna apanava, nacatichavare ena nujaneanana eta vimitucavaca éna. Tíchejimiráuchahavianapa. Eta tivíuchahi, tivayuchavapaichucha eta natapiravana. Ema Viya vaipa macamichahini eta náejecapirávana. Púitiserá táitecapáuchainapa eta náicuñaya máicha.

Éma Pablo mavaraha tíápechava máejiravaca ena machamuriana

¹⁷ Nuparapenaveana, tayanapane viyerehicacahi puiti juca cájeana, vahi vímahacacahini, tanasíhiserá vicaimairuhehi te viúquihana. Vivarahaine víjahúchavahini vítecapaucháhe vímahahéhini. ¹⁸ Nútiripa nuti Pablo, íchapemurihineni nuvaraha níteca eta ara eyehe, énapa ena apinana nucompañeroana. Émasera ema Satanás tíchejimiráurucahávi chupúca jácani. ¹⁹⁻²⁰ Véñamavahi víti eta eyehe taicha vivarahahi tánasíhíni eta iúri va eta machimápirayare eta machaviraya ema Viáquenu Jesucristo. Tásiha, víti vicuchapavainapa eta víjacapirayare eta vícuchíhi mayehe éma. Viúrisamurénapa víti te jena sache, íchavenéhi éti.

3

¹⁻² Eta tayerevaipahi eta vimaimanasirahehi, tétavicavahi eta véñamiravahi eta eyehe. Vaipa viúrisamuréhini. Vivarahaipaicha vecha tájahapuca eta ícharacavahi. Tásiha, vipane-rechapa vévataca ema vichamuri Timoteo, máiteca máímahapanáhe. Vinasipa víti vicarichu te Atena. Taicha ema maca Timoteo, émarichuhi mavanara ema Viya, émarichuvare vicutiquenehi eta vicaematanerahi tayehe eta máechajiriruva ema Viáquenu Jesucristo. Nuvanecahi tímícatapanáheyare témuracacháheyare eta esuapajiraivaina, ³ apaesa nacuija nacuchavacuejehava tayehe eta ecatajivairana naicha ena ticitianarahiana. Écharichuhi éti eta vicatajivairaya táichavene eta véhisirahi ema Jesucristo. ⁴ Váhiserá táramicarehi eta juca, taicha vimitacahévanéhi te vinasiquenerichaha eta eyehe, eta vicatajivairayarehi. Jéhesaréinehi títauchavahi púitiripa, ímaharipahi éti. ⁵ Eta tacahe, tétavicavahi eta néñamiravahi núti eta eyehe. Vaipa núrisamuréhini íchavenéhi éti. Tacahe, nuvanecapa ema Timoteo máímahapanáhe te enasirichuhipuca eta éhisirahi ema Jesús. Taicha nímicauyayahehi máquipaicahehini ema Satanás, támapurujihini eta vicaematanesiráipa ema Viya.

⁶ Púitiserá eta machaviraipa ema Timoteo, másíhairahi eta ara eyehe, timetacahavipa tájinairahi íchiravainahini eta éhisirahi ema Viáquenu Jesucristo, éta pa eta émunasiracacahi. Timetacahavivare eta écharairisirahávihi émunasirahavíhi víti, evarairahi íjahúchavahini ímahahavi. Vicuticacahi eta vivarairahi vímaháhe víti. ⁷⁻⁸ Eta tacahe, nuparapenaveana, véchararaháinehi eta visamairirisirahehi eta táurivahi eta éhisirahi ema Viáquenu. Tacamitiacarine eta véñamiravahi. Étumechahavirinehi eta vicatajivairana. Tichavarinehi eta viúrisamuréva. ⁹ ¡Ichape eta vihasulupayachirahi ema Viya táichavenéhi eta iúrivahi! ¡Tájinarine tácutihini eta viúrisamurévahi mayehe ema Viya, íchavenéhi éti! ¹⁰ Tamutu

sácheana, yátiana, viyujaracahi mayehe ema Viya, viyaseacahi vítujisirávainahíni viápechava vímahahe. Vímitucahehíni eta apamuriana títucacareana tayehe eta juca véhisirahi ema Jesús. Támutuhíni ítuca.

¹¹ Eta tacahe, viyaseacahi ema Tata Vicaiyaquene émapa ema Viáquenu Jesucristo nájaracahavíhíni eta vítujisiráváina víteca véjirapanáhe. ¹² Énerichuvare macajurucahíni ichape ema Viya eta émunaraváina nayehe ena echamuriana, énapa ena apamuriana achaneana, tácutihíni eta vémunasirahéni víti. ¹³ Májaracahéni táuriváina eta esamureana tacuíja etapiraváina, máepachinachahíni eta iáchanévana apaesa ecurisamurecha ema Tata Vicaiyaquene te jena sáchezare machaviraya ema Viáquenu Jesucristo, másíhairaya te anuma, mámirayarepahi ena apamuriana manerejiruanahí.

4

Mavarahe ema Viya táuri eta vítaresiraina

¹ Tiuri puiti, nuparapenaveana, vituparacahecha muraca te májare ema Viáquenu Jesucristo. Táuri eta ítaresiraina puiti juca epaisirayare. Te tauri eta ítaresiraina, ecurisamuréchayare ema Viya. Puiti iápajupanávinapáipa eta iúrivaya. ² Ítucarijáhi eta juca ímitucasivanahí viyehe. Étarichuhi vivanecasivanahí mayehe ema Viáquenu Jesucristo.

³ Taicha eta juca mavarahequenehi ema Viya, tiápajucavayare eta iávahásirahi éma. Vaipa ecuquicha eta pecatuana. Nacuíjapa nacuveha súcani apana esena. Ésuripa esu esena, vahi sucuveha ema apana achane. Énaripa ena echichanaveana, tacuíja eta natuhusiváina. ⁴ Nacuchapa eta náitachiraváina yátupína te mamirahu ema Viya. Emutu éti, yátupína eta émunasiráina ena eyenanaveana. Tauri eta ítaresiraina te epenana. ⁵ Vahi ecucutípa ena ajairana esenamareana. (Éna náichahí eta juca taicha eta namaimatirahí ema Viya.) ⁶ Nacuíja nacuveha esu mayena ema mácani echamuri. Taicha ema Viya, yátupi eta máicuñasirayare nácani ena tíchanahí eta juca. Étarichuhi eta vímiturapianahí eyehe cape juca te vítecanípa eta ara eyehe. ⁷ Taicha víti máichuhaqueneánaripa ema Viya, mavarahe tíurínayare eta vítaresiraya, vaipa víchaimahí eta juca tamauriqueneana. ⁸ Tacahe, ema mácani tépuruhí eta juca vímiturapianahí, máepurhívare ema Viya; taicha mavanairipianahí eta juca, vimetacasivahí víti mayehe ema Espíritu Santo, eta mávahásirahavíhi.

⁹ Puiti numetacahe nútí: Tájínapa vaipa néñamava eta eyehe eta émunasiracacahi, taicha ema Viya tíjaracaheripa eta émunasiracacahi. ¹⁰ Vaipa néñamavahíni taicha nusamairiricaheipa eta émunaravahí nayehe ena echamuriana títecapauchaheanahí tíásihanahí tayehe eta táunavanahí eta iávása Macedonia. Nuparapenaveana, puiti vituparacahecha iápajucavayare éti eta émunaravaya. ¹¹ Énerichuva viápechava vituparacahe tauri eta ítaresiraina. Échapajíríca eta émataneana. Ecaemataneacava yátupína, eviyihayare eta ecamunuqueneana tásíhaqueneánayare te evahuana, ¹² apaesa tacuíja ecucamunu te epenana. Te ítaucha eta juca, típícauchaheanayare ena apamuriana achaneana.

Vahi téñamavacareana ena vichamurianahíni náepenaqueneana taicha tíápechavanayare títarecanayare

¹³ Nuparapenaveana, énerichuvare vivaraha vimetacahe eta náichararacavayare ena vichamuriana náepenaqueneanaripa. Vahi ecucatisamurevaya nayehe. Ena apamuriana achaneana ticatisamurevanapa te náecarapana ena náepenaqueneana, taicha vahi nácasíñavahíni me Viya, nacunevahíni eta nápechiravaya téchepecana te náecari. Vahi ecucáhe íti. ¹⁴ Víti visuapahí eta máechepusirahí ema Jesús te táequenepa eta máepenirahí. Tásíha, visuapahívare eta macaechepusirahavíya ema Viya te vépena, vicáchanénapa ema Jesús víti véhicanahí éma. ¹⁵ Eta tacahe, vimetacahe eta juca vímitucasivanahí mayehe ema Viya. Te machavapa ema Viáquenu Jesús, te vuíchahapuca vicuepenahí víti, vahi vicánapucavaimahí nayehe ena náepenaqueneana. ¹⁶ Taicha émarichu ema Viáquenu tíucupaicaya tíchavayare, tíásíhaya te anuma. Típiaracaya muraca tíchuarecaya. Ema Arcángele énerichuvare típiaracayareva. Tícaemayareva eta machúja ema Viya. Tacahe, téchepecanainapa tínapucanaya ena náepenaqueneana ena tísupajirahianahí mayehe ema Cristo. ¹⁷ Tacahe, víti vítareruanaíchaha víyanainapa. Vimutu vicáchanénapa ena náepenaqueneánahí. Viácápajicánapa ema Viáquenu te anuquehe te távíhahí eta úcáji. Tásíha, máichecuarequireyare eta vicachaneraya ema Viáquenu. ¹⁸ Eta tacahe, emetajiricayare nayehe ena echamuriana tamutu eta juca vímiturapianahí, apaesa nacurisamurechavaya éna apanava.

5

Tíáramicareyarechucha eta machaviraya ema Viáquenu

¹⁻² Nuparapenaveana, vahi ecuemitisicava. Ecunevaicha yátupina, taicha téchacareipa eta táramicarevaya eta máitesirayare ema Viáquenu. Tacutiyaie mácani tiámereca te yati, nájina tinecapaina. Ene tacaheyare eta máitesirayare ema Viáquenu. Váhiserá vécha tájamuhuyarepuca. ³ Énaripa ena achaneana vuíchaha náemetecaimahi eta tánehiraripa eta máitecapiraya. “Viúririchucha puiti. Tájina víchiravaimahi” nacaheyare éna. Vahi tinecapauchavanaimahi eta táitecapauchiraya eta náicuñayare tacutiyaie esu súcani esena ticajari, títahúchavapa ticati eta sujuhe eta suínasiraya. Ene nacaheyare éna. Tájina najunaiyaimahi. ⁴ Étiserá, nuparapenaveana, écharipa eta juca. Vaipa iáramecaimahi te jena sache máitecapiraya ema Viáquenu, taicha tamutu sácheana ecuchapahi eta máitecapiraya. ⁵ Taicha víti víavíhahi te majaraivahi ema Viya, víti vipaicahi te sáchemuhu. Vahi táíñehavina eta yati, taicha vínajicaipa eta tamapicuquene. ⁶ Eta tacahe, tavaraha vicuneuchava tamutu sácheana, vijaneasiravainahini muraca. Váhini vicucutihini ena tivayuchavanahi tímaccarácavana, tájina náechaquenena éna. Vítiserá vijaneacavaya tamutu sácheana, yátiana. Tájina víchiravaimahi. ⁷ Ena achaneana, tímaccarácavanahi te yátiana, ena apamuriana ticávaháracavánahi te yátiana. Vahi najaneacavahini éna. ⁸ Vítiserá tamutu sácheana vicunevayare. Tiúriyarehi eta vipaisira, tájina víchiravaimahi. Yátupina eta véhisira ema Jesús. Vímiyanavahini eta vémunasiracacaina. Vácasiñavahini eta macuchucuirahaviya éma. Tájina vahi vicuyacujiequenehava eta vicuchapiraya eta jena sache. ⁹ Taicha ema Viya manerejiruhavihi eta macuchucuirahaviya máichavenehi ema Viáquenu Jesucristo. Vaipa vicaicuñaimahi. ¹⁰ Ema Jesucristo tépenahi te crusu vítivenehi, mavarairahi vítarecayare vicachaneyare éma. Te máitecapa éma, macaechepucainapa ena náepenaqueneana víchamurianaini. Tásiha, víti vítareruanaichaha tihetamurichahavinapa, taicha mavarahahi vicachaneyare éma. ¹¹ Eta tacahe, étumechacaca, ecaticacavare. Núti nucasiñavahi eta eyehe eta íchirapaipa puiti eta juca.

Emá Pablo tímiyanava eta maconsejachiravaca ena machamuriana

¹² Nuparapenaveana, énerichuvare vituparacahe eta epicauchiraina ena víyarahana pastoreana taicha ena ticonsejachaheanahi, tímitucaheanahi eta juca éhisirahi ema Viya. ¹³ Échapajiricavacaya éna. Émunasinávaicha, taicha éna tíurihi eta náimicatasirahehi. Tacuija ecuchiravaina éti eta nayehe.

¹⁴ Énerichuvare vituparacahe, nuparapenaveana, epamicayare muraca nacaematane ena plújuana, vahi náesachahi ticaemataneana. Énerichuvare étumechavaca ena tiyacujirihana. Ena nani títanájiricavanahi, muracaina eta ímitusiraina. Ecayehyeresera paciencia nayehe namutu.

¹⁵ Échapavayare. Títuricati natarihína navaraha titupiacacheana, vahi ecujicapa. Váhivare ecuitsicava. Ímerekayaresera eta iúrivaya nayehe ena echamuriana, énapa namutu ena apamuriana achaneana.

¹⁶ Íúrisamurerecaya tamutu sácheana. ¹⁷ Vahi ecucainajiruva eta eyujarasirana mayehe ema Viya. ¹⁸ Tamutu jácani íchararacavanahi, ehasulupayacha ema Viya, taicha eta mavarahahi ema Viya ecaheyare eti éhicanahi ema Viáquenu Jesucristo.

¹⁹ Váhivare ecuemepurureca eta mavarahaqueneanahi maicha ema Espíritu Santo eta eyehe. ²⁰ Te esama nácani téchajisihanahi ema Viya, vahi ecuepuru. ²¹ Vahi ecuemunasicava. Epanerechinavayare te tájahapuca jácani esamaqueneanahi, ímahaqueneanahi. Éhicaya eta táuriqueheana. ²² Téhesera vahi tíurihi, vahi ecuisapava, taicha eta tauriqueheanahi.

²³ Tiuri puiti, májaracahéni ema Viya táurivaina eta epanereruana. Yátupinahini tacujahini ecuchiravaina eta iávahásirahi éma. Majaneasinahehíni eta iáchanavana, eta iáqueheana. Tacuija eta etapiravainahini te machavapa ema Viáquenu Jesucristo. ²⁴ Taicha éti máichuhaqueneanahi éma. Yátupi eta macasiñacarevahi. Máitachayareva tamutu eta juca.

Eta téqueneha matuparaha ema Pablo

²⁵ Nuparapenaveana, ímicatachavi eyujarauchavahi me Viya.

²⁶ Échajisinhavi namutu ena víchamuriana.

²⁷ Nutuparacahe te máijare ema Viáquenu échajicuha eta juca vicartane te namuri ena víchamuriana apaesa námutu nasama.

²⁸ Nuyaseachaheparaca me Viáquenu Jesucristo táetaviuchahíni eta iúricacarevaya - máicha.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticajare **2 TESALONICENSES**

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiamarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. ² Nuvaraha macatajicahehíni ema Tata Vicaiyaquene, émapa ema Viáquenu Jesucristo; náijaracahehíni eta táurivaina eta epanereruana.

Ema Viya máicuñacayare ena ticapecaturarahiana te táitecapapa eta machaviraya ema Cristo

³ Nuparapenaveana, tatuparaca vihasulupayachaparaca ema Viya, taicha visamairicahi eta tápajusiravapaipaicha eta esuapirahi ema Viya. Tajurusirapaipahi eta émunasiracairahi. Eta tacahe, vihasulupayachaparacahi ema Viya. ⁴ Tájinarine tácuti eta vicajamurairahehi nayehe ena vichamuriana te viúrujisirávana te jácáni vítecapahapahi. Vimetacavacapahi eta táimianirávahi eta éhisirahi, ecamichirahivare tamutu eta nacatianasirahéhi ena achaneana étapa eta ecatajivairana, táichavene eta éhisirahi ema Viya. ⁵ Tímararacahehisera ema Viya eta ecamichirahi eta ecatajivairahi. Máimerecahi éma eta máuriva, máitachirahi tamutu. Éma tijacapaheyare eta esiapirayare tayehe eta mávasa.

⁶ Máimaháinepaséra ema Viya eta máicuñasiravacayare ena ticitianacaheanahi éti, taicha macarichu éma ticituparahahi juésyarehi téchayarehi. ⁷ Étiserá, ticanaracaheyare ema Viya eta ecatajivairana, viciticacainapa eta vinarasirayare te mamirahu ema Viya. Vinaracainapa vimutu, te máitecapapa ema Viáquenu Jesús, mápechiravaya titeca, másiháiraya te anuma. Te jena sácheyare, mámayarepahi ena mayeheana ángeleana, tíñehianainapáipa máicha. Tacutinapaipa eta ichapequene yucu eta máucupaisirayare. ⁸ Eta tímitecayare éma, máicuñacayare ena váhiquene návarahahíni náimati ema Viya, váhivare návarahahíni nasuapa eta máechajiriruva. ⁹ Ena nani máehicarahanahi ema Viáquenu Jesucristo, ticaquijianainapa eta te infierno. Váhivare nacamichahíni náimararaca eta mamira taicha táetaviuchahi eta máíñehivahi. Tájina náuchucuiraimahi. ¹⁰ Te jena sácheyare te máitecapapa ema Viáquenu, víaramimicainapa ichape eta mayehe vimutu viti manerejiruanahi. Tétavicavaya eta viconachirainapa éma. (Éti apanava etiarhiyarehi, taicha esuapahi eta vímiturapianahi.)

¹¹ Éta tacahe, tamutu sácheana te viyujarasirana, viyaseuchahehi me Viya eta ímiyaniravaina eta iúriava, taicha éti íchuarecasivahi eta mayehe. Énerichuvare viyaseuchahe me Viya eta máijarasirahéna eta ítupajijíásiraváina tayehe eta juca ématanerepíhi táichavenénahi eta esuapajiravahi. Eta juca, ichape tacurisamurecha ema Viya. ¹² Tásiha, ena apamuriana achaneana nacunachayare ema Viáquenu Jesucristo táichavenéhi eta náimairahi eta íchirahi éti eta táuriqueneana. Énerichuvare, éti ecunachacarénapa me Viya, taicha tétavicavahi eta máemunasirahéhi, émapa ema Viáquenu Jesucristo.

2

Ema Achane Váinarajiquene

¹⁻⁴ Puítiripa, nuparapenaveana, nariríhi ena tépiyaequenehanaripa ema Jesús, náimijacharípa matarihirípa, tichavarípa puítí. Vituparacaheca vahi ecusuapa nácani tépiyahirahianapahi. Tayanapane nácahepuca: “Eta juca vimetacativasahi me Espíritu Santo”. Nácahepuca: “Ema Pablo tímítucahavíhi eta juca”. Te náepiyequenehahavípuca náimechahepuca eta carta, náimijachayarehi tásihaquene viyehe, váhiquenesera ecusuapavane. Váhi tacuimipanererecahe eta juca. Váhivare ecuarameca. Taicha te máitecapa yátupina ema Jesús, ticurujicahávinumayare viti manerejiruanahi.

Nuvaraha numetacahe eta apana. Te tánehipaicha eta máitesiraya ema Jesús, ena achaneana vaipa napicauchaimahi ema Viya. Náepuruinapa eta máechajiriruva. Tásiha, tímerecaváinapa ema Achane Váinarajiquene. Ema maca achane, macatichainapa masama eta máijare ema Viya. Étarípa eta nasiñarajiana ena achaneana, váipavare máuricaimahi. Macavanairípinapa ena achaneana te tamutu avasareana náepuyumirauchayare éma. “Nuti Víyanu. Núti ecasiñayare” macahénapa. Masapíhainapa, ticaejacavainapa tayehe eta Templo. Téhesera támutupa, yátupiquenenapa eta máicuñayare muraca.

* 1:1 Ema Silas, eta máijarequene Silvano te náechajiriruva ena romanoana.

⁵ Échavarichuhi éti eta nímítusiraheparacahi cape juca te návihaichahahi eyehe. Numetacahéhi eta táichararacavayarehi. ⁶⁻⁷ Puiti ena achaneana, nararihipa tivainarajichavanapaipahi. Vuíchahasera máisapahini ema Viya navayuchavahini. Mararihi ema maneruhi tíchejimiráuchavacaríchaha. Eta tacahe, vuíchaha máuchujicahíni máimerecavahíni ema Achane Váinarajiquene. (Éti ímatichuhi ema tíchejimiráurucahi.) Tacahe, ema Viya máisapainapa térajícava ema tíchejimiráurucahi. ⁸⁻¹⁰ Tásiha, mapaenumavainapa tímerecavayare ema Achane Váinarajiquene. Tuparairucayare mayehe ema Satanás. Éma, tijaracayarehi eta máitupajijíasiravayarehi. Tamutuyare máimereca eta tíaramicareana tacutiyaare yátupiquenénahíni mayehénahíni ema Viya. Ema maca, máetaviuchainapa eta mavayuraiva nayehe ena achaneana. Éna, tísapavanainapa náehica eta táífehiqueneana mavayuraquianapahi. Váhisera máyerémahi. Tiúcupaicavanéna ema Viáquenu Jesús. Tiáramicarénapa eta majaraivayarepahi. Te máchajurapa, máquipaicainapa macapacainavarepa ema Achane Váinarajiquenéni. Tacahe, ena nani achaneana máiturevanahi témitiequenehanainapa. Ticaicuñanainapa taicha vahi návarahahíni náehica eta yátupiqueneana tíuriana echájirirucavana. Te nasupahini, tiúchucuhanahini tayehe eta ecuñaraqui. ¹¹ Taicha eta namasuapirahi ema Viya, máisapayarehi ena nani achaneana nasuapa eta mavayuraquiana ema Achane Váinarajiquene. ¹² Tacahe, namutuyare ticaicuñanayare éna, taicha vahi návarahahíni nasuapa eta yátupiqueneana vímiturapiana. Navapinaichucha eta náichiraya eta tamauriqueneana.

Tiúchucuhanayare ena téhicanahi ema Viya taicha manerejiruanahi

¹³⁻¹⁴ Étísera, nuparapenevana, máemunaruanahi ema Viya. Vítí tatuparaca vihásulupayachaparácayare ema Viya íchavenéhi éti, taicha manerejiruhehi ema Viya te tépanavainapa. Táitusiava, te esamapa eta vimetarairuhi, etupiruvapa ejacapahi; taicha esamapa eta máichuirahéhi éma. Éma ticuchucaheyare taicha ímíyanavahi esuapa eta yátupiqueneana máimíturapiana ema Cristo. Émapa ema Espíritu Santo máimíyanava eta mávahásirahehi, májaracaha eta esantuvainapaipaicha puiti juca ecajúheyaare. Tásiha, ítujuvainapa eslapa tayehe eta mávíhahi ema Viáquenu Jesucristo, ímahainapa eta majaraiva.

¹⁵ Tiuri puiti, nuparapenevana, ímíyanava eta éhisiraina ema Jesucristo. Vahi ecuemitisica eta vímiturapianahi, te vimuturichaha eta eyehe, étapa eta juca véchajiriruvanahi te carta, vémevataruanahi eyehe.

¹⁶ Nuparapenevana, tétaavicavahi eta máemunasirahavihi ema Viáquenu Jesucristo, émapa ema Tata Vicaiyaquene. Tayanapane vahi víuríhíni, énasera navarahahi ticurisamurechahavianaya. Tásiha, vicunevainapa eta víuricacarevaya, máichecuaraquirénapa náicha. ¹⁷ Puiti nuvaraha esamavaini éti eta nacurisamurechirahe te esamureana. Náetumechareréni eta ímíyaniravaya icha eta táuriqueneana, táurihivaréni eta échajirisiravana.

3

Ema Pablo mayaseacavaca eta nayujarauchiraina me Viya

¹ Títecapa, vivaraha vituparacahe puiti, eti nuparapenevana: Eyaseuchahavi te eyujasirana mayehe ema Viya. Tasuápacareváiinahíni muraca nayehe ena achaneana eta vimetarairuana máechajiriruvana ema Viya, tácutihini eta esupirávanehi éti. Táitecapauchavanehíni ena ticvasanahi te tayerehiqueneana te juca apaquehe. ² Énerichuvare, eyaseuchahavi macátíuchirahávinahíni ema Viya nayehe ena achaneana váinarajiqueneana tipuarahiana. Taicha camuriana ena masuapajirairahanahi me Viya. ³ Váhisera táeñamavacarehíni eta máurivahi ema Viya eta viyehé, yátupíhi eta máítauchirahi tamutu. Tétumechaheyare éma eta ímíyanavairaya. Tijaneacaheyareva mayehe ema Váinaraji. ⁴ Vítí vicasiñavahi eyehe eta esupirahaviya tamutu eta vitupararuheanahi taicha éti éhícahi ema Viáquenu, táicha esuaparipa eta tánapureanahi vitupararuheanahi cape juca. ⁵ Máimicatacahehíni ema Viya eta ímatiraina eta máemunasirahehi. Májaracahevaréni eta ecayeheraya paciencia, ácutihini ema Cristo.

Tatuparaca vicaematanyare

⁶ Nuparapenevana, te natiarihinapuca ena echamurianahi plújuana, váhipuca náesachahi tícaemataneana, te váhipuca návarahahíni náetumechavahíni, nasupahíni eta vímiturapianahi, vivanecahe éti te máijare ema Viáquenu Jesucristo: Vahi ecumeñahava nayehe. ⁷ Écharichuhi éti eta etuparahahi ítusiraina ítátíjirícava, éhisirayarehi eta viyeherepianahi víti te víávihaichaha eta ara eyehe. Vahi plújuhávímahi. ⁸ Váhivare vínicairihíhíni te epenana. Vítí vicaematanehi muraca eta vítátíjirisiravahi. Tamutu sácheana, yátiana, vicaematanehi, taicha vahi vávarahahíni vétsepanáracahéhíni eta vínicaquenerepi. ⁹ Tatuparacahinéni víyaseacahehíni eta énisirahavinahíni,

vivarahahisera vímechaheyahehi eta vicaemataneraivana, apaesa étainarichuhíni éhica éti. ¹⁰ Étaripa te vinasiqueneichaha eta eyehe, vivanecahehi: Vahi ecuenica mácani vahi mavarahahi ticaematane. ¹¹ Puítiripasera visamairiricahi eta natiaririhahi ena echamuriana tinerejicavanahi plújuana. Vahi náesachahini ticaemataneana, tinicairihianahi. Tímiapitavairicavanapaipahi te pétiana. ¹² Étíhi íchanahi eta juca, vivanecahe te májare ema Viáquenu Jesucristo: Yátupina táuri eta ecáematanéraina, eviyayare eta ecamunuqueneana. ¹³ Éti apamuriana nuparapenaveana, vahi ecuínajica eta táurivahi eta ecaematanerana. ¹⁴ Te natiarihinapuca nácani vahi nacusuapa eta vivanairipianahi te juca carta, ecauneyare éna. Tásiha, emetacapa ena echamuriana vaipa nacucachane éna, apaesa nátsiríhaichu ena nani eta namasuapajiraivahi. ¹⁵ Váhisera ecucatichavaca, econsejachavacachucha taicha echamurianahi éna.

Ema Pablo mayujarauchahi ena machamuriana

¹⁶ Tiuri puiti, nuyaseacahi ema Viáquenu ema tiúrichahavirahi, máimiyannahíni májara-cahéni eta iúrivaya te epanereruana, tijuricati tájahapuca ícharacava te sácheana, taicha mavarahahi eta iúrivaya. Ámutuhíni mávahácahehíni ema Viya.

¹⁷ Nuti Pablo, nútijacaruva nájucha eta juca táichecuaráquihi eta nucartane, apaesa ímati eta táimahíhi eta nuyehé letra nuvahurupajíhi.

¹⁸ Nuyaseuchaheparacahi emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo mayehe ema machamuri Timoteo, ticajare 1 TIMOTEO

¹ Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahiquenehi viyehe, émapa ema Viáquenu Jesucristo, ema vicunequenehi eta mápechiravayare tichava. ² Nímiámareca eta juca nucartane piyehe piti nuparape Timoteo. Némunacavihi tímicitijiricavahi nuchichavinahíni táichavénehi eta péhisiranuhi eta nusuapajiravahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájaracavini eta táurivaina eta pipaneruana.

Emá Pablo mametaca ema Timoteo eta macunerayare eta tihapapirahiana

³ Pécharipahi eta juca numetaruvíhi, te nuyanayarepa tayehe te tinapaica eta Macedonia, eta nutuparasiravíhi pinasiyaréhi tayehe eta avasare Efeso. Vuíchaha pijunijicaimahi taicha pímatirípahi píti ena nani navarahahi tihapapicana eta vímiturapiana. Vahi picuisapavaca. ⁴ Pécatiacaicha ena vichamurianahi, vahi nacusuapa eta échajirirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náéchajiriruvana te náéchajisíha ena viáchucanaveanaini. Eta juca náéchajiriruvana, ticauyayacarehi táemejecapavachavaca ena vichamuriana, machu nachavacuejehava táicha. Étavanerecáinahipucáini náimicatacahávihipucáini eta vítauchiráinahíni eta véhisirahi ema Viya. ⁵ Nutuparacavíhi taicha nuvarahahi náimerecaya ena vichamuriana yátupina eta náemunasiracacaina táuchurenvare te nasamureana, tapachinavareni eta napanereruana. Tacuíja nacúquichiraváinahíni eta nasamiravahi te mamirahu ema Viya. Tauri eta náehisiraina ema Viáquenu. Yátupina nasuapa. ⁶ Taicha nararihi ena téjecapavanapaipa, nasuaparichucha eta tájiparacana súnsurupiana. Eta juca táiminajicavacapaipa tayehe eta vímiturapiana. ⁷ Tásiha, tépiyacavanapa náimatíhi tamutu eta Sagrada Escritura. Navarahavare tímiturecana, váhisera nácaicutiarahíni eta tacayemaqueneana eta táéchajisíhaqueneanahi. Ena nacahehi: “Víti véchahi tamutu”, tájjanéni náéchihahíni.

⁸ Tájina táichava eta tatiaríhírahi eta mavanairipianahi ema víyarahaini Moisés. Véchahi eta táuriva eta mavanairipiana, taicha éta, táimitucavacahi ena achaneana eta vahi nacuejecapava. ⁹ Taicha véchahi eta tacaematanearahíni eta vanairipiana eta táimitupiruchiravacaya ena ticapecaturarahiana. Nácani achaneana túiriana, vahi énaina tatuparaca eta vanairipianahi. Tatuparacahisera ena nácani mapicauruirahana masuapajirairahana; énapa nácani váinarajipanereruana ticapecaturarahiana; énapa nácani mapicaucharahana ema Viya, ena ticatichana eta máéchajiriruvána; énapa nácani téhana ena náiyana, ena náenana; énapa nácani ticapahiana; ¹⁰ énapa ena túhusiana énapa nácani ticaecahiana ena nayanana, navehapa esu apana esena; énapa nácani tivehana ena nacutiqueneanahi ajaira; énapa nácani tíamerecana achane, amaperupuca, esenapuca; énapa ena tépiyahirahiana; énapa ena tépiyaequenerahíana. Énerichuvare eta vanairipi tatuparaca ena ticatichana eta táuriqueneana vímiturapiana. ¹¹ Taicha núti nutuparacasivahi me Viya eta nímutiresiraya eta táurinaqueneanahi máéchajiriruvana, eta tímicaíjuhechahaviya tayehe eta táurinaquene mávasa ema Viya. Tétavicavahi eta macunachacarevahi éma.

Emá Pablo mahasulupayacha ema Jesucristo taicha eta máichuirahi

¹² Núti nuhasulupayacha ema Viáquenu Jesucristo, taicha eta máichuiranuhi mavanaranuyarehi. Tétumechanuhi yátupi taicha máimahahi eta nítauchirayarehi eta nutuparacasivayarehi mayehe. ¹³ Éma, tituparacanuhi eta juca, ichapemuríhinéni eta néjecapiravahi mayehe, tíñemahíni eta néchajiriruvanaíhi mayehe. Nupanjiricavacahi ena náinapureanahi téhicanahi éma. Tijapanunuhisera éma, vuíchahahínéni nusuapahíni néhicahíni éma. Taicha vahi néchahíni émahínénipuca nucatianacahí, eta níchirahi ena machanerana éma. ¹⁴ Tásihasera tétavicavahi eta máemunasiranuhi ema Viáquenu Jesucristo. Ichaperínehi eta májjarasiranuhi eta nusuapirahi yátupi éma, étapa eta májjarasiranuhi eta némunaraivahi.

¹⁵ Nuvaraha námutihini ena achaneana nasuapa eta véhiruhi taicha yátupíhi eta juca vímiturapiana: Emá Viáquenu Jesucristo tímitecáhi te juca apaquehe macuchucuhavacayarehi ena ticapecaturarahiana.

Nútrípahi nuváyuchapanaváinihi eta nucapeaturaraváinihi. ¹⁶ Émasera ema Viáquenu Jesucristo tijapanunúhi, táitusiava tíchuhanuhi núti. Taicha mavarahahi máimerecayare

ichape eta mayehe paciencia eta nuyehe, nuvayurevaquenénihí eta nucapecaturaráivainihí. Eta tacahe, nucaicutiarapa eta majacpirayareva namutu ena tisuapanayare, máichecuaraquirénapa eta náitaresiraya máicha.

¹⁷ Eta tacahe, macarichu vicunachayare vijirauchayare tamutu sácheana ema Viya, taicha macarichuhi éma tamutu máituruequeneha. Éma, máimahasiquenéhi, máepenacachivare. Jéhevarequene éma, viyehéhi Rey acanequene te tépanavainapa, étapa puiti juca vicaijuheyare. Amén.

Éma Pablo matuparacahi ema Timoteo

¹⁸ Nuchicha Timoteo, nutuparacavicha muraca eta piratahairaina picanara eta tamauriqueneana. Tiúriyare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisiavirahi eta piúrivahi ena vichamuriana mametaruanahi ema Espíritu Santo. Vahi picuemepurureca. ¹⁹ Taicha nararihi ena ticainajiruvanapaipa, náechahinéni eta táifehivahi eta náichaqueneanahi, váhisera návarahahini nácaínajiruvahini eta tamauriqueneanahi. Tínajicavanarichucha eta náehisirainihí ema Viya. ²⁰ Émaripa ema Himeneo émapa ema Alejandro, tacahehi eta náínajisiravahi eta náehisirainihí ema Viya. Puítisera, ena nani níjararupa ema Satanás, taicha nuvaraha nachava, náínajicayare eta nacaecahirahi ema Viya.

2

Éma Pablo máimituca eta nayujarauhíravaya

¹ Tativayaresera nutuparacahe, vahi tacuechuquiha eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana. ² Énerichuvare eyaseuchayare ena aquenucana énapa ena apamuriana tuparairucana, apaesa táuri eta náechapajirisiraina eta avasareana, váhini vicuimaháini eta táifehiqueneana. Vítí vímíyanavahini víúrihíni te mamirahu ema Viya, vicapicahuhini nayehe ena achaneana. ³ Taicha ema Viya Macatiurahiquene máuricahi eta víchirahi víti eta júcana. ⁴ Taicha mavarahahi éma máimimatichayare namutu ena achaneana eta yátupiqueneana máechajiriruvana apaesa náuchucuha éna apanava. ⁵ Taicha májina apanainahini ticatiuchavacaina éna, macarichu ema Tata Vicaiyaquene. Émapa ema Machicha ema achane Cristo Jesús, macarichuhi ema téchajirurahi viyehé víti achaneana te mamirahu ema Tata Vicaiyaquene. Nájina apanaina téchajirurahínahi viyehé. ⁶ Ema Viáquenu Jesucristo tjaracavahi tépena taicha eta macuchucuirahaviya vimutu víti achaneana. Puítisera mavaraha máimimatichayare namutu eta juca arairuhi vímiturapiana. ⁷ Eta tacahehi, manerejirunuichuhi mayehenuhi apóstole, nucametariruyare tamutu avasareana, nímitucayarehi ena apavasanana eta nasuapiraina éna eta yátupiqueneana máechajiriruvana ema Viya. Nutupiruvahi nútí eta juca néchajisirahi, vahi népiyahiraivainahi.

Éma Pablo máimitucavaca eta náicharacavaya te náurujisiravana

⁸ Tiuri, nutuparacahevare pímitucavacavare ena vichamuriana eta juca apana: Tauri eta náurujisiravaina te nayujarasirana. Ena ajairana, vahi nacueñamavahini me Viya eta máitauchirayare eta nayasearuhi. Tátupiruvahini te nasamureana. Vahi nacúsemamajuhéhi eta nayujarasirayarehi nacajapavaquichavapuca. ⁹ Énaripa ena esenana, táurihini eta nacamuirihairana. Vahi nacúyehéheácaicha eta nacamuirihaira. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyehéheacavahini eta oro, eta perla, eta tasivachaqueneana múiriareana. ¹⁰ Étaripa náurinavahi yátupiquenehi, eta náimeresiravaina eta yátupina náehisirahi ema Viya, náichirainavare eta táuriqueneanapa. ¹¹ Énerichuvare, tiúriyare eta nasamararasira eta náimitucasivana. Vahi nacuácapaemarahi nácani tímitucanahi. ¹² Énerichuvare ena esenana, vahi tatuparaca náimitucahíni ena víyarahánapa te víúrujisiravana, taicha vahi tatuparacahini náimitucahíni éna. Nasamararacayarechucha eta náimitucasivana. ¹³ Taicha te máepiyacainapa ema Viya ena viáchucanaveánaini, tnapuca máepiyacahi ema Adan, téquenehapa esu Eva. ¹⁴ Váhivare émainahini ema Adan máinapuchahini máquipaicavahini. Ésuhi esu esena, tísapavahi mavayucama Satanás. Eta suísapiravahi, tiáquipaicavanapa tayehe eta pecatu. ¹⁵ Tásiha, ticatajivainapa eta suínasirana. Puíticha tanasíhi nayehe ena esenana. Tiúchuchuanayaresera, te náimíyanava náéhica ema Jesús, étapa eta náemunasiraina ena vichamuriana. Tacuijavare natapiravaina te mamirahu ema Viya, táurihini eta napanereruana.

3

Tiúrianayarehi eta náitaresira nácani tatupararuanayare eta avacureccare pastorecare

¹ Étaripa eta juca evacureca pastorecare, puiti nutupiruva numetacahe. Te natiarihi-napuca nácani ajairana návaraha ticavacureana eta pastorecare, tájina táichiravaina, taicha eta juca evacureca pastorecare, éta tiúriana evacureca ticaijuhecare. ² Tacamunuhisera mácani ticavacureya eta pastorecare, tájina matapiravainaya eta máitaresirahi, tacuija nacuyunaca ena achaneana. Mácani ésunarichuhi esu mayena. Mácani ticapicahuhi. Mácani tijaneacavahi eta máitaresira, máitucahi tipanerereca. Mácani achanesunavahi tijacaparahi nayehe nácani tichimarachanaya. Mácani máituca títitureca. ³ Mácani vahi tavayuaruina eta tércare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi. ⁴ Ticaiyacareyare te mapena. Máitucayare eta macajurusirayare ena machichanaveana, tisuapajirahianayare tipicaurahianayare máicha. ⁵ Vahi tisiapaimahi mácani achane vahi máitucahi ticavanairipi te mapena. Taicha nararihi ena vahi náituca ticavanairipiana. Tavetijipapuca eta juca evacureca, vaipa náitucaimahi eta náechajirisiraina najaneasirayarehi ena vichamuriana. ⁶ Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirahi eta matuparahahi. Eta tacahe eta máquipaisiravahi ema Váinaraji. ⁷ Énerichuvare tacamunuhi mácani pastoreyare ticapicahu nayehe ena apamuriana achaneana, apaesa vahi nacuechajica eta mayehe. Machu máituruca ema Váinaraji.

Tiúrianayarehi eta náitaresira nácani tatupararuanayare eta avacurecacare ticaijare diácono

⁸ Énerichuvare, nácani ticavacureya eta diáconocare, tacamunuhi ticapicahuanayare eta náitaresirahi. Vahi apipiemanaimahi eta náechajirisiravana. Váhivare ticavaharasianaimahi. Váhivare tijamurarahanaimahi. ⁹ Tacamunuhivare náimatiyare yátupi eta tisuapacareanahi mayehe ema Jesús, náitachiraripa tamutu, tájinapa náichiravaimahi te mamirahu ema Viya. ¹⁰ Nacasamairunumaya te yátupihipuca tiuri, tájinapuca náichiravaimahi. Téhesera tiúrianihi, énara tuparairucanayarehi eta evacureca diáconocare.

¹¹ Énerichuvare, ena esenana, tacamunuhi ticapicahuana. Vahi nacuechajihí. Súcani tijaneacavahi eta suítaresira. Tájina náichiravaimahi, títaurahíanayare.

¹² Ema tuparairucayare, tacamunuhi mácani ésunarichuvare esu mayena. Máitucayare eta máimitusirayare ena machichanaveana. Ticaiyacareyare te mapena. ¹³ Taicha te náitachahi tamutu eta natuparahana ena tuparairucana, ticunachacareanahi tipícauchacareánahivare. Tásiha, énerichuvare tétumesamúrechaváinapa eta nacametarairuirahi eta máimiturapiana ema Jesucristo.

Jéhevare eta juca téhicacare

¹⁴⁻¹⁵ Puiti nucunevaipa eta nítecapiravaneya eta ara piyehe, téhesera vuíchahapuca nucuitujicava níteca. Nucajurevihisera eta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejiruanahi ema yátupiquenehi Viya. Viúnacahi vímiturecachi yátupi eta máechajiriruvana. ¹⁶ Taicha eta juca véhiruhi vimutu, tétavicavahi eta táuriva:

Vimutuhi visuapahi eta máucupaisirahi te juca apaquehe ema Jesucristo, macaqueherahi eta juca viáquehehi viti achaneana.

Émaripa ema Espíritu Santo macametarapihivare eta yátupirahi Machicha ema Viya.

Náimahahivare ena ángeleana eta máechepusirahi te máecari.

Te tamutupa, tichavapa éma te mávasa anuma.

Tásiha, viti mavanarana véchajisihahi tamutu avasareana eta macuchucuirahiviyare vimutu viti achaneana.

Ichapemuriana ena ticasíñavanahi mayehe, téhicanahi éma.

4

Natiarihiyare ena tínajicavanaya eta náehisira ema Jesús

¹ Eta mametarapi ema Espíritu Santo, puiti juca vicaijuheyare, natiarihinapa ena tímúterahávanayarepahi tínajicavana eta náehisirahi ema Jesús. Nasuapainapa ena tíyururahiana. Náehicainapa eta náimiturapiana ena éreanana. ² Nasapilhainapa tísamacareanayare ena apipiemana tépiyahírahiana. Ena nani, máimatiacavarahánahi eta náepiyahiraivana taicha náitunaipahi eta nacahirana. ³ Ena nani achaneana nayurucainapa ena vichamuriana. Ánipa nacaheyare: “Vahi táurica vitanucahini esu esena viyenainahini. Jucarihivare eta tinicacare, énerichuvare vahi táurica vinicahini” nacaheyare. Tamutusera eta juca tinicacareana máepiyaruana ema Viya vinicayarehi viti vímatiequenehanahi eta máechajiriruvana. Víhasulupayachayarehi te vinicayare eta máijararuhavianahi ema Viya. ⁴⁻⁵ Taicha tamutuhi tiuri eta máepiyaruana ema Viya. Vahi táuricháini vépuruhíni. Vijacapyarehi tamutu, víhasulupayachayarehi te vinicaya; taicha víjaracasíhi mayehe

ema Viya, timetacahavihi eta táurivahi. Tacaúrisamurechahi ema Viya eta viyujarasirana. Puiticha tanasihi viyehe víti. Te vinica, vihasulupayachayarehi ema Viya.

Ema yátupiquene mavanara ema Jesucristo

⁶ Te pimitucavaca eta juca ena vichamuriana, pímerecahi eta yátupirahi mavanaravi ema Jesucristo. Eta juca táurinaquenehi echájirirucava, étarichuhi eta vímiturapianahi eta piyehe, éta tétumechaviyare eta pímiyaniravahi pisuapa eta juca véhiruhi. ⁷ Váhisera picusuapavaca ena nani tíchanahi eta juca echájirirucavana tamaúriqueneana. Súnsurupia-nachucha éta. Pímiyanavatera picaravahu eta piúirtaresiráina mayehe ema Viya. ⁸⁻¹⁰ Tacuti eta náimicavahuchirava ena ticavijarurahiana eta pelota, navaraha náetumecha eta náqueheana. Tacamunuhisera nápepejiricava te sácheana. Píti, vahi tacuechuquiha eta picaravahuirahi. Te yátupihí vicaravahu viúirtaresiraya mayehe ema Viya, tétavicavaya eta viúrivaya eta visamiravaya puiti juca vícahehi, énerichuvare véchapajiricavainapa eta vicaijuheraya eta mávasa ema Viya, vicachaneraya éma. Eta tacahe, vétumechavachucha apaesa viúirtaresira eta mayehe. Vimiyanaavachucha vímitucavaca ena achaneana apaesa náúirtaresira éna apanava mayehe ema Viya. Taicha yátupiquene eta echájirirucava ani tacahe:

Ema vicasiñaquenehi, éma yátupiquenehi Viya.

Éma, téchahavi vimutu víti achaneana.

Vivetiji víti véhicanaripa éma,

tétavicavahi eta macatíuchirahavipahi.

¹¹ Ena pímitureanaya, pituparacavacaicha muraca eta júcana. ¹² Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúirva apaesa étaina náehicaví ena vichamuriana. Tauri eta péchajisiráina. Tauri eta pítaresiráina, tájina pitapiravaimahi. Pémunarahi nayehe ena vichamuriana, éna ena apamuriana achaneana. Yátupina eta péhisirahi, étapa eta picasiñavairahi mayehe ema Viáquenu. ¹³ Te víuchahapuca nucuítécapa, pímiyanava eta pímitusirayare ena vichamuriana. Pímiyanavavare eta pétumechiravacaina. Péchajicuínayare eta Sagrada Escritura apaesa nasama namutu. ¹⁴ Pémechavayare eta nametarapianahi ena víyahana mametaruanahi ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepurureca eta péchemaravahi maicha ema Viya.

¹⁵ Pípanerecha yátupina eta juca pímetacasivanahi. Pímereca eta táurivahi eta péhisirahi, apaesa náimaha namutu eta piúirvínapaicha. ¹⁶ Péchapavaicha yátupina eta pímituresirahi eta juca véhiruhi. Pítijiva pípamicava pítauchayare tamutu. Te pítaucha eta juca, picuchucuhavayare píti, énapa ena pímitureanahi.

5

Vímerecayare eta viúrivayare nayehe ena vichamuriana

¹ Te natiarihinapuca náejecapava ena víyahana íchavícapananahi piyehe, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare ena amaperuquijiana ajairana, tauri eta píconsejachiravacáina tácuti eta péchajisira ena pichuquiqueneana. ² Énerichuvare ena vénarahana íchavícapananahi piyehe, te náejecapavapuca, píconsejachavaca tauri tácuti eta péchajisira esu ticachichavi. Énapa ena amaperuana esenana, píconsejachavaca tauri tácuti eta péchajisira ena pichuquiqueneana. Tátupiruva eta péchajirisiravacaina éna.

³ Pímicatavacaya ena tépenaimanahi, nácani tájinahi naviyavahini, yátupihí eta nacamunuiravana. ⁴ Téheserapuca natiarihihi ena suchichanaveana esu tépenaimahi, suámari-napuca, énapa titátianayarehi. Ticaravahuanainapa eta náitátijirisiravaya. Títisiri-jicavánainapa eta nacajurusiravacahi ena náenana, nátsenanapuca. Eta juca, máurica ema Viya. Taicha tatuparacahi ena echichanaveana eta náitsirijisiraváina eta nacajurusira ena ticachichana. ⁵ Pímicatavayaresera súcani tépenaimahi sucarichuhipuca, nájina suchichainahi, nájinavare suviyavahi. Sucuchapainapa eta tásihaqueneya mayehe ema Viya, taicha sújararuvaipa yátupi eta mayehe. Tiyujaracainapa tamutu sácheana, tamutu yátiana. ⁶ Ésusera súcani suícutichiravahi suicha eta suvarahaqueneanahi, ésu tímicutijiricavaípa suáqujiruvahi eta mayehe ema Viya. ⁷ Pímitucavacayare ena tépenaimanahi, apaesa táuri eta nacaemataneasiraina ema Viya, tacuíja natapiravaina. ⁸ Taicha ena vichamuriana, tatuparacavacahi náéñamavayarehi tayehe eta náitátira ena náenana, ena nátséana. Nácani vahi nacuquicha eta juca, tímicutijiricavaípa vahi náitauchahini eta náehisirahi ema Viya. Tiápajucavapanapa éma eta nayehe ena masuápajirairahánahi.

⁹ Nacarichu pínacayare te nalísta ena tépenaimana ena ticayeheanaripa sesenta año eta nahañora. Súcani émanarichuhi ema súfmaini eta suítaresirahi. ¹⁰ Ésupa súcani tímaticarehi

eta táurivanahi eta suématanerepiana. Súcani tíuríhi eta sucajurusirahi ena suchichanaveana. Súcani tijacaparahi te supena nayehe nácani tichimarachanapahi. Súcani tíuri eta suéchapajírísira ena vichamuriana. Súcani téchapajirahi nayehe nácani ticatajivanahi ticajumanahi, ticatiruhanahi. Súcani tamutuhi suítaparaha suicha eta táuriqueneana.

¹¹ Énasera ena tépenaimanahi amaperuanarichaha, vahi picunaca te lista. Tijuricati tíáquipaicavana taicha tavayuacavacarichaha eta tájiparacana, natanucarichaha ema ajaira, navarahaichaha tíápechavanayarehi ticaimana. Tijuricati ticainajiruhana eta náehisirahi ema Cristo. ¹² Tacamitiscavacapáipa, énapa tímicaicanapahi eta náehisirahi ema Cristo. ¹³ Énerichuvare ticauyayacarehi nayehe ena amaperuanarichaha, te pinaca eta te nalista, tijuricati tépicavavanapa plújuana. Náematanepe típaipiricana te péttiana, námapaipa eta cuéntoana. Tímisiáparacavánápáipa. Nacaemataneaca náehajisihapáipa jácani náimahaqueneanapahi te péttiana. Vahi tácatuparaha náichahíni eta juca. ¹⁴ Eta tacahe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuíja nacucayema ena ticunerahiana. ¹⁵ Taicha nararihi ena tépenaimanahi tímajicavanapaipa eta náehisirahi ema Jesús, náehicapa ema Satanás.

¹⁶ Te sutiaríhihipuca tépenaimahi esu vichamurihi, te natiaríhivarepuca ena sujaneanahi vichamurianahivare, ena títtíanayarehi ena sujaneanarichu; apaesa vahi sucupitavairichahi nayehe ena máimaruanaahi íttíjíríruanaahi, táichavenehisera jácani tamajinairahi naviyahíni éna.

Tatuparacavacahi ena vichamuriana náimicatacayare ena pastoreana eta náitátiravahi

¹⁷ Ena pastoreana, te tíuríhipuca eta náechapajírísiravaca ena vichamuriana, ichapeyare eta náemunacacarevayarehi. Tatuparacavacahi ena vichamuriana náimicatacayare tayehe eta nanicaquenerepi ena pastoreana, taicha éna, eta náematanerepihi tímíturacanahi ticametaríruanaahi. ¹⁸ Taicha ani tacahehi eta Sagrada Escritura: “Vahi picuitisumucha eta pívuíyera te ticaematapayahi taicha técuahapahi”. Ánivare tacahe: “Ema achane ticaematanehi, tatuparacahi ticavachayarehi mayehe ema macaematanearuhi”.

¹⁹ Vahi picusuapavane te tatiaríhinapuca eta máepiyaequenena mácani náiyacarahi ena vichamuriana. Téhesera natiaríhinapuca ena apinana, mapananapuca tineaepaequenehanahi eta máejecapiravahi, jéhesare tisuapacare éta. ²⁰ Téhesera yátupiquenehipuca eta máejecapiravahi, picajachayare muraca te namirahu ena machamurianahi náiyacarana, apaesa nátsiríha napica ena apamuriana, vaipa nacuquicha eta juca. ²¹ Nutuparacavicha muraca, pítauchayare yátupina eta juca numetarapianahi piyehe. Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi eta máichavaquenevahi mácani téjecapavahi, taicha máimarracahi ema Tata Vicaiyaquene, émapa ema Víáquenu Jesucristo, énapa ena mayeheana ángeleana manerejiruanahi.

²² Te matiaríhinapuca mácani navaraha nacasiapa pastor, picasamairunumaya te tíuríhipuca éma. Vahi picuíjáhúcha picunacavane éma. Tijuricati tatiaríhinapahi eta máejecapiravahi. Machu píttina tamuriaca taicha eta pímisípiraina éma. Píjanecavaiacha tayehe eta juca. ²³ (Puiti néchavahi eta picajumamajípa eta pítaresirahi te píami. Tásiha, nuconsejachavi: Pímisíríquicha apaesainarichu eta vino eta péresarama une, pípurujinahí.) ²⁴ Tacamunuhisera eta picasamairunumaya nácani tisiapanayare eta pastorecare, taicha nararihi ena máchasíhi eta napecaturana. Vahi tímaticarevane, tapaenumavaya picasamairunuma éna. Nararihisera ena ticaeheravane eta napecaturana. Tímaticareanavane. ²⁵ Ene tacahehi, nararihi ena tímaticareanavanehi eta náichirahi eta táuriqueneanahi. Nararihivare ena tacamunúhi eta picasamairunuma, apaesa ticaeheravanehi eta táuriqueneana náichaqueneanahi.

6

¹ Ena vichamuriana músuanahipuca, tatuparacavacahi napicauchayare ichape ena náquenuanahi. Vahi tíjicapairíhianaimahi apaesa vahi nacuyunaca ena achaneana eta májjare ema Viya, váhivare nacucaecahi eta vímiturapiana. ² Étarípa te nacaquenuhipuca mácani vichamurihi, tíápajucavayare eta napicauchírayare. Vahi tímipanavanáimahi eta nachamurirahi éma. Náimerecayare yátupi eta táurivaya eta náemataneana, taicha ema nacaematanearuhi, nachamurihi máemunaruvere ema Viya.

Ticurisamurechahavíhi eta véhsira ema Jesús

Pítí nuchicha Timoteo, pímitucayare tamutu eta juca nayehe ena vichamuriana. Pémechavacayare eta vímiturapiana. ³ Natiaríhinapuca ena nácani navaraha tímíturacana eta apana doctrina. Nahapapicainapa eta vímiturapiana, tájinasera vahi tavehapicaimahi eta juca yátupiqueneanahi tásihaqueneanahi mayehe ema Víáquenu Jesucristo. ⁴ Ena nani, ticasíñavaváicanahi, tájinahineni náitucaqueneháni. Ena nani, náurica téchajicana.

Navayurevanapahi nácapaemachapahi tayehe eta tacayemaqueneana eta véchajiriruvana te vímiturecahi. Ticapinarurahiana éna, tiúmeharahiana, tíchanarahiana, típícaracácanapa. ⁵ Tamutu sácheana ticitianarerecana taicha máuripanererurahána ena, máimatirahanahi eta yátupiqueneana. Navaraha nacavacharapiyare eta nayehe religión. Píti vahí picupauchavaca ena nani.

⁶ Jéhesareva, tétavicava eta viúricareva máicha ema Viya, eta véhisirahi éma. Tavetiji te vicurisamurechava tayehe eta vicayehequeneanahi májjararuhavianahi éma. ⁷ Taicha te viúchucapa suyehe esu ticachichahavi, tájina viámapahini vímahaquenenahíni. Ene tacaheyare eta vítavirayare, tájínavare viámamahi eta vímahaqueneanahi. ⁸ Eta tacahe, te tatiarihipuca eta vinícaquenéna te vipenana, vicamuirihahipuca, tarataripa visuapayarehi. ⁹ Énasera nácani típanerechanahi tírricuchavana, apanapanepa eta najamurachaqueneana. Tacananesiricapa eta naplatanechiavaya. Énajivapa tímicuñacavana taicha eta najamuraraiwana súnsurupianahi. Eta juca ticauyayacarehi étaina támicuñaca eta náchanevana. ¹⁰ Táitsivahisera ena achaneana, náetaviuchahi eta tavayuasirahi náichapa tamutu eta tájiparacana, táichavenéhi eta najamurachira eta plata. Namapurujipaipa ena vichamurianaini. Natiarihinapaipa timutserahavanapaipa eta tayurusiraina eta najamuraraiwana. Tásapihapapuca táiminajícapahi eta náehisirainihi ema Jesús. Énajivapa títanucavanahi eta navírevahi, timutserahavanapaipa eta nacatajivairanahi eta náitaresiranahi.

Yátupina eta véhisiraina ema Jesucristo

¹¹ Pítisera vahí picupanerecha eta juca mamavaraqueneana ema Viya. Pérajicava tayehe, taicha mavanaraviripa éma. Tátupiruvahi eta písamure mayehe éma. Táimiyana eta juca táurivahi eta pítaresira. Tauri eta péhisiraina. Pémunaca yátupina. Picamichayare tamutu. Yátupina eta pímansuvaina te písamure. ¹² Pétimechavachucha eta pícaemataneasirahi ema Viáquenu. Muracaina eta pícasíñavaira mayehe. Vahí picuyacujiequenehava eta picuchapirahi eta pítaresiraya máichecuaraquireyare, taicha máichuhaquenevirichuhi ema Viya. Vahí picuemepurereca eta péchajiriruvanahi te namuri ena vichamuriana, te píjaracavainapa eta péhisirayare ema Viya.

¹³ Puiti, tímaracavihi ema Viya eta nutuparasiraviya. Éma, ticaitarecahi tamutu eta vímahaqueneanahi eta te juca apaquehe. Tímaracavíhivare ema Viáquenu Jesucristo. Pécharichuhivare eta matupiruvairahi eta máimereuchiravahi éma te mamirahu ema Poncio Pilato. ¹⁴ Pítauchayare píti tamutu eta juca nuvanairipianahi taicha tásihaqueneanahi me Viáquenu. Vahí pihapapicaimahi, apaesa tacuija táimicajachavi mayehe. Tauri eta machimampiravina ema Viáquenu Jesucristo te máitecapa te táitauchavapa te jena sáchezare máicutiarahi ema Tata Vicaiyaquene. ¹⁵ Ichapenapa vicunachainapa ema Tata Vicaiyaquene taicha macarichuhi éma yátupiquenehi tamutu maratata. Émahí Réyquenehi, Viáquenuquenehi. Tivanecahi namutu ena réyeana énapa ena aquenucana. ¹⁶ Macarichu éma, yátupiquenehi máepenacaca. Máetaviuchahi eta maváyuháquiráivahi. Nájina tíratáhaina ticachacayaina eta majaraiva tayehe eta mávihahi. Éma, nájina tímahaina, taicha máimahasiquenehi éma. Éma, vipicauchaquenehi vivinapaquenehi ichape. Máitavacainapa eta vicunachirayare éma. Jéhevare éma, tamutu maratata. Amén.

¹⁷ Énerichuvare ena vichamurianahi ticaimahaqueneanahi rícuana, pímitucavacayare eta vahí nacucajamurava. Váhivare nacucasíñava eta nacaimahaquenerahi, taicha tíjuricati títava eta náimahaqueneanahi, témitiequenehapa tamutu. Nácasíñavaseram mayehe ema Viya, jéhevarequene ema ticasíñacare. Éma tíjaracahavihi tamutu eta vicamunuqueneana, viúrisamurecahi máicha. ¹⁸ Tacahe, ena vichamuriana rícuana, pímitucavacaichavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunuvanapahi. Tátupiruva te nasamure eta nájarasiraina ena ticamunuvanahi. ¹⁹ Te yátupina náítaucha eta juca, tatiarihi eta sáchezare najacapiraya eta apanayare náimahaqueneanayare te anuma. Éna, ticájaranainapa eta nápechiravaya títarecana, taicha éna yátupíhi eta náimicataráivahi eta náitaresirahi te apaquehe. Máichecuaraquirénapa eta náuricacarevaya.

Eta téqueneha matuparaha ema Timoteo

²⁰ Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahí picujicapavaca ena nácani téchajisihana eta tájiparacana, təcaticavánachucha. Váhivare picujicapa ena nácani navaraha ticanaraemachaviana. Éna nani tímijachavanahi náimatihíji eta táuriqueneana, tásihasera ichape nayerehi eta náehisirainahíni ema Viya. ²¹ Nararihipaipa ena vichamurianaini tínajícavanapa eta náehisirahi ema Jesús, taicha nasupahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahíni eta píuricacarevaya máicha.

Tamutupa eta néchajiriruvahi piyehe.

Eta macartane ema Apóstole Pablo mayehe ema machamuri Timoteo, ticajare 2 TIMOTEO

¹ Nuti Pablo mayehenu apóstole ema Jesucristo. Ema Viya tivanecanuhi eta nucameta-rairuirayare eta máechajiriruva, taicha macaechajiriruvahi eta máijarasirahaviya víti eta vítaresiraya táichavenehi eta mávahásirahavihi ema Machicha Jesucristo. Máichecuaraquirénapa eta vítaresira máicha. ² Puiti nápechavavare nucajurevi eta juca apana nucartane piyehe piti nuchicha Timoteo némunaruquene. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájaracavini eta táurivaina eta pipanereruana.

Ema Pablo máetumechahi ema Timoteo

³ Núti nécharairicavihi te sácheana yátiana te nuujarasirana, nuyaseuchavihi me Viya. Nuhasulupayachahi éma eta piúrivahi máicha. Éma nucasíñahi núti, tacutihi eta nacasiñairahi ena viáchucanaveanaini. Tájina níchiravainahi eta nusamiravahi te mamirahu. ⁴ Tétavicavahi eta nuvarairahi nápechavahini nímahavi. Vahi némitisicavahini eta piyairahi te nujunijicavinapa. Nuvarahahi píjahúchavahini pítecapauchanuhíni, núsamurepáini eta nímairavinahíni. ⁵ Taicha némechavahi yátupíhi eta pímiyaniravahi písuapa ema Viáquenu. Picápayayarácavacáinehi eta susuapirahi yátupi esu piátse Loida ésupa esu pena Eunice. Ichaperinehi pémechanuhi eta nayehe éna. Eta tacahe puiti, vahi néñamavahini eta piyehe. ⁶ Puiti nutuparacavicha muraca vahi picucaemaha eta péchemaravahi maicha ema Viya. Pímiyanavachucha. Vahi tacumapurúji eta nunasirahi eta nuvahuana te piápusi. ⁷ Taicha ema Viya vahi mavaraha vipíccarácavahini. Éma tíjaracavahi eta vitumesamurevana eta vicatuparahairahi. Éma tímitucavahi eta vémunaravahi. Tíjaracavahivare eta vicaratasiravayare yátupi eta vítaresira. ⁸ Eta tacahe, vahi picutsiríha eta picametarairuiraya eta máechajiriruvana ema Viáquenu. Váhivare picutsiríha eta táemeratasíránuhi eta nucameta-rairuiranahi núti apana. Yátupina picamicha eta picatajivairaya. Taicha ema Viya, éma tíjaracaviya eta pitumevaya eta pímiyaniravaya picametarairu. ⁹ Ema Viya tíamavahi eta máemunasirahavihi acane te tépanavainapa tamutu. Tijapanuhavihi máichavenehi ema Machicha Jesucristo. Eta tacahehi te mapanerechainapa eta máichuirahaviyare vimutu víti véhicamayare ema Machicha, mavarairahi ticuchucuhahaviyare, váhinéni víámavahini víúrihihi eta vítaresirahi. Púitísera ema Viya mavaraha mapecurarehaviya te mamirahu. ¹⁰ Púitícha, eta majapanuirahavihi ema Viya, máevatasinahavihi ema Machicha Jesucristo ticatiuchahaviyarehi. Éma, máechepurehi te máecari. Puiti manaquicahi eta máechajiriruvahi eta macaitaresirahaviya víti apana. Te jena sáchevare máitsivachainapa eta viáquehe, máepenacacahávinapa. ¹¹ Ema Viya títiparacanuhi nucametarairuyare eta juca. Éma tinacanuhi apóstolenuhi, nímitucayarehi éna apavasanana. ¹² Eta tímicaviuchanuhi eta juca, púitícha nucatajivahi íchape, taicha eta nítauchirahi eta nutuparacasivahi. Váhisera nutsiríha eta néhisirahi, taicha nímatíhi núti eta yátupirahi eta macasiñacarévahi ema nucasíñaquenehi. Néchahivare eta majacapirahi tamutu eta nématanerepiana. Nucunevainapa eta jena sáchevare eta máijarasiranuyare eta nícuhihi mayehe.

¹³ Piti apana, eta péhicayare eta juca yátupiqueneana nímiturapianahi piyehe, tájina vahi pihapapicaimahi. Yátupina písuapa, yátupina eta pémunaravaina taicha tíavahácaviripa ema Jesucristo. ¹⁴ Piúnacaicha yátupina eta juca máechajiriruvana ema Viáquenu. Te natiaríhipuca návaraha nahapapica eta vímiturapiana, vahi picuisapava. Máimahavinesera ema Espírítu Santo, ema tíavahácavahihi. Éma tímicatacavivare.

¹⁵ Títecapa, pécharichuhi píti eta namáimicatasíránuhi ena náiyarahanahi ena vichamuriana ticavasanahi te Asia. Émavanénahíni máitecáhiní ema Figelo, émainahipucainí ema Hermógenes. ¹⁶⁻¹⁸ Macarichu títecapauchanuhi ema Onesiforo. Te títecapapa éma te Roma, matupiríhi titanucanu, tétupícanupa te juca cárcel nucaerataiyahi. Éma, tájina mapi-caimahi ena ticatíancanana. Ticajínuhi eta nucamunaruqueneanahi. Pímaharichuhi píti apana eta máimicatasirahavihi te víavíhaichaha te Efeso. Eta tacahe, nuyaseacahi ema Viya macatajicahini máimicatacáhiní éma, énapa ena machichanaveana. Majapanuhini te jena sáchevare vítecapauchiraya ema Viya.

2

Yátupina eta véhisiraya ema Jesucristo

¹ Pítisera némunaruquene nuchicha Timoteo, nuvaraha yátupina máetumechavini ema Viáquenu Jesucristo. ² Píti pimatirichuhi tamutu eta nímuturapiana, taicha pisamahi eta nímitusiravacahi ena vichamuriana te avasareana. Puiti pitanucaya ena apamuriana vichamuriana nácani pímitureana títaurahianahi. Pituparacaya éna tauri eta námitusiraina ena apamuriana vichamurianayareva, tácutirichu eta nímitusiravihi níti.

³ Nutuparacavi: Picamichayare piti tamutu eta picatájivairana. Yátupina eta masuntaruravina ema Jesucristo. ⁴ Picutiya eta máuriva ema suntaru, tacarichu máechapajiricahi eta mavanairipiana ema mayehe comandante. Vahi máemitisicaimahi eta mavanahiana, tahapapicahipucáini jácani tájiparacana. Ene picaheya piti eta pítauchirayare eta mavanairipiana ema Viáquenu. ⁵ Eta juca tacutihi ena ticavijarurahiana eta pelota. Te vahi náitauchahi tamutu eta tavanairipianahi, vahi tivérearecanáimahi. ⁶ Píti pipamicavaya muraca eta pítauchiraya eta pituparahana. Picutiya eta mapamisirava mácani isaniritireru eta macaematana te máesane, mavarairahi tíuchucuhayare eta máematane. ⁷ Pipanerecha yátupina eta juca numetaruvianahi. Németeaca tímicataviyare ema Viáquenu eta picacutiarrarayare tamutu.

⁸ Vahi picuemitisica eta juca nímuturapianahi mayehe ema Jesús, eta émairahi yátupiquene Cristo, mámaríequenenihi ema rey David. Éma, máepenaquenénihi. Macaechepucahisera ema Viya. ⁹ Eta tímicaviuchanuhi eta juca, puíticha nucatajívahi ichape taicha eta nucametairuirahi. Étara témeratacanuhi puiti, ticutirinehi nucaviurevahini. Váhisera vicainajiruvaimahi eta vicametairuiraya eta máechajiriruva ema Viya, cápachi etiarhipa éti. Étinapa nítisivaheya. ¹⁰ Nucamichahisera tamutu eta náichiranuhi, nuvarairahi nasuapahini nácani máichuhaqueneánayarepahi ema Viáquenu Jesucristo, apaesa náuchucuhahini éna apanava, náitujicavahini nasiapa tayehe eta táuricacarequene mávasa. Máichecuarequerequene eta vichaneruya éma. ¹¹⁻¹³ Jéhesare, yátupiquenehi eta juca véhiruhi vimutu. Te vépenaca mayehavihi ema Viaquenu, éma ticaitarecaviyare vicachanenapa éma tayehe eta mávasa.

Te vicamicha eta vicatajivairanahi máichavenénahi éma, vítujicavayare vicajupahayare éma eta macavacureraya.

Téhesera vicaerajicavahi eta véhisirahi éma, éma apanavare ticaerajicaviyareva te mamirahu.

Te vínajicavahipuca eta véhisirahi éma, émasera vahi máinajicavahihini.

Manasirichucha ticuchapahavihi te víapechavayarepuca vichavayare mayehe.

Taicha éma, vahi apánapanéna eta mapanereruana.

¹⁴ Nutuparacavi: Pémechavaca ena pímitureana tamutu eta júcana. Pécatiacaicha muraca te máijare ema Viáquenu. Vahi nacuevataemajiricáca te jácani náechajirisiravána. Taicha tájina tájjaracaimahi, machu étaina tahapapica eta napaneruranahi ena vichamuriana eta nasámararásirainahi.

Yátupiyare eta náurivaya ena mavanarana ema Viya

¹⁵ Píti, yátupina tauri picha eta picaemataneahi ema Viya, picurisamurechirayare éma. Tájinaserépa piávamirahúimahi taicha tamutuhi tiuri eta pémataneana. Tatupiruvayarehi eta pímituresirahi eta yátupiqueneanahi máechajiriruva ema Viya. ¹⁶ Téhesera natiarihinapuca ena téchajisihanahi eta tájiparacana técativana, vahi picujicapajiricavaca éna. Pérajicava nayehe, taicha ena nani navetijiyarepáichucha eta náichira eta tamauriqueneana. ¹⁷ Tíñehiqueneanahi eta náechajirisiravana taicha eta tavayuarasiravahi, ticauyayacarehi nahapapica ena vichamuriana. Ene tacahehi eta náejecapiravanahi ema Himeneo, émapa ema Fileto. ¹⁸ Péchapavayare nayehe ena nani apinana, taicha nacaerajiruvapahi tayehe eta yátupiqueneana vímuturapiana. Taicha ena nani tépiyaequenehanahi eta táetavisi-ravaripahiji eta náechepusiraipahiji ena náepenaqueneana. Jéhesare, natiarhipahi ena náemejecapavaranapáipahi. ¹⁹ Vitiarihachahasera viti vímijanavahi véhicahi ema Viya. Taicha muraca eta vicasiñavairahi eta majaneasirahavihi, taicha éma tímatihavihi eta machanerairahavihi. Yátupiyare visuapa eta juca máechajiriruva, ani macahe: “Náinajicayarehi eta tamauriqueneana namutu ena tíamanahi eta máijare ema Nuchicha Jesucristo” macahepa.

²⁰⁻²¹ Eta tacahe, víti, ichape eta vijaneasiravayare tayehe eta tamauriqueneana. Yátupiyarehi eta vicamunucarevaina mayehe ema Viya, vítauchirayarehi eta vicaemataneasira éma. Jéhesare, ichapenapa eta vimunavayarehi mayehe. Véperajicavayarehiséra mayehe tacutiya eta náeperajisira ena rícoana eta nayereruvana táuriqueneanahi nayeheana jarra

oro, nacurujana plata. Vahi náimipananajicáimahi. Vahi náimicutichaimahi eta apamuriana nayereruvana yucuquisiana: eta raveta, eta yuvaraquí, étapa eta nacasuelana mátejisiana.

²² Eta tacahe, vahi picuehica eta natuhusivana ena amaperuquijiana. Tamutuhi najamuracha éna, nacaravahuhi jácani tamauriqueneanahi. Pítisera pímiyanava eta táurivahi eta pítaresirahi. Táuri eta picasifairahi ema Viáquenu. Yátupinavare eta pémunaraivaina. Pétipiricayareva eta náichavaqueneva ena achaneana. Énaina pitanuca pácachanevaca nácani pichamurianarichu tíuripanereruanahi, taicha éna nacasamurehi ema Viáquenu tamutu sácheana.

²³ Énerichuvare vahi picujicapajiricavaca nácani navarahahi tiyaserecaviana eta súnsurupiana. Taicha pímatipahi ena nani eta nacahirana, étachuca natanuca eta semanereana. ²⁴ Viti mavanarana ema Viáquenu, vahi viúriha vímisiaparacavahíni tayehe eta semanereana. Táitsivasera vétaviuchayarehi eta viúri va eta nayehe namutu. Vicayeheyareva paciencia eta nayehe namutu ena achaneana. Vímiturahiyareva eta táuriqueneana. ²⁵ Énaripa ena viánaranahi, tíuriyare eta véchajirisirayare. Vicuchapayare eta táetupirisiravaina eta napanereruana, májaracahíni ema Viya nasuapiraina eta máechajiriruvana, ²⁶ apaesa nacuchucuhavahíni eta náchanevana eta tacaeratairahi maicha ema Váinaraji. Taicha eta máiturusiravacahi éma, mavarahahi náitauchaya eta mavarahaqueneanahi éma.

3

Ena achaneana tévínarajichavanáinapáipa

¹ Eta apana eta juca nuvaraha péchayare. Puiti juca vicaijuheyare tavetjinapaipa eta táejeravayare nasamira ena achaneana eta náehisiraina ema Jesús. ² Taicha tivayuchavainapa eta náichirayare eta najamuraraivana. Tavayucainapa eta plata. Ticasifávanainapa, navayuchayare eta náechajirisiravana. Tipanarahiana. Énerichuvare, masuáipajirárahánainapa nayehe ena ticachichana. Tájinainapa eta náitsirijirápinaya. Váipavare napicauchaimahi ema Viya, nasapihayarechucha nacaecahiyare éma. ³ Nájinapa néamanaruimahi. Nájinavarepa najapanuquenémahi. Téchajihianainapa. Vaipa téchajicacareanáimahi. Titupirahianainapa. Nacatichainapa eta táuriqueneana. ⁴ Cáetemarahlana. Mapicauruirahanainapa. Ticasifávaváicanainapa. Náuricainapa náicha eta piesta, tasapihainapa napauchayare, vaipa émaimahi napauchaimahi ema Viya. ⁵ Nararhipuca ena tímijachavanainapa yátupinahíni nácaijuhe ema Viya. Váhisera náunacaimahi eta máechajiriruvana, váhivare tísapavanaimahi máemetupirucha ema Espíritu Santo eta napanereruana.

Puitiripa nararhipuca ena achaneana, étapa návacuha eta juca. Pérajicava eta nayehe ena nani. Vahi picuimisiapava nayehe. ⁶ Taicha nararipi ena achaneana tiyururahlana tépiyacavanapaipa tipaipicana te pétiana, nayurucavacapaipa nácani esenana máechaireana. Ena nani esenana tisipecaturanahi, tavayuaruanahi eta tájiparacana. ⁷ Nametainipa ticaravahuanahi, tájinasera vahi nacacutiaraimahi eta yátupiqueneana. ⁸ Puiticha ena nani tiyururahlana, éna ticaeahiana eta vímiturapiana yátupiqueneana taicha máuriparerurahlána éna. Tacutihí acane ena iápmareana ema Janes émapa ena jambres tiácapaemachanahi ema víyarahaini Moiséini. Tímaticareanahisera eta namaimatirahi eta yátupiqueneana. ⁹ Váhisera camurianaimahi ena náiturevanaya, taicha ena achaneana námatiacavaneyarehi eta náepiyahiraivana súnsurupianahi éta, tacutiyaehi eta námatiasiravacahi acane ena achaneana ena nani apina iápmareana tiácapaemachanainíhi ema Moiséini.

Eta téqueneha matuparacasivahi ema Timoteo mayehe ema Pablo

¹⁰ Pítisera péhichahi yátupi eta nímiturapiana. Picutinuhi eta núrivahi nayehe namutu achaneana, étaripa eta nupamisiravahi eta néhisirahi ema Jesús, nucasifávahi yátupi mayehe. Picutinuhivare eta nucayeherahi paciencia, étaripa eta némunarivahi, étaripa eta nucamichirahi tamutu. ¹¹ Péchahivare eta náichiranuhi ena achaneana, eta nucatajivairahi náicha. Ichapemuríhi eta napanajirisiranuhi eta te avasareana Antioquía Ichipichu, te Iconio, étapa te Listra. Émasera ema Viya ticatiuchanuhi tayehe eta juca náichiranuanahi. ¹² Énesera tacaheyarehi eta juca. Tímiyanavanayare tipanajiricahavianayarehi vimutu víti vivarahana véhica yátupi ema Jesucristo. ¹³ Énerichuvare, ena achaneana váinarajiqueneana tiápajucavainapa eta navainarajivanaya. Énerichuvare ena ticaetemarahlana, tiápajucavainapa eta nacaetemaraivaya. Énajicacainapa ticaetemacacanayare.

¹⁴ Pítisera pímiyanavahi eta péhisirahi eta juca pímitucasivanahi. Yátupíhi pímerercahi eta pisuapirahi. Piti pímatihavirichuhi víti vímitucavianahi, nútiripa. ¹⁵ Piámavahi te amuyavichaha pímatíhi eta Sagrada Escritura. Éta, tímitucavíhi tayehe eta víuchucuiraya te apana vítaesira, táchavenéhi eta visuapirahi yátupi ema Jesucristo. ¹⁶ Taicha tamutu eta

Sagrada Escritura tásihaqueneanahi mayehe ema Viya. Jéhevarequene eta viviyihayare eta ticaravahucareana, eta vímitusihaya véchajisihayare ena achaneana eta viconsejachi-hayareva, vímitupiruchihavacaya tayehe eta táurivayare eta náitaresirana. ¹⁷ Tacahe, ena vichamuriana mávaháruana ema Viya téchemarahianayarehi, yátupi náitucayarehi tamutu eta náichiraya eta táuriqueneana.

4

¹ Puiti nutuparacaviyare muraca te máijare ema Viya, émapa ema Viáquenu Jesucristo. Taicha éma, títecavaneyare eta macavacureiraya te juca apaquehe. Viti vítare-ruanaichaha énapa ena náepenaqueneanaripa vicayaserehinapa te mamirahu tájahahipuca eta vicaemataneasiranahi éma. ² Eta tacahe, pímiyanavachucha picametarairu eta máechajiriruva ema Viya te jácani pítujsiravana. Vahi picúyacujiéquenehava. Pécatiaca-vacaicha muraca ena téjecapavanahi eta náeneuchirávaina. Piconsejachavaca. Pétimechavaca ena tíuripanereruanahi. Pácayehesera paciencia eta pímitusiravacaya namutu. ³ Taicha tatiarihiyare eta sáchezare ena achaneana vaipa nasuapaimahi eta vímiturapiána táuriqueneana, étainapa náichayare eta navarahaqueneanarichu. Natanucainapa ena nácani tímutucanayare tayehe eta tájiparacana, nacarichuinapa tisamacareanayare nayehe. ⁴ Tasapihainapa náepuruyare eta yátupiqueneana, nacaepaquecuiñapa. Étaserá eta náepiyapiruana ena achaneana, tasapihayare eta tisupacareyarehi nayehe.

⁵ Pítisera pinasiyareichu tájina píchiravaimahi. Picamichayare tamutu eta picatajivairana. Pímiyanavachucha picametarairu eta máechajiriruva ema Viya. Pítauchayare eta pituparacasivahi.

⁶ Púitsera, nútí tiánehipa eta nítaviraya te apaquehe. Nucutiripa eta yúcupi te títavayarepa témahayarepa, éneripa nucahehi nútí. ⁷ Váhiquene néñamavacare. Nítavavarerupa eta nuncanarairahi eta tamauriqueneana. Vahi nuvitaequenehahini. Nítauchahi eta nutuparacasivahi mayehe ema Viáquenu. Núnacahi muraca ena nusuapirahi ema Jesús. ⁸ Púiti nútí étanecha nuchapahi eta jena sáchezare eta máijarasiranuyare eta níjaracasiya me Viáquenu, taicha eta néhisirahi yátupi. Taicha éma, máitachayarehi eta máijarasiránuyare eta nícuchihi mayehe. Váhivareséra nácarichuimahi nútí nucaijaracasiyare. Énerichuva máijaracayareva namutu nácani ticuchapanahi eta machaviraya.

Éma Pablo máimichuha ema Timoteo

⁹ Pítátijirícavaicha eta pítesirávanezare ani nuyehe. ¹⁰ Puiti tijunijicanuripa ema Demos, taicha tétavicavahi majamurachirahi eta mavaraha ticaimahaquenezare te juca apaquehe. Tiyana macaijuhehi tayehe eta Tesalónica. Émasera ema Crescente, névatachahi te departamento Galacia. Énerichuvare ema Tito, névatachavare te departamento Dalmacia. ¹¹ Macarinehi nucachanehi ema Lucas. Pivenumapahi ema Marcos, máiteca ema apanavare. Tétavicavahi eta nucamunuirahi éma. ¹² Éma Tíquico, nuvanecahi máiteca ara piyehe te avasare Efeso. Émainachaha pítsivaina. ¹³ Te píteca, pétavajicayarepahi te Troas, pivenuminanuya eta nuyehe capa nunaquiruhi mayehe ema Carpo, étapa eta nuyeheana libro, étapa eta apamuri ajumerucana.

¹⁴ Numetacavivare eta máejecapiravahi ema Alejandro eta nuyehe; tétavicavahi eta macatichiranuhi ema maca herrero. Máimahainesera ema Viáquenu. Éma títsirijiequenehayare eta máichiranuhi. ¹⁵ Eta tacahe, picuneuchavaicha eta mayehe, taicha tétavicavahi eta macatichirahi eta vicametarairuahi.

¹⁶ Étaripa, te tínapucainapa nucatiuchavahi te mamirahu ena tuparairucana juéseana, nájina náimicatacanuhini. Namutuhi tijunijicanuanahi. Tiuri, tacuijaseraini macuícharacáini ema Viya, maperdonachavacáini ena tijunijicanuanahi. ¹⁷ Émasera ema Viáquenu tijaneacanuhi, tímicatacanuhi. Vahi máisapanuhini nanacanuhini te tapena eta sárareana tíncarahiana. Nítujicavahi núchuca nuyana tayehe eta apanaqueaneana avasareana, nucametarairuhi nayehe ena apavasaqueneana. ¹⁸ Éne tacaheyare eta máimianiravayare ticatiuchanu ema Viáquenu tayehe eta táíñehiqueneana. Tiámanuyarehi tayehe eta mávasa anuma. Máichecuarequireyarehi eta vijirauchiraya éma. Amén.

Éta táichecuaraqui eta máechajiriruva ema Pablo

¹⁹ Péchajisinanuvaca ema Aquila ésupa esu mayena Priscila, énapa ena machichanaveana ema Onesíforo.

²⁰ Émasera ema Erasto, nunaquicahi te Corinto. Émapa ema Trófimo nunaquicahivare te Mileto taicha ticajumahi éma.

²¹ Pítecavanecha te tamirahuinarichaha eta muracana técatícava. Téchajicaviana ena vichamuriana ema Eubulo, ema Pudente, ema Lino, esu Claudia, énapa ena apamuriana vichamuriana.

²² Núti nuyaseuchaviparaca me Viáquenu Jesucristo majaneacavihini tamutu sácheana, táetaviuchavaréni eta iúricarevaya emutu éti máicha. Tamutupa eta néchajiriruvahi piyehe.

Eta macartane ema Apóstole Pablo mayehe ema machamuri TITO

¹⁻⁴ Nuti Pablo, nucajurevi piti nuparape Tito. Némunacavihi tímcutitjiricavahi nuchichavinahini táichavenehi eta péhisiranuhi eta nusuapajiraivahi mayehe ema Cristo. Nuvaraha macatajicavini ichape, májapanuvini ema Tata Vicaiyaquene, émapa ema Viáquenu Jesucristo, émaripahi ema Macatiurahiquene viyehe. Nájaracavini eta táurivaina eta pipaneruana.

Acane, eta táepaniravahi eta juca apaquehe, ema Viya macametarapihi eta májjarasirahaviya eta vítaresiraya máichecuaraquireyare. Ene tacaheyare, taicha ema Viya tájina máepiyahiraivaina. Puiti, títecapauchahaviripa eta sache máicutiarahi ema Viya, eta májjarasirahaviripa viti apóstoleana eta máechajiriruvana, étaripa vémechaquenehi puiti ena achaneana. Tacahe, núti mavanaranuhi ema Viya. Manerejirunuhi ema Jesucristo, ema Macatiurahiquenehi viyehe. Tituparacanuhi nítauchayare núti eta námirayare eta máechajiriruva. Tivanecanuhi eta nímitusiraya ena apamuriana manerejiruana ema Viya eta nasuapajiraivanayare, mavarairahi náimatiequeneha tamutu eta tímítucacareana yátupiqueneana apaesa tauri eta náitaresiraina. Tacahe, nacunevaina eta jena sácheyare te májjaracahaviya eta vítaresiraya máichecuaraquirénapa.

Eta macatuparahaira ema Tito

⁵ Péchavarichuhi te nunaquicavinapa eta te tíurupuhi te mar ticaijare Creta. Nutuparacavihi pítauchayare tamutu eta numaitaureanahi. Eta nutupararuvuhi pinerejicaya ena pinacaqueneanayare eta návacureanaya ena pastoreanaya téchapajiricanayare nácani nájamuripachu tisuapajirahiana. ⁶ Nayehepachuina pastor, tacamunusera mácani achane maoparavare eta máitaresira. Mácani, ésunarichuhi esu mayena. Tisuapajirahianahivare ena machichanaveana. Tacuija natapiravaina. Tisamarahiana éna. ⁷ Taicha tacamunu natapiravarena nácani pituparatanayare; taicha éna, tuparairucanayarevare mayehe ema Viya. Mácani, tímítucacarehi. Mácani, vahi tiseमारairihi. Váhivare tavayuaruina eta téracare. Váhivare macueharahi. Váhivare tijamurarahi. ⁸ Mácanisera achanesamure tijacaparahi nácani tichimarachana. Máurica macachane ena tíuripaneréruana. Mácani, máituca típanerereca. Mácani, títaurahi tamutu nayehe ena achaneana. Mácani, macaijuhe ema Viya, títaurahihivare mayehe. Mácani, táuriquene eta macaratasirava. ⁹ Énerichuvare tacamunu ema mácani tisuápajiráhiquene tayehe eta vímiturapiana tisuapacareana, apaesa éma táurivare eta máimituresiraina. Taicha tacamunu eta májjarasirayare eta natumevaina ena tisuapajirahianahi. Tacamunuhivare eta macajimuyasiravacaina ena nácani ticatianacanarichaha eta máimiturapiana. Májjaracainavare eta nasuapajiraivaina.

¹⁰ Taicha nararihi camuriana ena titupiarahiana. Náetaviucha eta náechajiricavarasivana, tivayuarahiana éna. Nararihi ena nujaneanana tíapajucavana eta natupiaraviana. ¹¹ Picamatinacayare ena nani. Vahi picuisapa eta náimitureca eta tamauriqueneana, machu náemejecapavacha ena vichamurianahi. Taicha vahi táuricacarehíni eta náimiturapiana. Ena nani náichahi eta juca taicha navarahahi navereacavaca eta naplataneana.

¹² Matiarihinihi ema nayehenihí profeta najaneanaichu ena cretenseana. Macahehi eta máechajiriruvahi nayehe: “Ena nujaneanana cretenseana, tépiyahirahiana éna. Tífehi eta náichaquene nacuti eta sárare tífehi. Cánisiuquiana. Plújuanavare éna” macahepa éna. ¹³ Yátupi tacahehi eta náitaresirahi puiti ena cretenseana. Eta tacahe, pituparacaicha muraca ena vichamuriana cretenseana, apaesa vaipa nacuaquipaicava tayehe eta tájiparácana. Tauri eta náehisira eta véhiruhi. ¹⁴ Vaipa nacusuapa eta náimiturapiana navayuarapiana ena nujaneanana israelítana. Machu nacusuapa eta náimiturapiana ena nácani navaraha tihapapiricavaca ena vichamuriana eta náehisira eta yátupiqueneana tímítucacareana.

¹⁵ Ena tipachinanahi te napanereruana téhepa nasamureana, éna ena nani nacaijuhe eta táuriqueneana taicha náurica eta nasamararasira tamutu eta táuriqueneanahi. Énasera ena masuapajirairahana váinarajipanereruana, éna vahi táurihini nasamira eta tíuriana echajirirucava yátupiqueneana. Taicha tachipejiquenehi tamutu eta napanereruana, muracasamureanapa táicha. Tájina nasamahini eta tamaurivahi eta náichirahi. ¹⁶ Éna nacahehi: “Véhica ema Viya”. Tímaticareanahisera eta namáehisirahi ema Viya, taicha náicharichucha eta tamauriqueneana tíñemahiana. Émasera ema Viya macaticha tamutu eta juca náichaqueneana táíñemahiqueneana. Ena nani, masuapajirairahanahi eta mayehe. Tájinasera vahi náituruequenehaimahi ena nani náichahini eta táuriqueneana.

2

Eta yátupiquene vímiturapiana

¹⁻² Pítisera pímiturecaya tamutu eta táuriqueneana. Ena víyarahana ichanaruana, pímitucayareva eta najaneasiravaina eta náitaresira, náitaurahivaina, náitusiraina tipanererecana, nasuápajiráhiquenéna tayehe eta mavanairipiana ema Jesucristo. Náemunarahi nayehe ena achaneana. Yátupina eta nacamichiraina tamutu. ³ Énerichuvare ena vénarahana ichanaruana, pímitucayareva éna tauri eta náitaresiraina taicha éna, tuparairucanahivare mayehe ema Viya. Vaipa téchajihianaimahi. Váhivare tacuvayuaca eta téracare. Náimiturahisera eta táuriqueneana. ⁴ Náimitucayareva ena amaperuana esenana apaesa náituca eta námunasiraina ena náimanaveana énapa ena nachichanaveana. ⁵ Náitusirayareva tipanererecana. Napicaucha ena náimanaveana. Nasuapajirahivare nayehe. Napicauchacare nacaenacare te napanana, náitusiraina náechapajirica eta nayerervana. Náurivaina éna, apaesa tacuija náechajisiacarevaina tayehe eta náehisirahi eta máechajiriruva ema Viya.

⁶ Énerichuvare píconsejachayare ena amaperuana ajairana, yátupina eta náitusiraina tipanererecana. ⁷ Tamutu eta juca, pinaquipairuyare píti eta piúrivaina, apaesa étaina náehica ena vichamuriana eta piúrivahi píti. Étanarichu eta pímiturapiya, vahi pihapapicaimahi eta pímitucasivahi. Váhivare picuitsivacha. Tapicauchacare eta pímituresiraya. ⁸ Táuri eta pímvahapisirayare eta jácani péchajirisiravanaya, apaesa tacuija nacuviyava eta nacaecahiravina ena piánaranahi, titsirihavianayarechucha táicha.

⁹ Píconsejachayare ena músuana eta nasuapajiraivaina nayehe ena náquenuana. Náitaucha támutu jácani navarahaqueneana ena náquenuana. Vahi nacujicapairihi tayehe eta vanairipiana. ¹⁰ Váhivare nacuvijaca eta nacayehequeneana ena náquenuana. Yátupina eta nacasiñacarevaina tayehe tamutu eta natupararahanahi. Náimereca yátupina eta náurivaina apaesa tajamurachacare eta véhiruhi, étarichuhi eta vímiturapiana mayehe ema Macatiurahiquenehi Viya.

¹¹ Ema Viya, acaneripa eta majapanuirahavihi vimutu viti achaneana. Eta tacahe, máimitesinahavihi puiti ema Machicha eta macuchucuirahaviya. Eta juca tímicaeche-rachahi víti eta majapanuirahavihi ema Viya. ¹² Puiti ema Viya mavaraha eta táuri eta vítaresiraina te juca apaquehe. Mavaraha yátupina eta vítusiraina vipanerereca, étapa eta víturaivaina tamutu nayehe ena achaneana, étapa eta víturaivaina mayehe ema Viya. Vaipa vichaimahi eta tájiparacana tamauriqueneanahi. Váipavare vichaimahi eta tajamurachaqueneana eta viáquehe. ¹³ Tásiha, vicunevainapa eta machavirayare ema Viáquenu Jesucristo ema Macatiurahiquenehi viyehe. Eta máitesiraya mámayarepahi eta tapachinaquene majaraiva. Tétavicava eta viúrisamurevainapa te jena sácheyare. ¹⁴ Éma, máepeni-nahavihi, mavarairahi macaichepaicaya tamutu eta víchirahi eta tamauriqueneanahi. Máepachinachayare tamutu eta tamaeperajivana eta viáchanevana. Taicha mavarahahi machaneraquenehaviyare. Tacahe, puiti vivapinavayarehi vicha eta táuri queneana.

¹⁵ Tiuri, pímitucayare eta júcana nutupararuvianahi, tamutu píconsejachavacayareva ena achaneana. Tijuricati natiarihi navaraha téjecapavana, picortachavaneyare. Pétumehava eta pímitusirahi taicha eta pituparacasivahi. Piúriyare eta pítaresira apaesa námutu napicauchavi, váhivare nacuepuru eta pituparahahi.

3

Eta vítaresira viti véhicana ema Cristo

¹ Pémechayareva ena vichamuriana eta nasuapiraina ema ichapequenehi aquenuca, tásiha, énapa ena tuparairucana. Énerichu pémechavare ena vichamuriana énaína nápapucava eta návanaicare tayehe jácani ématanecanaya. ² Vahi nacuechajica nayehe nácani achaneana. Váhivare nacumehareca. Váhivare nacutupiarahi. Mánसानीनसера, najapanurahi nayehe ena achaneana.

³ Víti, acane eta masuápajiráirahavirichaha, vimáimatiéquenehahinivare. Víchahi tamutu eta tájiparacana tavarahaqueneana eta viáquehe. Tétavicavahi eta viváinarajívainihi eta vítaresirahi. Vicapinarurahini. Vímicatichavainihi nayehe ena achaneana. Vicatianarahinivare nayehe éna. ⁴⁻⁵ Púitiserá, vaipa vácahehini, taicha máitsivacharipa eta vítaresira ema Macatiurahiquenehi Viya. Émasera, tétavicava eta máuriva eta viyehe. Témunacahaviripa. Váhinéni víchahini eta táuriqueneana, tíjapanuhavisera éma. Masipacaipa eta visamureana, máquijicaipa eta tamauriqueneanahi eta viyehe. Énerichuvare tíjaracahavipa ema Espíritu Santo. Ema Espíritu Santo máitsivachinahávipaipahi eta vítaresira, tímitucahavipa eta viúrivayare eta viyeherepiyare. ⁶ Tétavicavahi eta viúricacarevanahi maicha ema Espíritu Santo májjaruhi ema Jesucristo Macatiurahiquenehi eta viyehe. ⁷ Majacpahaviripa ema Viya, tiásihaquenehi eta máemunasirahavihi ichape. Énerichuvare

timetacahavihi eta májjarasirahaviyare eta vítaresiraya máichecuarquirénapa. Tásiha, vivapinavahi víti eta vicuneiravahi eta jena sáchezare.

⁸ Yátupiquenehi tasuapacareva eta juca vímitucasivahi. Eta juca néchajisihaque-
neanahi puiti, nuvaraha pímitucayare tamutu sácheana apaesa náimiyana naicha eta
táuriqueneana ena vicutiqueneana tisuapajirahiana me Viya. Tétavicavahi táuriva eta
vímiturapiana. Tájina táichiravaina, taicha eta juca tíjaracarahi eta náurivaya nayehe namutu
ena achaneana. ⁹ Puíticha nararihi ena tisuapanarichaha eta nahapapiruanahi nayehe-
repiana ena viáchucanaveánaini. Te návarahapuca náevataemachavi, vahi picujicapajiri-
cavaca, taicha súnsurupianachucha eta nayasereruvianaya. Váhivare picuimicasiapava
nayehe nácani tijunacana eta mayeherepiana ema Moiséini. Te navarahapuca nácani
ticajachaviana, vahi picujicapa. Pihapapicayaresera eta tajuricatira eta nasemanevanahi.
Téaticavachucha éta.

¹⁰ Te matiarihipuca ema mácani mavaraha mahapapica eta napanereruana ena
vichamuriana, pímicuhayare picórtachávaneya eta mapanereruhi. Te apihequenénapa
eta pímicuha, te máviraichu vahi macusuapavi, pévatacayare mayana máuchuca. ¹¹ Taicha
tímaticarepahi ema achane eta mamaimitucacarevaya. Étavenérahí eta mapecaturana
táimicuñacaya.

Eta téqueneha matuparacasivahi ema Tito mayehe ema Pablo

¹² Tiúri, névatacayare pítsivayare ema Artemas eta ara piyehe, téhesera émapuca névataca
ema Tíquico. Te máitecapauchavipa ara piyehe, pitecávaneyare ani nuyehe te juca avasare
Nicópolis, taicha nunasiyarechaha ani.

Nuvaraha táetavicavanúmachaha eta muracana téaticava, nupaenumavainapa
nuyanaya. ¹³ Énerichuva títecapauchaviya ema vichamuri abogado Zenas, émapa ema
vichamurivare Apolos. Pímicatacavacayare éna eta nayanirayare. Péchapajiricayare
éna, te náechuriapuca eta napaisiraya. ¹⁴ Pímitucayare ena vichamuriana eta
achanesamurevacaina, máejeraréna eta nacajiraivaina nayehe ena achaneana. Yátupina
náitaucha eta nacamunucarevanahi.

¹⁵ Téchajicaviana namutu ena natiarihiqueneanahi nuyehe. Tásiha, péchajisinanuya
namutu ena némunacasáreana vicutiqueneana eta visuapajiraivanahi mayehe ema Viya.

Nuyaseuchaheparaca emutu éti me viáquenu Jesucristo, táetaviuchahini eta iúricaca-
revaya máicha.

Tamutupa eta néchajirivanahi piyehe.

Eta macartane ema Apóstole Pablo mayehe ema machamuri FILEMÓN

¹ Nuti Pablo tapresuchaquenuhí eta néhisirahi ema Jesucristo, puiti nucachane ema Timoteo eta vicajureravihi eta carta piti Filemón, vichamurivíhi vémunaruviquenehi tayehe eta vématanerepianahi. ² Vémechajíshavare namutu ena vichamurianahi tíurujicavarahianahi te pipena. Péchajísinahavívere esu vichamuri Apia, émapa ema Arquipo, vicompañeroquenehi muraca tayehe eta vématanerepianahi. ³ Nuvaraha macatajicahehiní ichape ema Tata Viacíaquene, émapa ema Viáquenu Jesucristo. Náijaracahehiní táurivaina eta epanereruana.

Eta máurivahi ema Filemón

⁴ Néchaviparaca te nuyujarasirana, nuhasulupayachahi ema Viya. ⁵ Taicha nusamairicahi eta pímiyanirávahi pémunaca ema Viáquenu Jesús, péhícahi yátupi. Pémunachavívere namutu ena machanerana ema Viya. ⁶ Nuyaseuchavacahi me Viya nayehe namutu ena téhicavianapaipahi táichavenehi eta náimairahi eta pisuapirahi yátupi. Nuvaraha nácaicutiaraquenéaini muraca tamutu eta táuriqueneana máijararuhavianahi ema Cristo Jesús. ⁷ Ichaperinehi eta núsismurevahi picha piti nuparape. Tijarahinehi picha te nusamure eta nusamairirisirahí eta pímiyanirávahi pémunacavaca yátupi ena vichamuriana, étpa eta picurisamurechiravacahí ichape éna.

Ema Pablo máchejiucha ema Onésimo mayehe ema Filemón

⁸⁻¹⁰ Tiuri puiti, nuvaraha néchajiucha ema Onésimo. Picatajicanu piperdonachinanu éma. Núti yátupiquenenuhi mayehenuhi apóstole ema Cristo. Tituparacanuheníni nuvanecavihini. Étasea eta vémunasiracacahi, nuyaseacavi nuti paure ichavica, nucaerataquenehi puiti máichavenehi ema Cristo. Puiti éma, nuchichahi némunaruquenehi te juca cárcel taicha éma téhícahaviripa eta visuapirahi ema Jesús.

¹¹ Ema maca Onésimo, cape juca másinequenehi, vahi máitaurahini eta picamusurairahi. Tijunahivare. Púitisea éma, ichaperinehi eta máitátiranuhi. Eta máitátiranuhi núti tacutiya eta máitátiraviyareva píti apana. ¹² Puiti névatacayare éma eta ara piyehe. Picatajicanu pijacapinanuyare táimicutijiricava nútinayarehi nítecapauchavi piyehe. ¹³ Nuvarahahineni mánasihini eta ani nuyehe. Émainahini pítsivainahini eta pivairahi píteca pitátinuya eta návhairahi te juca cárcel táichavenehi eta nucametairuirahi eta máechajiriruvana ema Viya. ¹⁴ Nuvarahahineni níminasicha éma, nucuchapahisera tájahapuca picayemayare píti. Váhisera nuvaraha nupamicavi eta juca picatajisiránuya, nucuchapayare eta pijicapiranuyare. Nuvaraha étachucha tásihaquenyarehi eta táurivaina eta pipanereru. ¹⁵ Táitaurevaquene tijunijicavihi ánipi ema Onésimo. Émarichuserapuca jácani ema Viya tásihahi máisapahi eta macahyarehi ema Onésimo. Púitisea tétupiricavapa éma. Májajapainapa tichavayare eta ara piyehe, apajarahinapa eta máitátiraviya. ¹⁶ Váipa tácutimahi cape juca másinequenehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma te mavahuana ema Viáquenu. Núti, ichape eta némunasirahi ema maca. Énénapa pícaheyare píti apanava, tíapajucavainapaipa eta pémunasiraya ema maca.

¹⁷ Te yátupina pémunacanu eta nuchamurivírahí, pijacapinanuyare éma táimicutijiricava nútinayarehi pijacapa. ¹⁸ Te tatiaríhinapuca eta máejecapiranavahi piyehe, ticantevehipuca, nútinaríne picobracha. ¹⁹ Nuvachachaviyare núti. Nuti Pablo, nútiquenehi nájuchahi eta nufirmachirahi puiti eta nuvachachiraviyare. Nuvarahahinéni némechavi píti apana eta pintevehí nuyehe eta nucatiuchiravihi. ²⁰ Tiuri, nuparape, picatajicanuchaha eta juca nuyasearuvíhi táichavenehi eta nucachamurivirahi mayehe ema Viáquenu. Picurisamuréchanuya.

²¹ Németeaca vahi táefñamavacare eta juca pisuapiranuyare. Eta tacahe, nucajurevahi puiti. Taicha néchahivare eta vahi tácarichuimahi pítauchaya eta juca nuyasearuvianahi. Tatiaríhiyare jácani apanayare píjararuvanayare píti tásihaquenyare te pisamure. ²² Énerichuvare nuvaraha pétipirisananuya eta nítecapihaya. Étanecha nucuchapahi eta tasamacarevaina eta eyujaracasana me Viya eta nútujisiravaina nítecapauchaha.

Eta táichecuaraqui eta máechajiriruva ema Pablo

²³ Téchajicavi ema Epafra, ema nucompañerohi te juca cárcel, tapresuchaquenehivare ema apana eta véhisirahi ema Jesucristo. ²⁴ Énerichuvare téchajicaheana ena apamuriana

vicompañeroanahi tayehe eta vématanerepianahi: ema Marcos, ema Aristarco, ema Demas, émapa ema Lucas.

²⁵ Nuyaseuchaparaca ema Viáquenu Jesucristo táetaviuchahíni eta iúricacarevaya máicha. Tamu tupa.

Eta apanavare carta nayehe ena israelítana téhicanahi ema Jesús, ticaijare HEBREOS

Emajesús títametacahavi eta máechajiriruvana ema Tata Vicaiyaquene

¹ Acane eta náitaresirahi ena víachucanaveanaini, natiarihihi ena camuriqueneana santo profetana mavanaranahi ema Viya. Éna, náitametacahi ena achaneana eta máechajiriruvana mapanereruanahi. Ichapemurivare eta náimeresirahi eta máitupajijiasiravanahi ema Viya. Apanapanenéjivare eta náimituresira eta máechajiriruvana. ²⁻³ Puítisera viti vítareruanahi puiti juca áñoana, ema Viya mavanecahi ema Machicha eta viyehé, títametacahaviya eta táequeneruana mapanereruana. Ema maca Jesucristo, Víyahivare éma, taicha machichahi ema Viya. Acane émahitápiyacahi eta apaquehe, eta anuma, étapa eta vímahaqueneanahi puiti, máitauahirahi tamutu eta mapanereruana ema Maiya. Émarichuvare ticatuparahahi me Maiya eta émairahi téchahi tamutu. Puíticha émahitéchahi tamutu, máetaviuchahi eta máitupajijiasiravahi. Ema Cristo ticayehéhi eta majaravahi májararuihi ema Maiya. Eta máucupaisirahi eta viyehé, tímimaticahavipa eta máurivahi ema Maiya. Tásiha, te tamutupa eta macaepahirahi eta vipecaturana vimutu viti achaneana, tichavapa te anuma. Ánaqui ema Maiya macaejacapa te nayehe trono te mavaure.

Emacristo, éma ticapicahupanahi nayehe ena ángeleana

⁴ Tacahe, ema Cristo, éma ticapicahupanahi nayehe namutu ena ángeleana, taicha ema Maiya májaracahi eta ichapequene mávacurehi ticapicahuhi. ⁵ Taicha eta máechajiriruvahi ema Viya mayehé ema Cristo, ani macahehi: “Píti yátupiquenévihi nuchicha. Puiti nucaejacavihi te piávacure” macahepa. Tacahe, ena ángeleana, tájina vahi máichahini: “Píti nuchichavi”. Váhivare máichahini: “Núti picaiyaquenehi”. Ema Viya máechajisihahi ema Cristo, ani macahehi: “Ema maca, ema yátupiquenehi nuchicha, taicha nátiqenenuhivare máiyanu” macahepa. ⁶ Tacahe, te macucupaicapa ema macarichuquene Machicha te juca apaquehe, macavanairipipa eta natsiusirayare nacunachirayare namutu ena ángeleana. ⁷ Énasera ena ángeleana, táechajisihahi eta Sagrada Escritura, ani tacahehi: “Ena ángeleana vanairucanachucha éna. Nacutíhi eta técativava eta najuricativa te ticavanahiana. Nacutivare ena yucu eta nasiparisarayare jácani tamaeperajiqueneana” tacahepa eta Sagrada Escritura. ⁸ Ánisera tacahehi eta táechajisihairahi ema Cristo: “Píti yátupiquenevihi Viya. Máitavacacayarehi eta aquenucavirayare. Tétavicava eta tatupiruvairayarehi eta pivanairipi. ⁹ Píjaracayarehi eta táurivayare eta náitaresira ena achaneana tíuriana tisuapavianaya. Énerichu píjaracayare eta náicuñayare ena achaneana váinarajiana masuapajirairahanahi eta piyehé. Eta tacahe, ema Tata Vicaiyaquene, ema Ticachichavihi, tíjaracavihi tamutu eta picapicahuirayare nayehe ena pichamuriana téhicavianahi. Tétavicavahi eta náurisamureva picha”. ¹⁰ Anivare tacahehi: “Píti yátupiquenevihi Viáquenu. Píti pítucahi eta táimahiare eta táepaniravahi eta apaquehe étapa eta anuma, pépiyaruana te pivahuana. ¹¹⁻¹² Tayanapané títavayarehi tamutu eta juca vímahaqueneanahi, ichasipaipahi tacuti-paipa eta táichasivapaipa eta vimuiríha. Pítisera pinasiyarehi. Te pímahapa táuricapa eta pítsivachiraya tamutu, máejerareyarehi picha. Pícañapupujicainapa tamutu. Taicha píti, máitavacacaviyarehi eta pítaresirahi” tacahepa. ¹³ Jararihi eta apana máechajiriruvahi ema Viya, ani macahehi mayehé ema Cristo: “Yare, péjaca te nuvaure, eta picuchapihayare eta nucaeputyusiraya te pimirahu ena ticatianacavianahi” macahepa. Énasera ena ángeleana, tájina vahi máichahini: “Péjaca ani te nuvaure”. ¹⁴ Taicha ena ángeleana, mavanaranahi ema Viya. Éna, espírituanahi. Vahi énajivainahini nacapicahuhini. Eta natuparahahi éna, tijaneacahavianaya viti macuchucureanayare ema Jesús.

2

Tacamunuhi eta vipamisirava tayehe eta véhisirahi ema Jesús

¹ Eta tacahe, títuparaacahe yátupina eta ecaravahuiraya eta ímitucasiqueneanahi, machu émitisica, machu étaina taviuchahe vahi iúchucuhahini. ² Eta acane, ena ángeleana, éna tímitucanahi ema víyarahaini Moisés eta vanairipiana. Tétavicavahi eta tasuapacarevahi. Ticaicunávaneanahi ena téjecapavanahi, timasuapanahi eta nasamaquenehi. ³ Puiti numetacahe: Tisuapacarepanahi eta véhiruhi. Tájina vahi ticaticahémahi eta ícuñayare te váhipuca eucamapuravahi eta iúchucuirayare. Taicha émarichuhi ema Viáquenu tínapucahi máichuhavacahi ena achaneana eta náuchucuirayare. Tacahe, ena tisamanahi éma, tichuhavianapa viti.

4 Énerichuvare, ema Viya máimerecapahi eta tíaramicareana, máicutiaranahi eta émairahi vanairuca, mavarairahi tisuapacareyarehi eta nametarapiana. Énerichuvare puiti ema Espíritu Santo, éma tíjaracahavihi eta vítucaquenepachuyare apaesa vítauchayarehi eta vématanerepipachuhi víjarahi máicha.

Éma Jesucristo, achanehi eta máimahi eta máitesirahi te vitaracu

5 Éma Viya, váhivare éninahini matuparacavacahini ena ángeleana eta énaírayare téchanaya eta arairuyare avasare eta vicuchapaquenehi, étaripa eta véchajisihaqueneyarehi. 6 Éta Sagrada Escritura, ani tacahehi eta táechajiriruva: “Píti Tata Víáquenu, tétavicavahi eta pijapanuirahavihi víti achaneanasami. Víti, váhinéni táunahini eta vítaresirahi. Váhivare véñamacarehini. Pítisera péñamavahi eta víyehe, váhivare pémitisicahavíhini víti pépiyaruana. 7 Te pépiyacapa ema víáchucaini Adán, vahi mácutinasivacahini ena ángeleana. Éna, nacachuricahi éma eta náitupajijiasiravana. Váhiserá tánasimahi eta nacachuriasirahi. Taicha pijapanuhavihi víti mámariequenehana ema Adán. Píjaracahavihi eta víavacurehi tajarahiquenehivare, tétavicavahivare eta vicapicahuirahi. Aquenucahavihi pícha. Véchahi tamutu eta pépiyaruana. 8 Visuapacarehi víti tamutu eta pituparasirahavihi” tacahepa eta Sagrada Escritura.

Tacahe, téchajisihahavihi eta Sagrada Escritura eta véchirahi tamutu eta máepiyaruanahi ema Viya, tájina ticaejeraimahi, maicha ema Viya. Vuíchahasera vímahahini vicayamuricahini tamutu táichavenénahini eta visuapacarevahi. 9 Mararihiserá ema Jesús. Tíucupaicahi ánipíhi te juca apaquehe, nacachuríacaripa ena ángeleana eta náitupajijiasiravana. Éta máemunasirahavihi vimutu víti achaneana, ema Viya máimicapacarihavare te crusu vítívenehi. Téhesera te táequenepa, macaejacapa ema Jesús tayehe eta tajarahiquene mávacurehi tacapicahuquene, táitsivahi eta macatajivairahi eta máepenirahi.

10 Éma Viya émarichuhi téchahi tamutu. Éma, tétavicavahi eta máechemaraivahi eta manerejisirahi ema Machicha eta macuchucuirahaviyarehi, tíamahaviyarehi eta te mávasa, víti machichanayarehi. Émaripa ema Jesús, eta macamichirahi tamutu eta mátajivana, títauchavahi tamutu eta matuparahahi. 11 Éta máepachinachiraripa eta víáchanavana, visiapamuríhaipa ena machichanaveanahi ema Viya, vicutiripa ema Jesús eta machichairahi ema Maiya. Éta tacahe, ema Jesucristo, ichape eta máurisamurevahi eta víyehe eta majacapirahavihi maparapehaviyare. 12 Éta te Sagrada Escritura, ani tacahehi eta máechajiriruvahi ema Cristo: “Nuvapínava eta néchajisihairaviyare, Tata, nayehe ena nuparapenaveana. Nuvaraha nujirauchaviyareva, nacachanenuhivare éna”. 13 Ánivare tacahehi: “Tétavicava eta nucasiñavairahi mayehe ema Tata Nucaíyaquene”. Éta apana, ánivare tacahehi: “Áni návihahi núti, énapa ena píchichanaveana, ena pínerjiruanahi píjararunuanahi píti Tata” macahepa.

14 Víti achaneana, étanarichuhi eta vícaechera étapa eta vítine. Éne macahehi ema Jesucristo, macaechehi, macaitnehivare étarichuhi tacutíhi eta vítine víti. Éta tacahe, eta máepeninahavihi, macapaquechihayarehi ema Váinaraji, émarichuhi muracaquenéníhi eta máitupajijiasiravahi eta macapareresirahi. 15 Víti achaneana, ichapequenéníhi eta vípisirahi eta vépenirayarehi, taicha vipicahi eta vícuñayare. Éta vípisirahi tahapapiricahi eta vítaresira. Émasera ema Jesucristo macaepaharipa eta vícuñayarehini, vaipa tápicacarehini eta víyehe. 16 Éma, eta máitesirahi, vahi étainahini táimitecahíni eta máimicatasiravacarehi ena ángeleana. Yátupihiserá víti achaneana, víti máimicataruanayarehi, taicha eta vícasiñavairahi eta mayehe, vícutirahi ema víyarahaini Abraham eta macasiñavairahi me Viya. 17 Éta tacahe, eta máucupaísirahi ema Víáquenu, tatuparacahi macaqueheyarehi eta víáquehe eta máitaresirahi, ticutihaviyarehi víti maparapenaveana te tamutu eta vítaresirahi, yátupiyarehi eta máetaviuchiraya eta majapanuirahaviyare, máetaviuchayareva eta macasiñacarevaya eta víyehe. Taicha macarichuhi ema tíyasechahaviparacahi te mami- rahu ema Viya Macaíyaquene, macaepaháinahaviyarehi eta víviurevanahi táichavenehi eta vípecurana víti achaneana. 18 Éma Jesús, ichape eta macatajivairahi, macaitsamarajiquenehi ema Váinaraji. Macamichahiserá tamutu, vahi máisapavahini. Tásiha puiti, éma marataha tímicatachaviyare víti eta vícamichirayare eta víatájivana táichavenehi eta macaitsamarajirahavihi ema Váinaraji.

3

Éma Cristo tíápajucavahi eta macunachacarevapanahi mayehe ema víyarahaini Moisés

1 Nuvaraha numetacaheya eta apana, eti nuparapenaveana máepachiaruanahi ema Viya, máichuhaqueneanahivare eta esiapiraya eta mávasa. Nuvaraha epanerecha apaesa ácaicutiara eta táetaviuchirahi eta máitupajijiasiravahi ema Jesús. Éma, yátupíhi mavaneruhi

ema Viya eta máimitusirahaviyarehi eta juca véhiruhi. Macarichuhi ema tiyaseuchahavi-paracahi te mamirahu ema Viya. ²⁻⁶ Ema Jesús, tévavicavahi eta máitachirahi tamutu eta mavanahiana matuparacasivanahi me Viya. Énerichuvare ema víyarahaini Moisés, títaurahivare eta mavanahi eta maconsejaraivahi, máimitusirahivare ena achaneana tamutu eta mavanairipiana ema Viya. Énerichuvare máechajisihahi tatiarihiyare eta apana mapanereruana ema Viya vuíchahasera máimerecaini ema Viya. Émasera ema Jesucristo, ema tiápajucavapanahi eta macunachacareva, macachuricahi ema víyarahaini Moisés. Ticunachacarepanahi taicha machichahi ema Viya, ticatuparahahivare téchahavihi vimutu viti machanerana ema Viya. Émasera ema Moisés vanairucaichucha. Ema Moisés máichuhavacahi ena achaneana. Émasera ema Jesucristo, émahí tépachinachahi eta viáchanevana viti machanerana, tihetamurichahavivare. Viti yátupihí machanerahavihi, te vímiyanava eta juca véhisirahi éma, vicasiñavavare eta mayehe, víurisamurevare eta vicuchapirahi eta viúchucuiraya te jena sácheyare.

Ema Viya tícuchahavihi eta vinarasihayare viti machanerana

⁷ Eta tacahe, nuvaraha ejaneacava. Ema Espíritu Santo, ani macahehi eta máechajiriruvahi tayehe eta Sagrada Escritura: “Puiti jena sache, esamayare esuapayare éti eta numetarapiana nútí. ⁸ Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitamarajiranuhi nútí. ⁹ Tétavicavahisera eta nucamichiravacahi eta namasuapajiraivahi. Cuarenta añoripahinéni eta nímechiravacahi eta tíaramicareana níchaqueneanahi, váhisera nasuapanuhíni. ¹⁰ Eta tacahe, te táequenepa, nusemapa nayehe ena nani achaneana. Taicha éna, táetaviuchahi eta táejecapiravahi eta nasamureana. Vahi návarahahini náimatihini eta táurinaquene achene, nuvarahaquenehi nímechavaca. ¹¹ Nútí nétupiricaripahi eta náicuchihi nanarasihayarehini eta nuyehe. Tétavicavahisera eta náimiyusemasiranuhi. Tásiha, nucahepa nútí: Ena nánítátaji váhiquene nasiapaimahi tinaracanimahi eta nuyehe” macahepa ema Espíritu Santo.

¹² Eta tacahe, nuparapenaveana, nuvaraha ejaneacavayare yátupina. Machu éhica eta napanereru ena masuapajirairahana, machu emutserahava íminajícava eta éhisirahi ema yátupiquenehi Viya Vicaiyaquene. ¹³ Étumechacacayaresera nayehe ena apamuriana echamuriana támutuhi sácheana puiti juca vicaijuheyare, apaesa nacuija navayuca ena tivayuarahiana tayehe eta pecatu, machu étaina táemuracacha eta esamureana. ¹⁴ Taicha viti machamuriahavianahi ema Cristo. Vijacapainasarepa eta vícuchihi mayehe éma, te vímiyanavahi eta vicasiñairava mayehe, vétumechiravahivare eta véhisirahi. ¹⁵ Eta tacahe, nápechavavare némechahe eta máechajiriruva ema Espíritu Santo: “Puiti jena sache, esamayare esuapayare éti eta numetarapiana nútí. Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitamarajiranuhi nútí” macahepa.

¹⁶ Puiti nuvaraha epanerechaya eta juca. Némechaheya ema víyarahaini Moisés eta macuchusiravacahi ena viáchucanaveanaini tayehe eta avasare Egipto. Tétavicavayaréni eta náuricacareva. Tamapurujisera eta nasamirahi eta mahu ema Viya, májarasirahi eta mavanairipiana. Náimiyusemacapaipa éma eta namasuapirahi. ¹⁷ Tamapurujivare eta cuarenta añohi eta macamichiravacahi ema Viya. Taicha tavayucacahi eta napecatrana éna, étapa tivíuchahi eta náepenarasirahi te mávapahi apaquehe. ¹⁸ Eta namavarairavacahi nasuapahíni, éma manacapa eta mayehe juramento eta namaitujisiravayare tisiapana nanaracahini eta mayehe. ¹⁹ ¡Ácaicutiara éti! Táichavenehi eta namasuapajiraivahi, puiti vímahaipahi eta namaitujisiravahi tisiapana tayehe eta mávasa ema Viya.

4

¹ Tacahe puiti, vicasiñavayare me Viya apaesa vítujicava vinaraca mayehe. Ticamunucarehisera eta ejaneasiravayare muraca machu émpururecava éti, tijuricati vahi ecuitujicava esiapa. ² Taicha viti vicametacasihivare eta viúchucuirayare tacutihí eta nacametacahirahi éna. Tamapurujihisera eta nacametacahirahi eta náuchucuirayarehíni, váhiquenesera nasuapahíni. ³ Yátupisera jararihi eta vinarasihayarehi, taicha ánipa macahe ema Viya: “Nútí nétupiricaripahi eta náicuchihi nanarasihayarehini eta nuyehe. Tétavicavahisera eta náimiyusemasiranuhi. Tásiha, nucahepa nútí: Ena nánítátaji váhiquene nasiapaimahi tinaracanimahi eta nuyehe” macahepa ema Viya. Vítisera viti visuapajirahiana, vítujicavayare visiapa tayehe eta juca vinarasihayare eta mayehe ema Viya.

Émarichuhi ema Viya máetupiricaripahi eta vinarasihaya, taicha tinaracapa éma, te táequenepa eta máitachirahi macaemataneasirahi tamutu eta juca apaquehe. ⁴ Taicha eta

Sagrada Escritura, ánípa tacahe: “Saisi sache eta macaematanerahi ema Viya. Téhesera te siétequenepa sache, tinaracapa éma, taicha máitacharipahi tamutu” tacahepa. ⁵ Tásiha, nápechavavare némechahe eta juca máechajiriruvana ema Viya: “Váhiquene nasiapaimahi tinaracanimahi eta nuyehé” macahepa. ⁶ Tacahe puiti, mávacuichahahi eta nanarasihayarehini ena tnapucanahi tisananahi eta náuchucuirayare, táichavenehi eta namasuapajiravahi. Étainapasera viáviyahare viti véquenereruana visuapajirahianayare. ⁷ Ánaquiapari-pahi eta táetavisiravahi eta áñoanahi te táequenepa eta namasuapirahi ena nani, máichapa ema Viya eta te Salmo, ánípa macahe: “Puiti jena sache, esamayare esuapayare éti eta numetarapi núti. Tacuija eta tamuracavaina eta esamureana”. Eta macaheirahi eta juca, ema Viya máimicutiarachahi eta apana sache ticamapuravacarehi eta visiapiarayare eta te vinarasihayare eta mayehe. ⁸ Yátupihí ema víyarahaini Josué macaitcapavacahi ena nani achaneana tayehe eta apaquehe natuparahahi. Váhisera étainahini eta nanarasihayare mavarahaquenehi ema Viya. Eta tacahe, eta máechajisihapa eta apana sácheyare visiapi- rayá viti. ⁹ Tacahe, jararihichaha eta juca tacapicahuquenehi vinarasihayare, táicuchihi eta viáchaneva víyehé viti machaneranahi ema Viya. ¹⁰ Eta visiapiarayare vinaracaya eta mayehe ema Viya, yátupi máitavacacayare eta vinarasiraya, vaipa vicaematanémahi. Vicutiayare ema Viya eta manarasirahi tayehe eta máemataneanahi. ¹¹ Eta tacahe, tavarahahi vétumechavayarehi tayehe eta visuapiraina éma, apaesa vítujicava visiapa tayehe eta vinarasihaya. Machu vémpurureca eta vícuchihi, machu vácuti ena masuapajirairahanahi.

¹² Taicha eta máechajiriruva ema Viya, tétavicavahi eta táitupajijiasiravahi máicha, tamutuhi tarataha. Tacachuricahi eta tacasiriva eta espada. Tacapayacayarehi te amahé tayehe eta viáchanevana viti achaneana. Tímechahavi eta tamaurivahi eta visamureana. Tasiapavare eta vípanereruana. Timituchahavivare eta vétupirisieca eta vítaresirana. ¹³ Ema Viya máimamaracahi tamutu. Tájina vahi viratahaimahi viyumuruca eta víchaqueneanahi. Tamutuyarehi túchujica te mamirahu éma vépuyumiraureyarehi te máichuhahavipa eta vimetauresiravayare mayehe.

Ema Jesús macarichu éma tiyaseurahi eta viyehé

¹⁴ Ema Jesús, yátupiquenehi Machicha ema Viya. Macarichuhivare ema tiyaseurahi eta viyehé taicha mávaháruhi puiti ema Maiya mávihahi te machacaya. Eta tacahe, vicaratacavayarehi muraca tayehe eta véhiruhi. ¹⁵ Éma, yátupihí tiyaseurahiquenehi eta viyehé, taicha tímatihavi eta vimatumevahi. Tijapanuhavisera, taicha éma énerichuvare ticatajivahi tamutuhi macaitsamaraji ema Váinaraji, tacuti eta macaitsamarajirahavahi viti. Váhisera macapecaturahini ema Jesús. ¹⁶ Eta tacahe, vicesiñavayarehi te viyujarasirana, vémeñahairavahi me Viya témunarahiquene. Taicha tétavicavahi eta majapanuraiva táichavenehi eta máemunasirahavihi. Éma, yátupihí eta máimicatasirahavi tayehe tamutu eta vicamunuiravana.

5

¹ Nuvaraha epanerechaya nayehe ena nácani catuparahanayare tiyujaracarahiana viyehé viti israelítana. Éna, nerejianahi te nataracu ena achaneana. Natuparacasivaichuhi éna ticaitecapanayarehi me Viya eta námavahuana ena achaneana, étapa eta nanaquiruvana táichavenehi eta napecaturana, nayaseuchirayarehi ena achaneana mayehe ema Viya. ² Éna, tijapanurahianayarehi nayehe ena máitureereana énapa ena téjecapavana, taicha énarichuvare ticatajivanahi tayehe eta naeche máteji. ³ Étaripa eta nacatajivairana, ticamunuvanahi éna apana ticamavahuanahi mayehe ema Viya táichavenehi eta napecaturana.

⁴ Tacahe, mácani ticatuparahayare tiyaseurahiyarehi, vahi émajiriruvaimahi máichuhacavarichuhi. Émahi ema Viya tjaracahi eta matuparahahi mapicahuyarehi, tacutihi eta máijarasirahi ema víyarahaini Aarón eta matuparahahi macapicahuirahivare. ⁵ Ene macahehi ema Cristo. Vahi émajiriruvainahini eta macatuparahairahi tiyaseurahiyarehi eta viyehé. Émarichuhi ema Viya tjaracahi eta matuparahahi mapicahuyarehi, taicha ani macahehi ema Viya: “Píti yátupiquenévihi nuchicha. Puiti nucaejacavihi te piávacure” macahepa. ⁶ Eta apana máechajiriruva, ánivare tacahe: “Nunerejicavihi píti piyaseurahiyare. Nutuparacavihi péchajirahiyare nayehe ena achaneana. Máitavacacayare eta juca pituparaha, picutiayare ema nuvanaraini Melquisedec” macahepa ema Viya. ⁷ Tacahe, ema Cristo, te matiarihichaha ani te juca apaquehe, tiyaseuchavahi te mayujarasirana eta me Maiya. Muraca eta máumitirahi, máiyahairahivare. Tiyaseuchavahi vahi máemitisichahini ema Maiya eta macaechepusirayarehi te máecari te táequenepa eta máepenirahi te crusu. Jéhesare, tisamacarehi te mayujarasirana, táichavenehi eta mavarairahi máitaucha tamutu eta mapanereruana ema Maiya. ⁸ Taicha ema Cristo, machichahi yátupiquene ema Viya. Váhisera máéñamavahini. Váhivare majunijicahini eta macatajivairanahi. Macamichahi

tamutu, macaravahuirahi eta masuapajiravahi. ⁹ Eta tamutuirapa eta máepenirahi, téchepucavarepa, tásiha maratahapa eta macuchucuhairahaviyare vimuti viti visuapanahi éma. Máitavacacayarehi eta vítaresiraya máicha. ¹⁰ Eta tacahe, ema Viya manacahi eta mávacure téchajuirahi eta viyehe macutihi ema víyarahaini Melquisedec.

Ecunevahi machu ánasi ácuti ena amuyana

¹¹ Ichapemuriyare eta táechajisihaquenehi eta juca numetaruhehi. Ticajerahisera nítametacahehíni taicha tétavicavahi eta tamuracavahi eta echutiana. ¹² Ánaquiaparipahínéni eta ecaravahuirahi, iúrihapahíni puiti máestrohevacainaipahíni. Ecamunuichahahisera natiarihiyarehi nácani tiápechaheanaya títametacaheanayarehi jácani vahi tácajehahíni eta vímitucasivanahi me Viya. Puiti éti épiyacavaripahi máiturerehe. Ecutiripa ena amuyana, tacamunuhi vésicahayarehi eta leche eta ticaitarecayarehi, taicha vuíchaha táitucahíni tanicahíni eta tinicacareana. ¹³ Taicha ena amuyana tiájicanachaha, vuíchaha técharecana, vuíchahavare napanerequenehaimahi eta táurivayare eta náitaresira. Ene ecahehi éti, apaesarichuhi ecaratacavahi eta éhisira eta táuriqueneana. ¹⁴ Énaserá ena yátupíhi eta nacaravahuirahi, ena nacutihi ena ichanaruanahi. Téchavanaripa náitucaripa tinerejiuchavana eta táuriqueneana, náepurupa eta tamauriqueneana.

6

¹ Núti, nuvaraha ímiyanavayare eta ecajurusiraya eta échemaravahi tayehe eta juca véhiruhi. Ichanaruhénahíni tayehe, vaipa ecucutihíni ena amuyana. Éhicapaini yátupi eta máimiturapi ema Cristo. Vaipa ecuápechavahíni épanaequenereca eta tánapureanahi íárvahuanahi. Éti, vaipa ecamunuhi viápechahehíni vímitucahehíni eta éneuchiravayarehi eta epecurana tímcapacahayareni, váhivare viápechavahíni vímitucahe eta ecamunuirahi yátupina eta ecasiñavairayarehi me Viya. ² Éti ímatipa eta táicharacavahi te ecaicachasinapa, étapa eta táicharacavahi te nanacapa eta navahu te echuti. Ímativarepa tamutu eta vímiturapiana tayehe eta náechepusirayare ena náepenaqueneana, étapa eta ecuñaracui máitavacacayare. ³ Tásiha puiti, nímitucaheyare eta apamuri, te máíjaracanurichahapucaini ema Viya eta nítipajijiasiravaya, étapa eta ecaravahuiraya.

Ecunevahi, machu ínajícava eta véhiruhi

⁴⁻⁶ Páureanasamisera ena tínajicavanapuca eta véhiruhi, tichavanayarepuca. Taicha nácani natupiruvahi najacapa ema Jesús, tásiha énévanehi najirica te nasamure eta majacapiravacapa ema Viya, machichanaipa; mávahácaripa ema Espiritu Santo; tacurisamurechavacavarepa eta máechajiriruva ema Viya; náimatiequenehavarepa eta náuricacarevaya tayehe eta arairuyare avasare, téhesera te nácani náinajicapuca eta náehisirahi, vaipa táitujicacareimahi tiápechavana náeneuchavahíni. Taicha eta náinajisiravapa, náepuruipahi ema Machicha ema Viya. Tímcutijiricavaripa nacaecahíhíni éma te namírahu ena achaneana, nápechavahíni náetataca te crusu éma. ⁷ Nímicutichayare. Eta macamirisirahi ema Viya eta tíquiva, táerapaisiravanehi tamutu eta apaquehe. Jararihi eta apaquehe, tíurinasarepa eta tasucucureruvana, maicha ema Viya. ⁸ Jararihivare eta apana apaquehe, tájina tasucucureruvaina. Itapepairechucha, ijarevare. Ema Viya máíjaracayarehi eta táicuñayare, tíjuinapa te yucu táicuchíhi.

Vahi vínajicavaimahi taicha tatiarihi eta vicuchapaquenehi

⁹ Puiti, muracacaha apaesa eta numetasirahehi, nútisera nucasiñavahi eta eyehe eta vahi ínajicavaimahi, éti némunaruanahi nuparapenaveanahi. Nucasiñavahi eta máíjarasiraheya ema Viya eta iúricacarevayare te macuchucuhahavipa. ¹⁰ Ema Viya tétavicavahi eta máitauravahi, váiparinehi máemitisicaimahi eta ecaemataneasiranahi. Étapa tímereuchahehi eta émunasiravacahi ímicatasiravacahivare ena echamurianahi tayehe eta juca véhiruhi. Máimahahi eta ímiyanavairahi ecaemataneaca. ¹¹ Nuvarahavare ímiyanavahíni eta evapinavairavaca ámutu éti eta ecaemataneasirahi, yátupina ecasiñava mayehe ema Viáquenu, ecuchapaya eta machaviraya. ¹² Váhivare nuvaraha plújuhéna. Ímiyanavahi éhica ácuti ena echamurianaini yátupiquenehi eta nacasiñavairahi me Viáquenu, nacamichahi tamutu. Jéhesare, ecuticacasarepa éna eta ejacapiraya eta ícuchíhi mayehe ema Viya.

¹³⁻¹⁴ Émechava eta acane eta máechajiriruvana ema Viya eta máíjarasiravahi eta máuricacarevayare ema Abraham. Ánipa máicha: “Yátupiyare eta níjarasiraviyare eta piúricacarevayare, tásiha, níjaracaviyareva eta náichapemurívaya ena piámariéqueneana. Nútijiva nupamicava eta nítauchirayare eta juca néchajiriruvana níjararuviyare” máíchapa. Aní tacahehi eta máechajiriruvana, taicha nájina apanainahíni tipamicaimahi éma. Tásiha, émajiva tipamicavayare. ¹⁵ Ema víyarahaini Abraham, ichapemurihi eta macasiñavairahi

me Viya, eta macuchapirahi eta májjararuvanahi ema Viya. Tásiha, tétavacavahi eta máuricarevahí. Máimahahivare ema machicha Isaac énapa ena mámarinaveana. ¹⁶ Tacutihi mácani achane, te maicha eta juramento, majurachahi te mamirahu ema Viya, mavaraha ema Viya mapamicayarehi eta máitachiraina. Te mácani achane majurachapuca, tájina táefnamavacarehini eta máitachirayare. ¹⁷⁻¹⁸ Ene macahehi ema Viya, tjaracavahi eta mapamisiravayarehi máitaucha eta májjarasirahaviyare eta viúricarevayare. Tipamicavayare, taicha mavaraha vahi véñamavaimahi. Tímaticarehi eta máurivahi ema Viya. Tájina táefnamavacaréna eta vicasifnavairaya muraca eta mayehe, taicha éma vahi máitsivachaimahi eta mapanereruana, váiparinehivare tépiyahirahimahi. Tájina véñamavaimahi eta vicuchapirahi eta májjarasirahaviyare eta vícuchihi. ¹⁹ Eta juca vicuchapaquenehi, étara tétumechahavihi muraca te viáchanevana. Tétavacavayarehi eta vicasifnavaira eta vipauchirayare ema Viya, taicha mararihiyare ema tímisiapahaviyare te mávihahi ema Maiya. ²⁰ Taicha ema Jesús, ema títapumirauchayarepahi eta máetupirisirayare eta viyanirayarehi, taicha macarichuhi éma ticatuparahahi eta mayaseuchirahaviyare, macutihi ema víyarahaini Melquisedec.

7

Ema Jesús, ema tiyaseurahi eta viyehé, macutihi ema víyarahaini Melquisedec

¹ Ema maca Melquisedec, émahi maparajuruhi ema Abraham. Taicha acane, te jena año, ema viáchucaini Abraham énapa ena masuntarurana téhacacanapa nacanarapa ena réyeana, navarairahi nacuchucuha ena námereruana, émaripa ema máneva Lot, énapa ena machichanaveana. Máitahacacavacahisera. Matiarihivare ema apana rey, táquenuhi eta avasare Salem. Émahi ema Melquisedec. Éma, mavanarahivare ema Viya, tiyujaracarahi éma. Tacahe, te tichavapa te mapena ema Abraham, mácapapa ema Melquisedec, mavarahapa mayujarauchaya ema Abraham. ² Tacahe, ema viáchucaini Abraham títisiriicavapa. Májjaracapa ema Melquisedec eta diésmuri tayehe eta maganarermanahi nayehe ena mánarana. Étahi eta mámvahuhi me Viya. Ema Melquisedec, aquenucahi éma tayehe eta avasare ticaijare Salem. Eta májare, te véchajiriruva ticaijare: “Ema Rey máuriquenehi, tájina táichava tamutu te mávasa”. ³ Ema maca Melquisedec, eta majurusirahi, vahi táimaticarehini nájahahipuca ena ticachichanahi, nájinavare majaneanaina. Váhivare táechacare eta máuchusira étapa te máepenirahi. Énerichuvare, nájina ema máitsivainahini ema Melquisedec. Eta matuparahahi, ene macahehi puiti ema Machicha ema Viya, nájina máitsivainahini. Máichecuaraquirehi eta mávacure tiyaseurahi.

⁴ Nuvaraha epanerequeneha. Ema maca Melquisedec ticapicahupanahi maicha ema Viya. Eta tacahe, ema viáchucaini Abraham májjaracahi eta diésmuri eta maganarermanahi nayehe ena réyeana máitajaruanahi. ⁵ Acane, matiarihíhi ema mámariequenéni ema Abraham, ticaijare Leví. Te táequeneha, matiarihíhi ema mámariequenéni ema Leví, ticaijare Aarón, maparapehi ema Moisés. Tásiha, ema Moisés manacapa eta vanairipi, tatuparacahi namutu ena mámariequeneana ema Aarón, tiyujaracarahianayare éna. Tavanecahi ticobrarrecanayare eta diésmuri eta navachayare ena najaneanarichuhi, mámariequeneánaini ema Abraham. Nájina tacaitiruinahini. ⁶ Émasera ema Melquisedec, vahi mámarinahini ema Leví. Majacapahisera eta diésmuri mayehe ema Abraham, te tamutupa eta mayujarachirahi éma. Tayanapane tímijachavahipuca ticunachacarepanahi ema Abraham táichavenehi eta májjararuanahi ema Viya eta mayehe ema Abraham. ⁷ Eta tacahe, vimutu vecha víti, mácani tiyujaracarahi ema apana, éma ticunachacarepanahi mayehe mácani mayujarachaquenehi. ⁸ Tacahe, ena apamuriana tiyujaracarahiana tépenanapaipahi, tásihasera namutu ticaitsivanapahi. Émasera ema Melquisedec vahi macaitsivahini. Puiti eta Sagrada Escritura táechajisihahi éma, máichecuaraquire eta máitaresirahi. ⁹⁻¹⁰ Émaripa ema Leví énapa namutu ena tiyujaracarahiana mámariequeneanáníhi, natuparahachuhi náicuchihí eta náuchisirayare mámariequeneanayare ema Abraham. Tásiha, tímicutijiricavahi éna apanava navachachahi eta diésmuri ema Melquisedec te jena sache eta mavachachirahi ema Abraham. Énarichuyarehini najacapaya eta diésmuri.

¹¹ Ema tiyujaracarahiana mámariequeneanáníhi ema víyarahaini Aarón, éna tímítucanahi ena achaneana eta vanairipiana májureanahi ema víyarahaini Moisés. Váhiserá naratahaimahi napamicavaca ena achaneana náitaucha tamutu. Taicha te náitachapucaini, váipapucaini tacucamunuini ema apana tiyujaracarahi macutiyahehi ema Melquisedec, vaipa mámariequenénahini ema víyarahaini Aarón. ¹² Émasera ema Viya máechajisihahi ema apana tiyujaracarahiyare matupararuyarehi. Émapa tímechahaviyare eta máitsivachirayare eta viyanihayare mayehe. ¹³⁻¹⁴ Jararihi puiti eta apana. Taicha ema Viáquenu Jesús, vahi mámariequenénahini ema Aarón. Éma, máchucaini ema Judá. Te nataracu namutu ena

majaneanaini, nájina émanainahini mayujaracarahihini. Ema Moisés vahi máechajisihahini matiarhiyare ema tiyujaracarahiyare, mámariéquenehi ema Judá. Émasera ema Jesús táechajisihaquenehi eta Sagrada Escritura eta émairyare tiyujaracarahiyare.

¹⁵ Tacahe, vímatiequenehahi yátupi eta máitsivachirapa ema Viya eta viyanihayare eta mayehe, taicha ema arairuyare tiyujaracarahi, tacamunuhi eta macutiryarehi ema Melquisedec. ¹⁶⁻¹⁷ Taicha tacahehi eta máechajiriruvahi ema Viya, ani macahehi: “Nunerejicavihi píti, piyaseurahiyare. Nutuparacavihi péchajuirahiyare nayehe ena achaneana. Máitavacacayare eta juca pituparaha, picutiyare ema nuvanaraini Melquisedec” macahepa. Tásiha, vímatiequenehahi puiti ema ticatuparahahi ema Jesús táichavenehi eta máitaresiryare máitavacacahi. Vahi étaparacainahini eta nájahahipuca ema máchucaini. ¹⁸⁻¹⁹ Tacahe, tépahapa eta vanairipiana náehiruinihi ena náinapureana tiyujaracarahiana, étaripa eta vanairipiana manaquiruanahi ema Moisés. Taicha tájina táratahaini tacuchucuhahavihini táichavenehi eta vimáitachirahini víti. Vahi tacaitecapahavihini me Viya. Puítisera ema arairuhi, tétavicavapa eta macasiñacarévhahi éma. Émapa tacaitecapahavíhi mayehe ema Viya.

²⁰⁻²² Ena náinapureana tiyujaracarahiana, tájina eta júramentoinahini eta nacatuparahairahi. Émasera ema Jesús, ticapichapanahi eta mávacurehi taicha tújaracavahi ema Viya eta juramento, te matuparacapa ema Machicha. Taicha eta Sagrada Escritura táechajisihahi, ani tacahe: “Ema Viya, váhiquene máitsivachaimahi eta máechajiriruvana. Majurachapa, ánipa macahe: Nunerejicavihi píti, piyaseurahiyare. Nutuparacavihi péchajuirahiyare nayehe ena achaneana. Máitavacacayare eta juca pituparaha, picutiyare ema nuvanara Melquisedec” macahepa. Jéhesare ema Jesús, tétavicavahi eta macasiñacarévhahi eta máitachiraya tamutu eta májararuvanahi ema Viya. Tiúripanahi eta arairu viyanihayare me Viya. ²³ Tiuri, eta tayerevahi eta áñoanahi, camurianahi ena tiyujaracarahiana mámariéqueneánaini ema Aarón, taicha ticaitsivanapahi, arairuanapahi éna. Étasera tíchahi ena tépenanapaichucha, vahi náimiyavahini náitarecahini. ²⁴ Émasera ema maca Jesús, máepenacacahi éma. Nájina nasiapahini máitsivainahini tayehe eta mávacurehi. ²⁵ Tásiha puiti, macarichu éma maratahahi ticatiuchahavíhi víti vicasíñanahi éma. Éma, tacaitecapahavíhivare me Viya. Máitavacacayarehi eta máechajiuichirahavíhi taicha váiparinehi tépenaequenehahavimahi. ²⁶ Tacahehi puiti eta macatuparahairahi ema Jesús téchajiuichahavíyare. Tétavicavahi eta vicamunuirahi éma, taicha yátupiquenehi santo, matapiravarehi éma. Tájinavare máimatiyahini macapeaturahini. Váhiquene mácutihini ena pecatumareana eta napanereruana. Puíticha éma mávihahi tayehe eta anuquehe anuma te machacaya ema Viya. ²⁷ Éma, váhivare mácutihini ena apamuriana tiyujaracarahiana. Éna, nacamunuichaha tamutuyarehi sácheana nacapaca eta sárare náijuchaqueneharehi, tásiha nativayarepa tiyaseuchavana tayehe eta napecaturaichu. Te tamutupa, tapaenumavapa nayaseucha tayehe eta napecaturana ena achaneana. Émasera ema Jesús, étahéichuhi eta mavachachirahi eta vipeaturana vimutu, tújaracavainapa eta máepenirahi te crusu. ²⁸ Ena nani ajairana ticatuparahana tiyujaracarahianayarehi taicha eta vanairipiana, étasera vahi nánasihini te juca apaquehe, náepenaequenehapaichucha eta náematanerepianaini. Émasera ema Jesucristo tiyaseurahiquenehi yátupíhi. Eta macatuparahairahi tacachuricahi eta nacatuparahairahi ena nani. Máitavacacahivare eta máechajiuichirahavíhi. Taicha ema Viya máichahi eta juramento eta matuparasirahi ema Machicha.

8

Ema Jesús ema vituparahahi téchajiuichahavíhi víti véhichi eta arairu viyanihayarehi

¹ Tiuri puiti, nuvaraha yátupi ácacutiara eta juca: Ticunachacarepanahi ema téchajuirahi eta viyehe víti. Taicha máitarihí te anuma, téjacahi éma te mayehe trono te santuare ema Viya. ² Ánaquí, eta máitachihahi eta mávacure tayehe eta yátupiquenehi Mautuario tiávihahi te anuma, máepiyarui ema Viya. Vahi tácutihini eta náepiyarui ena achaneana. ³ Namutu ena tiyujaracarahiana, tatuparacahi náimerecayare eta námavahuana étapa eta nanaquiruvana. Éne macahehi ema Jesucristo, tatuparacahi máimerecaya eta námavahuarehi, tiúripanahisera éta. ⁴ Ena náinapureana tiyujaracarahiana, nacarichuhi ena ticatuparahanahi náimerecayarehi eta námavahuana tacamunuqueneanahi eta nayujarasirahi eta te Templo te jena Jerusalén. Émasera ema Jesucristo, tájina vahi mácamunuimahi ticamavahu tayehe eta Templo. Taicha éma, anuma eta mayujarasirarehi. ⁵ Énasera ena tiyujaracarahiana te juca apaquehe, eta náemamacasareana te nayujarasirana, étachucha eta tavasíhi eta tiávihanahi te anuma. Véchahi eta tavasichucha, taicha ema Viya máemechahi

ema víyahaini Moisés eta yátupiquene Santuário tiávihi te anuma. Ánipa maicha: “Pépiyacayare eta Santuário tavasiyare picha eta tiávihi te anuma númerovivi te piávihaipa te cerro” macahepa. ⁶ Émasera ema Jesús, tiúripanahi eta máematanerepi taicha te anuma eta máechajuchirahavihi. Éma, téchajirahi tayehe eta arairu matratune ema Viya. Eta arairu matratune, tiúripanahi eta táinapurehi, taicha tétavicavahi eta víiuricarevayarehi taicha máijaracahi eta máechajiruva ema Viya. ⁷ Jéhesare, eta táinapuiru matratune, vahi náitachaimahi ena achaneana. Taicha te náitachahipucaini, vahi tácamunuhini máijaracahini eta apana arairu. ⁸ Émasera ema Viya, eta máimairahi vahi náitachahini, tiápechavavarepa eta máechajiriruvahi, ánipa macahe: “Tatiarihiyare eta sáchevayare tépanavayare arairu eta nutratune nayehe ena achaneana israelítana. ⁹ Vaipa tácutimahi eta natratunehi nayehe ena náchucanaveanaini te jena sache te nuvechuhainapa te nuvahu, nucuchucavacapa tayehe eta avasare Egipto. Váhisera náitachahini eta nutratunehi eta nuyehe. Eta tacahe, nujunijiacavacapa. ¹⁰ Eta nutratuneyare nayehe ena nani israelítana te jena sácheyare, nunacachutichayare te nachutiana eta nuvanairipiana. Najiricainapa te nasamureana. Jéhevarénapa nútí nacaiyaqueneyare. Tásiha, éna, jéhevarénapa nuchichanavequeneanainapa. ¹¹ Vaipa nácomesaimahi ticaimitucasiana nayehe ena nachamuriana, énaripa ena naparapenaveana eta náimatiranuyare. Nútí yátupiquenenuhi náquenunuhi. Namutuínapa tímatinuanayare: ena amaperuana, ena ichanaruana, énapa ena ichavicana. ¹² Énerichuvare nuperdonachavacainapa nútí eta napecaturana navainarajivana. Vaipa nécharairicaimahi eta natapiravanaini” macahepa ema Viya. ¹³ Tacahe, ema Viya, te máechajisiha eta arairu matratune, tépaharipahi eta táinapurénihi. Éta táemitiaruripahi. Vaipa tasuapacarehini.

9

Eta santuário tiávihi te Jerusalén, tavasihi eta táimahi eta Santuário tiávihi te anuma

¹ Tacahe, eta táinapuiruhi matratune ema Viya nayehe ena nani náinapureana tiyujaracarahiana, tatiarihihi eta nayeherepichuhi te tiyujaracana me Viya. Jéhesare, te jena Jerusalén eta távihihi eta santuario nayujarasirare. ² Ani tacahehi eta táimahi te náepiyacainapa: Eta tinapuca cuarto ticajarehi “Lugar Santo”. Tacapicahuquenehi éta. Éta távihihi eta candelero étpa eta mesa távirare eta pan sagrado. ³ Eta apana cuarto, ticajarehi “Lugar Santísimo”. Éta tétavicavapanapa eta tacapicahuira. Tatiarihihi eta ichapequene cortina. ⁴ Te tachacaya eta ichapequene cortina, tatiarihivare eta mesa náijuchirare eta incienso, amairiha oro. Te tajuhe, tatiarihi eta cajune, amairihavare oro, tacaunaiyahi eta márimeana ajureca eta diez mandamiento, étpa eta cajeta amairihavare oro tacaunaiyahi eta maná, étpa eta matsucurupa ema Aarón eta tímarrutsicaipahi. ⁵ Te táimahu eta cajune, natiarihihi ena apinana ángeleana, ticajare “querubín”. Eta juca querubín táimahi eta majaranavihi ema Viya. Tásiha, eta napavana táepacuhicahi eta cajune, eta náepusaisirarehi eta iti tavachasarehi eta napecaturana namutu ena achaneana. Jararihivare eta apamuriana tayerurivaninihi eta santuario, váhisera nuvaraha nájuchahini te juca puiti.

⁶ Eta tacahehi eta táimahi eta náemamacasareana eta te santuario. Tacahe, tamutu sácheana ena tiyujaracarahiana tisiapaparacanahi tayehe eta tinapuca cuarto eta náitachihaparacahi eta náematanerepiana. ⁷ Étasera eta te apajuhe, táetaviuchahi eta tacapicahuvahi. Macarichuhi tisiapa ema náquenunuri ena tiyujaracarahiana. Étaherichuvare tisiapa te étana año, mámayarepahi eta táitine eta sárareana. Éta tivachachayarehi eta mapecatura ema tisiapahi, étpa eta napecaturana ena achaneana. ⁸ Émasera ema Espíritu Santo mavaraha vímatiequenehaya eta juca. Eta cortina, éta tiávimirauchahi eta Lugar Santísimo, vahi táisapahini tisiapana ena achaneana. Puitisera visapacarehi víti eta vítecapauchaya ema Viya. ⁹ Tamutu eta juca tacamunuhi vímatiequenehayare. Eta jena náichasareanahi ena nani tiyujaracarahiana eta nacamavahuirahi, vahi tacanarasinávachahini eta napaneruruana ena téneuchavanahi, apaesa tiúriyarepahini eta náitaresirana. ¹⁰ Vahi étparacainahini tayehe eta náchaneva, taicha eta námavahusana éna, tinicacareanachucha téracarechucha, étpa eta nacasipavahuira te tisiapana tayehe eta Templo. Eta júcana nayeheripianahi, vahi tímianavaimahi. Taicha te tépenapa ema Cristo te crusu, máitsivachahi ema Viya eta vítecapauchirayarehi éma.

Tiúripanahi eta yátupiquenehi Santuário tiávihi te anuma

¹¹ Puitisera, tímerecavapa ema Cristo. Jéhevale éma, yátupiquenehi tiyujaracarahi eta viyehe. Tétavicavahi eta táuriva eta viáchanavana máicha. Eta Santuario te anuma távihihi eta mayujarasirare, vahi tayehe te juca apaquehe tauriquenehi. Te jena, tamutu tiúrihi, tipachinahivare. Tétavicavahi eta tacunachacareva. Tacachuricahi eta santuario

nayujarasirare ena apamuriana tiyujaracarahiana, náepiyaruchucha ena vicutiqeneana achaneana. ¹² Ema Cristo, jéhevare éma mávihahi tayehe eta yátupiquene Lugar Santísimo te anuma. Vaipa mámavahuhini eta táitine eta sárareana chiqueru, Chávezapucaini. Eta mámavahuhi éma, étaquenepa eta máitine. Étaherichuhi máicha éma. Vimutuhisera viti macuchucureanahi. Tásiha, máitavacacaipa eta vítaresiraya. ¹³ Ena nani tiyujaracarahiana náepusapacarihaha te náinahu ena nachipejiqueneanahi. Eta náepusapairuhi, eta táitineana eta toro étapuca eta Chávezchicha, étapa eta tsimapama tayehe eta esena chiqueru náijureasa. Eta júcana, tépachinachinavacahi eta náqueheana, apaesa táisapacarepa nasiapa tayehe eta Templo. ¹⁴ Étasera eta máitine ema Cristo ema matapiravarequenehi, tétavicavahi eta táitupajijiasiravahi. Tacachuricahi eta náepusapairuhi ena nani tiyujaracarahiana. Taicha taratahahi tacaepaha tamutu eta vípecaturana, viperdonachacarepa táicha. Tímicitijiricavahi tisipacahavihi tamutu eta vipaneruanaini tamaeperajiquenehi, étaripa eta tímicapacahaviyarehini. Puítisera eta vítaresiraya, émainapa vicaematanecainapa ema yátupiquenehi Viya. Ema Espíritu Santo máetumechahi muraca ema Jesús eta máijarasiravahi tímicapacava te crusu, taicha mavarahahi eta mámavahuyarehi me Viya.

Ema Jesucristo, éma yátupiquenehi abogado eta viyehe

¹⁵ Puíticha ema Cristo, éma yátupiquenehi viyehe abogado, téchajirucahavihi tayehe eta táequenereruhi matratunehi ema Viya. Eta máepenirahi ema Cristo, mavachacharipahi tamutu eta vípecaturanaini viti máichuhaqueneanahi éma: viti, énapa ena náinapureanaini tijacapanahi eta táinapurénihi matratune ema Viya. Tásiha, yátupihi eta macuchucuirahaviya, máijaracahavi eta vítaresiraya máitavacacayarehi. ¹⁶ Nuvaraha nímicitichinahe: Mácani achane te manaquicahi eta testamento, májuchapa eta mavarairahi máijaracasi-chavacayarehi ena machichanaveana te máepenapapuca. Eta tasuapacarevayarehi, eta ley tacamesaequenehayarehi tacayasesereru te yátupipuca tépenaripa ema achane. Te yátupihi tépenaripahi, eta testamento tisuapacarehi. ¹⁷ Vuíchahasa tasuapacarehini eta testamento, te vuíchahahi tépena ema maca tépiyacahi. ¹⁸ Tacutiqenehi, eta táépaniravahi eta táinapuiruhi matratune ema Viya, tacamunupa tépena eta sárareana, apaesa navehaya eta táitine. ¹⁹ Ema víyarahaini Moisés macametarapipa tamutu eta vanairipiana nayehe namutu ena achaneana. Tacahe, mavehapa eta títisi lana máitiapusicapa eta yucugui, máepusapaisihayarehi eta ítiama, táitineana eta chíqueruana, Chávezana. Tativa máepusacava eta libro tíamahi eta vanairipiana. Máepusacavare ena achaneana náurujiruvanahi. ²⁰ Tacahe, mamecacavaca éma: “Eta juca ítiama népusaruhehi, eta táicituara eta íjarasiravahi ítauchayare tamutu eta matratune ema Viya eta eyehé éti” máichavacapa ema Moisés. ²¹ Énerichuvare ema víyarahaini Moisés máepusacavare eta ítiama te tapaja eta santuário étapa tamutu eta náemamacasareana te nayujarasirana. ²² Taicha tacahehi eta vanairipi: Ticaepusahayarehi te iti tamutuyaréni eta náemamacasareanahi eta nayujarasirayarehi, náepachiasihayarehi. Taicha te vahi tacuepusaicavahini eta iti, váhivare tacuepahahini eta pecatuana.

Eta máitine ema Cristo tacaepaha eta pecatuana

²³ Tacahe, eta juca náemamacasareanahi ena nani, tacamunuhi náepusacayarehi eta nayujarasirayarehi apaesa tapachinavacahini. Eta santuário te Jerusalén náepiyarui ena achaneana étapa eta náemamacasareanahi, náicitupaqueneanahi eta tiávihanahi te anuma. Étasera eta Santuário tiávihahi te anuma, tacamunuhi eta apana iti tasivachaquene, tacachuricayarehi eta iti náepusaruhi tayehe eta santuário tiávihahi te juca apaquhe. ²⁴ Ema Jesucristo, tájina máimatiyahini mayujaracahini eta te jena santuário te juca apaquhe. Étaquenehisera masiapa eta mayujarasirayare eta te Santuário tiávihahi te anuma. Puíticha matupihamirauchahi ema Viya eta mayaseuchirahavihi viti. ²⁵⁻²⁶ Ema maca tiyujaracarahi te juca apaquhe, áñopahi eta masiapiira tayehe eta téqueneha cuarto Santísimo. Ticamavahupahi eta táitine eta sárare, vahi máitinéarichuhini éma. Émasera ema Cristo, étaherichuhi eta máepusaisirahi eta máitine. Vahi mápepejiricavahini te áñoana. Te mápepejiricavahini, énerichuhivaréni tíapepejicavahini eta máepenirahi puiti juca táépaniravahi eta apaquhe. Ema Viya mapanrequenehapa eta táichararacavayarehi tamutu. Te máimahapa tíuri, mavanecapa ema Machicha te juca apaquhe. Tímitecahi eta macaepahairayarehi eta pecatu, máijarasiravaripa eta máepenirayarehi. Étaherichuhi máicha. ²⁷ Vítisi achaneana, eta víchararacavahi eta vítaresirahi, étaherichuhi eta vépeniraya vimutu. Te táequenepa, járajapainapa eta víyaseserehiyare. ²⁸ Énerichuvare, eta máitaresirahi ema Cristo, étaherichuhi eta máepenirahi te crusu eta macaepahairayare eta vípecaturana viyehe viti camuriqeneana achaneana. Yátupisera tíapéchavaya tímerrecava. Váipasera étaimahi tímiteca

mavachachaya eta pecatuana. Eta tímitecayare éma, tépanahaviyarepa viti véhicanahi vicuchapanahi éma eta macuchucuirahaviyarehi.

10

Eta máitine máepusairuhi ema Cristo, tacarichuhi tarataha tépachiacahaviyare

¹ Eta mavanairipiana ema Moisés, étachucha táicutiarahi eta arairuyarehi viyanihayare me Viya, eta tíurichahaviyarehi. Ticutihi eta tacuna eta yucuqui. Vahi tánasihini máitavacainahini eta mavanairipiana, taicha vahi táurichahini ena achaneana nácani tivarahanaahi ticaijuheana ema Viya, taicha váhivare nasamavahini eta náuchucuirahi, tayanapane nápepejiricavahini te áñoana eta nacapasirahi eta sárareana. ² Te yátupinahini táurichavacahini eta náichirahi eta nayeherepi, vahi nacuaepepejiricavahini nacamavahuhini ena tiyujaracarahiana, énerichuvare ena achaneana tisamavanaripahini eta náuchucuirahi. ³ Taicha tacamunuhi nápechava te áñoana eta nacapasirahi eta sárareana, taicha tíápechavana ticapecaturanaahi. Étaripa eta táepeniranaahi eta sárareana táemecharairicavaca eta nacapeaturairaripa. ⁴ Taicha eta táitineana eta toro, étapa eta chivu, yátupiquenehi váhiquene táratahaimahi tacaepaha eta pecatuana.

⁵ Étasesa te tíucupaicayareipahi te juca apaquehe ema Cristo, ánipa macahe mayehe ema Maiya: “Píti Tata, vahi pácamunu eta nucamavahuhini nunaquicavahipucaini eta piyehe, táitinehi eta sárareana. Píti píjarcanuhi eta juca náquehehi. Váhisera táemepururecavaimahi eta píjarasiranuhi. Eta náquehe tisuapaviyare jácani pivanesiranuya. ⁶ Váipavare pácamunu eta nacamavahuira ena achaneana eta sárareana, náijuchahini te pímirahu, táimicapacahini eta tacaepahairayarehi eta pecatuana. ⁷ Núti, tímitecanuhi puiti nítauchayare tamutu eta pivarahaqueaneanayare eta nayehe, piti Tata. Nusuapaviyare te tamutu eta pituparasiranuhi tacajuquenehi eta te Sagrada Escritura” macahepa.

⁸ Tiuri puiti, nuvaraha ecaicutiarayare eta vaipa mácamunuhini ema Viya, váipavare máurica nácamavahuhini eta sárare náijuchahipucaini ena achaneana, navarairahi táepahayare eta napecaturana, tayanapane nayeherepichucha eta náítauchirahi eta vanairipiana. ⁹ Énerichuvare, nuvaraha epanerechavare eta juca máechajiriruva ema Cristo: “Tímitecanuhi puiti nítauchayare tamutu eta pivarahaqueaneanayare, piti Tata”. Eta tacahe, vímatiequenehahi vaipa tácamunuhini eta táinapure nayujarasirahi ena achaneana. Taicha ema Viya máitsivachahi eta apana, arairupa, taicha ema Cristo macarichuhi máítauchahi eta mavarahaqueneana ema Maiya. ¹⁰ Jéhevare, ema Viya tépachiacahaviripa máíchavenehi ema Cristo, eta masuapirahi máítauchirahi eta mavarahaqueneana ema Maiya, májjararecahi eta máquehe eta máepeninahavihi. Étaherichuhi máicha, vahi mápepejiricavahini.

¹¹ Namutu ena nani tiyujaracarahiana vahi nanaracahini. Tamutuhi sácheana ticame-savana nanacahi eta námavahuana. Vahi táechuquihahini eta náichirahi eta juca. Tájinasera váhiquene tacaepahahini eta pecatuana. ¹² Émasera ema Jesucristo étaherichuhi eta máichirahi. Váhiquene mápepejiricavahini. Tacahe, téjacaripahi te mavaure ema Viya. ¹³ Énerichuvare puiti eta máejasiraipahi, macuchapavacaripa eta macaepuyusiraya ema Viya te mamirahu ena taticatianacanaahi éma. ¹⁴ Taicha eta máepenirahi, eta mámvahuhi me Viya eta máquehe. Tétavicavainehi eta tajacapacarevahi me Viya eta máepachiasihahaviyarehi viti máichuhaqueneanaahi. Váhiquene tacamunuhini mápepejiricavahini. ¹⁵ Ema Espíritu Santo, étarichuhivare tacutihi eta máechajiriruvahi, títametacahavihi. ¹⁶ Ani macahehi: “Eta nutratuneyare arairu nayehe ena nani te jena sácheyare, níjaracavayare nunacasamurechayare te nasamureana eta nuvanairipiana. Najiricainapa te napaneruruana”. ¹⁷ Ánivare macahe: “Yátupina eta nucaepahairayare eta napecaturana. Vaipa néchaimahi eta natapiravanaini étapa eta navainarajivanaini” macahepa. ¹⁸ Tacahe, nuvaraha ecaicutiara eta juca: Te yátupihí táepahairahi eta pecatuana eta mámvahuhi, vaipa tácamesahini tápepejiricavahini nacamavahuhini ena apamuriana.

Vicasíñavayare eta vicaijuhéiraya ema Viya

¹⁹ Tacahe, nuparapeneveana, vácasiñava yátupi eta vítecapauchirayare ema Viya tayehe eta mávihahi Santísimo, táichavenehi eta máepachiasirahavihi te máitine ema Jesucristo. ²⁰ Véhicayare eta juca arairu achene mavejiarui, yátupi eta tacaijuhériahi me Viya. Tájinapa táichejimirauchahavihini taicha mavejiacahi tamutu ema Cristo, eta máepenirahi te crusu. ²¹ Tacahe éma, yátupiquene tiyujaracarahi eta viyehe taicha émaquenehi téchahi namutu ena machichaneveana ema Viya. ²² Eta tacahe, tatupiruvayarehi eta visamureana eta vicaijuhériaya ema Viya. Vácasiñavaini eta mayehe, vahi véñamavaimahi taicha éma masipacaripahi eta visamureana apaesa tacuija vitapiravaina tayehe eta vipecaturana. Tájinapa eta táechipejicahavihini eta vipecaturana, tímicutijiricavahi vicavahini eta te tapachinaquene

une. ²³ Eta tacahe, vímianava vétumechava eta véhisirahi. Vahi viyacujimahi. Yátupina eta vicuchapira eta vícuchihi taicha ema Viya máitachayare tamutu eta májjararuvahi eta viyehe. ²⁴ Puiti vétumechavayare vímicatajiricacayare eta tápajusiravaina eta vémunarai-vanaya. Vímitucacayareva eta víchirayare eta táuriqueneana. ²⁵ Váhivare viyacujimahi eta víurujisiravana. Vahi ecucutihini ena vichamuriana, tinerejicavanahi mayanarahanahi te víurujicava. Vétumejiricacayaresera, tavetijpa puiti eta vímairapa eta tánehirapa eta masacheraya ema Viáquenu eta machavirayare.

²⁶ Taicha te ímianavaichuchapuca icha eta pecatuana, tayanapanehi ímatiripahi puiti eta yátupiqueneana, eti émpururecaripahi ema Cristo eta ímicapasirahi táichavenehi eta epecaturana. Páurehesami, taicha nájina apanainahini ecasiñahini. ²⁷ Ena nani náempururecaripahi ema Cristo, tétavicavahi eta tamuracavaya eta náicuñayare. Tisiapanayare eta táíñehiquene yucu tájjurequene. Eta juca eta náicuchihi návihayare ena ticitianacanaahi ema Viya. ²⁸ Tacutihí acane eta macacuñaira mácani téjcapavahi tayehe eta mavanairipiana ema Moisés. Te natirihihipuca apinanahi, mapananahipuca ena testigoanahi, tímahanahi eta májcapiravahi, tatuparacahi nacapacavaneyarehi ena tuparairucana. Vahi tíjapanucaremahi éma. ²⁹ Tásiha, tétavicava muraca eta náicuñayare ena témepururecanahi ema Machicha ema Viya, ¿masi? Taicha náempururecavahivare eta máitine máepusairuhi, nacaecahivare ema Espíritu Santo, náempururecavahivare eta máemunasiravacahi ema Viya. Váhivare návarahahi náimatí eta máitine máepusairuhi, étara vivachahi eta majac-pirahaviyarehi ema Viya. ³⁰ Vimutuhi vecha eta máechajiriruvahi ema Viáquenu, ani macahehi: “Núti tituparacanu nícuñasiravacayare. Nútichucha némecharecavacayare éna”. Tásiha, ánivare macahehi: “Ticayaserehianayare ena achaneana te numirahu”. ³¹ Tipicacarequenehi eta náicuñayare ena témepururecanahi te mamirahu ema Viya, tamutuquene máimahal

³² Németeacasera ímianavayare éti tauri eta éhisirahi. Écharichuhi eta ítaresirahi cape juca, te épanavainapa eta ejacapirahi eta juca tajarahiquene máechajiriruva ema Viya. Ichapemurihi eta ecatajivairahi naicha ena ticitianacaheanahi. Ecamicahisera éti. ³³ Etiaríhihi éti ecaumehacasíhi ecaehanahi te namirahu ena achaneana. Etiaríhivare éti ímicatacanahi tayehe eta náichavaquenevanahi ena ticaehananahi. ³⁴ Ejanuhivare nácani ticaeratanahi te cárcel. Tacutiquene ecurisamurechavachucha eta naverejisiraheanahi eta ímahaqueneana, taicha échahi éti tatiaríhihi eta ímahaqueneanayarehi te anuma. Tétavicavahi tíuripanahi tayehe, máitavacacahi éta. ³⁵ Tásiha puiti, vahi ecuyacujihini. Étumechavasera eta ímitusirahi eta máechajiriruva ema Viya. Éta tíuríchaheyare, ejacapayare eta mavachachiraheyare ichapequeneya. ³⁶ Ecayehachahavare paciencia. Ímianavavare ítaucha eta mavarahaquenehi ema Viya, tásiha yátupina ejacapainapa eta ícuchi eta mayehe. ³⁷ Taicha eta Sagraða Escritura, ani tacahehi: “Vaipa máyeremahi márjapainapa ema Cristo ema vicuchapaquenehi”. ³⁸ “Nácani natupiruvahi eta nasamureana, ticasíñanuanayarehi eta náitaresirahi. Énasera nácani tichavacuejehavanahi, nucaerajicavacayare táicha” tacahepa. ³⁹ Vítisera vahi vácútimahi ena tichavacuejehavanahi, énajivaya tímítaequenehanayare. Vítisera viti vímianavanahi eta vicasíñavaira me Viya, vicuchuchayarehi eta víachanevana táicha.

11

Tétavicavaya eta víuricacareva te vicasíñavahi mayehe ema Viya eta vítaresira

¹ Te yátupí visuapa eta máechajiriruva ema Viya, vicasíñayare éma, vicasíñavavare eta mayehe eta máitachirayare tamutu eta májjararuvanaahi, tayanapane víuchaha vímahaimahi. ² Ena víachucanaveanaini, tétavicavahi eta nasuapajiraivahi. Macunachavacahi ema Viya taicha eta nasuapajiraivahi.

³ Tacutiquene, te visuapa eta máechajiriruva ema Viya, vímatiequeneha eta máepiyasirahi acane eta juca apaquehe, tájnarichahasera eta táimahacarehíni. Visuapahi tamutuhi máitacha eta mapanereruhi, máetupirisirahi tamutu eta vímahaqueneanahi puiti.

⁴ Émaripa ema víyarahaini Abel, eta masuapajiraivahi mayehe ema Viya, tétavicavahi eta tájacapacarevahi eta mámvahuhu mayehe ema Viya, tacachuricahi eta mámvahuhu ema maparape Caín. Tásiha, ema Viya macametarapihi eta majacpacarevahi ema Abel. Puiticha, májinaripahínéni, ánaquiaparipahi eta máepenirahi, tanasíhisera eta tacunachacareva eta masuapajiraivahi.

⁵ Étapa eta masuapajiraivahivare ema víyarahaini Enoc, vahi máepennumahini te juca apaquehe eta mayaniraya te anuma. Tamutuhi eta máquehe mámahí tayehe eta apana

vítairesira, eta mámirahi ema Viya. Eta Sagrada Escritura táechajisihahi eta macurisamu-rechirahi ema Viya. Táitusiava, mámapa éma. ⁶ Tásihasesa víti, te tájinahi eta visuapajirai-vainahini me Viya, váiparinehi vicurisamurechaimahi éma. Eta vicaijuheiraya éma, tativa-yarehi tacamunu yátupina eta vicasíñavaira mayehe, eta majacapirahaviya, víuricareyare máicha.

⁷ Émaripa ema víyarahaini Noé, ticasíñavahi me Viya. Tásiha, tijacapacarepa. Taicha masuapahi eta mavanecasivahi máepiyasirayarehi eta ichapequene pacure, eta macuchucuiyavayarehi éma, énapa ena machichanaveana tayehe eta ichapequene une. Tájinaichahanéni ecutiararenahini eta taquivairayarehi. Máichuhavacavarepa ena apamuriana achaneana nasiapavare. Ticaicuñanapasepa, taicha eta namasuapirahi.

⁸ Émapa ema víyarahaini Abraham, masuapahivare eta máichuirahi ema Viya, máijarasirayare eta apana apaquehe mávasayarehi. Tacahe, ema Abraham tiúchucapa te mávasaini, váhinéni máimatihini távihapuca eta macaijuheyarehi. Ticasíñavahisera me Viya eta mámirahi. ⁹ Eta máitecapirahi, tímiyanava eta macasiñavairahi me Viya. Manasipa macavasahi eta apaquehe máijararúhi ema Viya, tayanapane vuíchaha mayehenahi eta apaquehe. Tájínavare mapenainahini. Cárpachucha eta mapenahi. (Ema machicha Isaac, ene macahehi eta máitaresirahi, émapa ema mámari Jacob. Taicha éna, énerichuvare natuparacahi eta juca apaquehe návasayarehi.) ¹⁰ Émasera ema Abraham, vahi máéñamavahini. Yátupihí eta macasiñavairahi, ticuchapavaichucha eta máijarasirayare ema Viya eta mávasayare máepahacayarehi eta tíasihaqueneayarehi te mavahuana ema Viya, máetupirirúhi tamutu.

¹¹ Ésuripa, esu Sara ticasíñavahivare mayehe ema Viya, máitauchayarehi eta máijarasirava eta sucachichairaya, ichavicachicharipahinéni. Macheruhivare ésu. Máijarachisera ema Viya eta suchicha taicha eta susuapirahi eta máitauchirayare ema Viya tamutu eta máijararuvanahi eta suyehe. ¹² Tacahe, ema Abraham ichavicachicharipahivare, mapaenu-mavapa ticachicha. Tásiha, tiúchucanapa ena camuríqueneana mámariequeneana. ¡Tétavica-vahí eta nasimutuvahi! ¡Vaipa natupachacarehini!

¹³⁻¹⁴ Tacahe, namutu ena nani néchajisihaqueaneana, tímiyanavana eta nasuapirahi ema Viya tamutu eta náitaresiranahi. Tétavicavahi eta nacasiñavairahi eta máitauchiraya eta máijararuvanahi. Te navapureana, náimahapa eta návasaqueneayarehi. Tásiha, vahi náetupiricavahini eta nanasirayare te juca apaquehe. Navarahaipahi náitecapachavaneyarehi eta arairu avasare natanujirirúhi. ¹⁵ Éta tímicaecherachahi vahi nacatiequenehahini eta apaquehe návinénihi, taicha vahi náechajisihahini nachavahini. ¹⁶ Natanucahisera eta arairu apaquehe tíuripanahi, eta tiávihihi te anuma. Eta tacahe, tétavicavahi eta máurisamurevahi ema Viya eta nayehe, táichavenehi eta nacasiñavairahi eta mayehe éma. Taicha máicuchavacahi eta arairu návasayarehi, émairahi nacaiyaquenehi éma.

¹⁷ Apanavare eta máimerechirahi ema Abraham eta masuapajiravahi, te ticavanahipa eta macapasirayarehi ema machicha Isaac, máijuchirayarehi eta macamavahuiraya me Viya. Vahi macatiequenehahini ema émanaracavahi machicha. Taicha yátupihí eta masuapirahi ema Viya eta máechajiriruva, ani macahehi: ¹⁸ “Ema pichicha Isaac, njarayare ena camuríqueneana mámariequeneanayare”. ¹⁹ Taicha ema Abraham máimatihí eta tamutuirahi máituruequeneha ema Viya. Maratahahi macaechepuca ema Isaac te táequenepe eta máepenirahi. Téhesera te macapacayarepaini ema machicha, ema Viya téchajicapa. Vaipa máisapahini eta macapasirayarehi, taicha máimahapa yátupihí eta masuapajiravahi ema Abraham. Tásiha, tímicitijiricavahini máechepurénahini ema amaperu Isaac.

²⁰ Émapa ema Isaac, yátupihivare eta macasiñavairahi me Viya eta máitauchirayare eta máechajiriruvana. Te ichavicapa, mabendiciónchapa ema machicha Jacob émapa ema maparape Esaú, mavarairahi najacapayare eta táurinaqueneana máijararuanaya ema Viya.

²¹ Émaripa ema Jacob, yátupihivare eta macasiñavairahi me Viya. Te tiánehipa eta máepenirayarehi, énerichuvare mabendiciónchapa ena apinana machichanaveana ema José, mavarairahi najacapayarehi eta náicuchiana. Te títapiricapa tamutu, téneuchavapa me Viya, ticayupaicaripa eta te mayupairiquí.

²² Émapa ema José, te tiánehipa eta máepenirayarehi, macaechajiriruvapa eta náuchusirayare ena israelítana tayehe eta apaquehe Egipto, nayanirayare te apaquehe náicuchihí. Eta macasiñavairahi mayehe ema Viya, macavanairipipa eta náunasirayarehi eta máperana éma, tásiha, námayarehi te náuchucapa.

²³ Énerichu eta nasuapajiravahi ena ticachichanahi ema Moisés, ticasíñavanahi mayehe ema Viya. Vahi napicahini eta mavanairipiana ema rey eta nacapapajisirayarehi ena amuyana ajairana. Eta náimairahi eta máurinavahi ema amuya, nayumurucapa éma.

Mapana caje eta nayumurujirisirahi. ²⁴ Tásiha, náitucahi eta sucajurusirahi esu esena ricoquenehi, taicha ésu, machichahi ema rey.

Tacahe, ema Moisés, te ichanarupa énerichuvare tisuapajirahihi. Vahi macatiequenehahini eta majunijiasirayarehi esu ticajurucahi. ²⁵ Váhivare mapicaracahini eta macatajivairayarehi eta macachanerayare ena majaneanana machaneranihi ema Viya. Vahi tavayuacahini jácáni tájiparacana pecatuanahi te apaquehe. ²⁶ Ticasiñavaipahi éma eta tatiarihirayare eta máimahaqueneanayare táitsivanayare eta macatajivairaya táichavenehi eta macatiuchirahi ena machamuriana, tacutihi eta macatiuchirahavihi víti ema Cristo. Tájinahinéni mácamunuhini eta táimahaquenehi tayehe eta avasare Egipto.

²⁷ Táichavenehivare eta masuapajiravahi ema Moisés, vahi mapicaracahini eta masemirayare ema rey tayehe eta Egipto eta macuchuciravaca, mámavacahi ena machamuriana israelítana. Tétumehavarichucha taicha ticasíñavahi eta majaneasiravacaya ema Viya, tayanapane máimahasi ema Viya.

²⁸ Eta masuapajiravahi ema Moisés, máitauchapa eta mavanairipi ema Viya. Mavane-cavaca ena machamuriana nacapacayare eta uvesachicha, nátsiquiriacaya eta iti te tapaja eta napenana, apaesa vahi macuesirujicavaca ema ángele ema tíamayarehi eta náepenira ena náechavimuri te jácáni peti.

²⁹ Énaripa ena machumariana ema Moisés, eta nasuapajiravahi, naratahahi nánueca eta ichape Mar Titsi. Témunahiricavahi tiájji te túpiricuha eta nayanihayarepahi. Tásiha, ena masuntarurana ema rey te Egipto, navarahavarepa tiánuecana. Tíchavapasera eta une. Téricanapa namutu. ³⁰ Téichavenehivare eta nasuapajiravahi ena israelítana, tíáquipai-cavapa naicha eta tayuchamarana eta avasare Jericó, te jena siétequenepa sache eta návicuruarasirahi eta avasare.

³¹ Ésuripa esu Rahab túhusini, eta susuapajiravahi, vahi suépenahini te tépenaracanapa ena masuapajirairahanahi. Taicha ésu sucatiuchapa ena vanairucana me Josué.

³² Nuvarahahinini numetacache tamutu eta nasuapajiravanahi ena apamuriana: ema víyarahaini Gedeón, ema víyarahaini Barac, ema víyarahaini Sansón, ema víyarahaini Jefté, ema víyarahaini David, ema víyarahaini Samuel, énapa ena víyarahaini profetanaini. Nararihivare ena apamuriana, tétavacavahivare eta nacasíñavairahi mayehe ema Viya. Váhiserá nunaca támutu te juca eta náijareana. ³³ Eta nasuapajiravahi éna, nararihihi ena tíahacapanahi ena nánarana te avasareana. Nararihihi ena apamuriana aquenucanahi, tatupiruhi eta nagobnarchirahi eta návásana. Ema Viya, eta majaneasiravaca ena apamuriana, máeratajacachavacahi eta tajacana eta táíñehiqueneana sárareana. ³⁴ Ena apamuriana, macamalahinehivare eta táijurequene yucu te jórnu. Ena apamuriana, macuchucuhavacahi te navaraha náechatinucavacayarehi ena nánarana. Nararihivare ena matumerahanahi, máetumehavacahisera eta nacaemataneasirahi éma. Ena apamuriana, tétavacavapa eta náitupajijiasiravapahi tayehe eta guerra, náitahavacapaipa eta ichapequeneana ejército ena nánaranahi. ³⁵ Natiarihivare ena esenana, eta nasuapajiravahi, mápechava máimichava ema Viya títarecana ena najaneanaini náepenaqueneanahi. Natiarihivare ena apamuriana náémépenahi eta nacatajivairasamihi. Nacamichahisera tamutu taicha eta nasuapajiravahi, namavarairahi náinajiacahini ema Viya, navarairahivare náimahayarehi eta táuricacarequene eta náitaresirayare te náechepucapa. ³⁶ Natiarihivare ena apamuriana, ichapemurihi eta nacaecahirasamihi, ticaestanahivare, táimitiacavacahivare te cadena tayehe eta cárcel te nacaerataiyapahi. ³⁷ Ena apamuriana, natupisiruanapahi te márijahiana eta nacapasirapahi ena achaneana. Ena achaneana, eta návarairahi náiminajicayarehi eta náehisirahi ema Viya, nayuchatihecare. Ena apamuriana náechatinucavacapanahi te espada. Napanajiricavaca ena apamuriana, náimijunavacavarepa te napenana. Tiyananapa témestajiricavanapaipa. Tépacuchavanapa te taparumachichana eta sárareana eta náechuriasirapa eta nacamuirahaquene. Tájinapa naviyavapahini taicha eta napaurevavacapaipa. ³⁸ Ena nani páureanasamí, ichape eta napicauchacarevainihi. Vaipa náuriahini eta najunanairisirahi te mávapahiana apaquehe eta tataracuana eta máriana, nacapenajuechapahi eta enurujuheana. ³⁹ Jéhesare, namutu ena nani néchajisihaqueaneanahi, ticatajivanahi eta náitaresirahi. Majacapavacapaihi ema Viya táichavenehi eta nasuapajiravanahi. Vuíchahasera nájahúchavahini nacajiracasihini eta náicuchianahi me Viya. ⁴⁰ Taicha mavarahahi éma tíhetamurichahaviyarepa viti véquenehanahi visuapanahi ema Jesús énapa namutu éna. Vicuticacayarepa eta víuricacarevayare vimutu.

12

Vicutiyare ema Jesús eta macamichirahi tamutu

¹ Puíticha víti apanavare vicamichayare tamutu eta vicatajivairana, vácutivaca eta nacamichira ena nani nánapureanahi téhicanahi ema Viya. Taicha puiti éna tímaracahavianahi víti tájahapuca tácharacavahi eta vipaisirahi víti. Eta tacahe, tituparacahavi vinajicayarehi eta tátiásirahavihi eta tájiparacana, tíamparaurahiana tayehe eta pecatua. Tacahe, vicamichayare tamutu, táurivaya eta vicaematanesirahi ema Viya, apaesa vijacapa eta vícuchihi. ² Vicutiyareva ema Viáquenu Jesús. Éma, tímitchahavihi eta véhiruhi, éma tínapuisinahavíhivare eta masuapajiraivahi. Tayanapane ichape eta matsiríhahi te máimhapa eta macatajivairayare eta macaetatairayare te crusu, vahi machavacuejevahini. Tétumechavahisera taicha máechahi éma tatiarihíhi eta táitsivayarehi. Tétavicavahi eta máurisamureva eta máejasirahi te mayehe trono te mavaure ema Maiya.

³ Puíticha éta, epanerequenehayare éhicayareva eta macamichirahi ema Jesús tamutu eta macatajivairahi naicha ena ticatianacanahi. Ene ecaheyare éti, vahi ecuyacujihini, étumechavayaresera eta éhisirahi éma. ⁴ Táitaurevaquene éti, tájinaichaha ímahahini ecatajivahini táimicapacahéhupacaini eta ínajiasiraipa eta tájiparacana te juca apaquehe pecatupaire. ⁵ Vahi ecuemitísica eta máemunásirahehi ema Viya te jácani máemecharahiraema táichavenehi eta machichaheirahi. Taicha ani tacahehi eta Sagrada Escritura: “Piti nuchicha, vahi picueñamava jácani máemecharésiraviana ema Viya, mavarairahi máetupiricayare eta pipanereruana. Váhivare picuinajicava tayehe eta maconsejachiraviana. ⁶ Taicha éma, máemecharécayarehi nácani máemunaruanahi machichavenahani” tacahepa. ⁷ Tacahe, ecamichayare éti jácani máemecharésiraheyare ema Viya táichavenehi eta máemunásirahehi eti machichanaveana. Tácuti mácani achane, te matiaríhi ema machicha, tímerecavahi eta tacaiyairahi eta mapena eta máemecharésirahi ema machicha, mavarairahi máetupiricayare eta mapanereruana. ⁸ Yátupíhi eta máemecharésirahavi ema Viya vimutu viti machichanaveana. Téhesera te tacuíja ímaha eta máemecharésiraheana éma, máimerecarípa éma vahi yátupinahini machíchahénahini. ⁹ Tacutihí eta vijurusirahi víti te amuyahavírichaha. Témecharecahavihi ena ticachichahaviana, visuapavacapa táicha. Tásíha, tavetíjipa eta visupirayarehi ema Tata Vicaiyaquenehi apaesa éma tíjaracahaviyarehi eta táurivayarehi eta vítaresiraya. ¹⁰ Ena ticachichahaviana, ánipirichu eta náimitsirahavihi jácani eta navarairahi éna víuriyarehi nayehe ena achaneana. Émasera ema Viya, tíuripanaíhi eta vímitucasivahi mayehe. Éta tíapajucava tíurichahaviyare. Tépatchinachahavíhivare éta. Mavarahahi vicutiyarehi eta masantuvahi éma. ¹¹ Jéhave, te tatiarihípuca eta vicaemecharahirana, vahi víurisamurémaíhi táicha. Ticatihí visama. Téhesera te vétupiricava táicha, tétavicavayarehi eta víuricacarevaya te visamureana taicha tatupiruhi eta vítaresira.

Tétavicava tavarahacareva te visama eta máechajiriruva ema Viya

¹² Tacahe, nuparapenaveana, nutuparacahe étumechacaca nácani nayacujíhipuca. Ímicatataca eta etupíhaira muraca eta éhisirahi. ¹³ Énerichuvare eta ecajúuheira eta me Viya, etanucayare tatupiruína eta ecajúuheira eta me Viya, etanucayare etupiruína eta eyaniyare. Vahi ecuepíñuñuca, machu náevejuca ena matumerahana ena téhicheanahi te équene. Táuri eta íámiracacaina, apaesa nacaravahuyare náetupirica eta napanereruana, náetumechavavare énajiva.

¹⁴ Tacuíjavare ecuchiravainahi nayehe namutu ena achaneana. Yátupina eta epachinavaina te esamureana étapa eta iúriya eta ítaresirana. Taicha te vahi tíuríhi eta ítaresirana, vahi eratahaimahi ítecapaucha ema Viáquenu. ¹⁵ Ejaneacavaicha yátupina, machu etiarihípuca eyacujíhi, tásíha émpurureca te máimicatasirahe ema Viya. Tacuíja eta ecumipananajicava eta esemirana. Machu tapareacavaca ena echamuriana eta evainarajivana, tacuti jácani sucureca máurirahana, tapareacayare eta apana sucureca táurinaquenehi, táimicapacapa. ¹⁶ Nacuíjavare te etaracu nacuveha esu apana esena. Nacuíja nacuepuru jácani típicauchacareanahi. Vahi ecucuti ema achane ticáijare Esaú. Eta mavarairahi tíjahúchava tinica, máijararecapa eta máicuchinihi mayeheníhi, taicha éma, máechavihi ema maparape. ¹⁷ Écharichuíhi éti, te táequenepa, te mavarahainípa majacapa eta mayehe bendición ema maiya, vaipa majacapacarehini, mametainípa tíyahahi. Vahi maratahahini ticájimuyacahini ema maiya.

¹⁸ Éti, tájina étaparacaina eta napisirahi ichapequenehi ena achaneana israelítana, acane te náitecapauchapa eta cerro Sinaí. Eta jara cerro, tatiarihíhi eta yucu tímuruhi te tápusi. Énerichuvare te távíhahi eta tímipicucúquenehi, távíhahivare eta táíñehiquene emarere. ¹⁹ Muracaquene eta machuja ema ángele. Muracavare eta mahu ema Viya eta máechajisiravacahi éna. Ichapequenehi eta napisirahi ena tisamanahi. Eta tacahe, tíyaseserecanapa vaipa macuechajicavacahini. ²⁰ Eta napicacarasiravahi, navaraha tichavacuejevahana. Ichapequenehi eta tapicahucareva eta cerro, taicha tatiarihíhi eta muraca vanairípi, ani

tacahehi: “Ecapaca nácani achane, jácanivare sárare tiápanapuca te juca cerro. Ecapacavanezarehi te márijahi, te váhipuca ticayubarayarehi te lanza” tacahepa. ²¹ Tacahe, tétavivavahi eta táifelhiva, émaripa ema Moisés ani macahehi: “Nuyyacarenecha eta nupisirahi” macahepa. Nuparapenaveana, numetacahe: Tájina étaparacaina eyehe tamutu eta juca tipicacareanahi.

²² Étiserá tachichaheanapa puiti eta mávasa ema Viya Vicaiyaquene, ticaijare Arairu Jerusalén*, eta távihahi eta cerro Sión te anuma, te náurujsihavahi ena camuriqueneana ángeleana eta najirauchirahi ema Viya. ²³ Éti esiapapa eta nasimutuva ena ecutiqneanahi machichanaveanahi ema Viya. Ecajucunavare eta nalista. Natarihipa ánaqui eta náchanavana ena machichanaveana náepenaqueneana. Natupiruhi eta náitaresirahi. Tipachinavaqueneanaripahi puiti, sántohivare. Matarihivare ema Viya, yátupiquenehi Juese viyehé vimutu víti. ²⁴ Matarihivare ema Jesús ema tiyaseurahíquene eta viyehé. Émahi ema tiámahi eta arairu matratune ema Viya. Émaripa máepusaicapa eta máitine tasipahacahaviyarehi, apaesa vijacapacareyarehi me Maiya. Eta máitine ticunachacarepanahi tayehe eta máitine ema víyahaini Abel.

²⁵ Eta tacahe, échapavaicha éti. Vahi ecuepuru eta máichuarapianahi ema Jesucristo. Machu ácuti ena tétpuruanahi eta mavanairipiana ema Viya, máimiturapianahi ema Moisés. Étapa tímucñacavacahi éna. Vivetijnapapuca víti eta vícuñayare, te vicaepaquecupuca eta máichuarapiana puiti ema Viáquenu, taicha éma tiásihahi te machacaya ema Viya te anuma. ²⁶ Taicha eta acane, eta mahu ema Viya, tétavicava eta tamuracava. Tiyayacarehi taicha eta apaquehe. Púftiserá, ani macahehi éma: “Étatherineyare tiyayacare nicha eta apaquehe. Váhisera tácarichuimahi. Éneyareichuvare te anuma” macahepa. ²⁷ Eta juca máechajiriruvahi, tímaticareipahi eta táitavirayare tamutu jácani tiyamuricanahi máepiyaruanahi ema Viya te juca apaquehe. Tacarichu tanasiyare jácani máitavacacaqueneana taicha mayamurianahi.

²⁸ Étaripa eta mávasa ema Viya, mavarahaquenehi máimiávihahavihi, máitavacacaquenehi éta. Eta tacahe, víhasulupayachaparaca éma. Vétaviuchainavare eta vípicauchiraya éma. Tásiha, vicurisamurechaina éma eta vivapinava ichape eta vijirauchirahi éma. ²⁹ Taicha ema Viáquenu macutihi eta yucu, maratahahi máitaequeneha mámainuca.

13

Vicurisamurechayare ema Viya

¹ Tiuri, nuparapenaveana, vahi ecucainajiruva eta émunajirisiracacahi, táichavenehi eta echamuricacairahi te mavahuana ema Viya. ² Vahi ecuemitisicava eta táurirayare eta ejacampiraya ena echimarana te epenana. Taicha tajuricati ángeleanainapahi nácani tipaipiuacheanahi, éta vahi ecumatihí.

³ Énerichuva échayareva nayehé ena ticaerata. Ejamanuvaca éna, táimicutijiricavahini étinahini ecaeratahini ecachanevacahini. Énerichuvare ejamanuyare nácani náemejapanuráruana taicha éna étarichuhi eta náqueheana tacutihi eta iáqueheana éti.

⁴ Ámutu epicauchacaca éti ecaimaqueneanaripa: eti esenana, étipa eti ajairana. Taicha máimaha tiuri ema Viya eta evehacacairahi. Tacuijasera eta échipeacava eta evehacacairahi ena apanana. Ema Viya máicuñacayarehi nácani tivehacacanahi vahi nacuchapahini náitauchavahini, énapa ena ticayepecacanahi.

⁵ Váhivare tacuvayucahe eta plata. Taratarichu tacurisamurechahe jácani ítrevahi ecayehequenehi. Ema Viya ani macahehi eta máechajiriruvahi: “Vahi nujunjicavimahi, váhivare némitiscavimahi” macahepa. ⁶ Tacahe, vicasiñavayare mayehé ema Viya te viyaseaca. Ani vícaheyare te visamure: “Ema Viáquenu ema tímaticatanuhi. Vahi nupicaimahi jácani náichiranuhi nácani achaneana” vícaheyare.

⁷ Échavayare ena tímitucaheanapaini tímisamaheanahini eta máechajiriruva ema Viya. Natupiruhi eta náitaresiraini. Éti, epamicava ecutiyaere éna eta nacasiñavairahi me Viya.

⁸ Ema Viáquenu Jesucristo, vahi máitsivacha eta máurivahi eta viyehé. Manasíhi púfticha, étapa eta aparahiyare. ⁹ Eta tacahe, vahi ecuisapava ecuehica eta jácani apanape-nejiqueneana náimiturapiana. Tiúripa étuamechayare eta esamureana, táichavenehi yátupiquene eta máemunasirahavihi ema Viya. Étapasera eta nayeherepiana tayehe eta tinicacareana, vahi étaparacaina taicha tájinachucha táimicatavacahini ena ticayeherepianahi.

* 12:22 Te pivaraha pecha eta apana tayehe eta Arairu Jerusalén, pitanuca te libro Apocalipsis 21.2-27 étapa 22.1-5.

¹⁰⁻¹¹ Eta nayeherepinihí ena tiyujaracarahiana tayehe eta santuario te Jerusalén, natuparahahi eta nanicasarehi eta námavahuana ena achaneana. Étahi eta navachachahi eta nacaemataneasirahi. Étasea eta sárareana námavahuanahi, navarahahi tacaepahayarehi eta napecaturana, éta, tituparacavaca vahi nacunicahini. Étachucha eta táitine mámahí ema náquenu ena tiyujaracarahiana tayehe eta téqueneha cuarto Lugar Santísimo. Étasea eta táqueheana, náijuchaqueneyarehi te tachachacu eta avasare. Vítisera, mararihi ema apana tiyujaracarahi eta viyehe, apanapavare eta mayujarauchirahavi. Vahi énaparacaimahi ena náinapureana tiyujaracarahiana. ¹² Ema Cristo, ticatajivahi eta máepenirahi te tachachacu eta avasare, mavarairahi máepachiacahaviyarehi viti achaneana tayehe eta máitinerichu éma. ¹³ Tacahe puiti, vínajicavayarehi eta nayeherepiana ena vijaneana. Vahi étaparacaina viyehe. Yátupina véhicayare ema Jesús. Tayanapane vicatajivayarepuca, vicutiyaresera éma eta macatajivairahi. ¹⁴ Taicha te juca apaquehe, tájina vahi táyeremahi eta avasareana étapa eta tayeherepiana. Vítisera tachichahavipa eta avasareyare arairuyare. Apananapa eta viyeherepiana víchaqueneanayare. Tétavicava eta vijamurachirahi víyápávane. ¹⁵ Tásiha puiti, eta véhisirahi ema Jesús, tavaraha eta vijirauchiraparacayahí ema Viya tamutu sácheana, yátiana. Te jácani tájahapuca víchararacava, váhasulupayachavare éma. Eta juca eta víámavahuhi eta mayehe. Éma vicavapajayarehi. ¹⁶ Énerichuvare, vahi ecuemitísica eta íchirahi eta táuriqueneana. Ecajiyareva ena echamuriana eta ecayehequeneana. Eta tímicitijiricavaipa eta íámavahuhi me Viya. Éta ecurisamurechirahi éma.

¹⁷ Esuapayareva nácani tímítucaheanahi, evapinavayare nayehe eta esuapajiraivahi. Taicha éna, tíjaneacaheanahi eta íachanevanahi éti. Náechahi éna eta ticayaserehianayarehi te mamirahu ema Viya. Ecurisamurechavaca éna eta esuapajiraivahi, tavapinacarénapa eta nacaemataneasirahena éti. Vahi ecuimipanerechavaca eta eyacujiva, emasuapajirivapuca.

¹⁸ Eyaseuchanuyare núti te eyujarasirana. Nucasiñavaipahinéni núti táurivaipahi eta nupanereru. Tájinapa níchiravainahini. Nuvaraha níchayare eta táuriqueneana nayehe namutu ena achaneana. ¹⁹ Nuvarahasera eta eyaseuchinanu me Viya, máisapanuhini éma níjahúchavahini nuchavahini eta eyehe.

Ema Apóstole mayaseuchavacahi ena machamuriana me Viya

²⁰ Ema Viya, tétavicavahi eta macanarasirahavihi eta vipanereruana. Éma tétavicavahivare eta máitupajijiasirava taicha macaechepucahi ema Víáquenu Jesucristo te máecari, apaesa émayarehi yátupiquenehi Pastoryare, tíjanearahi viyehe viti machichanaveana. Tisipahacahavipa eta te máitine apaesa máitavacacayarehi eta vicachanerayare éma. ²¹ Núti nuyaseuchahe me Viya, máimicatacahehíni itauchayare tamutu eta mavarahaqueneana, íchirahi eta táuriqueneana apaesa ecurisamurechahíni éma te tamutu eta ítaesira eta éhisirahi ema Machicha Jesucristo. ¡Máitavacacayare eta vicunachira ema Cristo! Amén.

Eta táichecuaraqui eta natuparacasivahi

²² Nuparapenaveana, nuvaraha nuyaseacahe ácayehéni paciencia tayehe eta juca nuconsejarapíhi eta eyehe. Ánipichichahi nájurehi tayehe eta juca nucartane. Jararihísera camuriqueneana eta apana nuvarahahi numetaruheyarehíni. ²³ Numetacahevare ema viparape Timoteo tíuchucuharipa te cárcel. Te máitecapavanepuca éma, nucachaneyarepahi te níteca eta ara eyehe. Nuvarahahi nímahapanahé.

²⁴ Néchajicahe emutu eti ejanearahiana ena vichamuriana. Échajisinanuvaca namutu ena vichamuriana vicutiqueneanahi tisuapajirahianahi te jácani návihahi éna. Ani te juca, nucachanevaca ena vichamuriana náiteruana te Italia. Téchajicaheanavare éna.

²⁵ Nuyaseuchaheparaca emutu éti me Víáquenu Jesucristo, táetaviuchahíni eta iúricacarevaya máicha. Amén.

Tamutupa eta juca néchajiriruvahi eyehe.

**Eta macartane ema Santiago nayehe ena majaneanana
machamurianahivare, nájanerepairuanahi te avasareana,
ticajare
SANTIAGO**

¹ Nuti Santiago, mavanaranuhi ema Viya, mavanaranuhivare ema Viáquenu Jesucristo. Nuvaraha nucaitecapa eta juca néchajiriruva eyehe emutu eti nujaneanana israelítana éjanerepairuanahi te tamutu avasareana.

Eyaseacayare eta ítupajijiasiravaina

²⁻⁴ Nuparapenaveana, nuvaraha nuconsejachahe: Te tatiarihinapuca eta ecatajivairana puiti juca ítasesirahi, vahi ecucainajiruva. Evapinavachucha, ácasifáva mayehe ema Viya. Taicha te yátupina ecasifáva mayehe, vahi tiáquipaicahémahi ema Váinaraji. Énerichuva ácamicha yátupina jácani apana táitecapaureheanaya. Ácuti nácani achaneana náitucahi ticaratacavana. Mavarahahi ema Viya tátupiruvahini eta ítasesirana. Eta tacahe, te tatiarihipuca eta ecatajivairana, ecaurisamurechavachucha. Evapinavaya, taicha iúripanayare eta iúchucuirayare.

⁵ Tacahe, te tatiarihinapuca eta téchacare, te váhipuca íturuequenehahini, eyaseacayare ema Viya eta ítupajijiasiravaina. Éma, tíjaracaheyare, taicha tájina mayavana éma. Váhivare ticajachahavimahi eta viyaseasirana jácani vicamunuqueneana. ⁶ Yátupinahisera ácasifáva me Viya eta eyaseasiranayare eta ítupajijiasiravaya. Vahi ecueñamava mayehe. Taicha te éñamavapuca, tímicitijiricavapaihi ecutihí eta táepacuruha eta une téquequerecavahi. ⁷⁻⁸ Taicha nararihi ena téquequerecavanachucha eta napanereruana. Vahi étanainarichuhini jácani navarahaquenyare náicha. Nácani tacahehi eta napanereru, éna tájina máijaracaimahi ema Viya.

⁹ Émaripa mácani vichamuri, te páurehipuca eta máitasesirahi, tivapinavayaresera taicha eta máimicatasiraipa ema Viya taicha eta máemunasirahi. ¹⁰ Émaripa mácani vichamuri ricoquenehi eta máitasesirahi, énerichuvare tivapinavayareva, tayanapane titahapuca eta máimahaqueneanahi. Taicha eta vímahaqueneanahi te juca apaquehe, vahi táeñamacarehini, taicha titavayarehi tamutu. ¹¹ Ánipirichu eta táurinajiva eta flureana; taicha te járajapapa eta muracana sache, tacajiyujicapa. Tamutu titava eta táurinajivainihi. Témiricaipavare eta taflurena. Ene macahe mácani rico, vahi tánasimahi eta máimahaqueneana, tayanapane vahi macuvaraha táitava, máitucahipuca eta macaematanera.

¹² Tétavicava eta náurivayare nácani vichamuriana ticamichanahi tamutu eta nátajivanahi. Járajapayare eta sácheanayare eta najacapuraya eta táitsivayarehi maicha ema Viya, máijaracainapa eta táurivayare eta náitasesirayare, taicha ticunachacareanahi. Tacahehi eta mapanereruhi ema Viya nayehe ena témunacanahi éma.

Máisapa ema Viya eta jácani víchavaquenevanaya, mavairahi tétupiricahaviyare

¹³ Téhevare tatiarihinapuca eta éjecipiravaya jácani tamauriqueneanahi, vahi émaimahi émeteaca ema Viya. Taicha vahi tásihaquenéna me Viya eta juca tájiparacana. Nájinavare mapamirumahi náichahini eta júcana. ¹⁴⁻¹⁵ Nácanisera náquipairuvana tayehe eta tamauriqueneana, táuchurepa te napaneruru tamauriqueneana, tásiha navaraha náichayarehi eta pecatuana. Vaipa nanechapavahini eta náichiraipa. Téhesera te táequenénapa, étpa tiviuachayarehi. Tíñehicha eta táimicapasiravacaina.

¹⁶ Némunaruqueneana nuparapenaveana, machu éjecipava tayehe eta juca numetaruheanahi. ¹⁷ Ema Viya, étanarichuhi eta mapanereru. Vahi apapananejinahi eta máuriva viyehé. Éma, tíjaracahavihi viti achaneana eta majaraiva, étpa tamichahui eta víachanevana. Taicha tamutu eta juca táuriqueneanahi vijacapaquenehi puiti, tásihaqueneanahi me Viya. Vahi apaesajirunaichuhini eta táurivahi. Jéhevare eta yátupiqueneanahi. ¹⁸ Taicha acane tacahehi eta mapanereruana, mavairahi vijacapayarehi eta yátupiqueneanahi máchajiriruvana apaesa machichahaviyarehi. Eta máitsivachirahi eta víachanevana, ticaeherahi máitsivachayarehi tamutu eta apamuriana máépiyaruana te juca apaquehe.

Vímerecavaya yátupi eta visupirayare eta máéchajiriruva ema Viya

¹⁹ Eta tacahe, eti némunaruqueneana nuparapenaveana, nutuparacahecha yátupina tauri eta esamiraina eta máéchajiriruvana ema Viya. Vahi ecuijahúchava esema. Epanerechinava eta échajisiraya. ²⁰ Taicha nácani tisemairihiana, vahi étainahini náichahini eta

mavaraqueneana ema Viya. ²¹ Puiti te juca vítaresirahi, jararihi eta tavarairahi vipane-rechaya tayehe eta tájiparacana, tamaeperajisira eta viáchanevana. Tétaviravare eta tapamisirahavihi vicha eta tamauriqueneana. Púitiserá nutuparacahe: Ínájicapa tamutu eta júcana. Ecasamureyareva eta máechajiriruva ema Viya eta ímitucasivanahi. Yátupina esuapa. Jéhevare, éta ticuchucuhayare eta iáchanevana.

²² Ítauchayare eta tametarapanahi eta máechajiriruvana ema Viya. Vahi tacuejecapava eta epanereruana, machu ímijachapuca taratarichuhi eta esamararasirahi. ²³ Vahi ecucuti nácani nasamarararuchucha, tásiha vahi náitauchahini eta tavanairipíhi, tímicitujiricavaipa nácani tímacunachavanahi te espejo. ²⁴ Tásihasera, vahi nasipacahini eta náimahaquenehi nachipequívahi. Tásiha, tiyananavanepa, náemitiscavanepa. ²⁵ Étiserá ecutiyare ena natupiruvanahi eta nasamirahi táuriva eta yátupiqueneana vímiturapiana tásihaqueneanahi me Viáquenu. Vahi ecuemitísica. Tásiha, itucayare enerejica eta táuriqueneana, esuapayareva eta ímitucasiqueneanahi. Tásiha, tétavicavaya eta iúrivaya táicha.

²⁶ Nararihipuca nácani tímijachavanahi religiósoana. Téhesera vahi náitucahini ticaratajacachavana, ena nani téjcapavanahi eta napanereruana. Tájinachucha vahi émanehini nasuapahini ema Viya. ²⁷ Vítiserá, eta vítauchirahi eta yátupiqene téhicacare, te vivaraha tájina véchajisiacarevaina te mamirahu ema Tata Vicaiyaquene, tatuparacahi vijapunuyare vitátiyare ena amaperuana váchachichana énapa ena náepenaimaqueneana tayehe eta nacamunuiravanahi. Tituparacahavíhvare vahi víchaimahi eta pecatuana te juca apaquehe.

2

Náciticaca ejacapa ena achaneana

¹ Nuparapenevaneana, éti éhicanahi ema máitupajjijhaquenehi Viáquenu Jesucristo, vahi táuricahini enerejicavaca ena echamuriana ejacapaqueneanaya. ² Étaripa te natarihinapuca nácani nasiapauchahe te iúrujisirarevana íchirana eta culto, vahi macarichuimahi tíuri eta ejacapiraya mácani tíurinahapahi eta macamuirihairahi, ticasurutijapahipuca eta oro. Énerichuvare ejacapayare mácani paure, tévichijihapahípuca. ³⁻⁴ Taicha téjcapavahi eta epanereruana, te macarichuhi mácani tíurinamuirihapahi, échapajiricahi eta ecaejasirahi, mácanisera paure, te váipapuca ecuechajiricahi, váipapucaini ecuijaracahi eta máejasiha, tasapiha evanecainapapuca téjahapaica. Éti, vaipa étupicavaimahi eta juca enerejisiravacaichucha nácani ejacapaqueneanaya.

⁵ Némunarqueneana nuparapenevaneana, esamanuchaha. Ena páureanahi te juca apaquehe, majacapavacahi ema Viya, táichavenehi eta nacasiñairahi ema Machicha. Éna, tíapajupanavanahi eta náurivaya taicha ena ticaicuchianahi eta mávasa ema Viya taicha machaneranahi. Nacachaneyarehi ena apamuriana témunacanahi éma. ⁶ Étiserá evarahapa ímitsirihavaca ena páureana, nasapihapa échapajiricahi ena rícoana. Tícutiripa vahi ímativacahini eta náemeratasiraheripa, te apasachichapa éjcapava. ⁷ Tícutiripavare vahi ímativacahini eta nacacahirahi ema Cristo, nacaecahíhvare eta íámirahi eta májare tacapichahuquenehi.

⁸ Púitiserá éti, yátupiyare ítaucha eta ticunachacarepanaquenehi mavanairipi ema Viya tayehe eta Sagrada Escritura. Ani tacahehi: “Pémunacayare ema piparaepiya tácuti eta pémunasiravahi píti”. ⁹ Téhesera enerejicaichucha nácani émunaruanahi, ecapecaturaichucha eta emasupirahi eta mavanairipi ema Viya, éta tivíuchaheya. ¹⁰ Taicha te natarihipuca nácani náitaucha tamutyaréni eta vanairipiana, téhesera apaesarichu eta néjcapiravahi, étapa tivíuchahi eta náicuñayare, tímicitujiricavahi vahi náitauchahini. ¹¹ Taicha ema Viya, ani tacahehi eta mavanairipíhi: “Vahi picuveha esu apana esena. Váhvare picupareca”. Píti, te váhipuca pivehahini esu apana esena, picaparecahiserapuca, piáviraichuhi picaviurevahi.

¹² Íúrihainehi ejacaparahirahi nayehe namutu, táurihini eta échajirisiravana. Vahi ecuemitísica eta tatiirihiraya eta sache ecayaserehiraya tayehe eta juca vanairipiana. Étara tétupiricahavihi. ¹³ Taicha nácani majapanurairahanahi nayehe nácani apamuriana, tájinavare najapanucarevaimahi te nacayaserehipa. Nácanisera tijapanurahianahi, ichape eta najacapacarevanaya me Viya te jena sácheyare.

Vímerecaya eta visuapajiraivaya étapa eta vicaemataneasiraya ema Viya

¹⁴ Nuparapenevaneana, nuvaraha níminecapaequenehaheyare. Te natarihinapapuca nácani nacahehi: “Núti nusuapa ema Viáquenu”, tásiha vahi náichahini eta táuriqueneanahi, vahi tisuapacare eta náechajiriruvahi. Németeaca vahi yátupinahini nasuapahini ema Viáquenu. ¹⁵ Nuvaraha nímicutichinaheyare eta juca. Te mararihipuca mácani vichamuri ticamunuvahi eta mamuiriharapiyare, manicaquenerepípuca te sácheana. ¹⁶ Tásiha,

mácani echamurihi tépiyacavahipuca tijapanurahíhi. Máichahipuca: “Páurevisami piti, te picaserechahipuca, pépacuchava. Te pécupachava. Te pécupachava, pínica”. Tásihasera, te vahi májaracahini eta macamunuquenehi, tamapurujichucha eta máichirahi. ¹⁷ Ene vicahe viti véhicana ema Viáquenu. Te vahi víchahini eta táuriqueneana, tamapurujichucha eta véhisirahi, vaipa tásuapacarehini.

¹⁸ Tiuri puiti, németeaca etiarhiyarepuca eti épuruyare eta juca numetaruheanahi. Áninapapuca ecaheyare: “Tarataripa eta vicasiñavairahi me Viya. Vaipa étaparacaina víchahini jácani apamuriana táuriqueneana” ecáhénapapuca. Nútisera numetacahe: Vahi tisuapacaremahi eta ecasiñavairahiji, te vahi íchahini eta táuriqueneana. Taicha eta íchirahi eta táuriqueneana, étapa tímereuchaheya eta yátupirahi eta ecasiñavairahi mayehe ema Viya. ¹⁹ Éti ímijachapapuca tarataripahi ticuchuhahayare eta esuapirahi eta matiaríhirahi émanarichu ema Viya. Táitaurevaquene esuapahi eta matiaríhirahi ema Viya. Apanasica ena éreanana nasuapahivare eta matiaríhirahi ema Viya. Tayanapane eta nasuapirahi, váhiquene tíuchucuhanimahi éna. Énaripa, tiyacacareanahi éna te nasama eta máijare ema Viya. ²⁰ ¿Vuíchahacaru ácaicutiarahini? Tiuri puiti, níminecapaquehehaheyare, taicha nuvaraha ácaicutiara: Tacamunuhi íchayare eta táuriqueneana tacañeyarehi eta ecasiñavairahi. Tamapurujicha eta ecasiñavairahi te vahi ecuquichahini eta táuriqueneana.

²¹ Nuvaraha némechahe mayehe ema viáchucaini Abraham. Eta acane, émaripa macaítasamarajíhi ema Viya, te yátupihipuca eta masuapajiraiva. Mavanecahi máechatinucayarehi ema machicha Isaac. Tacahe, ema Abraham, máechatinucayarepaine ema machicha, máimeresirayarehi eta masuapajiraivahi yátupi. Eta tacahe, ema Abraham, tétavacavahi eta majacapacarevahi mayehe ema Viya. ²² Étara ícutiaraya eta juca masuapajiraivahi yátupi ema Abraham. Vahi máeñamahini ema machicha eta mavarairahi máimerecayare yátupíhi eta masuapirahi. ²³ Taicha eta táechajiriruvahi eta Sagrada Escritura, ani tacahehi: “Ema Abraham masuapahi ema Viya. Tásiha, tétavacavainehi eta majacapacarevahi ema Abraham. Éma, máemunacasarehi ema Viya”.

²⁴ Ácaicutiara yátupina eta juca. Viti achaneana vijacapacare me Viya táichavene eta vímeresira eta visuapirahi. Vahi tarataha eta vicaheira: “Núti nusuapa ema Viya”. ²⁵ Níminecapaquehehahe eta acane tacahehivare eta síuchucuirahi esu esena túhusiquenénihi ticaijaru Rahab. Ésu, ticatiuchavacahi ena vanairucanahi mayehe ema víyaraha Josué, suímica-tacavacahivare eta náitujisiravayarehi tijunana nayehe ena ticaratacanayarehini. Eta máimairahi ema Viya eta juca síuchirahi, ichaperinehivare eta majacapirahi ésu. ²⁶ Eta juca tacutihi eta viáquehe te tajunijica eta viáchaneva, énevanerinehi tésamiricava eta viáquehe, tépenavaneyarehi. Ene tacahehi eta visuapajiraiva. Títavavare te vaipa vímeracahi eta viúrivahi, víchirahi eta táuriqueneana.

3

Eta vijaca, tamutu tajarareca

¹⁻² Nuparapenaveana, yátupi vimutu véjecapava tayehe eta véchajisirana. Nájina émanaina vahi macuejecapavaini eta máechajísira. Te matiaríhinaini mácani achane vahi macuejecapavaini, ichapehini eta macunachacarevainahini, taicha éma, yátupíhi eta máitupajíjiasiravahi, máitucahivare ticaratacava eta máquehe. Eta tacahe, nuvaraha nuconsejachahe: Tacamunu najaneacava muraca nácani náimereca eta navarairahi máestroanayarehi tayehe eta máimiturapiana ema Viáquenu. Échavayare eta vicayaserehirayarehi muraca me Viya viti máestroanahi.

³ Nuvaraha nímicutichinahe. Eta juca tímicitijiricavahi te vicapera eta cavayu: vinacapa eta freno, vichurujacachapa, viámapa te jácani vivarahaquene viámiha. ⁴ Tacutiquene eta ichape lancha, táevatajicaneni muraca eta técaticava, étapa eta tajunapira muraca eta une, taratahayarehisera táimitupirucha eta tayehe leme váhineni ichapenahini, ema piloto máimitupiruchayarehi te jácani mavarahaquene máimihayarepahi. ⁵⁻⁶ Ene tacahehi eta juca vijaca. Ánichicharichunéni tayehe eta viáquehe. Tasapíhahisera táechajísíhahi eta ichapequeneana. Tacutiquene eta yucu. Ánichicharichunéni eta táepanirava táijucha, taratahahisera táijucha eta ichapequene vámahí. Nácani achaneana te vahi náituchahini ticaratajacachavana, amairíjipa tamutu eta náitaresira. Tíñehicarehi najarareca ena nácani curmiana achaneana taicha eta náechajiriruvanahi. Ena nani téchajísíhanahi eta tamauriqueneana, éna mávaháruanahi ema Váinaraji, téchahi eta infierno. ⁷ Ena achaneana narataha namansucha eta cáyureana étapa eta quichareana étapa eta táíñehiqueneana sárareana tiávihana te apaquehe étapa te une. ⁸ Étasera eta jacare, nájina ticaratacaina, táechajísíhayarehi eta tamauriqueneana. Tacutihi eta jumare te nájina tiratahaimahi típuchaina, tiámahivare eta tacapasiravacayare ena achaneana. ⁹⁻¹⁰ Eta jacare, étarichuvare

táuchusiha eta náechajiriruvana ena ticunachanayarehi ema Tata Vicaiyaquene. Ticunachacarehi eta juca. Váhisera ticunachacaremahi te tiúchuchi eta jacare eta náumehaira ena nacutiqueneana achaneana naparaepíyanahi me Viya. Nuparapenaveana, tatuparacahi vahi ecaecahihini ena ecutiqueneana tiámanahi eta macaquehera ema Viya. ¹¹ Tacutiquene eta une, te tipachinahi eta tajututurusirahi te apaquehe, vahi tjáhúchavaimahi titsiricava, táuchucapucaini tisucareamahini, ticheveamapucahini. ¹² Tacutiquene vahi tiúchucaimahi eta aceite tayehe eta tahi eta yana. Étaripa eta narasa, vahi tiúchucaimahi eta tahi siñávehinapahini. Ene tacahehi eta une, vahi tajututurucahini te apaquehe eta tipachina une tacachanepahipucaini eta ticheveama. Nuconsejachahe: Eacunachachucha. Vahi ecumehareca.

Te yátupihí eta véchemaraivahi, tatuparacahí víchayarehi eta táuriqueneana

¹³ Te natirihinapuca te etaracu nácani náechemahahi tamutu, tatuparacahi náichayare eta táuriqueneana, yátupinavare eta namansuvayare. Éta pa tímicaecherachayarehi eta náitusirahi. ¹⁴ Te etiarhipuca eti ímijachavahi échemahahi tamutu, tásiha ecapinarurecarichuchasera te esamureana, evarahapa íapajupanavayarehi nayehe ena apamuriana eta ítupajijiasiravaya, vahi yátupinahini eta ítupajijiasiravainahini. ¹⁵ Eta juca échemarai-vavacahi, vahi étainahini tásihaquenénahini me Viya. Tayehechucha te juca apaquehe tásihaquenechucha eta ne achaneana, máevaequeneruhi ema Váinaraji. ¹⁶ Taicha ena ticapinarujiricacanahe téhajiricacana. Vahi tácuticacahini eta napanereruana. Náicharichucha eta tájiparacana. ¹⁷ Nararihsera ena yátupiquenehi eta náechemaraiva, tásihaquenehi me Viya eta náitupajijiasiravanahi. Náimerecahi tativa tatupiruvahi eta napanereruhi. Táurivahivare eta náitaresira. Ticatiurahianahivare nayehe ena apamuriana. Tisamarahianavare. Tijapanurahianavare. Eta náichirahi eta táuriqueneana, ticajirahianahi. Nájina nanerejiruina. Tatupiruvahi eta náechajirisiravana. ¹⁸ Nácani ticatiurahianahi, náetupiricahi eta náitaresira ena apamuriana. Jéhesare, tájinasarepa náichiravainahi. Nanaquipaicahi eta táuriqueneana.

4

Ema Viya mavaraha vínajica eta tájiparacana

¹ Puítiripa, ¿tájaha tacayema eta éhajiricácahi? Éti ecuticacahi ena apamuriana eta ejamurairavanahi. Éta, timaurichahehi eta tájiparacana, étijivaichucha íchavahi. ² Éti ejamurachahi ecaimahaquene. Étasera emaitusiravahi, evarahapa ecapaca ena ticaimahaqueneanahi. Éti ecapinarurecahi. Éta emaitusiravahi, téhacacapa eta échajirisiravana; tásiha, éhacacauchapa. Nuconsejachaheyare: Eyaseaca ema Viya eta ecamunuqueneanahi. ³ Éti eyaseacahinéni éma, váhisera májjaracahéhini, taicha vahi táetupicavahini eta eyasesearpiana, étachucha eta tajamurachaqueneanahi eta íaquehe.

⁴ ¡Tétavicavapa eta emaetupisiravahi eti achaneana! ¡Éjecapavahi ichape mayehe ema Viya! Evarahapa éhica eta nayeherepianahi ena achaneana masupajirairahanahi. Tihapapicahepa eta tájiparacana te juca apaquehe. Masapihapa epuruyarehi ema Viya, ecatianacapa éma. ⁵ Éti ímijachaipapuca táepiyevahi eta táechajiriruvahi eta Sagrada Escritura. Ani tacahehi: “Eta mávahásirahavíhi ema Espíritu Santo, téñmahaviripa vahi vihapasamurechaimahi tayehe eta tamauriqueneana”. ⁶ Étaripa eta máemunasirahavíhi ema Viya, tétumechahavíhi, mavarairahí víchahini eta tamauriqueneanahi. Taicha ánivare tacahe eta Sagrada Escritura: “Ema Viya macatianacavaca ena tisiñavavairicana. Máemunacavacahisera máimicacavacahivare ena mánsuana”.

⁷ Eta tacahe, esuapa yátupina ema Viya. Ecanaraya ema Váinaraji, te mavaraha mavayuacáhe. Jéhesare, tijuníjicahénapa éma. ⁸ Puítí, yátupina eta epauchirahi ema Viya. Tásiha, ema apanavare tipachaheyare. Ínajicapa puítí eta íchira eta tamauriqueneana. Émitisicainapa eta ejamurachira eta tájiparacana te esamureana. Taicha éhicasareipa ema Viya. Vaipa ecupanerecha eta nayeherepiana ena achaneana masupajirairahana te juca apaquehe. ⁹ Puítí, éneuchava me Viya. Íyauchava táichavenehi eta éjecapiravanahi. Vaipa ecuecarairicava, vaipa ecurisamure eta íchira eta tamauriqueneana. Ácatismurevasera táichavenehi eta tamutu eta tamauriqueneana íchaqueneanahi. ¹⁰ Ecajapanuravayare eta éneuchiravayare te mamirahu ema Viáquenu. Tásiha, tétavicavayare eta ejacapacarevainapa mayehe ema Viya.

Vahi picuacacahi ema pichamuri

¹¹ Nuparapenaveana, vahi ecuechajica mayehe mácani ehamurihi. Taicha mácani téchajicahi mayehe mácani machamuri, macaechahipuca, mavaraha máicuñaca mácani

machamuri. Émaripa máepururipahi eta mavanairipi ema Viya. Nuvaraha numetacahe: Te épuruhi éti eta mavanairipi ema Viya, eta tímicaecherachahehi eta emasuapirahi éma. ¹² Ema Viya, émahí ticavanairipihi. Macarichu éma tatuparacahi téchayarehi te tíurhipuca eta náichaqueneana ena achaneana. Téchayarehivare eta máicuñasiravacahi ena téjecapanahí. Vahí éтина tatuparacahéhini ícuñacahíni ena echamuriana.

Vahí vítina vecha eta vítaresira

¹³ Esamanuchaha. Vahí táuricahíni ácahehíni: “Puiti juca sácheana, achichupuca, nuyanaya te apana avasare. Níjararecaya eta nucayehequeneana. Tiámainucava nuchava te apana año. Ichapeyare eta nugareruyare”. ¹⁴ Éti, vahí échahíni tájahapuca eta íchavaquenévaya achichu. Taicha vahí evachareruina eta ítaresira. Tacutichucha eta iyaru. Ánipirichu eta tacaecheraira. Tásiha, témitiacaripavare. ¹⁵ Íúrihainehí ácahehíni: “Ema Viya téchahavíhi eta vítaresira. Te mavaraha éma, vítauchayarehi eta juca vipanereruhi” ácahehíni. ¹⁶ Étísera, tétavícapava eta ecasíñavavaisirahí eta échajisirana. Ticutirinehí étinahíni échinavahíni eta ítaresirana. Vahí táurihíni eta ecasíñavavaisirahí. ¹⁷ Némechahe eta juca yátupiquenehí: Mácani máimatíhi eta macatuparahairahí máichaya eta táuriqueneana, tásiha te vahí máítauchahíni máíchahíni, ticapecaturáipahí te mamirahu ema Viya.

5

Eta náichavaquenévaya ena rícoana

¹ Tiuri puiti, nuvaraha numetacahe eta náicharacavaya ena rícoqueneana. Éna, ichape eta nacatajivairayare. Náuríhaipa náiyahasamureripahíni taicha eta nacatajivairaya. ² Taicha títavainapa eta náimahaqueneana. Étaripa eta nacamuiríhairana eta táurinaqueneana, tanticamecainapa eta cachusiri. ³ Tájinapa táichaquenemahí eta naplataneana éta pa eta nayehe oro. Ichape eta nacatajivairaya, taicha eta náeñamirahí, tájina náimicatarapínahíni. Étainapa tímícuñacavacayare te jena yucu te táitecapapa eta jena sácheyare. ⁴ Nararíhi ena nani rícoqueneana, ichape eta navayuasiravacahí eta navachachirahí ena ticaemataneacanahí eta nayehe. Tatiaríhiyaresera eta sácheyare táitecapauchayare eta náicuñayare, taicha ema Viya máimaraacahí tamutu, masamahivare eta nayaseserepianahí ena páureanasami músuana. ⁵ Ema rícoana puiti te juca apaquehe, tétavícapahí eta náurítarésirahí. Tamutuhi nanica eta táurínisiqueneana, tísatuheherecanahí. Tésinanacavanahí nacuti eta cuchi te náesinacha. Éna, tájahúchavayare eta náepenirayare, nacutiare eta tájahúchirava nacapaca eta cuchi náesinaruhi. ⁶ Tacutiquene náimicaviurehí náimicapacavare ena matapiravareanahí, náimípanapa eta namaitúsirahí tíacapauchavana nacatiuchavahíni.

Vicamichayare tamutu, taicha táetumechahaví eta vicuchapirahí eta machavirayare ema Víáquenu

⁷ Étísera, nuparapeanaveana, ecamichayare tamutu, táichavenehí eta ecuchapirahí eta machavirayare ema Víáquenu. Ecutiyare mácani achane ticaematanerahí. Macamichahí tamutu eta macatajivairana. Tiámainucava te tíuchuhapa eta máevaru, mapaenumavapa majacapa eta macuchapaquenehí máevaraquí. ⁸ Ene ecaheyare éti, yátupina ecamicha tamutu, váhivare ecuinajícava eta juca éhiruhi. Ecuchapavachucha, taicha tíánehípa eta máitesirayare ema Víáquenu.

⁹ Nuparapenaveana, vahí ecuquicha eta tájiparacana nayehe ena echamuriana. Váhivare ecuemeteaca éna, apaesa tacuíja eta táimicatsíríacahe te ecayaseserehípa te mamirahu ema Viya. Écharichuhi éti eta tánehirapa eta máuchujisirayare ema Juez, ecayaseserehinapa.

¹⁰ Nuparapenavechichana, nuvaraha ácutíni ena profetanainí eta nacamíchirahí tamutu eta nacatajivairahí, táichavenehí eta nacametaráiruirahí te májare ema Víáquenu. ¹¹ Némechahe: Ichape eta nacunachacarevahí eta víyehé nácani ticamíchanahí eta nátajivanahí. Écharichuhi eta macamíchirahí ema víyarahainí Job. Échahivare eta táuriquenehí májjaracasíhi me Víáquenu. Taicha tétavícapahí eta majapanuraivahí ema Víáquenu.

¹² Tacutiquene nutuparacahecha éti nuparapenaveana: Te ecayaseserehípuca, vahí ecuquicha eta juramento te májare ema Viya, ema tépiyacahí eta anuma éta pa eta juca apaquehe. Váhiquene ecuquicha eta juramento. Átupiruvachucha te ítauchayarepuca, “Nítauchayare” ácahepa. Téhesera váhipuca, étupiruvayare “Vahí nítauchaimahí” ácahepa. Apaesa tacuíja taviuchahe mayehé ema Viya.

Tatuparaca eyujarauchacacayare

¹³ Te etiarihinapuca éti ecatajivahí, tatuparacahí éneuchavayare me Viya. Te etiarihinapuca eti íúrisamureanahí, tatuparacahí ejira eta alabanza. ¹⁴ Téhevare etiarihinapuca eti

ecajumanahi, ímichuhayare ena víyacarana vichamuriana apaesa nayajisicahe eta aceite, te májjare ema Viáquenu. Tásiha, tiyujarauchaheanayare. ¹⁵ Jéhesare, tisamacareyarehi eta nayaseasirana, táichavenehi eta nacasiñairava me Viya. Tásiha, ema Viáquenu macanaracayarehi eti ecajumaquenehi. Te étapuca tiviuchahehi eta epecaturana, macapahayareva ema Viya eta epecaturana. ¹⁶ Eta tacahe, te tatiarihipuca eta éjecapiravanahi mayehe ema echamuri, eyaseacayare maperdonachahe. Tásiha, eyaseuchacayare te eyujaraca eta enarasiraina. Taicha tétavicavahi eta tasamacarevahi eta nayujaracasa ena matapiravareana. ¹⁷ Émaripa ema vicutiquenéni achane víyarahaini profetaini Elías, te tiyujaracapa éma, tiyaseserecapa vahi tacuquiva. Tisamacarehi éma. Vaipa taquivahini. Mápána año, saisi caje eta tamajinairahi tiquiva. ¹⁸ Tásiha, tiápechavavarepa tiyujaracahi. Tiyaseserecapa táemiricahini eta tiquiva. Tiquivavarepa. Tacahe, tíurinaínehí eta evaraquiana te apaquehe.

¹⁹⁻²⁰ Nuparapenavechichana, te natiarihinapuca nácáni vichamuriana téjecapavanahi tayehe eta yátupiqueneana, eti ecatuparaha iúrichavacayarehi éna, econsejachavacayare apaesa nachava éna, náinajicahini eta nájecapiravana. Tétavicavahi eta táurivahi eta íturusiraina eta nachavira, taicha táemesiava eta ecuchucuiravacayare tayehe eta náicuñayarehini, taicha eta táemesiavahi eta táepahairapa eta camuriquenehi eta napecaturana.

Tamu tupa.

Eta macartane ema Apóstole Pedro, ticajare 1 PEDRO

¹ Núti Pedro, mayehenu apóstole ema Viáquenu Jesucristo. Nucajurehe eta juca nucartane eti nuchamuriana éjanerepairuanahi ecaquijiqueneanahi tayehe eta apana avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia. ² Emutu eti, yátupiquenehi eta manerejisi-rahehi ema Tata Vicaiyaquene taicha tacahehi eta mapanereruhi acane eta táepaniravahi. Émaripa ema Espíritu Santo, tiávahácaheripa máepachiasirahehi eta epecaturana eta te máitine ema Jesucristo, máitsivachinahehivare eta itaresirana, máimicatasirahehivare eta esuapajiraivahi me Viya. Puiti, nuvaraha tajurucaini eta ecaicutiaraira eta máemunasi-rahehi ema Viya; tájinavare tahapapiricahini eta táurivahi eta epanereruana.

Vijacapyare eta vícuchihi te anuma te tauri eta vítaresirana

³⁻⁴ Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásiha, viratahahi vicamichahi tamutu eta viátajivana te juca vítaresirana taicha vicuchapahi eta sácheyare visiapaya eta mávasa ema Viya. Máitavacacayare eta vítaresirayare, táichavenehi eta máechepusirahi ema Machicha Jesucristo te máecari. Ánaqui, tájinapa ticapacahemahi, váipavare íchaimahi eta tamauriqueneana. Máitavacacayare eta iúrisamurereasiravanayare. ⁵ Púitiserá, tétavicavahi eta máitupajijiasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucuhaheyare te jena sache táepaniravayare eta viúritaresiraya.

⁶ Puiti, apanapaneyarechaha eta ecatajivairayarechaha. Nucasiñavahisera eyehe éti, vahi ecainajiruvaimahi. Eta ecasiñavairahi me Viya, evapinavaichucha eta ecamichirahi tamutu, taicha ímatihí vaipa táunaimahi eta ecatajivairaya. ⁷ Ema Viya máisapahi eta juca ecatajivairana, mavarairahi ímereuchavayare eta yátupiquenehi eta ecasiñavairahi eta mayehe. Ecutiyaare eta oro te nacaitamaraji te yucu te yátupihipuca étaquenehi. Étiserá étaviviriacahi eta tatumeva eta oro, taicha eta oro títavayarehi, témitiacayarehi. Te vahi ecainajiruva eta ecasiñavairahi mayehe ema Viáquenu, tétavicavayare eta ecunachacarevayarehi mayehe éma eta machimapiraheyare te machava.

⁸⁻⁹ Éti, vuíchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásiha, ichapeyarehiva eta iúrisamurevaya, tájina eviyaimahi ácayemahini eta ecunachiraya éma, te jena sache iúchucuhainapa eta itaresiraya máichecuarquirenapa. Étaserá eta táitsivahi eta ecasiñavairahi mayehe ema Viáquenu.

¹⁰⁻¹¹ Eta juca viúchucuirayare, acaneripahi eta tacaecherairahi. Énaripa ena víyaranaini profetanaini nájuequeneharipa tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espíritu Santo máitametacavacahi éna eta macatajivairayarehi éma Cristo étapa eta machavirayare tayehe eta táurinaquenehi mávasa. Énaserá ena profetana vahi náimatimahi tamutu. Navarahahi náimatiyare ¿nájahapuca ema máiteruyarehi? ¿Tájahapuca eta májareya? ¿Tájamuhuyarepuca eta máimeresiravaya? ¹² Émasera ema Espíritu Santo (ema másihaquenehi te anuma), mametacavacapa vahi náimahaimahi ema Cristo, taicha camuriyarehi eta áñoana eta máitecapiraya. Vítipasera puiti viti vítareruanaichaha, vítipa vímatihí éma. Te vicametarairupa mayehe ema Jesucristo, ema Espíritu Santo títametahehi te esamureana. ¡Tétavicavayare eta viúricacarevayare víti, te viúchucuhapa! Énaripa ena ángeleana, ichape navarahahi náimatihini tájahapuca táicharacavayare eta viúricacarevayare.

Ema Viya, eta máichuirahavihi, mavarahahi tépachinachahaviyare eta vítaresirayare

¹³ Eta tacahe, ecaratacava tayehe eta epanereruana, táurivainavare eta itaresiraya. Ecasiñavayare eta ejacapirayare eta ícuchihi me Viya, májjararuheyare te machavapa ema Viáquenu Jesucristo. ¹⁴ Ímerecavayareva eta machichairahahi, esuapajirahiyare. Vaipa ecuquicha eta íchaqueneanaini eyeherepianaini cape juca te vuíchaha ímatihini ema Viya. ¹⁵ Púitiserá, sánturuhéhéna eta itaresirayare. Taicha ema tíchuhahahi, tétavicavahi eta masantuvahi. ¹⁶ Taicha ema Viya, ani macahehi eta máechajiriruvahi tayehe eta Sagrada Escritura: “Nuvaraha sántuhéna eta itaresirana, taicha núti, yátupiquenehi eta nusantuva”.

¹⁷ Te eyujarasirana éti, ani ecahehi: “Tata Vicaiyaquene” ecahehi mayehe ema Viya. Ímatiyare yátupi éma eta nájinairahi manerejiruina, tacutiquene eta máemecharesirahi ena téjcapavana, máitsivachavacahivare nácani tíchanahi eta táuriqueneana. Tacahe, yátupina

eta epicauchiraina éma tamutu sácheana puiti juca ítasesiraichaha te juca apaquehe. ¹⁸ Éma Viáquenu Jesucristo ticuchucuhaheripa tayehe eta támaraivainihi eta ítasesirana, iámápiricaichaha eta nayeherepianaini éna iáchucanaveánaini. Écharichuhi éti eta mavacharesirahehi éma Cristo eta iúchucuirahi, váhisera te plátainahini, óroinahipucaini. ¹⁹ Étasera eta máitine máepusairuhi éma eta mavacharesirahehi, étivenehi ímijararecahi éma, cútiripa te cáijararecasi eta uvesa matapiravarequenehi. ²⁰ Acane te tépanavainapa eta apaquehe éma Viáquenu Jesucristo ticatuparahaipa tacaheyarehi eta máepeniraya. Váhisera táitauhavavanehini. Tapaenumavapa puiti, títauchavahi eta étavenepa eta iúchucuirayarehi éti. ²¹ Énerichu táichavenehi eta éhisirahi éma Cristo, ímatipa puiti éma Viya, éma ticaechepucahi éma Machicha te máecari. Puiticha téjacaripa éma tayehe eta mávacure te anuma. Éta tacahe, tétavicavainehi eta ecasiñavairahi mayehe éma, ecuchapavaipa eta mayehe.

²² Puiti tipachinaripa eta échanevana táichavenehi eta esuapirahi eta yátupiquene máimiturapiana éma Jesucristo, máimitusiraheripa éma Espíritu Santo. Éta tacahe, ímrecavainapa puiti yátupina eta émunasiracacahi nayehe éna echamuriana. Evapinavavare eta te esamureana eta émunasiracacarahi. ²³ Cape juca, eta ítasesirahi, tájina vahí íturuequenehahini eta iúchucuiraya. Puitipasera machichaheripahi éma Viya. Ítsivachaipahi eta ítasesirainihi eta esuapirahi eta máechajiriruva éma Viya. Éta ticaitarecaheyarehi; jéhevare eta máitavacacahi. ²⁴ Éta Sagrada Escritura, ani tacahehi eta táechajiriruva, májurehi éma víyarahaini profeta Isaías: “Éta vítaesirahi viti achaneanasami te juca apaquehe, vicutihí eta táimarusira eta muíji. Tijurucapa, tásiha tájijjipa. Éta vitumevainihi étapa eta vítupajjiasiravainihi, títavayare tacutihí eta flore: tépnehapa, tíjiyupa, témiricapa. Étasera eta máechajiriruva éma Viya, jéhevare eta máitavacacahi” tacahepa. ²⁵ Éta juca máechajiriruva éma Viya, étaquenehi eta emetacasisvanahi apaesa táuripa eta éhisirahi.

2

¹ Éta tacahe, támutupa ínajica eta evainararajivanainihi, tamutu eta ecaetemaraivainihi, eta apiipiemaírahénihi, eta ecapinaruravainihi, étapa eta échajivanainihi. ²⁻³ Puiti, eta ímatiraripahi yátupi eta máurivahi éma Viya, tíjurucainapa puiti eta esuapiravare eta máechajiriruvana. Ecutinapa eta najurusira éna amuyana. Ánipichichapachu técuhana, tájicanaripavare te nacheneana éna náenana. Éne ecahehi éti, yátupina eta evarairaya ecaravahu eta máechajiriruva éma Viya, apaesa tíápajucavaya eta ímatiequenehairaina eta mapaneruana.

Éma Cristo macutihí eta mari máepenacacahi

⁴ Yátupina eta ecasiñavaira me Viáquenu, taicha tétavicavahi eta macasiñacarevahi, macuti éta mari máepenacacahi. Éma, náepuruquenehi éna achaneana. Manerejiruhisera éma Viya taicha tétavicavahi eta macunachacarevahi mayehe. ⁵ Éneripa ecahehi éti, ecutiripa eta márijahiana máepenacacahi. Tacahe puiti, táuripa eta ecachaneracacainapa. Macarichu éma Viya éma ecaemataneacaya. Tívyuacaheya eta esuapajiraivaya eta májjarasiraheyarehi eta ématanepachuyare. Énerichuvare ecatuparahaipa sántuhénapa. Ecutiyare éna tíyujaracarahiana eta te Templo. Ecatuparahaipavare eyaseurahiya nayehe éna echamuriana. Éta éna ecamavahuira me Viya, étaripa eta esuapajiraivahi, eta ehasulupayachirahi éma Viya, étapa eta ecunachirahi éma. Tamutu eta juca, ecurisamurechayare éma, taicha émarichuhi éma Jesucristo ticaítecapinaheyarehi me Viya. ⁶ Éta Sagrada Escritura, ani tacahe eta máechajiriruvahi éma Viya: “Núti névatacachi éma Nuchicha Cristo eta eyehe. Taicha nunerejiruhí éma eta macurujisirayarehi éna nuchanerana návaháruanaya. Tétavicavahi eta macunachacarevahi eta nuyehe. Nácani ticasíñavanahi eta mayehe éma nuvaneruyare, vahí máinajicavacaimahi” macahepa éma Viya. ⁷ Éti, tétavicavahi eta macunachacarevahi éma Cristo eta eyehe, taicha yátupihí eta ecasiñairahi éma. Énasera nácani masuapajiraírahanahi mayehe, náepuruhi éma, nacuti éna tépiyarecarahiana eta Templo, eta náepuruirahi eta mari ticunacharepanayare eta te peti. ⁸ Nácani masuapajiraírahanahi eta máechajiriruvana éma Viya, tacutiqeneyarehi náepuruhi éma mavaneruhi éma Viya. Nacutihí mácani achane máquipairuhi táichavenehi eta macayutetuirahi. Tisemahi, mavaraha térajicavayare eta tímicaýutetuchahi.

Éna machanerana éma Viya

⁹ Étisera manerejiruheripa éma Viya, machichaheripa. Tachichaheripavare eta mávasa. Sántuhepa máicha. Tituparacaheripavare éma eyaseuchinavacayare éna achaneana eta mayehe. Majupahahehivare éma Rey. Puiti émapa macarichuhi téchahéhi taicha mavecuhaqueneheripahi tayehe eta tímápicu, tímisiapaheripa tayehe eta táuricacarequene majaraná éma, apaesa emetajiricaya eta táuricacarequeneana máematanerépi éma Viya.

¹⁰ Cape juca itaresirahi éti, vuíchaha ímatihini ema Viya. Eyerehichaha éma, vuíchaha échahini eta majapanuirahéhi éma. Puitísera evapinavahi eta ímatirahi yátupi eta majapanuirahéhi, taicha machaneraheripa.

Yátupina eta ecaemataneasirayare ema Viya eta itaresiraya

¹¹ Némunarúqueneana nuparapenaveana, puiti éti, tímicitijiricavaichaha estranjerohéhi taicha iáviharichaha te juca apaquehe. Váipasera áyeremahi eta eyanirayare eta iávasayare te anuma. Eta tacahe, nuconsejachahe: Vaipa táuricahini íchahini eta tajamurachaqueneana eta iáqueheana. Taicha tétavicavahi eta tavarairahi tácamítiequeneha eta iáchanevana. ¹² Íúrihisera eta echanerarichaha ena achaneana te juca apaquehe máimatirahanahi ema Viya. Tayanapanerine ticatianacaheana, téchejicanahi eta eyehe ecutihí ena máuritesirana náicha. Ímerecayaresera eta iúrivahi apaesa éna nacunachayare ema Viya, navarahainapa náehica ema Cristo taicha náimahahi eta táurivahi eta itaresiranahi.

¹³⁻¹⁴ Táichavenenahi eta éhisirahi ema Viáquenu, ímerecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tuparairucana tanacaqueneanahi eta ley. Éna, ticatuparahanahi náicuñacavacayare ena achaneana váinarajiqueneana, téjecapavanahi. Énasea ena achaneana tíuriana títaurahianahi, ticaemunacasianayarehi. ¹⁵ Taicha ema Viya, éta mavarahahi íchayare eta táuriqueneana apaesa ecamatinacaya ena máecharaireana nácani téchajicanahi eta eyehe.

¹⁶ Yátupihí vaipa tapamiruhénahi éti eta esuapirahi eta mavanairipianaini ema Moisés eta iúchucuirayare. Váhisera ecuyunaca eta vahi tapamisirahenahini, táetseraruina icha eta tamauriqueneana. Esapihasera ímerecavayare yátupihí eta mavanaraherahi ema Viya. ¹⁷ Epicaurahiyare nayehe namutu ena achaneana. Émunajiricacayare nayehe ena vichamuriana. Ímerecapa eta epicauchirahi ema Viya. Epicauchayarehivare ema Emperador Presidente.

Vácuti ema Jesucristo eta macamichirahi eta mátajivana

¹⁸ Éti, te ecaematanerecapuca, esuapajirahiyare, epicauchayareva nácani iáquenuanahi. Vahi nacucarichu esuapa nácani tíuriana achaneana. Tácuticaca eta epicauchiraina nácani váinarajianahi. ¹⁹ Te ecatajiva náicha, tájinapa eta eviurevanainahini, tétavicavahi eta ecunachacarevaya me Viya te ecamichahi tamutu, taicha evarahahi itaucha eta mavarahaquenehi ema Viya. ²⁰ Téhesera náicuñacahepuca táichavenénahi eta íchirahi eta tamauriqueneana, tájina ecunachacarevaimahi eta ecamichirahi, taicha tatupiruvahi eta ecaicuñairayare. Téhesera táimicuñacahepuca eta íchirahi eta táuriqueneana, ecamichirahi eta náichirahéhi, tétavicava eta ecunachacarevaya te mamirahu ema Viya. ²¹ Taicha ema Viya, eta máichuirahéhi, mavarahahi ecutiharehi ema Cristo eta macamichirahi tamutu eta mátajivana íchavenéhi éti, mavarahahi ecaravahu eta máurivahi, ecutiharehi éma eta macayehera paciencia. ²² Éma, tájinahineni maviurevainahini, mapecaturainahipucaini. Nájinavare macaetemaquenenahini. ²³ Te nacaetemajiricapa, éma, vahi mácapaemachavacahini, macatitimahipucaini eta náemecatajivachirahi. Máechajicahisera ema Maiya, mámahainéhi éma. Taicha yátupihí eta máicuñasiravacaya ena témecatajivachanahi. ²⁴ Yátupihí ema Cristo ticaicuñahi víchavenéhi víti eta vícuñayaréni vícuchiníhi táichavenéhi eta vipecaturana. Tétavicavahi eta mátajivana te máquehe eta náemetatasirahi eta te crusu. Macamichahisera tamutu, mavarahahi vaipa tacuvayacahaví eta pecatu, tatupiruvayarehi eta vítaesiraina. Eta majarana, éta ticanaracaheyare. ²⁵ Eta itaresirainíhi acane éti, ecuti eta uvesa táemitiaru. Puitísera iávahácaripa ema Cristo, émapa tijaneacahéhi, ticatiuchahehivare eta iáchanevana.

3

Tíuriyare eta náitaresirayare ena nacaimaqueneana

¹ Tacutiquene eti esenana ecaimaqueneana, epicauchayareva ena ímanaveana, apaesa mácani vahi masuapahini eta máechajiriruvana ema Viáquenu, ecájimuyasamurechavaca táichavenénahi eta iúrivahi nayehe. ² Vaipa tácomesaimahi échajirica taicha náimahayare eta esuapajiraivahi nayehe, epicauchirahivare. ³⁻⁴ Ímerecayareva eta iúriya yátupiquenehi, tásihaquenehi te esamureana, tímicitijiricavahi eta iúrina eta emira. Tayanapanepuca ichanaruheripa, iúrinachavaya te esamureana. Evayuchahini eta étupisirava eta ésamirisirava. Eta juca, tétavicavahi eta ecunachacarehi mayehe ema Viya. Vahi étaparacaina eta evayuyujisirahipuca eta ecamuirihaira étapa eta ecatatasirana, váhivare étaina eta ecayehera oro. ⁵ Taicha acane ena vénarahana esenana náinapureanahi téhicanahi ema Viya, tacahehi eta náurinachiravahi eta náitaresirana, taicha yátupihí eta nacasiñavairahi mayehe ema Viya. Tásiha, tétavicavahi eta nasuapajiraivahi nayehe ena náimanaveana. ⁶ Ecutihare esu vénaraha Sara. Suímerecahi eta susuapajiraiva mayehe ema suima Abraham, taicha ani

sucahehi mayehe: “Náquenu eñi”. Tásiha éti, vahi ecupica eta esuapirahi ena ímanaveana. Ímreca yátupina eta iúrivahi nayehe.

⁷ Éti pa ajairana ecayenaqueana, eJapanuyare ena eyenana. Ejaneacavare, échahi éna eta vahi túmenahini. Yátupinahisera eta émunasirahi éna, taicha ecuticacayare eta ejacapi-rayare eta ícuchihí eta ítaresiraya mayehe ema Viya te jena sáchezare. Te iuri nayehe, esam-careya te eyujaraca.

Tiúriyare eta ecamichirahi eta íatájivana táichavenénaí eta íchirahi eta táuriqueneana

⁸ Ámutu éti, ácuticacahi eta epanereruana. EJapanucaca, émunacacavare nayehe namutu ena echamuriana. Ecajirahi. Mánshéhahi. ⁹ Tijuricati natupiacahépuca, náumehahe, váhisera ecujicapa. Eyaseacachuca ema Viya eta náuricacarevaina. Taicha mavaraha ema Viya vijapanurahiyahehi víti, vicutyare éma eta majapanuraivahi. Tatiarihiyare táitsivayare víyehe máicha. ¹⁰ Taicha ani tacahehi eta Salmo: “Mácani mavarahahi tíurita-resira te apaquehe, támutuyare sácheana tíúriya, vahi téchajijicaimahi tivayurecaimahi. Váhivare ticaetemarecaimahi tépiyahirahimahi. ¹¹ Váhivare máichaimahi eta tamauri-queneana. Máichahisera eta táuriqueneana. Macamitiacahi eta semanereana. ¹² Ema Viya majaneaca ena náuriqueneana; tisamacareanahi eta nayujarasirana. Énasera ena tíchanahi eta tamauriqueneana, macatíanaruanahi éma” tacahepa eta Salmo.

¹³ Nájina tíjaracavaimahi titupiacahéna te náimahahi ícha eta táuriqueneana. ¹⁴ Tijuricati natarihipuca ena ticatíanacahéanahi táichavenéhi eta táurivahi eta ítaresirahi, tásiha, tétavica-vayaya eta iúricacareva. Váhivare ecupica eta jácani náichirahépuca, váhivare iávamirah-uimahi nayehe. ¹⁵ Íjaracavaseira yátupi eta éhisira ema Viáquenu. Te nayaserecahépuca eta tacayema eta éhisirahi éma Jesucristo, tíúrihi eta ejicapiravacaya tayehe eta ecucha-paquene. Mánshéhéna éti, epicaurahivare. ¹⁶ Tátupiruva tamutu eta íchaqueneana, táurivare eta náimairahena namutu ena áchaneana, apaesa ecamatinaca nácani téchajisíaracahéanahi eta táurivahi eta éhisirahi ema Jesucristo, nátsirihapaini eta náechajisira. ¹⁷ Te máisapahipuca ema Viya eta náemecatájivachirahé táichavenéhi eta iúrivahi, tacunachacareyare mayehe eta ecamichira. Tájinasera ecunachacarevaimahi te ecaviurevahi.

¹⁸ Yátupi ema Cristo, étaherichuhi vímicapacahi táichavenéhi eta vipecaturana. Éma, tétavicava eta máuriva, matapiravarehivare. Tíjaracavahisera ticatájivaya víchavenéhi víti váinarajiqueneana, mavarairahi tíámahavi me Viya. Tépenahi eta máquehe, étasera eta máchaneva tímiyanavaichucha títareca. ¹⁹⁻²⁰ Tíyanavarepa máejirapanavacahi eta náchanevana ena náepenaqueneanaini nacaerataqueneanahi te ínferno. Ticametarairupa nayehe ena nani náepenaqueneana antivuanaini, machamurianaini ema víyarahaini Noé. Ichapehinéhi eta macamichiravacahi ema Viya eta macuchapiravacahi eta nasuapirainahini, vahi náeñamavahini eta náimairahi ema Noé máepiyasirahi eta íchape pacure. Tacahe, te témiricapa eta íchapequene tíquiva, macarichuhi ema Noé ésupa esu mayena, énapa ena machíchanaveana énapa ena nayanana, óchoanaichuhi ena tíuchuchuhanahi tayehe eta íchapequene une. ²¹ Tiuri puiti, eta une ticaeririjicavacahi ena masuapajirairahana, nímicutíchahehi eta vícachasi. Eta vícaicachasirahi te víjaracavapa véhica ema Jesucristo, vahi étaparacaina táepachíacahavimahini eta víáquehe. Étasera eta vícaicachasirahi, étapa tímereuchahavi eta maperdonachirahaviripa ema Viya tamutu eta vipecaturana. Máepachínachínahaviripavare eta víáchanevana, tájínapa taviuchahavihini, eta visamiravahi te mamirahu. Yátupina eta víuchucuirayare táichavenéhi eta máechepusirahi te máecari ema Viáquenu Jesucristo. ²² Puiti éma, tíyanaripahi te anuma; téjacaripa te mavaure ema Maiya. Tétavicavahi eta masuapacarevahi nayehe namutu ena mayeheana ángeleana. Énapa ena váinarajiana, nasuapahivare.

4

Eti éhicanahi ema Viáquenu, tituparacahé ecaratacavayarehi apaesa vaipa íchaimahi eta tamauriqueneana

¹ Ema Cristo, ichapemuríhi eta macatájivairahi eta máepenirahi te crusu. Macamichahisera éma tamutu. Éti apanavare, ecutyare éma. Vahi iávamirahuimahi eta ecatajivairaya. Nímicutíchaheyare eta mácani achane tépenapa, máinajicaripa eta pecatu. ² Eta tacahe éti, táichavenéhi eta iúrujasirahi ema Jesucristo, tímícutíjiricavaipa épenaipahini, ínajicari-pavare eta pecatu. Puiti eta tápechiravaripa táítarecahíni eta íáchanevana, tatuparacahi ecaemataneacayare ema Viya. Vaipa tivayucahémahi eta tajamuraraiva eta íáquehe. ³ Tamapurujipa eta táetavisiravaripa eta áñoana eta íchirahi eta tamauriqueneana, taicha emaimatirahi ema Viya. Tamutuhi ícha eta tájiparacana, tivayucacahéhi eta tajamuraraiva eta íáquehe. Evayuchavahi eta esenamaréranahi étapa eta ecavaharasiva. Ecasamurehi

eta íchira eta piesta. Íchahi eta tájiparacana tamauriqueneana eta ejaneasirahi eta esiñarajiana achanemirana. ⁴ Puitísera éti, vaipa ecasiriqumirihini ena émunacasareana. Vaipa íchaimahi eta táíñemahiquene eta náitaresirahi. Ichapemurinehi eta náejasirahéhi. Tásiha, téchajicanapa eta eyehe. ⁵ Járájpainapasera eta sácheyare nacayaseserehirayare te mamirahu ema Viáquenu, taicha éma yátupiquenehi eta macatuparahairahi eta vicayaseseheriraya víti, vítareruanaichaha énapa ena náepenaqueneana. ⁶ Eta tacahe, ena Jesucristo ticametarairuhi nayehe ena náepenaqueneana, mavarairahi macuchucuhayare eta náchanevana apaesa nápechavahini náitareca te mamirahu ema Viya, tayanapane eta náeche máteji táitavapapuca tayehe eta tacaecarasiyahi.

Yátupina eta émunajirisiracacaya, ítátijíricacayareva

⁷ Esamanuchaha, tiánehipa eta táitavirayare tamutu eta juca. Eta tacahe, ecaratacava eta epaneruana apaesa táurivaina eta eyujarasiranaya. ⁸ Táápajucavayarehisera ichape eta émunajirisiracacayare éti. Te yátupíhi eta émunajirisiracacahi, máejerareya eta eperdonachiracacaya eta jácáni éjécapiravana. ⁹ Evapinavaya eta ejaicapiracacaya, te epaipuchacaca te epena. ¹⁰ Ema Viya tíjaracahevacaripa eta ítucacauenepachuhi. Tacahe, yátupina ítachaya eta ecaemataneasiracacahi te mamirahu. ¹¹ Eti máitavareana ema Viya eta échajisira, ecuneuchava échajica yátupí eta máechajiriruvana éma. Eti ímicatarahiana ítátivaca ena echamuriana, vahi éñamaimahi eta etumeva májararuhehi ema Viya. Étavenehi éhisirahi ema Viáquenu Jesucristo, tamutu tauri eta jácáni íchaqueneana apaesa nacunacha ema Viáquenu namutu ena tímahaheana. Éma, ¡tétavicavahi eta macunachacarevahi! ¡tétavicavahivare eta máitupajijiasiravahi eta máechirahavihi tiuri! ¡Máitavacacahivare eta véhisiraya éma! Amén.

Vahi ecuavmirahu eta ecatajivairaya táichavene eta éhisirahi ema Jesucristo

¹² Némunarqueneana nuparapenaveana, vahi ecuarami eta muracairaya eta iátajivanayare, tímicutijiricavayarehi táamicarehini eta eyehe. ¹³ Evapinavachucha taicha ecapayaracahi eta macatajivairahi ema Cristo apaesa evapinava te jena sácheyare eta enecapirayare éma eta máucupaisiraya mámirayarepahi eta majaraiva. ¹⁴ Te náumehahepuca máichavenéni ema Cristo, tétavicavayare eta iúricacarevaya éti. Taicha tiávahácheyare ema Espíritu Santo, másihaquenehi te majaraiva ema Vicaiyaquene. Tayanapane náepurupuca éma, étisera ecunachahi éma. ¹⁵ Te etiarhipuca eti ecatajivahi náicha, tacuijasera étaimahi tivíuchahémahi jácáni ecapahivainahini, íámeraivainahipucáini, váhivare étaimahi tivíuchahémahi jácáni ímisiapirasiravainahipucáini tayehe eta náichaqueneana nácani apanana achaneana. ¹⁶ Étisera, te ecatajivapuca táichavenéni eta éhisirahi ema Cristo, vahi ecutsiraha. Evapinavachucha, ehasulupayachavare ema Viya tayehe eta ecajarerahi eta májare ema Cristo.

¹⁷ Puiti juca sácheana víavacurehi, táitecapaurehaviripa ichape eta vicatajivairayare, mavarairahi ema Viya vímereuchava eta víuriva víti machichanaveana. Énasea ena masuapajirairahanahi eta náichirahi ema Viya, páureanasami taicha tíápajucava eta nacatajivairaya, ichape eta náicuñaya. ¹⁸ Ichape eta vicatajivairahi te juca apaquehe víti macuchucureanayarehi ema Viya. ¡Páureanasamisera ena achaneana masuapajirairahana, vánarajiqueneanahivare! ¡ichapepanayare eta nacatajivairaya! ¹⁹ Puiti víti véhicanahi ema Cristo, ichape eta vicatajivairahi. Váhiserá vicainajiruvaimahi. Vímiyanavayarehi vícha eta táuriqueneana. Vácasiñava mayehe ema Vicaiyaquene eta majaneasirahavivare, taicha éma, tétavicavahi eta máitauravahi.

5

Ema Pedro maconsejachavaca ena machamuriana

¹ Tiuri puiti, nuparapenaveana, nuvaraha nuconsejachahe emutu eti pastoreana ejaneacanáhi ena vichamuriana. Nútiripa pastornuhi. Énerichuvare testigonuhi eta nímarasirahi eta macatajivairahi máepenirahi eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vicatuparahairaya víávihayare te majaraiva ema Cristo te táitecapa eta machaviraya. ² Tauri eta ejaneasiravacaina namutu ena vichamuriana, taicha éna tímicutijiricavahi uvesanainahini mayehe ema Viya. Ítauchayare eta etuparacasivahi. Ema Viya mavarahahi evapinavahini eta ejaneasiravacahi. Vahi eucuyacujequenehavaca. Váhivare ecupanerecha ecavacha. Evapinavayaresera eta ecaemataneasiravacaya. ³ Váhivare ímipananájicavacáimahi taicha vahi ecavanaravacahini. Ímerecayarehisera eta iúrivaya nayehe, apaesa éna náehica eta iúrivanahi. ⁴ Apaesa te machavapa ema yátupiquene Pastor eta víyehé, tétavicavaya eta macunachirahéya. Tíjaracahenapa éma eta evachayare ícuchihi. Máitavacacainapa eta ecachaneraya éma te mávihahi eta te majaravahi.

⁵ Eti apanava eti amaperuana, nuconsejachahe: Esuapayare eta navanesiraheana ena viyarahana. Emutuyare esuapacaca. Mánshéhahi. Taicha ema Viya vahi majapanuimahi ena ticasíñavavairicana. Tétavicavasera eta majapanuiravacaya ena mánsupanereruanahi. ⁶ Te ímereco eta emansuvavacahi tayehe eta ecasiñavairahi eta me Viya, éma, te máimahapa tiuri, ticatiuchahenapa te tamutu eta íchararacavaqueneana. Tásiha, tétavicavayare eta iúrisamurevaya. ⁷ Te tatiarihipuca eta éñamiravana, emetaca tamutu ema Viya. Éma, ticanaracaheyare taicha tétavicavahi eta máeñamiravahi eta eyehe.

⁸ Ecuneuchava yátupina. Ejaneacavahivare, taicha ema viánarahi Váinaraji, macuti eta táifñehiquene sárare tatanujiriricahi eta tanicayarehi. Ene macahehi éma, matanucahi ena máquipairuanayare. ⁹ Eta tacahe, túmehéna ecanarairayare éma, machu máquipaicahe. Ácasiñava muraca eta mayehe ema Viáquenu. Écharichuhi vahi ácarichuhini eta ecatajivairahi. Túmehénahi eta ecamichiraina, ecutiyare eta nacamichirahi ena vichamuriana ticavasanahi te tamutu avasareana. ¹⁰ Ema Viya, tíchuhahavihi, mavarahahi visiapayare tayehe eta mávasa táichavenehi eta véhisirahi ema Jesucristo. Ánipirinesera eta ecatajivairaya puiti juca sácheana. Émasera ema Viya, tétavicavahi eta majapanuraivahi. Éma, tímararacahéhi eta ecamichirahi; tásiha éma, tíjaracahenapa eta evayuchiravainapaicha eta etumevaya. Tájina ticayacahemahi máicha. ¹¹ Éma, ¡máitavacacahi eta macunachacarevahi! ¡Macachuricahi eta máitupajijíásirava, máitavacahivare éta! Amén.

Eta táichecuaraqui eta macartane ema Pedro

¹² Ímati emutu ema vichamuri Silvano. Éma, tétavicavahi eta máitauravahi te tamutu. Puiti, émahí ema tíaminanuríhi eta juca nucartane. Núti, ánipichichahi nájurehi eta eyehe. Esamanusera eta nuconsejachirahehi. Eta numetasirahehi tamutu eta juca, nuvaraha nétumechahe eta véhiruhi, taicha yátupíhi eta vicajúheirahi me Viya táicha.

¹³ Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecutíhi eti eta manerejisirahehi. Téchajicahivare ema nuchicha Marcos. ¹⁴ Núti, eta néchajirisirahehi éti nuchamuriana, nuvaraha nétserecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, máíjaracahehíni tanaraca tamutu eta epanereruana emutu éti machaneranahí ema Viáquenu Jesucristo.

Tamutupa eta juca néchajiruvahi eyehe.

Eta macartane ema Apóstole Pedro, ticajare 2 PEDRO

¹ Nuti Simón Pedro, mavanaranuhi ema Jesucristo. Manerejirunuhi vare mayehenuhi apóstole. Nucajurehe eta juca nucartane eti nuchamuriana taicha tétavicavahi eta evapinairavahi eta juca véhiruhi. Puiti éti apanava ejacapacarehivare me Viya, ecaicuchiripavare eta iúchucuiraya maicha ema Viáquenu Jesucristo. ² Puiti, nuvaraha tajurucaini eta ecaicutiaraira eta máemunasirahehi ema Viya, tásihaquenehi eta ímatiequenehairapaipahi eta mapanereruana éma, émapa ema Viáquenu Jesucristo. Tájinavare tahapapiricahini eta táurivahi eta epanereruana.

Eta náurivana ena téhicanahi ema Jesucristo

³ Táichavenehi eta vímatirahi ema Viya, tétavicavahi eta máitupajijiasiravahi eta macaemaneasirahavahi eta vítaresirana, mavarairahi vétaviuchahini eta víurivahi, vicutiyarehi éma eta masantuvahi. Étahi eta mapanereruhi eta máichuirahavahi. Tásiha, visuapavanepa taicha vímahapa eta majaraivahi, vímahavarepa tétavicavahi eta máurivahi taicha camuriquenehi eta táuriqueneana máichaqueneanahi. ⁴ Tíjaracavaripavare éma táetaviuchayare eta víúricarevanayare maicha te jena sáchezare, tíjamurachacareanahi tamutu. Muracahi eta vicasiñavairahi eta máítauchirayare tamutu eta júcana, taicha tétavicavahi eta máurivahi étapa eta majaraivahi. Táichavenehi eta ecasiñavairahi mayehe, tinacasamurechahehi eta ecasamurerayarehi étachucha eta táuriqueneana, ecutiyahe éma eta macasamurerahi eta táuriqueneana. Vaipa tivayucahemahi eta tajamurachagueneanahi eta iáqueheana, taicha tétavicavahi eta tamaeperajichirahehi eta cape juca eta itaresirana. ⁵ Eta tacahe, etuparahahi puiti, ímiyanavahini eta éhisirahi éma, epamicavavarehini iúri va nayehe namutu ena achaneana. ⁶ Epamicavavaréni ecaravahu apaesa ímatiequeneha eta mapanereruana ema Viya, ecaravahuvarehini ecaratacava, étumechavavarehini eta ecamichira eta jácani iátajivana. Epamicavahivareni ácuti ema Viya eta masantuvahi. ⁷ Epamicavahivareni iápajucaya eta émunaraivahi nayehe ena echamuriana, ecajirayare. Epamicavahivareni eta émunaraivahi nayehe ena apamuriana achaneana, tayanapane vahi náehicahavihini. ⁸ Eta tacaheyare eta itaresirana éti, ítamuturusirahi tamutu eta júcana iúri vanahi, ecutipaipahi ema Viáquenu Jesucristo eta máurivahi éma. Énerichuvare te muracahi íjaracava ecaravahupaipahi eta júcana, tiápajucavapaipahi eta ímatiequenehairahi eta máimiturapiana, tiápajucavapaipahivare eta etumeva tayehe eta ecaemateneasirahi éma. ⁹ Nácanisera vahi návarahahini nacaravahu, tímicitijiricavahi ena púchucuiana éna inapa ticatajivanayare. Taicha náemitisicaipahi eta máepachinachiravacahi ema Viya tayehe eta táinapurénihini napecaturana náichaquenénihini cape eta náitaresirahi.

¹⁰ Étiserá, eti nuparapenaveana, nuvaraha échavahini eta máichuirahahi ema Viya, manerejisirahehi. Epamicavahini eta ímeresirahi yátupi eta machichaherahi. Eta ímiyaniravahi eta ecaravahuira eta juca néchajisihagueneanahi, jéhesare, tájinapa tímiáquiipaichémahi. ¹¹ Tásiha, tétavicavaya eta iúricarevaya eta machimapiraheya ema Viáquenu Jesucristo te macuchucuhahepa eta te juca apaquehe, mámirahaya eta te mávacureya. Máitavacacaya eta macachanerahaviya vimutu.

¹² Tacahe núti, nupamicavahi puiti eta némechiraheya eta júcana, tayanapane nímatihahi eta ímatiriripahi, muracaripavare eta éhisirahi eta yátupiqueneana ímitucasivanahi. ¹³ Németeaca nétipicavahi eta juca nuconsejachirahehi puiti juca nítaresiraichaha te juca apaquehe. ¹⁴ Taicha vaipa náyeremahicha eta nítaviraya. Ema Viáquenu Jesucristo tímimetacanuhi eta nunarasiravanenapa te machacaya. ¹⁵ Nuvarahahisera vahi eucemitisica eta juca numetaruheanahi, tayanapanéinepuca népenaipa. Eta tacahe, nupamicavahi eta nímiájurecahe emutu, taicha nuvarahahi échayarehi tamutu sácheana.

Viti vímahahi eta majaraivahi ema Jesucristo

¹⁶ Viti vítipiruva eta vímitusirahehi tayehe eta táicharacavayare eta machaviraya ema Viáquenu Jesucristo, máimeresiraya eta máitupajijiasirava ichape. Vahi vépiyahirahimahi, váhivare vívehagueneana te vícuti. Vímatipa yátupi, taicha vímahahi te víúquihana eta majaraivahi eta aguenucairahi. ¹⁷⁻¹⁸ Taicha víti vítiarihihi te machacaya ema Viáquenu Jesús, vicachanehi éma tayehe eta cerro santo, te vinecapaequenehapa eta macajaireirahi éma eta Aquenucairaya. Visamahivare eta mahu ema Tata Vicaiyaquene eta macunachirahi ema Machicha. Ánipa macahehi: “Ema maca éma yátupiquenehi Nuchicha némunaruquenehi. Tétavicavahi eta núsismurevahi máicha” macahepa.

¹⁹ Viti vítametacahi eta nacayemaqueneanahi ena víyarahánaini profetana tayehe eta Sagrada Escritura, eta náechajisihairahi eta aquenucairayarehi ema Viáquenu. Eta náimiturapiána tacutihi eta tajaraiwa eta lámpara eta tamicauchirahavihi apaesa táuriyare eta vítaesirana te juca apaquehe tamaurivahi. Tacahe, étumechava tayehe eta ecuchapiravaya eta sáchehate te márajapainapa ema yátupiquene eta majaraíwa, tétavicavayarepa eta mamicauchirahereyare tamutu eta esamureana. Tacahe, tituparacaheli esuapayare eta juca esamaqueneanahi vímitucasivanahi. ²⁰⁻²¹ Nuvarahasera yátupina ímatiequeneha eta juca: Vahi táurica viveha te vichuti eta vímijachirahi eta tacayemaqueneanahi eta Sagrada Escritura. Vicatuparahahi vicaravahuyarehi eta yátupiquenehi. Ena víyarahánaini profetana, váhivare navehaquenéhaníni te nachutiana eta nájuquequenehairahi eta máechajiriruvana ema Viya. Ema Espíritu Santo, éma tímitucavacahi eta nájuquequenehairaya éna tayehe eta Sagrada Escritura vímahaquenehi puiti.

2

Natiarihiyare ena tépiyahirahianaya tímijachavanayare pastoreana

¹ Tiuri, acane natiarihivaresera ena tépiyahirahiana tímijachavanahi profetana te namuri ena náchucanaveanaini israelítana. Ene tacaheyare puiti, natiarihiyareva ena tépiyahirahianaya, tépiyacavanaya pastoreana eyehe. Éna típichasicaheanayare. Témejecapavachaheanaya, apanaya eta náimiturapiána. Vahi émaimahi náechajisíha ema Viáquenu ema náimicaparuhivare. Énajivahi tíchavanahi natanucahi eta náicuñayare, tájjahúchiravayarehi eta náemítiequenehairayare. ² Camurianayare ena náemejecapavaruanyare, náehicainapa eta nayeherepi, táetaviuchirahi eta natuhusivahi. Náichavenehi éna, téchajicanainapa ena apamuriana achaneana, nacaecahinapa eta juca véhiruhi táurinaquenehi achene. ³ Ena nani, tímitucaheanaya eta náimiturapiána náepiyahiraivanahi, taicha navarahahi títucavana tivereacaheanainapa éti, taicha tétavicavahi eta najamurarasirahi eta plata. Tájjinasera náipuinayare, vahi távejuacaimahi eta náicuñayare. Taicha acanevacaípa eta tacaecherairahi eta náicuñayare.

⁴ Nacutiyare ena ángeleana téjecapavanahi. Tájjina vahi maperdonachavacaimahi ema Viya. Máquijicavacapa tayehe eta táifehiquene infierno távihahi eta timapicuquene. Ticaitihanahi puiti te cadena. Te táitecapapa eta juicio, tíápajucavanainapa eta náicuñayare éna. ⁵ Nuvaraha némechahe nayehe ena machamurianaini ema víyarahaini Noé eta acane, váhivare májapanuvacahini ema Viya táichavenehi eta namasuapajiraivahi. Macamiricapa eta íchape tíquiva náicuñahi. Téricanahi namutu ena nani achaneana, taicha náepuruhi eta máichuiravacahi ema Noé, táurivayarehini eta náitaresirana. Nacarichuhi tíuchuchuhanahi ema Noé, esu mayena, énapa ena sáisiqueneana machichanaveana. ⁶ Nuvaraha némechahevere nayehe ena ticavasanainihi te avasare Sodoma, étapa te Gomorra, váhivare májapanuvacahini ema Viya. Macamiricahi eta yucu, náicuñahi éna. Tájjahúchavacapa tacamítiequenehavaca namutu. Títavanapa, amairihanecha tsimapa eta náitavirahi. Ema Viya máimerecahi eta juca, nayehe ena najurureanapa te juca apaquehe puiti, mavarairahi máemechavaca ena achaneana váinarajipanereruanahi te napicayarepuca. ⁷⁻⁸ Téhesera te nataracu, matiaríhi ena víyarahaini ticaijare Lot. Éma, tamutuhi sácheana ticatisamurevahi taicha máimairavacahi ena achaneana náichirahi eta tamaurivareana, masamirahivare eta náechajisihairahi eta titsirihacareanahi. Téñamavahivare éma eta máimairavacahi ena achaneana, natuhusivavacahi eta náitaresiranahi. Tacahe, macuchucuhahi ema Viya, taicha éma Lot, tétavicavahi eta máurivahi, tisuapajirahihi mayehe ema Viya. ⁹ Eta tacahe, ema Viya tétavicavahi eta macatiuchirahavi puiti, ticuchucuhavavi víti véhicánahi éma, tayehe eta víatacijavana. Énerichuvare yátupíhi matsecaripa eta náicuñayare nácani achaneana masuapajirairahanahi.

¹⁰ Ema Viya, yátupíhi máicuñacavacayarehi namutu ena tivayuchanahi eta náechipejisirahi eta náqueheana taicha tétavicavahi eta tavayuasiravacahi eta natuhusivana, énapa ena tépuruanahi ema Viáquenu eta émairahi téchavacahi. Ena nani, máeyajanahi. Mapicaurairahana, nájjina návamirahuquenéna eta náumeharaíwa. Nasapiha nacaecahivare ena ángeleana tíamana eta majaraíwhi ema Viya. ¹¹ Apanasica ena ángeleana tíavianahi te mamirahu ema Viáquenu, vahi nájaracahini nacajacharecani ena váinarajiana, tétavicavahiníni eta natumeva. ¹² Énasera ena nani tépiyacavanahi pastoreana, nacaecahisera eta téhicacareana namaitururequeneruanahi. Éna, nacutihi eta táitaresira eta sárare, tájjina nacaicutiaraquenéna. Najurupairuchucha te apaquehe. Éna, táuriavasahi eta justicia, máejehahi náerataca táimicpacavaneyare. Tépenanyarehi nacuti eta táepenira eta sárare. ¹³ Éna, náimicatajivachahi nácani apamuriana achaneana. Páureanasamisera éna, tíápajucavanayare eta nacatajivairayare.

Ena nani, tétupicavanahi eta náimairavahi, tiúrisamurereácavanahi eta nacavahairahi tamutu sácheana. Táitaurevaquenehi tétavicavahi eta natsirihacarevayarehi eta namaetupicushivanahi, eta nacasiriquirahehi te jácani énisiracacana ena echamuriana. Ticamapuravahi ticurismurechavana, navarairahi náituruca jácani najamurachaqueneana. ¹⁴ Namutuchucha najamuracha nácani esenana. Tájina náipuina eta náesenamarévana. Náechemaha eta náiturúsiraya súcani esena máejerarehi. Náimitucavare ena ajairana tájina náituruéqueneha, nacutiya éna eta náesenamarevanahi. Tájina tivechuquihaimahi eta nacapecaturairahi. Ecuñaraqüisera eta náicuchi éna. ¹⁵ Témunasiricavanahi éna, taicha namaimatirahi eta achene nacaijuheya eta táuriquenehi. Nacutipahi eta mayeherepini ema maca achane Balaám, machichaini ema Beor. Éma, tétavicavahi eta majamurachirahi eta plata, mavachayare eta máichirayare eta tamauriqueneana. ¹⁶ Ema Viya máimahahi eta tamarivahi eta mapanereruhi ema Balaam. Eta tacahe, eta burro macaperaquenehi ema Balaam téchajicapa, tacajachahi ema Balaam. Éma, macaicutirahi eta táechajiriruvana eta mapera. Enevanepa témitiacahi eta mapanereruhi tamariquenehi.

¹⁷ Ena nánitátaji achaneana nacutihi eta tiájicu eque. Nacutivare eta úciji támarairuhi eta técaticava. Éna, jararihipa eta náicuchi náicuñayare tayehe eta táetaviure eta tamapicuva. ¹⁸ Ena téchajisiavanapa ticunachavanapa eta náichaqueneana napecaturanahi náiturureanahi. Náiminajicapaipa nácani náiturevanapahi eta táurivainiripahi eta náehisirahi eta táuriqueneana, tichavanapaipa tayehe eta tamaeperajivanahi eta náitaresira. ¹⁹ Éna, ánipa tacahe eta náechajiriruvahi: “Víti, nájina visapaimahi tipamicahavi. Tacutirichuhi te vicha eta tamariqueneana étapuca eta táuriqueneana. Vítijiva véchinavahi eta vítaresiraya” nacahehi. Éna, tímijachavanahi libreana. Énasera tiápajucavanahi ticaeratanahi taicha eta tavayuchiravahi eta napecaturana étapa eta namaeperajivana. Nácani tavayuaruanahi eta napecaturana, vaipa énanahini náechinavahini. ²⁰ Tacutiquene nácani tinajicavanahi eta náehisirahi ema Viáquenu Jesucristo, tichavanapa tayehe eta tamaeperajivahi eta náitaresirana te juca apaquehe, éna, tiápajupanavanapa eta nacaicuñairayare, taicha eta navirevahi. ²¹ Tiúripa naichuhipucaini vahi nacuimatihini eta táurinaquene véhiruhi, váchupa náimatiripahi eta túrina achene, tásiha tinajicavanarichahavare tayehe eta túrinaquene vanairipi najacapaquenehi. ²² Jucarihi eta náechajiriruva náchucarapi, ani tacahehi: “Te tiáhica eta tamucu, táimichavayarehi tanica eta táhiruha. Étapa eta cuchi, tamapuruji vicachahini éta, taicha técarajicavayarehi te tiúrají”. Ene nacahehi ena tinajicavanahi tayehe eta véhiruhi, tichavanapa tayehe eta tamaeperajiqueneanahi.

3

Vaipa táyeremahi eta machavirayare ema Viáquenu Jesucristo

¹ Némuraruqueneana nuparapenaveana, apihepa puiti nímiamaréca eta juca nucartane. Eta táechajiriruvahi eta apinaquene nucartane, nuvarahahi nuconsejachahe, apaesa tacuija tahapapicahe eta éhisirahi ema Viáquenu. ² Nuvarahavare yátupina eta esuapiraina eta Sagrada Escritura nájureanahi eta acane ena víarahanaini santo profetana, étapa eta máimiturapiana ema Viáquenu Macatiurahiquene. Étarichuhivare vímiturapíhi puiti eta eyhe víti apóstoleana.

³ Tinapucayare nuvaraha némechaheyare eta juca. Te jena sache tánehipa eta táitavi-rayare, tímerecavainapa ena achaneana ticaecahirahiana tayehe eta juca yátupiqueneana vicuchapaqueneanahi víti. Eta náitaresirahi éna, apanachucha eta tihapapiricavacahi eta náichirahi eta tamariqueneana najamurachaqueneanahi. ⁴ Ánina nacaheyarecacha: “Táicharacava eta juca ecuchapaquenehi. Vuíchahacaru machavahini ema Cristo, ímijachaquenehi tichavavaneyarehi. Vaipa tasuapacare eta machaviraya. Taicha puiti tacutirichuhi eta náitaresirainihi ena viáchucanaveánaini. Tanasirichuhi eta táepaniravahi acane eta apaquehe. Vahi táitsivachavahini” nacahepa.

⁵⁻⁶ Ena nani, vahi návarahahini napanerequeneha eta táitsivachiravahi maicha ema Viya. Jéhesare éma, eta acane, máechajiriruchucha eta máepiyasirahi tamutu eta anuma étapa eta apaquehe. Máechajiriruchuchavare eta táimeresiravahi máicha, eta tiájipahi tétupiecahi te une. Énerichuvare, te táequene, únehi eta náicuñahi máicha, macamirisirahi eta ichapequene tíquiva. Téricanahi namutu ena masuapajirairahanahi. ⁷ Numetacahé puiti: Ema Viya tiápechavayare máicuñacayare eta juca apaquehe. Yúcuayahisera eta tacamietiequenehayare tamutu eta anuma étapa eta juca apaquehe. Taicha éma, manacaripahi eta máechajiriruva, máicutichahi eta tayerevaya étapa eta távapahianahi. Jéhesare, te jena sácheayare, títaicavacayare namutu ena achaneana masuapajirairahanahi váinarajanahi.

⁸ Váhivare ecuemitisica, nuparapenaveana, eta matuparaqüihi ema Viya, vahi tácuti eta vituparesira víti achaneana. Éma, étana sache matuparacahi, vítisami mil áñoripa eta

vitupachirahi tayerevaipa. ⁹ Éma, manacahi eta juca tayerevahi, mavarairahi macuchapayare ena achaneana eta náeneuchiravayare mayehe. Vahi tácahequenénahini eta juca táitaresirahi maicha eta apaquehe. Ichapemuri eta macayeherahi paciencia eta viyehe, mamavarairahi vámutuhichaini vémitiequenehíni. Nararihísera ena achaneana téjcapavanahi te napanereruana. Eta náimairahi eta mayerevahi ema Viya eta máicuñasiravacayarehi, náimijachahi vaipa maratahaimahi máicuñaca eta juca apaquehe.

¹⁰ Esamanuchaha. Te táitecapapa eta sáchezare táitavirayare tamutu maicha ema Viya, vahi vinecapauchavaimahi, taicha tacutiyaere eta mayumurusirava eta máitesira mácani tíamerahi. Eta anuma, étapa tamutu eta távapahianahi, tamutuyare témitiaca. Ticaemayare muraca, tacutiyaere eta tacaemaira eta ichapequene yucu te ichape curiche. Étapa eta tíavihanahi te apaquehe, tamutuyarehi títava, énapa ena távapahianahi. Tamutuyare táijuchayare eta yucu.

¹¹⁻¹² Tásiha éti, écharipahi eta juca táitavirayarehi eta anuma étapa eta apaquehe, táijuirayare tamutu te yucu. Puítipa tacamunuipahi ámutuhini ésenicahini ema Viya, étaviuchahini eta iúrivahi eta ítaresirahi. Puiti, yátupi ávarahahini táitecapavanehíni eta jena sáchezare. Eyaseaca ema Viya táitecapavane. ¹³ Taicha viti machaneranaahi ema Viya, vicuchapainapa eta arairuyare anuma étapa eta arairuyare apaquehe, vícuchihi mayehe ema Viya. Tájinainapa eta pecatuana, vaipa tíhapapicahavímahi. Tétavicavayarehi eta táuriva.

¹⁴ Eta tacahe, némunaruqueneana nuparapenaveana, puiti eta eucuchapirayare eta juca tacaitsivairaya tamutu, étumechavayarechucha eta ecasiñairahi ema Viáquenu Jesucristo, apaesa tauri eta machimapiraheyare, tacuija etapiravainahi. ¹⁵ Échava yátupina eta macayeherahi paciencia eta viyehe ema Viáquenu taicha mavarahahi ticuchucuhahaviya. Étarichuhivare tacahehi eta máimiturapihi ema apana viparape vémunaruquenehi Pablo, táichavenehi eta máitupajijiasiravahi máijararuhi ema Viya. ¹⁶ Tamutu eta macartaneana máimiamareruanaahi eta eyehe, étarichuhi táechajisihahi eta júcana. Jararihísera ticajerahi eta ecaicutiarairainahini. Nararihísera ena tícaravahuana apaesachicha, vuíchahavare túmevacaimahi eta náehisirahi. Náequépicasamichucha eta táimiturapi eta macartane. Nahapapicavare eta táimiturapihi eta apana Escritura. Táimicuñacavacayaresera eta nahapapisirahi.

¹⁷ Eta tacahe, némunaruqueneana nuparapenaveana, vahi tacumapuruji eta ímatiequenehairahi eta juca, machu nahapapicahe eta epanereruana ena tivayuarahianatataji. Máchuvare náiminajicahe eta éhisirahi ema Viáquenu. ¹⁸ Puiti, nuvaraha tajurucapari-chuchaini eta ímatiraina ema Viáquenu Jesucristo. Tajurucaparichuchavaréni eta evapinairavahi eta máemunasirahehi ema Ticatiuchahavihi. ¡Tétavicavahini eta vijirauchira, vicunachahini éma, te vinarasirana, te véjamisirana! ¡Te visiapainapa eta mávasa, vímiyanavayare! ¡Amén!

Eta macartane ema Apóstole Juan, ticaijare 1 JUAN

Eta viúrujasira ema Jesucristo

¹ Nuti Juan nímiámareca eta juca nájure eta eyehe. Nuvaraha numetacahe éti, eta véchaquenehi mayehe ema Jesucristo, ema tíjaracahavi eta échájirirucava ticaitarecarahi. Éma, matiarihíhi acane te tépanavapa tamutu. Tacahe, tiúcupaicahi, tímerecavahi eta viyehe. Visamapa eta máechajiriruva. Camuri eta sácheana eta vímararasirahi éma te viúquiha. Vémamahaca te vivahu. ²⁻³ Éma, matiarihíhi acane, manasiqueneripahi mayehe ema Maiya. Tiúcupaicapasera eta viyehe. Víti vímatipa eta achánequenérahí éma. Tásiha, puiti vimetacahe eta juca vímahaquenehi étapa eta visamaquenehi. Vimetacahe taicha vivaraha iúrujicavahíni eta viyehe. Taicha víti viúrujicavahi mayehe ema Tata Vicaiyaquene émapa ema Machicha Jesucristo. Tásiha, éti apana iúrujicavahíni nayehe. ⁴ Tásiha, nucajurehe eta juca taicha nuvaraha yátupina eta iúrisamurevaina.

Eta majaraivahi ema Viya

⁵ Vimetacahe eta máimitusirahavi ema Jesucristo. Eta juca eta macayemaquenehi: “Jararihi eta tíjarahi mayehe ema Tata Vicaiyaquene. Tájina timapicuina mayehe, taicha mavayure eta máuriva”.

⁶ Tiúri, te vinasirichupuca víti te timapicu, tásiha te vicahehipuca: “Viúrujicava mayehe ema Viya”, tásiha víti vépiyahirahiripa. Vahi viúrujicavahíni mayehe, váhivare visuapahíni eta mavanairipiana. ⁷ Téhesera yátupina eta visuapira eta mavanairipiana, vinasirichuhi eta te majaraivahi ema Viya, tacutíhi eta manasiririchuhi éma eta te majaraivahi. Tásiha, eta vinasiririchuhi eta te majaraivahi, viúritarecayarehi eta viúrujiusiracaca nayehe ena vichamuriana. Énerichuvare máepachinachayare tamutu eta vicapecaturairana, taicha te tépenapa ema Jesucristo Machicha ema Viya, máepusaicahi eta máitine eta máepachinachirahivarehi.

⁸ Te vicahehipuca: “Tájina eta nupecaturaina”, tacahe, vahi vátupiemahíni eta vipaneruhi. Vítijiva vivayuaracavahi víti.

⁹ Téhesera vitupiruvahi eta vimetauresiravahi eta vicapecaturairana mayehe ema Viya, jararihiripa eta maperdonachirahavihi. Taicha tíjaracavahi éma eta maperdonachirahaviyare, vahi táefñamavacarehíni. Énerichuvare májahaya tépachinachahaviyare tamutu eta tamauriqueneana viyehe. ¹⁰ Téhesera vicahehipuca: “Tájina nupecaturaina”, vépiyaquenehahí ema Viya. Vímicutijiricapa ema máepiyahirahíni. Vahi tátupiruvahíni eta víjachapirainahíni eta máechajiriruva.

2

Ema Jesucristo, ema ticatajirahi

¹ Nuchichanaveana, nucajurehehi eta júcana taicha nuvaraha vahi eucapaturaini. Téhesera íchupuca eta pecatu, mararihi ema ticatajirahi viyehe te mamirahu ema Tata Vicaiyaquene. Ticaijare Jesucristo ema ticatajicahavirahi. Éma, matapiravare; tétavicava eta máuriva. ² Éma, tímicapacavahi táichavenehi eta macaepahairayarehi eta vipecurana apaesa viúri mayehe ema Viya. Váhiserá tácarichu eta vipecurana víti. Táimicapacahi éma eta macaepahairayarehi eta napecaturana namutu ena achaneana te juca apaquhe.

³ Tiúri puiti, vicasiñavahi eta vímatirahi ema Viya, taicha visuapahi eta mavanairipiana. ⁴ Te nararihipuca ena nácani achaneana nacahehi: “Núti nímati ema Viya”, téhesera vahi nasuapahíni eta mavanairipiana, tacahe náepiyevahi éna. Vahi tásuapacarehíni eta náechajiriruva. ⁵ Étasera eta visuapirahi víti eta mavanairipiana tímechahavihi eta víavahásirahi ema Viya. Yátupíhi eta vémunasirahi ema Viya. ⁶ Víti vicahehi: “Viávaháca ema Viya”, tásiha, tacamunúhi eta táurihíni eta vítaresirainahíni tácutihíni eta táurivahi eta máitaesirahi ema Jesucristo.

Eta mavanairipi ema Viya eta vémunasiracacaina

⁷ Nuparapenaveana, nuvaraha némechahe te juca carta eta macavanairipirahavi ema Jesucristo eta vémunasiracacaya. Te tépanavainapa eta ecaijuherahi ema Jesucristo, vímitucaheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi ema Jesucristo. ⁸ Puítirichu nuvaraha tápajucava eta ecaicutiarairaya eta máemunasirahavihi éma. Manasirichuhi éma te majaraiva ema Maiya. Tásiha éti, te

esuapa eta juca mavanairipi, te émunacaca, epauchainapaipa eta majaraiva ema Viya. Térjicavainapa eyehe eta timapicu.

⁹ Te nararihipuca ena nácani achaneana nacahehi: “Núti návihahi eta te majaraiva ema Viya”, téhesera nacatichahipuca ena nachamuriana, návirarichuhi te timapicu. Vahi napauchaimahi eta majaraiva ema Viya. ¹⁰ Nácanisera náemunacahi ena nachamuriana, nanasirichuhi te majaraiva ema Viya. Tásiha, tíurihi eta napaisirahi, apaesa vahi náejecapavahini. ¹¹ Énaser a na nácani nacatichahi ena nachamuriana, nanasirichuhi éna te timapicu. Vahi náechahíni eta napaisirayare eta náitaresira, taicha eta timapicu vahi táisapahíni náimairirichahíni.

¹²⁻¹⁴ Eti nuchichanaveana, nucajurehe taicha néchahi eta maperdonachiraheripahi ema Viya eta epecaturana émvavenehi ema Jesucristo, táichavenehivare eta ímatirapa ema Tata Vicaiyaquene.

Eti ávinaveana, nucajurehe taicha éti ímatihí ema Jesucristo, ema matiarhiquenehi acane te tépanavapa tamutu.

Eti átinaveana, énerichuvare nímiaturecahehi taicha tanasirichu iúnacahi te esamureana eta máechajiriruva ema Viya. Tásiha éta, tétumechahehi eta ecapaquechirairipahi ema Váinaraji.

¹⁵ Emutu eti, vahi ecujamuracha eta tamauriqueneana te juca apaquehe. Váhivare ecujamuracha eta tatiarhiqueneana tayehe eta juca apaquehe. Te nararihipuca ena najamuracha eta tamauriqueneana te juca apaquehe, vaipa émainahini náemunaca ema Tata Vicaiyaquene. ¹⁶ Taicha tamutu eta napanereruana ena achaneana te juca apaquehe, tájina táurivaina. Napanerechahi naicha eta tamauriqueneana. Najamurachaipa eta apayehe. Navarahaipa nacayehe náimijachaipapuca tíurihi eta náimairahi. Te ticaimahaqueneana, tisiñavanapa táicha. Eta juca napanereruana, vahi máijjararuinahini ema Tata Vicaiyaquene. ¹⁷ Numetacahe puiti: Títavainapaipa tamutu eta apaquehe. Énerichuvare títavainapaipa tamutu eta najamurachaqueneana ena achaneana. Vítisera, te visuapa eta mavarahaquene ema Viya, máichecuaraquiréna eta vítaresira.

Ena ticatianacana ema Cristo

¹⁸ Nuchichanaveana, puiti tiánehinapa eta táichecuraya, títavainapa tamutu. Vimetacheripa eta máitesirayare ema maca achane ticajare Ánticristo, ema ticatianacayare ema Viáquenu. Puítiripa nararihipa ena ticatianacanahi ema Cristo, navarahaipa máitecavane ema Ánticristo. Tásiha, véchainapa eta tiánehinapa eta táichecuraya tamutu. ¹⁹ Ena ticatianacana ema Cristo náuchurehi eta viyehé. Váhiser a víumurivainahini éna. Taicha te víumurivainahini, nanasirichuhini eta viyehé. Náerajiruvaipahisera eta viyehé. Tásiha, vímatipa eta vahi víumurivainahini.

²⁰ Ema Viáquenu Jesucristo tjaracaheripa éti ema Espíritu Santo. Tásiha, emuturipahi ímati eta yátupiqueneana. ²¹ Nucajurehehi táichavenehi eta ímatirahi. Nuvaraha ácaicutiaraque-nénahini eta yátupiqueneana. Te esuapa eta yátupiqueneana, vahi ácutimahi ena tépiyahirahiana.

²² Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús váhira émaina Cristo Machicha ema Viya” nacahehi. Ena nácani achaneana, ticatianacanahi ema Cristo. Tacuti eta nácahehini: “Váhira émaina yátupiquene Tata Vicaiyaquene, váhivare émaina Maiya ema Jesús” nacahepáini. ²³ Numetacahe eta apana: Nájina tiávahácanaimahi ema Tata Vicaiyaquene ena vahi nasuapahini ema Jesús eta machichairahi ema Tata Vicaiyaquene. Viávahácahisera víti ema Tata Vicaiyaquene vímutu víti visuapanahi ema Jesucristo eta machichairahi ema Viya.

Eta viávahásirahi ema Jesucristo

²⁴ Tásiha, ecapanereruyaréchucha éti eta máechajiriruva, tamutu eta esamaqueneanaripahi eta te tépanavainapa eta ecasiñairahi ema Jesucristo. Eta ecapanereruira eta júcana, iávahácayare ema Tata Vicaiyaquene émapa ema Machicha. ²⁵ Taicha tjaracavahi ema Jesucristo tjaracahaviya eta vítaresira máichecuaraquiréna.

²⁶ Puiti nararihi ena navarahayare tivayuaracaheana. Tásiha, nucajurehe apaesa ecuneuchava éti nayehe ena témejecapavarahiána.

²⁷ Éti, mávaháruheripa ema Espíritu Santo mavaneruhi ema Jesucristo. Tásiha, nájina apanaina ácamunuhini máimitucahehini, taicha tímitucahehi tamutu ema Espíritu Santo. Éna, yátupiquenehi eta máechajiriruva. Éna, vahi tépiyahirahi. Timetacahehi éma: “Ánasirichu iávahácahi ema Jesucristo”.

²⁸ Puítisera, nuchichanaveana, ímianava eta iávahásiraina éti ema Jesucristo apaesa túmesamurehéina éti, vahi ecutsirihá mayehe eta te machava. ²⁹ Éti échahi eta máetaviuchira

eta máurivahi ema Jesucristo. Tásiha, ímatiyare ena apamuriana machichanaveana ema Viya, táichavene eta náichirahi eta táuriqueneana.

3

Víti machichanaveana ema Viya

¹ Nuchichanaveana, tétavícava táramicareva eta máemunasirahavi ema Tata Vicaiyaquene. Yátupihí tímijarechahavihi “machichanaveana”. Puítiripa yátupiquenehi machichahaviripahi. Énasea ena apamuriana achaneana vuíchaha nácaicutirahíni eta macachichairahavihi ema Viya, taicha vuíchaha náimatihíni eta máemunaraivahi éma. ² Némunacasareana, vécharipa eta macachichairahavipa ema Viya. Vuíchahasea tímechahavi éma eta viúrivayare. Vécharipavare eta vicutirayare ema Jesucristo eta te machava. Taicha vímahayare eta máimahiquene éma. ³ Tásiha, vímutu víti vicunevayare eta vicutiraya ema Jesucristo, puítí vácuticaca viúrihíni tácutihíni eta máurivahi éma.

⁴ Nuvaraha némechahe: Namutu ena tisipecaturana, nacaticha eta mavanairipiana ema Viya, étara eta juca napecaturahi. ⁵ Ema Jesucristo, tájina matapiravaina éma. Vímatiripasea eta tímitecahi éma te juca apaquehe eta macaepahairayare eta vipecaturana. ⁶ Víti, te viávahácahi ema Jesucristo, tituparacahavi vaipa vicuimisiapava tayehe eta pecatuana. Énasea ena ticapecaturarahiana vahi náimatihíni ema Cristo.

⁷ Nuchichanaveana, vahi ecuisapava navayuacahe. Víti, te vímisiapavahi tayehe eta táuriqueneana, vímerezaya eta viúriava. Vicutinapa ema Jesucristo eta máetaviuchirahi eta máuriva. ⁸ Te náimisiapava ena apamuriana tayehe eta tamauriqueneana, éta tímereuchavacahi eta machichairavacahi ema Váinaraji. Taicha ema Váinaraji, ema tinacuchahi táquenuhi eta pecatu. Numetacahe eta apana: Ema Machicha ema Viya tímitecahi eta macaepahairayare eta majarareruanahi ema Váinaraji.

⁹ Víti machichahaviripa ema Viya. Váipa vímisiapavaimahi tayehe eta vicapecaturairana taicha vicutinapa éma eta tamajinairahi matapiravaina. Éma, tájina mapecaturaina. Eta macachichairahavihi ema Viya, vahi vicapecaturaimahi. ¹⁰ Nácani vahi tíchanahi eta táuriqueneana, váhivare náemunacahíni ena nachamuriana, náimerecahi eta vahi machichavacainahani ema Viya. Tímerecavanahivare eta machichairavacahi ema Váinaraji. Vítisera, eta víchirahi eta táuriqueneana, étapa eta vémunasiracacahi, vímerezavahi eta macachichairahavihi ema Viya.

Eta vémunasiracaca

¹¹ Te tépanavainapa eta ecasiñairahi ema Viya, vimetacahehi eta mavarairahi eta vémunasiracacayare. ¹² Tásiha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetaviuchirahi eta mavainarajivahi. Ema maca Abel, táimicapacahi eta masuapajiraivahi, máichirahi eta táuriqueneana. ¹³ Nuparapenaveana, énerichuvare puítí nararihiya ena achaneana ticatichaeanayare éti apana. Váhiserá ecurami eta juca.

¹⁴ Nuparapenaveana, véchahi víti eta viápechiravaya vítareca te táequenéraya eta vépeniraya. Vicaijuhenapa eta vítaresiraya máichecuaraquireya. Véchahi eta juca, táichavenehi eta vémunasirahi ena vichamuriana. Énasea ena vahi náemunacahíni ena nachamuriana, nanasirichu. Vahi tíuchuchanaimahi tayehe eta náepenira. ¹⁵ Namutu ena ticatichanahi ena vichamuriana, nacutíhi ena ticapahiana. Eta náichararacavayare ena ticapahiana, véchahi eta namauchucuirayare. ¹⁶ Ema Jesucristo tímechahavihi eta máemunasirahavihi, taicha tjaracavahi tépna vítívenehi. Tásiha víti, te jácani táichararacava, tituparacahavi víjaracavayare vépna énavene ena vichamuriana, vímechiraya eta vémunasiracacahi. ¹⁷ Te mararihi ema mácani achane ticaimahaquenehi, te vahi achánesamurénahi mayehe ema machamuri eta macaijuherahi, ema maca váhivare máemunacahíni ema Viya. ¹⁸ Nuchichanaveana, vémunacacachucha vicajicaca eta vicayehequeneana. Vahi vicúyacujiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

Vicasínavaya te mamirahu ema Viya

¹⁹⁻²⁰ Tásiha, eta te vémunacaca, véchahi eta yátupirahi machichahavi ema Viya. Téheserapuca tipicacararacavahi eta visamure, vicaesamiricayare eta visamure, taicha ema Viya tímahahavihi eta vicasíñairahi eta majapanuirahavihi. Taicha majapanurahiquenehi éma. Téchahi tamutu. ²¹ Tiúripána, némunacasareana, te tájina eta tapicacararasiravaina eta visamure. Tásiha, vahi vipicaimahi eta viyasearapianaya mayehe ema Viya. ²² Vicasíñavainapa eta májjarasirahaviyare tamutu eta viyasearuanahi, taicha visuapahi eta mavanairipiana, vicurisamurechahi ema Viya. ²³ Eta juca mavanairipianahi: “Ecasíña ema Nuchicha Jesucristo, énerichuvare émunacaca”. Tacahehi eta mavanairipi viyehe. ²⁴ Te

visuapa eta mavanairipiana, viávahácahi éma, énerichuvare éma tiávahácahaviya. Véchahi eta matiarihirahi éma Viya eta viyehe, máicha éma Espíritu Santo mavaneruhi éma.

4

Ena mávaháruana éma Espíritu Santo énapa éna mávaháruana éma Váinaraji

¹ Némunacasareana, ecuneuchava nayehe éna tépiyacavana ticametarairuana. Taicha puiti nararihi éna. Vahi mavaneruanaina éma Viya, váhivare mávaháruanaina éma Espíritu Santo. Tásiha, te náitecapauchepuca éna návaraha tímitucaheana, éti eyaseresinavaya te yátupipuca vanairucana me Viya. Esamayare te étarichupuca éta vímiturapianahi víti. ² Éta juca éta ímatiarayare éna mávaháruana éma Espíritu Santo te nacahehipuca: “Éma Jesucristo yátupiquenehi achane éta máuchusirahi”. ³ Énasera éna apamuriana, te náñauchahipuca éta yátupirahi achane éma Jesucristo, vahi mavaneruanaina éma Viya. Éna, ticatianacanihi éma Cristo. Vimetacaheripa éta náitesirayare éna ticatianacana éma Cristo. Tiuri, puítrichu nararihipa ani viyehe.

⁴ Nuchichanaveana, éti machichahe éma Viya. Néchahi núti éta emaisapiravahi tivayucaheana taicha mávaháruhehi éma Espíritu Santo. Éma, túmepanahi mayehe éma Váinaraji, náehiruhi éna nani tivayuarahiana. ⁵ Éna nani, tahapapiricavacahi éta tájiparacana tayeheana éta apaquehe tauriqueneana. Tásiha, éna achaneana máehicarahanahi éma Viáquenu náuricaipa náitecapauchavaca. ⁶ Vítisera machichahavihi éma Viya. Tisamararacahaviana éna tímátiana éma Viya. Énasera éna apamuriana máimatirahana éma Viya, vahi tíúrimahi éta nasamirahavi. Tásiha, tímaticareanaya éna mávaháruana éma Espíritu Santo. Énerichuvare tímaticareanaya éna mávaháruana éma Váinaraji.

Témunarahiquene éma Viya

⁷ Némunacasareana, tacamunu éta vémunacaca vámutu. Taicha éma Viya tímítucavahihi éta vémunasiracacaya. Vimutu víti vémunacacanihi, énapa tímereuchahavihi éta macachichairahavihi éma Viya, yátupihí éta vímatirahi éma. ⁸ Énasera éna nani vahi témunacacana, vahi náimatihini éma Viya. Taicha éma Viya, yátupiquenehi éta máemunaraiva. ⁹ Éma, tímechahaviripa éta máemunasirahavihi, éta mavanésirahi éma macarichuquene Machicha. Mavanecahi títeca te juca apaquehe, tújacahaviyare éta vítaresirayare máichecuaraquirénapa. ¹⁰ ¡Tétavícava éta máemunasirahavihi! Vítisera vahi vítivainahíni vémunaca éma Viya. Mativahi éma témunacahavihi. Éta máemunasirahavi éma Viya, májjaracahi éma Machicha. Mavanecahi tépenayare te crusu étavene éta macaepaharayare éta vipecaturana.

¹¹ Némunacasareana, máetaviucha éta máemunasirahavi éma Viya; tásiha, vítipa tacamunu éta vémunasiracacáina. ¹² Nuvaraha ácaicutiara éta juca: Nájina tímahaina éma Tata Vicaiyaquene. Téhesera víti, te vémunacacapuca, tiávahácahaviya éma. Tásiha, vicutihí éma Viya éta máemunaraivahi éma.

¹³ Puiti, víti viávahácahi éma Viya, énerichuvare tiávahácahavihi éma. Véchahi éta mávahásirahavihi éma Viya, máichavenehi éma Espíritu Santo mavaneruhi éta viyehe. ¹⁴ Tásiha, víti vicachaneanaripa éma Jesús, vimetacavacapahi namutu éna vímanaruanapahi éta máucupaisiraipa te anuma, taicha vívaraha náimatiyare namutu éta mavanésirahi éma Viya máiteca éma Machicha ticatiuchahaviyare vímutu víti achaneana te juca apaquehe. ¹⁵ Tacahe, te nararihipuca éna nacahehi: “Éma Jesús machichara éma Viya”; tásiha, tímaticareanahi éna, mávaháruanahi éma Viya, énapa éta návahásirahi éma.

¹⁶ Víti véchahi éta yátupirahi máemunasirahavihi éma Viya. Éta tacahe, vicasifnavahi éta mayehe. Témunarahiquene éma. Tásiha, víti apana, te vémunarahipuca, viávahácaya éma Viya; éma apana, tiávahácahaviya. ¹⁷ Vétaviuchaya éta vémunasiraya éna vichamuriana taicha éta viávahásirahi éma Jesús. Tásiha, vahi vipicaimahi éta jena sácheyare te víyanapa te mamirahu éma Viya. Vahi vipicaimahi taicha machichahavihi éma Viya, vicutihí éma Jesús éta macachichairahi éma Maiya, tayanapanepuca vítarecarichaha te juca apaquehe.

¹⁸ Éna apamuriana achaneana tipicaracavanahi taicha téchavanahi éta nacaicuñairaya. Vítisera vahi vipicaimahi taicha vicasifnavahi éta máemunasirahavihi éma Viya. Te yátuphipuca vicasifnahi, macaesamiricaya éta visamure éta vipisira. Tásiha, nácani tipicanahi, napicahi taicha vahi nácasifnavahini éta máemunasiravacahi éma Viya.

¹⁹ Víti vémunacahi éma Viya taicha éma mativahi témunacahavi. ²⁰ Te nararihipuca éna nacahehi: “Víti vémunaca éma Viya”; téheserapuca nacatichaichucha éna nachamuriana, éna tépiyahirahianahi. Taicha náimahanénipuca éna nachamuriana, váhisera náemunacahini, éne tacahehi éta namaemunasirahi éma Viya máimahasiquenehi. ²¹ Éta juca éta mavanairipihí viyehe éma Viya: “Émunacanu nuti yátupiquenehi Viya; émunacavare éna echamuriana”.

5

Virataha vínajica eta tamauriqueneana

¹⁻² Yátupihí eta macachichairahavipa ema Viya vimutu viti visuapanahi ema Jesús eta émairahi ema Cristo. Tásiha, vémunacarine ema ticachichahavihi. Tásiha, te vémunaca ema Viya, téhepa visuapa eta mavanairipiana, tituparacahavi tacutiyaieichu eta vémunasiraya namutu ena vichamuriana, taicha machichanaveanahivare éna, viparapenaveanahi te mavahuana ema Viya. ³ Étavene eta vémunasirahi ema Viya, visuapaya eta mavanairipiana. Taicha vahi táyacujicarehini eta visuapiraya eta mavanairipiana. ⁴ Tásiha, viti machichanaveana ema Viya viratahaya vínajica eta tamauriqueneana eta vítaresiraya. Taicha tímecatadahaviripa ema Jesús táichavenehi eta vicasíñairahi eta mayehe. ⁵ Viti visuapahi eta yátupirahi Machicha ema Viya ema Jesús. Tásiha, viti véhicanahi éma, vicarichuhí viti virataha vínajica eta tamauriqueneanahi eta vítaresira.

Ema Jesucristo, Manerejiruhi ema Maiya

⁶⁻⁸ Te títécapa ema Jesucristo, tímerecavapa te juca apaquehe, une eta macaicachasiyahi. Énerichuvare eta máitine máepusairuhi eta máepenirahi te crusu. Tásiha, te vímatiequeneha eta macaicachasirahi te une, étapa eta máepusaisirahi eta máitine, témechahaviripa eta manerejiruichuhi ema Maiya. Eta une étapa eta máitine témechahavipa ema Jesús eta émairaquenehi Cristo. Ema Espiritu Santo, émapa títámetacahavi. Taicha ema Espiritu Santo yátupihí eta mametarapiana. Eta une, eta máitine, émapa ema Espiritu Santo, eta juca mapanaquene témechahaviripa. Ticuticacahi eta tacayemaqueneana. ⁹ Tacutihi eta masuapacareva ema mácani achane tiuri. Tiápajucavasera tasuapacarevapana eta mametarapiana ema Viya mayehe ema Machicha. Ánipa macahe: “Émara nuchicha, némunaruquene ema maca”. ¹⁰ Tásiha, te vicasíña ema Machicha ema Viya, visuapava vicasíñava te visamure eta yátupirahi eta mametasirahi ema Viya. Ena apamuriana vahi nasuapahini ema Viya, náimicutichapa máepiyahirahihíni ema Viya, taicha vahi nasuapahini eta mametarapianahi mayehe ema Machicha. ¹¹ Étarichuvare eta juca eta mametasirahi ema Viya, eta máijarasirahaviripa eta vítaresirayare máichecuarquirénapa. Ema Machicha ema Viya, éma téchahi eta vítaresira. ¹² Ena ticasíñanayare éma, títaecanayare. Énasera nácani vahi ticasíñanahi ema Machicha ema Viya, vahi titarecanaimahi.

Eta vítaresirayare máichecuarquireyare

¹³ Tiuri, némunacasareana, nuvaraha échayare eta ítaresirayare máichecuarquirénapa, taicha ecasíñahi ema Machicha ema Viya. Eta tacahehi eta nucatureirahehi.

¹⁴ Tásiha, tájina táefnamavacarehini eta viyasearuanahi ema Viya, taicha véchahi viti eta masamirahavihi, taicha eta viyasearapiana tásihaqueneanahi eta vímatiequenehairahi eta mavarahaquenehi ema Viya. ¹⁵ Tásiha, véchahi eta máijarasirahaviya tamutu eta viyasearuana, taicha véchahi eta tasamacarevahi eta viyasearapianahi eta mayehe.

¹⁶⁻¹⁷ Tamutu eta tamauriqueneana náichahi ena achaneana, ema Viya máimijarechahi “pecatuana”. Jararihi eta pecatuana tíñehipana mayuchaticavaneya ema Viya eta vítaresira táicha. Jararivare eta apana pecatuana váhirichu tíñehicha. Te mararhipuca ema mácani vichamuri ticapecaturarahi, eta váhirichu tíñehicha eta máepeniraina; te ímahapuca eta macapeaturairahi, éti eyaseuchaya éma, mayehe ema Viya. Tásiha, ema Viya máijarayare eta máítaresirayarechaha ema ticapecaturarahi. Téhesera mararhipuca ema mácani ticapecaturarahi eta tíñehipana mayuchaticavaneya ema Viya eta máítaresira, vahi nuvanecahe eta eyaseuchahini ema maca achane ticapecaturarahi.

¹⁸ Vecha eta vahi vímisiapavaimahi tayehe eta vicapecaturairana viti machichanaveanahi ema Viya. Taicha ema Machicha ema Viya tjanecahavihi vimutu viti. Vahi maratahaimahi ticaetemahavi ema Váinaraji.

¹⁹ Taicha véchahi eta macachichairahavihi ema Viya. Váhisera vámutu. Nararihihi ena apamuriana achaneana machaneranahi ema Váinaraji.

²⁰ Vítisera véchahi eta máitesirahi eta te juca apaquehe ema Machicha ema Viya. Éma tímítupanahavihi. Émavenehi témesenicahavihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa viti ema yátupiquenehi Viya. Émara ema macarichuquenehi yátupiquenehi Viya. Éma, tjaracahaviya eta vítaresiraya máichecuarquirénapa.

²¹ Nuchichanaveana, vahi ecucasiñaraji; vahi ecucuti ena achaneana ticasíñarajiana eta achanemirana.

Tamutupa eta juca néchajiriruvanahi eyehe.

Eta macartane ema Apóstole Juan, ticajare 2 JUAN

Eta vémunaraivaya

¹ Nuti Juan, viyarahana, nucajurevi eta juca nucartane piti ati. Néchajicavi piti manerejiruhi ema Viya. Énerichuvare némechajirisihavaca ena pichichanaveana. Eti némunaruhequenehi núti, tacuti eta náemunasiravaca namutu ena apamuriana títucana tisuapana eta yátupiquene máechajiriruva ema Viya. ² Viti vémunacahe taicha viciticacahi eta visuapira eta yátupiquene máechajiriruva ema Viya. Máichecuaraquirénapa eta visuapiraya. ³ Nuvaraha macatajicahehíni íchape ema Tata Vicaiyaquene, émapa ema Jesucristo, Machicha ema Viya. Nájapanuhehíni, nájaracahehíni eta táurivaina eta epanereruana, taicha yátupiquenehi eta náemunasirahehi.

⁴ Núrísamureinehi eta néchirahi eta nanerejisiravahi ena pichichanaveana, tíurihi eta náehisirahi eta yátupiqueneanahi, tímiyanavanavare eta nasuapirahi eta mavanairipiana eta viyehe ema Tata Vicaiyaquene, taicha ene vicaheyarehi.

⁵⁻⁶ Tiuri puiti, ati, nucajurevi, taicha nuvaraha némechavi eta juca mavanairipi ema Viya, étarichu eta vémunasiracacayare vimutu. Te vémunaca ema Viya, visuapaya tamutu eta mavanairipiana eta viyehe. Te tépanavainapa eta vicasiñairahi ema Viya, tivanecahaviripahi eta vémunasiracacayare. Tásiha puiti, eta ecaheyare eta émunasiracacairayare eta itaresirayare.

Ena tivayuarahiana

⁷ Nuvaraha némechavi eta juca, taicha nararihi te juca apaquehe te viávihihi ena navarahahi ticaetemaheanaya. Ena nani, vahi návarahahíni náimicaeheráchahíni eta máuchusirahi yátupiquenerahi achane ema Jesucristo. Ena nani, tivayuarahianahi, ticatianacanahivare ema Cristo. Vahi návarahahíni véhica éma. ⁸ Tásiha, ecaunevayare tayehe eta navayuarapiana. Échapavachucha éti, machu nacamitísicahe tayehe eta ícuchihi ématanevachahi. Nuvaraha ejaçapayare tamutu.

⁹ Viti visuapahi eta máimiturapiana ema Cristo, viti viávaháçahi ema Tata Vicaiyaquene émapa ema Machicha. Váhisera návaháçaimahi ema Viya náçani vahi návarahahíni nasuapa eta máimiturapiana ema Cristo. Tasapihapa, náimituçahi eta nayehechiravarichu eta napanereruana. ¹⁰ Tacahe, te náitecapauchahepuca te iúrujisiavahi ena náçani, téhesera vahi nacuechajísiha eta máimiturapiana ema Cristo, tasiha, vahi ecujachapa te epenana. Váhivare ecuichuha: “Yare, ani, ítecapauchanu” vahi ecuquicha éna. ¹¹ Taicha te íchapuca eta juca, ticutinapupuca eta étarichuhi nachamuriana ena tivayuarahiana. Váhira ecuimi-siapava nayehe, máçhura étaina etapiravaina eta juca náichirahi éna eta tamauriqueneana.

Eta táichecuaraqui eta macartane ema Juan

¹² Tiuri, júcaríhi apamuri eta numetaruheanaya. Vuíçahasera numetacahemahi puiti te juca carta. Taicha nucunevahi eta nítesiraya eyehe apaesa véchajiricavainapa eta vímanajiriracacayare. Tásiha, viúrisamurénapa vimutu.

¹³ Téçhajicaviana ena suchichanaveana esu péçhavi, ésurichuvare manerejiruhi ema Viya. Tamutupa eta juca néchajiriruvahi eyehe.

Eta macartane ema Apóstole Juan mayehe ema Gayo, ticajare 3 JUAN

Ema Juan macunacha ema Gayo

¹ Nuti Juan, víyarahánupa, nucajurevi piti némunaruquenehi Gayo. Núti yátupihí eta némunasirávihí.

² Némunaruquene, nuyaseuchavíhi me Viya táurivaina eta pémataneana. Énerichuvare nuyaseuchavívere táurivaina eta pítaresira, tácutini eta táurivaipa eta piáchaneva. ³ Tétaví-cavahí eta núrísamurevahí, te títecapanapa ena víchamuriana, taicha tímecacuanapa eta písupiráhi, péhisiráhi eta yátupíqueneana echájirirucávana mayehe ema Cristo. ⁴ Tájinarínehi tácuti eta núrísamurevahí taicha eta nusamairírísiraparacahí eta éhisiráhi eti nuchichanevana eta yátupíquene echájirirucava mayehe ema Cristo.

⁵ Némunaruquene, tájina táichavahí eta pijacapiráhi péchapajírísiráhi ena víchamuriana, váhinéni pímatíquenevacáinahíni éna. ⁶ Te títecapanapa ani te víúrújsiavahí, tímecachavíanainapa. Tájina táichava eta piúríva, pímicatasiravacahí eta nayaníra ena víchamuriana. Eta pícaheyare pímiyanaváini eta piúríva nayehe, taicha eta juca víchiráhi tacurísamurechayare ema Viya. ⁷ Taicha éna, táimipaícahí eta nacametaráiruirahí eta tíuri echájirirucava mayehe ema Jesucristo. Eta napaisiráhi, tájina nayaseserecapahíni éna nayehe ena achaneana masuápajírárahánaríchaha. ⁸ Tásiha, tavarahaichu eta véchapajírícavaca ena nani, apaesa eta vímicatasihaya éna eta nacametaráiruiraya eta yátupíquene tíuri echájirirucava.

Eta mampurivahi ema Diótrefes

⁹ Nucajurerípa ena píchamuriana te piávíhahí. Mararíhisera ema Diótrefes. Éma máurica ticainapupuiríca te namirahu ena achaneana. Éma, vahí masuapa eta vítuparahana. ¹⁰ Tásiha, te nutiaríhinapa eta ara eyehe, núti nítametacaheyare tamutu eta máichaqueneana. Éma, téchajícahí eta víyehe. Cátíchacarehí eta máechajírírúvana, váhisera másuapacarehíni. Váhívere tácaríchu eta juca máíchahí. Éma, vahí majacapai mahí ena víchamuriana típaicanahí. Te natiaríhi ena navaraha najacapa, ema maca macavanairípi nacuíja nacujacapa. Énerichuvare mavaraha macaerájica te emuri ena tívarahana najacapa.

¹¹ Némunaruquene, vahí pícuícutípa ena tíchanahí eta tamauríqueneana. Pícutiyaresera ena tíchanahí eta táuríqueneana. Taicha víti víchana eta táuríqueneana, víti machichanevana ema Viya. Énaserá ena tíchanahí eta tamauríqueneana, éna, vahí náimatíhíni ema Viya.

Ema Juan macunacha ema Demetrio

¹² Nutuparacaví pijacapayare ema Demetrio. Namutu nacunacha éma, taicha yátupíquenehi táuriva eta mayeherepi. Núti apanavare énerichuvare nucunacha eta máuriva. Pítí pímatínúhi, eta tatupírúvahí tamutu eta néchajírírúvana.

Eta táichecuaraqúí eta macartane ema Juan

¹³ Tíuri, jucaríhi apamurí eta numetaruvíanayare. Vuíchahasera numetacavímahí puití te juca cartá. ¹⁴ Nútíjapainapasera eta ara píyehe apaesa nímahaví. Tásiha, véchajírícavainapa eta vímanasírácacayare.

¹⁵ Puití, nuvaraha májjaracavíní ema Viya eta piúrívaina tayehe tamutu eta pípanereruana. Téchajícaviana ena piájíríareana. Tásiha, péchajísínanu émanapachuína ena nájíríareana núti.

Tamutupa eta juca néchajírírúvahí píyehe.

Eta macartane ema San Judas, ticajare JUDAS

¹ Nuti Judas néchajicahevaca emutu eti nuparapenaveana nuchamurianahi. Núti mavanerunuhi ema Viáquenu Jesucristo. Éti ímatíhi ema nuparape Santiago. Núti nucajurehevaca eta juca nucartane taicha eti apanavare machanerahepa ema Tata Vicaiyaquene, taicha esuapahi eta máichuarapihi. Tétavacavahi eta majaneasirahehi táichavene eta iúrujiasirahi ema Machicha Jesucristo. ² Puiti, nuvaraha tajurucaini eta evapinairavavacahi eta máemunasirahehi ema Viya, étapa eta majapanuirahahi; tájinavare tahapapiricahini eta táuriva eta epanereruana.

Yátupiyare eta náicuñayare ena tivarahanahi náemejecapavacha ena vichamuriana

³⁻⁴ Tétavacavahi eta nuvarairahi nucajurehe emutu éti, nétumechaheyare eta éhisiraina ema Viáquenu Jesús. Púitiserá nusamairiricapa eta náimisipiravahi eta eyehe ena nácani tépiyahirahiana tímijachavanahi vichamurianahi. Tásiha, nuvaraha ecuneuchavaya nayehe. Étumechacaca, vahi ecusuapavaca ena nánitátajiana, machu náemejecapavachahe. Táimiyana tauri eta éhisiraina eta véhiruhi. Taicha ena víyarahana apóstoleana tímítucahavianahi eta máimiturapiana ema Viáquenu Jesucristo. Tásiha, vahi táuricahini vihapapiricahini. Énaserá ena nani tépiyahirahiana, tétavacavahi eta namapicauravahi eta me Viya. Éna tímijachavanapa eta vahi máicuñacavacáimahi eta náichira tamutu eta tájiparácana taicha tétavacavahi eta máemunasiravaca. Tavetijipa tínemahipanapa jararihiva eta náimiturapi, ánipa nacahe: “Vahi tipicauchacare ema Jesús, váhivare táuricahini vácahehi émara Viáquenu. Te échajisihapuca éma, tatupiruvachucha ‘Jesús’ íchayare, taicha vahi émaina téchahavi víti” tacahehi eta navarahaquene éna. Máimahainepasera ema Viya eta náicuñayare éna, taicha nacaevacaipa eta mametarapi ema Viya: “Muracaquenema eta náicuñayare namutu ena ticaecahinuanahi eta némunasiravacahi”.

⁵ Németeaca éti écharipa eta náichararacavahi ena viáchucanaveanaini israelítana eta náuchusirapa te avasare Egipto. Nuvarahasera némechahe émahí ema Viáquenu ticuchucuhavacahi namutu éna. Téhesera te táequenepa, tétavacavahi eta namasuapajiravahi ena namutuyaréni. Tásiha, máitapaimuríhapa ena masuapajirairahanahi. ⁶ Énerichuvare némechahe eta náichararacavahi ena ángeleana masuapajirairahanahi. Ena nani aquenucarahanaini te anuma, sántuanainíhi. Tímisiapavanapasera tayehe eta tamauriqueneanahi. Tásiha, ema Viya macavanairipipa eta náiyaracuha ena ángeleanaini téjacapavanahi eta te timapicu inferno, nacaerataiyahi. Púiticha váhiquene títurucavanaimahi tíuchucana. Te jena sáchezare mayaseseresihaya ema Viya, muracayare eta náicuñayare namutu éna.

⁷ Échahivare eta náichararacavahi ena achaneana ticavasani te apinaquene avasare Sodoma étapa eta Gomorra, étapa eta avasarechichana te tachacayanahi. Éna, tétavacavahi eta tavayuchiravacahi eta náesenamarevana. Navetijipa ena tivehacacana ajairacana. Tacutiya eta tájahúchiravahi eta máemecharesiravacahi ema Viya ena ángeleanaini, macamiricahi eta yucu, tájuchavacapa namutu ena nani achaneana váinarajiqueneana. Eta juca tavaraha yátupina vicaicutiarahi tayehe eta nacaíñairavacayare eta te yucu inferno namutu ena tichanahi eta tamauriqueneanahi. Máitavacacainapa eta nacatajivairaya. ⁸ Táitusiava, vahi náechavahini ena nani tímisiapavanahi eyehe. Navayucharichucha eta náechipejisirahi eta náquehe taicha tétavacavahi eta tavayuasiravacahi eta natuhusivana. Ena nani tépuruanahi ema Viáquenu eta émairahi téchavacahi. Nacaecahivare ena ángeleana tiámána eta majaravahi ema Viya. ⁹ Vahi táurihini eta juca. Nuvaraha némechahe eta jena sache máepenirahi ema víyarahaini Moisés, ema Váinaraji mavaraha mámayarehini eta máquehe. Ema Váinaraji macanarapa ema Arcángele Miguel, mavaraha máimiyusemaca. Váhisera masemahini ema Miguel. Váhivare macajacharecahíni. Ánipa máicha: “Páurevisami píti. Pímahaya eta pícharacavayare maicha ema Náquenu” máichapa. ¹⁰ Énaserá ena nánitátajiana achaneana, vahi napicaurahihini. Tjjaracavana nacaecahi jácani tájahánapuca váhinéni náimatiequeneha. Éna nacutihi eta sárareana. Tinicanahi, téranahi, esenamareanahi. Nájina tatsiriháquenénahi. Étapa tímicuñacavacaya.

¹¹ ¡Páureanasami ena nani! Muracayare eta náicuñayare te yucu, taicha nacutihi ema Caín eta mamasuapajiravahi me Viya. Nacutivare ema Balaam ema témejecapavacachavacahi ena achaneana eta mavarairahi eta plata. Nacutivare ema Coré ema tépuruhi ema mavaneruhi ema Viya. Étapa tiviuchahi eta macapasirahi ema Viya. ¹² Tétavacavahi eta

natsirihacarevahi eta náimisiapiravahi te iúrujisiravana eta énisirana ena echamuriana. Taicha éna, tájina napicauchaquenéháini eta náurisamureravahi te nanisirana, náerirana. Éna, navarahahi epicauchavacayare éti, navairahi ticaetemajiricaheana. Ena nánitátajiana nacutihi eta úcájiana te ichape sácheréhi. Ticutimahi tiquivayarehi. Tétaticavachuchasera eta támapahi. Tájina taquivahini. Nacutivare eta yucuquiana máhiquireana te ticahipaipa eta apamuriana yucuquiana tachamuriana. Tamapuruji eta vicuchapirahi eta náichirahi eta táuriqueneana taicha nactivare eta yucuquiana tájiqueruana vinereruana, tépurihapa. Váipaquene tímarucaimahi. ¹³ Éna, nactivare eta táepacuruha eta une te tétaticavapa muraca eta ichape une, camurihi eta tarisasama. Tétavicavahi eta tatsirihacarevahi eta náichaquenehi eta támaraiqueneana. Nactivare eta jarariquiana tiyejerecavana. Jararihsera eta nacaicuñaiyayare eta ichapequene timapicu. Máitavacacayare eta nanasirayare.

¹⁴⁻¹⁶ Ena nánitátajiana, tétavicavahi eta nacaecahirahi tamutu. Étachucha natanuahi eta najamuraraivana. Ticasiñavavaicana eta náechajirisiravana. Nacunachahi ena ticaimahaqueneanahi, navairahi nacaetemajiricavaca éna. Ticaicuñayaresera, taicha ema víyahaini profeta Enoc acane máimaha te mavapure eta náicuñayare éna. Ánipa macahe: “Nímahahi te nuvapure eta máitecapirayare ema Viáquenu te juca apaquehe. Mámayarepahi namutu ena mayeheana ángeleana. Tétavicavahi eta nasimutuvahi. Nacuru-jicavacayare namutu ena ticapecaturarahiana. Náimerecayareva tamutu eta naviurevana ena achaneana váinarajiqueneana, taicha tétavicavahi eta náichirahi eta támaraiqueneana. Navetijinapa ena ticaecahirahiana me Viya, ichapepanainapa eta naviureva” macahepa. Tétavicavahi eta masuapacarevahi ema víyahaini Enoc, taicha mámariequenehi ema Adán, sántoquenehivare éma.

Ena Judas matuparacavaca ena machamuriana

¹⁷ Nuvarahavare némechahe, eti nuchamuriana némunaruqueneana, eta nametarapi ena víyahana apóstoleana mayeaneanahi ema Viáquenu Jesucristo. ¹⁸ Ánipa macahe: “Vahi táyerémahi eta náuchujisirayare ena ticaecahirahiana tayehe eta táuriqueneana máimiturapiana ema Viáquenu. Váhivare návararaháini nánajica eta támaraiqueneana” nacahepa. ¹⁹ Puiti numetacahe: Natiarihipa puiti ena ticaecahirahiana. Timaticareana éna, taicha navaraha náiputicavaca ena vichamuriana. Étachucha natanuahi eta najamuraraivana. Éna, vahi návaraháini émainahíni máechavachahini ema Espíritu Santo.

²⁰ Étisera némunaruqueneana, étumechacacaya eta éhisirahi ema Viáquenu, taicha tétavicavahi eta tasantuvahi eta véhiruhi. Ísapavayareva tímitucahe ema Espíritu Santo eta eyujarauchirana. ²¹ Tauri eta itaresira, vahi ecuemitisicavahini eta táetaviuchiravahi eta máemunasirahéhi ema Viya. Váhivare ecuyacujihini eta ecuchapirahi eta jena sácheyare táepaniravaya eta vítaresira. Máitavacacayare eta vítaresiraya taicha eta majapanuirahavihi ema Viáquenu Jesucristo.

²² Étumechayare ena echamuriana nácani tipanerechanaripa náehica ena tivayurahiana. ²³ Ena apamuriana, ena téhicanaripa eta náepiyahiráivana, epamicayare éna apaesa tachava eta náehisiraina yátupina ema Viáquenu. Ecuchucuhavacayare te náejecapiravana, tacuti te vicuchucuhahi eta viyereruvana te tjáhúchavapuca tiju eta vipena. Ejanapayare nácani muracaripahi eta náejecapiravanahi. Ecuneuchavasera, machu napareacaye eta náejecapiravana, taicha tétavicavahi eta támaraiva. Epicayare éta.

Tétavicava eta vicunachirahi ema Viya

²⁴⁻²⁵ Ena Viya, tétavicava eta máitupajjiasiravahi. Macarichuhi éma maratatah ticatiuchahavi tayehe eta vícuchihini vícuñayarehini, taicha mavanecahi máepeninahaviya ema Machicha, ema Viáquenu Jesucristo. Puiticha tétavicavahivare eta majaneasirahéhi éti apaesa vahi euaquipaicavahini tayehe eta pecatu. Taicha mavarahahi máepachinchayare eta iáchanevana, tacujahivaréni eviurevaina eta mámirahayare te mamirahu te jena sácheyare. Tétavicavainapa eta iúrisamurevaya te ímahapa eta majaraivaquenehi. Acane nacunachanahi ena ángeleana. Énerichuvare víti, tétavicavayareva eta vicunachiraya éma vimutu víti, taicha tétavicavahi eta máramicarevahi taicha ichapequenehi eta máitupajjiasirava. Vépuymiraucha eta víjarasirava visuapayare. Máitavacacayare eta vitsiusirayare éma. Amén.

Eta mametacasivanahi ema Apóstole Juan te mavapure, ticajare APOCALIPSIS

¹ Ema Tata Vicaiyaquene mavarahahi tímimatchahaviyare eta tájjahúchiravaya táicharacavayare eta apaquehe, apaesa vecha viti mavanaranahi. Ema máimechahi eta juca, ema machicha Jesucristo. Tásiha, ema Jesús mavanecapa ema ángele tímეტacanyarehi nuti Juan mavanarahi. Eta tacahe, nájuchahi puiti eta juca apaesa écha éti apanavare eta táichararacavayare. ² Tacuti eta yátupihí eta nucametarairuirahi nútí eta máechajiriruvana ema Viya, étarichuhi eta máimiturapiána ema Jesucristo, puiti nutupiruva numetacahe eta juca numetacasivanahi eta máimerunuanahi ema ángele. ³ Tétavicava eta náuricacarevaya ena téchajicuhanaya eta juca máechajiriruvanaahi ema Viya, eta máimimatirunuhi. Énerichuvare tétavicava eta náuricacarevaya namutu ena tisamanaya tisuapanaya eta juca. Taicha tiánehinapa eta táitavirayare tamutu.

Ema Juan macajure ena siétemuriqueneana machamuriana

⁴ Nuti Juan nucajurehe eti siétemuriana nuchamurianahi ejanereruanahi tayehe eta tinapaica te Asia. Nuvaraha macatajicahéhini ichape ema Tata Vicaiyaquene, émapa ema Jesucristo. Táurihivaréni eta epanereruana. Ema Tata Vicaiyaquene matiarhiquenehi te tépanavainapa, puiti manasirichuhi eta veyehe, émarichuva manasiqueneayare te táitavapa tamutu. Te tamirahu eta máejasihahi trono, natiarihi ena siétequeneana mayeheana arcángeleana. Navarahahivare eta iúricacarevainaini. ⁵ Ema Viáquenu Jesucristo, ema yátupiquenehi tiámaparauchahavihi eta juca vímitucasivanahi. Énerichuhivare ema máinapuiruhi téchepuca te máecari, apanapa eta máquehe. Éma, yátupiquenehi Rey. Namutuhi macachuriacavacaya ena réyeana te juca apaquehe. Éma, yátupihí eta máemunasirahavihi, masipasinahavihi eta viáchanevana tayehe eta vipecaturana te máitine máepusairuhi. ⁶ Énerichuvare, tinacahavihi te namuri ena manerjiruanahi tuparairucahaviyarehi eta mayehe, mavaraírahi viyujaracaráhiyare mayehe ema Viya. ¡Támutuhini sácheana vicunacha eta máitupajijiasiravahi! ¡Viáramiparacahini eta aquenucairahi! ¡Amén!

⁷ Ímaha, márajapainapa ema Cristo. Támayarepahi eta úcaji. Namutuyare nanecapa ena achaneana te juca apaquehe. Náimahainapa, tásiha, tipicanainapa. Tíyahahacavanainapa eta náimairayare, énaripa ena námariéqueneana ena tijarachanahi, taicha téchavanahi éna eta náejecapiravahi ena náchucanaveanaini. ¡Ene tacaheyare! ¡Máitecapavanepaini!

⁸ “Nútira nunacuchahi eta táepaniravahi eta apaquehe. Nútirichuvare nécha eta táimiyániravaya tiuri. Néchayareva eta táitavirayare tamutu” macahehi ema Viya, tétavicava eta máitupajijiasirava, máituruequenehahi tamutu. Éma, matiarhiquenehi te tépanavainapa, puiti manasirichuhi eta veyehe, émarichuva manasiyare te táitavapa tamutu.

Eta máimeresirava ema Jesucristo mayehe ema Juan

⁹ Nuti Juan, nútirichu echamurinuhi. Nútirichuvare ecutiquenenuhi tayehe eta vicatajivairahi, vicamichahisera tamutu taicha tétumechahavihi ema Jesús. Taicha vicunevaipahi eta visiapirayare te mávasa, aquenucahaviya.

Núti, tiáquijicanuanahi tayehe eta tiúrupuhi ticajare Patmos te etupiereca mar, táichavenehi eta nucametarairuirahi eta máechajiriruva ema Viya, néchajisihairahivare eta máijare ema Jesucristo. ¹⁰ Te jena sáchequenehi lumincuquenehi, ema Espíritu Santo tímimahanuhi eta mavarahaqueaneana tímechanu ema Jesucristo. Tacahehi eta táepaniravahi eta máimimahaqueneenuhi. Tativapa nusamahi eta mahu ema émana te nuquecu. Muraca eta máechajisiranuhi. Tirurehucha eta nusamirahi. ¹¹ Ánipa macahehi:

—Piájuchaya tamutu eta juca pímahaqueaneanaya. Pímiamarecapa eta piájure nayehe ena siétemuriqueneana pichamuriana: ena tiávihanahi te Efeso, ena tiávihanahi te Esmirna, ena tiávihanahi te Pérgamo, ena tiávihanahi te Tiatira, ena tiávihanahi te Sardis, ena tiávihanahi te Filadelfia, énapa ena tiávihanahi te Laodicea* —macahepa.

¹² Tacahe, néviurucavapa. Nuvarahapa nímahayarehi ema téchajicanuhi. Tásiha, nímahapa eta siete candelero tiúquiána, amairiha oro. ¹³ Te enumuhumuri eta siétequene candelero, matiarhi ena achane vivasimahi. Tiúmaji eta mamuiriha. Titecapa te máivapeana. Ichapeme eta máitijuhe, títecapa te matupa. Amairihavare oro. Eta máitijuhehi táicutiarahi eta aquenucairahi éma. ¹⁴ Eta machutimaca amairiha tijapu, tirapepejicaquenehi. Eta

* 1:11 Tamutu eta jucana avasareana tiávihanahi te provincia Asia. Puiticha eta juca provincia ticajare Turquía.

máuquihana, tétavicavahi eta tavayuhauquiravahi. ¹⁵ Eta máivapeana tijanunupevachava, tacuti eta bronce eta tajanutusira. Eta mahu, tétavicavahi eta tamuracavahi eta marurehuchirahi. ¹⁶ Te mavahu vaure, macaratacachi eta siete jarairiquiana. Te majaca tiúchucachi tavasimahiyaréni eta espada. Tétaviuchahi eta tacasiriva, tünunapehivare. Eta mamira, tétavicavahi eta táeramemesirahi tacuti eta sache.

¹⁷ Nupicarinehi eta nímairahi. Náquipaicavapa te máivapeana. Tiánehi népenaini eta nupisirahi. Émasera manacapa eta mavahu vaure te nápusi. Máichanupa:

—Vahi picupicanu. Nútichucha nuti nunacuchahi eta táepaniravahi. Nútirichuvare néchahi eta táitavirayare tamutu. ¹⁸ Núti yátupiquenénu nucaitarecarahi, taicha nuchavahi nítareca te táequenepa eta nacapasiranuhi. Puiti máichecuarquirénapa eta nítaresira. Nútirichuvare necha ena tépenana. Nucaechepucayare eta náqueheana ena náepenaqueneana nácani níchuhaqueneanayare. ¹⁹ Piti Juan, piájuchayare eta juca pímahaqueneanahi puiti, étapa eta písamaqueneanahi nutupararuvianahi nayehe ena pichamuriana, étapa eta táicharacavayare nimechaquenévivare. ²⁰ Numetacaviya eta tacayemaquenehi eta siétequene jarairiqui nucaraturuhi te vaure, étapa eta siétequiqueneana candeleroana óroquiiana. Éta juca siete jarairiqui, énarana ena ticametarairurahiana nayehe ena siétemuriqueneana pichamuriana. Eta siete candeleroana, énarana ena siétemuriqueneana nuchanerana.

2

Eta mametarapi ema Jesús nayehe ena machaneranahi ticavasanahi te Efeso

¹ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Efeso: Núti iáquenunuhi taicha núti nucaratacachi eta siétequene jarairiquiana te nuvahu vaure. Núti návihahi te tamuri eta siétequiqueneana candeleroana óroquiiana, táicutiarahi eta néchirahehi emutu éti. ² Núti nímati tamutu eta íchaqueneanahi, étaripa eta tamuracavahi eta ecaemataneasiranuhi, ecamichirahi tamutu. Váhivare iúricahini ecasiriquihini ena achaneana váinarajiana. Váhivare ejacapahini ena tépiyacavanapahi apóstoleana, imatiacavanehi éti ena tépiyahirahianapahi. ³ Nímatihe eta ecamichirahi tamutu eta iátajivanahi táichavenehi eta ecaemataneasiranuhi núti. Vahi eyacujihini. ⁴ Jucarihisera eta juca eviurevahi nuyehe. Puiti ecamitiacaripa eta émunaraivana. Vaipa tácutihini eta émunaraivanahi te épanavainapa. ⁵ Puiti nuvaraha étupiricayare eta juca, tachava eta émunaraivahi. Éneuchavaya tativaina apesa íchavare eta táuriqueneana tacuti eta acane. Te vahi ecuetupiricava, nútijacaruvayare nítareca, nítivachayare eta candelero ícutiarahi eyehe. ⁶ Éti, ecunachacarehi eta ecatichirahi eta tamaetupisiravahi eta nayeherépiana ena apamuriana téhicanahi ema Nicolás. Ene nucahehi núti, nucaticahivare eta nayeherépiana.

⁷ “Ema Espíritu Santo tímítucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucasipaheyare núti tayehe eta paraiso ícumunahi me Tata. Nénicahayareva eta tahi eta yucuquí tiana eta táuricacarevayare eta itaresira.

Eta mametarapi ema Jesús nayehe ena machaneranahi ticavasanahi te Esmirna

⁸ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Esmirna: Núti nunacuchahi eta táepaniravahi. Nútirichuvare néchahi eta táitavirayare tamutu. Nuti nacaparuhi, nuchavahisera nítareca. ⁹ Núti nímati tamutu eta íchaqueneanahi, eta ecatajivairahi, étapa eta epaureravanahi. Tétavicavahisera eta iúricacarevahi, tímicitijiricavaipeahi rícohénahíni. Nímativare vahi esemahini taicha eta épiyaequeneanahi nayehe ena tímijachavanahi machanerana ema Viya. Mávaháruanahi ema Váinaraji, machaneranahivare. ¹⁰ Vahi ecupica eta ecatajivairaya. Numetacahe: Ema Váinaraji tímisiapaheya te cárcel ena máitsamaresiraheya te tímínajichaheyarepuca. Ecamichachuchasera, taicha diésquenericu sache eta ecatajivairayare. Nutuparacahecha: Ejicapaicayare tayanapanepuca nacapacahe. Núti níjaracaheyare eta táitsivayare. Tiúriyare eta itaresiraya.

¹¹ “Ema Espíritu Santo tímítucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucuchucaheyare. Vahi ecatajivaimahi tayehe eta nacatajivairayare te yucu ena masuapajirairahanahi.

Eta mametarapi ema Jesús nayehe ena machaneranahi ticavasanahi te Pérgamo

¹² “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Pérgamo: Núti nítuca némecharecavaca nácani téjcapavana taicha nucayehe eta espada, táetaviurequenehi eta tacasiriva. ¹³ Núti

nímati tamutu eta íchaqueneanahi. Nímativare eta éñamiravahi taicha namutuyaréni ena echácayapenána téhicanahi eta máimiturapi ema Váinaraji Satanás. Váhiserá ínjacavahíni, étumechavaichucha eta éhisiranuhi nútí. Étaripa te ímahapa eta nacapasirahi ema nuchaneraini Antipas, yátupiquenehi eta masuapiranuhi éma. Ena machaneranahi ema Váinaraji nacapacahi éma te jena íávihihi étí. ¹⁴ Jucarihisera eta juca eviurevahi nuyehe. Taicha ísapavaichucha natíarihíhi ena nanerejiruvana ena echamuriana vahi návarahahíni náinjaca nanica eta tinicacare nayujaraurehi te tamirahu eta nasiñarajiana. Tacutiquene esenamareanahi éna. Eta acane, ema máratátaji Balaam tímitucahi ema Balac eta máimiaquipaisiravacahi ena israelítana tayehe eta juca tamauriqueneanahi. ¹⁵ Énerichuvare nararihi ánaqui te emuri ena apamuriana váhivare navaraha náemitísica eta máimiturapiana ema Nicolás. Tétavicavahi eta nucaticirahi nútí eta máimiturapiana ema Nicolás taicha tétavicavahi eta tamaetupisiravahi. ¹⁶ Eta tacahe, éneuchavayare eti éjecipavanahi. Te vahi ecueneuchava, nútijapayare némecharepanaheyare tayehe eta tacasiriquene espada táuchquenehi te nujaca.

¹⁷ “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nénicahayare eta ícuchihi me Viya eta ticaijare maná, tayumururevaquenerichaha. Énerichuvare níjaracahevayare eta tijapu mari. Eta te mari tatiarihíyare eta ajureca arapíru. Nájinasera tímatiquenehaimahi. Macarichu ema ticayeheyare, éma tímatiyare eta máijare arapíru.

Eta mametarapi ema Jesús nayehe ena machaneranahi ticvasanahi te Tiatira

¹⁸ “Picajureyare eta juca numetarapianahi ema ticametarairurahi nayehe ena pichamuriana ticvasanahi te avasare Tiatira: Nútí Machichanuhi ema Tata Vicaiyaquene. Nútí nímatíhi tamutu, taicha tajarahivaca eta núquihana, tétavicavahi eta tavayuhauquiravahi. Eta nívapeana tíanunucavacava tacuti eta bronca eti tajanunusirahi. ¹⁹ Nútí nímati eta íchaqueneana. Nímativare eta émunasiranuhi, eta esuapiranuhi yátupi, eta échapajirisirahi ena achaneana, étapa eta ecamichirahi. Nímativare muracapanapahi eta ecaemataneasiranuhi. Tiápajucavaipahi puiti tayehe te épanavainapa. ²⁰ Jucarihisera eta juca eviurevahi nuyehe. Ísapahi tisiapamurihahe esu esénatátaji. Ésu, vahi táetupicavahíni eta suyeherepiana, sucutihi esu Jesabélnitataji eta acane. Tímijachavahi mavanara ema Tata, suémejecapavachahisera ena nuchanerana. Suímitucavacahi naicha eta piesta, tásiha nanicavare eta tinicacareana nayujaraureanahi te tamirahu eta nasiñarajiana. Suímitucavacavare eta natuhusivayare. ²¹ Nútí íchapemurihi eta nucuchapirahi ésu, eta suéneuchavahíni, apaesa suíñajicahíni eta sutuhusiva. Váhiquenesera suvaraha suíñajica eti suyherepi. ²² Puiti níjaracayare eta suícuñayare. Ticajumayare apaesa suíveca te sucamane. Ichape eta sucatajivairaya. Énerichuvare ena suítirevanahi, nícuñacavacayareva muraca, te vahi nacuíñajica eta suíchaqueneasanahi ésu. ²³ Énerichuvare ena suchichanaveana níjaracayare eta najumayare, nímicapasiravacayare. Tásiha, échainapa eti nuchaneranahi eta nímatirahi tamutu eta epanereruana, eta te esamureana étí. Nímahainepasera nútí eta nícharacavacayare ena téjecipavanahi, étapa tíamayare eta náichaqueneana. ²⁴⁻²⁵ Tájina apanainahíni eti eviurevahi nuyehe. Núrisamurehi eyehe eti matapiravareanahi, eti vahi éhicahíni eta suímiturapiana esu esénatátaji. Váhivare ávarahahíni íjaracava éhica eta suhíapemarevanahi, susíñavavairisírahíni eta máimitusírahíni ema Satanás. Tásiha puiti, nutuparacahe eti nuchanerana íávihanahi eta te avasare Tiatira: Ecaratacava muraca tayehe eta juca éhiruhi. Ecuenuyare eta nuchavíraya.

²⁶ “Emutu eti ecamichanahi, ímiyanavahivare eta éhisiranuhi, váhivare ínjicahíni eta ecaemataneasiranuhi, nútí níjaracahéna eta tuparairucairahéna tayehe eta avasareana. ²⁷ Ecutinuyare nútí eta máíjarasiranuhi ema Tata Ticachichanu eta tamuracavahi aguenucairanuhi. Ene ecaheyare étí. Muracayare eta aguenucairahayare. Ecaratacayare eta etsucurupayare níjroqui. Esuapacareyare muraca. ²⁸ Tétavicavayare eta ejaravayare nicha nútí, taicha nútupahaheyarehi étí. ²⁹ Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayarehi esuapa.

3

Eta mametarapi ema Jesús nayehe ena machaneranahi ticvasanahi te Sardis

¹ “Picajureyare eta juca numetarapianahi ema ticametarairurahi nayehe ena pichamuriana ticvasanahi te avasare Sardis: Nútí néchavacahi ena síetequeneana arcángelena, étipa eti ecametarairurahiana taicha nútí távamirarehi eta síetequeneana jarairíquiana. Nútí nímati tamutu eta íchaqueneana. Ena achaneana tímijachanahi tíurihi eta ecaemataneasiranuhi. Nútisera nímararacahi eta esamureana. Nímatíhe tíánehí eti

ínajisirainapa eta éhisiranuhi. ²Ecaunchavayare apaesa vahi ecuemitiaca eta éhisiranuhi. Taicha nîmararacahi nûti vahi tátupiruvahini te esamureana eta ecaemataneasirahi ema Tata. ³Puítisera, éneuchavayare apaesa tacuijapa ecuichiravaina. Échavayare éti tamutu eta ímitucasivanahi. Yátupina eta éhisiraya. Te vahi ecuetupiricava eta epanereruana, nûtijapayare tîjahúchavayare eta nítecapirayare némecharepanaheya. ⁴Váhinéni ámutuhini éjecapavahini éti ecavanahi te Sardis. Natiarihíhi ena matapiravareanahi, váhivare náechipejicavahini. Ena nani, nîjaracavacainapa eta namuirihayare tijapu. Ticachanenuanayareva taicha tatuparacahi eta návihairayare eta nuyehe.

⁵“Emutu eti ecamichanahi, ímiyanavahivare eta éhisiranuhi, nîjaracaheyare ecamuirihayare eta tijapu. Váhivare nucaepahaimahi eta íjareana tayehe eta libro tiama eta nalista ena náitareruanayare. Nímimaticahaheyareva eta me Tata, énapa ena ángeleana. ⁶Ema Espíritu Santo tîmitucaheyare eta juca numetarapiana. Emutu eti nuchaneranahi, etupiruvayare esuapa.

Eta mametarapi ema Jesús nayehe ena machaneranahi ticavasanahi te Filadelfia

⁷“Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Filadelfia: Nûti yátupiquenénuhi Viya, yátupiquenehivare eta nusantuva. Nucarichu nûti néchahi eta tapajacura eta arairuyare avasare Jerusalén, tacuti eta máechapajirisirahi ema náchucaini rey David eta táinapuiruinihi Jerusalén. ⁸Nûti nímati eta íchaqueneanahi eta ecaemataneasiranuhi. Nímahahivare eta vahi camurihénahini. Nímatihivare eta ecatajivairahi, váhisera ecaínajiruvahini eta éhisiranuhi. Ímiyanavahivare esuapahi eta nímaturapiana. Tásiha, puiti nîjaracaheyare eta apana ématanerépiya. Nájina nísapaimahi tihapapiricaheánaimahi eta itauchiraya éta. ⁹Nûti nítahacavacayare ena israelítana tépiyacavanahi machanerana ema Tata, machaneranahisera ema Váinaraji. Nucaepuyucavacayare te emirahu, apaesa náimati eta némunasirahehi.

¹⁰“Éti, itauchahi ema nuvanairipi eta ecamichiraya tamutu. Eta tacahe, nujaneacaheya nûti apaesa vahi tacuimivehahe te táitecapapa eta nucaetemajirisiravacayare namutu ena achaneana távaphianahi te juca apaquehe. ¹¹¡Tiánehipa eta nuchaviraya! Étumechavaya eta éhisirahi, machu émpurureca ejacpirayare eta ícuchianayare.

¹²“Emutu eti ecamichanahi, ímiyanavahivare eta éhisiranuhi; nítsirijicavayare eyehe. Máichecuaraquireyare eta ecachaneraya ema Tata te mávasa. Iámayare eta máijare, étapa eta nîjare arairu. Iámayarevare eta tájare eta arairu Jerusalén, taicha tachichahevacya. ¹³Ema Espíritu Santo tîmitucaheyare eta juca numetarapiana. Emutu eti nuchaneranahi, etupiruvayarehi esuapa.

Eta mametarapi ema Jesús nayehe ena machaneranahi ticavasanahi te Laodicea

¹⁴“Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Laodicea: Nûti náicha ‘Ema títaurahi’. Námaphi eta yátupiqueneana táuriqueneana echajirirucava. Nûti tájinaquenéhi néjequiha. Nûti nítauchahi tamutu eta mapanereruanahi ema Tata, te népiyacapa eta anuma étapa eta apaquehe. ¹⁵⁻¹⁶Eta juca numetarapi eyehe éti: Nímati eta íchaqueneanahi. Éti apáesasajírúichucha eta éhisiranuhi. Éti, vuíchaha ímereuchavahini eta ecatianasiranu; váhisera yátupinahini tatupiruvahini eta éhisiranuhi. Tacamunuinehi átipiruvahini, yátupinahini ímrecava eta éhisiranuhi. Machu étaina taviuchahe eta nucaerajisiráhéna nuyehe. ¹⁷Taicha éti ímijachavahi rícohe, tájina íchiravainahini, tájinavare ácomunuhini. Vahi esamauchavahini ichapemurihi eta éjapanuravahi. Váhinéni rícohenahini. Etiinéni ecáijare páureana, púchuquiána, mamúiriareana. ¹⁸Nuvaraha nuconsejachahe: Te evarahapa yátupina eta erricovayare, íteca eta nuyehe. Jéhevare nûti núruchaheyare, ecutiayare ena ticayeheana eta yátupiquene oro. Jéhevare nûti nîjaracaheyare eta emuirihayare tijapu apaesa vahi ecutsiríha te numirahu. Nétsarachaheyareva eta ípurují apaesa ímairirica. ¹⁹Nûti nêtipiricaya eta napanereruana namutu ena némunarua te náejecapava. Te vahi nacusuapanu, némecharecayarehi. Tásiha éti, títuparacahehi étupiricavane eta epanereruana, étumechavavare tayehe eta éhisira. Éneuchavavare apaesa tacuija ecuichiravaina. ²⁰Nûti nujapanurahi. Nuvaraha tachava eta vicachaneracacahi. Vaipa ecuévuisiha eta nuyehe. Íchuhánuvare. Viápechava vivapinava eta véchajirisiravaparacayare*.

* **3:20** Te juca, ema Viáquenu tîmicutijiricava eta máehahamesira te jácaini tapajacura, mavarairahi masiapa, manica macachane ena ticavasanahi te tajuhe. Étasera eta máechajisíhaqueneana, vahi étainahini eta tapajacura eta vipena. Te juca, ema Viáquenu máechajisíhahi eta majapanuirahavi étapa eta mavaraira víchavaya vipaucha éma, tachavahini vivapinava mayehe, víúriyareva te machacaya.

²¹ “Emutu eti ecamichanahi, ímiyanavahivare eta éhisiranuhi, núti nucaejacahevacyare tayehe eta néjasihayare, tacutiyaire eta néjasirahi te mavaure ema Tata, taicha eta nétumechiravahi nucamichirahi tamutu. ²² Ema Espíritu Santo tímitucaheyare eta juca numetapiana. Emutu eti nuchaneranahi, etupiruvayare esuapa” tacahehi tamutu eta máechajiriruvana ema Viáquenu eta eyehe.

4

Ema Juan máimaha eta natsiuresira te anuma

¹ Te táequenepa eta juca, nímahavarepa eta téjiacahi eta anuma. Nusamavarepa eta mahu ema émarichuhi ema tnapucahi téchajicanuhi. Tirurehucha eta mahu. Tíchuhanupa, ánipa macahepa:

—Yare, piápana. Nuvaraha nímechaviyare eta táicharacavayare puiti juca vicaijuheyare —macahepa.

² Tacahe, eta nusamirahi eta íchuarapi, ema Espíritu Santo tjaracanupa eta nucaicutiarairayare tamutu eta nímahaqueneanayarehi. Tíjuhúchavapa nímaha ema Viya, téjacahi te trono te anuma. ³ Tiáramicarehi eta máimahi. Tétavicavahi eta máurinavahi. Eta máimahi tacuti eta tajanunusira eta márijahi jaspe étapa eta cornalína. Te tachachacuana távihahi eta trono, tétavicava eta tajaraivahi tacutiyaireni eta táimahi eta ahe eta táurinava. Véresera eta táimahi. ⁴ Távihahi eta íchape trono, tatiarihivare te tachachacu eta véinticuatro trono. Natiarihivare ena véinticuatroanavare téjacanahi tayehe, víyarahana tuparairucana. Tijapu amairiha eta namuirihana. Namutu ticayeheana corona te nachutiana, amairiha oro. ⁵ Tásiha, nímahahi eta térameca tásihaquenehi tayehe eta trono. Nusamavare tirurehuchanahi. Ticaemapa. Tásiha, tatiarihihi te tamirahu eta trono eta siete tijarahivaca tacutiyaireni tanene eta yucu. Énahi ena siétequeneana arcángeleana mayeheana ema Viya. ⁶ Tijararacavare te tamirahu eta trono tacutipa eta tajarahivahi eta íchapequene une.

Natiarihivare ena cuátroqueneana tijanearecanahi te machacaya ema Viya. Éna, ecutiarareana eta máitupajjiasirava. Tacutimahi ticaquihavacahi te namirahu téhepa nachepa. Amairiha eta náquihana. ⁷ Eta tnapuca tavasimahiyaréni eta sárare táíñehiquene*. Eta apana tavasimahiyaréni eta torillo. Eta apana tacutimahiyaréni achanemira. Eta apana tacutimahiyaréni eta íchape máitíhi tiárarairicahi. ⁸⁻⁹ Tacahe, ena nani cuátroqueneana ecutiarareana tiávihanahi tayehe eta trono, sáisivaca eta napavana. Ticaquihavacavare amairiha eta napavana. Ena nani, vahi táechuquihahini eta nacunachirahi ema Viya, ema acanevacaquene eta máitaresirahi. Tijiranahi tamutu sácheana, yátiana. Ánipa nacahe:

“Tétavicavahi eta pisantuva, piti Tata.

Tétavicavahivare eta pítipajjiasiravahi,

píturuequeneha tamutu.

Piti pitiarihiquenehi te tépanavainapa eta apaquehe.

Puiti pinasirichuvare eta viyehe.

Pítirichuvare pinasiyare te táitavapa tamutu.

Puiti vihasulupayachavihi eta pichanerahavihi”

nacahepa ena ángeleana.

¹⁰ Énavarepa ena véinticuatroqueneana víyarahana tuparairucana tépuyucanahi te mami-
rahu ema Viya, mávihahi te mayehe trono. Nacamavahupa eta nayeheana corona. Titsiure-
canavare. Ánipa nacahe:

¹¹ “¡Tata Víyaquene, piti Viáquenuvihil!

¡Tétavicavahi eta piúrivahil!

Picarichuhi piti vicasíñaquenévi.

Íchapequenehi eta vicunachiravihi.

Tamutuhi pirataha píti.

Taicha píti pépiyacahi acane tamutu eta juca

vímahaqueneanahi puiti.

Pítirichuvare péchahi puiti tamutu eta

pépiyuanahi”.

5

Ema Cordero macarataca eta ajureca tiama eta siete sello

* **4:7** Te jena avasare Asia (púitícha ticaijare Turquía), tatiarihihi eta tíñehiquenehi sárare náimijarechahi “león”. Te táiyahapa, eta tahu tacuti eta íchapequene toro, étapapuca eta ichi ajaira.

¹ Tacahe, te mavahu vaure ema máejaruhi tayehe eta trono, nímahapa macaratacachi eta ichapeme ajureca ticayuruquihí, ticanaracachi eta letra te tajuhe étapa te táquecume. Ticaipistahi tayehe eta siete sello, táipistaruvanahi. ² Nímahapa ema ángele tipiaracachi muraca. Tétavicava eta tamuracava eta mahu. Ánipa macahehi:

—¡Puiti táuricapa máimerecava mácani tatupararuhi tipegistacayare eta tayeheana sello eta juca ajureca, maveruruasirayare! ¡Tatuparacapa máiteca puiti! —macahepa.

³ Nájinasera nájjaracavahini navejiapanahini eta ajureca: énaripa ena tiávihanahi te anuma, énavanerecainahipucaini ena tiávihanahi te apaquehe, énaripa ena tiávihanahi te amahe apaquehe. Nájinvare tipatsicavaina náimarracahini eta ajureca. ⁴ Niyahahacavapa nútí eta nímairahi namajinairahi nájjaracavahini naveruruacahini eta ajureca, náechajicuhahipucaini, énavanerecainahipucaini náimarracahini. ⁵ Tacahe, téchajicanupa ema émana víyaraha tuparairucachi. Máichanupa:

—Vahi picuiyaha. Taicha matiaríhi ema Cristo, ema yátupiquenehi manerejiruhi ema Viya ema téchaya tamutu eta juca apaquehe. Éma, tjaracavahi eta máepenirahi víchavenehi víti. Tichavaripahisera títareca. Tásiha, macarichu ema tatuparacachi maveruruacayare eta ajureca, mavepistahayareva eta siétequene tayeheanahi sello táipistaruvanahi —máichanupa ema víyaraha.

⁶ Tacahe, nímahavarepa ema Jesús, ticajarehivare Cordero. Titupihahi éma te tamirahu eta trono, nachayacachi ena cuátroqueneana ecutiarareana énapa ena víyarahana tuparairucana. Nímahahi eta majara, taicha táimicapacachi éma eta macaepahairahi eta vipecurana víti achaneana. Siete eta majihuana. Eta juca táicutiarahi eta aquenucairahi. Siétevere eta máuquihana. Eta juca táicutiarahi eta tamutuirahi máimatiqueneha, taicha navanahíhi ena siéteana arcángeleana mayehe ema Viya, eta náimarrasiraya tamutu eta apaquehe. ⁷ Ema maca Cordero tiyanapa, majacapahi eta ajureca te mavahu vaure mayehe ema máejaruhi te trono. ⁸ Te macaratacava eta ajureca, ena nani cuátroquene ecutiarareana, énerichuvare ena vénticuatroqueneana víyarahana tuparairucana tépuyucanapa te mamirahu ema Cordero. Ena nani vénticuatroqueneana, namutuyehéhi te navahuana eta guitarra étapa eta escudilla, amairihasea oro. Tiama eta incienso, táicutiarahi eta táurivahi eta nayujarasiranahi ena machaneranahi ema Viya. ⁹ Tijiranahi eta juca jirasare arapíru. Ánipa nacahe:

“Picarichu píti tituparacavíhi eta picaratasirayare eta ajureca, pivepistasirayare eta tayeheana sello.

Tituparacavíhi taicha píjaracavahi píti tímicapacavíhi eta pivacharesirahaviyarehi tayehe eta pítime vimutu víti apaimamajiquenehavihi te juca apaquehe.

Taicha pívarahahi machanerahaviyarehi ema Tata Vicaiyaquene.

¹⁰ Píjaracahavíhivare viyujaracarahiyare mayehe ema Viya.

Píti píjaracahavíhi eta aquenucairahiyá tayehe eta avasareana” nacahepa.

¹¹ Tásiha, nusamavarepa eta nahu ena camuriqueneana ángeleana nachayacachi eta trono, eta návihahi ena cuátroqueneana ecutiarareana, énapa ena tuparairucana. Tétavicava eta nasimutuvahi éna. ¹² Énerichuvare tijirana muraca. Ánipa nacahe:

“Píti Cordero, píti nacaparuhi, picarichu tatuparacachi pijacapayare puiti eta piávacure mayehe ema Viya.

Tétavicava eta piúricacarevahi táicha.

Tétavicava eta pímatiequenehairahi tamutu.

Tétavicava eta pítimevahi.

Tétavicava eta pípicachacarevahi.

Tétavicava eta pícnachacarevahi.

Tijarahi visama te vijirauchaví” nacahepa.

¹³ Nusamavare eta tahu tamutu eta máepiyaruanahi ema Viya, eta tiávihanahi te anuma, étapa eta tiávihanahi te apaquehe, énerichuvare eta tiávihanahi te amahe eta apaquehe, étapa eta tiávihanahi te une. Ánipa tacahehi:

“Tétavicava eta pítipujjiasiravahi, píti Vicaiyaquene, pítipa píti Cordero.

Éti, tétavicava eta pípicachacarevahi.

Éti, tétavicava eta pícnachacarevahi.

Tijarahi visama eta vijirauchirahe.

Máitavacayare eta vítsiusiraheyare” nacahepa.

¹⁴ Énapa ena cuátroqueneana ecutiarareana najicapapaipa:

—Amén, ene vícaheparacayare —nacahepa.

Tásiha, ena vénticuatroqueneana víyarahana tépuyumurihanapa, natsiucapa ena apinana.

6

Eta táepistasira eta sélloana

¹ Tacahe, nímahapa ema Cordero te mavepistacapa eta tínapuca sello. Tásiha, nusamapa ema émana ecutiararehi. Eta mahu tacutichucha tirurehucha. Ánipa macahe:

—Yare, piúchuca —macahepa.

² Tacahe, nímahapa eta cavayu tijapu. Ema ticaperahi, tatiarihi eta mataquiriqui. Tásihapa, ticaijaracasipa eta corona éma. Eta juca táicutiarahi eta máquipairisiraparacaya ena mánarana, taicha guerrerohi éma.

³ Nímahavarepa ema Cordero mavepistacavarepa eta tápinane sello. Nusamavarepa ema apana ecutiararehi:

—Yare, piúchuca —macahevare.

⁴ Tacahe, tiúchujicapa eta apana cavayu. Titsi eta táimahi. Ema ticaperahi mámahi eta ichapequenehi espada. Ticavanahipa eta manacasamurechirayare ena achaneana eta náehacacairayare. Téhepucainapa eta guerra. Ticapajiricacanainapa ena achaneana camuriqueneana.

⁵ Nímahavarepa ema Cordero mavepistacavarepa eta tamapanane sello. Nusamavarepa ema apana ecutiararehi, máichapa:

—Yare, piúchuca —macahevare.

Nímahapa eta cavayu tiqusa. Ema ticaperahi macaratacahi eta balanza te mavahu. ⁶ Nusamavarepa eta mahu ema apana te namuri ena cuátroqueneana ecutiarareana. Ani macahehi eta máechajiruvahi:

—Ticatajivanayare ena ticaematanerahiana. Vaipa tisivachaimahi eta mavacha mácani achane. Diez páneana eta mavachayare te étana sache. Étaripa eta arusu* mapanarine kilo eta navachayare te étana sache. Étasera eta aceite comer, vahi téjiacavaimahi, étaripa eta tachi eta uva —macahepa.

⁷ Te mavepistacavarepa ema Cordero eta tacuatrone sello, nusamapa ema apana cuátroquene ecutiararehi, máichapa:

—Yare, piúchuca —macahepavare.

⁸ Nímahapa eta apana cavayu tiyacaca. Ema ticaperahi, éma ticaijarehi “Ticaparerecaya ena achaneana”. Matiarihivare ema téhicapahi, ema táquenu eta náchanevana ena náepenaqueneana. Tacahe, eta cuarta parte eta cuarta parte eta nasimutuva ena achaneana tépenanaya naicha ena apinana. Taicha ticapajiricacanainapa ena achaneana tayehe eta guerra. Ena apamuriana téculhanainapa. Apanapanenapa eta najumanayare. Énerichuvare tanicainapa eta sárareana táíñehiqueneana.

⁹ Te mavepistacavarepa ema Cordero eta tacincone sello, nímahapa eta mesa tiámahi eta mayucuneasa ema Viya. Te tápecu, nímahavarepa eta náchanevana ena náepenaqueneana támicaparuanahi eta náehisirahi ema Viya. Vahi náinajicahini eta náehisirahi te náimahapa eta nacatajivairayare. Váhivare timatinanaimahi eta nametasirahi eta máechajiriruva ema Viya. ¹⁰ Puiti éna, tipiaracanahi. Ani nacahe eta napiarasirahi:

—Tátachicha, sántoquenevivi píti. Yátupiquenevivi eta picasiñacareva. Píti pirataha tamutu. ¡Puiti vivaraha pítauchayare eta pitsirijiequenehairayare ena ticapacahavianahi te apaquehe! ¡Vivarahapa nacáemecharahipaini! —nacahepa.

¹¹ Tásiha, ticaijaracasianapa eta namuirihanayarehi eta tijapu. Ticametacasianapa nanarahasiranumayare apaesainahi. Tiámainucavayarehi te tiyuriticavapa eta natupayare ena nachamuriana nacaparuanayarechahavare ena téhicanahi ema Cristo.

¹² Te mavepistacavarepa ema Cordero eta tasaisine sello, nímahapa eta tamuracavahi tayamurisirahi eta apaquehe. Eta sache témahavarepa, tévavicavahi eta taquisava. Énerichuva eta caje amairihapa ítime. ¹³ Eta jarairiquiana tiávilhanahi te anuma, témiririjicapa te juca apaquehe, tacuti eta tahi eta mitu te muracaicha técativava. ¹⁴ Eta anuma témitiacavarepa tacutipa te téchuquimeca eta ajumeruca. Tásiha, eta ichapequeneana cerro tiyamuricavacapa tiyjecavavacapa. Étaripa eta tiúrupuhiana te mar énerichuvare tiyjecavavacapa. ¹⁵ Tacahe, tijunanapa ena réyeana te avasareana, énapa ena presidenteana, énapa ena comandanteana, énapa ena aquenucarahana, énapa ena rícoqueneana, énaripa ena músuana, énapa ena libreana. Ticayumurúquianapa te tajuhe eta ichapequeneana máriana cerro.

¹⁶ Ánipa nacahe:

* 6:6 Ema ecutiarare máechajisihahi eta taqui ticaijare cebada. Eta juca tacuti eta arusu.

—Vicavi eta ichapequeneana mari, apaesa vahi macuimahahavi ema Viya, apaesa viúchucuha tayehe eta táíñehiquene máicuñaraqui ema Cordero. ¹⁷Táitecapaurehavipa puiti eta ichapequene juicio. ¡Páurehavisami! ¡Nájina tacaemachaquenemahi! —nacahepa.

7

Ena dócemuriqueneana israelítana nacamarcaqueneanayare

¹Tacahe, nímahapa ena cuátroqueneana ángeleana. Titupihanahi te táinahu eta juca apaquehe, náichejimirusirahi tamutu eta técaticavana. Éna, náichejicahi eta técaticava apaesa tacuija eta técaticava te apaquehe étaripa te une, étavanerecainahipucaini tacaecherahini te yucuquiiana. Ticatuparahanasera éna nacamiriuchayarehi eta táicuñayare te apaquehe étaipa te une mar. ²Énerichuvare nímahavarepa ema apana ángele tiásihahi te táuchusinehi eta sache. Macaratacahi eta mamarca ema yátupiquene Viya Vicaiyaquene. Ema maca ángele máechajicavacapa muraca ena cuátroqueneana ángeleana. ³Tacahe, ema ángele máichavacapa:

—Vuíchaha ecucamirica eta táicuñayare eta apaquehe eta une te mar étaipa eta yucuquiiana. Tapainumavaya te vimarcachavacapa te nanahuana ena mavanarana ema Viya —máichavacapa.

⁴Tásiha, te tamutupa eta nacamarcairavacahi, nusamapa eta natupa ena nacamarcaqueneanaripa. 144,000 eta nasimutuva. Násihaqueneanahi nayehe ena dócemuriqueneana israelítana. ⁵Doce mil ena ticamarcanahi machichanavéqueneana ema Judá. Doce mílvare ena ticamarcanahi machichanavéqueneana ema Rubén. Doce mílvare ena ticamarcanahi machichanavéqueneana ema Gad. ⁶Doce mílvare ena ticamarcanahi machichanavéqueneana ema Aser. Doce mílvare ena ticamarcanahi machichanavéqueneana ema Neftalí. Doce mílvare ena ticamarcanahi machichanavéqueneana ema Manasés. ⁷Doce mílvare ena ticamarcanahi machichanavéqueneana ema Simeón. Doce mílvare ena ticamarcanahi machichanavéqueneana ema Levi. Doce mílvare ena ticamarcanahi machichanavéqueneana ema Isacar. ⁸Doce mílvare ena ticamarcanahi machichanavéqueneana ema Zabulón. Doce mílvare ena ticamarcanahi machichanavéqueneana ema José. Doce mílvare ena ticamarcanahi machichanavéqueneana ema Benjamín.

Camurianavare ena apavasajuecuana tijapumuirihavacahi

⁹Tacahe, nímahavarepa ena camuriqueneana achaneana tiásihana te tamutu avasareana, apaechajiriruvaqueneana. Vaipa titupachacareana eta nasimutuvahi. Titupihanahi éna te tamirahu eta trono, mávihahi ema Cordero. Tijapumuirihavaca eta namuirihana. Tásiha eta náurisamurevahi nacaratacahi te navahuana eta cáchipaca. ¹⁰Namutu tipiarcanahi, ánipa nacahe:

—Vihasulupayachavi, piti Tata Vicaiyaquene, pítipa piti Cordero, taicha éti ecuchucuhavíhi —nacahepa.

¹¹Tacahe, namutu ena ángeleana titupihanahi te tachacayahi eta trono, nachayacahivare ena cuátroqueneana ecutiarareanahi, énapa ena víyarahana tuparairucana. Tásiha, tépuyucanapa te tamirahu eta trono. Tétipaimurihanapa. Natsiucapa ema Viya. ¹²Ánipa nacahe: “¡Eta vicaheyare!

Máitavacayare eta vitsiuraviyare.

Taicha tétavicavapa eta picunachacarevahi.

Tétavicavavare eta pímatiequenehairahi tamutu, étaipa eta pipicauchacarevahi, étaipa eta pitumeva.

Picarichu piti péchahavíhi.

Ichape eta vihasulupayachiravíhi.

Tijarahi te visamure te vijirauchavi. Amén”.

¹³Tacahe, ema émana víyaraha máichanupa:

—Te pivaraha pímati, nímimatichaviyare ena nani ticamuirihanahi eta tijapu, távihavarepuca násiha —máichanupa.

¹⁴Tacahe, níchapa núti:

—Picatajicanu, pimetacanu, tata.

Tásiha, máichanupa:

—Ena nani énara ena nacatajivaqueneanahi ichape taicha eta náehisirahi ema Jesús, tiúchucuhanaripasera. Ticasipaipa puiti eta náchanevana tayehe eta máitine ema Cordero. Puiti ticamuirihanapa tijapu, taicutiarahi eta tájinairaripa naviurevainahini. ¹⁵Eta tacahe, titupihanahi puiti te tamirahu eta trono mávihahi ema Viya. Najirauchahi, natsiucahi éma tamutu sácheana yátiana te mayehehi templo. Éma majaneacavacahi. ¹⁶Ena nani tájinapa nácamunuimahi, vaipa téchana, váipavare tímauneana. Váipavare ticatajivanaimahi

taicha eta tájureva eta sache. ¹⁷Taicha ema Cordero, ema tiávihihi te tamirahu eta trono, tétavicava eta majapanuraivahi, majaneacavacayarehi. Máesichayareva eta tiúriama une ticaitarerahi. Énerichuvare ema Viya macamitiasinayare eta náiyaira —máichanupa ema víyarah.

8

Éma Cordero mavepistacapa eta téqueneha sello

¹Tacahe, mavepistacapa ema Cordero eta téqueneha sello tayehe eta ajureca. Tamuturine timatina. Média-horapuca eta tamatinaira. ²Tásiha, nímahapa ena siéteana ángeleana, titupihanahi te mamirahu ema Viya. Ticaijaracasianapa eta siete chujareana nachujanayarehi. ³Tásiha, titecapavarepa ema émana ángele. Mámaphi eta censario, amairiha oro. Tatiarihi te mamirahu ema Viya eta mesa tiámahi eta mayucuneasa. Amairihavare oro. Ema ángele titupihapa te tamirahu eta mesa. Nájaracapa eta incienso tisimuri. Tacahe, macaratacapa eta censario te tápusi. Macapusiacaapa ema Viya, tacachanepaipa eta nayujarasirana namutu ena machanerana ema Viya. ⁴Tásiha, eta taquijarera étapa eta mayujarasirana tiápanapa mayehe ema Viya, tásihaquenehi te mavahuana ema ángele. ⁵Tásiha, ema ángele mavehavarepa eta apamuri emaniqui eta te mayucuneasa. Máinicachapa eta censario. Tásiha, máepuraicapa te apaquehe. Tíjahúchavapa térameca, ticaema, tirurecapa. Tiyayacarepa eta apaquehe.

Eta nacachujairayare ena siétequeneana ángeleana

⁶Tacahe, nímahavarepa ena siétequeneana ángeleana titsecavanaripa eta nacachujairayare.

⁷Te ticachujapa ema tínapuca ángele, témiricapa te apaquehe eta uverequi étapa eta tiquiva ítama. Témiricavare eta yucu. Táijuchapa eta tercera parte te apaquehe. Támairiacapa eta yucuquiana, eta muiji, étapa eta sucurecana.

⁸Te ticachujapa ema apana ángele, témiricavarepa eta ichape mari. Timurupahi eta táemirisira tayehe eta mar. Eta une, ítiama taícha. Tercera párthevare eta ítiama. ⁹Támairiacapa tacapapajicava eta sárareana tiávihana te une. Étapa eta pacureana tachimarruanahi, técharicavanapa. Téririjcanapa tamutu.

¹⁰⁻¹¹Te ticachujapa ema apana ángele, témiricapa eta ichape jarairiqui. Tétiraraicaparine eta táemirisirahi. Tajararecapa eta une tayehe eta tercera parte eta cajacureana étapa eta cáquiureana. Venenoamapa taicha eta jarairiqui. Ichapemurianavare ena achaneana tépenaracanahi taicha eta náerirahi eta une tisucareama. Eta tacahe, ena tacaitruanahi tímijarechanahi eta ecuñaraqui: Eta Súcureama Venenoama.

¹²Te ticachujapa ema apana ángele, tiúchujicapa eta tépacuchahi eta sache, eta caje étapa eta jarairiquiana. Óchorine hora eta tétaviuchirahi eta tamapicuva. Tacahe, óchovare hora eta tacaacherairahi eta sache. Ocho hóravare eta tacaacherairahi eta caje étapa eta jarairiquiana.

¹³Tacahe, nésenicapa te anuquehe. Nímahavarepa ema émana ángele tiárraichahi. Nusamapa tipiaracapai muraca, ánipa macahe:

—Páureanasami ena tiávihanahi te apaquehe. Tétavicavaya eta nacatajivairayare, puiti te táitachavapa eta nacachujairaya ena mapanaqueneana ángeleana, téquenehanaya ticachujana —macahepa.

9

¹Te ticachujapa ema apana ángele, nímahapa ema ángeléní mavasíhi eta jarairiqui. Máquipairuvahi te apaquehe. Máisapa ema Viya eta mavejiasirayare eta pozo táupenaquene ticaijare Abismo. ²Tacahe, mavejiacapa eta táupenaquenehi pozo. Tiúchucapa eta ichape quijare tacutipa eta taquijarera te tíju eta evitarahi. Eta sache, timapicupa taicha eta quijare. ³Témunahiricavapa tiúchuca eta tavasiqueneana eta tsacarana, tayehe eta quijare. Amairipahipa tamutu eta apaquehe. Tajarachapahi eta tayucaraivahi tacutipa eta tayucaraiva eta sáserahi. ⁴Ticatuparacasipa vahi tacunica eta tamuijira eta apaquehe étapa eta tapacajiana eta sucurecana étapa eta yucuquiana. Eta tatuparahahi eta tayucavacayarehi namutu ena achaneana. Nacarichu tacaitica ena ticamarcanahi te nanahuana tayehe eta mamarca ema Viya. ⁵Cincoyarehi caje eta tayereva eta tayucareresirayarehi. Váhisera tépenanáimahi ena achaneana tayucaqueneanayarehi. Tétavicavasera tacativayarehi nasama. Eta tayucaraqui tacutiyarehi eta sáserahi eta tacativayarehi nasama. ⁶Te jena sácheanayare ena achaneana navarahayare ticapacavana. Váhisera tépenanáimahi, tayanapane navarahayare tépenana.

⁷ Etajuca tavasiqueneana tsacarana, nímicutíchapa eta cavayuana te titsecavanahi tayehe eta guerra. Tásiha, te tachuti tacutimahiyaréni ticayehe corona oro. Eta tamira achane-mirayaréni. ⁸ Tiuji eta tachutimaca, tacutiyaréni eta suchutimaca esu esena. Tíñehivaca eta táheana. ⁹ Eta taparuma tacutiyaréni eta fierro muracaquenehi. Vahi táechucaimahi eta isavipe. Eta tárairahi, jtétavicavahi eta tamuracavahi! ¹⁰ Ticaijiquivaca tacutiyaréni eta sáserahi. Etajuca tiyucarahi, cinco cájeyarehi eta tacaitemajirisiravacayare ena achaneana. ¹¹ Mararihivare ema táquenu ema téchahi éta, ema ángeléni tivejiacahi eta táupenaquene pozo. Ema maca ángeléni, eta máijare te náechajiriruva ena hebréoana “Apolión”. Te véchajiriruvana víti, ticaijare “Tijararerahi”.

¹² Títauchavapa eta títapuca ecuñaraqui nímahaquenehi. Jucarihichahavaresera apinachaha eta ecuñaraquiyare.

¹³ Te ticachujapa ema apana ángele, nusamapa eta mahu ema apana te tápusi eta cuátroquene esquina tayehe eta mesa oro eta tíamahi eta mayucuneasa ema Viya, tiáviyahahi te mamirahu éma. ¹⁴ Ticavanairipapa ema ángele ema ticachujahi, ániapa macahe:

—Picaiticapa ena cuátroqueneana ángeleanaini váinarajiana, tiávihanahi te tachacaya eta cajacure Eufrates —macahepa.

¹⁵ Taicha acane ema Viya manerejicaripa eta juca hora eta macaitisirainapa ena cuátroqueneana ángeleanaini, máisapainapa eta nacapasirayarehi camuriqueneana achaneana, ena mapamuriqueneana eta náichapemuriva. Tacahe, téjapucanapa éna. ¹⁶ Tacahe, tiúchujicanapa ena suntaruana ticaperana. Nusamapa eta natupa. Dosciento millone eta náichapemuriva.

¹⁷ Tacahe, eta nímairahi ena ticaperana, tatiarihi eta náicutiara te natupana. Eta táimahiana titsi, azul, tiyacaca. Táíñehiquenehi eta tachuti eta naperana. Tiúchucapaipa eta yucu, eta quijare te tajaca. Azufrepuha eta táepuha. ¹⁸ Camurianahi ena achaneana, ena tacaparuanapahi eta juca mapanaquene ecuñaraqui eta tacuchusirapahi te tajaca: eta yucu, eta quijare, étapa eta azufrepuha. ¹⁹ Énerichuvare tatiarihi eta táijiqui ticutipainehi eta quichare. Tétavicavahi eta táíñehivapahi eta tacaparaqui táuchurepahi te tajaca étapa te táijiqui.

²⁰⁻²¹ Énaserá ena apamuriana achaneana tacaitiruanahi eta ecuñaraqui, váhiquene navarahaimahi náinajica eta náichira eta tamauriqueneana. Váhiquene téneuchavanáimahi. Váhivare náinajicahini eta nacapahivana, eta nahiapemarevana, étapa eta náesenamarevana, étapa eta námeraivana. Váhivare náinajicaimahi eta najirauchira ena éreanana, eta natsiusirahi eta nasiñarajiana náepiyaruanahi oro, plata, bronce, márijahi, yucuqui. Tamutu eta juca mayamuricahivare, váhivare tapaicahini, váhivare tasamarahihini, váhivare táimairicahini.

10

Éma ángele macaratacachi eta ajurecachicha

¹ Tacahe, nímahapa ema apanavare ángele tiúcupaícahi te anuma. Tétavicava eta máíñehiva. Tamuichapahi eta úcaji. Te mápusi, tatiarihipa eta ahe. Eta mamira, tétavicava eta tajararasirahi tacuti eta táimahi eta sache. Eta mapaiqueana tijarahivaca ticutipahi timuruquiapae.

² Téjiacahi eta ajurecachicha eta macaratasirahi te mavahu. Tásiha, eta mapaique vaure mácatayaecahi eta une te mar. Eta étaquiapae sapa tacatayacahi te táijipahi. ³ Tásiha, tipiaracapa muraca, tacuti eta tahu eta tíñehiquenehi sárare. Te títapiricapa, nusama eta nahu ena apamuriana tacutiyaréni eta tirurehuchahi. Siétequenehi eta najicapirahi. ⁴ Te timatinapa, nuvarahapa nájuquenehayarehini. Nusamapasera ema téchajicanuhi te anuma. Máichanupa:

—Vahi picuajucha eta juca pisamaquenehi. Piáñauchayare eta juca. Váhivare picumeta-jirica —máichanupa.

⁵ Tásiha, ema maca ángele nímahaquenehi eta mácatayasirahi eta une étapa eta táijipahi, masuvechapa te anuma eta mavahu vaure. ⁶ Ániapa macahe:

—Tivanecanuhi ema Viya, ema acanevacaquenehi eta máítaresira, ema yátupiquenehi tépiyacahi eta anuma, eta apaquehe, eta mar, étapa tamutu eta tiávihaqueneanahi tayehe. Éma, tivanecanuhi numetaca eta juca máechajiriruvahi: “Tájinapa vaipa tiperemahi eta táítaviraya”. ⁷ Ánaquiaparipahi eta nacametacasivahi ena profetana eta mapaneruana ema Viya. Puítiserá te macachujapa ema téqueneha ángele, titavainapa tamutu eta mapanere-ruanahi —tacahepa eta mametarapíhi ema ángele.

⁸ Tacahe, nusamavarepa eta mahu ema téchajicanuhi tásihaquenehi te anuma. Tivanecanuvarepa nupaucha ema ángele titupihahi tayehe eta une étapa te táijipahi. Ániapa macahe: —Piyana piyaseaca eta ajureca macarataruhi ema ángele —macahepa.

⁹ Tacahe, nuyanapa mayehe ema ángele. Nuyaseacapa eta ajureca. Tásiha, éma máichanupa:

—Júcahi eta ajureca. Piveha, pinica. Títiveyare eta pisamira te pijaca tacutiyare eta mápama. Étasera te piami, tisucareyare pisama —macahepa.

¹⁰ Tacahe, nuvehapa eta ajurecachicha te mavahu ema ángele. Nunicapa. Jéhesaréinehi títivéinehi eta nusamira te nujaca tacutirinehi eta mápama. Téhesera nujiricapa, tisucarepa nusama te nami. ¹¹ Tásiha, nucametacativarepa:

—Píti piápechavaya picametarapiya eta náichararacavayare namutu ena aquenucana te juca apaquehe, énapa ena achaneana ticavasanahi te tamutu avasareana.

11

Éma Viya mavanecainapa ena apinana mavanaranayarehi profetanaya

¹ Tacahe, te nuvapare, tíjaracanuanapa eta ecutiriquí. Tásiha, máichanupa ema Viya:

—Píyanayare tayehe eta Templo te Jerusalén. Picutichaya tamutu eta peti étapa eta canchón. Picutichavare eta náijuchirarehi eta sárareana námavahuqueneana. Tásiha, pitupachayareva áyananahipuca ena achaneana téneuchavarahanahi eta te canchón. ² Váhisera picuicuticha te aneca tamirahuhi eta Templo. Taicha ena apajuecuruhana, nísapaqueneanapa eta návihairaya éna. Nísapainavarepa eta náitahisiraya eta tayereruvanaini eta avasare tacapicahuquenehi Jerusalén. Ichape eta namapachichijisirayare. Cuarenta y dos caje eta náichirayare. ³ Nútisera nuvanecavacainapa ena apinana nuvaneruana profetana. Éna, tiquisamuirihanayarepahi eta namuirihana. Eta juca táicutiarayarehi eta náichuarésirayare náeneuchava ena achaneana. Mil doscientos sesenta sache eta nayerevayare —macahepa.

⁴⁻⁵ Tásiha, nímahapa te anuma te mamirahu ema Viya eta apina yucuqui olivo étapa eta apina candeleroana te mamirahu ema Viya, ema téchahi tamutu eta juca apaquehe. Eta juca táicutiara eta majaneasiravaca ena apinana mavanarana, taicha manererjiruanahi éna, nacametarairuyare eta náeneuchiravayare ena achaneana. Te natiarihinapuca nácani tivarahanayare titupiacana, éna ticatiuchavanayare. Tiúchucayare eta yucu te najaca. Táijuchayare muraca, tacapacayareva ena nánaranayarehi. ⁶ Énerichuvare ena nani, naratahayarevare náichejica eta tiquiva te jena sácheana nacametarairuirayare. Étaripa eta une, náepiyacayare ítiamayare náicha. Nacuchucayareva eta táíñepahiyare nayehe ena achaneana, apanapanenejiyarehi náicha, te jácani navarahaquenyare éna. ⁷ Téhesera te táitauchavapa eta nacametarairuirayare, macanaravacainapa ema Tíñehi Achane Váinarajiquene ticajare Útsutsure. Émaripa ema majupaha ema Satanás. Tásiha, masapihainapa ticaparecayare macapacavacainapa ena apinana mavanarana ema Viya. ⁸⁻⁹ Tásiha, ema Tíñehi Achane Útsutsure vahi máisapaimahi náecara eta náqueheana. Tanasiyarehi te aneca. Tacahe, náimahayare namutu ena achaneana te juca apaquehe. Mapana sache y medio eta nacaheyare te calle eta te avasare. Eta juca avasare, étarichuhi eta macaetatainehi ema Viáquenu. Eta juca avasare, tétavicavahi eta tauravi tacuti eta avasare Sodoma, étapa eta Egipto. ¹⁰ Ena achaneana, natiarihiyare te tamutu avasareana ena tiúrisamureanaya eta náimairaya ena tépenanahi. Ticapiestaranainapa. Tíjaracasichacacanainapa eta námavahuana. Taicha títavanaripa ena nani profetanaini, énaripa ena tíhapapiricanahi eta náichira eta tauriqueneana. ¹¹ Tásihase, te táequenénapa eta mapanaquene sache y medio, macaechepucavacainapa ema Viya. Tichavanainapa títarecanayare. Namutu ena achaneana náimahaya. Ichape eta napsirayare. ¹² Tacahe, ena nani apinana profetana nasamainapa eta mahu ema tíchuhavacahi te anuma. Muraca eta mahu eta máichuiravacahi:

—Yare, íteca, íapana —máichapa.

Tacahe, járajapapa eta úcapi táepanavacapa éna, támapa te anuma. Ena ticanaranahi náimarracaripa eta nayanirahi. ¹³ Enevanepe tiyayacarepa eta apaquehe. Muraca eta tayamurisirahi. Camuri eta pétiana tíquipaicavavacahi. Siete mil eta náichapemuriva ena náepinaqueneanahi. Ena achaneana táemachanahi, tétavicavainehi eta napsirahi. Náimatinumainehi ema Viya. Napiaracapa, nacunachapa eta máitupajijiasiravahi ema Viya tíavivahi te anuma.

¹⁴ Títauchavapa eta juca apinaquene ecuñaraqui. ¡Váhisera tayerequenehaimahi eta mapanaquene ecuñaraqui!

Ticachujapa ema téqueneha ángele

¹⁵ Tacahe, ticachujapa ema téqueneha ángele. Tásiha, ticaemapa muraca te anuma. Ánipa tacahehi eta nahu eta nusamirahi:

—Títauchavapa puiti eta émairayarepa ema Viya técha, ticavanairipiyare namutu ena achaneana te juca apaquehe. Macaejacapa ema Machicha Cristo, máijaracainapa eta mávacureyare. Acanevacainapa eta émairayare techa tamutu —tacahepa eta nahu.

¹⁶ Tacahe, tépuyucanapa ena véinticuatroqueneana víyarahana, ena téjancanahi tayehe eta trono te mamirahu ema Viya. Titsiucapairicanapa, nacunachapa ema Viya. ¹⁷ Tijiranapa, ánipa nacahe:

“Vihasalupayachavi, Tata.

Tétavicavahi eta pítupajijiasiravahi, píturuequeneha tamutu.

Píti pitarihiquenehi te tépanavainapa eta apaquehe.

Pinasirichuhivare puiti eta viyehe.

Puiti péjacapa tayehe eta piávacure ichapequene, pítirayarepa pecha tamutu.

¹⁸ Tétavicavahi eta nasemanevahi ena achaneana eta piyehe.

Muracapanainapasera eta pícuñasiravaca éna.

Puiti ticayaseserehianainapa te pimirahu ena nápenaqueneana.

Jéhesare, picamitiequenehainapa namutu ena ticamitiequenerahianaini te juca apaquehe.

Puiti písríjicavainapa eta nacaemataneasiravihi ena pivanarana ticametarairurahiana eta péchajiriruva.

Puiti píjaracainapa eta náicuchihí ena yátupiqueneanahi

pichichanaveanahi tiámanahi eta píjare:

nácani ichavicana, araitanana, énapa ena amaperuana” nacahepa.

¹⁹ Tacahe, téjiacapa eta tapajacura eta Templo tiávihahi te anuma, mapena ema Viya. Ticaecherapa eta sagrario tacaunaiyahi eta echajirucavana matratuneanahi ema Viya nayehe ena israelítana. Tásiha, enevanepa téramecahi, ticaemapa, tirecapa. Témiricapa eta uverequi timítutupahi. Tiyamuricavarepa eta apaquehe.

12

Máimahavare ema Juan esu esena tínacayarehi étapa eta táíñehiquene sárare ticaijare Serpiente

¹ Nímahavarepa eta apana ecutiarare te anuma. Tiáramicarehi éta. Sutiarihi esu esena. Eta sumuiraha tacutiyaréni eta tajaraiwa eta sache. Te tápecu eta suívapeana tacutiyaréni eta caje. Eta te suyehe corona te suchuti, jararihi tacutiyaréni eta dócequeneana jarairiqui. ² Esu suca esena ticajarihi. Tipiaracahi eta suínasirayarehi. Ichape eta sucatajivairahi.

³ Tásiha, témunahiricavarepa tiúchujica eta táíñehiquene sárare. Ichapequenehivare. Ticaijare Serpiente. Máchaneva ema Satanás. Titsi eta táimahi. Siete eta tachuti. Diez eta taji-huana. Ticayehéhi eta corona eta te tachutiana. ⁴ Eta te táijiqui, táestacapa eta mapamuriana eta táichapemuriva eta jarairiquiana, tacamiricapa te juca apaquehe. Tásiha, titupihapa eta sárare te sumirahu esu esena esu tínacayarehi. Titsecavaipa eta tanisirayarehi eta suchicha.

⁵ Tacahe, ajaira eta suchichahi esu esena. Námavanepasera mayehe ema Viya, te mávihahi te trono. Ema suchicha, aqenucayarehi tayehe tamutu eta avasareana. Macaratayare eta matsucurupa fiéroqui. Váhiqeneyarehi tijapanucareanaimahi nácani náichahi eta tauriqueneana. Muracayarehi eta náicuñanayare ena téjecapavana. ⁶ Tásiha, esu esena tijunavanepa te mávapahi apaquehe eta suávihayarehi maicha ema Viya. Natarihiyarehisera ena ténicanayarehi ésu. Mil doscientos sesenta sácheana eta náitátrayarehi esu esena.

⁷ Tacahe, tiúchujicapa ema Arcángele Miguel énapa ena ángeleana machamuriana. Téhacacanapa nacanarapa eta Serpiente. Énerichuvare natiarihivare ena tayeheanahi ángeleanaini váinarajianahi. ⁸ Apaquehererupasera eta ichapequenehi Serpiente, énapa ena tachamuriana. Tásiha, vaipa máisapa ema Viya nanasihini te anuma. ⁹ Tacahe, ticaquijianapa te juca apaquehe namutu ena ángeleanaini, émapa ena náquenumuríhi Serpiente, ema ticaetemahi acane esu Eva. Émarichuhi ema Váinaraji ticaijarehivare Satanás. Púiticha ticaetemajiricavacahi ena achaneana te juca apaquehe.

¹⁰ Nusamavarepa te anuma eta mahu muraca, ánipa macahe:

—Títauchavapa puiti eta náuchucuirapa ena téhicanahi ema Cristo. Máimererupa ema Viya eta tamutuirahi marataha. Máijaracapa ema machicha Cristo eta émairapa techa tamutu. Taicha ticaquijipa ema Satanás, ema timetauchaparacainíhi me Viya eta náichavaquenévani ena vichamuriana, tamutu sácheana, yátiana. ¹¹ Ena vichamuriana naratahaipa ticatiuchavana mayehe ema Satanás. Vaipa macapaquechavacaimahi éna, taicha yátupi ticasíñavanahi tayehe eta máepenirahi ema Cordero. Énerichuvare náimimaticahahi ena apamuriana achaneana eta máechajiriruvana ema Viya. Éna, vahi napicacavavacahini tayehe eta náitaresira. Tijaracavanahi te náepenirayarehi, vahi návarahahini náinajica eta náehisirahi ema Cordero. ¹² Tétavicavaya eta iúrisamurevaya puiti, emutu eti iávilhanahi tayehe eta juca anuma. Páureanasamisera ena ticavasanaahi te apaquehe étapa eta tiávilhanahi te unte te mar,

taicha emá Váinaraji máucupauchavacaipa. Tétavicava eta masemanevapahi taicha máechahi eta ánipirinehi macaheyare —macahepa emá maca.

¹³ Tacahe, eta Serpiente, eta táimairahi eta tacaquijirahi te anuma, táucupaisiraipa te juca apaquehe, tacamesapa táehicarairica esu esena suínaruhi. ¹⁴ Ésusera ticaijaracasipa eta apina ichapequeneana supavanayarehi tacuti eta tapava eta ichape mátihi. Sumaitasiavayarehi tiara tayehe eta mávapahi apaquehe suáviyaharehi. Ánaqui natiarihiyareva emá téchapajiricanayarehi. Mapana año eta médio eta náenisirayarehi. Eta Serpiente vahi táitecapauchaimahi ésu. ¹⁵ Tásiha, eta Serpiente táhicapa eta une te tajaca, tavarairahi tñahúchava tatiarihi eta cajacure apaesa suéricahini esu esena. ¹⁶ Étaserá eta apaquehe tacatiuchapa esu esena. Téjiacapa eta apaquehe, táerapaicavanepa eta une táhiruamahi eta Serpiente. ¹⁷⁻¹⁸ Tacahe, eta táimairavahi eta Serpiente vahi táratahahini, tavetijipaicha eta tasemirahi suyehé esu esena. Tiyana nayehe emá suchamuriana, énapa apavequeneanahi. Tavarahapa tacapacayarehi emá sucutiqueneanahi tisuapanahi emá Viya, téhicanahivare eta máimiturapiánahi emá Jesucristo.

13

Máimahavare emá Juan eta útsutsure étapa eta sárare tíñehiquene

¹⁻² Te táequepepa eta juca, te nuvapure, nutupihahi tayehe eta playa eta mar. Nímahapa eta útsutsure tíucupaicapahi tásihahi te une. Siete eta tachuti. Dies eta tajihuana. Te tápusi eta tajihuana tatiarihi eta tayehe corona. Eta juca sárare tavasimahiyaréni eta ichini. Táíñehiquenehi eta tajaca. Eta táivapeana tacutiyaréni eta táivape eta aticure. Tásiha, te tachutiana tatiarihi eta ajureca tímijachavahi Viyainahíni. Macunahisera emá achane mapupaha emá Satanás. Eta tacahe, eta Serpiente táijaracapa eta máitupajijiasiravayarehi emá Útsutsure eta macaetemarairavayarehi maratahairayarehi tamutu. Aquenucayare te tamutu avasareana maicha eta Serpiente. ³ Te étana machuti emá Útsutsure, tatiarihi eta majara eta ticapacahi. Tásihasera, tichavahi títareca, tinaracavarepa. Tacahe, eta náimairahi emá achaneana te tamutu avasareana, ichaperinehi eta nárami. Tásiha, náehicapa nasuapapa emá Útsutsure. ⁴ Natsiucavarepa eta Serpiente, taicha eta náimairahi eta táijarasirahi eta máitupajijiasiravahivare emá Útsutsure. Tásiha, nacahepa mayehe:

—Tétavicavahi eta máitupajijiasiravahi emá maca. Nájinvare tiratahaimahi nacanara náquipaica éma —nacahepa.

⁵⁻⁷ Tacahe, emá Viya máisapahi emá Útsutsure téjacahi te mávacure, ichape aquenuca, ticavanairipipa tayehe tamutu avasareana te juca apaquehe. Emá Viya vahi máicuñacavanehini eta masiñavavaisirahi, tímijachavahi Viyainahini. Tíñemahipivaca emá máechajisira, macaechirahi emá Viya étapa eta mapena. Macaechahivare emá tíávihanahi te anuma. Énerichuvare mapanajiricavaca emá machanerana emá Viya. Máimicaratacavacapa, mavarairahi máimicapacavacaya. Cuarenta y dos caje eta macamichirahi emá Viya eta máimiyusemasirahi emá Útsutsure. ⁸ Eta acane te tépanavainapa eta apaquehe, tatiarihi eta libro tíama eta nalista emá títarecanaya te apana vítaresira. Macarataruhi emá nacaparuhi Cordero. Natiarihisera emá apamuriana tájinahi eta nalista tayehe eta libro. Ena nani emá titsiucanahi emá Útsutsure.

⁹ Te evarahapuca ecaicutiara eta juca, tavaraha epanerechaya ichape. ¹⁰ Mácani témeratacayare emá apana, énerichuvare éma te tacaicutiaravaya ticaeratayareva éma apanavare. Mácani ticaparecahi, nacapacayareva éma. Eta tacahe, nácani machanerana emá Viya, tatuparaca nacamichayare tamutu, náimereca yátupina eta náehisirahi emá Viya.

¹¹ Tásiha, nímahavarepa eta apana sárare, táíñehiquenevare. Tíúchujica te amahe apaquehe. Eta juca sárare, macunahi emá achane ticaijare Falso Profeta*. Eta juca, tatiarihihi eta apina eta tajihuana, tacuti eta tajihi eta uvesa. Étaserá eta táechajisira tacutiáhu eta tahu eta Serpiente Satanás. ¹²⁻¹⁴ Énerichuvare emá Falso Profeta májupahahi emá Útsutsure. Muraca eta tasuapacareva eta mavanairipiana emá Útsutsure maicha emá Falso Profeta. Éma, maratahahi tímereca eta tíáramicareana. Maratahahivare macamirica eta yucu tíásihaya te anuma. Námahahi namutu emá achaneana te juca apaquehe. Ichape eta náramirahi. Étavenehi eta juca táimeresirahi eta tíáramicareana, étainapa tivayuacaya emá achaneana, tisuapacarenapa titsiucacarenavarepa emá Útsutsure. Taicha námahahi eta manarasirahi eta majara te tumare; tíápechava títarecahi. Tacahe, emá maca Falso Profeta macavanairipipa náepiyacaya emá máimahi emá Útsutsure, nasiñarajiya. ¹⁵ Emá Viya macamichahi tamutu emá máichaqueneanahi emá Falso Profeta. Vahi máicuñacavánehi

* 13:11 Te pivarahapuca pecha eta apana, pitanuca eta capítulo 16.13.

eta máchanechirahi eta náepiyarui máimahi ema Útsutsure. Téchajicayare máicha. Eta juca nasiñaraji titupajjiacavainapa tivanereca, ánipa tacahe:

—Namutu tatuparacahi natsiucanu núti. Nácani vahi návarahahini titsuicanuhini, ecapacavacayarehi —tacahepa.

¹⁶⁻¹⁷ Tacahe, ema Falso Profeta macavanairipinapa nacamarca te navahu te vaure, te nanahupuca ena achaneana: ena amaperuana, énapa ena ichanaruana, énapa ena ichavicana. Tayanapane ricoanahipuca, páureanahipuca, libreanahipuca, mósoanahipuca. Námayarehi eta máijare ema Útsutsure étapa eta mayehe número. Énerichuvare macavanairipipa vahi nacuisapa nacujachapa eta navacharapiana ena mamarcareana. Ticatajivanainapa eta náiturisirayare eta nacamunuqueneana taicha vahi nacamarcahini. ¹⁸ Tacamunuhi yátupina vipáneréquenehayare maicha ema Viya, apaesa vácaicutiara eta tacayamaquenehi tayumurevahi eta tuparaqui máijare ema Útsutsure eta 666. Éta, tacunahi eta máijare ema maca achane.

14

Eta najirasa ena 144,000 ena téhicanahi ema Cordero

¹⁻³ Tacahe, nímahavarepa eta plaza ticaijarehi “Sántoquenehi Sión”, te mamirahu ema Viya, máejasirahi eta te trono, te návihahi ena cuátroana ecutiarareana énapa ena vénticuatroqueneana víyahana tuparairucana. Nímahavarepa ema Cordero. Te machacaya natiarihini ena 144,000queneana téhicanahi éma. Éna, ticamarcavacahi te nanahuana eta máijare ema Cordero émapa ema Maiya. Nusamavarepa eta muraca ticaemahi te anuma tacutiayaréni eta muraca tírureca. Tásiha, tútsivachavavarepa. Nusamapa ticapununeanahi eta camuriqueneana guitarrana. Tacahe, ena 144,000queneana tijiranahi te mamirahu ema Viya. Arapirui eta najirasahi. Nájina apanaina tíucaina eta najirasahi. Nacarichu tíucanahi ena 144,000queneana. Ena nani náuchucureanahi te namuri ena ticavasani eta juca apaquehe. ⁴ Matapiravareanahi éna te mamirahu ema Cordero. Tájnavare váhiquene náechipejicavahini, navirainahini esu esena túhusi. Náehicahi ema Cordero te jácani mapaisirana. Ena nani, ena náinapureanahi masantuchaqueneanahi ema Viya émapa ema Cordero. ⁵ Tájina náimatyahini eta náepiyahirahihini. Tájinaquene natapiravainahini te mamirahu ema Viya.

Eta nametarapi ena mapanana ángeleana

⁶⁻⁷ Nímahavarepa ema émana ángele tíararairicahi. Ticametarapihi eta téqueneha mametarapi eta máichuarepirahi eta náeneuchiravaina ena achaneana tiávianahi te tamutu avasareana, apaechajiriruvacueneana. Máitavacacainapa eta náitaresiraya nácani ena tisuapanahi. Muraca eta máichuarepirahi, ánipa macahe:

—Éneuchava eta epecaturana. Epicauchayare ema Viya, taicha éma tépiyacahi eta anuma, eta apaquehe, eta mar, étapa eta cáquiureana. Émaina ejiraucha, ecunachaya. Émaina etsiua. Taicha járajapainapa puiti eta máicuñasiraya ena achaneana máeneuchavarahana —macahepa.

⁸ Tacahe, tíuchujicavarepa ema apana ángele. Émapavavare téchajica. Tiáramicare eta macayemaquene. Ánipa macahe:

—Tájnapa táipuina tacamitiaruinapa eta ichapequenehi avasare Babilonia, taicha tétavacavahi eta tamutuirahi taicha eta tamauriqueneana. Tavayuacahi tamutu eta apana avasareana táichiraya eta tamauriqueneana, tacutihi súcani esena suétaviurequenehi eta sutuhusivahi, namutupahi suvayuaca —máichapa.

⁹ Te títipiricapa, émapavavarepa téchajica ema émana ángele, ema namápananehi. Muracavare eta máechajisirahi. Ánivare macahe:

—Tájnavarepa táipuina eta náicuñanayare ena tijirauchanahi ema Útsutsure étapa eta máimahi náepiyarui nasiñarajihini, énaripa ena tiámanahi eta mamarca te nanahuana étapa te navahuana. ¹⁰ Muraca eta nacatajivairaya taicha ichape eta náimiyusemasirahi ema Viya. Ticaepujuquichacasianainapa eta te muracaquene yucu, táetiraráisina eta tamuruira. Muracaquenehi eta nasamira. Táitusiava, natsirihainapa eta máimararasira ema Cordero, énapa ena ángeleana. ¹¹ Máichecuaraquireyare eta nacaicuñairayare. Tájina ticaemahaimahi eta yucu. Támutu sácheana, yátiana nacaheyare te yucu ena tijirauchanahi titsuicanahi ema Útsutsure, tiámanahivare eta mamarca, tacuna eta máijarehi ema nasiñaraji. ¹² Eta tacahe, ena machaneranahi ema Viya, ena tisuapanahi eta mavanairipiana, túmesamureanayare eta náehisiraya ema Jesús, puiti nacamichayarehi tamutu —máichapa ema ángele.

¹³ Tacahe, nusamavarepa ema téchajicanuhi te anuma. Ánipa macahe:

—Piájuchayare eta juca numetaruvianayare: ¡Tétavicava eta náuricacarevaya ena táimica-paruanayare puiti juca vicaijuheyare eta náehisirahi eta Viáquenu! —máichanupa.

Énerichuvare ema Espíritu Santo máichanupa:

—Jéhevare, najacapainapa eta náicuchihí taicha eta nacaemataneasirahi ema Viáquenu. Tájina nácamuñimahi, tinaracanainapa —macahepa.

Eta nacurujisiraya ena ángeleana ena achaneana

¹⁴⁻¹⁶ Te nésenicapa, nímahapa eta tijapu úcaji. Matiarihíhi ema támaquenepahi. Téjacahi éma te úcaji. Achanehi eta máimahi. Te machuti tatiarihíhi eta mayehe corona oro. Németeaca titsecavaipa eta macurujisirayare eta trigo. Tásiha, tiúchucapa ema émana ángele te tajuhe eta Templo. Mapiaracapa muraca ema téjacahi tayehe eta úcaji. Máichapa:

—Puiti piyana. Picurujica namutu ena achaneana manerejiruanahi ema Viya, taicha tiyuriticavapa eta natuparaha. Piputuvahu* —máichapa.

Tacahe, ema téjacahi te úcaji, tijahúchavapa macurujicapa ena náequenereruanahi manerejiruanahi ema Viya. Macuchucavacapa eta te juca apaquehe.

¹⁷ Tásiha, tiúchucavarepa ema apana ángele te tajuhe eta Templo te anuma. Németeaca matsecaripavare eta macurujisirayare, étapa eta uva[†]. ¹⁸ Énerichuvare tiúchucavarepa ema apana ángele eta te mesa tiámahi eta mayucuneasa ema Viya. Éma, téchahi eta yucu. Tacahe, mapiaracapa muraca ema matsecaripa eta macurujisirayare. Máichapa:

—Puiti piyana. Piputuvahu picurujica ena apamuriana achaneana te juca apaquehe. Ticuñacacareanapa ichape, taicha tétavicavahi eta náichirahi eta tamauriqueneana. Vaipa ticuchapacarehini eta náeneuchiravaina[‡] —máichapa ema ángele.

¹⁹ Tacahe, tityanapa ema ángele. Macurujimuríhapa ena achaneana tíchanahi eta tamauriqueneana. Tíñehiquenehi eta náepenirahi taicha títsecapapa eta táíñehiquene ecuñaraqui tiásihahi me Viya taicha eta náimiyusemasirahi éma. Tacajapapahecavacahi éna.

²⁰ Te tachachacu eta viávasa eta tacajapapahesihahi. Tiúchucapa eta náítine, tacuti eta cajacure. Étana metro eta táupenava. Tresciento kilómetro eta táunavayare.

15

Ena siétequeneana ángeleana najacapapa eta siétequene ecuñaraqiana

¹ Tacahe, te nésenicapa te anuma, nímahavarepa eta apana ecutiarare. Tétavicavapa eta táramicarevahi. Natiarihivare ena siétequeneana ángeleana. Tícatuparacasionapa éna eta nacamirisirayarehi eta siétequene ecuñaraqiana te apaquehe. Te táitavapa eta juca ecuñaraqiana, titavainavarepa eta masemanevahi ema Viya.

² Nímaha tativa eta ticutiyaréni táimahi eta une te ichapequene cáquiure. Tétavica-vasera eta tajanunusira tacutihí eta espejo. Tásiha, tacutiyaréni eta yucu eta táimahi. Natiarihivare ena máispavarahanahi najirauchahini natsiuchahipucaini ema Útsure étapa eta máimahi náepiyaruhi, váhivare náisapavahini nacamarcahini eta mamarca. Te tachacaya eta une titupihanahi. Nacaratacachi eta nayeheana guitarrana májjararuana ema Viya. ³ Tijiranahi eta jirasare majirasaini ema víyarahaini Moisés, mavanaraini ema Viya. Najirauchahi ema Cordero. Ani tacahehi eta jirasare:

“Píti ichapequenevihí aquenuca,

Tétavicava eta pítupajijiasirava.

Tamutuquenehi píturuequeneha.

Tétavicavapa eta táramicarevahi eta pépiyaruani.

Tiúricacarehivare eta pinaquipairuanahi.

Vahi apanapanenejinhahini eta péchajiriruvana.

Yátupihí eta piúriva.

Píti aquenucavihí, péchaya tamutu avasareana.

⁴ Namutuhi tipicaviana, piti Tata.

Namutuvare ticunachaviana taicha piti yátupiquenevihí eta pisantuva, nájina nácutivihini.

Titecanayare nácani achaneana te tamutu avasareana.

Tisiucavianayare taicha náimahahi tatupiruvahi tamutu eta píchaqueneanahi”.

⁵⁻⁶ Tásiha, nímahavarepa te anuma téjacahi tamutu eta Templo. Nímahapa tiúchucanahi ena siétequeneana ángeleana te téqueneha cuarto te tajuhe, énaquenehi ena títuparahanahi eta

* **14:14-16** Te pivarahapuca pecha eta apana, pitanuca Mateo 13.24-39, étapa te 24.30,31. † **14:17** Te juca, ema Juan máechajisihahi eta nacurujisirahi eta uva, tahi eta épire. Te jena avasare, eta nayeherepi ena achaneana, nácatayayajica eta uva te raveta, navarairahi nacuchuca eta tachi. ‡ **14:18** Ema ángele máimicutijiricahi eta tíñehiquene ecuñaraqui ticapacayare ena camuriqueneana achaneana étapa eta sárareana. Vuíchahasera étaina eta táequeneha ecuñaraqui.

siétequene ecuñaraqüiana táequenereruyare tiúchujica. Eta namuirihana, amairiha eta lino tñapu tirapeacavaca. Eta náitjuheana ichapemevaca, títecapavaca te natupana. ⁷Tásiha, nímahapa ema émana ecutiarareana nacuatronehi. Máijaracavacapa étasivaca eta escudilla oro ena siétequeneana ángeleana. Te tajuhe eta escudilla támapahi eta táifehiquene ecuñaraqüi tácutiarahi eta masemaneva ema Viya. Éma, acanevacaquenehi eta máitaresira. Máimahapa tamutu eta tamauriqueneanahi náichaqueneanahi ena achaneana. ⁸Tacahe, nímahapa tñahúchavapa eta tajurusirahi eta majaraivahi ema Viya, ema acanevaca eta máitaresirahi. Tétavicavahi eta mapicauchacarevahi taicha eta matumeva, maratahairahi tamutu. Tásiha, nájina tiratahaina tisiapana te Templo, váhivare tímahacarehini eta tapajacura táichavenehi eta tavayuchiravahi eta majaraivahi. Tiámmainucava te táitachavapa eta siétequene ecuñaraqüi táequenereruyarehi námaqueneapahi ena siétequeneana ángeleana.

16

Títauchavapa eta ecuñaraqüiana nacamiruhi ena siétequeneana ángeleana

¹Nusamapa muraca eta mahu ema Viya tásihaquenehi eta téqueneha cuarto náuchusinehi ena siétequeneana ángeleana. Ticavanahianapa éna. Ánipa tacaha eta navanahi:

—Eyanapa ecamirica te apaquehe eta juca siétequene ecuñaraqüi táifehiqueneana tiávihanahi te escudilla taicha eta nusemanevahi —máichapa ema Viya.

²Tacahe, tñyanapa ema tñapuca ángele. Máepusaicapa te apaquehe eta ecuñaraqüi tiávihamahi te escudilla macarataruhi. Tacahe, ena achaneana tiámanahi eta mamarca ema Útsutsure, táichavenehi eta natsiusirahi eta máimahi nasiñarajihí, témunahiricavapa táuchuacavaca éna eta caracha ticajachacarepa tijechevare, tacutiyareni eta espuntiu.

³Ema apana ángele máepusaicavarepa eta macarataruhi tayehe eta mar. Tacahe, eta une tñahúchavapa ítiama, tijecheamapa. Tépenaracanapa tamutu eta sárarechichana ticavasanihi te mar.

⁴Ema apana ángele máepusaicavarepa eta macarataruhi tayehe eta cajacureana, te cáquiureana, etapa te tatavarapiana. Énerichuvare ítiavamarepa. ⁵Nusamavarepa ema máepusaicahi eta juca ecuñaraqüi tayehe eta cajacureana. Macahépa éma:

—Tétavicavapa eta piúriava, piti Tata Vicaiyaquene, eta pícuñasiravacaipa puiti ena ticaviurevanahi. Yátupiquenevihu eta písantuva. Piti pitiarihiquenehi te tépanavainapa, puítiripa pinasirichuhi eta viyehe. ⁶Tícutichavanainapa puiti eta navarahaquenehi térana eta íti ena tépusaicanihi eta náitine ena píchanerana táimicaparuana eta náehisiravihu píti, etapa eta nacametarairuirahi eta péchajiriruva. Puiti píjaracaipa eta náeriyare eta ítiama taicha naviurevanahi éna.

⁷Nusamavarepa eta mahu ema apana tayehe eta mesa tiámahi eta mayucuneasa ema Viya. Ánipa macahe:

—¡Tata Vicaiyaquene, tétavicavapa eta vicunachiravi! Piti, tétavicava eta pítipajijiasirava, píturuequeneha tamutu. Pítupiruvahi eta pícuñasiravacahi ena ticaviurevanahi. Vahi pémetavichahíni —máichapa.

⁸Ema apana ángele máepusaicavarepa eta macarataruhi tayehe eta sache. Tacahe, eta sache tépanavainapa eta tavayuchiravayare tñjare, táijuchirapa eta apaquehe énapa ena achaneana. ⁹Jéhesaréinehi, táetaviuchapa eta táijurevahi. Táijuchavacapa ena achaneana. Váhiquenesera náeneuchavahini, váhivare návarahahini náesenicahini ema Viya. Navayuchaichucha eta nasemanevahi. Nacajachapa ema Viya, ema ticavanairipipa eta ecuñaraqüiana.

¹⁰Ema apana ángele máepusaicavarepa eta macarataruhi te táinahu eta mávasa capital ema Útsutsure, eta máejasihahi. Tacahe, ticutipa timapicupa te návihahi ena majupahana. Vaipa náimatiequenehahíni tájahapuca eta náicharacavaya namutu ena machanerana. Ticapitiquiahechavanapa ena achaneana taicha eta tacativa nasama. ¹¹Tacahe, tisemasamureanapa nacajachapa ema Viya taicha eta tacativahi nasama eta najarana nacarachana. Váhiquenesera téneuchavanámahi mayehe ema Viya. Váhivare náinajicáimahi eta náichira eta tamauriqueneana.

¹²Ema apana ángele máepusaicavarepa eta macarataruhi tayehe eta ichapequene cajacure ticajare Eufates. Tacahe, eta cajacure tiájicupa, apaesa máejereta eta nánucuiraya ena aqenucana tiásihanahi te tñnapaica eta táuchusine sache, énapa ena suntaruana.

¹³Tásiha, nímahavacapa ena mapanaqueneana ticaetemarahanahi: ema Serpiente, ema Útsutsure, émapa ema Falso Profeta. Tiájajacanahi éna. Te najaca, tiúchuchahi eta tavásiyaréni eta varutete. Éreananahi eta júcana, náchanevanahi ena mapanaqueneana. ¹⁴Éna, títipajijiacavanahi tíchanahi eta tiáramicareana tavayuraquianahi nayehe ena aqenucana te tamutu avasareana. Navaraha nacurujicavacayare, énapa ena nayeheana

ejército nasuntaruana apaesa namutu ticanaranaya ema Viya. Tíjuhúchavasera muraca eta máquipapaisiravacainapa éma, taicha tétavicava eta máitupajijiasirava, máituruequeneha tamutu.

¹⁵ (Nutí, tíjuhúchavaya eta nítecapauchiraheyare éti. Váhisera tánecapacaremahi eta nítesira. Eta tacahe, tétavicava eta íuricacarevaya te ecunevahi, machu ímacariana eta nuchimapuraheyare, etsíracarépa.)

¹⁶ Tacahe, ena mapanaqueneana éreanana nacurujicapa ena aquenucana énapa ena nasuntarurana tayehe eta vámahí ticaijare Armagedón te náechajiriruva ena israelítana.

¹⁷ Ena téqueneha ángele nasietenehi máepusaicapa eta mayehe escudilla te anuquehe. Tásiha, nusamapa muraca eta mahu ema Viya tísihahi te trono tayehe eta Templo. Ánipa macahe:

—¡Títauchavapa puiti tamutu! —macahepa.

¹⁸ Tacahe, tíuchucapa eta térameca. Ticaemapa. Tirurecapa. Tiyamuricapa eta apaquehe, muraca eta tayamurisira. Tájina tácuti eta tamuracava nasamasarehini eta acane eta táepaniravahi eta apaquehe. ¹⁹ Te tamutu eta avasareana te juca apaquehe, tíáquipaicavanapa eta pétiana. Tavetijipa eta ichapequene avasare Babilonia. Tíáquipaicavapa tamutu eta pétiana. Mapana eta tájepahi eta apaquehe te tajuhe eta avasare. Taicha ema Viya máechavapa eta naviurevanahi ena tachichanaveana. Máimerecapa éma eta masemanevahi. ¡Tétavicavahi eta tamuracava eta táicuña! ²⁰ Énerichuvare, tamutu eta tíurupuhiana téricapa. Eta céroana témitiequenevarepa. ²¹ Témiricavarepa eta ichapequene uverequiana. Tájínavare tácuti eta táichapeva. Cuatro arroba eta tajitacarevavaca. Tásiha, ena achaneana tise manaichucha, nacajachaichucha ema Viya, taicha tétavicava eta tamuracava eta ecuñaraqui, eta táemirisirahi eta ichape uverequi.

17

Esu esena túhusi téjacahi te tamaiquehe eta apanavare sárare tíñehi

¹ Tásiha, típauchanupa ema émana ángele nasietenehi ena ticaratanahi eta escudillana. Máichanupa:

—Yare, nímechaviyare eta suícuñayare esu esena túhusi, tavayurevahi eta supecaturana. Ésu, tacunahi eta ichapequene avasare te tachaui eta mar. ² Ena aquenucana te juca apaquehe namutuhi súiturucavaca sucachanevaca éna. Suíchuhavare ena suvarahaqueneanahi súiturucavaca tayehe tamutu eta tájiparacana tamauriqueneana —máichanupa.

³ Tacahe, ema Espíritu Santo tímimahanuhi eta mavarahaqueneana tímechanuya ema ángele. Ena ángele tíamanupa tayehe eta mávapahi apaquehe. Ánaqui nímahapa esu esena téjacahi te táinahu eta táíñehiquene sárare, máchanevahi ema Útsutsure. Títsi eta táimahi. Te táquehe, amairiha eta ajureca táimijarechavahi, tímijachavahi Víyainahini. Siete eta tachutiana. Diez eta tajihuana*. ⁴ Esu suca esena, eta táimahi eta sumuiriha mularume étape eta títsi. Tétavicavahi táurinaavavacahi eta suyereruvana, amairiha oro étape eta táurinaqueneana márijahichichana, étape eta tíúrinana perla. Tásiha, te suvahu sucaratacahi eta ichape suéreseri oro. Tíámahi eta tájiparacana pecatuana táíñemahiqueneana suíchaqueneanahi eta suítaresirahi sutuhusivahi. ⁵ Te suchuti, tatiarihíhi eta ajureca eta sujáruihi, tayumurevachuchasera eta tacayemaquenehi: “Eta ichapequene avasare Babilonia, tacachichapa ena túhusiana. Táquenuyare eta tájiparacana táíñemahiqueneana”. ⁶ Nucaicutiarapasera eta suícharacavahi esu esena ticavahahi ésu. Táecavahachahi taicha eta suéirahi eta náitineamaini ena machanerana ema Viya, ena suímicaparuanahi taicha eta náechajisihairahi ema Jesús. Eta nímairahi eta juca, ichaperinehi eta náramesirahi. ⁷ Tacahe, máichanupa ema ángele:

—¿Tájaha tacayema pírameca? Numetacaviyare puiti eta tacayemaquene eta juca pímaquenehi suyehe esu suca esena, étape eta sárare superahi, eta síetequenehi tachuti, eta díesquenehi tajihuana. ⁸ Eta juca sárare pímaquenehi, tanasiqueneripahineni acane, tájinaipahisera puiti. Tíúchujicayarevaresera tásihaya tayehe eta táupenaquene pusu. Ichape eta náramesirayare eta náimairayare ena achaneana, namutu ena tájinahi eta nalistainahini acane te tépanavainapa eta apaquehe, tayehe eta libro tiana eta nalistana ena náitareruanayare. Tatupiruvayaresera eta sárare tépenayare títaequenénapa.

⁹ “Pisamanuchaha. Puiti numetacaviyare eta tacayemaquenehi eta pímaquenehi, te pivarahapuca picacutiaraya. Esu esena tacunahi eta ichapequene avasare. Eta juca síetequene tachuti eta sárare tacunahi eta síetequene cerro távihahi eta avasare. ¹⁰ Tacutiquene eta juca síetequene tachuti eta sárare náicutiaranahi ena síetequeneana aquenucana. Cíncoanapasera ena nájinariipa puiti. Matiarhisera ema émana aquenucaichaha

* 17:3 Te pivarahapuca pecha eta apana, pitanuca eta capítulo 13.1-8.

puiti. Ema apana vuíchaha títicapahi. Téhesera te máitecapapa ema téquenehayare, vaipa tiyeremahi. ¹¹ Étarichuvare eta sárare táitareruinihi acane, tájinaripahisera puiti. Éta, macunahi ema nahóchone ena siétequeneana aquenucana. Te máuchujicapa, majacapa eta návacureana ena siétequeneana aquenucana. Tíjahúchavasera eta máitaviraya.

¹² “Eta pímahaquenehi diésquene tajihuana nacunahi ena apamuriana diésqueneana aquenucanayare. Vuíchahasera ticatuparacasiana. Najacapayaresera eta natuparahanaya ena aquenucanaya eta te návasana. Ánipirichusera nacaheyare eta nacachanerayare eta sárare. ¹³ Ena nani diésqueneana aquenucana tínunana eta napanereru. Náimicatacaya eta sárare eta aquenucairanahi te návasana. ¹⁴ Tacahe, ena nani nacanarainapa ema Cordero. Váhisera náratahaimahi. Máitahacavacayarehi ema Cordero. Taicha éma, yátupiquenehi Rey, Aquenuchavivare. Mavanecahi ena réyeana énapa ena aquenucana. Natiarihiyareva ena macachanequeneanayare éma. Nacanerejiquenehi eta máichuirahi ema Viya. Tásiha, yátupihí eta náehisirahí éma.”

¹⁵⁻¹⁸ Tásiha, máichanuvarepa ema ángele:

—Esu esena túhusi pímahaquenehi, tacunahi eta ichapequene avasare. Sucaetemaqueneanahi suítahacavacahi ena aquenucana te tamutu avasareana. Eta jena mar pímahaquenehi te tachaui eta suéjasihahi esu túhusiquenehi, tacunahi eta náichapemuriva ena achaneana te tamutu avasareana. Eta diésquenehi tajihuana eta sárare pímahaquenehi tacunahi ena diésqueneana aquenucana. Éna, nacatichayare esu túhusi. Téhesera te táequenepa eta juca, náitaracainapa ésu eta sucayehiqueneanaini. Náepachiacainapa. Náquipaicayare tamutu eta supenana. Tásiha, eta náemachayare náijuchainapa te yucu. Eta nacuticacairaya, navaraha náimicataca ema Útsutsure, étpa eta nacamitiequenehaya esu túhusi, vahí tásihahini eta napanereruana éna. Émarichuhi ema Viya tíjaracavacahi eta napanereruanayarehi, náichirayare eta mavarahaquenehi éma —macahepa ema ángele.

18

Eta táquipaisiravahi eta avasare Babilonia

¹ Nímahavarepa ema apana ángele tíucupaicapahi másihahi te anuma. Muraca eta matuparahahi. Mamicachaparinehi eta apaquehe eta majaraivapahi. ² Téchajicapa muraca, ánipa macahe:

—Tájinapa táipuina táquipairuvainapa eta ichapequene avasare Babilonia. Nájina nánasihini nacapenahini ánaqui. Énanecha ticapenanahi ena váinarajiana, étpa eta cáyureana tacajachacarequeneana. ³ Muracaqueneya eta táicuña taicha namutu ena achaneana te avasareana, tétavicavahi eta tavayuasiravacahi eta túhusicare, étanecha nacasamurehi. Énaripa ena aquenucana, énerichuhivare nacahehi éna táemesiavahi. Énerichuvare, ena tíjararecarahiana eta tétacare, tétavicavaipahi eta náurisirahi tarricochavacaipahi eta timitahacavacayare ena apamuriana —macahepa.

⁴ Nusamavarepa te anuma eta mahu ema apana ángele. Ánipa máichanu:

—Eti machaneranahi ema Viya, vahí ecuehica eta napecaturana ena achaneana te juca avasare. Iúchucavanesera, machu tavehahe eta táifehiquene táicuñayare taicha eta napecaturana. ⁵ Taicha tétavicavapa eta táuruquechiravahi eta napecaturana. ¡Ániquehepa! ¡Ema Viya máimarracahi tamutu eta tamaeperajivanahi! ⁶ ¡Puiti eti nuchamuriana ángeleana, ícuñacayare! ¡Íjaracayare muraca eta táitsivayare taicha tavayucana náichahi eta tamauriqueneana ena tachichanaveana eta juca avasare! Cape juca náimicatájivachavacahi ena páureana. Puiti, ichapepanayareva eta íjarasiraya eta nátajivaya. ⁷ ¡Émecharecayare muraca! Ichapena eta nacatajivaira taicha tétavicava eta nájarasiravahi eta nacaetemaraivahi eta napanereruhi: “Tájina níchiravainahini eta návihahi. Núti néchahi. Tájina nácamunuimahi. Vahí nucatajivahini” tacahehi eta napanereruanahi. ⁸ Eta juca napanereruhi naviurevana eta tájjahúchirainapa eta náicuñayare. Técuhanainapa ena tachichanaveanahi eta juca avasare. Ticatisamurevanainapa. Tíjuyare eta napenana, táimijuchavacainapa éna. Tépenaracainapa namutu. Májjahúchahi máicuñacavaca ema Viya, máemereuchirahi eta tamutuirahi marataha —máichanupa ema ángele.

⁹ Natiarihivare ena aquenucana te avasareana, ena tavayuaruanahi eta túhusicare, táimiaquijiaruana eta tavayuasiravacahi. Éna, te námahapa tipusisicapa eta yucu, tíyahanainapa ticatiequenehavanainapa. ¹⁰ Nayererequinainapa eta námarrarasirayare táichavenénahi eta napisirayare eta yucu táicuñayare eta avasare. Tásiha, nacahenapa:

—Páurevisami, piti ichapequene avasare Babilonia. Tíchecuhapa puiti eta tájjahúchiravapa eta pícuña —nacahepa.

¹¹ Énaripa ena comerciánteana tjárarecarahiana eta tájiparacana te avasareana, týahayareva ticatisamurevanaya eta náimairayarehi eta táitavirapa eta avasare. Taicha nájinainapa tiviyechaimahi eta námaqueneasana: ¹² oro, plata, táurinaqueneana márijahichichana, perla, yeréucava táurinaqueneana, seda, apaimamajiqueneana mularumeana, títsimeana; énerichuvare eta náepiyaruana tijapu íápe ticaijare marfil, yucuqui táurinaquene, bronce, fierro, étapa eta mari ticaijare mármol. ¹³ Étaripa eta canela, eta apana táijiyequeneana táhiana yucuqui nasucureana, eta tátoyucuqui incienosare, týiyequeneana brillanteana, perfumeana. Étaripa eta téracareana, eta acéiteana, eta harina te trigo. Étaripa eta sárareana ticavanaracarevaca, eta vuuye, cavayu, burro, énerichuvare eta tinicacareana uvesa, vaca. Étaripa eta carro. Énaripa ena achaneana ticamusuracareana náijararuanyarehi.

¹⁴ Tiápechavavarepa téchajica ema ángele, ánipa maicha eta avasare:

—¡Jéhesare pítitátaji! Títavapa puiti eta picayeheraini eta táurinisiyueneana tinicacareana, tétavicavainehi eta tavayuasiravihi. Énerichuvare títavavarepa eta picayehevaini eta tímahacareana táurinaqueneana pipincanillavainihi —máichapa.

¹⁵ Énerichuvare ena nani tjárarecarahianaini eta juca tájiparacana ichapemuriyueneana tarricuchaqueneanahi eta avasare, nayererequinari eta náimarasirahi eta tacaicuñai-rayarehi eta avasare. Ticatisamurevanaripahi. Týahanaripahi. ¹⁶ Tásiha, nacahepa:

—Páurevisami piti ichapequene avasare. Tétavicavainihi eta piúrinavainihi. Picutinihi esu esena eta táurinava eta sumuirihá lino, mularume, títsi eta tayehejaca eta sumuirihá. Eta piyereruva amairiha oro, táurinaqueneana márijahiana, perla. ¹⁷ ¡Puiti, tétavicavapa eta tájiahúchiravaipa témitiaca tamutu eta pímahaqueneanainisamihí! —nacahepa.

Énerichuvare, namutu ena comandanteana táquenuanahi eta lancha, énapa ena pasajeroana, énapa ena marineroana, énapa ena ticaemataneanahi tayehe eta lánchana te mar, nanasipa namutu te tiyerehi. ¹⁸⁻¹⁹ Eta náimairahi eta taquijarera eta yucu tájjuirahi eta avasare, típiarrecanapa eta nacatieuenehairahi. Týahanapa. Nanachavare eta máteji te nachuti. Tásiha, nacahepa:

—¡Páurevichapucaini! ¡Tamapuruji eta juca ichapequene ni avasare! ¡Tájina apanaina avasarena tácutihini eta juca ichapequenénihi avasare! ¡Títavapa tamutu eta tarricovainehi virrichochiravainihi vimutu viti tímisiapanahi eta táimahaqueneana viyereruusanahi te lánchana tayehe eta juca mar! ¡Puiti tétavicavapa eta tájiahúchiravahi eta táemitiequenerahi tamutu! —nacahepa.

²⁰ Tiápechava téchajicapa ema ángele, ánipa macahe:

—¡Júrisamurecarepa puiti eyehé eti íávihanahi te anuma, étipa eti apóstoleana, étipa eti profetana, emutu eti machaneranahi ema Viya! Taicha máitsirijiequeneharipa puiti ema Viya tamutu eta táemecatajivasirahehi —macahepa.

²¹ Tacahe, tíuchujicapa ema émana ángele, máetaviure eta mamuracava. Manaracuhapa eta ichapequene mari ticheyareme. Máquijicapa te une. Tásiha, macahepa:

—Tacaheyare eta tamuracavaya eta náquipaisiraya eta ichapequene avasare Babilonia. Tájina nátiapacháimahi náimahahini. ²²⁻²³ Tamutu timatina eta te távinihi. Tájina nátiapacháimahi tacasamahuhini eta irimaraquiana te cálleana eta nacapununeraini eta guitarrana, siviure, nacajana, étapa eta nachujana. Nájinavarepa ena ticachujarahianaini. Váipavare ticasamahuhimahi eta piéstana ena araimarahiana. Nájinainavarepa ena ticaemataneanaini eta tinicacareana. Títavainapa tamutu eta ematanecanaini. Étaripa eta tamachauana, tamutupa témitiequenehana. Tamapurujipa eta náituequenehainihi ichape ena comerciánteana, nájarareca eta tasimutuqueneana. Tamapurujivarepa eta tavayuasiravaca eta apamuriana avasareana téhicanahi éta, taicha puiti nájina ticatatajicaimahi eta ichapeni avasare. ²⁴ Eta júcatataji avasare, ticaviurevahi eta nacapasiravacahi namutu ena machaneraini ema Viya te juca apaquehe, énaripa ena profetanaini —macahepa.

19

¹ Te táequene pa eta juca, nusamavarepa eta nahu ena camuriyueneana achaneana tayehe eta anuma. Muraca eta najiraira. Ánipa nacahe:

“¡Aleluyapa puiti!

¡Tétavicavahi eta vicunachiravihi piti Tata!

Eta picatiuchirahavihi, pímercacheta nacapasiravacahi nam eta pítipajijiasiravihi.

² Taicha títauchavapa eta náicuñahi ena ticaviurevana, vahi pémetaviacavacahini eta náemecharahiana ena túhisiyueneana tachichanaveanainihi eta avasare.

Ichape eta navayuareresirainihi ena achaneana te apanana avasareana eta túhiscare.

Puiti pítipa pítsirijiequenehahi eta nacapasirahavihi viti machaneraini”.

³ Tiápechavanavarepa tijirana:
 “¡Aleluyapa puiti, taicha acanevacainapa eta tacaicuñairahi eta juca avasaretataji!” nacahepa.

⁴ Tásiha, ena véinticuatroqueneana víyarahana tuparairucana énapa ena cuátroqueneana ecutiarareana tépuyumurihanapa te mamirahu ema Viya, ema téjacahi te trono. Natsiucapa eta nacunachirahi. Ánipa nacahe:

—¡Amén! ¡Aleluya!

⁵ Tásiha, nusamavarepa eta mahu ema téchajicahi tayehe eta trono. Macahepa:

—Puiti etsiucayarepa ema Viya, emutu eti machanerana, étipa eti amaperuana epicauhiana mayehe —máichapa.

Eta táurinaquene mapiestara ema Cordero

⁶ Nusamavarepa eta nahu ena camuriqueneana achaneana. Tijajacanahi. Tétavicavahi eta tamuracavahi eta najirairahi. Ánipa nacahehi:

“¡Aleluyapa puiti!

Taicha téjacaipa te mávacure ema Viáquenu, tinacuchavapa eta émairapa técha tamutu éma.

Taicha tétavicava eta máitupajijiasirava, tamutuquenehi máituruequeneha.

⁷ ¡Vámutu vicunacha éma!

¡Tétavicava eta viúrisamurevapa puiti!

Taicha títauchavapa puiti eta macurujsirahavipa ema Cordero, tímicitijiricavahi te araimamuhu.

⁸ Viti véhicanahi ema Cordero, tétavicavahi eta vipachinavaipahi máicha, tacutihi súcani araimayare ticaetupirihpa, sucamuirihavivare eta táurinaquene múiriare lino, tijapu tirapepemeca” nacahepa.

(Eta juca lino, táicutirahi eta táurivahi eta víchaqueneana viti véhicanahi ema Viya.)

⁹ Tacahe, máichanupa ema ángele:

—Piájuchayare eta juca: Tétavicavapa eta náuricacareva nácani nacaichuhasiqueneanahi tayehe eta táurinaquene mapiestara ema Cordero.

Tásiha, máichanuvarepa:

—Eta juca nímechaquenéviana, yátupiqueneanahi máechajiririvanahi ema Viya —máichapa.

¹⁰ Tacahe, népuyucapa te máivapechacaya ema ángele. Nuvarahapa nutsiucayarehini. Émasera máichanupa:

—Péhepucachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi títauchanahi eta mavanairipiana ema Jesús. Ema Viya, éma tataparacavihi pitsiucayare. Taicha étirichuhi vicutiqueneana eta vicametairuira eta máechajiriruva ema Jesús —máichanupa.

Ema Jesús, macaperahi eta tijapu cavayu

¹¹⁻¹³ Tacahe, nímahavarepa eta anuma téjiacahi. Tiúchucapa eta cavayu tijapu. Eta máijare “Tímimatirahi me Viya”^{*} ema ticaperapahi éta. Éma, yátupiquene títaurahi; taicha éma, tatupiruva eta mahaquenucavahi. Éma, macatiuchavacahi ena náuriqueneanahi. Énaserá ena tíchanahi eta tamauriqueneana, muraca eta máicuñasiravacahi. Étapa eta macanarairavacahi ena mánarana, vahi macapacavacaimahi ena tájina navivurevaina. Énaserá ena nacaviurevanahi, máitaequenehavacayare. Eta tacahe, eta mamuiriha ticaepapamehi te iti. Eta máuquihana tímuruhevaca tacutiyaereni eta yucu. Te machuti ticayehéhi eta camuriquene coronana. Tatiarivare eta ajureca tíamahi eta apana máijare. Macarichusera ema téchahi eta tacayemaquenehi eta ajureca. ¹⁴ Náehicapahi ena mayeheana ejército, tíásihanahi te anuma. Namutu ticaperavaca eta cavayu tijapu. Eta namuirihana, amairiha eta táurinaquene lino tijapu. ¹⁵ Te majaca ema tínapucapahi, tíúchucapa tavasimahiyaréni eta tacasiriquene espada eta macapasihayare ena mánarana. Macaratacahi eta matsucurupa fiérroqui eta macurujsiravacaya. Mácatayayajcavacayare ena mánarana tacutiyaere eta nácatayayajisirahi eta uva eta nacuchusirahi eta tachi táitvequenehi. Éta tímereuchayarehi eta tamuracavayare eta náicuñaha, taicha tétavicavahi eta náimiyusemasirahi ema Viya ema máitupajijihquenehi, máituruequenehavare tamutu. ¹⁶ Tatiarivare eta ajureca te tacheyarapi eta mayehe capote tépacuchahi eta mapaheana. Eta táechajiriruva eta ajureca, ani tacahehi: “Éma yátupiquenehi Rey, Aquenuchavare. Mavanecahi ena réyena énapa ena aquenucana”.

¹⁷ Nímahavarepa ema ángele titupihahi te tamirahu eta sache. Mapiaracavacapa eta cáyureana tíararaircaráhiana te anuquehe. Ánipa macahe:

* **19:11-13** Te pivarahapuca pecha eta apana, pitanuca eta Juan 1.1-8.

—¡Yare, emutu eti cáyureana, iúrujicava! Enicayare eta táurinisiquene tinicacare máeniruhezare ema Viya.¹⁸ Enicayare eta nácheanaini ena aquenucanaini comandanteanaini, ena ajairanaini tímijachavana túmeana, énapa ena nayeheanaini ejército nasuntaruranainipahi, étapa eta táche eta cavayu naperanaini. ¡Vénicaheyare namutu éna! —macahepa.

¹⁹⁻²⁰ Tacahe, nímahavarepa ema Útsutsure, énapa ena apamuriana majupahana aquenucana te avasareana, énapa ena nayeheana ejércitoana. Matiarihivarehi ema Falso Profeta, ema tímerecaparacainihí eta tiáramareana, mavayuaraquianahi nayehe ena achaneana eta náisapiravayarehi ticamarcana, natsiusirayarehiva eta máimahi ema Útsutsure. Tacahe, namutu ena náurujiruvanahi ticanaranahi ema ticaperahi eta cavayu tijapu énapa ena téhicanahi mayeheapahi ejército. Tacahe, ena ángeleana nacaratapaca ema Útsutsure, émapa ema Falso Profeta. Tásiha, ena apinana náitareruichaha náepujuquichapa tayehe eta tájürequene yucu táetiraraisina eta tamuruira. Éta nacaicuñaiyahi.²¹ Tásiha, ema ticaperahi eta cavayu tijapu, máijahúchapa macapapajicavaca ena suntaruana mánananahi. Eta macaparaquí eta tacasiriquene espada táuchurehi te majaca. Tásiha, járajapapa eta camuriquene cáyureana, tanicapa eta nácheanaini. Tisatuhevacapa.

20

Eta táichavaquenevaya eta mil año

¹ Nímahavarepa ema émana ángele másihapahi eta te anuma. Mámapahi eta ichapepi cadena, étapa eta llave, tacaerataiyayare eta táupenaquene pusu.² Tacahe, ema ángele macaratapaca eta táíñehiquene Serpiente, eta ticaetemarerechahi acane, émarichuhi ema Váinaraji Satanás. Tacahe, ticaitihapa ema Satanás tayehe eta ichapepi cadena. Mil añozare eta macaitihairayare.³ Tacahe, ema ángele máiyaracuhapa éma eta te mávacu pusu táupenaquenehi. Manacapa eta llave, máerataequenehapa. Manacavarepa eta ajureca, ánipa tacahe: “Machu évejiaca eta juca tapaja”. Tayerevayare eta mil año, vahi ticaetema-recaimahi nayehe ena achaneana. Te táequenepasera eta mil año, tiúchujicainavarepa eta ticaetema-recaivarepa, ánipinesera.

⁴⁻⁵ Tacahe, nímahapa ena achaneana náechepureanahi nacaparuanainihí. Éna, táimicaparuanahi eta náehisirahi ema Jesús, étaripa eta nacametarairuirahi eta máechajiriruva ema Viya. Ena nani, vahi náepuyumirauchahini ema Útsutsure, váhivare natsiuchahini eta máimahi nasiñarajihí ena apamuriana achaneana, váhivare návarahahini nacamarachini eta te nanahu étapa te navahu. Ena nani, ena náinapurehi téchepucana te tamirahuichaha eta mil año. Nímahapa eta náejasiraipa te trono, catuparahanapa éna, juéseanaripa. Mil año eta nacatuparahairayare. Énasera ena apamuriana náepenaqueneanapa masupajirairahanainihí, vuichaha téchepucanaimahi. Tiámainucava te táequenénapa eta mil año, napaenumavainapa téchepucanayare.⁶ ¡Tiúricacareanayare ena nani tiápechavanayare títarecana puiti juca! Masantuchainapa ema Viya. Vaipa tiápechavanaimahi tépenana. Vaipa ticaicuñanaimahi eta te tájürequene yucu. Tiyujaracarahanaya mayehe ema Viya, étapa me Cristo. Aquenucarahanayare, taicha ema Cristo májaracainapa eta natuparahanayare. Mil año eta nacatuparahairayare.

⁷ Tásiha, te táequenénapa eta mil año, tiúchucainavarepa ema Satanás tayehe eta macaerataiyahi.⁸ Tépanavainavarepa ticaetema-recaiyare nayehe ena achaneana te tamutu avasareana. Étaripa eta apinaquene avasare ticaijare Gog étapa eta Magog, macaetema-re-sihayare. Mayurucavacainapa eta nacatianasiraya ema Viya. Tásiha, ticurujicacainapa ena nayeheana ejércitoana. Tétavicavainapa eta nasimutuvayare. Vaipa titupachacareana eta nasimutuvahi.⁹ Tacahe, tiyananapa. Ichapecuequeanapaine eta nayanine, taicha eta nasimutuvahi. Nacapayacarehi eta nachayasirayare eta avasare máemunaruinihi ema Viya, návihahi ena machanerana. Émasera ema Viya, enevanepa máitaequenehavacahí. Tiúcupaicapa eta yucu tiásiha te anuma, táijuchavacapa namutu. Nájina tacaemachaquéná.¹⁰ Tásiha, ema Satanás ema tivayurecainihí, nacaratapaca náepujuquichapa tayehe eta tájürequene yucu, táetiraraisina eta tamuruira. Étaripa eta mávihahi ema Útsutsure, émapa ema Falso Profeta. Tásiha nanarasiraimahi. Tamutu sácheana, yátiana eta nacatájivairaya, máichecuaraquireya.

Étapa támahaviyare eta víchaqueneanahi vícaevatainapa tayehe eta víávihayare

¹¹ Nímahavarepa eta ichapequene trono tijapu. Téjacahi ema Viya tayehe. Tétavicavahi eta máramicarevahi. Eta nímarrasirahí éma, némiticapa. Vaipa necha távihapuca návihahi téhepuca anuma, téhepuca apaquehe.¹²⁻¹³ Nímahavarepa namutu ena náepenaqueneanaini: ena amaperuana, énapa ena ichanaruana, énapa ena ichavicana. Taicha tichavanahi eta náchanevana namutu, téchepupujicanahi éna tayehe jácani náepenineanainipahi. Namutu

titupihanahi te mamirahu ema Viya téjacahi te trono. Tásiha, tatiarihi eta libro tiama eta nalistana ena náitareruanaya. Tatiarihivare eta apamuriana libro tacajuiyahi eta náichavaquenevanahi ena achaneana. Ena ángeleana náechajicuhapahi. Nácani náichahi eta tauriqueneana, étpa tivuchahi eta nacayaseserehirayarehi, nacaicuñairayare. Te tivayuchapuca eta napecaturana, muraca eta náicuñayare. ¹⁴⁻¹⁵ Eta nacaicuñaiyahi eta tájirequene yucu, táetiraraisina eta tamuruira. Namutu ena tájinahi eta náijarénahíni tayehe eta libro tiama eta nalista ena náitareruanayare, náepujuquichapa tayehe eta tájirequene yucu, tamutu eta náqueheana étpa eta náchanevana. Máitavacainapa eta nacatajivai-rayare. Máitujanainapa tayehe.

21

Ticasipainapa eta anuma étpa eta apaquehe

¹ Nímahavarepa eta tacasipairipahi, tamuturipahi arairu eta anuma étpa eta apaquehe. Tájinapa eta ichapequene une mar. ² Tásiha, nímahavarepa nútí tuícupaca eta tíurina avasare. Ticajarehi Arairu Jerusalén. Tétavicavahi eta tasantuva, taicha tásihapahi te anuma te mávihahi ema Viya. Tiúrinapahi eta tacaetupirihirahi, tacutihi te ticaetupirihí esu araimayare. ³ Nusamavarepa muraca eta mahu ema ángele, tiásihahi te anuma. Ánipa macahe:

—Puiti, ema Viya macucupaicapa eta mapena te juca apaquehe. Ánina macavasaya. Tiávahácahénapa eti achaneana. Yátupiquenénapa Ecayaqueneya éma. ⁴ Tacahe, ema Viya macamitiasinaheyare eta iyairana. Váipavare épenaimahi. Váipavare ecatisamurevaimahi. Tájinapa ticaiyacahémahi. Váipavare ecatajivaimahi taicha tájinapa tivuchahémahi —macahepa ema ángele.

⁵ Tacahe, nusamavarepa eta mahu ema Viya ánipa macahe:

—Puiti tépanavapa arairu, tamutupa ticaitsiva nicha nútí —macahepa.

Tásiha, máichanuvarepa ema ángele:

—Piájuchayare puiti eta juca, taicha yátupiqueneya eta táicharacavaya. Tamutuyare títauchava. Jéhevare eta tisuapacareana —máichanupa.

⁶ Ánivarepa macahe ema Viya:

—Títauchavapa puiti tamutu eta nupanereruana. Nútira néchahi tamutu eta táepaniravahi eta apaquehe. Nútirichuvare néchahi eta táimiyániravahi tiuri. Puiti nútí nítauchapa tamutu. Eti emaunehi, nútí níjaracaheyare eta máitavacaca une ticaitarecarahi. Tájinapa vahi evachareaimahi. ⁷ Tacutiquene, eti ecamichanahi, ímianavahi eta éhisiranuhi, níjaracaheyare tamutu eta júcana ícuchianayarehi. Nútí ecayaqueneya, taicha nuchichaheyare éti. Nútí néchaheya éti. ⁸ Ticaicuñanayaresera namutu ena tipiturijiana, ena masuapajirairahana, ena máeperajiana, ena ticapahiana, ena túhusiana, ena íámpemareana, ena ticasiñarajiana eta achanemirana, énapa ena tépiyahirahiana. Ticaquijianayare namutu éna tayehe eta náicuchi tájirequene yucu máitavacaca eta tamuruira, táetiraraisina eta tamuruira. Váhiquene tíuchucanaimahi tayehe —macahepa.

Eta arairu avasare Jerusalén

⁹ Tacahe, tipauchanupa ema émana ángele nasietenehi ena ticaratacanahi eta sítequene escudilla tíamapahi eta sítequene ecuñaraquiana táíñehiqueneana. Tásiha, máichanupa:

—Yare. Nímechaviyare eta avasare, návihahi ena machanerana ema Cordero. Tímicutijiricavahi esu araima sucaetupirihiquenehi eta suítauchiravayare —máichanupa.

¹⁰ Tásiha, ema Espiritu Santo tímimahanuhi eta mavarahaquene tímechanuya ema ángele. Ema ángele tíamanupa eta te tápusi eta ichapequene cerro anuquehequene. Tímechanupa eta táucupaisirahi eta avasare Arairu Jerusalén. Tétavicavahi eta tasantuva taicha tásihahi te anuma te mamirahu ema Viya. ¹¹ Eta juca avasare, tétavicavahi eta tajaraivapahi taicha tíamahi eta majaraivahi ema Viya. Eta táimahi eta tajaraivahi tacutiyaeníni eta tajanunusira eta márijahi tijararacahi. ¹² Te tachachacuana eta avasare, tatiarihi eta tacuti yúchama tímítutuche. Anuquehe eta táichapeva. Tatiarihi eta dócequene tapajacurana, távihahi eta ajureca náijare ena dócequeneanaini náchucanaini ena israelítana. Natarihivare ena ángeleana tayehe eta tapajacurana. ¹³ Tatiarihi mapana tapajacura te tinapaica eta táuchusine eta sache. Mapanavare tapajacura te tinapaica eta cajaha. Mapanavare tapajacura te tinapaica eta vana. Tásiha, eta mapanaquenevare te tinapaica eta tasiapine eta sache.

¹⁴ Te apaquehe eta yúchama, tatiarihi eta doce máriméana táejahameruanahi eta yúchama. Támahi eta dócequene náijareana ena apóstoleana mayeaneanahi ema Cordero.

¹⁵ Ema ángele ema téchajicanuhi macaratacachi eta máicitiriqui úruqui, máicitichihayare eta tapajacurana étpa eta yúchamana. ¹⁶ Eta avasare falaru eta táimahi. Eta táunava ticuticacachi eta tajuhe. Dos mil doscientos kilómetro eta táichapeva eta avasare. Ticuticacachi eta

táunava, eta tánuqueva, étapa eta tajuhe. ¹⁷ Máicutichavare eta yúchama. Sesenta y cuatro metro eta tánuqueva.

¹⁸ Eta yúchama amairiha mari jaspe timájumeana. Eta avasare amairiha eta yátupiquene oro. Tijanunucahi tacuti eta cristale eta tajarahivahi. ¹⁹ Eta márameana tachunuspévanahi eta yúchama, tatiarihihi eta táurinaqueneana mari. Eta tinapuca tacayehehi eta mari ticaijare jaspe. Eta apana tacayehehi eta ticaijare zafiro. Eta apana tacayehehi eta ticaijare ágata. Eta apana tacayehehi eta ticaijare esmeralda. ²⁰ Eta apana tacayehehi eta ticaijare ónice. Eta apana tacayehehi eta ticaijare cornalina. Eta apana tacayehehi eta ticaijare crisólito. Eta apana tacayehehi eta ticaijare berilo. Eta apana tacayehehi eta ticaijare topacio. Eta apana tacayehehi eta ticaijare crisoprasa. Eta apana tacayehehi eta ticaijare jacinto. Eta téqueneha tacayehehi eta ticaijare amatista. ²¹ Eta dócequene tapajana tacayehehi eta doce perla. Tayehepachuhi eta tapaja eta étana perla. Eta tinapuca calle, tacayehe eta yátupiquene oro, tijanunucahi tacuti eta cristale eta tajarahivahi.

²² Te jena avasare, tájina nímahani eta Templo nayujarasirarenahini. Tájina tácamunuhini eta nayujarasirareyare taicha matiarhihi ema Viya máitupajijhaquene máituruequenehavare tamutu, émapa ema Cordero. Návaháruhi namutu. ²³ Tacutiquene, vahi tácamunuhini eta sache étaripa eta caje eta tamicauchirainahini eta avasare. Taicha tamicauchahi eta majaraiva ema Viya, émapa ema Cordero. ²⁴⁻²⁶ Tájina táimatiyaimahi ticaerata eta tapajana, taicha tájina timapicuina tayehe, tájinavare yátina. Tásiha, namutu ena achaneana te apanana avasareana macuchucureanahi ema Viya, ichape eta napicauchirayare eta Aairu Jerusalén, ichapevare eta nacunachirayare. Tisuapajirahianayarehi tayehe eta vanairipiana tásihaqueneanahi eta juca mávasa ema Viya. Énerichuvare ena aquenucana te avasareana, ichape eta námavahuanayare me Viya te jena avasare mávihahi éma.

²⁷ Tájina náimatiyaimahi tisiapana ena nachipejiqueneana énaripa ena tícharahiana eta tamaeperajivaqueneana énaripa ena ticaetemarrahiana. Nacarichu tatuparaca tisiapanayare ena tatiarihi eta nájireana tayehe eta libro macarataru ema Cordero, tiama eta nalista ena náitareruanayare.

22

¹ Tásiha, ema ángele tímechanuvarepa eta tapachinaquene cajacure. Tétavicavahi eta tacaitarecaravahi eta tahunera. Tacutiyareni eta cristale eta tajararaesira. Eta táuchusihahi eta mayehe trono ema Viya, émapa ema Cordero. ² Tacahe, tatiarihihi eta yucuquiana, ticaitarecarahi eta tahi. Eta távihahi te enumuhuyipahi eta tinapuca calle, te tachaupahivare eta cajacure. Tásiha, dócehe ticahi te étana año. Cájepachu eta tacahira. Ipurujivare eta tapacaji, tacanaraca ena achaneana te avasareana. ³ Tájinapa tímiapechaimahi tiviuichaimahi ena achaneana ticavasana tayehe eta juca avasare, máejasihahi ema Viya, émapa ema Cordero. Vimutu viti mavanaranahi, máitavacayarehi eta vijirau-chirayarehi, vitsiusirayare. ⁴ Vímaracayare eta mamira tamutu sácheana. Vicamarayare eta májare te vinahu. ⁵ Aquenucahaviyare. Máichecuaraquireya eta vicituparahairayare. Ánaqui tájinapa yátina, tájinainapa eta timapicu. Vaipa vicamunuimahi eta tajaraiva eta sache. Váhivare vicamunuimahi eta vimícahu. Taicha tamicauchayare eta majaraivahi ema Viya.

Tiánehipa eta máitesirayare ema Jesucristo

⁶ Máichanuvarepa ema ángele:

—Eta juca númeruvihí, yátupiqueneya eta táchararacavaya. Tamutuyare títauchava. Jéhevare eta tisuapacareana. Taicha émarichuhi ema Viya tivanecanuhi eta nímításiraví píti. Acane ema Viáquenu máimitucavacahi ena profetana eta mapanereruana. Puiti mavaraha nímechaheyare eti mavaneranahi eta táequenereruhana mapanereruana, tayehe eta tájiahúchirainapa eta táichavaquenevaya. ⁷ Énerichuvare ema Viáquenu máichahehi: “Níjahúchavanénapa nútjapa”.

¡Tétavicava eta náuricacarevaya ena tisuapanahi, napanerequenehairahi eta nímechaviqueneanahi, étaripa eta piájurequeneanahi te juca libro! —macahepa ema ángele.

⁸ Tétavicava eta náramirahi nútí eta nímairahi tamutu eta júcana, nusamirahi nuti Juan. Tásiha, te tamutupa, népyucapa te máivapeana ema ángele ema tímechanuhi eta juca. Nuvarahapa nutsuicayarehini. ⁹ Émasera máichanupa:

—Péchepecachucha. Vahi picutsuicanu. Taicha nútirichuhi picutiquenenuhi mavanaranuhi ema Viya, énapa ena pichamurianahi ena ticametarairuana eta máechajiriruvana ema Viya, énaripa ena tisuapanahi tamutu eta tacajuqueneanahi te juca libro. Éma tatuparacahi pitsuicayare ema Viya —máichanupa.

¹⁰ Énerichuvare máichanuvarepa:

—Vahi picuañaucha. Pimetajirica eta juca pimetacasivanahi eta máechajiriruva ema Viya piájuchaqueneana eta te juca libro, taicha tiánehipa eta táitauchiravayare tamutu eta táichararacavayarehi. ¹¹ Énasea, nácani váinarajianahi, vahi picucamesavaca. Náimiyanavachaha naicha eta navainarajiva. Nácani tíchanahi eta tamauriqueneana, náimiyanavachaha naicha eta tamauriqueneanahi. Nácanisera tíchanahi eta táuriqueneana, tatuparacahi náimiyanavachucha naicha eta táuriqueneana. Nácani matapiravareanahi te mamirahu ema Viya, náimiyanavavare náuri eta mayehe —máichanupa.

¹² Ánivare macahe ema Viáquenu:

—Nútijapavanénapa. Námayarepahi eta nájaracasianayrajiva. Nácani tíchanahi eta tamauriqueneana, náare ena ticaemataneacanuanahi eta náitaresirahi te juca apaquehe. Énerichuvare námayarepahivare eta nayeheanayare ena masupajirairahana. ¹³ Nútira néchahi tamutu te tépanavainapa eta apaquehe. Nútirichuvare néchahi eta táimiyaniravahi tiuri. Puiti nútí nítauchayare tamutu —macahepa.

¹⁴ Tétavicava eta náuricacarevayare nácani tépachinachana eta náchanevana, tacuti te ticasipajihana eta namuirihana. Éna tatuparacahi nanicayarehi eta tahi eta yucuqui ticaitarecarahi. Tatuparacahivare nasiapayare eta Arairu Jerusalén. ¹⁵ Énasea ena masupajirairahanahi vahi títujicavanaimahi tisiapana. Nanasiyare te aneca, énapa ena íapemareana, ena túhusiana, ena ticapahiana, ena ticasinrajiana eta achanemirana, énerichuvare ena tíuricanahi tépiyahirahiana ticaetemarrahiana.

¹⁶ Macahevare ema Viáquenu:

—Nuti Jesús, nuvanecahi ema nuyehe ángele máimicaecherachayarehi tamutu eta juca numetarapiana puiti eyehe eti nuchanerana te avasareana. Núi, yátupinuhi Reyhi ecuchapaquenehi, mavanerunuhivare ema Tata. Tétavicavahi eta nujaraivahi taicha eta aquenucairanuhi ichape —macahepa.

¹⁷ Ema Espíritu Santo énapa ena téhicanahi ema Cordero, tíchuarecana éna:

—Yare, epauchahavi —náichapa.

Énapa nácani tisamanaya eta juca ichuárapi, énerichuvare éna náichuarecavare:

—Yare, epauchahavi —náichapa.

Énapa nácani timauneanayare, náiteca apaesa náera eta une ticaitarerahi. Tájina vahi navacharecaimahi.

¹⁸ Emutu eti esamayare eta juca mametarapiana ema Viya tacajuqueneanahi te juca libro, nuvaraha numetacahe nútí: Nácani navayuyupicayare eta táechajisihaqueneanahi eta juca libro, énerichuvare ema Viya mavayuchinayare eta nacatajivairayare tayehe eta juca ecuñaraquianayare táechajisihaqueneanahi. ¹⁹ Énerichuvare ecaunechava eta íañauchira eta táechajisihaqueneanahi te juca libro, machu máñauchahe ema Viya eta esiapira eta juca mávasa sántoquenehi, machu vahi macuenicahé eta tahi eta yucuquiána ticaitarecarahiana, étaripa nímahaqueneanahi nájurequeneana te juca libro.

²⁰ Émarichu ema Viáquenu títametacahi tamutu eta júcana. Énerichuvare máichahehi:

—Yátupi nútijapavaneyare —macahehi.

¡Jéheyavapuca, Tata Jesús! ¡Pítecavanepaini! Amén.

²¹ Ani táichecuiya eta juca nájurehi. Nuyaseuchaeparaca emutu éti me Viáquenu Jesucristo, táetaviuchahini eta íuricacarevaya máicha.